


Testament Cobə de'en choe' dižə' ɕhe ancho

Jesocristán'



New Testament in Zapotec, Yatzachi (MX:zav:Zapotec,
Yatzachi)

**Testament Cobə de'en choe' dižə' che ancho
Jesocristən'
New Testament in Zapotec, Yatzachi (MX:zav:Zapotec,
Yatzachi)**

copyright © 1971 Wycliffe Bible Translators, Inc.

Language: Zapotec, Yatzachi

Translation by: Wycliffe Bible Translators, Inc.

Zapoteco, Yatzachi [zav], Mexico

Copyright Information

© 1971, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Yatzachi

© 1971, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 22 Feb 2024 from source files dated 29 Jan 2022
d439ce34-67af-5db7-b82c-f44ad9932db2

Contents

SAN MATEO	1
SAN MARCOS	62
SAN LUCAS	99
SAN JUAN	159
HECHOS	202
ROMANOS	259
1 CORINTOS	286
2 CORINTOS	314
GÁLATAS	331
EFESIOS	341
FILIPENSES	350
COLOSENSES	357
1 TESALONICENSES	363
2 TESALONICENSES	369
1 TIMOTEO	372
2 TIMOTEO	380
TITO	386
FILEMÓN	390
HEBREOS	392
SANTIAGO	413
1 PEDRO	421
2 PEDRO	429
1 JUAN	434
2 JUAN	441
3 JUAN	442
JUDAS	443
APOCALIPSIS	446

Dižə' Güen Dižə' Cobə De'en Bzoj Sam Mtion'

Ķaxta'o Jesocristən'

¹ Nga cho'en dižə' che de'e ƣaxta'o Jesocristən' dezd gan' gwɣete dia che'enə'. Na' nyoj la yoguə'ate de'e ƣaxta'ogü'e' ca' gwzolaozən len de'e ƣaxta'ocho Abraannə' xte n'a'a. Jeso'osən' naque' xi'in dia che de'e Rei Dabin', na' de'e Dabin' naque' xi'in dia che de'e Abraannə'.

² Abraannə' naque' ƣa Isaac, na' Isaaquən' naque' ƣa Jacob, na' Jacobən' naque' ƣa Joda len beŋə' biše'e ca' yelə'. ³ Jodan' na' Tamar zjənaque' ƣaxna' Fares na' Sara. Na' Faresən' naque' ƣa Esrom, na' Esronnə' naque' ƣa Aram. ⁴ Arannə' naque' ƣa Aminadab, na' Aminadabən' naque' ƣa Naason, na' Naasonnə' naque' ƣa Salmon. ⁵ Salmonnə' na' Raab zjənaque' ƣaxna' Boos. Na' Boosən' na' Rot zjənaque' ƣaxna' Obed. Na' Obedən' naque' ƣa Isai. ⁶ Na' Isain' naque' ƣa Rei Dabin', na' Rei Dabin' naque' ƣa Salomon. Na' xna' Salomonnə' goque' xo'olə de'e Orias antslə ze'e yeca'a Rei Dabin' le' par gaque' xo'ole'.

⁷ Na' Salomonnə' naque' ƣa Roboam, na' Roboannə' naque' ƣa Abias, na' Abiasən' naque' ƣa Asa. ⁸ Na' Asan' naque' ƣa Josafat, na' Josafatən' naque' ƣa Joram, na' Jorannə' naque' ƣa Osias. ⁹ Na' Osiasən' naque' ƣa Jotam, na' Jotannə' naque' ƣa Acas, na' Acasən' naque' ƣa Esequias. ¹⁰ Na' Esequiasən' naque' ƣa Manases, na' Manasesən' naque' ƣa Amon, na' Amonnə' naque' ƣa Josias. ¹¹ Josiasən' naque' ƣa Jeconias na' biše'e ca'. Beŋə' ca' gwnits' ca' tyempən' catə' beŋə' Babilonia ca' besyə'əche'eƣaxje' de'e ƣaxta'o chio'o beŋə' Izrael Babilonian'.

¹² Gwde besyə'əche'eƣaxje' lega'aque' Babilonian', goljə Salatiel xi'in Jeconiasən'. Na' Salatielən' naque' ƣa Sorobabel. ¹³ Na' Sorobabelən' naque' ƣa Abiod, na' Abiodən' naque' ƣa Eliaquim. Na' Eliaquinnə' naque' ƣa Asor. ¹⁴ Asorən' naque' ƣa Sadoc, na' Sadoquən' naque' ƣa Aquim. Aquinnə' naque' ƣa Eliod. ¹⁵ Na' Eliodən' naque' ƣa Eleasar, na' Eleasarən' naque' ƣa Matan. Na' Matannə' naque' ƣa Jacob. ¹⁶ Nach Jacobən' naque' ƣa Jwse ben' naquə be'en che Marian'. Na' Marian' naque' xna' Jeso'os ben' nzi' Crist, zeje dižə' ben' gwlej Diozən' par gaquəlene' beŋəchən'.

¹⁷ Na' tyemp che de'e Abraannə' xte tyemp che de'e Dabin' goc žda' dia che'enə'. Na' goszolaon tyemp che de'e Dabin' xte catə'ən beŋə' Babilonia ca' besyə'əche'eƣaxje' de'e ƣaxta'o chio'o beŋə' Izrael Babilonian' gozac yežda' dia che'enə'. Na' leczə dezd tyemp catə'ən besyə'əche'eƣaxje' lega'aque' Babilonian' xte catə'ən bžin žan' goljə Cristən' gozac yežda' dia che'enə'.

Catə' goljə Jeso'osən'

¹⁸ Na' quingan' goquə catə'ən goljə Jesocristən'. Banaquən gwšagna' Marian' len Jwsen', na' ze'e ca'a Jwsen' le' par gaque' xo'ole', gwsa'acbe'ine' banoa' Marian' bdao'. Goc ca' chedə' Spirit che Diozən' beŋən par niç bgüendao' bda'onə' lo'o le'enə'. ¹⁹ Na' Jwsen' ben' banaquən si'e Marian' par gaque' xo'ole', goque' to beŋə' chon de'e güen lao Diozən'. De'e na'anə' bene' xbab cuejychje' Marian' šizizə sin cui no gache'i par niç cui əgws'i'e le' zto'. ²⁰ Žlac chone' xbab gone' ca', to angl che ƣancho Diozən' blo'elaogü'e'e le' lao bišgal. Na' gože'ene': —Jwse, le' naco' xi'in dia che de'e Dabin'. Bito žebo' si'o Marian' par gaque' xo'olo'. Spirit che Diozən' beŋən par niç no'e bda'onə'. ²¹ Na' sane'

to bi'i byo, na' əgws'i'o labo' Jeso'os chedə' yebeje' beṇə' gwlaž chele ca' xni'a de'e malən' beṇə' se'ejle' che'.

²² Na' de'en goquə yoguə' de'e ca' goc complir can' gwna Diozən' de'en bzoj to profet beṇə' be' xtižə' Diozən' cana', gwne':

²³ To no'ol güego' beṇə' nenaplažə'achgua cuine' güe'e to bi'i byo dao' na' sane'ebo'.

Na' si' labo' Emanuel.

Na' Emanuel zeje dižə': Zoczə Diozən' len chio'o.

²⁴ Na' catə' heban Jwsen' beyož gwneine' yelən' ca', beteyo bene' can' gož angl che Xancho Diozən' le'. Jəxi'e Marian' liže'enə' par goque' xo'ole'. ²⁵ Pero Jwsen' gwdapəcze' le' respet xte catə'an gwthane' to bi'i byo dao', xi'ine' nech. Na' gwxi' labo' Jeso'os.

2

Magos ca' jəsə'aləne'e Jeso'osən'

¹ Ca tyemp can' gwnabia' Rei Erodən', goljə Jeso'osən' Belennə', to yež gan' mbane Jodean'. Na' goquən' besə'əžin to chopə magos Jerosalennə', beṇə' za'ac galən' chla' bgüižən'. ² Na' gosə'əṇabene' beṇə' lao' syodan' gwse'e: —žGan' rei che beṇə' Izrael ca', be'en bagoljənə'? Nežeto' bagolje'enə' chedə' bable'ito' beljw che'enə' catə'an bla'an lažto'onə' galən' chla' bgüižən'. Na' za'ato' par niç güe'ela'oto'one'.

³ Catə' bene Rei Erodən' xtižə'əga'aque'enə', de'e juisy de'e goquene', na' leczə ca' yoguə'əloj beṇə' lao' syoda Jerosalennə'. ⁴ Nach btob Rei Erodən' yoguə'əloj bxož əblao che chio'o beṇə' Izrael na' leczə yoguə' beṇə' ca' choso'osed choso'olo'i lei de'en bzoj de'e Moizežən', con beṇə' nita' syodan'. Na' gwṇabene' lega'aque' gan' naquən galjə Cristən' ben' gwlej Diozən' par gaquəlene' nasyon chechon'. ⁵ Nach gwse' beṇə' ca' Erodən': —Belen nan' galje', gan' mbane Jodea, la' can' na to part Xtižə' Diozən' de'en bzoj to profet beṇə' be' xtiže'enə' cana'. Quinga nan:

⁶ Ca naquə yež Belen gan' mbane Jodea,

naquəczən yež de'e zaquə'achgua entr yež əblao ca' de'en zjəchi' Jodean', chedə' to beṇə' Belennə' gague' beṇə' gwnabia', na' le' əggüia əgwy'e' chio'o beṇə' Izrael.

⁷ Nach Erodən' bene' mendad ja'ac magos ca' laogüe'enə' bgašə'əzə par niç gwṇabene' lega'aque' tcho'a tšao' batə'əquən' besə'əle'ine' bla' beljon'. ⁸ Nach bsele'e lega'aque' Belennə', gože' lega'aque': —Le'e žja'ac Belennə' na' le'e žjəyediljyožə bida'onə'. Na' catə' yeželebo' na' deyedixjue'ile nada' par niç leczə ša'a əžje'ela'ogua'abo'.

⁹ Beyož boso'ozenag magos ca' can' gož rein' lega'aque', nach gwsa'aque' əzja'aque'. Na' ca naquə beljon' de'en besə'əle'ine' gan' chla' bgüižən' catə' cuiṇə' sa'ac lažga'aque'enə', zdan le'e yoban' žialaon laoga'aque'enə' bžinten gwzon gan' zo bida'onə', na' gwležən'. ¹⁰ Na' besyə'əbeine' xte juisy ca de'en besə'əle'ine' beljon' de'e yoblə. ¹¹ Nach catə' gwso'e lo'o yo'onə' na' besə'əle'ine' bida'onə' len xna'abo' Marian'. Nach bosə'əzo xibga'aque' gwso'elaogüe'ebo'. Na' bosə'əsaljo caj chega'aque' ca' na' gosə'əbeje' or, yal na' to xnižə' yag de'en chla' zix de'en ne' mirra par gwso'ebo'on. ¹² Pero na' Diozən' gwdixjue'ine' magos ca' lao bišgal de que hito yesyə'ədie' gan' zo Rei Erodən'. De'e na'anə' besyə'əque'e yetolə nez par jəya'aque' lažga'aque'enə'.

Jwsen' len Marian' na' len Jeso'osən' ja'aque' Egipton'

13 Na' cata' babesa'ac magos ca', to angl che Xancho Diozən' bloe' laogüe' Jwsen' lao bišgal, na' gože'ene': —Gwyas, gwche' bida'onə' na' xna'abo'onə' le'e žja'ac Egipton' na' sole xte catə'ačənia' le'e batə'aquə' gwaquə yesa'acle, čhedə' Erodən' banž'i'e bia' yeyilje' bida'onə' par gote'ebə'.

14 Nach nencal gwyas Jwsen', gwche'e bida'onə' len xna'abo'onə' zja'aque' Egipton'. 15 Nach gwnite'e Egipto na'azə xte catə'ačə got Erodən'. Na' de'en gwsə'one' ca' goc complir de'en bzoj to profet beṇə' be' xtižə' Diozən' cana'. Quinga bzoje' de'en gwna Xancho Diozən': "Čixjue'ida' Xi'ina'anə' yeze'e Egipton'."

Erodən' bsele'e soldad par gwsə'ote' yoguə' bi'i byo dao'

16 Na' lao bazja'aque' Egipton' Erodən' lechgualə bžejene' catə' gocbe'ine' gosə'əxoayag magos ca' le' de'en cuich besyə'adie' gan' zo'enə'. Na' segon can' gwyejni'ine' catə' gwṇabene' lega'aque' antslə do batə'aquən' bla' beljən', bsele'e soldad che' ca' par jse'ete' yoguə'ələl bi'i byo che'en' dao' zeləo bi'i čpəz ize, bi'i ca' gwsa'aljə Belennə' na' yeziquə'əchlə yež ca' zjənyechj zjəmbi'i Belennə'.

17 Na' laogüe de'en gwsə'ote' bi'i byo dao' ca', goc complir can' bzoj de'e profet Jeremiasən', ben' be' xtižə' Diozən' cana', gwne':

18 Gaquə bgüine bgüəžən' yež de'en nzi' Rama. No'ol ca' zjənaquə xi'in dia che de'e Raquelən' lechgualə yesyə'əyašə' yesyə'əgüinläže'e che yoguə' xi'in da'oga'aque' ca' əsa'at. Na' bito se'enene' par no yeyə'exen lega'aque'.

19 Lao ne'e nitə' Jwse ca' Egipton' got Erodən'. Nach to angl che Xancho Diozən' bloe' laogüe' Jwsen' lao bišgal. 20 Na' gože'ene': —Gwyas, beče' bida'onə' len xna'abo'onə' na' le'e žjəya'ac Izraelən'. Bagwsa'at beṇə' ca' besyə'əyilj bida'onə' par so'ote'ebə'.

21 Nach gwyas Jwsen' beče'e bida'onə' len xna'abo'onə' jəya'aque' lažga'aque' Izraelən'. 22 Pero Jwsen' catə' benene' de que Arquelaon' bedie' belane' xlatjə de'e xə' Erodən', bžebe' žjəya'aque' gan' mbane Jodean'. Na' Diozən' gwđixjue'ine' le' lao bišgalən' de que bito žjəya'aque' Jodean' sino que žjəya'aque' gan' mbane Galilean'. 23 De'e na'anə' besyə'əžine' syoda Nasaretən' na' jəsyə'ənite'e. Na' de'en jəsyə'ənite'e Nasaretən' goc complir de'en bosə'ozəj de'e profet ca' cana' gosə'əne' che Jesə'osən' de que beṇə' yesə'əsi'ene' beṇə' Nasaret.

3

Juan ben' bčhoa beṇə' nis gwđixjui'e dižə' güen dižə' cobə che Diozən'

1 Na' gwde zan iz, Juan ben' bčhoa beṇə' nis gwyeye' latjə dašən' gan' mbane Jodean'. 2 Na' gwđixjue'ine' beṇə' gože' lega'aque': —Le'e yedinje xtolə'əle ca', čhedə' babžin ža catə' Diozən' ben' zo yoban' nabi'e con notə'ətezə beṇə' əso'e latjə.

3 De'e profet Isaiazən' ben' be' xtižə' Diozən' cana' bzoje' che Juannə', gwne': To beṇə' əne' zižjo latjə dašən', əne':

"Le'e so probnid par əgwzenagle che Xančon' catə'an yide'.

Na' šə sole probnid par əgwzenagle che' catə'an yide', de'en gonle ca' gwxaquə'əleben can' čonle čxi' čhloale nez ca' catə' čhidə to beṇə' blaə."

4 Na' Juannə' gwyaze' lachə' de'en gwsə'one' len yišə' xa cameyən'. Na' par dobey che' bchine' to pedas yid. Na' gwdaogüe' bišə'əzo, na' leczə gwdaogüe' ši'in bia ser, bia nitə' yixə'. 5 Beṇə' Jerosalennə', na' beṇə' ca' ža' yoguə' yež ca' gan' mbane Jodean', na' leczə beṇə' ža' yež ca' nychj mbi'i yao

Jordannə' gwsa'aque' ja'aque' gan' zo Juannə' par bosozenague' xtiže'enə'.
 6 Na' bosə'əxoadole'e lao Diozən', na' Juannə' bchoe' lega'aque' nis lo'o yao Jordannə'.

7 Na' leczə ja'ac zan benə' Izrael benə' ca' zjanchoj zjənzi' fariseo, na' benə' ca' zjənzi' sadoseo. Ja'aque' par bchoa Juannə' lega'aque' nis, Nach Juannə' gože' lega'aque': —Le'e nacle benə' goxoayag na' naljele. zEchaquele de que gwaquə yexonjele castigon' de'en əselə' Diozən' par le'e? 8 Cheyalə' gonle de'en naquə güen par niç əsa'ache'i benə' yoblə de que baboša' yichjla'ažda'olen'. 9 Na' bito gonle xbab de que Diozən' bito gone' le'e castigw che xtolə'əlen' laogüe de'en nacle xi'in dia che de'e Abraannə'. Bito nacho de que lechgwale chyažje Diozən' le'e. Gwaquə gone' par niç yej quinga yesyə'ayaquən xi'in dia che de'e Abraannə'. 10 Ca naquə le'e šə cui chonle can' chazlažə' Diozən', gwxaquə'əlebele ca to yag frot de'e cui bi frot chbian. Na' ca naquə yoguə'əte yag frot de'e cui bi frot chon, chəsə'əchog benə' len na' chəsə'əzeye'en. 11 Na' ca naquə le'e chediñjele xtolə'əle ca', nada' de'e li chcho'a le'e nis. Na' ze'e yidə ben' gon par niç so Spirit che Diozən' lo'o yichjla'ažda'ochon' na' nabi'an chio'o. Na' Spiritən' naquən ca yi' na' gwxi' gwloan yichjla'ažda'ochon' len bitə'ətezə de'e mal. Ben' yidə zaquə'ache' ca nada' na' bito zaca'a par gaca' xmoše'. 12 Be'enan' gone' len chio'o can' choncho catə' chdecho trigon' rner, na' chzeycho yix bebən'. Na' šə chonlilažə'əcho Diozən', yotobe' chio'o par niç socho txen len le', na' benə' ca' cui chso'onlilažə' le', əsele'e lega'aque' lao yi' gabilən' de'en cuiczə cheyol.

Catə' gwchoa Jeso'osən' nis

13 Na' gwza' Jeso'osən' gan' mbane Galilean' na' gwyeye' gan' zo Juannə' cho'a yao Jordannə' par niç Juannə' bchoe' le' nis. 14 Na' Juannə' benczə yichjlaogüe' caguə gone'ene' gwchoe' Jeso'osən' nis. Gože'ene': —Chyažjlada' əgwcho' nada' nisən' na' nadə'əlan' zedenabdo' gwchoa' le' nisən'.

15 Nach Jeso'osən' gože' Juannə': —Gone'e bchoa nada' nisən'. Cheyalə' goncho ca' par niç gaquə complir yoguə'əlol de'en non Diozən' mendad gaquə.

Nach gwcheb Juannə' bcho'ene' nisən'. 16 Na' catə' beyož gwchoa Jeso'osən' nisən', le'e bechojte' lo'o nisən', na' le'e byaljtwe le'e yobana' na' ble'i Jeso'osən' gan' zo Diozən'. Ble'ine' Spirit che Diozən' betjən ca to ngolbexə na' bžinən gwzən len le'. 17 Na' gwsə'ene' gwna Diozən' ben' zo yoban': —Bengan' Xi'ina', ben' chacda' chei, lechgwale cheba chezaquə'əlažə'a le'.

4

Gwlo'oyelə' gwxiye'enə' Jeso'osən' gone' de'e mal

1 Na' Spirit che Diozən' benən par niç gwyey Jeso'osən' latjə dašən', par niç gwlo'oyelə' gwxiye'enə' le' gone' de'e malən'.

2 Na' bitobi gwdao Jeso'osən' lao choa ža choa yel, na' catə' gwde de'e choa žanə' gwdone'. 3 Na' gwxiye'enə' bgüiguə'an gan' zo Jeso'osən', gožə'an le': —Šə len' naco' Xi'in Diozən', gož yej quinga yesyə'ayaquən yetxtil.

4 Nach gož Jeso'osən' len: —Nyojczə Xtižə' Diozən' nan: “Caguə yelə' guao na'azən' əbane chio'o benəç sino leczə chyažjecho yoguə'əlol dižə' de'en na Diozən' par əbancho.”

5 Na' gwche' gwxiye'enə' le' yichjo' yo'odao' əblao che chio'o benə' Izrael de'en zo Jerosalennə' na' gwlequən le' gan' le'ezelaogüe naquə sibə. 6 Na' gožən

le': —Ša len' naco' Xi'in Diozən' bexitə' nga par che'elə, la' nyojczən le'e Xtižə' Diozən' nan:

Eselə' Diozən' angl che' ca' par əsa'aclene' le', na' əso'oxe'e le' par niç bito əchego'o no yej.

7 Na' gož Jeso'osən' gwxiye'enə': —Leczə can' nyojən le'e Xtižə' Diozən', nan: “Bito con goncho Xancho Diozən' prueb šə leine' can' ne'enə.”

8 Na' gwxiye'enə' gozche'en le' to lao ya'a de'e naquə lechguale sibə, na' blo'in le' yoguə nasyon de'en zjəchi' lao yežlyon' ca' naquə dechgua yelə' chnabia' čhega'aquənnə'. 9 Nach gožən le': —Yoguə' de'e quinga chle'ido' nga gona'an le' šə gwzo xibo' laogua' nga par güe'elaogo'o nada'.

10 Nach gož Jeso'osən' len: —Gwchi'izə' ca'alə nga Satanas. Nyojczən le'e Xtižə' Diozən' nan: “Cheyalə' šejni'alažə'əcho tozə Xancho Diozən' na' tozə le' güe'ela'ocho.”

11 Na' bebi'izə' gwxiye'enə len le', nach besə'əžin balə angl ca' jse'eclene'ene'.

Jeso'osən' gwzolaogüe' chyixjui'e dižə' güen dižə' cobə che Diozən'

12 Na' Jeso'osən' gwze'e Jodean' par gwyeje' Galilean' catə' benene' de que bade Juannə' ližyan'. 13 Na' gwze'e Nasaretən' jsoe' syoda Capernaum de'en chi' cho'a nisdə'onə' do gan' chi' distrit de'en nzi' Sabolon na' Neftali. 14 Na' de'en jəyzeoe' syodan' goc complir can' bzoj de'e profet Isaiazən', ben' be'e Xtižə' Diozən' cana' gan' nan:

15 Le'e gwzenag, le'e beņə' Galilea, le'e cui nacle beņə' Izrael, na' nita'əle distrit Sabolon na' Neftali de'en mbane yeš'la'alə nisdə'onə' na' yao Jordannə'.

16 Nchoł yichjla'ažda'olen' pero Diozən' əsele'e to beņə' cue'e be'eni' xen lo'o yichjla'ažda'olen'.

Nacle ca beņə' guat len yichjla'ažda'olen' por ni che de'e malən' chonle, pero be'enə' əselə' Diozən' yocobe' yichjla'ažda'olen'.

17 Na' dezd tyemp na', Jeso'osən' gwzolao gwdixjui'e gwne': —Le'e yedinje xtolə'alen', čheda' babžin ža năbia' Dioz ben' zo yoban' con notə'ətezə beņə' əso'e latjə.

Jeso'osən' gwleje' tap beņə' gwxcn bel par gwsa'aque' disipl che'

18 Na' goquan' lao zda Jeso'osən' cho'a Nisdəo' Galilean' ble'ine' čhopə beņə' gwxcn bel, choso'ozale'e yixjw bel čhega'aque'enə' lo'o nisən'. Zjənaquə čhopə biše'e. Toe' le' Simon Bed, na' yetoe' Ndrəs. 19 Nach gože' lega'aque': —Le'e da len nada'. Le'e nacle beņə' gwxcn bel, na' na'a əgwzejni'ida' le'e par niç gonle ca so'ombia' beņə' nada'.

20 Na' le'e gosə'əbejyichjtega'aque' yixjw bel čhega'aque' ca' nach ja'aclene' Jeso'osən'.

21 Nach gwsa'aque' yelata' na' jəsyə'adi'e Jacob len Juan čhopə biše'e, len xaga'aque' Sebedeo. Že'e to lo'o barcw chesyə'əyone' yixjw bel čhega'aque'enə'. Na' leczə gwṇabe Jeso'osən' Jacobən' len Juannə' par žja'aclene' le'. 22 Na' le'e bosyo'ocua'anlentie' xaga'aque' Sebedeon' barcon' na' ja'aclene' Jeso'osən'.

Jeso'osən' bsd blo'ine' beņə' zan

23 Na' gozac cata' Jeso'osən' gwyeje' yoguə' yež ca' zjəchi' gan' mbane Galilean', gwzolaogüe' bsd blo'ine' beņə' ca' zjəža' lo'o yo'odao' ca' gan' gwsə'elao' beņə' Izrael ca' Diozən'. Na' gwdixjui'e dižə' güen dižə' cobən' de que Diozən' năbi'e con notə'ətezə beņə' əso'e latjə. Na' Jeso'osən' beyone' yoguə' beņə' ca' chse'i gwde gwde yižgüe'. 24 Na' gosə' gwłalə yoguə' de'en ben

Jeso'osən' doxenlə nasyon Siria. Nach beṇə' Siria ca' jso'e yoguə' beṇə' ca' chsa'acšene laogüe'enə', beṇə' ca' chse'i zan clas yižgüe' na' beṇə' ca' chse'ey chesə'ala, na' len beṇə' ca' zjəyo'o zjəyaz de'e xio' yichjla'ažda'oga'aque', na' len beṇə' ca' chsa'az šon, na' beṇə' ca' zjanat to part cuerp chega'aque'enə'. Na' beyone' yoguə'atega'aque'. ²⁵ Na' zan beṇə' za'ac distrit che Galilea, na' beṇə' za'ac yež ca' gan' nzi' Decapolis, na' beṇə' za'ac syoda Jerosalennə', na' beṇə' za'ac yež ca' yelə' distrit che Jodea, nach beṇə' za'ac yešl'a' yao Jordannə' jasə'anaogüe' le'.

5

Dižə' de'en bsed blo'i Jeso'osən' to lao ya'a blo'ine' non' zjəzo mbalaz

¹ Na' Jeso'osən' catə' ble'ine' beṇə' zan zjanžag, gwloe' gwchi'e to lao ya'a. Na' gosə'abiguə' disipl che' ca' gan' chi'enə'. ² Nach gwzoloao bsed blo'ine' lega'aque', gwne':

³ –Le'e chacbe'ile de que chyažjele gaquəlen Diozən' le'e, zole mbalaz čhedə' bacho'ele latjə chnabia' Diozən' le'e.

⁴ Na' le'e zole trist lo'o yichjla'ažda'olen' por ni che xtolə'əle ca', mbalaz sole čhedə' Diozən' yeyonxenlaze'e le'e.

⁵ Na' le'e laogüe de'en chzejw yichje len Diozən' na' len beṇəchən', mbalaz sole čhedə' Diozən' gone' par nič gaquə güen chele can' baben Diozən' lyebe.

⁶ Na' le'e chzelažə'əchguale gacle beṇə' güen lao Diozən', zole mbalaz čhedə' Diozən' bachaclene' le'e par nič gacle beṇə' güen laogüe'enə'.

⁷ Na' le'e cheyašə'alažə'əle beṇə' yoblə, mbalaz zole čhedə' leczə ca' Diozən' cheyašə' čeži'ilaza'e le'e.

⁸ Na' le'e banacle beṇə' la'aždao' xi'ilažə', zole mbalaz čhedə' žjəyazole txen len Diozən'.

⁹ Na' le'e chogo'ole yelə' chxenlaza' che beṇə' ljuežje ca' chesə'ədilə, mbalaz zole čhedə' la' Diozən' bagwcue'e le'e ca xi'ine'.

¹⁰ Na' le'e choso'oči' choso'osaguə' beṇə' le'e laogüe de'e chontezle de'en naquə güen lao Diozən', zole mbalaz čhedə' cho'ele latjə chnabia' Diozən' le'e.

¹¹ Na' catə' chesə'əzi'ichižə' beṇə' le'e na' chesə'asaguə'əzi'e le'e na' chso'e yoguə' claste dižə' güenlaza' contr le'e por ni che de'en chonlilažə'əle nada', bia'aczə sole mbalaz. ¹² Cheyalə' yeba yezaquə'alažə'əchguale la'aṇə'aczə za'ac de'e ca' contr le'e čhedə' Diozən' gone' par nič gaquəchgua de'e güen chele cate' yežinle gan' zo'e'enə'. Can' chso'one beṇə' ca' le'e leczə can' gwso'one de'e xaxta'ocho ca' de'e profet ca' beṇə' ca' gwso'e xtižə' Diozən' cana'.

Naccho ca zedə' na' ca be'eni' par len beṇə' ža' yežlyo nga

¹³ Ca zedə' chaclenən par nič caguə cuiayi' no yid belə', le'egatezə ca' le'e chaclenle par nič beṇəchən' cui chso'ontequē' de'e mal. Na' šə zedə'an bitoch bi zxi' naquən, nezecho bito bi gac goncho par nič yeyaquən zxi' de'e yoblə. Na' bitoch bi zaquə'an lete goschon fuerlə na' əgwlej əgwšošj beṇə' len. Can' gaquə len le'e šə cuich gonle can' chene'e Diozən'.

¹⁴ Ca be'eni' chaclenən beṇə' par chəsə'ənezene' gan' cheyalə' žja'aque', ca'aczən' chaclenle beṇə' par chəsə'ənezene' nac chene'e Diozən' so'one'. Na' can' nota'ətezə beṇə' chac chle'ine' to syoda xen de'en chi' to lao ya'a, ca'aczən' notə'ətezə beṇə' chac chle'ine' de'e güennə' chonle. ¹⁵ Catə' chgualə'əle to yi' bito chdosə'alən žomə sino chda'alən le'e ze'e par chse'eni' len yoguə' beṇə' ža' lo'o yo'onə'. ¹⁶ Na' ca naquə le'e ža, cheyalə' sotezə sole gonle de'e güennə' par nič yesə'əle'i beṇə' len na' əso'elaogüe'e Xacho Diozən' ben' zo yoban'.

Jeso'osən' bsed blo'ine' can' na lei de'en bzoj de'e Moizezən'

¹⁷ Bito gonle xbab de que nada' za'a zedeyena' par niçh lei de'en bzoj de'e Moizezən' na' de'en boso'ozoj de'e profet ca' cana' cuich so'onən zin. Za'a par niçh gaquə complir yogua'əlol de'en bsi' Diozən' xneze gaquə ca de'en boso'ozoj beṇə' ca'. ¹⁸ De'e li chnia' le'e, xte ca te che yežlyo nga len de'e ca' chle'icho le'e yoban', ni to letr dao' ni to asento de'en nyoj le'e lein' cui ten ca'azə xte que gaquə yogua'əlol de'en chene'e Diozən' gaquə. ¹⁹ De'e na'anə' yogua' de'e ca' zjənyoj de'en chene'e Diozən' gonle, la'anə'əczə šə lebeyoza to de'e dao', leḡonən. Notə'ətezle šə əçhoele cui gonle can' none' mendadən', na' šə leczə əgwlo'ile beṇə' yoblə cui so'one' can' none' mendadən', Diozən' bito gone' le'e yelə' bala'an catə' yežinle yoban' gan' chnabi'enə'. Na' notə'ətezle šə gonle can' none' mendadən' na' šə leczə gwlo'ile beṇə' yoblə so'one' can' none' mendadən', Diozən' gone' le'e yelə' bala'an catə' yežinle yoban' gan' chnabi'enə'. ²⁰ Echnia' le'e, beṇə' fariseo ca' na' beṇə' ca' choso'osed choso'olo'i lein' bito zjənaquə yichjla'ažda'oga'aque'enə' güen lao Diozən'. Na' šə yichjla'ažda'olen' bito gaquəçhən güen lao Diozən' cle ca chega'aque'enə', bito yežinle yoban' gan' zo Diozən' chnabi'e.

Choncho de'e mal šə chža'a lježjcho

²¹ Na' leczə bsed blo'i Jeso'osən' lega'aque' gwne': —Banzele can' gož de'e Moizezən' de'e xaxta'ocho ca': “Cui no gotle. Na' šə no got lježj beṇəche', jostis ca' çhoglaogüe'en che' de que cheyalə' gate.” ²² Na' nada' chnia' le'e notə'ətezle šə chža'a lježj beṇəchle zaquə'əczən par gatle ca to castigw çhele žalə' ca', na' notə'ətezle šə chža' chniti'əle lježjle zaquə'əczən par so'on beṇə' golə blao ca' chəsa'anabia' nasyon Izraelən' castigw çhelen'. Na' notə'ətezle šə çholgüiž lježjle dižə' pesad, zaquə'əczən par yoselə' Diozən' le'e lao yi' gabil'.

²³ Cheyalə' socho binlo len lježj beṇəchcho. Na' la'anə'əczə catə' bazole lo'o yo'odao' par əgwnežjwle bi de'en əgwnežjwle güe'ela'ole Diozən', šə žjsa'alažə'əle de que babenle contr to beṇə' lježjlen', ²⁴ na'azə cheyalə' yocua'anle šlož de'en noxə'əlen'. Zgua'atec žjəyeye'exenle beṇə' lježjlen', nach gaquə žjəyenežjwle de'en bagwlejle par güe'ela'ole Diozən'.

²⁵ Catə' to beṇə' gonle xya che' na' əche'e le'e lao jostis, leḡonlene' regl binlo lao ngo'ole nezən' par niçh na' cui che'e le'e lao jostisən'. Šə bito gonle ca' ža, catə' əžinle lao jostisən' gone' le'e lao na' polsian' par yosə'əze'e le'e ližya. ²⁶ Echnia' le'e, bito yebeje' le'e xte catə' çhixjwle doxen de'en çhalə'əlen'.

De'e malən' choncho šə chgo'o xtocho

²⁷ Banzele can' gwna de'e Moizezən': “Bito co'o xtole na' bito cuejyichjle be'en chele o no'ol chele par solenle beṇə' yoblə.” ²⁸ Na' nada' chnia' le'e de que notə'ətezle šə chgüiale to no'olə' na' chzelažə'əle solenlene', banaple dolə' çhedə' tozəczə ca malən' bachonle lo'o la'ažda'olen' len de'en chon beṇə' chgo'o xtoe'.

²⁹ Na' de'e na'anə' əchnia' le'e, šə de'en chle'ile len jəlaole chonən par niçh əxople gonle de'e malən', nca'alə xneze žalə' cui žia jəlaolen'. Len nca'alə xneze cuejlen cle ca cuiayi'ile lao yi' gabilən' por ni che len. ³⁰ Na' šə de'en chonlenle na'ale ca' chonən par niçh əxople gonle de'e malən', nca'alə xneze žalə' cui žia na'ale na'anə'. Len nca'alə xneze çhogga'aclen cle ca cuiayi'ile lao yi' gabilən' por ni che leḡa'aquən.

Beṇə' csad ca' bito cheyalə' yesyə'əla'a lježjga'aque'

³¹ Leczə nezele can' gwna de'e Moizezən': "Notə'atezə beṇə' yele'e no'ol che'enə', cheyalə' chas to act ga güe'en dižə' de que besyə'əle'enə'." ³² Na' nada' əchnia' le'e de que notə'atezle yela'ale no'ol chelen', šə bito naque' to no'olə go'o xtoi, gonle par niç gaque' ca to no'olə go'o xtoi. Na' notə'atezle yošagna'ale len to no'olə beṇə' belə'a ben' chei le', leczə tozəczə ca malən' chonle len beṇə' ca' chesə'əgo'o xtoi.

Jeso'osən' bzejni'ine' che jorament ca'

³³ Na' leczə baṇezele can' gož de'e Moizezən' de'e xaxta'ocho ca': "Bito əgwzole jorament lao Xancho Diozən' catə' ənale to de'en gonle šə cui gonle complir can' nalənə'. Catə'ən chzole jorament lao Xancho Diozən', cheyalə' gonle can' chonle lyeben' laogüe'enə'." ³⁴ Pero na' nada' chnia' le'e, cuat əgwzole joramentən' por bitə'atezə, nic por yoba chedə' na'anə' zo Diozən' chnabi'e. ³⁵ Na' nic əgwzole joramentən' por yežlyon' chedə' den xni'a Diozən'. Na' nic əgwzole joramentən' por syoda Jerosalenna' chedə' naquan syoda che Diozən' ben' naquə le'ezelaogüe Rei blao. ³⁶ Na' nic gon yichjlen' testigw de que cho'ele dižə' li, chedə' bito gaquə gonle par niç yišə' yichjlen' yeyaquan šyiš o yeyaquan gasj. ³⁷ Cheyalə' güe'ele por dižə' li niç cui əyažjan əgwzole jorament par se'ejle'e beṇə' chele. Šə chyažjan bichlə dižə' de'e ənale par se'ejle'e chele, nachbia' gwxiye' nan' chnabia'an yichjla'ažda'olen'.

Bito co'olažə'əcho beṇə' contr checho

³⁸ Šə to beṇə' gone' zi' jelaolenə' nezele de que lei de'en bzoj de'e Moizezən' nan de que guaquə gonle zi' jelaogüe'enə'. Na' šə to beṇə' əxope' to leyle leczə nezele de que lein' nan guaquə əxople to che'enə'. ³⁹ Pero na' nada' əchnia' le'e, bito əgwžonle gon beṇə' de'e mal len le'e. Šə to beṇə' cape'e šla'a xaguə'əlen', le'e güe' latjə cape'e de'en yešla'a. ⁴⁰ Šə to beṇə' chene'ene' əque'e xcamislen' laogüe de'en chalə'əle lata' xmeche', güe'etele latjə əque'e len xadon' chelen'. ⁴¹ Na' šə to beṇə' blao gone' byen šejlenlene' gua'ale yoa' che'enə' to kilometro, le'e šejlene' gua'alen yeto kilometro. ⁴² Na' šə bi de'en chṇabe beṇə' le'e, le'e güe'en. Na' le'e cueje šə bi de'e chṇabe' cuejlene'.

Cheyalə' gaquecho che beṇə' contr checho

⁴³ Na' leczə baṇezele can' chəsə'əne': "Cheyalə' gaquele che beṇə' migw chele na' gue'ile beṇə' contr chele." ⁴⁴ Pero nada' əchnia' le'e, le'e gaque che beṇə' contr chelen', le'e nabe Diozən' gaquə de'e güen che beṇə' ca' choso'ožia choso'onitə' le'e. Na' le'e gon de'e güen len beṇə' ca' chəsə'əgue' le'e, na' le'e gon orasyon lao Diozən' par beṇə' ca' chsa'adə' le'e dižə', na' par beṇə' chəsə'əsaquə'əzi' le'e. ⁴⁵ Šə gonle ca' na'achən' əsa'acbe'i beṇə' de que nacle xi'in Xacho Diozən' ben' zo yoban'. Le'enə' chone' ca chla' bgüižən' par yoguə'əloj beṇə' la'anə'əczə šə chso'one' de'e güen o šə chso'one' de'e mal. Na' leczə chone' par niç chac yejw par yoguə'əloj beṇə' ža' yežlyon' la'anə'əczə šə zjənaque' beṇə' güen o šə zjənaque' beṇə' mal. ⁴⁶ Šə porzə chaquele che beṇə' ca' chsa'aque chele žbixa zedegua'atguan par le'enə'? Le'egatezə can' chso'on beṇə' gochixjw ca', beṇə' ca' nale zjənaque' beṇə' malchgua. ⁴⁷ Na' šə can' chguaple diox beṇə' ljuežjle ca'azə žəchonle xbabən' de que chonchle güen cle ca beṇə' yoblə? Bito chonchle güen. Can' chso'on beṇə' ca' cui zjənombia' Diozən', con beṇə' ljuežjga'aque' na'azə chesə'əguape' diox. ⁴⁸ Cheyalə' gacle beṇə' šao' ca beṇə' šao' beṇə' güennə' naquə Xacho Diozən' ben' zo yoban'.

6

Jeso'osən' blo'ine' naquan' cheyalə' goncho caridan'

¹ Le'e gon de'en naquə de'e güen pero caguə parzə niç yesə'əle'i beṇə' can' chonḷen' na' so'elaogüe'e le'e, çhedə' šə chonḷe ca' bito güe'elao' Xacho Diozən' ben' zo yoban' le'e. ² De'e na'anə' šə bi de'en chene'ele əgwnežjwle to beṇə' par gaquäləne'e, le'e əgwnežjon pero caguə parzə niç yesə'əneze beṇə' can' chonḷen' na' əso'elaogüe'e le'e. Beṇə' goxoayag ca' çəsə'ənežjue' bi de'en çəsə'ənežjue' beṇə' do lo'o yo'oda'onə' na' do lao lcue' parzə niç əso'elao' beṇə' lega'aque'. De'e li çhnia' le'e, bagwyejlaoczəga'aque'enə' pero Diozən' bito güe'elaogüe'e lega'aque'. ³ Pero na' le'e ža, šə bi de'en əgwnežjwle to beṇə' par gaquäləne'e, bito co'ole be' lban ca de'en chonḷe. ⁴ Gonḷen ca cui əsa'acbe'i beṇə' na' cui so'elaogüe'e le'e. Xacho Diozən' ben' chle'i yoguə' de'en choncho güe'elaogüe'e le'e.

Bsed blo'i Jeso'osən' nac cheyalə' goncho orasyon

⁵ Catə' gonḷe orasyon bito gonḷen can' çhsə'on beṇə' goxoayag ca'. Lega'aque' çəsə'əbeine' çəsə'əzeche' çhsə'one' orasyon lo'o yo'oda' çhega'aque' ca' gan' çhsə'elaogüe'e Diozən' na' do squin lquey, çhsə'one' orasyonṇə' par çəsə'əle'i beṇə' can' çhsə'one'enə'. De'e li çhnia' le'e, bagwyejlaoczəga'aque'enə' na' Diozən' bito güe'elaogüe'e lega'aque'. ⁶ Na' catə' gonḷe orasyon le'e yeyo'o lo'o yo'o çhele na' əgwseyjwle puertən', na' gonḷe orasyonṇə' lao Xacho Diozən' ben' cui chle'icho. Na' Xacho Diozən' ben' chle'i yoguə' de'e choncho le' güe'elaogüe'e le'e.

⁷⁻⁸ Ca naquə beṇə' ca' cui zjənombia' Diozən', catə' çhsə'one' orasyon çhsə'echgüe' dižə'. Çhsə'one' xbab laogüe de'en çhsə'echgüe' dižə' Diozən' əgwzenague' çhega'aque'. Bito gonḷe can' çhsə'one'enə'. Ca naquə Xacho Diozən', banezczene' bi de'en çhyažjele ze'e ṇablelene'en. ⁹ Quingan' gonḷe orasyonṇə':

Xato' beṇə' zo yoba, çhnabto' yoguə'əloḷ beṇə'çhən' əso'elaogüe'e le'.

¹⁰ Çhnabto' gono' par niç beṇə' zan əso'e latjə ṇabi'o lega'aque'.

Gaguəšga can' che'endo'onə' lao yežlyo nga, can' chac yoban'.

¹¹ Beṇšga ṇa'a de'e gaoto' tža tža.

¹² Na' bezi'ixenšga çheto' çhedə' leczə chezi'ixento' çhe sa'aljuežj beṇə'çhto'onə' bitə'ətezə de'en çhsə'onene' neto'.

¹³ Na' bito go'o latjə gaquə de'e ṇabia' neto' len xbab çheto'onə' par gonto' de'e malən',

mas bcuasə' bcue'ej neto' len gwxiye'enə'.

Le'enə' çhnabi'o na' napo' yelə' guac

na' napo' yelə' bala'aṇ par zejlicəne. Amen.

¹⁴ Na' šə chezi'ixenle xtoḷə' sa'aljuežj beṇə'çhən' bitə'ətezə de'en çhsə'onene' le'e, leczə gozi'ixen Xacho Diozən' ben' zo yoban' xtoḷə'əlen'. ¹⁵ Pero na' šə le'e bito chezi'ixenle çhe sa'aljuežj beṇə'çhən', leczə ca' Xacho Diozən' bito yezi'ixene' çhelen'.

Jeso'osən' bzejni'ine' naquan' cheyalə' goncho catə' socho sin cui ye'ej gaocho par güe'ela'ocho Diozən'

¹⁶ Na' catə'ən çhazole sin cui che'ej chaole par niç çho'ela'ole Diozən' bito gon ço'alaolen' ca ço'ala' beṇə' çhegüinçhgüei can' çhsə'on beṇə' goxoayag ca'. Lega'aque' çhsə'onḷizəga'aque' ca beṇə' çhegüine'e parzə niç çhsə'acbe'i beṇə'çhən' de que nite'e cui zjəne'ej zjənaoga'aque'. De'e li çhnia' le'e bagwyejlaoczəga'aque'enə' na' Diozən' bito güe'elaogüe'e lega'aque'. ¹⁷ Pero

na' le'e catə' zole sin cui ne'ej naole par cho'ela'ole Diozən', le'e əgwpə'a yichjle na' xala'anle. ¹⁸ Legon ca' par niçh cui əsa'acbe'i beṇəçən' de que zole sin cui ne'ej naole. Tozə Xacho Diozən' ben' cui chle'icho nezene' can' chonle. Na' Xacho Diozən' ben' chle'i yoguə' de'e choncho güe'elaogüe'e le'e.

Quingan' cheyalə' goncho par niçh gatə' çecheo de'en cui te çhei gan' chnabia' Diozən'

¹⁹ Bito gwtoble de'e zan de'e zaque'e na' de'e xoche lao zole yežlyo nga, la' yesə'əbiayi'in. Baṭən chsa'aljən bia dao' na' chsa'ob lega'aquən, na' yebalən chzen no xçhe'i, na' leczə chaš beṇə' bguan na' so'e yesə'əque'e bi de'en deilen'.

²⁰ Le'e gon par niçh gon Diozən' de'e šao' de'e güençhlə çhele de'e cui te çhei catə' yežinle yoban' gan' zoe'enə', çhedə' na' bito galjə bia dao' par əsa'ob len, na' nic sen xçhe'i par cuiayi'in, na' nic gaquə šo'o beṇə' bguan par əque'en.

²¹ Gan' de de'en chaquele çhei nan' zo yichjla'ažda'olen'.

Žia jelaochon' par chle'icho

²² Žia jelaochon' par chle'icho. Con šə bito bi chaquən chle'iczecho binlo. ²³ Pero šə nçhol jelaochon' bito chle'icho. Ca'aczən' naquən len yichjla'ažda'olen' šə nacle beṇə' la'aždao' güen yo'o be'eni' çhe Diozən' yichjla'ažda'olen', pero šə nacle beṇə' mal nçhol yichjla'ažda'olen'. De'e li lechguəle nçhol yichjla'aždao' le'e cui chzenagle çhe Diozən'.

Bito gaquə gaquecho çhe Diozən' na' gacteicho çhe bien çecheon' tš'i'izə

²⁴ Notono no gaquə so liž çhopə xan žin par gaque' xmosga'aque' tš'i'izə, çhedə' la' šə gone' ca' gue'ine' to xan žinnə' na' gaquene' çhe yetoe', o gone' žin çhe toe' do yichj do lažə'e na' bito bi respet gape' par xane'en yeto par gone' xšine'enə'. Leczə can' le'e bito gaquə gonle xšin Diozən' do yichj do lažə'əle na' gonte xšinle par gacle beṇə' gwni'a.

Diozən' chgüia chye' chio'o naccho xi'ine'

²⁵ De'e na'anə' chnia' le'e, bito cuec yichjle tlaozə de'en ye'ej de'en gaole lao mbanle. Na' leczə ca' cuerp çhelen' bito cuec yichjle tlaozə de'en guacwlen'. Zakuə'əch yelə' mban çhelen' ca yelə' guaon'. Le'egatezə ca' cuerp çhelen' zakuə'əçən ca xala'anlen'. ²⁶ Legontoš xbab çhele, ca naquə bia ca' zjəžia xile'e bito chsa'azəb na' bito çəsyə'əlapəb na' nic bi da'a xoa' çhega'aguəb zo, pero na' chguaoczə Xacho Diozən' ben' zo yoban' lega'aquəb. Naquəçxen' zakuə' le'e ca bia ca' zjəžia xile'enə'. ²⁷ Na' ni tole bito gaquə yoston çuinle gašjə metr šə con cue'e yichjle ətonle.

²⁸ Na' çbixçhen' çhbec yichjle çhe xala'anle? Legontoš xbab ca naquə yej sosennə' chesə'əcha'oczən, len bitobi žin chso'onən, nic chsa'aljən do.

²⁹ Na' əchnia' le'e, Salomonə' goque' lachə xoche juisy, pero bito bžinlažə'e xala'ane'enə' ca yelə' xoche çhe yej sosen ca'. ³⁰ Diozən' none' xoche yixə' de'en ze yoba len to termzə zen nach choso'ozeye'en, naquəçxe gon Diozən' len le'e, güe'eczə yichje' gone' yoguə'əte de'en chyažjele, le'e cui çhejle'eteclə de que gone' de'en chyažjele. ³¹ Le'e ža, bitoch cuec yichjle çhe bi de'en chyažjele ənalizle: "çBin' ye'ej gaocho na' bin' gacwcho?" ³² Con por de'e ca'azən' zjəçhi' yichj beṇə' ca' cui chso'onlilažə' Diozən', çhe de'en əse'ej əsa'ogüe' na' çhe xala'anga'aque'. Pero na' Xacho Diozən' ben' zo yoban', nezczene' yoguə' de'e ca' chyažjele. ³³ De'en güe'elažə'əle, güe'ele latjə par niçh Diozən' nabi'e le'e, na' güe'elažə'əle gonle de'en na Diozən' naquə güen. Na' yoguə' de'e ca' de'en chyažjelen' gonczə Diozən' len, de'en ye'ej de'en gaolen', na' xala'anle. ³⁴ Le'e

gon xbab che de'en chac tza tza. Bito cuec yichjle che bi de'en gaquə gwɣe güižj, la' guatə'əczə de'e zan de'e cuec yichjcho chei catə' əžin žan'.

7

Bito zaquə'əcho par ənacho che beŋə' de que zjanape' dolə'

¹ Bito gonle xbab de que zaquə'əle par ənale che beŋə' de que zjanape' dolə'. Šə ənale chega'aque' de que zjanape' dolə' leczə ca' əna Diozən' chele de que naple dolə'. ² Can' chosbague'ele beŋə' de que zjanape' dolə' le'egatezəczə can' yosbague'e Diozən' le'e de que naple dolə'. Con can' chonle len beŋə', le'egatezə can' gon Diozən' len le'e. ³ Chle'ile güe' dao' de'en žia cožə' beŋə' ljuežjle, na' cabi chele'ile güe' xen de'en žia cožə'əlen'. ⁴ Che' beŋə' ljuežjle: "Be'e latjə gona' rmech güe' daon' de'en žia cožə'ona'", na' bito chonle rmech güe' xen de'en žia cožə'əlen'. ⁵ ;Beŋə' goxoayag le'e! Zgua'atec le'e gon rmech güe' xenna' de'en žia cožə'əlen' na' techlə ənezele naquən' gonle rmech güe' daon' de'en žia cožə' beŋə' ljuežjlen'.

⁶ Pero na' bito güe'etezle xtižə' Diozən' len beŋə' ca' chso'onczə yichjlaoga'aque' cui chse'enene' yoso'ozenague' chei, chedə' la' guacte so'onene' le'e znia can' chon beco' catə'an cho'exaxjchob de'en cui cho'olazə'əb. Na' šə güe'etezle xtižə' Diozən' len beŋə' ca' chso'onczə yichjlaoga'aque' cui chse'enene' yoso'ozenague' chei, con yosə'əlej yoso'ošošje' dižə' de'en güe'elenga'aclene'enə' can' chso'on coš ca' len de'en cui chse'ene'eb asa'ob.

Le'e nabe Diozən' bi de'en ənabelene' la' goncze'en

⁷ Bitə'ətezə de'en chene'echo gaquə, de de'e goncho par nič gaquən. Šə to de'e chene'echo so'on beŋə' chio'o, chnabchon. Šə to de'e chene'echo əzelecho, chyiljchon. Šə puert de'en chene'echo əsaljo beŋə', chnecho cho'a puertən' par nič chsaljue'. Na' ca'aczən' cheyalə' ye'echo Diozən' catə'an de de'en chene'echo gaquə. ⁸ Na' notə'ətezcho šə bi de'e chnabechone' gone', la' de'e goncze'enə'. Na' notə'ətezcho šə bi de'en chnabechone' əgwzejni'ine' chio'o, əgwzejni'iczene'. Na' notə'ətezcho šə chnabechone' gaquə to de'en chene'echo gaquə can' chon beŋə' chne' cho'a puertən', la' de'e gaquəczən'.

⁹ Na' le'e nacle xa bidao', šə xi'inlen' ənabebo' le'e yetxtil žəgwnežjwlebo' to yej? ¹⁰ Na' šə ənabebo' le'e to bel ya'a žəgwnežjwlebo' to bel bia nxobə le'i? Cle bito gonle ca'. ¹¹ Le'e nacle beŋə' mal pero nezele chnežjwle xi'inlen' de'e güen. Naquachxe güen gon Xacho Diozən' ben' zo yoban' len beŋə' chnab laogüe'enə' bi de'en chyažjje'.

¹² Na' can' naquən, con yoguə' de'e güen de'e chene'ele so'on beŋə'chən' len le'e ca'atezəczən' cheyalə' gon le'e len lega'aque', chedə' can' na lei de'en bzoj de'e Moizezən' na' de'en boso'ozoj de'e profet ca' beŋə' ca' gwso'e xtižə' Diozən' cana'.

Nezən' de'en yežin yoban' gwxaquə'əleben ca to nez las

¹³ Lao yelə' mban chechon' chopə nez nan' de. To nez las, na' to nez laguə'. Cheyalə' goncho byen šo'ocho to nez šao' to nez güen la'əŋə'əczə naquən ca to nez las de'e caŋe əželən na' de'e chaquecho naquən zdebə par tachon. Na' nez malan' gwxaquə'əleben ca to nez yo nez laguə' chedə' chpein chio'o par nič yežincho gabiłən' gan' saquə'əzi'icho zejlicane. Pero beŋə' zan bazjəyo'e nez laguə'anə'. ¹⁴ Nezən' de'en yežin yoban' gan' əbancho zejlicane len Diozən' gwxaquə'əleben ca to nez las de'e caŋe əželən na' de'e chaquecho

naquən zdebə par tachon. De'e na'anə' balga beṇə' chəsyə'əželene'en par chjəsə'ənaogüe'en.

Segon can' naquə frot de'e chbia to to yaguən' nezecho bi clas yaguən'

¹⁵ Cheyalə' gapcho cuidad par niçh cui šejle'echo xtižə' beṇə' ca' chso'onlaže'e chəsə'əne' de que xtižə' Diozən' chəsə'əyixjui'e. Xochechguan' chso'e dižə'anə' par choso'opeine' chio'o, chse'enene' goncho xbab de que zjənaque' beṇə' güen. Pero lega'aque' zjənaque' beṇə' la'aždao' mal na' chse'enene' yoso'ožiyai'e chio'o. ¹⁶ Segon can' naquə frot de'e chbia to to yaguən' nezecho bi clas yaguən'. Ca'aczən' gacbe'iczecho de que beṇə' ca' chəsə'əxoayague', segon can' chso'one' na' bin' choso'osed choso'olo'ine' beṇə'. Ca' naquə yag yešən' bito chbian obas, na' nic yag bçho'onən' chbian yixgüio. ¹⁷ Na' de'en naquə yag güen, frot güenczə chbian na' de'e cui naquə güen leczə bito chbian frot güen. ¹⁸ Yag frot güennə' bito chbian frot de'e cui naquə güen, na' leczə to yag frot de'en cui naquə güen bito chbian frot güen. ¹⁹ Na' yoguə' yag frot de'e cui chesə'əbian frot güen, yesə'əchogoe'en na' yesə'əzeye'en. ²⁰ Na' gacbe'icho non' chəsə'əxoayag, segon can' chso'one' na' bin' choso'osed choso'olo'ine' beṇə'.

Caguə yoguə' beṇə' yesyə'əžine' yoban' gan' zo Diozən' chnabi'e

²¹ Beṇə' zan chse'e nada: "Naco' Xana'", pero caguə yogue'e yesyə'əžine' yoban' gan' chnabia' Diozən'. Beṇə' ca' chso'on can' chazlažə' Xa' Diozən' ben' zo yoban', lega'acze'enə' yesyə'əžine' yoban' gan' zo'enə'. ²² Catə' əžin ža yoso'odie' cuent lao Diozən' beṇə' zan əse'e nada: "Xana', goclen neto' na'a, la' beṇə' zan gwdixjue'ito' xtižə'onə'. Na' leczə be'eto' la'onə' par bebejto' de'e xio' ca' zjəyo'o zjəyaz yichjla'aždao' beṇə'. Na' leczə be'eto' la'onə' par bento' de'e zan miłag'." ²³ Pero na' clar yapə'əga'aca'ane': "Bito nombi'a le'e. Ležjəya'ac ca'alə le'e beṇə' güen de'e mal."

Chopə beṇə' na' yo'o de'en gwso'on to toe'

²⁴ Beṇə' chzenag xtižə'anə' na' chone' can' nannə', gwxaquə'əlebene' ca to beṇə' sin' beṇə' ben liže' na' gwleque' lanen' len yej gual. ²⁵ Na' goc yejw zil juisy na' bchojchgua yaonə' na' gwyechjən liže'enə'. Na' lei bdoḅən be' bdon'. Pero bito gosə'əzoin par yoso'ochixən len, çhedə' gwleque' lanen' de'e gual. ²⁶ Na' beṇə' chzenag xtižə'anə' pero bito chone' can' nannə', gwxaquə'əlebene' ca to beṇə' fałs beṇə' ben liže'enə' fałs bzoe'en lao yox. ²⁷ Na' goc yejw zil juisy, gwyechj be' bdon' na' bchojchgua yao na' beyožən gan' zo liže'enə'. Nach bebixən gwžiyai'in. Na' catə' gwže'enə' xte gwñin.

²⁸ Na' catə' beyož be' Jeso'osən' dižə' ca', beṇə' zan ca' gwse'ene xtiže'enə' besyə'əbanchgüeine' can' bsd blo'ine'. ²⁹ Na' can' bzejni'ine' lega'aque' nacbia' de' que napə'che' yełə' chnabia' cle ca beṇə' ca' choso'osed choso'olo'i lei de'en bzoj de'e Moizežən'.

8

Jeso'osən' beyone' to beṇə' che'i yizgüe' de'en ne' lepr

¹ Beṇə' zan zesyə'ənaogüe' Jeso'osən' catə' beyetje' ya'anə'. ² Nach to beṇə' che'i yizgüe' de'en ne' lepr bgüigüe'e lao Jeso'osən' na' bzo xibe' laogüe'enə' gože'ene': —Xana' gonšgüei ben par niçh yeyacda'.

³ Nach Jeso'osən' bli ne'enə' gwdane'ene' gože'ene': —Guaquəczə, beyaque.

Na' le'e beyactei be'enə'. ⁴ Nach Jeso'osən' gože'ene': —Ni tozə cui no güe'eleno' dižə' ca' naquə nga babena' len le'. Gwyej lao bxožən' niçh le'ine'

baçh beyacdo'. Na' bnežjue' bia yixə' gote' lao Diozən' can' non de'e Moizezən' mendad par niçh yesə'əneze beṇə' de que babeyacdo'onə'.

Jeso'osən' beyone' xmos capitān beṇə' Roma

⁵ Na' catə' bežin Jeso'osən' Capernaunnə' le'e bšagte to capitān beṇə' Roma le'. Na' gotə'əyoine' Jeso'osən' ⁶ gože'ene': —Xana', xmosa'an die' liža'anə', chaçšenchgüeine'. Nat cuerp che'enə' na' leçgualē chžaglaogüe'.

⁷ Nach Jeso'osən' gože' capitānnə': —Sa'alena' le' na' yeyona'ane'.

⁸ Pero na' capitānnə' gože'ene': —Xana', bito zaca'a par sa'o liža'anə'. Ngatezə ben mendad yeyaue xmosa'anə' nach yeyaue'ne'. ⁹ Rein' chnabi'e nada' pero leczə nitə' soldad chia' ca' na' chnabi'aga'aca'ane' na' choso'ozenague' chia'. Catə' chapa'a toē': "Gwyeyj", na' cheje', na' catə' chapa'a yetoē': "Da nga", na' chide'. Nach catə' chapa'a xmosa'anə': "De'e nga gonō'", na' chone'en. Con beṇšga mendad na' nežda' gaquə can' na'onə'.

¹⁰ Na' Jeso'osən' bebanene' catə' benene' xtižə' capitānnə', na' gože' beṇə' ca' nao le'enə': —De'e ličzə əchnia' le'e, notono beṇə' ne'e žjəti'a beṇə' gonlilažə'ətec nada' ca bengā. Ni tozə beṇə' Izrael cui chonlilažə' nada' ca le'. ¹¹ Echnia' le'e, beṇə' zan ža' doxenlə yežlyon' so'onlilaže'e nada, na' lega'aque' žjəsyə'anite'e txen len de'e xaxta'ocho Abraannə' na' de'e xaxta'ocho Isaaquən', na' de'e xaxta'ocho Jacobən' yoban' gan' zo Diozən' chnabi'e. ¹² Na' ca naquə nasyon Izrael chechon' le'en gwlej Diozən' par nabi'e, əchoj beṇə' zan bito so'e latjə nabi'e lega'aque'. De'e na'anə' əsele'e lega'aque' lao yi' gabilən' gan' yesə'əbežyaše'e na' sa'oyejə leyga'aque'enə'.

¹³ Gwde gwna Jeso'osən' ca' nach gože' capitānnə': —Guaquə yeyejo'. Babeyona' xmoso'onə', chedə' chejli'o chia'.

Na' xmos capitānnə' lao or na' le'e beyacteine'.

Jeso'osən' beyone' taobin' che Bedən'

¹⁴ Na' gwyey Jeso'osən' liž Bedən' na' ble'ine' taobin' che Bedən' die' lao camən', na' yo'e de'e lan'. ¹⁵ Jeso'osən' bexe'e ne'enə' na' le'e bechojte' de'e lan'. Nach le'e gwyaste no'olən' bene' de'e gwsa'ogüe'.

Jeso'osən' beyone' beṇə' zan

¹⁶ Na' catə' gwxen, besə'əžin beṇə' gan' zo Jeso'osən' zjənche'e beṇə' zan zjəyo'o zjəyaz de'e xio' yichjla'ažda'oga'aque'enə'. Jeso'osən' con bene' mendad na' besyə'əchoj de'e xio' ca'. Na' beyone' yoguə beṇə' ca' chsa'acšenenə'.

¹⁷ Can' bene' par niçh goc complir can' bzoj de'e profet Isaiazən' che' cana', nan: "Le'enə' yequē'e de'en chžaglaochō na' gone' ca yeyauecho che yoguə' yižgüe'."

Can' gož Jeso'osən' beṇə' ca' gwse'ene žja'aclen le'

¹⁸ Gwde na' ble'i Jeso'osən' babesə'əžin beṇə' zan zjənyechje' le', nach bene' mendad len disipl che' ca' yesə'əlague'e yešl'alə nisdə'onə'. ¹⁹ Na' bchoj to ben' chsed chlo'i lei de'en bzoj de'e Moizezən' nach bgüigue'e lao Jeso'osən' na' gože'ene': —Maestr, gwza'alena' le' gatə'ətezə šejo'.

²⁰ Na' par niçh be'enə' benyane'e xbab šə de'e ličzə che'enene' šejlene' le', na' Jeso'osən' gože'ene': —Zjəde liž becoyo'o ca' na' leczə zjəde liž bia ca' zo xile'e bia chaš yoba, pero nada' bitobi xlatja' de gan' gona' dezczanz la'anə'əczə bselə' Diozən' nada' golja' beṇə'ach.

²¹ Na' bchoj yeto ben' nao de'en chsed chlo'i Jeso'osən' na' gože'ene': —Xana', gwza'alena' le' pero zgua'atec be'ešga latjə yega'anlena' xa'anə' xte catə'əch əžin ža gate' na' əgwcuša'ane'.

²² Jeso'osən' gože'ene': —Da len nada'. Beṇə' ca' zjənaquə len yichjla'ažda'oga'aquen' ca beṇə' guat guaquə yesə'əcuaše'e beṇə' guat ca'.

Jeso'osən' gwleczie' to be' gual lao nisdəon'

²³ Gwde be' Jeso'osən' dižə' ca', gwyo'e lo'o barcon' len disipl che' ca'.
²⁴ Na' lao zda barcon' gwtas Jeso'osən'. Na' gwzolao gwyečj to be' gual lao nisdəonə', na' gwzolao chož nisan' lo'o barcon'.
²⁵ Nach bosyo'osbane' Jeso'osən' gwse'ene': —jXanto'! jBosla chio'o! jBačh chbiayi'icho!

²⁶ Nach Jeso'osən' gože' lega'aque': —Bito žeble. Le'e šejle'ech chia'.

Nach gwyase' ne'e chas chatə' nisdəonə' nach bene' mendad besyə'əbe'eži nisdəonə' len be'enə', na' le'e besyə'əbe'ežiten.
²⁷ Na' disipl che' ca' besyə'əbanene' can' bene'enə', nach gwse' ljuežjga'aque': —Bitolja naquə bengə con to beṇəčzə, la' žnacxa gon to beṇəč par yebečzie' be' gualən' len nisdəonə'?

Čopə beṇə' Gadara zjəyo'o zjəyaz de'e xio' yichjla'ažda'oga'aquen'

²⁸ Na' besə'əžine' yešla'alə nisdəonə', laž beṇə' Gadara ca'. Na' catə' besyə'əchoje' barcon', besə'əšag čopə beṇə' Jeso'osən', beṇə' zjəyo'o zjəyaz de'e xio' lo'o yichjla'ažda'oga'aquen'. Beṇə' quinga banitə'əte' capsant na' chesə'əchoje' chaše' do tnezən' galə'əzə capsantən' chso'one' znia juisy len beṇə' chesə'əžague', na' caguə no chac ta tnezən'.
²⁹ Na' de'e xio' ca' gwso'osya'an gwse'en Jeso'osən': —Partlə le', na' partlə neto', Jeso'os Xi'in Dioz. žEza'lo par əgwčhi'i əgwsaco'o neto' catə' cuinə' əžin ža əžin or par si'ito' castigw'?

³⁰ Na' galə'əzə chaš beṇə' choso'oye' coš zan.
³¹ Nach de'e xio' ca' gwsa'atə'yoin Jeso'osən' gwse'en le': —Šə yebejo' neto' yichjla'aždao' beṇə' quinga, güe'ešgo' latjə žjəyežo'oto' lo'o la'aždao' coš ca'.

³² Nach gož Jeso'osən' lega'aque': —Leyechoj.

Nach besyə'əchojən yichjla'aždao' beṇə' ca' na' jəsyə'əžo'on lo'o la'aždao' coš ca'. Nach besyə'ədinses coš ca' le'e ya'a gan' chašəbən' na' jəsyə'əxopəb lo'o nisdəonə', na' gwsa'atəb gwse'ejəb nisan'.

³³ Na' beṇə' ca' chosə'əye' coš ca' besa'acdoe' na' besyə'əžine' syodan', jəsyə'ədixjue'ine' beṇə' lao' syodan' yoguə' can' bagoc na' can' babesyə'əyaque beṇə' ca' zjəyo'o zjəyaz de'e xio'onə' yichjla'ažda'oga'aque'enə'.
³⁴ Nach yoguə' beṇə' ca' ža' syodan' ja'aque' gan' zo Jeso'osən'. Na' catə' besə'əžague' Jeso'osən' gwsa'atə'yoine' le' yeze'e lažga'aque'enə'.

9

Beyon Jeso'osən' to beṇə' nat to part cuerp che'ena'

¹ Nach Jeso'osən' beyo'e to lo'o barcw len disipl che' ca' na' besyə'əlague'e yešla'alə nisdəonə' par besyə'əžine' Capernaum gan' bazocze'.
² Na' besə'əžin xonj beṇə' na' zjənlene' to beṇə' nat to part cuerp che'ena', zjənxoe'ene' to lao cam dao'. Ca' naquə gočbe'i Jeso'osən' de que gwso'onlilaže'ene', nach gože' beṇə' güe'ena': —Bebe!, xi'indaogua'a. Babezi'ixena' xto'lo'onə'.

³ Na' balə beṇə' ca' choso'osed choso'olo'i lei de'en bzoj de'e Moizezən' gwse'ene' de'en gož Jeso'osən' beṇə' güe'ena', na' gwso'one' xbab lo'o yichjla'ažda'oga'aque'enə' gosə'əne': —Bengə čžia chnite'e Diozən' laogüe de'en chon cuine' ca Diozən'.

⁴ Jeso'osən' gočbe'ine' xbabən' chso'one'ena', nach gože' lega'aque': — žBixčhen' chonle xbab malən' ca' lo'o yichjla'ažda'olen'?
⁵ Šə con yapa'ane'

de que babezi'ixena' xtol'e'enə', bito nezele šə napa' yelə' gwnabia' par yezi'ixena'an. Pero šə yapa'ane': "Gwyas na' gwda", guatə'əbia' šə napa' yelə' gwnabia' par gaquə can' nia'anə'. ⁶ Diozən' bsele'e nada' golja' benach na' de'e ngan' gona' par nič ənezele de que napa' yelə' gwnabia' lao yežlyo nga par yezi'ixena' xtolə' benachən'.

Nach gože' beṇə' güe'enə': —Gwyas beyoa xcamo'onə' na' beyej ližo'onə' to šao' to güen.

⁷ Na' beyas be'enə', beze'e zjəyede' liže'. ⁸ Na' beṇə' ca' besə'əle'i can' goquən', lechgualə besə'əžebe'. Na' gwso'elaogüe'e Diozən' ca' naquə bene' yelə' guac par nič Jeso'osən' goc bene' de'e ca' zjanac ca'.

Jeso'osən' gwleje' Mation' par goque' disipl che'

⁹ Gwde na' beza' Jeso'osən' na' ble'ine' to beṇə' gochixjw na' le' Matio, chi'e latjə gan' chchixjue'enə'. Na' Jeso'osən' gože'ene': —Da len nada'.

Na' Mation' le'e gwzoža'ate' gwyejlene' le'.

¹⁰ Na' goquən' chi' Jeso'osən' liž Mation' len disipl che' ca' chsa'ogüe'. Na' nita' beṇə' zan beṇə' gochixjw ca' na' nochlə beṇə' güen de'e mal ca' chsa'olene' lega'aque'. ¹¹ Na' beṇə' fariseo ca' catə' besə'əle'ine' chi' Jeso'osən' txen len beṇə' güen de'e mal ca', gwse'e disipl che' ca': —Malən' chon maestr' chelen' che'ej chaogüe' txen len beṇə' gochixjw ca' na' nochlə beṇə' güen de'e mal beṇə' cui chonlento' txen.

¹² Na' catə' Jeso'osən' benene' xtižə'əga'aque'enə', na' gože' lega'aque': —Beṇə' cui chsa'acšene bito chəsə'əyazjene' beṇə' güen rmech. Beṇə' ca' chsa'acšene lega'aque'enə' chəsə'əyazjene' beṇə' güen rmech. ¹³ Leše'j na' legwsed bi zeje Xtižə' Diozən' de'en nyožən nan: "Che'enda' yeyaša' yeži'ilazə'əle beṇə', caguə tlozə' gotle bia yixə' par güe'ela'ole nada'." Za'a zedəyena' par nič beṇə' ca' zjəneze' de que zjanaque' beṇə' güen de'e mal yesə'ədinjene' xtolə'əga'aque'enə', pero bito zedəyena' par nič beṇə' ca' chsa'aque'ne' bazjanaque' beṇə' güen yesə'ədinjene' xtolə'əga'aque'enə'.

Chəsə'ənbene' Jeso'osən' bixchen' disipl che' ca' cui chəsə'ənite'e sin cui əse'ej əsa'ogüe'

¹⁴ Nach disipl che' Juan ben' bchoa nis gosə'əbigue'e lao Jeso'osən', na' gwse'ene': —Zan las beṇə' fariseo ca' na' neto' chzoto' sin cui che'ej chaoto' par cho'ela'oto' Diozən'. Pero disipl chio' ca' chse'ej chsa'ogüe'. ¿Bixchen' ža?

¹⁵ Nach Jeso'osən' gože' lega'aque': —Catə' chac to yelə' gošagna' beṇə' migw che be'enə' chšagna'anə' bito chəsə'əgüine'ene' sino chse'ej chsa'ogüe'. Na' ca'aczən' naquən len nada' na' len disipl chia' ca', chse'ej chsa'ogüe' lao ne'e zoa' len lega'aque'. Catə'əchən' əžin ža yesə'əche'əxaxj beṇə' contr chia' ca' nada' cana'achən' əchoj catə' cuich əse'ej əsa'o disipl chia' ca'.

¹⁶ Notono beṇə' zo beṇə' chchine' to pedas lachə' cuiṇə' xoa nis par yoda' xa gole'enə' de'en bač chyoe. Šə can' gone', catə' chib xe'enə' yebe' lachə' cobən' na' əchezəchən len. ¹⁷ Na' leczə' notono zo beṇə' chgue'e bino cobən' lo'o yid golən'. Šə gone' ca', bino cobən' əchezəən yid golənə' na' laljə binon' na' cuiayi' yidən'. Cle la' cheyalə' que'e bino cobən' lo'o yid cobə, par nič ca' bito cuiayi' binon' na' yidən'.

Gože' lega'aque' ca' par nič bzejni'ine' de que bito gaquə yesə'ənaogüe' costombr golə' chega'aque'enə' na' yesə'ənaotie' de'en chsed chlo'ine'.

Jeso'osən' beyone' xi'in' Jairon' na' no'olən' gwdan lox xadon che'ena'

18 Na' ne'e cho'ete Jeso'osən' dižə' quinga, bžin to beṇə' gwnabia' bzo xibe' lao Jeso'osən' na' gože'ene': —Ze'e gotte to xi'ina' no'olə. Yo'ošga cano'obo', na' yebambo'.

19 Na' le'e gwzoža'ate Jeso'osən' na' txen len disipl che' ca' ja'aclene' beṇə' gwnabian'. 20 Na' lao zja'aque' liž beṇə' gwnabian' jənao to no'olə lega'aque', beṇə' bagoc šižin iz chzoe' bgua'a. Na' bene' byen bgüigue'e cožə' Jeso'osən' gwdane' lox xadon che'ena'. 21 La' bene' xbab lo'o yichjla'ažda'ogüe'ena', gwne': "Con cana' xadon che'ena', goyacczəda'." 22 Na' gwyechj Jeso'osən', ble'ine' no'olən', na' gože'ene': —Bebai xi'indaogua'a. Babeyacdo' chedə' chonlilažo'o nada'.

Na' le'e bega'ate yižgüe' de'en che'i no'olən'.

23 Catə' bžin Jeso'osən' liž beṇə' gwnabian', na' ble'ine' beṇə' zan zjəža' na' nita' beṇə' chəsə'əcuež ca bžejo, na' beṇə' ca' ža'anə' chəsə'əbežchgüe'. 24 Na' gože' lega'aque': —Le'e yechoj ngalə. Bito nacho' bi'i guat, con chtasbo'onə'.

Pero na' beṇə' ca' gwso'onle'e che'. 25 Na' beyož besyə'əbeje' beṇə' ca' fuerlə, nach gwyo'o Jeso'osən', bexe'e na' bi'i no'olə guat da'onə', na' beyasbo'. 26 Na' ca naquə de'e güennə' de'en ben Jeso'osən' gosə' gwlaļə dižə'anə' yoguə yež ca' zjəchi' do na'.

Jeso'osən' beyone' chopə beṇə' lchol

27 Na' catə' beza' Jeso'osən' len disipl che' ca', jəsə'ənao chopə beṇə' lchol lega'aque'. Na' gwsa'ata'əyoine' le' gosə'əne' zižjo gosə'əne': —Le' naco' xi'in dia che de'e Rei Dabi. Beyašə'əlažə'əšgüei neto'.

28 Na' catə' bežin Jeso'osən' len disipl che' ca' liže'ena' na' besyə'əyo'e, na' leczə gwso'o beṇə' lchol ca'. Nach Jeso'osən' gože' lega'aque': —ĹEchejle'ele de que guac gona' par niç yeļ'ilen'?

Nach gwse'ene': —Chejle'eto' Xanto'.

29 Nach Jeso'osən' gwdane' jlaoga'aque'ena', na' gože' lega'aque': —Yeļ'ile, chedə' chonlilažə'əle nada'.

30 Nach besyə'əle'ine'. Na' Jeso'osən' bene' mendad cui no əso'elene' dižə' ca naquə bene' par niç besyə'əle'ine'.

31 Bixa na' besa'aque' na' gatə'ətežə ja'aque' doxen Galilean' jəsyə'əye'elene' beṇə' dižə' ca naquə de'en haben Jeso'osən' len lega'aque'.

Jeso'osən' beyone' to beṇə' mod

32 Na' catə' besa'ac beṇə' ca' babesyə'əle'ina', le'e besə'əžinte beṇə' yoble zjənche'e to beṇə' mod, na' yo'o yaz de'e xio'onə' yichjla'ažda'ogüe'ena'.

33 Jeso'osən' bebeje' de'e xi'onə' na' le'e benete be'ena'. Na' beṇə' zan ca' besə'əle'i can' goquan' besyə'əbanchgüeine', na' gosə'əne': —Chio'o beṇə' Izrael de'e nechən' bable'icho ca naquə miļagr de'en chon benga.

34 Pero na' beṇə' fariseo ca' gosə'əne': —Gwxiye' de'en chnabia' de'e xio' ca'anə' chaclənə' le' par niç chebeje' de'e xi'onə'.

Jeso'osən' cheyašə' cheži'ilaže'e beṇə'achən'

35 Na' Jeso'osən' len disipl che' ca' ja'aque' yo'odao' che to to yež na' to to syoda gan' mban Galilean' na' gwduxjue'ine' beṇə' dižə' güen dižə' cobən' can' ŋabia' Diozan' notə'ətežə beṇə' so'e latjə. Na' beyone' yoguə beṇə' ca' chsa'acšene len bitə'ətežə yižgüe' de'en chse'ine'. 36 Na' Jeso'osən' ble'ine' beṇə' zan ca' zjəsə'ənao le' na' beyašə' beži'ilaže'e lega'aque' chedə' gočbe'ine' chsa'acžejlaže'e naclən' so'one' na' gočbe'ine' caguə no zo no gaquəlen lega'aque' len yoguə de'en chəsə'əžaglaogüe'ena'. Gwsa'aque' ca xilə' bian' cui

no xanga'acquab zo par əgwy'e lega'acquab. ³⁷ Nach gože' disipl che' ca': — Nitə' beṇə' zan beṇə' yoso'ozenague' che' Diozən' catə' se'enene' xtiže'enə'. Na' gwxaquə'ələbəga'aque' ca to cwseš xen de'en chetoba'. Na' chyažda' beṇə' zan əsa'aclene' nada', la' to čhōpgale nitə'. ³⁸ De'e na'anə' lenabe Xancho Diozən' əselə'əche' beṇə' zanch par əsa'aclene' chio'o yetobcho cwseš che'enə'.

10

Jeso'osən' gwleje' beṇə' šižin' ca' par əsa'aque' apostol

¹ Jeso'osən' betobe' disipl che' ca' šižin' na' bnežjue' lega'aque' yelə' guac par nič əsa'aque' yesyə'əbeje' de'e xio' zjəyo'o zjəyaz lo'o yichjla'aždao' beṇə', na' par nič əsa'aque' yesyə'əyone' beṇə' bitə'ətezə' yizgüe' de'en chse'ine' na' bitə'ətezəchlə' de'e chsa'acquene'.

² Quinga zjəle beṇə' šižin' ca': Simon ben' leczə' le' Bed, na' Ndres beṇə' bišə' Bedən', na' xi'in Sebedeon' Jacob len Juannə', ³ na' Lip na' Bartolome, na' Tomas, na' Matio ben' goquə' beṇə' gochixjw, na' Jacob xi'in Alfeo, na' Lebeo, ben' leczə' le' Tadeo, ⁴ na' Simonnə' ben' ben txen len partid Cananistən', na' Jod Iscariot ben' bdie' Jeso'osən' lao na' beṇə' contr ca'.

Jeso'osən' bsele'e disipl che' ca' šižin' jəsə'ədixjui'e xtiže'enə'

⁵ Na' catə' Jeso'osən' bsele'e beṇə' šižin' quinga jəsə'ədixjui'e xtiže' Diozən', gože' lega'aque': — Chselə'a le'e žje'ele xtiže' Diozən' len yeziquə'əchlə' beṇə' Izrael ca'. Na' bito əžja'acle laž beṇə' ca' cui zjənaquə' beṇə' Izrael, na' nic əžja'acle yež ca' zjəchi' Samaritan'. ⁶ Le'e žja'ac porzə gan' ža' beṇə' Izrael beṇə' bazjəmbiayi' chedə' bitonə' so'ombi'e Diozən'. ⁷ Le'e žja'ac na' le'e žjətixjue' de que babžin ža' Diozən' ben' zo yoban' nabi'e con notə'ətezə' beṇə' əso'e latjə.

⁸ Le'e yeyon beṇə' chsa'acšene, na' le'e yeyon beṇə' ca' chse'i yizgüe' de'en ne' lepr, na' le'e yosban no beṇə' bagwsa'at, na' le'e yebej de'e xio' zjəyo'o zjəyaz lo'o yichjla'aždao' beṇə'. Diozən' babene' le'e yelə' guac che'enə' dadzə' par gonle de'e quinga, de'e na'anə' le'e gaclen beṇə' ca' dadzə'.

⁹ Bitobi gonle probnid gua'ale, ni mech de or, de plāt, o de cobr lo'o bols mech chelen' lao co'ole nežən'. ¹⁰ Na' nic gua'ale bsod, o yeto xcamisle, nic gua'ale yel, na' nic goxə'əle garrot. Ca naquə' le'e chonle xšina'anə' zaquə'əle par gon beṇə' de'e ye'ej gaole gan' selə'a le'enə'.

¹¹ Na' gatə'ətezə' syoda o yež gan' əžinle, lenab šə zo to beṇə' güen beṇə' yebei əgüialaogüe'e le'e liže'enə'. Na' na'atezə' sole xte catə'əch yesa'acle. ¹² Na' catə' əžinle liže'enə', le'e gguape' diox, na' le'e nabləžə' so cueze' binlo len yichjla'ažda'ogüe'enə'. ¹³ Na' šə na' nitə' beṇə' chse'enene' yesə'əzo yesə'əbezəga'aque' binlo len yichjla'ažda'oga'aque'enə', na' gaquə' can' ənabləžə'əle par yesə'əzo yesə'əbezəga'aque' binlo. Pero šə bito no zo no chon ca so cueze' binlo len yichjla'ažda'ogüe'enə', bito gaquə' ca de'en bagwnabləžə'əlen'. ¹⁴ Na' gatə'ətezə' əžinle ga cui nono yebei əgüialao le'e, na' nic əgwzenague' chele, le'e yesa'ac liž be'enə' o yežən'. Na' catə' yesa'aclen', əgws'i'ins ni'alēn' par yežib bišten' de'en gwžianə', nič əgwlo'ile beṇə' ca' de que de'e malən' chso'one' cui chesə'əzenague' xtiže' Diozən' de'en cho'elen'.

¹⁵ Diozən' bene' par byinj yi' na' sofr lao syoda Sodomān' na' syoda Gomorran' por ni che' de'en cui bosozenague' che'. Na' de'e li' əchnia' le'e, catə' əžin ža gon Diozən' castigw zejlicane che' yoguə' beṇə' chso'on de'e malən', beṇə' ca' cui yosə'əgüialao le'e yesə'əzəquə'əzi'iche' clezə' ca beṇə' ca' gwnitə' Sodomān' na' Gomorran'.

Gaquə de'e saquə'əzi'icho

¹⁶ Le'e gon xbab de que nada' əselə'a le'e žjətixjue'ele xtiža'anə' len beṇə' ca' gwxaquə'əlebe ca bež, na' le'e gwxaquə'əlebele ca xilə' dao' ladjoga'aque'enə', chedə' beṇə' ca' se'enene' so'ote' le'e can' chso'on bež ca' chso'otəb xilə' dao'. Pero le'e cheyalə' gacle lechguale beṇə' xenlažə' na' lechguale beṇə' bib par len lega'aque'. ¹⁷ Nita' beṇə' so'one le'e lao na' beṇə' gwnabia' ca' por ni che de'en chonlilažə'əle nada' na' yesə'əyine' le'e lo'o yo'odao' chega'aque' ca'. De'e na'anə' le'e čhiljažə' naclən' gonle par nič cui gacle lao na' beṇə' contr ca'. ¹⁸ Nach leczə por ni che de'en chonlilažə'əle nada' nita' beṇə' yesə'əche'əxaxje' le'e lao no goberṇador, na' lao no rei. Na' catə' gaquə ca' güe'ele xtiža'anə' lao beṇə' gwnabia' ca', beṇə' Izrael len beṇə' cui zjənaquə beṇə' Izrael. ¹⁹ Pero catə' yesə'əche'əxaxje' le'e lao beṇə' ca', bito cuec yichje nac yoži'ile xtiža'əga'aque'enə'. Lao or na'atezə Diozən' əgwzejni'ine' le'e bin' cheyalə' ənale. ²⁰ La' caguə le'ezən' güe'ele xtiža'anə', Spirit che Xacho Diozən' əgwzejni'in le'e bin' cheyalə' nale.

²¹⁻²² Na' yoguə' beṇə' ca' cui zjənombia' Diozən' yesə'əgue'ine' le'e chedə' chonlilažə'əle nada', na' xte no bišə'əle na' no xale so'one' le'e lao na' beṇə' par nič so'ote' le'e, na' leczə xte no xi'inle so'one' le'e lao na' beṇə' ca' so'ot le'e. Pero šə sotezə sole gonlilažə'əle nada' xte catə'əch əžin ža gatle, nachən' žjəyezole len Diozən'. ²³ Šə beṇə' nita' to yež yesyə'əlague' le'e, le'e yesa'actele na' žjəya'acle ga yoblə. Diozən' bsele'e nada' golja' beṇə'ach, na' de'e li čhnia' le'e bitonə' yeyož güe'ele xtiža'a lao yoguə' beṇə' Izrael ca' catə'ən yida' de'e yoblə.

²⁴ Nezele can' naquən catə' to beṇə' čhsede' len to maestr, bito əṇacho naque' beṇə' blaoch ca maestrən', na' to mos bito naque' blaoch ca xane'enə'. ²⁵ Na' ben' čhsed bito cheyalə' gone' xbab so'on beṇə' güenč len le' cle ca chso'one' len maestr čhe'enə'. Le'egatezə ca' mosən' bito cheyalə' gone' xbab so'on beṇə' güenč len le' cle ca chso'one' len xane'enə'. Nita' beṇə' čhesə'əne' chona' txen len de'en čhna'bia' de'e xio' ca' de'en le Beelsebo. Nadan' naca' Xanle na' naquə'chxe yesə'əne' che le'e nacle displ čhia'.

Cheyalə' žebcho castigw de'en gon Diozən' čhio'o

²⁶ Na' la'anə'əczə yoso'očhi' yoso'osaquə' beṇə' le'e laogüe de'en cui chse'ejni'ine' de que chonle can' chene'e Diozən' bito žeble lega'aque'. Guaquə can' na dicho de'en na: "Yoguə'əloł de'en ngašə' na'a gwžin ža la'alaon, na' yoguə' əloł de'e cui no gwse'ejni'i antslə leczə gwžin ža se'ejni'i beṇə' len." ²⁷ De'e zan de'en čhsed chlo'ida' le'e de'en cui čhsed chlo'ida' yeziquə'əchlə beṇə'. Na' le'e ža, legwsed legwlo'in yoguə'əloł beṇə', na' le'e gon par nič beṇə' zan se'ejni'ine'en. ²⁸ Bito cheyalə' žeble beṇə' ca' so'ot le'e, chedə' lega'aque' bito gaquə bi so'onene' yichjla'ažda'olen'. Cheyalə' žeble Diozən', la' len' nape' yelə' čhna'bia' par əgwžia'yi'e cuerp čhelen' len yichjla'ažda'olen' lo'o yi' gabilən'.

²⁹ Nezele de que byin dao' ca' bitobi zjəzaquə'ətequəb, pero bito nacho tob gat sin cui əneze Xacho Diozən'. ³⁰ Na' ca' naquə čhio'o ža, de'e tant chaque Diozən' čecho xte nezene' balə yišə' yichj to tocho žia la'anə'əczə nezecho bito bi zjəzaquə' yišə' yichjchon'. ³¹ De'e na'anə' bito žeble, chedə' zaquə'əch le'e cle ca' bia zan byin dao'.

Cheyalə' güe'echo dižə' len beṇə' de que nombi'acho Jesocrisən'

³² Na' notə'ətezle šə cho'ele dižə' len beṇə'achən' de que chejle'ele čhia', leczə ca' nada' gua'a dižə' len Xa'anə' ben' zo yoban' de que nacle xi'ina'. ³³ Na'

notá'atezle šə cho'e le dižə' len beṇačhən' de que bito chejle'e le chia', leczə ca' nada' gua'a dižə' len Xa'anə' ben' zo yoban' de que bito nacle xi'ina'.

Yesə'adilə beṇə' por ni che de'en bida Jeso'osən'

³⁴ Bitó gonle xbab de que beṇə' ža' yežlyo nga yesə'əzo yesə'əbeze' binlo len ljuēžga'aque' laogüe de'en bida'. Bitó yesə'əzo yesə'əbeze' binlo len ljuēžga'aque' laogüe de'en bida' sino yesə'ədile'. ³⁵ Laogüe de'en babida' yedilə beṇə' byo len x'e'enə' na' no'olan' len xne'enə', na' yedilə xo'oliž beṇə' len taobin' che'enə'. ³⁶ Entr lo'o yo'ozəga'aque' yesyə'anite'e contr.

³⁷ Notá'atezle šə chaquele che xale o che xna'ale mazəchlə can' chaquele chia' nada' bito zaquə'əle par gacle disipl chia'. Le'egateza ca' šə chaquele che xi'inle mazəchlə can' chaquele chia' leczə bito zaquə'əle par gacle disipl chia'. ³⁸ Na' notá'atezle šə laogüe de'en chaquele yoso'oči' yoso'osakuə' beṇə' le'e o so'ote' le'e to le'e yag coroz de'e nan' bito chonlilažə'əle nada', bito zaquə'əle par gacle disipl chia' šə ca'. ³⁹ Notá'atezə beṇə' chaquene' gone' par nič cui či' saque'e o par nič cui no so'ot le', be'enan' cuiayi'. Na' notá'atezə beṇə' chsanlažə' cuine' či' saque'e o so'ot beṇə' le' por ni chia', be'enan' əbane' zejlicane.

Beṇə' ca' nitə' mbalaz cata' yesyə'əžine' yoban'

⁴⁰ Notá'atezə beṇə' yebeine' güialaogüe' le'e nacle disipl chia', nadə'əczan' yebeine' güialaogüe' šə ca'. Na' šə yebeine' güialaogüe' nada' leczə Dioz na'anə' əgüialaogüe', Dioz ben' bselə' nada'. ⁴¹ Beṇə' ca' chso'e xtižə' Diozən', mbalaz gaquə' čhega'aque' catə'an yesyə'əžine' yoban', na' notá'atezə beṇə' yebeine' güialaogüe' lega'aque', leczə mbalaz soe' catə'an yežine' yoban'. Na' mbalaz gaquə' che beṇə' ca' chso'on can' chazlažə' Diozən' catə'an yesyə'əžine' yoban'. Na' notá'atezə beṇə' yebeine' güialaogüe' lega'aque', leczə mbalaz soe' catə'an yežine' yoban'. ⁴² Notá'atezə beṇə' chnežjue' la'anə' tbaszə nis ye'ej be'enə' chonlilažə' nada', de'e liczə gona' ca soe' mbalaz cata'an yežine' yoban', la'anə'əczə ben' bnežjue' nisan' cuitec bi zaqu'e len beṇačhən'.

11

Juannə' bsele'e čopə disipl che' gan' zo Jeso'osən'

¹ Catə' beyož ben Jeso'osən' mendad can' so'on disipl che' ca' šižin, beze'e latjən'. Na' gwyeye' yež ca' zjəchi' do na' jšed jəlo'ine' xtižə' Diozən' len beṇə' ca' ža'anə'.

² Na' ca naquə' Juannə' ben' bčhoa beṇə' nis, lao die' ližyan' benene' dižə' ca' naquə' yogua' de'en chon Jeso'osən' ben' bselə' Diozən' par chaclene' nasyon Izraelən', nach Juannə' bsele'e čopə disipl che' ca' gan' zo Jeso'osən', ³ jse'eže'ene': —žElen' ben' naquən əselə' Diozən' o šə soto' lez yidə beṇə' yoblən'?

⁴ Nach Jeso'osən' gože' lega'aque': —Le'e žjəya'ac na' le'e žjəyeyež Juannə' doxen can' chenele na' can' chle'ile chona'. ⁵ Bable'ile chona' par nič bałə beṇə' lčhoj chesyə'əle'ine', na' bałə beṇə' coj chesyə'əde', na' yebałə beṇə' cuež chesyə'əyenene'. Na' leczə bable'ile bena' par nič bałə beṇə' gwse'i yizgüe' de'en ne' lepr babesyə'əyaquene'. Bable'ile bosbana' bałə beṇə' guat, na' babenele cho'a dižə' güen dižə' cobə chia'anə' len beṇə' yašə' ca'. ⁶ Mbalaz zo beṇə' chejle'e de que Diozən' bsele'e nada'.

⁷ Nach catə' besyə'əsa'ac disipl che' Juannə', nach Jeso'osən' be'elene' beṇə' ca' zjəndobən' xtižə' Juannə', gože' lega'aque': —žNacxa naquə' ben' jəle'itgüeczele latjə dašən'? žEšəyechə šayen chaque'? Bitó. ⁸ žNacxan' goque'

catə' jəle'ilene'? ¿Enyaze' lachə' šao'? ¿Ešə bito? la' beṇə' ca' zjənyaz lachə' šao' nite'e yo'o güenchgua ca no liž rei. ⁹ ¿Noxan' jəle'ilen' ža? ¿Eto profet ben' cho'e xtižə' Diozən'? De'e li naque' to profet. Pero əchnia' le'e, caguə con to profetan'. ¹⁰ Che bengan' nyojən le'e Xtižə' Diozən' nan:

Nada' Dioz əselə'a to beṇə' cuialaogüe' gü'e le' xtiž'o'onə' par niç nitə' beṇə' probnid par əso'elaogüe' le' catə'an yido'.

¹¹ De'e li əchnia' le'e, notono no beṇə'ch le'e so beṇə' naquə'ch beṇə' blaoch ca Juan ben' chchoa beṇə' nis. Na' notə'ətezəchlə beṇə' gü'e le' latjə ṇabia' Diozən' le', la'anə'əczə bito naque' beṇə' bla, gwžin ža catə' šejni'ichene' chia' clezə ca Juannə'.

¹² Dezd catə'an gwzola Juannə' gwduxjui'e xtižə' Diozən' na' bcho'e beṇə' nis xte ža ṇeža beṇə' zan choso'ozenague' xtižə' Diozən' na' chəsə'əyiljlaže'e naclə so'one' par niç ṇabia' Diozən' lega'aque'. ¹³ Catə' cuinə' solao gwzene Juannə' xtižə' Diozən', con lei de'en bzoj de'e Moizezən' na' de'en boso'ozoj yoguə' profet ca', de'e ca'azan' bzejni'in chio'o che Diozən'. ¹⁴ Xtižə' Diozən' de'en nyojən nan de que yeto beṇə' yedəyen can' ben Liazən' ben' be' xtižə' Diozən' cana'. Na' che Juan na'anə' boso'ozoje' žalə' šejle'ele. ¹⁵ Le'e žia nagle de'e chene, legwzenag xtižə'anə'.

¹⁶ ¿Nac əgwsaquə'əlebetgüeida' le'e mbanle ṇa'a? Egwsaquə'əlebeda' le'e ca bidao' chedə' cuiczə bi de žleb chele. Ca naquə' bidao' ca' catə' nitə'əbo' do gan' chac ya'a chse' ljuežjga'acbo': ¹⁷ "Bento' legr, bito gwyo'olažə'əle, na' babento' bgüine bgüež, peor." ¹⁸ Juannə' bide' laole nga. Bito gü'e'ej gwdaošaogüe'e can' chse'ej chsa'o beṇə' yoblə. Nach gwnale che': "Yo'o yaz de'e xio'onə' yichjla'azdaogüe'enə'." ¹⁹ Na' nada', Diozən' bsele'e nada' golja' beṇə'ch. Na' chle'le che'ej chaogua' can' che'ej chaole. Na' nale chia' de que naca' beṇə' lia na' beṇə' gü'e'ezo, na' lecza nale de que naca' migw che beṇə' gochixjw ca' na' migw che yeziquə'əchlə beṇə' ca' chso'on de'e mal'. Pero na' nachia' de que Dioz na'anə' naque' le'ezelaogüe beṇə' sin' por ni che can' chso'on beṇə' ca' choso'ozenag che'.

Yež ca' gan' cui boso'ozenague' che Jeso'osən'

²⁰ Nach Jeso'osən' be'e xtižə' beṇə' ca' ža' yež ca' gan' bene' de'e zan de'e zaquə' yesyə'əbanene', na' gwdi'e' lega'aque' chedə' bito besyə'ədinjene' xtolə'əga'aque'. Nach gwne': ²¹ —jProbchguazə le'e beṇə' Corasin! jProbchguazə le'e beṇə' Betsaida! Beṇə' ca' nitə' Tiro na' Sidon le'e besyə'ədinjeteine' xtolə'əga'aque'enə' žalə' blo'iga'acda'ane' yelə' guac chia'anə' ca de'en bablo'ida' le'e. Žalə' goquə' ca', sa'azlje' lachə' zešə' na' zosə'əža'alja cuinga'aque' de par niç sa'acbe'i beṇə' de que babesyə'ədinjene' xtolə'əga'aque'enə'. ²² Echnia' le'e saquə'əzi'ichle clezə ca beṇə' ca' nitə' Tiro na' Sidon catə' əžin ža gon Diozən' castigw zejlicane che yoguə' beṇə' chso'on de'e malən'. ²³ Le'e nitə'əle Capernaunnə', chonle xbabən' de que Diozən' gonchgüe' le'e yelə' bala'an, pero bito gone' le'e yelə' bala'an, sino gone' le'e castigw zejlicane de'en cui chejle'ele chia'. Žalə' bena' de'e zaquə' yesyə'əbane beṇə' ca' gwnitə' Sodoman' can' babena' laole nga, besyə'ədinjene' xtolə'əga'aque'enə' žalə' ca' na' ne'e chi' syodan' žalə' ca'. ²⁴ Echnia' le'e, saquə'əzi'ichle clezə ca beṇə' ca' gwnitə' Sodoman' catə' əžin ža gon Diozən' castigw zejlicane che yoguə' beṇə' chso'on de'e malən'.

Beṇə' ca' so'onlilažə' Jeso'osən' nite'e mbalaz

²⁵ Na' lao orən' Jeso'osən' bene' orasyon lao Diozən' gwne': —Xa', len' chnabi'o beṇə' ža' yoban' na' yežlyon'. Na' choṇa' yelə' choxcwlen

chio' de que babzejni'ido' balə beṇə' can' che'endo' so'e latjə nabi'o yichjla'ažda'oga'aque'enə'. Bzejni'ido'on beṇə' ca' gwsa'acbe'i chəsə'ayažjene' no əgwseđ əgwlo'i lega'aque' na' bito bzejni'ido'on beṇə' ca' chso'on xbab de que zjənaque' beṇə' sin' na' beṇə' zjənyejni'i. ²⁶ Beno' ca' ža Xa', čhedə' can' gwyazlažo'o.

²⁷ Nach gože' beṇə' ca' ža'anə': —Xa'anə' babene' lao na'a chona' par nich chombia' beṇə' le'. Le' nombi'ayane'e nada', na' nada' nombi'ayana'a le'. Na' beṇə' ca' bagwleja' par zjənombi'e Xa'anə', chona' par nich zjənombi'ene' na' notono no nochlə zjənombia' Xa'anə' na' ni nada'. ²⁸ Legonlilažə' nada', le'e zole trist tant pesad chaquele chonle yoguə' de'e ca' chəsə'əne' chene'e Diozən' gonle. Nada' gona' ca sole mbalaz. ²⁹ Legon can' nona' mendad gonle na' legwzenag de'en əgwzejni'ida' le'e. Nada' naca' beṇə' xenlažə' na' beṇə' gažjwlažə' na' gona' ca sole mbalaz lo'o yichjla'ažda'olen'. ³⁰ Na' de'en nona' mendad gonle bito naquən pesad, na' de'en chsed chlo'ida' bito naquən zdebə.

12

Boso'olechj disipl ca' trigon' ža dezcanzən' par gwsa'ogü'e'n

¹ Na' gozaquən to ža dezcanz Jeso'osən' gwdie' len disipl che' ca' gan' nyaž trigon', na' disipl che' ca' gosə'ədone', nach gosə'əlechje' trigon' na' gwsa'ogü'e'n. ² Na' besə'əle'i balə beṇə' fariseo ca' can' gwso'on disipl ca', na' gwse'e Jeso'osən': —Bgüiašc can' chso'on disipl chio' ca' žin de'e cui de lsens goncho ža dezcanzən'.

³ Nach gož Jeso'osən' beṇə' fariseo ca': —žEcabi za'alazə'əle de'en bablable can' ben de'e Rei Dabin' catə' le' na' beṇə' ljuēžje' ca' gosə'ədone'? ⁴ Gwyeye' lo'o yo'odao' əblaonə' nach gwdaogüe' yetxtil de'en bazjəncua' bχoz ca' par Diozən', na' Dabin' bnežje'en gwsa'o beṇə' ljuēžje' ca' la'əṇə'əczə' cui zjənaque' bχoz. Na' yetxtilən' cui de lsens par gao con to beṇə' len letg bχoz ca' chac sa'ogü'e'n. ⁵ žEna' cabi za'alazə'əle ca de'en bablable le'e lei de'en bzoj de'e Moizezən' can' chso'onczə bχoz ca' mendad che yo'oda'onə' yoguə' ža dezcanz na' bito chso'omba'əne' žanə'. Na' bito ṇacho de que zjənape' dolə' por ni che de'en chso'one' mendadən' ža dezcanzən'. ⁶ Echnia' le'e, nada' zoa' nga zaquə'əcha' cle ca yo'odao' əblaonə'. ⁷ Xtižə' Diozən' de'en nyojən nan: "Che'enda' yeyaša' yeži'ilažə'əle beṇə', caguə' tlaozə' gotle bia yixə' par güe'ela'ole nada'." Žalə' chejni'ile bi zejennə' bitolja'əṇale che disipl chia' quinga de que zjənape' dolə' por ni che šə' bin' bagwso'one' ža dezcanzən'. ⁸ Echnia' le'e de que Diozən' bsele'e nada' golja' beṇə'ch na' naquən lao na'a əṇia' bin' naquən güen goncho ža dezcanzən'.

Beyaue to beṇə' mbižə šla'a ne'enə'

⁹ Na' cata' Jeso'osən' beze'e latjan', na' gwyo'e to lo'o yo'odao' chechon'. ¹⁰ Na' lo'o yo'odao' na' zo to beṇə' bambižə šla'a ne'enə', nach beṇə' fariseo ca' gwse'e Jeso'osən': —žEde lsens par yeyoncho beṇə' xinj lao ža dezcanzən'?

Gwse'ene' ca' nič əžel de'en yesə'əde'ine' par əsa'ogüe' xyə contr Jeso'osən'.

¹¹ Nach Jeso'osən' gože' lega'aque': —Šə' nita' əsə' dao' čele na' əxorə' tob lo'o yech zitjw lao ža dezcanzən', žəcabi le'e yebejteleb lo'o yechən' lao žanə'?

¹² Na' lechguale zaquə'əch to beṇə' cle ca to xilə' dao'. Na' əchnia' le'e de lsens gaquə'lencho beṇə' lao ža dezcanzən'.

¹³ Nach Jeso'osən' gože' be'enə' mbižə ne'inə': —Bli na'onə'.

Nach catà' bli na' be'ena' le'e beyacten can' naquà de'en yešl'a'a. ¹⁴ Na' beṇà' fariseo ca', catà' besa'aque' yo'oda'onà' bosoxi'e naclà so'one' par so'ote' Jeso'osàn'.

To de'en bzoj de'e profet Isaiazàn' che Jeso'osàn'

¹⁵ Gocbe'i Jeso'osàn' can' bosoxia' beṇà' fariseo ca', na' gwze'e gwyje' ga yoblà. Beṇà' zan jàsə'anaogüe'ene' nach Jeso'osàn' beyone' beṇà' ca' chsa'acšene. ¹⁶ Na' bene' mendad cui no əso'elene' dižà' de que Dioz nan' bsele'ene' par gaqualene' nasyon čhega'aque'ena'. ¹⁷ Bene' ca' par nič goc complir can' bzoj de'e profet Isaiazàn' che' nan:

¹⁸ Bengan' naque' xmosa', ben' gwleja' par gone' can' chazlaža'anà'.

Chacchgüeida' čhe', na' cheba chezaquə'əlaža'a len le'.

Na' nada' əselà'a Spirit čhia'anà' sotezə son len le'.

Na' beṇà' zjənaquə beṇà' Izrael len beṇà' cui zjənaquə beṇà' Izrael čixjue'ine' lega'aque' naquə'n čheyalə' so'one'.

¹⁹ Bito gaquəyože' beṇà', nic gosye'e,

na' nic əne' zižjo lao lqueyən' par əse'ene beṇà' bin' ne'.

²⁰ Gwnežjue' fuers balor che beṇà' ca' chsa'acbe'i cui bi fuers balor čhega'aque' de par so'one' de'e güen,

na' yezi'ixene' čhe beṇà' ca' chsa'aque'ne' cui no yezi'ixen čhega'aque'.

Yoguà de'e can' gone' par nič əžin ža so'on beṇəčən' can' chazlaže'ena'.

²¹ Na' beṇà' zjənaquə beṇà' Izrael len beṇà' cui zjənaquə beṇà' Izrael yešə'əbeze' gaquəlene' lega'aque'.

Gosə'ane' de que Jeso'osàn' bebeje' de'e xio' ca' len yelə' guac che Beelsebo

²² Na' zo to beṇà' Ičhoł, na' nacte' beṇà' mod, na' yo'o yaz de'e xio'onà' lo'o yichjla'ažda'ogüe'ena' na' jso'ene' lao Jeso'osàn'. Na' Jeso'osàn' bebeje' de'e xio'onà' yo'o yaz yichjla'aždao' be'ena' na' le'e bele'iteine' na' gocte bene'. ²³ Na' yoguà' beṇà' ca' besə'əle'i can' goquə lechguale besyə'əbanene'. Nach gwse' ljuežjga'aque': —Ənaquəlizə be'enga ben' chbezcho yidə lao dia čhe de'e Rei Dabin'?

²⁴ Na' catà' gwse'ene beṇà' fariseo ca' dižà' quinga gwse'e bałə beṇà' ca': —Bitobi yelə' guac napə benga. Con chebeje' de'e xio' ca' len yelə' guac čhe Beelsebo de'en čhnabia' de'e xio' ca'.

²⁵ Gocbe'i Jeso'osàn' can' gwso'on beṇà' fariseo ca' xbabən', nach gože' lega'aque': —Šə beṇà' ža' to nasyon əsa'aque' čhoplə na' yešə'ədile' entr lega'aque', əgwžiai' nasyon čhega'aque' na'anà' šə ca'. Na' leczə ca' šə beṇà' nitə' to syoda əsa'aque' čhoplə na' yešə'ədile' entr lega'aque', leczə cuiayi' syoda čhega'aque' na'anà' šə ca'. Na' šə to family əsa'aque' čhoplə na' yešə'ədile' entr lega'acze' leczə yenit family čhega'aque' na'anà' šə ca'. ²⁶ Le'egatezə ca' šə Satanasən' yebej cuinei lo'o yichjla'aždao' beṇà' leczə cuiayi' yelə' čhnabia' čhei na'anà' čhedə' čhdiləlen cuinei žalə' ca'. ²⁷ Le'e nale de que nada' chebeja' de'e xio' ca' yo'o yaz yichjla'aždao' beṇà' len yelə' guac che Beelsebon'. Žalə' naquən can' nalenə', leczə zejen de que beṇà' ljuežjle ca' čhəsyə'əbeje' de'e xio' ca' zjəyo'o zjəyaz yichjla'aždao' beṇà' len yelə' guac čhei žalə' ca'. Beṇà' ljuežjle ca' se'e le'e de que clelən' nale čhia' nada' can' chebeja'anə'. ²⁸ Na' de'en chebeja' de'e xio' ca' len yelə' guac čhe Spirit čhe Diozən', chlo'in de que babžin ža čhene'e Diozən' güe'ele latjə nabi'e le'e.

²⁹ Nezecho notono no gaquə šo' liž to beṇà' gual par žjəlane' šinłaze' ca' sin cui əgwčheje' xan yo'onà' to do. Con šə əgwčheje'ene' guaquə cuane' šinłaze' ca'.

³⁰ Šə cui chonle txen len nada', chonle contr nada'. Na' šə cui chonle ca se'ejle' beṇə' chia' zeje dižə' de que chonle par niḥ cui yoso'ozenague' chia'anə'.

³¹ De'e na'anə' əchnia' le'e, bitə'ətezə de'e mal de'en chonle, na' bitə'ətezə dižə' mal de'e cho'ele, Diozən' yezi'ixene' chele šə yedinjelen, pero notə'ətezele šə güe'ele dižə' contr Spirit che Diozən' cuat yezi'ixen Diozən' chele. ³² Na' notə'ətezele šə güe'ele dižə' contr nada', la'aṇə'əczə Diozən' bsele'e nada' golja' beṇəch, gozi'ixencze' chele šə yedinjele can' nale, pero šə güe'ele dižə' contr Spirit che Diozən', cuat yezi'ixen Diozən' chele na'a na' batə'ətezə.

Segon can' naquə frot de'e chbia to yaguən' nezecho nac naquə yaguən'

³³ Nezecho de que to yag frot naquən yag güen o cui naquən yag güen segon nac naquə frot cheinə'. Ca'aczən' nacia' šə naquən' nacle. ³⁴ Lechgualə beṇə' mal nacle. Bitoczə gaquə güe'ele dižə' güen chedə' nacle beṇə' la'aždao' mal. Yoguə'əte dižə' de'e chchoj cho'achon' la' lo'o yichjla'ažda'ocho na'anə' za'an. ³⁵ To beṇə' la'aždao' xi'ilažə' cho'e dižə' güen, chedə' la' can' nan lo'o yichjla'ažda'ogüe'e nan' cho'e dižə'. Na' to beṇə' la'aždao' mal cho'e dižə' mal la' can' nan lo'o yichjla'ažda'ogüe'ena'. ³⁶ Na' əchnia' le'e, catə'an əzin ža gon Diozən' castigw zejlicane che yoguə' beṇə' ca' chso'on de'e malən', cana' yoguə'əloj beṇə' yesə'ədie' cuent che yoguə' dižə' de'en bagwso'e de'e bitobi žjəzaquə'an. ³⁷ Na' segon dižə' de'en cho'ele Diozən' choglaogüe'en chele šə napple dolə' o šə cui napple dolə'.

Beṇə' mal ca' chəsə'ənabe' gon Jeso'osən' to miłagr

³⁸ Nach baļə beṇə' ca' choso'osed choso'olo'i lei de'en bzoj de'e Moizezən', na' beṇə' fariseo ca' gwse'e Jeso'osən': —Maestr, che'eneto' gono' to miłagr par niḥ ənezeto' šə de'e liczə Dioz nan' bsele'e le'.

³⁹ Nach Jeso'osən' gože' lega'aque': —Le'e mbanle na'a, naquəchgualə beṇə' yichjla'aždao' mal, na' bito chzenagle che Diozən'. Na' chṇable gona' to miłagr par niḥ ənezele šə le Dioz nan' bsele'e nada'. Pero bito gona' can' chṇablenə'. De'en gon Diozən' len nada' par niḥ ənezele de que le'ena' bsele'e nada', gwxaquə'əleben ca de'en bene' len de'e profet Jonasan'. ⁴⁰ Antslə ze'e šeje' Niniben' Diozən' bene' par niḥ to beļ ya'a xen gwdebob le', na' šoṇə ža šoṇə yel gwyo'e lo'o le'ebən' catə' beyebəb le' mbancze'. Na' ca' naquə nada', gata' na' əgaša'a, na' te šoṇə ža šoṇə yel yebana' ladjo beṇə' guat ca' par niḥ ənezele de que Diozən' bsele'e nada' golja' beṇəch. ⁴¹ Na' catə' əzin ža gon Diozən' castigw che yoguə' beṇə' chso'on de'e malən', ža na' yesyə'əban de'e beṇə' Ninibe ca' na' lao Diozən' yesə'əcuiše' le'e mbanle na'a, chedə' besyə'ədinjəne' xtolə'əga'aque'ena' catə' de'e Jonasan' gwdixjue'ine' lega'aque' can' na' Diozən'. Le'e gonšc xbab de que nada' zoa' nga naquəcha' beṇə' blaoch cle ca' de'e Jonasan', na' bito chzenagle chia'. ⁴² Na' leczə žan' gon Diozən' castigw che yoguə' beṇə' chso'on de'e malən', de'e no'olən' gwnabia' beṇə' ca' gwnitə' galən' chla' bgüižən' cuiten lichalə yebane' len yeziquə'əchlə beṇə' guat ca' na' lao Diozən' əgwcuše' le'e mbanle na'a. Ca' naquə le' ža, gwze'e Seba gan' naquə zitə'əchgua na' bide' nga par bzenague' dižə' sin' de'en be' de'e Rei Salomonṇə' len le'. Na' nada' zoa' nga naquə'əcha' beṇə' blaoch cle ca de'e Salomonṇə', na' bito chzenagle chia'.

De'e xi'onə' yeyo'on de'e yoblə lo'o yichjla'aždao' beṇə'

⁴³ Na' šə to de'e xio' de'en yo'o yaz yichjla'aždao' beṇə' yechojən nach lažə'an nil na'alə yeyiljən ga son mbalaz. Na' šə bitobi latjə želən, nach ənan: ⁴⁴ “De'e yobləczə žjəyežə'a yichjla'aždao' be'ena' gan' gwyo'o gwyaza' antslə.” Na'

yeyejan de'e yoblə gan' zo ben'. Catə' le'in de que bacheyone' xbab güen na' bazoche' binloch na' caguə nochlə yo'o yaz yichjla'aždao'güe'enə' de'en əgwžon yeyo'on de'e yoblə, nach yeyo'on. ⁴⁵ Nach žjəyetoban yegažə de'e xio' ca' de'en zjənaquə maləch ca len na' txenna' so'on lo'o yichjla'aždao' be'ena'. Na' šə bagwso'onən ca', bachaquəch mal che be'ena' clezə can' goc che' antslə. Can' goquə len benga leczə ca'ana' gaquə che le'e mbanle na'a de'en nactecle be'nə' la'aždao' mal.

Xna' Jeso'osən' na' biše'e ca' besə'ažine' gan' zoe'

⁴⁶ Necho'ete Jeso'osən' dižə' chsed chlo'ine' be'nə' zan quinga, catə' bžin xne'ena' len biše'e ca'. Na' zitə'alə gosə'əbeze' gosə'ənabe' so'elene' le' dižə'.

⁴⁷ Entr be'nə' ca' nitə' choso'ozenague' xtižə' Jeso'osən', to'e gože' Jeso'osən': —Babla' xna'onə' len bišo'o ca' na' nite'e na'ate chse'enene' əso'elene' le' dižə'.

⁴⁸ Nach Jeso'osən' gože' ben' gwna ca': —Nitə' be'nə' yoblə be'nə' zjənaque' ca xna'anə' na' ca biša'a.

⁴⁹ Nach bli na' Jeso'osən' blo'e disipl che' ca' na' gože' be'ena': —Be'nə' quinga bazjənaque' ca xna'a, na' zjənaque' ca biša'a. ⁵⁰ Can' naquan len notə'ətezə be'nə' chso'one' can' chazlažə' Xa' Diozən' ben' zo yoban', zjənaque' ca xna'a na' ca biša'a na' ca zana'.

13

Jempl che be'nə' gozən'

¹ Na' lao ža na'atezə gwza' Jeso'osən' yo'onə' jəchi'e cho'a nisda'onə'. ² Nach tant be'nə' zan juisy besə'ədoba gan' chi'ena' xte benən byen gwyo'e gwchi'e to lo'o barcon'. Na' yoguə' be'nə' ca' besə'ədobən' gosə'anite'e lao yoxən'. ³ Nach Jeso'osən' bsd blo'ine' lega'aque' len zan jempl. Na' be'elene' lega'aque' to jemplan', bsaquə'əlebene' xtižə' Diozən' ca trigon'. Nach gwne': —To be'nə' gwze'e zde' güen trigw. ⁴ Na' lao chose' trigon' bałən jəsə'əchazən cho'a nez, na' bia žia xile'e bia chaš le'e yoban' gwsa'ob len. ⁵ Na' yebałən jəsə'əchazən ga naquə lao yej, na' bitotec bi yo žia lao yejən', de'e na'anə' le'e bla'acten.

⁶ Pero na' catə' beža'achgua besə'əcuadən na' le'e gosə'əbižten, la' bitobi loi gwso'on. ⁷ Na' yebałən besə'əgo'onən lao yo ga nchixə xsa yešə' na' bla'aquan tən len xsa yešə'ənə', na' besə'əlolə' yag yešə' ca' lega'aquan'. ⁸ Na' yebałən besə'əgo'onən lao yo šao' na' bla'aquan'. Bałən gosə'əbian to gueyoa güejə, na' yebałən gosə'əbian gyon guejə, na' yebałən gosə'əbian šichoa güejə. ⁹ Le'e žia nagle de'e chene, legwzenag.

Be'nə' ca' cui gwse'ejle'e che Jeso'osən' bsd blo'ine' lega'aque' len jemplan'

¹⁰ Nach gosə'əbiguə' disipl che Jeso'osən' laogüe'enə' na' gwse'ene': —žBixchen' chsed chlo'ido' be'nə' quinga len jempl?

¹¹ Na' Jeso'osən' gože' lega'aque': —Diozən' chone' par nič le'e nezele de'en cui no gwneze antslə de que le' nabi'e con notə'ətezə be'nə' soe' latjə. Pero be'nə' cui chse'ejle'e xtižə' ana' bito chac se'ejni'ine' de que nabi'e be'nə' soe' latjə.

¹² Notə'ətezə be'nə' choso'ozenague' ca de'en bachzejni'i Diozən' lega'aque', Diozən' gwzejni'ichene' lega'aque' par nič šanch de'en se'ejni'ine'. Pero na' notə'ətezə be'nə' cui choso'ozenague' che Diozən' ca de'en chsed chlo'ine' lega'aque', Diozən' yeque'e de'en chse'ejni'ine'ena' la'anə'əczə latə'alasə de'en bagwse'ejni'ine'. ¹³ De'e na'anə' chsed chlo'ida' be'nə' quinga len jemplan' cheda' chesə'əle'ine' de'en chona' pero bito chsa'ache'ine' bi zejən, na' la'anə'əczə chse'enene' xtižə'ana', bito chse'ejni'ine'en. ¹⁴ Len be'nə' quinga bachac complir can' bzoj de'e profet Isaiazən', gan' nan:

De'e li yenele, pero cabi šejni'ile bi zeje de'en yenele.

Na' de'e li le'ile, pero cabi gacbe'ile bi zejen de'en le'ilen'.

¹⁵ Benə' Izrael quinga cuicəə bi rson chsa'aze', baçh nažjocəə yichjla'ažda'oga'aque' na'anə'.

Chse'enene' pero bito chse'ejni'ine' bin' zeje de'en chse'enene'.

Na' chesə'əle'ine' pero cabi chsa'acbe'ine' bi zeje de'en chəsə'əle'ine'enə' çhedə' bazjanaque' beṇə' la'aždao' žod.

Žalə' bito zjanaque' beṇə' la'aždao' žod, gwse'ejni'ine' bi zejen de'en chse'enene'enə', na' sa'acbe'ine' bi zeje de'en chesə'əle'ine'enə'.

Gosyə'ədinjljei xtola'əga'aque'enə', na' gwso'elje' latjə yocobə Diozən' yichjla'ažda'oga'aque'enə' žalə' chse'ejni'ine'en na' žalə' chsa'acbe'ine'en.

¹⁶ Pero na' le'e ža, leçhualə mbalaz zole çhedə' chle'ile de'e ca' chona' na' chache'ile bi zejen, na' chzenagle xtižə'anə' na' chejni'ilen. ¹⁷ De'e li əchnia' le'e, zan de'e profet na' zan de'e beṇə' ca' yeziquə'əchlə beṇə' bosə'ozenag che Diozən' cana' gwse'enene' yesə'əle'ine' de'en chle'ile, pero bitoch golə' yesə'əle'ine'en. Na' gwse'enene' əse'enene' de'en chenele' pero bito golə' se'enene'en.

Jeso'osən' gwne' bi zeje jempl che beṇə' güen trigon'

¹⁸ Na' le'e leğwzenag, quingan' zeje jempl che beṇə' güen trigon'. ¹⁹ Xtižə' Diozən' gwxaquə'əleben ca de'en byažən'. Nita' beṇə' chse'enene' dižə' can' chon Diozən' chnabi'e con notə'ətezə beṇə' chso'e latjə, pero bito chse'ejni'ine'en, na' chžin gwxiye'enə' chonən par niç cuich choso'ozenague' che xtižə' Diozən'. De'e na'anə' gwxaquə'əlebaga'aque' ca trigon' de'en jesə'əchaz cho'a nezən'. ²⁰⁻²¹ Na' nita' beṇə' chse'ene xtižə' Diozən' na' šložga chesyə'əbeine' chso'one'en chega'aque'. Na' catə' choso'ochi' choso'osaquə' beṇə' lega'aque' par niç cui se'ejle'e xtižə' Diozən', le'e chesyə'əbejyichjtie' cuich choso'ozenague' chei. Na' de'en chso'one'en gwxaquə'əleben ca de'en chac che trigon' de'en besə'əgo'əṇən lao yej. ²² Le'egatezə ca' naquən len beṇə' ca' chse'ene xtižə' Diozən', pero na' lao mbanga'aque' yežlyo nga, chesyə'əlal chesyə'əžejene' chso'on xmendadga'aque' por ni che chse'enene' yesə'əni'e. Pero yoguə' de'en chso'one' chxoayaguən lega'aque', chonən par niç cui çha'oxen xtižə' Diozən' lo'o yichjla'ažda'oga'aque'enə'. Ca de'en chso'one'enə' gwxaquə'əleben ca de'en chac che trigon' de'en besə'əgo'əṇən lao yo gan' nchixə xsa yešə'. ²³ Pero yebałə beṇə' chse'enene' xtižə' Diozən' na' chse'ejni'ine'en na' choso'ozenague' chei. Na' de'en choso'ozenague' che xtižə' Diozən' gwxaquə'əleben ca trigon' de'en besə'əgo'əṇən lao yo šao'. Bałən gosə'əbian to gueyo güejə, na' yebałən gosə'əbian gyon güejə, na' yebałən gosə'əbian šichoa güejə.

Jempl che trigon' na' bgüeyxtil

²⁴ Gwde na' Jeso'osən' gozo'elene' beṇə' ca' yeto jempl, goze'e lega'aque': — Yelə' gwnabia' che Dioz ben' zo yoban' gwxaquə'əleben ca de'e nga goquə. To beṇə' jeze' trigw biṇnə' yoba che'enə'. ²⁵ Na' do še'elə catə' cui no gwsa'acbe'i gwyej to beṇə' contr che' jeze' xsa bgüeyxtil gan' banazə xan' yežlyon' trigon', na' beyož goze' bgüeyxtilən' beze'e. ²⁶ Na' tš'i'izə bla'acquən, na' trigon' gwzolaə chbian. Na' catə' ja'ac xmos xan trigon', gwsa'acbe'ine' nchixə trigon' len bgüeyxtil. ²⁷ Nach jəya'aque' gan' zo xanga'aque'enə' par jəsyə'əyežə'ene': “Señor, çacaguə trigw biṇnə' gozo' yoba çhio'onə'? ¿Bixçhen' nchixən len bgüeyxtilən'?” ²⁸ Nach xanga'aque'enə' gože' lega'aque': “To beṇə' contr çhia'anə' jən ca'.” Nach xmose' ca' gwse'ene': “¿Eche'endo' əlažə'əto

bgüeyxtilän'?" ²⁹ Nach xanga'aque'enä' gože' lega'aque': "Bito əlažə'əlen. La' nxož əlažə'əlente trigon'. ³⁰ Ljyennə' par na'a. Guaquə yesə'əcha'on txen, pero na' chona' mendad catə' bagolə yetoble cwsešən', cana' zgua'atec yebele bgüeyxtilän' na' gonlen bnoj par əse'eyən. Nach te na' žjəyetoble trigon' əgwcuə'aša'olen."

Jempl che xsa moztas

³¹ Gwde na' gozo'elene' beṇə' ca' yeto jempl, gože': —Yelə' gwnabia' che Dioz ben' zo yoban' gwxaquə'əleben ca to xsa moztas de'en gozə to beṇə' yežlyo che'enä'. ³² Xsa moztasən' naquan le'ebeyožə de'e dao' rizə' lao bitə'əchlə semiy. Pero na' catə' chla'an, chcha'ochən ca bichlə yixə' cuan na' chaquən yag cha'o dao'. Na' xte bia ca' zjəzo xile'e chjse'en ližda'oga'aquəb lao xoze'e ca'.

Jempl che xna' cuazin'

³³ Nach gozoe' yeto jempl, gozne': —Yelə' gwnabia' che Diozən' ben' zo yoban' gwxaquə'əleben ca xna' cuazin' de'en gwlec no'olan' len to rob yezj par nič becha'o doxenən.

Jeso'osən' bzejni'ine' beṇə' porzə len jempl

³⁴ Yoguə' de'e quinga bsed blo'i Jeso'osən' beṇə' ca' besə'əžag gan' zo'enə'. Bsed blo'ine' lega'aque' porzə len jempl, bitobi bichlə gwne' par bzejni'ine' lega'aque'. ³⁵ Ca' ben Jeso'osən' par nič goc complir can' bzoj de'e profetan' che', gan' nan:

Əgwsed əgwlo'iga'acda'ane' porzə len jempl,

na' əgwzejni'iga'acda'ane' de'en cui no gwṇeze antslə de'en bgašə' dezd catə'ən gwxe yežlyon'.

Jeso'osən' bzejni'ine' bi zeje jempl che trigon' na' bgüeyxtilän'

³⁶ Na' catə' beyož bsed blo'i Jeso'osən' beṇə' ca' zjəža' gan' zo'enə', bese'e lega'aque', na' beza' le' len displ che' ca'. Na' catə' besyə'əžine' yo'o gan' nite'enä' besyə'əyo'e lo'ina'. Nach gosə'əbiguə' displ che' ca' cuite'enä' gwse'ene': —Bzejni'išguei neto' bi zejen jempl che xsa bgüeyxtilän'.

³⁷ Nach Jeso'osən' gože' lega'aque': —Quingan' zejen: Diozən' bsele'e nada' golja' beṇəč na' gwxaquə'əlebeda' ca ben' gozə trigw biṇnə'. ³⁸ Na' doxen yežlyo nga gwxaquə'əleben ca yoba gan' goze' trigw biṇnə', na' beṇə' ca' chso'e latjə chnabia' Diozən' lega'aque' gwxaquə'əlebəga'acquene' ca trigw biṇnə'. Na' beṇə' ca' chso'e latjə chnabia' de'e gwxiye'enä' lega'aque' gwxaquə'əlebəga'acquene' ca xsa bgüeyxtilän'. ³⁹ Gwxiye'enä' gwxaquə'əleben ca beṇə' contrən' gozə xsa bgüeyxtilän' gan' banyaž trigw biṇnə'. Na' žan' gaquə juisyən' gwxaquə'əleben ca tyempən' yosyo'otobe' trigon'. Na' anglən' zjənaque' ca beṇə' ca' yosyo'otobə cwsešən'. ⁴⁰ Na' can' gac che bgüeyxtilän' yosyo'otobe'en šeyən', can' gaquə che beṇə' ca' chnabia' de'e gwxiye'enä' lega'aque' catə' əžin ža gaquə juisyən'. ⁴¹ Diozən' bsele'e nada' golja' beṇəč na' catə' əžin žan', nada' əsela'a angl chia' ca' par yosyo'otobe' yoguə' beṇə' ca' chesə'əgo'oyele'e beṇə' yoblə so'one' de'e malən', na' yosyo'otobte' yeziquə'əchlə beṇə' ca' chso'on de'e malən'. Na' angl ca' yesyə'əbeje' lega'aque' nič cuich nite'e txen len beṇə' ca' bagwso'e latjə chnabia' Diozən' lega'aque'. ⁴² Nach yosə'əsele'e lega'aque' lao yi' gabil' gan' se'eye' zejlīcane. Na' lao yesə'əžaglaogüe'enä' yesə'əbežyaše'e na' sa'oyež leyga'aque'enä'. ⁴³ Na' cana'ach Xancho Diozən' gone' par nič beṇə' ca' chso'on de'e güennə' nite'e len le' na' əsa'aque' ca yelə' chey che'eni' che bgüižən' catə' yesyə'əžine' yoban' gan' chnabia' Diozən'. Le'e žia nagle de'en chene, legwzenag.

Jempl che mech xen de'en ngašə' to lao yežlyo

⁴⁴ Yelə' chnabia' che Diozən' ben' zo yoban' gwxaquə'əleben ca de'e nga goquə. To beṇə' jəyedi'e mech xen de'e ngašə' to lao yežlyo. Nach bocuaše'en de'e yoblə. Na' de'e tant bebeine' de'en jəyedi'e mechən' nach jəyete'e yoguə'əloł bi de'e de che' par nič gwxi'e yežlyon' gan' ngašə' mechən'. Ca mbalazən' gwzo be'enə' can' mbalazən' nita' beṇə' ca' chso'e latjə chnabia' Diozən' lega'aque'.

Jempl che to perla de'en lechguale zaque'e

⁴⁵ Na' yelə' gwnabia' che Diozən' ben' zo yoban' leczə gwxaquə'əleben ca de'e nga goquə. Zo to comersyant beṇə' cha'o chsi' na' cheyote'e perlas de'en lechguale naquən xoche. ⁴⁶ Na' bželene' to perla de'e lechguale zaquə'an. Na' leczə beyote'e yoguə'əlołte de'en de che' na' gwxi'e perlan'. Ca'aczən' gwxaquə'əlebe beṇə' ca' chsa'acbe'i de que de'e žialao əso'e latjə nabia' Diozən' lega'aque'.

Jempl che yixjw bel

⁴⁷ Na' yelə' gwnabia' che Diozən' ben' zo yoban' leczə gwxaquə'əleben ca de'e nga goquə. Nita' balə beṇə' gwxen bel ca' na' boso'ozal'e'e yixjw bel chega'aque'enə' lo'o nisdə'onə' na' gwxenən yoguə' clas bel ya'a ca'. ⁴⁸ Nach catə' bagwža' bia zannə' lo'o yixjon', besyə'əbeje' yixjon' yobizlə, na' gosə'əbi'e bia ca' zjənaquə' güen par əsa'ogüe', na' gosə'əgüe'eb lo'o žomə ca'. Na' bia ca' cui zjənaquə' güen, gosə'ocho'one'eb. ⁴⁹⁻⁵⁰ Ca'aczən' gaquə' che yoguə' beṇə' catə'an əžin ža gaquə' juisyən'. Angl ca' yesə'əbeje' beṇə' mal ca' na' yosə'əzale'e lega'aque' lo'o yi' gabilən' gan' yesə'əbežyaše'e na' sa'oyejə leyga'aque'enə' tant yesə'əžaglaogüe'.

⁵¹ Nach Jeso'osən' gože' disipl che' ca': —žEzyejni'ile yoguə' de'e ca' bablo'ida' le'e?

Nach gwse'ene': —Zyejni'ito'on Xanto'.

⁵² Nach Jeso'osən' gože' lega'aque': —Notə'ətezle šə chac chsed chlo'ile Xtižə' Diozən' de'en byoj canə', na' šə leczə chzenagle can' chsed chlo'ida' de que cheyalə' güe'ele latjə nabia' Diozən' le'e, nachən' guac əgwsed əgwlo'ile beṇə' chopten. Na' gwxaquə'əlebele ca to xan yo'o beṇə' napə yoguə' de'en chyažj chčhine family che'enə'.

Jeso'osən' beyeje' Nasaretən'

⁵³ Nach catə' beyož be'elen Jeso'osən' disipl che' ca' jempl ca', beze'e latjən' len disipl che' ca'. ⁵⁴ Na' beyeje' Nasaretən' gan' gwcha'ogüe'. Na' jəyessed jəyelo'ine' beṇə' ca' lo'o yo'odao' chega'aque'enə'. Na' lechguale besyə'əbanene' len xtiže'enə', na' gwse'e ljuežjga'aque': —žNacxa goquən' nezene' de'e ca' de'en naquə' de'e sin'? na' žnacxa chac chone' miłagr ca' chone'? ⁵⁵ Nombi'achone', la' naque' xi'ın carpinterən'. Na' xne'enə' naque' no'olən' le' Maria. Nombi'acho beṇə' biše'e Jacobən', jwsen', Simonə' na' Jodasən'. ⁵⁶ Na' leczə beṇə' zane' ca' nita' lažcho nga. žNacxa chaquən' cho'e dižə' ca' ža, na' chacte chöe' miłagr?

⁵⁷ Na' de'en gwso'one' xbab de que Jeso'osən' naque' con to beṇə' gwlaž chega'aque', de'e na'anə' bito gwse'ejle'e che'. Nach gože' lega'aque': —La'aṇə'əczə beṇə' zan chse'ejle'e che beṇə' ca' chso'e xtižə' Diozən' na' chso'e lega'aque' yelə' bala'an, beṇə' gwlaž chega'aque' ca' na' family chega'aque' ca' bito chse'ejle'e chega'aque'.

⁵⁸ Na' Jeso'osən' bene' con to čhopzə miłagr Nasaretən' čhedə' bito gwse'ejle'e che'.

14

Quingan' goquə got Juan ben' bčhoa beṇə' nis

¹ Na' ca nan' Erodən' ben' naquə gubernador che Galilean', benene' dižə' ca naquə yoguə'əlo' de'e güen de'en chon Jeso'osən'. ² Nach gože' xmosə' ca': — Bengan' de'e Juannə' ben' bčhoa beṇə' nis. Babebane' ladjo beṇə' guat ca' na' de'e na'anə' chac chone' miłagr ca'.

³⁻⁴ Quingan' goquə gwso'ote' Juannə': Erodən' beque'e Erodiasən' ca xo'ole', len Erodiasən' naque' xo'olə Lip biše'enə'. Na' Juannə' gože' Erodən': "Malən' beno' beca'o no'ol che beṇə' bišo'on par naque' xo'olo'." Na' de'en gož Juannə' Erodən' ca' de'e na'anə' Erodən' bene' mendad gosə'əzene' Juannə' na' gosə'əgüe'ene' ližya na' bosə'əčheje' ni'ane'e ca' gden.

⁵ Erodən' gone'ene' gote' Juannə', pero bitobi benene' le' čhedə' bžebe' bi so'on beṇə' ca' gwse'ejle'e che Juannə' de que cho'e xtižə' Diozən'. ⁶ Pero na' catə' gwso'one' lni ža la Erodən', bi'i no'ol che Erodiasən' bya'abo' lao beṇə' ca' gwnitə' lniṇə'. Na' lechgualə bebei Erodən' can' bembə'ona'. ⁷ Na' tant beyazlažə' Erodən' can' bya'a no'ol güegon', bzoe' jorament de que əgwnežjue'ebo' bitə'ətezə əṇabebo' le'. ⁸ Na' por consejw che xna'abo'onə' gožbo' Erodən': — Ben nada' na'atec na'a yichj Juannə' ben' chčhoa beṇə' nis žian to lao plat.

⁹ Na' gwzo Erodən' trist catə' beyož gož no'ol güegon' le' ca', pero na' ca naquə babzoe' jorament len lebo' lao beṇə' ca' zjənaquə combidən', bešaze' mendad gaquə can' gwnabe no'ol güegon' le'. ¹⁰ Ca' goquən' bene' mendad jəsə'əčhogue' yen Juannə' lo'o ližya gan' yo'enə'. ¹¹ Na' bosə'ozie' yichj de'e Juannə' to lao plat par jso'en lao bi'i no'olən' na' bnežjwbo'on xna'abo'onə'.

¹² Nach disipl che de'e Juannə' jəsyə'əxi'e cuerp čhe'ena' na' jəsə'əcuaše'en. Gwde na' ja'aque' gan' zo Jeso'osən' na' jse'əže'ene' can' bagoquən'.

Jeso'osən' bguaogüe' gueyə' mil beṇə'

¹³ Na' catə' bene Jeso'osən' can' goquə che de'e Juannə', beze'e latjən' len disipl che' ca' na' besyə'əyo'e to lo'o barcw par jəya'aque' latjə dašən' de'en de yeš'la'alə nisdə'ona'. Na' beṇə' ca' ža' yež ca' zjəchi' galə'əzə nisdə'ona' gwse'enene' rson galən' bazjəda Jeso'osən'. Na' gwsa'aque' lažga'aque'enə' ja'aque' yobižlə jəsə'əšague' Jeso'osən' yeš'la'alə nisdə'ona'. ¹⁴ Na' catə' bžin Jeso'osən' cho'a nisdə'ona', ble'ine' beṇə' zan ca' na' beyašə' beži'ilaže'e lega'aque'. Na' beyone' yoguə' beṇə' ca' chsa'acšene. ¹⁵ Na' catə' bachal, gosə'əbiguə' disipl che' ca' laogüe'enə', na' gwse'ene': — Zocho to latjə ga cui no nla', na' bagwde or par gaocho xgüe. Bselə' beṇə' quinga yež ca' de'en zjəchi' galə'əzə par nič žjəsə'ədilje' de'e se'ej əsa'ogüe'.

¹⁶ Na' Jeso'osən' gože' lega'aque': — Bito cheyalə' žjəya'aque'. Le'e güe'ega'aque' de'e se'ej əsa'ogüe'.

¹⁷ Nach gwse'ene': — Čhopga bel ya'a čhechon' de na' gueyə'əga yetxtil.

¹⁸ Nach Jeso'osən' gože' lega'aque': — Le'e žjəxi'in ni.

¹⁹ Nach ben Jeso'osən' mendad gosə'əbe' beṇə' zan ca' lao yixye daquə'əna'. Na' gwxi'e yetxtil ca' gueyə'ə na' bel ya'a ca' čhopə. Na' bgüe' yobalə be'e yelə' choxcwlen che Diozən'. Gwde na' bzoxje'en nach bnežjue'en disipl che' ca' par gosə'əyise' che che beṇə' ca'. ²⁰ Na' yogue'e gwsa'ogüe'en xte ca gwse'eljene'.

Nach pedas ca' de'en besyá'əga'annə', bosyo'otobe'en, na' goquən šizīn žomə'.
 21 Na' beṇə' ca' gwsa'o yetxtilən' naquə ca do gueyə' mil beṇə' byo cui cuent
 no'olə na' cui cuent bidao'.

Jeso'osən' gwze'e tlaō nisdə'onə'

22 Gwde na' Jeso'osən' bene' mendad yesyə'əyo'o disipl che' ca' lo'o barcon'
 par yesyə'əbialaogüe' yesyə'əlague'e yeš'la'alə nisdə'onə' žlac bega'an le' bzeine'
 beṇə' zan ca' dižə'. 23 Na' beyož bzei Jeso'osən' beṇə' ca' dižə', gwloe' to lao
 ya'a par jene' orasyon toze'. Dezd golte gwzo tozə Jeso'osən' lao ya'anə'. 24 Na'
 ca naquə barcon' gan' zesyə'əyo'o disipl che' ca', bazdan gwchojte nisdə'onə',
 nžiguə'əxaxj nisən' len chedə' chas chatə' nisdə'onə' por ni che chechj be'enə'
 clelə. 25 Na' do šbaļ beyetj Jeso'osən' ya'anə' na' gwze'e tlaō nisdə'onə' par
 gwweje' galən' zja'ac disipl che' ca'. 26 Na' catə' besə'əle'i disipl che' ca' le' zde'
 lao nisdə'onə', lechguale besə'əžebe' xte gwso'osye'e gosə'əne': —iTo beṇə' guat
 chle'i cho chda tlaō nisən'!

27 Na' le'e bolgüižte Jeso'osən' lega'aque', gože': —Leyebei. Nada'anə'. Bito
 žeble.

28 Nach Bedən' gože'ene': —Xantə', šə le le'enə', gwna nada' sa'a tlaō
 nisdə'onə' yida' gan' zo'onə'.

29 Nach gož Jeso'osən' le': —Da Bed.

Na' le'e bchojte Bedən' lo'o barcon' na' gwzolao gwze'e tlaō nisdə'onə' par
 zde' gan' zo Jeso'osən'. 30 Pero na' catə' gocbe'ine' ca fuertən' chechj be'enə',
 bžebe' na' gwzolao chyše'e lo'o nisən'. Nach bisye'e gože' Jeso'osən': —Xana',
 bosla nada', bachetja' xan nisən'.

31 Na' le'e blite na' Jeso'osən' bexe'ene'. Nach gože' Bedən': —Bixčhen'
 gocžejlažo'o? Gwwejle'ech chia'.

32 Na' catə' beyo'o Jeso'osən' len Bedən' lo'o barcon', le'e gwlezte be'enə'.

33 Na' beṇə' ca' ža' lo'o barcon' gwso'elaogüe'e Jeso'osən', gwse'ene': —De'e ličza
 len' naco' Xi'in Diozən'.

Jeso'osən' beyone' beṇə' chsa'acšene beṇə' nitə' Genesaret

34 Nach gwza'ach barcon' xte bžinən cho'a nisdə'onə' to latjə de'en nzi'
 Genesaret. Na' besyə'əchoje' lo'o barcon'. 35 Na' beṇə' ža' do Genesaretən'
 besyə'əyombi'e Jeso'osən', na' bosə'əsele'e rson yoguə' yež ca' de'en zjachi'
 galə'əza de que Jeso'osən' babžine' lažga'aque'enə'. Na' beṇə' ca' ža' yež ca'
 gosə'əche'e yoguə' beṇə' chsa'acšene lao Jeso'osən'. 36 Nach gosə'ənbene'
 Jeso'osən' šə güene'ene' yesə'əgane' lox xadon che'enə'. Na' yoguə' beṇə' ca'
 gosə'əgan len besyə'əyaquene'.

15

Dižə' de'en chchoj cho'achon' chonən manch la'ažda'ochon'

1 Na' baļə beṇə' fariseo ca' na' beṇə' ca' choso'osed choso'olo'i lei de'en bzoj
 de'e Moisezən' gwsa'aque' Jerosalenṇə' na' besə'əžine' gan' zo Jeso'osən', na'
 gwse'ene': 2 —¿Bixčhen' disipl chio' ca' bito chesə'ənaogüe' costombr ca' de'en
 bosyo'ocua'anlen de'e xaxta'ocho ca' chio'o? ¿Bixčhen' cui chosyo'one'e zan
 las antslə ze'e sa'ogüe' can' chonto'?

3 Nach Jeso'osən' gože' lega'aque': —Ca naquə le'e ža, žbixčhen' chbejyichjle
 cui chonle can' non Diozən' mendad goncho na' con naozechle costombr
 chelen'? 4 Diozən' none' mendad can' goncho, gwne': "Le'e gwnežjo yelə'
 bala'an xaxna'ale", na' "Notə'ətezle šə chžia chnitə'əle xaxna'ale cheyalə'
 gatle." 5 Pero le'e nale de que šə beṇə' əne' de que babnežjue' Diozən' mech o

bien de'en cheyalə' əgwnežjue' xaxne'enə' par gaquəlene' lega'aque', na' bitoch bi cheyalə' əgwnežjue' xaxne'e. ⁶ Na' de'en chonle ca', bachonle lei che Diozən' ca to de'e cui bi bi zaque'e nich ca' naozechle costombr chelen'. ⁷ Le'e nacle beṇə' goxoayag. Chonle cayanə'n bzoj de'e profet Isaiazən' chele, gan' nan:

⁸ Beṇə' Izrael ca' chesə'əne' de que nada' Diozən' chso'elaogüe'e,

pero caguə do lažə'əga'aque'en chso'elaogüe'e nada'.

⁹ Bitobi zejen de'en chso'elaogüe'e nada'

chedə' la' choso'osed choso'olo'ine' beṇə' costombr de'en gwsa'aljlažə' beṇə'chən'.

¹⁰ Nach Jeso'osən' bozolgüiže' beṇə' zan ca' zjənžaguən' par nich gosə'əbigue'e laogüe'enə', na' gože' lega'aque': —Legwzenag de'e nga əṇia' le'e nich šejni'ilen'. ¹¹ Bito nacho de que de'en che'ej chaochon' chonən manch la'ažda'ochon'. Echnia' le'e, dižə' de'en chchoj cho'alən', lenṇə' chonən manch la'ažda'olen'.

¹² Nach gosə'əbiguə' disipl che Jeso'osən' laogüe'enə' gwse'ene': —ĲEbito gočbe'ido' de que beṇə' fariseo ca' lechguəle besə'əže'e catə' gwse'enene' xtižo'onə'?

¹³ Na' Jeso'osən' gože' lega'aque': —Gwžin ža catə' Xa' Diozən' ben' zo yoban' gwžiyai'e yoguə'əloj beṇə' cui choso'ozenag che'. Egwžiyai'e lega'aque' can' choncho catə' chlāžə'əcho yixə' ca' chla'ac lo'o yel. ¹⁴ Ljosə'əye beṇə' fariseo ca'. Zjənaquəga'aque' ca to beṇə' lchol beṇə' chene'ene' cue'e nez yeto beṇə' lchol. Chso'onczə' yichjlaoga'aque' cui choso'ozenague' che Diozən' na' choso'osedene' beṇə' de'en cui naquə de'e li. Nezecho de que beṇə' lcholən' bito gaquə cue'e nez yeto beṇə' lchol la' txennə' žjəsə'əbixə' to lo'o yech.

¹⁵ Nach Bedən' gože' Jeso'osən': —Bzejni'išguei neto' bi zejen de'en gwnao' de que de'en che'ej chaochon' bito chonən manch la'ažda'ochon'.

¹⁶ Nach gož Jeso'osən' lega'aque': —ĲElecza lenle bito chejni'ile de'e quinga bagwnia' le'e? ¹⁷ ĲEcabi nezele de que yoguə' de'en che'ej chaochon' chjche'en lo'o le'echon' na' chžin or cheden? ¹⁸ Pero əchnia' le'e, yoguə' dižə' de'en cho'echon' chəsə'əchojən yichjla'ažda'ochon', na' šə cho'echo dižə' malən', len chso'onən manch yichjla'ažda'ochon'. ¹⁹ Na' lo'o yichjla'aždao' beṇə'ch na'anə' chchoj yoguə' xbab mal quinga, ca de'en nan so'ote' beṇə', na' nan yoso'ogo'o xtoga'aque', na' nan yesə'əbejyichj no'ol chega'aque' o ben' chega'aque' par yesyə'əzolene' beṇə' yoblə na' nan yesə'əbanga'aque' bi de che beṇə', na' nan so'onlāžə'əga'aque', na' nan yoso'ožia yoso'onite'e ljuežj beṇə'chga'aque'. ²⁰ Xbab mal ca' zjənac ca' chso'onən manch yichjla'ažda'ochon'. Na' bito ənacho de que de'en cui chona'acho zan las antslə ze'e gaoch chonən manch yichjla'ažda'ochon'.

To no'olə cui naque' beṇə' Izrael chonlilaže'e Jeso'osən'

²¹ Beza' Jeso'osən' latjən' len disipl che' ca' par ja'aque' galə'əzə gan' mbane Tiro na' Sidon. ²² Na' to no'olə beṇə' cui naquə beṇə' Izrael, gwze'e gan' mbane Tiro na' Sidon par jašague' Jeso'osən'. Na' gwne' zizjo' geto' Jeso'osən': —Xana', le' naco' xi'ṇ dia che de'e Rei Dabin'. Beyašə'əšguei neze'. To bi'i no'olə chia' yo'o yaz to de'e xio' lo'o yichjla'ažda'obo'onə' na' lechguəle chžaglaobo'.

²³ Pero Jeso'osən' bito boži'e xtiža' no'olən'. Nach disipl che Jeso'osən' gosə'əbigue'e cuite'enə' na' gwsa'atə'əyoine' le' gwse'ene': —Bosa'ašga no'olən' la' con naogüe' chio'o na' chata'əyoine' le' zizjo' par gaquəlene'one'.

24 Nach Jeso'osən' gože' lega'aque': —Diozən' bsele'e nada' gaquəlena' nasyon Izrael na'azən', la' lega'aque' gwxaquə'əlebəga'aque'ne' ca xilə' dao' bia zjənaquəžeje.

25 Nach no'olən' bgüigue'e bzo xibe' lao Jeso'osən', na' gože'ene': —Xana' go'onšgwei goclen neto'.

26 Na' Jeso'osən' gože'ene': —Bito naquən güen yeca'acho yelə' guao che xi'incho na' əgwnežjwchon gao xicoda'ocho.

27 Na' gocbe'i no'olən' bsaquə'əlebe Jeso'osən' beṇə' ca' cui zjənaquə beṇə' Izrael ca beco', nach gože'ene': —Leiczədo' Xana'. Pero xicocho ca' guaquə asa'ob pedas de'e chesə'əxopə' lao yon'.

28 Nach Jeso'osən' gože'ene': —No'olə, lechguale chonlilažo'o nada'. Gaaquələncza' le' can' che'endo'.

Na' lao or na' beyaque xi'in' no'olən'.

Jeso'osən' beyone' beṇə' zan beṇə' chsa'acsene

29 Gwde na' Jeso'osən' na' disipl che' ca' besa'aque' latjən' na' gwso'e nezən' de'en zda tcho'a nisdao' Galilean'. Nach gwse'epe' to lao ya'a na' jesə'əchi'e lao ya'ana'. 30 Na' besə'əžin beṇə' zan lao ya'a gan' zo Jeso'osən' len disipl che' ca'. Zjənche'e no beṇə' coj, na' no beṇə' lchoł, na' no beṇə' mod, na' no beṇə' nchog ni'ana'aga'aque', na' zjəlen beṇə' chse'i gwde gwde yižgü'e na' bosə'onite'e lega'aque' lao Jeso'osən'. Na' Jeso'osən' beyone' yogue'e. 31 Na' lechguale besyə'əbane beṇə' ca' cata' besə'əle'ine' can' ben Jeso'osən' beyone' beṇə' ca'. Besyə'əbanene' can' besyə'əne beṇə' mod ca', na' besyə'əyaque beṇə' ca' zjənchog no ni'ana'aga'aque'ena', na' besyə'əda beṇə' coj ca', na' besyə'əle'i beṇə' lchoł ca'. Nach yoguə'əloł beṇə' ca' gwso'elaogü'e Diozən'.

Jeso'osən' bguaogü'e tap mil beṇə'

32 Gwde na' Jeso'osən' goxe' disipl che' ca' na' gože' lega'aque': —Lechguale cheyašə'ada' beṇə' quinga. Bagoc šonə' ža nite'e nga len chio'o, na' bitobi de de'e sa'ogü'e. Na' bito che'enda' yosa'aga'aca'ane' sin cui sa'ogü'e' par ničh cui yesyə'əchołene' tnezən'.

33 Nach disipl che' ca' gwse'ene': —Gan' zocho nga naquən to latjə ga cui nono nla'. ĆGaxa əželecho de'e əsa'o yoguə' beṇə' zan quinga?

34 Nach Jeso'osən' gože' lega'aque': —ĆBalə yetxtil chechon' de'?

Nach gwse'ene': —Gažga yetxtil dao' zjəde na' to chopga beł ya'a dao'.

35 Nach Jeso'osən' bene' mendad yesə'əbe' beṇə' ca' lao yon'. 36 Na' gwxi'e yetxtil dao' ca' gažə na' len beł ya'a dao' ca', nach be'e yelə' choxcwlen che Diozən'. Gwde na' bzoxje'en bnežjue'en disipl che' ca' par gwso'e che yoguə' beṇə' ca'. 37 Na' yogue'e gwsa'ogü'e' xte ca gwse'eljene'. Nach pedas ca' de'en besyə'əga'anna' bosyə'otobə' disipl ca' len, na' goquən gažə žomə. 38 Na' beṇə' ca' gwsa'o yetxtilan' naquə tap mil beṇə' byo, bito cuent no'olə na' bito cuent bidao'. 39 Nach Jeso'osən' bose'e beṇə' ca'. Gwde na' gwyo'e to lo'o barcw len disipl che' ca' na' ja'aque' distrit gan' nzi' Magdala.

16

Gosə'əṇabene' Jeso'osən' gone' to de'e yesə'əle'ine' le'e yoban'

1 Na' goquən' balə beṇə' fariseo ca' na' beṇə' sadoseo ca' gosə'əbigue'e gan' zo Jeso'osən'. Na' gosə'əṇabe' gone' to miłagr de'en yesə'əle'ine' le'e yoban' de'en gwsa'aque'ne' cui gaquə gone'. 2 Nach Jeso'osən' gože' lega'aque': —Cata' chle'ile nlatjəcha le'e yoban' še'elə nach nale: “Goža'a gwxe chedə' nlatjəcha.” 3 Na' šə'chi' bejw cata'ən che'eni' nach nale: “Guaquə zag, la' chi'ichgua bejw.”

Benə' goxoayag le'e. Nezele šə gwaquə zag o šə gwaquə zeyə' catə'an chle'ile nac naquə le'e yoban', pero cabi chacbe'ile bi zeje de'e ca' chon Diozən' tyemp nga zocho na'a. ⁴ Le'e mbanle na'a lechguale beñə' la'aždao' mal nacle, na' bagwlejšyichje Diozən'. De'e na'anə' chnəble gona' to de'e le'ile le'e yoban' par niç ənezele šə Diozən' bsele'e e nada'. Pero bito gona' can' chnəblenə'. De'en gon Diozən' len nada' par niç ənezele de que le'ena' bsele'e nada' gwxaquə'əleben ca de'en bene' len de'e Jonasən' ben' be' xtižə' Diozən' cana'.

Na' beyož gwna Jeso'osən' ca', beze'e len disipl çe' ca' gan' ničə' beñə' ca'.

De'en chsed chlo'i beñə' fariseo ca' na' beñə' sadoseo ca' gwxaquə'əleben ca xna' cuazin'

⁵ Na' catə' besə'əžine' yešla'alə nisdəo' Galilean', disipl çe' ca' gwsa'acbe'ine' de que gwsa'anlaže'e yetxtil de'en əsa'ogüe'. ⁶ Nach Jeso'osən' gože' lega'aque': —Legapə cuidad len xna' cuazi çe beñə' fariseo ca' na' çe beñə' sadoseo ca'.

⁷ Pero disipl çe' ca' bito gwse'ejni'ine' bi zeje de'en gože' lega'aque' ca', nach gwse' ljuežjga'aque': —Gwne' ca' çhedə' gonlažə'əcho gua'əcho yetxtilən'.

⁸ Na' Jeso'osən' gocbe'ine' xbab de'en chso'one', nach gože' lega'aque': — çBixçhen' chonle xbab çe yetxtilən' de'en gonlažə'əle? çEcabi ne'e šejle'ele de que napa' yelə' guac par guaogua' le'e? ⁹ çEbito chejni'ile bi zeje miłagr ca' chona'? na' çəbagonlažə'əle can' bguaogua' gueya'a mil beñə' byo len gueyə'əzə yetxtil dao'? çEna' leczə bito za'aləžə'əle do bałə žomə pedas yetxtil ca' betoble de'en besyə'əga'an? ¹⁰ Na' ççhexa tapa mil beñə' byo ca' bguaogua' len gažə yetxtil dao'? çEza'aləžə'əle bałə žomə pedas yetxtil can' betoble gwde besyə'ədaogüe'ena'? ¹¹ çBixçhen' con benle xbab çe yetxtilən' catə'an gwnia' le'e gapple cuidad len xna' cuazi çe beñə' fariseo ca' na' çe beñə' sadoseo ca'?

¹² Nach disipl çe' ca' gwsa'acbe'ine' de que Jeso'osən' caguə bi'e dižə'an ca' çe xna' cuazin' de'en chəsə'əçhine' par checha'o yetxtilən' sino bi'e dižə'an ca' par niç cui yoso'ozenague' çe de'en choso'osed choso'olo'i beñə' fariseo ca' na' beñə' sadoseo ca'.

Bedən' gwne' çe Jeso'osən' de que Diozən' bsele'ene' par gaquəlene' nasyon Izraelən'

¹³ Jeso'osən' len disipl çe' ca' ja'aque' gan' mbane to syoda de'en nzi' Sesarea de Filipino. Nach Jeso'osən' gože' lega'aque': —De'e li Diozən' bsele'e nada' golja' beñəçh. Pero çbi chesə'əna beñə'? çnon' naca' nada'?

¹⁴ Nach gwse'ene': —Bałə' chesə'əne' de que naco' de'e Juan ben' bçhoa beñə' nis. Na' yebałə' chesə'əne' de que naco' Liaz ben' be' xtižə' Diozən' cana'. Na' yebałə' chesə'əne' de que naco' de'e profet Jeremias, o de que naco' yeto' beñə' be' xtižə' Diozən' cana'ate.

¹⁵ Nach gože' lega'aque': —Çhexa le'e, çbi nale non' naca' nada'?

¹⁶ Simon Bedən' gože'ene': —Len' naco' Crist ben' gwlej Diozən' par gaquəlene' nasyon çhechon', na' naco' Xi'in Dioz ben' zo zejlicəne'.

¹⁷ Nach Jeso'osən' gože'ene': —Simon xi'in Jonas, mbalaz zo' de'en gwnao' de'e ca'. Notono beñəçh bzejni'i le' de'e ca', tozə Xa' Diozən' ben' zo yoban', le'ena' babzejni'ine'en le'. ¹⁸ Na' nada' ənia' de que len' lio' Bed na' zejen dižə' yej. Na' can' nao' chejli'o çhia' gwxaquə'əleben ca to yej gual de'e gaquə gwçhincho par lan yo'o. Na' nada' yetoba' beñə' zan beñə' se'ejle'e de que naca' Xi'in Dioz can' chejli'o çhia' par niç ca' əsa'aque' tozə yoso'ocodə' ljuežje' so'elaogüe'e nada'. Na' bitobi gaquə so'on de'e xio' ca' par niç əžin ža catə' cuich no so'elao' nada'. ¹⁹ Na' gona' lao na'o zgua'atec le' go'o xtižə'anə'

len beṇə' zan par niç əso'e latjə n̄abia' Diozən' lega'aque', Dioz ben' zo yoban'. Na' lec̄zə gaquən lao na'o yo'o beṇə' ca' yoso'ocodə' l̄juežje so'ela'ogüe'e nada' bin' naquə güen so'one' na' ye'ega'aco'one' bi de'e ca' cui naquə güen so'one'. Na' Diozən' əgwzejni'ine' le' naquən' ye'ega'aco'one' par niç ca' yediḷən len de'en na Diozən'.

²⁰ Nach Jeso'osən' bene' mendad len lega'aque' de que ni toe' cui əso'e dižə' de que le' na'anə' naque' Crist ben' gwlej Diozən' par gaquəlene' n̄asyon c̄hechon'.

Jeso'osən' gw̄dixjue'ine' disipl che' ca' de que so'ot beṇə' le'

²¹ Na' ža na' Jeso'osən' gwzolaogüe' b̄sed blo'ine' disipl che' ca' de que cheyalə' šeje' Jerosalennə' na' gaque' lao na' beṇə' golə blao c̄he n̄asyon Izrael c̄hechon', na' lao na' b̄xoz əblao checho ca', na' lao na' beṇə' ca' choso'osed choso'olo'i lei de'en bzoj de'e Moizezən'. Na' gwne' de que yoguə' beṇə' ca' de'e zan de'e yosə'əchi' yosə'əsaque'e le' na' əso'ote' le'. Pero na' yeyon ža yebane' ladjo beṇə' guat ca'. ²² Nach Bedən' gwleje' Jeso'osən' lata' dao' ca'alə na' gože'ene': —X̄ana', Diozən' gaquəlene' le'. Bitoczə gac c̄hio' de'e quinga nao' nga.

²³ Pero na' Jeso'osən' gwyeçhje' bgüie' Bedən' na' gože' gwxiye'enə' de'en chnabia' yichjla'azdao' Bedən': —Gwchi'izə' ca'alə Satanas.

Nach gože' Bedən': —Bito che'endo' gona' can' non Diozən' mendad gona'. Chono' xbab c̄he de'en chacdo' gaquən güen na' bito chono' xbab naquən' chene'e Diozən' gaquə.

²⁴ Gwde na' Jeso'osən' gože' disipl che' ca': —Notə'ətezle šə che'enele gonlilažə'əle nada' na' gwzenagle c̄hia' cheyalə' əchoj yichjle de'en chene'ele gon c̄uinle par niç gonle con can' chene'e Diozən' na' bitobi gaquele c̄he de'en c̄hi' saquə'əle, la'anə'əczə šə so'ot beṇə' le'e to le'e yag coroz con gonlilažə'əle nada'. ²⁵ Notə'ətezə beṇə' chaquene' gone' par niç cui c̄hi' saque'e o par niç cui no so'ot le', be'enan' cuiayi'. Na' notə'ətezə beṇə' chsanlažə' cuine' c̄hi' saque'e o so'ot beṇə' le' por ni c̄hia', be'enan' əbane' zejlicane'. ²⁶ Bitobi de'e güen gaquə c̄he to beṇə' la'anə'əczə n̄abi'e doxen yežlyon' šə cuiayi'e zejlicane, la' bitə'ətezə de'e gatə' che', bito gaquəlenən le' par niç cui cui'ayi'e zejlicane'. ²⁷ Diozən' b̄sele'e nada', golja' beṇəçh, na' cata' yida' yežlyo nga de'e yoblə n̄sa'a yelə' chey che'eni' c̄he X̄a' Diozən' na' c̄hi'a angl c̄hia' ca', cana'ach gona' par niç to to beṇəçhən' n̄ite'e mbalaz o yesə'əzi'e castigw segon de'e gwso'on to toga'aque'. ²⁸ Diozən' b̄sele'e nada' golja' beṇəçh. Na' de'e li chnia' le'e, balle cabinə' gatle cata'an le'ile nada' yida' de'e yoblə par yedəlo'a yelə' gwnabia' c̄hia'anə'.

17

Jeso'osən' goque' ca' to de'e chey che'eni'

¹ Gwde xop ža gwna Jeso'osən' de'e ca', gwçhe'e Bedən' len Jacobən' na' Juan beṇə' bišə' Jacobən', ja'aque' to lao ya'a siba. ² Na' lao nite'e lao ya'anə' beža' can' goquə Jeso'osən', beža'ateczə cho'alaogüe'enə' na' gwyeçh gwye'eni' in ca'aczən' chac bgüizən', na' xalane'enə' beyaquən šyiš xilə' ca'aczə be'eni'. ³ Na' goquən lao nite'enə' conczə besə'əle'ine' de'e Moizezən' len profet Liazən' ben' gwzo cana', na' chso'elene' Jeso'osən' dižə'. ⁴ Nach Bedən' gože'ene': —X̄anto', güenchgua zocho nga na'a. ¿Egüe'endo' gonto' šonə ranš? ton par le', na' ton par Moizezən' na' yeton par Liazən'.

⁵ Ne'e cho'ete' dižə'anə' catə'əczla to bejw de'en chactit bcuašə'an lega'aque', na' lo'o bejon' gwse'enene' gwna Diozən': —Benga Xi'ina' ben' chacchgüeida' chei. Cheba chezaquə'alaža'a len le'. Che le'enə' le'e gwzenag.

⁶ Na' catə' gwse'ene disipl ca' dižə' ca' lechgualə besə'əžebe', xte jesə'əchaze' goscho'alə lao yon'. ⁷ Nach bgüigua' Jeso'osən' b̄xoa ne'enə' yichjga'aque'enə', na' gože': —Leyeyas. Bito žeble.

⁸ Na' catə' besyə'əgüie'enə', notono no nochlə besə'əle'ine' sino tozə Jeso'osən'.

⁹ Na' gwde na' lao chesyə'əyetje' ya'anə', gož Jeso'osən' lega'aque': —Ni tole cui güe'ele dižə' che de'en bable'ile xte catə'əch bagwso'ot benə' nada' na' yebana' ladjo benə' guat ca', nada' naca' ben' bselə' Diozən' golja' benəch.

¹⁰ Nach disipl che' ca' gwse'ene': —Benə' ca' choso'osed choso'olo'i lein' choso'osedene' neto' de que zgua'atec profet Liaz ben' gwzo cana' cheyalə' yide' lao yežlyo nga de'e yoblə antslə ze'e yidə ben' əselə' Diozən' par gaquəlene' nasyon chechon'. ¿Bixchen' chəsə'əne' ca' ža?

¹¹ Nach Jeso'osən' gože' lega'aque': —De'e liczə chəsə'əne' de que zgua'atec yidə profet Liazən' de'e yoblə ben' gwzo cana' par yeyone' yoguə'əloj de'e cheyalə' yeyac. ¹² Pero na'a chnia' le'e de que babilə ben' bedayen can' ben profet Liazən', na' benə' Izrael gwlaž checho ca' bito gwsa'acbe'ine' de que le' naque' ben' naquən yidə. Na' gwsə'onene' le' con can' gwse'enene' na' gwso'ote'ene'. Na' ca'aczən' so'one' len nada', Diozən' bselə'e nada' golja' benəch.

¹³ Nach gwsa'acbe'i disipl che' ca' de que Jeso'osən' cho'e dižə' che de'e Juannə' ben' b̄choa benə' nis.

Jeso'osən' beyone' to bi'i chaz šon

¹⁴ Na' catə' besə'əžine' gan' zjənžag benə' zan, to benə' bšague' Jeso'osən' na' bzo xibe' laogüe'enə'. Na' gože'ene': ¹⁵ —Xana' beyašə'alažə'əšgüei xi'ina' nga. Chazbo' šon na' lechgualə chžaglaobo' len len. Na' zan las bajchazbo' lao yi' na' leczə ca' zan las bəbxopbo' lo'o nis. ¹⁶ Bajoa'abo' lao disipl chio' ca', pero bito gwsa'aque' yesyə'əyone'ebo'.

¹⁷ Nach Jeso'osən' gože' benə' ca' ža'anə': —Le'e chonle clelə na' naljele. ¿Bixchexaczxan' cui chejle'ele chia'? Bachac šša zoa' napa' yelə' chxenlažə' len le'e. ¿Batxan' šejle'ele chia'?

Nach gože' xa bida'onə': —Doa' bi'i chio'on ni.

¹⁸ Nach Jeso'osən' gwdile' de'e xio'onə' yo'o yaz yichjla'aždao' bida'onə' par nič bechojən yichjla'ažda'obo'onə'. Na' lao or na' beyaquebo'.

¹⁹ Na' gwde goc de'e ca', gosə'əbiguə' disipl che Jeso'osən' gan' zoe' toze', na' gwse'ene': —¿Bixchexaczxan' cui goquə yebejto' de'e xio'onə' yichjla'aždao' bida'onə'?

²⁰ Jeso'osən' gože' lega'aque': —Bito goquə yebejlen chedə' bito gwyejle'ele de que Diozən' gaquəlene' le'e. Xsa yag moztasən' naquən de'e dao' riza'. Na' de'e li chnia' le'e la'anə'əczə šə de'en chonlilažə'əle Diozən' gwxaquə'əleben ca to xsa moztasən' laogüe de'en cuinə' gonlilažə'əchguəlene' guac ye'ele ya'a nga: “Gwde gwzo de'e na'ate", na' gaquə can' chonle mendadən'. Bito bi bi de de'e cui gaquə gonle con šə chejle'ele de que Diozən' chaclene' le'e. ²¹ Na' par nič yebejle de'e xio' ca' de'en zjanaquə ca de'en bebeja' yichjla'aždao' bi'inə', cheyalə' co'o gwchejle cui ye'ej gaole na' gontezə gonle orasyon.

De'e yoblə gwduxje' Jeso'osən' de que so'ot benə' le'

²² Na' lao zjezda' Jeso'osən' len disipl che' ca' do gan' mbane Galilean', Jeso'osən' boszenene' lega'aque' de'en ze'e gac che', gwne': —Diozən' bsele'e nada' golja' benaçh, na' gaca' lao na' beṇə' ²³ na' so'ote' nada'. Pero na' yeyon' ža yosban Diozən' nada' ladjo beṇə' guat ca'.

Nach disipl che' ca' catə' gwse'ene' xtiže'enə', leçhguale gwnite'e trist.

Jeso'osən' gwdixjue' impuest che yo'odao'

²⁴ Na' catə' besyə'əžine' Capernaunnə', baḷə beṇə' ca' chəsə'əçhixjue' impuest de'en chəsə'əyixjw to to beṇə' byo Izrael ca' par gast che yo'odao' əblaonə' ja'aque' lao Bedən'. Na' gwse'ene': —Ca naquə' maestr çhelenə', çəgwyixjue' impuest che yo'oda'onə'?

²⁵ Nach gož Bedən' lega'aque': —Gwyixjue'en.

Gwde na' Jeso'osən' len disipl che ca' gwso'e lo'o yo'onə'. Nach Jeso'osən' le'e gožte' Bedən': —çBi xbab chono', Bed? Ca naquə' rei ca' nitə' yežlyo nga chəsə'anabi'e na' chso'one' byen chəsə'əyixjw beṇə' che impuest. çNon' chəsə'əçhixjue'en ža? çəfamily çhega'aque' o šə beṇə' yoblə?

²⁶ Nach Bedən' gože'ene': —Chəsə'əçhixjue' beṇə' yoblə.

Nach Jeso'osən' gože' Bedən': —Beṇə' zjənaquə family çhega'aque' ca' bitobi chəsə'əyixjue'. Na' ca naquə' chio'o ža, naccho xi'in Rei ben' zo yoban' na' bito cheyalə' çhixjwcho impuest che yo'oda'onə'. ²⁷ Pero na' par niç notono no so'on xbab de que choncho contr yo'odao' əblaonə', çhixjwcho impuestən'. Gwyje cho'a nisdə'onə', na' gwzalo'o yixjw beḷ chio'onə', na' beḷ nech bian' seno' lo'o cho'ab na' əželdo' to mech. Na' yeyoxo'on žjətixjo' impuest chechon'. Gwdiləczən par çhixjwcho impuest che çhopcho.

18

Gwsa'acyožə disipl che' ca' noe' naquəch blaoch

¹ Na' ca orən' gosə'əbiguə' disipl che Jeso'osən' cuite'enə', na' gwse'ene': —Entr neto' çnoto' gaquəçhto' blaoc catə'an Diozən' ben' zo yoban' gone' par niç solao ṇabi'o?

² Na' Jeso'osən' goxe' to bidao' na' bzeche'ebo' laoga'aque'enə'. ³ Na' gože' lega'aque': —De'e li əchnia' le'e, notə'ətezle šə bito əgwša' xbab çhelen' par əgwzəxjw yichjle lao Diozən' can' chon bidao' nga chzəxjw yichjbo' lao xaxna'abo', bito gaquə' sole len nada' catə' Diozən' ben' zo yoban' gone' par niç solao ṇabi'a. ⁴ Na' notə'ətezle šə babəyacle ca bidao' nga laogüe de'en chzəxjw yichjle lao Diozən', banacle beṇə' blaoc len nada' catə' Diozən' ben' zo yoban' gone' par niç solao ṇabi'a. ⁵ Na' notə'ətezle šə chonle güen len notə'ətežə bidao' ca bi'i nga laogüe de'en chaquele chia', chonczle güen len nada'.

Nxož əxopcho goncho de'e mal

⁶ Probçhguazə ben' chon par niç əxopə to beṇə' chonlilažə' nada' gone' de'e mal, la'anə'əczə ben' əxopə bitotec bi zaque'e len bənaçhan'. Nca'alə xneze žalə' əgwchej yene'enə' to yej yišə na' žjəxope' lo'o nisdə'onə' na' gate', cle ca soe' əxope' beṇə' gone' de'e malən'. ⁷ Probçhguazə le'e de'e zan de'e zjəde yežlyo nga de'e chso'on par niç gonle de'e mal. Bitoc naçho de que bitobi de de'e so'on par niç əxopə le'e bachonlilažə'əle nada'. Pero probçhguazə beṇə' chon ca əxopə beṇə' yoblə gone' de'e malən'.

⁸ Na' de'e na'anə' əchnia' le'e, šə de'en chonle len ni'ana'alen' chonən par niç əxople gonle de'e malən' güenchlə žalə' əçhog ni'ana'ale ca' na' cho'onlen cle ca əxople gonle de'e malən'. Nca'alə xneze nacle beṇə' na' çog o beṇə' coj yežinle

lao Diozən' na' əbanlɛ zɛjlɪcane cle ca cuiayi'ilenlɛn tɛxn lao yi' gabılən'. ⁹ Na' šə de'en chle'ile len jelaole chonən par niç əxople gonlɛ de'e malən' yejni'alə žalə' cuejlennə' na' ch'o'onlɛn, cheda' nca'alə xneze nacle benə' lchol yežinlɛ yoban' gan' zo Diozən' na' əbanlɛ zɛjlɪcane, cle ca' cuiayi'ilenlɛn tɛxn lao yi' gabılən'.

Jempl che xilə' bian' goquəžeje

¹⁰ Le'e gon xbab che benə' chso'onlilažə' nada' benə' cuitɛc bi zjəzaquə' len benəçən', par niç cui gonlɛ len notə'əteze' ca benə' cui bi bi zjəzaquə'e. Chniə' le'e, angl ca' chapə chye' lega'aque' nitə'ətezə nite'e lao Xə' Diozən' yoban' gan' zo'enə'. ¹¹ Na' ca naca' nada', Diozən' bsele'e nada' golja' benəç par niç zedəlo'ida' benə' ca' bachəsə'əbiayi' de que nži'ilažə'a lega'aque'. Bsele'e nada' par gona' ca cui žjəya'aque' lao yi' gabılən' šə so'onlilažə'e nada'.

¹² Na' chniə' le'e, šə nitə' to gueyoa xilə' chele na' gaquəžeje tob, žəcabi yocua'anle bia ca' taplalj tğualj do lao ya'a gan' zjəžə'ab na' žjəyediljle bian' goquəžejenə' xte ca' yeželeleb? ¹³ Na' əchniə' le'e, catə' yeželeleb, yebeichele de'en beželobən' clezə can' chebeile len bia ca' taplalj tğualj cui gwsa'acžeje.

¹⁴ Ca'acžə naquən len benə' ca' chso'onlilažə' nada' benə' cuitɛc bi zjəzaquə' len benəçən'. Xəcho Dioz ben' zo yoban' bito chene'ene' cuiayi' ni toga'aque'.

Cheyalə' yezi'ixencho che benə' bišə'əcho benə' chso'onlilažə' Diozən'

¹⁵ Šə to benə' bišə'əle benə' bachonlilažə' Diozən' chone' de'e malən' contr to le'e, tozle šejle žje'elenlene' dižə' can' naquə de'en chone'enə' par niç yedinjene'en, na' šə çhaze' rson che dižə' de'en žje'elenlene' yezo'e binlo len Diozən' de'e yoblə. ¹⁶ Pero na' šə bito çhaze' rson ca dižə' de'en žje'elenlene', güenç əche'ele yeto o yeçhopə benə' bišə'əle par niç əsa'aque' testigw de que dižə' šao' bagotə'əyoile ben' yoša' xbab che'ena'. ¹⁷ Na' šə bitocžə gwzenague' chele, le'e güe' dižə' ca naquə de'en chone' lao yoguə'əle ncodə' ljuežjle cho'ela'ole Diozən'. Na' šə ni que gwzenagcže' chele, cuich gonlene' cuent entr le'e ncodə' ljuežjle cho'ela'ole Diozən'. Pero leğon cuent de que naque' tɛxn benə' ca' cui chso'onlilažə' Diozən', na' naque' tɛxn len yeziquə'əchlə benə' ca' chso'on de'e malən' can' chonlɛ xbab che benə' goçixjw ca'.

¹⁸ De'e li chniə' le'e, bitə'ətezə de'e əgwxiə' le'e ncodə' ljuežjle cho'ela'ole Diozən' par ənale naquən güen so'on benə' ca' əsa'ac tɛxn len le'e, leczə can' əna Diozən' ben' zo yoban'. Na' bitə'ətezə de'e əgwxiəle ənale cui naquən güen so'one', leczə can' əna Diozən' ben' zo yoban'.

¹⁹ Na' leczə ca' chniə' le'e, šə çhople gwxiəle bin' ənable lao orasyonnə', le'e nitə'əle yežlyo nga, Xəcho Diozən' ben' zo yoban' goncže' de'en ənablenə'. ²⁰ Na' gan' nžag çhopə šonlɛ cho'ela'ole nada', zocza' tɛxn len le'e.

²¹ Nach Bedən' bgüigue'e gože' Jeso'osən': —Xana', šə benə' ljuežja' chone' de'e mal len nada' tapteli, žbał las cheyalə' yezi'ixenə' che'? žəzelao do gaž las?

²² Nach Jeso'osən' gože'ene': —Bito nia' de que cheyalə' yezi'ixenlɛ che' zelao do gaž las. Pero de'en chniə' le'e, bito gonlɛ cuent do bał las yezi'ixenlɛ che benə' ljuežjlen', con le'e yezi'ixentəžə che' yoguə' laste.

Jempl che mosən' ben' cui bezi'ixen che de'en çhalə' ljuežje'

²³ Na'a ža, yelə' gwnabiə' che Diozən' ben' zo yoban' gwxaquə'əleben ca de'e nga goquə. Zo to rei ben' chsa'alə' xmose' ca' xmeche'ena'. Na' gone'ene' gone' cuent len lega'aque'. ²⁴ Na' catə' gwzolaogüe' bezi'e cuent che to toga'aque', zgua'atec bžin to xmose' ben' çhalə' zan millon pes. ²⁵ Na' mosən' bito bi xmeche' gotə' par yonežjue'en rein'. De'e na'anə' bene' mendad ta'oga'aque' len xo'olen', na' len xi'ingə'aque' ca' na' len doxen de'e zjədeine' par niç gaquə

yosyo'onežjue' de'en chsa'ale'e che rein'. ²⁶ Nach mosən' bzo xibe' lao rein' gotə'əyoine' le', gože'ene': "Xana', gwdapəšga yelə' chxenlažə' len nada', na' yeyona' de'en čala'a čhio'onə'." ²⁷ Nach rein' beyaše'ene' le' na' bezi'ixene' che doxen de'en čale'enə' na' bsane' le'. ²⁸ Pero na' catə' bechoje' liž rein', le'e bežagte' yeto mos beṇə' čalə' che' to čop pes. Nach le'e bñizte' yene'enə' gože'ene': "Yeyoṇ' de'en čalo'o čhia'an na'atec na'a." ²⁹ Nach mos ljuēžjen' bzo xibe' laogüe'enə', gože'ene': "Gwdapəšga yelə' chxenlažə' čhia' na' yeyona' doxen de'en čala'a čhio'onə'." ³⁰ Pero na' mos nechən' bito bzenague' che mos ljuēžje'enə', le'e gwyejte' jene' mendad gosə'əyixjue'ene' ližya xte ca gatə' de'en yonežjue' čhe'enə'. ³¹ Na' mos ca' yelə' catə' besə'əle'ine' can' ben mos nechən', lechguale gwnite'e trist. Na' ja'aque' lao rein' jse'eže'ene' yoguə'əlo' can' goquə'. ³² Nach rein' goxe' mos nechən' laogüe'ene' de'e yoblə, na' gože'ene': "Le' naco' to mos malchgua. Nada' bezi'ixena' che doxen de'en čalo'o čhia'anə' la' gotə'əyoido' nada' yezi'ixena' čhio'. ³³ ¿Bixchen' cui beyašə'əlažə'o mos ljuēžjo' ben' čalə'e čhio'onə' can' beyašə'əlažə'a le'?" ³⁴ Na' de'e tant bža'a rein' bene'ene' lao na' beṇə' ca' par gosə'əyixjue'ene' ližya gan' əžaglaogüe' xte catə'əch bade de'en čale'e che rein'.

³⁵ Nach Jeso'osən' gože' displ che' ca': —Can' gon Xa' Diozən' ben' zo yoban' gone' castigw che notə'ətezle cui chezi'ixenle che ljuēžje do yichj do lažə'əle bitə'ətezə de'en chso'onene' le'e.

19

Bito yelə'acho be'en checho o no'ol checho par solencho beṇə' yoblə

¹ Na' Jeso'osən' cata' beyož gwne' de'e ca', beze'e Galilean' na' gwlague'e yao Jordannə' par beyeje' gan' mbane Jodean'. ² Na' beṇə' zan jəsə'ənaogüe'ene', na' beyone' beṇə' ca' chsa'acšene.

³ Na' beṇə' fariseo ca' ja'aque' gan' zo'enə' čhedə' gwse'enene' yesə'əbeje'ene' dižə' de'e yesə'əčhine' contr le', nach gwse'ene': —¿Ede lsens par to beṇə' nšagna' yele'e xo'ole' šə bitə'ətezə de'en chone' cui cho'olažə' be'en che'enə'?

⁴ Nach gože' lega'aque': —Bablabczle can' nyoj Xtizə' Diozən' nan de que catə'an gwxe yežlyon' Diozən' bene' beṇə' nech ca' beṇə' byo na' no'ola. ⁵ Na' gwna Diozən': "Beṇə' byonə' le'e xaxne'e par əgwšagne'e si'e to no'olə na' beṇə' ca' yoso'ošagna'anə' əsa'aque' tozə'." ⁶ Bitoch əsa'aque' čopə beṇə', sino que əsa'aque' tozə beṇə'. De'e na'anə' notono zaquə' yole'e lega'aque' la' Dioz nan' banone' lega'aque' tozə cuerp.

⁷ Nach gwse'ene': —Šə ca' ža, ¿bixčhexan' ben de'e Moizezən' mendad cata' to beṇə' yele'e no'olə čhe'enə', cheyalə' čhas to act ga güe'en dižə' de que besyə'əle'enə'?

⁸ Jeso'osən' gože' lega'aque': —De'e Moizezən' be'e latjə yelə'a no'ol chelen' čhedə' nacle beṇə' yichjla'əždao' žod. Pero catə' Diozən' bene' beṇə' nech ca', bito nacho gwyazlaže'e yesyə'əla'aga'aque'. ⁹ Echnia' le'e, notə'ətezə beṇə' chelə'a no'ol čhe'enə' par yeque'e no'olə yoblə, len nezene' de que no'ol čhe'enə' bito naque' to no'olə go'o xtoi, tozəczə ca malən' chon be'enə' len de'en chon beṇə' chgo'o xtoe'. Na' notə'ətezə beṇə' yošagna'alene' to no'olə beṇə' belə'a ben' čhe' le', leczə tozəczə ca malən' gone' len de'en chon be'enə' chgo'o xtoe'.

¹⁰ Nach displ che' ca' gwse'ene': —Šə can' naquən che beṇə' byon' na' no'olən' naplən cuent cui no no gwšagna'.

¹¹ Jeso'osən' gože' lega'aque': —Caguə yoguə' beṇə' chse'ejni'ine' de'e ngan' sino beṇə' ca' babzejni'i Diozən' lega'aque' bi zejen. ¹² Nitə' beṇə' cui nan yosa'ašagne'e cheda' gwsa'alje' zjənaque' beṇə' güiž, na' lecza nitə' beṇə' cui yosa'ašagne'e laogüe de'en bazjənon beṇə' lega'aque' güiž. Na' lecza ca' nitə' beṇə' cui chesa'ašagne'e par nič əso'elažə'əche' so'one' ca əsa'anch beṇə' ca' əso'e latjə ṇabia' Dioz ben' zo yoban' lega'aque'. Le'e gwzenag che de'en bagwni'anə' šə' baben Diozən' par nič chejni'ilen.

Jeso'osən' bene' orasyon par bidao' ca'

¹³ Na' ja'ac beṇə' əjso'e bidao' lao Jeso'osən' par nič əxoə ne'enə' yichjga'acbo'onə' na' gone' orasyon par lega'acbo'. Pero disipl che' ca' gosa'adile' beṇə' ca' zjənche' bidao'. ¹⁴ Nach Jeso'osən' gože' disipl che' ca': —Le'e güe' latjə la'ac bidao' ca' laogua' nga, na' cui əgwzönle. Na' əchnia' le'e beṇə' ca' chəsə'əzəxjw yichjga'aque' lao Diozən' ca' bidao' ca' chəsə'əzəxjw yichjga'acbo' lao xaxna'aga'acbo', lega'acze'enə' chso'e latjə chṇabia' Diozən' lega'aque'.

¹⁵ Na' cata' beyož gwxoə na' Jeso'osən' yichjga'acbo'onə', bene' orasyon par lega'acbo', nach gwyje' ga yoblə.

Beṇə' güego' ben' goquə beṇə' gwni'a be'elene' Jeso'osən' dižə'

¹⁶ Na' goquən' to beṇə' güego' bžine' gan' zo Jeso'osən', na' gože'ene': —Maestr, le' naco' beṇə' güen, gwna nada' bi de'e güenṇə' cheyalə' gona' par gatə' yelə' mban zejlicane chia'.

¹⁷ Jeso'osən' boži'e xtiže'enə', gože'ene': —¿Bixchen' nao' de que beṇə' güen nada'? Dioz nan' naque' le'ezelaogüe beṇə' güen. Pero na' šə' che'endo' gatə' yelə' mban zejlicane chio'onə', cheyalə' gono' can' na lei de'en bzoj de'e Moizezən'.

¹⁸ Nach be'enə' gože' Jeso'osən': —¿Noxan' de'e ca' nan ža?

Nach Jeso'osən' gože'ene': —Cui gotle beṇə', cui co'o xtole na' cui cuejyichj be'en chele o no'ol chele par solenle beṇə' yoblə, cui cuanle, bito gacle testigw fałs contr sa'aljuežjle. ¹⁹ Le'e əgwnežjo yelə' bala'an xaxna'ale, na' legaque che sa'aljuežjle can' chaquele che cuinle.

²⁰ Nach beṇə' güegon' gože' Jeso'osən': —Yoguə'əloj de'e quinga chzenaga' chei dezd xcuidə'ətia'. ¿Bixa de'en chaquəch fałt gona' ža?

²¹ Jeso'osən' gože'ene': —Šə' de'e licza che'endo' gaco' cayaṇə'an chene'e Diozən', jəyeyetə' bi de'e de' chio', na' mech de'en le'ido' che de'e ca' bnežjon beṇə' yašə' nach da len nada'. Na' cata' yežino' yoban' gan' zo Diozən', so' mbalaz.

²² Pero na' beṇə' güegon' beyož benene' can' gož Jeso'osən' le', beza'achoe' trist chedə' la' to beṇə' gwni'achguan'.

²³ Gwde na' gož Jeso'osən' disipl che' ca': —De'e li chnia' le'e, zdebəchgua naquən par to beṇə' gwni'a güe'e latjə ṇabia' Diozən' le'. ²⁴ Na' lecza chnia' le'e, zdebəchlə naquən che to beṇə' gwni'anə' güe'e latjə ṇabia' Diozən' le' cle ca to camey teb to lo'o nag yešə'.

²⁵ Na' besyə'əbanchgüei disipl che' ca' can' gwne'enə', nach gosə'əne': —Notono gaquə yechoj xni'a de'e malən' šə' ca'.

²⁶ Jeso'osən' bgüie' lega'aque' nach gože': —Ni to beṇəch cui gaquə yebej cuine' xni'a de'e malən', pero Diozən' chaque'. Le' chac chone' bitə'əteza.

²⁷ Nach Bedən' gože' Jeso'osən': —Neto' bagwlejyichjto' family cheto' ca' na' len yoguə'əloj de'en deito' par chzenagto' chio'. ¿Bi de'e güen gaquə cheto' laogüe de'en bagwlejyichjto' family cheto' ca' na' len de'en deito'?

²⁸ Jeso'osən' gože' lega'aque': —De'e li chnia' le'e Diozən' bsele'e nada' golja' beṇač na' catə' yocobe' yežlyon', nada' cui'a gan' chey che'eni' na' nabi'a, na' yogua' le'e chonliłažə'əle nada' cue'ele cuita'anə' na' nabi'ale txen len nada'. Na' le'e šižinle nabi'ale family ca' šižin, beṇə' ca' zjənaquə xi'in dia che de'e Izraelən'. ²⁹ Na' notə'ətezle šə de'en chzenagle chia' bagwlejšyichjle ližle, o bišə'əle, o zanle, o xaxna'ale, o xo'olle, o xi'inle, o yežlyo chele, Diozən' gone' le'e de'e zaquə'əche clezə ca de'e ca' na' beṇə' ca' gwlejšyichjle. Na' leczə gon Diozən' par nich əbanle zejlicane. ³⁰ Na' beṇə' zan beṇə' zjənaquə blao na'a gwžin ža catə' cuich əsa'aque' beṇə' blao. Na' beṇə' zan beṇə' cui zjənaquə blao na'a, gwžin ža catə' əsa'aque' beṇə' blao.

20

Jempl che beṇə' güen žin ca'

¹ Nach bossed boslo'i Jeso'osən' lega'aque', gwne': —Yelə' gwnabia' che Diozən' ben' zo yoban' gwxaquə'əleben ca de'e nga goquə. To beṇə' napə to güert gan' ža'achgua yag obas. Na' gwze'e liže'en to zil tempran gwyeje' gan' chac ya'anə', jtilje' mos par so'one' žin lo'o güert che'enə' žana'. ² Na' catə' beyož gosə'əxenlažə' mos ca' de que to denario chixjue' to toga'aque' con ca chac mosən' tža žin, nach bsele'e lega'aque' lo'o güert gan' so'one' žinnə'. ³ Nach do cheda ga gozeje' gan' chac ya'anə', na' ble'ine' nitə'əch beṇə' cui bi bi žin de so'one'. ⁴ Na' gože' lega'aque': “Ležja'ac lo'o güert chia'anə' ležjen žin na' chixjwczə' le'e.” Nach ja'ac beṇə' ca'. ⁵ Na' gozeje' de'e yoblə gan' chac ya'anə' do gobiž, nach yeto do cheda šonə, na' bezle'ine' nitə' beṇə' cui bi bi žin de so'one'. Nach bozsele'e lega'aque' par so'one' žin lo'o güert che'enə'. ⁶ Na' ca do cheda gueya' še'elə gozeje' de'e yoblə. Na' bezle'iczene' beṇə' zeznite'e cui bi bi žin de so'one', nach goze'e lega'aque': “¿Bixchen' cui ja'acle güen žin?” ⁷ Nach gwsə'ene': “Notono no gwna neto' güen žin.” Nach goze'e lega'aque': “Le'ə žja'ac le'e gon žin lo'o güert chia'anə'. Na' chixjwczə' le'e.” Nach ja'ac beṇə' ca'. ⁸ Na' catə' bžin or yosa'a xan güertən' xmosə' ca', nach gože' mos əblao che'enə': “Beyax beṇə' güen žin ca' par chixjwga'aco'one', solaoteco' chixjo' beṇə' ca' bla'ac bzebe, na' yeyožlo' len beṇə' ca' bla'ac nechte.” Nach ben mos əblao' can' ben xane'enə' mendad. ⁹ Gwdixjue' zgua'atec beṇə' ca' gosə'əzolaogüe' gwsə'one' žin cheda gueya' še'elə tgüejə denario to toga'aque'. ¹⁰ Na' catə' gwdixjue' beṇə' ca' gosə'əzolo chso'on žinnə' temprante, gwsa'aque' beṇə' ca' de que chixjoche' lega'aque' de'e scha'och laogüe de'en gosə'əzolaogüe' chso'one' žinnə' temprante. Pero tozəczə can' gwdixjue' yogua'əlołtega'aque'. ¹¹ Na' catə' beyož gosə'əzi' laxjw beṇə' ca' gosə'əzolo žinnə' temprante, gwsa'ade'e xan žinnə' dižə'. ¹² Na' de'e tant chesə'əloque' toe' gože' xan žinnə': “Bedo žana' bžaglaochguato' lao de'e zeyə'ən bento' žin chio'onə'. Na' tozəczə can' gwdixjo' neto' len beṇə' ca' bla'ac bzebe, len yetor güejgan' gwsə'one' žinnə'.” ¹³ Pero na' xan žinnə' gože' be'enə': “Migw chia', bitobi de'e mal chona' contr le'e. ¿Ecaguə tratən' bencho de que to denario chixjua' to tole? ¹⁴ Laxjon' bagwxi'o, gwaquə yeyejo'. Bagwdixjua' beṇə' ca' con can' go'onda' la'anə'əczə bla'aque' bzebe. ¹⁵ ¿Bixchen' chacxi'ido' nada' ni che de'en naca' beṇə' güen? Lao na'an naquən gona' con can' che'enda' len de'en deida'.” ¹⁶ Nach Jeso'osən' gože' beṇə' ca' bosə'əzenag jemplən': —Can' naquən, nitə' beṇə' bito zjənaque' beṇə' blao na'a pero gwžin ža catə' əsa'aque' beṇə' blao. Na' nitə' beṇə' zjənaque' beṇə' blao na'a, pero leczə gwžin ža catə' lega'aque'

bitoch əsa'aque' beṇə' blao. Diozən' chaxe' yoguə'əloj beṇə' par se'ejle'e che', pero balgue'en choso'ozenague' che', na' lega'acze' chque'e ca xi'ine'.

De'e yoblə gosyixjue'e Jeso'osən' de que so'ot beṇə' le'

¹⁷ Jeso'osən' na' zan disipl che' ca' zja'aque' par Jerosalennə'. Na' lao zjəngü'e nezən' Jeso'osən' gwleje' partlə disipl che' ca' šižinṇə' na' gože' lega'aque': ¹⁸ —Diozən' bsele'e nada' golja' beṇəch, na' na'a šejcho Jerosalennə' gan' gaca' lao na' bχoz əblao ca' na' lao na' beṇə' ca' choso'osed choso'olo'i lein', na' yesə'əchoglaogü'e'en chia' de que so'ote' nada'. ¹⁹ Na' leczə so'one' nada' lao na' beṇə' ca' cui zjənaquə beṇə' Izrael gwlaž checho par so'one' nada' borl, na' yesə'əyine' nada' yid sot, nach tenə' yosə'əde'e nada' le'e yag corozən', pero na' yeyon ža yebana' ladjo beṇə' guat ca'.

Xna' Jacobən' na' Juannə' gwnəbe' yesə'əbe' xi'ine' ca' cuit Jeso'osən' gan' nabi'enə'

²⁰ Na' ja'ac xi'in Sebedeon' Jacobən' len Juannə' na' len xna'aga'aque'enə' lao Jeso'osən'. Na' xna'aga'aque'enə' bzo xibe' lao Jeso'osən' gože'ene': —Chṇabda' le' to goclen.

²¹ Nach Jeso'osən' gože'ene': —žBi goclennə' che'endo' gona'?

Nach xna'aga'aque'enə' gože'ene': —Che'enda' gono' par nič xi'ina' quinga yesə'əbi'e šlja'a güejə cuito'on catə' əžin ža nabi'o nasyon chechonə'.

²² Jeso'osən' gože' Jacobən' len Juannə': —Bito chache'ile bi de'en chṇabele nada'. žEguaquə saquə'əzi'ile can' saquə'əzi'anə'? žEgwzoile gaquə chele can' gaquə chia'anə'?

Nach besyo'oži'e xtiže'enə' gwse'ene': —Gwzoito'.

²³ Nach Jeso'osən' gože' lega'aque': —De'e liczə čhi'i saquə'əle can' čhi'i saca'anə', na' de'e liczə gaquə chele can' gaquə chia'anə', pero bito naquən par əṇia' nada' non' cue' cuitan' catə'an əžin ža nabi'a. Tozə Xa' Diozən' bagwleje' beṇə' ca' yesə'əbe' cuita'anə'.

²⁴ Nach disipl ca' yeši catə' gwse'enene' can' gosə'əna disipl ca' čhopə besə'əže'e lega'aque'. ²⁵ Nach Jeso'osən' goxe' yogue' par nič gosə'əbigue'e laogü'e'enə', na' gože' lega'aque': —Nezecho nitə beṇə' gwnabia' na' beṇə' blao che to to nasyon, na' la fuers chesə'ənabi'e beṇə' nitə xni'aga'aque'. ²⁶ Pero caguə can' cheyalə gonle. Šə no le'e chene'ele gacle beṇə' blao, cheyalə əgwzəxjw yichjle gaquəlenle ljuežjle. ²⁷ Na' šə no le'e chene'ele gacle xen entr ljuežjle, cheyalə gon cuinle ca xmos beṇə' ca' yela'. ²⁸ Diozən' bsele'e nada' golja' beṇəch, na' caguə bida' par nič beṇəchən' sa'aclene' nada', sino que bida' par gaquəlena' beṇəchən', na' par əgwnežjo cuina' čixjua' xtolə' yoguə'əloj beṇəchən' catə'an so'ote' nada'.

Jeso'osən' bene' par nič čhopə beṇə' lčhol besə'əle'ine'

²⁹ Na' beṇə' zan jəsə'ənaogü'e' Jeso'osən' len disipl che' ca' catə'an besa'aque' syoda Jericon'. ³⁰ Na' čhopə beṇə' lčhol zjəchi' cho'a nezən' galən' zjəyeda Jeso'osən'. Catə' gosə'əneze' de que Jeso'osən' chedie' laoga'aque'enə' nach gosə'əne' zizjo, gwse'e Jeso'osən': —Xanto', len' naco' xi'in dia che de'e Rei Dabin'. Beyašə'əlažə'əšgüei neto'.

³¹ Nach beṇə' ca' chesyə'əde laoga'aque'enə' gosə'ədile' lega'aque' par nič nite'e žiza. Pero nachle gosə'əne' zizjochlə gosə'əne': —Xanto', len' naco' xi'in dia che de'e Rei Dabin'. Beyašə'əlažə'əšgüei neto'.

³² Jeso'osən' gwleze' gan' nite'enə', nach goxe' lega'aque' par gosə'əbigue'e laogü'e'enə'. Nach gože' lega'aque': —žBin' chene'ele gona' len le'e?

³³ Nach gwse'ene': —Xanto' benšga par ničh yele'ito'.

³⁴ Jeso'osən' beyašə'əlaže'e lega'aque' na' gwdane' jlaoga'aque'enə', nach le'e besy'əle'iteine', na' jəsə'ənaogüe' Jeso'osən'.

21

Gwso'elaogüe' Jeso'osən' cata' beyo'e Jerosalennə'

¹ Na' lao zja'ac Jeso'osən' len disipl che' ca' Jerosalennə' besə'əžine' Betfage, gan' zo ya'a de'en nzi' Olibos galə'əzə Jerosalennə'. Na' Jeso'osən' gwleje' čopə' disipl che' ca', ² na' gože' lega'aque': —Le'e žja'ac yež dao' de'en čhi' de'e na' na' žjə'ti'ile to borrh bia no'olə da'ab yag na' nche'ete to xi'inda'ob. Na' gwsežle xna'abən' na' əche'eleb nga len xi'inda'obən'. ³ Na' šə bi ye'e beŋə' le'e, na' ye'elene': “Xanto' nan' chyažjene' lega'aque'.” Na' le'e desy'əasantecze'eb len le'e.

⁴ Goc ca' par ničh goc complir can' bzoj de'e profet Zequerian' ben' be' xtižə' Diozən' cana' gwne':

⁵ Gož beŋə' ca' nitə' Jerosalennə':

“Le'e ggüiašc baza' Rei čhelen'.

Žie' cožə' borrh da'onə' ca to beŋə' cui naquə beŋə' blao.”

⁶ Na' ja'ac disipl ca' yež dao' de'en gož Jeso'osən' lega'aque' ca', na' gwso'one' can' ben Jeso'osən' mendad. ⁷ Na' besy'əəche'e borrhən' len xi'inəbən' lao Jeso'osən', na' besə'əxoa no xaga'aque' cožə'aga'aque'abən', nach gwžia Jeso'osən' bia da'onə' par gwyeje' Jerosalennə'. ⁸ Na' lao nez gan' zde'ena' beŋə' zan gwso'ela'ogüe'e Jeso'osən' bosə'ošiljue' no xaga'aque'enə' par ničh blej borrhən' len na' lecžə gosə'əchogue' no xozə' yag de'e nita' tcho'a nezən' na' bosə'nite'en lao nezən'. ⁹ Na' beŋə' zan gosə'əbialao lao Jeso'osən' na' lecžə beŋə' zan jəsə'ənao le'. Nach yogue'e gosə'əgüe' be' lban che' gosə'əne': —ičhguale beŋə' güen be'enga, naque' xi'in dia che de'e Rei Dabin'! Sošga Rei chechon' mbalaz gan' baza' nga bselə' Xancho Diozən' le'. Ledoye'ela'oche' txen len beŋə' ca' nitə' gan' to Diozən'.

¹⁰ Na' cata' bžin Jeso'osən' Jerosalennə' yoguə' beŋə' ca' ža' syodan' besy'əəbanene', na' gosə'əne: —ičNoxa bengə bla' nga?

¹¹ Na' beŋə' ca' nžag Jeso'osən' cata'ən bežine' lao' syoda Jerosalennə' bosy'ož'i'e xtižə'aga'aque'enə' gwse'e: —Bengə Jeso'os beŋə' za' Nasaret gan' mbane Galilean' na' cho'e xtižə' Diozən'.

Jeso'osən' bebeje' beŋə' ca' chso'on ya'a yo'odao' əblao che beŋə' Izrael ca'

¹² Na' gwyej Jeso'osən' yo'odao' əblao che chio'o beŋə' Izrael na' bebeje' yoguə' beŋə' ca' chso'on ya'a chy'onə'. Nach gwlo'on'i'ane'e mes che beŋə' ca' choso'oša' mech, na' lecžə ca' bene' len yag siy che beŋə' ca' chso'ota' ngolbexa. ¹³ Gwde beyož bene' ca' gože' lega'aque': —Nyobjcən can' gwna Diozən' gwne': “Che'enda' yesə'əna beŋə' de que liža'an naquən to latjə gan' so'on beŋə' orasyon”, pero na' le'e babenlen ca to latjə gan' ža' beŋə' bguan.

¹⁴ Na' beŋə' lčhoł ca' na' len beŋə' coj ca' gosə'əbigue'e lao Jeso'osən' žlac gwzo'e lo'o yo'odao'onə'. Nach beyone' lega'aque'. ¹⁵ Pero na' bžox əblao ca' na' beŋə' ca' choso'osed choso'olo'i lei de'en bzoj de'e Moizežən' lechguale besə'əže'e cata' besə'əle'ine' milagr ca' de'en ben Jeso'osən'. Na' lecžə besə'əže'e cata' gwse'enene' can' gwso'elao' bi'i xcuidə' ca' Jeso'osən' yo'odao' əblaonə', de'en gosə'ənabo': “ičhguale beŋə' güen be'enga, naque' xi'in dia che de'e Rei Dabin'!” ¹⁶ Nach gwse'e Jeso'osən': —ičEzendo' bin' gosə'əna bi'i xcuidə' ca'?

Jeso'osən' boži'en gože' lega'aque': —Zenda'. ĶEcabi za'alažə'əle can' nyoj Xtizə' Diozən' de'en gož de'e Rei Dabin' Diozən', nan:

Le' babeno' par niĉ bi'i xcuida' na' bi'i cho'a nižə' ca' chso'ela'obo' le' can' chazlažo'o?

¹⁷ Nach bechoje' gan' nitə' beņə' ca', na' beze'e syodan'. Na' že' na' jəyega'ane' Betania len disipl che' ca'.

Ben Jeso'osən' par niĉ bgüiž yag yixgüion'

¹⁸ Na' zil beteyo besa'aque' Betanian' jəsyə'aque' Jerosalenə' de'e yoblə. Na' lao zesya'əngüe'e nezən' gwdon Jeso'osən'. ¹⁹ Na' ble'ine' to yag yixgüio zon cho'a nezən' na' gwyeye' jəgüie' šə žian yixgüion'. Pero bitobi bželene', con zlega xlague' žia. Nach gože'en: —Caneque cuich bi bi yixgüion' cuio'.

Na' lao or na' le'e bgüižten. ²⁰ Catə' besə'əle'i disipl che' ca' can' goquən', besyə'əbanene', nach gwse'ene': —Ķixchen' le'e bgüižte yaguən'?

²¹ Na' Jeso'osən' gože' lega'aque': —De'e li achnia' le'e, šə do yichj do lažə'əle chonlilažə'əle Diozən' na' bito chac ĉhop lažə'əle, guaquə gonle can' babena' par niĉ bgüiž yaguən'. Na' lecəə ca' guaquə gonle par niĉ ya'a nga žjəyazon lo'o nisdə'ona'. ²² Na' šə chonlilažə'əcho Diozən' do yichj do lažə'əcho, bitə'ətežə de'en ənabechone' lao orasyonə', goncze'en chio'o.

Yelə' gwnabia' che Jeso'osən'

²³ Nach, Jeso'osən' gozeje' yo'odao' əblaona' de'e yoblə par jəsed jəlo'ine' beņə' ca'. Na' balə beņə' fariseo ca' na' yebalə beņə' choso'osed choso'olo'i lein' gosə'əbigue'e cuit Jeso'osən'. Nach gwse'e Jeso'osən': —ĶNac goquən' gwxi'o yelə' gwnabia'anə' na' non' ben le' yelə' gwnabia'anə' par gono' de'e ca' chono'?

²⁴ Nach Jeso'osən' gože' lega'aque': —Lecəə de to de'e nabda' le'e. Šə gwnale nada' de'en nabda' le'e nach ənia' le'e non' beņ nada' yelə' gwnabia' par gona' de'e ca' chona'. ²⁵ Lenašc nada': Ķnon' bselə' de'e Juannə' bide' bĉhoe' beņə' nis? ĶEDioz nan' bsele'ene' o šə beņə' yoblən'?

Nach bosoxi'e gosə'əne': —Šə ye'echone' de que Dioz nan' bsele'e de'e Juannə' par bĉhoe' beņə' nis, na' ye'e chio'o: “ĶBixĉhexan' bito gwyejle'ele che'?” ²⁶ Na' šə ye'echone' de que to gwlažzen' bide', cuili biczən' so'one beņə' quingan' chio'o, ĉhedə' chse'ejle'e de que Diozən' bsele'e de'e Juannə' par be'e xtiže'ena'.

²⁷ Nach gwse'e Jeso'osən': —Bito nezeto' non' bselə' de'e Juannə'.

Nach gož Jeso'osən' lega'aque': —Lecəə ca' nada' bito ənia' non' beņ nada' yelə' gwnabia'anə' par gona' de'e ca' chona'.

Jempl che ĉopə xi'in beņə'

²⁸ Le'e gon xbab bi zeje jempl nga: Gwzo to beņə' gwnitə' ĉopə xi'ine'. Na' gože' tobo: “Xi'ina' neža che'enda' šejo' güen žin gan' ža' yag obas ĉhia' ca'.”

²⁹ Nach xi'ine'ena' gožbo' le': “Bito ša'a.” Pero gwdelə beyombo' xbab, nach gwyejbo'. ³⁰ Nach gozeje' gan' zo xi'ine'en yeto, na' ježe'əbo' can' gože' bi'i bišə'əbo'ona'. Na' le'e gožte bi'in le': “Guaquəczə, na' ša'a.” Pero bito gwyejbo'.

³¹ Le'e našc nada': Ķnobo' bi'i ca' ĉopə bosozə'ənenagbo' che xaga'acbo'ona'?

Nach gwse'ene': —Bi'i nech na'.

Nach Jeso'osən' gože' lega'aque': —Leiczelen'. Na' de'e li chnia' le'e beņə' goĉhixjw ca' na' no'olə zargat ca' yobəch yoso'ozə'ənenagbe' che Diozən' cle ca le'e na' yobəch əso'e latjə năbia' Diozən' lega'aque'. ³² Ca naquə Juannə' ben' bĉhoa beņə' nis bide' laolen' na' gwduxjue'ine' le'e naquən' cheyalə' gonle par niĉ yebei Diozən' le'e. Pero bito gwyejle'ele che'. Letga beņə' goĉhixjw

ca' na' no'olə zargat ca' gwse'ejle'e che'. Na' catə' gocbe'ile de que beṇə' ca' bagwse'ejle'e che', bito bedinjele xtolə'əle ca' par šejle'ele che de'e Juannə'.

Jempl che mos mal ca'

³³ Le'e gwzenag yeto jempl nga. Gwzo to beṇə' na' lao to pedas yežlyo chen' goze' zlezə yag obas na' gwlo'e le'ej doxenən. Na' na'atezə bene' to tanc gan' bososi'e obasən' par bechoj xisein'. Na' leczə bene' to campnary gan' yesə'əcua'a beṇə' əsa'ape' güertən'. Nach bene' güertən' lao na' beṇə' par bosogüia bosoye'en, na' gwde na' gwze'e jəzoe' ga yoblə. ³⁴ Catə' bžin tyemp par yosyo'otobe' cwsešən', bsele'e to čhopə xmosə' gan' ža' beṇə' ca' chsa'apə yag obas che'enə' par žjəsyə'əxi'e to tlaw cwsešən' de'en cheyalə' yezi'e. ³⁵ Pero na' beṇə' ca' chsa'apə yag obas che'enə' bito bosə'əgüialaogüe' mos che' ca'. Gosə'əyine' toe', na' yetoe' bososiž'e'ene' yej, nach yetoe' gwso'ote'. ³⁶ Nach bosselə' xan yag obasən' mos zanch clezə ca beṇə' ca' bsele'e nech, pero leczə can' gwso'onene' beṇə' nech ca' leczə can' gwso'onene' lega'aque'.

³⁷ Nach xan yag obasən' bsele'e cuinczə xi'ine'enə', goquene' əsa'ape'ene' respet na' yosyo'onežjue'ene' cwsešən'. ³⁸ Pero na' beṇə' ca' chsa'apə güertən' catə' besə'əle'ine' xi'ine'enə', nach gosə'əne' entr lega'acze': "Be'engan' xi'in xan yag obasən', na' le'enə' yega'anlen bienə'." Leda gotchone' par nič yega'anlencho yežlyo che x'e'enə'." ³⁹ Nach bosonize'ene', besyə'əbeje'ene' fuerlə güertən' na' gwso'ote'ene'.

⁴⁰ Beyož be' Jeso'osən' jempl nga, gože' beṇə' ca' ža'anə': —žNac chactgüeile gon xan güertən' len beṇə' ca' bocua'anlene' güert che'enə' catə' yežin cuine'?

⁴¹ Nach gwse'ene': —Gote' lega'aque' yelə' beṇə' mal čhega'aque'enə', na' yegüe'e güertən' lao na' beṇə' yoblə. Yegüe'en lao na' beṇə' so'on complir yosyo'onežjue'ene' to tlaw cwseš che'enə' catə' əžin ža par yesyə'ətobe'en.

⁴² Jeso'osən' gože' lega'aque': —Ca'aczən'. Na' žəcabinə' šejni'ile bi zejen de'en nyoj Xtizə' Diozən' gan' nan:

Yej de'en cui gwso'olažə' mues güen yo'o ca',

lennə' banaquən yej squin.

Xancho Diozən' babzoe' yejən' gan' cheyalə' son

na' de'e zaquə' yebanecho can' bene'enə'.

⁴³ De'e na'anə' čnia' le'e de que Diozən' cuejyichje' cuich nabi'e nasyon chelenə' na' cueje' beṇə' yoblə beṇə' yoso'ozenag che' par nabi'e lega'aque'.

⁴⁴ Na' ca' naquə' yejən' ža, yoguə' no cui šejle' čhia' gwxaquə'əlebene' ca beṇə' əxopə lao yejən' na' cue'ežožje'. Na' yoguə' no cuinə' šejle' čhia' catə' babžin žan' gaquə' juisyən', gwxaquə'əlebene' ca beṇə' əxopə yej laogüe'enə' na' əgwšosžjan le'.

⁴⁵ Na' bħox əblao ca' na' beṇə' fariseo ca', catə' gwse'enene' jempl ca' de'en be' Jeso'osən', gwsa'acbe'ine' de que be'e jempl ca' por ni che de'en cui chse'ejle'e che'. ⁴⁶ Nach gwse'enene' yesə'əzene'ene' pero bitobi gwso'onene' le'. Besə'əžbe' šə bi so'one beṇə' ca' nžague'enə' lega'aque', čhedə' yogue'e gwse'ejle'e de que Diozən' bsele'e Jeso'osən' par cho'e xtiže'enə'.

22

Jempl che to yelə' gošagna'

¹ Na' de'e yoblə bsd blo'i Jeso'osən' beṇə' ca' len jemplan', gozne': ² —Yelə' gwnabia' che Diozən' gwxaquə'əleben ca de'e nga goquən'. Zo to rei, beṇə' ben gast catə' bšagna' xi'ine'enə'. ³ Na' bene' combid beṇə' zan əžja'aque' liže'enə'

par əsa'ogüe'. Na' catə' bžin or par solao lñin', rein' bsele'e xmoše' ca' par jəsə'əxi'e beṇə' ca' babene' combidən'. Pero notono no gwse'ene əžja'ac lao yelə' gošagna' che xi'ine'ena'. ⁴ Nach gože' yexonj xmoše' ca': "Le'e žjež beṇə' ca' zjanaquə combidən' de que babsi'ini'a de'en gaochona'. Babeta' xco'ona' ca' na' xme'edaogua' ca' bia ca' chsa'anə', na' yoguə' de'e ca' yelə' babsi'ini'a par gaochi. Na' ye'ega'aclene' sa'aque' gaochi de'en babsi'ini'ana'." Nach ja'ac mos ca' jse'eže' lega'aque' ca'. ⁵ Pero beṇə' ca' bito gwso'one' cas. Toe' gwyeje' jəgüie' yežlyo che'enə', na' yetoe' gwyeje' jene' negosy. ⁶ Na' yebale' bosə'əñize' mos ca' bselə' rein' na' gosə'əzi'ichiže'e lega'aque' na' gwso'ote' bale'. ⁷ Na' lechgualə bža'a rein', na' bsele'e soldad che' ca' jse'ete' lega'aque' na' bosə'əzeye' syoda chega'aque'ena'. ⁸ Nach rein' gože' xmoše' ca': "Babsi'ini'a de'en gaochi lao lñin', pero ca' naquə beṇə' ca' bena' combidən' nacia' bito zjəzaque'e par la'aque' liža' nga əsa'ogüe'. ⁹ Le'e žja'ac yež ca' yelə' na' le'e žjəta yoguə' lquey ca' na' gonle combid yoguə' beṇə' chaš par da'aque' sa'ogüe'." ¹⁰ Na' mos ca' ja'aque' yoguə' nez ca' na' jəsə'ətobe' con yoguə' beṇə' besə'əžague', no beṇə' naquə beṇə' güen na' no beṇə' naquə beṇə' mal, par nič beža' liž rein' xte cuich bi latjə gotə'.

¹¹ Pero na' catə' gwyo'o rein' jəgüie' beṇə' ca' bazjanžaguan', na' entr lega'aque' ble'ine' to beṇə' cui nyaze' lachə' de'en chnežjo rein' de'en chsa'aze' lao lñina'. ¹² Nach gož rein' le': "Migw chia' žnac goquən' gwyo'o nga? la' bito nyazo' lachə' de'en cheyalə' čhazo'." Na' be'ena' bito bželene' bi ye'e rein'. ¹³ Nach rein' bene' mendad yoso'ochej xmoše' ca' ni'ana' be'ena' na' yesyə'əbeje'ene' fuerlə, gan' lechgualə naquə žchol, gan' cuežyaše'e na' gan' gaoyejə leye' zejlīcane. ¹⁴ Can' naquən, Diozən' chaxe' yoguə' beṇə' par əse'ejle'e che', pero balgüe'en choso'ozenague' che', na' chque'e lega'aque' ca' xi'ine'.

Gosə'əñabene' Jeso'osən' šə naquən güen yesə'əyixjue' impuest che gobiern

¹⁵ Nach beṇə' fariseo ca' besə'əžague' par bosə'əxi'e naclə so'one' par nič yesə'əcujeje' Jeso'osən' dižə' de'en yesə'əčhine' par əsa'ogüe' xya che'. ¹⁶ Na' beṇə' fariseo ca' bosə'osele'e balə beṇə' zjanaquə cuent len lega'aque' lao Jeso'osən' na leczə bosə'osele'e balə beṇə' chso'on txen len Erodən' par jse'eže'ene': —Maestr, nezeto' de que cho'o dižə' li. Nezeto' de'en chsed chlo'ido' beṇə' can' chene'e Diozən' goncho naquən dižə' li. Na' nezeto' bito chžebo' bin' yesə'əna beṇə', la' bito chono' cuent che beṇə' šə naque' blao o šə bito naque'. ¹⁷ De'e na'anə' zedenabeto' le' par ənao' neto' naquən' cheyalə' gonto'. žEnaquən güen čhixjwto' impuest che gobiern roman', o šə bito cheyalə' čhixjwto'on?

¹⁸ Jeso'osən' goche'ine' caguə do lažə'əga'aque'ena' gwse'ene' ca', nach gože' lega'aque': —jNacle beṇə' goxoayag! žBixchen' chene'ele cuejle nada' dižə' de'en gwčhinle contr nada? ¹⁹ Le'e gwlo'i nada' xmechlen' de'en chyixjwle che impuestən'.

Nach bosə'olo'ine' le' to denario. ²⁰ Jeso'osən' gože' lega'aque': —žNo diboj čheinə' da' laogüennə', na' no lein' nyoj laogüennə'?

²¹ Nach gwse'ene': —Čhe Rei Sesar.

Nach Jeso'osən' gože' lega'aque': —Le'e əgwnežjo Sesarən' de'en naquə che' ža, na' le'e əgwnežjo Diozən' de'en cheyalə' əgwnežjwlene'.

²² Nach beṇə' ca' catə' gwse'ene' xtižə' Jeso'osən' besyə'əbanene'. Na' besə'aque' gan' zoe'ena'.

Catə' yesyə'əban beṇə' guat ca'

²³ Na' le'e ža na'atezæczə besə'æzžin balə beŋə' sadoseo beŋə' ca' cui chse'ejle' de que yesyə'əban beŋə' guat ca', na' de'e na'anə' jse'eže'ene': ²⁴ — Maestr, de'e Moizezan' bzoje' de que šə to beŋə' byo beŋə' nšagna' gate' na' yega'an' no'olə che'enə' sin cui no xi'ine' gwzo, beŋə' bišə' be'enə' bagotəŋ' cheyałə' yeque'e no'olənə' par nič nita' xi'in dia che de'e beŋə' biše'enə'. ²⁵ Bač bemb'i'ato' gažə bišə'əga'aque'. Na' beŋə' nechən' bšagne'e, na' gote', na' notono xi'ine' gwzo. Na' biše'e əgwchopən' beque'e no'olən'. ²⁶ Na' lecə got beŋə' əgwchopən' na' notono xi'ine' gwzo. Nach le'egatezə ca' goquə len beŋə' biše'e əgwyone, nach beŋə' bišə'əga'aque' ca' yela', xte besyə'əyatega'aque' besyə'əque'e no'olən' na' besyə'əyatega'aque' gwsa'at, na' notoczə no xi'inga'aque' gwnita'. ²⁷ Na' gwde gwsa'at beŋə' ca' lecə got no'olən'. ²⁸ Na' catə' yesyə'əban beŋə' guat ca', žnoe' entr beŋə' gažə ca' gaquə be'en che no'olən'? la' yogue'en bosyo'ošagna'alene' le'.

²⁹ Nach gož Jeso'osən' lega'aque': —Bito chonle xbab šao' de'en nale ca', la' bito nezele can' na Xtizə' Diozən' de'en nyojan na' nic nezele naquən' naquə yelə' guac che Diozən'. ³⁰ Catə'an yesyə'əban beŋə' guat ca', bito gachia' šə zoso'ošagne'e o šə cui, na' cana' caguə no yosyo'ošagna'ach. Lebzen' əsa'aque' len angl che Diozən' beŋə' ca' nita' yoban'. ³¹ Na' ca' naquən' chaquele bito yesyə'əban beŋə' guat ca', žəbito za'aləžə'əle can' nyoj Xtizə' Diozən', nan: ³² “Nada' naca' Dioz che de'e xaxta'ole Abraannə', na' Dioz che de'e xaxta'ole Isaaquən', na' Dioz che de'e xaxta'ole Jacobən'.” Na' nezecho beŋə' ca' nite'e len Diozən' chedə' Diozən' bito naque' Dioz che beŋə' guat, sino naque' Dioz che beŋə' ca' zjəmban.

³³ Na' beŋə' zan ca' zjənžaguən' besyə'əbanene' catə' gwse'ene' dižə'an de'en bsed blo'ine' lega'aque'.

De'en naquə de'e blaoch de'en non Diozən' mendad goncho

³⁴ Na' catə' gwse'ene beŋə' fariseo ca' de que Jeso'osən' bzožie' beŋə' sadoseo ca', nach jeza'aque' lao Jeso'osən'. ³⁵ Na' to ben' chsed chlo'i lein' lecə gone'ene' cueje' Jeso'osən' dižə' de'e gwchine' contr le'. Na' gože'ene': ³⁶ —Maestr, lao lei che Diozən' žnon' de'en none' mendad goncho naquən de'e blaoch?

³⁷⁻³⁸ Jeso'osən' gože'ene': —De'en naquə de'e žialaoch na' de'e blaoch lao de'e ca' none' mendad goncho nan: “Cheyałə' gaquecho che Xancho Diozən' do yichj do lažə'əcho do fuers balor checho.” ³⁹ Na' de'e əgwchopen' lebze nan len de'e nechen': “Cheyałə' gaquecho che sa'aljuežjcho catg chaquecho che cuincho.” ⁴⁰ Čhopə de'e ca' non Diozən' mendad goncho zjənožə'an doxen de'en bzoj de'e Moizezan' na' de'en boso'ozoj beŋə' ca' gwso'e xtizə' Diozən' cana'.

Cristən' naque' xi'in dia che de'e Rei Dabin'

⁴¹ Na' lao ne'e zjənžag beŋə' fariseo ca' lao Jeso'osən', ⁴² gože' lega'aque': — žBin' chontgualə xbab che Cristən' ben' əselə' Diozən' par gaquəlene' nasyon chechon'? žNo xi'in dia chei gaque'?

Na' gwse'ene': —Gaque' xi'in dia che de'e Rei Dabin'.

⁴³⁻⁴⁴ Nach Jeso'osən' gože' lega'aque': —De'e Dabin' bzoje' can' blo'i Spirit che Diozən' le'. Gwne' de que Cristən' naque' Xane'. Quinga bzoje':

Xancho Diozən' gože' Xana'an:

“Gwche'edo' cuita' nga nabi'əcho txen,

Na' gona' par nič nita' de'e ca' chso'on contr le' na' beŋə' contr čhio' ca' xni'əna'.”

45 Na' de'en gwna de'e Rei Dabin' de que Cristən' naque' Xane', ꞥacabi zejen de que Cristən' naque' mazəchlə ca xi'ın dia che' na'anə' ža?

46 Na' notoch no goquə yosyo'oži'i xtiže'enə'. Na' dezd ža na' bitoch besyə'ayaxjene' bi yesə'əñabene' Jeso'osən'.

23

Xtolə' beñə' fariseo ca' na' beñə' ca' choso'osed choso'olo'i lein'

1 Nach Jeso'osən' gwzolaə be'e dižə' len disipl che' ca' na' len beñə' zan ca' nitə' gan' zo'enə', gwne': 2 —Beñə' ca' choso'osed choso'olo'i lein' na' beñə' fariseo ca' bazjənłane' xlatjə de'e Moizezən' par choso'ozejni'ine' beñə' lei che Diozən'. 3 Na' de' na' anə' le'e gwzenag chega'aque' catə' choso'ozenene' le'e can' na' lein', na' le'e gon can' nannə', pero bito gonle can' chso'on lega'aque', chedə' lega'aque' bito chso'one' de'en chəsə'əne' cheyalə' gonle.

4 Lega'aque' chesə'əzanche' can' na' lein', na' chso'one'en ca to yoa' de'e cuiczə no do'i na' chse'enene' soa' beñə' yoblə len, na' bito chse'ene' lega'aque' əso'en. 5 Ca naquə beñə' ca' yoguə' de'en chso'one'enə', chso'one'en parzə niç yesə'əle'i beñə' can' chso'one'enə', na' so'elaogüe'e lega'aque'. Nchej na'aga'aque'enə' na' nchej lao xgaga'aque'enə' caj dao' gan' ža' part güejə Xtižə' Diozən' na' chso'one' caj dao' ca' de'e cha'odao'. Na' leczə chso'one' lox xadon chega'aque'enə' de'e tonə. 6 Chesyə'əbeine' chesə'əbi'e gan' chəsə'əbe' beñə' blaə ca' catə' chja'aque' gan' chac no lni, na' catə' chja'aque' yo'odao' chega'aque'. 7 Chesyə'əbeine' catə' beñə' ca' chəsə'əguape' lega'aque' diox na' catə' chesə'ənope'e na'aga'aque'en do lao lquey, na' chse'enene' yoso'osi' beñə' lega'aque' maestr.

8 Pero əchnia' le'e, bito gonle byen ye'e beñə' le'e "maestr" laogüe de'en chsed chlo'ile xtižə'anə', chedə' nada'əzan' gwlej Diozən' par naca' maestr chele, nadan' bsele'e par gaquələna' beñə'chən'. Na' yoguə' le'e chonlilažə'əle nada' chaque bišə'əljuežjle tole yetole. 9 Na' leczə bito nale che notə'ətezə beñə' de que naque' "Padrecito". Tozə Dioz ben' zo yoba naque' Xacho. 10 Na' bito gonle byen ye'e beñə' le'e "Xana", chedə' leczə tozə nada' Cristən' gwlej Diozən' par naca' Xanle. 11 Šə no le'e nacle beñə' blaəch, cheyalə' əgwzəxjw yichjle gaquələnle ljuežjle. 12 Notə'ətezle cho'elao' cuinle Diozən' gone' par niç gacbe'ile de que bitobi zaquə'əle. Na' notə'ətezle chonle xbab de que bitotec bi zaquə'əle, Diozən' gone' le'e yełə' bala'an.

13 Probchguazə le'e chsed chlo'ile lein', na' probchguazə le'e beñə' fariseo. Chxoayagle beñə' par niç cui so'e latjə nabiə' Diozən' lega'aque' na' leczə le'e bito cho'ele latjə nabiə' Diozən' le'e.

14 Na' probchguazə le'e chsed chlo'ile lein', na' probchguazə le'e beñə' fariseo. Chxoayagle no no'olə gozebə par niç no'ol ca' chso'one' le'e ližga'aque' na' len bichlə de'en de chega'aque'. Nach catə' chonle orasyon cho'echgualə dižə' par niç əxoayagle beñə' əsa'aque' nacle beñə' güen. Goscha'och Diozən' castigw chelen' clezə ca che beñə' ca' cuitec zjənezene' can' na' lein'.

15 Probchguazə le'e chsed chlo'ile lein' na' probchguazə le'e beñə' fariseo. Nacle beñə' goxoayag. Chja'actezə chja'acle chjətiljle beñə' zitə' beñə' yesə'ənao de'en chsed chlo'ile. Na' catə' chželga'aque'ne' chzejni'iga'aque'le'ne' par niç əsa'aque' lechguale beñə' maləch clezə ca le'e.

16 jProbchguazə le'e! Nacle ca beñə' lchoł beñə' chsa'aque'ne' gaaquə yesə'əgüe'e nez beñə' yoblə. Nale de que notə'ətezə beñə' chzoe' joramentən'

por yo'odao' əblaonə', bitobi zeje jorament che'enə'. Pero šə chzoe' joramentən' por oro de'en de lo'o yo'oda'onə', nachən' zejen de que cheyalə' gone' can' chone' lyebe. ¹⁷ Le'e nacle ca beṇə' lchol na' bitobi chejni'ile. Oron' bitotec bi zaquə'an. Yo'oda'onə' gan' yo'o oron' lənnə' zaquə'əchən, la' de'en yo'o oron' lo'inə' de' na'anə' oron' naqən' che Diozən'. ¹⁸ Na' lēcza nale de que šə to beṇə' chzoe' joramentən' por mes de yejən' gan' choso'ozeye' bia yixə'an par chso'elaogü'e Diozən', bitobi zeje jorament che'enə'. Pero na' šə chzoe' joramentən' por de'en xoa lao mes de yejən', cheyalə' gone' can' chone' lyebe. ¹⁹ Le'e nacle ca beṇə' lchol na' bitobi chejni'ile. De'en choso'ozeye' par chso'elaogü'e Diozən' bitotec bi zaquə'an. Mes gan' chxoa de'en chosa'ənežjue' Diozən' lənnə' zaquə'əchən, la' de'en choso'oxo' de'e ca' laogüen, de'e na'anə' chsa'aquən' che Dioz. ²⁰ Šə beṇə' chzoe' joramentən' por mes de yejən' lenczə por de'en xoa laogüennə' chzoe'en. ²¹ Na' šə beṇə' chzoe' joramentən' por yo'oda'onə', lenczə por Dioz nan' chzoe' joramentən' čhedə' yo'oda'onə' naquə' che Diozən' na' nan' zoe'. ²² Na' šə beṇə' chzoe' joramentən' por yoban', por Dioz nan' chzoe'en, čhedə' la' nan' chi' Diozən' chnabi'e.

²³ Probchguazə le'e chsed chlo'ile ləin', na' probchguazə le'e beṇə' fariseo. ¡Nacle beṇə' goxoayag! La'anə'əczə chnežjwle Diozən' to part lao ši part che yixgüej' čhele, che niz' čhele, na' che comin' čhele, bitobi zejen, čhedə' bito chzenagle che de'e ca' zjanaquə' de'e žialaoch de'en na ləin'. Bito chonle de'en naquə' güen lao Diozən'. Bito cheyašə'əlažə'əle sa'aljuežj beṇə'chle. Bito chonle complir can' nale. De'e quinga zjənaquə' de'e žialaoch gonle; pero bito cheyalə' cuejyichjle cui əgwnežjwle de'e ca' chnežjoczlene'. ²⁴ Nacle ca beṇə' lchol beṇə' chsa'aquene' guaquə' yesə'əgü'e' nez beṇə' yoblə. Gwxaquə'əlebele ca to beṇə' chebej bizə beb dao' nchixə' yelə' guao che'enə', pero bito chacbe'ine' šə nchixə'əchlən to de'e xen de'e zaquə' yebeje'.

²⁵ Probchguazə le'e chsed chlo'ile ləin' na' probchguazə le'e beṇə' fariseo. ¡Nacle beṇə' goxoayag! Gwxaquə'əlebele ca tas plat de'en chchin beṇə' na' cui cha'a chyibe' lo'inə' binlo. Chonle par ničh chsa'aque beṇə' de que nacle beṇə' güen pero lechgualə' chzelažə'əle bi de'e de che beṇə' na' chebeichgüeile chca'alēn. ²⁶ Le'e beṇə' fariseo, nchol yichjla'ažda'olen'. Le'e yedinje xtolə'əle ca' par ničh de'e liczə' gacle beṇə' güen can' chene'ele so'on beṇə' xbab nacle.

²⁷ Probchguazə le'e chsed chlo'ile ləin' de'en bzoj de'e Moizezən', na' probchguazə le'e beṇə' fariseo. ¡Nacle beṇə' goxoayag! Gwxaquə'əlebele ca to ba de'en zjənone' xochechgua laogüenə' pero lo'ilei ža' žit beṇə' guat na' chi'ichgua de'e zban. ²⁸ Chene'ele so'on beṇə' xbab čhele de que nacle beṇə' güen, pero len yichjla'ažda'olen' nacle beṇə' goxoayag na' beṇə' malchgua.

²⁹ ¡Probchguazə le'e chsed chlo'ile ləin'! na' ¡probchguazə le'e beṇə' fariseo! Nacle beṇə' goxoayag. Chonle monoment lao ba che de'e profet beṇə' ca' gwso'e xtižə' Diozən' cana', na' chonle xochechgua lao ba che yeziquə'əchlə beṇə' gwso'on de'e güen. ³⁰ Na' nale: "Žalə' chio'o bazocho ca tyemp che de'e xaxta'ochə ca', bito bencho txen len lega'aque' ca de'en gwso'one' gwso'ote' profet ca' beṇə' ca' gwso'e xtižə' Diozən' cana'." ³¹ Pero na' yoguə'əlolte de'en chonle chlo'in de que tozəczə can' nacle len de'e xaxta'ole ca' beṇə' ca' gwso'ot de'e profet ca'. ³² Šə de'e tant chebeile chonle de'e malən', le'e gwza'alao lejon biquə'əchlə de'e mal de'en bito golə' so'on de'e xaxta'ole ca'.

³³ Le'e nacle beṇə' goxoayag na' naljele. ¿Echaquēle de que guaquə' yexonjele castigon' de'en gon' Diozən' le'e ca de'en əsel'e le'e lao yi' gabilən'? ³⁴ Na' de'en gona' nada' əselə'a beṇə' so'e xtižə'anə' na' no beṇə' sin' laolēnə', na' nochlə beṇə' yoso'osedene' le'e xtižə'anə'. Na' balē' gotle əgwda'aga'aclene' to le'e

yag coroz, na' yebale' chinle do lo'o yo'odao' chele ca', na' yebale' yolagzeja' yolagzidaga'aclene' gatə'ateza' yež žja'aque'. ³⁵ Na' de'en gonle ca' gapple dolə' che yelə' got che yogua' beŋə' ca' gwso'on de'e güen, beŋə' ca' gwso'ot de'e xaxta'ole ca', gwzolaozan len de'e Abelən' xi'in beŋə' nech ca' ben' naquə beŋə' güen lao Diozan' na' beyożan len de'e Zeqeria xi'in de'e Berequias. Zeqeria na'anə' ben' gwso'ote' entr yo'odao' əblaonə' na' entr mes de yej gan' choso'ozeye' bia yixə' par chso'elaogüe'e Diozan'. ³⁶ Na' de'e li le'e mbanle na'a si'ile castigw che yelə' got che yogua' beŋə' ca' gwso'ot de'e xaxta'ole ca'.

Beğüine'e Jeso'osən' por ni che xtolə' beŋə' Jerosalen ca'

³⁷ ¡Prob le'e beŋə' Jerosalen! Chotle beŋə' ca' chso'e xtižə' Diozan' na' beŋə' ca' chselə' Diozan' par chso'elene' le'e xtiže'ena' chšizə'əga'aclene' yej. Zan las bago'onda' yotoba' le'e can' chon to jeid cheyež xi'inəb, pero bito be'ele latjä. ³⁸ Na' na'a cuejyichj Diozan' le'e. Bitoch gone' ca' chele. ³⁹ Na' əchnia' le'e, bitoch le'ile nada' xte catə'əch əžin ža əŋale: "Cho'ela'oto' ben' za' nga, babselə' Xancho Diozan' le'."

24

Jeso'osən' gwne' de que gwžin ža yosyo'ochinjə' yo'odao' əblaonə'

¹ Na' catə' beza' Jeso'osən' yo'odao' əblaonə' par šeje' ga yoblə gosə'əbigua' disipl che' ca' gan' zo'enə' na' lao chəsə'əgüi'e yo'odao' əblaonə' gwso'e dižə' catec xoche naquən na' lecza' ca' yo'o ca' zjənyechjən. ² Nach Jeso'osən' gože' lega'aque': —Bable'ile catec xochen' naquə yogua' de'e quinga. Na' de'e li chnia' le'e ca' naquə de'en chle'ile na'a, gwžin ža yosyo'ochinj beŋə' doxenən, na' notoch no le'ile'lega'aquən.

De'en gaquə catə'ən bazon baožə šo'o fin che yežlyon'

³ Na' ja'aque' ya'a Olibosən' na' Jeso'osən' gwchi'e lao ya'anə' toze'. Na' gosə'əbigua' disipl che' ca' laogüe'ena' na' gwse'ene': —Xanto', ždo batə'aquən' gaquə de'e nga nao' nga? Na' žnac gaquən' gache'ito' de que bazon baožə yido' de'e yoblə par šo'o fin che yežlyon'?

⁴ Nach Jeso'osən' gože' lega'aque': —Le'e gon xbab par nič notono əxoayag le'e. ⁵ Gwžin ža catə' zan beŋə' goxoayag ša' lao yežlyo nga beŋə' se'ene'ene' yoso'olane' xlatja' nga. Na' yesə'əne': "Nada'an Cristən' ben' gwlej Diozan' par gaquəlena' le'e." Na' beŋə' zan yesə'əxoayague'. ⁶ Na' yene'ele dižə' de que chac gwdiłə, o de que guaquə gwdiłə, pero na' bito žeble, chedə' zgua'atec cheyalə' gaquə ca'. Na' bito le'e žinte žan' par šo'o fin che yežlyon'. ⁷ Na' yesyə'ədilə yež contr yež, na' nasyon contr nasyon. Na' lecza' zan yež de'e zjəchi' doxenlə yežlyon' gaquə bgua bgüin na' cue'e yizgüe', na' lecza' xo'ochgua. ⁸ Na' te gaquə ca' ne'e yesə'əžaglaoch beŋə' ža' yežlyon'.

⁹ Nach beŋə' ca' ža' doxen yežlyo nga yesə'əgue'ine' le'e chedə' chonliłəžə'əle nada'. Na' so'one' le'e lao na' beŋə' contr ca', na' yesə'əsaquə'əzi'e le'e, nach so'ote' le'e. ¹⁰ Cana' ža, beŋə' zan beŋə' bachso'onliłəžə' nada' yesə'əbejyichje' cuich so'onliłəže'e nada'. Na' lega'acteze' yesə'əgue'ine' ljuežjga'aque' beŋə' ne'e chso'onliłəžə' nada' na' so'one' lega'aque' lao na' beŋə' contr ca'. ¹¹ Na' beŋə' zan so'onlaže'e yesə'əne' de que xtižə' Diozan' chəsə'əyixjui'e na' yesə'əxoayague' beŋə' zan. ¹² Na' laogüe' de'en šanch beŋə' ca' so'one' de'e malən', beŋə' zan juisy beŋə' bachso'onliłəžə' nada' cuich əsa'aque'ne' che yeziquə'əchlə beŋə' chso'onliłəžə' nada'. ¹³ Pero na' notə'ətezle šə co'o gwchejlažə'əle len de'en chi' saquə'əle par gonliłəžə'əle nada' na' gwzenagle chia' xte catə'əch əžin ža gatle, gožjəyezole len Diozan'. ¹⁴ Na' žja'ac beŋə'

doxen lao yežlyon' yesə'əyixjui'e dižə' gūen dižə' cobən' de que nabia' Diozən' con nota'ətezə beṇə' əso'e latjə. Na' catə' bazjəneze beṇə' ža' yoguə' nasyonṇə' len, cana'achan' əžin ža šo'o fin che yežlyon'.

15-16 Bablable can' bzoj de'e profet Daniel ben' be' xtižə' Diozən' cana'. Na' de'en bzoje' nan de que beṇə' mal so'one' de'en naquə de'e zban juisy de'e chgue'i Diozən' lo'o yo'oda' əblao che chio'o beṇə' Izrael na' yo'oda'ona' bitoch gonən žin. Na' catə' le'ile gaquə de'e quinga, canan' le'e nitə'əle Jodean' cheyalə' əgwxonjle na' žja'acle do ya'ada'ote. Le'e chlable de'en nga le'e šejni'in. 17 Na' šə zo to beṇə' chone' dezcanz lao sotea che' liže'enə', bito galə' yotobe' šinlaze' ca' ža' liže'enə', con cuejyichje'en. 18 Na' leczə ca' beṇə' zda do yoba bito galə' yebi'e par žjəyexi'e xadon che'enə' liže'. 19 Na' ca tyempən' lechgualə zdebə gaquən len no'olə ca' žjənoa' bdao' na' no'ol ca' chesə'əguəžə' bidao'. 20 Le'e gon orasyon par nič cui cheyalə' əgwxonjle tyemp catə' chi' de'e zag o lao ža dezcanz. 21 Catə' gaquə de'e ca' lechgualə chi' saquə' beṇə' Izrael gwlaž checho ca'. Na' dezd catə'an gwxe yežlyon' xte ža neža bito ənacho bagwidi' bagwxaquə' beṇə' can' chi' saquə' beṇə' Izrael gwlaž checho ca', na' bito əžinlaze'e gaquə ca' len beṇə'chən' de'e yoblə. 22 Žalə' nžia Diozən' bia' yesə'əžaglaogü'e sša ni yeto beṇə' cuich zjəmban catə'an yeyož yesə'əžaglaogü'e enə' žalə' ca'. Pero por ni che de'en chaque Diozən' che beṇə' ca' chso'onlilažə' le', beṇə' ca' bagwleje' par əsa'aque' xi'ine', de'e na'anə' cui güe'e latjə yesə'əžaglaogü'e sša.

23 De'e na'anə' šə no əye'e le'e: "Bgüiašc nga zo Cristən' ben' gwlej Diozən' par gaquəlene' chio'o", o šə əye'e le'e: "Na'alə zoe'", bito šejle'ele che'. 24 Zan beṇə' goxoayag ša' lao yežlyo nga əse'e le'e de que zjənaque' Cristən' o de que chso'e xtižə' Diozən'. Na' so'one' miłagr na' so'one' de'e naquə yelə' goban par nič yesə'əxoayague' beṇə' ca' bagwlej Diozən' par əsa'aque' xi'ine' žalə' gaquə yesə'əxoayague' lega'aque'. 25 Baṇezele can' gaquə la' bagwdixjue'ida' le'e che de'e ca' ze'e gaquə. 26 De'e na'anə' šə əse'e le'e: "Zo Cristən' latjə dašən'", bito gwzenagle čhega'aque' par əžja'acle. Na' šə əse'e le'e de que zo Cristən' lo'o yo'ona', bito šejle'ele čhega'aque'. 27 Can' chac catə' čep yesən' chse'eni'in doxenlə le'e yoban' to de repentza, leczə can' gaquə catə'an əžin ža yida' de'e yoblə. Diozən' bsele'e nada' golja' beṇə'ch, na' yida' to de repentza na' yoguə'əloj beṇə' yesə'əle'ine' nada'. 28 Ngale'en chonen che ben' ne': "Gan' de bia' guat nan' chesə'əžag šod ca'."

Can' gaquə catə' yida' Jesocristən' de'e yoblə

29 Na' cate yeyož chi' saquə' beṇə'chən' lao ža ca', bgüižən' bitoch əgwse'eni'in, na' leczə ca' bio'ona'. Na' beljw ca' zjəžia le'e yoban' yesə'əxopən čedə' Diozən' əgws'i'ine' yoguə' de'e ca'. 30 Na' cana'ach beṇə' ža' yežlyon' yesə'əle'ine' nada' yida' de'e yoblə to lo'o bejw, nadan' naca' ben' bsele' Diozən' golja' beṇə'ch. Yida' nsa'a yelə' guac xen čhia'anə' na' yelə' chey che'eni' čhia'anə'. Na' beṇə' ža' yoguə' nasyon che yežlyon' yesə'əbežyaše'e, beṇə' cui gwso'onlilažə' nada'. 31 Na' catə'an yida' to trompetən' cuežən žižjo, na' əseła'a angl čhia' ca' doxenlə yežlyona' par yesy'ətobe' beṇə' ca' bagwlej Diozən' par zjənaque' xi'ine' gatə'ətezə zjənasəlese'.

32 Nezele can' chac do nga len yag yixgüion', catə' bač chzola' chebia xlague'e, chacbe'ile de que bač zon yela' yejon'. 33 Na' leczə can' catə'an le'ile gaquə de'e mal ca' bagwnia' gaquə, cana'ach ənezele de que bazon əžin ža šo'o fin che yežlyon'. 34 De'e li əchnia' le'e, bitonə' gat le'e nitə'əle lao tyemp nga na'a

catə' solao gaquə yoguə'əloj de'e ca'. ³⁵ Ca naquə de'e ca' chle'icho le'e yoban' na' yežlyon', yesə'əde chei, pero ca naquə xtiža'anə' caguə de'e te cui gaquə can' nannə'.

³⁶ Pero ca naquə bi ža bi orən' šo'o fin che yežlyon', notono no neze, ni que zjəneze angl ca' nita' yoban', na' ni que nezdə' nada' naca' Xi'in Diozən'. Tozə Xa' Dioz nan' neze.

³⁷ Diozən' bsele'e nada' golja' beṇəch, na' can' goquə ca tyemp che de'e Noenə', leczə can' gaquə catə'an nada' yida' de'e yoblə. ³⁸ Beṇə' ca' gwnitə' ca tyemp che de'e Noen' gwžə'azeche' gwse'ej gwsə'ogüe' na' gwso'elaozechga'aque' bosə'ošagne'e na' bosə'əšague' na' no xi'inga'aque'. Ne'e chso'onte' ca' catə'an bžin ža gwyo'o Noen' lo'o barcon' len family che' ca'.

³⁹ Bitə gwsa'acbe'ine' bin' gaquə xte catə'əchan' goc yejw sio' juisyən' na' bia' nisən' yoguə'əlojga'aque'. Ca'atezəczən' bitə sa'acbe'i beṇə' bin' gaquə xte catə'əchan' yida' de'e yoblə. ⁴⁰ Quingan' gaquə catə'an yida' de'e yoblə, čhopə beṇə' nite'e do yoba, toe' yezi' yeca' Diozən', na' yetoe' yocua'əne'. ⁴¹ Na' čhopə no'olə nite'e chso'ote', toe' yezi' yeca' Diozən', na' yetoe' yocua'əne'.

⁴² De'e na'anə' le'e so probnid par catə'an yida' de'e yoblə, čhedə' bitə nezele bi ža bi orən' yida' de'e yoblə, nada' naca' Xanle. ⁴³ Le'e gon xbab che de'e nga, žalə' neze xan yo'onə' do bi or lao yelən' əžin beṇə' bguannə' liže'enə', la' gwnaze' par nič bitə güe'e latjə šo'o be'enə' liže'enə' par cuane' šinlaze'enə'.

⁴⁴ De'e na'anə' ža, le'e so probnid par catə'an yida' de'e yoblə čhedə' catə'an cui chonle xbab yida' ca nan' yida' de'e yoblə, nada' naca' ben' bsele' Diozən' golja' beṇəch.

Mos ben' chon güen na' mos ben' cui chon güen

⁴⁵ Notə'ətezle šə zotezə zole probnid dote tyemp, gwxaquə'əlebele ca to mos beṇə' naque' beṇə' sin' na' beṇə' chon complir can' cheyalə' gone'. Na' gwxaquə'əlebele ca to mos ben' gwlo'o xane'enə' lao ne'e liže'enə' catə'an gwze'enə' par nič chnežjue' de'e chsa'o yoguə' mos che' ca' yelə' catə' chžin or chsa'ogüe'. ⁴⁶ Šə to beṇə' mosən' chontezə chone' can' non xanen' mendad, mbalaz socze' catə' yežin xane'enə'. ⁴⁷ De'e li chnia' le'e, xane'en cue'e lao na' xmose'enə' yoguə'əloj de'en deine'. ⁴⁸ Pero šə mosən' naque' beṇə' mal na' gone' xbab əne': "Bagwžei xanan'". ⁴⁹ Nach šə solaocle' čhine' mos ca' yelə' na' ye'ej gaoxatteze' len no beṇə' güe'e zo, ⁵⁰ nach xane'enə' yežine' to ža senyale' le' to or cui nacbe'ine'. ⁵¹ Na' por ni che de'en cui chon mosən' can' cheyalə' gone', xane'enə' čhinchgüe' le' yid sotən' xte ca gate'. Gaquə che' can' chac che notə'ətezə beṇə' goxoayag, čhjəya'aque' gabilən' gan' chesə'əbežyašə' beṇə' na' chsa'oyejə leyga'aque'enə'.

25

Jempl che ši no'ol güego' ja'aque' to yelə' gošagna'

¹ Nach Jeso'osən' goze'e disipl che' ca': —Yelə' gwnabia' che Diozən' ben' zo yoban' gwxaquə'əleben ca de'e nga goquə. Goc to yelə' gošagna' na' bazjəxi' beṇə' gošagna'anə' xo'ole'enə'. Na' nita' ši no'ol güego' zjənaque' migw che beṇə' ca' chesə'əšagna'anə'. Na' zjənxobe' lintern čhega'aque'en ja'aque' jəsə'əleze' catə' yesyə'əchoj beṇə' ca' liž no'olan' par nič əžja'aque' liž beṇə' byon' t xen. ² Na' gueyə' no'ol ca' gwnite'e probnid, na' no'ol ca' yegueyə' bitə gosə'anite'e probnid. ³ Catə' gwsa'aque' ližga'aque'enə', zjənxobe' lintern čhega'aque'enə' pero bitə gwso'oxe'e lmet gan' yožə petroly de'en yoso'ochine' catə' yebiž de'en yožə lo'o lintern čhega'aque'enə'. ⁴ Na' no'ol

ca' gueya' catə' gwsa'aque' ližga'aque'ena', gosə'əxobe' lintern čhega'aque'ena' na' gosə'əbecyichje' gwsə'o'xe'e lmet gan' yožə' petroly de'en yosə'əchine' catə' yebiž de'en yožə' lo'o lintern čhega'aque'ena'.⁵ Na' gosə'əzei benə' gošagna' ca', na' yogua' benə' ca' gosə'əbezo' lega'aque' gosə'ətase' lao chesə'əbeze'ena'.⁶ Na' do chel, to beŋə' gwne' zižjo, gože' lega'aque': "Bachesy'əchoj beŋə' gošagna' ca'. Le'e šo'o žjəšagga'acchone'." ⁷ Na' catə' gože' lega'aque' ca', yogua' no'ol ca' gosə'əzeche' na' gosə'əque'e bao' de'en zo lao meš čhe lintern čhega'aque'ena'.⁸ Na' no'ol ca' cui gosə'ənitə' probnid gwse'e no'ol ca' yegueya': "¿Ebito gon latə' petroly chelen' neto'? la' bachebiž čheto'onə'." ⁹ Nach no'ol ca' gwse'e lega'aque': "Bito gaquə' gonlatə'əto' chele la' de'en de čheto' bito gaquen par yogua'əcho. Le'e žja'ac le'e žjəxi' chelen' gan' chso'ote'enna'." ¹⁰ Nach no'ol ca' cui gosə'ənitə' probnidə' ja'aque' jəsə'əxi'e petrolyən'. Na' lao zja'aque' gwxi' petrolyən' besy'əžin beŋə' ca' choso'ošagna' liž beŋə' byon'. Na' no'ol ca' gosə'ənitə' probnid gwso'e lo'o yo'onə' gan' chso'one' gastən' txen len beŋə' ca' chosə'əšagna'anə'. Nach mos ca' bosə'oseyjue' puertən'.¹¹ Na' catə' besə'əžin no'ol ca' jəsə'əxi' petrolyən' na' gosə'əne' cho'a puertən', gwse'e ben' zo cho'a puertən': "Señor, bsaljwšga puertən' par nič šo'oto'." ¹² Pero na' ben' zo cho'a puertən' gože' lega'aque': "De'e li chnia' le'e, bito saljua' par šo'ole la' bito nombi'a le'e."

¹³ Nach goze' Jeso'osən' disipl čhe' ca': —Ca'aczən' cheyałə' sole probnid batə'əquan' yida', čhedə' bito nezele bi ža bi orən' yida' yežlyo nga de'e yoblə, nada' naca' ben' bselə' Diozən' golja' beŋə'ch.

Jempl čhe ben' bocua'anlene' xmosə' ca' mečan'

¹⁴ Na' yelə' gwnabia' čhe Diozən' ben' zo yoban' gwxaquə'əleben ca de'en nga. To beŋə' gwyeye' nasyon zita'. Na' ze'e se'e goxe' mos čhe' ca' na' gwlo'e lao na'aga'aque' xmeche'ena' par gwso'onene'en negosy.

¹⁵ Toe' bocua'anlene' gueya' mil pes. Na' yetoe' bocua'anlene' čhopa mil. Na' yetoe' bocua'anlene' tmil. Bnežjue'en lega'aque' segon can' chac so'on to toga'aque'. Beyož bene' ca' gwze'e. ¹⁶ Ben' bocua'anlene' gueya' mil le'e gwzolaote chone' negosy len mečan' na' bene' gan yegueya' mil pes. ¹⁷ Le'egatezə' ca' ben ben' bocua'anlene' čhopa mil. Le'e gwzolaote chone' negosyən' len mečan' na' bene' gan yechopa mil. ¹⁸ Na' ben' bnežjue' tmil gwyeye', jəcuša'e xmech xane'ena' to lo'o yech de'e əgwčhe'ene' lo'o yon'.

¹⁹ Goc šša gwza' xan mos quinga catə' bežine' nach bene' mendad ja'ac xmosə' ca' laogüe'ena' par bosyo'odie' cuent. ²⁰ Na' mosən' ben' bocua'anlene' gueya' mil pes bžine' laogüe'ena' na' gože'ene': "Xana', ni de de'e gueya' mil de'en beŋə' nada'. Na' babena' gan yegueya' mil." ²¹ Na' xane'ena' gože'ene': "Babeno' de'e güen. Naco' mos güen na' syempr chono' complir can' cheyałə' gono'. Beno' can' cheyałə' gono' len de'e daon' bocua'anlena' le', na' na'a gona' lao na'o de'e xenchlə. Gwyo'o na' gona' par nič so' mbalaz len nada'."

²² Nach catə' bžin ben' bocua'anlene' čhopa milən' gože'ene': "Xana', ni de de'e čhopa mil pes de'en bocua'anleno' nada', na' babenən' gan yechopa mil."

²³ Nach gož xane'en le': "Babeno' de'e güen. Naco' mos güen na' syempr chono' complir can' cheyałə' gono'. Beno' can' cheyałə' gono' len de'e daon' bocua'anlena' le', na' na'a gona' lao na'o de'e xenchlə. Gwyo'o na' gona' par nič so' mbalaz len nada'." ²⁴ Nach catə' bezžin ben' bocua'anlene' tmil, nach gože' xane'ena': "Nga de xmecho' de'en bocua'anleno' nada'. Nežda' de que le' naco' to beŋə' znia. Chelapo' de'en gwsa'az beŋə' yoblə, na' chotobo' cwseš gan' gwso'on beŋə' yoblə žin. ²⁵ De'e na'anə' gwya'a jəche'ena' to yech na' bcuaša'a xmecho'onə', čhedə' bžeba' šə əgnwitla'an. Na' na'a bezi'išgan'."

26 Nach *xane'en* gože' le': "¡Naco' mos mal, na' naco' xagüed! Chacdo' de que chelapa' gan' gwsa'az beñə' yoblə, na' chotoba' cwseš gan' gwso'on beñə' yoblə žin. 27 Na' šə chacdo' chona' ca', žbixčhen' cui gwlejo' xmecha'an beñə' yoblə žlac cui gwzoa'? na' na'a babela'a yezi'an len yičhjei žala' ca'." 28 Nach gože' xmoše' ca' yelə': "Yeca'ale mechən' de'en bocua'anlena' be'enə' na' əgwnežjwlen ben' banoxə' šı mil pes. 29 Can' naquən, ben' chon güen len de'en chnežjo xane'en le', xane'en gwnežjochcze' che', ničh gata' de'e scha'och che'. Pero na' be'enə' cui chgon žin de'en chnežjo xane'en le', yeca'a xane'en de'e da'on bnežjue' le'. 30 Na' ca' naquə mos mal nga le'e yebeje' fuerlə gan' lechgualə naquə žčhol na' cuežyaše'e na' gaoyeja' leye'enə'."

Can' gaquə catə' Jeso'osən' gone' yelə' jostis che yogua' nasyon

31 Diozan' bsele'e nada' golja' benačh, na' catə' yida' de'e yoblə nsa'a yelə' chey che'eni' čhia'anə', na' čhi'a angl čhia' ca' na' cui'a gan' chey che'eni' na' nabi'a. 32 Yoguə' beñə' ban na' yoguə' beñə' guat che yoguə' nasyon gona' mendad da'aque' laogua'anə'. Na' catə' banitə' yogue'e na' la'aga'aca'ane' can' chon to beñə' goye xilə' catə' chbeje' partlə xilə' ca' na' partlə šib ca'. 33 Na' beñə' ca' zjənaquə beñə' güen lao Diozən' de'en baboso'ozenague' čhia' əgwnitə'əga'aca'ane' cuiitan' liča. Pero beñə' mal ca' əgwnitə'əga'aca'ane' cuiitan' yeglə. 34 Na' nada' naca' Rei yapa'a beñə' ca' nitə' šla'a ličan': "Baben Xa' Diozən' par ničh le'e zole mba. Le'e da nga par ničh gona' ca' nabi'ale txen len nada' can' banžia Diozən' bia' dezd gwxe yežlyon'. 35 Gona' ca' nabi'ale čheda' catə' gwdona' le'e beñle de'en gwdaogua'. Na' catə' bgüilda' nis, le'e beñle de'e güe'ėja'. Na' catə' goca' ca' beñə' zitə' le'e bebeile bgüialaole nada' ližlen'. 36 Na' catə' cui gotə' de'e čhaza', le'e beñle de'e gwyaza'. Na' catə' gocšenda' le'e bedətiple laža'a. Na' catə' gota'a ližya, le'e bedəlanə'əle nada'." 37 Na' yoguə' beñə' güen ca' əse'e nada': "Xanto' žbatən' ble'ito' le' gwdono' na' beñto' de'e gwdaogo'? Na' žbatən' bgüildo' na' beñto' de'e güe'ejo'? 38 Na' žbatən' goco' ca' beñə' zitə' na' bebeito' bgüialaoto' le'? Na' žbatən' ble'ito' le' cui gotə' de'e čhazo' na' beñto' de'e gwyazo'? 39 Na' žbatən' gocšendo' o goto'o ližya na' bedəlanə'əto' le'?" 40 Na' nada' naca' Rein' yapə'əga'aca'ane': "De'e li čhnia' le'e, laogüe de'en beyašə'əlažə'əle beñə' ca' zjənaquə ca' biša'a na' ca' zana' por ni čhe de'en chso'onližaže'e nada', la'anə'əczə' cuitec bi zjəzaque'e par len beñačən', lencza' nada'an beyašə'əlažə'əle."

41 Nach beñə' ca' nitə' yeglə, beñə' mal ca', yapə'əga'aca'ane': "Le'e cui'izə' ca'alə. Banchoglaon čhele cuiayi'ile yelə' güen de'e mal čhelen'. Le'e žja'ac lo'o yi' gabil' de'en cui chyol, yi' de'en bxen Diozən' gan' yesə'əzi' de'e gwxiye'enə' len angl bzelaog čhe' ca' castigw zejlicane. 42 Le'e žja'ac gabilan' čheda' catə' gwdona' bito beñle de'en gaogua'. Catə' bgüilda' bito beñle de'e ye'ėja'. 43 Catə' goca' ca' beñə' zitə' bito bebeile ggüialaole nada' ližle. Catə' cui gotə' de'e čhaza' bito beñle de'e čhaza'. Catə' gocšenda' na' catə' gota'a ližya, bito bedəlanə'əle nada'." 44 Nach lega'aque' yosyo'oži'e xtiža'a yesə'əne': "Xanto', žbatən' gwdono'?, žbatən' bgüildo'? na' žbatən' goco' beñə' zitə'?, žbatən' cui gotə' de'e čhazo'?, žbatən' gocšendo'? na' žbatən' goto'o ližya na' bito beyaše'eto' le'?" 45 Na' catə' yeyož əsi'e nada' ca', yapə'əga'aca'ane': "Laogüe de'en cui beyašə'əlažə'əle beñə' ca' zjənaquə ca' biša'a na' ca' zana' por ni čhe de'en chso'onližaže'e nada', la'anə'əczə' cuitec bi zjəzaque'e par len beñačən', lencza' nada'an cui beyašə'əlažə'əle." 46 Nach beñə' mal ca' yesə'əzi'e castigw čhe xtolə'əga'aque'enə' zejlicane. Pero beñə' güen ca' yesə'əzoe' len nada' zejlicane.

26

Boso'oxi'e can' so'one' yesə'əzene' Jeso'osən'

¹ Catə' beyož be' Jeso'osən' dižə'an ca', gože' disipl che' ca': ² —Banezele de que yechopə žazən' galə' lni pascw chechon', na' ca na' gaca' lao na' benə' contr chia' ca' nič so'ote' nada' yosə'əde'e nada' to le'e yag coroz, nadan' naca' ben' bselə' Diožən' golja' benəch.

³ Nach bχoz əblao ca' na' benə' ca' choso'osed choso'olo'i lei de'en bzoj de'e Moizežən' na' benə' golə' blao che chio'o benə' Izrael besə'ədobe' chyo'o che benə' gwnabia' che bχoz ca', ben' le Caifas. ⁴ Na' boso'oxi'e naclən' so'one' par yesə'əzene' Jeso'osən' bgašə'əzə na' so'ote'ene'. ⁵ Na' gosə'əne': —Bito gotchone' ža lni'nə', par nič cui yesə'ədopə benə' ca' banitə' lao syodan' na' yesə'ədiləlene' chio'o.

To no'olə bcuase' set zix yichj Jeso'osən'

⁶ Nach Jeso'osən' len disipl che' ca' ja'aque' Betania, liž to benə' le' Simon. Na' Simon nan' güe'ine' yižgüe' de'en ne' lepr antslə. ⁷ Na' catə' besə'əžine' liž Simonnə' gwche' Jeso'osən' cho'a mes che'enə'. Na' ca' chi'e catə'əczlə bžin to no'olə noxə'e to imet de yej fin de'e yožə to set de'e lechguale zaque'e de'e chlā' zix. Na' no'olən' bcuase' setən' yichj Jeso'osən'. ⁸ Na' disipl ca' catə' besə'əle'ine' can' ben no'olən' besə'əže'e na' gwse'e ljuežjga'aque': —čBixčhen' con benditjeine' setən'? ⁹ Güenchlə žalə' bete'en na' mech xennə' de'en le'ine' chei əgwnežjue'en benə' yašə'.

¹⁰ Na' catə' bene Jeso'osən' xtižə'əga'aque'enə', nach gože' lega'aque': —čBixčhen' chnele che no'olən'? Güenchgua babene' len nada'. ¹¹ Ca naquə benə' yašə' ca' syempr nitə'əcze' len le'e, pero ca naca' nada' yešložgan' soa' len le'e. ¹² De'en bcuasə no'olən' setən' yichja'anə' bene' de'e non gone'ene' nada' žan' so'ote' nada' na' əgaša'a, can' choncho len cuerp che benə' guatən'. ¹³ De'e li chnia' le'e, catə' chixjue'ile dižə' güen dižə' cobə chia'anə' gasə' laljən doxenlə yežlyo nga, na' leczə guasə' gwłaljə dižə'an can' ben no'olən' nga len nada', na' benə' zannə' so'one' xbab ca güennə' bene'.

Jod Iscariotən' bene' Jeso'osən' lao na' benə' contr ca'

¹⁴ Gwde de'e quinga, Jod Iscariotən' ben' goquə txen len disipl ca' šižin gwyeje' lao bχoz əblao ca' ¹⁵ par ježe' lega'aque': —čJa'aque'ətə' gonle nada' na' gona' Jeso'osən' lao na'ale?

Nach boso'oxia' benə' ca' boso'onežjue'ene' šichoa mech plət. ¹⁶ Nach Jodən' lao orzə gwzolao gwche'enaogüe' batə'əquan' so latjə gone' Jeso'osən' lao na'aga'aque'enə'.

Lao gwsa'ogüe' xše' Jeso'osən' blo'ine' lega'aque' naquan' žjasyə'əzalaže'e ca de'en əgwnežjo cuine' so'ot benə' le'

¹⁷ Na' ža nech ža lni'n' catə'an chsa'ogüe' yetxtil sin cui bi xne'i nchixə, ja'ac disipl ca' gan' zo Jeso'osən' na' gwse'ene': —čGa che'endo' žje'eni'ato' de'en gačo xše' lni pascon'?

¹⁸ Nach Jeso'osən' gože' lega'aque': —Le'e žja'ac lao syodan' liž to benə' yežagle na' ye'elene': “Maestrən' ne' de que bazon əžin ža so'ote'ene' na' ližo' nga chene'ene' gaolento'one' xše' lni pascon'.”

¹⁹ Nach gwso'on disipl ca' can' ben Jeso'osən' mendad, jesə'əsi'ini'e de'en gwsa'olene' le' xše' lni pascon'.

²⁰ Na' catə' beyoʒ gwɔ̃xɛn, Jeso'osən' len disipl ɕhe' ca' šiʒiɲ gosə'əbi'e cho'a mesən' gwsa'ogüe'. ²¹ Na' lao chsa'ogüe'enə' goʒ Jeso'osən' lega'aque': —De'e li əchnia' le'e, to le'e gonle nada' lao na' beɲə' contr ca'.

²² Nach de'e juisy de'e gwsa'acquene' catə' beyoʒ gwne' ca', nach to toe' gwse'e le': —Xana', çanada'an gona' le' lao na' beɲə' contr ca'?

²³ Nach goʒe' lega'aque': —To ben' babne' ne'enə' txen len nada' lo'o platən', le'enə' gone' nada' lao na' beɲə' ca'. ²⁴ Banaquəczən so'ot beɲə' nada' can' nyoj Xtiʒə' Diozən' nan gaquə çhia', pero probchguazə be'enə' gon nada' lao na' beɲə' contr ca'. Nca'alə xɲeze žalə' cuiclə golje'enə'.

²⁵ Nach Jodən', ben' bene' Jeso'osən' lao na' beɲə' contr ca', goʒe'ene': —Maestr, çənanadan' gona' le' lao na' beɲə' contr ca'?

Jeso'osən' goʒe'ene': —Nezczədo' šə le'enə'.

²⁶ Na' lao chsa'ogüe'enə' gwxi' Jeso'osən' yetxtilan', be'e yelə' choɔxcwlen ɕhe Diozən'. Gwde na' bʒoxje'en nach be'en disipl ɕhe' ca', goʒe' lega'aque': —Le'e gaon. Lənnə' cuerp chia'anə'.

²⁷ Nach leczə beɔ̃xe'e basən' gan' yoʒə nis oban', na' lao noxe'en be'e yelə' choɔxcwlen ɕhe Diozən' nach boznejue'en lega'aque' goze'e: —Yoguə'əle le'e ye'ej de'en yoʒə lo'o bas nga. ²⁸ Lənnə' xçhena'anə'. Na' xçhena' na'anə' laljə par niç yezi'ixen Diozən' xtolə' beɲə' zan, na' de'en laljənnə' solao gaquə de'e cobə de'en ben Diozən' lyebe gone' par gaquəlene' beɲəçhən'. ²⁹ Echnia' le'e na'a zelao che'eja' nis oban'. Pero de yeto de'e yebeichocho mazəchlə can' chebeicho nis oban', lənnə' de'en socho mbalaz zejlicane catə'an socho txen gan' nabi'a len Xa' Diozən'.

Jeso'osən' gwne' de que Bedən' cui çhebe' šə nombi'ene'

³⁰ Na' beyoʒ gwse'ej gwsa'ogüe' gwso'ole' to imno nach besə'əchoje' ja'aque' ya'a de'en nzi' Olibos. ³¹ Na' lao zjəngüe'e nezən' Jeso'osən' goʒe' disipl ɕhe' ca': —Neže' yoguə'əle cuejyichjle nada' por ni ɕhe de'en gaquə çhia'. Gaquə can' nyoj Xtiʒə' Diozən' nan: “Gota' beɲə' goye xilə'anə' na' xilə' ɕhe' ca' sa'asə'alasəb.” ³² Pero na' catə' yosban Diozən' nada' ladjo beɲə' guat ca', yobəçhda' nada' yeya'a Galilean' cle ca' le'e.

³³ Nach Bedən' goʒe' Jeso'osən': —Nada' cuat cuejyichja' le' la'anə'əczə šə yoguə' beɲə' yeziquə'əchlə yesə'əbejyichjle' le'.

³⁴ Jeso'osən' goʒe'ene': —Bed, əchnia' le' bito cueʒ lecon' neže' antslə ze'e gaquə šon las cui çhebe' de que nombi'o nada'.

³⁵ Nach Bedən' goʒe'ene': —La'anə'əczə šə çhonçlan byen guatlencza' le', bito əɲia' de que bito nombi'a le'.

Na' leczə ca' əgwse' yoguə' disipl ɕhe' ca' le'.

Jeso'osən' bene' orasyon lo'o güert de'en nzi' Getsemani

³⁶ Na' catə' Jeso'osən' len disipl ɕhe' ca' besə'əzine' latjən' gan' nzi' Getsemani, na' goʒe' lega'aque': —Ngazə lecue' žlac ša'a de'e na' žjena' orasyon.

³⁷ Na' gwche'e Bedən', len çhopə xi'ɲ Sebedeon' Jacobən' len Juannə'. Na' Jeso'osən' gwzolao gwzochgüe' trist, na' de'e juisy de'e goquene' lo'o yichjla'ažda'ogüe'enə'. ³⁸ Nach goʒe' lega'aque': —Tristçgua zo yichjla'ažda'ogua'anə' xte bachonən yelə' got. Leçuezə nga na' sole əɲa'azle len nada'.

³⁹ Nach gwdie' gwyeje' yelatə' delant na' jete'e gosçho'alə lao yon' nach bene' orasyonə' gwne': —Xa', çəguaguə te ca'azə de'en çhi' saca'anə'?, pero bito che'enda' gaquə de'e ɲia' nada', sino gaquə con can' əɲao' le'.

⁴⁰ Catə'əczlə bežine' gan' nitə' disipl ca' šonə jəyedi'e lega'aque' chəsə'ətase'. Na' gože' Bedən': —ĴEni to or bito bchejele əna'azle len nada? ⁴¹ Le'e nā', na' le'e gon orasyon niç cui co'o gwxiye'en le'e nez mal. Nezdə' chene'ele əna'azle len nada', pero cui choile.

⁴² Na' gosze'e gan' nite'enə' de'e yoblə, jəzene' orasyonnə', gwne': —Xa', šə cui gaquə te ca'azə de'en çhi' saca'anə', con can' che'endo' le' gaquə.

⁴³ Na' bezžine' gan' nite'enə' de'e yoblə jeyezdi'icze' bachəsə'ətase' tant bachac šə tasga'aque'. ⁴⁴ Na' gwze'e de'e yoblə gan' nite'enə' jene' orasyonnə' de'e əgwyon lase, na' gwnacze' can' bagwne'. ⁴⁵ Nach bezžine' gan' nitə' disipl ca' šonə nach gože' lega'aque': —ĴEne'e chtasle? ĴEne'e chonle dezcanz? Diozən' bsele'e nada' golja' beñach na' nā'a baç bžin or chia' par gaca' lao na' beñə' mal ca' par so'ote' nada'. ⁴⁶ Le'e secha. Le'e šo'o. Baza' ben' gon nada' lažə' na' beñə' contr ca'.

Jodən' bdie' Jeso'osən' lao na' soldad ca'

⁴⁷ Necho'ete Jeso'osən' dižə' ca' catə' bžin Jodən' ben' naquə cuent lao disipl ca' šižin. Na' žague' zan beñə' bosə'oselə' bχoz əblao ca' na' beñə' golə blao che chio'o beñə' Izrael. Na' zjanəle'e spad na' zjanlene' no yag. ⁴⁸ Na' Jodən' babzejni'ine' lega'aque' can' gone' par əgwdie' Jeso'osən' lao na'aga'aque'enə', gože' lega'aque': —Ben' gaogua' bxidən', le'enə' senle.

⁴⁹ Na' catə' bžine' gan' zo Jeso'osən' le'e bgüigua'əte' cuite'enə' na' gože'ene': —Padiox Maestr.

Na' gwdaogüe'ene' bxidən' pero caguə do laže'en bene' ca'. ⁵⁰ Jeso'osən' gože'ene': —Migw chia', Ĵbixchen' za'o nga?

Beyož gwne' ca' le'e gosə'əbiguə'əte beñə' ca' gwso'oxe'ene'.

⁵¹ Na' to ben' naquə txen len Jeso'osən' gwlej spad chen' gw dine'en mos che beñə' gwnabia' che bχoz ca', gwchogtechgüe' šla'a nague'enə'. ⁵² Nach Jeso'osən' gože'ene': —Bego'o spad chio'onə' lo'o liže, la' yoguə' beñə' chso'ot beñə' len spad, leczə len chsa'atene'. ⁵³ ĴEbito nezdo' de que gaquə naba' lao Xa'anə' par le'e selə'əte' mazlə gyon šižina mil angl beñə' əsa'aclen nada'? ⁵⁴ Šə le'e tiləlenle beñə' quinga par yoslale nada', Ĵnacxa gaquən gaquə complir can' nyoj Xtižə' Diozən' nan can' cheyalə' gaquən'?

⁵⁵ Na' lao bazjənoxe'e Jeso'osən', gože' lega'aque': —ĴEca to beñə' bguannə' chsaquə'əlebele nada' za'acle len spad len yag zedexenle nada'? Yoguə' ža gwchi'a len le'e na' bsd blo'ida' beñə' lo'o yo'odao' əblaon' na' cui gwzenle nada'. ⁵⁶ Pero laogüe de'en chac yoguə' de'e quinga chac complir Xtižə' Diozən' de'en bosə'ozoj de'e profet ca' beñə' ca' gwso'e xtiže'ena' cana'.

Na' lao or na' bosyo'oxonj yoguə' disipl che' ca' gosə'əbejyichje'ene'.

Gosə'əche'e Jeso'osən' lao beñə' golə beñə' blao che Izraelən'

⁵⁷ Na' beñə' ca' gosə'əzen Jeso'osən' gosə'əche'ene' lao Caifasən' ben' naquəch bχoz əblao che chio'o beñə' Izrael gan' bazjəndobə beñə' ca' choso'osed choso'olo'i lei de'en bzoj de'e Moizezan' na' len yeziquə'əchlə beñə' golə blao ca' chəsə'ənabia' nasyon chechon'. ⁵⁸ Nach Bedən' jənaogüe' Jeso'osən' zitə' zitə'alə xte bžinte' liž bχoz əblaonə', na' gwyo'e chyo'onə' na' jəchi'e len beñə' ca' zjənaquə xā'ag che yo'odao' əblaonə', cheda' gone'ene' le'ine' naquən' zelao gaquə len Jeso'osən'.

⁵⁹ Nach yoguə' bχoz əblao ca' na' yeziquə'əchlə beñə' golə blao ca' chəsə'ənabia' nasyon Izrael chechon' chasyə'əyilje' beñə' so'e dižə' contr Jeso'osən' parzə niç so'ote'ene' la'anə'əczə šə dižə' güenlažə'ənə'. ⁶⁰ Pero goc šša bito besyə'əzelene' chopə beñə' əso'e dižə' de'en yedile la'anə'əczə beñə'

zan gosə'ənitə' testigw fals contr le'. Gwde na' besə'əchoj yęchopə testigw fals ca' na' bedile can' gosə'əne'. ⁶¹ Na' gosə'əne': —Benga gwne': "Nada' gwaquə yochinjə' yo'odao' əblao gan' cho'ela'ocho Diozən', na' lao šonə žazə yeyona'an."

⁶² Nach gwzoža' ben' naquəch bχoz əblao gože' Jeso'osən': —ǝEbito bi de bi nao' ca' naquə de'e nga chosə'əcuš beŋə' quinga le'?

⁶³ Jeso'osən' bitobi gwne'. Nach gož bχoz əblaonə' le': —Echnia' le' gwna neto' na' bzo Dioz ben' zo zejlicəne gaque' testigw šə le len' Crist Xi'in Diozən' ben' gwleje' par gaquəlene' nasyon chechon'.

⁶⁴ Jeso'osən' gože'ene': —Le ben' nao' na' nada'. Diozən' bsele'e nada' golja' beŋəch. Na' əchnia' le'e, gwžin ža le'ile nada' chi'a cuit Diozən' ben' napə le'ezelaogüe yelə' guac xen, na' nabi'a t xen len le', na' le'ile nada' yetja' yoban' to lo'o bejw.

⁶⁵ Cate bene bχoz əblaonə' xtižə' Jeso'osən' gwšo' gwčhezə' xe'enə' la' par le' de'e mal juisjən' gwna Jeso'osən', nach gwne': —Babenecho nə'a babžia bnite'e Diozən'. ǝNochxa testigon' chyažjecho? ⁶⁶ Na' ǝnaquan' əŋale che'?

Nach beŋə' ca' bosyo'oži'en gwse'ene': —Babžia bnite'e Diozən' na' cheyalə' gate'.

⁶⁷ Nach bosooža' xene'e cho'alaο Jeso'osən', na' gosə'əbaže'ene', na' baļe' gosə'əgape'e xague'enə'. ⁶⁸ Nach gwse'ene': —Šə len' naco' Cristən' ben' gwlej Diozən' par gaquəleno' nasyon chechon', gwŋeya'ašc gwna neto', ǝnon' chgapə' le'?

Bedən' bito gwčhebe' šə nombi'e Jeso'osən'

⁶⁹ Na' lao chac de'e quinga, chi' Bedən' chy'o'ona' catə' bžin to no'ol criad che Caifasan' gože'ene': —Lečzə leno' le' naco' t xen len Jeso'os beŋə' Galilean'.

⁷⁰ Na' lao yoguə' beŋə' ca' ža'anə', Bedən' bito gwčhebe' šə naque' t xen len Jeso'osən' na' gože' no'olən': —Bito ŋezda' bi dižə'an cho'o.

⁷¹ Gwde beyož gože' no'olən' ca' gwyeje' cha'ašilan', na' bezle'i yeto no'ol criadən' le', na' goze'e beŋə' ca' ža'anə': —Benga naque' t xen len Jeso'os beŋə' Nasaretən'.

⁷² De'e yoblə bito gwčhebe' šə le naque' t xen len Jeso'osən' nach bzoe' joramentən' lao Diozən' gože' no'olən': —Bito nombi'a be'enə' nao' ca'.

⁷³ Na' chaczə šlož, gosə'əbiguə' beŋə' ca' ža'anə' gosə'əze'e Bedən': —De'e liczə, chono' t xen len beŋə' ca' chedə' ca nga chŋio' ngazə nacbia'.

⁷⁴ Nach Bedən' gože' lega'aque': —Diozən' goŋe' nada' castigw šə chonļaža'an nia' bito nombi'a be'enə'. Chzoa' jorament lao Diozən', bito nombi'ane'.

Na' le'e gwčhezə' to lecw. ⁷⁵ Nach jəza'alažə' Bedən' can' gož Jeso'osən' le': "Šon las gaquə cui chčhebo' šə nombi'o nada' catə' cuež lecon'." Nach beza' Bedən' lechguale gwčhezjaše'e tant de'e goquene'.

27

Gosə'əche'e Jeso'osən' lao Pilatən'

¹ Na' catə' gwye'eni' beteyon', yoguə' bχoz əblao ca' na' yeziquə'əchlə beŋə' golə blaο ca' chəsə'ənabia' nasyon chechon' besə'ədope' jont na' gosə'əchoglaogüe'en de que so'ote' Jeso'osən'. ² Nach bosoocheje'ene' na' le'e gosə'əche'ete'ene' jse'ene'ene' lao na' Gobernador Ponsio Pilatən'.

Jodən' beyot cuine'

³ Na' Jodən' ben' bdiē' Jeso'osən' lao na' beṇə' ca', catə' gocbe'ine' de que bagoso'ochoglaogüē'en so'ote' Jeso'osən', beyejene' de'en bdiē' le' lao na' bḫoz əblao ca' na' beṇə' golə blao ca'. Nach gwyeje' laoga'aque'enə' par bonežjue' lega'aque' šichoa mech plātən'. ⁴ Nach gože' lega'aque': —Malən' bēna' bdiā' lao na'alēn' to beṇə' cui napə dolə'.

Na' gwse'ene': —Bitobi dolə' napə neto' de'en beno' ca', la' de'e nezzədo'on beno'.

⁵ Nach Jodən' bozale'e mech ca' lo'o yo'odao' əblaonə', nach beze'e, na' jəyelo'o don' yene' par beyot cuine'.

⁶ Beyož beza' Jodən', bḫoz əblao ca' besyə'ətobe' mechən'. Na' gwse'e ljuežjga'aque': —Bito de lsenš co'ochon lo'o caj gan' yo'o mech che yo'oda'onə', chedə' la' naquən mech de'en gwdixjwcho par nič gotcho be'enə'.

⁷ Na' bosə'oxi'e yesə'əzi'e to yežlyo de'en de che to beṇə' güen yesə' len mechən'. Na' gosə'əzi'en par to capsant gan' yesə'əcuasē'e beṇə' zita'. ⁸ Na' yezlyonə' nzi'in "Capsant Chen" xte ža neža chedə' gosə'əzi'en len mech de'en gosə'əyixjue' par gwso'ote' Jeso'osən'. ⁹ Can' goquə' par nič goc complir can' bož de'e profet Jeremiasən' ben' be' xtižə' Diozən' canə', gan' nan: "Besyə'əzi'e šichoa mech plātən', de'en gwsa'aque bałə beṇə' Izrael zaquə' ben' besə'əgue'ine'enə'. ¹⁰ Na' len mechən' gosə'əzi'e yežlyo che to beṇə' güen yesə', can' gwna Xancho Diozən' nada' gaquə'."

Bosə'əcuišē' Jeso'osən' lao Pilatən'

¹¹ Na' bžin Jeso'osən' gwzeche' lao gubernadorən', nach gubernadorən' gože'ene': —čElen' naco' Rei che beṇə' Izrael ca'?

Nach Jeso'osən' gože'ene': —Le ben' nao' na' nada'.

¹² Na' bito bi gwna Jeso'osən' ca de'en bosə'ocuiš bḫoz əblao ca' le' na' beṇə' golə blao ca'. ¹³ Nach Pilatən' gože'ene': —čEbito chendo' catec de'e zan xya nga chsa'ogüē' contr le'?

¹⁴ Pero Jeso'osən' ni to xtiže'enə' bito boži'e, xte bebanchgüēicze gubernadorən'.

Gosə'əchoglaogüē'en so'ote' Jeso'osən'

¹⁵ Na' de to costombr de que ža lni pascw əgwsan gubernadorən' to pres, con beṇə' yesə'əṇab beṇə' lao' syoda ca'. ¹⁶ Na' ližya na' de to pres beṇə' zechgua chei naque' beṇə' mal na' le' Barrabas. ¹⁷ Nach Pilatən' gože' beṇə' ca' zjəndobən': —čNoe' beṇə' quinga chene'ele gwsana'? čEBarrabas na' o šə Jeso'os nga ben' chesə'əne' naquə Crist chele?

¹⁸ Gone'ene' əgwsane' Jeso'osən' la' nezene' ni che de'e zjəžiaque'i bḫoz əblao ca' Jeso'osən', de'e na'anə' bosə'odie' le' lao ne'enə'.

¹⁹ Ca' chi' Pilatən' gan' chone' yełə' jostisən', bžin to rson de'e bsələ' no'ol che'enə' gože'ene': "Bitobi non ben' par bi castigon' əgwnežjo'one', zdacə ben' liča. De'e zan de'e bžaglaochgua' bišyele len yel de'e gwneida' por ni che de'en chac che be'enə'."

²⁰ Na' bḫoz əblao ca' na' beṇə' golə blao ca' gosə'əgo'oyele'e beṇə' ca' ža'anə' par yesə'əṇabe' əgwsane' Barrabasən' na' yesə'əṇabe' gone' mendad so'ote' Jeso'osən'. ²¹ Nach gubernadorən' gože' lega'aque' de'e yoblə: —čNoe' beṇə' quinga chopə chene'ele gwsana'?

Nach gwse'ene': —Barrabas na'.

²² Pilatən' gože' lega'aque': —čBixa gona' len Jeso'os, ben' chesə'əne' naquə Crist chele?

Na' yogue'e gwse'ene': —Bde'e le'e yag corozən'.

²³ Nach gož gubernadorən' lega'aque': —¿Bixa de'e mal babene'enə?

Na' lega'aque' gwso'osye'e zižjoch gosə'əne': —Bde'e le'e yag corozən'.

²⁴ Gocbe'i Pilatən' cuiczə bi de gone'. Bachyalə'əch chso'one' scandl juisy. Nach bsele'e to beṇə' jəxi'e nis par bone'e lao beṇə' ca' ža'anə' na' gože' lega'aque': —Zdaczə bengā licha. Bitobi xbagā'a naquan ca de'en gate', čhedə' de'en nezze le'enə' gate'.

²⁵ Nach yoguə' beṇə' ca' gosə'əne': —Xbaguə' neto' na' xbaguə' xi'into' naquan che yelə' got che bengā.

²⁶ Nach bsan Pilatən' Barrabasən'. Gwde na' bene' mendad gosə'əyin soldad ca' Jeso'osən', nach bene' le' lao na'aga'aque' par yosə'əde'ene' le'e yag corozən'.

²⁷ Nach soldad che gubernadorən' gosə'əche'e Jeso'osən' lo'o yo'o che gubernadorən', nach bosyo'otobe' yoguə' soldad ljuežjga'aque' ca'. ²⁸ Na' gosə'əyine' xala'an Jeso'osən' na' bosə'əguacue'ene' to lachə' color əxna ca de'en chsa'az rei ca'. ²⁹ Na' gwso'one' to coron de yešə' bosə'əožine'en yichje'enə', na' ne'e lican' bosə'əgoxə'ene' to ya. Na' bosə'əozo xibe' laogüe'enə' par gwso'one'ene' borl, nach gwse'ene': —jBiba Rei che beṇə' Izrael!

³⁰ Nach bosə'əžə' xene'e le', na' besyə'əque'e yanə' de'en noxe'enə' na' gosə'əyine'en yichje'enə'. ³¹ Na' beyož gwso'one' le' borlən', besyə'əyine' lachə' color əxnanə' de'en bosə'əguacue'ene'enə', na' besyə'əguacue'ene' xacze'. Nach gosə'əche'ene' par jəsə'əde'ene' le'e yag corozən'.

Boso'ode'e Jeso'osən' le'e yag corozən'

³² Na' catə' besə'əchoje' syodan' besyə'əžague' to beṇə' Sirene le Simon na' la fuers bosə'əgüe'ene' coroz che Jeso'osən'.

³³ Na' besə'əžine' to latjə gan' nzi' Golgota, zejen dižə' latjə che yichj beṇə' guat. ³⁴ Na' bosə'ənežjue' Jeso'osən' bino corrient de'e nchixə to rmech zla' par ye'eje', pero le' con bnixə'en bito güe'eje'en.

³⁵ Na' catə' beyož bosə'ode'ene' le'e yag corozən', soldad ca' gwso'one' xe'enə' rif par gotə'əbia' noe' yechelən. Na' de'en gwso'one' ca' goc can' bzoj de'e profetən' ben' be' xtižə' Diozən' cana', gwne': "Yosyo'ole'e xalana'anə' entr lega'aque', so'one'en rif." ³⁶ Nach gosə'əbi'e gwsa'ape'ene'. ³⁷ Na' yichj yag corozən' gan' de'enə' bosə'əozoje' de'en bcuiš le', na' nan: "Bengan' Jeso'osən' Rei che beṇə' Izrael ca'."

³⁸ Na' leczə cana' bosə'ode'e čhopə beṇə' bguan le'e yečhopə yag coroz. Toe' gwda' cuit Jeso'osən' licha na' yetoe' cuiten' yegla. ³⁹ Na' beṇə' ca' chse'ej chəsə'əde' gan' da' Jeso'osən' chəsə'əlole yichje'enə' gwso'onene' borl, ⁴⁰ gwse'ene': —Len' gwnao' yochinjə' yo'odao' əblaona' na' šonə' žazə yeyono'w, bosla cuino'. Šə len' naco' Xi'in Diozən', beyetj le'e yag corozən'.

⁴¹ Na' len bħoz əblao ca' na' len beṇə' ca' choso'osed choso'olo'i lei de'en bzoj de'e Moizezən' na' len beṇə' fariseo ca', na' len beṇə' golə blao ca', yogue'e gwso'one'ene' borl, na' gosə'əne': ⁴² —Yeziquə'əchlə beṇə' bosle' na' cabi chac yosla cuine'. Šə len' naque' Rei che chio'o beṇə' Izrael, yoletj cuine' le'e yag corozən' na'a na' šejle'echo che'. ⁴³ Le' chonlilaže'e Diozən', la' gwne': "Xi'in Dioz nada'." Na' le'icho yosla Diozən' le' na'a šə chaquene' che'.

⁴⁴ Na' beṇə' bguan ca' zjəda' le'e yag corozən' cuite'enə' čhopə la'a, leczə gwso'one'ene' borl.

Can' goquə catə'an got Jeso'osən'

⁴⁵ Na' do gobiž goc žčhoj doxen yežlyon' bžinte cheda šonə. ⁴⁶ Na' do cheda šonə Jeso'osən' gwne' zižjo gwne': —Eli, Eli, člama sabactani? —zejen dižə': Dioz čhia', čbixčhen' bagwlejšyichjo' nada'?

⁴⁷ Na' catə' gwse'ene' xtiž'e'ena', bałə beŋə' nitə' galə'əzə gosə'ane': —Chaxe' profet Liažən' ben' be' xtižə' Diožən' cana'.

⁴⁸ Nach behoj to beŋə' gwsa'adoe' jəxi'e to sponj na' bosgaže'en bino corrient de'cn cui bi nčhižə, na' bzo'en to lao ya dao' na' bosšine'en cho'a Jeso'osən' par nič gü'e'je'en. ⁴⁹ Na' yebałe' gwse'e be'ena': —Gwležə. Yešč šə yidə Liažən' par yosle'ene'.

⁵⁰ Nach bisya'a Jeso'osən' zižjo na' be'e latjə bchoj grasy čhe'ena' gote'.

⁵¹ Na' lao orən' catə'an got Jeso'osən', ca naquə lachən' de'en ze lo'o yo'odao' əblaonə' gwchəzə gwcholoən gwza'azə yichjei bechojte čhe'ela. Na' lechguale gwxo' xte gwso'oxj yej ca'. ⁵² Na' leczə xte besyə'əyaljo bloj ba ca'. Na' zan de'e beŋə' ca' gwso'onlilažə' Diožən' besyə'əbane' ladjo beŋə' guat ca'. ⁵³ Nach catə'an beban Jeso'osən' ladjo beŋə' guat ca', besyə'əchoje' lo'o ba čhega'aque' ca', na' jəya'aque' Jerosalennə' gan' naquə syoda čhe Diožən'. Na' jəsyə'əlo'e laoga'aque' lao zan beŋə' lao' syodan'.

⁵⁴ Na' leczə lao orən' catə'an got Jeso'osən', capitannə' len soldad čhe' ca' nite'e chsa'ape' Jeso'osən'. Na' besə'əžebchgüe' catə' besə'əle'ine' can' gwxo' na' bichlə de'e ca' goquə, na' gosə'ane': —De'e ličzə benga naque' Xi'in Dioz.

⁵⁵ Na' leczə nitə' zan no'olə latjən' beŋə' gosə'əzecha zitə'ələ na' besə'əle'ine' can' goquan'. No'ol quinga gosə'ənaogüe' Jeso'osən' catə' beze'e Galilean' par chsa'aclene' le' len bi de'e chyažjene'. ⁵⁶ Na' len no'ol quinga gwzo Maria beŋə' Magdala, na' leczə len Maria ben' naquə xna' Jacob na' Jwse, na' leczə ca' xna' Jacob na' Juan xi'in Sebedon'.

Bosə'əcuasə'e Jeso'osən'

⁵⁷ Na' zo to beŋə' gwni'a beŋə' Arimatea le' Jwse, leczə goque' disipl čhe Jeso'osən'. Na' catə' bachzolao chexjw že'ena' ⁵⁸ Jwsen' gwyeje' lao Pilatən' jəyenabe' cuerp čhe Jeso'osən'. Nach Pilatən' bene' mendad bosyo'onežjue'ene' cuerp čhe Jeso'osən'. ⁵⁹ Nach Jwsen' bego'o lao ne'e cuerp čhe'ena' na' blaže'ene' to lachə' de'e nyach. ⁶⁰ Ca naquə Jwsen' bazo to bloj ba čhe' de'e cobə de'e gwčhe'ene' le'e yej, na' lo'o ba čhe' na' gwlo'e cuerp čhe Jeso'osən' na' bləle' to yej xen de'e bseyjue'ene' cho'a ban'. Nach beze'e. ⁶¹ Na' Maria beŋə' Magdalan', na' yeto Maria yoblə, jesə'əchi'e cho'a banə'.

Boso'ozoe' beŋə' chsa'ape' ba čhe Jeso'osən'

⁶² Na' beteyo, gwde žan' catə'an choso'osi'ini'e de'en chse'ej chsa'ogüe' ža lni pascon', besə'ədobə bχoz əblao ca' na' beŋə' fariseo ca' par ja'aque' gan' zo Pilatən'. ⁶³ Na' gwse'ene': —Señor, bajəyeza'alažə'əto' can' gwna de'e beŋə' goxoayaguən' can' nembane' gwne': “Yeyon ža yebana' ladjo beŋə' guat ca'.” ⁶⁴ Bselə'əšga beŋə' žjəsə'ədape' cho'a banə' lao šonə ža, nič cui žja'ac disipl čhe' ca' še'elə žjəsyə'əleje' cuerp čhe'ena' na' əse'e beŋə' de que babebane' ladjo beŋə' guat ca'anə'. La' šə əsa'aque' beŋə' de que bebane' ladjo beŋə' guat ca', gončən mal cle can' benən antslə catə'an bχoayague' beŋə' par gwsa'aque'ne' de que Diožən' bsele'ene'.

⁶⁵ Nach Pilatən' gože' beŋə' ca': —Gona' le'e soldad ca'. Le'e čhe'ega'aque' par əsa'ape'en ga zelao yesə'əzaque'ene'.

⁶⁶ Nach ja'aque' len soldad ca' na' bosə'očhiše'e sey le'e yejən', na' bosə'onite'e soldad ca' gwsa'ape' ban'.

28

Jeso'osən' bebane' ladjo beṇə' guat ca'

¹ Na' catə' gwde ža dezcanz čhechon', bał dmigw Maria beṇə' Magdalan', na' Maria ben' yeto, ja'aque' jəsə'əgüie' cho'a banə'. ² Na' goquən' lechgualə gwxo' čhedə' angl čhe Xančhon' betje' yoban', na' bžine' gwcue'e yej de'en nseyjw cho'a ban', na' gwchi'e lao yejən'. ³ Na' anglən' lechgualə chactit cho'alaogüe'enə' caczə ga chep yes na' xala'ane'enə' naquən šyiš xilə' juisy caczə be'eyə'. ⁴ Na' catə' besə'əle'i beṇə' gop ca' le', lechgualə besə'əžebe' xte gosə'axize' na' gosə'əbixə' gwsa'ate' šlat. ⁵ Pero na' anglən' gože' no'ol ca': — Bito žeble. Nada' nezdə' de que Jeso'osən' ben' bosə'ode'e le'e yag coroz nan' cheyilje. ⁶ Notoch no nla' nga. Babebane' ladjo beṇə' guat ca', can' gwnacze'. Na' le'e da le'e ggüia latjə ga nga bosə'əxoe' cuerp čhe'enə'. ⁷ Ležjəya'acdo le'e žjəyedixjue'i disipl čhe' ca' de que babebane' ladjo beṇə' guat ca'. Na' ye'ega'aclene' de que gwyobe Jeso'osən' yežine' Galilean' cle ca le'e na' Galilea na' le'ilene'. Can' ben' Diozən' mendad detixjue'ida' le'e.

⁸ Nach no'ol ca' besə'aque' cho'a banə' do chesə'əžebe' pero lechgualə chesyə'əbeine', žjəya'acdoe' žjəsyə'ədixjue'ine' disipl ca' dižə' cobən' de'en gož anglən' lega'aque'. ⁹ Na' lao žjəya'aque' žjəsyə'ədixjue'ine' apostol ca' can' goquən', besyə'əžague' Jeso'osən' tnez. Nach gože' lega'aque': —Dioxei.

Na' no'ol ca' gosə'əbigue'e gan' zo Jeso'osən', bosə'ozo xibga'aque' laogüe'enə', na' gosə'əyele'e ni'enə' tant besyə'əbeine', na' gwso'elaogüe'ene'. ¹⁰ Jeso'osən' gože' lega'aque': —Bito žeble. Le'e žjəyedixjue'i beṇə' lježjcho ca' de que cheyalə' əžja'aque' Galilean' ničh na' yesə'əle'ine' nada'.

Beṇə' gop ca' jəsyə'ədixjue'ine' bχoz ca' can' bagoc

¹¹ Na' catə' beza'ac no'ol ca' cho'a ban', bałə soldad ca' beṇə' ca' gwsa'apə' ba čhe Jeso'osən' ja'aque' syodan' jəsyə'ədixjue'ine' bχoz əblao ca' can' bagoquən'. ¹² Nach besyə'ədobə bχoz əblao ca' len beṇə' golə blao čhe nasyon čhechon' bosə'əxi'e naclə so'one' ca naquə de'en əgwse' soldad ca' lega'aque'. Na' beyož bosə'oxi'enə', bosə'onežjue' soldad ca' de'e scha'o mech. ¹³ Gwse'e lega'aque': — Šə no əṇabe le'e bin' goquən', na' ye'ega'aclene' de que še'elə' lao chtasle, disipl čhe' ca' besyə'əbeje' cuerp čhe'enə' lo'o ban' na' besyə'əyo'en ga yoblə. ¹⁴ Na' šə gubernadorən' yenene' dižə' quinga, neto' žjəyeye'exento'one' par ničh cui əže'e le'e na' par ničh cui gone' le'e castigw.

¹⁵ Na' soldad ca' gosə'əzi'e mechən' de'en bosə'ənežjue' lega'aque', nach gwso'one' con can' gwse' bχoz əblao ca' na' beṇə' golə blao ca' lega'aque'. Na' yoguə' can' gosə'əna soldad ca' gosə' gwłaljən doxen gan' nitə' beṇə' Izrael gwłaz čhechon'. Na' xte ža neža beṇə' gwłaz čhechon' chse'ejle'e xtižə' soldad ca'.

Jeso'osən' bene' mendad əso'e xtiže'enə' yoguə' nasyon

¹⁶ Nach disipl čhe Jeso'osən' beṇə' ca' šnej ja'aque' Galilean' par jəsyə'əšague' Jeso'osən' to lao ya'a gan' bene' mendad yesyə'əžague'. ¹⁷ Na' catə' besə'əle'ine' Jeso'osən', gwso'elaogüe'ene'. Pero bia'aczə to čhope' gwsa'acžejlaže'e šə'əbe'ne'. ¹⁸ Nach bgüiguə' Jeso'osən' gan' nite'enə' na' gože' lega'aque': — Baben Diozən' par ničh chnabi'a doxen yoban' na' yežlyon'. ¹⁹ De'e na'ana', le'e žja'ac le'e žjəsəd le'e žjəlo'i beṇə' ca' ža' yoguə'əloł nasyon par ničh əsa'aque' disipl čhia'. Na' le'e gwčhoaga'aque' nis par ničh yesə'əlo'e de que chso'onlilaže'e Xacho Diozən', na' nada' Xi'ine', na' Spirit čhe'enə'. ²⁰ Na'

əgwseḁ əgwlo'iga'aqelene' par niçh so'one' yoguə'əloḁ de'en babena' mendad gonḁe. Nada' zocza' len le'e yoguə' ža xte ca te çhe yežlyon'.
De'e na'azən' chzoja'.

Dižə' Güen Dižə' Cobə De'en Bzoj San Marcosən'

Juan ben' bčhoa beṇə' nis be'e xtižə' Diozən' latjə dašən'

¹ De'en nga chzoja' naquan dižə' güen dižə' cobə de'en chzejni'in che Jesocristən' ben' naquə Xi'in Diozən'. Na' na'a solaogua' gua'a xtiže'enə'.

² De'e profet Isaiazən' ben' be' xtižə' Diozən' cana' bzoje' can' gož Diozən' Xi'ine'enə', gože'ene':

Eseła'a to beṇə' güe'e xtižo'onə'

par nič nitə' beṇə' probnid par yoso'ozenague' čhio' catə'an əžino' yežlyon'.

³ Le' əne' zižjo latjə dašən', ne':

"Le'e so probnid par əgwzenagle che Xančon' catə'an yide'.

Na' šə sole probnid par əgwzenagle che' catə'an yide',

de'en gonle ca' gwxaquə'əleben can' chonle chxi' chloale nez ca' catə' chidə to beṇə' blaō."

⁴ Na' goquən' catə' Juannə' ben' bčhoa beṇə' nis gwyeye' latjə dašən', na' gwzolaogüe' gwduxjue'ine' beṇə' de que cheyalə' yesyə'ədiŋjene' xtolə'əga'aque'enə' na' yesə'əṇabene' Diozən' əgwnitlaogüe'en, na' yesə'əchoe' nis. ⁵ Na' beṇə' ca' za'ac yogua' yež gan' mbane Jodean' na' beṇə' Jerosalen ca' gwsa'aque' ja'aque' yao Jordannə' gan' zo Juannə' par bosə'ozenague' xtiže'enə'. Na' bosə'oxoadole'e lao Diozən', na' Juannə' bčhoe' lega'aque' nis lo'o yao Jordannə'.

⁶ Juannə' gwyaze' lachə' de'en gwsə'one' len yišə' xa camey. Na' par dobye' che' bčhine' to sint de yid. Na' gwdaogüe' bišə'əzo, na' lecza gwdaogüe' ši'in bia ser bia nitə' yixə'. ⁷ Na' gwduxjue'ine' beṇə' gwne': —Yidə yeto beṇə' zaquə'əche ca nada', na' nada' bito zaca'a par gaca' xmose'. ⁸ Nada' babčhoa' le'e nis, pero na' be'enə' yidə gone' ca so Spirit che Diozən' lo'o yichjla'ažda'ochon' na' nabi'an chio'o.

Can' goquə catə'an gwčhoa Jeso'osən' nis

⁹ Na' ca tyemp catə'an bčhoa Juannə' beṇə' nis, Jeso'osən' gwze'e Nasaret gan' mbane Galilean', na' gwyeye' gan' zo Juannə' cho'a yao Jordannə' na' Juannə' bčho'ene' nisən'. ¹⁰ Na' catə' beyož gwčhoa' Jeso'osən' nisən' bechoje' lo'o nisən'. Na' le'e ble'iteine' byaljo le'e yoban' na' ble'ine' Spirit che Diozən' betjən ca to ngolbexə' na' bžinən gwzon len le'. ¹¹ Na' benene' gwna Diozən' ben' zo yoban': —Le' naco' Xi'ina', na' chacchgüeida' čhio'. Lechguale cheba chezaquə'əlaža'a le'.

Gwlo'oyelə' gwxiye'enə' Jeso'osən' gone' de'e mal

¹² Na' Spiritən' le'e benten par nič gwyej Jeso'osən' latjə dašən'. ¹³ Na' Jeso'osən' gwzoe' latjə dašən' čhoa ža gan' chsa'aš bia znia ca'. Na' lao čhoa žan' Satanəsən' de'en chnabia' de'e xio' ca' gwlo'oyelə'ən le' gone' de'e malən'. Na' gwde cui gwzoin co'oyelə'ən le' angl ca' besə'əžine' gwsa'aclene' le'.

Jeso'osən' gwzolaogüe' bsd blo'ine' beṇə' Galilea ca'

¹⁴ Na' gwde gosə'ogüe'e Juannə' ližyan', Jeso'osən' gwyeye' gan' mbane Galilean' gwduxjue'ine' dižə' güen dižə' cobə can' nabi'a' Diozən' con notə'ətezə beṇə' əso'e latjə. ¹⁵ Na' gwne': —Babžin ža bžin or gaquə can' babžia Diozən' bia' gaquə. Na' babžin ža nabi'a' Diozən' con notə'ətezə beṇə' soe' latjə. Le'e yediŋje xtolə'əle ca' na' lešejele' dižə' güen dižə' cobə che'enə'.

Jeso'osən' gwleje' tap beṇə' gwɣen bel par əsa'aque' disipl che'

¹⁶ Na' Jeso'osən' gwyeje' cho'a nisdao' Galilean', na' lao zde' cho'inə' ble'ine' chopə beṇə' gwɣen bel, choso'ozale'e yixjw bel chega'aque'enə' lo'o nisdə'onə'. Zjənaquə chopə biše'e. Toe' le' Simon na' ben' yeto le' Ndrəs. ¹⁷ Nach gož Jeso'osən' lega'aque': —Le'e da len sada'. Le'e nacle beṇə' gwɣen bel. Pero na'a gwozejni'ida' le'e par niç donle ca so'ombia' beṇə' nada'.

¹⁸ Na' le'e gosə'əbejyichjtega'aque' yixjw bel chega'aque'enə' nach ja'aclene' Jeso'osən'.

¹⁹ Nach gwsa'aque' yelata' na' jəsyə'adi'e Jacobən' len Juanṇə' na' len xaga'aque' Sebedeon'. Že'e to lo'o barcw chesyə'əyone' yixjw bel chega'aque'enə'. ²⁰ Nach le'e gwṇabtei Jeso'osən' Jacobən' na' Juanṇə' par žja'aclene' lega'aque'. Na' bosyo'ocua'ane' xaga'aque' len xmosga'aque'en lo'o barcon' na' ja'aclene' Jeso'osən' na' beṇə' ca' banžague'.

Jeso'osən' bebeje' de'e xio' de'en yo'o yaz yichjla'aždao' to beṇə'

²¹ Nach Jeso'osən' len disipl che' ca' ja'aque' syoda de'en nzi' Capernaum, na' ža dezcanzən' ja'aque' yo'odao' che neto' beṇə' Izrael na' Jeso'osən' bsd blo'ine' beṇə' ca' ža'anə'. ²² Na' beṇə' ca' besyə'əbanene' ca naquə de'en bsd əblo'ine' lega'aque' la' can' bzejni'ine' lega'aque' nacbja' de que napache' yelə' chnabia' cle ca beṇə' ca' choso'osed choso'olo'ine' lei de'en bzoj de'e Moisezan'. ²³ Na' lo'o yo'odao' na' zo to beṇə' yo'o yaz de'e xio' yichjla'aždaogü'e'enə'. Na' bgosya'an be'enə' gwnan: ²⁴ —Partlə le', partlə neto' Jeso'os beṇə' Nasaret. ¿Ezedežiaiyo' neto'onə'? Nezczeto' no le'. Le' naco' beṇə' la'aždao' xi'ilažə' juisy na' Diozən' bsele'e le'.

²⁵ Jeso'osən' gwdilə' de'e xi'onə' na' gože'en: —Sšago'. Bechoj yichjla'aždao' benga.

²⁶ Na' de'e xi'onə' benən par gwyaz be'enə' šon, na' bgosya'aten le' zižjo nach bechojən yichjla'aždaogü'e'enə'. ²⁷ Na' yoguə beṇə' ca' ža'anə' lechguale besyə'əbanene', nach gwse' lježjga'aque': —Nža' can' chzejni'ine' beṇə', na' nacbja' nape' yelə' chnabia' de'en chone' mendad yesyə'əchoj de'e xio' ca' lo'o yichjla'aždao' beṇə' na' chesyə'əchojən.

²⁸ Na' xtižə' Jeso'osən' le'e gosə' gwłaljten doxen Galilean'.

Jeso'osən' beyone' taobin' che Simon Bedən'

²⁹ Nach catə' beza' Jeso'osən' yo'oda'onə' len tapte disipl che' ca' jəya'aque' liž beṇə' ca' chopə, liž Simonṇə' na' Ndrəsən'. ³⁰ Na' taobin' che Simonṇə' die' lao camən' yo'e de'e la, nach gwse'e Jeso'osən' de que chacšenene'enə'. ³¹ Jeso'osən' bgüigue'e bexe'e na' no'olən' na' bcose'ene'. Na' le'e bechojte de'e lan', nach le'e gwwoža'ate no'olən' bene' de'e gwsa'ogü'e'.

Jeso'osən' beyone' beṇə' zan

³² Baben bgüižən' catə' jso'e yoguə' beṇə' ca' chsa'acšenene' na' beṇə' ca' zjəyo'o zjəyaz de'e xio' yichjla'ažda'oga'aque'enə' gan' zo Jeso'osən'. ³³ Na' yoguə' beṇə' ža' yežən' jəsə'ədobe' cho'a puert liž Simonṇə'. ³⁴ Na' Jeso'osən' beyone' zan beṇə' chse'i gwde gwde yižgü'e', na' bebeje' de'e xio' ca' zjəyo'o zjəyaz yichjla'aždao' beṇə' zan. Na' bito be'e latjə bi yesə'əna de'e xio' ca' cheda' zjənezen de que naque' Xi'in Diozən'.

Jeso'osən' gwde' doxenlə Galilea bsd blo'ine'

³⁵ Ža beteyo, nencal catə' gwyas Jeso'osən' beze'e na' gwyeje' fuerlə syodan' to latjə ga cui no nla', jene' orasyon. ³⁶ Na' Simonṇə' len beṇə' lježje' ca' ja'aque'

ǰasyə'ədilje' Jeso'osən'. ³⁷ Na' catə' besyə'əželene' le' gwse'ene': —Yoguə' beṇə' ža' syodan' chesyə'əyilje' le'.

³⁸ Jeso'osən' gože' lega'aque': —Šejcho yež ca' zjəchi' galə'əza, par nič leczə čixjui'a xtižə' Diozən' len beṇə' ca' ža'anə', la' par na'anə' bselə' Diozən' nada'.

³⁹ Ca' goquan' Jeso'osən' len disipl che' ca' ja'aque' to to yež gan' mbane Galilean', na' lo'o yo'odao' che neto' beṇə' Izrael de'en nitə' to to yež əbsed əblo'ine' beṇə', na' bebeje' de'e xio' ca' zjəyo'o zjəyaz yichjla'aždao' beṇə'.

Jeso'osən' beyone' to beṇə' che'i yižgüe' de'en nzi' lepr

⁴⁰ Na' goquan' bgüiguə' to beṇə' lao Jeso'osən', beṇə' che'i yižgüe' de'en nzi' lepr, na' be'enə' bzo xibe' lao Jeso'osən' gože'ene': —Gonšgwei ben par nič yeyacda'.

⁴¹ Jeso'osən' beyaše'ene' le', na' bli ne'enə' gwdane'ene' na' gože'ene': —Guaccza, beyaque.

⁴² Na' le'e beyactei be'enə'. ⁴³⁻⁴⁴ Nach Jeso'osən' bene' mendad len be'enə' gože'ene': —Bzenagšga. Ni tozə cui no güe'eleno' dižə' ca naquə nga babena' len le'. Gwyej lao bxožən' nič le'ine' bač beyacdo', na' bnežjue' bia yixə' gote' lao Diozən' par nič yexi' yeyacho' can' na lei de'en bzoj de'e Moizežən' na' par nič yesə'əneze beṇə' de que babeyacdo'onə'.

⁴⁵ Pero na' be'enə' beze'e gan' zo Jeso'osən' na' be'e dižə' len yoguə' beṇə' bežague' ca naquan' beyon Jeso'osən' le'. Nach gosə' gwəlajə dižə'anə' xte benan ca cuich goquə šo' Jeso'osən' yež ca' na' cuich goquə te' con ca nla'azə. Gwde' fuerlə yež ca' gan' cui no beṇə' chaš. Pero bia'aczə zan beṇə' za'ac yoguə' yež ca' yelə' ja'aque gan' zoe'enə'.

2

Jeso'osən' beyone' to beṇə' nat to part cuerp che'enə'

¹ Na' goc to čhopə ža gwza' Jeso'osən' Capernaunə' catə' beyeje' de'e yoblə, na' gwse'ene beṇə' de que babežin Jeso'osən' liže'enə'. ²⁻³ Na' lǰüegwzə besə'əžag beṇə' zan liže'enə' xte bitoch bi latjə gotə' lo'o yo'o che'enə' nic cho'a puertən' par šo'och beṇə'. Na' lao chsed chlo'i Jeso'osən' lega'aque' xtižə' Diozən', besə'əžin tap beṇə' zjənle'ne' to beṇə' nat to part cuerp che'enə', zjənxo'e'ene' to lao cam dao'. ⁴ Na' catə' gwsa'ache'ine' cui gaquə yesə'əžinle'ne' beṇə' güe'enə' gan' zo Jeso'osən' tant beṇə' zan ža'anə', gwse'epe' yichjo'olə. Na' boso'osaljue' yichjo'onə' zaquə' gan' zo Jeso'osən' nach boso'oletje' be'enə' len xcame'enə'. ⁵ Na' gocbe'i Jeso'osən' de que gwso'onlilažə' beṇə' ca' zjənlen beṇə' güe'enə', nach gože' beṇə' güe'enə': —Xi'indaogua'a, babezi'ixena' xtolə'onə'.

⁶ Pero balə beṇə' ca' choso'osed choso'olo'i lei de'en bzoj de'e Moizežən' zjəchi'e lo'o yo'onə'. Na' catə' gwse'enene' dižə' ca' be' Jeso'osən', gwso'one' xbab lo'o yichjla'ažda'oga'aque'enə': ⁷ —čBixchen' choe' benga dižə' quinga? Čhžia chnite'e Diozən' ca de'en ne' de que chezi'ixene' xtolə' beṇə'chən'. Notoṇo gaquə yezi'ixen xtolə' beṇə'chən' šə caguə tožə Diozən'.

⁸ Jeso'osən' le'e gocbe'iteine' bi xbabən' gwso'one'enə', nach gože' lega'aque': —čBixchen' chonle xbabən' ca' lo'o yichjla'ažda'olenə'? ⁹ Šə con yapa'ane' de que babezi'ixena' xtolə'enə', bito nezele šə napa' yelə' gwnabia' par yezi'ixena'an. Pero šə yapa'ane': “Gwyas beyoa' xcamo'onə' na' beyej ližo'onə' to šao' to güen”, guatə'əbia' šə napa' yelə' gwnabia'anə' par gaquə can' nia'anə'. ¹⁰ Na'

na'a gona' par nich ənezele de que napa' yelə' gwnabia' lao yežlyo nga par yezi'ixena' xtolə' beṇachən', nadan' naca' ben' bselə' Diozən' golja' beṇach.

Nach gože' beṇə' güe'ena': ¹¹ —Nada' əchnia' le', gwyas beyoa' xcamo'ona' na' beyej ližo'ona' to šao' to güen.

¹² Nach le'e gwyasseste be'ena', na' beyoa' xcame'ena' beze'e zjəyede' liže', chosə'əgüiate' beṇə' ca' nite'ena'. Na' yoguə' beṇə' ca' ža'ana' besyə'əbanene' na' gwsə'elaogüe'e Diozən' gosə'əne': —Bitonə' le'icho gaquə' ca de'e nga bagoc.

Jeso'osən' gwleje' Lebin' par gwlene' disipl che' ca'

¹³ Gwde na' Jeso'osən' gwyeye' cho'a nisda'ona' de'e yoblə' na' beṇə' zan besə'əžag gan' zoe'ena' nach bsd blo'ine' lega'aque'. ¹⁴ Na' catə' beyož bzejni'i Jeso'osən' lega'aque' beze'e na' lao zjəyede'ena' ble'ine' to beṇə' gočhixjw, beṇə' le' Lebi xi'in to beṇə' le' Alfeo, chi'e latjə gan' chesə'əčhixjue'ena'. Na' Jeso'osən' gože'ene': —Da len nada'.

Nach Lebin' gwžože'e jənaogüe'ene'.

¹⁵ Na' goquən' chi' Jeso'osən' liž Lebin' len disipl che' ca' chsa'ogüe'. Na' nitə' beṇə' zan beṇə' gočhixjw ca' na' nochlə beṇə' güen de'e mal ca' chsa'olene' lega'aque'. Nitə' beṇə' zan chedə' zane' choso'ozenague' che' na' chso'onlilaže'ene'. ¹⁶ Na' beṇə' ca' choso'osed choso'olo'i lei de'en bzoj de'e Moisezan' na' len beṇə' fariseo ca' catə' besə'əle'ine' chi' Jeso'osən' chaolene' beṇə' gočhixjw ca' na' yebałə beṇə' güen de'e mal ca', gwse'e disipl che' ca': —Malən' chon maestr chelen' che'ej chaogüe' txe'n len beṇə' gočhixjw na' nochlə beṇə' güen de'e mal beṇə' cui chonlento' txe'n.

¹⁷ Na' catə' bene Jeso'osən' xtižə'əga'aque'ena', gože' lega'aque': —Beṇə' cui chsa'acšene bito chesə'əyažjene' beṇə' güen rmech. Beṇə' ca' chsa'acšene lega'aque'ena' chesə'əyažjene' beṇə' güen rmech. Nada' za'a zedəyena' par nich beṇə' ca' zjəneze de que zjənaaque' beṇə' güen de'e mal yesyə'ədinjene' xtolə'əga'aque'ena', pero bito zedəyena' par nich beṇə' ca' chsa'aque'ne' bazjənaaque' beṇə' güen yesyə'ədinjene' xtolə'əga'aque'ena'.

Gosə'ənbene' Jeso'osən' bixchen' bito gwleje' tgüejə catə' cui əse'ej əsa'o disipl che' ca'

¹⁸ Na' goquən' to ža catə' disipl che Juannə' na' disipl che beṇə' fariseo ca' nite'e sin cui chse'ej chsa'ogüe'. Na' ja'ac balə beṇə' lao Jeso'osən' na' gwse'ene': —Disipl che Juannə' na' lecza disipl che beṇə' fariseo ca' chnite'e zan las sin cui chse'ej chsa'ogüe' par chso'ela'oche' Diozən'. Pero disipl chio' ca' chse'ej chsa'ogüe'. žBixchen' ža?

¹⁹ Nach Jeso'osən' gože' lega'aque': —Catə' chac to yelə' gošagna' beṇə' migw che be'ena' chžagna'ana' chse'ej chsa'ogüe'. Na' ca'aczən' naquən len nada' na' len disipl chia' ca', chse'ej chsa'ogüe' lao ne'e zoa' len lega'aque'. ²⁰ Catə'əchən' əžin ža yesə'əche'exaxj beṇə' contr chia' ca' nada', cana'achən' əchoj catə' cuič əse'ej əsa'o disipl chia' ca'.

²¹ Notono beṇə' zo beṇə' chchine' to pedas lachə' cuiṇə' xoa nis par yoda' xa gole'ena' de'en bač chyoe. Šə can' gone', catə' chib xə'ena', yebe' lachə' cobən' na' əchezəchən len. ²² Na' lecza ca' notono zo beṇə' chgue'e bino cobən' lo'o yid golən'. Šə gone' ca', bino cobən' əchezən yid golən' na' laljə binon' na' cuiayi' yidən'. Cle la' cheyalə' que'e bino cobən' lo'o yid cobə.

Jeso'osən' gwne' ca' par bzejni'ine' lega'aque' de que bito gaquə yesə'ənaogüe' costombr gol chęega'aque'ena' na' yesə'ənaotie' de'en chsed chlo'ine'.

Bosə'olechj disipl ca' trigon' ža dezcanzən' par gwsa'ogüe'en

²³ Na' gozaquən' to ža dezcanz Jeso'osən' gwdie' len disipl che' ca' gan' nyaž trigon', nach disipl che' ca' gosə'əlechje' trigon' lao gosə'ədi'enə'. ²⁴ Nach besə'əle'i bałə beṇə' fariseo ca' can' gwso'on disipl ca' na' gwse'e Jeso'osən': — Bgüiašc can' chso'on disipl chio' ca' žin de'e cui de lsens goncho ža dezcanzən'.

²⁵⁻²⁶ Na' Jeso'osən' gože' lega'aque': — ĽEcabi za'alažə'əle de'en bablable can' ben de'e Rei Dabin' ca' tyemp catə'an goc Abiatarən' bħoz əblaoch? Nan de que to ža cui gota' de'e əsa'o de'e Dabin' len beṇə' lĵuežje' ca' na' gosə'ədone'. Nach gwyeje' lo'o yo'odao' əblao che chio'o beṇə' Izrael. Na' gwxi'e yetxtil de'en bazjəncua' bħoz ca' par Diozən', na' gwsa'ogüe'en len beṇə' lĵuežje' ca' la'əṇə'əczə cui zjənaque' bħoz, len yetxtilən' bito de lsens par gao notə'əteza beṇə' len, letga bħoz ca' chac əsa'ogüe'en.

²⁷ Na' leczə gwna Jeso'osən': — Diozən' bene' beṇəchən' na' techlə gwleje' to ža lao xman par niçh beṇəchən' gaquə so'one' dezcanz. Bito gwlej Diozən' ža dezcanzən' parzə niçh so'omba'əne'en. ²⁸ Naquən lao na'a əṇia' bin' naquən güen goncho ža dezcanzən', nada' naca' ben' bselə' Diozən' golja' beṇəch.

3

Beyaque to beṇə' mbižə šla'a ne'enə'

¹ Na' gozej Jeso'osən' to lo'o yo'odao' che neto' beṇə' Izrael yeto ža dezcanz. Na' lo'o yo'oda'onə' zo to beṇə' bambižə šla'a ne'enə'. ² Na' beṇə' fariseo ca' ža' yo'oda'onə' chosə'əgüiateze' Jeso'osən' chesə'əbeze' šə goyone' be'enə' ža dezcanzən' par niçh əsa'ogüe' xya contr le'. ³ Jeso'osən' gože' ben' mbižə ne'inə': — Gwžoža' na' da ngalə.

Nach bgüiguə' ben' gwzeche' laogüe'enə'.

⁴ Jeso'osən' gože' beṇə' ca' ža' lo'o yo'oda'onə': — ĽEna lein' goncho de'e güen ža dezcanzən', o šə nan goncho de'e mal? ĽEnan goncho par niçh cui sa'at beṇə', o šə nan goncho par niçh sa'ate'?

Pero beṇə' ca' ža'anə' bitobi gosə'əne'. ⁵ Nach Jeso'osən' bgüie' lega'aque' znia tant gwzoe' trist chedə' cui chse'enene' se'ejni'ine' bin' chene'e Diozən' so'one'. Nach Jeso'osən' gože' be'enə': — Bli' na'onə'.

Nach bli' na' be'enə' na' beyaquen. ⁶ Nach beṇə' fariseo ca' catə' besa'aque' yo'oda'onə' bosə'əxi'e len beṇə' ca' chso'on txe'n len Erodən' naclə so'one' par so'ote' Jeso'osən'.

Beṇə' zan besə'əžag cho'a Nisdəo' Galilean'

⁷⁻⁸ Jeso'osən' len disipl che' ca' gwsa'aque' yo'oda'onə' na' ja'aque' cho'a nisdə'onə'. Na' beṇə' zan jəsə'ənaogüe'ene' chedə' gwse'enene' dižə' che Jeso'osən' can' chone' de'e zan de'e zaque'e. Na' beṇə' ca' za'aque' do gan' mbane Galilean', na' do gan' mbane Jodean', na' do Jerosalenṇə', na' do Idomea, na' do yešla'a yao Jordannə', na' do gan' mbane Tiro na' Sidon. Za'aque' chedə' gwse'enene' yesə'əle'ine' Jeso'osən'. ⁹⁻¹⁰ Babeyon Jeso'osən' zan beṇə' chsa'acšene na' yoguə' beṇə' ca' ne'e chsa'acšene besyə'əyiljlaže'e naclə so'one' par niçh yesə'əlapə na'aga'aquen' le'. Tant beṇə' zan gosə'əbiadi'ene' xte bosə'əochi'izoje'ene'. De'e na'anə' Jeso'osən' bene' mendad so'on disipl che' ca' probnid to barcw par le'. ¹¹ Na' beṇə' ca' zjəyo'o zjəyaz de'e xio'on lo'o yichjla'ažda'oga'aquen' catə' besə'əle'ine' Jeso'osən' besə'əzo xibga'aque' laogüe'enə' na' de'e xio' ca' gwso'osya'an gosə'anən: — Le' naco' Xi' in' Dioz.

¹² Pero Jeso'osən' bene' mendad len lega'aquən cui so'en dižə' non' naque'.

Jeso'osən' gwleje' šiz in beṇə' bsi'e apostol

13 Na' gwde na' Jeso'osən' gwloe' to lao ya'a na' goxe' yoguə' disipl che' ca' par nich cueje' beṇə' ca' əsə'ac apostol che'ena', nach yogue'e gosə'əbigue'e gan' zoe'ena'. 14 Na' gwleje' šižin beṇə' par yesə'ədalene' le' na' par nich əsele'e lega'aque' žjəsə'ədixjue'ine' beṇə' can' na' Diozən'. 15 Na' bnežjue' lega'aque' yelə' gwnabia'anə' par nich besyə'əyone' beṇə' ca' chse'i yizgüe' na' par nich goc besyə'əbeje' de'e xio' ca' zjəyo'o zjəyaz yichjla'aždao' beṇə'. 16 Gwleje' Simon ben' bsi'e Bed, 17 na' Jacobən' len Juan biše'ena' xi'in Sebedeon'. Jeso'osən' bsi'e Jacobən' na' Juannə' Boanerges, chedə' zjənaque' beṇə' loc. 18 Na' gwleje' Ndressən', na' Lipən', na' Bartolomen', na' Mtion', na' Tomasən', na' Jacob xi'in Alfeon', na' Tadeon', na' Simon ben' chon txen len beṇə' ca' zjənzi' cananistas. 19 Nach gwleje' Jod Iscariotən' ben' bdie' Jeso'osən' lao na' beṇə' contr ca'.

Gosə'əne' de que Jeso'osən' bebeje' de'e xio' ca' len yelə' guac che Beelsebon'

Gwde gwleje' disipl che' ca' beyeje' liže'ena' len lega'aque'. 20 Nach de'e yoblə besə'ədopa beṇə' zan gan' nite'ena' xte nic goquə latjə əsa'ogüe'. 21 Catə' gwse'ene family che Jeso'osən' de que cui de latjə chega'aque' ni par əsa'ogüe', ja'aque' gan' zo Jeso'osən' par yesyə'əche'əxaxje'ene' chedə' gosə'əna beṇə' de que chactonte'ena'.

22 Na' leczə balə beṇə' Jerosalennə' beṇə' choso'osed choso'olo'i lei de'en bzoj de'e Moisezən' bla'aque', na' gosə'əne': —Beelsebo de'en chnabia' de'e xio' ca' yo'o yazan yichjla'aždao' benga, na' chebeje' de'e xio' ca' len yelə' guac cheina'.

23 Nach Jeso'osən' goxe' beṇə' ca' par yesə'əbigue'e gan' zoe'ena' na' be'e jemplən' len lega'aque', gože': —Satanasən' de'en chnabia' de'e xio' ca' bito gaquə yebej cuinei lo'o yichjla'aždao' beṇə'. 24 Šə beṇə' ža' to nasyon əsa'aque' choplə na' yesyə'ədile' entr lega'aque', əgwžiai'i nasyon chega'aque' na'anə' šə ca'. 25 Na' šə to family beṇə' əsa'aque' choplə na' yesyə'ədile' entr lega'acze', leczə yenit family chega'aque' na'anə' šə ca'. 26 Na' leczə ca' šə Satanəsən' len de'e xio' chei ca' əsa'aquən choplə na' yesyə'ədilən, cuiayi' yelə' chnabia' chega'acquənnə' šə ca'.

27 Nezecho notono no gaquə šo' liž to beṇə' gual par žjəlane' šinlaze' ca' sin cui əgwcheje'ene' to do. Pero šə əgwcheje'ene' guaquə cuane' šinlaze' ca'.

28 De'e li chnia' le'e, bitə'ətezə de'e mal de'en chso'on beṇə'chən' na' bitə'ətezə dižə' mal de'e chso'e contr Diozən', Diozən' yezi'ixene' chega'aque' šə yesyə'əadinjene'en. 29 Pero notə'ətezə beṇə' soe' dižə' contr Spirit che Diozən' cuat yezi'ixen Diozən' chega'aque'. Zejlīcanə yesə'əzi'e castigw chei.

30 Can' gwna Jeso'osən' chedə' beṇə' ca' choso'osed choso'olo'i lein' gosə'əne' de que cho'chaz de'e xio'onə' lo'o yichjla'ažda'ogüe'ena'.

Xna' Jeso'osən' na' biše'e ca' besə'əžine' gan' zoe'ena'

31 Gwde de'e ca' xna' Jeso'osən' len biše'e ca' besə'əžine' gan' zo Jeso'osən'. Na' chyo'olə gosə'əbeze' gosə'əṇabe' so'elene' le' dižə'. 32 Na' beṇə' zan ca' zjəchi' tcuit tcue'ej Jeso'osən' gwse'ene': —Xna'on len beṇə' bišo'o ca' zjəzeche' chyo'olə na' chse'enene' əso'elene' le' dižə'.

33 Pero Jeso'osən' gože' lega'aque': —Nitə' beṇə' yoblə beṇə' bazjənaquə ca xna'a na' ca biša'a.

34 Nach Jeso'osən' blo'e beṇə' ca' zjəchi' tcuit tcue'eje'ena', gwne': —Beṇə' quingan' bazjənaque' ca xna'a na' bazjənaque' ca biša'a. 35 Can' naquən len notə'ətezə beṇə' chso'one' can' chazlazə' Diozən', zjənaque' ca xna'a na' ca biša'a na' ca zana'.

4

Jempl che benə' gozən'

¹ Na' de'e yoblə gwzo Jeso'osən' cho'a nisdə'onə' na' goszolaogüe' chsed chlo'ine'. Na' tant benə' zan besə'ədobə gan' zo'enə' xte benən byen gwyo'o Jeso'osən' gwchi'e to lo'o barcw de'en chi' galə'əza cho'a nisdə'onə'. Na' yoguə' benə' ca' besə'ədobən' gosə'ənite'e lao yoxən'. ² Nach Jeso'osən' bsed blo'ine' lega'aque' len zan jempl. Na' be'elene' lega'aque' to jempl bsaquə'əlebene' xtižə' Diozən' ca trigw.

³ Nach gwne': —Le'e gwzenag de'e nga. To benə' gwze'e zde' güen trigw. ⁴ Na' lao chose' trigon' balən jəsə'əchazən cho'a nez na' bia žia xile'e bia chaš le'e yoban' gwsa'ob len. ⁵ Na' yebalən jəsə'əchazən ga naquə' lao yej ga cuitec žia yo. De'e na'anə' le'e bla'acten. ⁶ Pero na' catə' beža'achgua besə'acuadən na' le'e gosə'əbižten chedə' bitobi loi gwso'on. ⁷ Na' yebalən besə'əgo'onən' lao yo ga nchixə xsa yešə' na' bla'aquan' t xen len xsa yešə'ənə'. Na' besə'əlolə' yag yešə' ca' lega'aquan, na' bitobi gosə'əbian. ⁸ Na' yebalən besə'əgo'onən' lao yo šao' na' bla'aquan, na' gosə'əcha'on na' balən gosə'əbian šichoə güejə, na' yebalən gosə'əbian gyon güejə, na' yebalən gosə'əbian to gweyoa güejə.

⁹ Nach gož Jeso'osən' lega'aque': —Le'e žia nagle de'e chene legwzenag.

Jeso'osən' bzejni'ine' bixchen' cho'elene' benə' jempl

¹⁰ Na' catə' cuich nitə' benə' zan len Jeso'osən', disipl che' ca' šižin na' len yeziquə'əchlə benə' ca' zjəsə'ənao le', gosə'ənabene' le' bi zejen jemplan'. ¹¹ Nach gože' lega'aque': —Diozən' chone' par nič le'e ənezele de'en cui no gwneze antslə de que le' nabi'e con notə'ətezə benə' soe' latjə. Pero benə' yeziquə'əchlə cho'elenga'aca'ane' jempl chedə' bito chse'ejle'e chia'. ¹² Chona' ca' par nič yesə'əle'ine' de'en chona' na' bito sa'acbe'ine' bi zejen, na' par nič əse'enene' xtižə'anə' na' cui se'ejni'ine'en, chedə' bazjənaque' benə' la'aždao' žod. Žalə' bito zjənaque' benə' la'aždao' žod, gwse'ejni'ine' bi zejen de'en chse'enene'ənə', na' yesyə'ədinjene' xtələ'əga'aque'ənə' na' Diozən' yezi'ixene' chega'aque'.

Jeso'osən' bzejni'ine' bi zeje jempl che benə' güen trigon'

¹³ Nach Jeso'osən' gože' lega'aque': —čEbitonə' šejni'ile jempl nga? Šə bito chejni'ilen' čnacxa šejni'ile jempl ca' yela'? ¹⁴ Quingan' zejen jempl che benə' güen trigon'. Xtižə' Diozən' gwxaquə'əleben ca de'en gozə be'ənə'. ¹⁵ Na' nitə' benə' choso'ozenague' xtižə' Diozən' na' le'e chžinte Satanə'n de'en chnabia' de'e xio' ca' chebejan xtižə' Diozən' lo'o yičhjlə'aždaoga'aque'ənə'. Na' chac chega'aque' can' goquə len trigon' de'en jəsə'əchaz cho'a nezən'. ¹⁶ Na' leczə nitə' benə' choso'ozenague' xtižə' Diozən' na' le'e chesyə'əbeiteine'en pero chac chega'aque' can' goquə len trigon' de'en jəsə'əchaz lao yo de'en žia lao yejən'. ¹⁷ Zjənaque' ca to de'e cui bi loi chon, šložga chse'ejle'e che xtižə' Diozən'. Na' catə' chesə'əgue'i benə' lega'aque' na' choso'ochi' choso'osaque'e lega'aque' laogüe de'en chse'ejle'e xtižə' Diozən', nach le'e chesə'əbejyichjte'en. ¹⁸ Na' nitə' benə' choso'ozenague' xtižə' Diozən' na' chac chega'aque' can' goquə len trigon' de'en jəsə'əchaz lao yo de'en nchixə xsa yešə'ənə'. ¹⁹ Chesyə'alə' chesyə'əžejene' len bi de'en chso'one' na' chse'enene' yesə'əni'e, na' chesə'əzelaže'e gatə' bi de'en gatə' chega'aque' chedə' bazjənxoayague' chsa'aquene' de que naquən de'e žialao. Na' de'e ca' chso'one'ənə' choso'olələ'n xtižə' Diozən' de'en bayo'o yičhjlə'aždaoga'aque'ənə', na' de'e na'anə' cui chso'one' can' chazlažə' Diozən'. ²⁰ Na' leczə nitə' benə' choso'ozenague' xtižə' Diozən' do yičh do lažə'əga'aque',

na' chso'one' yogua'əlol can' chazlažə' Diozən'. Chac čhega'aque' can' goquə len trigon' de'en jəsə'əchaz lao yo güennə'. Bałən gosə'əbian šichoa güejə, na' yebałən gosə'əbian gyon güejə, na' yebałən gosə'əbian to gueyoa güejə.

Jempl čhe de'en choncho len to yi'

²¹ Nach Jeso'osən' be'elene' disipl čhe' ca' yeto jempl, bsaquə'əlebene' de'en chsed chlo'ine'enə' ca to yi', gwne': —Notono no ggualə' to yi' na' gwdose'en to žomə na' nic no gwcuasə'an xan xcamei. Syempr chde'e yi'inə' le'e ze'e par nič əgwse'eni'in lo'o cuartən'. ²² Guaquə can' na dicho de'en na: “Yogua'əlol de'en ngašə' na'a, gwžin ža la'alaon, na' yogua'əlol de'en cui no gwse'ejni'i antslə, leczə gwžin ža se'ejni'i beņə' len.” ²³ Le'e žia nagle de'e chene, legwzenag.

²⁴ Na' leczə gož Jeso'osən' lega'aque': —Le'e gon xbab čhe de'en nga chnia' le'e. Con can' chzenagle xtiža'anə' leczə can' gona' par nič šejni'ilen, na' ca'aczə čha'oxen de'en šejni'ile. ²⁵ Šə chzenagle xtiža'anə' əgwzejni'ichda' le'e. Pero na' šə bito chzenagle čhei, de'e daon' banezele ganlažə'əlen.

Jempl čhe xoa' bin

²⁶ Yelə' gwnabia' čhe Diozən' ben' zo yoban' gwxaquə'əleben ca de'e nga: To beņə' chjeze' xoa' biņnə' lao yežlyo čhe'enə'. ²⁷ Chde na' cheyeje' chjəyetase' na' catə' chžin or chase' na' chase'. Na' ca'azə chac chesə'əde ža ca' na' yel ca'. Na' chla'ac yel dao' ca' na' chesə'əcha'on. Pero bito neze be'enə' nac chaquən' chesə'əcha'o yel dao' ca'. ²⁸ Yežlyo na'anə' chonən par nič chla'ac yel dao' ca' na' chesə'əcha'on na' chəsə'əbian za'a nach chaquən yez. ²⁹ Na' cata' babgüiž yezən', be'enə' gozə len chelape'en čhedə' banaquə tyemp par chetobe' cwsešən'.

Yelə' gwnabia' čhe Diozən' gwxaquə'əleben ca xsa moztasən'

³⁰ Nach gwna Jeso'osən': —Na'a əgwlo'ida' le'e par nič ənezele naquən' gwxaquə'əlebe yelə' gwnabia' čhe Diozən'. ³¹ Gwxaquə'əleben ca to xsa moztas de'en chaz to beņə' lao yežlyo čhe'enə'. Xsa moztasən' naquən le'ebeyožə de'e dao' rizə' lao bitə'ətezəchlə semiy. ³² Pero na' catə' chla'an chcha'on na' chaquən to yag cha'odao' na' chesə'əcha'o xoze'e ca' xte bia ca' zjəzo xile'e chso'on ližga'aquəb lo'o xoze'e ca'.

Jeso'osən' bzejni'ine' beņə' porzə len jempl

³³ Jeso'osən' bsd blo'ine' beņə' zan ca' besə'əžag gan' zo'enə' porzə len jempl ca de'e quinga babzoja', bzejni'ine' beņə' xte ga zelao gwse'ejni'ine'en. ³⁴ Bitobi bichlə gwne' par bzejni'ine' lega'aque' sino porzə len jempl bzejni'ine' lega'aque'. Pero na' disipl čhe' ca' bzejni'ine' lega'aque' clar bi zejen to to jempl ca'.

Jeso'osən' bcueze' be' gualn' lao nisdə'onə'

³⁵ Na' le'e ža na'atezə do chxentg catə' Jeso'osən' gože' disipl čhe' ca': —Elaquə'əcho yešla'alə nisdə'onə'.

³⁶ Nach disipl čhe' ca' bosyo'ocua'ane' beņə' ca' nitə'anə' na' bosə'ose'e barcon' gan' bayo'o Jeso'osən'. Nach yebałə barcon' gan' ža' beņə' ca' jəsə'ənaon lega'aque'. ³⁷ Na' lao zda barcon' gwzolao gwyechj to be' gual lao nisdə'onə'. Na' barcon' gwyəjan nil na'alə por ni čhe be'enə', na' chas chatə' nisən' xte gwzolao gwyož barcon' nisən'. ³⁸ Pero na' Jeso'osən' bachtase' xni'ate barcon' lao to lmad, tant chjxaque'ene'. Nach bosyo'osbane'ene' gwse'ene': —jMaestr! žEbitobi chacdo' de'en bach chbiayi'ichon'?

³⁹ Nach Jeso'osən' gwyase' lao ne'e chas chatə' nisdə'onə', nach gwdile' be'enə', na' bene' mendad len nisdə'onə' gože'en: —Bebe'eži.

Nach le'e besya'abe'ežite be'enə' len nisdə'onə'. ⁴⁰ Nach Jeso'osən' gože' disipl che' ca': —Bito žeble. Le'e šeje'ech chia'.

⁴¹ Na' lega'aque' besya'əbanchgüeine' na' gwse' lježjga'aque': —Bitolja naquə bengə con to beṇəḥzə, la' ḥnacxa gon to beṇəḥ par yebeczie' be' gualən' len nisdə'onə'?

5

To beṇə' Gadaran' yo'o yaze' de'e xio'

¹ Jeso'osən' na' disipl che' ca' besə'əžine' yešla'alə nisdə'onə' gan' naquə laž beṇə' Gadara ca'. ² Na' catə' bechoj Jeso'osən' lo'o barcon', beza' to beṇə' Gadaran' capsantən' jəšague' le'. Na' be'enə' yo'o yaz de'e xio' ca' yichjla'aždaogüe'enə'. ³ Bengə con gwzoe' do capsant. Na' notoch no goquə gwčhej le' ni len do gual nic len gden. ⁴ Zan las boso'očheje' ni'a ne'e ca' gden, pero syempr de'e xio' ca' gwsə'onən ca bzoxxbtine' gdennə', na' notono goquə ṇabia' le'. ⁵ Do ža do yel gwde' do lao ya'a ca' na' do capsantən' bisye'e na' bene cuine' zi' len yej. ⁶ Na' catə' ble'ine' zda Jeso'osən' zitə'alə na' gwsa'adoe' jəšague'ene' na' bzo xibe'en lao Jeso'osən' be'elaogüe'ene'. ⁷ Nach de'e xio' ca' yo'o yaz yichjla'aždaogüe'enə' gosə'ənen zižjo gosə'ənan: —Partlə le', partlə neto' Jeso'os Xi'ṇ Dioz ben' naquə le'eze'laogüe beṇə' blaο. Diozən' naque' testigw čheto' chatə'əyoito' le' cui əgwčhi' əgwsaco'o neto'.

⁸ Gosə'ənan ca' čhedə' Jeso'osən' bene' mendad gože' lega'aquən: —De'e xio' le'e yechoj yichjla'aždao' bengə.

⁹ Nach gož Jeso'osən' lega'aquən: —ḥBi lele?

Na' gosə'ənan: —Legionnə' leto' čhedə' naquə zanto'.

¹⁰ Na' be'enə' gotə'əyoine' Jeso'osən' par cui əsele'e de'e xio' ca' fuerlə laž be'enə'. ¹¹ Na' to ya'a de'e zo gaḷə'əzə chaš beṇə' choso'oye' coš zan. ¹² Na' de'e xio' ca' gwsa'atə'əyoin le' gwse'en: —Be'ešga latja žjəyežo'oto' yichjla'aždao' coš ca'.

¹³ Nach Jeso'osən' be'e latja. Na' besya'əchoj de'e xio' ca' yichjla'aždao' be'enə' na' jəsyə'əžo'on yichjla'aždao' coš ca'. Nach besya'ədiṇsesəb le'e ya'anə' na' jesyə'əxopəb lo'o nisdə'onə' na' gwsa'atəb gwse'ejəb nisən'. Na' ca do čhopa mil coš can' zjənaquə.

¹⁴ Na' beṇə' ca' chosə'əye' coš ca' besə'əle'ine' de'en bagoquən' na' de'en besə'əžebchgüe' besa'acdoe' nach jəsyə'ədiṇxje'ine' beṇə' lao' syodan' na' beṇə' nitə' do yoba. Na' beṇə' ca' catə' gwse'enene' xtižə' beṇə' goye coš ca' ja'aque' jəsə'əgüie' de'en bagoquən'. ¹⁵ Na' catə' besə'əžine' gan' zo Jeso'osən' besə'əle'ine' be'enə' gwyo'o gwyaz de'e xio' ca' yichjla'aždaogüe'enə', bachie nyaz xalane'e, na' babezošao' yichjla'aždaogüe'enə', na' besə'əžebe' de'en goquən'. ¹⁶ Na' beṇə' ca' besə'əle'i de'en goquən', gwse'e beṇə' ca' yela' can' beyaque ben' gwyo'o de'e xio' ca' yichjla'aždaogüe'enə' na' can' goquə len coš ca'. ¹⁷ Nach beṇə' ca' ža' gan' mbane Gadaran' jse'etə'əyoine' Jeso'osən' yeze'e lažga'aque'enə'.

¹⁸ Na' catə' Jeso'osən' beyo'e lo'o barcon' par yeze'e len disipl che' ca', ben' bechoj de'e xio' ca' yichjla'aždaogüe'enə' gotə'əyoine' Jeso'osən' šejlene' le'. ¹⁹ Pero Jeso'osən' bito be'e latja, gože'ene': —Beyej ližo' gan' ža' family chio' ca' na' jəyedixje'iga'aque'ne' catec de'e mban' baben Xancho Diozən' len le', na' can' bacheyaša' cheži'ilaže'e le'.

20 Nach beza' be'enə' gwzolaogüe' jəyede' yoguə' syoda ca' gan' mbane Decapolisən' jəyzenene' catec de'e mban' baben Jeso'osən' len le'. Na' yogue'e besyə'əbanene'.

Jeso'osən' beyone' xi'in Jairon' na'yeto no'olə beṇə' gwdan lao xadoṇ che'enə'

21 Na' catə' beslaguə' Jeso'osən' len disipl che' ca' yešla'alə nisdə'onə' besyə'əchoje' lo'o barcon'. Na' besə'əžin beṇə' zan gan' nite'e cho'a nisdə'onə', na' besyə'əga'ane' na'azə. 22 Nach bžin to beṇə' le Jairo, naque' to beṇə' gwnabia' che yo'odao' che neto' beṇə' Izrael. Na' catə' ble'ine' Jeso'osən' bzo xibe' laogüe'ena'. 23 Na' gotə'əyoichgüeine' le', gože'ene': —Xi'ina' no'olən' bachatbo'. Yo'ošga cano'obo' par niçh yeyaquebo' na' par niçh əbambo'.

24 Nach Jeso'osən' t xen len disipl che' ca' ja'aclene' beṇə' gwnabian'. Na' beṇə' zan jəsə'ənaogüe' lega'aque' xte bosə'oçhi'izəjene'. 25 Na' entr beṇə' ca' len to no'olə beṇə' bagoc šižin iz chzoe' bgua'a. 26 Na' babžaglaogüe' gwyeje' lao zan beṇə' güen rmech ca' na' babenditjei zgade xmechen' len lega'aque' na' notono goquə yeyon le'. Con byalə'əch yižgüe' che'ena'. 27 Na' no'olən' babenene' xtižə' Jeso'osən', na' bgüigüe'e cožə' Jeso'osən' gan' zde' ladjo beṇə' ca' jəsə'ənao le' nach gwdane' xadoṇ che'ena'. 28 Bene' xbab lo'o yiçhja'aždaogüe'ena', gwne': —Šə con cana' xadoṇ che'ena', goyacczəda'.

29 Na' le'e gwlezte bgua'a de'en chzo'ena' na' gocbe'ine' de que babeyaquene'. 30 Nach Jeso'osən' leczə gocbe'ine' de que babeyone' to beṇə' len yelə' guac che'ena', na' gwyeçhje' bgüie' bene' ca' zjəsə'ənao le', nach gože' lega'aque': —žNon' bagwdan xadoṇ çhia'anə'?

31 Nach disipl che' ca' gwse'ene': —Chle'ido' nitə' beṇə' zan nga, na' choso'oçhi'izəje' le'. Na' nao': “žNon' gwdan nada'?”

32 Pero na' Jeso'osən' bgüie' yogue'e par niçh le'ine' non' gwdan le'. 33 Na' no'olən' de'en gocbe'ine' babeyaquene' na' do chaž chžebze' bgüigüe'e bzo xiben' lao Jeso'osən' par gože'ene' dołol can' bagoc che'. 34 Nach Jeso'osən' gože'ene': —Xi'inđaogua'a, babeyacdo' chedə' chonlilažo'o nada'. Beyej to šao' to güen na' Diozan' gone' par niçh cuich gue'ido' yižgüen' nac ca'.

35 Ne'e cho'ete Jeso'osən' dižə'an ca' catə' besə'əžin beṇə' gwsa'ac liž Jairon' ben' naquə xə bi'i no'olən' jse'eže'ene': —Bagot bi'i no'ol dao' çhio'onə'. Bitoch gondo' maestrən' zed.

36 Pero Jeso'osən' bito bene' cas che de'ena' jež be'ena', con gože' Jairon': —Bito žebo'. Con benlilažə' nada'.

37 Na' bito be' Jeso'osən' latjə əžja'acquəch beṇə' ca' len le', sino Bedən' len Jacobən' na' Juan beṇə' bišə' Jacob na'azən' ja'ac len le'. 38 Na' catə' besə'əžine' liž beṇə' gwnabian', Jeso'osən' ble'ine' de que beṇə' ca' ža' cha'ašilən' bachso'one' scaṇdl na' bachesə'əbežchgüe'. 39 Nach catə' gwyo'e cha'ašilən', gože' lega'aque': —žBixçhen' bachonle scaṇdl na' chbežle? Bito nacbo' bi'i guat, con chtašbo'onə'.

40 Na' gosə'əzi'ichižə' beṇə' ca' ža'anə' le'. Nach Jeso'osən' bebeje' yoguə' beṇə' ca' ža'anə', na' gwçhe'e xaxna' bi'i guatən' na' beṇə' ca' zja'aclen le' na' gwsə'e lo'o cuartən' gan' debo'onə'. 41 Nach beçe'e na' bi'i no'olə guat da'onə' na' bolgüiže'ebo' gože'ebo': —Talita comi—, zeje dižə': “No'ol dao', əchnia' le', beyas.”

42 Nach le'e beyaste bi'i no'ol daon' na' bedabo'. Nacbo' bi'i šižin ize. Nach xaxna'abo'on len beṇə' ca' yelə' ža' lo'o cuartən' besyə'əbançgüeine'. 43 Jeso'osən' bene' mendad cui əso'e dižə' can' goquən', na' leczə bene' mendad len xaxna'abo'on əso'ebo' de'e gaobo'.

6

Bežin Jeso'osən' Nasaretən'

¹ Na' Jeso'osən' len disipl che' ca' besa'aque' Capernaunnə' na' jəya'aque' Nasaret gan' gwcha'o Jeso'osən'. ² Na' ža dezcanzən' gwyeye' yo'odao' che neto' beṇə' Izrael na' gwzola'o bsed əblo'ine' beṇə'. Na' beṇə' zan beṇə' ca' gwse'enene' xtiže'enə', besyə'əbanene' na' gwse'e ljuežjga'aque': —¿Nacxa goquən' neze benga yoguə' de'en chsed chlo'ine'en ža? ¿No bzejni'i le' de'en naquə' de'e si'inṇə'?, na' žnac chaquən' chone' miłagr? ³ Nombi'acho benga. Le'enə' carpinter xi'in Marian', na' beṇə' bišə' Jacob, na' Jwse, na' Jodas, na' Simon. Nach zane' ca' nitə' lažcho nga.

Na' de'en gwso'one' xbab de que Jeso'osən' naque' con to beṇə' gwlaž chega'aque', de'e na'anə' bito gwse'ejle'e che'. ⁴ Na' gož Jeso'osən' lega'aque': —La'anə'əczə beṇə' zan chso'e yelə' bala'an che beṇə' ca' chso'e xtižə' Diozən', pero beṇə' gwlaž chega'aque' ca' na' family chega'aque' ca' na' beṇə' ca' nitə' ližga'aque' bito chso'e lega'aque' yelə' bala'an.

⁵ Na' laogüe de'en cui gwse'ejle'e che Jeso'osən', bito bene' zan miłagr Nasaretən' con de'e bene' bxoə ne'enə' to čhopə beṇə' na' besyə'əyaquene'.

⁶ Na' bebane Jeso'osən' de'en cui gwse'ejle'e che'. Na' gwdechlə gwyeye' len disipl che' ca' na' bzejni'ine' beṇə' ca' ža' yež ca' de'en zjəchi' galə'əzə.

Jeso'osən' bsele'e disipl che' ca' šižin jəsə'adixjui'e xtiže'ena'

⁷ Jeso'osən' botobe' disipl che' ca' šižin na' bnežjue' lega'aque' yelə' guac par nich əsa'aque' yesyə'əbeje' de'e xio' ca' zjəyo'o zjəyaz yichjla'azdao' beṇə'. Na' bsele'e čhopə güežaga'aque' jəsə'adixjui'e xtiže'ena'. ⁸ Na' bene' mendad len lega'aque' bitobi əso'oxe'e tnezən', sino tozə garrot. Gože' lega'aque' de que bito cheyałə' əso'e bsod, ni yet, ni mech. ⁹ Be'e latjə yoso'oleje' šcue' yel, na' əsa'aze' tozə camis. ¹⁰ Na' ze'e sa'aque' catə' gože' lega'aque': —Catə' əžinle liž beṇə' yesyə'əbei yoso'ogüialao le'e, na'atezə sole na' na'atezə yesa'acle par žja'acle ga yoblə. ¹¹ Na' gatə'ətezə əžinle ga cui nono yebei əgüialao le'e, na' nic yoso'ozenague' chele, le'e yesa'ac latjən'. Na' catə' yesa'aclen', əgws'i'ins ni'alən' par yežib bišten' de'en gwžianṇə', nič əgwlo'ile beṇə' ca' de que de'e malən' chso'one' cui choso'ozenague' xtižə' Diozən' de'en cho'elen'. Diozən' bene' par nič byinj yi' na' sofr la'o syoda Sodomān' na' syoda Gomorran' por ni che de'en cui boso'ozenag beṇə' ca' che'. Na' de'e li əchnia' le'e catə' əžin ža gon Diozən' castigw zejlicəne che yoguə' beṇə' ca' chso'on de'e malən', beṇə' ca' cui yoso'ogüialao le'e yesə'əzaquə'əzi'iche' clezə ca beṇə' ca' gwnitə' Sodomān' na' Gomorran'.

¹² Nach gwsa'ac disipl ca' na' jəsə'adixjui'e de que benachən' cheyałə' yesyə'ədinjene' xtolə'əga'aque'ena'. ¹³ Na' leczə besyə'əbeje' zan de'e xio' de'en zjəyo'o zjəyaz yichjla'azdao' beṇə' na' boso'ošone' set lao cuerp che zan beṇə' ca' chsa'acšene na' gwso'one' par nich besyə'əyaquene'.

Can' goquə' got Juan ben' bchoa beṇə' nis

¹⁴ Na' Erodən' ben' chnabə' beṇə' Galilea ca' benene' dižə' ca naquə' yoguə'əlol de'e güen de'en ben Jeso'osən', la' beṇə' zan gosə'əneze' de'e ca' ben Jeso'osən'. Nach gwna Erodən': —Bengan' de'e Juannə' ben' bchoa beṇə' nis. Babebane' ladjo beṇə' guat ca', na' de'e na'anə' chac chone' miłagr quinga.

¹⁵ Nach yebałə beṇə' gosə'əne': —Naque' profet Liazən' ben' be' xtižə' Diozən' cana'.

Nach yebałə' gosə'əne': —Naque' to profet ben' choe' xtižə' Diozən' can' gwso'on de'e profet beṇə' ca' gwnitə' cana'.

16 Pero catà' bene Erodàn' xtižà' beṇà' ca' na' gwne': —Bengan' de'e Juannà' ben' bena' mendad gosà'əchogue' yene', na' ṇa'a babebane' ladjo beṇà' guat ca'.

17-18 Quinga goquà got Juannà'. Erodàn' beque'e Erodiasən' ca xo'ole', len Erodiasən' naque' xo'olà Lip biše'enà'. Na' Juannà' gože' Erodàn': "Malàn' beno' beca'o no'ol che beṇà' bišo'onà' par naque' xo'olo'." Na' de'en gož Juannà' Erodàn' ca', de'e na'anà' Erodàn' bene' mendad gosà'əzene' Juannà' na' gosà'əgü'e'ene' ližyan', na' boso'ocheje' ni'a ne'e ca' gden.

19 Erodiasən' gwlo'olaže'e Juannà' por ni che de'en gože' Erodàn' ca', na' gone'ene' gote'ene', pero bito goquà. 20 Erodàn' gocbe'ine' de que Juannà' dzacze' licha na' de que naque' to beṇà' güen. De'e na'anà' bžeb Erodàn' gone' mendad so'ote' Juannà' na' de'e na'anà' bito be' Erodàn' latjə bi gone no'olàn' Juannà'. Na' la'anà'əczə bitotec gwyejni'i Erodàn' bi de'en gwna Juannà', bebeine' bzenague' xtiže'enà'. 21 Pero na' gotà' to latjə par got Erodiasən' Juannà'. Catà'an gwye'i Erodàn' iz, bene' to lni par beṇà' gwnabia' che' ca', na' par beṇà' gwnabia' che soldad ca', na' par beṇà' blao ca' nità' Galilean' gan' chnabi'enà'. 22 Bi'i no'ol che Erodiasən' gwyo'obo' lo'o cuart gan' chsa'o beṇà' ca' na' bya'abo'. Na' lechguale bebei Erodàn' na' len beṇà' ca' chsa'olen le' txen can' bya'abo'. Nach Rei Erodàn' gože'ebo': —Gwṇab bità'ətezə de'en che'endo' na' goṇa'an.

23 Na' bene' lyebe len lebo' bzoe' jorament de que əgwnežjue'ebo' bità'ətezə de'e əṇabebo' le' la'anà'əczə šə gašjə ṇasyon gan' chnabi'enà'. 24 Nach bechojbo' na' gožbo' xna'abo'onà': —žBin' əṇabda'ane' gone'?

Nach xna'abo'onà' gože'ebo': —Gwṇabene' gone' le' yichj Juannà' ben' bchoa beṇà' nis.

25 Nach le'e beyo'oseste bi'i no'olàn' gan' chaolen rein' beṇà' ca' yelà, na' gožbo' rein': —Beṇ nada' ṇa'atec ṇa'a yichj Juannà' ben' bchoa beṇà' nis bžian to lao plat.

26 Nach rein' gwzochgüe' trist catà' beyož gož bi'i no'olàn' le' ca', pero na' baçhlə bzoe' jorament len lebo' lao beṇà' ca' zjənaquə combidàn'. De'e na'anà' benšaze' can' gwṇabe bi'i no'olàn' le'. 27 Nach le'e bente rein' mendad šej to soldad žjəchogue' zelao yen Juannà' na' əgwzi'e' yichje'enà' to lao plat. 28 Nach gwyej soldadàn' ližya gan' de Juannà' jəchogue' yene'enà' na' bži'en to lao plat. Nach beyože'en jəyenežjue'en bi'i no'olàn', na' bi'i no'olàn' bnežjwbo'on xna'abo'on.

29 Catà' gwse'ene disipl che de'e Juannà' de'en goquàn', jəsyə'əxi'e cuerp che'enà' na' jəsə'əcuəše'en.

Jeso'osən' bguaogüe' gueyà' mil beṇà' byo

30 Na' catà' besyà'əžin disipl che Jeso'osən' gan' zoe'enà' gwso'elene'ene' dižà' can' jse'ene'enà', na' can' jəsə'ədixjui'e can' na' Diozàn'. 31 Jeso'osən' gože' lega'aque': —Le'e da, šejcho to latjə ga cui no ṇla' žžencho šlož dezcanz.

Gwne' ca' çhedà' beṇà' zan chsa'aš gan' nite'enà', na' cui goquà latjə par gao Jeso'osən' len disipl che' ca'. 32 Nach Jeso'osən' len disipl che' ca' gwso'e to lo'o barcw na' gosà'əlague'e nisdà'onà' par besà'əžine' to latjə ga cui no ṇla'. 33 Pero beṇà' zan besà'əle'ine' lega'aque' catà'an gwsa'aque', na' besyà'əyombi'e Jeso'osən'. Nach gwsa'acdo beṇà' ca' ža' yoguà' yež ca' zjəchi' galə'əzə əzja'aque' zaquə' galən' əžin Jeso'osən' len disipl che' ca' na' byobəch besà'əžine' cle ca' Jeso'osən' len disipl che' ca'. 34 Na' catà' besà'əžine' cho'a nisdà'onà' Jeso'osən' ble'ine' beṇà' zan ca' na' beyašə'əlaže'e lega'aque', çhedà' gocbe'ine' de que zjənaque' ca' xilə' ca' bian' cui no xane de. Na' Jeso'osən' bzejni'ine' lega'aque'

de'e zan. ³⁵ Na' catə' bachexjw že'enə' gosə'əbiguə' disipl che' ca' laogüe'enə' na' gwse'ene': —Bachal na'a na' zocho to latjə ga cui no nla'. ³⁶ Bitobi de che beṇə' quinga par əse'ej əsa'ogüe'. Bzeišgueiga'aque'ne' dižə' nič žjəy'a'aque' yež ca' de'en zjəchi' galə'əzə par nič žjəə'əxi' de'e se'ej əsa'ogüe'.

³⁷ Nach Jeso'osən' gože' lega'aque': —Le'e gwnežjo de'e sa'ogüe'.

Na' gwse'ene': —ĵEche'endo' šejcho žjəxi'icho tml pes yetxtilən' par əgwnežjwchon əsa'o beṇə' quinga?

³⁸ Nach Jeso'osən' gože' lega'aque': —ĵBalə yetxtil chechon' de? Le'e güiašc.

Na' catə' gosə'ənezene', gwse'ene': —Gueyə' yetxtil na' čopə bej ya'a.

³⁹ Nach ben Jeso'osən' mendad gosə'əbe' beṇə' zan ca' lao yixye daquə'anə', xonj güeje'. ⁴⁰ Na' besə'ədobə to gueyoa güeje' na' šiyon güeje' gosə'əbi'e lao daquə'anə'. ⁴¹ Na' Jeso'osən' gwxi'e yetxtil ca' gueyə' na' bej ya'a ca' čopə, na' bgüie' yobalə be'e yełə' choxcwlen che Diozən' na' bzoxxe' yetxtilən'. Na' bnežjue'en disipl che' ca' par gwso'e che che beṇə' ca'. Leczə ca' bene' len bej ya'a ca' čopə, na' gwso'e che yoguə' beṇə' ca'. ⁴² Yogue'e gwsa'ogüe'en xte ca' gwse'eljene'. ⁴³ Na' pedas yetxtil ca' na' bej ya'anə' besyə'əga'an bosyo'tobe'en, na' gwsa'aquan šižin žomə. ⁴⁴ Na' beṇə' ca' gwsa'o yetxtilən' na' bej ya'anə' zjənaquə gueyə' mil beṇə' byo cui cuent no'olə na' cui cuent bidao'.

Jeso'osən' gwze'e lao nisdə'onə'

⁴⁵ Gwde na' Jeso'osən' bene' mendad yesyə'əyo'o disipl che' ca' lo'o barcon' par yesyə'əbialaogüe' yesyə'əlague'e yešla'alə nisdə'onə' par yesyə'əžine' Bet-saidan', žlac ne'e bega'an le' bzeine' beṇə' zan ca' dižə'. ⁴⁶ Na' catə' beyož bzei Jeso'osən' beṇə' ca' dižə', gwlo'e' to lao ya'a par jene' orasyon. ⁴⁷ Na' catə' goł, barcon' gan' zesyə'əyo'o disipl che' ca' bazdan gwcholte nisdə'onə', na' yetozə Jeso'osən' bega'ane' lao ya'anə'. ⁴⁸ Na' ble'ine' de que naquan zdebə par yesə'əžiguə'əche' barcon' chedə' chečj be'ena' clelə. Na' do šbal beyetj Jeso'osən' ya'anə' na' gwze'e tlo nisdə'onə' na' gwyeye' galən' zja'ac disipl che' ca'. Na' bene' ze te yešla'alə galən' zja'aque'. ⁴⁹ Pero na' catə' besə'əle'ine' le' zde' lao nisdə'onə' gwsa'aque'ne' de que naque' to beṇə' guat, na' gwso'osy'e. ⁵⁰ Yogue'e besə'əle'ine' le' na' besə'əžebchgüe'. Pero na' le'e bolgüizte' lega'aque' na' gože': —Leyebei, nada'anə'. Bito žeble.

⁵¹ Nach beyo'e lo'o barcw čega'aque'ena' na' le'e gwlezte be'ena'. Na' lechgualə besyə'əbanene', ⁵² la' bito gwsa'acbe'ine' non' naquə Jeso'osən' la'anə'əczə bguaogüe' beṇə' zan ca' len gueyə'əzə yetxtilən' chedə' nežjənčol yichjla'aždaoga'aque'ena'.

Jeso'osən' beyone' beṇə' chsa'acšene beṇə' nitə' Genesaretən'

⁵³ Na' catə' beyož besyə'əlague'e nisdə'onə', besə'əžine' gan' mbane Genesaretən'. Na' besə'əchoje' barcon' na' bosə'očheje'en cho'a nisdə'onə'. ⁵⁴ Na' ze'e besyə'əchoje' barcon' catə'əczlə besyə'əyombia' beṇə' ca' ža' Genesaretən' Jeso'osən'. ⁵⁵ Na' gwsa'ašdoe' yoguə' yež ca' zjəchi' doxen gan' mbane Genesaretən', na' gosə'əche'e yoguə' beṇə' ca' chsa'acšene zjəxoateze' lao xcamga'aque'ena' par jso'ene' gan' gwse'enene' rson to Jeso'osən'. ⁵⁶ Na' gatə'əteza gwyej Jeso'osən' šə lao' syoda, o šə lao' yež ca', con bosə'onite'e beṇə' ca' chsa'acšene do cho'a nezən' na' gwsa'atə'əyoine' Jeso'osən' šə güe'e latjə yesə'əgane' lačga lox xadon che'ena'. Na' yoguə' beṇə' ca' gosə'əgan len besyə'əyaquene'.

7

De'e mal de'en chchoj yichjla'azda'ochon' chonən manch la'azda'ochon'

1 Bałə beṇə' fariseo ca' na' beṇə' ca' choso'osed choso'olo'i lei de'en bzoj de'e Moizezən' gwsa'aque' Jerosalenna' na' besə'əžine' gan' zo Jeso'osən'. 2 Na' catə' besə'ələ'ine' de que bałə disipl che Jeso'osən' bito bosyo'one'e zan las ze'e sa'ogüe', na' gwsa'ogüe' xya contr disipl ca' lao Jeso'osən'. 3 Ca naquə costombr che yogua' neto' beṇə' Izrael na' mazachlə che beṇə' fariseo ca' beṇə' ca' lecəə zjənaquə beṇə' gwlaž cheto', bito chsa'ogüe' šə cuinə' yosyo'one'e zan las, la' can' naquə costombr de'en gosə'əžinao de'e xaxta'oto' ca'. 4 Catə' chja'aque' gan' chac ya'anə' na' catə' chesyə'əžine' ližga'aque' bito chsa'ogüe' xte catə'əch bagwsa'a gosə'əyib cuinga'aque'. Na' dech de'e zan costombr de'e chəsə'ənaogüe' ca de'en chso'one' xi'ilažə' tas plat chega'aque' ca' na' yesə' de ya, na' no mes chega'aque' segon can' na costombr golən'. 5 De'e na'anə' beṇə' fariseo ca' na' beṇə' ca' choso'osed choso'olo'i lei de'en bzoj de'e Moizezən' gwse'e Jeso'osən': —¿Bixchen' disipl chio' ca' bito chəsə'ənaogüe' costombr ca' de'en bosyo'ocua'anlen de'e xaxta'ochə ca' chio'o'? ¿Bixchen' cui chosyo'one'e zan las antslə ze'e sa'ogüe' can' chonto'?

6 Nach Jeso'osən' gože' lega'aque': —Naquən de'e li can' bzoj de'e profet Isaiazən' ben' be' xtižə' Diozən' cana' che le'e beṇə' goxoayag. Bzoje'en nan: Beṇə' Izrael ca' chəsə'əne' de que nada' Diozən' chso'elaogüe'e pero lo'o yichjla'azdaoga'aque'enə' chəsə'əgue'ine' nada'.

7 Bitobi zejen de'en chəsə'əne' chso'elaogüe'e nada', chedə' la' choso'osed choso'olo'ine' beṇə' costombr de'en gwsa'aljlažə' beṇəchən'.

8 Le'e chbejyichjle de'en non Diozən' mendad gonle na' con naozechle costombr golə de'en əbxe beṇəchən', ca de'en chi'ichgua yichjle cheyible no yesə' na' no tas plat chele zan las ze'e gwčhinlen na' chi'ichgua yichjle gonle de'e zan de'e zjənac ca'.

9 Na' goze'e Jeso'osən' lega'aque': —¿Echaquele güenchguan' chonle chbejyichjle de'en non Diozən' mendad gonle parzə nich naole costombr chelen'? 10 Le'e nale de que chzenagle che de'en bzoj de'e Moizezən'. De'e Moizezən' bzoje' can' gož Diozən' le', nan: “Le'e gwnežjo yelə' bala'aṇ xaxna'ale.” Na' lecəə bzoje': “Notə'ətezle šə chžia chnitə'əle xaxna'ale cheyalə' gatle.” 11 Pero na' le'e nale de que notə'ətezə beṇə' guac ye'e xaxne'enə': “Bitoch gaquələna' le'e chedə' yogua' mech o bien de'en naquə gonə' par gaquələna' le'e naquən Corban” (zeje dižə' naquən che Diozən'). 12 Na' šə ca' ye'e xaxna' be'enə', le'e natele de que bitoch cheyalə' gaquələne' xaxne'enə'. 13 Na' de'en naozechle costombr golə chele de'en nale naquə de'e žialaoch, bachonle lei che Diozən' ca to de'e cui bi bi zaque'e. Na' de'e zan de'e zjənaquə ca de'e quinga chonle.

14 Nach Jeso'osən' bolgüiže' beṇə' ca' zjənžaguən' par gosə'əbigue'e laogüe'enə', na' gože' lega'aque': —Yogua'əle le'e gwzenag de'en nga əñia' le'e nich šejni'ilen. 15 Bito nacho de que de'en che'ej chaochon' chonən manch la'azdaochon'. De'e mal de'en chchoj yichjla'azda'olen' lennə' chonən manch la'azda'olen'. 16 Le'e žia nagle de'e chene, legwzenag.

17 Catə' beza' Jeso'osən' gan' nitə' beṇə' ca' na' beyo'e liže'enə' disipl che' ca' gosə'əṇabene' le' bi zejen jemplan'. 18 Nach gože' lega'aque': —¿Elezə lenle bito chejni'ile de que de'en che'ej chaochon' bito gaquə gonən manch la'azda'ochon'? 19 De'en che'ej chaochon' bito cho'on yichjla'azda'ochon' sino que chjche'en lo'o le'echon' na' chžin or cheden.

(Can' gwne' blo'e de que yoguá' yelá' guaon' zjənaquən güen par gao-chon.) ²⁰ Na' gwne': —De'en chchoj yichjla'ažda'olen' lennə' chonən manch la'ažda'olen'. ²¹ Na' lo'o yichjla'aždao' beñač na'anə' chchoj yoguá' xbab mal quinga, ca de'en nan yesə'əgo'o xtoga'aque' na' yesə'əbejyichje' no'ol chega'aque' o be'en chega'aque' par yesyə'əzolene' beñə' yoblə, na' ca de'en nan so'ote' beñə'. ²² Na' leczə lo'o yichjla'aždao' beñač na'anə' chchoj xbab mal de'en nan yesə'əbanga'aque' bi de'e de che beñə', na' yesə'əzelaže'e bi de'e de che beñə', na' so'one' de'e mal, na' yesə'əxoayague' beñə', na' so'onlene' cuerp chega'aque'enə' de'en naquə de'e yelə' zto', na' sa'acxi'i ljuežjga'aque', na' yoso'ožia yoso'onite'e ljuežjga'aque', na' sa'alaže'e na' nan so'one' de'en cui zaque'e. ²³ Yoguá' de'e mal ca' de'en zjənac ca' chchojən yichjla'aždao' beñə', na' chac manch la'ažda'oga'aque'enə'.

To no'olə cui naque' beñə' Izrael chonjilaže'e Jeso'osən'

²⁴ Beza' Jeso'osən' latjan' len disipl che' ca' par ja'aque' galə'əzə gan' mbane Tiro na' Sidon. Na' gwso'e to lo'o yo'o na' bito gone'e Jeso'osən' no əneze gan' nite'enə', pero bia'aczə bito goquə yesə'əcuašə' cuinga'aque'. ²⁵⁻²⁶ Na' zo to no'olə Sirofenisia beñə' chšil dižə' griego na' zo to bi'i no'ol che' yo'o yaz de'e xio'on yichjla'ažda'obo'onə'. Na' lguəgwzə bene no'olən' rson gan' zo Jeso'osən', na' gwyeje' bzo xibe' lao Jeso'osən'. Na' gotə'əyoine' Jeso'osən' yebeje' de'e xio' ca' yo'o yaz yichjla'aždao' xi'ine' no'olən'. ²⁷ Pero na' Jeso'osən' gože'ene': —Cheyalə' güe'echo latjə zgua'atec əsa'o bi'i checho ca' na' techlə əgguaə xico'ochon', chedə' bito naquən güen yeca'acho yelə' guao che xi'inchon' na' əgwnežjwchon gao xico'ochon'.

²⁸ Na' gocbe'i no'olən' bsaquə'əlebe Jeso'osən' beñə' ca' cui zjənaquə beñə' Izrael ca beco', nach gože'ene': —Leiczədon' Xana'. Pero xico'ocho ca' bian' nita' xan mesən' guaquə əsa'ob pedas yelə' guaon' de'en choso'osan xi'incho ca' lao yon'.

²⁹ Nach Jeso'osən' gože'ene': —No'olə, güenchguan' bagwnao'. Guaquə yeyejo' ližə'. Babečoj de'e xio' de'en gwyo'o gwyaz yichjla'aždao' xi'inə'onə'.

³⁰ Na' catə' bežin no'olən' liže'enə', xi'ine'enə' debo' lao xcambo'onə' na' babečoj de'e xio'onə' gwyo'o gwyaz yichjla'ažda'obo'onə'.

Jeso'osən' beyone' to beñə' ncuež nague' na' leczə bito goquə əne' binlo

³¹ Gwde na' Jeso'osən' len disipl che' ca' besa'aque' latjan' gan' mbane Tiro na' besyə'ədie' gan' mbane Sidonnə' na' yež ca' zjəchi' gan' mbane Decapolis par besyə'əžine' nisdəo' Galilean'. ³² Na' galə'əzə nisdə'onə' besyə'əžague' beñə' ca' zjanche'e to beñə' cuež na' leczə bito goquə əne' binlo, na' gwsa'atə'əyoine' Jeso'osən' əxoə ne'enə' be'enə' par nič yeyaquene'. ³³ Jeso'osən' gwche'ene' partlə gan' cui no beñə' nitə' na' bzeb xbene'enə' lo'o nag be'enə' čhopə' la'a, na' btop xene'enə' xbene'enə' nach gwdane' ložə' be'enə'. ³⁴ Nach Jeso'osən' bgüie' yobalə, na' gwcua'alaže'e gwne': —jEfata! —zeje dižə' “jByaljo!”.

³⁵ Nach byaljo nag be'enə', na' leczə lože'enə' beyaquen, na' goc gwne' binlo.

³⁶ Na' Jeso'osən' bene' mendad len beñə' ca' cui so'e dižə' che de'en babene', pero mazəchlə gwso'one' gwso'e dižə' chei. ³⁷ Na' lechguale besyə'əbane beñə' ca' na' gwse'e ljuežjga'aque': —Chac chone' yoguə'əloj na' yoguə' de'en chone' chone'en binlo. Chone' par nič chesyə'əyene beñə' cuež ca' na' par nič chesyə'əne beñə' mod ca'.

1 Na' goquən' besə'ažag beṇə' zan gan' zo Jeso'osən', na' bito bi de chega'aque' par əsa'ogüe'. Nach Jeso'osən' goxe' disipl che' ca' na' gože' lega'aque'. 2 —Lechguale cheyaša'ada' beṇə' quinga. Bagoc šonə ža nite'e nga len chio'o, na' bitobi de de'e əsa'ogüe'. 3 Šə yosa'aga'aca'ane' sin cui bi əgwnežjua' əsa'ogüe', gosyə'əcholene' tnezən', la' baļe' za'aque' zitə'.

4 Nach disipl che' ca' gwse'ene': —Gan' zocho nga naquən to latjə ga cui nono nļa'. ǀGaxa əželech de'e əsa'o yogua' beṇə' zan quingan'?

5 Nach Jeso'osən' gože' lega'aque': —ǀBaļə yetxtil chechon' de' Nach gwse'ene': —Gažən.

6 Nach Jeso'osən' bene' mendad yesə'abe' beṇə' ca' lao yon'. Na' bexe'e yetxtil dao' ca' gažə na' be'e yeļə' choxcwlen che Diozən'. Nach bzojje'en bnežjue'en disipl che' ca' par gwso'e che yogua' beṇə' ca'. 7 Na' leczə de to chopə beļ ya'a dao', na' Jeso'osən' be'e yeļə' choxcwlen che Diozən' por lega'aquəb, nach bene' mendad len disipl che' ca' əso'e che che beṇə' ca'. 8 Na' yogue'e gwsa'ogüe' xte ca gwse'eljene'. Nach pedas ca' de'en besyə'əga'annə' bosyo'otobə disipl ca' len, na' gwsa'aquən gažə žomə. 9 Na' beṇə' ca' gwsa'o yetxtilən' len beļ ya'anə' zjənaquə do tapa mile'. Gwde na' bosa' Jeso'osən' lega'aque'. 10 Nach le' gwyo'e to lo'o barcw len disipl che' ca' na' ja'aque' distrit gan' nzi' Dalmanota.

Beṇə' fariseo ca' gosəṇabene' Jeso'osən' gone' to de'e yesə'əle'ine' le'e yoban'

11 Na' besə'əžin baļə beṇə' fariseo gan' zo Jeso'osən' na' gwzolao gwsa'acyože'ene'. Na' gosəṇabene' le' gone' to miļagr de'e yesə'əle'ine' le'e yoban' gwsa'aquene' šə cui gaquə gone'enna'. 12 Jeso'osən' gwcuə'alaze'e na' gože' lega'aque': —Le'e mbanļe nā'a chṇable gona' to de'e le'ile le'e yoban' par niç ənezele šə Diozən' bsele'e nada'. Pero de'e li chnia', le'e, bitobi bi gona' de'e le'ile le'e yoban'.

13 Na' beyož gwna Jeso'osən' ca' beze'e len disipl che' ca' gan' nitə' beṇə' ca', na' besyə'əyo'e lo'o barcon' na' besyə'əlague'e yešļa'alə nisdə'onə'.

De'en chsed chlo'i beṇə' fariseo ca' gwxaquə'əleben ca xna' cuazin'

14 Na' disipl che' ca' gwsa'ache'ine' de que gwsa'anlaže'e əso'oxe' yetxtil de'en əsa'ogüe'. Toga yetxtilən' de chega'aque' lo'o barcon'. 15 Nach Jeso'osən' bene' mendad len lega'aque' gože': —Legapə cuidad len xna' cuazi che beṇə' fariseo ca' na' che beṇə' ca' chso'on t xen len Erodən'.

16 Pero disipl che' ca' bito gwse'ejni'ine' bi zejen de'en gože' lega'aque' ca', nach gwse' ljuējiga'aque': —Gwne' ca' chedə gonlažə'əcho gua'acho yetxtilən'.

17 Jeso'osən' goche'ine' can' gwse'e ljuējiga'aque', nach gože' lega'aque': —ǀBixchen' chonle xbab che yetxtilən' de'en gonlažə'əlen'? ǀEcbina' šejni'ile bi zeje de'en gwnia' le'e? ǀəna' bito chonle xbab chei? ǀEbia'aczə ne'e nchol yichļa'ažda'olen'? 18 ǀEbito chle'ile de'en chona'? na' ǀəbito chenele de'en chzejni'ida' le'e? ǀEbito za'alaze'əle miļagr de'en babena'? 19 Catə'ən bguaogua' gueya'a mil beṇə' byo len guey'əzə yetxtil dao' ǀbaļə žomə pedas yetxtilən' botoble de'en besyə'əga'an'?

Nach gwse'ene': —Šižin žomən'.

20 Na' gozna Jeso'osən': —Catə' bguaogua' tapa mil beṇə' byo len gažə yetxtil ǀbaļə žomə pedas yetxtil ca' botoble de'en besyə'əga'an'?

Nach gwse'ene': —Gažə žomən'.

21 Nach gože' lega'aque': —ǀEbia'aczə bitonə' šejni'ile bi zejen de'en gwnia' le'e?

Jeso'osən' beyone' jelao to beṇə' lchol yež de'en nzi' Betsaida

²² Gwde de'e ca' besa'əžine' Betsaidan'. Na' beṇə' Betsaida ca' jso'e to beṇə' l̥choḷ̥ lao Jeso'osən', na' gwsa'atə'əyoine' le' cane'ene' par niçh yele'ine'. ²³ Na' Jeso'osən' beṇə'e na' be'ena' na' gwçhe'ene' fuerlə yežən' na' gwdeb xene'ena' j̥lao be'ena' nach gwdane'ene'. Nach gwnabene' le' šə bachac le'ine' lata'. ²⁴ Beṇə' l̥choḷ̥ən' bgüie' na' gože' Jeso'osən': —Chle'ida' beṇə' can' chle'icho yag ca', pero chesa'əde'.

²⁵ Nach Jeso'osən' gwdane' j̥lao be'ena' de'e yoblə, nach be'ena' bgüiayane'e, na' beyaque jelaogüe'ena' na' bele'ine' bin̥lo. ²⁶ Nach Jeso'osən' gože'ene': —Bito šejo' lao' yežən', na' nic no yo'o can' babena' len le'.

Na' bose'ene' beyej liže'ena'.

Bedən' gwne' che Jeso'osən' de que Diozən' bsele'ene' par gaquəlene' beṇə' ca' bagwleje' par zjənaque' nasyon che'ena'

²⁷ Na' Jeso'osən' len disipl che' ca' gwsa'aque' ja'aque' yež ca' de'en zjəchi' gan' mbane Sesarea de Filipino. Na' lao zja'aque' tnežən' Jeso'osən' gože' disipl che' ca': —Ĵbi chesa'əna beṇə', non' naca' nada'?

²⁸ Nach gwse'ene': —Baḷe' chesa'əne' de que naco' de'e Juan ben' bçhoa beṇə' nis. Na' yebaḷe' chesa'əne' de que naco' profet Liaz ben' be' xtižə' Diozən' cana'. Na' yebaḷe' chesa'əne' de que naco' yeto profet beṇə' leczə be' xtižə' Diozən' cana'.

²⁹ Nach gože' lega'aque': —Ĵçhexa le'e? Ĵbi nale non' naca' nada'?

Nach Bedən' gože'ene': —Le' naco' Cristən' ben' gwlej Diozən' par gaquəleno' neto' bagwleje' par naquəto' nasyon che'ena'.

³⁰ Nach Jeso'osən' bene' mendad len lega'aque' de que ni toe' cui əso'e dižə' de que len' naque' Cristən' ben' gwlej Diozən' par gaquəlene' beṇə' ca' zjənaquə nasyon che'ena'.

Jeso'osən' gwdixjue'ine' disipl che' ca' de que gate'

³¹ Nach gwzolaə Jeso'osən' bsed blo'ine' disipl che' ca'. Na' bzenene' lega'aque' de que de'e zan cheyalə' çhi' saquə' le' naque' ben' bseḷə' Diozən' golje' beṇəçh. Na' gwne' de que beṇə' golə beṇə' blao che nasyon Izrael çheton' na' beṇə' gwnabia' che bçox çheto' ca' na' beṇə' ca' choso'osed choso'olo'i lei de'en bzoj de'e Moizežən' bito se'ejle'e che'. Nach gože' disipl che' ca' de que beṇə' blao ca' so'ote'ene', pero na' yeyon ža yebane' ladjo beṇə' guat ca'. ³² Yoguə' de'e ca' gož Jeso'osən' disipl che' ca' clar. Nach Bedən' gwleje' Jeso'osən' lata' dao' ca'alə par gwdile'ene'. ³³ Pero na' Jeso'osən' gwyeçhe' na' bgüie' disipl che' ca' na' gwdile' Bedən', gože' gwxiye'ena' de'en chnabia' yichjla'azdao' Bedən': —Gwçhi'izə' ca'alə Satanas.

Nach gože' Bedən': —Chono' xbab che de'en chacdo' gaquən güen na' bito chono' xbab naquən' chene'e Diozən' gaquə.

³⁴ Nach Jeso'osən' gože'e disipl che' ca' na' yeziquə'əchlə beṇə' ca' zjənžaguən' gože': —Notə'ətezle šə chene'ele gonlilažə'əle nada' na' gwzenagle çhia', cheyalə' əchojyichjle de'en chene'ele gon cuinle par niçh gonle con can' chene'e Diozən', na' bitobi gaquəle che de'en çhi' saquə'əle la'anə'əczə šə so'ot beṇə' le'e to le'e yag coroz, con gonlilažə'əle nada' na' gwzenagle çhia'. ³⁵ Na' notə'ətezə beṇə' chaquene' gone' par niçh cui çhi' saque'e o par niçh cui no so'ot le', be'enan' cuiayi'. Na' notə'ətezə beṇə' çhsanlilažə' cuine' çhi' saque'e o so'ot beṇə' le' çhedə' chonlilažə'əle nada' na' çhedə' chejle'e dižə' güen dižə' cobə çhia'anə', be'enan' əbane' zejlicane. ³⁶ Bitobi de'e güen gaquə che to beṇə' la'anə'əczə nabi'e doxen yežlyon' šə cuiayi'e zejlicane. ³⁷ La' bitə'ətezə de'e gata' che' bito gaquəlenən le' par niçh cui cuiayi'e zejlicane.

38 Notə'ətezle šə cheto'ile chia' na' che xtiža'anə' lao beṇə' güen de'e mal ca' beṇə' ca' cui chso'elao' Diozən', leczə ca' nada' yeto'ida' chele, nada' naca' ben' bselə' Diozən' golja' beṇəch. Yeto'ida' chele cata'an yida' de'e yoblə nsa'a yelə' chey che'eni' che Xa' Diozən' na' nchi'a angl chia' ca'.

9

1 Nach goze'e Jeso'osən' lega'aque': —De'e li əchnia' le'e de que balle cabina' gatle cata'an le'ile can' gon Diozən' əgwlo'e yelə' guac xen che'ena' par nabi'e beṇəchan'.

Jeso'osən' goque' ca to de'e chey che'eni'

2 Gwde xop ža gwna Jeso'osən' de'e ca', gwčhe'e Bedən' len Jacobən' len Juannə', con lega'acze' ja'aque' to lao ya'a sibə. Na' lao nite'e lao ya'ana' besə'əle'ine' beža' can' goquə Jeso'osən'. 3 Na' xalane'enə' goctitən na' beyaquən šyiš xilə' juisy. Beyaquən šyiš xilə' juisyəch cle ca' che notə'ətezəchlə beṇə' chac chib lachə' yežlyo nga. 4 Na' besə'əle'ine' Liazən' ben' be' xtižə' Diozən' cana' na' leczə besə'əle'ine' de'e Moizezən' chso'elene' Jeso'osən' dižə'. 5 Nach gož Bedən' Jeso'osən': —Xantə', güenchgua zocho nga ṇa'a. ĆEgü'e'endo' gonto' šonə ranš?, ton par le', na' ton par Moizezən' na' yeton par Liazən'.

6 Gože'ene' ca' chedə' bito bene' xbab che de'en gože' tant besə'əžebe'. 7 Nach betj to bejw bcuašə'an lega'aque', na' lo'o bejon' gwse'enene' gwna Diozən': —Benga Xi'ina' ben' chacchgüeida' chei. Che le'ena' le'e gwzenag.

8 Na' choso'ogüiate' ca' cata'əczla con cuich no no besə'əle'ine' sino yetozə Jeso'osən'.

9 Na' gwde na' lao chesyə'əyetje' ya'ana', Jeso'osən' bene' mendad len lega'aque' cui no no əso'elene' dižə' che de'en babesə'əle'ine'ena' xte cata'əch so'ot beṇə' ca' Jeso'osən' ben' bselə' Diozən' golje' beṇəch na' yebane' ladjo beṇə' guat ca'. 10 De'e na'ana' bito bi dižə' gwso'elene' yeziquə'əchlə beṇə'. Pero bito gwse'ejni'ine' bi zejen xtižə' Jeso'osən' de'en gwne' yebane' ladjo beṇə' guat ca' na' gosə'əṇabe' ljeužjga'aque' bi zejenṇə'. 11 Nach gwse'e Jeso'osən': —Beṇə' ca' choso'osed choso'olo'ine' lein' choso'osedene' neto' de que zgua'atec profet Liazən' ben' gwzo cana' cheyalə' yide' lao yežlyo nga de'e yoblə antslə ze'e yidə ben' əselə' Diozən' par gaquəlene' nasyon chechon'. ĆBixchen' chesə'əne' ca' ža?

12 Nach Jeso'osən' gože' lega'aque': —De'e liczə can' chesə'əne' de que profet Liazən' ben' gwzo cana' leteque' yide' de'e yoblə par yeyone' yoguə'əlo' de'en cheyalə' yeyac. Na' leczə ca' nyoj Xtižə' Diozən' nan de que ben' əselə' Diozən' galje' beṇəch na' de'e zan de'e chi' saque'e. Beṇəchan' so'onene' le' ca'acza to beṇə' cui bi bi zaque'e. 13 Pero na' əchnia' le'e de que babidə ben' bedəyen can' ben Liazən' na' beṇə' Izrael gwlaž checho ca' gwso'onene' le' con ca gwse'enene' can' nyoj Xtižə' Diozən' gaquə.

Beyon Jeso'osən' to bi'i yo'yo yaz de'e xio'

14 Na' cata' besyə'əžine' gan besyə'əga'an disipl ca' yelə', besə'əle'ine' beṇə' zan, zjanyechje' disipl ca'. Na' leczə nita' beṇə' ca' choso'osed choso'olo'i lei de'en bzoj de'e Moizezən' chsa'acyože' disipl che Jeso'osən'. 15 Nach cata' besə'əle'i yoguə' beṇə' ca' nžaguən' Jeso'osən' besyə'əbanchgüeine'. Nach gwsa'acdoe' jəsə'əšague'ene' na' gwsə'olgüiže'ene'. 16 Nach Jeso'osən' gože' disipl che' ca': —ĆBi dižə'an cho'elenle beṇə' ca' choso'osed choso'olo'i lein'?

17 Nach entr beṇə' ca' zjənžaguən' toe' gože'ene': —Xana', nchi'a xi'ina' nga. Yo'o yaz de'e xio'on yichjla'azda'obo'onə' na' chonən par nič nacho' mod.

18 Na' gatə'ətezə zobo' catə' chŋizən lebo' chchixən lebo' lao yon', na' chla' bžin' cho'abo'onə', na' chaoyejə leybo'on na' chatbo' šlat. Bagotə'yoida' disipl chio' ca' par niç yesyə'əbeje' de'e xi'onə' yo'o yaz yichjla'ažda'obo'onə', pero bito gwsa'aque' yesyə'əbeje'en.

19 Nach gož Jeso'osən' beŋə' ca' ža'anə': —Le'e nitə'əle nga, žbixchexan' cui chejle'ele chia'? Bachac šša zoa' napa' yelə' chxenlažə' len le'e. žBatxan' šejle'ele chia'?

Nach gože' xa bida'onə': —Doa' xi'ino' nga.

20 Na' catə' zjsə'bo' lao Jeso'osən', ble'i de'e xio'onə' Jeso'osən' na' bŋizən bida'onə', na' benən par niç lechgualē gwyazbo' šonŋə', na' bchix btołən lebo' lao yon', xte bla' bžin' cho'abo'onə'. 21 Nach Jeso'osən' gože' xabo'onə': —žŠna bagoc chacbo' ca'?

Nach xabo'onə' gože' Jeso'osən': —Dezd bida'otebo'. 22 Zan las ben de'e xi'onə' par jechazbo' do lao yi' na' bχopən lebo' do lo'o nis par gatbo'. Šə bi de'e guac gono' par gaquəleno' neto', beyašə'əlažə'əšgwe' neto'.

23 Jeso'osən' gože'ene': —Šə chejli'o chia', goyona'abo', la' chac chona' bitə'ətezə, con šə chejli'o chia'.

24 Nach xabo'onə' le'e gožte' Jeso'osən': —Chejli'a chio'. Goclenšga nada' par niç šejle'echa' chio'.

25 Na' catə' Jeso'osən' ble'ine' bachesə'əžag beŋə' zan, nach gwdile' de'e xio'onə', gože'en: —De'e xio', chono' par niç bi'i nga nacbo' mod na' ncuežbo'. Chona' mendad yechojo' yichjla'aždao' bi'i nga na' cuatəch yeyo'o yeyazo' de'e yoblə.

26 Nach de'e xio'on bgosya'an lebo' na' benən par niç lechgualē fuert gwyazbo' šonŋə' de'e yoblə nach bechojən lebo' na' bocua'anən lebo' ca'aczə to bi'i guat. Na' beŋə' zan gosə'əne' de que gotbo'onə'. 27 Pero na' Jeso'osən' bexe'e na'abo'onə' par bezožə'abo'.

28 Nach Jeso'osən' gwyo'e to lo'o yo'o na' disipl che' ca' gosə'əbigue'e gan' zo toze', na' gwse'ene': —žBixchexacxan' cui goquə yebejto' de'e xi'onə' ža?

29 Nach gože' lega'aque': —Par niç gaquə yebejle de'e xio' ca' de'en zjanaquə ca de'en bebeja' yichjla'aždao' bi'i nga, cheyalə' co'o gwchejle cui ye'ej gaole niç gontezə gonle orasyon.

De'e yoblə gwdixjue' Jeso'osən' de que gate'

30 Na' catə' besa'aque' latjən' besyə'əžine' gan' mbane Galilean', pero Jeso'osən' bito gone'ene' yesə'əneze beŋə' gan' zoe'. 31 Con disipl che' ca'azə əbsed əblo'ine'. Na' gože' lega'aque' de que le' naque' ben' bselə' Diozən' golje' beŋəch. Na' gaque' lao na' beŋə' na' so'ote'ene', nach yeyon ža yebane' ladjo beŋə' guat ca'. 32 Pero na' disipl ca' bito gwse'ejni'ine' dižə' de'en be' Jeso'osən' na' besə'əžebe' par yesə'əŋabene' le' bi zejen de'e gože' lega'aque'enə'.

Gwsa'acyožə disipl che' ca' noe' naquə blaoch

33 Jeso'osən' len disipl che' ca' besyə'əžine' liž Jeso'osən' de'en zo Capernaunə', na' lao bazjənite'e liže'enə' gože' lega'aque': —žBi porən' chacyožle tnezən'?

34 Nach disipl che' ca' bito bosyo'oži'e xtize'enə', chedə' gwsa'aquene' zto' de'en gwsa'acyože' entr lega'aque' noe' naquə blaoch. 35 Gocbe'i Jeso'osən' xbab chega'aque'enə' na' gwchi'e na' goxe' disipl che' ca' par gosə'əbigue'e laogu'e'enə', na' gože' lega'aque': —Notə'ətezle šə chene'ele gacle beŋə' blaoch,

cheyalə' gonle xbab che cuinle de que bitobi zaquə'əle, na' cheyalə' gaquəlen ljuežjle ca to mos.

³⁶ Nach goxe' to bidao' na' bzeche'ebo' laoga'aque'ena' nach gwlene'ebo', gože' lega'aque': ³⁷ —Šə chonle güen len bidao' nga o nota'ətezachlə bidao' laogüe de'en chaquele chia', choncze güen len nada'anə'. Na' cata' chonle güen len nada', leczə choncze güen len Diozən' ben' bselə' nada'.

Ben' cui chon contr chio'o txenczən' chone' len chio'o

³⁸ Nach Juannə' gože'ene': —Maestr, babežagto' to beṇə' cho'e la'onə' par chebeje' de'e xio' de'en yo'o yaz yichjla'aždao' beṇə' na' bžonto' gone' ca' cheda' bito chone' txen len chio'o.

³⁹ Nach Jeso'osən' gože'ene': —Bito gwžonle gone' ca', cheda' nota'ətezə beṇə' cho'e la'anə' par gone' to miłagr, bito gaquə bi əne' contr nada'. ⁴⁰ Šə to beṇə' cui chone' contr chio'o, txenczən' chone' len chio'o. ⁴¹ Na' nota'ətezə beṇə' gaquəlen le'e laogüe de'en naole nada' la'anə' tbaszə nis gone' ye'ejle, be'enə' gon ca' de'e ličzə gona' ca soe' mbalaz cata' yežine' yoban'.

Bito cheyalə' goncho ca əxopə beṇə' yoblə gone' de'e mal

⁴² Probchguazə ben' gon par nič əxopə to beṇə' chonliłazə' nada' gone' de'e mal, la'anə'əczə ben' əxopən' cuitec bi zaque'e par len beṇə'chən'. Nca'alə xneze žalə' yoso'ocheje' yen ben' chon ca' to yej yišə' na' žjəsə'əzale'ene' lo'o nisda'onə' par gate' cle ca soe' gone' ca əxopəch beṇə' so'one' de'e malən'. ⁴³ Šə de'en chonle len na'alena' chonən par nič əxople gonle de'e malən', güenchlə žalə' əchog na'alena' cle ca əxople gonle de'e malən'. Nca'alə xneze nacle beṇə' na' chog yežinle lao Diozən' na' əbanle zejlicane cle ca cuiayi'ilenlen txen lao yi' gabilən' de'en cui chyoł. ⁴⁴ Zejlicane yesə'əžaglaochgua beṇə' ca' yesyə'əžin lao yi' gabilən' cheda' cuat yol yi'inə'. ⁴⁵ Na' šə de'en chonle len ni'alena' chonən par nič əxople gonle de'e malən', güenchlə žalə' əchog ni'alena' cle ca əxople gonle de'e malən'. Nca'alə xneze yežinle lao Diozən' nacle beṇə' coj na' əbanle zejlicane cle ca cuiayi'ilenlen txen lao yi' gabilən' de'en cui chyoł. ⁴⁶ Zejlicanen' yesə'əžaglaochgua beṇə' ca' yesyə'əžin lao yi' gabilən' cheda' cuat yol yi'inə'. ⁴⁷ Na' šə de'en chle'ile len jelaolen' chonən par nič əxople gonle de'e malən' yejni'alə žalə' cuejlen, cheda' nca'alə xneze nacle beṇə' lchol yežinle yoban' gan' zo Diozən' chnabi'e na' əbanle zejlicane, cle ca cuiayi'ilenlen txen lao yi' gabilən'. ⁴⁸ Zejlicanen' yesə'əžaglaochgua beṇə' ca' yesyə'əžin lao yi' gabilən' cheda' cuat yol yi'inə'.

⁴⁹ Bxoz ca' chso'ose' zedə' lao xpelə' bia ca' choso'ozeye' chso'elaogüe'e Diozən' par nič belə'an chaquən xi'ilažə'. Na' de'en chsi' Diozən' xneze chy' chzaquə'əcho, chone' ca' par nič chaquəch yichjla'aždao' chio'o chonliłazə'əchone' xi'ilažə'. ⁵⁰ Nezecho de que zedə' naquən güen na' chonən par nič cui chbiayi' yid belə'an, pero šə zedə'an bitoch bi zxi' naquən, bitoch bi zaquə'an na' bito gaquə goncho ca yeyaquən zxi' de'e yoblə. Na' par nič gacle ca zedə' de'en naquə zxi' cheyalə' gacle beṇə' la'aždao' xi'ilažə', na' so cuezle binlo len ljuežjle.

10

Bito yela'acho be'en checho o no'ol checho par solencho beṇə' yoblə

¹ Jeso'osən' len disipl che' ca' besa'aque' Capernaunnə' na' ja'aque' yež ca' zjəchi' gan' mbane Jodean' na' yež ca' zjəchi' yešla'alə yao Jordannə'. Na' besə'əžag beṇə' zan gan' zoe'enə', na' de'e yoblə bzejni'ime' lega'aque' con

can' chzejni'iczene' lega'aque'. ² Nach bałə beŋə' fariseo ca' gosə'abigüe' gan' zo Jeso'osən' par niçh yesə'əbejene' dižə' de'e yesə'əchine' contr le', na' gosə'əñabene' le' šə de lsens par beŋə' nšagna' yele'e xo'ole'. ³ Jeso'osən' gože' lega'aque': —¿Naquən' nyoj lei de'en bzoj de'e Moizezan'? ¿Bin' bene' mendad gonle'?

⁴ Nach beŋə' fariseo ca' gwse'e Jeso'osən': —De'e Moizezan' be'e latjə əgwcos ben' nšagna'anə' to act ga güe'en dižə' de que besyə'əle'enə', nach cuejyichje' no'ol che'enə'.

⁵ Jeso'osən' gože' lega'aque': —De'e Moizezan' be'e latjə yela'a no'ol chele cheda' nacle beŋə' yichjla'aždao' žod. ⁶ Bablabczle can' nyoj Xtizə' Diozən' nan de que catə'an gwxe yežlyon' Diozən' bene' beŋə'chən' beŋə' byo na' no'olə. ⁷ Na' lecza nan: “Beŋə' byonə' le'e xaxne'e par əgwšagne'e si'e to no'olə. ⁸ Nach beŋə' ca' yoso'ošagna'anə' əsa'aque' tozə.” De'e na'anə' bitoch əsa'aque' çhopə beŋə', sino que əsa'aque' tozə beŋə'. ⁹ De'e na'anə' notono cheyalə' yolə'a lega'aque' la' Dioz nan' banone' lega'aque' tozə beŋə'.

¹⁰ Na' catə' Jeso'osən' len disipl che' ca' besyə'əžine' yo'o gan' gosə'anitə' disipl che' ca' gosə'əñabene' le' bi zejen de'en gože' beŋə' fariseo ca'. ¹¹ Na' Jeso'osən' gože' lega'aque': —Notə'ətezə beŋə' chela'a no'ol che'enə' par yeque'e no'olə yoblə tozəczə ca malən' chone' len de'en chon beŋə' chgo'o xtoi. ¹² Na' notə'ətezə no'olə yele'e be'en che'enə' par yeque'e beŋə' yoblə, lecza tozəczə ca malən' chon no'olən' len de'en chon beŋə' chgo'o xtoi.

Jeso'osən' bene' orasyon par bidao' ca'

¹³ Na' ja'ac beŋə' əjsə'e bidao' lao Jeso'osən' par niçh əxoə ne'enə' yichjga'acbo' na' gone' orasyon çhega'acbo'. Pero disipl che' ca' gosə'ədile' beŋə' ca' zjsoa' bidao' ca'. ¹⁴ Catə' ble'i Jeso'osən' can' chso'on disipl che' ca', bže'e nach gože' lega'aque': —Le'e güe' latjə la'ac bidao' ca' laogua' nga, na' cui əgwžonle. Na' əchnia' le'e, beŋə' ca' choso'ozexjw yichjga'aque' lao Diozən' ca' bidao' ca' choso'ozexjw yichjga'acbo' lao xaxna'aga'acbo' lega'acze'enə' chso'e latjə chnabia' Diozən' lega'aque'. ¹⁵ Bidao' ca' bito chso'on cuinga'acbo' xen, na' de'e li chnia' le'e, notə'ətezle šə cui yeyacle ca bidao' par güe'ele latjə ñabia' Diozən' le'e, bito gaquə yežinle yoban' gan' zo Diozən' chnabi'e.

¹⁶ Nach Jeso'osən' gwlene' bidao' ca' na' gwxoə ne'enə' yichjga'acbo'onə', na' bene' orasyon par lega'acbo'.

Beŋə' güego' ben' goquə beŋə' gwni'a be'elene' Jeso'osən' dižə'

¹⁷ Na' ze'e yesa'aque' latjən' to beŋə' güego' gwsa'adoe' bžine' gan' zo Jeso'osən' na' bzo xibe'en lao Jeso'osən'. Na' gože'ene': —Maestr, le' naco' beŋə' güen, gwna nada' bi de'en cheyalə' gona' par gatə' yelə' mban zejlicane chia'.

¹⁸ Na' par niçh gonch be'enə' xbab che de'en gwne', Jeso'osən' gože'ene': —¿Bixchen' nao' de que beŋə' güen nada'? Dioz nan' naque' le'eze-laogüe beŋə' güen. ¹⁹ Neždo' bin' na lein': “Cui co'o xtole, na' cui cuejyichje be'en chele o no'ol chele par solenle beŋə' yoblə; cui gotle beŋə'; cui gacble; bito gacle testigw fals contr sa'aljuežjle; bito xoayagle sa'aljuežj beŋə'chle; legwnežjo yelə' bala'an xaxna'ale.”

²⁰ Nach beŋə' güegon' gože' Jeso'osən': —Maestr, yoguə'əloj de'e ca' chzenaga' chei dezd xcuidə'ətia'.

²¹ Jeso'osən' bgüie' be'enə' na' goquene' che' na' gože'ene': —Tozə de'en ne'e chac falt gono'. Jəyeyetə' yoguə'əloj de'en de'chio', na' mech de'en le'ido' che de'e ca' bnežjon beŋə' yašə'. Nach da denao nada' la'anə'əczə šə gonclən byen gato' to le'e yag coroz. Na' catə' yežino' yoban' gan' zo Diozən', so' mbalaz.

22 Pero na' beṇə' güegon' beyoḻ goḻ Jeso'osən' le' ca', lechgualē trist gwzoe' chedə' la' to beṇə' gwni'achguan' naque', na' beza'achoe' trist.

23 Nach Jeso'osən' bgüie' beṇə' güegon', na' goḻe' disipl che' ca': — Zdebəchgua naquən par to beṇə' gwni'a güe'e latjə nabia' Diozən' le'.

24 Na' besyə'əbanchgüei disipl che' ca' can' goḻe' lega'aque' che beṇə' gwni'anə', nach de'e yoblə goze'e Jeso'osən' lega'aque': —Xi'indaogua', de'e li šə to beṇə' zoe' lez gaquälēn yelə' gwni'a che'ena' le' zdebəchgua naquən par žjəyezoe' yoban' gan' zo Diozən' chnabi'e. 25 Zdebəchlə naquən che to beṇə' gwni'anə' güe'e latjə nabia' Diozən' le' cle ca to camey teb to lo'o nag yešə'.

26 Nach disipl che' ca' catə' gwse'ēnene' xtiže'ena' besyə'əbanchgüeine' na' gwse' ljuēžja'aque': —Notono gaquə yechoj xni'a de'e malən' šə ca'.

27 Jeso'osən' bosgüie' lega'aque' na' goze'e: —Benəchən' bito gaquə so'one' ca yesyə'əchoje' xni'a de'e malən', pero Diozən' guaquə yebeje' beṇə' xni'a de'e malən'. Diozən' chac chone' bitə'ətezə.

28 Nach Bedən' goḻe' Jeso'osən': —Xanto', neto' bagwlejiychjto' family cheto' ca' na' len yoguə'əlo' de'en deito' par chonjilažə'əto' le' na' chzenagto' chio'.

29 Nach goḻ Jeso'osən' lega'aque': —De'e li əchnia', šə nölē bagwlejiychjle' ližle, beṇə' bišə'əle, beṇə' zanle, xaxna'ale, xo'olle, xi'inle, o yežlyo chele chedə' chzenagle chia' na' chedə' chejle'ele che dižə' güen dižə' cobə' chia'anə',

30 Diozən' goṇe' le'e de'e zaquə'əche lao yežlyo nga clezə ca beṇə' ca' na' de'e ca' gwlejiychjlen'. Na' leczə gon Diozən' par nič əbanle zejlicane. Goṇe' le'e de'e ca' la'əṇə'əczə lao yežlyo nga de de'e zan de'e chi' saquə'əle. 31 Beṇə' zan zjənaquə beṇə' blaο na'a pero gwžin ža catə' cuich əsa'aque' beṇə' blaο. Na' beṇə' zan beṇə' cui zjənaquə beṇə' blaο na'a, pero gwžin ža catə' əsa'aque' beṇə' blaο.

De'e yoblə gosyixjue' Jeso'osən' de que gate'

32 Nach Jeso'osən' na' zan disipl che' ca' ja'aque' Jerosalennə'. Na' lao zjəngüe'e nezən' Jeso'osən' gwžialaogüe' laoga'aque'ena', na' besyə'əbanchgüei disipl che' ca' de'en šeje' Jerosalennə' gan' nitə' beṇə' ca' chse'ene so'ot le'. Na' do chesə'əžebze' jəsə'ənaogüe'ene'. Nach partlə gwlej Jeso'osən' disipl che' ca' šižin na' gwzolaogüe' be'elene' lega'aque' dižə' che de'e ca' gaquə' che'.

33 Na' goḻe' lega'aque': —Diozən' bsele'e nada' golja' beṇəch, na' na'a šejcho Jerosalennə' gan' gaca' lao na' beṇə' gwnabia' che bxož ca' na' lao na' beṇə' ca' choso'osed choso'olo'i lein'. Yesə'əchoglaogüe'en chia' de que cheyalə' gata', na' leczə so'one' nada' lao na' beṇə' ca' cui zjənaquə beṇə' Izrael. 34 Na' so'one' nada' borl na' soe' nada' golp na' yoso'oža' xene'e cho'alaogua'anə'. Nach so'ote' nada', pero yeyon ža yebana' ladjo beṇə' guat ca'.

Jacobən' na' Juannə' gosə'ənabe' yesə'əbi'e cuit Jeso'osən' gan' nabi'ena'

35 Nach xi'in Sebedeon' Jacobən' len Juannə' gosə'əbigue'e lao Jeso'osən'. Na' gwse'ene': —Xanto', zedənbeto' le' to goclen.

36 Nach Jeso'osən' goḻe' lega'aque': —ŽBi goclenṇə' chene'ele gona'?

37 Nach gwse'ene': —Chene'eto' gono' par nič cue'eto' cuito'onə' šla'a güeje catə'ən əžin ža nabi'o nasyon chechonə'.

38 Nach Jeso'osən' goḻe' lega'aque': —Bito chache'ile bi de'en chnabele nada'. ŽEguaquə saquə'əzi'ile can' saquə'əzi'anə'? ŽEgwzoile gaquə' chele can' gaquə' chia'anə'?

39 Nach bosyo'oži'e xtiže'ena' gwse'ene': —Gwzoito'.

Jeso'osən' goḻe' lega'aque': —De'e ličzə' chi' saquə'əle can' chi' saca'anə', na' de'e ličzə' gaquə' chele can' gaquə' chia'anə'. 40 Pero bito naquən par əṇia' nada'

non' cue' cuitan' catə'an əžin ža ŋabi'anə'. Xa' Diozən' bagwleje' beŋə' yesə'əbe' cuita'anə'.

⁴¹ Nach disipl ca' yeši, catə' gwse'enene' de'en gwse' Jacobən' na' Juannə' le', besə'əže'e lega'aque'. ⁴² Pero Jeso'osən' goxe' yogue'e par niçh gosə'əbigue'e laogü'e'enə', na' gože' lega'aque': —Nezele nitə' beŋə' gwnabia' na' beŋə' blaoc he to to nasyon, na' la fuers chesə'anabi'e beŋə' ca' nitə' xni'aga'aque'enə'.

⁴³ Pero caguə can' cheyalə' gonle. Šə no le'e chene'ele gacle beŋə' blaoc, cheyalə' əgwzəxjw yichjle na' gaquəlenle ljuəzjle. ⁴⁴ Na' šə no le'e chene'ele gaquəchle blaoc ca beŋə' ljuəzjle ca', caguə can' cheyalə' gonle sino que cheyalə' gon cuinle ca xmos beŋə' ca' yela'. ⁴⁵ Diozən' bsele'e nada' golja' beŋə'ach, na' caguə bida' par niçh beŋə'achən' əsa'aclene' nada', sino que bida' par gaquəlena' beŋə'achən', na' par əgwnežjo cuina' chixjua' xtolə' yoguə'əlole beŋə'achən' catə'an so'ote' nada'.

Jeso'osən' beyone' to beŋə' lçhol le Bartimeo

⁴⁶ Jeso'osən' len disipl che' ca' na' len beŋə' zan ca' jəsə'ənao Jeso'osən' besə'əžine' syoda Jericon'. Na' catə' besa'aque' syodan' to beŋə' lçhol le Bartimeo, xi'in to beŋə' le' Timeo, chi'e cho'a nezən' chŋabe' carida. ⁴⁷ Na' catə' bene Bartimeon' de que Jeso'osən' be'enə' naquə beŋə' Nasaretən' bazon əžine' gan' chi'enə', nach gwzəloao gwŋe' zizjo gwne': —Jeso'os, len' naco' xi'in dia che de'e Rei Dabin'. Beyašə'əlažə'əšgüei nada'.

⁴⁸ Beŋə' zan gosə'ədile' beŋə' lçholən' par niçh zoe' žizə, pero nachlə gwŋe' zizjochlə gwne': —Jeso'os, len' naco' xi'in dia che de'e Rei Dabin'. Beyašə'əlažə'əšgüei nada'.

⁴⁹ Nach Jeso'osən' gwleze' na' gože' beŋə' ca' zjəsə'ənao le': —Le'e gax be'enə'. Nach gwsa'axe' beŋə' lçholən' par bigue'e lao Jeso'osən', na' gwse'ene': —Bebei, gwzecha chedə' chaxe' le'.

⁵⁰ Nach beŋə' lçholən' bzalə' xadon che'enə' na' bxite'e bgüigue'e lao Jeso'osən'. ⁵¹ Jeso'osən' gože'ene': —žBin' che'endo' gona' len le'?

Nach beŋə' lçholən' gože' Jeso'osən': —Xana', benšga par niçh ye'le'ida'.

⁵² Jeso'osən' gože'ene': —Guaquə yeyejo'. De'en chonlilažə'o nada' baçh goc can' che'endo'onə'.

Na' le'e bele'itei be'enə' na' gwnaogüe' Jeso'osən' lao zja'aque' Jerosalennə'.

11

Gwso'əlaogüe'e Jeso'osən' catə' beyo'e Jerosalennə'

¹ Jeso'osən' len disipl che' ca' na' len beŋə' ca' zjəsə'ənao lega'aque' besə'əžine' galə'əzə Jerosalennə'. Na' galə'əzə Jerosalennə' zjəchi' çhopə yež, ton Betfage na' yeton Betania. Zjəchi'in frent to ya'a de'en nzi' Ya'a Olibos. Nach Jeso'osən' gwleje' çhopə disipl che' ca'. ² Na' gože' lega'aque': —Le'e žja'ac yež dao' de'en chi' delant, na' catə' šo'ole lao' yežən', le'ile to borrr dao' bia cui nonə' cuia da'ab yag. Na' əsežleb na' əche'eleb ŋgalə. ³ Na' šə no ŋabe le'e bixchen' chsežleb, na' ye'elene' de que nada' Xanle chyažjda'ab, na' de que lğüegwzə žjəyesana'ab.

⁴ Nach beŋə' ca' bselə' Jeso'osən' gwsa'aque' zja'aque' na' lao zja'aque'enə' besə'əle'ine'eb da'ab yag cuit puert che to yo'o de'en zo cho'a nezən'. Nach bosə'oseže'eb. ⁵ Na' nitə' bałə beŋə' na' gwse'e disipl ca': —žBin' chonle? žBixchen' chsežle borrr da'onə'?

⁶ Nach disipl ca' gwse'e beŋə' ca' can' gož Jeso'osən' lega'aque' yesə'əne', nach gwso'e latjə bosə'oseže'eb. ⁷ Nach gosə'əche'eb lao Jeso'osən', na' bosə'oxəo xadon çhega'aquen' cožə'əbən', nach gwžia Jeso'osən' leeb. ⁸ Na' lao nez gan'

zde'enə' beṇə' zan gwso'elaogüe'ene' na' bosə'ošiljue' xaga'aque'enə' gan' zde' žie' borrən' na' yebalə' gosə'əchogue' xozə' yag de'en ze tcho'a nezən', na' bosə'anite'en lao nezən'.

⁹ Na' beṇə' zan gosə'əbialao lao Jeso'osən' na' leczə beṇə' zan jəsə'ənao le'. Nach yogue'e gosə'əgüe'e be' lban che' gosə'əne': —Sošgo' mbalaz le' za'o nga, babselə' Xancho Diozən' le'. Goclenšga neto'. ¹⁰ Catec mba gaquə checho de'en baza' ben' ṇabia' chio'o can' gwnabia' de'e Rei Dabin' cana'. Lenczə le'e nitə'əle gan' zo Diozən' ledoye'ela'oche'.

¹¹ Ca' goquə bežin Jeso'osən' Jerosalennə', na' leczə catə'an gwyo'e yo'odao' əblaonə'. Na' beyož bgüie' yoguə' de'en chac lo'o yo'odao' əblaonə' besa'aque' len disipl che' ca' šižin na' ja'aque' Betanian', chedə' bagol'.

Ben Jeso'osən' par ničh bgüiž yag yixgüion'

¹² Ža beteyo catə' besa'aque' Betanian' par jəsyə'aque' Jerosalennə' de'e yoblə, gwdon Jeso'osən'. ¹³ Na' zitə'ələ ble'ine' to yag yixgüio žia xlague'e. Na' gwyoje' jəgüie' šə žian yixgüion', pero bitobi bželen', con zlega xlague'e žia, chedə' ca orən' bito naquə tyemp chei. ¹⁴ Nach Jeso'osən' gože' yag yixgüion': —Caneque cuich bi frot cuio'.

Na' gwse'encze disipl che' ca' can' gwne'enə'.

Jeso'osən' bebeje' beṇə' ca' chso'on ya'a chyo'o yo'odao' əblao che beṇə' Izrael ca'

¹⁵ Gwde na' besə'əžine' Jerosalennə' na' catə' gwyo'o Jeso'osən' chyo'o yo'odao' əblaonə' gwzolaogüe' bebeje' yoguə'əlol beṇə' ca' chso'on ya'a chyo'onə'. Nach gwlo'oni'ane'e mes che beṇə' ca' choso'oša' mech, na' leczə ca' bene' len yag siy che beṇə' ca' əgwso'otə' ngolbexə. ¹⁶ Na' Jeso'osən' bito be'e latjə par yesə'əde notə'əteza beṇə' chyo'o yo'odao' əblaonə' šə zjənoe' yoa'. ¹⁷ Nach bzejni'ine' lega'aque', gože': —Nyojczə Xtizə' Diozən' gan' nan: “Che'enda' yesə'əna beṇə' de que liža'an naquən to latjə gan' so'on beṇə' orasyon beṇə' ža' yoguə' ṇasyon ca'.” Pero na' le'e babenlen ca to latjə gan' ža' beṇə' bguan.

¹⁸ Na' beṇə' gwnabia' che bžox ca' na' leczə beṇə' ca' choso'osed choso'olo'i lei de'en bzoj de'e Moizezən' gwse'enene' can' be' Jeso'osən' dižə'anə' na' besyə'əyiljlaže'e naclə so'one' par əso'ote'ene'. Besə'əžebe' cuich yoso'ozenag beṇə' chega'aque' chedə' yoguə'əte beṇə' bosə'ozenague' xtizə'ena' na' besyə'əbanene' ca güennə' bzejni'ine' lega'aque'. ¹⁹ Na' catə' bazon gal' Jeso'osən' len disipl che' ca' besa'aque' syodan' na' jəsyə'əga'ane' Betanian'.

Bgüiž yag yixgüion'

²⁰ Žil beteyo besa'aque' Betanian' par jəya'aque' Jerosalennə' besyə'ədie' gan' zo yag yixgüion' de'en əgwṇablažə' Jeso'osən' əbiž. Na' besə'əle'i disipl che' ca' babgüiž do loi. ²¹ Nach Bedən' jsa'alazaže'e can' goquən' na' gože' Jeso'osən': —Xana', bgüiašč yag yixgüion' de'en əgwṇablažo'o əbiž neje babgüižən.

²² Jeso'osən' gože'ene': —Le'e gonlilažə' Diozən' na' gaquə can' əṇabelene'.

²³ De'e li əchnia' le'e, šə do yichj do lažə'əle chonlilažə'əle Diozən' guaquə ye'ele ya'a nga: “Boša' xišna'onə' na' jəyezo' lo'o nisdə'onə'”, na' gaquə can' chonle mendadən' de'en chejle'ele sin cui chac chop lažə'əle. ²⁴ De'e na'anə' chnia' le'e de que bitə'əteza de'en chṇablen Diozən' catə'an chonle orasyonə', šə chejle'ele de que gone' can' chṇabelene'ena' na' guaquəczən'. ²⁵ Na' catə' solao gonle orasyonə', šə yosa'alazažə'əle bi de'en baben to beṇə' contr le'e, leyezi'ixen che', par ničh leczə Xacho Diozən' ben' zo yoban' yezi'ixene' xtolə'əlen'. ²⁶ Pero šə

le'e bito chezi'ixenle che sa'aljuežj benachlen' leczə ca' Xacho Diozən' ben' zo yoban' bito yezi'ixene' xtolə'əlenə'.

Yelə' gwnabia' che Jeso'osən'

²⁷ Na' besyə'əžine' Jerosalennə' de'e yoblə. Na' catə' balažə' Jeso'osən' chy'o' yo'odao' əblaonə', ben' naquəch bəxoz əblaoch na' benə' ca' choso'osed choso'olo'i lein', na' len benə' golə blao che neto' benə' Izrael gosə'əbigue'e lao Jeso'osən'. ²⁸ Na' gwse'ene': —čNac goquən' gwxi'o yelə' gwnabi'anə', na' non' ben' le' yelə' gwnabia'anə' par gono' de'e ca' chono'?

²⁹ Jeso'osən' boži'e xtižə'əga'aque' enə' gože': —Leczə de to de'e nabda' le'e. Šə gwnale nada' de'en nabda' le'e nach ənia' le'e non' ben' nada' yelə' gwnabia' par gona' de'e ca' chona'. ³⁰ Leṇəšč nada': čnon' bselə' de'e Juannə' bide' bchoe' benə' nis? čEdioz nan' bsele'ene' o šə benə' yoblən'?

³¹ Nach bosoxi'e entr lega'aque' gosə'əne': —Šə ye'echone' de que Dioz nan' bsele' de'e Juannə' par bchoe' benə' nis, na' ye'e chio'o: “čBixčhexan' bito gwyejle'ele che'?” ³² Na' nic gac ye'echone' de que benə' yoblən' əbselə' de'e Juannə'.

Gosə'əne' ca' čhedə' besə'əžebe' bi so'on benə' ca' zjənžaguan', la' yogue'e gwse'ejle'e de que de'e liczə Diozən' bsele'e de'e Juannə' par be'e xtiže'enə'.

³³ De'e na'anə' gwse'e Jeso'osən': —Bito nezetə' non' bselə' de'e Juannə'.

Nach gož Jeso'osən' lega'aque': —Leczə ca' nada' bito ənia' non' ben' nada' yelə' gwnabia'anə' par gona' de'e ca' chona'.

12

Jempl che mos mal ca'

¹ Nach Jeso'osən' gwzolo be'e jempl nga bzejni'ine' lega'aque' de que notə'atezə benə' šə chso'onczə yichjlaoga'aque' cui choso'ozenague' che' yesə'əbi'ayi'e. Na' gwne': —To benə' goze' zan yag obasən' yežlyo che'enə'. Na' bwlo'e le'ej doxenən. Na' na'atezə bene' to tanc gan' bosoxi'e obasən' par bchoj xisein'. Na' leczə bene' to campnary gan' yesə'əcua'a benə' əsa'ape' güertən'. Nach bene' güertən' lao na' benə' par bosə'əgüia bosoxi'e'en, na' gwde na' gwze'e gwyeje' zitə'. ² Catə' bžin tyemp par yosyo'otobe' cwsešən', bsele'e to mos che' par žjəyexi'e to tlaw cwsešən' de'en cheyałə' yezi'e. ³ Pero na' benə' ca' chsa'apə yag obas che'enə' bosoxi'e' mosən', na' gosə'əyine'ene' nach bosyo'ose'ene' sin cui bi bi bosyo'onežjue'ene'. ⁴ Nach xan yag obasən' bsele'e yeto mosən', na' benə' ca' bosoxi'e'ene' yej, na' gwso'one' güe' yichje'enə' na' bosoxi'e' bosoxi'e'ene'. ⁵ Nach bosselə' xan yag obasən' yeto mosən', na' benə' ca' chsa'apə yag obasən' gwso'ote' le'. Na' gwdechlə xan yag obasən' bossele'e mos zanch na' benə' ca' chsa'apə yag obasən' gosə'əyine' bale' na' yebale' gwso'ote'.

⁶ Na' zo xi'in' tlišə' xan yag obasən', na' chacchgüeine' che'. Nach le'ezeleagüe bsele'e le'. Lo'o yichjla'azdaogüe'enə' goquene': “Gwsa'apəlje' xi'inan' respet yosyo'onežjue'ebə' cwsešən'.” ⁷ Pero na' benə' ca' chsa'apə güertən' catə' besə'əle'ine' xi'inə'enə' nach gwse' ljuežjga'aque': “Bengan' xi'in' xan yag obasən', na' le'enə' yega'an' len biennə'. Leda gotchone' par nich yega'an'lencho bien che xe'enə'.” ⁸ Nach bosoxi'e'ene', gwso'ote'ene', na' besyə'əbeje' cuerp che'enə' fuerlə güertən'.

⁹ Beyož be' Jeso'osən' jempl nga, gože' benə' ca' ža'anə': —čNac chactgüeile gon xan güertən' len benə' ca'? Žjəyənitleagüe' lega'aque', na' yegüe'e yaguan' lao na' benə' yoblə.

10 ζEcabiṇə' šejni'ile bi zejen de'en nyoj Xtizə' Diozən' gan' nan:
Yej de'en cui gwso'olažə' mues güen yo'o ca', lenṇə' banaquən yej squin.

11 Xancho Diozən' babzoe' yejən' gan' cheyalə' son na' de'e zaquə' yebanecho can' bene'ena'.

12 Nach beṇə' fariseo ca' na' beṇə' ca' choso'osed choso'olo'i lein' len beṇə' golə blao ca' gwse'ene' yešə'əzene' Jeso'osən' cheda' gwse'ejni'ine' de que Jeso'osən' be'e jempl nga contr lega'aque' por ni che de'en cui chse'ejle'e che'. Pero bito bi gwso'one' cheda' besə'əžebe' bi so'on beṇə' ca' ža'ana'. De'e na'ana' con besa'aque' gan' zo' Jeso'osən'.

Gosə'əṇabene' Jeso'osən' šə yešə'əyixjue' impuest che gobiernən'

13 Na' gwde de'e ca' bososele'e balə beṇə' fariseo ca' len yebalə beṇə' ca' chso'on t xen len Erodən' lao Jeso'osən' par yešə'əbe'enaogüe' əchoj dižə' cho'ena' de'en yešə'əchine' par əsa'ogüe' xya contr le' lao beṇə' gwnabia' che gobiernən'. 14 Nach catə' besə'əžin beṇə' can' lao Jeso'osən' na' gwse'ene': —Maestr, nezetə' de que cho'o dižə' li na' bito chžebo' bin' yešə'əna beṇə' yoblə, cheda' bito chono' cuent che beṇə' šə naque' blao o šə bito naque'. Nezetə' can' chsed chlo'ido' beṇə' de'en chene'e Diozən' goncho naquən dižə' li. De'e na'ana' zedenəbeto' le' par əṇao' neto' naquən cheyalə' gonto'. ζEnaquən güen chixjwto' impuest che gobiern roman' o šə bito cheyalə' chixjwto'on?

15 Jeso'osən' le'e gober'iteine' caguə do lažə'əga'aque'ena'. Con chse'ene' ye'e lega'aque' to de'e yešə'əchine' contr le'. Nach gože' lega'aque': —ζBixchen' chene'ele cuejle nada' dižə' de'e əgwčhinle contr nada'? Le'e gwlo'i nada' to xmechlen'.

16 Nach bososele'ine' le' ton na' catə' ble'i Jeso'osən' len gože' lega'aque': —ζNo diboj cheina' da' laogüennə', na' no lein' nyoj laogüennə'?

Nach gwse'ene': —Che Rei Sesar na'ana'.

17 Jeso'osən' gože' lega'aque': —Le'e əgwnežjo Sesarən' de'en naquə che' ža, na' le'e gwnežjo Diozən' de'en cheyalə' əgwnežjwlene'.

Nach beṇə' ca' catə' gwse'ene' xtižə' Jeso'osən' besyə'əbanene' can' gože' lega'aque'.

Gosə'əṇabe' naquən' yesyə'əban beṇə' guat ca'

18 Na' leczə besə'əžin balə beṇə' sadoseo ca' lao Jeso'osən'. Na' beṇə' sadoseo ca' choso'osed choso'olo'ine' de que bito yesyə'əban beṇə' guat ca'. Nach gosə'əṇabene' Jeso'osən' gwse'ene': 19 —Maestr, de'e Moizežən' bzoje' de que šə to beṇə' byo beṇə' nšagna' gate' na' yega'an' no'ol che'ena' sin cui no xi'ine' gwzo, beṇə' bišə' be'ena' bagotən' cheyalə' yeque'e no'olanə' par nič nitə' xi'in dia che de'e beṇə' bišə'ena'. 20 Na' goquən' gwnitə' gažə bišə'əga'aque', na' beṇə' nechən' bšagne'e na' catə' gote' notono xi'ine' gwzo. 21 Na' beṇə' bišə'e əgwchopen' beque'e no'olan', na' leczə got beṇə' əgwchopen' na' notono xi'ine' gwzo. Nach le'egatezə ca' goquə len beṇə' bišə'e əgwyonen'. 22 Nach leczə ca' goquə len bišə'əga'aque' ca' yelə' xte besyə'əyatega'aque' besyə'əque'e no'olan' na' besyə'əyatega'aque' gwsa'at na' notoczə no xi'inga'aque' gwnitə'. Na' gwde gwsa'at beṇə' ca' leczə got no'olan'. 23 Na' catə' yesyə'əban beṇə' guat ca', žnoe' entr beṇə' ca' gažə gaquə be'en che no'olan'? La' yogue'en bosyo'ošagna'alene' le'.

24 Na' Jeso'osən' gože' lega'aque': —Bito chonle xbab šao', la' bito nezele naquən' nyoj Xtizə' Diozən', na' nic nezele naquən' naquə yelə' guac che Diozən'. 25 Cata'ən yesyə'əban beṇə' guat ca' bito gachia' šə zoso'ošagne'e o šə cui. Na' cana' caguə no yosyo'ošagna'ach. Lebze əsa'aque' len angl che Diozən'

benə' ca' nitə' yoban'. ²⁶ Na' ca naquən' chaquele bito yesyə'aban benə' guat ca', çabito za'alazə'əle can' nyoj Xtizə' Diozən' de'en bzoj de'e Moizezən' can' gož Diozən' le'. Moizezən' ble'ine' to yi' bəl de'e chdoljən to lo'o xis yešə'. Na' gož Diozən' de'e Moizezən': "Nada' naca' Dioz che de'e xaxta'ole Abraanna', na' Dioz che de'e xaxta'ole Isaaquən', na' Dioz che de'e xaxta'ole Jacobən'." ²⁷ Na' nezecho benə' ca' nite'e len Diozən' chedə' Diozən' bito naque' Dioz che benə' guat, sino naque' Dioz che benə' ca' zjəmban. De'e na'anə' lechgualə clelən' chejni'ile na' chsed chlo'ile Xtizə' Diozən' clelə.

De'en naquə de'e blaoch de'en non Diozən' mendad goncho

²⁸ Nach bžin to benə' chsed chlo'i lei de'en bzoj de'e Moizezən' lao Jeso'osən', chedə' benene' rson can' gwsa'acyožə benə' ca' Jeso'osən' na' gwnezene' de que binlo boži' Jeso'osən' xtižə'aga'aque'ena'. Nach gože' Jeso'osən': —Maestr, lao lei che Diozən' žnon' de'en none' mendad goncho naquən de'e blaoch?

²⁹ Jeso'osən' gože'ene': —De'en naquə de'e žialaoch lao de'e ca' none' mendad goncho nan: "Le'e gwzenag le'e benə' Izrael. Tozə Xancho Diozən' zaque'e par güe'ela'och. ³⁰ De'e na'anə' cheyalə' gaguecho che Xancho Diozən' do yichj do lažə'əcho, do fuers balor checho", lenə' naquən de'e žialaoch. ³¹ Na' de'e əgwchopen' lebze nan len de'e nechən': "Cheyalə' gaguecho che sa'aljuežjcho catg chaquecho che cuincho." Bito bi de'e len non Diozən' mendad goncho de'en naquəch de'e žialaoch ca de'e ca' çopə.

³² Nach be'enə' chsed chlo'i lein' gože' Jeso'osən': —De'e güen can' nao' maestr. Naquən de'e li can' nao'onə' de que tozə Diozən' zo be'enə' zaquə' par güe'ela'och. ³³ Na' cheyalə' gaguecho che Diozən' do yichj do lažə'əcho do fuers balor checho. Na' lecə cheyalə' gaguecho che sa'aljuežj benachcho catg chaquecho che cuincho. Na' de'e li zaquə'əchan goncho can' na de'e ca' non Diozən' mendad goncho cle ca gotčo bia yixə' na' gwzeychob par güe'ela'ochone'. Zaquə'əchan cle ca' bitə'ətezəchlə de'e chnežjwcho Diozən' cho'ela'ochone'.

³⁴ Jeso'osən' goche'ine' boži'i be'enə' xtiže'en len dižə' sin', nach gož Jeso'osən' le': —Bazon go'o latjə nabia' Diozən' le'.

Na' dezd ža na' bitoch no besyə'əyaxje bi de'e yesə'ənbene' Jeso'osən'.

Cristən' naque' xi'in dia che de'e Rei Dabin'

³⁵ Na' lao ne'e chsed chlo'i Jeso'osən' benə' ca' ža' lo'o yo'oda'onə', gože' lega'aque': —žBixchen' chesə'əna benə' ca' choso'osed choso'olo'i lein' de que Cristən' naque' xi'in dia che de'e Rei Dabin'? ³⁶ Cuin de'e Dabin' bzoje' can' blo'i Spirit che Diozən' le' gan' nan:

Xancho Diozən' gože' Xana'an:

"Gwche'edo' cuita' nga nabi'acho txen,

na' gona' par niç nitə' de'e ca' chso'on contr le' na' benə' contr çhio' ca' xni'onə'."

³⁷ Na' de'en gwna de'e Dabin' de que Cristən' naque' Xane', çəcabi zejen de que Cristən' naque' mazəchlə ca xi'in dia che' na'azən' ža?

Nach benə' zan ca' besyə'əbeine' boso'ozenague' che'.

Xtolə' benə' ca' choso'osed choso'olo'i lein'

³⁸ Na' Jeso'osən' lao bzejni'ine' benə' ca' gože' lega'aque': —Le'e gon xbab niç cui gonle can' chso'on benə' ca' choso'osed choso'olo'i lei de'en bzoj de'e Moizezan'. Lega'aque' chesyə'əbeine' chəsə'əlaže'e zjənyaze' lachə' tonə' na' chesyə'əbeine' catə' benə' chəsə'əguape' lega'aque' diox na' chəsə'ənope'e na'aga'aque'ene' do lao lquey. ³⁹ Lega'aque' chse'enene' yesə'əbi'e gan' chəsə'əbe' benə' blao catə' çhja'aque' yo'odao' na' catə' chac lni. ⁴⁰ Na'

choso'oxoayague' no'olə gozeb ca' par niçh no'ol ca' chəsə'ənežjue' lega'aque' ližga'aque'en len bichlə de'en de çhega'aque'. Na' catə' chso'one' orasy-onnə' chso'echgüe' dižə' par niçh chəsə'əxoayague' beñə'. Mazəchlə castigw çhega'aque' əgwnežjo Diozən' clezə ca çhe beñə' yeziqə'əchlə çhedə' chso'one' de'e mal ca' zjənac ca' len zjəneze' can' na lein'.

To no'olə gozebə be'e Diozən' xmeche'ena'

⁴¹ Na' goquən' to žlas catə' chi' Jeso'osən' lo'o yo'odao' əblaonə' gan' nitə' caj ca' gan' chgo'o xmech neto' beñə' Izrael par yo'odao' əblaonə'. Na' ble'ine' beñə' ca' catə' gosə'əgüe'e xmechga'aque'ena' lo'ina', na' leczə ble'ine' beñə' gwni'a ca' de'e scha'o mechən' gosə'əgüe'e. ⁴² Na' lao chgüie' beñə' ca', bžin to no'olə gozebə no'olə yašə' na' gwlo'e çhopə sentab dao' che'ena' lo'o cajən'. ⁴³ Nach Jeso'osən' goxe' disipl çhe' ca' na' gože' lega'aque': —De'e li əchnia' le'e, no'olə gozebən' naque' beñə' yašə', pero bagwlo'e de'e zaquə'əch lao Diozən' ca yoguə' beñə' ca' yelə'. ⁴⁴ Lega'aque' gosə'əgo'o xmechga'aque' de'e checho'onən' lao yelə' gwni'a çhega'aque'ena', pero no'olə nga lao yelə' yašə' yelə' zi' çhe'ena' bagwlo'e yoguə' ca ga de'e dao' de çhe'.

13

Jeso'osən' gwne' de que gwžin ža yosyo'ochinjje' yo'odao' əblaonə'

¹ Na' catə' beza' Jeso'osən' yo'odao' əblaonə', to disipl çhe'ena' gože'ene': —Xanto', bgüiašc catg xoche zjənone' yo'odao' əblao nga, na' catg xoche yej quinga zjənonene'en.

² Nach gož Jeso'osən' be'ena': —Chgüiale catec xoche naquə yoguə' de'e ca'. Pero ca naquə de'en chle'ile nga na'a, gwžin ža yosyo'ochinj beñə' doxenən na' notoch no le'i lega'aquən.

De'en gaquə catə'an bazon baozə šo'o fin çhe yežlyon'

³ Na' ja'aque' ya'a Olibosən' de'en zo yešlā'alə bdiñjən' ze frent yo'odao' əblaonə'. Na' catə' besə'əžine' lao ya'anə' gwche' Jeso'osən'. Nach Bedən', Jacoban', Juannə' len Ndresən' gosə'əbigue'e lao Jeso'osən' na' bgašə'əzə gwse'ene': ⁴ —Chene'eto' ənezeto' do batə'əquən' gaquə de'e nga nao' nga. Na' žnac gaquə gacbe'ito' cata' bazon baozə gaquə can' na'onə'?

⁵ Jeso'osən' gože' lega'aque': —Le'e gapə cuidad par niçh notono əxoayag le'e. ⁶ Gwžin ža catə' zan beñə' goxoayag ša' lao yežlyo nga yesə'əne' de que zjənaque' Cristən' ben' gwlej Diozən' par gaquəlene' le'e. Na' beñə' zan yesə'əxoayague'.

⁷ Pero na' le'e bito žeble catə' yenele dižə' de que chac gwdilə, o de que guaquə gwdilə, çhedə' can' cheyalə' gaquə. Na' la'ana'əczə šə bachac ca' bitonə' əžin ža par šo'o fin çhe yežlyon'. ⁸ Ze'e əžin žan' yesy'ədilə yež contr yež, na' nasyon contr nasyon. Na' leczə zan yež de'e zjəchi' doxenlə yežlyon' xo'ochgua, na' gaquə bgüin na' gaquə bichlə de'en yesə'əzaquə'əzi'e. Na' te gaquə de'e quinga ne'e za'aquəchczə de'en yesə'əžaglao beñə' ža' yežlyon'.

⁹ Na' ca naquə le'e ža, cheyalə' ənezele de que beñə' contr çhelen' so'one' le'e lao na' beñə' gwnabia' ca', na' yesə'əyine' le'e lo'o yo'odao' çhega'aque' ca'. Yesə'əche'əxaxje' le'e do lao gobernador ca' na' do lao rei par əsa'ogüe' xya contr le'e de'en chonjilažə'əle nada'. Can' gaquə güe'ele xtiž'anə' lao beñə' gwnabia' ca'. ¹⁰ Na' leczə ze'e əžin žan' šo'o fin çhe yežlyon', žja'ac beñə' doxen lao yežlyon' yesə'əyixjui'e dižə' güen dižə' cobə de'en chzejni'in çhia' len beñə' ca' ža' yoguə' nasyon. ¹¹ Na' catə' no yesə'əche'əxaxj le'e lao beñə' gwnabia' ca' bito cue' yichjle nac yoži'ile xtižə'əga'aque'ena'. Lao or na' Spirit çhe Diozən'

əgwzejni'in le'e bin' ye'ega'aclene'. De'e na'anə' le'e ye'ega'aclene' con can' əgwzejni'i Spiritən' le'e, chedə' caguə le'enə' güe'ele xtiž'a'anə' sino que Spirit na'anə' güe'en len. ¹²⁻¹³Yogua' beñə' cui zjənombia' Diozən' yesə'əgue'ine' le'e chedə' chonlilažə'əle nada'. Na' xte no bišə'əle na' no xale so'one' le'e lao na' beñə' par niç so'ot le'e na' leccə xte no xi'inle so'one' le'e lao na' beñə' ca' so'ot le'e. Pero šə soteza sole gonlilažə'əle nada' xte catə'əchən' əžin ža gatle, nachən' žjəyezole len Diozən'.

¹⁴ Bablabczle can' bzoj de'e profet Danielən' ben' be' xtižə' Diozən' cana'. Na' de'en bzoje' nan de que beñə' mal ca' so'one' de'en naquə de'e zban juisy de'en chgue'i Diozən' lo'o yo'oda' əblao che chio'o beñə' Izrael na' yo'oda'onə' bitoch gonən žin. Na' catə' le'ile gaquə de'e quinga, cana' le'e nitə'əle Jodean' cheyalə' əgwxonjle na' žja'acle do ya'ada'ote. (Le'e chlable de'e nga le'e šejni'in.) ¹⁵ Na' šə zo to beñə' chone' dezcanz lao sotea che liže'enə' catə' gaquə de'e ca' bagwnia' gaquə, bito galə' yotobe' šinlaze' ca' ža' liže'enə', con cuejyichje'en. ¹⁶ Leccə ca' beñə' zda do yoba bito galə' yebi'e par žjəyexi'e xadoŋ che'enə' liže'enə'. ¹⁷ Na' ca tyempən', lechgualə zdebə gaquən len no'ol ca' zjənoa' bdao', na' no'ol ca' chesə'əguazə' bdao'. ¹⁸ Le'e gon orasyon par niç cui cheyalə' əgwxonjle tyemp catə' chi' de'e zag. ¹⁹ Catə' gaquə de'e ca' lechgualə čhi' saquə' beñə' Izrael ca' ža'anə'. Na' dezd catə'an gwxe yežlyon' xte ža neža bito ənacho bagwdi' bagwxaquə' beñə' can' čhi' saquə' beñə' Izrael ca', na' bito əžinlaže'e gaquə ca' len beñəchən' de'e yoblə. ²⁰ Žalə' nžia Diozən' bia' yesə'əzaglaogüe' šša ni yeto beñə' cuich zjəmban catə'an yeyož yesə'əzaglaogüe'enə' žalə' ca'. Pero por ni che de'en chaque Diozən' che beñə' ca' chso'onlilažə' le', beñə' ca' bagwleje' par zjənaque' xi'inə', de'e na'anə' cui güe'e latja yesə'əzaglaogüe' šša. ²¹ Na' ža, šə no əye'e le'e: "Bgüiašc nga zo Cristən' ben' əbsele' Diozən' par gaquale' chio'o", o šə ye'e le'e: "Na'alə zoe'", bito šejle'ele che'. ²² Zan beñə' goxoayag ša' lao yežlyo nga əse'e le'e de que zjənaque' Cristən' o de que chso'e xtižə' Diozən'. Na' so'one' miłagr na' so'one' de'e naquə yelə' goban, par niç yesə'əxoayague' beñə' ca' bagwlej Diozən' par əsa'aque' xi'inə' pero bito gaquə yesə'əxoayague' lega'aque'. ²³ Baņezele can' gaquə, la' bagwdixjue'ida' le'e che de'e ca' ze'e gaquə. De'e na'anə' le'e so probnid par niç cui xoayagle.

Can' gaquə catə' yida' Jesocristən' de'e yoblə

²⁴ Pero na' lao ža ca' cate yeyož čhi' saquə' beñəchən', bgüižən' bitoch əgwse'eni'in na' leccə ca' bio'one'. ²⁵ Na' beljw ca' zjəžia le'e yoban' yesə'əxopən, chedə' Diozən' əgws'i'inse' yogua' de'e ca'. ²⁶ Na' cana'ach beñə' ca' ža' yežlyon' yesə'əle'ine' nada' yida' de'e yoblə to lo'o bejw, nadan' naca' ben' bsele' Diozən' golja' beñəch. Yida' nsa'a yelə' guac xen čhia'anə' na' yelə' chey che'eni' čhia'anə'. ²⁷ Na' əsela'a angl čhia' ca' doxenlə yežlyon' par yosyo'otobe' beñə' ca' bagwlej Diozən' par zjənaque' xi'inə' gatə'ətezə zjənasəlasə'.

²⁸ Nezele can' chac do nga len yag yixgüion'. Catə' bachezolao chebia xlague'e, chache'ile de que bach zon yelə' yejon'. ²⁹ Na' leccə can' catə'an le'ile gaquə de'e mal ca' bagwnia' gaquə, cana'ach əņezele de que bazon əžin ža šo'o fin che yežlyon'. ³⁰ De'e li əchnia' le'e, bitonə' gat le'e nitə'əle tyemp nga na'a catə' solao gaquə yogua'əlo' de'e ca'. ³¹ Ca naquə de'e ca' chle'icho le'e yoban' na' yežlyon' yesə'əde čhei, pero ca naquə xtižə'anə' caguə de'e te cui gaquə can' nannə'.

³² Pero na' ca naquə bi ža bi orən' šo'o fin che yežlyon' notono no neze, ni que zjəneze angl ca' nitə' yoban', na' ni que nežda' nada' naca' Xi'in Diozən'. Toza Xa' Dioz nan' neze.

³³ De'e na'anə' le'e so probnid, le'e gac ca beṇə' nchoj bišgal chei na' le'e gon orasyonnə' chedə' bito nezele batən' yida' de'e yoblə. ³⁴ Na' de'en cuezle batən' yida' de'e yoblə gwxaquə'əleben can' chac che to beṇə' chej zita'. Antslə ze'e se'e liže'enə', che'e xmose' ca' bi de'en so'on to toe' na' leczə ca' che'e ben' chapə puertən' gape'en do tyempte par nič ca' chapəcze'en catə'an yežine'. ³⁵ Ca'aczan' naquən len le'e, le'e so probnid chedə' bito nezele batən' yida' de'e yoblə, nadan' gwxaquə'əlebeda' ca xan yo'ona'. Bito nezele šə yida' do bagol o šə do chel o do šbal xen o šə do che'eni'. ³⁶ Le'e so ca beṇə' nchoj bišgal chei, nič sole probnid na' cui senyala' le'e catə'an yida' de'e yoblə. ³⁷ Na' de'e ca' bagwnia' le'e taple leczə əchnia'an par yoguə beṇə' chso'onliža' nada'. Leso probnid par catə'an yida' de'e yoblə.

14

Boso'oxi'e can' so'one' yesə'əzene' Jeso'osən'

¹ Na' goquən' ne'e chac falt yečopə ža par gałə lni pascw che neto' beṇə' Izrael Jerosalennə' catə'an chaoto' yetxtil de'en cui bi xne'i nchiṅə. Na' beṇə' ca' chəsə'anabia' bəox ca' na' len beṇə' ca' choso'osed choso'olo'i lei de'en bzoj de'e Moizezan' besya'əyilje' naclə so'one' par yesə'əzene' Jeso'osən' bgašə'əzə na' so'ote'ene'. ² Na' gosə'əne': —Bito gotchone' lao lniṇə' par nič cui yesə'ədopə beṇə' ca' banitə' lao' syodan' na' yesə'ədiləlene' chio'o.

To no'olə bcuase' set zix'yichj Jeso'osən'

³ Na' goquən' zo Jeso'osən' Betanian' liž to beṇə' le Simon be'enə' güe'i yižgüe' de'en nzi' lepr. Na' lao chi' Jeso'osən' cho'a mesən' chaogüe', bžin to no'olə noxe'e to lmet de' yej fin de'e yožə to clas set de'e nzi' nardo. Na' setən' lechgualə zix' chla'an na' lechgualə le'eya' zaquə'an. Na' no'olan' gwle'e lmetən' gan' yožə setən' na' bcuase'en yichj Jeso'osən'. ⁴ Nach balə beṇə' ca' nitə' len Jeso'osən' liž Simonə' besə'əže'e na' gwse' ljuežjga'aque': —čBixčhen' con benditjeine' setən' noxe'ena'? ⁵ Güenčlə žalə' bete'en la' mazlə tmlil gueya' gueyoa le'ine' chei žalə' ca', na' mech de'en le'ine' chei əgwnežjue'en beṇə' yašə' par gaquəlene' lega'aque'.

Na' gosə'ədile' no'olan'.

⁶ Nach Jeso'osən' gože': —Ljoye'ena'. čBixčhen' chdillene'? Güenčguan' babene' len nada'. ⁷ Ca naquə beṇə' yašə' ca' syempr nitə'əcze' len le'e, na' guaquə gaquəlenga'aclene' batə'ətezə chene'ele. Pero ca naca' nada' yešložgan' soa' len le'e. ⁸ De'en bcuasə' no'olan' setən' yichja'anə' na' bežonən' lao cuerp chia'anə' bene' de'en non gone' len nada' žan' yoso'ocuaše'e nada', can' chonle cheyble set zixən' cuerp che beṇə' guatan'. ⁹ De'e li achnia' le'e gata'ətezə chixjue'ile dižə' güen dižə' cobə de'en chzejni'in chia'anə' leczə chixjue'ile can' ben no'olə nga len nada'. Na' šanch beṇə' əso'e dižə' ca güennə' bene'.

Jod Iscariotən' bene' Jeso'osən' lao na' beṇə' contr ca'

¹⁰ Gwde de'e ca' Jod Iscariotən' ben' goquə txen len disipl ca' šižin, gwyeje' lao beṇə' ca' chəsə'anabia' bəox che neto' beṇə' Izrael par gože' lega'aque' de que əgdwie' Jeso'osən' lao na'aga'aque'ena'. ¹¹ Na' beṇə' ca' catə' gwse'ene'ne' xtizə' Jodən' lechgualə besya'əbeine'. Na' gwso'one' lyebe yosə'ənežjue'ene' mech. Nach Jodən' gwzolao gwche'enaogüe' batə'əquən' so latjə gone' Jeso'osən' lao na'aga'aque'ena'.

Lao gwsa'ogüe' xše' Jeso'osən' blo'ine' lega'aque' can' so'one' par žjesya'əzalaže'e bi zežen ca de'en gate'

12 Na' ža nech che lni pascon' catə'an chsa'ogüe' yetxtil de'en cui bi xne'i nchixə na' lecə chso'ote' xilə' dao' par chjəsyə'əzalazə'e can' bebej Diozən' de'e xaxta'oga'aque'ena' Egipton'. Na' ža na'anə' gwse' disipl che Jeso'osən' le': — Ćgan' che'endo' žje'eni'ato' de'en gaocho xše' lni pascon'?

13 Nach gwleje' chopə disipl che' ca' na' bsele'e lega'aque' lao' syodan' gože': —Le'e žja'ac lao' syodan' na' na' yežagle to beᅇə' byo beᅇə' noa' che'e niᅇən' ya'ayene'. Na' le'e žjnaotelene'. 14 Na' šo'ole len be'ena' na' ye'ele xan yo'onə': “Maestrən' ne' gonšgo' to cuart gan' güe'eni'ato' de'en gaolento'one' xše' lni pascon', neto' disipl che'.” 15 Nach əgwlo'ine' le'e to cuart xen de'e zo žcuia la'alə, na' lo'o cuartən' zo to mes, na' niᅇə' ga cue'ele na' bichlə de'e chyažjele. Lo'o cuart na'anə' əgws'i'ini'ale de'en gaocho lao lni pascon'.

16 Nach gwsa'ac disipl che' ca' na' catə' besə'əžine' syodan' yogua'əloj can' gože' lega'aque'ena' goquə. Nach bososi'ini' de'en gwsa'ogüe' xše' lni pascon'.

17 Na' cata' beyož gwxen, Jeso'osən' len disipl che' ca' šižin besə'əžine' yo'onə' gan' baboso'osi'ini'e de'en əsa'ogüe'ena'. 18 Na' lao zjəchi'e cho'a meᅇən' chsa'ogüe', Jeso'osən' gože' lega'aque': —De'e li əchnia' le'e, entr to le'e chaolene' nada' txeᅇn gonle nada' lao na' beᅇə' contr ca'.

19 Nach de'e juisy de'e gwsa'aque'ne' catə' beyož gwne' ca', nach tgüeja tgüeje' gwse'e le': —Xana' žanada'an gona' le' lao na' beᅇə' contr ca'?

20 Jeso'osən' gože' lega'aque': —Entr le'e šižinle tole chne' na'alen' lo'o platən' txeᅇn len nadan', gonle nada' lao na' beᅇə' ca'. 21 Banaquəczən so'ot beᅇə' nada' can' nyoj Xtižə' Diozən' nan gaquə čhia' nadan' naca' ben' bsele' Diozən' golja' beᅇəch. Pero probchguazə be'ena' gon nada' lao na' beᅇə' contr ca'. Nca'ala xneze žalə' cuiclə golje'ena'.

22 Na' lao chsa'ogüe'ena' gwxi' Jeso'osən' yetxtilan', na' be'e yeļə' choxcwlen che Diozən'. Gwde na' bzoxje'en, nach be'en disipl che' ca', gože' lega'aque': —Le'e gaon. Lennə' cuerp čhia'anə'.

23 Nach lecə bexe'e basən' gan' yožə nis obasən', na' lao noxe'en be'e yeļə' choxcwlen che Diozən' nach bosnežje'en lega'aque' na' yogue'e gwse'eje'en.

24 Nach gože' lega'aque': —Lennə' xčhena'anə'. Na' xčhena' na'anə' laljə por ni che xtolə' beᅇəchən'. Na' de'en laljənnə' solao gaquə de'e cobə de'en ben Diozən' lyebe gone' par gaqualene' beᅇəchən'. 25 De'e li čhnia' le'e ᅇa'a zelao che'eja' nis oban'. Pero de' yeto de'e yebeichecho mazəchlə can' chebeicho che'ejcho nis oban'. Lennə' de'en socho mbalaz zejlicəne catə'an socho txeᅇn gan' nabi'a len Diozən'.

Jeso'osən' gwne' de que Bedən' cui chebe' šə nombi'ene'

26 Na' beyož gwse'ej gwsa'ogüe' gwso'ole' to imno, nach besə'əchoje' ja'aque' ya'a de'en nzi' Olibos. 27 Na' lao zjəngüe'e nezən' Jeso'osən' gože' disipl che' ca': —Neže' yogua'əle cuejyichjele nada' por ni che de'en gaquə čhia'. Gaquə can' nyoj Xtižə' Diozən' nan: “Gota' beᅇə' goye xilə'anə' na' xilə' che' ca' əsa'asəlasəb.” 28 Pero na' catə' yeyas yebana' ladjo beᅇə' guat ca', yobəchda' yeya'a Galilean' cle ca' le'e.

29 Nach Bedən' gože' Jeso'osən': —Nada' cuat cuejyichja' le' la'anə'əczə šə yogua' beᅇə' yeziqua'əchlə yesə'əbejyichjele' le'.

30 Jeso'osən' gože'ene': —De'e li əchnia' le' neže' antslə ze'e cuež lecon' chop las, gaquə šon las cui chchebo' de que nombi'o nada'.

31 Nach Bedən' gože' Jeso'osən': —La'anə'əczə šə chonclən byen guatlencza' le' bito ənia' de que bito nombi'a le'.

Na' lecə ca' əgwse' yogua' disipl che' ca' le'.

Jeso'osən' bene' orasyon lo'o güert de'en nzi' Getsemani

³² Na' catə' Jeso'osən' len disipl che' ca' besə'əžine' latjən' gan' nzi' Getsemani, gože' lega'aque': —Ngazə' lecue' žlac ša'a de'e na' žjena' orasyon.

³³ Na' gwche'e Bedən' len Jacobən' na' Juannə', gwsa'aque' gan' nitə' disipl ca' yelə'. Na' Jeso'osən' gwzolaogwzochgüe' trist, na' de'e juisy de'e goquene' lo'o yichjla'ažda'ogüe'enə'. ³⁴ Na' gože' lega'aque': —Tristchgua zo yichjla'aždaogua'anə' xte bachonən yelə' got. Lecuežə' nga' sole əna'azle len nada'.

³⁵ Nach gwdie' gwyeje' yelatə' delant na' jete'e goscho'alə' lao yon'. Nach bene' orasyonnə' gwnabene' Diozən' šə' guac te ca'azə' de'en čhi' saque'e. ³⁶ Na' gože' Xe'enə': —Xa' Dioz, le' chac chono' yoguə'əloł. Benšga' ca te ca'azə' de'en čhi' saca'anə', pero bito che'enda' gaquə' de'e ənia' nada', sino gaquə' con can' ənao' le'.

³⁷ Nach beyeje' gan' nitə' disipl ca' šonə, na' jəyedi'e lega'aque' chəsə'ətase'. Na' gože' Bedən': —Simon žachtaso'? žEni to or bito bchejdo' əna'azo' len nada'? ³⁸ Le'e na', na' le'e gon orasyon nič cui co'o gwxiye'en le'e nez mal. Nežda' chene'ele əna'azle len nada', pero cui chzoile.

³⁹ Na' gožese'e gan' nite'enə' de'e yoblə, jəzene' orasyonnə', na' gwnacze' can' bagwne'. ⁴⁰ Na' catə' bezžine' gan' nite'enə' de'e yoblə, jəyezdi'icze' disipl ca' šonə chəsə'ətase', tant cuich chəsə'əzoinə' bišgalən'. Na' xte bito zjəneze' bi əse'e le'. ⁴¹ Na' gwze'e de'e yoblə gan' nite'enə' jene' orasyonnə' de'e gwyon lase, na' catə' bezžine' gan' nitə' disipl ca' šonə, na' gože' lega'aque': —žEne'e chtasle? žEne'e chonle dezcanz? Bač goc na'a. Diozən' bsele'e nada' golja' beṇač na' na'a bač bžin or gaca' lao na' beṇə' mal ca' par so'ote' nada'. ⁴² Le'e secha, le'e šo'o. Baza' ben' gon nada' lažə' na' beṇə' contr ca'.

Gosə'azene' Jeso'osən'

⁴³ Ne'e cho'ete Jeso'osən' dižə'n ca' catə' bžin Jodən' ben' naque' cuent len disipl ca' šižin. Na' žague' zan beṇə' bosə'oselə' beṇə' ca' chəsə'anabia' bxož che neto' beṇə' Izrael na' beṇə' ca' choso'osed choso'olo'i lei de'en bzoj de'e Moizežən', na' beṇə' golə' blao che nasyon četo'ona'. Beṇə' ca' zjənžag Jodən' zjənalə'e spad na' zjənlene' no yag. ⁴⁴ Jodən' babzejni'ine' lega'aque' can' gone' par əgwdie' Jeso'osən' lao na'aga'aque'enə', gože' lega'aque': —Be'enə' gaogua' bxidən', le'enə' senle na' gwčhejləne' par əche'elene'.

⁴⁵ Nach catə' bžine' gan' zo Jeso'osən' le'e bgüiguə'əte' cuite'enə' na' gože'ene': —Maestr.

Na' gwdaogüe'ene' bxidən', pero caguə' do laže'enə' bene' ca'. ⁴⁶ Nach beṇə' ca' əzja'ac len Jodən' gwso'oxe'e Jeso'osən' na' gosə'əche'əxəxje' le'.

⁴⁷ Na' to beṇə' zecha galə'əzə' gwlečhj spad che'enə' gwdine'en šla'a nag xmos bxožən' ben' naquəč əblao, gwčhogtechgüe'en. ⁴⁸ Nach Jeso'osən' gože' beṇə' ca': —Za'acle len spad na' len yag zedəxənle nada' ca to beṇə' bguan. ⁴⁹ Yoguə' ža gwchi'a len le'e bsd blo'ida' beṇə' lo'o yo'odao' əblaonə' na' bito gwxenle nada'. Pero chac de'e quinga par nič chac complir can' na' Xtižə' Diozən' de'en nyojən' gaquə' čhia'.

⁵⁰ Na' lao or na' bosyo'oxonj yoguə' disipl che' ca' gosə'əbejyichje'ene'.

Beṇə' güegon' ben' bexonj

⁵¹ Na' to beṇə' güegon' jənaogüe' Jeso'osən', na' nyaze' to lache' de'e naquə' ca to sabana. ⁵² Na' ca gwso'oxe'ene' gwso'oxe'e slezə' xe'enə' na' le'e bchojte' lo'imə' na' bexonje' ga'alyide'.

Gosə'əche'e Jeso'osən' lao beṇə' golə beṇə' blao ca' chəsə'anabia' nasyon Izraelən'

⁵³ Na' beṇə' ca' gosə'əzen Jeso'osən' gosə'əche'ene' lao Caifasan' ben' naquəch bχoz əblao che neto' beṇə' Izrael. Nach besə'ədobə yoguə' beṇə' ca' choso'osed choso'olo'i lei de'en bzoj de'e Moizezən' na' len yeziqə'əchlə beṇə' golə blao ca' chəsə'anabia' nasyon cheto'onə'. ⁵⁴ Nach Bedən' jənaogü'e Jeso'osən' zitə' zitə' xte bžinte' liž bχoz əblaonə' na' gwyo'e chyo'onə'. Na' beṇə' ca' zjənaquə xə'ag yo'oda'onə' zjəchi'e cho'a yi'inə' par chəsyə'əže'ine'. Nach Bedən' jəchi'e len lega'aque' cho'a yi'inə'.

⁵⁵ Na' yoguə' bχoz əblao ca' na' yeziqə'əchlə beṇə' golə blao ca' chəsə'anabia' nasyon Izrael cheto'onə' gosə'əyilje' beṇə' əso'e dižə' contr Jeso'osən' par niçh yesə'əchoglaogü'e'en che' de que gate', pero notono besə'əzelene'. ⁵⁶ Beṇə' zan gwso'e dižə' güenləžə' contr Jeso'osən' pero xtižə'əga'aque'ena' bito besyə'ədilən. ⁵⁷ Nach balə beṇə' gosə'əzeche' na' gwso'e dižə' güenləžə' contr le' gosə'əne': ⁵⁸ —Beneto' cata' gwne': “Yochinja' yo'odao' əblao nga gwso'on beṇə', na' lao šonə žazə gona' yeto yo'odao' əblao de'en cui gon beṇəçhən'.”

⁵⁹ Pero bia'aczə bito bedile de'en gosə'əne'ena'.

⁶⁰ Nach gwzoža' ben' naquəch bχoz əblao gwzeche' gwchołga'aque'ena' gože' Jeso'osən': —ǰEbito bi nao' ca' naquə de'e nga chosə'əcuiš beṇə' quinga le'?

⁶¹ Na' Jeso'osən' bitobi gwne'. Nach gož ben' naquəch bχoz əblao le': —ǰEle len' Cristən' ben' gwlej Diozən' par gaquəleno' nasyon chechon'? ǰElen' Xi'inq Dioz ben' cho'ela'och?

⁶² Jeso'osən' gože'ene': —Le ben' nao' na' nada'. Diozən' bsele'e nada' golja' beṇəçh na' əchnia' le'e gwžin ža le'ile nada' chi'a cuit Xə' Diozən' ben' napə le'ezelaogü'e yelə' guac xen na' nabi'a txen len le'. Na' le'ile nada' yetja' yoban' to lo'o bejw.

⁶³ Catə' bene ben' naquəch bχoz əblao xtižə' Jeso'osən' gwšo' gwçhezə' xe'ena' goquene' de'e mal juisy can' gwna Jeso'osən', na' gwne': —ǰNochxa testigon' chyažjecho? ⁶⁴ Babenecho chžia chnute'e Diozən' de'en ne' naque' Xi'inq Dioz len naque' con to beṇəçhza. ǰBi nale? ǰNac gonchone'?

Nach yoguə' beṇə' ca' ža'ana' gosə'əchoglaogü'e'en che' de que cheyalə' gate'.

⁶⁵ Nach balə' bosə'oža' xene'ena' cho'alao Jeso'osən', na' bosə'ocuaše'e cho'alaogü'e'ena' len to lachə' na' gosə'əbaže'ene', gwse'ene': —Gwñeya'ašč ǰnon' chbažə' le'?

Nach xə'ag yo'odao' ca' leczə gosə'əgape'e xəgue'ena'.

Bedən' bito gwçhebe' šə nombi'e Jeso'osən'

⁶⁶ Na' lao chac de'e quinga Bedən' chi'e chyo'o che ben' naquəch bχoz əblaoch na' na' chi'e catə' bžin to no'ol criad che ben' naquəch bχoz əblaon'. ⁶⁷ Na' catə' ble'ine' chi' Bedən' cho'a yi'inə' par cheže'ine', no'olan' bgüiayane'ene' na' gože'ene': —Lečzə leno' le' naco' txen Jeso'os beṇə' Nasaretən'.

⁶⁸ Pero Bedən' bito gwçhebe' šə naque' txen len Jeso'osən'. Gože' no'olan': —Bito nombi'ane' na' nic nəzda' bi dižə'an cho'o.

Na' gwyeye' jəzeche' cho'a puert saguannə'. Nach le'e gwçhezte to lecw.

⁶⁹ Nach bezle'i no'olan' le' de'e yoblə na' gože' beṇə' ca' ža'ana': —Benga naque' txen len beṇə' ca'.

⁷⁰ Na' de'e yoblə bito gwçhebe' šə nombi'e Jeso'osən'. Na' chacza šlož beṇə' ca' ža'ana' gosə'əze'e Bedən': —De'e liczə le' naco' txen len beṇə' ca' chedə' ca' nga chnio' ngazə nachbia' de que naco' beṇə' Galilea.

⁷¹ Nach Bedən' bzoe' Diozən' testigw gwne': —Diozən' gone' nada' castigw šə chonlaža'an əni'a' bito nombi'a ben' nale ca'. Chzoa' jorament lao Diozən', bito nombi'ane'.

⁷² Na' le'e gwchežte lecon' de'e yoblə. Nach jsa'alažə' Bedən' can' gož Jeso'osən' le' de que ze'e gaquə chop las cuež lecon' catə' gaquə šon las cui chchebe' de que nombie'ene'. Na' catə' bene' xbab che de'enə' gwchežyaše'e tant de'e goquene'.

15

Gosə'əche'e Jeso'osən' lao Pilatən'

¹ Na' catə' gwye'eni'inə' bχoz əblao ca' na' yeziquə'əchlə beṇə' golə blao ca', na' len beṇə' ca' choso'osed choso'olo'i lein', na' len yeziquə'əchlə beṇə' ca' chesə'ənabia' nasyon Izraelən' besyə'ədobə' par nich boso'oxi'e naclən' so'one' len Jeso'osən' na' boso'ocheje'ene' na' gosə'əche'ene' jse'ene'ene' lao na' Pilatən'.

² Pilatən' gože' Jeso'osən': —ĴElen' naco' rei che beṇə' Izrael ca'?

Nach Jeso'osən' gože'ene': —Le be'en nao' nan' naca'.

³ Na' de'e zan de'e gosə'əna beṇə' gwnabia' che bχoz ca' par boso'ocuiše' Jeso'osən'. ⁴ Nach Pilatən' goze'e Jeso'osən': —ĴEbito choži'o xtižə'əga'aque'enə'? ĴEcabi chendo' catec de'e zan xya nga chsa'ogüe' contr le'?

⁵ Pero Jeso'osən' ni to xtižə'əga'aque'enə' bito boži'e, xte bebanchgüeicze Pilatən'.

Gosə'əchoglaogüe'en so'ote' Jeso'osən'

⁶ Na' de to costombr chega'aque' de que ža lni pascon' əgwsan Pilatən' to pres, con beṇə' yesə'ənab beṇə' Izrael ca'. ⁷ Na' ližya na' de to pres beṇə' le' Barrabas txen len beṇə' ca' boso'oxe gwdiłə lao syodan' na' zjənaque' beṇə' güet beṇə'. ⁸ Na' beṇə' zan ca' bazjənžag gosə'əbigue'e lao Pilatən' na' gosə'ənabene' le' əgwsane' to pres can' naquə' costombr chega'aque'enə'. ⁹ Nach Pilatən' gože' lega'aque': —ĴEchene'ele əgwsana' ben' naquə' rei che le'e beṇə' Izrael?

¹⁰ Gwne' ca' chedə' nezene' beṇə' ca' chesə'ənabia' bχoz ca' zjəžiaque'ine' Jeso'osən', de'e na'anə' boso'odie' le' lao ne'enə'. ¹¹ Na' beṇə' ca' chəsə'ənabia' bχoz ca' gosə'əgo'yeye'le beṇə' zan ca' ža'anə' par yesə'ənabe' əgwsane' Barrabasən' lgua'a Jeso'osən'. ¹² Nach Pilatən' gože' lega'aque': —ĴBixa gona' len Jeso'osən' ben' nale naque' rei che le'e beṇə' Izrael?

¹³ Nach gwso'osye'e gwse'e Pilatən': —Bde'e le'e yag corozən'.

¹⁴ Pilatən' gože' lega'aque': —ĴBixa de'e mal babene'enə'?

Pero beṇə' ca' gwso'osye'e yełata' zižjoch gosə'əne': —Bde'e le'e yag corozən'.

¹⁵ Na' Pilatən' gone'ene' soe' güen len beṇə' zan ca'. De'e na'anə' bsane' Barrabasən'. Na' beyož gosə'əyin soldad ca' Jeso'osən', Pilatən' bene'ene' lao na'aga'aque' par yoso'ode'ene' le'e yag corozən'.

¹⁶ Nach gosə'əche' soldad ca' Jeso'osən' chyo'o che yo'o gan' chi' Pilatən' na' bosyo'otobe' yoguə' soldad ca' yeła'. ¹⁷ Nach gosə'əyiṇe' xa Jeso'osən' na' boso'oguae'ene' to lachə' morad na' gwso'one' to coron de yešə' na' boso'ožine'en yichje'enə'. ¹⁸ Na' gwso'onene' borl gosə'əne': —Biba rei che beṇə' Izrael.

¹⁹ Nach soldad ca' gosə'əyiṇe' yichje'enə' to ya, na' boso'oža' xene'en le' na' boso'ozo xibga'aque'enə' laogüe'enə' chso'one' ca cho'elao' le'. ²⁰ Na' catə' beyož gwso'one'ene' borlən' besyə'əyiṇe' lachə' moradən' boso'oguae'ene'

na' bosyo'oguae'ene' xacze'. Nach gosə'əche'ene' par yoso'ode'ene' le'e yag corozən'.

Boso'ode'e Jeso'osən' le'e yag corozən'

²¹ To beṇə' Sirene le' Simon xa Ljandr na' Rofo ze'e zeze'e yoba catə' bežague' beṇə' ca' zjanche'e Jeso'osən' par yoso'ode'ene' le'e yag corozən'. Na' la fuers boso'ode'e yag coroz che Jeso'osən' cožə' Simonṇə'.

²² Na' gosə'əche'e Jeso'osən' to latjə de'en nzi' Golgota, zejen dižə' latjə che yichj beṇə' guat. ²³ Na' boso'onežjue'ene' bino corrient de'en nchixən len to rmech zla' de'en nzi' mirra. Pero Jeso'osən' bito güe'ejə'en. ²⁴ Nach boso'ode'ene' le'e yag corozən'. Na' soldad ca' gwso'one' xala'ane'enə' rif entr lega'aque' par gosə'əneze' bi partən' yechelə to toga'aque'.

²⁵ Na' do cheda ga lsil boso'ode'e Jeso'osən' le'e yag corozən'. ²⁶ Na' yichj yag coroz che'enə' boso'ozoje' de'en bcuiš le', nan: "Bengan' Rei che beṇə' Izrael ca'." ²⁷ Na' leczə cana' boso'ode'e čhopə beṇə' bguan le'e yechopə yag coroz, to'e gwda cuit Jeso'osən' licha na' yetoe' cuite'en yeglə. ²⁸ Na' de'en goc ca' goc complir can' nyoj Xtižə' Diozən' gan' nan: "So'onene' le' caczən' chso'onene' beṇə' güen de'e mal."

²⁹⁻³⁰ Na' beṇə' ca' chse'ej chəsə'əde' gan' da' Jeso'osən' chəsə'əlojə' yichjga'aque'enə' gwso'onene' borl gwse'ene': —Len' gwnao' guaquə yochinjo' yo'odao' əblaonə' na' šoṇə žəzə yeyono'on, bosla cuino' na' beyetj le'e yag corozən'.

³¹ Na' leczə ca' beṇə' gwnabia' che bχoz ca' na' beṇə' ca' choso'osed choso'olo'i lei de'en bzoj de'e Moizezən' gwso'one'ene' borl gosə'əne': —Yeziqə'əchlə beṇə' bosle' na' cabi chac yosla cuine'. ³² Šə len' naque' Cristən' ben' gwlej Diozən' par gaquəlene' nasyon chechon', na' nacte' rei che chio'o beṇə' Izrael, yoletj cuine' le'e yag corozən' na'a par nič le'icho na' šejle'echo che'.

Na' beṇə' ca' zjəda' le'e yag corozən' cuite'enə' čhopə la'a, leczə gwso'onene' borl.

Can' goquə catə'an got Jeso'osən'

³³ Na' do gobiž goc žchol doxen yežlyon' bžinte cheda šoṇə. ³⁴ Na' do cheda šoṇə catə' gwṇe Jeso'osən' zižjo gwne': —Eli, člama sabactani? —zeje dižə': "Dioz čhia, čbixčen' bagwlejyichjo' nada'?"

³⁵ Na' beṇə' nitə' galə'əzə gwse'enene' can' gwne'enə' nach gosə'əne': —Le'e gwzenagšč, chaxe' Liazən' ben' be' xtižə' Diozən' cana'.

³⁶ Nach bechoj to beṇə' gwsa'adoe' jəxi'e to spong na' bosgaže'en bino corrient de'en cui bi nchixə, na' bzo'en to lao ya dao' na' bosšine'en cho'a Jeso'osən' par nič güe'ejə'en na' be'enə' gwne': —Cuezcho yešč šə yidə Liazən' na' yoletje'ene'.

³⁷ Jeso'osən' bisye'e zižjo nach gote'. ³⁸ Na' ca naquə lachə'an de'en ze lo'o yo'odao' əblao che neto' beṇə' Izrael le'e gwchezə'əte gwcholən' gwza'əzə yichjei bechojte che'elə. ³⁹ Na' lao orən' got Jeso'osən', capitan che soldad ca' ben' zecha lao Jeso'osən' benene' can' bisya'a Jeso'osən' na' ble'ine' can' gote' na' gwne': —De'e liczə bengə naque' Xi'in Dioz.

⁴⁰ Na' leczə nitə' zan no'olə latjən' beṇə' gosə'əzecha zitə'ələ par besə'əle'ine' can' goquən'. Na' entr lega'aque' zjəlen no'ol quinga: Maria beṇə' Magdala, na' Maria xna' Jwsen' na' Jacob bi'in naquach bi'i xcuidə, na' leczə len Salme. ⁴¹ No'ol ca' gosə'əzolao chso'onlilažə' Jeso'osən' catə'an gwzoe' Galilean' na' gwsa'aclene' le' len bi de'en byažjene', lega'aque' na' yezan no'olə ca' besyə'ənaogüe' Jeso'osən' catə'an beze'e Galilean' par bežine' Jerosalenṇə'.

Boso'ocuaše'e Jeso'osən'

⁴² Na' ne'e da' Jeso'osən' le'e yag corozən' catə' gwzoloa chexjw že'enə', na' ža na'anə' catə'an choso'osi'ini'e che lni pascon', na' bachžin or so'omba'ane' ža dezcanzan'. ⁴³ Na' gwzo to beṇə' le Jwse na' naque' beṇə' Arimatea, na' nacte' to beṇə' blao entr beṇə' ca' chesə'anabia' nasyon Izrael cheto'onə'. Na' Jwsen' gwzoe' lez əžin ža selə' Diozən' beṇə' nabia' nasyon cheto'onə'. Na' laogüe de'en bachexjw že'enə' benchechlaže'e gwyeje' lao Pilatən' jəṇabe' cuerp che Jeso'osən'. ⁴⁴ Pilatən' bebanene' de'en byob got Jeso'osən', nach goxe' capitannə' gwnabene' le' šə le bagote'ena'. ⁴⁵ Catə' capitannə' gože'ene' de que bagote', nach Pilatən' be'e latjə žjəyleetj Jwsen' cuerp che Jeso'osən' par yeyo'ene'. ⁴⁶ Na' Jwsen' gwxi'e to lachə' fin nach gwyeje' gan' da' Jeso'osən' na' beletje'ene' le'e yag corozən' nach bolaže'ene' lachə'əna', na' gwlo'ene' to lo'o bloj ba de'e bagwche'ene' to le'e yej. Na' beyož bene' de'e ca' blole' to yej xen de'e bseyjuene' cho'a banə'. ⁴⁷ Na' Maria beṇə' Magdalan' na' Maria xna' Jwsen' yeto, besə'əle'ine' gan' boso'ocuaše'e cuerp che Jeso'osən'.

16*Jeso'osən' bebane' ladjo beṇə' guat ca'*

¹ Na' catə' gwde ža dezcanzan' Maria beṇə' Magdalan', na' Maria xna' Jacobən' na' len Salmen' jəsə'əxi'e set zix de'e yoso'oguazje' cuerp che Jeso'osən'. ² Na' zil dmigw tempran gwsa'aque' zja'aque' cho'a ban' na' besə'əžine' cho'a ban' do chla'atg bgüižən'. ³ Na' lao zja'aque'ena' gwse'e ljuežjga'aque': —¿No gaquə yeca'a yejən' de'en da' cho'a ban' par niç šo'ocho?

⁴ Na' ca ne'e zja'aque' zitə'alə gan' zo bloj ban' besə'əle'ine' de que yej xennə' de'en da' cho'a ban' baçh bega'an. ⁵ Catə' besə'əžine'ena' gwso'e lo'o blojən' na' besə'əle'ine' to beṇə' xcuidə' chi'e lo'inə' šla'a lichalə na' nyaze' to lachə' šyis tonə, na' no'ol ca' besə'əžebe' catə' besə'əle'ine'ene'. ⁶ Na' gože' lega'aque': — Bito žeble. Nada' nežda' de que cheyljle Jeso'osən' ben' naquə beṇə' Nasaret ben' boso'ode'e le'e yag corozən'. Babebane' ladjo beṇə' guat ca'. Notoch no nla' nga. Legüia latjə ga nga bosə'əxoe' cuerp che'ena'. ⁷ Le'e žjəya'ac le'e žjəyediçjue'i Bedən' len disipl ca' yela' de que gwyobe Jeso'osən' yežine' Galilean' ca' le'e na' Galilea na' gwle'iczelene', can' gwnacze' le'e.

⁸ Nach besyə'əchoje' lo'o ban' besa'acdoe' xte gosə'əxize' tant besə'əžebe'. Na' notono gwse'e bin' goquə chedə' besə'əžebe'.

Jeso'osən' blo'e laogüe' Maria beṇə' Magdalan'

⁹ Na' zil dmigw tempran catə'an beban Jeso'osən' ladjo beṇə' guat ca' zgua'atec blo'e laogüe' Maria beṇə' Magdalan' ben' bebeje' gažə de'e xio' zjəyo'o zjəyaz yichjla'aždaogüe'ena'. ¹⁰ Le' jəyediçjue'ine' yeziquə'əchlə beṇə' ca' de que beban Jeso'osən' ladjo beṇə' guat ca'. Catə' bžin Marian' chəsə'əbežyašə' beṇə' ca' na' chəsyə'əgüine'ene' chedə' gwso'ot beṇə' mal ca' Jeso'osən'. ¹¹ Na' catə' gwse'ene' de que babeban Jeso'osən' ladjo beṇə' guat ca' na' de que Marian' bable'ine' le', bito gwse'ejl'e'e.

Blo'e lao Jeso'osən' çhopə disipl che' ca'

¹² Na' blo'e lao Jeso'osən' çhopə disipl che' ca' lao zja'aque' yoba, pero nža'alə can' besə'əle'ine' le'. ¹³ Na' jəya'aque' jəsyə'ədiçjue'ine' beṇə' ljuežjga'aque' ca' pero beṇə' ca' leczə bito gwse'ejl'e'e che lega'aque'.

Jeso'osən' bene' mendad əso'e xtiže'ena' yogua' nasyon

¹⁴ Na' gwdechla blo'e lao Jeso'osən' disipl che' ca' snej lao chsa'ogüe'. Na' gwdi'e le' lega'aque' de'en zjənaque' beṇə' la'aždao' žod na' de'en cui gwse'eje'e de que bebane' ladjo beṇə' guat ca' la'aṇə'əczə beṇə' ca' besə'əle'i le' gwse'e lega'aque' ca'. ¹⁵ Nach gože' lega'aque': —Le'e žja'ac le'e žjəsed le'e žjəlo'i beṇə' ca' ža' yoguə'əlol nasyon dižə' güen dižə' cobə de'en chzejni'in chia'. ¹⁶ Na' beṇə' ca' so'onlilažə' nada' na' yesə'əchoe' nis bito žjəya'aque' lao yi' gabilən'. Na' beṇə' ca' cui so'onlilažə' nada' gwnežjoga'aca'ane' yelə' guac par so'one' de'e quinga: Len yelə' guac chia'anə' yesyə'əbeje' de'e xio' ca' zjəyo'o zjəyaz yichjla'aždao' beṇə', na' əso'e gwde gwdele dižə' de'en cui no chac. ¹⁸ Guaquə əso'oxe'e no bel bia benen na' bitobi gaquə chęga'aque'. Na' šə əse'eje' benen bitobi gonən len lega'aque'. Guaquə yesə'əxoa' na'aga'aque'enə' yichj beṇə' ca' chsa'acšene, na' yesyə'əyaque beṇə' ca'.

Jeso'osən' beyepe'yoban'

¹⁹ Na' catə' beyož be'e Xancho Jeso'osən' dižə'an ca' len lega'aque', bezi' beca'a Diozən' le' yoban' gan' chi'e chnabi'e txen len Xacho Diozən'. ²⁰ Na' disipl che' ca' ja'aque' doxenlə jəsə'ədixjue'ine' dižə' güen dižə' cobə de'en chzejni'in che Jeso'osən', na' le' goclene' lega'aque' na' bene' par nič gwso'one' no mīagr len yelə' guac che'enə' par blo'e de que xtižə'əga'aque'enə' naquən de'e li.

De'e na' azən' chzoja'.

Dižá' Güen Dižá' Cobá De'en Bzoj San Locasán'

De'e nga bzoj Locasán' par Tioflán'

¹⁻⁴ Señor Tiofl, chzoja' le' dižá' quinga par ničh na' ənezdo' de'e li ca naquə de'en babendo' na' de'en bagoc. Beṇə' zan bačh boso'ozoje' che Jeso'osán' ca naquə de'en bagoc complir par neto' chonlilažá'əto'one'. Boso'ozoje'en can' bzejni'i beṇə' ca' neto', beṇə' ca' besə'əle'i can' goquə dezd goljte Jeso'osán'. Na' beṇə' ca' gwse'en besə'əle'ine' can' goquən' boso'osed boso'olo'ine' beṇə' yoblə dižá' güen dižá' cobá che Jesocristán'. Na' nada' catə' beyož gwnabyoža' can' goquən', na' gwyazlaža' a gwzoja'an tcho'a tšao' par ničh ənezdo' Señor Tiofl.

Can' goquə gwdixjue'e to angl de que galjə Juannə'

⁵ Ca tyemp can' gwnabia' Rei Erodán' gan' nzi' Jodea, na' zo to bxož che beṇə' Izrael ca' beṇə' le Zequeria. Bene' žin len xonj bxož beṇə' zjele Abias. Na' no'ol che Zequerian' le' Čhabet na' naque' dia che de'e bxož Ronṇə'. ⁶ Na' Zequerian' len Čhabetən' zja'accze' liča par len Diozən', na' gwso'one' yoguə'əloł de'en non Xancho Diozən' mendad de'en zžənyoј le'e lei che'enə'. ⁷ Na' notono xi'inga'aque' nitə', čhedə' Čhabetən' naque' no'olə güiž, na' čopte' bazjanaque' beṇə' gola.

⁸ Na' goquən' beyalo' Zequerian' len beṇə' ljuežje' ca' beṇə' ca' zžənaquə bxož par gwso'one' de'en besyə'əyale'e so'one' par gwso'elaogüe'e Diozən'. ⁹ Na' de costombr che bxož ca' chso'one' rif par chatə'əbia' noe' əchoј par əgwzeye' yal lo'o yo'odaə' əblao čhega'aque'enə' gan' chso'elaogüe'e Xancho Diozən' Jerosalennə'. Nach gwso'one' rif na' bchoј Zequerian' par bzeye' yalən' lo'o yo'oda'onə'. ¹⁰ Na' žlac bzeye' yalən' gwnitə' yoguə'əloł beṇə' zan ca' chyolə gwso'one' orasyonə'. ¹¹ Na' to angl che Xancho Diozən' bloe' laogüe' Zequerian', na' gwzecha anglən' cuit mesən' lichalə gan' čəsə'əzeye' yalən'. ¹² Catə' ble'i Zequerian' anglən' benit bečhoł goc lo'o yičhjlə'aždaogüe'enə' na' bžebchgüe'. ¹³ Pero anglən' gože' le': —Bito žebo' Zequeria. Diozən' babzenague' orasyon' čhio'onə', na' no'ol čhio' Čhabetən' sane' to xi'ino', na' əgwsio' le' Juan. ¹⁴ Na' so' mbalaz na' yebeido', na' leczə beṇə' zan yesyə'əbeine' šə bagolje', ¹⁵ čhedə' gaque' beṇə' blao lao Diozən'. Bito ye'eje' bino ni biquə'əchlə de'en česə'əzože beṇə', na' catə' galje' yo'o Spirit che Diozən' lo'o yičhjlə'aždaogüe'enə' par nabi'an le'. ¹⁶ Na' gone' par ničh zan beṇə' Izrael gwlaž che' ca' yesə'əša' yičhjlə'ažda'oga'aque'enə' na' so'elaogüe'e Diozən' can' cheyalə' so'elaogüe'ene', Dioz ben' naquə Xanga'aque'. ¹⁷ Na' cuialaogüe' lao Xančon' na' gone' par ničh beṇə' ca' cui nitə' binlo len xi'inga'aque' yesyə'ənite'e binlo len xi'inga'aque' de'e yoblə. Na' gone' par ničh beṇə' godenag ca' yesə'əzenague' che Diozən'. Gone' ca' par ničh yesə'ənitə' beṇə' probnid par əso'elaogüe'e Xančon' catə'an yide'. Na' len xbab de'en yo'o yičhjlə'aždaogüe'enə' na' len dižá' balə de'en güe'enə' gaque' ca profet Ljazən' ben' gwzo cana'.

¹⁸ Nach Zequerian' gože' anglən': —¿Nacxa gaquə ənezda' de'e nga? Nada' bačh naca' beṇə' gola na' no'ol čhia'anə' leczə beṇə' gola.

¹⁹ Nach anglən' gože' le': —Nada' naca' angl Gabryel. Zoa' len Diozən' na' zoa' cho'elaogua'ane'. Na' bsele'e nada' zedetixjue'ida' le' dižá' güen dižá' cobá quinga. ²⁰ Na' le' gaco' mod, cui gaquə ənio' xte que catə'əch əžin ža gaquə de'e

nga, chedə' cui chejli'o xtiža'anə'. Na' de'e liczə gwžin ža gaquə complir can' gwnia'anə'.

²¹ Na' benə' ca' ža' chyo'olə gosə'əbeze' Zequerian', nach besyə'əbanene' chedə' gwžeine' lo'o yo'odao' əblao gan' chso'elao' benə' Izrael ca' Diozən'.

²² Catə' bechoj Zequerian', bene' seņy len ne'enə' la' bitoch goquə əne'. Bač naque' benə' mod. Nach gwsa'acbe'i benə' ca' de que ble'ida'ogüe'ene' lo'o yo'oda'onə'.

²³ Na' catə' bde laze'en de'en bene' žin lo'o yo'odao' əblaonə' beyeje' liže'.

²⁴ Gwde na', no'ol che' Chabetən' bgüendao' bda'onə' lo'o le'enə' na' gueyə' bio' gwzoze'. Na' gwne': ²⁵ —Güenchgua baben Xana' Diozən' len nada', chedə' babžin ža nži'ilaže'e nda', chone' par nič bitoch so'on beňačən' xbab čhia' de que cui bi zaca'a.

Anglən' gwđixju'e galjə Jesocrisən'

²⁶ Goc xop bio' noa' Chabetən' bda'onə', Diozən' bozsele'e anglən' ben' le Gabryel, gweje' to syoda de'en nzi' Nasaret gan' mbane Galilean'.

²⁷ Bsele'ene' gan' zo to no'ol güego' le' Maria. Na' Marian' ne'e naplažə'əchgua cuine'. Na' to beňə' le Jwse bač naquən gwšagna'alene' par gaque' xo'ole'. Na' Jwsen' naque' dia che de'e Rei Dabin'. ²⁸ Na' bžin anglən' gwyo'e gan' zo Marian' na' gože'ene': —Dioxei. Xancho Diozən' nži'ilaže'e le' na' zoe' len le'. Na' gone' par nič socho' mbalaz ca yoguə'əlo' no'ol ca' yelə'.

²⁹ Catə' ble'i Marian' anglən', benit bečol' goc lo'o yichjla'aždaogüe'enə' por ni che dižə' de'en gože' le'. Na' bene' xbab bi zejen de'en bguape' le' dioxən' ca'. ³⁰ Nach anglən' gože'ene': —Bito žebo' Maria. Diozən' nži'ilaže'e le'. ³¹ Na' le' gua' xi'ino', to bi'i byo dao', na' sano'obo', na' əgws'i'o labo' Jeso'os. ³² Na' Jeso'osən' gaque' to beňə' blao na' beňačən' yesə'əsi'ene' Xi'in' Dioz, Dioz ben' naquə' le'ezelaogüe beňə' blao. Na' Xancho Diozən' gone' par nič nabi'e nasyon Izraelən' can' gwnabia' de'e xaxta'ogüe'e Rei Dabin'. ³³ Na' le' nabi'e nasyon Izraelən' zejlicane. Na' cuat te yelə' gwnabia' che'enə'.

³⁴ Nach gož Marian' anglən': —čNacxa gaquə sana' bdao'? la' bitonə' žaga' nda' beňə' byo.

³⁵ Nach gož anglən' le': —Spirit che Diozən' yidən gan' zo'onə', na' yelə' guac che Diozən' son len le', Dioz ben' naquə' le'ezelaogüe beňə' blao. De'e na'anə' bi'i la'aždao' xi'ilažə'an galjənə', yoso'osi'ebo' Xi'in' Dioz. ³⁶ Na' beňə' xna'o Chabetən' lecəzə bač bgüenda'obo' lo'o le'enə' la'ana'əczə banaque' beňə' golə. Bagoc xop bio' no'e to bi'i byo dao', len la' gosə'əne' che' de que no'olə güižən'.

³⁷ Bito bi bi de de'e ənacho cui chac gon Diozən'.

³⁸ Nach gož Marian' anglən': —Nga zoa' naca' xmose', gaquə čhia' con bi na Xana'an.

Nach beza' anglən' gan' zo Marian'.

Marian' jəlanə'e Chabetən'

³⁹ Gwde na' le'e gwejeje Marian' to syoda de'e žia lao ya'a gan' mbane Jodean'. ⁴⁰ Na' bžine' liž Zequerian', gwyo'e bguape' Chabetən' diox. ⁴¹ Na' goquən' catə' Chabetən' benene' cholgüiž Marian' le' nach gocbe'iteine' chxita' chžia chac bdao' che'enə' lo'o le'enə'. Na' Spirit che Diozən' gwnabi'an yichjla'aždao' Chabetən'. ⁴² Na' gwne' zižjo tant bebeine', na' gože' Marian': —Diozən' babene' par nič zocho' mbalaz ca yoguə'əlo' no'ol ca' yelə'. Na' Diozən' gone' par nič gaquə mbalaz che bdao' čhio'onə' no'onə'. ⁴³ Nactecxan' le' naco' xna' Xana'an zedəlanə'o nada'. ⁴⁴ Mer catə' bene naga'anə' chguapo' nada' dioxən', bdao' čhia'anə' bebeibo' na' bxitə' bžiabo'

lo'o li'anə'. ⁴⁵ Xancho Diozən' bene' par niç anglən' gwne' le' de'en ze'e gaquə na' zo' mbalaz de'en gwyejli'o de que gaquə complir can' gwne'enə'.

⁴⁶ Nach Marian' gwne':

—Cho'elaogua'a Xana' Diozən' do yichj do laža'a.

⁴⁷ Na' lo'o yichjla'aždaogua'an chebeichgüeida' Dioz ben' chebej nada' xni'a de'e malən'.

⁴⁸ Babeyaša' beži'ilaže'e nada' naca' xmoše' la'anə'əczə cui bi zaca'a.

Na' dezd na'a žtia žtia beṇačən' yesə'əne' de que zoa' mbalaz.

⁴⁹ Diozən' chac gone' de'e cui no zaquə gon, na' babene' de'e güen juisy len nada'.

Le'enə' naque' beṇə' la'aždao' xi'ilažə' juisy.

⁵⁰ Na' notə'ətezə beṇə' chsa'ape'ene' respet do yichj do lažə'əga'aque', Diozən' cheyaša' cheži'ilaže'e lega'aque' na' len xi'in dia čhega'aque'.

⁵¹ Baç blo'i Diozən' beṇačən' yełə' guac čhe'enə',

na' babene' par niç beṇə' ya'alazə' ca' baboso'ozexjw yichjga'aque'enə' laogüe'enə'.

⁵² Babene' par niç beṇə' gwnabia' ca' cuich gosə'anabi'e,

na' beṇə' ca' cui gwsa'ac beṇə' blao, Diozən' bcuie' lega'aque' par gwsa'aque' beṇə' blao.

⁵³ Na' beṇə' ca' gwsa'acbe'ine' de que chesə'əyažjene' yełə' chaclen čhe Diozən', bagoclene' lega'aque'.

Na' beṇə' ca' gwsa'aque' bitobi chesə'əyažjene',

bose'e lega'aque' sin cui bi bnežjue' lega'aque'.

⁵⁴ Nach bagocwlene' chio'o beṇə' Izrael naccho ca xmoše'.

Bablo'ine' chio'o de que bito ganlaže'e par yeyaša' yeži'ilaže'e chio'o can' bene' lyebe.

⁵⁵ Na' de'en beyaša' beži'ilaže'e de'e Abraannə' len xi'in dia čhe',

bene' complir can' gože' le' len yebałə xaxta'ocho ca'.

Na' zocze' yeyaša' yeži'ilaže'e xi'in dia čhe de'e Abraannə' zejlicane'.

⁵⁶ Na' catə' bagoc šon bio' bega'an Marian' len Čhabetən' nach beyeje' liže'enə'.

Goljə Juannə' ben' bchoa beṇə' nis

⁵⁷ Na' catə' bžin or par san Čhabetən', gwxane' bi'i byo dao' čhe'enə'. ⁵⁸ Na' catə' gwse'ene beṇə' gwliž čhega'aque'enə' na' family čhega'aque'enə' de que Diozən' babeyaša' beži'ilaže'e Čhabetən', besyə'əbeichgüeine' len le'. ⁵⁹ Na' ža xon' beṇə' ca' jəsə'əzo'ebo' señy de'en ne' sirconsision. Na' zejen de que chse'ejle'e che lyebe de'en ben Diozən' len de'e Abraannə'. Na' gwse'enene' si' labo' Zequeria can' le xabo'onə'. ⁶⁰ Pero xna'abo'onə' gwne': —Nca, cheyałə' si' labon' Juan.

⁶¹ Nach lega'aque' gwse'e le': —Notono family čhele nitə' beṇə' zjəle ca' na' nic xaxta'ole.

⁶² Nach gwsə'one' señy gosə'anabene' xabo'onə' nac chene'ene' si' la bda'onə'. ⁶³ Nach bene' señy gwṇabe' to yag la' dao' gan' bzoje': “Si' labo' Juan.” Nach yogue'e besyə'əbanene'. ⁶⁴ Le'e gocte beṇə' Zequerian' na' le'e gwzolaote be'e dižə' be'elaogüe'e Diozən'. ⁶⁵ Na' besə'əžebchgua beṇə' gwliž čhega'aque'enə'. Na' xtižə'əga'aque'enə' gosə' gwłaljən doxen yež ca' zjəchi' lao ya'a ca' gan' mbane Jodean'. ⁶⁶ Na' yoguə'əłol beṇə' gwse'enene' dižə'əna' gwsə'one' xbab lo'o yichjla'ažda'oga'aque'enə' čhe de'e ca', na' gosə'əne':

—¿Bixa gon bdao' na'anə'?

Gosə'əne' ca' čhedə' gosə'əneze' de que zoczə Diozən' len lebo'.

Dižá' de'en be' Zequerian'

⁶⁷ Nach gwnabia' Spirit che Diozán' yichjla'aždao' xabo' Zequerian'. Na' Zequerian' be'e xtižá' Diozán' gwne':

⁶⁸ Cho'elaogua'a Xanchon' ben' naquá Dioz che chio'o beṇá' Izrael.

Cheyaše'ene' chio'o naccho nasyon' che' na' babene' par ničh gaquá yechojcho xni'a de'e malán'.

⁶⁹ La' babene' par ničh zo to beṇá' napá yelá' guac par yebeje' chio'o xni'a de'e malán',

na' za' be'ená' lao dia che de'e Rei Dabin' ben' goquá xmos Diozán'.

⁷⁰ Chac can' gwna Diozán' len cho'a de'e profet ca' beṇá' ca' gwleje' par gwsa'aque' lažá' ne'ená' cana'ate.

⁷¹ Gwne' de que yosle' chio'o lao na' beṇá' contr checho ca' na' lao na' yoguá beṇá' chásá'ague'i chio'o.

⁷² Na' leczá gože' de'e xaxta'ocho ca' de que yeyašá' yeži'ilaže'e lega'aque' len xi'in dia chega'aque'.

Na' can' chone' na'a, chone' par ničh chac complir ca naquá de'en bene' lyebe gone' par gaquálene' chio'o.

⁷³ Ben Diozán' cuine' testigw lao de'e xaxta'ocho Abraanná' de que gaquáczá can' bene' lyeben'.

⁷⁴ Na' gwne' de que yosle' chio'o lao na' beṇá' contr ca' par ničh ca' gaquá güe'ela'ochone' sin cui žebcho.

⁷⁵ Na' gwne' gone' par ničh gaquá la'ažda'ochon' xi'ilažá' par len le'ená' na' gone' par ničh šeicho licha güe'ela'ochone' doxen yelá' mban chechon'.

⁷⁶ Nach Zequerian' gože' bida'oná':

Na' le' xi'ina', beṇáčan' yesá'áne' chio' de que naco' profet beṇá' choe' xtižá' Diozán',

Dioz ben' naquá le'ezelagüe beṇá' blao.

Yesá'áne' ca' chedá' le' cuialaogo' lao Xanchon' na' go'o xtiže'ene' par ničh nitá' beṇá' probnid par aso'elaogüe'ene' catá'an yide'.

⁷⁷ Egwsed əgwlo'ido' neto' can' chene'e Diozán' yebeje' chio'o xni'a de'e malán' na' can' chene'ene' yezi'ixene' xtolá'əcho ca', chio'o naccho beṇá' nasyon che'.

⁷⁸ Diozán' cheyašá' cheži'ilaže'e chio'o na' bachselé'e to beṇá' gaquálene' chio'o.

Na' gwxaquá'əlebe be'ená' ca be'eni' che bgüižán'.

⁷⁹ Le' gwzejni'ine' chio'o beṇách naquán' goncho par ničh žjəyezochon gan' zo Diozán' catá' gatcho,

na' əgwzejni'ine' chio'o beṇách naquán' so cuzcho binlo.

Can' gone' cue'e be'eni' lo'o yichjla'aždao' chio'o gwxaquá'əlebecho ca beṇá' chsa'aš lo'o de'e žcholán'.

⁸⁰ Na' Juanná' ca bcua' chcha'ogüe', zdate chaquəch yichjla'aždaogüe'en can' chene'e Diozán'. Na' Juanná' jsœ' latjə dašan'. Na' nan' nezo'e catá'an bžin ža gwzolaogüe' gwduxjui'e xtižá' Diozán' len beṇá' Izrael ca'.

2*Can' goquá catá'an goljə Jeso'osán'*

¹ Na' gwde de'e ca', na' ca tyempən' catá'an gwnabia' Sesar Augusto, bene' mendad te cuent na' əsa'alə' yiš balə beṇá' ža' to to yež de'e zjəchi' doxen ganə' chnabi'e. ² Na' bguale'e yišan' lao chnabia' Sirenio gan' nzi' Siria. Na' naquán' de'e nech de'en bguale'e yiš balə beṇá' ža' to to yež. ³ Nach yoguá'əlol beṇá'

jəya'aque' lažga'aque' jəsyə'əde cuinga'aque' cuent par gwsa'alə'əga'aque' yiš.
 4 Nach Jwsen' naque' dia che de'e Rei Dabin'. Na' beze'e Nasaret gan' mbane Galilean' par beyeje' syoda che de'e Rei Dabin' de'e nzi' Belen. Na' chi' syoda Belennə' gan' mbane Jodean'. 5 Beyeje' jəyede cuine' cuent na' zenche'e no'ol che' Marian', pero bitonə' yesə'əca'a ljuežje'. Na' Marian' bano'e bda'onə'. 6 Na' goquən' lao nite'e Belennə' bžin or par sane'. 7 Na' bi'i nechən' gwxane' goljbo' bi'i byo dao', na' blaže'əbo' lachə'. Na' gwlo'əbo' to lo'i gan' chsa'o bia yixə', chedə' bito bi latjə gwyo'och mesonnə' par lega'aque'.

Angl ca' boso'ozenene' beṇə' goye xilə' ca' de que bagoljə Goslan'

8 Na' lao že' na', le'e yixə' che Belen na'atezəczə ža' beṇə' goye xilə' nechəsə'əne'e chsa'ape' xilə' čhega'aque' ca'. 9 Na' angl che Xanchon' bžine' gan' nita' beṇə' goye xilə' ca', na' yelə' chey che'eni' che Diozən' gwyecjhən bse'eni'in gan' nite'ənə'. Na' besə'əžebchgü'e. 10 Na' gož anglən' lega'aque': —Bito žeble, na'a chixjo'ida' le'e to dižə' güen de'e yeba yezaquə'əlažə'əchgua yoguə'əloł beṇə'. 11 Lao' syoda che de'e Rei Dabin' bagoljə na'a ben' chac yebej beṇə' xni'a de'e malən'. Naque' Cristən' ben' bselə' Diozən' par gaquəlene' beṇəchan' na' naque' Xanchon'. 12 Par yežezele bda'onə' quinga naquə: Žjəyedi'ilebo' lažə'əbo' lachə' na' debo' lo'i gan' chsa'o bia yixə'.

13 Beyož gwna anglən' ca' le'e besə'əžinte angl zanch gan' zo angl nechən', za'aque' gan' zo Diozən'. Na' chso'elaogü'e le', chəsə'əne':

14 Lədoye'ela'och Diozən' ben' zo yoban'.

Na' lao yežlyon' gatə' yelə' so cuezə binlo entr beṇə' ca' chebei Diozən' lega'aque'.

15 Na' catə' besyə'əsa'ac angl ca' zjəya'aque' yoban', nach beṇə' goye xilə' ca' gwse' ljuežjga'aque': —Yeyejcho Belennə' žjəyegüiacho de'en bagoc, ca naquə Xanchon' bsele'e angl quinga bedəsə'ədixjue'ine' chio'o.

16 Nach besa'aces beṇə' goye xilə' ca' jəya'aque' Belennə', na' jəsyə'ədi'e Marian' len Jwsen' na' len bda'onə'. Na' bda'onə' debo' lo'i gan' chsa'o bia yixə' ca'. 17 Beyož besə'əle'ine' can' bagoquən', na' gwso'e dižə' che bda'onə' len yeziquə'əchlə beṇə' ca' naquə de'en gwse' angl ca' lega'aque'. 18 Na' yoguə'əloł beṇə' ca' əgwse'ene dižə' de'en gwsoe' beṇə' goye xilə' ca' besyə'əbanene'. 19 Na' Marian' leczə gwlo'o yichje' yoguə'əloł dižə' de'en gwsoe' beṇə' goye xilə' ca' na' bene' xbab lo'o yichjla'əždaogü'e'en bi zejennə'. 20 Nach besyə'əsa'ac beṇə' goye xilə' ca' chso'elaogü'e Diozən' na' chso'e le' yelə' bala'an' che yoguə'əloł de'en bagwse'ənene' na' babesə'əle'ine' ca' naquə de'en gož anglən' lega'aque'.

Family che Jeso'osən' jso'əbo' lo'o yo'odao' əblaona'

21 Catə' gwde xon' ža' na' jəsə'əzo'əbo' señy de'en ne' sirconsision na' bosə'əsi'e labo' Jeso'os, can' ben anglən' mendad catə' ze'e gua'alə Marian' lebo'.

22 Catə' gwde tyempən' babeyac Marian' xi'ilažə' len bda'onə' segon can' na lein' de'en bzoj de'e Moizezən', nach gosə'əlene'əbo' Jerosalennə' par jso'əbo' lao Diozən'. 23 Gwso'one' ca' chedə' nyojən le'e lein': “Yoguə' bi'i byo dao' bi'i nech cheyalə' gacbo' lao na' Diozən', na' yoguə' bia yixə' bia maš dao' bia nech leczə gaquəb lao na' Diozən'.” 24 Na' gwso'elaogü'e Diozən' gwso'one' can' na lei che Xancho Diozən', nyojən: “Cheyalə' gotle to csad ngolbexə o čhopə plomxtil.”

25-26 Na' Jerosalennə' gwzo to beṇə' byo le Simeon. Be'enan' gwyecze' bene' de'e güen lao Diozən' na' be'elaogü'e'ene', na' gwleze' batə'əquən' yidə Cristən'

ben' gwleĵ Xancho Diozən' par gaquəlene' beŋachən'. Na' Spirit che Diozən' gwzən lo'o yichjla'aždao' Simeonnə'. Na' bzene Spiritən' le' de que antslə ze'e gate' le'ine' Cristən'. ²⁷ Na' Spiritən' benən par niĉ gwyeje' yo'odao' əblaonə'. Na' zoe' yo'oda'onə' catə' besə'əžin xaxna' Jeso'osən' zjənĵene'ebə' par niĉ so'one' len lebo' can' na'lein'. ²⁸ Nach Simeonnə' gwĵene'ebə', nach be'elaogüe' Diozən' gože'ene':

²⁹ Na'a ža Xana' Dioz, baĉ goc can' gwnə'onə'.

Be' latjə yeyeda' binlo gan' zo'onə', nada' naca' beŋə' güen žin ĉhio',

³⁰ ĉhedə' bable'ida' ben' zedəyelej neto' xni'a de'e malən'.

³¹ Naque' ben' bžio' bia' əgwseĵo' par yoguə'əĵol beŋə'.

³² Na' cue'e be'eni' lo'o yichjla'aždao' beŋə' cui zjənaquə beŋə' Izrael par niĉ se'ejni'ine' xtižo'onə'.

Na' leczə gone' par niĉ beŋə' Izrael ca' yesə'əzi'e yeĵə' bala'an.

³³ Nach xabo'on len xna'abo'on besyə'əbanene' ca naquə dižə' de'en be' Simeonnə' ĉhebo'.

³⁴ Na' Simeonnə' gwŋabene' Diozən' gone' par niĉ gaquə güen ĉhega'aque', na' gože' Marian': —Beŋə' zan beŋə' Izrael ca' yesə'əbiayi'e ĉhedə' cui so'onĵilaže'e xi'ino' nga, na' zane' yesə'əzi'e yeĵə' mban zeĵicəne ĉhedə' so'onĵilaže'ene', na' beŋə' zan yoso'ožia yoso'onite'ene' catə' yesə'əzeze' ĉhe'.

³⁵ Na' gone' par niĉ gacbia' non' əgwzenag che Diozən' na' non' cui. Na' caczə ga chaz to cwšy gaquə lo'o yichjla'aždaogo'onə' tant əžaglaogo' de'en gac ĉhe'.

³⁶ Na' leczə gwzo to no'olə gwle Añy yo'odao' əblaonə', na' no'olən' ĉo'e xtižə Diozən'. Naque' xi'in' de'e Fanuel, na' naque' dia che de'e Aser. Bšagne'e catə'an naque' no'ol güego', pero na' gaž izga bguan be'en ĉhe'enə'. Na' Añyən' banaque' to beŋə' golə. ³⁷ Bagoc taplalj tap iz got be'en ĉhe'enə'. Cuiczə chebiže'e yo'odao' əblaonə'. Leĉgualə ĉo'elaogüe' Diozən' do ža do yel, xte gwyaz tgüejə cui gwdaogüe' par niĉ benche' orasyon lao Diozən'.

³⁸ Na' goquən' bgüiguə' Añyən' gan' nita' Jwsen' len Marian', na' be'e yeĵə' choxcwlen che Diozən' de'en baĉ bseĵe'e ben' gaquəlen nasyon Izraelən'. Na' be'e dižə' che Jeso'osən' len yoguə'əĵol beŋə' ca' ža' Jerosalennə' beŋə' ĉesə'əbeze' batə'əquən' əseĵə' Diozən' ben' gaquəlene' lega'aque'.

Jəya'aque' Nasaretən'

³⁹ Nach Jwsen' na' Marian' catə' beyož gwso'one' yoguə'əĵol de'en non lei che Diozən' mendad so'one', jəya'aque' lažga'aque' Nasaret gan' mbane Galilean'.

⁴⁰ Na' Jeso'osən' zda chcha'ogüe' na' zda chdipe'. Na' ca bcua' chcha'ogüe'ənə' zdach chejni'ichene', na' nži'ilažə' Diozən' le'.

Can' ben Jeso'osən' lo'o yo'odao' əblaonə'

⁴¹ Na' xaxne'e ca' yoguə' iz ĉja'aque' Ĵni pascw de'en ĉhalə' Jerosalennə'.

⁴² Šižin ize Jeso'osən' catə' gosə'əĉhe' xaxne'e ca' le' ja'aque' Jerosalennə'. Segon ca costombr che beŋə' Izrael ca' ĉja'aque' catə' ĉhalə' Ĵnin'. ⁴³ Na' catə' gwde Ĵninə' xaxne'e ca' besa'aque', pero Jeso'osən' bega'əne' Jerosalennə'. Na' xne'ənə' len Jwsen' bito gwsa'ache'ine', ⁴⁴ con gwso'one' xbab šə' bazjəyede' len beŋə' ca' nžagga'aque' txennə'. Na' tza nez babesa'ac xaxne'e ca' gwzoloao ĉhasyə'əyilje'ene' entr family na' migw ĉhega'aque' ca'. ⁴⁵ Pero bito besyə'əželene' le', nach besyə'əbi'e jəya'aque' Jerosalennə' de'e yoblə par žjəsyə'ədilje'ene'.

⁴⁶ Na' goquən' beyon žach besyə'əželene' Jeso'osən' lo'o yo'odao' əblaonə', ĉhi'e gwĉol beŋə' ca' ĉoso'osed ĉoso'olo'i lei de'en bzoj de'e Moizezən'.

Jeso'osən' chzenague' xtižə'əga'aque'enə' na' de'e zan chṇabene' lega'aque'.
 47 Na' yoguə'əlol beṇə' ca' choso'ozenag xtižə'enə' chəsyə'əbanene' che yelə'
 chejni'i che'enə' na' can' choži'e xtižə' beṇə' ca' choso'osed choso'olo'i
 lein'. 48 Na' cata' besə'əle'i xaxne'en le' besyə'əbanene', na' gož xne'en le':
 —Xi'indaogua'a, ḷbixchen' chondo' neto' ca'? Xəo' nga na' nada' bagwdato'
 beyiljto' le' na' de'e juisy de'e chaqueto'.

49 Nach Jeso'osən' gože' lega'aque': —ḷBixchen' cheyljle nada'? ḷEcuī nezele
 de que cheyalə' gona' de'en na Xə'anə' gona'anə'?

50 Pero xaxne'e ca' bito gwse'ejni'ine' bi zeje de'en gože' lega'aque'enə'.

51 Na' beyeje' Nasaretən' len xaxne'e ca', bzenague' chega'aque'. Na' gwlo'o
 yichj xne'enə' yoguə'əlol de'en goquən'. 52 Na' ca' naquə' zda gwyejni'iche
 Jeso'osən' na' zda gwcha'ochē', na' Diozən' zda bebeichene' le' na' leczə' ca'
 beṇə'ḷhən' zdach besyə'əbeichene' le'.

3

Juan ben' bḷhoa nis gwdixjui' dižə' güen dižə' cobə' che Diozən'

1 Catə' goc šino' iz chnabia' Sesar Tiberion', goc Ponsio Pilatən' gubernador
 che Jodean'. Na' goc Erodən' gubernador che Galilean', na' goc beṇə' biše'e
 Lipən' gubernador che Itorea na' che Traconite. Na' goc Lisaniās gubernador
 che Abilinia. 2 Nach Anas na' Caifas gwsə'aqueche' bḷoz əblao che beṇə'
 Izrael ca'. Iz na' xi'ṇ Zequerian', ben' gwle Juan, gwzoe' latjə dašən'
 na' Diozən' be'elene' le' dižə'. 3 Nach Juannə' gwyeje' yoguə'əlol yež de'e
 zjənyechj zjəmbi'i yao Jordannə', jətiḷjue'ine' yoguə' beṇə' de que cheyalə'
 yesyə'ədinjene' xtolə'əga'aque'enə' na' yesə'əṇabene' Diozən' əgwṇitlaogüe'en,
 na' yesə'əchoe' nis. 4 Juannə' bene' can' bzoj de'e profet Isaiazən' ben' be' xtižə'
 Diozən' cana'. Quinga nan:

To beṇə' əne' zižjo latjə dašən', əne': “Le'e so probnid par əgwzenagle che
 Xənchon' catə'an yide'.

Na' šə sole probnid par əgwzenagle che' catə'an yide',
 de'en gonle ca' gwxaquə'əleben can' chonle chxi' chloale nez ca' catə' chidə to
 beṇə' blao.

5 Le'e yoša' yichjla'ažda'olen'
 par nič gaquən ca to nez güen gan' baboso'ochixə' ya'a yao ca' par beyaquən
 to leli.

Na' gaquən ca to nez gan' baboso'oxi' baboso'oloe',
 na' bagosə'əchogüe' xiše'en par beyaquən liča.

6 Na' gwžin ža cata' yoguə'əlol beṇə' yesə'əle'ine' ben' selə' Diozən' par yebeje'
 beṇə' xni'a de'e malən'.”

7 Na' beṇə' zan ja'aque' gan' gwzo Juannə' par nič bḷhoe' lega'aque' nisən'.
 Na' Juannə' gože' lega'aque': —Le'e nacle beṇə' goxoayag na' naljele. ḷEchaquele
 de que gəaquə' yexonjele castigon' de'en əselə' Diozən' par le'e? 8 Cheyalə'
 gonle de'en naquə' güen par nič sa'acbe'i beṇə' yoblə de que baboša'
 yichjla'ažda'olen'. Na' bito gonle xbab de que Diozən' cui gone' le'e castigw
 che xtolə'əlen' laogüe de'en nacle xi'ṇ dia che de'e Abraannə'. Bito ṇacho
 de que lechguale chyažje Diozən' le'e. Gəaquə' gone' par nič yej quinga
 yesyə'əyaquən xi'ṇ dia che de'e Abraannə'. 9 Ca' naquə' le'e šə cui bi chonle can'
 chəzlažə' Diozən', gwxaquə'əlebele ca to yag frot de'e cui bi frot chbian'. Na'
 ca' naquə' yoguə'əte yag frot de'e cui bi frot chon', chəsə'əchog beṇə' len na'
 chəsə'əzeyen'en.

10 Nach beṇə' ca' chəsə'əzenag xtiže'enə' gosə'əṇabene' Juannə' gwse'ene': —¿Bi ca de'e cheyaḷə' gonto'?

11 Nach gože' lega'aque': —Ben' napə' chəpə' xadon, cheyaḷə' əgwnežjue' ton che beṇə' cui bi bi de che'. Na' leczə' ca' ben' de de'e gaogüe', cheyaḷə' əgwnežjue' che beṇə' cui bi bi de de'e gaogüe'.

12 Na' catə' beṇə' gochixjw ca' leczə' jəsə'əbigue'e par gwchoa Juannə' lega'aque' nis na' gwse'ene': —Maestr; ¿bi ca de'e cheyaḷə'əch gonto'?

13 Na' gože' lega'aque': —Bito əgwchixjwle de mazəchlə' ca de'en cheyaḷə' əgwchixjwle.

14 Na' beṇə' ca' zjənaque' soldad leczə' gosə'əṇabene' le' gwse'ene': —¿Chexa neto' za? ¿Bi ca de'e cheyaḷə'əch gonto'?

Nach Juannə' gože' lega'aque': —Bitoch əca'ale la fuers de'en de che beṇə', na' nic gacle testigw fals contr beṇə' yoblə' par əca'ale xmechga'aque'. Le'e gon banez len laxjwlen'.

15 Na' beṇə' Izrael ca' gwnitə' lez yidə' Cristən' ben' gwlej' Diozən' par gaqulene' nasyon chega'aque'enə', gwsa'aque'ne' lo'o yichjla'az daoga'aque' šə' Juannə' naque' be'enə'. 16 Na' Juannə' gocbe'ine' xbab chega'aque'enə' na' gože' yoguə'əga'aque': —Nada' de'e li chchoacza' beṇə' nis, pero na' ze'e yidə' ben' yonə' par niçh so Spirit che Diozən' lo'o yichjla'azda'ochon' na' nabi'an chio'o. Na' Spiritən' naquən ca yi' na' gwxi' gwloan yichjla'azda'ochon'. Ben' yidə' zaquə'əche' ca nada' na' bito zaca'a par gaca' xmoše'. 17 Be'enan' gone' len chio'o can' choncho catə' chdecho trigon' rner na' chzeycho yix bebən'. Na' šə' chonlilažə'əchone' yotobe' chio'o par niçh socho txen len le', na' beṇə' ca' cui chso'onlilažə' le' əsele'e lega'aque' lao yi' gabilən' de'en cuiczə' cheyol.

18 Na' de'e zanch de'e gwne Juannə' gwdixjue'ine' lega'aque' dižə' güen dižə' cobən' na' gwneyoine' lega'aque' se'ejle'en. 19 Nach Juannə' be'e dižə' che gubernador Erodən' ca naquə' de'e mal de'en babene'enə' beque'e Erodiasən' ca xo'ole'. La' Erodiasən' naque' xo'olə' Lip beṇə' bišə' Erodən'. Na' leczə' be'e Juannə' dižə' ca naquə' yoguə' de'e malən' babene'. 20 Na' catə' Erodən' benene' can' choe' Juannə' xtiže'enə' na' bene' yeto' de'e mal, gwlo'e Juannə' ližya.

Can' goquə' catə'ən gwchoa Jeso'osən' nis

21 Na' žlac ne'e chchoa Juannə' beṇə' nis, beṇə' zan ja'ac laogüe'enə' par bchoe' lega'aque' nisən' na' len Jeso'osən' gwchoe' nisən'. Na' lao orən' Jeso'osən' bene' orasyon na' le'e byaljwte yoban' na' ble'ine' gan' zo Diozən'.

22 Na' betj Spirit che Diozən' bžinən gwzon len le' na' ca orən' naquən ca to ngolbexə. Na' gož' Diozən' Jeso'osən': —Le' naco' Xi'ina', na' chacchgüeida' chio'. Cheba chezaquə'əlažə'əchgua' le'.

Dia che Jeso'osən'

23 Na' ca do šichoa ize Jeso'osən' catə' gwzolaogüe' bene' yoguə'əlol de'en zedeyene'. Na' beṇə' ca' gwnitə' na' gwso'one' xbab de que xi'in Jwse na' Jeso'osən'. Na' Jeso'osən' naque' xesoə' Eli. 24 Na' Elin' naque' xi'in Matat, na' Matatən' naque' xi'in Lebi, na' Lebin' naque' xi'in Melqui, na' Melquin' naque' xi'in Jana, na' Janan' naque' xi'in Jwse. 25 Na' Jwsen' naque' xi'in Matatias, na' Matatiasən' naque' xi'in Amos, na' Amosən' naque' xi'in Naom, na' Naonnə' naque' xi'in Ešli. 26 Na' Ešlin' naque' xi'in Nagai, na' Nagain' naque' xi'in Maat, na' Maatən' naque' xi'in Matatias, na' Matatiasən' naque' xi'in Semei, na' Semein' naque' xi'in Jwse, na' Jwsen' naque' xi'in Joda. 27 Na' Jodan' naque' xi'in Joana, na' Joanan' naque' xi'in Resə, na' Resan' naque' xi'in Sorobabel, na' Sorobabelən' naque' xi'in Salatiel. 28 Na' Salatielən'

naque' xi'in Neri, na' Nerin' naque' xi'in Melqui, na' Melquin' naque' xi'in Adi, na' Adin' naque' xi'in Cosam, na' Cosannə' naque' xi'in Elmodam, na' Elmodannə' naque' xi'in Er. ²⁹ Na' Erən' naque' xi'in Josue, na' Josuen' naque' xi'in Elieser, na' Elieserən' naque' xi'in Jorim, na' Jorinnə' naque' xi'in Matat. ³⁰ Na' Matatən' naque' xi'in Lebi, na' Lebin' naque' xi'in Simeon, na' Simeonnə' naque' xi'in Joda, na' Jodan' naque' xi'in Jwse, na' Jwsen' naque' xi'in Jonan, na' Jonannə' naque' xi'in Eliaquim. ³¹ Na' Eliaquinnə' naque' xi'in Melea, na' Melean' naque' xi'in Mainan, na' Mainannə' naque' xi'in Matata, na' Matatan' naque' xi'in Natan. ³² Na' Natannə' naque' xi'in Dabi, na' Dabin' naque' xi'in Isai, na' Isain' naque' xi'in Obed, na' Obedən' naque' xi'in Boos, na' Boosan' naque' xi'in Salmon, na' Salmonnə' naque' xi'in Naason. ³³ Na' Naasonnə' naque' xi'in Aminadab, na' Aminadabən' naque' xi'in Aram, na' Aranə' naque' xi'in Esrom, na' Esronnə' naque' xi'in Fares. Na' Faresən' naque' xi'in Joda, ³⁴ na' Jodan' naque' xi'in Jacob, na' Jacobən' naque' xi'in Isaac, na' Isaacquən' naque' xi'in Abraam, na' Abraannə' naque' xi'in Tare, na' Taren' naque' xi'in Nacor. ³⁵ Na' Nacorən' naque' xi'in Serog, na' Seroguən' naque' xi'in Ragau, na' Ragaun' naque' xi'in Peleg, na' Peleguən' naque' xi'in Eber. ³⁶ Na' Eberən' naque' xi'in Sala, na' Salan' naque' xi'in Cainan, na' Cainannə' naque' xi'in Arfacsad, na' Arfacsadən' naque' xi'in Sem, na' Sennə' naque' xi'in Noe, na' Noen' naque' xi'in Lamec. ³⁷ Na' Lamequən' naque' xi'in Matosalen, na' Matosalennə' naque' xi'in Enoc, na' Enoquən' naque' xi'in Jared, na' Jaredən' naque' xi'in Maalaleel. ³⁸ Na' Maalaleelən' naque' xi'in Cainan, na' Cainannə' naque' xi'in Enos, na' Enosən' naque' xi'in Set, na' Setən' naque' xi'in Adan, na' Adannə' naque' xi'in Dioz.

4

Gwxıye'enə' gwlo'oyelə'an Jeso'osən' gone' de'e mal

¹ Na' Spirit che Diozən' gwnabia'an yichjla'aždao' Jeso'osən'. Na' Jeso'osən' beze'e cho'a yao Jordannə', na' Spiritən' benən par niç gwıyeje' latjə daşən'. ² Choə ža gwzoe' latjə daşən', na' lao choə žan' gwıye'enə' gwlo'oyelə'an Jeso'osən' gone' de'e malən'. Na' lao de'e choə žan' bitobi gwdaogüe', na' catə' gwde choə žan' gwdone'. ³ Na' gož gwıye'enə' le': —Šə len' naco' Xi'in Diozən', gož yej nga yeyaquən yetxtıl.

⁴ Nach gož Jeso'osən' len: —Nyojczə Xtižə' Diozən' nan: “Caguə yelə' guao na'azən' əbane chio'o beṅač sino lecəə chyažjecho yoguə'əloł dižə' de'e na Diozən' par əbancho.”

⁵ Na' gwche' gwıye'enə' le' to lao ya'a sibə, na' žalnez blo'in le' yoguə' nasyon de'e zjəchi' lao yežlyon'. ⁶ Nach gožən le': —Doxen yelə' chnabia' de'e de lao yežlyo nga naquən lao na'a. Na' əgwnežjuə'an con no che'enda'. Goṅa' le' yelə' chnabia' čhia'anə' na' len yoguə' de'en naquə güen na' yoguə' de'e naquə de'e žialao čhia' ca' naquə chnabia'a nasyon ca' de'en zjəchi' yežlyo nga. ⁷ Šə le' güe'elaogo'o nada' yoguə'əloł de'e quinga əsa'acquən čhio'.

⁸ Nach Jeso'osən' gože' gwıye'enə': —Gwchi'izə' ca'alə' nga, Satanə. Nyojczən le'e Xtižə' Diozən' nan: “Cheyalə' šejni'alažə'əcho Xancho Diozən', na' tozə le' güe'ela'ocho.”

⁹ Nach gwıye'enə' gozche'en le' yichjo'o yo'odao' əblao de'en zo Jeros-alennə', na' gwlequən le' gan' naquə le'ezelaogüe sibə, na' gožen le': —Šə len' naco' Xi'in Diozən' bexitə' nga par che'elə, ¹⁰ la' nyojczən le'e Xtižə' Diozən': Ešelə' Diozən' angl che' ca' par əsa'aclene' le' na' əsa'ape' le'.

¹¹ Na' lecəə ca' nan:

Eso'oxe'e le' par niçh bito açhego'o no yej.

¹² Nach Jeso'osən' gože'en: —Łeczə ca' nyojczən le'e Xtižə' Diozən': "Bito con goncho Xancho Diozən' prueb šə leine' can' ne'enə'."

¹³ Beyož gotə'əbia' de que cui gwzoi gwxiye'enə' co'oyelə'an Jeso'osən' gone' de'e malən', bebi'izə'an šlož len le'.

Jeso'osən' gwzolaogüe' chyixju'e dižə' güen dižə' cobə che Diozən'

¹⁴ Nach Jeso'osən' beyeje' Galilean', na' goclen Spirit che Diozən' le' len yelə' guac cheinə'. Na' yoguə'əloł beņə' ža' yež de'en nyechj mbi'i Galilean' gwse'enene' che Jeso'osən'. ¹⁵ Nach Jeso'osən' bsd blo'ine' lega'aque' lo'o yo'odao' chega'aque' ca' na' yoguə'əloł beņə' ca' gwso'elaogüe'e Jeso'osən'.

Bežin Jeso'osən' Nasaretən'

¹⁶ Na' bežin Jeso'osən' Nasaret gan' gwcha'ogüe', na' ca costombr che' de'e de, gwyo'e yo'oda'onə' ža dezcanzən' na' gwzeche' blabe'. ¹⁷ Na' ben' yo'o lao ne'i yo'oda'onə' bnežjue'ene' rollo gan' nyoj de'en bzoj de'e profet Isaiazən', ben' be' xtižə' Diozən' cana'. Na' Jeso'osən' bsaše' rollon' na' beželene' partən' gan' nyojən:

¹⁸ Zo Spirit che Diozən' len nada',

na' Diozən' gwleje' nada' zedegua'a dižə' güen dižə' cobə len beņə' yašə'.

Na' babsele'e nada' zedeyena' par niçh yesyə'əyaclažə' beņə' ca' zjanitə' trist.

Na' zedətižjue'ida' beņə' ca' nitə' xni'a gwxiye'enə' de que yebeja' lega'aque' xni'einə'.

Na' zedeyena' par yesə'əle'i beņə' lchol,

na' beņə' chyi' chzaquə', zedeyena' par niçh cuich çhi' saque'e.

¹⁹ Na' zedetižjui'a de que babžin ža bžin or gaquəlen Diozən' beņəçhən'.

²⁰ Na' botobə Jeso'osən' rollon' na' benežjue'en ben' yo'o lao ne'i yo'oda'onə', na' Jeso'osən' gwchi'e. Nach yoguə' beņə' ca' nitə' yo'oda'onə' chosə'əgüiachgüe'ene'. ²¹ Na' gwzolaob e'e dižə'anə', gwne': —Ža neža bachac can' na Xtižə' Diozən' de'en babenele.

²² Na' yoguə' beņə' ca' gwse'ene dižə' de'en be'enə' besyə'əbanene' catec mba naquə xtižə' Jeso'osən', na' gwso'e dižə' güen che'enə'. Na' gwse' ljuežjga'aque': —Łecaguə bengan' xi' in Jwsen'?

²³ Nach gož Jeso'osən' lega'aque': —Šəquə güe'ele nada' can' na dicho çhelen' de'en na: "Beņə' güen rmech le', beyon cuino'." Na' güe'eljalə nada': "De'en babeneto' beno' Capernaum de'e zaquə' yebane beņə', łeczə can' cheyalə' gono' lažcho nga'."

²⁴ Nach goze'e lega'aque': —De'e li chnia' le'e, beņə' gwlaž che beņə' güe' xtižə' Diozən' bito chse'ejle'e che'. ²⁵ Can' goquə ca tyemp che profet Liazən' bito bi bi yejw goquə šon iz yo'o gašja, na' goc bgün juisy chega'aque' doxen gan' zelao mbane Izraelən'. De'e li chnia' le'e, gwnitə' zan no'olə gozebə Izraelən' cana'. ²⁶ Pero bito bselə' Diozən' Liazən' par gaquəlene' ni to lega'aque'. Bselə'ene' yetolə yež de'en nzi' Sarepta ga mbane Sidon par goclene' to no'olə gozebə. ²⁷ Na' łeczə can' goquə tyemp che de'e profet Lesion' gwnitə' zan beņə' Izraelən' beņə' gwsa'acšene len yižgüe' de'en ne' lepr. Ni to lega'aque' cui beyon Lesion'. Tozə Naaman beņə' Siria beyon Lesion'.

²⁸ Na' yoguə' beņə' ca' ža' yo'oda'onə' catə' gwse'enene' dižə' quinga besə'əža'achgüe'. ²⁹ Na' le'e besyə'əzoža'ate' na' besyə'əbeje' Jeso'osən' syodan' na' gosa'əche'ene' to lao ya'a galə'əzə gan' chi' syodan' gwse'ene'ene' yoso'oxope'ene' par che'elə, pero bito goquə bi so'onene' le'. ³⁰ Con beza' Jeso'osən' bedie' gwcholga'aque'enə'.

Jeso'osən' bebeje' de'e xio' de'en yo'o yaz yichjla'aždao' to beṇə'

³¹ Na' jsoe' syoda Capernaum gan' mbane Galilean'. Na' yogua' ža dezcanzən' bsed blo'ine' beṇə' ca' ža' lo'o yo'oda'onə'. ³² Na' beṇə' ca' besya'əbanene' ca' naquə de'en bsed əblo'ine' lega'aque' čhedə' bsed blo'ine' lega'aque' ca'acžə to beṇə' banded gačjw gwche'.

³³ Lo'o yo'odao' na' gwzo to beṇə' yo'o yaz de'e xio' yichjla'aždaogüe'enə'. Na' bgosya'an be'ena' gwan: ³⁴ —Ljoyeto'onə'. Partla le', partla neto' Jeso'os beṇə' Nasaret. ĆEzedežiayi'o neto'onə'? Nezczato' no le': Le' naco' beṇə' la'aždao' xi'ilažə' juisy na' Diozən' bsele'e le'.

³⁵ Jeso'osən' gwdile' de'e xi'onə' na' gože'en: —Sšago'. Bechoj yichjla'aždao' benga.

Na' bchix de'e xi'onə' be'ena' gwchol beṇə' ca' zjəža'anə' nach bechojən, pero bito benen le' zi'. ³⁶ Na' lechguale besya'əbane beṇə' ca' nach gwse' ljuējga'aque': —Nactequan' con gwne' ca' na' bechoj de'e xi'onə' de'en yo'o yaz yichjla'aždao' be'ena'. Nachbia' nape' yelə' chnabia' na' yelə' guac de'en chone' mendad yesya'əchoj de'e xio' ca' na' chesya'əchojən.

³⁷ Na' ca' naquə de'en ben Jeso'osən' gosə' gwłaljə dižə'anə' doxen Galilean', na' len yež ca' de'en zjənyechj zjəmbi'i galə'əzə Galilean'.

Jeso'osən' beyone' taobi'in čhe Simonṇə'

³⁸ Na' catə' beze'e yo'oda'onə', na' gwyeje' liž Simonṇə'. Na' taobin' čhe Simonṇə' chacšenene' yo'ochgüe' de'e la na' gwsə'olgižə' Jeso'osən' yeyone' no'olən'. ³⁹ Na' Jeso'osən' gwzeche' cuite' gan' de'ena' na' bcheque'e gwdile' de'e lanə' par bechojən no'olən'. Nach taobi'in čhe Simonṇə' le'e beyaste' na' goclene' beṇə' ca'.

Jeso'osən' beyone' beṇə' zan

⁴⁰ Na' catə' bachen bgüižən', yogua' beṇə' gosə'əče'e con beṇə' chse'i gwde gwde yižgüe' jso'ene' lao Jeso'osən'. Na' Jeso'osən' gwṇoa ne'en yichj to toga'aque' na' beyone' lega'aque'. ⁴¹ Na' leczə bebej Jeso'osən' de'e xio' ca' zjəyo'o zjəyaz lo'o yichjla'aždao' beṇə' zan ca'. Na' besya'əchojən gosə'anən zizjo: —Len' naco' Xi'ij Diozən'.

Jeso'osən' gwdile' lega'aquan na' bito be'e latjə yesə'anən čhedə' zjənezczen de que naque' Cristən' ben' gwlejš Diozən' par gaquəlene' beṇə'čən'.

Jeso'osən' gwde' doxenlə Galilean' bsed blo'ine'

⁴² Na' beteyo catə' gwye'eni', beze'e na' gwyeje' to latjə gan' notono nla'. Na' beṇə' ca' besya'əyllje'ene' na' ja'aque' gan' zoe'ena'. Na' bito gwse'ene' yeza' Jeso'osən' lažga'aque'ena'. ⁴³ Jeso'osən' gože' lega'aque': —Lezczə beṇə' ca' nita' syoda ca' yelə' cheyalə' zjətixjue'iga'acda'ane' dižə' güen dižə' cobən' de que Diozən' nabi'e con nota'ətezə beṇə' əsoe' latjə. Diozən' bsele'e nada' par nič zjətixjue'iga'acda'ane'.

⁴⁴ Ca' goquən' Jeso'osən' gwde' to to yežən' gan' mbane Galilean' na' lo'o yo'odao' čhega'aque' ca' bsed blo'ine' lega'aque'.

5*Jeso'osən' bene' par nič gosə'əzene' bia zan bel'ya'a*

¹ Na' goquən' lao zecha Jeso'osən' cho'a nisdəon' de'en nzi' Genesaret, gosə'əbigua' beṇə' zan par bosə'ozenague' xtizə' Diozən' de'en be'ena'. ² Na' Jeso'osən' ble'ine' nita' čhopə barcw dao' cho'a nisən'. Na' beṇə' gwxcn bel'ya'a ca' bač besə'əžaše' lo'o barcw ca' na' bachesya'əyibe' yixjw bel

chega'aque'enə'. ³ Na' Jeso'osən' gwyo'e lo'o barcw che Simonnə' na' gwṇabene' le' gocwlen par niç bžigue'e barcw che'enə' latə' lo'o nisən'. Na' gwche' Jeso'osən' lo'o barcon' nach bsed blo'ine' beṇə' ca'. ⁴ Na' ca beyož be'e dižə'anə' nach gože' Simonnə': —Bžiguə'əch barcw chio'onə' gan' naquə nisən' zitzjoch, na' le'e əgwzələ' yixjw chelen' par senle belən'.

⁵ Nach Simonnə' gože' Jeso'osən': —Maestr, babento' žin bedo yel na' ni to cono no bdole'eto'. Pero laogüe de'e bagwnao' le' ca', yoszələ'əchto' yixjw quinga.

⁶ Na' bosə'əzələ'e yixjw chega'aque'enə', na' cata' besyə'əbejga'aque'en zjənž'a'achan belən' yelezə yesə'əchezə'an. ⁷ Na' beṇə' ca' gwnitə' lo'o barcw che Simonnə' gwsa'axe' beṇə' ljuežjga'aque' ca' zjəža' lo'o barcon' yeto par ədžse'elene' lega'aque'. Na' cata' besə'əžin beṇə' ca' na' bosyo'osš'a'ache' barcw ca' xte ca' baç gwzoloa chse'etjən xan nisən'. ⁸ Nach Simonnə' ben' leczə le Bed cata' ble'ine' can' goquən', bzo xibe' lao Jeso'osən' na' gože'ene': —Bebi'izə'əšga len nada' Xana', chedə' la' naca' to beṇə' güen de'e mal.

⁹ Gwne' ca' chedə' le' txen len beṇə' ca' ža'alene' lo'o barcon' besyə'əbanchgüeine' ca' naquən' gosə'əzene' bel zan ca'. ¹⁰ Na' leczə ca' besyə'əbane xi'ṇ Sebedeon' çhopə bišə'əte Jacobən' len Juannə', beṇə' ca' chso'on žin txen len Simonnə'. Nach Jeso'osən' gože' Simonnə': —Bito žebo'. Le' naco' beṇə' gwxen bel. Pero ṇa'a gaco' beṇə' güe' xtizə'a, na' gono' par niç so'ombia' beṇə' nada'.

¹¹ Na' cata' besyə'əžinlene' barcw ca' yo biž, gosə'əbejyichje'en na' len yoguə' šinlazga'aque' nach jəsə'ənaogüe' Jeso'osən'.

Jeso'osən' beyone' to beṇə' che'i yizgüe' de'en nzi' lepr

¹² Na' goquən' cata' zo Jeso'osən' to syoda, bžin to beṇə' chacšenchgüeine' len yizgüe' de'en ne' lepr. Na' be'ena' cata' ble'ine' Jeso'osən' bzo xibe' laogüe'ena', na' belgüiže'ene' gože'ene': —Xana', gonšguei ben par niç yeyacda'.

¹³ Nach Jeso'osən' bli ne'ena' gwdane'ene' na' gože'ene': —Guacczə beyaque. Na' le'e beyacteine' ca' naquə yizgüe' de'en che'ine'ena'. ¹⁴ Na' Jeso'osən' bene' mendad ni tozə cui no no güe'elene' dižə' ca' naquə de'en babene' len le', na' gože'ene': —Gwyey lao bçozən' niç le'ine' de que baç beyacdo'. Na' gwnežjo'one' to bia yixə' gote' lao Diozən' ca' de'en non de'e Moizezən' mendad par niç yesə'əneze beṇə' de que babeyacdo'ona'.

¹⁵ Na' tža tža gwdach dižə' ca' naquə miłagr ca' de'en chon Jeso'osən'. Na' beṇə' zan besə'ədopə besə'əžague' par bosə'əzenague' xtizə' Jeso'osən' na' par niç beyone' con beṇə' ca' chsa'acšene ca' naquə yizgüe' de'en chse'ine'. ¹⁶ Na' tš'i' güeja bechoj Jeso'osən' beyeje' latjə dašən' par jəyene' orasyonnə'.

Jeso'osən' beyone' to beṇə' nat to part cuerp che'ena'

¹⁷ Na' goquən' to ža zo Jeso'osən' lo'o yo'o gan' zo'e'ena' chsed chlo'ine' beṇə'. Na' galə'əzə zjəchi' to çhopə beṇə' Izrael beṇə' ca' babesə'əchoj zjənzi' fariseo par ni çhe can' choso'osed choso'olo'ine'. Na' yebał beṇə' choso'osed choso'olo'i lei de'en bzoj de'e Moizezən' zjəlene' lega'aque'. Beṇə' ca' ža' na' za'aque' yoguə'əloł yež gan' mbane Galilean' len Jodean', na' leczə bałe' za'aque' syoda Jerosalennə'. Na' bosə'əzenague' dižə' de'en be' Jeso'osən'. Na' yelə' guac che Xancho Diozən' gwzon len Jeso'osən' par beyone' beṇə' güe' ca'. ¹⁸ Na' besə'əžin xonj beṇə' zjənlene' to beṇə' nat to part cuerp che'ena', zjənçoxe'ene' to lao cam dao'. Na' gwsa'acłaze'e yesə'ədie' na' əžjso'ene' lao Jeso'osən'. ¹⁹ Na' tant beṇə' zan ža' caguə goquə yesə'əžinlene' beṇə' güe'ena' gan' zo Jeso'osən'. Na' beṇə' ca' gwse'epe' yichjo'olə par bosə'osaljue' na'

boso'oletje'ene' len xcame'ena' nič bžine' lao Jeso'osən' gwchol beṇə' zan ca'.
 20 Ca naquə gočbe'i Jeso'osən' de que gwso'onlilaže'ene', gože' beṇə' güe'ena':
 —Babezi'ixena' xtolə'onə'.

21 Na' beṇə' ca' choso'osed choso'olo'i lei de'en bzoj de'e Moizezən' na' beṇə'
 fariseo ca' gwzola chso'one' xbab: “Benga chžia chnite'e Diozən' de'en chon
 cuine' ca Dioz. Notono no gaquə yezi'ixen xtolə' beṇəchən' šə caguə tozə
 Diozən'.”

22 Jeso'osən' gočbe'ine' xbabən' de'en gwso'one'ena' nach gože' lega'aque':
 —¿Bixchen' chonle xbabən' ca' lo'o yichjla'azda'olena'? 23 Šə con yapa'ane'
 de que babezi'ixena' xtolə'ena', bito nezele šə napa' yelə' gwnabia' par
 yezi'ixena'an. Pero šə yapa'ane': “Gwyas na' gwda”, guatə'əbia' šə napa'
 yelə' gwnabia'anə' par gaquə can' nia'anə'. 24 De'e nga gona' par nič ənezele
 de que napa' yelə' gwnabia' lao yežlyo nga par yezi'ixena' xtolə' beṇəchən',
 nadan' naca' ben' bsələ' Diozən' golja' beṇəch.

Nach gože' beṇə' güe'ena': —Gwyas, beyoa' xcamo'onə' na' beyej ližo'onə' to
 šao' to güen.

25 Na' le'e gwyasseste be'ena', chosə'əgüiate' beṇə' ca' nita'əna'. Nach beyoa'
 xcame'ena' gan' xoe'ena' beze'e zjəyede' liže' cho'elaogüe'e Diozən'. 26 Na'
 yoguə'əloj beṇə' ca' ža'ana' besyə'əbanene' na' gwso'elaogüe'e Diozən'. Na' do
 chžebga'aque' gosə'əne': —Na'a bable'icho to de'e zaquə' yebanecho.

Jeso'osən' gwleje' Lebin' par gwlene' disipl che' ca'

27 Gwde na' beza' Jeso'osən' na' ble'ine' to beṇə' gočixjw beṇə' le Lebi, chi'e
 latjə gan' chčixjue'ena'. Na' Jeso'osən' gože'ene': —Da len nada'.

28 Nach be'ena' le'e gwwoža'ate' gwlejyichje' yoguə' šinlaze' na' gweyjlene'
 Jeso'osən'.

29 Nach Lebin' bene' to lni xen liže'ena' par Jeso'osən'. Na' ja'ac beṇə' zan
 beṇə' gočixjw ca' na' beṇə' yeziquə'əchlə na' gosə'əbe'elene' lega'aque' cho'a
 mesən' par gwsa'ogüe'. 30 Na' beṇə' ca' choso'osed choso'olo'i lei de'en bzoj
 de'e Moizezən' na' len beṇə' fariseo ca' gwsa'acyože' disipl che' Jeso'osən',
 gwse'e lega'aque': —Malən' chonle che'ej chaole txen len beṇə' gočixjw na'
 nochlə beṇə' güen de'e mal ca' beṇə' cui chonlento' txen.

31 Jeso'osən' gože' lega'aque': —Benə' cui chsa'acšene bito chəsə'əyažjene'
 beṇə' güen rmech. Beṇə' ca' chsa'acšene lega'aque'ena' chəsə'əyažjene' beṇə'
 güen rmech. 32 Nada' za'a zedəyena' par nič beṇə' ca' zjəneze de que
 zjənaque' beṇə' güen de'e mal yesyə'ədinjene' xtolə'əga'aque'ena', pero
 bito zedeyena' par nič beṇə' ca' chsa'aquene' bazjənaque' beṇə' güen
 yesyə'ədinjene' xtolə'əga'aque'ena'.

Gosə'ənabene' Jeso'osən' bixchen' bito gwleje' tgüejə cui əse'ej əsa'ogüe'

33 Nach yebałə beṇə' gwse'ene': —Zan las neto' disipl che' Juanna' na' lecəzə
 ca' disipl che' beṇə' fariseo ca' chzoto' sin cui che'ej chaoto' par cho'ela'oto'
 Diozən' na' choncəto' orasyon. Pero na' disipl chio' ca' chse'ej chsa'ogüe'.
 ¿Bixchen' ža?

34 Nach gož Jeso'osən' lega'aque': —Catə' chac to yelə' gošagna' beṇə' migw
 che' be'ena' chšagna'anə' chse'ej chsa'ogüe'. Na' ca'aczən' naquən len nada' na'
 len disipl chia' ca', chse'ej chsa'ogüe' lao ne'e zoa' len lega'aque'. 35 Catə'əchən'
 əžin ža yesə'əche'əxaxj beṇə' contr chia' ca' nada', cana'achən' əchoj catə' bito
 əse'ej əsa'o disipl chia' ca'.

Jeso'osən' gwne' ca' bsaquə'əlebe cuine' ca' beṇə' gošagna', na' disipl che' ca'
 ca' beṇə' migw che' beṇə' gošagna'anə'.

³⁶ Na' gozo'elene' lega'aque' to jempl par nich gwsa'acbe'ine' de que bito gaquə yesə'ənaogüe' costombr gol čhega'aque' na' yesə'ənaotie' de'en chsed chlo'ine'. Gože' lega'aque': —Notono beṇə' zo beṇə' chčeze'e xa cobe'en na' yode'en xa gole'enə'. Šə gone' ca' la' gw̄x̄inje' xa cobe' na'anə' na' xa gole'en bito gaquən lebe len pedas xa cobe'enə'. ³⁷ Na' leczə ca' notono zo beṇə' chgue'e bino cobən' lo'o yid golə. Šə gone' ca' ža, bino cobən' əchezə'an yid golən' na' laljə binon' na' cuiayi' yidən'. ³⁸ Cle la' cheyalə' que'e bino cobən' lo'o yid cobə. ³⁹ Na' ca naquə beṇə' bačh yo'olaogüe' che'eje' bino golən' bito yene'ene' ye'eje' bino cobən', chedə' əne': "Bino golən' naquəchən güen." Leczə can' naquən len beṇə' bačh yo'o yichje' costombr gol čhe'enə', bito yene'ene' gwzenague' che de'e cobən'.

6

Ža dezcanz boso'olečj disipl ca' trigon' par gwsa'ogüe'en

¹ Na' gozaquən to ža dezcanz Jeso'osən' gwdie' len disipl che' ca' gan' nyaž trigon'. Nach disipl che' ca' gosə'əlečje' trigon', na' gosə'əxobe'en, na' gwsa'ogüe'en. ² Nach besə'əle'i bałə beṇə' fariseo ca' can' gwso'on disipl ca' na' gwse'e lega'aque': —čBixčhen' chonle de'en bito de lsens goncho ža dezcanzən'?

³ Na' Jeso'osən' gože' lega'aque': —čEcabi za'alazə'əle de'en bablable can' ben de'e Rei Dabin' cata' le' na' beṇə' ljuežje' ca' gosə'ədone'? ⁴ Gwyeje' lo'o yo'oda' əblaonə' na' gwxi'e yetxtil de'en bazjəncua' bχoz ca' par Diozən', na' gwdaogüe'en len beṇə' ljuežje' ca' la'anə'əczə cui zjənaque' bχoz. Na' yetxtilən' cui de lsens par gao con to beṇə' len, letg bχoz ca' chac əsa'ogüe'en.

⁵ Na' leczə gwna Jeso'osən': —Naquən lao na'a ənia' bin' naquən güen goncho ža dezcanzən', nada' naca' ben' bselə' Diozən' golja' beṇəch.

Beyaque to beṇə' mbižə šla'a ne'en

⁶ Na' yeto ža dezcanz gozeje' lo'o yo'oda'onə' na' bsd blo'ine' beṇə' ca' ža'anə'. Na' entr beṇə' ca' ža'anə' len to beṇə' bambižə ne'e lichan'. ⁷ Na' beṇə' ca' choso'osed choso'olo'i lei de'en bzoj de'e Moizezan' na' beṇə' fariseo ca' nite'e na' chosə'əgüiateze' Jeso'osən', chəsə'əbeze' šə goyone' be'enə' ža dezcanzən' par nich əsa'ogüe' xya contr le'. ⁸ Na' goche'i Jeso'osən' xbab čhega'aque'enə' na' gože' ben' mbižə ne'inə': —Da ngalə.

Nach bgüiguə' be'enə' gwzeche' laogüe'enə'. ⁹ Na' Jeso'osən' gože' lega'aque': —Le'e gonšč xbab čhelen' naquən na' lein'. čEnan goncho de'e güen ža dezcanzən', o šə nan goncho de'e mal? čEnan goncho par nich cui sa'at beṇə' o šə nan goncho par nich sa'ate'?

¹⁰ Jeso'osən' bgüie' yogue'e nach gože' be'enə': —Bli' na'onə'.

Nach bli' na' be'enə', na' beyaquen. ¹¹ Na' beṇə' ca' choso'osed choso'olo'i lein' na' beṇə' fariseo ca' lechguale besə'əže'e, na' gwzola' boso'oxi'e entr lega'aque' naclə so'one' len Jeso'osən'.

Jeso'osən' gwleje' šiziṇ beṇə' bsi'e apostol

¹² Na' to ža gozej Jeso'osən' lao ya'an jene' orasyon. Na' bedo yel bene' orasyon lao Diozən'. ¹³ Na' cata' gwye'eni'inə' bolgüiže' disipl ca' par gosə'əbigue'e gan' zoe'enə' nach gwleje' šiziṇe' na' əbsi'e lega'aque' apostol. ¹⁴ Na' beṇə' quingan' gwleje': Simon ben' bsi'e Bed, na' Ndrəs beṇə' bišə' Bedən', na' Jacob, na' Juan, na' Lip, na' Bartolome, ¹⁵ na' Matio, na' Tomas, na' Jacob xi'in Alfeo, na' Simon Selote, ¹⁶ na' Jodas xi'in Jacob, nach Jod Iscariot ben' əbdie' Jeso'osən' lao na' beṇə' contr ca'.

Jeso'osən' bzejni'ine' beṇə' dao' beṇə' zil

17 Na' beyetje' ya'anə' len lega'aque' na' gwzeche' gan' naquə' lašə' len disipl che' ca'. Na' lecəə nitə' beṇə' zan beṇə' za'ac doxen Jodean', do Jerosalenna' na' do gan' mbane Tiro na' Sidon. Na' Tiron' len Sidonna' zjəchi'in cho'a nisda'onə'. Na' entr beṇə' ca' nitə' choso'ozenag xtižə' Jeso'osən' zjəlen balə beṇə' chse'i yižgüe', na' Jeso'osən' beyone' lega'aque'. 18 Na' beṇə' ca' zjəyo'o zjəyaz de'e xio' yichjla'aždaoga'aque'ena' Jeso'osən' bebeje' de'e xio' ca' zjəyo'o zjəyaze'. 19 Na' yoguə' beṇə' besə'əyiljlaže'e naclə so'one' par niç yesə'əlapə' na'aga'aque' le' çhedə' len yelə' guac che'ena' chone' par chega'a yižgüe' de'en chse'i to toga'aque'.

Non' zo mbalaz na' non' cui zo mbalaz

20 Na' Jeso'osən' gwlis laogüe'ena' bgüie' disipl che' ca' na' gože' lega'aque' —Mbalaz zo le'e beṇə' yašə' çhedə' cho'ele latjə chnabia' Diozən' le'e.

21 Mbalaz so le'e chdonle ṇa'a, çhedə' gwžin ža catə' cuich tonle.

Na' mbalaz so le'e chbežle ṇa'a, çhedə' Diozən' gone' par niç yebeile.

22 Nada' naca' ben' bselə' Diozən' golja' beṇə' le'e, na' šə chesyə'əbeje' le'e lo'o yo'odao' chega'aque'ena', na' šə choso'ožia choso'onite'e le'e, na' šə chəsə'əne' de que nacle beṇə' mal. 23 Leyebeichgüei catə'an chac de'e quinga, na' le'e so mbalaz, çhedə' Diozən' gone' par niç gaquəchgua de'e güen çhele catə' yežinle gan' zoe'ena'. Can' chso'onene' le'e ca'aczən' gwso'one de'e xaxta'oga'aque'ena' de'e profet ca' gwso'e xtižə' Diozən' cana'.

24 Pero probchguazə le'e beṇə' gwni'a. Chac güen çhele ṇa'a, pero caguə par zejlicanen' gaquə güen çhele.

25 Probchguazə le'e dechgua de'e chaole ṇa'a. Gwžin ža catə' cuich bi gatə' çhele.

Probchguazə le'e zole legr ṇa'a. Gwžin ža catə' yegüine'ele na' cuežyašə'əle.

26 Probchguazə le'e chso'elao' yoguə'əloj beṇə' le'e. Ca'aczən' gwso'elao' de'e xaxta'oga'aque' profet goxoayag ca'.

Cheyalə' gaquecho che beṇə' contr checho

27 Pero le'e chzenagle çhia', le'e gaque che beṇə' contr çhele ca', le'e gontezə le'e gon de'e güen len beṇə' ca' chəsə'əgue'i le'e. 28 Le'e nabteza le'e ṇab par niç beṇə' ca' chso'on contr le'e nite'e mbalaz. Le'e so le'e gon orasyon par beṇə' ca' choso'ožia le'e xyəçhol. 29 Šə to beṇə' tie' xaguə'əlen' šla'a, le'e güe'e de'en yešla'a. Šə to beṇə' aque'e xadon çhelen' la fuers, legüe' latjə çhine' len xcamislen'. 30 Notə'ətezə beṇə' bi ṇabene' le'e, gwnežjwlene'en. Šə to beṇə' aque'e bitə'ətezə de'en de çhele, bito yənaben. 31 Con yoguə' de'e güen de'e çhene'ele so'on beṇə'ənen' len le'e, con ca'atezəczən' cheyalə' gonle len lega'aque'.

32 Šə porzə chaquele che beṇə' ca' chsa'aque çhele, çbixa yejlaotgualen'? Le'egatezə ca' chso'on beṇə' güen de'e mal ca', chsa'aque' che beṇə' ca' chsa'aque chega'aque'. 33 Lecəə šə chonle de'e güen porzə len beṇə' ca' chso'on de'e güen len le'e, çbixa yejlaotgualen'? Le'egatezə can' chso'on beṇə' güen de'e mal ca'. 34 Šə porzə chbejle bi de'en chbejle len beṇə' sole lez yesyə'əyone'en le'e, çbixa yejlaotgualen'? Le'egatezə can' chso'on beṇə' güen de'e malən', chesə'əbeje' bi de'en chesə'əbeje' lježjga'aque' na' nite' lez yesyə'ənežjue'en. 35 Pero na' le'e ža, le'e so le'e gaque che beṇə' contr çhele ca', na' le'e so le'e gon de'e güen. Na' le'e so le'e cuej bi de'en cuejle beṇə' na' bito sole lez

yesyə'əyone'en. Šə gonle ca', gwlo'ele de que nacle xi'in Dioz ben' naquə le'ezelaogüe beṇə' blao, na' Diozən' gone' le'e yelə' bala'an xen. Le'enə' naque' gaxjwlažə' len beṇə' ca' cui chso'e yelə' choxwlen che' na' yezi'iquə'achlə beṇə' güen de'e mal ca'. ³⁶ Cheyalə' yeyašə' yezi'ilazə'əle ljuežj beṇə'chle ca' Xachon' ben' zo yoban' cheyašə' cheži'ilazə'e'e yoguə' beṇə'chən'.

Bito cheyalə' nacho che beṇə' de que zjənapə' dolə'

³⁷ Bito gonle xbab de que zaquə'əle par choglaolen che beṇə' de que zjənapə' dolə'. Šə choglaolen che beṇə' de que zjənapə' dolə', le'egatezə ca' Diozən' choglaogüe'en chele de que naple dolə'. Na' bito bi yosbague'ele beṇə' de que zjənapə' dolə' par nič Diozən' bito bi yosbague'ene' le'e de que naple dolə'. Le'e so le'e yezi'ixen che beṇə' par nič Diozən' yezi'ixene' chele. ³⁸ Le'e so le'e gwnežjo beṇə' šə bi de'en chsə'əyazjəne'. Can' chso'on balə beṇə' lechguale nale'e choso'ochixe' bi de'en chso'ote'e, chsə'əchiše'e lao medid chega'aque'en na' choso'osi'inse'en na' chso'one' xte ca' chezoya'an, ca'aczən' cheyalə' gonle gwnežjwle bi de'en chsə'əyazjə beṇə' par nič leczə ca' gon Diozən' len le'e.

³⁹ Nach Jeso'osən' be'elene' beṇə' ca' ža'anə' yeto jempl. Na' bsaquə'əlebene' beṇə' fariseo ca' na' beṇə' ca' choso'osed choso'olo'i lein' ca' beṇə' lchəl chedə' bito gwse'ejni'ine' de'en naquə de'e li na' de'e na'anə' bito goquə yoso'osed yoso'olo'ine'en beṇə' yoblə. Na' gwne': —¿Eguaquə to beṇə' lchəl cue'e nez yeto beṇə' lcholan'? Bito gague'. Nezecho de que txeṇ žjəsə'əbixe' to lo'o yech. ⁴⁰ Šə to beṇə' chsede' len to maestr, bito nacho guaquə əgwsedene' maestrən'. Na' la'anə'əczə šə ben' chsed ta' yichje' yoguə'əlol de'en əgwlo'i maestrən' le', bito gague' beṇə' si'inč ca' maestrən', sino cachozəczə gague'.

⁴¹ Chle'ile güe' dao' de'en žia cožə' beṇə' ljuežjle na' cabi chele'ile güe' xen de'en žia cožə'əlen'. ⁴² Che' beṇə' ljuežjle: “Be' latjə gona' rmech güe' daon' de'en žia cožə'o”, na' bito chonle rmech güe' xen de'en žia cožə'əlen'. Beṇə' goxoayag le'e, zgua'atec le'e gon rmech güe' xennə' de'en žia cožə'əlen' na' techlə ənezele bi rmechən' chyažjele par gonle rmech güe' daon' de'en žia cožə' beṇə' ljuežjlen'.

De'en choncho chlo'in bin' yo'o lo'o yichjla'azda'ochon'

⁴³ Bito nacho de que to yag frot güen chbian frot de'e cui naquə güen, na' nic ənacho de que yag frot de'en cui naquə güen chbian frot güen. ⁴⁴ Segon can' naquə frot de'en chbia to to yaguən' nezecho bi clas yaguən'. Yag yešə' bito chbian yixgüion', nic yag bisga' chbian obas. ⁴⁵ To beṇə' la'aždao' xi'ilažə' chone' de'e güen, chedə' la' can' nan lo'o yichjla'azda'ogüe' nan' chone'. Na' ben' chon de'e mal chone' ca' chedə' chzenague' che la'ažda'omale'ena'. Na' yoguə'əte dižə' de'en chchoj cho'achon' la' lo'o yichjla'azda'ochə na'anə' za'an.

Chopə beṇə', na' yo'o de'en gwsə'on to toe'

⁴⁶ ¿Bixchen' che'ele nada' “Xana””, na' cui chonle can' nona' mendadən'? ⁴⁷ Na'a nia' le'e can' gwxaquə'əlebe yoguə' non' nao nada' na' chzenague' xtiža'anə' na' chone' can' nona' mendadən'. ⁴⁸ Gwxaquə'əlebene' ca to beṇə' ben yo'o. Na' gwche'ene' zitjw gwleque' lan yo'onə' de'en naquə de'e gual. Na' catə' bchojchgua yaonə', gwyechjən liže'ena' na' bito bebixən cuiay'i'in, chedə' gwzo chechchguan. ⁴⁹ Na' yoguə' non' cui chzenague' che xtiža'anə' gwxaquə'əlebene' ca yeto beṇə' ben yo'o. Con bene'en lao yo' na'azə sin cui bi lanei gwleque'. Na' catə' bchojchgua yaonə' gwyechjən liže'ena', na' bebixən gwžiyai'iteczən'.

7

Jeso'osən' beyone' xmos to capitan

¹ Na' catə' beyoʒ be' Jeso'osən' dižə'ən len beṇə' ca', beyeje' Capernaunnə'. ² Na' zo to capitan beṇə' bito naque' beṇə' Izrael, na' zo to xmosə' chacšenchgüeine' na' yelezə gate'. Na' capitannə' chacchgüeine' che'. ³ Na' catə' bene capitannə' dižə' che Jeso'osən', bsele'e bałə beṇə' golə beṇə' blaο che beṇə' Izrael ca' par jse'etə'əyoine' Jeso'osən' šeje' liže'enə' par yeyone' xmosen'. ⁴ Nach catə' besə'əžine' gan' zo Jeso'osən' gwsa'atə'əyoine' le' gaquəlene' capitannə', na' gwse'e Jeso'osən': —Naque' to beṇə' zaque'e par gaquəleno'one', ⁵ chedə' chaquene' che chio'o beṇə' Izrael. Na' le' bene' yo'odao' cheto' nga len xmeche'.

⁶ Nach gwyej Jeso'osən' len lega'aque'. Pero ze'e yesə'əžine' liže'enə' catə' bselə' capitannə' bałə beṇə' migw che'enə' lao Jeso'osən', na' gwse'ene': —Capitannə' ne' de que bito gonzi'ilažo'o yido' liže'enə', chedə' la' nezene' de que bito zaque'e par šo'o liže'enə'. ⁷ De'e na'anə' bito beyaxjene' deṇabene' le' gaquəleno'one'. Con chene'ene' gonšgo' mendadan' na' yeyaque xmosə'enə'. ⁸ Capitannə' ne' de que zoe' xni'a rein', pero lecəə nitə' soldad che' ca' xni'enə'. Na' catə' che'e toe': "Gwyej", na' cheje', na' catə' che'e yetoe': "Da", na' chide'. Na' catə' che'e xmosen': "De'e nga gono'", na' chone'en. Na' nezene' de que con əṇao' yeyaque xmosə'enə' na' yeyaquene'.

⁹ Na' Jeso'osən' catə' benene' dižə' de'en əgwse' beṇə' migw che capitannə' le', bebanene' na' beyechje' gože' beṇə' ca' zjəsə'əṇao le': —Echnia' le'e, bitonə' želda' beṇə' gonlilažə' nada' ca chonlilažə' capitannə' nada'. Ni to beṇə' Izrael cui chonlilažə' nada' ca benga.

¹⁰ Nach jəya'ac beṇə' ca' bselə' capitannə', na' catə' besyə'əžine' liže'enə' babeyaque xmosə'enə'.

Jeso'osən' bosbane' xi'in to no'olə gozebə

¹¹ Na' gwyej Jeso'osən' to syoda de'en nzi' Nain, nžague' disipl che' ca' na' zan beṇə' yoblə. ¹² Bazja'aque' gałə'əzə par yesə'əžine' cho'a puert che syodan', na' lei chəsə'əchoj xonj beṇə' cho'a puertən' zjənlene' to beṇə' guat. Na' ben' gotən' naque' beṇə' tlišə, na' xne'en naque' beṇə' gozebə. Na' beṇə' zan beṇə' lao' syodan' zjənžague' xna' beṇə' guatən'. ¹³ Na' catə' ble'i Xanchon' no'olan', beyaše'ene' le', nach gože'ene': —Bito cuežo'.

¹⁴ Nach zde' na' jtane' yagant gan' xoa beṇə' guatən', na' beṇə' ca' zjənlen le'enə' gosə'əbeze'. Nach gože' beṇə' guatən': —Beṇə' güego', beyas.

¹⁵ Nach beṇə' guatən' beyase' gwchi'e na' gwzolao cheṇe'. Na' Jeso'osən' beyone' le' lao na' xne'enə'. ¹⁶ Na' yoguə' beṇə' ca' besə'əžebe' nach gwso'elaogü'e Diozən' chəsə'əne': —Babla' to profet əblao gan' nga zocho ṇa'a. Na' Diozən' bagocwlene' chio'o naccho ṇasyon che'enə'.

¹⁷ Na' ca naquə de'en ben Jeso'osən' gosə' gwłaljə dižə' che'enə' doxen Jodean' na' yež ca' de'en zjənyechj zjəmbi'i gałə'əzə.

Juannə' bsele'e chopə disipl che' gan' zo Jeso'osən'

¹⁸ Nach disipl che Juannə' jəsyə'eye'elene' le' dižə' yoguə' ca naquə de'e ca' chon Jeso'osən'. ¹⁹ Nach gox Juannə' chopə disipl che' ca' nach gože' lega'aque': —Le'e žja'ac gan' zo Jeso'osən' na' ye'elene': "ŽElen' ben' naquən əselə' Diozən' o šə soto' lez yidə beṇə' yoblən'?"

²⁰ Nach disipl ca' catə' besə'əžine' gan' zo Jeso'osən' gwse'ene': —Juan ben' chchoa beṇə' nis bsele'e neto' laogo' nga par əṇabeto' le' šə len' ben' naquən əselə' Diozən' o šə soto' lez yidə beṇə' yoblən'.

²¹ Lao or na'atezə žlac ne'e nitə' disipl che Juannə', Jeso'osən' beyone' beṇə' zan beṇə' ca' chsa'acšene na' beṇə' chse'i yižgü'e gual. Leczə bebeje' de'e xio' ca' de'en zjəyo'o zjəyaz yichjla'aždao' beṇə', na' bene' par ničh besyə'əle'i beṇə' lchol'. ²² Nach Jeso'osən' boži'e xtižə' beṇə' ca' bsele' Juannə' laogü'e enə' gože' lega'aque': —Le'e žjəya'ac na' le'e žjəyeyež Juannə' doxen de'e ca' bable'ile na' de'e ca' babenele. Bable'ile chona' par ničh balə beṇə' lchol' chesyə'əle'ine', na' balə beṇə' coj chesyə'əde', na' yebalə beṇə' cuež chesyə'əyenene', na' leczə balə beṇə' gwse'i yižgü'e de'en ne' lepr babesyə'əyaquene'. Bable'ile bosbana' balə beṇə' guat na' babenele cho'a dižə' güen dižə' cobə' chia'anə' len beṇə' yašə' ca'. ²³ Mbalaz zo beṇə' chejle'e de que Diozən' bsele'e nada'.

²⁴ Na' catə' besyə'əsa'ac disipl che Juannə' nach Jeso'osən' be'elene' beṇə' ca' zjəndobən' xtižə' Juannə', gože' lega'aque': —¿Nacxa naquə ben' jəle'itgüeiczele latjə dašən'? ¿Ešayechə šayen chaque'? Bito. ²⁵ ¿Nacxan' goque' catə' jəle'ilene'? ¿Enyaze' lachə' šao'? ¿əšə bito? la' beṇə' ca' zjənyaz lachə' šao' nite'e yo'o güenchgua ca no liž rei, na' bito bi chesə'əyazjene' par yesə'əchoje' ližga'aque'enə'. ²⁶ ¿Noxan' jəle'ilen' ža? ¿Eto profet ben' cho'e xtižə' Diozən'? De'e li' naque' to profet. Pero əchnia' le'e caguə con to profetən'. ²⁷ Che bengan' nyojən le'e Xtižə' Diozən' nan:

Nada' Dioz əselə'a to beṇə' cuialaogü'e güe'e xtižə'onə', par ničh nitə' beṇə' probnid par əso'elaogü'e le' catə'an yido'.

²⁸ Echnia' le'e, notono beṇə'ch ne'e so beṇə' naquəch beṇə' blaoch ca Juannə'. Na' notə'ətezəchlə beṇə' güe'e latjə nabi'a' Diozən' le', la'anə'əczə bito naque' beṇə' blao gwžin ža catə' šejni'ichene' čhia' clezə ca Juannə'.

²⁹ Na' balə beṇə' gochixjw ca' na' len yeziquə'əchlə beṇə' ca' bchoa Juannə' nis, gwsa'acbe'ine' de que de'e li zjənaque' beṇə' mal lao Diozən' catə' gwse'enene' dižə' de'en be' Juannə' len lega'aque'. ³⁰ Pero na' beṇə' fariseo ca' na' beṇə' ca' choso'osed choso'olo'i lei de'en bzoj de'e Moizezən' gwso'onczə yichjlaoga'aque' cui besyə'ədinjene' xtolə'əga'aque'enə' can' gone'e Diozən' na' bito bchoa Juannə' lega'aque' nis.

³¹ Nach Jeso'osən' gože' lega'aque': —¿Nac əgwsaquə'əlebetgüeida' le'e mbanle na'a? na' ¿nac nacle? ³² Egwsaquə'əlebeda' le'e ca bidao' čhedə' cuiczə bi de žleb čhele. Ca naquə bidao' ca' catə' nitə'əbo' do gan' chac ya'a chse' ljuēžga'acbo': “Bento' legr, bito gwyo'olažə'əle, na' babento' bgüine bgüēž, peor.” ³³ Juan ben' chchoa beṇə' nis bide' laole nga. Bito güe'ej gwdao'əsaogü'e'e can' chse'ej chsa'o beṇə' yoblə, na' nic güe'ej'e bino. Nach gwnale čhe': “Yo'o yaz de'e xionə' yichjla'aždaogü'e'enə'.” ³⁴ Na' nada' ža, Diozən' bsele'e nada' golja' beṇə'ch, na' chle'ile che'ej chaogua' can' che'ej chaole, na' nale čhia' de que naca' beṇə' lia na' beṇə' güe'e zo. Na' leczə nale de que naca' migw che beṇə' gochixjw ca' na' migw che yeziquə'əchlə beṇə' ca' chso'on de'e mal. ³⁵ Pero na' Diozən' chone' par ničh beṇə' ca' choso'ozenag čhe' chso'one' ca nacbia' de que le' naque' le'e ezelaogüe beṇə' sin'.

Jeso'osən' gwyeje' liž Simon beṇə' fariseo

³⁶ To beṇə' fariseo bene' combid Jeso'osən' šeje' liž'e'enə' par əsa'ogüe'. Na' bžin Jeso'osən' liž be'enə' na' gwchi'e cho'a mesən'. ³⁷ Na' to no'olə beṇə' güen de'e mal beṇə' lao' syodan' gwņezene' de que Jeso'osən' əžine' liž be'enə'. Na' Jeso'osən' len beṇə' ca' yelə' banite'e cho'a mesən' par əsa'ogüe' catə' bgüiguə'

no'olən' cuit Jeso'osən' noxe'e to lmet de yej de'e yožə to set de'e zaque'e de'e chla' zix. ³⁸ Na' no'olən' jəbigue'e galə'əzə xni'a Jeso'osən', na' gwcheže'. Nis əxchež che'enə' bžonən ni'a Jeso'osən' na' bgüisən. Na' bxie' ni'ena' len yišə' yichje'ena', na' bnope'en, na' gwdebe'en set zixən'. ³⁹ Na' beṇə' fariseon' ben' ben Jeso'osən' combid, catə' ble'ine' can' chon no'olən', na' goquene': —Žalə' be'enga naque' profet, guache'ine' de que no'olə nga naque' beṇə' güen de'e mal.

⁴⁰ Nach Jeso'osən' gože'ene': —Simon, de to de'e che'enda' ənia' le'.

Nach Simonṇə' gože' Jeso'osən': —Gwnan Maestr.

⁴¹ Jeso'osən' gože'ene': —Gwzo to beṇə', na' gwnitə' chopə beṇə' gwsa'ale'e xmeche'. Toe' gole'e gueyə' gueyoa mech de'en ne' denario, na' ben' yeto gole'e šiyon denario. ⁴² Na' chopte beṇə' ca' ni toe' cui de chega'aque' par yesyə'əyixjue' xyan', na' ben' gwlej mechan' bñitlaogüe' de'en chsa'äl'e'e che'enə'. Gwnašc nada', ĩnoe' entr beṇə' ca' chopə gwsa'aquechene' che'?

⁴³ Nach Simonṇə' gože'ene': —Šəquə ben' əbñitlaogüe' xya chein' de'e xench. Jeso'osən' gože'ene': —De'e li can' bagwna'onə'.

⁴⁴ Nach gwyechje' bgüie' no'olən' na' gože' Simonṇə': —Ĭchle'ido' no'olə nga? Nada' bagwyo'a ližo' nga, na' bito beṇo' nis chib ni'a, pero no'olə nga bagwdibe' ni'anə' len nis əxchež che'enə', na' bxi'en len yišə' yichje'ena'. ⁴⁵ Bito bnopo'o nada', pero na' no'olə nga dezd bla'atia' nga chnopo'e ni'anə'.

⁴⁶ Bito gwdebo' set yichja'ana', pero no'olə nga bagwdebe' set zixən' ni'anə'. ⁴⁷ Na' əchnia' le', xtole'ena' gwsa'əquən de'e zan, pero babezi'ixena' che'. De'e na'anə' chacchgüeine' chia'. Ben' bito əžinlažə' xtole'ena' ca xtole' no'olə nga, catə' yezi'ixena' che' bito gactequene' chia'.

⁴⁸ Nach gože' no'olən': —Babezi'ixena' xtole'onə'.

⁴⁹ Nach beṇə' ca' chsa'o len Jeso'osən' txen lao mesən' gwzolao chse' lježje': —ĬNoxa benga chaclizene' de que le'enə' chezi'ixene' dolə'?

⁵⁰ Nach gož Jeso'osən': —De'en chonlilažo'o nada' babezi'ixena' chio'. Beyej to šao' to güen.

8

No'ol ca' gwsa'aclen Jeso'osən'

¹ Na' techlə gwyej Jeso'osən' to to syoda na' to to yež de'en zjənyechj zjəmbi'i Galilean', na' jtixjui'e dižə' güen dižə' cobə de que Diozan' nabi'e con notə'ətezə beṇə' soe' latjə. Na' zja'aclen beṇə' šižin' ca' le', beṇə' ca' zjənzi' apostol. ² Nach xonj no'olə leczə zja'aclene' Jeso'osən', beṇə' ca' babeyone'. Bale' babebeje' de'e xio' de'en zjəyo'o zjəyaz yichjla'aždaoga'aque'ena', na' yebale' babeyone' lega'aque' catə' gwsa'acšenene'. Na' entr no'ol ca' len ben' le Maria beṇə' Magdala, bebej Jeso'osən' gažə de'e xio' ca' zjəyo'o zjəyaz yichjla'aždaogüe'ena'. ³ Nach leczə len ben' le Xguan, xo'olə Chosa. Na' Chosan' yo'o lao ne'e chape' liž Erodən' na' yežlyo che' ca'. Na' leczə len ben' le San gwyejlene' Jeso'osən', na' yezan beṇə' yezi'iqə'əchla. Na' no'ol ca' boso'ochine' bitə'əteza de'en gotə' chega'aque' par bosə'ənežjue' de'en byažje Jeso'osən' len disipl che' ca'.

Jempl che beṇə' gozən'

⁴ Na' beṇə' zan besə'dope' gan' zo Jeso'osən' beṇə' za'ac to to syoda ca'. Na' be'e to jempl bzejni'ine' lega'aque' can' gwxaquə'əlebe xtižə' Diozan'. Gwne': ⁵ —To beṇə' gwze'e zde' güen trigw. Na' lao chose' trigon' balən jəsə'əchazən cho'a nez, na' boso'olej boso'ošošj beṇə' len, na' bia žia xile'e

bia chaš le'e yoban' gwsa'ob len. ⁶ Na' bałan jəsə'əchazən ga naquə lao yej, na' catə' bla'aquannə' gosə'əbižən čhedə' caguə bi gopə' denə'. ⁷ Na' yebałan besə'əgo'onən lao yo ga nčixə xsa yešə' na' bla'aquən txen na' bosə'ololə' yag yešə' ca' lega'aquən. ⁸ Na' yebałan besə'əgo'onən lao yo šao' na' bla'aquən na' gosə'əbian to gueyoa güeja.

Na' beyoz be'e dižə' quinga gwne' zižjo gwne': —Le'e žia nagle de'e chene, legwzenag.

Jeso'osən' gože' disipl čhe' ca' bixčhen' bzejni'ine' beņə' len jempl

⁹ Nach disipl čhe' ca' gosə'əñabene' le' bi zeje jemplən' de'en be'enə'. ¹⁰ Na' gož Jeso'osən' lega'aque': —Diozən' chone' par nič le'e ənezele de'en cui no gwneze antslə de que nabi'e con notə'ətezə beņə' soe' latjə. Pero beņə' yeziquə'əchlə cho'elenga'aca'ane' jempl čhedə' bito chse'ejle'e čhia'. Chona' ca' par nič yešə'əle'ine' de'en chona' na' bito sa'acbe'ine' bi zejen, na' par nič əse'enene' xtižə'anə' na' cui se'ejni'ine'en.

Jeso'osən' bzejni'ine' bi zeje jempl čhe beņə' güen trigon'

¹¹ Na' ca naquə jempl nga zejen quinga: Ca de'en byažən' naquən xtižə' Diozən'. ¹² De'en jəsə'əchaz cho'a nezən' zejen ca beņə' ca' chse'ene xtižə' Diozən' pero na' le'e čžinte gwxiye'enə' chebejan xtižə' Diozən' lo'o yičjla'aždaoga'aque'enə' par nič cui so'onlilaže'ene' na' cui yesyə'əchoje' xni'a de'e malən'. ¹³ Na' de'e ca' besə'əgo'on gan' naquə lao yej gwxaquə'əleben ca beņə' ca' chəsyə'əbei choso'ozenag xtižə' Diozən'. Pero zjanaque' ca to de'e cui bi loi chon, šložga chse'ejle'e čhe xtižə' Diozən'. Na' catə' chac bi de'e mal čhega'aque' le'e chəsə'əbejyichjte'en cuich choso'ozenague' čhei. ¹⁴ Na' de'e ca' besə'əgo'onən lao yo ga nčixə xsa yešə' zejen ca beņə' ca' bazjanenene' xtižə' Diozən'. Pero lao zjəmbanga'aque' chesyə'əlal chesyə'əzejene', na' chse'enene' yəsə'əni'e, na' chəsə'əde' legr. Na' de'e quinga chso'one'enə' choso'ololə'an xtižə' Diozən' de'en bayo'o yičjla'aždaoga'aque'enə', na' de'e na'anə' cui chso'onlilaže'ene' can' cheyałə'. ¹⁵ Na' de'e ca' besə'əgo'onən lao yo ša'onə' zejen ca beņə' la'aždao' güen ca' catə'an chse'enene' xtižə' Diozən' chəsə'əzi'en chso'onen čhega'aque'. Na' chso'onlilaže'ene' na' chəsə'əgo'o chəsə'əčhejlaže'e len bitə'ətezə de'en chac čhega'aque' par chso'one' can' chene'e Diozən'.

Bitobi ngašə' de'e nacho cui no yene le'i

¹⁶ Na' Jeso'osən' bsaquə'əlebene' de'en bsd əblo'ine'enə' ca to yi', gwne': —Notono no gualə' to yi' na' gwdose'en to žomə na' nic no gwcuəšə'an xan xcamei. Syempr chde'e yi'inə' le'e ze'e par nič əgwse'eni'in len yoguə' beņə' so'o lo'o cuartən'. ¹⁷ Guaquə can' na dicho de'en na: “Yoguə'əlol de'en ngašə' na'a, gwžin ža la'alaon, na' yoguə'əlol de'en cui no gwse'ejni'i antslə, leczə gwžin ža se'ejni'i beņə' len.”

¹⁸ De'e na'anə' le'e co'o yičjle de'en čnia' le'e, čhedə' la' šə chzenagle xtižə'anə' əgwzejni'ichda' le'e. Pero na' šə bito chzenagle čhei, de'e daon' baņezele ganlažə'əlen.

Xna' Jeso'osən' na' biše'e ca' besə'əžine' gan' zoe'

¹⁹ Na' xna' Jeso'osən' len beņə' biše'e ca' besə'əžine' gan' zo Jeso'osən' na' gwsa'acłaže'e yəsə'ədie' pero tant beņə' zan ža' caguə goquə yəsə'əžine' gan' zoe'enə'. ²⁰ Na' gwnitə' beņə' gwse'e Jeso'osən': —Xna'on len beņə' bišo'o ca' zjəzeche' na'ate, na' chse'enene' əso'elene' le' dižə'.

²¹ Nach Jeso'osən' gože' lega'aque': —Beṇə' ca' choso'ozenag xtižə' Diozən' na' chso'one' can' nan, lenczəga'aque'enə' zjənaque' xna'a na' biša'a.

Jeso'osən' bcueze' be' bdon' lao nisdə'onə'

²² Na' gozac to ža Jeso'osən' gwyo'e to lo'o barcw len disipl che' ca', na' gože' lega'aque': —Elaḡuə'əcho yešlā'alə nisdə'onə'.

Nach boso'ose'e barcon'. ²³ Lao zda barcon' gwtas Jeso'osən'. Na' gwzō-lao gwyechj to be' gual lao nisdə'onə' na' barcon' gwzōlao gwyožən nisen' na' besə'əxožene' yesə'əbiayi'e. ²⁴ Nach bosyo'osbane' Jeso'osən' gwse'ene': —iMaestr! iMaestr! iBač chbiayi'icho!

Nach catə' gwyase' ŋe'e chas chatə' nisdə'onə' na' gwdiļe'en len be'enə', na' le'e gosə'əbe'ežiten. ²⁵ Na' gože' lega'aque': —Cheyalə' šejle'echle chia'.

Nach lega'aque' besə'əžebe' na' besyə'əbanene' na' gwse' ljuēžje': —Bitolja naquə' bengā con to beṇəčzə, la' žnacxa gon to beṇəč par yebecžie' be' gualən' len nisdə'onə'.

To beṇə' Gadara yo'o yaze' de'e xio'

²⁶ Na' besə'əžine' laž beṇə' Gadara ca', to yež de'e chi' delant Galilean' əlaḡuə'əcho nisdə'onə'. ²⁷ Na' catə' bechoj Jeso'osən' lo'o barcon', to beṇə' lao' syodan' jəšague' le', beṇə' bagwža yo'o yaz de'e xio' ca' yichjla'aždaogüe'en. Na' chde' con cui bi bi xe' chazəche', na' bitoch zoe' yo'o, con bazoe' do capsant. ²⁸⁻²⁹ Na' beṇə' gwlaž che' ca' boso'ocheje' ŋi'a ne'e ca' gden na' gwsa'ape'ene', pero zan las de'e xio' ca' gwso'onən ca' bzoxjbtine' gdenṇə' na' leczə gwso'onən ca' gwyeye' gan' cui no beṇə' zjənla'. Na' be'enə' catə' ble'ine' Jeso'osən' na' bzo xibe' laogüe'enə' na' de'e xio' ca' boso'ogosya'an le', zižjo gosə'ənan: —Partlə le', partlə neto', Jeso'os. Naco' Xi'īn Dioz ben' naquə' le'ezelaogüe beṇə' blaō. Chatə'əyoiito' le' cui əgwčhi' əgwsaco'o neto'.

De'e xio' ca' gosə'ənan ca' chedə' Jeso'osən' bene' mendad yesyə'əchojən lo'o yichjla'aždao' be'enə'. ³⁰ Nach Jeso'osən' gožga'aquen': —iBi lele?

Na' gosə'ənan: —Legion leto'.

Gosə'ənan ca' chedə' zanən gwso'on yichjla'aždao' be'en'. ³¹ Na' de'e xio' ca' gwsa'atə'əyoin Jeso'osən' cui gone' ca' žjəsyə'ədebən lo'o yech gabilən'.

³² Na' to ya'a de'e zo gaļə'əzə chaš beṇə' choso'oye' coš zan. Nach de'e xio' ca' gwsa'atə'əyoin le' par güe'e latjə žjəsyə'əžo'on yichjla'aždao' coš ca'. Na' Jeso'osən' be'e latjə. ³³ Nach besyə'əchoj de'e xio' ca' yichjla'aždao' be'enə' na' jəsyə'əžo'on yichjla'aždao' coš ca'. Na' besyə'ədinses coš ca' le'e ya'anə' na' jəsyə'əxopəb lo'o nisdə'onə', na' gwsa'atəb gwse'ejəb nisen'.

³⁴ Na' beṇə' ca' choso'oye' coš ca' besə'əle'ine' de'en bagoquən' na' de'en besə'əžebchgüe' besa'acdoe' nach jəsyə'ədixjue'ine' beṇə' lao' syodan', na' beṇə' nitə' do yoba can' bagoquən'. ³⁵ Na' beṇə' ca' catə' gwse'enene' xtižə' beṇə' goye coš ca' ja'aque' jəsə'əgüie' de'en bagoquən'. Na' catə' besə'əžine' gan' zo Jeso'osən', besə'əle'ine' be'enə' gwyo'o gwyaz de'e xio' ca' yichjla'aždaogüe'enə' bachi'e gaļə'əzə cuit Jeso'osən', nyaz xalane'e, na' babezošao' yichjla'aždaogüe'enə'. Na' besə'əžebe' de'en goquən'. ³⁶ Na' beṇə' ca' besə'əle'i de'en goquən' gwse'e beṇə' ca' yela' can' beyaque' ben' gwyo'o de'e xio' ca' yichjla'aždaogüe'enə'. ³⁷ Nach yoguə'əloļ beṇə' ca' ža' gan' mbane Gadaran' jse'eta'əyoine' Jeso'osən' yeze'e lažga'aque'enə' chedə' besə'əžebchgüe'. Nach beyo'o Jeso'osən' lo'o barcon' par beze'e. ³⁸ Na' ben' bechoj de'e xio' ca' yichjla'aždaogüe'enə' gotə'əyoine' Jeso'osən' šejlene' le', pero Jeso'osən' bito be'e latjə, gože'ene': ³⁹ —Beyej ližo' na' jəyedixjue'e catec de'e mban' baben Diozən' len le'.

Na' beze'e, nach jəyede' doxen lao syodan' jəyезenene' catec de'e mban' baben Jeso'osən' len le'.

Jeso'osən' beyone' xi'in Jairon' na'yeto no'olə beṇə' gwdan lao xadoṇ che'enə'

⁴⁰ Na' catə' bežin Jeso'osən' Capernaunnə' beṇə' zan banitə' chəsə'əbeze'ene' na' besyə'əbeichgüeine' de'e bežine'enə'. ⁴¹ Na' bžin to beṇə' le Jairo, ben' naquə' beṇə' gwnabia' che yo'odao' che beṇə' Izrael ca'. Na' bzo xibe' lao Jeso'osən' gotə'əyoine' le' šejlene' le' liže'enə' ⁴² chedə' bazon gat bi'i no'ol che'enə'. Nacho' bi'i tlišə'əzə' na' šižin izgueibo'. Na' lao zda Jeso'osən' len le', beṇə' zan gosə'əbiadi'ene' xte boso'očhi'izojene'.

⁴³ Na' len to no'olə bagoc šižin iz chzoe' bgua'a na' babenditjei zgade xmechen' len beṇə' güen rmech ca'. Na' notono goquə' gon le' rmech. ⁴⁴ Na' bgüigua' no'olən' cožə' Jeso'osən' na' gwdane' lox xadoṇ che'enə', na' le'e gwlezte bgua'a de'en chzo'enə'.

⁴⁵ Na' gož Jeso'osən' beṇə' ca' zja'aclen le': —¿Non' bagwdan nada'?

Na' yogue'e bito gosə'əchebe' de que gosə'əgane' le'. Nach Bedən' len beṇə' ca' zja'aclen Jeso'osən' gwse'ene': —Maestr, beṇə' zan ža' nga, na' chesə'əčhi'izoje' le'.

⁴⁶ Nach Jeso'osən' gože' lega'aque': —To beṇə' bagwdane' nada'. Na' chache'ida' de que beyaquene' len yelə' guac chia'anə'.

⁴⁷ Nach no'olən' catə' gocbe'ine' de que cabi bgašə' de'en bene'enə', bgüigue'e lao Jeso'osən' do chaž chžebe', na' bzo xibe' laogüe'enə' be'e dižə' lao yogua' beṇə' ca' ža'anə' bixchen' gwdane'ene' na' can' goquə' le'e beyacteine'.

⁴⁸ Nach gož Jeso'osən' no'olən': —Xi'indaogua'a, babeyacdo' chedə' chonlilažo'o nada'. Beyej to šao' to güen.

⁴⁹ Ne'e cho'ete Jeso'osən' dižə'an ca' catə' bžin to beṇə' gwza' liž Jairon' ježe'ene': —Bagot bi'i no'ol dao' čhio'onə'. Bitoch gondo' maestrən' zed.

⁵⁰ Pero na' catə' bene Jeso'osən' dižə'anə' gože' Jairon': —Bito žebo'. Con beṇlilažə' nada'.

⁵¹ Na' catə' besə'əžine' liž be'enə' Jeso'osən' bito be'e latjə so'o beṇə' ca' zja'aclen le' sino Bedən' len Juannə' len Jacobən' na' len xaxna' bi'i guat na'azə.

⁵² Na' bačh chacchgua scanđl chedə' yogua' beṇə' ca' ža'anə' chəsə'əbežchgüe', pero gož Jeso'osən' lega'aque': —Bito cuežle. Bito nacho' bi'i guat, con chtasbo'onə'.

⁵³ Na' gosə'əzi'ichi'ize'ene' chedə' zjənezene' de que bagotbo'onə'. ⁵⁴ Pero Jeso'osən' bexe'e na' bi'i no'olə guat da'onə' na' bolgüiže'ebə' che'ebə': —No'ol dao' beyas.

⁵⁵ Nach bebambo' na' le'e beyastebo'. Na' ben Jeso'osən' mendadən' əso'ebə' de'e gaobo'. ⁵⁶ Na' besyə'əbanchgüei xaxna'abo'on, pero Jeso'osən' bene' mendad cui əso'e dižə' can' goquan'.

9

Jeso'osən' bsele'e disipl che' ca' šižin jəsə'ədixjui'e xtiže'enə'

¹ Jeso'osən' betobe' disipl che' ca' šižin na' bnežjue' lega'aque' yelə' guac par ničh əsa'aque' yesyə'əbeje' de'e xio' zjəyo'o zjəyaz yichjla'aždao' beṇə', na' leczə' par ničh əsa'aque' yesyə'əyone' beṇə' chsa'acšene. ² Na' leczə' bene' mendad žjəsə'ədixjui'e de que Diozən' nabi'e con notə'əteza beṇə' soe' latjə. Na' bene' mendad yesyə'əyone' no beṇə' güe'. ³ Na' gože' lega'aque': —Bito bi goxə'əle tnezən'. Bito yeyilje garot goxə'əle, nic gua'ale bsod, ni yet, ni mech, na' bito gua'ale čhopə xadoṇ. ⁴ Na' gatə'əteza əžinle' na' no liže'i šo'ole,

na'atezə sole na' na'atezə əsa'acle par šejəchle. ⁵ Na' gatə'atezə yež əžinle ga cui yesə'əgüialaogüe' le'e, catə' yesa'acle yežən' əgws'i'ins ni'alen' par yežib bište de'en gwžianə'. Gonle ca' par nič əgwlo'iga'aquelene' de que de'e malən' chso'one' cui choso'ozenague' xtižə' Diozən' de'en cho'e.

⁶ Nach disipl ca' ja'aque' to to yež, jəsə'ədixjui'e dižə' güen dižə' cobən' na' besyə'əyone' no beṇə' güe'.

Bagwso'ote' Juan ben' bchoa beṇə' nis

⁷ Na' gubernador Erodən' goquene' tolə catə' benene' yoguə'əloł de'en chon Jeso'osən' len disipl che' ca'. Goczejlaže'e čhedə' balə beṇə' gwse'ene' de que babeban de'e Juannə' ladjo beṇə' guat ca' na' chone' de'e quinga. ⁸ Na' yebalə' gwse'ene' de que profet Liazən' babelə' yežlyo nga de'e yoblə na' chone' de'e quinga. Yebalə' gosə'əne' de que to profet beṇə' gwzo cana'ate babebane' ladjo beṇə' guat ca' na' chone' de'e quinga. ⁹ Na' Erodən' gwne': —Bena' mendad gosə'əchogue' yen de'e Juannə', pero čnoxa benga babenda' dižə' chei?

Na' gwdiljlaže'e naclə gone' par le'ine' Jeso'osən'.

Bguao Jeso'osən' gueyə' mil beṇə'

¹⁰ Na' catə' besyə'əžin disipl ca' gan' zo Jeso'osən' gwse'ene' can' jse'ene'enə'. Na' gwčhe'e lega'aque' partlə na' ja'aque' to latjə gan' mbane syoda de'en nzi' Betsaida. ¹¹ Catə' gwsa'acbe'i beṇə' ca' nitə' gan' gwzo Jeso'osən' de que bagwze'e len disipl che' ca' nach jəsə'ənaogüe' lega'aque'. Jeso'osən' bebeine' bgüialaogüe' lega'aque' na' bsed blo'ine' de que Diozən' nabi'e con notə'atezə beṇə' soe' latjə. Na' beyone' beṇə' ca' chsa'acšene.

¹² Catə' gwzolao chxoə bgüižən' nach disipl ca' šižin gwse'e Jeso'osən': —Bselə' beṇə' quinga yež ca' de'en nychj mbi'i nga par yesə'əyilje' gan' yesə'ətase' na' par nič yesə'əželene' de'e se'ež əsa'ogüe' čhedə' latjə gan' zocho nga naquən to ga cui no nla'.

¹³ Pero na' gož Jeso'osən' lega'aque': —Le'e gwnežjo de'e sa'ogüe'.

Na' gwse'ene': —Gueyə'əga yetxtil na' čopga bel ya'a de čecho. Lete šə si'ichchon par gaquən əsa'o yoguə' beṇə' quinga.

¹⁴ Gosə'əne' ca' čhedə' la' ža' ca' gueyə' mil beṇə' byo. Nach Jeso'osən' gože' disipl che' ca': —Le'e gon mendad yesə'əbe' šiyon güejə beṇə' ca'.

¹⁵ Nach disipl ca' gwso'one' mendad yesə'əbe' yoguə' beṇə' ca'. ¹⁶ Na' Jeso'osən' gwxi'e gueyə' yetxtilən' na' čopə bel ya'anə', na' bgüie' yobalə be'e yelə' choxcwlen che Diozən', na' bzoxxe'en na' bnežjue'en disipl che' ca' par gwso'e che che beṇə' ca'. ¹⁷ Na' yogue'e gwsa'ogüe'en xte ca' gwse'eljene'. Nach pedas ca' besyə'əga'anən' bosyo'otobe'en, na' gwsa'aquən šižin žomə'.

Bedən' gwne' de que Jeso'osən' naque' ben' bselə' Diozən'

¹⁸ Na' gozac yeto nitə' disipl che' ca' len le' na' Jeso'osən' chone' orasyon toze'. Nach gože' lega'aque': —čBin' chəsə'əna beṇə' zan ca', non' naca' nada'?

¹⁹ Na' gwse'e le': —Balə' chəsə'əne' naco' de'e Juan ben' bchoa beṇə' nis, na' yebalə' chəsə'əne' de que naco' profet Liazən' ben' gwzo cana', na' yebalə' chəsə'əne' de que naco' yeto profet beṇə' gwzo cana'ate na' le'enə' babeban ladjo beṇə' guat ca'.

²⁰ Nach gože' lega'aque': —čČhexa le'e? čbi nale? čnon' naca'?

Nach gož Bedən' le': —Len' naco' Crist ben' gwlej Diozən' par gaquəleno' nasyon čhechon'.

Jeso'osən' gwdixjue'ine' disipl che' ca' de que gate'

²¹ Nach Jeso'osən' bene' mendad len lega'aque' de que ni toe' cui əso'e dižə' de que len' naque' Cristən' ben' gwlej' Diozən' par gaquəlene' nasyon čhega'aque'enə'. ²² Na' gože' lega'aque': —Nadan' naca' ben' bselə' Diozən' golja' beňach. Na' de'e zan de'e chonən byen čhi' saca'a. Na' ca naquə beňə' golə blao čhe nasyon Izrael čhechon' na' beňə' blao čhe bχoz čhecho ca' na' beňə' ca' choso'osed choso'olo'i lei de'en bzoj de'e Moizezan', cabi se'ejle'e čhia', na' so'ote'nada', pero na' yeyon ža yosban Diozən' nada' ladjo beňə' guat ca'.

²³ Nach gože' yoguə' disipl che ca': —Notə'ətezle šə chene'ele gonlilazə'əle nada' na' gwzenagle čhia', cheyalə' əchojyichje de'en chene'ele gon cunle par nich gonle con can' chene'e Diozən', na' bito bi gaquele che de'en čhi' saquə'əle, la'anə'əczə šə so'ot beňə' le'e to le'e yag coroz, con gonlilazə'əle nada' na' gwzenagle čhia'. ²⁴ Notə'ətezle chaquele gonle par nich cui čhi' saquə'əle o par nich cui no so'ot le'e, cuiayi'ile. Na' notə'ətezle chsanlazə' cunle čhi' saquə'əle o so'ot beňə' le'e por ni čhia' bade yelə' mban zejlicane čhele. ²⁵ Bito bi de'e güen gaquə' che to beňə' la'anə'əczə nabi'e doxen yežlyon' šə cuiayi'e cui gatə' yelə' mban che' zejlicane. ²⁶ Notə'ətezle šə cheto'ile čhia' na' che xtižə'anə', leczə ca' nada' yeto'ida' čhele, nadan' naca' ben' bselə' Diozən' golja' beňach. Yeto'ida' čhele catə'an yida' de'e yoblə nsa'a yelə' chey che'eni' čhia'anə' na' yelə' chey che'eni' che Xa' Diozən', na' yelə' chey che'eni' che angl' che Diozən'. ²⁷ Echnia' de que balle cabinə' gatle catə' le'ile can' gon Diozən' əgwlo'e yelə' gwnabia' čhe'enə'.

Jeso'osən' goque' ca to de'e chey che'eni'

²⁸ Na' goc to xman gwna Jeso'osən' ca', gwyje' to lao ya'a jene' orasyon, na' gwče'e Bedən' len Juannə' na' Jacobən'. ²⁹ Na' lao bene' orasyonnə' goc cho'alaogüe'enə' ca de'e chey che'eni', na' xalane'enə' beyaquən šyiš xilə' xte gwnatitən. ³⁰ Na' lao or na' de'e Moizezan' len profet Liazən' ben' gwzo cana' besyə'əžine' gan' zo Jeso'osən' na' Jeso'osən' be'elene' lega'aque' dižə'. ³¹ Gwso'e dižə' ca naquən' bazon gate' Jerosalennə'. Na' yelə' chey che'eni' čhe Diozən' gwyečhjan' lega'aque'. ³² Na' Bedən' len beňə' ca' yəchopə' lechguale gwsa'ac šə tasga'aque'. Pero catə' bechoj bišgal' chega'aque'enə' besə'əle'ine' Jeso'osən' len yelə' chey che'eni' čhe'enə', zeche' cho'elene' de'e Moizezan' len profet Liazən' dižə'. ³³ Na' žlac besyə'ənitlao de'e Moizezan' len profet Liazən', Bedən' gože' Jeso'osən': —Maestr, güenchgua zocho nga n'a'a. ¿Eguaquə gonto' šonə ranš, ton par le', na' yeton par Moizezan', na' yeton par Liazən'?

Gwne' ca' čhedə' bito bene' xbab čhe de'en gwne'. ³⁴ Na' lao gwne' ca' gwyečh' bejon' lega'aque' na' besə'əžebe' laogüe de'en goc ca'. ³⁵ Na' gwse'enene' gož Diozən' lega'aque': —Bengan' xi'ina', ben' chacchgüeida' čhei. Čhe le'enə' le'e gwzenag.

³⁶ Na' catə' beyož gož Diozən' lega'aque' ca', besə'əle'ine' yetozə Jeso'osən'. Na' ca tymp na' bitobi dižə' gwso'elene' yeziquə'əchla beňə' ca naquə de'en bagwse'en besə'əle'ine'enə'. Con gwnitə'əteze' žizə čhe de'e ca'.

Beyon Jeso'osən' to bi'yo'o yaz de'e xio'

³⁷ Na' beteyo catə' bach besyə'əyetje' ya'anə', jəsə'əšag beňə' zan lega'aque' gan' nite'enə'. ³⁸ Na' entr beňə' zan ca' toe' gwne' zizjo na' gože' Jeso'osən': —Maestr, chatə'əyoida' le' gaquəlenšgo' xi'ina' nga, čhedə' nacho' xi'ina' tlišə'. ³⁹ Čhniz de'e xi'onə' lebo', na' le'e chgosya'aten lebo', na' chonen par chazbo' šon xte chla' bžin' cho'abo', na' chonən lebo' zi', na' canə chechojan' lebo'.

40 Bagotə'əyoida' disipl chio' ca' par niç yesyə'əbeje' de'e xi'onə' cho'o chaz yichjla'ažda'obo'onə', pero bito gwsa'aque' yesyə'əbeje'en.

41 Na' Jeso'osən' gože' beṇə' ca' ža'anə': —ǂBixchexan' cui chejle'ele chia'? Clellan' chonle na' naljele. Bachac sša zoa' napa' yelə' chxenlažə' len le'e. ǂBatxan' šejle'ele chia'?

Nach gože' ǂa bida'onə': —Doa' xi'ino' nga.

42 Na' lao jzso'ebo' lao Jeso'osən' bniz de'e xi'onə' lebo', na' benan par niç lechgualə fuert gwyazbo' šonnə', na' bchix btołan lebo' lao yon'. Na' Jeso'osən' gwdilə' de'e xi'onə' par niç bechojan lo'o yichjla'ažda'obo'onə' na' beyaquebo'. Gwde na' beyone'ebo' lao na' ǂabo'onə'. 43 Na' yogue'e besyə'əbanene' besə'əle'ine' yelə' guac che Diozən'.

De'e yoblə gwdixjue'e Jeso'osən' de que gate'

Na' besyə'əbanene' che yoguə' de'en chon Jeso'osən'. Na' lao nite'e ca', Jeso'osən' gože' disipl che' ca'azə: 44 —Legon par niç dižə' nga šo'on yichjla'ažda'olen', chedə' la' nada' gaca' lao na' beṇə', nadan' naca' ben' bselə' Diozən' golja' benəch.

45 Pero na' disipl ca' bito gwse'ejni'ine' dižə' de'en be' Jeso'osən' len lega'aque', chedə' bito gože' lega'aque' clar bi zejen, na' besə'əžebe' par yesə'ənbene' le' bi zejen de'e gože' lega'aque'.

Gwsa'acyožə disipl che' ca' noe' naquə blaoch

46 Na' gwsa'acyožə disipl che' ca' entr lega'aque' noe' naquə beṇə' blaoch. 47 Jeso'osən' goche'ine' xbab de'en gwso'one'enə' na' goxe' to bidao' na' bso'ebo' cuite'enə'. 48 Na' gože' lega'aque': —Šə chonle güen len bidao' nga o len notə'ətezəchlə bidao' laogüe de'en chaquele chia', chonczle güen len nada'anə'. Na' catə' chonle güen len nada', leczə chonczle güen len Diozən' ben' bselə' nada'. Na' notə'ətezle catə' chonle xbab che cuinle de que cuitec bi zaquə'əle, banaquəczle beṇə' blaō.

Ben' cui chon contr chio'o txenczən' chone' len chio'o

49 Nach Juannə' gože'ene': —Maestr, babežagto' to beṇə' cho'e la'onə' par chebeje' de'e xio' de'en yo'o yaz yichjla'aždao' beṇə', na' bžonto' gone' ca' chedə' bito chone' txen len chio'o.

50 Nach Jeso'osən' gože'ene': —Bito gwžonle gone' ca' chedə' šə to beṇə' cui chone' contr chio'o, txenczən' chone' len chio'o.

Jeso'osən' gwdilə' Jacobən' na' Juannə'

51 Na' laogüe bazon baözə par yezi' yeca'a Diozən' le', gwchoglaže'e šeje' Jerosalennə'. 52 Na' bselə'e to čopə beṇə' gosa'əbialao laogüe'enə'. Na' ja'aque' to yež gan' mbane Samarian' par niç žjəsə'əsi'ini'e gan' so Jeso'osən' len disipl che' ca'. 53 Pero beṇə' Samaria ca' bito besə'əgüialaogüe' lega'aque', chedə' Jeso'osən' len disipl che' ca' chja'aque' Jerosalennə'. 54 Na' disipl che' ca' čopə, Juannə' len Jacobən', catə' besə'əle'ine' can' gwsə'əon beṇə' Samaria ca' nach gosə'ənbene' Jeso'osən' gwse'ene': —Maestr, ǂache'endo' gonto' can' ben profet Liazən' ben' gwzo cana', ənbeto' Diozən' əselə'e yi' par əgwzeyən beṇə' quinga'?

55 Pero Jeso'osən' gwyechje' na' gwdilə' lega'aque' gože': —Le'e bito nezele non' chnabia' yichjla'ažda'olen'. 56 La' nada' bito bida' par əgwziayi'a beṇəchən', sino bida' par niç gona' ca' cui žjəya'aque' lao yi' gabilən', nadan' naca' ben' bselə' Diozən' golja' benəch.

Nach ja'aque' yež yoblə.

Can' gož Jeso'osən' beṇə' ca' gwse'ene yesə'ənaogü'e'ene'

⁵⁷ Lao zja'aque'enə' to beṇə' gože' le': —Sa'alena' le' gatə'atezə šejo'.

⁵⁸ Nach gož Jeso'osən' le': —Zjəde liž becoyo'o ca' na' lecə ca' zjəde liž bia ca' zo xile'e bia chaš yoba, pero bito bi xlatja' de gan' gona' dezcanz, nadan' naca' ben' bselə' Diozən' golja' beṇəç.

⁵⁹ Na' Jeso'osən' gože' yeto beṇə': —Denao nada'.

Pero be'ena' gože' le': —Xana' be' latjə zgua'atec yega'anlena' xā'anə' xte catə' əžin ža gate' par niç əgwcuəša'ane'.

⁶⁰ Na' gož Jeso'osən' le': —Beṇə' ca' zjənaquə len yichjla'ažda'oga'aquen' ca' beṇə' guat guaquə yesə'əcuəše'e beṇə' guat ca'. Pero le' jətiçjue'e de que Diozən' ṇabi'e con notə'atezə beṇə' soe' latjə.

⁶¹ Nach lecə yetoe' gože' Jeso'osən': —Sa'alena' le' Xana', pero zgua'atec be'ešga latjə žjəyezeida' family chia' dižə'.

⁶² Jeso'osən' gože' le': —Beṇə' bagwzolao naogü'e' nada' šə bito naogü'e' do yichj do laže'e, na' šə yo'o yichje' che de'e ca' bocua'ane', bito zaque'e par gone' xšin Diozən'. Na' gwxaquə'əlebene' ca to beṇə' chgüia traslə žlac chgua'ane' go'on.

10

Jeso'osən' bselə'e gyonši beṇə' žjəsə'ədixjui'e xtiže'ena'

¹ Gwde de'e quinga, Xanchon' gwleje' gyonši beṇə'. Na' bene' mendad yesə'əbialaogü'e' əžja'ac chopə güeje' to to syoda na' to to yež gan' ze'e šej le'.

² Na' antslə ze'e žja'aque' gože' lega'aque': —De'en chona'anə' gwxaquə'əleben ca to cwseš xen de'en chotoba'. Na' chyažjda' beṇə' zan sa'aclene' nada', pero to chopgale nita'. De'e na'anə' lenabe Xancho Diozən' əselə'əche' beṇə' zanch par əsa'aclene' chio'o çixjue'echo xtiže'ena'.

³ Na' le'e gon xbab de que nadan' chselə'a le'e žjətiçjue'ile xtiža'an len beṇə' ca' gwxaquə'əlebe ca bež, na' le'e gwxaquə'əlebele ca xila' dao' ladjoga'aque'ena'. Can' chso'on bež ca' chso'otteb xilə' dao', lecə can' se'ene beṇə' so'ote' le'e. ⁴ Bito gua'ale mech, ni xala'anle, ni xelle, na' bito šeile gan' əgguaple beṇə' diox beṇə' yežagle tnez.

⁵ Na' notə'atezə liže' šo'ole, zgua'atec ənale: “Chṇablažə'əšga so cuezle binlo len xbab de'en yo'o lo'o yichjla'ažda'olen', le'e nita'əle nga.”

⁶ Šə na' zo to beṇə' chene'ene' so cueze' binlo len xbab de'en yo'o lo'o yichjla'aždaogü'e'ena', na' gaquə can' bagwṇablažə'əle par so cueze' binlo. Pero šə bito no zo no chon ca so cueze' binlo len xbab de'en yo'o lo'o yichjla'aždaogü'e'en, bito gaquə ca de'en bagwṇablažə'əlen'.

⁷ Na' le'e yo'o na'atezə yega'anle. Bito yeyilje ga yoblə sole. Le'e ye'ej le'e gao bitə'atezə de'en so'one' ye'ej gaole. Ca to beṇə' güen žin cheyalə' si'e laxjue', le'egatezə ca' le'e zaquə'əle par so'one' de'e ye'ej de'e gaole.

⁸ Na' catə' əžinle to yež ga əso'elaogü'e' le'e, ye'ej gaotezle de'en so'one' le'e. ⁹ Le'e yeyon beṇə' güe' nita' yež gan' əžinlen', na' le'e ye'ega'aque': “Babžin ža chene'e Diozən' güe'ele latjə ṇabi'e le'e.”

¹⁰ Pero na' catə' əžinle to yež ga cui yesə'əgüialaogü'e' le'e, ležja'ac lao lqueyən' na' le'e ye'ega'aque': ¹¹ “Bište che lažle nga de'en žia ni'ato' quinga yosi'insto'on par niç əgwlo'ito' le'e de que de'e malən' chonle bito chzenagle xtižə' Diozən' de'en cho'eto'onə'. Pero na' chyixjue'ito' le'e de que Diozən' chene'ene' güe'ele latjə ṇabi'e le'e.”

¹² Na' gož Jeso'osən' beṇə' gyonši ca': —Diozən' bene' par niç byiņj yi' na' sofr lao' syoda Sodoman' por ni che de'en cui bosə'ozenag beṇə' ca' che'. Na' de'e li əchnia' le'e, žan' gaquə juisyən' beṇə' ca' cui yoso'ogüialao le'e yesə'əzaquə'əzi'iche' clezə ca beṇə' ca' gwnitə' Sodoman'.

Benə' ca' cui choso'ozenag xtižə' Jeso'osən'

¹³ Nach gozna Jeso'osən': —¡Probchguazə le'e beṇə' Corazin! ¡Probchguazə le'e beṇə' Betsaida! Beṇə' ca' nitə' Tiro na' Sidon le'e besya'ədinjine' xtolə'əga'aque'ena' žala' blo'iga'acda'ane' yelə' guac chia'anə' ca de'en bablo'ida' le'e. Žala' goquə' ca' sa'azlje' lachə' zešə' na' zosə'əža'alja cuinga'aque' de par nič sa'acbe'i beṇə' de que babesya'ədinjine' xtolə'əga'aque'ena'.
¹⁴ Saquə'əzi'ichle clezə ca beṇə' ca' nitə' Tiro na' Sidon catə' əžin ža gaquə' juisyən'.
¹⁵ Le'e nitə'əle Capernaunnə' chonle xbabən' de que Diozən' gončgüe' le'e yelə' bala'an. Pero bito gone' le'e yelə' bala'an, sino gone' le'e castigw zejlicane de'en cui chejle'ele chia'.

¹⁶ Nach Jeso'osən' goze'e beṇə' gyonši ca': —Beṇə' gwzenag xtižə'əlen' leczə gwzenague' xtižə'anə', na' beṇə' gonczə yichjlaogüe cui gwzenague' xtižə'əlen', leczə bito gwzenague' chia' nada'. Na' beṇə' gonczə yichjlaogüe cui gwzenague' xtižə'anə', leczə bito gwzenague' xtižə' Diozən' ben' bselə' nada'.

Besyə'əžin beṇə' gyonši ca'

¹⁷ Beṇə' gyonši ca' catə' beyož jəsə'ədixjui'e xtižə' Jeso'osən' besya'əžine' gan' zoe', na' besya'əbeichgüeine'. Nach gwse'e Jeso'osən': —Xantə', de'e zan miłagr babento' cho'eto' la'onə' par chebejto' de'e xio' ca' de'en zjəyo'o zjəyaz yichjla'aždao' beṇə' na' choso'ozenaguən čheto'.

¹⁸ Na' gože' lega'aque': —Ble'ida' can' gwnit yelə' gwnabia' che Satanasən' to žalnez.
¹⁹ Babena' le'e yelə' guac par nič əgwlej əgwšošjle no beł əznia' na' no bełgoni', na' leczə əgwlej əgwšošjle gwxiye'ena'. Na' bito bi de de'e soi gonen le'e zi'.
²⁰ Pero bito yebeitequele de que de'e xio' ca' choso'ozenaguən čhele, sino le'e yebeichgüei de que Diozən' babzoje' lalen' le'e libran' gan' zjənyoj la yogu'əloł xi'ine' ca'.

Bebeichgüei Jeso'osən'

²¹ Lao or na'atezə ben Spirit čhe Diozən' ca bebeichgüei Jeso'osən'. Na' bene' orasyon lao Diozən', gwne': —Xa' len' chnabi'o beṇə' ca' ža' yoban' na' yežlyon'. Na' chona' yelə' choxcwlen čhio' de que babzejni'ido' balə beṇə' can' che'endo' so'e latjə nabi'o yichjla'ažda'oga'aque'ena'. Babzejni'ido'on beṇə' ca' gwsa'acbe'i chəsə'əyazjene' no əgwsed əgwlo'i lega'aque' na' bito bzejni'ido'on beṇə' ca' chso'on xbab de que zjənaque' beṇə' sin' na' beṇə' zjənyejni'i. Beno' ca' ža Xa, čheda' can' gwyazlažo'o.

²² Nach gože' beṇə' ca' ža'anə': —Xa'anə' babene' lao na'a chona' par nič chombia' beṇə' le'. Le' nombi'ayane'e nada' na' nada' nombi'ayana'a le'. Na' beṇə' ca' bagwleja' par zjənombi'e Xa'anə', chona' par nič zjənombi'ene'. Na' notono no nochlə zjənombia' Xa'anə' na' ni nada'.

²³ Na' gwyechj Jeso'osən' bgüie' disipl čhe' ca' na' gože' lega'acze': —Mbalaz zole ca de'en chle'ile nada' na' chle'iteile de'e ca' chona'.
²⁴ Echnia' le'e, beṇə' zan profet na' rei gwse'enene' yesə'əle'ine' nada', pero bitoch golə' yesə'əle'ine' nada'. Na' gwse'enene' yesə'əneze' de'en nezele, pero bitoch golə' yesə'əneze' en.

Jempl čhe to beṇə' güen beṇə' Samaria

²⁵ Na' gwzecha to beṇə' chsed chlo'i lei de'en bzoj de'e Moizezən'. Gone'ene' gone' Jeso'osən' prueb bin' əne' na' gože'ene': —Maestr, žbi cheyalə' gona' par nič gatə' yelə' mban zejlicane chia'?

²⁶ Na' gož Jeso'osən' le': —žBin' nyojən le'e lein'? žNac nan?

²⁷ Na' ben' chejni'ichgüei čhe lein' boži'e xtižə' Jeso'osən' gože'ene': —Lei chechon' nan: “Cheyalə' gaquecho čhe Xancho Diozən' do yichj do lažə'əcho,

do fuers balor checho, na' gaquecho che ljuežjcho catg chaquecho che cuincho."

²⁸ Nach gož Jeso'osən' le': —De'e liczə can' bagwnao'. Can' cheyalə' gono' par əbano' zejlicane.

²⁹ Na' be'ənə' gone'ene' əgwlo'e de que zdacze' licha can' nannə' na' gože' Jeso'osən': —čNon' naquə ljuežja' ben' cheyalə' gaquəda' chei?

³⁰ Na' Jeso'osən' gože'ene': —To beṇə' beze'e Jerosalennə' par yežine' Jerico na' jəsyə'əxen beṇə' bguan le'. Na' gosə'əyine' xala'ane'ənə' na' gwso'ot gosə'əyine' le' nach besa'aque' bosyo'ocua'ane'ene' caczə to beṇə' guat. ³¹ Na' goquən' to bχoz gwdie' tnezən' na' catə' ble'ine' ben' de'ənə', nach gwdie' yešla'alə nezən'. ³² Leczə can' ben' to beṇə' goljə lao dia che de'e Lebin'. (Beṇə' ca' yo'o lao na'aga'aque' so'one' mendad lo'o yo'odao' əblaonə'.) Zde' tnezən' na' catə' bžine' gan' ble'ine' de be'ənə' na' gwdie' yešla'alə nezən'. ³³ Pero to beṇə' Samaria lao ngü'e'e nezən' nlague' xporren' bžine' gan' de be'ənə' na' ca ble'ine' le' beyašə'aləže'ene'. ³⁴ Na' bgüigüe'e gan' de'ənə', na' bšone' set na' bino lao güe'ənə', na' bcheje'en lachə'. Nach božie'ene' cožə' xporre'ənə'. Na' beche'ene' gan' zo to meson gan' bgüia bye'ene'. ³⁵ Na' beteyo gwleje' čopə mech de'en nzi' denario bnežjue'en xan mesonṇə' na' gože'ene': "Bgüia bye bengə na' šə bichlə de'en gono' gast na' čixjua'an catə' zeza'a." ³⁶ Beyož be' Jeso'osən' dižə' can' goc che ben' jəsyə'əxen beṇə' bguan ca', nach gože' ben' chsed chlo'i lein': —čBi chacdo'? čnoe' beṇə' ca' goquene' de que beṇə' probən' naquə ljuežje' ben' cheyalə' gaquene' chei?

³⁷ Nach ben' chsed chlo'i lein' gože' Jeso'osən': —Ben' beyašə' beži'ilažə' ben' jəsyə'əxen beṇə' bguan ca'.

Nach gož Jeso'osən' le': —Leczə can' cheyalə' gono' dezd na'a, yeyašə' yeži'ilažo'o yoguə'əloł beṇə'.

Jeso'osən' jəlane'e Martən' na' Marian'

³⁸ Na' lao zja'aque' besyə'əžine' to yež, na' to no'olə le Mart bene' le' combid na' Jeso'osən' gwyeje' liže'en. ³⁹ Na' zo to bile' le' Maria. Na' Marian' gwchi'e' cuit Jeso'osən' par bzenague' xtiže'ənə'. ⁴⁰ Pero na' Martən' beləčhgüeine' bsi'ini'e de'en sa'ogüe'. Na' gwyeje' lao Jeso'osən' na' gože'ene': —Xana', čacabi bi chacdo' de que bila'ana' bocua'anlene' nada' mendadən' toza'? Benšga mendad gaquəlene' nada'.

⁴¹ Xanchon' gože' le': —Mart, či'ichgua yichjo' che xmendado'onə' na' chacžejlažo'o laogüe de'en nyanchguan. ⁴² Maria nga bagwleje' de'en naquəch de'e güen, či'ichgua yichje' chzenague' chia'. Na' bito gwžoncho gone' ca'. Ležən de'en žialao gonle.

11

Jeso'osən' blo'ine' can' so'one' orasyon

¹ Na' gwzo Jeso'osən' to latjə bene' orasyon. Catə' beyož bene' orasyonṇə' to disipl che' ca' gože'ene': —Xanto', bsd blo'išgüe' neto' naquən' cheyalə' gonto' orasyonṇə', can' bsd əblo'i de'e Juannə' disipl che' ca'.

² Na' Jeso'osən' gože' lega'aque': —Catə' gonle orasyonṇə' quingan' nale: Xato' beṇə' zo yoba, chnabto' yoguə'əloł beṇə' əso'elaogüe'e le'. Čhnabto' gono' par nič beṇə' zan əso'e latjə nabi'o lega'aque'. Gaquəšga can' che'endo'onə' lao yežlyo nga can' chac yoban'.

³ Benšga na'a de'e gaoto' tža tža.

⁴ Na' bezi'ixenšga čheto'

cheda' lecza neto' chezi'ixento' che sa'aljuježj beṇaḥto'onə' bitə'ətezə de'e chso'onene' neto'.

Na' bito go'o latjə gaquə de'e ṇabia' neto' len xbab cheto'onə' par gonto' de'e malən',

mas bcuasə' bcue'ej neto' len de'e malən'.

⁵ Nach gož Jeso'osən' lega'aque': —Legon xbab nac gaquə šə šejle liž beṇə' migw chele do chel na' ye'elene': "Migw chia', beṇšga nada' šoṇə yetxtil.

⁶ Babla' to migw chia' beṇə' za' zita', na' bito bi de chia' par əgwnežjua'ane' gaogüe'." ⁷ Na' migw chelen' yo'e lo'o yo'ote šə yoži'e xtižə'əlen', əne': "Bito gondo' nada' zed, la' banyeyjw puertən' na' badeto' chtasto' len xi'into'. Bito chasa' par goṇa' de'en chyažjdo'."

⁸ Echnia' le'e, la'anə'əczə naque' migw chele bito yene'ene' chase' par goṇe' le'e yetxtilən', pero šə sole yepəyoe ṇabelen le' na' gwyassaze' na' goṇe' bitə'ətezə de'en chyažjele. ⁹ Na' chnia' le'e,

bitə'ətezə de'en chene'echo gaquə, de de'e goncho par niḥ gaquən. Šə to de'e chene'echo so'oṇ beṇə' chio'o, chṇabchon. Šə to de'e chene'echo əzelecho,

chyiljchon. Šə puert de'en chene'echo əsaljo beṇə', chnecho cho'a puertən' par niḥ chsaljue'. Na' ca'aczn' cheyalə' ye'echo Diozən' catə'ən de de'en chene'echo gaquə. ¹⁰ Na' notə'ətezcho šə bi de'en chṇabechone' goṇe', la' de'e goṇcze'enə'.

Na' notə'ətezcho šə bi de'en chṇabechone' əgwzejni'ine' chio'o, gwzejni'iczene'en. Na' notə'ətezcho šə chṇabechone' gaquə to de'en chene'echo gaquə can' chon beṇə' chne' cho'a puertən', la' de'e gaquəczən'.

¹¹ Na' le'e nacle xa' bidao', šə xi'inlen' əṇabebo' le'e yetxtil zəgwnežjwlebo' to yej? Na' šə əṇabebo' le'e to bej ya'a zəgwnežjwlebo' to bej bia nxobə' le'i? ¹² Na' šə əṇabebo' le'e to žit gaobo' zəgwnežjwlebo' to beḡgoni'? Cle bito gonle ca'.

¹³ Le'e nacle beṇə' mal pero nezele chnežjwle xi'inlen' de'e gien. Naquəchxe güen gon Xacho Diozən' ben' zo yoban' goṇe' Spirit che'enə' son lo'o yiḥjla'aždao' notə'ətezcho əṇabechone' len.

Gosə'əne' de que Jeso'osən' bebeje' de'e xio' ca' len yelə' guac che Beelsebo

¹⁴ Na' Jeso'osən' bebeje' de'e xio' yo'o yaz yiḥjla'aždao' to beṇə' mod. Na' catə' bechoj de'e xi'onə' yiḥjla'aždao' be'enə', goc bene', na' beṇə' ca' ža'anə' besyə'əbanchgüeine'.

¹⁵ Pero bałe' gosə'əne': —Chebeje' de'e xio' ca' len yelə' guac che Beelsebo de'en chnabia' de'e xio' ca'.

¹⁶ Na' yebale' gwse'enene' so'one' le' prueb naclən' gone', gosə'əṇabene' le' gone' to de'e yesə'əle'ine' le'e yoban' de'e zaqua' yesyə'əbanene'. ¹⁷ Pero Jeso'osən' gocbe'ine' xbab de'en gwso'one', na' gože' lega'aque': —Šə beṇə' ža' to ṇasyon əsa'aque' choplə na' yesyə'ədile' entr lega'aque', əgwžiai' ṇasyon chega'aque' na'anə'.

Na' šə to family beṇə' əsa'aque' choplə na' yesyə'ədile' entr lega'acze', lecza yenit family chega'aque' na'anə'. ¹⁸ Na' lecza šə Satanasən' len de'e xio' chei ca' əsa'aquan choplə na' yesyə'ədilən, cuiayi' yelə' chnabia' chega'aquennə'.

Le'e nale de que chebeja' de'e xio' ca' zjəyo'o zjəyaz yiḥjla'aždao' beṇə' len yelə' guac che Beelsebon'.

¹⁹ Žalə' naquən can' nale de que chebeja' de'e xio' ca' zjəyo'o zjəyaz yiḥjla'aždao' beṇə' len yelə' guac che Beelsebon', lecza zejen de que beṇə' ljuežjle ca' chəsyə'əbeje' de'e xio' ca' zjəyo'o zjəyaz yiḥjla'aždao' beṇə' len yelə' guac chein' žalə' ca'.

Beṇə' ljuežjle ca' se'e le'e de que clələn' nale chia' can' chebeja'annə'. ²⁰ Na' de'en chebeja' de'e xio' ca' len yelə' guac che Diozən', chlo'in de que babžin ža catə' Diozən' ṇabi'e notə'ətezele güe'ele latjə.

²¹ Gwxiye'enə' gwxaquə'əleben ca to beṇə' gual, na' nada' naquəcha' beṇə' gualəch. Na' nezele de que catə' to beṇə' gual chape' ližen' len spad, yoguə'

de'en de che' naquæn segor. ²² Pero catə' əzin to beŋə' gualəch ca le' na' tiləlene'ene', na' ben' naquə gualəch len' gon gan. Na' que'e spad che be'enə' de'en zoe' lez gaquəlenən le'. Na' əca'atie' bichlə de'e de che' na' chise'en len migw che' ca'.

²³ Šə cui chonle txen len nada' chonle contr nada'. Na' šə cui chonle ca se'ejle' beŋə' chia', zeje dižə' de que chonle par niç cui yoso'ozenague' chia'.

De'e xi'onə' yeyo'on de'e yoblə lo'o yichjla'aždao' beŋə'

²⁴ Na' šə to de'e xio' de'en yo'o yaz yichjla'aždao' beŋə' yechojən nach lažə'an nil na'alə yeyiljən ga son mbalaz. Na' šə bitobi latjə želen, nach ənan: "De'e yobləczə žjəyežə'a yichjla'aždao' ben' gan' gwyo'o gwyzaza' antslə." ²⁵ Na' yeyejən de'e yoblə gan' zo ben'. Catə' le'in de que bacheyone' xbab güen nach bazoche' binloch, na' yeyo'on de'e yoblə. ²⁶ Nach žjəyetəbən yegažə de'e xio' ca' de'en zjənaquə maləch ca len na' txennə' so'on lo'o yichjla'aždao' be'enə'. Na' šə bagwso'onən ca' bachaquəch mal che be'enə' clezə can' goc che' antslə.

Mbalaz nitə' beŋə' ca' choso'ozenag xtižə' Diozən'

²⁷ Lao be' Jeso'osən' dižə' quinga, gwzo to no'olə gwchoļ beŋə' ca' zjəžə' gan' bsd əblo'ine'ena'. Na' no'olən' gwne' zižjo gožə'ene': —Mbalaz zo no'olən' gwxaŋ le' na' bguažə'e le'.

²⁸ Pero na' Jeso'osən' gožə'ene': —Naquəchxe mbalaz nitə' beŋə' ca' choso'ozenag xtižə' Diozən' na' chso'one' can' ne'ena'.

Chəsə'əŋabe' gon Jeso'osən' to miłagr

²⁹⁻³⁰ Na' beŋə' zan beyechj bebi'i cuit Jeso'osən' na' gwne': —Le'e mbanle ŋa'na naquəchgualə beŋə' yichjla'aždao' mal. Chnəble gona' to miłagr par niç ənezele šə le Dioz nan' bsele'e nada'. Pero bito gona' can' chnəblənə'. De'e gon Diozən' len nada' par niç ənezele de que le'enə' bsele'e nada' gwxaquə'əleben ca de'en bene' len de'e profet Jonasən' par niç gosə'əneze beŋə' Ninibe ca' de que Dioz nan' bsele'ene'. ³¹ Catə' əzin ža gon Diozən' castigw che yoguə' beŋə' chso'on de'e malən', de'e no'olən' gwnabia' beŋə' ca' gwnitə' galən' chla' bgüižən' cuiten lichalə yebane' len yeziquə'əchlə beŋə' guat ca' na' lao Diozən' gwcuise' le'e mbanle ŋa'a. Ca naquə le' ža, gwze'e Seba gan' naquə zitə'əchgua na' bide' nga par bzenague' dižə' sin' de'en be' de'e Rei Salomonŋə' len le'. Na' nada' zoa' nga naquəcha' beŋə' blaoch cle ca de'e Salomonŋə', na' bito chzenagle chia'. ³² Na' catə' əzin ža gon Diozən' castigw che yoguə' beŋə' chso'on de'e malən', leczə ža na' yesyə'əban beŋə' Ninibe ca'. Na' yesə'cuise' le'e nitə'əle lao dia nga chedə' besyə'ədinjene' xtoļə'əga'aque'enə' catə' de'e Jonasən' gwdixjue'ine' lega'aque' can' gwna Diozən'. Legonšc xbab de que nada' zoa' nga naquəcha' beŋə' blaoch cle ca de'e Jonasən', na' bito chzenagle chia'.

De'en bsd blo'i Jeso'osən' gwxaquə'əleben ca to yi'

³³ Nach Jeso'osən' bsaquə'əlebene' xtižə'ena' na' len de'en chone'ena' ca to yi'. Gozne': —Notono no ggualə' to yi' na' gwdose'en žomə, na' nic agwcuəše'en ga yoblə ga cui no le'i len. Syempr chde'en le'e ze'e par niç əgwse'eni'in len yoguə' beŋə' so'o lo'o cuartən'. ³⁴ Žia jelaochon' par niç chle'icho. Con šə bito bi chaquen, chle'iczecho binlo. Pero šə nchoļ jelaochon', bito chle'icho. Ca'aczn' naquan len yichjla'ažda'ochon'. Šə naccho beŋə' la'aždao' güen, yo'o be'eni' che Diozən' yichjla'ažda'ochon', pero šə naccho beŋə' la'aždao' mal, nchoļ yichjla'ažda'ochon'. ³⁵ De'e na'anə' legon par niç gacle beŋə' la'aždao' güen, na' šo'o be'enin' yichjla'ažda'olen'. Bito gacle beŋə' la'aždao' mal na' beŋə'

yichjla'aždao' žčhol. ³⁶ Šə nye'eni' yichjla'ažda'olen' na' cui bi de'e mal yo'on, gwse'eni'iczan xnezlen' can' chse'eni' to lampara gan' naquə žčhol.

Jeso'osən' gože' beṇə' fariseo ca' na' beṇə' ca' choso'osed choso'olo'i lein' de que zjanape' dolə'

³⁷ Catə' beyož be' Jeso'osən' dižə' quinga, to beṇə' fariseo bene'ene' combid šeje' liže'en par əsa'ogüe'. Na' gwyo'o Jeso'osən' liž beṇə' fariseon' na' gwchi'e cho'a mesən'. ³⁸ Na' beṇə' fariseon' bebanene' catə' ble'ine' bito bona' Jeso'osən' antslə ze'e gaogüe' can' chosyo'ona' lega'aque' chsa'aque'ne' yebei Diozən' lega'aque' de'en chso'one' ca'. ³⁹ Xanchon' gože' le': —Le'e beṇə' fariseo gwxaquə'əlebele ca tas plat de'en chchin beṇə' na' cui cha'a chyibe' lo'ina' binlo. Chonle par nič chsa'aque beṇə' de que nacle beṇə' güen, pero chebeile chca'ale bi de'e de che beṇə' na' nacle beṇə' mal juisy. ⁴⁰ Cui bi bi xbab de'e zaque'e yo'o lo'o yichjla'ažda'olen'. Chi' yichjle nac gonle par gacle xi'ilažə' len cuerp chele. Le'egatezə ca' cheyalə' cue' yichjle nac gonle par gacle xi'ilažə' len yichjla'ažda'olen', chedə' Diozən' ben' ben cuerp chechon' leczə le'enə' bene' yichjla'ažda'ochon'. ⁴¹ Le'e gwnežjo beṇə' bi de'en deile, beṇə' chəsə'əyazjene'en. Šə gonle ca' nacbia' de que nacle beṇə' la'aždao' xi'ilažə'.

⁴² ¡Probchguazə le'e beṇə' fariseo! La'anə'əczə chnežjwle Diozən' to part lao ši part che yixgüej, che yej Sant Maria, nach che rcaod chele, bito bi zejen, chedə' bito chonle de'en naquə güen na' bito chaquele che Diozən'. De'en naquə de'e žialao gonle, gonle de'en naquə güen na' gaquele che Diozən'. Pero bito cuejyichjle əgwnežjwle de'e ca' de'en chnežjwle Diozən'.

⁴³ ¡Probchguazə le'e beṇə' fariseo! Chzelažə'əle cue'ele lo'o yo'odao' ca' txen len beṇə' golə beṇə' blao ca' na' catə' chejle do gan' chac ya'a chene'ele əso'elao' beṇə' le'e.

⁴⁴ ¡Probchguazə le'e chsed chlo'ile lei de'en bzoj de'e Moisezən' na' len le'e beṇə' fariseo! Chene'ele so'on beṇə' xbab chele de que nacle beṇə' güen, pero len yichjla'ažda'olen' nacle beṇə' mal. Na' leczə beṇə' ca' zedəsə'ənao le'e əsa'aque' can' nacle sin cui sa'acbe'ine'.

⁴⁵ To beṇə' chsed chlo'i lein' boži'e xtižə' Jeso'osən' na' gože'ene': —Maestr, laogüe de'en nao' de'e quinga leczə chšašo' cheto'onə'.

⁴⁶ Na' gož Jeso'osən' le': —Lezczə ca' le'e chsed chlo'ile lein' ¡probchguazlen'! Chzanchle can' na lein', chonlen ca to yoa' de'e cuiczə no do'i na' chene'ele soa' beṇə' yoblə len, na' le'e bito chene'ele gua'alēn.

⁴⁷⁻⁴⁸ ¡Probchguazə le'e chonle monoment lao ba che de'e profet ca' gwso'e xtižə' Diozən'! Chacle tozə len de'e xaxta'ocho ca' de'en gwso'ote' lega'aque', na' le'e chonle par nič nacbi'axejə de que gwso'ote' de'e profet ca' laogüe de'en chonle monoment lao ba che beṇə' ca' gwso'ote'.

⁴⁹ De'e na'anə' lao yelə' sin' che Diozən' gwne' de que əsele'e len le'e profet che' ca' na' apostol che' ca', beṇə' so'e xtiže'en. Na' gwne' de que le'e gotle balə' na' gwchi' gwsaquə'əle yebalə'. ⁵⁰ Na' de'e li bachonle can' gwne'. De'e na'anə' si'ile castigw che yelə' got che yoguə' profet ca' gwso'ote' dezd catə'an gwxe yežlyon' xte ža neža, le'e mbanle na'a. ⁵¹ Zan beṇə' gwso'ot beṇə' yoblə lega'aque'. Na' le'e si'ile castigw che yelə' got che yoguə' beṇə' ca' gwzolaozən len de'e Abelan' ben' bet de'e biše'e Cainnə' le' na' zelaon len de'e Zequerian'. Zequeria na'anə' gwso'ote' entr yo'odao' əblaonə' na' entr mes de yej gan' chso'ote' bia yixə' par chso'elaogüe'e Diozən'.

52 ꞑProbchguazə le'e chsed chlo'ile lein! Ca naquə de'en chzejni'ile beṇə' lei che Diozən', bito chzejni'iga'aquelenen'icha can' naquən, na' nic chzenagle chei. Na' beṇə' chse'ene'e yoso'ozenag chei, nic cho'ele latjə yoso'ozenague'.

53 Na' catə' beyož be' Jeso'osən' dižə' quinga, nach beṇə' fariseo ca' na' beṇə' ca' choso'osed choso'olo'i lein' gwsa'acyožəchgüe' le' na' gwse'enene' yesə'əbeje' le' dižə'. 54 Na' gosə'əbe'enaogüe' əchoj dižə' cho'enə' de'en yosa'əde'ine' par əsa'ogüe' xya contr le'.

12

Yelə' goxoayag che beṇə' fariseo ca'

1 Na' goquən' zan mil beṇə' babesə'əžag gan' zo Jeso'osən' xte bosə'əlej bosə'əšoşj ni'a ljuežjga'aque'. Na' Jeso'osən' gwzolaoteque' be'e dižə' len disipl che' ca' gože' lega'aque': —Le'e gapə cuidad nich cui əxoayagle beṇə' par əsa'aquene' nacle beṇə' güen can' chso'on beṇə' fariseo ca'. Yelə' goxoayag chega'aque'enə' gwxaquə'əleben ca xna' cuazin' de'en chlažə'an par chaquən yetxtil. 2 Bito gonle can' chso'one'enə' chedə' gaquə can' na dicho de'en na: “Yoguə'əloj de'en ngašə' ṇa'a gwžin ža la'alaon, na' yoguə'əloj de'en cui no gwse'ejni'i antslə, leczə gwžin ža se'ejni'i beṇə' len.” 3 De'e na'anə' bitə'ətezə de'e ənale bgašə'əzə, beṇə' zan əse'enene'en, na' de'en ənale žižizə lo'o cuart chelen', leczə beṇə' zan yesə'əneze len.

Non' cheyalə' žebcho

4 Migw chia', əchnia' le'e, bito žeble beṇə' ca' əso'ot le'e, chedə' catə' bagotle bitoch bi gaquə so'onene' le'e. 5 Chona' le'e consejw, cheyalə' žeble Diozən' chedə' catə' bach beque'e yelə' mban chelen' leczə nape' yelə' guaquən' par yesele'e le'e gabilən'. De'e yoblə əchnia' le'e, cheyalə' žeble Diozən'.

6 Nezecho de que byin dao' ca' bitobi zjəzaquə'ətequəb, pero na' Diozən' ni tob cui chanlaže'e. 7 Na' ca naquə chio'o ža, de'e tant chaque Diozən' checho xte nezene' balə yišə' yichj to tocho žia la'anə'əczə bitotec bi zjəzaquə' yišə' yichjchon'. De'e na'anə' bito žeble chedə' zaquə'əch le'e cle ca bia zan byin dao'.

Cheyalə' güe'echo dižə' len beṇə' de que nombi'acho Jesocrisən'

8 Na' əchnia' le'e, notə'ətezle šə cho'ele dižə' len beṇə'chən' de que chejle'ele chia', leczə ca' nada' gua'a dižə' len angl che Diozən' de que nacle xi'ina', nadan' naca' ben' bselə' Diozən' golja' beṇə'ch. 9 Na' notə'ətezle šə cho'ele dižə' len beṇə'chən' de que bito chejle'ele chia', leczə ca' nada' gua'a dižə' lao angl che Diozən' de que bito nacle xi'ina'.

10 Na' notə'ətezle šə güe'ele dižə' contr nada' naca' ben' bselə' Diozən' golja' beṇə'ch, Diozən' yezi'ixene' chele šə yedinjele can' nale. Pero notə'ətezle šə güe'ele dižə' contr Spirit che Diozən', cuat yezi'ixen Diozən' chele.

11 Na' šə yesə'əche'e le'e lao beṇə' gwnabia' che yo'oda'onə' o lao beṇə' jostis ca' o šə lao yeziquə'əchlə beṇə' ca' zjənapə poder, bito cuec yichjle nac yoži'ile xtižə'əga'aquen', o šə nacle ənale. 12 Lao or na'atezə Spirit che Diozən' əgwlo'in le'e bin' cheyalə' ənale.

Bito cheyalə' cuec yichjcho tlaozə bi de'en deicho

13 Entr beṇə' zan juisy ca' to'e gože' Jeso'osən': —Maestr, gonšgo' mendad par nich gon beṇə' bišə'anə' nada' bien che de'e xaxna'ato' de'en cheyalə' si'a.

14 Pero Jeso'osən' gože' le': —Bito naca' nada' juez chele na' bito naca' beṇə' güe'e laze che de'e deile.

15 Nach gože' lega'aque': —Le'e gapə cuidad par nič bito selažə'əle bi gata' chele yežlyon', čhedə' bito əbancho laogüe šə deczə zan de'e de čhecho.

16 Na' be'elene' lega'aque' to jempl, gwne': —To beŋə' gwni'a lechguale goc cwseš čhe'enə'. 17 Na' bene' xbab lo'o yichjla'aždaogüe'en gwne': “¿Nacxa gona? čhedə' bitoch bi latjə de par cwseš čhia'anə'.” 18 Nach gozne': “Quinga gona, yochinja' yo'o gan' nga ža' cwseš čhia' quinga na' gona' yo'o xench. Na' gwža'ašaugua'a cwsešən' na' bichlə de'e de čhia'.” 19 Na' laogüe bade de'e chyažjda' par zan iz, bitoch gona' žin. Ye'ej gaoteza' con bi che'enda' na' gona' legr.” 20 Pero Diozən' gože' be'enə': “Beŋə' tont le'. Neže' bžin or gato', na' ¿nola lao ne'i gaquə yoguə' de'en de čhio'onə'?” 21 Can' gac che notə'ətezə beŋə' šə con čbec yichje' tlaozə de'en deine' žlac mbane' na' bito chone' ca yebei Diozən' le'.

Diozən' chapə chye' xi'ine' ca'

22 Na' gož Jeso'osən' disipl čhe' ca': —Echnia' le'e, bito cuec yichjle tlaozə de'en ye'ej de'en gaole lao mbanle. Na' leczə ca' bito cuec yichjle tlaozə de'en gacwlen'. 23 Zaquə'əch yelə' mban čhelen' ca yelə' guaon'. Le'egatezə ca' cuerp čhelen' zaquə'əchən ca xala'anlen'. 24 Legontoš xbab, ca naquə bečj ca' bito chsa'azəb bito chəsyə'alapəb, nic zo da'a xoa' čhega'acquəb, nic zo gan' ncuə' no guangoš čhega'acquəb ga ža' de'e sa'ob. Pero na' Diozən' chguacze' lega'acquəb. Naquəchxen' zaquə'əle ca bia ca' žia xile'e. 25 Na' ni tole bito gaquə yoston cuinle gašj metr šə con cue'e yichjle atonle. 26 Nezele bito gaquə yoston cuinle na' nic naquən de'e zaquə'e. De'e na'anə' bito gontecle xbab čhe biquə'əchlə de'e chyažjele.

27 Legontoš xbab ca naquə yej ca' de'en zjəze yixə' chesə'əcha'oczən. Bito bi žin chso'onən, nic chsa'aljən do. Na' əchnia' le'e de'e Rei Salomonŋə' goque' lachə' xoche juisy, pero bito bžinlaže'e xalane'enə' ca yelə' xoche čhe yej ca'. 28 Diozən' none' xoche yixə' de'en ze yoba len to termzən' zen nach choso'ozeye'en, naquəchxe gon Diozən' len le'e ggüe'eczə yichje' gone' yoguə'əte de'en chyažjele, le'e cui chejle'etecele de que gone' de'en chyažjele. 29 Le'e ža, bito güe'elažə'əle par gata' de'e ye'ej de'e gaole. Bito gaquəžejlažə'əle čhe len. 30 Beŋə' ca' cui chso'elao' Diozən' porzə čhei de'e can' chso'elažə'əzeche', čhe de'en əse'ej de'en əsa'ogüe' na' čhe xala'anga'aque'. Pero Xacho Diozən' nezczene' biquə' de'e ca' chyažjele. 31 De'en güe'elažə'əle, güe'ele latjə par nič Diozən' nabi'e le'e. Na' yoguə' de'e ca' de'en chyažjelen' gonczə Diozən' len, de'en ye'ej de'en gaole na' xala'anle.

De'e zaquə'əche gata' čhecho catə' yežincho yoban'

32 Bito žeble la'anə'əczə naquə to čhopzle. Diozən' chebeine' chnabi'e le'e na' chaclene' le'e. 33 Le'e yeyotə' de'en deile par nič gata' de'e əgwnežjwle beŋə' ca' chesə'əyažje. Šə gonle ca' caguə cuiayi' de'en deilen', čhedə' la' Diozən' gone' le'e de'e zaquə'əche na' de'e cui te čhei catə' yežinle yoban' gan' zo'enə'. Na' bito gac šo'o beŋə' bguan par əque'en, na' niqwe gaquə šo'o bia dao' əgwžiyai' len. 34 Gan' de de'en chaqule čhei, nan' zo yichjla'ažda'olen'.

Cheyalə' socho probnid par catə'an yidə Cristən' yeto

35-36 Nach Jeso'osən' bsed blo'ine' lega'aque' naquən' gaquə catə'an yide' de'e yobla. Na' gwne': —Le'e so probnid par catə'an yida' yeto, le'e so can' nitə' beŋə' chsa'ape' liž xanga'aque' žlac zde' yelə' gošagna', zjanyaze' xala'anga'aque' na' chalə' yi'. Nach catə' yežine' na' əne' cho'a puertən' le'e yosə'əsaljwtie' par yeyo'e. 37 Mbalaz gaquə čhe mos ca' beŋə' ca' nitə' probnid

chəsə'əbeze xanga'aque'en catə'an yežine'. Šə nite'e chəsə'əbeze le' catə'an yežine', nachən' əgws'i'ini'e de'en əsa'ogüe' na' cuine' gwnežjue' lega'aque' de'en əse'ej əsa'ogüe'. ³⁸ Mbalaz gaquə chega'aque' šə chəsə'əbeze' batə'aquən' yežine' la'anə'əczə šə yežine' do chel o šə do šbał. ³⁹ Legon xbab che de'e nga. Žalə' neze xan yo'onə' do bi or əžin beņə' bguanna' liže'enə', la' gwnaze' par nič bito güe'e latjə šo' be'enə' liže'enə' par cuane' šinlaze'. ⁴⁰ Le'e ža, cheyalə' sole probnid, chedə' catə'an cui chonle' xbab yida', ca na'an yida' de'e yoblə, nada' naca' ben' bselə' Diozən' golja' beņach.

Mos ben' chon güen na' mos ben' cui chon güen

⁴¹ Bedən' gože'ene': —Xanto' žəcho'o jempl nga par neta'əzəto'onə' o šə par yoguə' beņachən'?

⁴² Nach gož Jeso'osən' Bedən': —Naquən par notə'ətezə beņə' šə chone' can' chon mos əblao beņə' naquə beņə' sin' na' beņə' chon complir can' cheyalə' gone'. Ben' nac ca' co' xane'enə' lao ne'e liže'enə' par nič əggüia əgwy'e mos ca' yelə' na' par nič ggone' de'e əsa'o to toe' catə' chžin or əsa'ogüe'. ⁴³ Šə to beņə' mosən' chontezə chone' con can' non xanen' mendad, mbalaz soe' catə' yežin xane'enə'. ⁴⁴ De'e li əchnia' le'e xane'en cue'e lao na' xmosə'enə' yoguə'əłol de'en deine'. ⁴⁵ Pero na' šə mosən' gone' xbabən' na' əne': “Bagwžei xanan’”, na' šə solaocle' čhine' mos ca' yelə' na' ye'ej gaoxatteze' na' sožene', ⁴⁶ nach xane'enə' yežine' to ža senyale' le' to or cui nacbe'ine'. Na' por ni che de'en cui chon mosən' can' cheyalə' gone', xane'enə' chinchgüe' le' yid sotən' xte ca gate'. Can' chac len notə'ətezə mos ben' cui chon cuaseləł can' cheyalə' gone'.

⁴⁷ Na' ca naquə mos beņə' naquə beņə' godenag, la'anə'əczə baņezene' can' chene'e xane'enə' gone', pero bito chone' ca'. De'e na'anə' bito zoe' probnid catə' yežin xane'enə', na' xane'enə' chinchgüe'ene' yid sotən'. ⁴⁸ Na' beņə' cui nezene' bin' non xanen' mendad na' chone' de'e leczə zaquə' čhine'ene', pero caguə' chintequene'. Notə'ətezə beņə' yo'o lao ne'e gone' de'e zan de'e zaquə'e, cheyalə' gone' yoguə'ən. Na' ben' yo'o lao ne'e gone' de'e zan de'e zaquə'e, chonchən byen gone' mazəchlə can' cheyalə' gon ben' cuitec yo'o lao ne'e de'e zan de'e gone'.

Yesə'ədilə beņə' por ni che de'en bida' Jeso'osən'

⁴⁹ Nach gwna Jeso'osən': —Ca naquə beņachən' yesə'ədilə' na' yesə'əšaše' por ni che de'en zedeyena' yežlyo nga, na' de'en so'one' ca' gwxaquə'əleben ca yi'. įžalə' bagoclə de'en zedeyena'anə'! ⁵⁰ Bida' par čhi' saca'a na' gata'. Lechgualə yo'o yichja' čhei xte catə'an əžin ža gaquən. ⁵¹ įEchonle' xbabən' de que beņə' ža' yežlyon' yesə'əzo yesə'əbeze' binlo len ljuežjga'aque' laogüe de'en bida'? Echnia' le'e, bito yesə'əzo yesə'əbezəga'aque' binlo len ljuežjga'aque' laogüe de'en bida', sino que yesə'ədilə' na' yoso'ošaše'. ⁵² Dezd na'a, šə nitə' gueyə' beņə' family to yo'o, yesə'ədilə' entr lega'aque', čhope' contr šone' na' šone' contr čhope'. ⁵³ Yedilə beņə' byon' contr xi'ine', na' xi'ine'en contr le'. Na' no'olan' yedilə' contr xi'ine' no'ola, na' xi'ine' no'olan' contr le'enə'. Na' yedilə no'olan' contr xo'oliže' na' xo'oliže'en contr le'.

Bito gwsa'ache'ine' bi zeje de'e ca' chon Jeso'osən'

⁵⁴ Nach leczə gož Jeso'osən' beņə' ca' nitə'anə': —Catə' chle'ile čhi' bejw gan' chen bgüižən' na' nale: “Guaquə yejw”, na' can' chac. ⁵⁵ Na' catə' chečj to be' de'e za'ate zaquə' galən' chla' bgüižən' cuiten liča, na' nale: “Guaquə zeyə’”, na' chac zeyə'. ⁵⁶ įBeņə' goxoayag le'e! Catə' chle'ile nac chac le'e yoban' na'

lao yežlyon' nezele šə guaquə yejw o šə guaquə zeyə'. ¿Bixčhen' cui chacbe'ile bi zeje de'e ca' chona'?

Cheyalə' goncho regl binlo len beṇə' chene'e ače'e chio'o lao jostis

⁵⁷ ¿Bixčhen' cui chonle xbab par nič ənezele naquən' cheyalə' gonle? ⁵⁸ Catə' to beṇə' gonle xya che' na' ače'e le'e lao jostis, na' lao ngo'ole nezən' legonlene' regl binlo par nič na' cui che'e le'e lao jostisən'. Šə bito gonle ca' ža, catə' əžinle lao jostisən' gone' le'e lao na' polsian' par yosə'əže'e le'e ližya. ⁵⁹ Echnia' le'e, bito yebeje' le'e xte catə' chixjwle doxen de'en chalə'alen'.

13

Šə bito yedinjecho xtolə'əchon' la' cuiayi'ichon'

¹ Na' lao or na'atezə entr beṇə' ca' ža' na' gwnitə' balə beṇə' gwso'elene' Jeso'osən' dižə' can' goquə che xonj beṇə' Galilea. Gwse'ene' de que žlac gwso'ot beṇə' Galilea ca' bia yixə' par chso'elaogüe'e Diozən', soldad che Pilatən' jse'ete' lega'aque' chedə' can' ben Pilatən' mendad. ² Nach boži'i Jeso'osən' xtižə'əga'aque'enə' gože' lega'aque': —¿Echonle xbabən' de que beṇə' ca' gwsa'at gwso'onche' de'e maləch cle ca beṇə' Galilea ca' yelə' laogüe de'en goc chega'aque' ca'? ³ Echnia' le'e caguə ca'anə'. Šə bito yedinjele xtolə'əle ca' gwžin ža cuiayi'ile can' gosə'əbiayi' beṇə' ca'. ⁴ Nezele che beṇə' ši'inšon ca', lao zjənite'e Siloen' bxpə to campnary na' gwdenən lega'aque' na' gwsa'ate'. ¿Ełeczə chonle xbabən' goc ca' laogüe de'e zjənaquəche' beṇə' maləch lao yoguə beṇə' ca' ža' Jerosalenna'? ⁵ Echnia' le'e caguə ca'anə'. Šə le'e cui yedinjele xtolə'əle ca' gwžin ža cuiayi'ile can' gosə'əbiayi' beṇə' ca'.

Jempl che yixgüion' de'en cui bi frot chbia

⁶ Na' be'elene' lega'aque' jempl nga bzejni'ine' lega'aque' de que cheyalə' yesyə'ədinjene' xtolə'əga'aque'enə'. Na' gože' lega'aque': —To beṇə' zo to yag yixgüio che' gan' ža' yag obas che' ca'. Na' gwyeje' lao yaguən' jəgüie' šə zetgua yixgüion' gaogüe', pero bitobi bželene'. ⁷ Na' gože' ben' chap güert che'ena': “Bachac šon iz chedəgüia' yag nga šə chbian yixgüio, pero bito bi chbian. Gwčhoguən. Lašj con zon nlanən na' nique bi frot chbiazən.” ⁸ Na' gož ben' le': “Xana', ljoyennə' zezošgan yetgüzən'. Na' ače'ena' xanein' cueca'an yo beb. ⁹ Na' šə cuian frotən' yetgüz, bitec de'e güen. Pero šə cuiczə bi cuian nach ačhogchon.”

Jeso'osən' beyone' to no'olə ža dezcanz

¹⁰ Na' to ža dezcanz bsed blo'i Jeso'osən' beṇə' ca' ža' to lo'o yo'odao'. ¹¹ Na' zo to no'olə beṇə' bagoc ši'inšon iz yo'o yaz de'e xio'on yichjla'ažda'ogüe'ena'. Na' ben de'e xi'onə' par nič bdobə cuerp che'ena', na' caguə goquəch seche' licha. ¹² Na' catə' ble'i Jeso'osən' le', goxe'ene', nach gože'ene': —No'olə na'a yeyacdo' che yižgüe' chio'onə'.

¹³ Na' bxoə ne'ena' lao cuerp che no'olən', na' le'e bezechate' licha na' be'elaogüe'e Diozən'. ¹⁴ Pero na' beṇə' gwnabia' che yo'oda'onə' bloque' chedə' Jeso'osən' beyone' beṇə' güe'ena' ža dezcanzən', na' gože' beṇə' ca' nitə' lo'o yo'oda'onə': —De xop ža par gonle žin. Le'e da lao ža ca' par nič yeyauele che yižgüe' chelen', pero bito la'acle ža dezcanzən' par yeyauele.

¹⁵ Nach Xanchon' gože'ene': —İle'e beṇə' goxoayag! ¿Ecaguə lao ža dezcanzən' bia'aczə chsežle go'on chele o borr chele gan' zjəda'ab na' chgua'aga'acleb güe'ej nis? ¹⁶ No'olə nga naque' xi'in dia che de'e Abraanna'

na' ca naquə ben gwxiye'enə' par niç baddobə cuerp çe'enə' ši'inšon iz, naquəczən liča babeyona'ane' ža dezcanzən'.

¹⁷ Lao gwne' ca' beṇə' ca' chəsə'əgue'i le' gwsa'aque' zto', na' yoguə'əlol beṇə' zan ca' yelə' nitə' na' besyə'əbeichgüeine' len yoguə' de'en ben Jeso'osən', la' lechguale güen zjənaquə de'en bene'enə'.

Yelə' gwnabia' çe Diozən' gwxaquə'əleben ca xsa moztas

¹⁸ Nach gwna Jeso'osən': —Na' əgwlo'ida' le'e par niç ənezele nac gwxaquə'əlebe yelə' gwnabia' çe Diozən'. ¹⁹ Gwxaquə'əleben ca to xsa moztas. To beṇə' goze'en, na' catə' bla'an gwcha'on goquən yag cha'odao'. Na' bia ca' zjəzo xile'e gwsə'on ližda'oga'aquəb lao xoze'e ca'.

Yelə' gwnabia' çe Diozən' gwxaquə'əleben ca xna' cuazin'

²⁰ Nach de'e yoblə gozne': —ŹNac əgwsaquə'əlebecho yelə' gwnabia' çe Diozən'? ²¹ Egwsaquə'əlebechon ca xna' cuazin' de'en gwlec no'olən' len to rob yezj par niç becha'o doxenən'.

Cheyalə' yeyiljažə'əcho naclə goncho par niç socho binlo len Diozən'

²² Na' gwda Jeso'osən' bsed blo'ine' beṇə' ža' syoda ca' na' yez' ca' gan' bedie' par bežine' Jerosalenə'. ²³ Na' to beṇə' gože' Jeso'osən': —Xanto', žəcon to čopzə beṇə'an cui žjəya'ac lao yi' gabilən'?

Nach Jeso'osən' gože' lega'aque': ²⁴ —Echnia' le'e, beṇə' zan se'ene'ene' nite'e binlo len Diozən'. Pero gwžin ža catə' cuich gaquə so'one' par nite'e binlo len le'. De'en naquə žialao gonle, čhiljlažə'əle naclə gonle par niç sole binlo len Diozən', ²⁵ niç cui gone' len le'e can' ben to xan yo'o catə' bžin or par əgwseyjue' na' gwwože'e bseyjue'. Na' gwdechlə besə'əžin beṇə' bosə'osiže' le'e perət çe'enə' na' bito bsaljue' par so'e. Na' gwse'ene': "Bsaljwšga par šo'oto'." Na' gože' lega'aque': "Bito nombi'a le'e, nic nežda' gan' za'acle." ²⁶ Can' gaquə len balə. Nach solaole ye'elene': "Gü'e'ej gwdaoto' len le' na' bsed blo'ido' neto' lao lquey lažto'." ²⁷ Pero na' de'e yoblə əye'e le'e: "Bitoczə nežda' gan' besa'acle. Le'e žjəya'ac yoguə' le'e beṇə' güen de'e mal." Can' ye'e le'e. ²⁸ Na' le'ile Abraanə' na' Isaaquən' na' Jacobən' na' yoguə' profet beṇə' ca' gwsə'o xtižə' Diozən' nite'e yoba gan' to Diozən' čhnabi'e, na' le'e bito gac šo'olenə'. Na' cana' cuežyašə'əle na' gaoyejə leylen' catə' gache'ile bito gaquə šo'ole. ²⁹ Beṇə' za'ac doxenlə yežlyon' yesə'əžine' yoba gan' to Diozən' čhnabi'e na' yesə'əbi'e cho'a mes çe'enə' sa'ogüe'. ³⁰ Na' ža, nitə' beṇə' bito zjənaque' beṇə' blaə na'a, pero gwžin ža catə' əsa'aque' beṇə' blaə. Na' nitə' beṇə' zjənaque' beṇə' blaə na'a, pero leczə gwžin ža catə' lega'aque' bitoch əsa'aque' beṇə' blaə.

Begüine'e Jeso'osən' por ni çe xtolə' beṇə' Jerosalen ca'

³¹ Lao or na'atezə balə beṇə' fariseo ca' besə'əžine' gan' zo Jeso'osən' na' gwse'ene': —Cheyalə' yexonjo' nga gan' čhnabia' Erodən' čhedə' čhene'ene' gote' le'.

³² Jeso'osən' gože' lega'aque': —Erodən' gwxaquə'əlebene' ca to becoyo'o por yelə' goxoayag çe'enə'. Ležja'ac na' ye'elene' de que yeto čopə žazə soa' par yebejəcha' de'e xio' ca' zjəyo'o zjəyaz yichjla'aždao' beṇə' na' par niç yeyoncha' beṇə' čhsa'acšene, na' caguə sšachən' yeyož gona' de'en cheyalə' gona'. ³³ Pero ca naquə de'en chona' nga na'a, goncha'an gwxe güižj čhedə' Jerosalen na' gan' čhsə'ote' profet ca' čhsə'o xtižə' Diozən', caguə ngan'.

³⁴ Le'e beṇə' Jerosalenə' chotle profet, na' beṇə' ca' čselə' Diozən' len le'e čšišə'əga'aclene' yezj. Zan las go'onda' yetoba' le'e ca to jeid cheyežəb ši'inəb, pero bito be'ele latjə. ³⁵ Na' bagwlejəyichja' le'e. Na' əchnia' le'e bitoch

le'ile nada' xte catə'əch əžin ža ənəle: "Cho'ela'oto' beṇə' za' nga beṇə' babselə' Xancho Diozən'."

14

Jeso'osən' beyone' to beṇə' zo le'enə' yi

¹ Na' to ža dezcanz Jeso'osən' gwyeje' liž to beṇə' blao entr beṇə' fariseo ca' par gwsa'ogüe', na' beṇə' fariseo ca' nitə'əna' besyə'əyatchgüeine' le'. ² Na' laogüe'enə' zecha to beṇə' chacšene, zo le'enə' yi. ³ Na' gož Jeso'osən' beṇə' fariseo ca' na' len beṇə' ca' choso'osed choso'olo'i lein' de'en bzoj de'e Moisezən': —Segon can' na' lein' žəde lsens yeyoncho to beṇə' güe' ža dezcanzən' o šə bito de lsens?

⁴ Pero notono boži'i xtiže'enə'. Nach Jeso'osən' beṇə'e na' be'enə' na' beyone'ene', na' gože'ene': —Baguaquə yeyejo'.

⁵ Na' gož Jeso'osən' beṇə' ca' ža' liž beṇə' fariseon': —Le'e šə zo to borř o to go'oṇ chele, na' əxopəb to lo'o pos, žəcabi yebejleb lügügwə la'anə'əczə naquən ža dezcanz?

⁶ Na' notono goc yoži'i xtižə' Jeso'osən'.

Beṇə' ca' gwsa'ac combid gan' chac to yelə' gošagna'

⁷ Na' ble'i Jeso'osən' can' chso'on beṇə' ca' zjənaque' combid liž beṇə' fariseon', gosə'əbeje' siyən' gwse'enene' yesə'əbi'e gan' zjəchi' beṇə' blao ca'. Na' Jeso'osən' gože' lega'aque': ⁸ —Catə' to beṇə' gone' le'e combid gan' chac to yelə' gošagna', bito cue'ele gan' cheyalə' cue' beṇə' blao ca'. La' šə cue'ele na' de repent yidə beṇə' naquach beṇə' blao. ⁹ Na' yidə xan yo'onə' ye'e le'e: "Lešoža' nič cue' benga." Nach do chaquele zto' cue'ele ga yoblə len beṇə' ca' cui bi bi zjəzaquə'. ¹⁰ Pero na' catə' nacle combid, cue'ele len beṇə' ca' cui bi bi zjəzaquə', na' catə' yidə xan yo'onə' na' ye'e le'e: "Beṇə' migw chia', da cui'o len beṇə' blao ca'", nach si'ichle yelə' bala'an lao beṇə' ca' zjəchi' len le'e cho'a mesən'. ¹¹ Notə'ətezcho cho'elao' cuincho, Diozən' gone' par nič gacbe'icho de que bitobi zaquə'əcho. Na' notə'ətezcho choncho xbab de que bitotec bi zaquə'əcho, Diozən' gone' chio'o yelə' bala'an.

¹² Nach leczə gož Jeso'osən' ben' ben le' combid: —Catə' gono' to lni na' gono' beṇə' combid əsa'ogüe' len le', bito gono' combid porzə beṇə' migw chio' o beṇə' zjənaquə beṇə' gwni'a. Lega'aque' leczə gosyə'əyone' le' combid ližga'aque', na' yosyo'ogüe'e gwzon laogüe de'en benga'aco'one' combidən' bla'aque' ližo'onə'. ¹³ Catə' gono' to lni, gono' combid beṇə' yašə' ca' na' beṇə' nchog no ni'a na'aga'aque', beṇə' coj, na' beṇə' lchol'. ¹⁴ Šə gono' lega'aque' combid, Diozən' gone' par nič so' mbalaz, čhedə beṇə' ca' bito gaquə yesyə'əyone' le' combid. So' mbalaz catə' Diozən' yosbane' le' ladjo beṇə' guat ca' t xen len yeziquə'əchlə beṇə' ca' ja'ac licha lao gosə'əbane'.

Jempl che to beṇə' ben lni

¹⁵ Na' to beṇə' chi' cho'a mesən' t xen len Jeso'osən' benene' xtiže'enə' na' gože'ene': —Mbalaz socho gaocho lao lni de'en gaquə catə' bachnabia' ben' əselə' Diozən'.

¹⁶ Nach Jeso'osən' gwne': —To beṇə' bene' to lni xen na' bene' combid əžja'ac beṇə' zan liže'enə' par əsa'ogüe'. ¹⁷ Na' catə' bžin or əsa'ogüe', xan yo'onə' bselə'e xmosə'enə' par žjatobe' beṇə' ca' bene' combid əsa'ogüe'. Na' catə' jəye' to toga'aque' gože' lega'aque': "Lešo'o, la' babsi'ini'e de'en gaocho." ¹⁸ Na' to toga'aque' gwse'e be'enə' bixchen' cui zjəzoe' latjə žja'aque' gan' chone' lnin'. Toe' gwne': "Ze'e gwxi'a to yežlyo. Cheyalə' žjəgüia'an. Na' ye'ešgo' xano'on

de que bito gac yida.” ¹⁹ Yetoe' gwne': “Ze'e gwxi'a gueya' cue' go'on na' na'a əzjenga'aca'ab prueb. Ye'əşgo' xano'on si'ixene' chia' bito gaquə yida.” ²⁰ Na' yetoe' gože'ene': “Ze'e bšagna'a. De'e na'ana' bito gaquə yida.” ²¹ Na' mosən' beyeje' na' gože' xane'ena' can' gwse' beña' ca' le'. Nach xan yo'onə' ben' chon lɪn'in' bže'e, nach gože' xmose'ena': “Gwyej jtado' yoguə' lqueyən' na' yoguə' nez lao' syodan', na' əgwto'bo' beña' yaša' ca' na' beña' ca' nchog no ni'a na'aga'aque', na' beña' coj ca' na' beña' lchoj ca' par la'aque' əsa'ogü'e.” ²² Gwde bene' ca' nach gože' le': “Xana', bajə'toba' beña' ca' gwna'onə' na' nedechczə latjə par beña' yoblə.” ²³ Nach xane'ena' gože' le': “Gwyej fuer syodan' na' gono' byen da'ac beña' ca' nitə' do tnezən' na' žjəxi'o beña' ca' zjəža' yixə', gono' byen da'aque' liža' nga əsa'ogü'e par niç šane' xte ca cuich bi latjə šo'. ²⁴ Na' ca naquə beña' ca' bena' combid nechte, bito gua'a latjə əsa'o lega'aque' de'en babsi'ini'ana'.”

De'en cheyalə goncho par niç naocho Jesocrisən'

²⁵ Na' beña' zan juisy jəsə'ənaogü'e Jeso'osən'. Na' gwyechje' gože' lega'aque': ²⁶ —Notə'ətezle šə gaquəchele che xale, xna'ale, xo'olle, xi'inle, bišə'əle, zanle na' cuinle mazəchlə can' chaquele chia', bito gaquə naole nada' par gacle disipl chia'. ²⁷ Na' notə'ətezle šə laogü'e de'en chaquele yoso'ochi' yoso'osaquə' beña' le'e o so'ote' le'e to le'e yag coroz de'e nan' bito chonjilažə'əle nada', leczə bito gaquə naole nada' par gacle disipl chia' šə ca'. ²⁸ Šə to le'e chene'ele gonle to campnary, zgua'atec cue'ele nach gonle xbab na' gwzaquə'əle ca do ja'aquə'ətə' chyažjele par gonlen na' šə de mech chelenə' par yeyož campnaryən'. ²⁹ Šə cui əgwchixə əgwto'lə' xbab chelen' ja'aquə'ətə' de'en chyažjele, catə' bagwlecle laneina' na' gacbe'ile de que bitoch bi mech de par yeyožən. Na' yoguə' beña' yesə'əle'i lanein' so'one' le'e borl. ³⁰ Na' yesə'əne': “Benga gwzola' bene' to campnary pero bito goquə yesyože' de'en gwzolaogü'e.” ³¹ Na' šə to rei chone' xbab tile' len yeto rei leczə zgua'atec gongaxje' xbab šə len si mil soldad che' ca' guaquə gone' gan len rein' yeto ben' yidə len galjə mil soldad. ³² Na' šə chacbe'ine' cui gone' gan, lao nezo rein' yeto zitə'ələ, əsele'e beña' žjəsə'ədie' xtiže'en lao rein' yeto yesə'ənabe' yesyə'ənite'e binlo. ³³ Can' naquən len le'e, notə'ətezle šə cui cuejyichje family chele, bia yixə' chele na' yoguə'əloj cuantəchlə bi de'e de chele, bito gaquə naole nada' par gacle disipl chia'.

Gwxaquə'əlebecho ca zedə'

³⁴ Zedə'ən naquən güenchgua, pero na' šə bitoch naquən xzi', žnacxa goncho par niç yeyaqun xzi'? ³⁵ Bitobi zaquə'ən, nic gaqualenən yežlyon', nic gaquə gwchinchon par beb, lete cho'onchon. Can' gwxaquə'əlebele šə bitoch chzenagle chia' do yichj do lažə'əle. Le'e žia nagle de'e chene, legwzenag.

15

Jempl che xilə' bian' goquəžeje

¹ Na' beña' gočhixjw ca' na' yeziquə'əchlə beña' ca' chso'on de'e mal, yogue'e gosə'əbigue'e gan' zo Jeso'osən' par gwse'enene' xtiže'ena'. ² Na' beña' fariseo ca' na' beña' ca' choso'osed choso'olo'i lei de'en bzoj de'e Moizezən' chəsə'ənelaogü'e, chəsə'əne': —Benga chgüialaogü'e beña' ca' chso'on de'e malən' na' chaolene' lega'aque'.

³ Nach Jeso'osən' be'e to jempl, gože' lega'aque': ⁴ —Šə nitə' to gueyoa xilə' chele na' gaquəžeje tob, žacabi yocua'anle bia ca' taplalj tgalj gan' ža'ab latjə

dašən' na' žjəyediłjle bian' goquəžejena' xte ca yeželeleb? ⁵ Na' catə' yeželobən' yebeichgüeile na' yežoaleb ya'a yenle yeyo'aleb. ⁶ Na' catə' yežinle ližle əgwtole beñə' migw chele na' beñə' gwliž chele na' ye'ele lega'aque': "Leyebel len nada', chedə' babežel xilə' chia' bian' goquəžeje." ⁷ Echnia' le'e, gobeiche Diozən' na' angl che' ca' catə' to beñə' chon de'e mal yedinjene' xtole'ena' clezə can' chasyə'əbeine' len taplalj tğualj beñə' zjənaquə beñə' güen lao Diozən' beñə' bito de xtole'əga'aque' par yesyə'ədinjene'en.

Jempl che mech de'en gwnit

⁸ Na' no no'olan' šə de ši mech p̄lat che' na' šə nit ton, žəcabi əgguale'e to yi' na' gwlo'e lo'o yo'o che'ena' na' yeyiljyože'en xte ca yeželene'en? ⁹ Na' catə' yeželene'en na' əgwtole' no'olə migw che' ca' na' beñə' gwliž che' ca', na' ye'ele lega'aque': "Leyebel len nada' chedə' babeželda' mech chian' de'en gwnitən'." ¹⁰ Echnia' le'e, leczə chesyə'əba chesyə'əzaquə'əlažə' angl che Diozən' catə' to beñə' chon de'e mal chedinjene' xtole'ena'.

Jempl che ben' benditjei xi'inen' xmeche'

¹¹ Na' leczə gože' lega'aque': —Gwzo to beñə' na' gwnitə' čopə xi'inə' beñə' byo. ¹² Na' bžin ža beñə' xcuidən' gože' xən': "Xa, beñ nada' de'en cheyalə' si'a de'en deido'." Nach xē'en bnežjue'ene' de'en cheyalə' si'ena'. ¹³ Gwde yeto čopə ža na' beñə' xcuidən' btobe' yoguə'əloł quantzə bi de'en de che' na' gwze'e gwyeye' nasyon zita'. Na' porzə de'e cui zaque'e jene'. Na' lao zdalene' de'e malən' benditjeine' xmeche'ena'. ¹⁴ Na' catə' beya xmeche'ena', goc to bgüin juisy lao doxen nasyonə', na' bitoch bi bi gotə' par si'e de'e ye'ej gaogüe' na' bichlə de'e byažjene'. ¹⁵ De'e na'anə' gwyeye' gan' zo to beñə' nasyonə' na' gwñabe' žin. Na' be'ena' bsele'ene' yixə' gan' ža' bia zan xcoše' par nič jəye'eb. ¹⁶ Na' tant gwdone' xte goclaže'e gaogüe' de'en chsa'o coš ca', pero ni len cui bosonežjue'ene' gaogüe'. ¹⁷ Na' beyone' to xbab šao' na' gwne': "Nita' mos zan che xā'ana', na' dechgua de'e chsa'ogüe', na' nada' gatada' yelə' chdon. ¹⁸ Yeza'a nga na' yeya'a gan' zo xā'ana', na' yapa'ane': Xa, babena' de'e mal lao Diozən' na' laogo' le'. ¹⁹ Na' bitoch zaca'a gono' nada' cuent ca xi'ino', con šə go'o latjə gaca' xmoso'." ²⁰ Nach beze'e beyeye' gan' zo xē'ena'. Na' zita'ələ ze'e yežine' catə' ble'i xē'en le', na' gwsa'adoe' jəšague'ene', na' gwdele'ene' gwdaogüe'ene' bxid chedə' beyašə' beži'ilaže'ene'. ²¹ Nach gož xi'inə'ena' le': "Xa, babena' de'e mal lao Diozən' na' laogo' le', na' bitoch zaca'a gono' nada' cuent ca xi'ino'." ²² Na' xē'ena' gože' xmoso'en: "Jəlej tğot lacha' šao' na' guaco'obo'on. Na' jəxi' to niy na' gwdio'on xbembo'on, na' jəxi' šcue' yel na' gwdio'on ni'abo'ona'. ²³ Na' jəxi' go'on da'ona' bian' chanə' na' betəb par gaochob, na' goncho lni. ²⁴ La' xi'ina' nga babena'abo' cuent ca to bi'i' guat, pero na'a zobo' mbambo'. Gwlejjychjbo' chio'o, pero na'a babela'abo'." Na' gwzoloə chso'one' lñin'.

²⁵ Na' xi'inə' nechən' zde' yoba catə'an bežin xi'inə'en yeto. Na' catə' zeza' ben' gwyey yoban' bazon yežine' liž xē'ena' catə' benene' choso'ocueže' na' choso'oye'e. ²⁶ Na' goxe' to mosən' na' gwñabene' le' bixchen' chso'one' lñin'. ²⁷ Na' mosən' gože'ene': "Bi'i bišo'ona' babela'abo' na' xā'ona' babete' go'on dao' bian' chanə' chedə' belə'abo' to šao' to güen." ²⁸ Nach xi'inə' nechən' bže'e, na' bito gone'ene' yeyo'e liž xē'ena'. Nach bchoj xē'ena' gotə'əyoine' le' yeyo'e. ²⁹ Pero xi'inə' nechən' gože' xē'ena': "Zan iz bachac zoa' nga chonteza' žin con can' chono' mendad. Na' bitonə' gaca' beñə' godenag. Na' ni tozə šib dao' cuinə' gono' nada' par gotə'ab gona' lñin' len beñə' migw chia' ca'. ³⁰ Na' na'a belə' xi'ino' nga bi'in benditjei yoguə'əloł de'en bnežjo'obo'

gwza'alembō' no'olā sargat, na' beto' par lebo' to go'on dao' bian' chanə'əch." ³¹ Na' xē'enə' gože'ene': "Xi'indaogua'a, le' zotezo' len nada', na' yoguə'əlo' de'e deida' naquan' chio'. ³² Pero cheyalə' goncho lni nga na'a tant chebeicho babelə' bi'i bišo'onə', chedə' babena'abo' cuent ca to bi'i guat, pero na'a zobo' mbambo'. Gwlejiyichjbo' chio'o pero na'a babelə'abo'."

16

Jempl che to mos əblao ben' benditjei de'en de che xane'

¹ Na' lecza gož Jeso'osən' disipl che' ca': —Gwzo to beṇə' gwni'a na' gwzo to mos əblao che' beṇə' gwyo'o lao ne'e bia yixə' che' ca' na' biquə'əchlə de'en de che'. Na' beṇə' gwni'anə' benene' rson de que xmosen' babenditjeine' de'en de che'. ² Nach xane'en goxe' le' na' gože'ene': "Babenda' to dižə' can' chono'. Cheyalə' gon' cuent che yoguə'əlo' de'en babchino' chia' chedə' bitoch gaquə' gono' xšina'anə' na'a." ³ Nach mosən' bene' xbabən': "¿Bixa gona? Xana'an bacholague' nada' cuich gaquə' gona' xšine'enə', na' nic chac gona' žin gual na' gaquəda' zto' šə naba' carida. ⁴ Nežda' bi gona' par nič nitə' beṇə' yesə'əgiialaogüe' nada' catə' cuich chona' žin che xana'an." ⁵ Na' goxe' yoguə' beṇə' ca' chsa'alə' xmech xane'enə' tgüejə' tgüejə'. Na' gože' beṇə' nechən': "¿Ja' aquə' chalə'o che xana'anə'?" ⁶ Na' be'enə' gože'ene': "Chalə'a che tapa mil litr set." Nach gož mosən' be'enə': "Gwche'edo', na' bzoj lao cuentən' de que chalə'o che chopə mil litrə setən'." ⁷ Gwde na' gože' beṇə' əgwchopen': "¿Ja' aquən' chalə'o che xana'anə'?" Nach be'enə' gože'ene': "Che to mil rob trigw." Nach mosən' gože' be'enə': "Gwche'edo', na' bzoj lao cuent chio'onə' de que chalə'o che xon' gueyoa robzə trigon'." ⁸ Na' xan mos goxoayaguən' goche'ine' lechgualə' bib naquə' be'enə' de'en bene' xbab naclən' gone' par nič soe' binlo len ljuežje' ca' beṇə' ca' chsa'alə' che xane'en. Nada' chnia' le'e de que beṇə' ca' zjəchi' yichjga'aque' porzə de'en chac lao yežlyon' chso'onchgüe' xbab naclən' so'one' len de'en zjədeine'. Pero zan beṇə' ca' bazjəyo'o be'eni' che Diozən' lo'o yichjla'ažda'oga'aque'enə' bito chso'one' xbab naclən' yesə'əchine' de'en zjədeine'.

⁹ Na'a əchnia' le'e, de'en deile yežlyo nga de'e te chein', pero legwchin len par nič nitə' migw chele, na' catə' babeya bi de'en deile yežlyo nga, nitə' beṇə' yozene'e le'e catə' yežinle yoban' gan' sole zejlicane.

¹⁰ Šə to beṇə' chone' can' cheyalə' gone' len de'e cuitec zaquə' lecza gone' can' cheyalə' len de'e zaquə'əchgüei, na' beṇə' cui chone' can' cheyalə' gone' len de'e cuitec zaquə', lecza bito gone' can' cheyalə' len de'e zaquə'əchgüei. ¹¹ Šə le'e cui chonle can' cheyalə' gonle len de'en deile yežlyo nga de'e te chei, bito gon' Diozən' le'e de'e zaquə'che de'en cui te chei. ¹² De'en deile yežlyo nga che Diozən' anə', caguə' chelen'. Na' šə bito chonle can' cheyalə' gonle len de'en naquə' che'enə', bito gone' le'e de'e zaquə'che de'e cui te chei.

¹³ Notono no gaquə' so liž chopə xan žin par gaque' xmosga'aque' tš'i'izə, chedə' la' šə gone' ca', gue'ine' to xan žinṇə' na' gaquene' che yetoe', o gone' žin che toe' do yichj do lažə'e na' bito bi respet gape' che xane'en yeto par gone' xšine'enə'. Lecza ca' le'e bito gaquə' gonle xšin Diozən' do yichj do lažə'əle na' gonte xšinle par gacle beṇə' gwni'a.

¹⁴ Na' lecza gwniətə' beṇə' fariseo ca' gwse'enene' xtižə' Jeso'osən' na' gwso'onene' borl, chedə' gwso'elažə'əche' əsa'aque' beṇə' gwni'a. ¹⁵ Na' gož Jeso'osən' lega'aque': —Le'e ža, chonle par nič beṇə'chən' chesə'əne' chele de que zdacze licha, pero Diozən' než nle'ine' yichjla'ažda'olen'. Zjade de'en

chsa'aque benachən' zjənaquən de'e žialao xen pero balən zjənaquən de'e chgue'í Diozən'.

Lei che Diozən' na' beñə' ca' chnabi'e

¹⁶ Na' gozna Jeso'osən': —Antslə con lei de'en bzoj de'e Moizezən' na' len de'en boso'ozoj profet ca' bzejni'in chio'o che Diozən'. Pero na'a de'e Juanna' babedətxijui'e dižə' güen dižə' cobən' de que Diozən' nabi'e con notə'ətezə beñə' soe' latjə, na' leczə ca' neto' chyixjue'eto'on. Na' beñə' zan chesə'əzo chesə'əbi'e naclə so'one' par niç nabia' Diozən' lega'aque'.

¹⁷ Ca naquə bitə'ətezə pont dao' che lei che Diozən' bito te chei pero ca naquə yežlyon' len de'e ca' zjəžia le'e yoban' yesə'əde chega'aquei.

Bito yela'acho be'en checho o no'ol checho par solencho beñə' yoblə

¹⁸ Notə'ətezə beñə' chela'a no'ol che'enə' par yequē'e no'olə yoblə, tozəczə ca malən' naquən len de'en chon beñə' chgo'o xtoe'. Na' yoguə' no beñə' yošagne'e len to no'olə beñə' bela'a ben' chei le', leczə tozəczə ca malən' naquən len de'en chon beñə' chgo'o xtoe'.

Beñə' gwni'a na' Laçhən'

¹⁹ Nach gozna Jeso'osən': —Gwzo to beñə' gwni'a, na' lechguale xoche goquə xala'ane'ena', na' lechguale gwdaošaogüē'e yoguə' ža. ²⁰ Na' to beñə' yašə' le' Laçh yoguə' ža bzo beñə' le' cho'a puert zaguan che beñə' gwni'anə' par gwñabe' carida. Na' Laçhən' lechguale gwžia yežə' doxen cuerp che'enə'. ²¹ Na' tant gwdone' gone'ene' gaogüē' pedas dao' yelə' guao che beñə' gwni'anə' de'en besə'əxopə lao yon'. Na' beco' ca' ja' aquəb jəsə'əle'eb yežə'an gwžia cuerp che'enə'. ²² Na' catə' got beñə' probən', nach angl ca' besyə'əzi' besyə'əque'e le' yoban' gan' zoe' len de'e xaxta'ocho Abraannə'. Na' leczə got beñə' gwni'anə' na' bosə'əcuasə'ene'. ²³ Na' beyeje' gan' ža' beñə' ca' bagwsa'at. Na' lao chžaglaogüē' na' gwļis laogüē'enə' na' ble'ine' zitə'ələ nitə' Abraannə' lene' Laçhən' yoban'. ²⁴ Na' gwne' zižjo gwne': “Xa Abraam, beyašə'əlažə'əšgüei nada', na' bselə' Laçhən' par yosbise' loža'an len latə' nis de'en yexopə xbene'enə' chedə' la' lechguale chžaglaogua' lo'o yi' nga.” ²⁵ Pero na' Abraannə' gože' le': “Xi'ina' bosa'alažə' catə' lao bguano' yežlyon' porzə de'e šao' de'e güen gotə' chio', na' Laçh nga porzə de'e mal goc che'. Na' bazoe' mbalaz nga na'a, na' le' chžaglaogo'. ²⁶ Bito gaquə gone' can' che'endo' chedə' la' Diozən' baçh bzie' to bđinj xen ga cui no zaquə' te entr neto' na' le'e par niç ca' bito gaquə yidato' gan' zolen', na' nic gaquə da'ac le'e nga.” ²⁷ Nach beñə' gwni'anə' gože' Abraannə': “Beñə' gol dao', chatə'əyoida' le', bselə'əšga Laçhən' liž xa'anə'. ²⁸ Nitə' gueyə' beñə' biša'a, na' che'enda' chixjue'ine' lega'aque' naquən' so'one' par niç Diozən' bito əsele'e lega'aque' latjə nga gan' yesə'əžaglaogüē'.” ²⁹ Abraannə' gože' le': “Deczə libr de'en bzoj de'e Moizezən' na' libr de'en boso'ozoj de'e profet ca' beñə' ca' gwso'e xtižə' Diozən'. Cheyalə' yoso'ozenague' che de'e ca' zjənyožen'.” ³⁰ Na' gože' Abraannə': “Bito beñə' yol dao'. Žalə' to beñə' yebane' ladjo beñə' guat ca' güe'elene' lega'aque' dižə', la' gosyə'ədinjene' xtolə'əga'aque'enə'.” ³¹ Nach gož Abraannə' le': “Šə bito choso'ozenague' che de'en bzoj de'e Moizezən' na' de'e profet ca', la'anə'əczə šə yeban to beñə' ladjo beñə' guat ca', bito se'ejle'e che Diozən'.”

17

Bito cheyalə' goncho ca' əxopə beñə' yoblə gone' de'e mal

¹ Nach gož Jeso'osən' disipl che' ca: —Syempr de de'en gonən ca yesə'əxopə beṇə' so'one' de'e malən'. Pero probchguazə beṇə' chone' ca yesə'əxopə' so'one' de'e malən'. ² Nca'alə xneze žalə' yoso'ocheje' yene'enə' to yej yišə' na' žjəsə'əzalə'ene' lo'o nisda'onə' cle ca soe' gone' ca əxopə beṇə' gone' de'e malən' la'anə' tozə beṇə' cuitec bi zaquə' len beṇəčan'.

³ Le'e gon xbab chele, šə to beṇə' bišə'əcho beṇə' bachonlilažə' Diozən' gone' mal contr tole, ben' bene' contr cheyalə' gatə'əyoine' le' yedinjene' xtole'enə', na' šə yedinjene' xtole'enə' cheyalə' yezi'ixene' che'. ⁴ La'anə'əczə gaž las lao tza gone' de'e mal contr beṇə' bišə'enə', šə gaž laste əne': “Babeyjda' che de'en bena', bezi'ixen chia'”, na' cheyalə' yezi'ixene' che'.

Gwse'enene' so'onlilažə'əche' Diozən'

⁵ Nach gwse' apostol ca' Xanchon': —Gaquələnšgo' neto' par nič gonlilažə'əchto' Diozən'.

⁶ Nach gož Xanchon' lega'aque': —Xsa yag moztasən' naquən de'e dao' rizə'. Na' la'anə'əczə de'en chonlilažə'əle Diozən' gwxaquə'əleben ca to xsa moztasən' laogüe de'en cuiṇə' gonlilažə'əchgualene', guac ye'ele yag yixgüio nga: “Boša' xišna'o nga na' žjəyeyzo' lo'o nisda'onə'”, na' guaquəczə can' ṇalena'.

De'en cheyalə' so'on mos ca'

⁷ Ca naquə costombr chelen' šə mos chelen' chgua'əne' go'oṇ o chapə chye' xilə', catə' chele'e goyebən' bito che'elene': “Beyo'o ngalə gwche'edo' gaogo' xše'”. ⁸ Cle che'elene': “Bsi'ini'a de'en ye'ej gaogua' na' gwdio' de'en gaogua'anə'. Te yedaogua'anə' nach gaogo'.” ⁹ Na' bito cho'elene' yelə' choxwlen catə' babene' de'en gožlene' gone'. ¹⁰ Na' leczə ca' le'e nacle disipl chia', catə' babenle yoguə'əloł de'en nona' mendad gonle cheyalə' ənale: “Bifo bi zaquə'əto' par goṇo' yelə' choxwlen cheto', chedə' de'en babento'onə' la' de'e cheyalə'əczə gonto'onə'.”

Jeso'osən' beyone' ši beṇə' chse'i yizgüe' de'en nzi' lepr

¹¹ Lao zda' Jeso'osən' Jerosalennə' len disipl che' ca' na' gwdie' gan' zjəndil distrit che Samaria len Galilean'. ¹² Na' besə'əžine' to cho'a yež dao' na' besə'əchoj ši beṇə' zjesə'əšague' Jeso'osən', beṇə' ca' chse'i yizgüe' de'en nzi' lepr, na' gosə'əzeche' zita'ələ. ¹³ Na' gosə'əne' zizjo gwse'ene': —Maestr Jeso'os, beyašə'əlažə'əšguei neto'.

¹⁴ Na' Jeso'osən' catə' ble'ine' lega'aque' gože' lega'aque': —Ležjəya'ac lao bxož ca' nič yesə'əgüie' le'e.

Na' goquən' lao zezyə'əngüe'e nezən' besyə'əyaquene'. ¹⁵ Nach toe' catə' goche'ine' de que bač beyaquene' na' bebi'e na' gwne' zizjo be'elaogüe'e Diozən'. ¹⁶ Na' bzo xibe' lao Jeso'osən' na' be'ene' yelə' choxwlen. Be'enə' ben ca' naque' to beṇə' Samaria. ¹⁷ Nach gwna Jeso'osən': —Ši beṇə' can' beyona'. ¿Ganxa beṇə' ca' yegan'? ¹⁸ Tozə beṇə' zita' nga bebi'e par cho'elaogüe'e Diozən'.

¹⁹ Nach gož Jeso'osən' be'enə': —Bezoža' na' beyej to šao' to güen. Babey-acdo' chedə' chonlilažə'o nada'.

Yelə' chnabia' che Diozən'

²⁰ Na' goquən' beṇə' fariseo ca' gosə'əṇabene' le' batxan' yidə ben' əselə' Diozən' par nabi'e nasyon Izraelən'. Nach boži' Jeso'osən' xtizə'əga'aque'enə' gwne': —Ca naquən' nabi'enə' bito naquan to de'e le'icho. ²¹ Notono no cheyalə' əne': “Bgüiašc nga chnabi'e”, o “Na' chnabi'e”, chedə' bazoe' na'a entr le'e chnabi'e.

²² Nach gože' disipl che' ca': —Gwžin ža catə'an n̄ale: “Žalə'əga na'a bač zocho yoban' gan' chnabia' ben' bselə' Diozən'.” Pero bito gaquə can' chnablažə'əlenə'. ²³ Nitə' beṇə' əse'e le'e: “Bgüiašc nga chnabi'e”, o “Bgüiašc na' chnabi'e”, pero le'e bito n̄aole beṇə' ca' əse'e le'e ca'. ²⁴ Can' čac catə' chep yesən' chse'eni'in doxenlə le'e yoban' to de repentzə, leczə can' gaquə catə'an əžin ža yida' de'e yoblə, nadan' naca' ben' bselə' Diozən' golja' beṇačh yida' to de'e repentzə na' yoguə'əlol beṇə' yesə'əle'ine' nada'. ²⁵ Žgua'atec de de'e zan de'e cheyalə' čhi' saca'a, na' n̄ezda' de que beṇə' ca' ža' na'a bito se'ejle'e čhia'. ²⁶ Leczə can' goquə ca tyemp che Noenə', leczə can' gaquə catə'an bazon əžin ža yida' de'e yoblə, nadan' naca' ben' bselə' Diozən' golja' beṇačh. ²⁷ Beṇə' gwnita' ca tyemp che Noen' gwž'a'azechə' gwse'ej gwsa'ogüe' na' gwsə'elaozechga'aque' bosə'əšagne'e na' bosə'ošague' na' no xi'inga'aque' xte catə'an bžin ža gwyo'o Noen' lo'o barcon', na' goc to yejw sio' juisy nach gosə'əbiayi' yoguə' beṇə' ca' cui gwsə'o lo'o barcon'. ²⁸ Leczə can' goquə ca tyemp che Lotən'. Beṇə' Sodoma ca' gwž'a'azechə' gwse'ej gwsa'ogüe', gwsə'ote'e no bia yixə' čhega'aque' na' bichlə de'e de čhega'aque', na' gosə'əzi'e bi de'en besə'əyazžene' na' gwsa'az gwsa'ane' na' gwsə'on ližga'aque'. ²⁹ Pero na' žan' beza' Lotən' Sodoman', Diozən' bene' par ničh lechguale byinj yi' na' sofr yobanə' na' gosə'əbiayi' yogue'e. ³⁰ Can' gaquə catə'an yida' de'e yoblə, nadan' naca' ben' bselə' Diozən' golja' beṇačh, na' yoguə'əlol beṇə' yesə'əle'ine' nada'.

³¹ Na' žan' yida' šə na'aclə zo to beṇə' chone' dezcanz lao sotea che' liže'enə' na' šinlaze'enə' ža'an lo'o yo'onə', cui yeyetje' par yetobe' šinlaze'enə', con cueyichje'en. Na' leczə ca' ben' zo do yoba bito gaquene' yeyej liže'. ³² Le'e žjsa'alažə' can' goc che no'ol che Lotən'. ³³ Notə'ətezə beṇə' chaquene' gone' par ničh cui čhi' saque'e o par ničh cui no got le', be'enan' cuiayi'. Na' notə'ətezə beṇə' chsanlažə' cuine' čhi' saque'e o so'ot beṇə' le' por ni čhia', bade yelə' mban che'enə' zejlicane.

³⁴ Echnia' le'e, quinga gaquə že'enə' catə'an yida' de'e yoblə: Čhopə beṇə' žjədie' chəsə'ətase', toe' yezi' yeca'a Diozən' na' toe' yega'an. ³⁵ Na' čhopə no'olə niṭə' txen chso'ote', toe' yezi' yeca'a Diozən', na' toe' yega'an. ³⁶ Na' čhopə beṇə' niṭə' do yoba, toe' yezi' yeca'a Diozən' na' leczə yega'an toe'.

³⁷ Catə' gwse'enene' dižə' quinga, gwse'ene': —čGan' gaquə de'e quinga Xanto'?

Nach Jeso'osən' gože' lega'aque': —Ngale'en chonen che ben' ne': “Gan' de bia quat nan' chesə'əžag šod ca'.”

18

Jempl che to no'olə gozebə len to juez mal

¹ Na' be'elene' lega'aque' to jempl par ničh bsd blo'ine' lega'aque' de que cheyalə' so'ontezə so'one' orasyon sin cui žjəxaquə'əlažə'əga'aque'. Na' gože' lega'aque': ² —Gwche' to syoda gan' gwzo to juez. Na' juezən' bito gwdape' Diozən' respet na' nic gwche' yičhje' šə chsa'azlažə' beṇačhən' can' chone'enə'.

³ Na' lao syodan' gwzo to no'olə gozebə na' goxjəzə cheje' lao juezən' na' che'e le': “Bosla nada' lao na' beṇə' contr čhia'anə'.” ⁴ Bagoc šša bito bzenague' che', pero gwdelə bene' xbabən' na' gwne': “Bito čhapa' Diozən' respet na' nic čhi' yičhja' šə chsa'azlažə' beṇačhən' can' chona'. ⁵ Pero yosla' no'olə nga lao na' beṇə' contr che' la' lechguale zed chone'ene' nada'. Šə bito gona' yelə' jostis che'enə' bitoch soida' tant zed chedeyenene' nada'.”

6 Nach gož Xanchon' lega'aque': —Le'e gon xbab che de'en gwna juežan' ben' cui zda licha. 7 Naquächxe gon Diožan' gwzenague' che beñə' ca' bagwleje' par zjənaque' xi'ine', beñə' ca' chso'olgiüž le' do ža do yel. Goslacze' lega'aque' lao na' beñə' contr chega'aque' ca' la'añə'əczə šə əsa'aquene' de que bachžeine'. 8 Echnia' le'e, to žalnezdao' Diožan' yosle' lega'aque' lao na' beñə' contr chega'aque' ca'. Pero catə' nada' yida' yežlyo nga yetlas, nadan' naca' ben' bselə' Diožan' golja' benach, cuili ne'e nitə' beñə' ne'e chso'onlilaže'e nada' par yosla' lega'aque' lao na' beñə' contr chega'aque' ca'.

Jempl che to beñə' fariseo len to beñə' gochixjw

9 Na' gwnitə' balə' beñə' zjənapəchgua confyanz cuinga'aque' de que zjənaque' beñə' güen lao Diožan' ca de'en chso'one'enə'. Beñə' ca' zjənone'en de que beñə' yeziqwa'əchlə bito bi zjəzaque'e. Na' Jeso'osən' be'e jempl nga par beñə' ca' zjənapəchgua confyanz cuinga'aque', gwne': 10 —Čopə beñə' ja'aque' lo'o yo'odao' əblaona' jse'ene' orasyon, to'e beñə' fariseo na' ben' yeto beñə' gochixjw. 11 Beñə' fariseon' gwzeche' na' bene' orasyonnə' cho'elao' cuine' na' gwne' quinga: “Diož, chona' yelə' choxcwlen chio' chedə' bito chona' can' chso'on yeziqwa'əchlə beñə'. Bito chca'a bi de'e de che beñə' yoblə, na' bito chona' bichlə de'e mal. Bito naca' beñə' ggo'o xtoi, nic chbejychja' no'ol chia' par solena' beñə' yoblə, na' nic naca' beñə' mal can' naquə beñə' gochixjw nga. 12 Čopə ža lao to xman chzoa' cui chaogua'. Na' yoguə'əloł gan de'en chona', chona'an ši cue'elə na' chnežjua' tcue'en par yo'oda'onə'.” 13 Na' beñə' gochixjon' gwzechateze' zitə'ələ, na' xte nic cheyaxjene' əlis laogüe'enə' əgğüe' yoban', na' chbažə' lcho'enə' gwne': “Diož, beyašə'əlažə'əsgue' nada' beñə' güen de'e mal.” 14 Ca'azə de'e gwna beñə' gochixjon'. Na' əchnia' le'e, Diožan' bezi'ixene' che beñə' gochixjon', na' beyeje' liže' sin cui bi xtole'e gotə'. Caguə ca' beñə' fariseon'. Na' notə'ətezcho cho'elao' cuincho, Diožan' gone' par nič gacbe'icho de que bitobi zaquə'əcho. Na' notə'ətezcho choncho xbab de que bitotec bi zaquə'əcho, Diožan' gone' chio'o yelə' bala'an.

Jsoa' beñə' bidao' lao Jeso'osən'

15 Na' ja'ac beñə' jso'e bidao' lao Jeso'osən' par nič əxoə ne'enə' yichjga'acbo' na' gone' orasyon chega'acbo'. Na' catə' besə'əle'i disipl ca' can' chso'one'enə', gosa'ədile' lega'aque'. 16 Pero na' Jeso'osən' goxga'aque'ebə' na' gože' disipl che' ca': —Le'e güe' latjə la'ac bidao' ca' laogua' nga, na' cui əgwžonle. Na' əchnia' le'e, beñə' ca' chəsə'əzəxjw yichjga'aque' lao Diožan' can' chəsə'əzəxjw yichj bidao' ca' lao xaxna'aga'acbo', lega'acze'ena' chso'e latjə chnabia' Diožan' lega'aque'. 17 Bidao' ca' bito chso'on cuinga'acbo' xen, na' de'e li chnia' le'e, notə'ətezele šə cui yeyacle ca bidao' par güe'ele latjə nabia' Diožan' le'e, bito gaquə yežinle yoban' gan' zo Diožan' chnabi'e.

Beñə' güego' ben' goquə beñə' gwni'a

18 To beñə' gwnabia' gože' Jeso'osən': —Maestr, le' naco' beñə' güen, gwna nada' bi de'en cheyalə' gona' par nič gatə' yelə' mban zežlicane chia'.

19 Na' par nič gon be'enə' xbab che de'en ne', Jeso'osən' gože'ene': —Čbixchen' nao' de que naca' beñə' güen? Diož nan' naque' le'eze-laogüe beñə' güen. 20 Le' nezdo' bin' na lein': “Cui co'o xtole, na' cui cuejyichjle be'en chele o no'ol chele par solenle beñə' yoblə; cui gotle beñə'; cui cuanle; bito gacle testigw falš contr sa'aljuežjle; gwnežjwle yelə' bala'an xaxna'əle.”

21 Nach gož be'en le': —Yoguə'əloł de'e quinga chona'an dezd xcuida'a.

22 Nach catə' bene Jeso'osən' xtiže'en na' gože'ene': —Tozə de'en ne'e chac falš gono'. Jəyeyetə' yoguə'əloł bi de'e de chio', na' mech de'en le'ido' che de'e

ca' bnežjon beṇə' yašə', nach da denao nada'. Na' catə' yežino' yoban' gan' zo Diozən', de'e zaquə'əche gatə' čhio'.

²³ Pero na' be'enə' cata' beyož benene' dižə' de'en gož Jeso'osən' le', gwzecha-choe' trist, čhedə' la' goque' to beṇə' gwni'achgua. ²⁴ Na' bgüia Jeso'osən' beṇə' gwni'anə', na' gwne': —Zdebəchgua naquən par to beṇə' gwni'a güe'e latjə par nič nabia' Diozən' le'. ²⁵ Zdebəchlə naquən par to beṇə' gwni'a güe'e latjə ṇabia' Diozən' le' cle ca par to camey teb to lo'o nag yešə'.

²⁶ Na' beṇə' ca' boso'ozenague' xtiže'enə' gwse'ene': —čNoxan' yečoj xni'a de'e malən' ža?

²⁷ Na' Jeso'osən' gože' lega'aque': —De'en cui gaquə gon beṇəčhən', bito ṇacho cui gaquə gon Diozən' len.

²⁸ Nach Bedən' gože' le': —Neto' bagwlejšyčjtə' family četo' ca' na' len de'en deito' par chonlilažə'əto' le' na' chzenagto' čhio'.

²⁹ Na' gož Jeso'osən' lega'aque': —De'e li čhnia', šə nole bagwlejšyčjle ližle, xo'olle, bišə'əle, xaxna'ale o xi'inle čhedə' cho'ele latjə čhnabia' Diozən' le'e,

³⁰ Diozən' gone' le'e de'e zaquə'əche lao yežlyo nga ṇa'a clezə ca de'e ca' na' beṇə' ca' bagwlejšyčjle. Na' catə' yežinle yoban' gone' par nič əbanle zejlicane.

De'e yoblə gosyixjue' Jeso'osən' de que gate'

³¹ Na' gwlej Jeso'osən' apostol ca' šižin ca'alə, na' gože' lega'aque': —Na'a šejcho Jerosalenṇə' gan' gaquə yoguə'əlo' de'en baboso'ozoj de'e profet ca' čhia', nadan' naca' ben' bselə' Diozən' golja' beṇəč. ³² Gaca' lao na' beṇə' ca' cui zjanaquə beṇə' Izrael, na' so'one' nada' borl na' yesə'əzi'čhiže'e nada', nach yoso'oža' xene'e cho'alaogua'anə'. ³³ Yesə'əyine' nada' yid sot nach so'ote' nada', pero yeyon ža yebana' ladjo beṇə' guat ca'.

³⁴ Pero disipl čhe' ca' bito gwse'ejni'ine' de'en gože' lega'aque'. Zjənčhol yičhja'ažda'oga'aque'enə', de'e na'anə' bito gwse'ejni'ine'en.

To beṇə' lčhol beṇə' Jerico bele'ine'

³⁵ Nach lao bazon əžin Jeso'osən' Jericon', to beṇə' lčhol čhi'e cho'a nezən' čhṇabe' carida. ³⁶ Na' benene' chesə'əde beṇə' zan, na' gwṇabe' bin' chac.

³⁷ Nach gwse'ene': —Jeso'os beṇə' Nasaretən' čhdie' laogo'onə'.

³⁸ Na' gwne' zižjo gwne': —Jeso'os, len' naco' xi'in dia čhe de'e Rei Dabin', jbeyašə'əlažə'əšgwei nada'!

³⁹ Nach beṇə' ca' zjəžialao lao Jeso'osən' gosə'ədile' beṇə' lčholən' gwse'ene' de que cheyalə' soe' žizə, pero nachle gwne' zižjochlə gwne': —Len' naco' xi'in dia čhe de'e Rei Dabin', jbeyašə'əlažə'əšgwei nada'!

⁴⁰ Jeso'osən' gwleze' nach bene' mendad əžjsə'e beṇə' lčholən' laogüe'enə' na' catə' bgüiguə' beṇə' lčholən' lao Jeso'osən' nach gože'ene': ⁴¹ —čBi che'endo' gona' len le'?

Nach beṇə' lčholən' gože'ene': —Xana' benšga par nič yele'ida'.

⁴² Jeso'osən' gože'ene': —Bele'i. De'en chonlilažə'o nada' bač goc can' che'endo'onə'.

⁴³ Na' le'e bele'iteine' na' gwnaogüe' Jeso'osən' be'elaogüe'e Diozən', na' leczə ca' yoguə' beṇə' ca' besə'əle'ine' can' goquən' gwso'elaogüe'e Diozən'.

¹ Nach Jeso'osən' gwyo'e Jericon' na' gwdeze' yešla'a syodan'. ² Na' zo to beṇə' le' Saqueo. Naque' beṇə' gwnabia' che beṇə' gočixjw ca', na' naque' beṇə' gwni'a. ³ Gwdiljlaže'e naclə le'ine' Jeso'osən' pero bito goquə, chedə' nitə' beṇə' zan len Jeso'osən' na' Saqueon' goque' to beṇə' bčhecw dao'. ⁴ De'e na'anə' gwsa'adoe' gwdie' lao beṇə' ca' par jəšepe' to lao yag yixgüio ničh goc ble'ine' Jeso'osən', chedə' bazon te Jeso'osən' na'. ⁵ Pero na' catə' bžin Jeso'osən' xan yaguən', bgüie' lao yaguən' na' gože'ene': —Saqueo, beyetjdodo', chedə' cheyalə' yega'ana' ližo'on neže'.

⁶ Nach Saqueon' beyetjdoe' chebeine' nach beče'ene' liže'enə' na' be'elaogüe'ene'. ⁷ Pero na' beṇə' ca' zjənzag len Jeso'osən' catə' besə'ale'ine' can' goquən', yogue'e gosə'ənelaogüe'e gosə'əne': —Bazde' liž to beṇə' güen de'e mal par so'enə'. ⁸ Na' Saqueon' gwzeche' nach gože' Xanchon': —Xana', gašjə de'en deida' gwnežjua'an beṇə' yaša', na' de'en bagwcuə'a che beṇə' ca' bxoayaga' ničh gosə'əyixjue' mazəchlə ca de'en cheyalə' yesə'əyixjue', yonežjua' lega'aque' tap tantən'.

⁹ Na' Jeso'osən' gože'ene': —Neža babebej Diozən' le' lao de'e malən' len family chio', na' de'e li banacle xi'in dia che de'e Abraannə' laogüe de'en bachonlilažə'əle Diozən' can' ben de'e xaxta'ocho Abraannə'. ¹⁰ Ca naca' nada', bselə' Diozən' nada' golja' beṇə' par zedəlo'ida' beṇə' ca' bachəsə'əbiayi' de que nži'ilaza'a lega'aque' na' par ničh con noe' so'onlilažə' nada' yebejəga'aca'ane' xni'a de'e malən'.

Jempl che ši beṇə' bnežjw xanga'aque'en lega'aque' chopə gueyoa pes güeja

¹¹ Na' žlac nežjənzag beṇə' chse'enene' dižə' de'en choe' Jeso'osən', be'elene' lega'aque' to jempl chedə' banite'e galə'əzə Jerosalennə' na' gwsa'aque' de que le'e solaote ṇabi'e nasyon Izraelən'. ¹² Nach gwne': —Lao to family blao bchoj to beṇə' gwyeye' to nasyon zitə' jene' de'en cheyalə' gone' par ničh solao ṇabi'e nasyon che'enə' catə' yežine'. ¹³ Na' antslə zese'e gwleje' ši mos che'enə' na' bnežjue' to toe' chopə gueyoa pes güeja. Nach gože' lega'aque': “Mech nga gonele negosy lao cui zoa.” ¹⁴ Pero beṇə' gwlaž che' ca' besə'əgue'ine' le'. Nach catə' beyož gwze'e bosə'osele'e beṇə' lao xane'enə' ben' naquə rein' jse'eže'ene': “Bito chene'eto' ṇabia' bengə neto'.” ¹⁵ Nach catə' bežin be'enə' laže'en de'e yoblə gwzolao gwnabi'e, nach bene' mendad əžja'ac xmosə' ca' ši laogüe'enə', beṇə' ca' bocua'anlene' mechən'. Gone'ene' ənezene' ja'acquə'ətə' bžso'one' gan len mechən' de'en bocua'anlene' to toga'aque'. ¹⁶ Beṇə' nechən' bžine' laogüe'enə' na' gože'ene': “Xana', xmecho' de'en bocua'anleno' nada' benən gan ši tant ca de'en bocua'ano'.” ¹⁷ Nach xane'en gože'ene': “Babeno' de'e güen. Naco' mos güen na' syempr chono' complir can' cheyalə' gono'. Beno' can' cheyalə' gono' len de'e da'on bocua'anlena' le', na' de'e nan' gona' par ničh ṇabi'o ši syoda.” ¹⁸ Na' beṇə' əgwchopen' bžine' lao xane'enə' na' gože'ene': “Xana', xmecho' de'en bocua'anleno' nda' benən gan gueyə' tant ca de'en bocua'ano'.” ¹⁹ Nach gože' le': “Le' ṇabi'o gueyə' syoda.” ²⁰ Nach bžin yetoe' lao xane'enə' na' gože'ene': “Xana', nga de xmecho' de'en bocua'anleno' nada'. Bablažə'əcheča'an bey nga. ²¹ Bžeba' le' la' naco' to beṇə' znia. Chono' gan de'en cui beno' žin chei, na' chzi'o cwseš che de'en chsa'az beṇə' yoblə.” ²² Nach gož xanen' le': “De'en bagwnao' ca' chlo'in de que napo' dolə'. Naco' mos mal. Chacdo' de que naca' to beṇə' znia, de que chona' gan de'en cui bena' žin chei, na' chzi'a cwseš che de'en chsa'az beṇə' yoblə. ²³ Na' šə chacdo' chona' ca', žbixchen' cui gwlejo' xmecha'an beṇə' yoblə par ničh yezi'an len yichjei na'a babel'a'a?” ²⁴ Nach gože' beṇə' ca' zjəzecha

cuite'enə': "Yeca'ale xmecha'an de'en bocua'anlena'ane' na' gwnežjwlen ben' banoḁə' čhopa mil." ²⁵ Nach gwse'ene': "Xanto', banoḁə'acze' ši tant ca de'en bocua'anleno'one'." ²⁶ Nach gož beṇə' gwnabia'an lega'aque': "Echnia' le'e, ben' chon güen len de'en chnežjua'ane', gwnežjochcza' che'. Pero na' be'ena' cui chgon žin de'en chnežjua'ane', yeca'a de'e da'on noḁe'enə'. ²⁷ Na' ca naquə beṇə' ca' čhasə'agüe'i nada', beṇə' ca' bito chse'ene nabi'aga'aca'ane', le'e žjəxi'iga'aque' na' gotga'aclene' laogua' nga."

Gwso'elaogüe'e Jeso'osən' catə' beyo'e Jerosalennə'

²⁸ Na' catə' beyož be' Jeso'osən' jempl nga, gwze'e zde' Jerosalennə'. ²⁹ Na' catə' bgüigue'e yež Betfage na' Betania, gan' zo ya'a de'en nzi' ya'a Olibos, na' gwleje' čhopa disipl che' ca'. ³⁰ Na' gože' lega'aque': —Le'e žja'ac yežən' chi' na', na' catə' šo'ole lao' yežən' le'ile to borrr dao' da'ab yag, bia cui nonə' cuia. Na' əsežleb na' əche'eleb ngala. ³¹ Šə non' ye'e le'e: "čBixchen' chsežleb?" na' ye'elene': "Xanto' nan' chyažjene'eb."

³² Nach beṇə' ca' bselə' Jeso'osən' gwsa'aque' na' besə'əle'ine'eb da'ab gan' gož Jeso'osən' lega'aque' ca'. ³³ Nach lao' chosə'əseže'eb, xamb ca' gwse'le'ega'aque': —čBixchen' chsežle borrr da'onə'?

³⁴ Nach disipl ca' gwse'e lega'aque': —Čhedə' Xanto'on chyažjene'eb.

³⁵ Nach gosə'əche'eb lao' Jeso'osən' na' besə'əxoə xadoṇ čhega'aquen' cožə'əban', nach bosə'ožie' Jeso'osən' cožə'əban'. ³⁶ Na' lao' zde' Jerosalennə' žie' cožə' borrrən', lao' nez gan' zde'enə' bosə'ošiljw xala'an beṇə'čən'. ³⁷ Na' gosə'əbigue'e galə'əzə Jerosalennə' na' besə'əžine' gan' yesyə'əyetje' ya'a Olibosən'. Nach yoguə'əloł disipl zan che' ca' zja'aclene' le' gwzolaə lechguale besyə'əbeine' na' gwzolaə gwso'elaogüe'e Diozən' zižjo gwso'e dižə' che' yoguə'əloł de'en babesə'əle'ine' de'e zaquə' yebanecho. ³⁸ Nach gosə'əne': —Sošga Rei čhechon' mbalaz ben' baza' nga bselə' Xancho Diozən' le'. Ledoye'ela'och Diozən' txen len beṇə' ca' nitə' gan' zoe'enə' čhedə' babene' par nič beṇə'čən' gaquə' nite'e binlo len le'.

³⁹ Na' entr beṇə' zan ca' gwnitə' balə beṇə' fariseo. Nach to čhope' gwse'le' Jeso'osən': —Maestr, ben' mendad nitə' disipl čhio' ca' žizə.

⁴⁰ Nach boži'i Jeso'osən' xtižə'aga'aque'enə' gwne': —Echnia' le'e, žalə' beṇə' quinga nite'e žizə, yej quinga so'osya'an əso'ela'on nada'.

⁴¹ Na' lao' bežine' galə'əzə Jerosalennə' bgüie' syodan' na' bene' xbab čhe beṇə' lao' syodan' na' gwchežyase'e. ⁴² Na' gwne': —jžalə' bachejni'ile na'a nac gonle par sole binlo len Diozən'! Pero na'a nengašə'an len le'e. ⁴³ Gwžin ža gwžin or catə' beṇə' contr čhele so'one' to yež de' yej de'en šechj syodan' par nič notono gac yechoj syodan'. ⁴⁴ Na' əso'ote' le'e na' xi'inle ca', na' yosyo'ochinje' syodan' na' yesyē'eyoslase' yej ca'. Can' gaquə' čhedə' bito chejle'ele de' que Diozən' babselə' nada' laolen' par gaquə'lena' le'e.

Jeso'osən' bebeje' beṇə' ca' chso'on ya'a yo'odao' əblaonə'

⁴⁵ Na' Jeso'osən' bžine' yo'odao' əblaonə' na' gwzolaogüe' bebeje' yoguə'əloł beṇə' ca' chso'on ya'a chyona'. ⁴⁶ Na' gože' lega'aque': —Nyojczən' le'e Xtižə' Diozən': "Liža'an naquən' to latjə gan' so'on beṇə' orasyon", pero na' le'e babenlen ca' to latjə gan' ža beṇə' bguan.

⁴⁷ Na' bsed blo'ine' beṇə' ca' ža' yo'odao' əblaonə' yoguə' ža. Na' bxož əblao ca' na' beṇə' ca' choso'osed choso'olo'ine' lei de'en bzoj de'e Moisežən' na' nochlə beṇə' blao čhe beṇə' Izrael ca' besyə'əyiljlaže'e naclə so'one' par

əso'ote' le'. ⁴⁸ Pero bito besə'əzelene' naclə so'one' len le', çhedə' yoguə' beṇə' yeziqə'əchlə besyə'əbeichgüeine' xtiže'enə'.

20

Yelə' gwnabia' che Jeso'osən'

¹ To ʒa lao bsd blo'i Jeso'osən' beṇə' ca' lo'o yo'odao' əblaonə' na' chyixjui'e dižə' güen dižə' cobə' che Diozən', besə'əžin bʒox əblao ca' na' nochlə beṇə' gola beṇə' blao che beṇə' Izrael ca' na' beṇə' ca' choso'osed choso'olo'i lein'. ² Na' gwse'ene': —Gwnaşc neto', ʒnac goquən' gwxi'o yelə' gwnabi'an na' non' beṇ le' yelə' gwnabia'anə' par gono' de'e ca' chono'?

³ Na' boži'e xtižə'əga'aquen' gwne': —Leczə de to de'e nabda' le'e, lenaşc nada', ⁴ ʒnon' bselə' de'e Juannə' bide' bçhoe' beṇə' nis? ʒE Dioz nan' bselə'ene' o šə beṇə' yoblən'?

⁵ Na' bosoxi'e gosə'əne': —ʒBi nacho? La' šə nacho de que Diozən' bselə' de'e Juannə' par bçhoe' beṇə' nis, nach əne' chio'o: “ʒBixçhen' bito gwyejle'e che'?” ⁶ Na' šə nacho de que bide' to gwłazze', nach yoguə' beṇə' quinga yosa'əšž'e' chio'o yej çhedə' chse'ejni'ine' de que de'e Juannə' goque' to profet beṇə' bselə' Diozən' par be'e xtiže'enə'.

⁷ Nach gwse'e Jeso'osən' de que bito zjənezene' non' bselə' de'e Juannə'.

⁸ Nach Jeso'osən' gože' lega'aque': —Leczə ca' nada' bito ənia' non' beṇ nada' yelə' gwnabia' par gona' de'en chona'.

Jempl che mos mal ca'

⁹ Na' be'e jempl nga bzejni'ine' beṇə' ca' choso'ozenag che' de que notə'ətezə beṇə' šə choncə yichjlaogü'e cui chejle'e che' cuiayi'e. Na' gwne': —To beṇə' goze' zan yag obasən' na' bocua'əne'en lao na' beṇə' ca' yoso'ogüia yoso'oye'en, na' gwze'e gwyeye' ga yoblə na' jəyega'əne' sša. ¹⁰ Catə' bžin ʒa par yesyə'ətobe' cwsešən', bselə'e to mos che'enə' lao beṇə' ca' chsa'ape' yag obasən' par niç yosyo'onežjue'ene' to tlaw che cwsešən' de'en cheyalə' si' xane'en. Na' beṇə' ca' chsa'apə yag obasən' gosə'əyine' mosən' na' bosyo'ose'ene' sin cui bi bi bosyo'onežjue'ene'. ¹¹ Nach xanga'aque'en bselə'e yeto mosən', na' leczə gosə'əyine'ene' na' gwso'one'ene' borl, na' bosyo'ose'ene' sin cui bi bi bosyo'onežjue'ene'. ¹² Nach bselə' xanga'aquen' mos əgwyone, na' leczə gwso'otlate'ene' xte gwso'onene' güe' na' besyə'əbeje'ene' fuerlə.

¹³ Nach xan yag obasən' gwne': “ʒNacxa gona'? Egwselə'a xi'ina' bi'in chacçhüeida' çhei, la' šəquə gwsa'apəlje'ebo' respet.” ¹⁴ Pero beṇə' ca' chsa'apə yag obasən' catə' besə'əle'ine' xi'ine'əno' gosə'əne' entr lega'acze': “Bengan' xi'in xan yag obasən' na' len' si' biennə'. Leda' gotchone' par niç si'icho bienn che xə'enə'.” ¹⁵ Nach besyə'əbeje'ene' fuerlə güertən' na' gwso'ote'ene'. Na' ʒnacxa bentgua xan yaguən' len lega'aque'enə' ʒa? ¹⁶ Jəyeni'tlaogü'e' lega'aque', na' begüe'e yaguən' lao na' beṇə' yoblə. Na' beṇə' ca' ʒa'anə' catə' gwse'enene' dižə' quinga de'en be' Jeso'osən' gosə'əne': —jCatec de'e mal juisy de'e ca' goquən'!

¹⁷ Na' Jeso'osən' bgüiachgü'e' lega'aque' na' gože' lega'aque': —ʒBixa zejen ʒa, de'en nga nyojən' le'e Xtižə' Diozən' çhia' de'en gwxaquə'əlebəda' ca yejsquin?, nan:

Yej de'en cui gwso'olazə' mues güen yo'o ca', len banaquən yej squin.

18 Na' yoguə' no cui šejle' chia' gwxaquə'əlebene' ca beṇə' əxorə lao yej na' cue'ežoše'. Na' yoguə' no cuiṇə' šejle' chia' cata' babžin žan' gaquə juisyən', gwxaquə'əlebene' ca beṇə' əxorə yej laogüe'ena' na' əgwšošjan le'.

Gosə'əṇabene' Jeso'osən' šə yesə'əyixjue' impuest che gobiern

19 Na' lao or na'atezə beṇə' ca' choso'osed choso'olo'i lein' na' beṇə' gwnabia' che bəoz ca' gwse'ene' yesə'əzene'ene' cheda' gwse'ejni'ine' de que Jeso'osən' be'e jemplan' por ni che de'en cui chse'ejle'e che'. Pero bito bi gwso'one' cheda' besə'əžebe' bi so'on beṇə' ca' ža'ana' beṇə' bachse'ejle'e che Jeso'osən'. 20 Na' dezd or na'atezə gwzolaogwə'əbe'enaogüe' Jeso'osən' par əchoj to dižə' cho'ena' de'en yesə'əchine' par əsa'ogüe' xya che' lao beṇə' gwnabia' che gobiernən'. De'e na'ana' bosə'əsele'e beṇə' chso'on txen len lega'aque' lao Jeso'osən' gwsa'aque' yesə'əxoayague'ene' nič gone' xbab de que do lažə'əga'aque' chse'ene' yesə'əneze' bi de'en naquən güen so'one'. 21 Nach gwse'e le': —Maestr, nezeto' de que cho'o dižə' li, na' naquən licha de'en chsd chlo'ido' beṇə' ca', na' tozə can' chono' len notə'ətezə beṇə'. Na' nezeto' de que dižə' lin' cho'o chsd chlo'ido' beṇə' can' chene'e Diozən' goncho. 22 Na' chene'eto' nezeto' čəcheyalə' chixjwto' impuest che gobiernən', o šə cui?

23 Pero gočbe'i Jeso'osən' caguə do lažə'əga'aque'ena' chse'ene' ca', con chse'ene' yoso'oxoayague' le', na' gože' lega'aque'; 24 —Le'e gwlo'i nada' to xmechlen'. čNo diboj chein' da' laogüen' na' no lein' nyoj laogüen'?

Nach gwse'ene': —Čhe Rei Sesar na'ana'.

25 Nach gože' lega'aque': —Le'e əgwnežžo Sesarən' de'en naquə che' ža, na' le'e əgwnežžo Diozən' de'en cheyalə' əgwnežžwlene'.

26 Na' bito gwsa'ac so'one' xtiže'ena' cllə lao beṇə' ca' ža'ana', na' besyə'əbanene' can' boži'e xtižə'əga'aque'ena', na' bitoch bi gosə'əne'.

Catə'yesyə'əban beṇə' guat ca'

27 Na' leczə besə'əžin balə' beṇə' sadoseo ca' beṇə' ca' cui chse'ejle'e de que yesyə'əban beṇə' guatən', nach gosə'əṇabene' le' 28 gwse'ene': —Maestr, de'e Moizezən' bzoje' can' cheyalə' goncho. Na' gwne': “Šə to beṇə' byo beṇə' nšagna' gate' na' yega'an' no'ol che'ena' sin cui no xi'ine' gwzo, beṇə' bišə' ben' bagotən' cheyalə' yeque'e no'olanə' par nič nitə' xi'in' dia che ben' bagotən'. 29 Na' goquən' gwnitə' gažə bišə'əga'aque', na' toe' bšagne'e na' cata' gote' notono xi'ine' gwzo. 30 Na' beṇə' biše'e əgwchope beque'e no'olan', na' leczə gote' na' notono xi'ine' gwzo. 31 Na' beṇə' biše'e əgwyone leczə beque'e no'olan', na' leczə ca' goquə len le', nach beṇə' bisə'əga'aque' ca' yetap besyə'əque'e no'olan' na' gwsa'ate' na' notono xi'inga'aque' gwnitə'əczə. 32 Gwdelə leczə got no'olan'. 33 Na' cata' yesyə'əban beṇə' guat ca', čnoe' entr lega'aque' gaquə be'en che'? la' yogue'e bosə'ošagna'alene' le'.

34 Na' Jeso'osən' boži'e xtižə'əga'aque'ena' na' gože' lega'aque': —Beṇə' ca' nita' lao yežlyo nga chosə'əšagne'e na' leczə chosə'ošague' na' no xi'inga'aque'.

35 Pero na' beṇə' ca' na' Diozən' chega'aque' de que žəza'aque' e par yesyə'əbane' ladjo beṇə' guat ca' na' par žjəsyə'əzoe' len le' zejlicane, catə'an yesyə'əžine' gan' zo Diozən' bito nachia' šə žjənaque' beṇə' žjənšagna' o šə cui, na' caguə no yesyə'əšagna'ach na'ana'. 36 Bitoch sa'ate'. Lebze əsa'aque' len angl ca'. Na' žjənaque' xi'in' Dioz cheda' babosban Diozən' lega'aque' ladjo beṇə' guat ca'.

37 Na' leczə de'e Moizezən' bzoje' can' goquə ble'ine' to yi' bel' de'e chdoljan to lo'o xis yeše' sin cui bzeyən' len. Na' gwne' che Xancho Diozən' de que naque' Dioz che de'e xaxta'əcho Abraannə', na' Dioz che de'e xaxta'əcho Isaaquən' na' Dioz che de'e xaxta'əcho Jacobən'. De'e na'ana' nezecho de que beṇə' guat

ca' yesyá'əbane'. ³⁸ Na' n̄ezecho beṇá' ca' nite'e len Diozán' chedá' Diozán' bito naque' Dioz che beṇá' guat, sino naque' Dioz che beṇá' zjəmban. Na' yoguá' beṇá' bagwso'onlilažá' Diozán' n̄e'e zjəmbane' par chso'elaogüe'ene'.

³⁹ Na' bałə beṇá' choso'osed choso'olo'ine' lei de'en bzoj de'e Moisezán' gwse'e Jeso'osán': —Maestr, binlo boži'o xtižá'əga'aque'ena'.

⁴⁰ Na' bitoch besyá'əyaxjene' jbi yesá'əṇabene' le'.

Cristán' naque' xi'in dia che de'e Rei Dabin'

⁴¹ Jeso'osán' gože' lega'aque': —¿Bixchen' chásə'əna beṇá' che Cristán' de que naque' xi'in dia che de'e Rei Dabin'? ⁴² Cui de'e Dabin' bzoje' le'e libr gan' žia Salmos, gwne':

Xancho Diozán' gože' Xana'ana':

"Gwche'edo' cuita' nga nabi'acho txen.

⁴³ Na' gona' par nich n̄itá' de'e ca' chso'on contr le' na' beṇá' contr chio' ca' xni'oná'."

⁴⁴ Na' de'en gwna de'e Dabin' de que Cristán' naque' Xane', žəcabi zejen de que Cristán' naque' mazəchlə ca xi'in dia che'ena' ža?

Xtolá' beṇá' ca' choso'osed choso'olo'ine' lei de'en bzoj de'e Moisezán'

⁴⁵ Na' gože' disipl che' ca' len yoguá' beṇá' yeziquə'əchlə boso'ozenag che', gože' lega'aque': ⁴⁶ —Le'e gon xbab nich cui gonle can' chso'on beṇá' ca' choso'osed choso'olo'ine' lei de'en bzoj de'e Moisezán'. Lega'aque' chesyá'əbeine' chásə'əlaže'e zjənyaze' lachá' tonə, na' chesyá'əbeine' catá' beṇá' chásə'əguape' lega'aque' diox na' chásə'ənope'e na'aga'aque'ena' do lao lquey. Lega'aque' chse'enene' yesá'əbi'e gan' chásə'əbe' beṇá' blao catá' chja'aque' yo'odao' na' catá' chac lni. ⁴⁷ Na' choso'oxoayague' no'olə gozebə ca' par nich no'ol ca' chásə'ənežjue' lega'aque' ližga'aque' len bichlə de'en de čhega'aque'. Na' catá' chso'one' orasyon, chso'echgüe' dižá' parzə nich choso'oxoayague' beṇá'. Mazəchlə castigw čhega'aque' əgwnežjo Diozán' clezə ca' che beṇá' yeziquə'əchlə chedá' chso'one' de'e mal ca' zjənac ca' len zjəneze' can' na' lein'.

21

To no'olə gozebə be'e Diozán' xmeche'ena'

¹ Jeso'osán' bgüie' gan' boso'onežjo beṇá' ca' mechán' par yo'odao' əblaonə', na' ble'ine' beṇá' gwni'a ca' gosá'əgüe'e xmechga'aque' lo'ina'. ² Na' leczə ble'ine' to no'olə gozebə no'olə yašá' gwlo'e čhopə sentab dao' čhe'ena' lo'i gan' gosá'əgüe'e mechán' par yo'oda'ona'. ³ Nach Jeso'osán' gwne': —De'e li əchnia' le'e, no'olə gozebən' naque' beṇá' yašá', pero bagwlo'e de'e zaquə'əch lao Diozán' ca' yoguá' beṇá' ca' yelá'. ⁴ Lega'aque' gosá'əgo'oxo xmechga'aque' de'e checho'onən lao yelá' gwni'a čhega'aque'ena', pero no'olə nga lao yelá' yašá' yelá' zi' čhe'ena' bagwlo'e yoguá' ca' ga' de'e de' de' čhe'.

Gwžin ža yosyo'ochinjje' yo'odao' əblaonə'

⁵ Na' ca' naquə' bałə disipl ca' gwso'e dižá' catec xoche naquə' yo'odao' əblaonə' ca' naquə' gwso'one'en de' yej xoche de'e zaquə'e na' yo'on bi de'en boso'onežjo beṇá'. ⁶ Nach gože' lega'aque': —Ca' naquə' yo'odao' əblaonə' de'en chle'ile nga, gwžin ža yosyo'ochinj beṇá' doxenən' na' notoch no'le' len.

De'en gaquə' catá'ən bazon baožə šo'o fin che yežlyon'

⁷ Na' gosá'əṇabene' Jeso'osán' gwse'ene': —Maestr ždo batə'əquə' gaquə' de'e nga nao' nga? na' žnac gaquə' gacbe'ito' catá' bazon baožə gaquə' can' na'onə'?

⁸ Na' gože' lega'aque': —Le'e gon xbab niçh notono əxoayag le'e par niçh šejle nez yoblə. Beṇə' zan beṇə' goxoayag la'aque' yesə'əne': “Nadan' Cristən' na' bazon gaquə' juisyan'.” Pero le'e bito əgwzenagle xtižə'əga'aque'enə'. ⁹ Na' catə' yene'ele dižə' de que chac gwdilə o de que gwaquə' gwdilə, bito žeble, çhedə' zgua'atec de'e quinga cheyalə' gaquə'. Pero na' bitonə' žin žan' par šo'o fin çhe yežlyon'.

¹⁰ Nach gože' lega'aque': —Ze'e šo'o fin çhe yežlyon' yedilə yež contr yež na' nasyon contr nasyon. ¹¹ Na' leczə' zan yež de'e zjəchi' doxenlə yežlyon' xo'ochgua, na' gaquə' bgüin, na' cue'e yižgüe'. Na' yesə'əžebchgua beṇəçhən' catə' yesə'əle'ine' de'en gaquə' le'e yoban'.

¹² Pero ze'e gaquə' yoguə' de'e quinga catə' yesə'əzene' le'e, na' yoso'oçhi' yoso'osaque'e le'e, na' so'one' le'e lao na' bxoç ca' na' yesə'əyixjwga'aque' le'e ližya. Na' yesə'əçhe'əxəxje' le'e do lao rei na' lao gubernador par sa'ogüe' xya çhele çhedə' chonlilažə'əle nada'. ¹³ Na' lao chac de'e quinga, le'e güe'ech xtižə'anə'. ¹⁴ Pero na' bito gonle xbab nac yoži'ile xtižə'əga'aque'en catə' əžinle lao beṇə' gwnabia' ca' gan' sa'ogüe' xya çhele. ¹⁵ Nada' gona' le'e xbab na' yelə' sin' par niçh gaquə' yoži'ile xtižə'əga'aque'enə' sin cui bi yesə'əne' na' bito gaquə' so'one' par se'ejle' beṇə' yoblə de que babenle de'e mal. ¹⁶ Na' tant yesə'əgue'i beṇə' le'e xte xaxna'ale ca' na' beṇə' bišə'əle na' bišə'əljuežjle na' beṇə' migw çhele ca' so'one' le'e lao na' beṇə' contr çhele ca' na' əso'ote' ballə. ¹⁷ Na' casi yoguə' beṇəçhən' yesə'əgue'ine' le'e çhedə' chonlilažə'əle nada'. ¹⁸ Na' le'e gon xbab de que chapə chye Diozən' le'e. Na' bito güe'e latjə cuiyai'ile. ¹⁹ Na' gone' yelə' mban zejlicane çhelen' šə sole co'o gwçhejlažə'əle len yoguə'əlol de'en so'onene' le'e.

²⁰ Na' catə' le'ile soldad zan zjənyechj zjəmbi'e Jerosalennə', na' ənezele de que bazon cuiyai'in. ²¹ Na'a ža, le'e nitə'əle distrit çhe Jodean' cheyalə' yexonjle catə'an bachac ca' na' žja'acle do ya'ada'ote. Na' le'e nitə'əle lao' syodan' yesə'əcdole, na' le'e nitə'əle fuerlə syodan' bito gonle xbab yeyo'ole. ²² Cana' gwnežjo Diozən' castigw çhe beṇə' ca' ža' syodan' por ni çhe xtolə'əga'aque'enə' par niçh gaquə' can' nyojən le'e Xtižə' Diozən'. ²³ Na' ca' tyempən' leçhguale zdebə gaquə' len no'ol ca' zjənoa' bdəo' na' no'ol ca' çhəso'əguəžə' bidəo'. Leçhguale çhi' saquə' beṇə' ca' ža' doxenlə Jodean', çhedə' Diozən' əžə'achgüe' lega'aque'. ²⁴ Soldad ca' so'ote' baləga'aque' len spad, na' yebəle' yesə'əçhe'əxəxj soldad ca' nasyon ca' de'en zjəchi' doxenlə yežlyon'. Na' beṇə' ca' cui zjənaquə' beṇə' Izrael yosyo'oçhinje' yo'o ca' de'en ža' Jerosalennə' na' yoso'olej yosə'əšošje'en. Pero na' babžia Diozən' bia' əžin ža' catə' beṇə' ca' cui zjənaquə' beṇə' Izrael bitoch yesə'ənabi'e nasyon Izraelən'.

Yida' Jesocrisən' de'e yoblə

²⁵ Ca' naquə' bgüiž, bio' na' beljw ca', gaquə' de'e yebanecho len lega'aquan. Na' beṇə' ža' yežlyon' sa'aquene' tolə' na' sa'acžejlaže' e tant sšag gon nisda'onə' de'en gwliš be'ena' len. ²⁶ Na' beṇə' ža' yežlyo nga sa'ate' šlat tant yesə'əžebe' de'en gaquə', çhedə' Diozən' əgws'i'nse' yoguə' de'e ca' chle'icho le'e yoban'. ²⁷ Na' cana'ach beṇə' ža' yežlyon' yesə'əle'ine' nada' yida' de'e yoblə to lo'o bejw, nadan' naca' ben' bselə' Diozən' golja' beṇəçh. Yida' len yelə' guac xen chia'anə' par niçh gwlo'a de que naca' le'ezelaogüe beṇə' blaə. ²⁸ Na' catə' soləo gaquə' de'e quinga, le'e gondiplažə' na' le'e yebēi, çhedə' bazon əžin ža' catə' yida' de'e yoblə par yoslə' le'e lao yoguə' de'e mal.

²⁹ Na' Jeso'osan' be'elene' lega'aque' to jempl na' gože' lega'aque': —Le'e ggüiašč can' chon yag yixgüion' o bitə'ətezə' yag yoblə. ³⁰ Catə' chle'ile bachebia

xlague'e nach nezele de que bach zon yela' yejon'. ³¹ Na' leczæ ca' catæ' le'ile gaquæ de'e quinga bagwnia' ze'e gaquæn', cana'ach ænezele de que bazon ægwlo'e Diozæn' yelæ' gwnabia' che'ena'.

³² De'e li æchnia' le'e, bitonæ' gat le'e nitæ'ale tyemp nga catæ' solao gaquæ yogua'ælol de'e ca'. ³³ Ca naquæ de'e ca' chle'icho le'e yoban' na' yežlyon' yesa'æde chei, pero ca naquæ xtiž'a'anæ' caguæ de'e te cui gaquæ can' nanñæ'.

³⁴ Na' le'e gon xbab par niçh cui gacle benæ' lia na' benæ' güe'e zo na' par niçh cui sole yelal yežejele. Nchol yichjla' aždao' benæ' ca' zjænaque' benæ' lia na' benæ' güe'e zo na' benæ' ca' chesyæ'alal chesyæ'ažeje. Bito nite'e probnid catæ'an selæ' Diozæn' castigw çhega'aque'. ³⁵ Na' leczæ yogua' benæ' yeziquæ'æchlæ ža' yežlyon' benæ' cuiñæ' so'onlilažæ' nada' bito nite'e probnid. ³⁶ Pero le'e ža, leso probnid dote tyemp, le'e gon orasyon par niçh catæ' gaquæ de'e quinga Diozæn' gaquælene' le'e par niçh cui bi gaquæle na' par niçh yedæsole len nada', nadan' naca' ben' bselæ' Diozæn' golja' benaçh.

³⁷ Na' yogua' ža gwzo Jeso'osæn' bsed blo'ine' benæ' ža' lo'o yo'oda' æblaonæ'. Nach yogua' že' beyeje' lao ya'a de'en nzi' ya'a Olibos. ³⁸ Na' yogua' zil tempran besæ'æžin benæ' zan par bosu'ozenague' che' lao bsed blo'ine' lega'aque' lo'o yo'oda' æblaonæ'.

22

Boso'oxi'e can' so'one' yesa'æzene' Jeso'osæn'

¹ Na' goquæn' bazon baözæ lni pascon' de'en çhalæ' Jerosalenñæ' catæ'an çhsa'ogüe' yetxtil de'en cui bi xne'i nçhiçæ. ² Na' bçoz æblao ca' na' benæ' ca' choso'osed choso'olo'i lei de'en bzoj de'e Moisezan' besyæ'æyilje' naclæ so'one' par ædola' Jeso'osæn' sin cui no gacbe' i na' æso'ote'ene'. Gwso'one' ca' çhedæ' besa'æžebe' šæ bi so'one benæ' lega'aque'.

³ Nach gwyo'o gwyaz Satanasæn' yichjla' aždao' Jod Iscariotæn' ben' naquæ cuent len apostol ca' šižin. ⁴ Gwyeye' lao bçoz æblao ca' na' lao benæ' ca' zjænaquæ gwnabia' che xæ'ag yo'odaon' na' bosæ'æxi'e naclæ so'one' par gone' Jeso'osæn' lao na'aga'aque'. ⁵ Na' leçhguale besyæ'æbeine', na' gwso'one' lyebe yosa'ænežjue'ene' mech. ⁶ Na' Jodæn' gwænlaže'e len lega'aque' na' gwzolao gwche'enaogüe' batæ'æquæn' so latjæ gone' Jeso'osæn' lao na'aga'aquen' catæ' cui ža' benæ' zan len le'.

Gwsa'ogüe' xše' na' Jeso'osæn' blo'ine' lega'aque' can' so'one' par žjesyæ'æzalaze'e ca de'en gate'

⁷ Na' bžin žan' catæ'an çhsa'ogüe' yetxtil de'en cui bi xne'i nçhiçæn. Na' ža na'anæ' naquæn žan' cata' chso'ote' xilæ' dao' par çhjasyæ'æzalaze'e can' bosla Diozæn' de'e xaxta'oga'aque'ena' lao na' benæ' Egipto ca'. ⁸ Nach Jeso'osæn' gwleje' Bedæn' len Juannæ' na' gože' lega'aque': —Le'e žja'ac na' le'e žje'esi'ini'a de'en gaocho lao lni pascon'.

⁹ Nach gwse'ene': —žGan' che'endo' žje'eni'aton'?

¹⁰ Nach gože' lega'aque': —Catæ' bagwyo'ole syodan' na' yežagle to benæ' byo ben' noa' che'e nis ya'a yene'. Le'e žjænaotelene' na' šo'ole len le' lo'o yo'onæ'.

¹¹ Na' ye'ele xan yo'onæ': “Maestræn' ne' gonšgo' to cuart gan' güe'eni'ato' de'en gaolento'one' xše' lni pascon' neto' disipl che'.” ¹² Nach ægwlo'ine' le'e to cuart xen de'en zo žcuia la'alæ, na' lo'o cuartæn' zo to mes na' bichlæ de'e çhyažjecho. Lo'o cuart na'anæ' ægws'i'ini'ale de'en gaocho lao lni pascon'.

¹³ Nach gwsa'aque', na' yogua'ælol cayana'anæ' gože' lega'aque'ena' goquæ. Nach bosæ'æsi'ini'e de'en gwsa'ogüe' lni pascon'.

14 Na' catə' bžin or, gwchi'e cho'a mesən' len disipl che' ca'. 15 Nach gože' lega'aque': —Lechguale gwzelaža'a gaogua' yelə' guao che lni pascon' nga len le'e antslə ze'e chi' saca'a par gata'. 16 Chnia' le'e, zelao na'a gaogua'an. Xte catə'əch babloe' Diozən' yelə' gwnabia' che'enə', cana'ach gaogua'an de'e yoblə.

17 Na' gwxi'e basən', be'e yelə' choxcwlen che Diozən' nach gwne': —Le'e si'in na' le'e ye'ej yogua'əle latə' güejə de'en yožə lo'o bas nga. 18 Chnia' le'e zelao na'a che'ėja' bino che oban' nga. Xte catə'əch babloe' Diozən' yelə' gwnabia' che'enə', cana'ach ye'ėja'an de'e yoblə.

19 Nach gwxi'e yetxtilən' na' be'e yelə' choxcwlen che Diozən' na' bzojje'en na' bnežjue'en lega'aque'. Na' gože' lega'aque': —De'e ngan' cuerp chia' de'en chsanlaža'a por ni che le'e. Quinga gonle par žəyeczalaža'əle bi zežen par le'e ca de'en so'ote' nada'.

20 Na' leczə bexe'e basən' catə' babeyož gwsa'ogü'e xšen' na' gože' lega'aque': —De'en yožə lo'o bas nga zežen de'e cobə de'en non Diozən' lyebe gone' par gaquəlene' le'e. Na' solao gone' can' none' lyeben' chedə' so'ote' nada' na' laljə xchena'anə' por ni chele.

21 Na' de'e li ben' gone' nada' lao na' beņə' ca' so'ot nada' chaolene' nada' txen nga. 22 Banaquəczən' chia' gata', nadan' naca' ben' bselə' Diozən' golja' beņach, pero įprobchguazə be'ena' gon nada' lao na' beņə' ca'!

23 Nach disipl ca' gosə'əzolaogü'e gosə'ənbene' ljuēžjga'aque' noe' entr lega'aque'n' gon de'e malən' nac ca'.

Gwsa'acyože' entr lega'acze' noen' naquəch blaο

24 Na' leczə gosə'əzolaogü'e gwsa'acyože' entr lega'acze' noen' naquəch beņə' blaο. 25 Na' Jeso'osən' gože' lega'aque': —Nita' rei che to to nasyon ca' na' chəsə'ənabi'e beņə' nita' xni'aga'aque'. Na' beņə' gwnabia' ca' chse'enene' əsoe' beņə' dižə' chega'aque' de que zjənaque' beņə' güenchgua. 26 Pero caguə can'. Šə no le'e nacle beņə' blaοch, bito cheyalə' yene'ele əso'elao' beņə' le'e. Na' šə no le'e nacle beņə' chgüia chye beņə' chso'elao' Diozən', cheyalə' sole par gaquəlen ljuēžjle. 27 Le'e gon xbab non' naquəch beņə' blaο, čəbe'enə' chi' cho'a mesən', o šə xmosə' ben' chon mendadən'? Clarczən' naquən de que ben' chi' cho'a mesən' naquəche' blaο. Ca naquə nada' zoa' par gaquəlena' le'e la'anə'əczə naca' xanle.

28 Le'e bito chbejyichjle nada' lao yogua'əloj de'en chy'i chzaca'a. 29 Na' ca naquə Xa'anə' bano'e chia' par nič nabi'a, leczə nada' bano'a chele par nič nabi'ale. 30 Na' gona' par nič ye'ej gaole txen len nada' catə' yežinle gan' nabi'a. Na' leczə gona' par nič le'e əggüia əgwyele family ca' šižin, beņə' ca' zjənaquə xi'in dia che de'e Izraelən'.

Jeso'osən' gwne' de que Bedən' cui chebe' šə nombi'ene'

31 Nach Jeso'osən' gože' Simon Bedən': —Ben xbab chio', bagwñab Sathanasən' gaco' lao ne'in par nič gonən le' prueb šə güejyichjo' cuich gonlilažo'o nada'. Na' de'en gonən len le' gwxaquə'əleben ca de'en chon to beņə' catə' chdie' trigon' rner par chega'an de'e güen. 32 Pero na' nada' babena' orasyon par le' par nič ca' bito cuejyichjo' can' chonlilažo'o nada'. Na' catə' babedinjdo' xtolo'onə', btiplažə' beņə' bišo'o quinga.

33 Nach Bedən' gože'ene': —Xana', bagwchoglaža'a sa'alena' le' caguə ližya na'azə sino xte gatlenca' le'.

34 Na' Jeso'osən' gože'ene': —Bed, əchnia' le' bito cuež lecon' neže' antslə ze'e gaquə šon las cui chchebo' de que nombi'o nada'.

Jeso'osən' gože' disipl che' ca' de que bazon yoso'oçhi' yoso'osaquə' beṇə' lega'aque'

³⁵ Na' gože' disipl che' ca': —ǰEde de'e byažjele catə' bselə'a le'e jətixjue'ile xtiž'a'anə? Bselə'a le'e sin cui bi'ale mech na' nic bsod, na' nic bi'ale xelle.

Nach gwse'ene': —Bitobi byažjəto'.

³⁶ Na' gože' lega'aque': —Pero na'a ža šə ŋaple mech cheyalə' gua'alēn, na' leczə ca' gua'ale bsod. Na' šə bito bi spad chelenə' de, le'e gotə' xadon chelen' par si'ilen. ³⁷ Echnia' le'e gonle ca' chedə' gaquə' chia' can' nyojczən le'e Xtižə' Diozən', nan: "So'onene' le' can' chso'one' len beṇə' chon de'e mal." Na' bacheyož chac yoguə'əlole de'en nyojən chia'.

³⁸ Na' gwse'ene': —Xanto', bgüiašč nga no'ato' chopə spad.

Nach gože' lega'aque': —Guaquəczən.

Jeso'osən' bene' orasyon lo'o güert de'en nzi' Getsemani

³⁹ Nach bechoje' yo'onə' na' ca naquə' costombr che' beyeje' ya'a de'en nzi' Olibos nach disipl che' ca' jəsə'ənaogüe'ene'. ⁴⁰ Na' catə' besyə'əžine' latjən' gože' lega'aque': —Le'e gon orasyonṇə' niçh cui co'o gwxiye'enə' le'e nez mal.

⁴¹ Na' gwle'e lega'aque' zitə' ca gan' zelao əžin to yej de'e gwzələ' to beṇə', na' bzo xibe' na' bene' orasyonṇə'. ⁴² Gwne': —Xa, beṇšga par niçh cui çhi' saca'a šə can' chazlažo'o, pero bito che'enda' de'e nia' nada' gaquə, sino gaquə can' əṇao le'.

⁴³ Na' to angl beṇə' za' yoban' blo'elaogüe' le' na' be'e le' fuers balor.

⁴⁴ Na' žlac lechguale chžaglaogüe' len yichjla'aždaogüe'enə' gwzəloao chžaglaoche' chone' orasyonṇə' xte beyačlojje' na' nis yes che'enə' beyaquən ca tlabə güeje' chen de'en naquə' chelsoṇ besə'əyinjten lao yon'.

⁴⁵ Na' bezeche' na' catə' bežine' gan' nitə' disipl che' ca' jəyedi'e lega'aque' chəsə'ətase' tant nite'e trist. ⁴⁶ Na' gože' lega'aque': —ǰixchen' chtasle? Le'e ças, le'e gon orasyon niçh cui co'o gwxiye'en le'e nez mal.

Jodən' bdie' Jeso'osən' lao na' soldad ca'

⁴⁷ Na' ca' neçho'ete Jeso'osən' dižə'ənə' catə' bžin ben' le Jod, ben' naquə' cuent lao disipl ca' šizīn, na' nçhe'e beṇə' zan. Na' bgüigue'e gan' zo Jeso'osən' na' gwdaogüe'ene' bχidən', pero caguə' do laže'en bene' ca'. ⁴⁸ Nach gož Jeso'osən' le': —Jod, çəlen to bχid gono' nada' lao na' beṇə' quinga, nadan' naca' ben' bselə' Diozən' golja' beṇəçh.

⁴⁹ Na' catə' besə'əle'i disipl che' Jeso'osən' can' gaquə' che'enə' gwse'ene': —Xanto', çəgwyinto' beṇə' quinga spad cheto'onə'?

⁵⁰ Na' toe' gwɖinen' mos che beṇə' gwnabia' che bχoz ca', na' gwçhogtechgüe' nague' liçhan'. ⁵¹ Pero Jeso'osən' gože'ene': —Ljoye'enə'.

Nach gwdane' nag mosən' na' beyone' le'. ⁵² Jeso'osən' gože' bχoz əblao ca' na' beṇə' gwnabia' che xa'ag yo'odaonə', na' beṇə' golə beṇə' blao ca', beṇə' ca' zja'ac zjəsə'əxene'ene', gože' lega'aque': —ǰEca to beṇə' bguannə' chsaquə'əlebele nda' za'acle len spad len yag zedexenle nada'? ⁵³ Yoguə' ža gwçhi'a len le'e lo'o yo'odao' əblaonə' na' bito gwxenle nada'. Pero na'a babžin or par gonele nada' con can' chene'ele, na' babžin or gaquə can' chene'e gwxiye'enə' de'en chnabia' beṇə' ca' chsa'aš lo'o de'e žçholən'.

Bedən' bito gwçhebe' šə nombi'e Jeso'osən'

⁵⁴ Nach gosə'əzene' Jeso'osən' na' gosə'əçhe'ene' liž ben' naquə'ch bχoz əblao che ṇasyon Izraelən'. Nach Bedən' zjənaogüe' Jeso'osən' zitə' zitə'ələ. ⁵⁵ Na' bosə'oxene' yi' chy'o' çhe bχoz əblaonə' na' gosə'əbi'e cho'a yi'inə', na' gwçhe'

Bedan' len lega'aque'. ⁵⁶ Na' to no'olə criad ble'ine' le' chi'e cho'a yi'inə', na' bgüie' le' na' gwne': —Lecza len bengā naque' txen len Jeso'osən'.

⁵⁷ Pero Bedan' bito gwchebe' šə nombi'e Jeso'osən', na' gwne': —No'olə, bito nombi'ane'.

⁵⁸ Na' chaczə šlož yeto beṇə' ble'ine' Bedan' na' gože'ene': —Lenczon' naco' txen beṇə' ca'.

Nach Bedan' gože'ene': —Beṇə', bito lena' lega'aque'.

⁵⁹ Gwde to or yetoe' gwne': —De'e licza naquə bengā txen len Jeso'osən', chedə' naque' beṇə' Galilea.

⁶⁰ Na' Bedan' gože'ene': —Beṇə', bito nezdə' bi dižə'ən cho'o.

Na' lao necho'ete Bedan' dižə'ən ca' le'e gwchežte to lecw. ⁶¹ Na' Xancho' gwyechje' bgüie' Bedan', na' jəsa'aləžə' Bedan' dižə' de'en gož Xancho' le' catə'ən gwne': “Bito cuež lecon' neže' antslə ze'e gaquə šon las cui chebo' de que nombi'o nada'.” ⁶² Na' Bedan' bechoje' gan' ža' beṇə' ca' na' gwchežyašə'əchgüe'. Na' de'e juisy de'e goquene'.

Gosə'azi'ichiže'e Jeso'osən'

⁶³ Na' xa'ag yo'odao' ca' beṇə' ca' gwso'oxə' Jeso'osən' gwso'onene' borl na' gwso'ot gosə'əyine' le'. ⁶⁴ Na' bosə'ocheje' to lachə' lao Jeso'osən' na' gosə'əyine' le'. Na' gwse'ene': —Gwneya'ašč žnon' chyin le'?

⁶⁵ Na' gwyanch dižə' de'en gosə'əne' contr le' gosə'azi'ichiže'ene'.

Gosə'əche'e Jeso'osən' lao beṇə' golə beṇə' blao che nasyon Izraelən'

⁶⁶ Na' catə' gwyeni'ina' beṇə' golə beṇə' blao che nasyon Izraelən' na' bxož əblao ca' na' beṇə' ca' choso'osed choso'olo'i lei de'en bzoj de'e Moizezən' besyə'əžague' na' gwso'one' mendad par gwyej Jeso'osən' laoga'aque'enə' gan' chəsə'anabi'ena'. Nach gwse'ene': —Gwnašč neto' šə len' naco' ben' gwlejš Diozən' par gaquəleno' nasyon chechon'.

Nach gože' lega'aque': ⁶⁷ —Žalə' nia' de que naca' Cristən' ben' gwlejš Diozən' par gaquəlena' nasyon chechon' bito šejle'ele chia'. ⁶⁸ Na' žalə' bi nabda' le'e nic yoži'ile xtiža'ana'. ⁶⁹ Nadan' naca' ben' bselə' Diozən' golja' beṇəch, na' dezd na'a cui'a cuit Diozən' par nič nabi'a txen len le', Dioz ben' chnabia' doxenlə.

⁷⁰ Nach yogue'e gwse'ene': —žElen' naco' Xi'in Diozən'?

Na' gože' lega'aque': —Le can' nale nan' naca'.

⁷¹ Nach gosə'əne': —žNochxa testigw chyažjecho? Chio'on babenecho na'a chžia chnite'e Diozən' de'en ne' ca'.

23

Bosə'əcuiše' Jeso'osən' lao Pilatən'

¹ Na' yoguə'əlol beṇə' zan ca' gosə'əzeche' nach gosə'əche'ene' lao Pilatən'.

² Na' gwzolao bosə'əcuiše' Jeso'osən' gosə'əne': —Bagwchoglaoto' che bengā de que cheyaļə gate' ca de'en chta chne' nasyon Izraelən'. Na' lecza chžone' chixjwto' impuest de'en chṇab Rei Sesarən'. Nach lecza ne' de que le' naque' Cristən' ben' gwlejš Diozən' par gaquəlene' nasyon cheto'onə' na' naque' to rei.

³ Nach Pilatən' gože'ene': —žElen' naco' rei che beṇə' Izrael ca'?

Nach Jeso'osən' gože'ene': —Le can' nao' nan' naca'.

⁴ Nach Pilatən' gože' bxož ca' na' beṇə' zan ca' nžag laogüe'ena': —Bitobi chla'alaon šə bi dolə' napə bengā.

⁵ Pero na' gosə'əneche' gosə'əne': —Chta chne' yoguə'əlol beṇə' ža' Jodea nga len de'en chsed chlo'ine'. Gwzolao bsd blo'ine' Galilean' pero lencza nga bachsed chlo'ine' na'a.

Pilatən' bsele'e Jeso'osən' lao Erodən'

6 Catə' bene Pilatən' can' gosə'əne', gwnabe' šə Jeso'osən' naque' beṇə' Galilea. 7 Na' catə' goche'ine' de que Jeso'osən' ze'e Galilean' gan' chnabia' gubernador Erodən', na' bsele'ene' lao Erodən', la' ca or na' zo Erodən' Jerosalennə'. 8 Catə' Erodən' ble'ine' le' bebeine' chedə' bagoc sša chene'ene' le'ine'ene'. Babenene' xtižə' Jeso'osən' na' gwzoe' lez le'ine' to de'e zaquə' yebanene'. 9 Nach de'e zan gwnabene' Jeso'osən', pero ni to dižə' che'enə' cui boži'i Jeso'osən'. 10 Bxoz əblao ca' na' beṇə' ca' choso'osed choso'olo'i lei de'en bzoj de'e Moizezən' gosə'əzeche' galə'əzə na' bosə'əcuiše'ene' len zan dižə'. 11 Na' Erodən' len soldad che' ca' gwzoloao gosə'əzi'čhiže'ene' na' gwso'onene' borl. Nach catə' beyož bosə'əguacue'ene' to lacha' xoche juisy, bosə'əsele'ene' lao Pilatən'. 12 Na' dezd ža na' gwsa'ac Erodən' len Pilatən' migw, chedə' antslə besə'əgue'i ljuježga'aque'.

Gosə'əchoglaogü'e en gat Jeso'osən'

13 Nach Pilatən' betobe' bxoz əblao ca' na' beṇə' gwnabia' ca' nach len beṇə' ža' gan' chso'one' yelə' jostisən'. 14 Na' gože' lega'aque': —Le'e bedəgua'ale benga laogua' nga, na' gwnale che' de que chta chne' beṇə' Izraelən'. Nada' bač gwnabyožəda'ane' laole nga, na' ca xyan' de'en chaole che', ni to de'e xinj cui chželda' šə bin' none'. 15 Na' leczə ca' Erodən' bitobi xtole'e bželene', na' bossele'ene' laoto' nga. Na' naquən clar bitobi ben benga de'e cheyalə' gate'. 16 Na' na'a con gona' mendad yesə'əyine'ene' na' əgwsana'ane'.

17 Gwne' ca' chedə' gotə' to costombr chega'aque' de que əgwsane' to beṇə' pres lao yoguə' lṇi pascon'. 18 Na' yoguə' beṇə' ca' ža' na' gwso'osye'e, tozə ca gosə'əne': —iEchojtega benga gate', na' əgwsano' Barrabasən'!

19 Na' ca naquə Barrabasən' gosə'əyixjue'ene' ližya chedə' le' bxie' gwdilə lao syodan' na' goque' to beṇə' güet beṇə'. 20 Na' Pilatən' de'e yoblə gwnabene' lega'aque' šə əgwsane' Jeso'osən'. 21 Pero gwso'osye'e gosə'əne': —iBde'e le'e yag corozən'! iBde'e le'e yag corozən'!

22 Na' de'e əgwyon lase gož Pilatən' lega'aque': —iBi de'e mal bene'enə'? Ni to de'e xinj cui cheželda' šə bin' none'. Na' con gona' mendad yesə'əyine'ene' nach əgwsana'ane'.

23 Pero con gwso'osye'e yelatə' zižjoch gosə'əṇabe' par əgwde'ene' le'e yag corozən'. Na' Pilatən' gwzolaogü'e' bzenague' chega'aque'. 24 Na' gwchoglaogü'e'en de que gaquə can' gosə'əṇabene' le'. 25 Na' bsane' Barrabasən' ben' zjənyixjue' ližyan' ben' gosə'əṇabe' əgwsane' la'əṇə'əczə Barrabasən' goque' ben' bxe gwdilən' na' beṇə' güet beṇə'. Na' Pilatən' bene' Jeso'osən' lao na' aga'aque'enə' par so'one' len le' can' chse'enene'.

Boso'ode'e Jeso'osən' le'e yag corozən'

26 Na' lao zjənche'ene' fuerlə syodan' besyə'əžague' to beṇə' Sirene le' Simon, ze'e zeze'e fuerlə syodan'. La fuers bosə'əde'e yag coroz che Jeso'osən' cože'enə' na' gwnaogü'e' Jeso'osən'.

27 Na' beṇə' zan zjəsə'ənao le' na' zjəlen zan no'olə. Na' no'ol ca' gwzoloao gwso'osye'e gosə'əbeže' che'. 28 Pero na' Jeso'osən' gwyečje' na' gože' lega'aque': —No'olə lao' syoda Jerosalen, bito cuežle čhia', yejni'a lecuež chele na' che xi'inle. 29 Na' de'e li gwžin ža catə' yesə'əne': “Mbalaz nitə' no'olə güiž no'olə cui no gwxa' na' cui no bi'i che' zo par əgguaze'e.” 30 Ca na' yesə'əṇablaže'e yesə'əbixə ya'a ca' par čhenən' lega'aque', yesə'əṇablaže'e əca'a

bdinj gotən lega'aque'. ³¹ Šə so'ot beṇə' nada' len cui bi xtolə'a de, jnaquəchxe so'one' len le'e nacle beṇə' güen de'e malən'!

³² Na' leczə gosə'əche'e čhopə beṇə' güen de'e malən' par bosə'ode'e lega'aque' le'e yag corozən' can' gwso'one' len Jeso'osən'. ³³ Na' catə' besə'əžine' latjə ganə' nzi' "Yichj Beṇə' Guat", bosə'ode'e Jeso'osən' le'e yag corozən', na' leczə bosə'ode'e beṇə' mal ca' čhopə le'e yag corozən' len le'. Toe' gwda' cuit Jeso'osən' licha na' yetoe' cuite' yeglə. ³⁴ Na' Jeso'osən' gwne': —Xa, bezi'ixen che yoguə' beṇə' quinga chəsə'əgue'i nada', la' caguə zjəneze' bin' chso'one'ena'.

Na' gwso'one' xala'ane'ena' rif par bosyo'ole'en. ³⁵ Na' beṇə' zan gosə'əzeche' na' besyə'əyate'ene'. Na' beṇə' gwnabia' čhəga'aque' ca' gwso'onene' borl, chəsə'əne': —Yeziquə'əchlə beṇə' bosle'. Šə de'e li naque' Cristən' ben' gwlej Diozən' par gaquəlene' nasyon čhechon', čbixčhen' cui chosla cuine'?

³⁶ Nach soldad ca' leczə gwso'onene' borl gosə'əbigue'e galə'əzə gan' zo yag corozən' na' bosə'onežjue'ene' binagr. ³⁷ Nach gwse'ene': —Šə len' naco' Rei che beṇə' Izraelən', bosla cuino'.

³⁸ Na' yichj yag coroz che'ena' gwzo to de'en nyojən ca de'en bcuiš le', na' nan: "Bengan' Rei che beṇə' Izrael ca'." Na' byojən dižə' griego, dižə' latin na' dižə' ebreo.

³⁹ To beṇə' mal ben' da' le'e yag corozən' cuit Jeso'osən' leczə gwzi'ičiže'ene', gože'ene': —Šə len' naco' ben' gwlej Diozən' par gaquəleno' nasyon čhechon', bosla cuino' na' leczə bosla neto'.

⁴⁰ Pero na' ben' yeto gwdile' le' gože'ene': —čEbito čžebo' Diozən'? len badacho le'e yag corozən' par gatcho. ⁴¹ Na' de'en gatcho naquən licha, čheda' na'a chzi'icho castigw che xtolə'əchon' laogüe naccho beṇə' güen de'e malən'. Pero benga bitobi dolə' nape'.

⁴² Nach gože' Jeso'osən': —Jeso'os, žjəsa'alažə'əšgo' nada' catə' əžin ža nabi'o.

⁴³ Na' gož Jeso'osən' le': —De'e li əchnia' le', neža soczo' len nada' gan' zo Diozən'.

Can' goquə catə'an got Jeso'osən'

⁴⁴ Na' catə' bžin do gobiž goc žčhol doxen lao yežlyon' xte do cheda šonə. ⁴⁵ Bitə bse'eni' bgüižən'. Na' ca naquə lachə'an de'en ze lo'o yo'odao' əblaonə' gwchezə gwcholen xte goquən čhoplə. ⁴⁶ Nach Jeso'osən' bisye'e gwne': —Xa, chon cuina' lao na'o. Bezi' spirit čhi'anə'.

Na' beyož gwne' ca' gote'.

⁴⁷ Na' catə' ble'i capitan che soldad ca' de'e quinga, be'elaogüe'e Diozən' na' gwne': —De'e liczə benga naque' beṇə' zda licha.

⁴⁸ Na' beṇə' zan besə'əžag par besə'əle'ine' can' chac. Na' yoguə'əlole' catə' babesə'əle'ine'en jəya'aque' gosə'əbažə' lcho'oga'aque'ena'. ⁴⁹ Na' yoguə' beṇə' ca' gwso'ombia' Jeso'osən' na' zjəlen nō'olə' ca' jəsə'ənao le' catə'an beze'e Galilean' gosə'əzeche' zitə'ələ besə'əle'ine' de'e ca' goquən'.

Bosə'əcuasə'e Jeso'osən'

⁵⁰ Na' zo to beṇə' lao' syoda Arimatea gan' mbane Jodean' na' le' Jwse. Naque' txen len beṇə' ca' chesə'ənabia' lao beṇə' Izrael ca'. Jwsen' naque' to beṇə' güen, beṇə' zda licha. ⁵¹ Gwzoe' lez əžin ža selə' Diozən' beṇə' nabi'e nasyon Izraelən'. Bitə bene' txen len beṇə' ca' catə'an gosə'əchoglaogüe'en so'ote' Jeso'osən'. ⁵² Be'ena' gwyeje' lao Pilatən' na' gwṇabe' cuerp che Jeso'osən'. ⁵³ Na' beletje'ene' le'e yag corozən' na' blaže'ene' to lachə' na' gwlo'ene' to lo'o bloj ba. Na' naquən to ba cobə ga cuiczə no no ne'e šo'o. ⁵⁴ Na' goc de'e

quina žan' catə'an chso'eni'e che lni pascon', na' babžin or par so'omba'ane' ža dezcanzən'.

⁵⁵ Na' no'ol ca' za'ac len Jeso'osən' Galilean' jəsə'anaogüe' Jwsen' par besa'əle'ine' ba che Jeso'osən' na' can' gwxoə cuerp che'enə'. ⁵⁶ Nach besa'aque' na' jəsyə'əyenšəogüe'e to de'en chlā' zix' de'en none' len mirra na' aloes. Na' ža dezcanzən' gwso'one' dezcanz segon can' na' lein'.

24

Jeso'osən' bebane' ladjo beṇə' guat ca'

¹ Na' bal' dmigw no'olə ca' ja'aque' cho'a bloj ban' de'e yoblə na' gwso'oxe' de'e ca' bagwso'onšəogüe'e de'e chlā' zix'. ² Na' cata' besə'əžine'enə' besə'əle'ine' bitoch bi yejən' da' cho'a ban'. ³ Na' gwso'e lo'o blojən' na' bito besyə'əželene' cuerp che Xancho Jeso'osən'. ⁴ Lao chsa'aque'ne' tolə che de'e quinga, besa'əle'ine' čhopə beṇə' zjəzecha cuitga'aque'enə' na' zjənyaze' lachə' de'e chactitchgua. ⁵⁻⁶ Na' no'ol ca' besə'əžebe' na' besə'əchequə' yichjga'aque'enə' besə'əgüie' lao yola. Nach gwse' beṇə' ca' no'ol ca': —čBixčhen' cheyiljle Jeso'osən' nga gan' bgaše'e? Notoch no nla' nga. Babebane' ladjo beṇə' guat ca' na' mbancze'. Ležjsa'aləžə' can' gwne' catə' nezo'le Galilean'. ⁷ Gwne' de que le' naque' ben' bselə' Diozən' golje' beṇə' na' cheyalə' gaque' lao na' beṇə' mal ca' na' so'ote' le' yoso'ode'ene' le'e yag corozən' na' yeyon' ža yebane' ladjo beṇə' guat ca'.

⁸ Na' no'ol ca' jəsyə'ezaləže'e de que gwne' ca'. ⁹ Na' besyə'əsa'aque' cho'a ban' na' jəsyə'ədixjue'ine' apostol ca' šnej na' len yeziquə'əchlə beṇə' ca' nitə' txen len lega'aque' yoguə' de'e ca'. ¹⁰ Na' beṇə' ca' jəsyə'ədixjue'ine' apostol ca' zjanaque' beṇə' quinga: Maria beṇə' Magdala, na' Xguan, na' Xguan, na' Maria xna' Jacob, na' len yebalə' no'olə. ¹¹ Na' apostol ca' bito gwse'ejle'e che no'ol ca', gwsa'aque'ne' con chesə'anaze'enə'.

¹² Pero na' Bedən' le'e gwzechadote' na' gwsa'adoe' bžine' cho'a ban' na' bcheque'e na' ble'ine' lachə' ca' zjəchi'in lao yon', na' beze'e bebanchgüeine' che de'e ca' ble'ine'.

Blo'elao Jeso'osən' čhopə disipl che' ca' lao zja'aque' Emaus

¹³ Na' leczə ža dmigw na'anə' čhopə disiplən' ja'aque' yež de'e nzi' Emaus, do šnej kilometros zitə' par Jerosalennə'. ¹⁴ Na' bosə'ošile' entr lega'aque' che yoguə' de'e ca' bagoquən'. ¹⁵ Na' nechso'one' xbab na' nechso'ete' dižə' che de'e ca' cata' Jeso'osən' bgüigue'e len lega'aque' na' gwza'alene' lega'aque' txen. ¹⁶ Pero bito gwsa'acbe'ine' noxan' zdalen lega'aque'. ¹⁷ Nach gože' lega'aque': —čBi dižə'an cho'e'le entr le'e lao ngo'ole nezən'? čBixčhen' za'acchguale trist?

¹⁸ Na' toe' ben' le' Cleofas boži'e xtiže'en gože'ene': —čNacxa chactguan' bagwza'o Jerosalennə' na' cuiṇə' gacbe'ido' de'e ca' ze'e goc lao syodan'? čEde'en naco' beṇə' zitə' ža?

¹⁹ Na' gože' lega'aque': —čBi goquən' nale ca'?

Nach gwse'ene': —De'en goc che Jeso'os beṇə' Nasaret. Goque' profet, na' Diozən' len beṇə'ən besyə'əbeine' le' can' blo'e yelə' guac che'enə' na' can' be'e dižə'anə'. ²⁰ Pero na' bxož əblao čheto' ca' len beṇə' gwnabia' čheto' ca' gwso'one'ene' lao na' beṇə' ca' na' gosə'əchoglaogüe'en che' de que cheyalə' gate', na' bosə'ode'ene' le'e yag corozən'. ²¹ Bachac šonə ža na'a goc de'e quinga. Na' len neto' gwzoto' lez de que Dioz nan' bsele'ene' par yebeje' nasyon čheto'onə' xni'a beṇə' zitə'. ²² Na' no'ol ca' zjanaquə' txen len neto' bale' gwso'e dižə' de'en chebaneto'. Ja'aque' cho'a ban' be'i, ²³ na' bito besyə'əželene' cuerp che'enə'. Cata' besyə'əla'aque' gosə'əne' de que besə'əle'idaogüe'ene'

angl ca' beṇə' gwse'e lega'aque' de que babebane' ladjo beṇə' guat ca'. ²⁴ Na' lec̄zə to c̄hopə beṇə' byo beṇə' ca' zjənaquə txen len neto' ja'aque' cho'a ban' na' besə'əle'ine' cayanə'an gosə'əna no'ol ca' naquə, pero bito besə'əle'ine' Jeso'osən'.

²⁵ Na' gož Jeso'osən' lega'aque': —jProb le'e! Cui chejni'ile na' cui chejle'ele yoguə de'en bosozoj profet ca'. ²⁶ Benən byen Crist ben' gwlej Diozən' par gaquəlene' beṇəc̄hən' gwxaquə'əzi'e yoguə' de'e quinga bagoc, pero na' de'e yoblə yezi'e yelə' c̄hnabia' che'enə' len yelə' bala'aṅ che'enə'.

²⁷ Na' be'e dižə' len lega'aque' gwzolaoteque' len de'en bzoj de'e Moizezən' na' len de'en bosozoj profet ca' yelə', nach bsd blo'ine' lega'aque' yoguə' de'en nyoj che'enə' le'e Xtizə' Diozən'.

²⁸ Na' besə'əžine' galə'əzə yežən' gan' zja'aque'. Na' Jeso'osən' bene' ca' šejəche' delant. ²⁹ Pero beṇə' ca' gwso'one' byen yega'aṅe' len lega'aque', gwse'ene': —Yega'aṅczə' len neto' c̄hedə' bachexjw že'ena' na' bagwde or par šejəcho'.

Na' gwyo'e par yega'aṅlene' lega'aque'. ³⁰ Na' lao zjachi'e cho'a mesən' txen, Jeso'osən' gwxi'e yetxtilən' na' be'e yelə' choxc̄wlen che Diozən', na' bzojxe'en na' bnežjue'en lega'aque'. ³¹ Cana'ach besyə'əyache'ine' de que le'enə', na' lao ne'e nite'e ca' benitlaogüe'. ³² Nach gwse'e ljuežjga'aque': —Lechguale bebei la'ažda'ochon' cata' be'elene' chio'o dižə' tnezən' na' cuaseləl bsd blo'ine' chio'o can' nyojən che' le'e Xtizə' Diozən'.

³³ Na' lao or na'atezə le'e besyə'əsa'acte' jəya'aque' Jerosalennə', na' besyə'əžine' gan' zjəndopə zjənzag apostol ca' šnej len beṇə' ca' yelə'. ³⁴ Na' benə' šnej ca' gwse'e beṇə' ca' ze'e besyə'əžin: —De'e liczə babeban Xānchon'. Bablo'elaogüe' Simonə'.

³⁵ Nach beṇə' ca' c̄hopə gwse'e lega'aque' de'en goquə lao zjəngüe'e nezən', na' gwse'e lega'aque' de que besyə'əyache'ine' de que le'enə' lao bzojxe' yetxtilən' par sa'ogüe'en.

Jeso'osən' blo'elaogüe' disipl che' ca'

³⁶ Na' ca' ne'e chso'ete' dižə' cata'əczla gwzecha Jeso'osən' gwcholga'aque'ena' nach gože' lega'aque': —Leso binlo len xbab de'en yo'o lo'o yichjla'ažda'olen'.

³⁷ Pero na' lechguale besa'əžebe' na' besyə'əbanene' c̄hedə' gwsa'aque'ne' de que chesə'əle'ida'ogüe'ene' de'e beṇə' guat na'ana'. ³⁸ Nach Jeso'osən' gože' lega'aque': —žBixc̄hen' chaquale tolə? na' žbixc̄hen' chonle xbabən' ca' lo'o yichjla'ažda'olen'? ³⁹ Le'e ggüiašč ni'a na'a quinga par ničh ənezele de que nada'anə'. Le'e can nada' par ničh ənezele. Žalə' naca' beṇə' guat bito naquə žit belə' chia' ca de'e nga chle'ile nga.

⁴⁰ Nach lao gwne' ca', blo'ine' lega'aque' ni'a ne'e ca'. ⁴¹ Na' ca' naquə bitonə' se'ejle'e tant chesyə'əbanene' na' tant chesyə'əbeine', Jeso'osən' gože' lega'aque': —žEde lata' de'e gaogua'?

⁴² Nach bosə'ənežjue'ene' lata' bel' ya'a gaogüe', nach bosə'ənežjue'ene' to pedas c̄hixə' bia ser de'en yožə š'i'imb. ⁴³ Gwxi'en na' gwdaogüe'en laoga'aquen'. ⁴⁴ Nach gože' lega'aque': —Bagwni'a le'e cata'ən nezolena' le'e de que cheyalə' gaquə yoguə'əlol de'e ca' zjənyoj chia' le'e lei de'en bzoj de'e Moizezən', na' le'e libr de'en bosozoj de'e profet ca', na' lec̄zə ca' le'e libr gan' žia Salmos ca'. Na' de'e ca' zjənyoj chia' bac̄h goquən na'a.

⁴⁵ Nach ben Jeso'osən' par ničh gwse'ejni'ine' de'e ca' zjənyojən che' le'e Xtizə' Diozən'. ⁴⁶ Na' gože' lega'aque': —Benən byen goc can' nyojən de que nada' gata' na' yebana' ladjo beṇə' guat ca' yeyon ža, nadan' naca' ben' gwlej Diozən' par gaquəlena' beṇəc̄hən'. ⁴⁷ Na' le'e cheyalə' güe'ele xtizə'ana' len

benə' ža' yoguə' nasyon, na' solaoteclē gü'e'elen Jerosalennə'. Gü'e'ele xtiž'a'anə' de que cheyalə' yesyə'ədinje benəçən' xtolə'əga'aque'enə' par niç Diozən' yezi'ixene' çhega'aque'. ⁴⁸ Na' le'e nacle testigw na' gü'e'ele dižə' çhe de'e quinga bable'ile de'en bagoc chia'. ⁴⁹ Na' leczə əsela'a Spirit che Xa' Diozən' yedəson len le'e can' bene' lyebe. Na' le'e yega'aŋ lao' syoda nga xte catə' Xa' Diozən' gone' le'e yelə' guac de'en za' yoban'.

Beyep Jeso'osən' yoban'

⁵⁰ Na' Jeso'osən' gwçhe'e lega'aque' ja'aque' gan' nzi' Betania, na' gwłis ne'e ca' gwñabene' Diozən' gone' par niç nite'e mbalaz. ⁵¹ Na' goquən' beyož gwñabe'en, Diozən' bezi' beque'ene' yobanə'. ⁵² Na' disipl ca' besyə'əga'añe' gwso'elaogüe'e Jeso'osən' yešlož dao' na' jəya'aque' Jerosalennə' chesyə'əbeine' xte juisy. ⁵³ Nach gwnitə'ətezə gwnite'e lo'o yo'odao' əblaonə' chso'elaogüe'e Diozən'.

De'e na'azən' chzoja' n'a.

Dižə' Güen Dižə' Cobə De'en Bzoj San Juannə'

Ben' naquə Xtižə' Diozən' golje' goque' beṇačh

¹ Catə' gwxe yežlyonə' bazocə ben' naquə Dižə'əṇə'. Zoe' len Diozən' na' ben' naquə Dižə'əṇə' lecə naque' Dioz. ² Dezd nechte zoe' len Diozən'. ³ Na' Diozən' bene' par ničh ben' naquə Dižə'ən bene' yoguə'əlol beṇačh, angl, bia chsa'aš, na' yeziquə'əchlə de'e zjəde. Bitobi bi de de'e gwxe de'e gwzil de'e cui ben le'. ⁴ Le' nse'e yełə' mban zejlicəne. Na' beṇə' ca' zjənapə' yełə' mban zejlicəne, yo'o be'eni' lo'o yichjla'ažda'oga'aque'enə'. ⁵ Na' ben' naquə Dižə'əṇə' nse'e be'eni' par yichjla'aždao' beṇačhən'. Na' la'anə'əczə chachgwa de'e malən' yežlyo nga gan' ble'enə', de'e malən' bito chgapə'ən be'eni' che'enə'.

⁶ Diozən' bsele'e to beṇə' le' Juan. ⁷ Bide' bedəye'e dižə' che ben' nsa' be'eni'inə' par ničh yoguə'əlol beṇačhən' gwaquə so'onlilaže'e ben' nsa' be'eni'inə' catə' se'enene' xtižə' Juannə'. ⁸ Caguə Juan na'anə' nse'e be'eni'inə', sino bide' bedəye'e dižə' che ben' nsa' be'eni' par beṇačhən'. ⁹ Babžin ža bla' be'eni' che Diozən' yežlyo nga par šo'on lo'o yichjla'aždao' beṇačhən', na' chse'eni'in len notə'əteze'.

¹⁰ Ben' naquə Dižə'əṇə' gwzoe' yežlyon'. Na' la'anə'əczə len' bene' yežlyon', beṇə' ca' ža' yežlyon' bito gwsa'acbe'ine' non' naque'. ¹¹ Golje' entr neto' naquəto' beṇə' nasyon che'enə', na' casi yoguə' neto' naquəto' beṇə' nasyon che' bito gwyejle'eto' che'. ¹² Con beṇə' chse'ejle'e che', beṇə' chso'onlilaže'ene', chone' par ničh zjənaque' xi'in Dioz. ¹³ Zjənaque' xi'ine' caguə por ni che gwsa'alje' zjənaque' beṇə' belə' chen, na' caguə por ni che de'en gwzelažə' beṇə' byon' na' no'olə, na' caguə por ni che gone'e beṇə' byon' so xi'ine'. Dioz nan' bene' xi'ine' lega'aque'.

¹⁴ Na' ben' naquə Dižə'əṇə' golje' goque' beṇačh na' gwzoe' len neto'. Ble'ito'one' na' gocbe'ito' de que naque' le'ezelaogüe beṇə' zaque'e la' len' naque' Xi'in tlišə' Xacho Diozən'. Lechgwale nži'ilaže'e beṇačhən' na' chzejni'ine' beṇačhən' yoguə'əlol dižə' li che Diozən'. ¹⁵ Juannə' bzejni'ine' che' gwne': —Che be'ena'anə' babi'a dižə' gwnia' de que ben' ze'e əchoj zaquə'əche' ca nada', chedə' bazocə le'enə' antslə ze'e soa' nada'.

¹⁶ Na' Xi'in Diozən' laogüe de'en lechgwale nži'ilaže'e chio'o, zotezə zoe' chaclenchgüe' yoguə' chio'o chonlilažə'əchone'. ¹⁷ De'e Moizezan' bzejni'ine' de'e xaxtao' neto' beṇə' Izrael lei che Diozən', na' Jesocristən' bedəlo'e de que nži'ilažə' Diozən' chio'o beṇačh na' chzejni'ine' chio'o yoguə'əlol dižə' li che Diozən'. ¹⁸ Ni to cui nonə' le'i Diozən'. Xi'ine' tlišə'əṇə' ben' chaquene' chei babzejni'iczene' beṇačhən' can' naquə yichjla'aždao' Diozən'.

Juan ben' bchoa beṇə' nis be'e dižə' che Jeso'osən'

¹⁹ Beṇə' blao che nasyon Izrael cheto'on ža' Jerosalennə' bosə'osele'e balə bxož lao ben' le Juan len yebałə beṇə' gwsa'aljə lao dia che de'e Lebi beṇə' zjəyo'o lao na'aga'aque' so'one' mendad lo'o yo'odao' əblao che neto' beṇə' Izrael. Bosə'osele'e beṇə' ca' lao Juannə' par ničh gosə'ənezenə' non' naque'. ²⁰ Na' gože' lega'aque' clar: —Caguə nadan' Cristən' ben' naquan əselə' Diozən' par gaquəlene' nasyon che chio'o beṇə' Izraelən'.

²¹ Na' gwse'ene': —¿Noxa le' ža? žəšə len' Liazən' ben' be' xtižə' Diozən' cana'? Na' gože' lega'aque': —Caguə nada'anə'.

Nach gosə'əze'ene': —¿Ešə len' ben' naquən yidə par güe'elene' neto' xtižə' Diozən'?

Na' boži'en gwne': —Bitoczə.

²² Nach gwse'ene': —¿Noxaczə le'? niç žjəyeyəžto' beŋə' ca' boso'oselə' neto'. ¿Bi natgo' che cuino'?

²³ Nach gože' lega'aque': —Nada' naca' ben' chne zizjo latjə dašən', ənia': "Le'eyoša' yichjla'ažda'olen' par niç əgwzenagle che Xançon' catə'an yide'enə'", can' gwna de'e profet Isaiazən' ben' be' xtižə' Diozən' cana'.

²⁴ Na' beŋə' ca' ja'ac lao Juannə' boso'oselə' beŋə' fariseo ca' lega'aque'. ²⁵ Na' gwse'ene': —¿Bixçhen' chçho' beŋə' nis šə cui naco' Cristən', na' šə cui naco' Liazən' na' šə ni ben' naquən yidə par güe'elene' neto' xtižə' Diozən'?

²⁶ Na' Juannə' boži'e xtižə'əga'aque'enə' gože': —Nada' chçhoa' beŋə' nis, pero na' entr le'e zo to beŋə' cui nomb'ale. ²⁷ Be'enə' ze'e əchoje' na' zaquə'əche' ca nada' na' bito zaca'a par gaca' xmoše'.

²⁸ Yoguə' de'e quinga goquən yež de'en nzi' Betabara. Na' yežən' chi'in yeš'la'alə yao Jordannə' gan' chçhoa' Juannə' beŋə' nis.

Jeso'osən' gwxaquə'əlebene' ca xilə' dao' ca' gwso'ot beŋə' Izrael ca' par gwnitlao xtolə'əga'aque'enə'

²⁹ Beteyo ble'i Juannə' za' Jeso'osən' gan' zoe'enə' na' gože' neto' ža'ato'onə': —Le'e güiašč nga za' ben' bselə' Diozən' ben' gwxaquə'əlebe ca xilə' dao' bia ca' çotcho par chnitlao xtolə'əchon'. Le'enə' yeque'e xtolə' beŋə'chon' con beŋə' so'onlilažə' le'. ³⁰ Çhe bengan' bi'a dižə' catə'an gwnia' de que ben' ze'e əchoj zaquə'əche' ca nada', çhedə' bazoczə le'ena' antslə ze'e soa' nada'. ³¹ Bito gocbe'ida' nada' cate non' naque'. Pero ŋa'a za' a chçho'a beŋə' nis par niç yežiquə'əchlə beŋə' Izrael sa'acbe'ine' non' naque'.

³² Na' Juannə' be'eche' dižə' che Jeso'osən' gwne': —Spirit çhe Diozən' de'en zo yoban' len Diozən' ble'ida' betjən ca to ngolbexə na' bžinən gwzon len Jeso'osən'. ³³ Bito gocbe'ida' nada' non' naque' žalə' que Diozən' ben' bselə' nada' par chçhoa' beŋə' nis gwne' nada': "Le'ido' yetj Spirit çhia'anə' gan' zo ben' gon ca so Spirit çhia'anə' lo'o yichjla'ažda'olen' na' ŋabi'an le'e. Na' catə' əžin Spirit çhia'anə' gan' zo be'enə', son len le'." ³⁴ Nada' bable'ida' goc can' gwne'enə' na' cho'a dižə' de que bengan' Xi'in Diozən'.

Beŋə' ca' gosə'ənaogüe' Jeso'osən' de'e neche

³⁵ Ža beteyo zecha Juannə' len çhopə' neto' disipl çhe'. ³⁶ Na' ble'ine' gwde Jeso'osən', na' gože' neto': —Le'e ggüiašč na' zda ben' bselə' Diozən' ben' gwxaquə'əlebe ca xilə' dao' bia ca' çotcho par chnitlao xtolə'əchon'.

³⁷ Na' çopte neto' gože' ca' jenaoto' Jeso'osən'. ³⁸ Na' beyechj Jeso'osən' na' ble'ine' banaoto'one'. Na' gože' neto': —¿Bixçhen' naole nada'?

Na' gožto'one': —Maestr, žga zo'?

³⁹ Nach gože' neto': —Le'e šo'o na' le'ile.

Na' gwyejleno'one' na' ble'ito' gan' zoe'enə', na' bega'anlento'one' do yeto çhop or, çhedə' ca orən' banaquə' ca do cheda tap.

⁴⁰ Nada' lena' Ndreš beŋə' bišə' Simon Bedən' beneto' dižə' de'en be' Juannə' na' gwnaoto' Jeso'osən'. ⁴¹ Na' Ndrešən' antslə ze'e gone' bichlə jəyeni'e Simon bišə'enə' na' gože'ene': —Babežaglaoto' Mesiasən'—, zeje dižə' Cristən' ben' gwlej Diozən' par gaquələne' nasyon Izrael çeton'.

⁴² Nach Ndrešən' gwçhe'e Simon bišə'enə' gan' zo Jeso'osən'. Na' lao chgüia Jeso'osən' le' gože'ene': —Len' Simon xi'in Jonas. Pero yesə'əsi' beŋə' le' Sefas—, zeje dižə' Bed.

Jeso'osən' gwleje' Lipən' na' Natanaelən' par əzja'aclene' le'

⁴³ Beteyo Jeso'osən' gwçhoglaogüe'en yeyeje' Galilean', na' bežague' Lipən' na' gože'ene': —Yo'o len nada'.

⁴⁴ Lipən' naque' beṇə Betsaida, laž Ndressən' na' laž Bedən'. ⁴⁵ Nach Lipən' bežague' Natanaelən' na' gože'ene': —Babežaglaoto' ben' bzoj Moizezən' xtiže'e le'e libr ca' gan' lecza bzoje' lein', na' che lecze'en boso'ozoj beṇə' ca' gwso'e xtižə' Diozən' cana'. Len' Jeso'osən' beṇə' Nasaret, xi'in Jwsen'.

⁴⁶ Na' gož Natanaelən' le': —¿Bat benecho Nasaret na' əchoj beṇə' güen?

Na' gož Lipən' le': —Yo'o niç əṇezdo'.

⁴⁷ Na' catə' Jeso'osən' ble'ine' bachžin Natanaelən' baoza, gwne' che': —Na' za' to beṇə' Izrael gwlaž checho ben' naquə beṇə' güen, na' ni latə'əza cui naque' beṇə' goxoayag.

⁴⁸ Na' gož Natanaelən' le': —¿Nac chac nombi'o nada'?

Na' Jeso'osən' gože'ene': —Antslə ze'e əṇe' Lipən' le', catə'an zecha'o xan yag yixgüionə', ble'ida' le'.

⁴⁹ Nach Natanaelən' gože'ene': —Maestr, len' naco' Xi'in Dioz. Len' naco' Rei ben' chbezəto' yedəṇabia' neto' beṇə' Izrael.

⁵⁰ Na' Jeso'osən' gože'ene': —¿Epor ni che de'en gwnia' de que ble'ida' le' xan yag yixgüion' chejli'o de que Diozən' gwleje' nada' par gaquəlena' ṇasyon chechon' ža? De'e zaquə'əche ca de'e nga ze'e za'ac.

⁵¹ Nach Jeso'osən' goze'e neto': —De'e li əchnia' le'e, le'ixejele yoban' gan' to Diozən' na' angl che' ca' əse'ep se'etje' yežlyo nga gan' zoa', la' Dioz nan' bsele'e nada' golja' beṇəçh.

2

Gotə' to yelə' gošagna' yež de'en nzi' Cana

¹ Gwde šonə ža nach gotə' to yelə' gošagna' yež de'enə' nzi' Cana distrit che Galilea, na' gwyey xna' Jeso'osən'. ² Na' lecza gwsa'axe' Jeso'osən' len' neto' disipl che' niç gwyejto' gan' chac yelə' gošagna'anə'. ³ Na' cagua goque binon' par əse'ej yoguə' beṇə' ca' ža'anə'. Nach xna' Jeso'osən' gože'ene': —Bito bi bino dech chega'aque'.

⁴ Na' gož Jeso'osən' le': —Nagüe, ¿bixçhen' chi'o nada' ca? Ze'e əžin or gaquəlena' beṇə' quinga.

⁵ Na' xne'enə' gože' beṇə' ca' chso'on mendadən': —Le'e gon bitə'ətezə de'e əṇe'.

⁶ Na' nita' xop yey ga chož nis. Yey ca' zjanac ca' choso'ochin beṇə' Izrael gwlaž çheto' ca' par chsa'a chəsə'əyib cuinga'aque' segon can' na' lei çheto'onə'. Na' to to yey ca' chožən do xon' che'e o do ši che'e nisən'. ⁷ Na' gož Jeso'osən' beṇə' güen mendad ca': —Le'e yosša' yey ca' nisən'.

Na' gosə'əgue'en xte ca' gosə'əža'an. ⁸ Nach goze'e lega'aque': —Le'e gaša' latə'an ṇa'a, na' le'e žjənežjon' be'en chgüe'ej chguaon'.

Nach gwsa'aše'en jəsə'ənežjue'en be'en chgüe'ej chguaon'. ⁹ Na' bnix be'en nisən' banaquən bino, pero bito gwnezene' ga gwza'anṇə', con beṇə' ca' gwsa'ašə' len' na' zjəneze. Nach goxe' ben' chšagna'anə' ¹⁰ na' gože'ene': —Yoguə' beṇə' chdie' zgua'atec bino šao', na' catə' beṇə' ca' ža'anə' bazjəne'eje' zilən', nach cho'e lega'aque' de'e corrient. Pero na' le' bzago'o bino šao' nga xte ṇa'ach.

¹¹ De'e nga ben' Jeso'osən' Cana distrit che Galilean' goquən miłagr nech de'en bene' par blo'e de que nse'e yelə' guac che Diozən'. Na' neto' disipl che' beṇlilažə'əto'one'.

¹² Gwde na' gwyejto' Capernaum len le' na' len xne'enə' na' beṇə' biše'e ca'. Na' jəsoto' na' to čhopə šonə ža.

Jeso'osən' bebeje' beṇə' ca' chso'on ya'a chyo'o yo'odao' əblaonə'

¹³ Na' bazon galə' lni pascw che neto' beṇə' Izrael catə'an gwyejto' len Jeso'osən' Jerosalennə'. ¹⁴ Catə' bžinto' chyo'o yo'odao' əblao che neto' beṇə' Izrael na' ža' beṇə' chəsyə'əyotə' go'on na' xilə' na' ngolbexə, na' len beṇə' ca' zjəchi' choso'oše'e mech. ¹⁵ Nach Jeso'osən' bene' to sot de do na' bebeje' yoguə'əlol beṇə' ca' ža' chyo'o che yo'odao' əblaonə' len xilə' ca', len go'on ca'. Na' beslase' xmech beṇə' goša' mech ca', na' gwlo'on'ane'e mes čega'aque' ca'. ¹⁶ Na' gože' beṇə' ca' chso'otə' ngolbexən': —Le'e yebej yoguə'əlol bia quinga nga. Cui gonle ya'a nga liž Xa'anə'.

¹⁷ Nach jəyeza'alažə' neto' disipl che' can' nyoj Xtizə' Diozən' gan' nan: "De'e tant chi' yichja' che liž'onə' xte cheyožlaža'a."

¹⁸ Na' beṇə' ca' zjənaquə beṇə' blao che nasyon Izrael čheto'on ža'anə' gwse'ene': —čBi yelə' guac əgwlo'ido' neto'onə' par nič ənezeto' šə napo' yelə' gwnabia' par bebejo' beṇə' ca'?

¹⁹ Na' Jeso'osən' gože' lega'aque': —Le'e yočhinj yo'odao' nga na' šonə žaza yeyona'an.

²⁰ Nach beṇə' blao ca' gwse'ene': —Xopecyon iz gwso'one' yo'odao' nga, čəna' le' yeyono'on šonə žaza?

²¹ Pero Jeso'osən' gwne' ca' che cuerp che'enə', chsa'acquə'əlebene'en ca' yo'oda'onə'. ²² Nach catə' bžin ža bebane' ladjo beṇə' guat ca', neto' disipl che' jəyeza'alažə'əto' can' gwne'ena'. Na' gwyejle'eto' can' na Xtizə' Diozən' de'en nyojan de que Jeso'osən' yebane' ladjo beṇə' guat ca', na' lecza gwyejle'eto' de'en gože' neto'.

Jeso'osən' nezene' bin' yo'o lo'o yichjla'aždao' beṇəčən'

²³ Žlac gwzo Jeso'osən' Jerosalennə' lao lni pascon', beṇə' zan gwso'onlilaže'ene' catə' besə'əle'ine' miłagr ca' de'en bene'. ²⁴ Pero na' Jeso'osən' bito ben cuine' lao na' beṇə' ca' čhedə' baneze nle'ine' yichjla'aždao' beṇəčən'. ²⁵ Na' bito byažjene' no əgwzejni'i le' can' naquə yichjla'aždao' beṇəčən' čhedə' le' nezene' bin' yo'o lo'o yichjla'aždao' to toe'.

3

Jeso'osən' na' ben' le Nicodemo

¹ Na' zo to beṇə' fariseo ben' le' Nicodemo. Na' naque' beṇə' blao che nasyon Izrael čheton'. ² Nicodemon' gwyeye' lao Jeso'osən' še'elə na' gože'ene': —Maestr, nezeto' de que Diozən' bsele'e le' par chzejni'ido' neto', čhedə' la' notono no chac gon ca' naquə miłagr ca' chono' šə cui zo Diozən' len le'.

³ Na' gož Jeso'osən' le': —De'e li əchnia' le' šə non' cui galjə yeto bito gaquə soe' ca' nabia' Diozən' le'.

⁴ Nach gož Nicodemon' le': —čNacxa gon to beṇə' galje' šə banaque' beṇə' gola? čEguaquəch yeyo'e lo'o le'e xne'e na' galje' yeto?

⁵ Nach gož Jeso'osən' le': —De'e li əchnia' le', šə non' cui galjə len nis na' len Spirit che Diozən', bito gaquə soe' ca' nabia' Diozən' le'. ⁶ Beṇə' zjənaque' belə' čhen chasə'əzan chasə'əbeque' xi'inga'aque' lecza bi'i belə' čhen. Beṇə' ca' chon Spirit che Diozən' par nič chsa'alje', Spiritən' chnežjon lega'aque' yelə' mban zejlicane. ⁷ Bito yebando' can' gwnia' le' de que chonən byen galjə yoguə'əle yeto. ⁸ Ca' naquə be'enə' de'en chečhj, gatə'ətezə čhene'en chečjən,

na' chendo' cholən, na' nic nezdo' gaxa za'annə' na' nic nezdo' gaxa šejənnə'. Can' naquən che yoguə'əloj beṇə' chon Spirit che Diozən' par niç chsa'alje'.

⁹ Nach Nicodemon' gože'ene': —¿Nacxa chactguan' par chac can' na'onə'?

¹⁰ Na' Jeso'osən' gože'ene': —Le' naco' beṇə' blao entr beṇə' ca' choso'osed choso'olo'i beṇə' Izrael gwlaž checho ca' xtižə' Diozən', çəna' cui chejni'ido' de'e ngan'? ¹¹ De'e li əchnia' le', de'e nezeto'onə' chyixjue'eto' na' de'e bable'ito'onə' cho'eto' dižə' chei, na' cui chzenagle. ¹² De'en chac yežlyo ngan' bagwnia' le'e na' cui chejle'ele. ¿Nacxa gaquən' šejle'ele šə nia' le'e de'en chac yoban'?

¹³ Ni to beṇə' cui zo yežlyo nga beṇə' babeyep yoban' par nezene' can' chac yoban'. Pero ca naca' nada' ža, gwzoa' yoban' len Diozən' na' bsele'e nada' yežlyo nga par golja' beṇəç, na' zotezə zoa' len Diozən' ben' zo yoban'. De'e na'ana' nezda' can' chac yoban'. ¹⁴ Na' can' gwlis de'e Moisezən' beļ de bronsən' to le'e yag latjə dašən', can' cheyalə' yesə'əlise' nada' to le'e yag, nadan' bsele' Diozən' golja' b'ənəç. ¹⁵ Na' gaquə' chia' ca' par niç notə'ətezə beṇə' gonlilažə' nada' bito cuiayi'e, sino gatə' yelə' mban zejlicaṇ che'.

Chaque Diozən' che beṇəçən'

¹⁶ Lechguale chaque Diozən' che chio'o beṇəç na' beṇ Xi'ine' tlišə'əna' par niç na' notə'ətezcho chonlilažə'əchone' bito cuiayi'icho mas de yelə' mban zejlicaṇ checho. ¹⁷ Diozən' bsele'e Xi'inen' yežlyo nga caguə par niç əchoglaogü'e en che chio'o beṇəç de que napcho dolə', sino par niç gone' ca cui yeyejcho lao yi' gabilən'.

¹⁸ Chio'o chonlilažə'əcho Xi'in' Diozən' baç nchoglaon checho de que bito bi dolə' napcho, pero beṇə' cui chso'onlilažə' le' nchoglaon chega'aque' de que zjənapə' dolə' chedə' bito chso'onlilažə'e Xi'in' tlišə' Diozən'. ¹⁹ Can' chac, beṇə' ca' cui chso'onlilažə' le' banchoglaon chega'aque' de que zjənapə' dolə', por ni che de'en babidə Xi'in' Diozən' yežlyon' nse'e be'eni' par yichjla'aždao' beṇəçən', na' chəsyə'əbeichene' de'e žçholən' cle ca be'eni' che'enə' chedə' chso'one' de'e malən'. ²⁰ Beṇə' ca' chso'on de'e malən' chəsə'aque'ine' be'eni' che'enə', na' bito chse'enene' əgwse'eni'in lo'o yichjla'ažda'oga'aque'ena', chedə' bito chse'enene' la'alaon de que de'e malən' chso'one'. ²¹ Caguə ca' chio'o chzenagcho che dižə' li che Diozən' par choncho can' cheyalə' goncho. Chio'o cho'echo latjə chse'eni'in lo'o yichjla'ažda'ochon' chedə' chene'echo goncho ca sa'acbe'i beṇə' de que Diozən' chaclene' chio'o len bi de'en chonchən'.

Juan ben' bçhoa beṇə' nis be'e dižə' che Jeso'osən' de'e yobla

²² Gwde na' neto' disipl gwyejto' len Jeso'osən' yež dao' ca' zjəchi' gan' mbane Jodean'. Na' žlac bega'antə'onə' Jeso'osən' bene' par niç neto' bçhoato' beṇə' nis. ²³ Na' Juannə' leczə chçhoe' beṇə' nis yež de'en nzi' Enon de'en chi' galə'əzə yež Salim, gan' dechgua nis. Na' ja'ac beṇə' na' gosə'əchoe' nisən'. ²⁴ Cana' bitonə' gatə' Juannə' ližyan'.

²⁵ Na' gotə' to bžəš entr disipl che Juannə' na' entr yeto çopə beṇə' Izrael gwlaž çeto' ca' che de'en chəsə'əchoe' beṇə' nis. ²⁶ Na' disipl che Juannə' ja'aque' laogü'e'ena' na' gwse'ene': —Maestr, ben' gwzo len le' yešla'alə' yao Jordannə', ben' cho'o xtižə'e, le' bachçhoe' beṇə' nisən' na' yoguə'əzə beṇə' çja'ac ga'an zoe'ena'.

²⁷ Nach Juannə' gože' lega'aque': —Notono no əye'elao' šə cui gon Diozən' par niç so'elao' beṇə' le'. ²⁸ Le'e nezele can' bagwnia' de que bito naca' nada' Crīstən' ben' bsele' Diozən' par gaquəlene' nasyon chechon'. Nada'

naca' ben' bselə' Diozən' par cho'a xtižə' Cristən' niç nıtə' beṇə' probnid par yoso'ozenague' che' catə'n yide'enə'. ²⁹ Catə' chəsə'əšagna' beṇə', beṇə' byo ben' chšagna' le'enə' chzi'e no'olən'. Na' beṇə' migw che ben' chšagna'anə', zeche' cuite'ena' chebeichgüeine' chenene' chšil ben' chšagna'anə'. Ca'aczən' chac len nada' ža, lechguale chebeida' de'en chso'elao' beṇə' Cristən'. ³⁰ La' le'enə' cheyalə' šejəchlə gaque' beṇə' blaio; pero ca naquə nada', šejəchlə te chia'.

Ben' za' gan' zo Diozən'

³¹ Ca naquə ben' za' gan' zo Diozən', le' naque' blaoch ca notə'ətezəchlə beṇə'. Na' ca naquə notə'ətezəchlə beṇə' ža' yežlyo nga, be'en che yežlyo nga zjənaque' na' xtižə' yežlyo ngan' chso'e. Pero na' ben' za' gan' zo Diozən', le' naque' beṇə' blaoch ca notə'ətezəchlə beṇə'. ³² Le' cho'e dižə' che de'en bable'ine' gan' zo Diozən' na' che de'en babenene' na', na' notono no chzenag xtiže'ena'. ³³ Na' šə non' choso'ozenag xtižə' ben' za' gan' zo Diozən' choso'olo'e de que zjəneze' Diozən' cho'e dižə' li. ³⁴ Na' Xi'iq Diozən' ben' bsele'ena' cho'e xtižə' Diozən' chedə' Diozən' chone' par niç zotezə zo Spirit che'ena' len le' dote tyemp. ³⁵ Diozən' chaquene' che Xi'iq'ena' na' babene' ca chejni'ine' yoguə'əlol par niç le' əgwzejni'ine' benə'chən'. ³⁶ Na' chio'o chonližə'əcho Xi'iq Diozən' de yelə' mban zejlicane checho. Na' beṇə' ca' chso'onczə yichjlaoga'aque' cui chso'onližə'ene', bito gatə' yelə' mban zejlicane chega'aque' sino yesə'əzi'e castigw zejlicane.

4

Jeso'osən' be'e dižə' len to no'olə Samaria

¹ Na' beṇə' fariseo ca' gwsa'acbe'ine' de que beṇə' zanch jəsə'ənaogüe' Jeso'osən' cle ca Juannə' na' de que beṇə' zanch chchoe' nis cle ca Juannə'. ² Pero caguə cuin Jeso'osən' bchoe' lega'aque' nis sino neto' disipl che' bcho'ato' beṇə' nis. ³ Na' ca naquən' gwneze Jeso'osən' can' bagwsa'acbe'i beṇə' fariseo ca' de que beṇə' zan žjəsə'ənao le' nach beza'ato' distrit che Jodean' na' beyejto' distrit che Galilean'.

⁴ Par bežinto' Galilean' bedeto' distrit che Samaria na'alə. ⁵ Ca' goquən' bežinto' to yež de'e nzi' Sicar distrit che Samaritan'. Naquə yežən' galə'əzə len yežlyon' de'en bnežw de'e Jacobən' de'e xi'iqe' Jwsen'.

⁶⁻⁸ Na' žia to pos na' de'e nzi' "Pos che de'e Jacobən'". Jeso'osən' bach chjxaque'ene' ngüe'e nezən' na' gwchi'e cho'a posən'. Bach naquə ca do gobiz. Na' neto' gwyejto' lao' yežən' par si'ito' de'e gaoto'. Na' bžin to no'olə Samaritan' par güe'e nis, na' Jeso'osən' gože'ene': —Doa' latə' nis ye'eja'.

⁹ Na' no'olə Samaritan' gože'ene': —¿Nactecxan' le' naco' beṇə' Izrael chnabdo' nada' nis ye'ejo'? len no'olə Samaria nada'—. (Ca naquə beṇə' Izrael gwlaž četo' ca' bito chəsə'əne' beṇə' Samaria ca').

¹⁰ Na' Jeso'osən' gože'ene': —Žalə' neždo' de'en chene'e Diozən' gone' le' na' žalə' chache'ido' non' naca' nada' chapa'a le': "Doa' latə' nis ye'eja'", le' ənabdo'on nada' na' nada' goṇa' le' nis de'e choṇ yelə' mban zejlicane.

¹¹ Na' no'olən' gože'ene': —Señor, caguə noxo'o bi gašə'ədo'onṇə' na' pos nga naquən zitjw. ¿Gaxa si'o nis de'en choṇ yelə' mban zejlicane de'en nao' ca'? ¹² ¿Echacdo' de que zaquə'əcho' le' ca de'e xaxta'əcho Jacobən' ben' bocua'an len neto' pos nga ga güe'eje' na' xi'iqe' ca' na' bia yixə' che' ca'?

¹³ Na' gož Jeso'osən' le': —Notə'ətezə beṇə' ye'ej nis nga bia'aczə əbiləchene'en de'e yoblə. ¹⁴ Pero na' notə'ətezə beṇə' ye'ej nisən' de'en

əgwnežjua' nada' cuatəch əbilene'en la' gatə' yelə' mban zejlicane che'enə'. Na' nis de'en əgwnežjua'ane' gaquən lo'o yichjla'azdaogüe'en ca to nis de'e chxita' chzia chaldin na' de'e cuat yebizən.

15 Na' no'olən' gože'ene': —Señor, beñ nada' nisən' nao' ca' par nich cuich abilda' na' cuich yida' dexia'an ga.

16 Jeso'osən' gože'ene': —Beyej jəyene be'en chio'onə' na' le'e da nga.

17 Nach gož no'olən' le': —Notono be'en chia' zo.

Na' gož Jeso'osən' le': —Leicədo' can' nao' de que notono be'en chio' zo, 18 la' gueyə' be'en chio' bagwnitə' beñə' nšagna' aleno', na' ca naquə ben' zoleno' na'a caguə nšagna' aleno'one'enə'. De'e li can' bagwnao'.

19 Na' gož no'olən' le': —Señor, bachacbe'ida' de que le' chyixjue'ido' bi de'en na Diozən'. 20 De'e xaxta'no neto' beñə' Samaria gwso'elaogüe'e Diozən' ya'an zo na', na' le'e nale de que Jerosalen na'anə' cheyalə' güe'ela'ocho Diozən'.

21 Na' gož Jeso'osən' le': —No'olə, gwyejle' chia' de que gwžin ža cata' bitoch gonən byen žje'ela'ole Xacho Diozən' ya'an zo na' na' ni Jerosalennə'. 22 Le'e nacle beñə' Samaria bito nombia'ale ben' chejni'alažə'əle. Neto' beñə' Izrael nombi'ato' Diozən' ben' chejni'alažə'əto'. Na' entr neto' beñə' Izrael əchoj ben' chac yebej beñaçhən' xni'a de'e malən'. 23 Gwžin ža na' na'a baza'an beñə' ca' chse'ejni'alažə'e Xacho Diozən' can' chazlaže'enə' əso'elaogüe'ene' do yichj do lažə'əga'aque' na' segon de'en naquə de'e li, chedə' Xacho Diozən' chylje' beñə' əso'elao' le' ca'. 24 Diozən' bito naque' beñə' belə' chen. Na' beñə' ca' chse'ejni'alažə'e le' cheyalə' so'elaogüe'ene' do yichj do lažə'əga'aque' na' segon de'en naquə de'e li.

25 Na' gož no'olən' le': —Nezda' de que yidə ben' gwlej Diozən' par gaquəlene' chio'o, ben' nzi' Mesias o Crist. Catə'yide' na' chixjue'ine' chio'o yoguə'əloj de'e quinga.

26 Nach Jeso'osən' gože'ene': —Nada'an naca' ben' nao' ca' na' cho'elena' le' dižə'.

27 Na' lei cho'elene' no'olən' dižə' catə' bežin neto' disipl che'. Na' bebaneto' de'en cho'elene' to no'olə dižə' pero ni toto' cui gwñabeto'one' bi dižə'an cho'elene' no'olən' o bixçhen' chšillene'ene'. 28 Nach no'olən' bcua'an che'e che'enə' na' beyeje' yežən' jəyeže' beñə' gwlaž che' ca': 29 —Leda legüia to beñə' bagwne' nada' yoguə'əte de'en babena'. žšə bengalizən' Cristan'?

30 Na' besə'əžaše' yežən' ja'aque' gan' zo Jeso'osən'. 31 Žlac zjəyeda no'olən' gotə'əyoito' Jeso'osən' che'eto'one': —Maestr, gwdao.

32 Na' Jeso'osən' gože' neto': —Bito nezele de to yelə' guao chia'.

33 Nach gwnato' entr neto': —žšə nolizə babedegua' de'e gwdaogüe'enə'?

34 Na' gož Jeso'osən' neto': —Par nada' naquən ca to yelə' guao chona' can' chene'e ben' əbselə' nada' nich gaquə yoguə' de'en chene'ene' gaquə. 35 Le'e nale: “Ne'e dech yetap bio' par yedobə cwsešən.” Na' nada' əchnia' le'e, de yeto cwseš de'e cheyalə' yedobə, beñə' ca' yoso'ozenag che Diozən' šə güe'elenchga'acchone' xtiže'enə'. Legon xbab de que bagolə gatə'əyoiga'aquechone' yoso'ozenague' che'. 36 Ben' chon par nich beñə' choso'ozenague' che Diozən' chaclene' beñə' par nich chəsə'əzi'e yelə' mban zejlicane. Na' Diozən' chone' ca zoe' mbalaz por ni che de'en chaclene' lega'aque'. Can' chac, ben' chyixjui'e xtižə' Diozən' de'e neche na' ben' chon par nich beñə' choso'ozenague' chei txennə' chasyə'əbeine'. 37 De'e li can' na dižə'an de'en de: “Beñə' yoblən' chaz na' beñə' yoblən' chelap.” 38 Nada' bach chselə'a le'e ca beñə' yesyə'əlape' gan' cui gwso'one' žin. Beñə' yoblə

bagosə'əyixjui'e xtižə' Diozən' na' le'e gonle par niç beṇə' ca' gwse'enene' xtiže'enə' yoso'ozenague' chei.

³⁹ Na' zan beṇə' ža' lao' yež Sicarən' gan' mbane Samaritan' gwso'onlilaže'e Jeso'osən' por ni che de'en gwna no'olən': "Bagwne' nada' yoguə'əte de'e babena'." ⁴⁰ Na' catə' besə'əžin beṇə' Sicarən' gan' zoe'enə' gwsa'atə'əyoine' Jeso'osən' yega'ane' len lega'aque', na' bega'ane' čhopə ža. ⁴¹ Na' beṇə' zanch gwso'onlilaže'ene' por ni che dižə' de'en be' cuin Jeso'osən'. ⁴² Na' gwse'e no'olən': —Na'a chonlilažə'əto'one' caguə por ni che de'en gwnao' na'azən' sino por ni che de'en babeneto' cho'e dižə' cuinczəto'. Banezeto' de que de'e liczə bengan' Cristən' ben' gwlej Diozən' par yebeje' beṇə'čən' xni'a de'e malən' con beṇə' se'ejle'e che'.

Jeso'osən' beyone' xi'in to beṇə' blao

⁴³ Na' catə' goc čhopə ža zoto'onə', beza'ato' beyejto' Galilean'. ⁴⁴ Na' cuin Jeso'osən' bagwnacze' de que beṇə' gwlaž che nota'ətezə profet beṇə' cho'e xtižə' Diozən' bito chso'ene' yelə' bala'an' na' nic chse'ejle'e che'. ⁴⁵ Pero na' catə' bežinto' Galilean', beṇə' Galilea ca' besyə'əbeine' na' bosə'ozenague' che Jeso'osən' čhedə' lecžə lega'aque' ja'aque' Jerosalennə' par lni pascon' na' besə'əle'ine' yoguə' de'e güen de'en bene' bedote lao lniṇə'.

⁴⁶ Na' gozejto' len Jeso'osən' yetši'i yež Canan' distrit che Galilean' gan' bene' par niç beyac nisən' bino. Na' yež Capernaunnə' zo to beṇə' blao beṇə' chon žin che rein' na' chacšenchgüei xi'ine'ena'. ⁴⁷ Xa bi'inə' catə' benene' rson bežinto' Galilean' zezə'ato' Jodean', bide' lao Jeso'osən' na' gotə'əyoine' le' šeje' žjəyeyene' xi'ine'ena', čhedə' bazon gatbo'. ⁴⁸ Na' Jeso'osən' gože'ene': —Šə cui le'ile miłagr na' bichlə de'e zaquə' yebanele, bito šejle'ele čhia'.

⁴⁹ Nach ben' chon žin che rein' gože' le': —Señor, yo'ošga antslə cuiṇə' gat bi'i čhia'anə'.

⁵⁰ Na' Jeso'osən' gože'ene': —Beyej. Bito gat bi'i čhio'onə'.

Nach gwyejle' be'ena' de'en gož Jeso'osən' le' na' beze'e. ⁵¹ Na' lao bazengüe'e nezən' jəsə'əšag xmosə' ca' le' na' gwse'ene': —Bacheyaque bi'i čhio'onə'.

⁵² Nach gwṇabene' lega'aque' bi or gwzolao beša'alaza'əbo'. Na' lega'aque' gwse'ene': —Neje cheda to gobiz bechojbo' de'e lan'.

⁵³ Nach xabo'onə' goche'ine' or na'anə' gož Jeso'osən' le' de que bito gat bi'i che'ena'. Nach beṇlilaže'e Jeso'osən', le' na' family che'ena' na' yoguə' beṇə' ža' liže'ena'.

⁵⁴ De'e nga goc čhop las ben Jeso'osən' miłagr catə' ze'e beze'e Jodean' na' bežine' Galilean'.

5

Jeso'osən' beyone' to beṇə' nat to part cuerp che'ena'

¹ Gwdenə' golə' to lni che neto' beṇə' Izrael Jerosalennə' na' gwyej Jeso'osən'.

² Jerosalen na' žia to tanc de'en nzi' Betesda dižə' ebreo. Žian galə'əzə cho'a puert che syodan' de'en nzi' "Čhe xilə' ca'". Na' nyechj mbi'i cuit cue'ej tanquən' gueyə' ca cha'ašil dao'. ³ Na' beṇə' zan beṇə' güe' zjəde' lo'o cha'ašil da'onə', no beṇə' lčhol, beṇə' coj, na' no beṇə' zjanat to part güejə' cuerp čhega'aque'ena'. Zjədie' čhasə'əbeze' bata'əquan' ta nisən'. ⁴ To angl betje' tğüejə' bte' nisən', na' con beṇə' chyobe četj lo'o nisən' cata'ən' cheyož čhta anglən' len, le'ena' cheyaque che bitə'ətezə' yižgüe' de'e che'ine'. ⁵ Na' entr beṇə' ca' len to beṇə' byo bagoc ši'inšonə'choa iz chacšenene'. ⁶ Na' Jeso'osən' ble'ine'

be'enə' na' gocbe'ine' de que bagwža de' ca'. Na' gože'ene': —¿Eche'endo' yeyacdo'?

⁷ Na' beṇə' güe'ena' gože'ene': —Señor, caguə no beṇə' zo cue'e nada' lo'o tanquən' catə'n chda nisən'. Na' žlacte əzya'a nada' par šo'a, beṇə' yoblə chyobene' chetjə' lo'o nisən'.

⁸ Nach gož Jeso'osan' le': —Gwyas na' botobə xta'onə' na' gwda.

⁹ Na' le'e beyactei be'enə' na' botobe' xte'ena' na' gwzolaə chde'. Goc de'enə' ža dezcanz. ¹⁰ Nach beṇə' blao che neto' beṇə' Izrael gwse'e ben' beyaquen': —Ža dezcanz na'a. Bito de lsens yeyoa' xta'onə'.

¹¹ Nach gože' lega'aque': —Ben' beyone nada' gože' nada': “Botobə xta'onə', beyoa'an na' gwda.”

¹² Na' gwse'ene': —¿Noxan' gož le': “Botobə xta'onə' na' gwda”?

¹³ Na' ben' beyaquene' bito nezene' non', chedə' Jeso'osan' babebi' iže'e gan' ža' beṇə' zan ca'. ¹⁴ Gwdechlə bedil Jeso'osan' le' lo'o yo'odaə' əblaonə' na' gože'ene': —Bach beyacdo' na'a. Bitoch bi de'e mal gono' par nič cui gac chio' to de'e maləch.

¹⁵ Nach beza' be'enə' na' gwdirjue'ine' beṇə' blao che nasyon Izrael cheto'on de que Jeso'os na'anə' beyone le'. ¹⁶ Na' de'e na'anə' beṇə' blao ca' bosə'olagzejə bosə'olagzide' Jeso'osan' chəsə'əyiljlaže'e naclən' so'one' par so'ote'ene' de'en bene' miłagr ca' ža dezcanzən'. ¹⁷ Na' Jeso'osan' gože' lega'aque': —Xa'anə' chelalene' yoguə' ža, na' leczə ca' nada'.

¹⁸ Nach beṇə' blao che nasyon cheto'on mazəchlə gosə'əyiljlaže'e naclən' so'one' par so'ote'ene' por ni che de'en gwne' de que Diozən' naquə' Xə', caguə tlaozə de'en cui bembə'ane' ža dezcanz na'anə'. Na' de'en gwne' de que Diozən' naquə' Xə' zejən de que tozəczə can' zaque'e len Diozən'.

Yelə' chnabia' che Xi'in Diozən'

¹⁹ Na' gož Jeso'osan' lega'aque': —De'e li chnia' le'e, bito gaquə bi gona' to gwlazza', nadan' naca' Xi'in Diozən'. De'en chle'ida' chon Xa'anə', lennə' chona'. Yoguə'əloł de'en chon Xa'anə', leczə lennə' chona'. ²⁰ Xa'anə' chaquene' chia', na' chlo'ine' nada' yoguə' de'en chon cuine'. Na' əgwlo'ine' nada' de'e zaquə'əch ca de'e quinga de'e gona' par nič yebanele. ²¹ Xa' Diozən' chbeje' beṇə' na' chone' ca chatə' yelə' mban zejlicane' chega'aque' par nič cui əsa'aque' ca beṇə' guat len yichjla'ažda'oga'aque'enə'. Na' ca'aczən' chona' nada' naca' Xi'ine', chbeja' beṇə' par chnežjua' yelə' mban zejlicane' chega'aque'. ²² Bito chchoglaə Xa' Diozən' che ni to beṇə' šə nape' dolə', sino babene' nada' yelə' chnabia'anə' par əchoglaogua'an che beṇə'chən' šə non' napə dolə'anə', nadan' naca' Xi'ine'. ²³ Xa' Diozən' chene'ene' de que yoguə'əloł beṇə' so'one' nada' yelə' bala'an' can' chso'e le' yelə' bala'an'. Ben' cui chon nada' naca' Xi'in Dioz yelə' bala'an', lente Xa' Dioz na'anə' cui cho'e yelə' bala'an', chedə' len' bsele'e nada'.

²⁴ De'e li chnia' le'e, ben' chzenag xtiža'anə' na' chonlilaže'e Diozən' ben' əbsejə' nada' de yelə' mban zejlicane' che'. Na' cuat si'e castigon', chedə' bitoch naque' len yichjla'aždaogüe'en ca beṇə' guat, sino bade yelə' mban zejlicane' che'. ²⁵ De'e li chnia' le'e gwžin ža catə'n beṇə' ca' zjənaque' len yichjla'ažda'oga'aque'enə' ca beṇə' guat əse'enene' xtiža'a nada' Xi'in Dioz, na' beṇə' ca' yoso'ozenag chia' yesə'əbane' zejlicane'. Na' bačh chzolaə chac ca' na'a. ²⁶ Xa' Diozən' nse'e yelə' mban zejlicane' na' chac gwnežjue'en beṇə'chən', na' ca'aczə babene' par nič nada' nsa'a yelə' mban zejlicanen' na' chac chnežjua'an che beṇə'chən', nadan' naca' Xi'ine'enə'. ²⁷ Na' leczə beṇə' nada' yelə' chnabia'anə' par nič əchoglaogua'an non' napə dolə' chedə' bsele'e

nada' golja' benach. ²⁸ Bito yebanele de'e nga. Gwžin ža catə' yoguə'əlol benə' guat ca' ža' lo'o ban' əse'enene' ənia' lega'aque'. ²⁹ Na' benə' ca' gwso'on de'e güen žlac gosə'əbane' yesyə'əchoje' par yesə'əbanche' zejlicane. Na' benə' ca' gwso'on de'e mal žlac gosə'əbane' yesyə'əchoje' par əsa'aque' castigw.

Jeso'osən' bzejni'ine' de que nape'yelə' chnabia'

³⁰ Bito bi gaquə' gona' de'e bia'azalaža'a. Chzenaga' bin' na Xa'anə' par nič nezda' naquən' chchoglaogua'an che benachən' šə non' napə dolə'. Na' chchoglaogua'an che to toe' can' cheyalə'əczə gaquə' chedə' bito chona'an de'e bia'azalaža'a. Chona'an con can' chene'e Xa'anə' ben' əbselə' nada'anə'. ³¹ Žalə' toza' nada' cho'a dižə' non' naca', bito naquən' de'e šejle'ele chia'. ³² Pero zo Xa'anə' cho'e dižə' non' naca', na' nezda' de que dižə' de'en cho'e chia'anə' naquən' de'e li. ³³ Bač bselə'əle benə' lao Juannə' par jəsə'əñabene' le' chia'. Na' Juannə' be'e dižə' li non' naca'. ³⁴ Pero ca naca' nada' bito chyažjda' ənezda' dižə' de'e güe' ni to benachən' chia'. Parzə nič le'e šejle'ele chia' na' gona' ca cui yeyejle lao yi' gabilən', de'e na'anə' che'enda' yosa'alazə'əle de'en gwna Juannə' chia'. ³⁵ Juannə' goque' ca to lampara de'e chse'eni'ichgua, na' gone'ele bebeile šlož can' bsd əblo'ine'enə'. ³⁶ De to de'e cho'en xtizə'a de'e zaquə'əche ca dižə' chia' de'en choe' Juannə'. Nada' chona' yoguə'əlol de'en chon Xa'anə' lao na'a gona', na' de'en chona' cho'en dižə' de que le'enə' bsele'e nada'. ³⁷ Na' leczə Xa'anə' ben' bselə' nada' cuine' babe'e xtizə'a. Na' bitonə' gwzenagle xtize'enə' nic ne'e le'ile can' naque'enə'. ³⁸ Bitonə' gone' chele xtize'enə' chedə' bito chonlilažə'əle nada' naca' ben' əbsele'enə'. ³⁹ Chsedyanə'əle Xtizə' Diozən' de'en nyojən, chaquele naple yelə' mban zejlicane laogüe de'en chsedlen. Na' de'e ca' zjənyojən chso'en xtizə'a. ⁴⁰ Pero cui chene'ele gonlilažə'əle nada' par gapple yelə' mban zejlicane.

⁴¹ Par nada' bito bi nonən šə benachən' so'one' nada' yelə' bala'an o šə cui. ⁴² Nada' nombi'a le'e na' nezda' cabi chaquele che Diozən'. ⁴³ Xa'anə' bsele'e nada' na' bene' nada' yelə' chnabia' par chona' con can' ne'enə' na' cabi chejle'ele chia'. Na' šə benə' yoblə yide' to gwłazze', gwyejle'ele che'. ⁴⁴ Bito gaquə' šejle'ele chia' chedə' la' chi' yichjle chonle ca so'on ljuežjle ca' le'e yelə' bala'an na' cui cheyljle naclən' gonle par nič Diozən' gone' le'e yelə' bala'an. Tozə le'enə' cho'e yelə' bala'an de'en naquə' de'e zaque'e. ⁴⁵ Bito gonle xbab de que nada' gua'a le'e part lao Xa'anə'. De'e Moizezən', ben' zole lez gaquəlen le'e lao Diozən', le'enə' güe'e le'e part lao Xa'anə'. ⁴⁶ Žalə' gwyejle'ele che de'e Moizezən' na' šejle'etele len chia' nada', chedə' chia' nadan' bzoje'. ⁴⁷ Na' ca naquən' cui chejle'e de'en bzoje'enə', žnacxa gonczle šejle'ele de'en bagwnia' le'e?

6

Jeso'osən' bguaogüe' gueyə' mil benə' byo

¹ Gozde de'e ca' gwyejto' len Jeso'osən' yeš'la'alə Nisdəo' Galilean'. Na' nisdə'onə' leczə nzi'in Nisdəo' Tiberias. ² Na' benə' zan bedəsə'ənao le' chedə' besə'əle'ine' miłagr ca' de'en chone' cheyone' benə' güe' ca'. ³ Na' gwloeto' to lao ya'a len Jeso'osən' na' na' gwche'eto' len le'. ⁴ Na' bazon baözə galə' lni' che neto' benə' Izrael de'en nzi' lni' pascw. ⁵ Na' catə' bgüia Jeso'osən' na' ble'ine' de que baza'ac benə' zan gan' zoe'enə', na' gože' Lipən': —žGaxa si'icho de'e əsa'o yoguə' benə' quinga?

⁶ Jeso'osən' gwne' ca' parzə niç ye' Lipən' nac chaquene' cheyalə' gonto', la' bañezcene' naquan' gone'. ⁷ Na' gož Lipən' le': —Tmil pes cabi gaquen si'icho de'e əsa'ogüe' latə' güejən.

⁸ Na' zo to disipl che Jeso'osən', ben' le Ndrəs, bišə' Simon Bedən'. Na' Ndrəsən' gože' Jeso'osən': ⁹ —Nga zo to bi'i byo na' de gueyə' yetxtil de sebad chebo' na' yechopə' beļ ya'a. Pero bi de gon de'e quinga la' beņə' zannə'.

¹⁰ Nach Jeso'osən' gože' neto': —Le'e gon mendad yesə'əbe' beņə' ca'.

Chi'ichgua yixye daquə' latjən', nach gosə'əbe' beņə' ca' laogüeinə'. Naquə ca do gueyə' mil beņə' byo cui cuent no'olə na' cui cuent bidao'. ¹¹ Nach gwxi' Jeso'osən' yetxtil ca'. Na' beyož be'e yeļə' choxcwlen che Diozən' bene' che che neto' disipl par be'eto' che beņə' ca' bazjəchi'. Na' leczə ca'atezəczə bene' len beļ ya'a ca'. Be'eto' lega'aque' con catə'ətə' de'e gwse'enene'. ¹² Na' catə' beyož gwse'eljene' nach gože' neto': —Le'e yetobə pedas ca' de'en bega'an par niç cui bi cuiayi'.

¹³ Nach botobəto' pedas ca' de'en besyə'əga'an beyož gwsa'o beņə' ca', na' goquən šižin žomə' lao gueyə' yetxtil de sebadən'. ¹⁴ Na' beņə' ca' catə' besə'ələ'ine' miļagr de'en ben Jeso'osən' nach gosə'əne': —De'e ličzə bengan' profetən' ben' bagwlezcho selə' Diozən' yežlyo nga par gaquəlene' chio'o.

¹⁵ Na' catə' gocbe'i Jeso'osən' de que gwse'enene' yesə'əche' exaxjene' par so'onene' rei čhega'aque'enə', nach bebi'ize'e gozeje' ya'ada'onə' toze'.

Gwda Jeso'osən' lao nisdə'onə'

¹⁶ Na' catə' be'xjw že'enə' neto' disipl che Jeso'osən' beyetjto' cho'a nisdə'onə'.

¹⁷ Na' beyo'oto' to lo'o barcw par zjəyedato' Capernaunnə'. Bagoļ, na' Jeso'osən' bitonə' yeļe' gan' zjəyedato'onə'. ¹⁸ Na' chas chatə' nisdə'onə' la' to be' fuert chečj. ¹⁹ Ca do čhopə' legw babeza'ato' lao nisdə'onə' catə' ble'ito' zezə' Jeso'osən' lao nisən' galən' zda barcon'. Na' bžebto'. ²⁰ Nach gože' neto': —Nada'anə'. Bito žeble.

²¹ Nach neto' chebeito' bego'oto'one' lo'o barcon'. Nach le'e bežinteto' cho'a nisdə'onə'.

Beņə' zan chasyə'əyilje' Jeso'osən'

²² Na' beteyo beņə' ca' besyə'əga'an yešla'alə nisdə'onə' bito besyə'əželene' Jeso'osən'. Gwsa'acbe'ine' caguə bi barcw gotə'əch sino yetoga de'en beyo'oto', na' gosə'ənezene' bito beyo'oto' Jeso'osən' lo'o barcon' gan' beyo'oto' neto'. ²³ Nach besə'əžin to čhopə' barcw ca' de'en za'ac syoda de'en nzi' Tiberias, besə'əžinən galə'əzə gan' əgwsa'ogüe' catə'an gwde be' Xancho Jeso'osən' yeļə' choxcwlen che Diozən'. ²⁴ Na' catə' besə'ələ'i beņə' ca' caguə no Jeso'osən' nla'anə', na' ni neto' disipl che', nach besyə'əyo'e lo'o barcw dao' ca' na' ja'aque' Capernaunnə' chesyə'əyilje'ene'.

Jeso'osən' naque' yeļə' guao de'e chnežjon yeļə' mban zejlicane che beņə' chso'onližə'ene'

²⁵ Na' catə' besyə'əželene' Jeso'osən' yešla'alə nisdə'onə' na' gwse'ene': —Maestr, žbatə'əquə' belə'o nğan'?

²⁶ Na' Jeso'osən' gože' lega'aque': —De'e li chnia' le'e, cheyilje nada' caguə por ni che bagwyejni'ile bi zejen miļagr ca' bable'ile beņə', sino por ni che de'en gwdaole na' beļjele. ²⁷ Bito cue'e yichje gonle par niç gata' de'e ye'ej gaole de'en chde chei, sino lecue'e yichje le'e gon par niç gaquə ye'ej gaole de'en gon le'e yeļə' mban zejlicane. Diozən' bsele'e nada' golja' beņəch na' nada' gona' de'en ye'ej gaole par niç əbanje zejlicane. Na' Diozən' babene' par niç nezele bsele'e nada'.

28 Na' gwse'ene': —¿Bi cheyalə' gonto' par niçh yebei Diozən' neto'?

29 Na' gož Jeso'osən' lega'aque': —De'e nga gonle par niçh yebei Diozən' le'e, gonlilažə'əle nada' ben' əbsele'enə'.

30 Nach gwse'ene': —¿Bi miłagr gono' par niçh gonlilažə'əto' le'? ¿Bi gono' le'ito' ža? 31 De'e xaxta'ocho ca' gwsa'ogüe' mana latjə dašən', can' nyoj Xtizə' Diozən' nan: “Yelə' guao de'e za' yoban' be'e lega'aque' gwsa'ogüe'.”

32 Nach Jeso'osən' gože' lega'aque': —De'e li əchnia' le'e, caguə de'e Moizezən' bnežjue' lega'aque' yelə' guao de'en za' yoban', sino Xa' Dioz na'anə'. Na' Xa'anə' babselə'e par le'e to yelə' guao de'e zaquə'əche na' de'e li za'an yoban'.

33 Na' yelə' guao de'en babselə' Xa' Diozən', za'an yoban' na' betjan yežlyon' na' chnežjon yelə' mban zejlicane che notə'ətezə beṇə' chao len.

34 Nach gwse'ene': —Señor, beṇšga neto' yelə' guaon' nao' ca' yedote.

35 Na' Jeso'osən' gože' lega'aque': —Nada' naca' yelə' guao de'en chnežjon beṇə' yelə' mban zejlicane. Notə'ətezə beṇə' chse'ejle' chia' yesyə'əbei la'ažda'oga'aque'enə' zejlicane, na' de'en chso'onlilaže'e nada', nite'e mbalaz zejlicane. 36 Na' bagwniacza' le'e, la'anə'əczə bable'ile nada' naca' yelə' guaonə', bitoczə chonlilažə'əle nada'. 37 Yoguə' beṇə' ca' chbej Diozən' par əsa'aque' nada' txen, chžin ža catə' chso'onlilaže'e nada'. Na' notə'ətezə beṇə' ca' chso'onlilažə' nada', chebeida' chsa'aque' nada' txen. 38 Nada' za'a yoban' na' betja' yežlyon' caguə par niçh gona' de'e bia'azəlaža'anə', sino par niçh gona' can' chene'e Xa'anə' ben' əbsele' nada'. 39 Na' de'e ngan' de'en chene'e Xa'anə' ben' əbsele' nada', de que yoguə'əloł beṇə' bagwleje' par əsa'aque' nada' txen, ni toe' cui gua'a latjə cuiayi'e sino que yosbanga'aca'ane' ladjo beṇə' guat ca' šə bagwsa'ate' catə' əžin ža šo'o fin che yežlyon'. 40 Xa'anə' chene'ene' de que yoguə'əloł beṇə' se'ejni'ine' non' naca' nada' na' so'onlilaže'e nada', par niçh əgwnežjue' lega'aque' yelə' mban zejlicane, na' nada' yosbanga'aca'ane' ladjo beṇə' guat ca' šə bagwsa'ate' catə'an əžin ža šo'o fin che yežlyon'.

41 Na' beṇə' blao che nasyon Izrael cheton' besə'əže'eš'e che Jeso'osən' de'en gwne': “Nada' naca' yelə' guao de'en za' yoban'.” 42 Na' gosə'əne': —¿Ecagua bengan' Jeso'os xi'in jwse ben' nombia'acho na' lecza' ca' xne'enə'? ¿Bixçhexa nga nalize' de que ze'e yoban' betje' yežlyon'?

43 Nach Jeso'osən' gože' lega'aque': —Bito že'ešə'əle chia' entr le'e. 44 Ni to cono no gonlilažə' nada' šə Xa'anə' ben' əbsele' nada' cui gone' ca se'ejle'e chia'. Na' beṇə' ca' chse'ejle'e chia' yosbanga'aca'ane' ladjo beṇə' guat ca' šə bagwsa'ate' catə' əžin ža šo'o fin che yežlyon'. 45 Gan' nyoj de'e ca' boso'ozoj de'e profet ca' beṇə' ca' gwso'e xtižə' Diozən' cana' nan: “Na' yoguə'əlole' əgwse əgwlo'i Diozən'.” Nachən' yoguə'əloł non' neze can' na Xa'anə' na' choso'ozenag che, yoguə' beṇə' can' chso'onlilaže'e nada'.

46 Bito naçho zo nochlə beṇə' bable'ine' Xa'anə' sino toza' nada', la' nadan' za'a gan' zo Xa' Diozən'. 47 De'e li chnia' le'e, beṇə' ca' chso'onlilažə' nada' de yelə' mban zejlicane chega'aque'. 48 Nada' naca' yelə' guao de'en chnežjon beṇə' yelə' mban zejlicane. 49 Xaxta'ocho ca' gwsa'ogüe' manan' latjə dašən', pero bia'aczə gwsa'ate'. 50 Nadan' cho'a dižə' de que naca' yelə' guao de'en za' yoban' de'en chnežjon yelə' mban zejlicane che beṇə' ca' chsa'ogüe'en par niçh ca' cuich žjənaque' len yichjla'ažda'oga'aque'enə' ca beṇə' guat. 51 Nadan' naca' yelə' guao de'en za' yoban'. Nsa'a yelə' mban zejlicanenə' na' chac chnežjua'an beṇə'chən'. De'e na'anə' beṇə' ca' sa'o yelə' guao nga yesə'əbane' zejlicane. Na'

yelə' guao de'e əgwnežjua' əsa'ogüe' naquən cuerp chia'anə', na' əgwnežjua' na par niç notə'ətezə beṇəç guaqua yesə'əzi'e yelə' mban zejlicaneə'.

⁵² Nach gwche' bžaš entr beṇə' blao che ṇasyon Izrael çeton' gosə'əne': —çNacxa gone'en gon cuerp che'enə' gaocho?

⁵³ Na' Jeso'osən' gože' lega'aque': —De'e li chnia' le'e, Diozən' bsele'e nada' golja' beṇəç, na' šə cuiṇə' gaole cuerp chia'anə' na' šə cuiṇə' ye'ejle xçhena'anə', bito de yelə' mban chele zejlicane. ⁵⁴ Beṇə' ca' chsa'o cuerp chia'anə' na' chse'eje' xçhena'anə' de yelə' mban zejlicane çhega'aque', na' šə bagwsa'ate' catə' əžin ža šo'o fin che yežlyon', yosbanga'aca'ane' ladjo beṇə' guat ca'. ⁵⁵ Na' cuerp chia'anə' naquən yelə' guao de'e le'ezełaogüe de'e zaque'e, na' xçhena'anə' de'en chse'eje'ena' naquən le'ezełaogüe de'e zaque'e. ⁵⁶ Na' beṇə' ca' chsa'o cuerp chia'anə' na' chse'eje' xçhena'anə' nitə'ətezə nite'e len nada' na' nada' zotezə zoa' len lega'aque'. ⁵⁷ Xa'anə' ben' zo zejlicane le'ena' bsele'e nada', na' zoa' çhedə' le' chone' ca' zoa', na' ca'atezəczən' ben' gao cuerp chia'anə' soe' çhedə' gona' ca' soe'. ⁵⁸ Cuerp chia'anə' naquən yelə' guao de'en za' yoban'. Na' yelə' guao nga bito naquən ca' manan' de'en gwsa'o xaxta'ocho ca' na' bia'aczə gwsa'ate'. Beṇə' ca' chsa'ogüe' yelə' guao nga nia' ca' nite'e zejlicane.

⁵⁹ De'e quinga əbsed əblo'i Jeso'osən' lo'o yo'odao' Capernaunnə'.

Xtižə' Jeso'osən' chnežjon yelə' mban zejlicane che beṇə' ca' choso'ozenag çhei

⁶⁰ Na' beṇə' zan beṇə' ca' zjəsə'ənao Jeso'osən' catə' gwse'ene' can' gože' lega'aque' nach gosə'əne': —Zi'ichgua naquə' dižə' quinga. çNoxaczə šejle'e çhe'?

⁶¹ Na' goche'i Jeso'osən' de que çəsə'əže'eše'e por ni che de'en gože' lega'aque', na' gozne': —çEpor ni che de'en gwnia' can' chene'ele yebiguə'əle gosxanlə? ⁶² çNaquəçxa gonlen' šə le'ile nada' yeyepa' gan' gwzoa' antslə? nadan' bselə' Diozən' golja' beṇəç. ⁶³ Caguə' por ni che de'en goljle beṇəç de yelə' mban zejlicane chele sino šə yo'o Spirit che Diozən' lo'o yichjla'ažda'olen' de yelə' mban zejlicane chele. Dižə' de'en babi'a len le'e zaquə'an par yichjla'ažda'olen' na' əbanle zejlicane šə šejle'ele çhei. ⁶⁴ Ne'e nita' balle cui çonlilažə'əle nada'.

Jeso'osən' gwne' ca' çhedə' dezd gwzolao zjəsə'ənao beṇə' le' nezene' noquə' beṇə' ca' cui gwso'onlilaže'ene' na' non' əgwde le' lao na' beṇə' ca' çəsə'əgue'i le'. ⁶⁵ Na' gože' lega'aque': —Chac can' gwnia'anə' de que notono no chac gonlilažə' nada' šə Xa'anə' ben' əbselə' nada' cui chone' par niç gonlilaže'e nada'.

⁶⁶ Nach besyə'əbi'izə' beṇə' zan beṇə' bagosə'ədalene' Jeso'osən', bitoç gosə'ənaogüe'ene'. ⁶⁷ Na' Jeso'osən' gože' šižinte neto': —çElen le'e chene'ele žjəya'acle?

⁶⁸ Na' gož Simon Bedən' le': —Xanto', notono nochlə de no zaquə' əgwzenagto' çhei. Nezeto' de que le' choṇo' yelə' mban zejlicane che notə'ətezə neto' çhenagto' xtižə'ona'. ⁶⁹ Neto' bachejle'eto' na' banezeto' de que len' naco' Cristən' ben' bagwlej Diozən' par gaquəlene' ṇasyon çhechon'. Naco' Xi'in Diöz ben' zo zejlicane.

⁷⁰ Na' Jeso'osən' gože' neto': —Nada' gwleja' le'e šižinle na' nezda' de que tole çhenagle che gwxiye'ena'.

⁷¹ Gwne' ca' che Jod Iscariotən' xi'in Simonnə' la' Jod nan' əgwdi'ene' lao na' beṇə' ca' çəsə'əgue'i le', len nacte' txen neto' šižinto'.

7

Benə' bišə' Jeso'osən' bito gwso'onlilaže'e le'

¹ Catə' bagwde de'e ca' Jeso'osən' gw dacze' chsed chlo'ine' beṇə' ca' ža' distrit che Galilean'. Bito gone'ene' yeyeje' Jodean' par soe' na' chedə' beṇə' blao che ṇasyon Izrael cheton' chəsə'əyiljlaže'e naclən' so'one' par so'ote'ene'.

² Na' bazon galə'əzə' lṇi che neto' beṇə' Izrael de'en nzi' "lṇi che yo'o de laguə'".

³ Na' beṇə' bišə' Jeso'osən' gwse'ene': —Bito yega'ano' nga, sino gwyej Jodean' par ničh displ chio' ca' ša' na' yesə'əle'ine' de'e ca' chono'ona'. ⁴ Ni to beṇə' cui chone' bgašə'əzə' to de'e chone' šə' chene'ene' gombia' beṇə' le'. Šə' de'e li chono' miṇagr, ben par ničh yesə'əneze yoguə'əloḷ beṇə' can' chono'ona'.

⁵ Beṇə' biše'e ca' gosə'əne' ca' chedə' ni lega'aque' cui gwso'onlilaže'e le'.

⁶ Nach gož Jeso'osən' lega'aque': —Bitonə' žin ža' par gwlo'a non' naca', pero ca' naquə' le'e ža, guaquə' žja'acle lṇin' batə'ətezən'. ⁷ Beṇə' ca' cui zjənobbia' Diozən' bito chəsə'əgue'ine' le'e, pero chəsə'əgue'ine' nada', chedə' chzejni'iga'acda'ane' de que chso'one' de'e malən'. ⁸ Le'e žja'ac lṇinə'. Nada' bito sa'a na'a chedə' bitonə' žin ža' chia'anə' par sa'a lṇin'.

⁹ Na' beyož gože' lega'aque' ca' bega'əne' Galilean' yeto' čopə' ža.

Jeso'osən' gwyeje' Jerosalennə' gan' yo'o lṇinə'

¹⁰ Nach gwde gwsa'ac beṇə' biše'e ca' əzja'aque' lṇinə' leczə' gwza' le' zde' lṇinə', pero caguə' zaquə'əlao sino bgašə'əzə'. ¹¹ Na' beṇə' blao che ṇasyon Izrael cheto'ona' besyə'əyilje' le' lao lṇinə' na' gosə'əne': —čGanxa be'ena'anə'?

¹² Na' beṇə' ca' zjənžag lao lṇinə' zane' gwso'e dižə' che Jeso'osən' len ljuəžjga'aque'. Na' caguə' tozə' can' gosə'əne' che'. Baḷe' gosə'əne': —Naque' beṇə' güennə'.

Na' yebaḷe' gosə'əne': —Abi, chonleizene' beṇə'əna'.

¹³ Pero ni toe' cui gwso'e dižə' che' zaquə'əlao chedə' besə'əžebe' beṇə' blao che ṇasyon cheto'ona'.

¹⁴ Na' do gašjə' zda lṇinə' catə' gwyo'o Jeso'osən' lo'o yo'odao' əblao che neto' beṇə' Izrael na' gwzola' chsed chlo'ine'. ¹⁵ Na' chəsyə'əbane beṇə' blao ca', chəsə'əne': —čBixa chejni'i bengan' len caguə' babsede' can' nsed chio'ona'?

¹⁶ Nach Jeso'osən' gože' lega'aque': —De'en chlo'ida'anə' caguə' de'e chaljaləža'anə', sino ben' əbselə' nada' blo'ine'en nada'. ¹⁷ Notə'əteza beṇə' chene'ene' gone' can' chene'e Diozən', le' ənezene' šə' de'en chlo'ida'anə' naquən che Diozən' o šə' naquən de'e bia'azələža'a. ¹⁸ Beṇə' ca' chso'e dižə' de'e bia'azələža'əga'aque' chəsyə'əyilje' no so'e lega'aque' yelə' bala'an. Caguə' ca' nada' chedə' cheylja' naclə' gona' par ničh Diozən' ben' bselə' nada' si'e yelə' bala'an. De'e na'anə' guaquə' gapple confyans de que nada' cho'a dižə' li, na' bito chxoayaga' beṇə'.

¹⁹ Le'e cho'ela'ole de'e Moizezən' ben' bzoj lei che Diozən', len ni tole cui chonle can' nannə'. čBixchen' chyiljlažə'əle naclən' gonle par gotle nada'?

²⁰ Na' beṇə' ca' zjənžaguən' gwse'ene': —Chac tonto'. čNo chyiljlažə' naclə' gone' par gotle' le'?

²¹ Jeso'osən' gože' lega'aque': —Tozə' miṇagr de'en babena' ža dezczən' na' de'e na'anə' yoguə'əle chebanele. ²² De'e Moizezən' bzoje' de que cheyaḷə' socho sefj de'en ne' sirconsion. Pero caguə' gwzola' len le' sino len de'e xaxta'ocho ca' beṇə' ca' gwnitə' antslə' ca' le'. Na' le'e chzole bi'i byo' dao' ca' sefj de'en ne' sirconsion ža dezczən'. ²³ Na' a' ža, šə' chaquele chonən byen gwzole no bidao' sefj de'en ne' sirconsion ža dezczən' par gonle complir

can' na lei de'en bzoj de'e Moizezən, ħbixçhen' chža'ale nada' de'en beyona' to beṇə' ža dezcanzən' len yoguə'əloj de'en chac che'? ²⁴ Bito con gonle xbab de que to de'e chle'ile chon beṇə' naquən de'e mal, sino le'e co'o rson niçh ənezele šə de'e li chone' de'e mal o šə chone' de'e güen.

Jeso'osən' be'e dižə' de que gwze'e gan' zo Diozən'

²⁵ Nach to çhopə beṇə' Jerosalen ca' gosə'əne': —ĸEçaguə bengan' çəsyə'əyilje' par niçh so'ote'ene'? ²⁶ Le'e ggüiašc can' cho'e dižə' nga zaquə'əlo na' bitobi chse'ene'. De repentlja beṇə' gwnabia' ca' baçh chso'one' xbab de que naquacze' Cristən' ben' gwlej Diozən' par gaquəlene' nasyon çhechon'. ²⁷ Pero na' nəzecho ga beṇə' be'enga, mas catə' yidə Cristən' ni to cono əneze ga be'ena'.

²⁸ Ne'e chsed chlo'i Jeso'osən' lo'o yo'odao' əblao çhe neto' beṇə' Izrael catə'ən gosə'əne' ca'. Nach gwne' zižjo gože' lega'aque': —Nada' nombi'ale na' nəzele ga beṇə' nada'. Na' caguə con za'a de'e bia'azəlaža'anə'. De'e li zo ben' əbselə' nada' la'anə'əczə le'e bito nombi'ale'. ²⁹ Nada' nombia'ane' çhedə' gan' zoe' nan' gwza'a na' len' bsele'e nada'.

³⁰ Nach çəsyə'əyiljlaže'e naclən' so'one' par yesə'əzene' Jeso'osən', pero notono no gwzen le' çhedə' bitonə' əžin ža par gaque' lao na'aga'aque'enə'. ³¹ Na' beṇə' zan gwso'onlilaže'e Jeso'osən' na' gosə'əne': —Catə'ən yidə Cristən' bitolja gone' miłagr zanch can' chon benga.

Ķa'ag yo'odao' ca' ja'aque' par žjəsə'əxene' Jeso'osən'

³² Na' beṇə' fariseo ca' gwse'enene' beṇə' zan chso'e dižə' che Jeso'osən'. Nach boso'oxi'e len bçoz əblao çhe nasyon Izrael çheton' boso'osele'e Ķa'ag yo'odao' çheto' ca' par žjəsə'əxene' le'. ³³ Na' Jeso'osən' chsed chlo'ichene' gwne': —Gwzocha' yeto tyemp dao' len le'e nach yeya'a gan' zo ben' əbselə' nada'. ³⁴ Yeyilje nada' na' cabi yeželele nada', la' gan' soa' nada', le'e bito gaquə yidle.

³⁵ Nach beṇə' blaoc çhe nasyon Izrael çheton' gosə'əne' entr' lega'aque': —ĸGa yeyej bengan' cui yeželechone'? ĸEšə šejlene' beṇə' gwlaž çhecho ca' žjənaselas entr' beṇə' griego ca' na' žjəsedene' beṇə' griego ca'? ³⁶ ĸBi zeje dižə' de'e nga gwna benga? Gwne': “Yeyilje nada' na' cui yeželele nada'.” Na' lecəə gwne': “Ga'an soa' nada', le'e bito gaquə yidle.”

Jeso'osən' be'e dižə' çhe Spirit çhe Diozən'

³⁷ Na' ža le'ezelaogüe na' ža xen çhe ĸninə' gwzecha Jeso'osən' gan' chsed chlo'ine' na' gwne' zižjo: —Notə'ətezel šə de'e tant chene'ele gata' yelə' mban zejlicane çhele xte banacle ca to beṇə' çhbillaže'e, leğonlilažə' nada' na' gonə' yelə' mban zejlicane çhele. ³⁸ Le'e çhonlilažə'əle nada', so de'en nabia' yichjla'ažda'olen' can' na Xtižə' Diozən' de'en nyojən, gonən par niçh gaquəlenle yeziquə'əchlə beṇə' par yesə'əzi'e yelə' mban zejlicane. De'e na'anə' saquə'əlebele ca yao ca' de'en chso'onən par niçh yežlyon' de tcho'alaoga'əquən çhosçha'on bitə'ətežə.

³⁹ Jeso'osən' gwne' ca' çhedə' gwnezene' Spirit çhe Diozən' yedəson lo'o yichjla'aždao' chio'o çhonlilažə'əcho le' par niçh gaquəlencho beṇə' yesə'əzi'e yelə' mban zejlicane. Na' ca naquə Spiritən' bitonə' yedəson lo'o yichjla'aždao' beṇə' ca orən', çhedə' beṇə' ca' çəsyə'əgue'i Jeso'osən' bitonə' so'ote'ene', na' bitonə' güe' Diozən' le' yelə' bala'an xen.

Gwsa'aque' çhoplə por ni çhe Jeso'osən'

⁴⁰ Beṇə' ca' ža'anə' gwse'enene' chsed chlo'i Jeso'osən' na' baļe' gosə'əne': —De'e ličzə bengan' profetən' ben' naquən yidə.

⁴¹ Na' yebale' gosə'əne': —Bengan' Cristən' ben' gwleĵ Diozən' par gaquəlene' nasyon chechon'. Pero baļe' gosə'əne': —ĶEna' nācho de que Galilea na' əchoĵ Cristən'? ⁴² ĶEcaguə na Xtižə' Diozən' de'en Nyoĵən de que Cristən' galĵe' lao dia che de'e Rei Dabin' na' de que galĵe' yež Beļen laž de'e rein'?

⁴³ Na' gotə' bžāš entr beṇə' ca' ža'anə' na' gwsa'aque' čhoplə por ni che Jeso'osən'. ⁴⁴ Baļe' gwsa'aque' cheyaļə' yesə'əzene'ene', pero bito gwsə'one' ca'.

Beṇə' gwnabia' che beṇə' Izrael ca' bito gwse'ejle'e che Jeso'osən'

⁴⁵ Na' xā'ag yo'odao' che neto' beṇə' Izrael besyə'əžine' lao beṇə' ca' bosə'oselə' lega'aque'. Na' bħox əblao che nasyon čheton' na' beṇə' fariseo ca' gwse'e lega'aque': —ĶBixčhen' cui əgwčhe'elene'?

⁴⁶ Na' xā'ag yo'odao' ca' gwse'e lega'aque': —Xte ža neža ni tozə beṇə' cuiṇə' ne' güen ca güennə' chne bengan'.

⁴⁷ Nach beṇə' fariseo ca' gwse'e lega'aque': —ĶElente le'e bagwxoayagle? ⁴⁸ Ni tozə neto' naquəto' beṇə' blao na' naquəto' beṇə' fariseo cuiṇə' šejle'eto' che'. ⁴⁹ Pero beṇə' zan quinga ža' nga bito zjənombi'e lei de'en bzoĵ de'e Moizezən', na' bazjəmbi'ayi'e.

⁵⁰ Na' Nicodemon', ben' gwyeĵ lao Jeso'osən' še'elə, lene' beṇə' blao ca'. Na' Nicodemon' gože' lega'aque': ⁵¹ —Lei chechon' bito cho'en latĵə čhoglaochon che to beṇə' de que malən' bene' sin cui güe'e dižə' nac goquə na' sin cui əžāš əche'enə bixa bene'enə'.

⁵² Nach gwse' beṇə' ca' le': —ĶEna' nācho leno' len' naco' beṇə' Galilea? Bsed na' ənezdə de que ni to profet cuiṇə' əchoĵ Galilean'.

Besyə'adolē'ene' to no'olə len xtoe'

⁵³ Na' besa'aque' jəya'aque' ližga'aque'.

8

¹ Nach Jeso'osən' gwyeĵe' ya'a de'en ne' Ya'a Olibos. ² Na' beteyo catə' gwye'eni' gwyeĵe' de'e yoblə yo'odao' əblao che neto' beṇə' Izrael. Na' yoguə' beṇə' ca' ža' na' gosə'əbigue'e laogüe'enə' na' Jeso'osən' gwchi'e na' gwzolaogüe' chsed chlo'ine' lega'aque'. ³ Nach beṇə' ca' choso'osed choso'olo'i lei de'en bzoĵ de'e Moizezən' na' len beṇə' fariseo ca' bedəšə'əgüe'e to no'olə beṇə' besyə'adolē'ene' len xtoe'. Na' bosə'ozeche'ene' gwchəĵ beṇə' ca' lao Jeso'osən'. ⁴ Na' gwse'e Jeso'osən': —Maestr, no'ol nga babedolə'əto'one' mer delene' to xtoe'. ⁵ Na' lei de'en bzoĵ de'e Moizezən' chonən mendad gotcho no'ol ca' chso'on ca' əgwsīžə'əga'acchone' yeĵ. ĶBixa ənao' le'? Ķbi cheyaļə' gonechone'?

⁶ Gwse'e Jeso'osən' ca' chedə' gwse'enene' yesə'əbeĵe'ene' dižə' de'e yesə'əchine' contr le'. Nach Jeso'osən' con bcheque'e na' bzoĵe' lao yon' len xbene'. ⁷ Na' gwnitə'əcheche' chəsə'əṇabene' le' nacxa əne'enə'. Nach gwche'əša'ogüe'e na' gože' lega'aque': —Guaquə con to le'e beṇə' cui de xtole'e solaole əgwsīžə'əle no'olə nga yeĵən'.

⁸ Nach bcheque'e de'e yoblə bzoĵe' lao yon'. ⁹ Na' beṇə' blao ca' beṇə' ca' chəsə'əcuiš no'olən' catə' gwse'enene' de'en gož Jeso'osən' lega'aque', gosə'əneze' lo'o yichĵla'ažda'oga'aque'enə' de que yogue'e de xtole'əga'aque'. Nach gwzolaolə besyə'əchoĵ tgüejə tgüejə', gwzolaotec besyə'əchoĵ beṇə' ca' zjəngoləch nach beṇə' ca' yelə' xte bega'an yetozə Jeso'osən' len no'olən' ladjo

benə' ca' choso'ozenag che'. ¹⁰ Na' catə' bebe'ešao' Jeso'osən' caguə no benə' ca' ble'ichene' laogüe'enə' sino yetozə no'olən'. Na' gože'ene': —No'olə, ¿gan benə' ca' choso'ocuiš le'? ¿Eni toe' cui ben le' castigw?

¹¹ Nach no'olən' gože'ene': —Ni toe' Señor.

Nach Jeso'osən' gože'ene': —Ni nada' bito gona' le' castigw. Beyej na' cuich gono' de'e malən'.

Jeso'osən' nse'e be'eni' par yichjla'aždao' benəchən'

¹² Na' Jeso'osən' gozoe' dižə'an yetši'i len benə' ca' ža'anə', gože' lega'aque': —Nada' nsa'a be'eni' par yichjla'aždao' benəchən'. Benə' ca' chso'onlilaže'e nada' na' choso'ozenague' chia' bitoch chso'ontezə chso'one' de'e malən'. Yo'o be'eni'in lo'o yichjla'ažda'oga'aque'enə' chedə' zjənapə' yelə' mban zejlicane.

¹³ Nach benə' fariseo ca' gwse'ene': —Le'etezə cho'o dižə' che cuino', na' bito naquən de'e se'ejle' benə'.

¹⁴ Na' gož Jeso'osən' lega'aque': —La'añə'əczə cho'a dižə' che cuina', xtiža'anə' naquən de'e li. Nada' nəzda' gan' gwza'a na' gan' yeya'a, pero le'e bito nəzele gan' gwza'a na' gan' yeya'a. ¹⁵ Le'e con to chosbaguə'əle nada' de que napa' dolə' por ni che bi de'en chle'ile chona'. Nada' bito za'a par choglaogua'an che benə' de que zjənapə' dolə'. ¹⁶ Pero na' šə catə' choglaogua'an che notə'ətezə benə' de que zjənapə' dolə', zaquə'əczə can' əñia'anə' chedə' bito choglaogua'an che benə' to gwłazza' sino con can' na' Xa'anə' ben' bsele' nada'. ¹⁷ Lei chechon' de'en bzoj de'e Moizezən' nyojən nan de que dižə' de'en əso'e chopə' testigw cheyalə' šejle'echo de que naquən de'e li šə tozə can' yesə'əne'. ¹⁸ Nada' cho'a dižə' che cuina' na' Xa'anə' leczə cho'e dižə' chia', na' le'enə' bsele'e nada'. Neto' naquəto' testigw ca' chopə'.

¹⁹ Na' gwse'ene': —¿Gaxa zo xa'onə'?

Na' gwna Jeso'osən': —Ni nada' ni Xa'anə' cui nombi'ale. Žalə' nombi'ale nada' leczə nombi'ale Xa'anə'.

²⁰ Dižə' ca' be' Jeso'osən' bsed blo'ine' gan' chəsə'əgüe'e mech lo'o yo'odao' əblao che neto' benə' Izrael. Na' ni to cono gwxe'n le' chedə' cuinə' žin ža par gaque' lao na' benə' ca' chəsə'əgüe'i le'.

Jeso'osən' gwne': "Gan'yeya'anə' le'e cabi gaquə da'acle"

²¹ Na' gož Jeso'osən' lega'aque' yetši'i: —Nada' yeya'a, na' le'e yeyilje nada', pero gan' yeya'anə' le'e cabi gaquə da'acle, chedə' le'e gatle catə' cuinə' yedinjele xtolə'əle ca'.

²² Na' benə' blao che nasyon Izrael cheto'on gosə'əne': —¿Eyeyot cuine'enə' ža, de'en ne' gan' yeyeje' bito gaquə šejcho?

²³ Na' gože' lega'aque': —Le'e chzenagle che gwxiye'enə', na' nada' chzenaga' che Diozən'. Le'e chonje can' chso'on yeziquə'əchlə benə' cui zjənombia' Diozən', na' nada' bito chona' ca'. ²⁴ De'e na'anə' gwnia' le'e de que gatle catə' cuinə' yedinjele xtolə'əlen'. Šə cui chejle'ele de que nada' naca' doxen can' gwnia'anə', gatle sin cui yedinjele xtolə'əle ca'.

²⁵ Na' gwse'ene': —¿No naco' le'enə'?

Na' gož Jeso'osən' lega'aque': —Nada' naca' ben' bagwnia' le'e bedote. ²⁶ Ne'e dech de'e zan de'e əñia' chele gwzejni'ida' ca' naquə xtolə'əle ca'. Xa'anə' bsele'e nada' par cho'a dižə' len benəchən' de'en babenda' gwne'. Na' Xa'na'anə' cho'e dižə' li.

²⁷ Jeso'osən' be'e dižə' che Xe' Diozən', na' lega'aque' bito gwse'ejni'ine' šə che Dioz nan' cho'e dižə'. ²⁸ Na' Jeso'osən' gože' lega'aque': —Diozən' bsele'e nada' golja' benəch, na' te gotle nada' le'e yag corozən' cana' ənezele de que naca'

ben' gwnia'anə'. Na' lecə ənezele de que cabi bi chona' de'e bia'azəlaža'a, sino con bin' babzejni'i Xa'anə' nada', lennə' chnia'. ²⁹ Xa'anə' babsele'e nada' na' zocze' len nada'. Bito chbejyichje' nada' chedə' do tyempte chona' de'en chazlaže'enə'.

³⁰ Na' žlac choe' Jeso'osən' dižə' quinga beṇə' zan gwso'onlilaže'e le'.

Noquə'an zjənaquə xi'in Dioz na' noquə'an nitə' xni'a de'e malən'

³¹ Na' Jeso'osən' gože' balə beṇə' gwlaž cheto' ca' bachse'ejle'e che': —Šə sotezə sole gonle de'e chnia' le'e gwlo'en de que de'e liczə banacle disipl chia'.

³² Na' šə sotezə sole gonle de'en chnia' le'e, nach ənezele bi zeje dižə' li chia'anə', na' šə banezele bi zejen, bitoch gacle ca esclabos.

³³ Na' gwse'ene': —Dia che de'e Abraannə' naquəto' na' xte ža neža bitonə' gacto' ca esclabos. ¿Bixčhen' nao' le' de que bitoch gaquəto' ca esclabos?

³⁴ Na' gož Jeso'osən' lega'aque': —De'e li chnia' le'e, yoguə' beṇə' chso'on de'e malən' nite'e xni'a de'e malən' ca esclabos. ³⁵ Beṇə' naquə esclabo caguə do tyempte gaque' cuent len familyən' gan' naque' esclabo, pero beṇə' golje' lao familyən', do tyempte gaque' cuent len familyən'. ³⁶ Na' šə nada' Xi'in Diozən' gona' ca əchojle xni'a de'e malən' par nič cuich gacle ca esclabos, de'e liczə əchojlen'. ³⁷ Nezdə' de que nacle xi'in dia che de'e Abraannə' pero bia'aczə cheyjlažə'əle naclən' gonle par nič gotle nada', na' chonle ca' chedə' bito chone chele xtiža'anə'. ³⁸ Nada' cho'a dižə' che de'en bablo'i Xa'anə' nada', na' le'e chonle can' na xalen'.

³⁹ Na' gwse' beṇə' ca' Jeso'osən': —Neto' naquəto' xi'in dia che de'e Abraannə'.

Na' gož Jeso'osən' lega'aque': —Žalə' nacle doalje xi'in dia che de'e Abraannə' gonle can' ben de'e Abraannə' žalə' ca'. ⁴⁰ Na' la'aṇə'əczə babzejni'ida' le'e dižə' li de'en babsd blo'i Diozən' nada', le'e chene'ele gotle nada'. De'e Abraannə' cabi bene' can' chonlen'. ⁴¹ Tozəczə can' chonle len xalenə'.

Nach gwse'e le': —Tozə Diozən' naque' Xato' na' bito chzenagto' che nochlə beṇə'.

⁴² Na' Jeso'osən' gože' lega'aque': —Žalə' Diozən' naquə xale guaquēle chia', chedə' nada' gwza'a gan' zo Diozən'. Caguə za'a de'e bia'azəlaža'anə'. Len' əbsele'e nada'. ⁴³ ¿Bixčhen' cui chejni'ile de'en chnia' le'e? Bito chejni'ile chedə' la' bito chene'ele gwzenagle xtiža'anə'. ⁴⁴ Gwxiye' nan' naquə xale. Nachən' chebeile chonle can' chene'ennə'. Len naquən giēt beṇə' dezd catə'ən gwxe yežlyon', na' cui chdalenən dižə' li che Diozən' chedə' cui yo'o dižə' lin' lo'o yichjla'azda'ogü'ennə'. Catə' chnen de'e güenlažə' chnen con can' naquə cuinei chedə' naquən güenlažə' na' yoguə' dižə' güenlažə' za'an chei. ⁴⁵ Na' cabi chejle'ele chia' nada', chedə' nada' əchnia' le'e dižə' li. ⁴⁶ Ni tole cui gaguə əgwlo'ele de que babena' bi de'e malən'. Nada' cho'a dižə' li, ¿bixčhen' cui chejle'ele chia'? ⁴⁷ Beṇə' ca' zjənaquə xi'in Dioz choso'ozenague' che xtiže'enə'. Na' ca naquə le'e cui nacle xi'ine', de'e na'anə' bito chzenagle che'.

Ze'e galjə de'e Abraannə' bazoczə Cristən'

⁴⁸ Na' beṇə' blaö che nasyon Izrael cheton' gwse'ene': —Leiczeto' can' nato' de que le' naco' beṇə' Samaria na' de que chac tonto'onə'.

⁴⁹ Na' gož Jeso'osən' lega'aque': —Bito chac tonta'. Nada' əchnežjua' yelə' bala'an che Xa'anə' na' le'e chnitle yelə' bala'an chia'anə'. ⁵⁰ Nada' caguə chyllja' no gon nada' yelə' bala'anə'. Xa'anə' choṇe' nada' yelə' bala'an, na' len' əgwlo'e non' napə dolə' na' non' cui napə dolə'. ⁵¹ De'e li chnia' le'e, notə'ətezə beṇə' choso'ozenag xtiža'anə', cuat nabia' yelə' gotən' lega'aque'.

⁵² Nach beṇə' blao che nasyon Izrael cheton' gwse'ene': —Na'a babeyož gwnezetu' de que chac tonto'onə'. De'e xaxta'ocho Abraannə' gote' na' leczə de'e profet ca' beṇə' ca' gwso'e xtiža' Diozən' cana'. Na' le' nao' de que beṇə' ca' choso'ozenag chio' cuat năbia' yelə' gotən' lega'aque'. ⁵³ ¿Ezaquə'əcho' le' ca de'e xaxta'ocho Abraannə'? Len' gote' na' leczə ca' de'e profet ca'. ¿Noxan' chacdo' naco'?

⁵⁴ Na' gwna Jeso'osən': —Žalə' nada' choe' cuina' yelə' bala'an, cabi zaquə' yelə' bala'anə'. Pero Xa'anə' chone' nada' yelə' bala'an, ben' nale naqua Dioz chelen'. ⁵⁵ Le'e bito nombia'alene', pero nada' nombi'ane'. Žalə' nia' cui nombia'ane' gaca' beṇə' güenlažə' ca le'e. Nada' nombia'ane' ža, na' chzenaga' xtiže'enə'. ⁵⁶ De'e xaxta'ocho Abraannə' bebeine' gwwejele'e de que le'ine' tyemp ni zoa' yežlyo ni. Na' bable'ine'en na'a na' zoe' mbalaz.

⁵⁷ Na' gwse' beṇə' blao che nasyon Izrael cheton' le': —Ni šiyon iz cuinə' žino'. ¿Ena' neze'ido' de'e Abraannə'?

⁵⁸ Na' gož Jeso'osən' lega'aque': —De'e li əchnia' le'e, ca ze'e galjla de'e Abraannə' bazocza' nada'.

⁵⁹ Nach gosə'əzi'e yej par yoso'ošiče'ene'en. Na' Jeso'osən' bocuaše' na' beze'e yo'odao' əblaona'. Bitu gwsa'acbe'ine' catə' bedie' gwcholga'aque'ena' zjəyede'.

9

Jeso'osən' bene' par nich ble'i to beṇə' golje' nchole'

¹ Na' txen chdato' len Jeso'osən' catə' ble'ito' to beṇə' byo beṇə' golje' nchole'. ² Na' gožto'one': —Maestr, ¿no napə dolə' de'en goljə bengan' nchole'? ¿əle' o šə xaxne'enə'?

³ Na' Jeso'osən' gože' neto': —Benga golje' nchole' caguə por ni che xtole'enə', na' caguə por ni che xtole'ə xaxne'enə', sino par nich la'alaon can' gon Diozən' len le'. ⁴ Cheyalə' goncho xšin Diozən' ben' bselə' nada' žlac nede latjə. Gwžin catə' cuich gatə' latjə gonchon. ⁵ Žlac nezoa' yežlyo nga chgua'a be'eni' lo'o yičjla'aždao' beṇə'.

⁶ Beyož gwne' ca' gwcho'on xene'en lao yon' na' bene' benjw len xen' che'enə'. Na' gwdebe' benjon' jelao beṇə' lcholən'. ⁷ Na' gože'ene': —Gwwej jəyedib jelaogo'onə' cho'a tanc de'en nzi' Siloe—. Na' Siloe zejen dižə' Nselə'.

Na' gwweje' na' beyib jelaogüe' ca'. Na' beze'e jəyede' bachle'ine'. ⁸ Na' beṇə' gwliž che' ca' na' beṇə' ca' besə'əle'i le' yoguə' las catə' ne'e nchole' gosə'əne': —¿Ecaguə bengan' bable'icho bedote chi'e chnəbe' caridan'?

⁹ Bale' gosə'əne': —Bengan'.

Na' bale' gosə'əne': —Cabi naquə le' sino ca naquə bengan' naque'.

Na' le' gwne': —Nada'anə'.

¹⁰ Na' gwse'ene': —¿Nacxa goquən' gwzolao chle'ido'?

¹¹ Na' gože' lega'aque': —To beṇə' le Jeso'os bene' benjw na' gwdebe'en jelaogua'anə' na' gože' nada'. “Gwwej cho'a tanc de'en nzi' Siloen' na' jəyedibən.” Na' gwyə'a na' beyiba'an, na' gwzolao chle'ida'.

¹² Nach gwse' beṇə' ca' le': —¿Ganxa be'enə'?

Na' gože' lega'aque': —Bitu nežda'.

Benə' fariseo ca' gosə'ənəbene' be'enə' nac goquən' chle'ine'

¹³ Na' gosə'əche' ben' goquə beṇə' lcholən' gan' nita' beṇə' fariseo ca'.

¹⁴ Na' naquə ža dezcanz catə'an ben Jeso'osən' benjon' de'en gwdebe' jelao be'enə' par ble'ine'. ¹⁵ Na' beṇə' fariseo ca' leczə gosə'ənəbene' le' nac goquən'

bachle'ine'. Na' le' gože' lega'aque': —Ben' beyone nada' gwdebe' benjon' jelaogua'anə' na' beyiban' na' gwzolaol chle'ida'.

16 Nach to čhopə beṇə' fariseo ca' gosə'əne': —Nezecho bito zo Diozən' len benga chedə' bito chomba'ane' ža dezcanzan'.

Na' bale' gosə'əne': —¿Nac gon to beṇə' güen de'e mal gone' miłagr quinga?

Na' gwsa'aque' čhoplə entr' lega'aque'. 17 Nach de'e yoblə gwse'e be'en goljə nčholən': —¿Bi nao' le' čhe ben' ben par ničh chle'ido'?

Na' le' gwne': —Naque' to profet beṇə' bselə' Diozən'.

18 Na' beṇə' blao čhe ṇasyon Izrael četon' bito gwse'e'jele'e čhe ben' šə len' golje' nčhole' na' na'a bachle'ine' xte que gwsa'axe' xaxne'ena'.

19 Na' gosə'ənabene' lega'aque' gwse'ene': —¿Ebengan' xi'inlen' ben' nale golje' nčhole'? ¿Nacxa goquan' chle'ine' na'a?

20 Na' gwse' xaxne'e ca' lega'aque': —Nezeto' de que bengan' xi'into'onə', na' de que golje' nčhole'. 21 Mas nac chaquan' bachle'ine' bito nezeto', nic nezeto' noxa ben par ničh bachle'ine'. Le' bazejəczene'. Lenabe le', güe'ecze' dižə' naquan' goc čhe'.

22 Xaxne'e ca' gosə'əne' ca' de'en besə'əžebe' beṇə' blao čhe ṇasyon Izrael četo'onə', chedə' lega'aque' bačh zjənone'en de que notə'ətezə beṇə' güe'e dižə' de que Jeso'osən' naque' Cristən' ben' gwlej Diozən' par gaquəlene' ṇasyon četon', cabi əso'e latjə šo'oche' lo'o yo'oda'onə'. 23 De'e na'anə' gosə'əna xaxne'e ca': "Bazejəczene'. Lenabe le'."

24 Nach de'e yoblə gwsa'axe' ben' goljə nčhol gwse'ene': —Be'elao' Diozən' na' gwzo'one' testigw de que clelən' babe'eleno' neto' dižə' bačhe. Neto' nezeto' de que Jeso'osən' naque' to beṇə' güen de'e mal.

25 Na' gwne': —Šə naque' beṇə' güen de'e mal, bito nezda'. De'en nezda', nada' goca' beṇə' lčhol na' na'a chle'ida'.

26 Na' de'e yoblə gwse'ene': —¿Bi benene' le'ena'? ¿Nac benen' par ničh bachle'ido'?

27 Na' gože' lega'aque': —Bagwnia' le'e na' cui chzenagle. ¿Bixčhen' chene'ele yenele de'e yoblə? ¿Elen le'e chene'ele gacle disipl čhe'ena'?

28 Na' gwsa'ade'ene' dižə' gwse'ene': —Le' naco' disipl čhe, pero neto' naquəto' disipl čhe de'e Moizezən'. 29 Nezeto' de que Diozən' be'elene' de'e Moizezən' dižə' cho'a, pero benga bito nezeto' gan' ze'ena'.

30 Na' ben' goljə nčholən' gože' lega'aque': —Nactequan' le'e cui nezele ga ze'ena', len babene' par ničh chle'ida'. 31 Na' nezecho de que Diozən' cabi chzenague' čhe beṇə' ca' chso'on de'e mal. Con beṇə' chso'ene' yelə' bala'an na' chso'one' can' chene'ene'ena', lega'acze' chzenag Diozən' čhei. 32 Dezd gwxe yežlyon' ni to cononə' yene de que bagwzo beṇə' chone' par ničh chle'i beṇə' goljə nčhol. 33 Žalə' cui zo Diozən' len le' caguə bi miłagr gaquə gone'.

34 Na' beṇə' blao ca' gwse'ene': —Pendejw, len' goljo' nčholo' yelə' beṇə' mal čho'onə', žəna le' əgwseddo' neto'onə'?

Na' besyə'əbeje' neto' fuer.

Beṇə' ca' zjənčhol yichjla'azda'oga'aque'ena'

35 Gocbe'i Jeso'osən' de que babesyə'əbeje' be'ena' fuer, na' jəšague'ene' gože'ene': —¿Echonlilažo'o le' Xi'in Diozən'?

36 Na' gož ben' le': —¿Noxa'an ža? seňor, par ničh gonlilaža'ane'.

37 Na' gož Jeso'osən' le': —Nada'anə' ben' bable'ido' antslə na' nada'anə' cho'elena' le' dižə'.

³⁸ Nach be'enə' bzo xibe' be'elaogüe'e Jeso'osən', gwne': —Xana', chonlilaža'a le'.

³⁹ Na' gwnach Jeso'osən': —Nada' za'a yežlyo nga par niçh la'alaon che beṇačan' non' zjanapə dolə' na' non' cui zjanapə dolə'. Za'a chgua'a be'eni' par beṇə' ca' chsa'acbe'ine' zjançhol yichjla'ažda'oga'aque'enə', na' za'a par yeca'a be'eni' che beṇə' ca' chsa'aque'ne' cui zjançhol yichjla'ažda'oga'aque'enə'.

⁴⁰ Na' balə beṇə' fariseo ca' nitə' galə'əzə gwse'enene' de'e nga. Na' gwse'e Jeso'osən': —¿Echacdo' len neto' nçhol yichjla'ažda'oto'onə'?

⁴¹ Na' gož Jeso'osən' lega'aque': —Žalə' cui chejni'ile bito bi xtolə'əle de. Pero por ni che de'en nale de que chejni'ile, de'e na'anə' deczə xtolə'əlen'.

10

Jempl che xle'ej xilə' ca'

¹ De'e li çhnia' le'e, be'en cui cho'o cho'a puert xle'ej xilə' ca' na' ga yoblə chepe' par cho'e, beṇə' bguan be'enə'. ² Be'en cho'o cho'a puertən', le'ena' goye xilə'anə'. ³ Na' be'en chapə puert che xle'ej xilə' ca' chsaljue' par niçh cho'o beṇə' goyebən'. Na' xilə' ca' choso'ozenaguəb xtiže'ena' çhedə' zjanombia'ab le', na' chaxe'eb cho'e laga'aguəb catə' chbeje'eb. ⁴ Na' catə' bagwleje' yoguə' bia che' ca' lo'o xle'ejga'aguəbən', chbialaogüe' laoga'aguəbən' na' chjəsə'ənaob le' çhedə' zjanombi'ab ši'ena'. ⁵ Na' bito žjəsə'ənaob beṇə' yoblə, sino yesə'əxonjəb le' çhedə' cui zjanombi'ab ši'ena'.

⁶ Jeso'osən' be'e jempl nga par bzejni'ine' beṇə' ca' ža'anə', pero bito gwse'ejni'ine' bi zejen de'en gože' lega'aque' ca'.

Jeso'osən' chgüia chye' chio'o ca to goye xilə' beṇə' chgüia chye' bia che' ca' binlo

⁷ Nach gozne Jeso'osən' gože' lega'aque': —De'e li əchnia' le'e, nada' gwxaquə'əlebəda' ca cho'a puert che xle'ej xilə' ca'. ⁸ Yoguə' beṇə' goxoayag ca' babla'ac antslə ca nada' çəsə'əne' de que Diozən' bsele'e lega'aque' pero gwxaquə'əlebəga'aque'ne' ca beṇə' bguan. Na' ca xilə' ca' cui choso'ozenaguəb xtižə' beṇə' cui zjanombi'ab, ca'aczən' beṇə' ca' chso'onlilažə' nada' cui choso'ozenague' che beṇə' goxoayag ca'. ⁹ Nada' gwxaquə'əlebəda' ca cho'a puert che xle'ej xilə' ca'. Xilə' ca' çhəsyə'əyo'ob lo'o xle'ejga'aguəb na' çəsə'əchojəb par çəsə'əyiljəb de'e chsa'ob. Na' ca xle'ej xilə' ca' chcue'ejən lega'aguəb par niçh cui bi gac çhega'aguəb, ca'aczən' chcue'ēja' beṇə' ca' chso'onlilažə' nada' par niçh cui bi gac çhega'aque'.

¹⁰ Beṇə' goxoayag ca' gwxaquə'əlebəga'aque'ne' ca beṇə' bguan beṇə' ca' chda'ac leçgualə con to de'e yesə'əbane', na' so'ote', na' yesə'ənitlaogüe'. Nada' za'a par niçh chnežjua' yelə' mban zejlicaṇe che beṇə' ca' chso'onlilažə' nada' na' par niçh nite'e mbalaz juisy. ¹¹ Nada' chgüia chya' beṇə' ca' chso'onlilažə' nada' can' chon to beṇə' goye xilə' beṇə' chgüia chye' xilə' che' ca' binlo. Na' de'en chgüia chyega'aca'ane' chsanlažə' cuina' so'ot beṇə' nada'. ¹² Balə beṇə' ca' choso'oye' xilə' çesə'əzi'e laxjwga'aque', la' xilə' ca' bito zjanaguəb bia çhega'aque'. De'e na'anə' çəsə'əbejyichje'eb na' choso'oxonje' catə' çəsə'əle'ine' za' no becoyo'o, çhedə' bito zjanaque' xan xilə' ca'. Chso'e latjə çhiz becoyo'ona' xilə' ca' na' choslasəb lega'aguəb. ¹³ Çesə'əxonje' çhedə' bito zjanzi'ine' xilə' ca' de'en cui zjanaquəb bia çhega'aque', con zjanaque' goyeb.

¹⁴ Nada' chgüia chya' beñə' ca' chso'onlilažə' nada' ca to beñə' goye xilə' beñə' chgüia chye' xilə' che' ca' binlo. Na' nombi'a beñə' ca' chso'onlilažə' nada', na' lega'aque' zjənonmbi'e nada'. ¹⁵ Nombi'aga'aca'ane' ca Xa'anə' nombi'e nada' na' nada' nombi'a Xa'anə'. Na' de'en chgüia chyega'aca'ane' chsanlažə' cuina' so'ot beñə' nada'. ¹⁶ Na' nitə' beñə' ga yoblə beñə' cui zjənaquə beñə' Izrael beñə' so'onlilažə' nada' na' yoso'ozenague' chia'. Leczə lega'aque' cheyalə' əgwtoha' par niç yoguə'əlol no so'onlilažə' nada' əsa'aque' tozə len lježjga'aque' na' toza' nada' ggüia gwya' yoguə'əlolga'aque'.

¹⁷ Chsanlažə' cuina' so'ot beñə' nada' pero techlə yebana'. Na' chaquəche Xa'an chia' de'en chazlažə'a chona' ca'. ¹⁸ Ni to cono yeque'e yelə' mban chia'anə' sino chsanlažə' cuina' so'ot beñə' nada'. Napa' yelə' gwnabia'anə' par gwsanlažə' cuina' so'ote' nada', na' napa' yelə' gwnabia' par yeyas yebana' ladjo beñə' guat ca'. Na' Xa'anə' babene' mendad gona' ca'.

¹⁹ Na' de'e yoblə gwsa'ac beñə' blao che nasyon Izrael cheton' choplə por ni che dižə' ca' de'en gwse'enene' be'e. ²⁰ Zan beñə' ca' gosə'əne': —Chac tontə'enə', bito chache'ine' bi dižə'an cho'e. ¿Bixchen' chzenagle che'?

²¹ Na' bale' gosə'əne': —Dižə' quinga caguə naquən ca che beñə' chac tontən'. ¿Eguaquə gon to beñə' chac tont par le'i beñə' lçhol'?

Beñə' blao che beñə' Izrael ca' cuiczə gwse'enene' se'ejle'e che Jeso'osən'

²² Na' Jerosalennə' chac lni che yo'odao' əblao che neto' beñə' Izrael de'en ne' "Dedication". Na' naquə tyemp zag. ²³ Na' Jeso'osən' chde' cha'əsil che yo'odao' əblaonə' part de'en chəsə'əne' "Cha'əsil che Salomon". ²⁴ Na' gwse'eçhj beñə' blao che nasyon Izrael cheton' Jeso'osən' na' gwse'ene': —¿Bixchen' ne'e chono' par chaczejləžə'ətecto' šə len' Cristən' ben' gwleje Diozən' par gaquəlene' nasyon cheton'? Šə le'ena' Cristən', gwna neto' clar.

²⁵ Na' gož Jeso'osən' lega'aque': —Bagwnia' le'e na' cui chejle'ele. Milagr ca' de'en babena' len yelə' guac che Xa'anə' chəsə'əlo'en de que le'enə' bsele'e nada'. ²⁶ Na' le'e bito chejle'ele chia' chedə' cui nacle txen len beñə' ca' chso'onlilažə' nada'. ²⁷ Nombi'a beñə' ca' chso'onlilažə'e nada' na' lega'aque' choso'ozenague' chia'. ²⁸ Na' nada' chnežjoga'aca'ane' yelə' mban zejlicane, na' cuat yesə'əbiayi'e. Ni to cui no no əca'axəxj lega'aque' lao na'anə'. ²⁹ Xa'anə' bagwleje' lega'aque' par niç chgüia chyega'aca'ane'. Na' ni to cui no no gaquə əca'axəxj lega'aque' lao na' Xa'anə' chedə' nape' le'ezeləogüe' yelə' chnabia' xen. ³⁰ Nada' na' Xa'anə' tozə can' naquə yichjla'azda'oto'onə', tozə can' naquə yelə' guac cheto'onə' na' tozə can' chonto'.

³¹ Nach beñə' blao che nasyon Izrael cheton' gosə'əzi'e yej par yoso'ošize'ene'en. ³² Na' gož Jeso'osən' lega'aque': —De'e zan de'e güen bable'ile bena' len yelə' guac che Xa'anə'. ¿Non' de'e ca' babena' chonən par əgwšizə'əle nada' yejən'?

³³ Na' beñə' blao ca' gwse'e le': —Caguə por ni che bi de'e güen de'en babeno'on əgwšizə'əto' le' yejən', sino por ni che chžia chnito'o Diozən'. Con beñəchzə le' na' nao' de que naco' Dioz.

³⁴ Na' gož Jeso'osən' lega'aque': —Le'e chsedle Xtizə' Diozən' de'en nyoj gan' nan: "Nada' gwnia' de que le'e nacle ca Dioz." ³⁵ Na' Xtizə' Diozən' de'en nyojən caguə de'e te cheinə'. Na' lennə' nan de que Diozən' gwne' che beñə' ca' əbnežjue' xtizə'enə' de que gwsa'aque' ca Dioz. ³⁶ Ca naquə Diozən' gwne' zjənaque' ca cuine', ¿bixchen' nale de que chžia chnita'a Diozən' de'en gwnia' naca' Xi'ine'? Le'enə' gwleje' nada' par gaquəlena' beñəchən' na' bsele'e nada' yežlyo nga. ³⁷ Žalə' de'e ca' chona'anə' bito zjənaquən de'en chon Xa'anə', bito

šejle'ele chia'. ³⁸ Pero na' de'en zjənaquən de'en chone'enə', cheyalə' šejle'ele de que naca' Xi'ine' la'anə'əczə cui chejle'ele xtiža'anə'. Šə šejle'ele che de'e ca' chona'anə' na' ənezele de que Xa'anə' zoe' len nada' na' nada' zoa' len le'.

³⁹ Na' de'e yoblə bosə'əsyə' naclən' gaquə ədolē'e, pero bito besyə'əželene' naclən' so'one'.

⁴⁰ Na' gwsa'ato' len Jeso'osən' jəsoto' yešla'alə yao Jordanna' gan' gwzo de'e Juanna' antslə catə'an bchoe' beṇə' nis. ⁴¹ Na' zan beṇə' bda'aque' gan' zoto' par bosə'ozenague' xtižə' Jeso'osən' na' gosə'əne' che': —La'anə'əczə de'e Juanna' ni to miḷagr cui bene', yoguə'əlol de'en gwne' che benga naquən de'e li.

⁴² Na' beṇə' zan beṇə' nitə' na' gwsə'onḷilaž'e' Jeso'osən'.

11

Can' goquə catə'an got ben' le Laçh

¹⁻² Na' goquən chacšene to beṇə' Betania beṇə' le Laçh. Betania nan' naquən laž Maria na' Marta, na' lega'aque'enə' zjənaque' beṇə' zan Laçhən'. Maria nga ben' bcuase' set zix̄ ṇi'a Xancho Jeso'osən' na' bxie' ṇi'enə' len yišə' yichje'enə'. ³ Na' beṇə' zan Laçhən' bosə'osele'e rson gan' zo Jeso'osən' gwse'ene': —Xanto', be'en chacdo' chei chacšenene'.

⁴ Na' catə' gwneze Jeso'osən' na' gwne': —Yižgü'e che'enə' bito naquən de'e gattecze', sino par əye' Diozən' yelə' bala'anən' chacšenene' na' par niç nada' si'a yelə' bala'an, nada' naca' Xi'in Diozən'.

⁵⁻⁶ Gwde gwneze Jeso'osən' de que chacšene Laçhən', nebega'əne' yechopə ža gan' zoe'enə' la'anə'əczə chaquene' che Martən', che beṇə' bile'enə' na' che Laçhən'. ⁷ Nach gože' neto': —Ləšo'o Jodean' de'e yoblə.

⁸ Nach gožto'one': —Maestr, bi ža na'azən' gwsa'aclašə' beṇə' blao che nasyon chechon' yoso'ošize'e le' yej. ¿Ena' de'e yoblə šejo' na'anə'?

⁹ Na' gwna Jeso'osən': —¿Ecaguə šiz̄in orən' naquə težan'? Beṇə' chda teža bito chčhegü'e' chedə' la' nye'eni'inə'. ¹⁰ Mas beṇə' chda še'elə chčhegü'e' chedə' cuich nye'eni'. Ca'aczə naquən len nada', bito bi bi gaquə chia' žlac cuinə' əžin ža par so'ote' nada'.

¹¹ Gwde gwne' ca' gozne' neto': —Beṇə' migw checho Laçhən' bagwtase', na' ša'a žjəyesbana'ane'.

¹² Na' gožto'one': —Xanto', šə bachtase'enə' goyacczene'.

¹³ Jeso'osən' gwne' ca' chedə' gwnezene' bagot Laçhən', na' neto' bento' xbab de que gwne' ca' che bišgalən'. ¹⁴ Nach Jeso'osən' gwne' neto' clar: —Bagot Laçhən'. ¹⁵ Na' chebeida' cui gwzoa' lao chacšenene', par niç ṇa'a gona' ca šejle'echle chia'. Le'e šo'o gan' de'enə'.

¹⁶ Nach beṇə' ljuēžjto' Tomasən' gože' neto': —Le'e šo'o par niç len chio'o so'ote' šə bachso'ote' Jeso'osən'.

Tomas na'anə' ben' bosə'osi'e Didimo chedə' naque' beṇə' cuaš.

Jeso'osən' chosbane' beṇə' guat ca'

¹⁷ Nach gwyejto' len Jeso'osən' Betanian', na' catə' bžinto'onə' gwse' beṇə' ca' le' de que bagoc tap ža bosə'ocuaše'e Laçhən'. ¹⁸ Na' Betanian' chi'in galə'əžə Jerosalennə' ca do gašjə legw. ¹⁹ Na' beṇə' zan beṇə' Izrael gwlaž cheto' ca' ža' Jerosalennə' besə'əžine' gan' zo Martən' na' Marian' par chso'e lega'aque' yelə' chxenlažə' de'en got beṇə' zanga'aque'enə'. ²⁰ Nach Martən' catə' gwnezene' bazon əžinto' na' bchoje' bedəšague' neto', na' Marian' bito bchoje' ližga'aque'enə'. ²¹ Nach Martən' gože' Jeso'osən': —Xana', žalə gwzo'

catə'an gocšene beṇə' zana'anə' bito gote' žalə' ca'. ²² Pero la'aṇə' bagote', nezdə' de que Diozən' gone' bitə'ətezə de'en aṇabdo'one'.

²³ Nach gož Jeso'osən' le': —Goban beṇə' zano'onə'.

²⁴ Nach Martən' gože'ene': —Nezdə' de que gobane' catə'an yesyə'əban beṇə' guat ca' žan' šo'o fin che yežlyon'.

²⁵ Na' gož Jeso'osən' le': —Nada' chac chosbana' beṇə' guat ca' na' nada' nsa'a yelə' mban zejlicane par beṇə' ca' chso'onlilažə' nada'. De'e na'anə' beṇə' ca' chso'onlilažə' nada' la'aṇə'əczə sa'ate', de yelə' mban zejlicane chega'aque'.

²⁶ Na' notə'ətezə beṇə' chso'onlilažə'e nada' zjənapə' yelə' mban zejlicane na' cuat ṇabia' yelə' gotən' lega'aque'. ĵEchejli'o de'e nga?

²⁷ Na' gože'ene': —Xana', chejli'a de que naco' Xi'in Dioz. Chejli'a de que naco' Cristən' ben' babselə' Diozən' yežlyo nga par gaquəlene' neto'.

Jeso'osən' gwcheže' cho'a ba che Lačən'

²⁸ Beyož gwna Martən' ca' nach beyeje' na' jəyeyeže' Maria bile'enə' žižizə: —Baza' Maestrən' na' chṇe' le'.

²⁹ Na' Marian' catə' benene' can' gož Martən' le' le'e gwzoža'ate' bide' gan' zoto' len Jeso'osən'. ³⁰ Na' caguə babžinto' lao yežən' ca orən', nenaguə'əto' gan' bedəšag Martən' neto'. ³¹ Na' beṇə' Jerosalen ca' nitə' len Marian' liže'enə', beṇə' ca' chso'e lega'aque' yelə' chxenlažə', catə' besə'əle'ine' gwza' Marian' nach gosə'ənaogüe'ene' chsa'aque'ne' cho'a ba na'an zde' zjəčeže'.

³² Na' Marian' catə' ble'e gan' zoto'onə' ble'ine' Jeso'osən', na' bzo xibe' laogüe'enə' na' gože'ene': —Xana', žalə' le' gwzo' nga catə'an chacšene beṇə' zana'anə', bito gote' žalə' ca'.

³³ Na' catə' ble'i Jeso'osən' chbež Marian' na' lecəzə chəsə'əbež beṇə' Jerosalen ca' nžague'enə', de'e juisy de'e goquene' na' bžaglaogüe' lo'o yičhja'ažda'ogüe'enə'. ³⁴ Na' gože' lega'aque': —ĵGa əbcuašə'əlene'?

Na' lega'aque' gwse'ene': —Xanto', yo'o na' le'ido'.

³⁵ Na' gwchež Jeso'osən'. ³⁶ Na' gosə'əna beṇə' Jerosalen ca': —Le'e ggüiašc catequən' chaquene' che'.

³⁷ Na' bałə beṇə' ca' gosə'əne': —Le' nğan' bene' par nič ble'i beṇə' lchoł ca'. ĵEcu gaquən' žalə' bene' par nič cui gat Lačən'?

Jeso'osən' bosbane' Lačən' ladjo beṇə' guat ca'

³⁸ Na' de'e yoblə de'e juisy de'e goque Jeso'osən' lo'o la'aždaogüe'enə'. Nach yoguə'əto' gwyejto' cho'a ban' len Jeso'osən'. Na' ban' naquən to bloj na' da' to yej cho'inə'. ³⁹ Nach gož Jeso'osən': —Leca'a yejən'.

Na' Mart zan de'e beṇə' guatən' gože'ene': —Xana', bachla' ben' zban, la' bach goc tap ža ṇa'a gote'.

⁴⁰ Na' gož Jeso'osən' le': —Bagwnia' le' šə chonlilažo'o nada' nach šejni'ido' bi zeje ca' de'en gwlo'e Diozən' yelə' yuac xen che'enə'.

⁴¹ Nach beṇə' ca' gosə'əque'e yejən'. Na' Jeso'osən' gwłis laogüe'en yobala gwne': —Xa', choxcwleno' babzenago' chia'. ⁴² Nada' nezdə' de que syempr chzenago' chia'. Pero ənia' ca' par nič beṇə' ca' ža' nga se'ejle'e de que len' əbselo'o nada'.

⁴³ Na' beyož gwne' ca' lao orasyonṇə', belgüiže' de'e beṇə' guatən' gwne' zižjo gože'ene': —Lač bechoj.

⁴⁴ Nach le'e bechojte Lačən', zjəncšeləyoy ṇi'a ne'e ca' cint de lachə' na' to bey nazjə laogüe'enə'. Na' gož Jeso'osən' lega'aque': —Le'e yozaše' lachə'ənə' na' le'e gwsane' yeyeje'.

Boso'oxi'e yesa'azene' Jeso'osən'

⁴⁵ Na' zan beṇə' Jerosalen ca' beṇə' ca' zja'ac len Marian' besə'əle'ine' miḷagr de'en ben Jeso'osən' na' gwso'onlilaže'e le'. ⁴⁶ Pero bale' ja'aque' lao beṇə' fariseo ca' jse'eže' lega'aque' can' bene' bosbane' Lachan'. ⁴⁷ Nach bḫoz əblao che ṇasyon Izrael chton' na' beṇə' fariseo ca' besə'ətobe' yoguə'əloḷ beṇə' ca' chəsə'ənabia' ṇasyon chton'. Nach boso'oxi'e gosə'əne': —¿Naclə gonchon'? la' miḷagr zanna' chon benga. ⁴⁸ La' šə gaquecho ljoye'ena', yoguə' beṇə' so'onlilaže'e le', nach da'ac beṇə' ṇasyon Roma na' yoso'ožiaye'e yo'oda' əblao checho nga na' len ṇasyon chechon'.

⁴⁹ Entr beṇə' golə beṇə' blao ca' toe' le Caifas na' naquəche' bḫoz əblao ca izən'. Na' gože' lega'aque': —Le'e caguə bi ṇezelen'. ⁵⁰ Nic chonḷe xbab de que napən chio'o cuentən' tozə ben' gotcho lgu'a cuiayi' yoguə'əcho len ṇasyon checho nga.

⁵¹ Caifasən' naquəche' bḫoz əblao ca izən' na' caguə con gwne' ca' to gwlaže'ena'. Dioz nan' bene' par gwdixjui'e de que so'ote' Jeso'osən' por ṇasyon Izrael chto'onə'. ⁵² Na' caguə so'ote'ene' par ṇasyon chto' na'azənə'. Leczə so'ote'ene' par niḫ yoguə' beṇə' ca' bagwlej Diozən' par əqu'e'e ca xi'ine' gatə'ətezə ṇasyon, yesyə'əyaque' tozə so'elaogüe'ene'. ⁵³ Na' ža na' gwzola' boso'oxi'e naclən' so'one' par so'ote'ene'.

⁵⁴ Na' de'e nan' bitoch gwda Jeso'osən' zaquə'əlao entr beṇə' gwlaž chto' ca'. Na' gwza'ato' gwyejto' to yež de'en nzi' Efrain, chi'in galə'əzə latjə dašan'. Na' gwzoto' na' len le'.

⁵⁵ Na' lni pascw che neto' beṇə' Izrael bazon baozə. Na' beṇə' zan beṇə' za'ac to to yež ja'aque' Jerosalenna' antslə ze'e galə' lni pascon' par gwso'on cuinga'aque' xi'ilažə' can' na lei chto'onə'. ⁵⁶ Na' besyə'əyilje' Jeso'osən', na' ca nite'e chy'o yo'oda' əblao chton' gwse'e ljuežje': —¿Bi xbab chontgualə? žəgüide' lni nga?

⁵⁷ Gosə'əne' ca' chedə' bḫoz əblao che ṇasyon Izrael chton' na' beṇə' fariseo ca' bagwso'one' mendad de que notə'ətezə beṇə' əṇezene' gan' zo Jeso'osən' gwzenene' lega'aque' par niḫ yesa'azene'ene'.

12*Marian' chgüe'e set zix'ni'a Jeso'osən'*

¹ Na' xop ža antslə lni pascon', gwyejlento' Jeso'osən' Betanian' gan' zo Lachən' ben' bosbane' ladjo beṇə' guat ca'. ² Na' balə beṇə' Betania ca' boso'osi'ini'e to xše' par Jeso'osən', na' Martən' bdie' de'en güe'ej gwdaoto' len le'. Na' Lachən' chi'e cho'a mesən' txen len Jeso'osən' na' len neto' na' beṇə' ca' yela'. ³ Na' Marian' de tya set zix' che' de'e zaquə'əchgüei na' gwlo'en ni'a Jeso'osən'. Na' bxie' ni'ena' len yišə' yichje'ena'. Na' doxen yo'onə' gwla'achgua ze set zixən' gwlo'e ni'ena'. ⁴ Na' zo Jod Iscariotən', ben' naquə neto' txen. Le'ena' banaqən əgwdie' Jeso'osən' lao na' beṇə' ca' chəsə'əgue'i le'. Jodən' naque' xi'in to beṇə' le Simon. Na' Jodən' gwne': ⁵ —¿Bix'chen' cui bete'e set zix' nga? Zaquə'ən do tmil gueyə' gueyoa. Na' mechən' de'en le'ine' chei əgwnežje' en beṇə' yašə' žalə' ca'.

⁶ Jodən' bene' xbabən' ca' caguə por ni che beyaše'ene' beṇə' yašə' ca' sino por ni che naque' beṇə' bguan. Len' bexe'e mech de'en bchin yoguə'əto' na' gwlejlane' mechən'. ⁷ Nach Jeso'osən' gože'ene': —Ljoye'ena'. Babene' de'en non gonene' nada' žan' əgaša'anə'. ⁸ Ca naquə beṇə' yašə' ca', syempr nitə'acze' len le'e, pero nada' caguə syempr soa' len le'e.

Bxoz əblao ca' boso'oxi'e so'ote' Laçhən'

⁹ Na' beṇə' zan beṇə' Izrael gwlaž çeton' gwsa'acbe'ine' de que Jeso'osən' zoe' na'. Na' ja'aque', pero caguə por ni che Jeso'os na'azən', sino par besa'əle'ine' Laçhən', ben' bosban Jeso'osən' ladjo beṇə' guat ca'. ¹⁰ Na' bxoz əblao che nasyon çeton' leczə boso'oxi'e so'ote' len Laçhən', ¹¹ çhedə' beṇə' zan beṇə' Izrael gwlaž çeton' ja'aque' na' gwso'onlilaže'e Jeso'osən' por ni che le'.

Jeso'osən' beyo'e Jerosalennə'

¹² Na' beteyo gwza'ato' Betanian' len Jeso'osən' na' gweyjo' Jerosalennə'. Na' ca orən' beṇə' zan çəsə'əžag Jerosalennə' beṇə' zja'ac lni pascon'. Na' gosə'ənezene' de que Jeso'osən' yežine' Jerosalennə'. ¹³ Na' de'e na'anə' besa'əchoje' bedəsə'əleze' neto', zjənoxe'e no zin, na' çəsə'əgü'e be' lban che çəsə'əne': —Le' naco' Rei che nasyon Izrael chechon', goclenšga neto'. Sošgo' mbalaz le' baza'o nga, babselə' Xancho Diozən' le'.

¹⁴ Na' bžel to borrr dao' bia gwžia Jeso'osən' lao zde'. Goc can' nyojczən nan: ¹⁵ Le'e ža'ale Jerosalennə' bito žeble.

Le'e ggüiašč baza' Rei çhelen' žie' to borrr dao'.

¹⁶ Na' neto' disipl che' bito gweyjni'ito' categazə de que goc che' con can' boso'ozoj de'e profet ca' beṇə' ca' gwso'e xtižə' Diozən' cana'. Gwde gwso'ot beṇə' Jeso'osən' na' Diozən' be'ene' yelə' bala'an xen, na' canan' jəyeza'alazə'əto' dižə' ca' zjənyoj che' na' gocbe'ito' gwso'one'ene' le' can' nyojənnə'.

¹⁷ Beṇə' ca' gwnitə' len Jeso'osən' catə'an bolgüiže' Laçhən' na' bosbane'ene' par bechoje' lo'o ban' gwso'e dižə' len beṇə' ca' ža' syodan' can' bene'ena'.

¹⁸ De'e na'anə' bedəsə'əleze'ene' çhedə' gosə'ənezene' ca' miłagr de'en bene'.

¹⁹ Na' gosə'əna beṇə' fariseo ca' entr lega'aque': —Bachle'ile cuiczə bi de gonchon'. Yoguə' beṇəçhən' zjəsə'ənao le'.

To çhopə beṇə' griego gwse'ene' əso'elene' Jeso'osən' dižə'

²⁰ Na' zjəlen balə' beṇə' griego, beṇə' ja'ac lni'na' par gwso'elaogü'e Diozən'.

²¹ Beṇə' quinga besə'əžine' gan' zo Lip beṇə' Betsaida distrit che Galilean'. Na' gwsa'atə'əyoine' Lipən' gwse'ene': —Gwzi'ixenšga, chene'eto' gü'e'elento' Jeso'osən' dižə'.

²² Nach gwey Lipən' jəye' Ndresən'. Nach Ndresən' len Lipən' jəsə'əye' Jeso'osən'. ²³ Nach Jeso'osən' gože' lega'aque': —Na'a bachžin ža so'ot beṇə' nada' par niçh Diozən' gone' nada' yelə' bala'an xen. Len' bsele'e nada' golja' beṇəçh. ²⁴ De'e li əchnia' le'e, ša to trigon' cui yexinjən cata' əxorən' lao yon', chega'ançzə tozən, pero šə yexinjən na' yela'an, de'e zan trigon' yeyaquən.

²⁵ Notə'ətezə beṇə' chaquene' gone' par niçh cui çhi' saque'e o par niçh cui no so'ot le', be'enan' cuiayi'. Na' notə'ətezə beṇə' çsanlažə' cuine' çhi' saque'e o so'ot beṇə' le' por ni çhia', bade yelə' mban zejlicane che'ena'. ²⁶ Na' notə'ətezə beṇə' chene'ene' gone' xšina'anə', çheyalə' gonlilaže'e nada' na' gwzenague' çhia'. Na' ga'an soa' na' so ben' gon xšina'anə'. Na' beṇə' ca' so'on xšina'anə', Xa'anə' gü'e'lega'aque' yelə' bala'an.

Jeso'osən' gwduxje'e de que so'ot beṇə' le'

²⁷ Bachžaglaogua' lo'o yiçhjlə'aždaogua'anə'. ¿Echaquele nabda' Xa'anə' yosle' nada' lao de'e ca' ze'e gaquə çhia' na'a? Abi. Babida' par niçh gaquəczə çhia' ca'anə'.

²⁸ Nach bene' orasyonnə' gwne': —Xa', ben par niçh le' si'icho' yelə' bala'an.

Nach Diozən' ben' zo yoban' gwņe' gože'ene': —Babena' ca gwxi'a yelə' bala'aṅ, na' ze'e goncha' ca si'icha'annə'.

²⁹ Benə' zan zjənžague' neto' ca orən' na' cata' gwse'enene' de'en gwna Diozən', balə' gosə'əne' de que gwņinnə'. Na' yebale' gosə'əne': —To anglən' agwne' le'.

³⁰ Na' Jeso'osən' gože' neto': —Diozən' gwņe' nada' zižjo caguə par nič nada' ənezda' de que chzenague' čhia'anə', sino par nič əneze le'ena'. ³¹ Bachžin ža cata' Diozən' əgwnežjue' castigw zejlicane che benə' ca' cui zjənombia' le'. Na' bachžin ža cata' gwxiye'ena' de'en chnabia' benə' ca' cui zjənombia' Diozən' nit yelə' gwnabia' cheina'. ³² Na' cata' gwso'ote' nada' le'e yag corozan', gona' par nič yoguə'əloł benə' bagwlej Diozən' par əsa'aque' xi'ine' so'onlilaže'e nada'.

³³ Na' de'e ngan' gwne' chzejni'ine' neto' de que so'ot benə' le' yoso'ode'ene' to le'e yag coroz. ³⁴ Nach balə benə' zan ca' ža'anə' gwse'ene': —Neto' babeneto' choso'osed choso'olo'i benə' can' na Xtižə' Diozən' de'en nyojən, na' nezeto' nan de que Cristən' ben' gwlej Diozən' par gaquəlene' nasyon chechon' soe' zejlicane. Na' le' nao' de que Diozən' bsele'e le' goljo' benəch. ¿Bixčhen' nao' le' de que so'ot benə' le' to le'e yag coroz? ¿Ebselə Diozən' le' goljo' benəch?

³⁵ Nach Jeso'osən' gože' lega'aque': —Nada' za'a par əchgu'a be'eni' lo'o yichjla'aždao' benəchən'. Na' yeto term da'ogan' soa' par əgwsed əgwlo'ida' le'e. Le'e šejle' xtižə'anə' žlac ne'e de latjə par nič cui cuiayi'ile zejlicane. Benə' ca' cui chse'ejle'e xtižə'anə' bito chsa'acbe'ine' de que yesə'əbiayi'e. Zjənaque' ca to benə' chda gan' naquə žchoł na' bito chacbe'ine' gan' chde'. ³⁶ Le'e gonlilažə' nada' na'a žlac ne'e de latjə par nič šo'o be'eni' čhian' lo'o yichjla'ažda'olen' na' par nič əgwnežjwle be'eni' che yeziquə'əchlə benə'. Gwde gwna Jeso'osən' ca' beze'e bocuaše'ene' lega'aque'.

Zan benə' Izrael ca' bito gwso'onlilaže'e Jeso'osən'

³⁷ La'aṅə'əczə besə'əle'i benə' Izrael gwlaž četon' ben Jeso'osən' zan miłagr, casi yogue'e bito gwso'onlilaže'ene'. ³⁸ Na' de'en goc ca' goc complir can' bzoj de'e profet Isaiazən' ben' be' xtižə' Diozən' cana', nan:

Xanto', casi notono no choso'ozenag dižə' de'en chyixjue'eto'onə'.

Na' casi notono chsa'acbe'i de que babesə'əle'ine' blo'o yelə' guac čhio'onə'.

³⁹ Bito goquə se'ejle'e, čhedə' chac čhega'aque' can' na yeto de'en bzoj de'e profet Isaiazən', nan:

⁴⁰ Diozən' babene' par nič nažjo yichjla'aždao' benə' quinga na' par nič zjənaque' benə' godenag.

Babene' par nič chəsə'əle'ine' pero cabi chsa'acbe'ine' bi zejen de'en chəsə'əle'ine'ena',

na' chse'enene' pero bito chse'ejni'ine' bi zejen de'en chse'enene'ena'.

Gosyə'ədinjljei xtolə'əga'aque'ena' na' gwso'elje' latjə yocobə Diozən' yichjla'ažda'oga'aque'ena' žalə' chse'ejni'ine'en na' žalə' chsa'acbe'ine' bi zejen.

⁴¹ De'e quinga gwna de'e profet Isaiazən' čhedə' ble'ine' yelə' chey che'eni' che Jeso'osən' na' be'e dižə' che'.

⁴² La'aṅə'əczə benə' zanch lao nasyon Izrael četon' bito gwse'ejle'e che Jeso'osən', bia'aczə zane' gwso'onlilaže'ene', na' len no benə' gwnabia' čheto' ca'. Pero na' bito gwso'e dižə' de que chso'onlilaže'ene' čhedə' besə'əžebe' cabich aso'e benə' fariseo ca' latjə par so'e lo'o yo'oda'onə'. ⁴³ Gwse'enchene' so'e benəchən' lega'aque' yelə' bala'aṅ cle ca so'one' ca güe' Diozən' lega'aque' yelə' bala'aṅ.

Xtižā' Jeso'osān' zjānaquān de'e žialao xen

⁴⁴ Na' Jeso'osān' gwñe' zižjo gože' lega'aque': —Benā' ca' chso'onlilažā' nada' caguā nada'āzan' chso'onlilaže'e sino lenczā Xa'anā' ben' ābselā' nada'. ⁴⁵ Ben' chle'i nada' leczā chle'ine' Xa'anā' ben' bselā' nada'. ⁴⁶ Nada' za'a yežlyo nga par nič chgua'a be'eni' lo'o yičhja'aždao' beñā' ca' chso'onlilažā' nada'. Chgua'a be'eni' lo'o yičhja'ažda'oga'aque'enā' par nič cuich so'ontezā so'one' de'e malān'. ⁴⁷ Na' notā'ātezā beñā' chse'ene xtižā'anā' na' bito choso'ozenague' čhei caguā nada' čhoglaogua'an čhega'aque' de que zjānape' dolā, čhedā' bito za'a yežlyo nga par nič čhoglaogua'an che beñāčhān' de que zjānape' dolā' sino par nič gona' ca cui žjāya'aque' lao yi' gabilān' šā so'onlilaže'e nada'. ⁴⁸ Xtižā'anā' de'en babi'a len lega'aque' čhoglaon čhega'aque' de que zjānape' dolā' čhedā' bito chse'ejle'e čhia' na' nic choso'ozenague' čhe xtižā'anā'. Čhoglaon čhega'aque' de que zjānape' dolā' catā' āžin žā šo'o fin čhe yežlyon'. ⁴⁹ Dižā' de'en babi'anā' bito bi'an de'e bia'azālaža'a. Xa'anā' bsele'e nada' na' le'enā' none' mendad bin' cheyalā' nia' na' bin' āgwsed āgwlo'ida' beñā'. ⁵⁰ Na' notā'ātezā beñā' yoso'ozenag čhe xtižā' Xa'anā' de'en none' mendad čo'elena' beñāčhān', āgwnežjue' yelā' mban zejlicāne čhega'aque'. De'e na'anā' čo'elena' le'e dižā' con can' bagwna Xa'anā'.

13*Gwdib Jeso'osān' ni'a disipl čhe' ca'*

¹ Na' ca' naquā Jeso'osān', bedote chaquene' čhe neto' chonlilažā'oto' le' yežlyo nga. Na' nezene' de que bachžin žā yeze'e yežlyo nga par yeyeje' gan' zo Xē'enā'. De'e na'anā' catā' ze'e za'alā lni pascon' blo'ichene' neto' can' lechguale chaquene' čheto'.

² Na' bač gwlo'o gwxiye'enā' xbabān' lo'o yičhja'aždao' Jod Iscariot xi'in Simonā' par āgwdie' Jeso'osān' lao na' beñā' contr čhe' ca'. ³ Na' neze Jeso'osān' de que Xē'enā' babene' par nič nape' le'ezełaogüe yelā' čhnabia' xen, na' nezene' de que gan' zo Dioz nan' gwze'e na' gan' zo Dioz nan' yeyeje'.

⁴ Na' lao chaoto' xše'enā' Jeso'osān' gwzože'e na' gwcua'a xadoñ čhe'enā' na' gwxi'e to lachā' na' bcheje'en lsine'enā'. ⁵ Nach gwxi'e nisān' gwde'en to lo'o šā' na' gwzolaogüe' gwdibe' ni'ato'onā' ca to mos. Na' bosbiže' ni'ato'onā' len lachān' de'e nchej lsine'enā'.

⁶ Na' catā' bžine' gan' čhi' Simon Bedān', Bedān' gože' le': —Xana' žāle' čhibo' ni'anā'?

⁷ Na' gož Jeso'osān' le': —De'e nga chona' cabi čejni'ido'on nā'a, pero gwyejni'ido'on tela.

⁸ Na' gož Bedān' le': —Le' cuat čhibo' ni'anā'.

Na' Jeso'osān' gože'ene': —Šā cui ga'a čhiba' le' caguā leno' nada'anā'.

⁹ Na' Bedān' gože'ene': —Xana' caguā ni'a na'azān', sino doxencza'.

¹⁰ Nach gož Jeso'osān' le': —Benā' nošā' nazjā, ni'e na'azā čhyažje čhibe', la' banaquāczā doxen cuerp čhe'enā' xi'ilažā'. Ca naquā le'e žā, naquāczle xi'ilažā' la'añā'āczā caguā yoguā'āle.

¹¹ Jeso'osān' nezene' non' āgwde'le' lao na' beñā' contr čhe' ca', na' de'e na'anā' gwñe': “Caguā yoguā'āle nacle xi'ilažā'”, na' zejen caguā yoguā'oto' naquāto' beñā' la'aždao' xi'ilažā'.

¹² Na' catā' beyož gwdibe' ni'ato'onā', na' beyaz xadoñ čhe'enā' na' bebi'e de'e yoblā čho'a mesān'. Na' gože' neto': —čEčejni'ile bi zejen de'en babena' len le'e? ¹³ De'e nga zejen. Le'e nsi'ile nada' Maestr na' Xanle, na' güenczān'

nale *cheda'* can' naca'. ¹⁴ Na' nada' naca' *Xan*len' na' nactia' Maestr *chelen'* bagwdiba' ni'alen' ca to mos, de'e na'anə le'e *lecza'* cheyalə' gaquəlen ljuəzjle ca to mos. ¹⁵ Bagwdiba' ni'alen' parza' nič gwlo'ida' le'e de que cheyalə' gonle can' babena'anə'. ¹⁶ De'e li əchnia' le'e notə'ətezə mos bito naque' blaoch ca xane'enə', ni ben' chej mendadən' cui naque' blaoch ca ben' chselə' le'. ¹⁷ Šə chejni'ile de'e quinga na' gonle can' nia'anə', nachən' sole mbalaz.

¹⁸ Caguə nia' ca' che yogua'əlen'. Nada' nezdə' nac naquə yichjda' aždəo' le'e bagwleja' par nacle disipl čhia'. Pero na' gwleja' le'e par nič gaquə complir can' na Xtižə' Diozən' de'en nyojən nan: "Be'en gwdaolena' txen bablej bšošje' nada'." ¹⁹ Nada' əchnia' le'e de'e nga na'a antslə' cuiṇə' gaquən, par nič cata' gaquən šejle'ele de que nada' naca' ben' bagwnia' le'e. ²⁰ De'e li əchnia' le'e ben' cho'eləo' notə'ətezə benə' əchselə'a, nada'anə' cho'elaogüe'e. Na' ben' cho'eləo' nada', ben' əbsele' nada' na'anə' cho'elaogüe'e.

Jeso'osən' be'e dižə' che ben' naquən əgwde le' lao na' beṇə' ca' chəsə'əgue'i le'

²¹ Beyož gwna Jeso'osən' de'e ca' bachžaglaogüe' lo'o yichjla'aždaogüe'enə', na' gwne' clar: —De'e li əchnia' le'e de que to le'e əgwdele nada' lao na' beṇə' ca' chəsə'əgue'i nada'.

²² Nach neto' bgüia' lao ljuəzjto' chaqueto' noto' chein' ne' ca'. ²³ Nach nada' chi'a cuite'enə' *cheda'* chacchgüeine' čhia'. ²⁴ Na' Bedən' bene' señy len nada' par nič gwnabda' Jeso'osən' no chein' gwne' ca'. ²⁵ Nach bgüiga' bao goža' Jeso'osən': —Xana', čnon'?

²⁶ Nach gož Jeso'osən' nada': —Be'en əgwnežjua' to pedas yetən' cata' bablo'oja'an xojən', le'enə'.

Nach blo'oje' yetən' xojən' na' bnežjue'en Jod Iscariot xi'in Simonṇə'. ²⁷ Na' beyož bnežjue' Jodən' yetən' le'e gwyo'o gwyazte Satanasən' de'en chnabia' de xio' ca' lo'o yichjla'aždao' Jodən'. Nach Jeso'osən' gože'ene': —De'en gono'onə' benən lğüegwza.

²⁸ Na' ni to neto' ža'ato'onə' cui gwyejni'ito' bixchen' gože' le' ca'. ²⁹ Jodən' noxe'e bols mechən' na' de'e na'anə' baləto' bento' xbab de que Jeso'osən' gože' le' šejə' žjəxi'e de'e chyažjeto' lao llin' o de que cheyalə' əgwnežjue' lata' mechən' beṇə' yašə' ca'. ³⁰ Na' cata' beyož gwdao Jodən' pedas yetən' de'en bnežjw Jeso'osən' le', le'e bchojte'. Na' ca orən' bagol.

To de'e cobə de'e non Jeso'osən' mendad goncho

³¹ Na' gwde bchoj Jodən' Jeso'osən' gwne': —Diozən' bsele'e nada' golja' benəč, na' na'a so'ot beṇə' nada' na' gone' nada' yelə' bala'an xen. Na' *lecza'* Diozən' si'e yelə' bala'an xen ca de'en gaquə čhia'. ³² Na' ca naquə Diozən' si'e yelə' bala'an ca de'en gaquə čhia', *lecza'* le'enə' gone' nada' yelə' bala'an, na' le'e solaote gone' nada' yelə' bala'anṇə' na'a. ³³ Xi'indaogua'a, yešlož da'ogan' soa' len le'e. Na' yeyiljle nada', na' can' goža' beṇə' blao che nasyon Izrael chechon', *lecza'* can' əchnia' le'e na'a de que gan' yeya'a bito gaquə sa'alenle nada'. ³⁴ Nach to de'e cobə chona' mendad gonle, de que gaque che ljuəzjle tole yetole can' chacda' chele, *lecza'* can' le'e gaque che ljuəzjle tole yetole. ³⁵ Na' yesa'əneze yogua'əloł beṇə' de que nacle disipl čhia' šə gaquele che ljuəzjle tole yetole.

Jeso'osən' ne' de que Bedən' cui chebe' de que nombi'ene'

³⁶ Na' gož Bedən' le': —Xana', čgan' yeyejo'?

Na' gož Jeso'osən' le': —Gan' yeya'a bito gaquə denaogo' nada' na'a, pero tela denaogo'.

³⁷ Na' gož Bedən' le': —Xana' ħbixchen' cui gaquə denaogua' le' na'a? Gwsanlažə' cuina' so'ot beṇə' nada' laogüe de'en chacda' ħchio' šə chonclən byen.

³⁸ Na' gož Jeso'osən' le': —ĸEchacdo' gwsanlažə' cuino' so'ot beṇə' le' laogüe de'en chacdo' ħchia'? De'e ĸi əchnia' le' de que bito cuež lecon' antslə ze'e gaquə šon las cui ħĸhebo' de que nombi'o nada'.

14

Beṇə' ca' ħso'onĸilažə' Jesocristən' zjənombi'e Xe' Diozən'

¹ Bito gaquəžejlažə'əle ħchia' nada'. Leḡonĸilažə' Diozən', na' leczə leḡonĸilažə' nada'. ² Gan' zo Xa' Diozən' naquən ca to yo'o xen gan' ža' de'e zan cuart. Gwnia' le' žalə' cui bi cuart de par le'e. Na' yeya'a žjəyeyenšaogua'a cuart par to tole. ³ Na' catə'an babeyož jəyeyenšaogua'a cuart ħhelen', yida' yetš'i' na' yeĸi'a le'e soĸo txen par niĸ gan' soa' na' so le'e. ⁴ Banombi'ale gan' yeya'a na' baṇezele naquən' gonle par yeda'acle na'.

⁵ Na' gož Tomasən' le': —Xanto', bito nezetə' gan' yeyejo'. ĸNa' nacxa gaquən' ənezetə' nac gonto' par yelə'ato' na'?

⁶ Jeso'osən' gože'ene': —De'en cheyalə' gonle gonĸilažə'əle nada' par niĸ yežinle gan' zo Xa'anə'. Nada' nezdə' na' ħzejni'ida' yoguə'əloĸ de'en naquə de'e ĸi ħe Diozən'. Na' nada' nsa'a yelə' mban zejlicəne par beṇə' ca' ħso'onĸilažə' nada'. Ni to cono yežin gan' zo Xa'anə' šə cui gonĸilažə'e nada'.

⁷ Žalə' nombi'ayanə'əle nada', lente Xa'anə' nombi'ale žalə' ca'. Na' dezd ṇa'a banombi'alene' na' bable'ilene'.

⁸ Na' gož Lipən' le': —Ben par niĸ le'ito' Xa'onə'. Lezən de'en chene'eto'.

⁹ Jeso'osən' gože'ene': —Lip, šša xen bagwzoa' len le'e, ĸana' cuinə' gombi'o nada'anə'? Notə'ətezə beṇə' bable'i nada' lenczə Xa'anə' bable'ine'. ĸBixchen' nao' gona' par niĸ le'ile Xa'anə'? ¹⁰ ĸEcu' chejli'o de que nada' zoa' len Xa'anə' na' Xa'anə' zoe' len nada'? Dižə' quinga ĸo'a nada', cagua ĸo'an de'e bia'azəlažə'anə'. Xa' na'anə' zoe' len nada' na' len' chone' par niĸ ĸo'a dižə' quinga na' chona' yoguə'əloĸ de'en chona'. ¹¹ Le'e šejle' ħchia' ca de'en ənia' de que zoa' len Xa'anə' na' le' zoe' len nada'. Na' šə cui chejle'ele xtiza'anə', le'e šejle' ħchia' por ni ħe de'en bable'ile chona'anə'. ¹² De'e ĸi əchnia' le'e ben' chonĸilažə' nada', ca de'e ca' chona' leczə gone'en. Na' de'e zaquə'əĸ ca de'e ca' gone' ħhedə' nada' yeya'a gan' zo Xa'anə'. ¹³ Na' yoguə' de'e əṇabele Xa'anə' gona' laogüe de'en chonĸilažə'əle nada', gona'an par niĸ Xa'anə' si'e yelə' bala'an ca de'en gona' naca' Xi'ine'. ¹⁴ Bitə'ətezə de'e əṇabele gona' por ni ħe de'en chonĸilažə'əle nada', nada' gona'an.

Jeso'osən' bene' lyebe sele'e Spirit ħe Diozən'

¹⁵ Šə ħaquele ħchia' cheyalə' gonle can' nona' mendad gonle. ¹⁶ Na' ṇabda' Xa'anə' par əsele'e Spirit ħe'enə' len le'e par gaquəlenən le'e can' babena' nada'. Na' son len le'e zejlicəne. Spirit ħe Diozən' əḡwzejni'in le'e de'en naquə de'e ĸi. ¹⁷ Beṇə' ca' cui zjənombia' Diozən' bito ħso'elaogüe'e Spiritən' ħhedə' bito ħesə'əle'ine'en na' nic zjənombi'en. Pero le'e nombi'alən ħhedə' zon len le'e ṇa'a na' gwžin ža catə' son lo'o la'ažda'olen'. ¹⁸ Bitə' gwcuə'əṇa'a le'e ca gozebə. Gūida' yeto nga gan' zole. ¹⁹ Na' yešlož da'ozə na' beṇə' ca' cui zjənombia' Diozən' cabiĸ yesə'əle'ine' nada', pero le'e gwle'ile nada'. Na' laogüe de'en zoa' nsa'a yelə' mban zejlicəne ħe beṇə' ħso'onĸilažə' nada', de'e na'anə' le'e sole zejlicəne. ²⁰ Na' catə' əžin ža la' Spirit ħe Diozən' son lo'o la'ažda'olen' canan' ənezele de que nada' zoa' len Xa'anə', na' le'e zole len nada',

na' nada' zoa' len le'e. ²¹ Ben' neze can' nona' mendad na' chone' can' ani'anə', bena'an chaque chia'. Na' ben' chaque chia' leczə chaque Xa'anə' che', na' gwzochcza' gaquəda' che' na' gona' par niçh əneze' de que zotezə zoa' len le'.

²² Na' Jodən' pero caguə Jod Iscariotən' gože' le': —Xanto' çbixçhen' gono' par niçh neto' le'icheto' le' na' cui gono' par niçh beṇə' yoblə yesə'əle'ichene' le'?

²³ Na' Jeso'osən' gože'ene': —Le'e chaquele chia' chzenagle xtiža'anə'. Na' Xa'anə' leczə chaquene' chele na' neto' desoto' len le'e. ²⁴ Beṇə' ca' cui chsa'aque chia' bito choso'ozenague' xtiža'anə'. Dižə' de'en chenele ənia' le'e, caguə cho'an de'e bia'azəlaža'anə', sino cho'a dižə' de'en chene'e Xa'anə' ben' absele' nada'.

²⁵ De'e quinga bagwnia' le'e žlac ne'e zoa' len le'e. ²⁶ Na' Xa'anə' əsele'e Spirit che'enə' son lo'o la'aždao' le'e chonlilaža'əle nada' niçh gaquəlenən le'e. Na' Spiritən' əgwzejni'in le'e yoguə'əlo' de'en cheyalə' ənezele na' gonən ca žjəyeza'alaza'əle yoguə'əlo' de'en bagwnia' le'e.

²⁷ Chona' par niçh so cuezle binlo len xbab de'en yo'o lo'o yichjla'ažda'olen' ca binlo zo chbeza' len xbab de'en yo'o lo'o yichjla'aždaogua'anə'. Nada' chona' ca zo chbezachle binlo len xbab de'en yo'o lo'o yichjla'ažda'olen' cle ca chso'on beṇəçhən' par so cuezle binlo len xbab de'en yo'o lo'o yichjla'ažda'olen'. Bito gaquəžejlaža'əle, nic žeble. ²⁸ Babenele can' bagwnia' de que yeya'a gan' zo Xa'anə', na' de que yida' de'e yoblə gan' zolen'. Žalə' chaquele chia' can' cheyalə'anə', gobeile de'en yeya'a, çhedə' Xa'anə' zaquə'əche' ca nada'. ²⁹ Na'a ža bagwnia' le'e de'e ca' antslə cuiṇə' sa'aquən par niçh catə' sa'aquən šejle'ele de que naca' ben' bagwnia' le'e.

³⁰ Bitoch gua'a dižə' zan len le'e çhedə' baza' gwxiye' de'en chnabia' beṇə' ca' cui chso'onlilaža' nada' na' tiłəlenən nada'. Pero bito soin nada'. ³¹ Chona' con can' non Xa'anə' mendad par niçh əneze beṇəçhən' de que çacda' che Xa'anə'. Na'a ža lešo'o šejəchcho.

15

Jeso'osən' gwxaquə'əlebene' ca to yag oba

¹ Nada' gwxaquə'əlebəda' ca to yag oba de'en naquə le'ezelaogüe yag zaque'e. Xa'anə' gwxaquə'əlebene' ca ben' chonš'i' yaguən'. ² Na' le'e chonlilaža'əle nada' gwxaquə'əlebele ca xozə' yaguən'. To to xoze'e ca' cui bi frot chbian, chçhogue'en. Na' to to xoze'e ca' de'e çhasə'əbia frot, çpe'en par niçh chbiachən frot zanch. ³ Can' banaquə yichjla'ažda'olen' çhedə' chzenagle xtiža'anə' de'en babi'a len le'e. ⁴ Lesotezə leso len nada' par niçh nada' gaquə sotezə soa' len le'e. Ca che xozə' yag frotən', bito bi frot cuian to gwłazzen šə cui zon nca'an le'e yaguən', can' naquən len le'e, bito gaquə gonle de'en çhazlažə' Diozən' šə cui sotezə sole len nada'.

⁵ De'e yoblə əhia' de que nada' gwxaquə'əlebəda' ca yag oban' na' le'e ca xoze'enə'. Notə'ətezle šə zotezə zole len nada' na' nada' zotezə zoa' len le'e, gonçgualə de'en çhazlažə' Diozən'. Pero cuiczə gac gonle de'en çhazlaže'enə' to gwłazle. ⁶ Beṇə' cui zotezə zo len nada' əhoje' ca'alə, ca che xozə' yag oban' de'e ca' chçhog ben' chonš'i' yaguən' na' çhasə'əbižən. Nach çtobe'en çhade'en yi' par çse'eyən.

⁷ Šə le'e zotezə zole len nada' na' šə yo'o yichjle xtiža'anə' do tyempte, bitə'ətezə de'e chene'ele ənable len orasyonṇə' de'e si'icizlenə'. ⁸ Yelə' bala'an çhzi' Xa'anə' catə'ən chonçgualə can' çhazlaže'enə', na' baçh chlo'ele de que chonlilaža'əle nada' na' chzenagle chia' can' cheyalə' gonle šə bachonçgualə

de'en chazlaže'enə'. ⁹ Ca Xa'anə' chaquene' chia', leczə ca' nada' bachacda' chele. Le'e so legon ca gacbe'ile de que chacda' chele. ¹⁰ Šə chonle can' nona' mendadən', nachən' gacbe'ile de que chacda' chele, ca nada' chona' can' non Xa'anə' mendadən' na' chacbe'ida' de que chaquene' chia'.

¹¹ Bagwnia' le'e ca' par ničh sole mbalaz ca mbalazən' zoa' nada'. Che'enda' sole mbalaz juisy. ¹² De'e nga chona' mendad gonle, gaquele che ljuežjle tole yetole can' chacda' chele. ¹³ Notono nla' beṇə' chaquene' che ljuežje' mazəchlə can' chaque ben' chsanlažə' cuine' so'ot beṇə' le' par gaquəlene' beṇə' migw che' ca'. ¹⁴ Le'e nacle migw chia' šə chonle can' nona' mendadən'. ¹⁵ Bitoch ənia' le'e mos chia' chedə' beṇə' zjənaquə mos bito zjənezene' bi chon xanga'aque'enə'. Bania' le' migw chia', chedə' yoguə'əlol de'e ca' babenda' gwna Xa'anə' babzejni'ida'an le'e. ¹⁶ Caguə le'e gwlejele nada' par naca' Xanle. Nada' bagwleja' le'e par chonlilažə'əle nada'. Na' chsela'a le'e par ničh šejchle gonchuale can' chazlažə' Xa'anə' na' caguə de'e te che de'e ca' gonlen'. Na' šə gonle can' chazlaže'enə', yoguə'əlol de'en ənabele Xa'anə' laogüe de'en chonlilažə'əle nada', gone'en. ¹⁷ De'e nga de'en chona' mendad gonle, de que gaquele che ljuežjle tole yetole.

Beṇə' ca' cui zjənombia' Diozən' chəsə'əgue'ine' beṇə' ca' choso'ozenag che Jeso'osən'

¹⁸ Bito yebanele de'en chəsə'əgue'i beṇə' ca' cui zjənombia' Diozən' le'e. Legon xbab de que zgua'atec nadan' besə'əgue'ine' antslə ca le'e. ¹⁹ Žalə' nacle txen len beṇə' ca' cui zjənombia' Diozən', gwsa'aque'ine' chele can' chsa'aque'ine' che beṇə' ca' zjənaque' txen. Nada' bagwleja' le'e par naole nada', na' bitoch nacle txen len beṇə' ca' cui zjənombia' Diozən', na' de'e na'anə' chəsə'əgue'ine' le'e. ²⁰ Le'e žjsa'alažə' de'en bagwnia' le'e: "Notə'ətezə mos bito naque' blaoch ca xane'enə'." Can' baboso'olagzejə bosə'olagzide' nada', leczə can' yoso'olagzejə yoso'olagzide' le'e. Žalə' bosə'ozenague' xtižə'anə', leczə gosə'əzenague' xtižə'alen'. ²¹ Na' yoguə' de'e ca' so'one' len le'e chedə' le'e chonlilažə'əle nada' na' lega'aque' bito zjənombi'e Xa'anə' ben' bselə' nada'.

²² Žalə' nada' cui bida', na' žalə' cui bia'a dižə' len lega'aque', bito zjənape' dolə' ca naquən' chəsə'əgue'ine' nada'. Na' na'a cuiczə bi de bi yoso'ode'ine' par yesə'əne' cui bi dolə' zjənape'. ²³ Ben' chgue'i nada', lenczə Xa' nan' chgue'ine'. ²⁴ Žalə' cui bena' entr lega'aque' miłagr de'e cuiṇə' gon ni to beṇə' yoblə, bito zjənape' dolə' ca naquən' chəsə'əgue'ine' nada'. Pero na'a babesə'əle'ine' de'e ca' chona' na' bia'aczə chəsə'əgue'ine' nada' na' len Xa'anə'. ²⁵ Pero na' chac ca' par ničh chac complir can' na Xtižə' Diozən' gan' nyojən nan: "Besə'əgue'ine' nada' sin cui bi de'e mal bena'."

²⁶ Bagwnia' le'e de que selə'a Spirit che Xa' Diozən' par gaquəlenən le'e na' par əgwzejni'in le'e de'en naquə de'e li. Spiritən' sa'an gan' zo Xa'anə' la' selə'an par güe'en xtižə'anə'. ²⁷ Na' leczə ca' le'e güe'ele xtižə'anə', chedə' bagwzole len nada' dezd catə'ən gwzoloa chyixjui'a xtižə' Xa' Diozən'.

16

¹ Bagwnia' le'e de'e ca' par ničh cui yebiguə'əle gosxanlə. ² Yesə'əbeje' le'e lo'o yo'odao' čhega'aque' ca'. Na' bazon əžin ža catə' notə'ətezə beṇə' se'enene' so'ote' le'e so'one' xbab yebei Diozən' lega'aque' de'en so'one' ca'. ³ So'one' ca' len le'e chedə' cui zjənombi'e Xa'anə' na' ni nada' cui zjənombi'e. ⁴ Na'

bagwnia' le'e ca' par niçh catə' əžin ža gac ca' žjəsa'alažə'əle de que bagwnia' le'e can' gaquən.

De'e chon Spirit che Diozən'

Catə'an gwleja' le'e par nacle disipl chia' bito gwnia' le'e yoguə' de'e ca' gac chele, chedə' gwnezdə' socha' len le'e. ⁵ Na' la'anə'əczə yeya'a na'a gan' zo Xa'anə' ben' əbselə' nada', ni tole cui chnabele nada' bi zejen de'en yeya'anə'. ⁶ Na' de'en bagwnia' le'e de'e ca' bachacchgüeile lo'o la'ažda'olen'. ⁷ Pero de'e li əchnia' le'e napən le'e cuent yeya'a, la' šə cui yeya'a Spirit che Diozən' de'en gaquəlen le'e bito yedəson lo'o la'ažda'olen'. Na' de'en yeya'anə' əselə'an len le'e. ⁸ Na' catə'əch yidə'an əgwzejni'in benəchən' de que zjənapə' dolə', əgwzejni'in lega'aque' de que naca' le'ezeलाogüe beṇə' güen, na' əgwzejni'in lega'aque' de que gatə' castigw zejlicane che notə'ətezə beṇə' cui choso'ozenag chia'. ⁹ Egwzejni'in lega'aque' de que zjənapə' dolə' de'en cui chso'onlilažə'e nada'. ¹⁰ Egwzejni'in lega'aque' de que naca' le'ezeलाogüe beṇə' güen chedə' yeya'a gan' zo Xa'anə' na' bitoch le'ile nada'. ¹¹ Na' əgwzejni'in lega'aque' de que gatə' castigw zejlicane che notə'ətezə beṇə' cui choso'ozenag chia', chedə' gwxiye' de'en chnabia' beṇə' ca' cui zjənombia' Diozən' banchoğlaon chei de que si'in castigw zejlicane.

¹² Nedeç de'e zan de'e əṇia' le'e, pero zdebə naquən na'a par šejni'ilen. ¹³ Pero catə' yedəso Spirit che Diozən' lo'o la'ažda'olen' par əgwzejni'in le'e de'en naquə de'e li, əgwseḍ əgwlo'in le'e yoguə'əloł de'en cheyalə' ənezele chia' nada'. Bito güe'en dižə' de'e bia'azəlažə'i sino güe'en bitə'ətezə dižə' de'en chzene Xa'anə' len na' chixjue'in le'e biquə' de'e ze'e za'ac. ¹⁴ Goṇən nada' yełə' bala'an, chedə' əgwzejni'in le'e chia' nada'. ¹⁵ Xa'anə' babene' ca nezdə' yoguə'əloł de'en nezene' na' de'e na'anə' gwnia' de que Spirit che'enə' əgwzejni'in le'e de'e ca' nezdə'.

Jeso'osən' gože' disipl che' ca' de que nite' trist to tyemp dao' na' techlə yesyə'əbeine'

¹⁶ Yeto tyemp dao' le'e bitoch le'ile nada'. Na' techlə yeto tyemp dao' yoblə na' yežle'ile nada' nach yeya'a gan' zo Xa'anə'.

¹⁷ Na' bałə neto' disipl che' gož ljuəžjto': —¿Bi zejen de'e nga che'e chio'o de que yeto tyemp da'ozə na' bitoch le'ichone' na' de que techlə yeto tyemp dao' yoblə na' yežle'ichone'? ¿Na' bi zejen de'en ne' yeyeje' gan' zo Xe'enə'? ¹⁸ ¿Bi zejen de'en ne' yeto tyemp da'ozə ža? Cuili bixchen' ne' ca'.

¹⁹ Na' gocbe'i Jeso'osən' de que chene'eto' nabeto'one' bi zejennə', na' gože' neto': —¿Ede'e ngan' de'en chnabe ljuəžjle? ¿Echene'ele ənezele bi zejen ca de'en gwnia' le'e de que yeto tyemp da'ozə na' bitoch le'ile nada', na' techlə yeto tyemp dao' yoblə na' yežle'ile nada'? ²⁰ De'e li chnia' le'e de que bazon cuežle na' yegüine'ele na' beṇə' ca' cui zjənombia' Diozən' yesyə'əbeine'. Yeyaša'əlažə'əle pero con to tyemp da'ozən' na' techlə yebeile. ²¹ Šə catə' chzan to no'olə, chžaglaogüe' lao chaque' bes che yełə' sannə'. Pero na' catə' bagoljə bda'onə' bitoch chone' xbab che de'en bžaglaogüe'enə' de'e tant chebeine' de que bagoljə yeto benəch yežlyo nga. ²² Leczə can' len le'e, na'a sole trist, pero catə' yežagcho de'e yoblə cana' yebeile lo'o la'ažda'olen'. Na' ni to cono yeca'a yełə' chebei çhelen'.

²³ Na' catə' babžin ža soa' gan' zo Xa'anə' de'e yoblə bito yažjele bi ənable gona' par le'e. De'e li əchnia' le'e bitə'ətezə de'e ənabele Xa'anə' laogüe de'en chonlilažə'əle nada', gone'en par le'e. ²⁴ Xte na'a cuiczə bi ne'e nabele Xa'anə' ye'elene' de que chnablen por ni che de'en chonlilažə'əle nada'. Na' na'a lenabe

Ḫa'anə' bi de'en ə̀nabelene' ye'elene' ca', na' gone' can' ə̀nabelene' par niḅ sole mbalaz juisy.

Jesocrisən' babene' par niḅ gwxiye'enə' cuich n̄abia'an chio'o

²⁵ De'e zan de'e ca' bagwnia' le'e babzejni'ida'an len jempl. Ežin žan' catə' bitoch ə̀gwzejni'ida' le'e len jempl sino clar chixjue'ida' le'e che Ḫa'anə'. ²⁶ Na' catə' babžin ža soa' gan' zo Ḫa'anə' de'e yoblə, cana'ach ə̀nabele Ḫa'anə' bi de'en ə̀nabelene' ye'elene' de que chnablen por ni che de'en chonlilažə'əle nada'. Na' bito ə̀nia' le'e de que nada' n̄aba' lao Ḫa'anə' par niḅ gaquəlene' le'e. ²⁷ Cuincəḅ Ḫa'anə' chaquene' chele por ni che de'en bachaquele chia' na' de'en bachejle'ele de que gwza'a gan' zoe'enə'. ²⁸ Gan' zo Ḫa'anə' gwza'a babida' yežlyo nga. Na' na'a yeza'a yežlyo nga na' yeya'a gan' zo Ḫa'anə'.

²⁹ Na' neto' disipl che' gožto'one': —Na'a cho'o dižə'an clar. Bito cho'o dižə' len jempl de'e cui chejni'ito'. ³⁰ Na' chacbe'ito' de que než nle'ido' xbab che beḅaḅən'. Bito chyažjdo' no ə̀na le' bin' chse'ene'ene' yesə'ənežene'. De'e na'anə' chejle'eto' de que gwza'o gan' zo Diozən'.

³¹ Na' gwna Jeso'osən' neto': —ĴEna'a chejle'ele ža? ³² Gwžin or na' n̄a'a baza'an catə' gasə'əlasle. To tole ca'ale xnež che chele na' ə̀gwcuə'anle toza'. Pero caguə zoa' toza'anə' chedə' Ḫa'anə' zoe' len nada'. ³³ Bagwnia' le'e ca' par niḅ so cuezle binlo len xbab de'e yo'o lo'o yichjla'ažda'olen' laogüe de'en chonlilažə'əle nada'. Yežlyo nga chi' saquə'əle, pero bito žeble, nada' babena' par niḅ gwxiye'enə' cuich n̄abia'an le'e.

17

Jeso'osən' bene' orasyon par niḅ gaquəlen Diozən' disipl che' ca'

¹ Gwde gwna Jeso'osən' ca', bgüie' yobalə na' gwne': —Ḫa', babžin or par gaquə chia' can' babžio' bia' gaquə. Beḅ nada' yelə bala'an par niḅ leczə ca' nada' gona' le' yelə' bala'an, nadan' naca' Xi'ino'. ² Babeno' nada' yelə' chnabia' lao yoguə' beḅaḅ par niḅ chnežjua' yelə' mban zejlicane che yoguə'əloḷ noquə' beḅə' ca' bagwlejo' par chso'onlilaže'e nada'. ³ Na' beḅə' ca' zjənapə yelə' mban zejlicanen' zjənombi'e le' ca tozon' zaco'o par güe'ela'oto', na' leczə zjənombi'e nada' Jesocris ben' ə̀bseḷo'onə'.

⁴ Babena' le' yelə' bala'an yežlyo nga ca de'en babeyož bena' yoguə'əloḷ de'en gwlo'o lao na'a gona'. ⁵ Na'a ža Ḫa', ben par niḅ yezi'a yelə' bala'an chia'anə' catə' yela'a gan' zo'onə' ca yelə' bala'an de'en gwdapa' cata'an gwzoa' len le' antslə ze'e xē yežlyo nga.

⁶ Bagwlejo' balə beḅaḅ par chso'onlilaže'e nada' na' bablo'iga'acda'ane' naquən' naquə yichjla'aždaogo'onə' na' naquən' chono'. Zjənaque' xi'ino', na' beno' par niḅ chso'onlilaže'e nada' na' chso'one' can' nono' mendadən'. ⁷ Na' bazjənežene' de que yoguə'əloḷ de'en chona' na' yoguə' dižə' de'en cho'a za'an che cuino'. ⁸ Babe'elena' lega'aque' dižə' de'en beno' mendad güe'elenga'aca'ane', na' bazjənonen' chega'aque'. Na' bachsa'acbe'ine' de que de'e liczə gwza'a gan' zo'onə', na' chse'ejle'e de que len' ə̀bseḷo'o nada'.

⁹ Chnabda' le' gaquəleno' lega'aque'. Caguə chnabda' le' gaquəleno' yoguə' beḅaḅən', sino gaquəleno' beḅə' ca' zjənaquə xi'ino', beḅə' ca' gwlejo' par chso'onlilaže'e nada'. ¹⁰ Na' yoguə' beḅə' ca' chso'onlilaže' nada' zjənaque' xi'ino'. Na' ca'aczən' naquən, notə'ətezə beḅə' zjənaquə xi'ino' leczə zjənaque' xi'ina'. Echzi'a yelə' bala'an de'en chso'onlilaže'e nada' na' de'en chso'one' bichlə de'en chso'one'enə'.

11 Na' na'a caguə socha' yežlyo ngan', pero beṇə' quinga ɳitə'acze' yežlyo nga. Nada' bazeza'a gan' zo'onə'. Xa', naco' le'ezeleogüe beṇə' la'aždao' xi'ilažə'. Na' ca naquə beṇə' ca' gwlejo' par chso'onlilaže'e nada', bcuasə' bcue'ejga'aque' len de'e malən' por yelə' chnabia' chio'onə'. Bcuasə' bcue'ejga'aque' len de'e malən' par niç əsa'aque' tozə len ljuēžjga'aque'enə' ca chio'o naccho tozə.

12 Bedote žlac zoa' len lega'aque' babcuasə' bcue'ejga'aca'ane' len de'e malən' por yelə' chnabia' chio'onə'. De'e na'anə' ni toga'aque' cui gwžiyai' sino tozə ben' banaquəczən cuiayi'e par niç gaquə complir can' na Xtizo'onə' de'en nyožən.

13 Na' na'a bazeza'a gan' zo'onə', na' cho'a dižə' quinga lao orasyonṇə' žlac ne'e zoa' yežlyo nga par niç lega'aque' ɳitə'əchgüe' mbalaz ca mbalazən' zoa' nada'. 14 Nada' babe'lenga'aca'ane' xtizo'onə'. Pero na' beṇə' ca' cui zjənombia' le' chsa'əgue'ine' beṇə' ca' chso'onlilažə' nada' por ni che de'en cuich zjənaque' txen len lega'aque', ca nada' cui naca' txen len beṇə' ca' cui zjənombia' le'. 15 Na' ca naquə beṇə' ca' chso'onlilažə' nada', caguə chṇabda' le' yeca'aga'aco'one' lao yežlyo ngan', sino chṇabda' le' par əgwcuasə' əgwcu'e'ejga'aco'one' len de'en chon gwxiye'enə'. 16 Bito zjənaque' txen len beṇə' ca' cui zjənombia' le' ca nada' cui naca' txen len beṇə' ca' cui zjənombia' le'. 17 Ben par niç beṇə' ca' chso'onlilažə' nada' so'on cuinga'aque' lažə' na'onə' laogüe de'en bazjənombi'e dižə' li chio'onə'. Yoguə'əlołte de'en babzejni'ido' lega'aque' naquən de'e li. 18 Len' bselo'o nada' yežlyo nga par chzejni'ida' beṇə'chan' dižə' li chio'onə', na' leczə ca' nada' bachsela'a lega'aque' par yoso'ozejni'ine' beṇə'chən' dižə' li chio'onə'. 19 Zoa' chon cuina' lažə' na'onə' chedə' chacda' che beṇə' ca' chso'onlilažə' nada'. Na' chona' ca' par niç lega'aque' so'on cuinga'aque' lažə' na'onə' laogüe de'en bazjənombi'e dižə' li chio'onə'.

20 Na' ca naquə chṇaba' gaquəleno' beṇə' ca', bito chṇaba' gaquəleno' lega'acze' sino leczə gaquəleno' beṇə' ca' so'onlilažə' nada' catə' əse'enene' dižə' de'en əsoe' beṇə' ca'. 21 Xa', ben par niç yoguə'əlole' əsa'aque' tozə len ljuēžjga'aque' ca' le' naco' tozə len nada' na' nada' naca' tozə len le'. Ben ca əsa'aque' tozə laogüe de'en zjəngode'e txen len chio'o, par niç beṇə' ca' cui zjənombia' le' se'ejle'e de que len' əbselo'o nada'. 22 Babeno' par niç chsa'acbe'i beṇə' de que noṇo' nada' yelə' bala'an, ca'aczən' chona' nada' par niç chsa'acbe'ine' de que chnežjua' lega'aque' yelə' bala'an. Na' chona' ca' par niç əsa'aque' tozə len ljuēžjga'aque' ca chio'o naccho tozə. 23 Lega'aque' zjəngode'e txen len nada' na' nada' ngoda'a txen len le' niç yoguə'əcho gaccho tozə na' ca' beṇə' ca' cui zjənombia' le' yesa'əneze' de que len' əbselo'o nada' na' de que chacdo' che beṇə' ca' zjəngodə' txen len nada' can' chacdo' chia'.

24 Xa', bachacdo' chia' antslə ze'e xe yežlyo nga. De'e na'anə' beṇə' nada' yelə' chey che'eni'nə'. Na' che'enda' de que beṇə' ca' bagwlejo' par chso'onlilaže'e nada' ɳite'e len nada' gan' so'anə' par niç yesa'əle'ine' yelə' chey che'eni' chia'anə'. 25 Xa', le' naco' le'ezeleogüe beṇə' güen, na' ca naquə beṇə' ca' cui chso'onlilažə' nada' bito zjənombi'e le', pero nada' nombi'a le' na' beṇə' ca' bagwlejo' par chso'onlilaže'e nada' bazjəneze' de que len' əbselo'o nada'. 26 Na' babena' par niç zjəneze' can' naquə yichjla'aždaogo'onə' na' can' chono', na' ne'e gonchca' ca yesa'əneze'. Chzejni'iga'acda'ane' can' naquə yichjla'aždaogo'onə' na' can' chono' par niç əsa'acbe'ine' de que chacdo' chega'aque' can' chacdo' chia' nada' na' par niç sotezə soa' len lega'aque'.

18

Jodan' bdie' Jeso'osən' lao na' soldad ca'

¹ Na' ca beyoż gwna Jeso'osən' de'e ca', neto' disipl che' gwza'ato' len le' gwyejto' šla'a yao Sedron gan' gota' to güert, na' gwyo'oto' len le'. ² Na' Jodan' ben' banaquən gone' Jeso'osən' lao na' beṇa' ca' chəsə'ague'i le' nombi'e güertən', chedə' zan las bagwyejto' len Jeso'osən' lo'o güertən'. ³ Na' bḫoz əblao ca' na' beṇa' fariseo ca' bosə'osele'e xonj soldad na' len xa'ag yo'odao' ca' zja'aclene' Jodan' par jəsə'əxene' Jeso'osən' lo'o güertən'. Zja'aque' gan' zo Jeso'osən' zjənoxe'e lintern, yi' yech na' spad. ⁴ Jeso'osən' banəzene' yoguə'əlo' de'en gaquə che', nach bchoje' jəšague' lega'aque' nach gože': —¿Non' cheyilje?

⁵ Na' gwse'ene': —Jeso'os beṇa' Nasaret.

Na' gož Jeso'osən' lega'aque': —Nada'anə'.

Na' len Jodan' lega'aque', ben' banaquən gone' Jeso'osən' lao na'aga'aque'enə'. ⁶ Na' cata' gože' lega'aque': “Nada'anə’”, le'e besyə'əbigua'əte' gosxanlə na' gosə'əbiḫe' gwsa'ate'e lao yon'. ⁷ Na' de'e yoblə gože' lega'aque': —¿Non' cheyilje?

Na' lega'aque' gosə'əze'ene': —Cheyiljo' Jeso'os beṇa' Nasaret.

⁸ Na' gwna Jeso'osən': —Bagwnia' le'e de que nada'anə'. Na' šə nandan' cheyilje, le'e güe' latjə žjəya'ac beṇa' quinga.

⁹ Gože' ca' par niḫ goc complir can' gwne' de que ni to beṇa' ca' bagwlej Diozan' par chso'onlilaže'ene' cui yesə'əbiayi'e. ¹⁰ Na' Simon Bedan' no'e to spad na' golje'en gwchogue' nag liḫa xmos beṇa' gwnabia' che bḫoz ca'. Na' mosən' le' Malco. ¹¹ Na' Jeso'osən' gože' Bedan': —Bego'o spad chio'onə' lo'o liže. ¿Echaquele gonle par niḫ cui chi' saca'a can' babsi' Xa'anə' xneze chi' saca'a?

Gosə'əche'e Jeso'osən' lao ben' le Anas

¹² Nach soldad ca' len capitan čega'aque'enə' na' zjəlen xa'ag yo'odao' che nasyon Izrael cheton' gosə'əzene' Jeso'osən' na' bosə'ocheje'ene'. ¹³ Na' gosə'əche'ene' zgua'atec lao Anas xta'obin' che Caifasən'. Caifasən' naquəche' bḫoz əblao che nasyon cheton' ca izən'. ¹⁴ Na' Caifas na'anə' babnežjue' beṇa' blao che nasyon Izrael cheton' consejon' de que napən lega'aque' cuent tozə ben' so'ote' lgua'a yesə'əbiayi' yogue'e len nasyon cheto'onə'.

Bedan' bito gwchebe' šə lene' Jeso'osən'

¹⁵ Simon Bedan' na' nada' jənaoto' Jeso'osən'. Na' nombia' bḫoz əblaonə' nada'. De'e na'anə' goc gwyo'a len Jeso'osən' chy'o'o che bḫoz əblaonə'. ¹⁶ Na' Bedan' bega'ane' cho'a puertən' fuerlə. Na' bechoja' na' be'elena' no'olən' chapə cho'a puertən' dižə', nach gwlo'o no'olən' Bedan' chedə' nombia' bḫoz əblaonə' nada'. ¹⁷ Nach no'olən' chapə cho'a puertən' gože' Bedan': —¿Ecagua leno' len' naco' disipl che be'enə'?

Na' gwne': —Bito lena' nada'.

¹⁸ Na' mos ca' na' xa'ag yo'odao' ca' bagosə'əbeque' yi' ya'alj chedə' chac zag. Na' zjəzeche' cho'a yi'inə' par chəsyə'əže'ine'. Na' len Bedan' zeche' len lega'aque' cho'a yi'inə' par cheže'ine'.

Gosə'əṇabene' Jeso'osən' che de'en chsed chlo'ine'

¹⁹ Na' bḫoz əblaonə' gwṇabene' Jeso'osən' che neto' disipl che' na' che de'en chsed chlo'ine'. ²⁰ Nach Jeso'osən' gože'ene': —Nada' zaquə'əlao babi'a dižə' len beṇa'chən'. Syempr babsed blo'ida' lo'o yo'odao' checho ca' na' leczə ca' lo'o yo'odao' əblaonə' gan' chəsə'əžag yogua' beṇa' Izrael gwlaž chechon'.

Bito bi bi dižə' ne'e gua'a bgašə'əzə. ²¹ ǀBixchen' chnabdo' nada'? Gwnabe beṇə' ca' bagwse'ene de'en babsed bablo'ida'. Lega'aque' zjənezene' bi dižə'an babe'elenga'aca'ane'.

²² Gwde gwna Jeso'osən' ca', to xə'ag yo'odao' beṇə' zechan' gwdape'e xague'enə', nach gože'ene': —ǀEca' choži'o xtižə' ben' naquə bχoz əblaonə'?

²³ Nach gož Jeso'osən' le': —Šə bi de'e mal bagwnia', be' dižə' che bi de'e malən'. Na' šə gwnia' de'e güen, ǀbixchen' chgapo'o nada'?

²⁴ Nach Anasən' bdie' Jeso'osən' ncheje' lao Caifasən' ben' naquəch bχoz əblaonə'.

De'e yoblə Bedən' bito gwchebe' šə lene' Jeso'osən'

²⁵ Na' Bedən' ne'e zeche' cho'a yi'inə' par cheže'ine' na' beṇə' ca' zjəzecha na' gosə'əze'ene': —ǀEcaguə leczə lenon' naco' disipl che be'enə'?

Na' bito gwchebe', na' gwne': —Bito lena' nada'.

²⁶ To xmos beṇə' gwnabia' che bχoz ca' naque' family che ben' əgwchog Bedən' nague', na' gože' Bedən': —ǀEcaguə zle'ida' le' len Jeso'osən' lo'o güertən'?

²⁷ Na' Bedən' de'e yoblə bito gwchebe', na' le'e gwchežte to lecw.

Gosə'əche'e Jeso'osən' lao Pilatən'

²⁸ Na' do che'eni'ilas bχoz əblao ca' gosə'əbeje' Jeso'osən' gan' zo Caifasən' na' gosə'əche'ene' gan' chon Pilatən' yelə' jostisən'. Na' lega'aque' bito gwso'e len Jeso'osən' gan' chon Pilatən' yelə' jostisən' chedə' segon costombr chega'aque' bito gaquə əsa'ogüe' de'e ca' gwso'one' par xšə' lni pascon' šə so'e lo'o yo'o che beṇə' ca' cui chəsə'ənao costombr chega'aque' ca'. ²⁹ De'e na'anə' Pilatən' bchoje' gan' nitə' beṇə' blao che nasyon Izrael cheton' na' gože' lega'aque': —ǀBi ben bengan'? ǀEde bi de'e chaole xya?

³⁰ Na' gwse'ene': —Žalə' bengə cui naque' beṇə' mal bito əgwdeto'one' lao na'onə'.

³¹ Na' gož Pilatən' lega'aque': —Le'e yeche'e na' le'e gon yelə' jostis che'ena' segon lei chelen'.

Na' beṇə' blao che nasyon Izrael cheton' gwse'ene': —Bito bi lsens cheto' de par no gotto'.

³² Ca goquən' goc complir can' gwna Jeso'osən' bzejni'ine' naquən' gaquə so'ote'ene'. ³³ Nach Pilatən' beyo'e gan' chone' yelə' jostisən', na' goxe' Jeso'osən' nach gože'ene': —ǀElen' naco' Rei che beṇə' Izrael ca'?

³⁴ Jeso'osən' gože'ene': —ǀEcon de'e babidzən yichjo'onə' nao' ca', o šə beṇə' yoblə gosə'əne' le' ca'anə'?

³⁵ Pilatən' gože'ene': —ǀEchacdo' naca' nada' beṇə' Izraelən'? Beṇə' gwlaž chio' ca' na' bχoz əblao chele can' boso'odie' le' lao na'a nga. ǀBi de'e xinjən' beno'?

³⁶ Nach Jeso'osən' gože'ene': —Nža'alə can' chnabia' nada' na' nža'alən' chəsə'ənabia' notə'ətezachlə beṇə' gwnabia'. Yelə' gwnabia' chi'anə' bito za'an che beṇə' ža' yežlyo nga. Žalə' za'an che beṇə' ža' yežlyo nga beṇə' ca' chəsə'ənabi'anə' yesə'ədile' par nič cui gaca' lao na' beṇə' Izrael gwlaž chia' quinga. Pero yelə' chnabia' chia'anə' bito za'an che yežlyo nga.

³⁷ Nach gož Pilatən' le': —ǀEna' rein' naco'?

Na' gwna Jeso'osən': —De'e lin' bagwnao' de que nada' naca' rei. Babida' yežlyo nga golja' par nič nabi'a na' par nič əgwzejni'ida' benəchən' dižə' li che Diozən'. Beṇə' ca' bachoso'ozenag che dižə' li che Diozən' leczə choso'ozenagə' chia'.

³⁸ Nach gož Pilatən' le': —Cuili bin' naquə dižə' līn'.

Gosə'əchoglaogüe'en so'ote' Jeso'osən'

Na' beyož gwna Pilatən' ca' bchoje' yetši'i gan' nita' beṇə' blao che nasyon Izrael cheton' na' gože' lega'aque': —Bito bi chla'alaon šə bi dolə'anə' napə benga. ³⁹ Na' ca naquə de costombr chele de que to beṇə' presən' gwsana' lao līn pascon', čəchene'ele gwsana' benga naquə Rei che le'e beṇə' Izrael?

⁴⁰ Nach gwso'osye'e gosə'əne': —Bito gwsano' be'ena'. Barrabas na' əgwsano'.

Len Barrabasən' naque' to beṇə' bguan.

19

¹ Nach ben Pilatən' mendad gosə'əyine' Jeso'osən'. ² Na' soldad ca' gwso'one' to coron de xis yešə' na' bosə'ožine'en yichje'ena'. Na' bosə'ogucue'ene' to clas lachə' morad ca de'en chəsə'əčhin rei ca'. ³ Na' gwo'onene' borl gosə'əne': —Biba Rei che beṇə' Izrael.

Na' gosə'əgape'e xague'ena'.

⁴ Nach Pilatən' bchoje' chyo'onə' de'e yoblə na' gože' beṇə' Izrael ca' ža'anə': —Na'a cueja'ane' par nič ənezele ca xyan' de'en chaole che', ni to de'e xinj cui cheželda' šə bin' none'.

⁵ Na' bchoj Jeso'osən' chyo'onə', zo coron de yešə'anə' yichje'ena', na' nyaze' lachə' moradən'. Na' gož Pilatən' lega'aque': —Le'e ggüia, nga zecha be'ena'.

⁶ Na' bχoz əblao ca' na' xə'ag yo'odao' ca', catə' besə'ələ'ine' le' gwso'osye'e gosə'əne': —jBde'e le'e yag corozən'! jBde'e le'e yag corozən'!

Pilatən' gože' lega'aque': —Le'e leče'e na' legwde'e le'e yag corozən' čhedə' ca xyan' chaole che', ni to de'e xinj cui cheželda' šə bin' none'.

⁷ Na' gwse' beṇə' blao che nasyon Izrael cheton' le': —Segon lei cheto' de'en de cheyalə' gotchone' čhedə' ne' naque' xi'īn Dioz la'anə'əczə naque' con to benachzə.

⁸ Bachžeb Pilatən' ca de'en bachaquən', na' catə' benene' gosə'əne' ca' che Jeso'osən' nachlə bžebache'. ⁹ Nach beyo'o Pilatən' len Jeso'osən' de'e yoblə gan' chone' yelə' jostisən'. Na' gože' Jeso'osən': —čGa beṇə' le'?

Pero Jeso'osən' bito boži'e xtiže'ena'.

¹⁰ Nach Pilatən' gože'ene': —čEcuī choži'o xtiža'anə'? čEcuī nezdə'onə' nada' napa' yelə' chnabia' par gwsana' le' na' napa' yelə' chnabia' par əgwda' le' le'e yag corozən'?

¹¹ Jeso'osən' gože'ene': —Bito bi yelə' gwnabia' napo' len nada' žalə' Diozən' cui none'en le'. Na' ben' əbde nada' lao na'onə' dolə' xench nape' cle ca le'.

¹² Nach gwdiljažə' Pilatən' naclə gone' əgwsane'ene'. Pero beṇə' blao che nasyon Izrael cheton' gwso'osye'e gosə'əne': —Šə əgwsano' benga, contr Rei Sesar nan' gono' šə ca'. Notə'atezə beṇə' ne' de que naque' rei, contr Rei Sesarən' chone'.

¹³⁻¹⁴ Nach Pilatən' beyož benene' de'en əgwse' beṇə' ca' le', gwleje' Jeso'osən' chyo'onə'. Na' leczə bchoj le' chyo'onə' gan' nao yej, gan' nzi'in dižə' ebreo Gabata. Na' gwchi'e gan' chbi'e catə' chone' yelə' jostisən'. Nach gože' beṇə' blao che nasyon Izrael cheton': —Nga zo Rei chelen'.

Na' do gobiž catə'an gože' lega'aque' ca', na' beṇə' Izrael gwlaž cheto' ca' choso'osi'ini'e par līn pascon' žanə'.

¹⁵ Nach lega'aque' gwso'osye'e gosə'əne': —jGwcue'e! jBde'e le'e yag corozən'!

Na' gož Pilatən' lega'aque': —čErei chele nga gona' mendad yoso'ode'ene' le'e yag corozən'?

Nach b̄xoz əblao ca' gwse'ene': —Caguə rei çheto' benga. Tozə Sesarən' naque' rei çheto'.

¹⁶ Ca' goquan' bdie' Jeso'osən' lao na'aga'aque'enə' par te'e le'e yag corozən'.

Boso'ode'e Jeso'osən' le'e yag corozən'

¹⁷ Nach gosə'əche'e Jeso'osən' fuerlə syodan' gan' boso'oda' soldad ca' le' le'e yag corozən'. Latjən' nzi'in Golgota dižə' ebreo, zejen dižə' latjə che yichj beṇə' guat. Na' gwze'e zde' noa' coroz che'enə'. ¹⁸ Na' Golgota na' boso'ode'ene' le'e yag corozən'. Na' len yechopə beṇə' yoblə boso'ode'e le'e yechopə yag coroz t̄güejə' cuite'enə', Jeso'osən' gwyo'e gwchol. ¹⁹ Na' Pilatən' bene' mendad byoj to chopə letr de'e gwda' yichj yag coroz che Jeso'osən', boso'ozoje'en nan: "Jeso'os beṇə' Nasaret, Rei che beṇə' Izrael." ²⁰ Boso'ozoje'en dižə' ebreo, dižə' griego na' dižə' latin. Na' zan beṇə' Izrael gwlaž cheton' boso'olabe' de'enə' byojən', chedə' gan' gwda' Jeso'osən' le'e yag corozən' naquan galə'əzə syodan'. ²¹ De'e na'anə' beṇə' ca' zjənaquə b̄xoz əblao che nasyon Izrael cheton' gwse'e Pilatən': —Bšə'an par niç cui nan de que naque' rei che neto' beṇə' Izrael, sino nan de que len' gwne' naque' rei cheto'.

²² Na' Pilatən' gwne': —De'en bena' mendad boso'ozoje', banyojənnə'.

²³ Nach soldad ca', beyož boso'ode'e Jeso'osən' le'e yag corozən' gosə'əzi'e xalane'e ca' na' gwso'one'en taplə, to part ḡuejan gosə'əzi'e. Na' leczə ca' gosə'əzi'e xe'enə' de'en naquə ca' xadon cha'o. Pero lachə'ənə' naquan de to golizə. Bito bi dia nyazan. ²⁴ Na' gwse'e ljuežje': —Bito əgwzoxjchon' sino gonchon rif. Yešc no yechelən.

Na' gwso'one' ca' par niç goc can' nyoj Xtižə' Diozən' gan' nan: "Yosyo'ole'e xalana'anə' entr lega'aque' na' so'one'en rif." Na' ca'anə' gwso'on soldad ca'.

²⁵ Na' cuit coroz che Jeso'osən' zecha xne'enə' len beṇə' bile'enə' na' len Maria no'ol che Cleofas na' Maria beṇə' Magdala. ²⁶ Na' catə' Jeso'osən' ble'ine' zecha xne'enə' galə'əzə na' nada' zecha' cuite'enə', nach gože'ene': —Naogüe, benga gaque' ca xi'ino'.

²⁷ Nach gože' nada': —Bži'ilažə' xna'a nga ca xna'onə'.

Na' lao žanə' nada' gwcua'ane' bena'ane' ca family çhia'acza'.

Can' goquə catə'an got Jeso'osən'

²⁸ Jeso'osən' nezene' de que baç goc yoguə'əloł de'en cheyalə' gaquan. Na' par niç gaquə can' na Xtižə' Diozən' de'enə' nyojan gwne': —Chbilda' nis.

²⁹ Na' de latə' bino corrient de'e yožə to lo'o xguaguə dao'. Na' to beṇə' bosgaže'e to sponj len bino corrientən' na' bosšine'en cho'a Jeso'osən' bso'en to lao xis de'en ne' isopo. ³⁰ Na' beyož gwxop Jeso'osən' bino corrientən' gwne': —Baç goc yoguə'əloł de'en cheyalə' gaquan'.

Na' b̄chequə' yichje'enə' gote'.

To soldadən' gode'e lanz cuit le'e Jeso'osən'

³¹ Nach beṇə' blao che nasyon Izrael cheton' gosə'ənbene' Pilatən' gone' mendad yesə'əyišjw soldad ca' ni'a beṇə' ca' zjəda' le'e yag corozən' niç yob sa'ate' par niç ca' yesyə'əque'e lega'aque'. Bito gwse'enene' yesyə'əga'an cuerp ca' le'e yag corozən' xte yeteyo, chedə' yeteyon' naquan ža dezcanz na' ža l̄ni xen. ³² Nach Pilatən' bene' mendad ja'ac soldad ca' na' gosə'əyišjue' chopə la'a ni'a ben' boso'ode'e to šla'a cuit Jeso'osən'. Na' leczə ca' gwso'one' len ben' gwda' le'e yag corozən' cuite'en yešla'a. ³³ Na' catə' besə'əžine' gan' da' Jeso'osən', besə'əle'ine' bagote', na' bito gosə'əyišjue' ni'e ca'.

³⁴ Pero to soldadən' gode'e lanzən' cuit le'e Jeso'osən', na' le'e bchojten chen len nis. ³⁵ Nada' ble'ida' can' goquan' na' nezdə' de que dižə' de'en cho'a

naquən de'e li. Na' cho'a dižə'nə' par nič lenczə le'e šejle'ele. ³⁶ Goc ca' par nič goc complir can' na Xtižə' Diozən' de'en nyojən gan' nan: "Ni to žit yo'e cui yesə'əyišjue'." ³⁷ Na' len yeto gan' nan: "Yoso'ogüie' ben' əgwsa'ade'e lanzən'."

Boso'ocuaše'e Jeso'osən'

³⁸ Na' gwde na' Jwse beṇə' Arimatea gwnabene' Pilatən' gwnežjue' lsens yeque'e cuerp che Jeso'osən'. Na' Pilatən' be'e lsens. Nach gwyej Jwsen' na' beque'e cuerpən'. Jwsen' naque' disipl che Jeso'osən' pero bgašə'əzə por ni che bžebe' beṇə' blao che nasyon Izrael četon'. ³⁹ Na' leczə gwyejlen Nicodemon' le' ben' bagwyej antslə gan' zo Jeso'osən' to še'elə. Na' Nicodemon' no'e to de'e chlā' zix de'e none' len mirra na' aloes, ca do tapa robən'. ⁴⁰ Na' boso'ochele' cuerp che Jeso'osən' sint de lachə' na' len de'en chlā' zixən', ca costombr che neto' beṇə' Izrael catə'an chcuasə'əto' beṇə' guat. ⁴¹ Na' galə'əzə gan' gwsote' Jeso'osən' le'e yag corozən' gotə' to güert. Na' lo'o güertan' bazo to bloj ba de'e cobə de'e bagwche'en Jwsen' le'e yej ga cuiczə no beṇə' guat ne'e šo'o. ⁴² Na' boso'ocuaše'e Jeso'osən' lo'o bloj banə' laogüe de'e zon galə'əzə čhedə' chsa'acbyenene' por ni che de'e naquə yeteyo ža dezcanz na' ža xen che lni pascon'.

20

Beban Jeso'osən' ladjo beṇə' guat ca'

¹ Na' bal dmigw Maria beṇə' Magdalan' gwyeye' cho'a bloj ban'. Na' ble'ine' yejən' da' cho'inə' babga'an. ² Nach beza'adoe' beyede' ga'an zoto' len Simon Bedən', nach gwne' neto': —Babesyə'əbeje' Xanchon' lo'o ban', na' bito nezecho galə besyə'əyo'ene'.

³ Nach gwza'ato' len Bedən' gwyejto' cho'a bloj ban'. ⁴ Čopteto' gwsa'adoto' pero nada' gwsa'adocha' ca Bedən' na' zgua'atec nada' bžina'. ⁵ Na' bčeca'a bgüia' lo'o ban' na' ble'ida' lachə' ca' gan' zjəchi'in, pero bito gwyo'a. ⁶ Le'e bla'ate Simon Bedən' na' le' gwyo'e lo'o ban' na' leczə ble'ine' lachə' ca' gan' zjəchi'in. ⁷ Na' bey de'en bosyo'oguzje' laogüe'enə' bito lenən lachə' ca' yelə', ndobən chi'in ca'alə. ⁸ Na' la'anə'əczə nadə'əteca' byob bžina', gwdechlə gwyo'a lo'o ban', na' catə' ble'ida' de'e ca' gwyejli'a de que beban Jeso'osən'. ⁹ La' ca orən' bito ne'e šejni'ito' Xtižə' Diozən' de'enə' nyojən nan de que yeban Jeso'osən' ladjo beṇə' guat ca'. ¹⁰ Na' beza'ato' beyej ližto'.

Maria beṇə' Magdalan' ble'ine' de que mbanczə Jeso'osən'

¹¹ Na' Marian' bega'ane' chbeže' cho'a bloj ban'. Na' lao chbeže'enə' bcheque'e bgüie' lo'inə'. ¹² Na' ble'ine' čhopə angl zjənyaze' lachə' šyiš zjəchi'e lo'o ban', to'e' chi' zda yichjlei na' yetoe' chi' zda xni'alei gan' gotə' cuerp che Jeso'osən'. ¹³ Nach gwse'e no'olan': —čBixchen' chbežo' no'olə'?

Na' le' boži'en gože' lega'aque': —Čhedə' babesyə'əyo'e Xana'anə', na' cabi nezdə' galə jəsyə'əsane'ene'.

¹⁴ Ca beyož gwna Marian' ca', gwyechje' bgüie' traslə na' ble'ine' Jeso'osən' zeche' cože'enə', pero bito beyombia' Marian' le'. ¹⁵ Nach gož Jeso'osən' le': —No'olə čbixchen' chbežo'? čNon' cheyiljo'?

Na' Marian' bene' xbab de que ben' chapə güert na'anə', na' gože'ene': —Šə le' babeyo'one'enə', gwna nada' galə jəyesano'one'enə' na' nada' yeyo'ane'.

¹⁶ Jeso'osən' gože' le': —Maria.

Na' Marian' gwyechje' de'e yoblə na' gože'ene': —Raboni—, naquən dižə' ebreo na' zejen Maestr.

17 Jeso'osən' gože' le': —Bito goxo'o nada', la' bito ne'e yeyepa' ga'an zo Xa'anə'. Beyej lao disipl chia' ca' yela' beṇə' ca' zjənaquə ca biša'a na' zana' na' gožga'aque' de que yeyepa' ga'an zo Xa'anə', ben' leczə naque' Xale. Naque' Dioz ben' cho'elaogua'a na' leczə naque' Dioz ben' cho'ela'ole.

18 Nach beza' Maria beṇə' Magdalan' bedəyedixjue'ine' neto' disipl de que bable'ine' Xanchon'. Na' be'elene' neto' dizə' de'en gož Jeso'osən' le'.

Disipl che Jeso'osən' besə'ale'ine' de que mbancze'

19 Na' ca beɣjw že' ža dmigon' neto' disipl che' nžagto' txen. Na' zjənyeyjw puert ca' por ni che de'en bžebto' beṇə' blao che nasyon Izrael cheton'. Cata'əczla gocbe'ito' bazecha Jeso'osən' gwchołto'onə'. Nach gože' neto': —Leso binlo len xbab de'en yo'o lo'o yichjla'ažda'olen'.

20 Ca beyož gwne' ca' blo'ine' neto' lo'o taque'e ca' na' cuit le'enə'. Na' bebeito' ble'ito' Xanchon'. 21 Nach gože'e neto' yetši'i: —Leso binlo len xbab de'en yo'o lo'o yichjla'ažda'olen'. Can' bselə' Xa'anə' nada' yežlyo nga par chona' xšine'enə', ca'aczən' əchselə'a le'e par gonle xšina'anə'.

22 Beyož gwne' ca' blobe' neto' nach gože' neto': —Le'e si' Spirit che Diozən'. 23 Beṇə' ca' yesyə'adinje xtolə'əga'aque'enə' naple yelə' chnabia' par ye'ega'aclene' de que bagwnitlaon. Pero beṇə' ca' cui yesyə'adinje xtolə'əga'aque'enə' naple yelə' chnabia' par ye'ega'aclene' de que bito nitlaon.

Tomasən' ble'ine' de que mban Jeso'osən'

24 Na' Tomas ben' boso'osi'e Didimo laogüe de'en naque' beṇə' cuaš, lene' neto' šižinto', pero bito zoe' len neto' cata'ən bedəyelo'elao Jeso'osən'. 25 Na' neto' gožto'one': —Bable'ito' Xanchon'.

Nach Tomasən' gože' neto': —Xte que le'ida' taque'e ca' na' əgwzebə xbenə'anə' gan' gwdebə clab ca', na' əgwzebə na'anə' cuit le'enə', nach šejli'a.

26 Gozde to xman zezzoto' lo'o yo'onə' de'e yoblə, na' zo Tomasən' len neto'. Na' leczə zjənyeyjw puert ca', cata'əczla bezla' Jeso'osən' na' gozzeche' gwchołto'onə', na' gwne': —Leso binlo len xbab de'en yo'o lo'o yichjla'ažda'olen'.

27 Nach gože' Tomasən': —Bgüia lo'o taca'a quinga na' bzeb xbeno'onə'. Na' bzeb na'onə' cuit li'a nga par ničh šejli'o. Na' cui gaco' to beṇə' cui chejle'.

28 Nach Tomasən' gože'ene': —Xana', na' Dioz chia'.

29 Nach gož Jeso'osən' le': —Xte que ble'ido' nada' nach gwyejli'o. Mbalazəch len beṇə' cui yesə'ale'i nada' na' se'ejle'e.

Libr nga nyojən par ničh šejle' beṇə' de que Jeso'osən' naque' Xi'in Dioz

30 Na' de'e zan miłagr de'e ben Jeso'osən' gan' zoto'onə' pero bito bzojga'aca'an nga. 31 Pero zjənyoj de'e quinga par ničh sotezə sole šejle'ele de que Jeso'os na'an Xi'in Diozən' ben' gwlej Diozən' par gaquəlene' benəchan', na' par ničh gata' yelə' mban zejlicəne chele laogüe de'en chonlilažə'əlene'.

21

Jeso'osən' blo'elaogüe' gažə disipl che' ca'

1 Gwde goc de'e ca', Jeso'osən' bozloe' laogüe' neto' disipl che' yetši'i cho'a nisdəo' Galilea de'en leczə nzi' Tiberias. Quinga blo'elaogüe' neto': 2 Txen zoto'onə' Simon Bedən', len Tomasən', na' Natanaelən' na' nada' na' beṇə' biša'a na' yechopə' disiplən'. Natanaelən' naque' beṇə' Cana, to yež de'e chi' gan' mbane Galilean'. Na' Tomasən' de'en naque' beṇə' cuaš nachən' boso'osi'ene' Didimo. 3 Simon Bedən' gože' neto': —Ša'ayetošca' gwxen bel.

Na' gožto'one': —Leczə gwza' neto'.

Nach gwza'ato' gwyejto' cho'a nisd'a'onə' na' gwyo'oto' to lo'o barcw. Pero ž'e'enə' cuiczə no no bdole'eto'. ⁴Na' che'eni'ilas bla' Jeso'osən' cho'a nisd'a'onə' pero na' neto' bito beyombi'ato' ša le'enə'. ⁵Jeso'osən' gwne' zizjo gože' neto': —Xi'inda'ogua'a ĩgañ bel' ya'a gaocho?

Na' boži'ito' xtiže'enə' gožto'one': —Notono de.

⁶Nach gože' neto': —Le'e gwzala' yixjw bel' chelen' cuit barcon' lichalə na' əželeleb.

Nach bzala'əto' yixjw bel' cheto'onə' na' xte caguə gwzoito' yecueton' lo'o barcon' tant bel' zan gwža' lo'inə'. ⁷Nach nada' goža' Bedən': —Xancho na'anə'.

Nach Simon Bedən' cate goža'ane': "Xancho na'anə'", le'e beyacwte' xalane'enə', la' de'e cho'o lo'olzən' nacue' par nič chone' zinnə', na' le'e bexita'əte' lao nisən' par nič byob bežine' gan' zo Jeso'osən'. ⁸Na' neto' zeyo'oto' lo'o barcw da'onə' ze'e zenxobəto' yixjw belən' gan' ža' bel' ya'a ca'. Caguə nactequəch zitə' cho'a nisd'a'onə', ca do yeto' gueyoa metrən'. ⁹Na' catə' bežinto' cho'a nisd'a'onə' beyetjto' lo'o barcon' na' ble'ito' chi' yi' ya'aljən' na' xoa to bel' ya'a laogüen', na' len yet. ¹⁰Jeso'osən' gože' neto': —Le'e yeyoxə' la' bel' ya'a ca' ze'e gwxenle nilə.

¹¹Na' Simon Bedən' gwyeje' gan' chi' barcon' na' jəyeseže' yixjw belən' gan' nchejən. Nach hexobəto'on yo bižla. Na' ža'an to gueyoa ši'inəyon bel' xen. Na' bito gwchezə yixjon' la'añə'əczə bia zannə' gwža' lo'inə'. ¹²Jeso'osən' gože' neto': —Le'e da gaole xsil.

Na' ni toto' cui beyaxjeto' ye'eto'one': "ĳNo le'?" la' goche'ito' de que Xancho na'acžənə'. ¹³Jeso'osən' bgüigüe'e gwxi'e yetən' na' bene' che cheto'. Na' leczə ca' bene' len belən'.

¹⁴De'e nga beyon las blo'elao Jeso'osən' neto' disipl' che' lao bebane' ladjo beñə' guat ca'.

Jeso'osən' be'elene' Simon Bedən' dižə'

¹⁵Na' ca bedaoto'onə' Jeso'osən' gože' Simon Bedən': —Simon xi'in' Jonas ĳəchaquəchdo' chia' can' chsa'aque beñə' quinga chia'?

Na' boži'en gože': —Xana' le' nezdə' de que chacda' chio'.

Jeso'osən' gože' le': —Bsed blo'i beñə' ca' ze'e gwzolao chso'onlilažə' nada'.

¹⁶Na' de'e əgwchop lase gože'ene': —Simon xi'in' Jonas ĳəchacdo' chia'?

Na' Bedən' gože'ene': —Xana' le' nezdə' de que chacda' chio'.

Jeso'osən' gože' le': —Bgüia bye beñə' ca' chso'onlilažə' nada'.

¹⁷De'e əgwyon lase gože'ene': —Simon xi'in' Jonas, ĳəchacdo' chia'?

Na' Bedən' gocchgüeine' de'e gože'ene' de'e gwyon lase: "ĳEchacdo' chia'?" Na' gože' le': —Xana' le' neze nle'ido' yoguə'əlo'. Le' nezdə' de que chacda' chio'.

Jeso'osən' gože' le': —Bsed blo'i beñə' ca' chso'onlilažə' nada'. ¹⁸De'e li əchnia' le' catə' goco' beñə' güego' cuino' bochej doxpeyo'ona' na' gwyejo' con ga nazən chio'. Pero catə' gaco' beñə' golə, əgwli' na'onə' na' beñə' yoblə yocheje' doxpeyo'ona' na' yesə'əche'e le' ga cui che'endo'.

¹⁹Na' de'en gože'ene' ca' zeje dižə' de que Bedən' gone' ca si' Diožən' yełə' bala'añ ca' de'en gaquə Bedən' lao na' beñə' mal ca' par so'ote'ene'. Gwde gwna Jeso'osən' can' gaquə che Bedən' nach gože' Bedən': —Da len nada'.

Jeso'osən' goquene' che Juannə'

²⁰Na' beyechj Bedən' ble'ine' nada' naogua' lega'aque' na' bene' xbab can' chaque Jeso'osən' chia', la' nada'an gwchi'a cuit Jeso'osən' žen' gwdaoto' xše'enə' txen catə'an goža'ane': "Xana', ĳnoxaczən' əgwde le' lao na' beñə' ca'?"

²¹Nach Bedən' gože' Jeso'osən': —Xana' ĳnac gaquə che benga?

²² Jeso'osən' gože' le': —Šə che'enda' ne'e zoczə benga xte catə'an yida' yetlas ĵbixa zedən' chaco'? Con gwzotezə gwzo benlilažə' nada' na' bzenag chia'.

²³ De'e na'anə' gwditj dižə'anə' entr beṇə' ca' chso'onlilažə' Cristən' de que nada' bito gata'. Pero Jeso'osən' caguə gože' Bedən' cui gata'anə' sino gože'ene': “Šə nada' che'enda' ne'e zoczə' xte catə'an yida' yetlas ĵbixa zedən' chaco'?”

²⁴ Nada'an naca' disiplən' ben' goquene' chei na' nezda' can' goquə yoguə' de'e quinga babzoja'. Na' leczə le'e nezczəle de que dižə' lin' cho'a.

²⁵ Zanch de'e de de'e ben Jeso'osən' de'e cui zjənyoj. Žalə' zjənyoj yoguə'an na' tgüejə tgüejən libr zan juisy zjəde žalə' ca'.

De'e na'azən' chzoja'.

De'en Gwso'on Apostol Ca'

Jeso'osən' bene' lyebe sele'e Spirit che Diozən'

¹⁻² Teofilo dao', ca' naquə libr de'en bzoja' de'e nech, bzoja' che yoguə'əlol de'e güen de'e ben Jeso'osən' na' de'en bsd blo'ine' dezd catə'an gwzolaogüe' bsd blo'ine' xte catə'an beyepe' yoban'. Žlac bsd blo'ine'enə' gwleje' apostol che' ca' na' len yelə' chnabia' che Spirit che Diozən' bene' mendad naquən' so'one'. ³ Nach gwde gwso'ot beṇə' Jeso'osən', jəyeloe' laogüe' apostol che' ca'. Na' de'e zan de'e bene' par niç gosə'əneze' de que mbancze'enə', na' gwɔdalenə' lega'aque' choa ža na' bzejni'ine' lega'aque' can' chene'e Diozən' nabi'e beṇə' so'e latja.

⁴ Na' žlac ne'e zo Jeso'osən' len apostol che' ca' bene' mendad cui yesyə'əžaše' syoda Jerosalennə' lgüegwza. Gože' lega'aque' yesyə'əga'əne' yesə'əbeze' xte catə'an bach goc can' ben Xe' Diozən' lyebe gaquə, ca de'en bzejni'ine' lega'aque'. ⁵ Jeso'osən' goze'e lega'aque': —De'e zaque'enə' ca naquə Juannə' bchoe' beṇə' nis, pero entr yeto chopə ža, nada' gona' par niç gaquə to de'e zaque'əche, gona' par niç yedəso Spirit che Diozən' lo'o yichjla' ažda'olen' nabi'an le'e.

Jeso'osən' beyepe' yoban'

⁶ Na' catə' bazjəndopə zjənžague' len Jeso'osən' gwse'ene': —Xantə' žəbabžin ža gono' ca yechoj nasyon Izrael chechon' xni'a beṇə' zita' ca'?

⁷ Jeso'osən' gože' lega'aque': —Bitə naquən par niç le'e ənezele bi ža bi orən' gon Xacho Diozən' de'e ca' babži'e bia' gone'. ⁸ Pero na' catə' yedəso Spirit che'enə' len le'e, gaquəlenən le'e len yelə' guac che'enə' par niç güe'ele xtiža'anə' syoda Jerosalen nga, na' doxen ga mbane Jodean', na' Samarian' na' doxenlə lao yežlyon'.

⁹ Beyož gwna Jeso'osən' ca', lao chəsə'əgüia disipl che' ca' le' beyepe' yoban' to lo'o bejw na' bitoch besə'əle'ine' le'. ¹⁰ Na' ne'e chəsə'əgüiachgua disipl che' ca' le'e yoban' gan' besə'əle'ine' beyepe', catə'əczla gwsa'acbe'ine' bazjəzecha chopə angl len lega'aque' beṇə' zjənyaz lachə' šyiš. ¹¹ Na' beṇə' ca' chopə gwse'e lega'aque': —Beṇə' Galilea, žbixchen' chgüiale le'e yoban'? Catezəczən' ble'ile beyep Jeso'os nga yoban' catə'an bechoje' ladjwlen', ca'atezəczən' le'ile yide' de'e yoblə.

Gosə'əbeje' Matias par gaque' apostol lguə'a Jodən'

¹² Nach besa'aque' ya'a de'en nzi' ya'a Olibos jəya'aque' Jerosalennə', na' naquə galə'əzə Jerosalennə' to catə'ətə'an de lsenš sa'aque' ža dezcənzən' seğon costombr che beṇə' Izrael ca'. ¹³ Na' catə' besə'əžine' Jerosalennə' apostol ca' šnej na' beṇə' ca' zjənžague' besyə'əgüie' gan' nite'enə' lo'o cuartən' zo žcuia la'alə. Apostol ca' šnej beṇə' quinga: Bedən', Jacobən', Juannə', Ndrešən', na' Lipən', Tomasən', Bartolomen', Mtion' na' Jacob xi'in Alfeo, na' Simon ben' chon txen len partid de'en nzi' Cananista, na' Jodəsən' beṇə' bišə' Jacobən'. ¹⁴ Yoguə' ža gwnitə'ətezə gwnitə' apostol ca' šnej gwso'one' orasyon txen len beṇə' ca' zjənaquə bišə' Jeso'osən' na' len Maria xna' Jeso'osən' na' len yeziquə'əchlə no'ol ca' zjənžague'.

¹⁵ Na' ca tyemp na' Bedən' gwzeche' ladjo to gueyoa galjə beṇə' ljuežj chio'o chonlilažə'əcho Jesocristən' par be'elene' lega'aque' dižə'an, na' gože'

lega'aque': ¹⁶ —Benə' bišə', Spirit che Diozən' benən par niçh de'e Rei Dabin' bzoje' na' be'e dižə' che Jodən' ben' gwçhe'e beṇə' ca' gosə'əzen Jeso'osən' gan' jesə'ašague'ene'. Na' benən byen goc complir can' nyoj Xtizə' Diozən' che'. ¹⁷ Jodən' goque' t xen len neto' apostol, na' bene' t xen len neto' yoguə'əloł de'en gwoyo' lao na'ato' bento'. ¹⁸ Na' Jodən' gwxi'e to pedas yežlyo len laxjue' de'en gwxi'e par de'e malən' bene' bdie' Jeso'osən' lao na' beṇə' ca'. Pero na' bexope' gan' golə'ədite'ena' na' gošj le'ena' na' doxen xjlo'ena' bchoj. ¹⁹ Yoguə'əloł beṇə' ža' Jerosalennə' gosə'ənezene' can' goc che'ena' na' de'e na'anə' bosə'əsi'e yežlyon' Aseldama na' xtizə'əga'aque'ena' zeje dižə' yežlyo chen. ²⁰ Na' de'en gwso'one' ca' goc can' nyoj to Salmo nan:

Liže'ena' gaquən to yo'o daš, notono no so' na'.

Na' leczə' nyojən nan:

Na' te beṇə' yoblə gwłane' xlatje'ena'.

²¹ Na' nitə' beṇə' entr chio'o nga beṇə' bagwso'on t xen len chio'o bedote lao gwdalen Xancho Jeso'osən' chio'o. ²² Bagwso'one' t xen dezd catə' de'e Juannə' bchoe' le' nis xte catə'an beyepe' yoban', na' cheyalə' cuejcho toe' gone' t xen len neto' apostol güe'eto' dižə' can' beban Xancho Jeso'osən' ladjo beṇə' guat ca'.

²³ Na' gosə'əbeje' çhopə beṇə', toe' Jwse ben' le Barsabas, na' leczə' le' Josto, na' ben' yeto Matias. ²⁴⁻²⁵ Nach gwso'one' orasyon gwse'e Diozən': —Xanto' le' nombi'o yichjla'aždao' yoguə'əloł beṇə'. Entr beṇə' ca' çhopə blo'išguei neto' noe' bagwlejo' par tie' gwłane' xlatjə Jodən' par gaque' apostol na' gone' xšino'onə' t xen len neto', ca' naquə Jodən' gwlejyichje' de'en ngo'o lao ne'ena' gone' na' bazjəyede' gabil gan' naquən yeyeje' yelə' güen de'e mal che'ena'.

²⁶ Nach gwso'one' rif par gosə'ənezene' non' bagwlej Diozən' na' Matiasən' bchoje' na' gwso'onene' cuent len apostol ca' šnej.

2

Can' goquə catə'an bidə Spirit che Diozən'

¹ Na' bžin ža lni de'en ne' Pentecostes, na' apostol ca' na' yoguə'əloł beṇə' ca' bagwso'onlilažə' Jesocristən' zjəndopə zjənžague' t xen tozə latjə. ² Na' to de repentzə goc to sšag le'e yoban' ca' sšag che to be' bdon' gual na' nenxejə lo'o yo'o gan' zjəchi'ena'. ³ Na' besə'əle'ine' to de'en naquə ca' yi' bel' na' bžinte latə' güejə de'ena' chalə'ənin gan' zjəchi' to toe'. ⁴ Ca' goquə bedənabia' Spirit che Diozən' yichjla'aždao' to toe', na' Spiritən' benən par niçh gosə'əzolaogüe' gwso'e gwde gwdełə dižə' de'e gwse'ejni'i beṇə' zitə' ca'.

⁵ Na' ca' tyempən' beṇə' zan beṇə' Izrael ca' ža' Jerosalennə' beṇə' chso'elao' Diozən', za'aque' zan yež yoblə lao yežlyon'. ⁶ Na' catə' gwse'ene' sšaguən' de'en goquə lo'o yo'o gan' ža' apostol ca', zan beṇə' Izrael ca' besə'əžague', na' leçhguale besyə'əbanene' çhedə' to toe' gwse'ene' chso'e beṇə' ca' chso'onlilažə' Jesocristən' dižə' de'e chəsə'əne to toe'. ⁷ Bitə gwse'ejni'ine' bin' chac na' besyə'əbanene', gosə'əne': —¿Ecaguə beṇə' Galilea beṇə' quinga chso'e dižə'əna'? ⁸ ¿Nactecxa chaquən' to tocho chenecho chso'e dižə' can' chso'e beṇə' gwlaž checho ca' dižə'? ⁹ Balcho naccho beṇə' Partia na' balcho beṇə' Media, na' balcho beṇə' Elam, na' balcho beṇə' Mesopotamia. Na' yebalcho beṇə' Jodea, na' yebalcho beṇə' Capadosia, yebalcho beṇə' Ponto, yebalcho beṇə' Asia, ¹⁰ yebalcho beṇə' Frigia na' beṇə' Panfilia, na' yebalcho beṇə' Egipto, na' yebalcho za'acho yež Africa ca' de'en zjəchi' delant Sirene. Na' entr chio'o za'acho Roman' balcho goljcho naccho beṇə' Izrael na' yebalcho

ben cuincho beṇəʼ Izrael. ¹¹ Na' bałcho naccho beṇəʼ Creta na' beṇəʼ Arabia. Na' gata'ətezə beṇəʼ naccho, yogua'əcho chenecho chso'e beṇəʼ Galilea quinga xtižə'əchon' de'en chaccho, chso'e dižə' che de'e zan de'e baben Diozən' de'e zaquə' yebanecho.

¹² Na' yogua' beṇəʼ ca' besə'ədobə choso'ozenague' besyə'əbanene' na' gwsa'aczejlaže'e che de'en chaquən', na' zane' gosə'əne': —¿Bi zejen de'e nga chaquən'?

¹³ Na' yebale' gwso'one' borl gosə'əne': —Beṇəʼ quinga chesə'əzožene'.

Dižə' de'en be' Bedən' len beṇəʼ Izrael ca' besə'əžag

¹⁴ Na' Bedən' gwzeche' lao beṇəʼ ca' txen len apostol ca' yešnej na' be'e dižə'ən zižjo gože' beṇəʼ ca' zjənžaguən': —Le'e beṇəʼ Jodea na' notə'ətezəchle zole Jerosalennəʼ, che'enda' gwzenagle chia' na' gonle xbab che de'en ze'e nia' le'e. ¹⁵ Beṇəʼ lježja' quinga bito chəsə'əzožene' can' chaquele, la' ne'e naquə tempran. ¹⁶ Bachac can' bzoj de'e profet Joelən' ben' be' xtižə' Diozən' cana', bzoje' de'en gwna Diozən', nan:

¹⁷ Cata' bazon əžin tyemp par šo'o fin che yežlyon'

nada' Dioz gona' par niç Spirit chia'anə'

yedəson len beṇəʼ ža' doxen lao yežlyon'.

Na' gona' par niç xi'inle ca' so'e xtižə'anə'

na' beṇəʼ byo xcuids' ca' yesə'əle'idaogüe'ene' bi de'en gona' par

yesə'əle'idaogüe'ene',

na' güe'elena' beṇəʼ byo gola' ca' dižə' lao bišgal čhega'aque'ena'.

¹⁸ Na' yogua' beṇəʼ ca' chso'on xšina'anə' la'anə' beṇəʼ byo o la'anə' no'olə, yedəso

Spirit chia'anə' len lega'aque' par niç so'e xtižə'anə'.

¹⁹ Gona' par niç gaquə de'en cui nonə' le'i le'e yoban' na' lao yežlyon'.

Gwlo'a yelə' guac chia'anə' len chen, len yi' na' len žen de'en naquə ca bejw.

²⁰ Cuich əgwse'eni' bgüižən',

nach bio'onə' yeyaquən xna ca color che chen antslə ze'e əžin ža yida' de'e

yoblə

par čhoglaogua'an che yogua'əloł beṇəʼ šə non' napə dolə', nadan' naca' Xanle.

Gaquən to ža žialao xen,

na' gwlo'a yelə' guac xen chia'anə'.

²¹ Na' gaquə de que notə'ətezə beṇəʼ yesə'əṇab goclen laogua',

nada' naca' Xanle gona' par niç cui žjəya'aque' lao yi' gabil.

Can' gwna Diozən' na' bzoj de'e profet Joelən' len, ben' be' xtižə' Diozən' cana'.

²² Na' le'e beṇəʼ Izrael gwlaž chia', legwzenag chia'. Ca naquə Jeso'osən' ben'

naquə beṇəʼ Nasaretən', Diozən' blo'ine' le'e de que naque' beṇəʼ zaque'e.

Diozən' bene' par niç Jeso'osən' bene' miłagr na' bichlə de'e zaquə' yebane-

cho par ble'ile, can' nezczelena'. ²³ Lao yelə' neze che Diozən' bin' ze'e gaquə che

Jeso'osən', bsi'e xneze par niç Jodən' benene' lao na'alen' na' benle par niç

beṇəʼ mal ca' gwso'ote'ene' boso'ode'ene' le'e yag corozən'. ²⁴ Pero na' Diozən'

bolis bosbane'ene' ladjo beṇəʼ guat ca', čhedə' bito gwzoi yelə' gotan' nabia'an

le'. ²⁵ Quinga bzoj de'e Rei Dabin' xtižə' Jeso'osən' gan' nyoj Xtižə' Diozən' nan:

Nezda' de que Xana' Diozən' zoe' len nada' do tyempte

na' chaclene' nada' par niç cui bi chžeba'.

²⁶ De'e na'anə' zoa' mbalaz na' cho'a dižə' can' chebeida'

na' nezda' yolis yosbane' nada' ladjo beṇəʼ guat ca' cata' bagota'.

²⁷ Dioz chia' nezda' bito yocua'əno' nada' gan' ža' beṇəʼ guat ca',

ni que go'o latjə gožə' cuerp chia'anə',

nadan' naca' Xi'inon' na' naquə la'aždaogua'anə' xi'ilažə'.

28 Bablo'ido' nada' naquən' gona' par niçh əbana' zejlicane na' lechguale mbalaz soa' yedote de'en zoleno' nada'.

29 Beṇə' Izrael, nezecho de que de'e xaxta'ocho Rei Dabin' gote' na' bosu'ocuaše'ene'. Na' nombi'acho yo'o de'en zo gan' bosu'ocuaše'ene'. 30 Na' de'e Rei Dabin' ža be'e dižə' can' bzejni'i Diozən' le' cana'. Gwne' naquən segor can' ben Diozən' lyebe de que to beṇə' galjə' lao dia che'ena' nabi'e Izraelən' can' gwnabia' le'ena'. 31 Diozən' bene' par niçh de'e Rei Dabin' gwneze'ene' can' gaquə' na' de'e na'ana' be'e dižə' che Cristən' ben' babselə' Diozən' par chaclene' nasyon chechon'. Gwne' de que Cristən' yebane' na' bito yega'ane' gan' ža' beṇə' guat ca' na' nic gožə' cuerp che'ena'. 32 Na'a ža, Diozən' bolis bosbane' Jeso'osən' ladjo beṇə' guat ca' na' neto' naquəto' testigw de que beyas bebane'ena'. 33 Na' Diozən' len yelə' guac che'ene' bene' par niçh beyep Jeso'osən' gan' zoe'ena' na' chnabi'e txen len le'. Na' Diozən' bnežjue'ene' Spirit che'ena' can' bene' lyebe. Na' Jeso'os na'ana' babene' miłagr nga de'en babenele na' de'en bable'ile, babene' par niçh zedəso Spiritən' len neto'. 34 Caguə' de'e Rei Dabi na' ben' beyep yoban', sino de'e Dabin' bzoje' che Jeso'osən' gwne':

Xancho Diozən' gože' Xana'anə':

“Gwche'edo' cuita' nga nabi'acho txen,

35 na' gona' par niçh niṭə' de'e ca' chso'on contr le' na' beṇə' contr chio' ca' xni'onə'.”

36 Na' yoguə' chio'o beṇə' Izrael cheyalə' nezecho de'en ngan' che Jeso'osən' ben' betle bda'alene' le'e yag corozən'. Diozən' gwleje'ene' par niçh naque' Xanchon' na' naque' Cristən', zeje dižə' ben' bsele'e par chaclene' nasyon chechon'.

Can' gwna Bedən' gože' beṇə' Izrael ca' zjənžaguan'. 37 Na' catə' beṇə' ca' zjənžaguan' gwse'enenə' xtiže'ena' de'e juisy de'e gwsa'aque' lo'o la'ažda'oga'aque'ena', nach gwse'e Bedən' na' apostol ca' yelə': —Beṇə' gwlaž, žbin' cheyalə' gonto' ža?

38 Nach Bedən' gože' lega'aque': —Cheyalə' yedinjele xtołə'əle ca' par niçh Diozən' yezi'ixene' chele na' choale nis par yesə'əneze beṇə' de que bachonlilažə'əle Jesocristən'. Nach Diozən' gone' le'e Spirit che'ena' son lo'o yichjla'ažda'olen'. 39 Diozən' gone' notə'ətezle Spirit che'ena' can' none' lyebe, le'e na' xi'ine ca' na' notə'ətezə beṇə' zita', la' chnežjue'en yoguə' beṇə' chbeje' par chsa'aque' xi'ine'.

40 Nach Bedən' be'elene' lega'aque' dižə' zan, na' gwneyoine' lega'aque' gože': —Leyechoj lao de'e malən' de'en chso'onchgua beṇə' ca' cui zjənombia' Diozən'.

41 Ca' goquən' beṇə' ca' gwse'ejle' che dižə' de'en be' Bedən' gosə'əchoe' nis. Na' lao žanə' šoṇa mil beṇə' ca' gwso'onlilaže'e Jeso'osən' na' gwsa'aque' txen len yeziqə'əchlə beṇə' bachso'onlilažə'əcze' le'. 42 Yogue'e gwnitə'ətezə gwnite'e gosə'ənaogü'e de'en bosu'osed bosu'olo'i apostol ca' lega'aque' na' gwsa'aque' tozə len yeziqə'əchlə beṇə' gwso'onlilažə' Jeso'osən' na' gwse'ej gwsa'ogü'e txen na' gwnitə'ətezə gwnite'e gwso'one' orasyonə' txen.

Can' gwso'on beṇə' ca' gwso'onlilažə' Cristən' de'e neche

43 Na' yoguə'əzə beṇə' besyə'əbanene' can' gwso'on apostol ca' miłagr zan len yelə' guac che Diozən'. 44 Na' beṇə' ca' bachso'onlilažə' Jesocristən' gwsa'aque' tozə na' gwso'one' tozə yoguə'əlol de'en zjədeine'. 45 Na' gwso'ote'e byen chega'aque'ena' na' bichlə de'e ca' zjədeine' na' mech de'en besə'əle'ine' chein' gosə'əyise'en entr yoguə'əlolga'aque' segon de'en besə'əyažje to toe'.

46 Na' t̄za t̄za besə'ədopə besə'əžague' yo'odao' əblaonə' na' l̄eczə gwse'ej gwsa'ogüe' txen liž to toga'aque' na' gwnite'e mbalaz na' besyə'əbeine' gwso'one' txen. 47 Gwnitə'atezə gwnite'e gwso'elaogüe'e Diozən'. Na' gwsa'azlažə' beṇə' yeziqə'əchlə can' gwso'one'ena'. Na' t̄za t̄za Xancho Diozən' bene' par niç gwyanch beṇə' ca' gwso'onlilažə' Jesocrisən'.

3

Besyə'əyone' to beṇə' coj

1 Na' to ža Bedən' na' Juannə' ja'aque' yo'odao' əblaonə' do cheda šonə, or catə' chso'on beṇə' Izrael ca' orasyon segon costombr çhega'aque'ena'. 2 Na' gwzo to beṇə' nxiṇj ṇi'ena' dezd goljtie' na' yoguə' ža gosə'əbec beṇə' l̄e' cho'a puert çhe yo'oda'onə' puert de'en nzi' "De'e Xochē", par gwṇabe' carida lao beṇə' ca' çhja'ac yo'oda'onə'. 3 Nach catə' besə'əžin Bedən' na' Juannə' yo'oda'onə' na' be'ena' nxiṇj ṇi'ena' bolgüize' lega'aque' yoso'onežjue'ene' mech. 4 Nach Bedən' na' Juannə' gosə'əbeze' na' bosə'əgüiachgüe'ene' na' Bedən' gože'ene': —Bgüia neto'.

5 Na' be'ena' bene' xbab yoso'onežjue'ene' mechən'. 6 Pero Bedən' gože'ene': —Bito bi mech chia' de goṇa' l̄e', pero de to de'e gona' gaquale'na' l̄e'. Por yelə' guac çhe Jesocrisən' ben' naquə beṇə' Nasaretən' chona' mendad gwzožə' na' gwda.

7 Nach Bedən' bexe'e na' l̄icha be'en bsože'ene', na' l̄e'e gocte gwzeche' na' ṇi'e ca' l̄e'e besyə'əyacten gual na' l̄eczə ca' beçh ṇi'e ca'. 8 Na' catə' gocbe'ine' babesyə'əyac ṇi'e ca' gual bxite'e yelə' chebei çhe'ena'. Na' gwyo'e cha'ašil çhe yo'oda'onə' len lega'aque' chxite'e na' cho'elaogüe'e Diozən'. 9 Na' beṇə' ca' ža' cha'ašilən' besə'əle'ine' can' chde' chxite'e na' cho'elaogüe'e Diozən'. 10 Na' gwsa'acbe'ine' de que naque' ben' chbe' chṇab carida yoguə' ža cho'a puert çhe yo'oda'onə' puert de'en nzi' "De'e Xochē", na' l̄echgualē besyə'əbanene' de que babeyaue ṇi'ena'.

Bedən' be'e xtižə' Diozən' cha'ašil çhe yo'oda'onə'

11 Na' to cha'ašil çhe yo'oda'onə' nzi'in "Çhe de'e Salomonṇə". Cha'ašil na' gwyej ben' beyaque ṇi'ena' len Bedən' na' Juannə'. Bito bsane' lega'aque', con bexe'e na'aga'aque'ena', na' yoguə' beṇə' ca' ža' yo'oda'onə' besə'əžagsese' par jəsə'əgüie'ene' chedə' besyə'əbanchgüeine' de'en babeyaue be'ena'. 12 Na' catə' Bedən' ble'ine' de que bazjənžag beṇə' zan gan' nite'ena' nach be'elene' lega'aque' dižə' gože' lega'aque': —Le'e beṇə' gwlaž chia' beṇə' Izrael, chebanelē can' babeyaue be'enga. De repent çhaquele de que por yelə' guac çheton' bento' par niç beyaque be'enga o šə çhaquele beyaquene' por ni çhe de'en chonchguato' can' chazlažə' Diozən', pero caguə ca'ana'. 13 De'e xaxta'ocho Abraannə', Isaaquan' na' Jacobən' gwso'elaogüe'e tozə' Diozən' ben' cho'ela'ocho, na' Dioz na'anə' bnežjue' yelə' bala'an xen çhe Xi'ine' Jeso'osən'. Pero le'e bdele Jeso'osən' lao na' jostis ca' par gwso'ote'ene' na' bžonl̄e catə' Pilatən' gone'ene' əgwsane'ene'. 14 Can' beṇl̄e len Jeso'osən' l̄a'anə'əczə naque' beṇə' la'aždao' xi'ilažə' juisy na' naque' l̄e'ezelaogüe beṇə' güen. Nach gwṇable bosan Pilatən' to beṇə' güet beṇə' de ližyan' l̄gua'a Jeso'osən'. 15 Na' ca naquə Jeso'osən' ben' əbxe yelə' mban zejlicanen', l̄e'ena' betle pero na' Diozən' bolis bosbane'ene' ladjo beṇə' guat ca'. Neto' ble'ito'one' na' cho'eto' dižə' de que bebene' ladjo beṇə' guat ca'. 16 Na' chle'ile bengā cui goquə sa' na' nombi'alene', na' cheyalə' ənezele de que Diozən' beyone' ṇi'ena' chedə' chonlilažə'əto' Jeso'osən'. De'e yoblə nia' de que de'en chonlilažə'əto'

Jeso'osən' de'e na'anə' Diozən' bene' par niçh beyacšao' ni'a bengə can' chle'ilen'.

¹⁷ Beṇə' bišə' dao', nezdə' de que le'e na' beṇə' golə blao chele ca' betle Jeso'osən' laogüe de'en cui gwyejni'ile de que Dioz nan' bsele'ene'. ¹⁸ Naque' Cristən' ben' gwleĵ Diozən' par gaquəlene' nasyon chechon'. Can' goquə goc complir de'e ca' ben Diozən' mendad boso'ozoj de'e profet ca' che Cristən' antslə ze'e sele'ene'. Gwso'e dižə' de que yoso'ochi' yoso'osaquə' beṇə' le' na' so'ote'ene'. ¹⁹ Na'a ža leyoša' xbab chelen' na' le'e yedinje xtolə'əle ca' par niçh Xancho Diozən' gwnitlaogüe'en na' par niçh gone' ca sole mbalaz. ²⁰ Nach Xancho Diozən' sele'e Jeso'osən' yežlyo nga yetlas ben' gwleje' gwlatte par naque' Cristən'. ²¹ Pero chonən byen yega'an Jesocristən' yoban' xte catə' əžin ža gon Diozən' par niçh yežlyon' yeyaquən de'e cobə. La' Diozən' bene' par niçh de'e profet ca' beṇə' ca' gwleje' par gwsa'aque' lažə' ne'enə' na' gwso'e xtiže'enə' cana'ate boso'ozoje' de que yeyaquən de'e cobə. ²² De'e Moizezən' be'elene' de'e xaxta'ocho ca' dižə' gože' lega'aque': "Xancho Diozən' sele'e yeto beṇə' lao dia chelen' par güe'elene' le'e xtiže'enə' can' bsele'e nada'. Che be'enan' gwzenagle bitə'atezə əne'. ²³ Na' Diozən' gone' par niçh yesə'əbiayi' yoguə' beṇə' ca' cui yoso'ozenag che be'enə' əsele'e." Can' gož de'e Moizezən' de'e xaxta'ocho ca'.

²⁴ Le'egatezə ca' yoguə'əloĵ de'e profet ca' beṇə' ca' gwso'e xtižə' Diozən' cana' gwzəloazən' len de'e Samuelən' na' beṇə' ca' gwsa'ac gwdechlə gwso'e dižə' che tyemp nga zocho na'a na' che de'e ca' bachac na'a. ²⁵ De'e profet ca' zjənaque' xaxta'ocho na' lyebe de'en ben Diozən' len de'e Abraanṇə' de que gone' güen len xi'in dia che'enə' naquən par chio'o. Gože' de'e Abraanṇə': "Por xi'in dia chio' beṇə' nita' to to nasyon nite'e mbalaz." ²⁶ Can' chac, Diozən' gwleje' Xi'inən' bsele'ene' por ni checho na' gone' par niçh to tole sole mbalaz šə yedinjele xtolə'əle ca'.

4

Bedən' na' Juannə' nite'e lao beṇə' gwnabia' ca'

¹ Ne'e chso'elente Bedən' na' Juannə' beṇə' ca' dižə' catə' besə'əžin balə bχoz che beṇə' Izrael ca', na' beṇə' gwnabia' che yo'odao' əblao chega'aque'enə' na' beṇə' sadoseo ca' beṇə' ca' cui chse'ejle'e de que yesyə'əban beṇə' guat ca'. ² Beṇə' sadoseo ca' chəsə'əže'e de'en choso'osed choso'olo'i Bedən' na' Juannə' beṇə' ca' zjənžəguan', choso'ozejni'ine' lega'aque' de que gwžin ža cata' yesyə'əban beṇə' guat ca' chedə' beban Jeso'osən'. ³ Na' beṇə' blao ca' gosə'əzene' Bedən' len Juannə' na' gosə'əyixjue' lega'aque' ližyan' sin cui gwsa'ogüe' xya chega'aque' can' cheyalə, chedə' bachexjw že'enə' na' bito golə'əch so'one' yelə' jostis chega'aque'enə' že'enə'. ⁴ Na' ca naquə beṇə' ca' gwse'ene choe' Bedən' na' Juannə' xtižə' Diozən' zane' gwso'onĵiləže'e Cristən', na' txen len beṇə' ca' bagwso'onĵiləže'ene' antslə gwnitə' gueyə' mil beṇə' byo cui cuent no'ola.

⁵⁻⁶ Na' beteyo beṇə' gwnabia' che beṇə' Izrael ca', beṇə' golə blao ca' na' beṇə' ca' choso'osed choso'olo'i lei de'en bzoj de'e Moizezən' besə'ədopə besə'əžəgue' Jerosalenṇə' len Anasən' ben' naquəch bχoz əblao na' len Caifasən' na' Juannə' na' Ljandr na' nochlə beṇə' ca' zjənaque' bišə' ljuežj ben' naquəch bχoz əblan'. ⁷ Nach gwso'one' mendad žəsə'əxi'e Bedən' na' Juannə' na' gosə'əṇabene' lega'aque': —žNon' ben lsens chele par beyonĵe be'enə' nxinjən'? o žnon' ben mendad par beyonlene'?

8-9 Na' ca naquə Spirit che Diozən' gwnabia'an yichjla'azdao' Bedən' nach benən par niçh gože' beṇə' ca': —Le'e beṇə' gwnabia' na' beṇə' golə beṇə' blao che Izraelən', chnable nac goquən' beyonto' be'ena' nxiñj ni'ena'. ¹⁰ Yoguə'əle cheyalə' gwzenagle na' əni'a le'e, de que le'e betle Jesocristən' be'ena' naquə beṇə' Nasaret, bda'alene' to le'e yag coroz, pero Diozən' bolis bosbane'ene' ladjo beṇə' guat ca', na' Jesocrist nan' bene' yelə' guac beyaque benga. ¹¹ Jesocristən' naque' le'ezelaogüe beṇə' zaque'e, pero bito bzenagle che'. De'e na'anə' gwxaquə'əlebene' ca to yej de'en naquə le'ezelaogüe de'e güen na' le'e gwxaquə'əlebele ca beṇə' güen yo'o beṇə' jəsə'əcho'on yejən' de'e naquəch yej güen, pero yejən' banaquən yej squin na'a. ¹² Tozə Jesocristən' guaquə yebeje' beṇə' xni'a de'e malən', na' notono nochlə zo doxen lao yežlyon' beṇə' gaquə yebej chio'o xni'a de'e malən' sino tozə Jesocristən'.

¹³ Besyə'əbane beṇə' gwnabia' ca' can' boži'i Bedən' na' Juannə' xtižə'əga'aque'ena' sin cui besə'əžebe', len nachbia' zjənaque' beṇə' yixə' na' bito zjənsedteque'. Nach gwsa'acbe'ine' de que beṇə' ca' bito chesə'əžebe' çhedə' bagosə'adalene' Jeso'osən'. ¹⁴ Na' de'en zecha ben' beyaque ni'ena' txen len Bedən' na' Juannə' bito besyə'əžele beṇə' gwnabia' ca' bi xya sa'ogüe' çhega'aque'. ¹⁵ Nach besyə'əbeje' apostol ca' fuerlə žlac bosə'oxi'e' en tr ljuežjga'aque' naclə so'one'. ¹⁶ Na' beṇə' gwnabia' ca' gwse'e ljuežjga'aque': —¿Bi goncho len beṇə' quinga? Yoguə' beṇə' ža' Jerosalen nga zjənezene' de que gwso'one' to miłagr xen na' bito gaquə ye'echo beṇə' de que bito gwso'one' miłagran'. ¹⁷ Letechozə goncho par niçh cui gasə' laljə dižə' de'en chso'ena'. De'e na'anə' cheyalə' ye'echo lega'aque' gatə' castigw gual çhega'aque' šə do'eche' xtižə' Jeso'osən'.

¹⁸ Nach gwsa'axe' Bedən' na' Juannə' de'e yoblə na' gwse'e lega'aque' cuich so'e dižə' che Jeso'osən' na' cuich no yoso'osed yoso'olo'ine' che'. ¹⁹ Nach Bedən' na' Juannə' bosyo'oži'en gwse'e lega'aque': —Legon xbab che de'e nga, çəchaquele chene'e Diozən' gwzenagto' çhele o šə chene'ene' gwzenagto' che'ena' ža? ²⁰ Bito gaquə cuezəto' cuich güe'eto' dižə' che de'e ca' bable'ito' na' babeneto' che Jeso'osən'.

²¹⁻²² Na' de'e zan de'e gwse' beṇə' gwnabia' ca' lega'aque' par yoso'ošebe' lega'aque'. Pero na' bito besə'əželene' naclə so'one' lega'aque' castigw çhedə' beṇə' zan chso'e yelə' choxcwlen che Diozən' de'en beyaque be'ena'. Mazəchlə çhoa izene' na' dezd goljtie' cui goquə se'e. Na' beṇə' gwnabia' ca' cui gwse'enene' yoso'oše'e beṇə' zan ca', de'e na'anə' bosyo'osane' Bedən' na' Juannə'.

Gosə'ənbene' Diozən' gaquəlene' so'e xtižə'ena' sin cui yesə'əžebe'

²³ Na' Bedən' len Juannə' cata' bosyo'osan beṇə' gwnabia' ca' lega'aque' jəya'aque' gan' nitə' yeziquə'əchlə beṇə' ca' chso'onlilažə' Cristən' na' gwso'elene' lega'aque' dižə' yoguə'əloj can' əgwse' bxož əblao ca' na' beṇə' golə blao ca' lega'aque'. ²⁴ Na' beṇə' ca' cata' gwse'enene' dižə'an tozə can' gwso'one' xbab len lega'aque' na' gwso'one' orasyonna' lao Xacho Diozən' gosə'əne': —Xənto' Dioz, len' beno' yoban' na' yežlyon' na' nisda'onə'. Len' beno' beṇəçh, bia ca' chsa'aš na' biquə'əchlə de'e zjəde, na' len' chnabi'o doxenlə. ²⁵ Na' Spirit çhio'onə' benən par niçh de'e Rei Dabin' bzenague' çhio' na' bzoje' dižə' quinga de'en nan:

Beṇə' ca' cui zjənaquə beṇə' Izrael chsa'ase' contr le' Xənto' Dioz, pero bitocə gaquə can' chso'one' xbabən'.

26 *Benə*' gwnabia' *che* *nasyon* ca' na' *che* yež ca' *txenṇə*' *zjənaque*' *chso'one*' *contr* le' *Xanto*' *Dioz*,

na' *contr* *Xi'ino*' *Cristən*' *ben*' *bseḷo*'o *par* *gaquəlene*' *nasyon* *Izrael* *četo*' *nga*.

27 Na' *lao*' *syoda* *ngan*' *besə'adobə* *Rei* *Erodən*' na' *Ponsio* *Pilatən*' na' *benə*' *cui* *zjənaque*' *benə*' *Izrael*, na' *len* *benə*' *Izrael* ca'. Na' *yogue'e* *gws'o'one*' *txen* *par* *gws'ote*' *Xi'ino*' *Jeso'osən*' *ben*' *naqua* *benə*' *la'aždao*' *xi'ilažə*' *juisy*, *ben*' *gwlejo*' *par* *gaquəlene*' *nasyon* *četo*' *nga*. 28 *Gws'o'one*' *can*' *bsi'o* *xneze* *gaquə* na' *can*' *gwdixjui'o* *cana'ate*. 29 Na' *na'a* *ža* *Xanto*', *bgüia* *can*' *chso'on* *benə*' *gwnabia*' ca' *chse'enene*' *yoso'ošebe*' *neto*' *benə*' *güen* *žin* *čhio*', na' *goclen* *neto*' *par* *nič* *cui* *žebto*' *güe'eto*' *xtižo'onə*'. 30 Na' *catə*' *güe'eto*' *xtižo'onə*' *blo'ešga* *yelə*' *guac* *che* *Xi'ino*' *Jeso'osən*' *benə*' *la'aždao*' *xi'ilažə*' *juisyən*' ca' *de'en* *gaquə* *no* *miḷagr*, na' *yesyə'əyaque* *no* *benə*' *chsa'acšene* na' *gaquə* *bichlə* *de'e* *yesyə'əbane* *benə*'.

31 Na' *cata*' *beyož* *gws'o'one*' *orasyonṇə*' ca' *Diozən*' *bene*' *par* *nič* *gwxo*' *gan*' *zjəndopə* *zjənžague'enə*' na' *Spirit* *che'enə*' *bedəṇ**abia'achən* *yichjla'ažda'oga'aque'enə*' na' *goclenən* *lega'aque*' *par* *gws'o'e* *xtiže'enə*' *sin* *cui* *besə'əžebe*'.

Gws'o'one' de'en zjəde čhega'aque' tozə

32 Na' *yoguə*' *benə*' ca' *gws'onjilažə*' *Cristən*' *tozə* *can*' *goquə* *yichjla'ažda'oga'aque'enə*'. Na' *yoguə*' *bi* *de'en* *zjəde* *čhega'aque'enə*' *gws'o'one'en* *tozə* na' *notono* *gwna*: "Chia' *de'e* *nga*", o "Chia' *de'e* *na*", *la*' *naquən* *che* *yoguə'əga'aque*'. 33 Na' *apostol* ca' *gwnitə'ətezə* *gwnite'e* *boso'ozejni'ine*' *benə*' *de* *que* *Jeso'osən*' *bebane*' *ladjo* *benə*' *guat* ca'. Na' *Diozən*' *goclenčgüe*' *lega'aque*' *len* *bi* *de'en* *gws'o'one*' na' *bene*' *par* *nič* *benə*' *yeziquə'əchlə* *gwsa'apəchgüe*' *lega'aque*' *respet*. 34 *Can*' *goquə* *bito* *bi* *bi* *goquə* *falt* *bi* *de'en* *besə'əyažje* *benə*' ca' *gws'onjilažə*' *Cristən*', *čhedə*' *benə*' ca' *gotə*' *yežlyo* *čhega'aque*' o *ližga'aque*' *tgüejə* *gws'o'otəga'aque'en*. 35 Na' *mech* *de'en* *besə'əle'ine*' *che* *to* *ton* *boso'onežjue'en* *apostol* ca' na' *apostol* ca' *gosə'əyise'en* *len* *benə*' ca' *yelə*' *con* *noe*' *byažjene'en*. 36 *Can*' *ben* *to* *benə*' *Chipre* *benə*' *le* *Jwse*. *Naque*' *benə*' *goljə* *lao* *dia* *che* *de'e* *Lebin*' na' *apostol* ca' *bosə'əsi'ene*' *Bernabe*, *zejen* *dižə*' *ben*' *čhtipe*' *lažə'əcho*. 37 *Jwse* na' *anə*' *bete'e* *to* *yežlyo* *che'enə*' na' *mech* *de'en* *ble'ine*' *čheina*' *bnežjue'en* *apostol* ca'.

5

De'e mal de'en ben Ananias na' Safira

1 Na' *zo* *to* *benə*' *le* *Ananias* na' *no'ol* *che'enə*' *Safira*, na' *Ananiasən*' *bete'e* *to* *yežlyo* *che'enə*'. 2 *Pero* na' *boso'oxi'e* *entr* *lega'acze*' *yoso'oḫoayague*' *apostol* ca' *yoo'onežjue*' *to* *partzə* *mech* *de'en* *besə'əle'ine*' *cheina*' na' *se'e* *lega'aque*' *de* *que* *doxenənṇə*'. *Nach* *gwyey* *Ananiasən*' na' *bnežjue*' *mechən*'. 3 *Nach* *Bedən*' *gože'ene*': — *Ananias*, *žixčhen*' *bzenago*' *che* *gwxiye'enə*' *par* *čhacdo*' *əḫoayago*' *Spirit* *che* *Diozən*', *nao*' *neto*' *de* *que* *čhoṇo*' *doxen* *mechən*' *de'en* *ble'ido*' *che* *yežlyon*' *len* *bagwlo'oša'ole* *to* *partən*' *par* *cuinlen*'? 4 *Chio*' *yežlyon*' *catə*' *cuiṇə*' *goto'on*, na' *čhio*' *mechən*' *de'en* *ble'ido*' *catə*' *beto'on* na' *zaco'o* *par* *beno*' *bi* *che'endo*' *len* *len*. *De'e* *malən*' *benle* ca' *de'en* *goquəle* *əḫoayagle* *len* *de'en* *benle* *neto*'. *Caguə* *contr* *neto'onə*' *babenle* *de'en* *benlažə'əle* *sino* *contr* *Dioz* na' *anə*'.

5 *Nach* *Ananiasən*' *catə*' *benene*' *xtižə*' *Bedən*' *to* *bgüixze*' na' *gote*'. Na' *yoguə*' *benə*' ca' *gwse'enene*' *dižə*' *can*' *goquən*' *lečhguəle* *besə'əžebe*'. 6 Na' *besə'əžin*

beṇə' xcuidə' ca' gan' bgüixə de'e Ananiasən' na' bosyə'əchele' cuerp che'enə' to lachə' na' besyə'əyo'ene' gan' bosu'ocuaše'ene'.

7 Na' gwde do šon' or gote' bžin' no'ol che'enə' na' gwyo'e yo'onə' sin cui nezene' šə bin' bagoc che de'e be'en che'enə'. 8 Na' Bedən' gože'ene': —Ca naquə yežlyon' de'en betə'əlen' ɹəleine' to ca'atə'ətən' ble'ile chein' ža?

Na' Safiran' gože'ene': —To ca'atə'ətən'.

9 Nach Bedən' gože' no'olən': —ɹBixchen' goco' tozə len be'en chio'onə' chaquele gonle Diozən' prueb šə leine' can' ne' bito əxoayagcho? Cho'a puert nga zjəzecha beṇə' ca' baboso'ocuašə' be'en chio'onə' na' na'a so'e le'.

10 Na' le'e bgüixte Safiran' lao Bedən' na' gote'. Na' catə' gwso'o beṇə' xcuidə' ca' lo'o yo'onə' besə'əle'ine' bagote' nach gwso'ene' jəsə'əcuša'e'ene' cuit de'e be'en che'enə'. 11 Na' yoguə' beṇə' ca' chso'onlilažə' Cristən' besə'əžebe' can' goquən' na' leczə besə'əžeb yeziquə'əchlə beṇə' gwse'ene dižə' can' goquən'.

Gwso'one' de'e zan miłagr

12 Na' apostol ca' gwso'one' de'e zan miłagr entr beṇə' ca' ža' Jerosalennə'. Na' beṇə' ca' chso'onlilažə' Xancho Jesocristən' chəsə'ədopə chəsə'əžague' txeṇ cha'ašil che yo'odao' əblaonə' gan' nzi' "Che Salomonŋə". 13 Na' yeziquə'əchlə beṇə' ca' ža' Jerosalennə' lechguale gwsa'apəga'aque'ene' respet, la'aŋə'əczə besə'əžebe' par yesə'əžague' txeṇ len lega'aque'. 14 Pero na' zane' gwso'onlilaže'e Xanchoṇ' na' besə'əžague' txeṇ, zan beṇə' byo na' no'olə. 15 Na' catə' no beṇə' gwsa'acšene gosə'əyixjue' lega'aque' tnežən' do lao cam o do lao yagla' gosə'əbeze' catə' te Bedən' na' gwse'enene' nite'e gan' yesə'əchele' bxeṇ che Bedən' par niç yesə'əyaquene' šə bi yižgüen' chse'ine'. 16 Na' beṇə' ca' ža' yež ca' zjachi' galə'əzə Jerosalennə' ja'aque' Jerosalennə' zjənche'e beṇə' ca' cha'acšene na' beṇə' ca' zjəyo'o zjəyaz de'e xio' ca'. Na' por yelə' guac che Diozən' apostol ca' gwso'one' par niç besyə'əyaque beṇə' ca' gwsa'acšene na' besyə'əbeje' de'e xio' ca' zjəyo'o yichjla'azdao' beṇə'.

Boso'olagzežə boso'olagzide' Bedən' len Juannə'

17 Nach ben' naquəch bxož əblao na' yeziquə'əchlə beṇə' sadoso ca' beṇə' ca' cui chse'ejle'e de que yesyə'əban beṇə' guat ca', besə'əgue'ine' apostol ca'. 18 Na' gosə'əzene' lega'aque' na' gosə'əyixjue' lega'aque' ližyan'. 19 Na' to angl beṇə' za' gan' zo Xancho Diozən' bžine' ližyan' še'elə na' bsaljue' puert ca' na' bebeje' lega'aque'. 20 Na' gože' lega'aque' žja'acquəche' yo'odao' əblaonə' na' so'eche' dižə' len beṇə' ca' chəsə'əžaguən' naquən' so'one' par yesə'əzi'e yelə' mban zejlicanən'. 21 Nach de'en gwse'enene' can' gož anglən' lega'aque', ja'aque' yo'odao' əblaonə' catə' gwy'e'eni'inə' na' bosu'osed bosu'olo'ine' beṇə' ca' zjənžaguən'.

Na' ben' naquəch bxož əblao txeṇ len beṇə' golə' blao ca' chəsə'ənabia' nasyon Izraelən' besə'ədobe' par gwso'one' jontən' nach gwso'one' mendad žjəsə'əxi'e apostol ca' gan' zjədie' ližyan'. 22 Pero catə' besə'əžin xə'ag yo'odao' ca' ližyan' caguə no apostol ca' nla'. Na' jəya'aque' lao beṇə' gwnabia' ca' jəsyə'ədixjui'e. 23 Chse'e beṇə' ca': —Nyeyjw chech ližyan' na' soldad ca' nite'e cho'a puertən' chsa'ape'en pero catə' bsaljwto' puertən' caguə no apostol ca' ža' lo'o ližyan'.

24 Na' ben' naquəch bxož əblao na' beṇə' gwnabia' che soldad ca' chsa'apə yo'oda'onə', na' bxož golə' blao ca' catə' gwse'enene' rsonŋə' besyə'əbanene' na' gwsa'aczejlaže'e bi zeje ca' de'en bagoquan'. 25 Na' lao chsa'aczejlaže'enə' bžin to beṇə' gože' lega'aque' de que apostol ca' beṇə' ca' gosə'əyixjue' ližyan' že'e cha'ašil che yo'odao' əblaonə' choso'osed choso'olo'ine'.

²⁶ Nach beṇə' gwnabia' che soldad gop ca' gwyeje' len xa'ag yo'odao' ca' jəsyə'axi'e apostol ca' dižə' šao'. Bito gwso'one' znia len lega'aque' chedə' besə'əžebe' beṇə' ca' choso'ozenag xtižə' apostol ca' šə yoso'ošiže'e lega'aque' yej. ²⁷ Na' catə' besə'əžin apostol ca' lao beṇə' gwnabia' ca' beṇə' ca' chso'on jontən' nach ben' naquəch bχoz əblao gože' lega'aque': ²⁸ —Bačh bento' mendad cui güe'ele dižə' che Jeso'osən' na' cuich əgwsed əgwlo'ile beṇə' che le'enə', na' mazachlə babe'elenle yogua' beṇə' Jerosalen ca' xtiže'enə'. Na' bachosbaga'əle neto' che de'en gwso'ote'ene'.

²⁹ Nach Bedən' na' apostol ca' yelə' gwse'e le': —Naquəchən de'e žialao xench gwzenagto' che Diozən' cle ca' che beṇə'chən'. ³⁰ Le'e betle Jeso'osən' bda'alene' to le'e yag coroz pero Dioz ben' cho'ela'ocho na' ben' be'elao' de'e xaxta'ocho ca' bolis bosbane'ene' ladjo beṇə' guat ca'. ³¹ Na' na'a Diozən' babnežjue'ene' yelə' bala'aṅ xen na' yelə' gwnabia' xen par ničh chnabi'e na' chebeje' beṇə' xni'a de'e malən'. Na' le'enə' chene'ene' gaquəlene' yogua' chio'o beṇə' Izrael par ničh yediñjecho xtola'əchon' na' yezi'ixene' checho. ³² Neto' nezeto' can' ben' Diozən' len Jeso'osən' na' cho'eto' dižə' chei, na' leczə Spirit che Diozən' nezczen na' cho'en dižə' chei na' Diozən' babsel'e'e Spirit che'enə' zon lo'o yichjla'aždao' beṇə' ca' choso'ozenag che'.

³³ Na' lechguale besə'əža'a beṇə' gwnabia' ca' catə' gwse'enene' can' gož Bedən' lega'aque' na' gwse'enene' so'ote' apostol ca'. ³⁴ Pero na' lao jontən' zo to beṇə' fariseo beṇə' le Gamaliel. Chsed chlo'ine' beṇə' lei de'en bzoj de'e Moizezən' na' gwsa'apəchgua beṇə' le' respet. Na' Gamalielən' gwzeche' lao jontən' na' bene' mendad yesə'əchoj apostol ca' fuerlə žlac güe'elene' beṇə' ca' ža'anə' dižə'. ³⁵ Nach gože' beṇə' ca' ža'anə': —Beṇə' gwlaž, cheyalə' gongaxjcho xbab nac goncho len beṇə' quinga par ničh goncho de'en naquə de'e sin'. ³⁶ Le'e yosa'alažə' can' goquə catə' bchoj ben' le Teudas gwne' de que naque' beṇə' zaque'e. Na' do tap gueyoa beṇə' boso'ozenag che' na' gwsa'aquene' txen. Pero na' bžin ža gwso'ot beṇə' le' na' besyə'əyasəlas beṇə' ca' gwsa'aque' le' txen, caguə bi goquəch so'one'. ³⁷ Nach gwdechlə to beṇə' Galilea ben' le Jodas bchoje' ca tyempən' boso'oguale'e yiš balə beṇə' ža' to to yež, na' beṇə' zan gwsa'aquene' txen na' leczə bžin ža gwso'ote'ene' na' beṇə' ca' gwsa'aque' le' txen leczə besyə'əyasəlase'. ³⁸ Na' de'e na'anə' choṇa' le'e consejw nga, ljoye' beṇə' quinga, bito bi gonecho lega'aque'. La' šə de'en choso'osed choso'olo'ine'enə' naquən che lega'acze' gwžin ža catə' yenitan. ³⁹ Na' šə de'en choso'osed choso'olo'ine'enə' naquən che Diozən', bito bi gaquə goncho par cui gasəlasən. Cheyalə' gapcho cuidad par ničh cui tiļəlencho Diozən'.

⁴⁰ Na' gwsa'azlažə' beṇə' gwnabia' ca' can' gož Gamalielən' lega'aque'. Nach gwsa'axe' apostol ca' na' gosə'əyine' lega'aque' na' gwso'one' mendad cuich no yoso'osed yoso'olo'ine' che Jeso'osən' batə'ətezəchlə. Nach boso'osane' lega'aque'. ⁴¹ Na' ca naquə apostol ca' catə' besyə'əchoje' gan' gotə' jontən' chesyə'əbeine' de' que Diozən' bsi'e xneze boso'oči' boso'osaquə' beṇə' lega'aque' por ni che de'en choso'osed choso'olo'ine' che Jeso'osən'. ⁴² Na' yogua' ža boso'osed boso'olo'iche apostol ca' che Jesocristən' do liž beṇə' na' do catə' chja'aque' yo'odao' əblaonə'.

6

Beṇə' ca' chso'onliłaza' Cristən' gosə'əbeje' gažə beṇə' par gwsa'aque' comisyon chega'aque'

¹ Na' ca tyempən' zda chanch beṇə' ca' chso'onlilažə' Jesocristən' na' beṇə' ca' chso'e dižə' griego gwzolao chəsə'əže'e'eše'e chedə' no'olə gozeb ca' entr lega'aque' bito chəsə'əzi'e lebe len no'olə gozeb ca' entr beṇə' ca' chso'e dižə' ebreo catə' chəsə'əyise' de'en chse'ej chsa'o to toga'aque'. ² Nach apostol ca' šižin bosyo'otobe yeziquə'əchlə beṇə' ca' chso'onlilažə' Jesocristən' na' gwse'e lega'aque': —Bito naquan güen par neto' cuezəto' cuich əgwsed əgwlo'ito' beṇə' xtižə' Diozən' par niçh chisto' de'en əse'ej əsa'o beṇə'. ³ De'e na'anə' beṇə' bišə', lecuej gažə beṇə' entr le'e, beṇə' chnabia' Spirit che Diozən' yichjla'ažda'oga'aque'enə', beṇə' zjənaquə beṇə' sin' na' beṇə' chso'on de'e güenṇə', na' le'e gon lao na'aga'aque' yesə'əyise' de'en əse'ej əsa'o beṇə' ca'. ⁴ Na' neto' sotezə soto' gonto' orasyonṇə' na' əgwsed əgwlo'ito' beṇə' xtižə' Diozən'.

⁵ Na' gwsa'azlažə' yoguə' beṇə' ca' gwso'one' can' gwse' apostol ca' lega'aque', na' gosə'əbeje' to beṇə' le Esteban, beṇə' chonlilažə'əchgua Diozən' na' chnabi'achgua Spirit che Diozən' yichjla'aždaogüe'enə'. Na' lecəə gosə'əbeje' Lip na' Procoro na' Nicanor na' Timon, na' Parmenas na' Nicolas beṇə' Antioquia, beṇə' ben cuine' beṇə' Izrael. ⁶ Na' bosə'ozoe' lega'aque' lao apostol ca' par niçh apostol ca' gwso'one' orasyon chega'aque' na' bosə'oχoa na'aga'aque'enə' yichj beṇə' ca' par gwso'o lao na'aga'aque'enə' žinnə' de'en so'one'enə'.

⁷ Na' beṇə' zanch gwse'enene' xtižə' Xancho Jesocristən', na' zan beṇə' Jerosalennə' gwso'onlilaže'ene' na' lecəə zan bχoz ca' bosə'ozenague' na' gwse'ejle'e xtiže'enə' de'en bosə'osed bosə'olo'ine'.

Gosə'əzene' Estebannə'

⁸ Na' ca naquə Estebannə' gwzochgua yelə' guac che Diozən' len le' na' Diozən' godlençgüe' le'. De'e na'anə' bene' milagr na' bichlə de'e zaquə' yesyə'əbane beṇə' lao beṇə' ca' ža' Jerosalennə'. ⁹ Na' zo to yo'oda'onə' de'en chəsə'əne' "Yo'odao' che Beṇə' ca' Gwsa'ac Esclabos". Beṇə' ca' chəsə'ədopə chəsə'əžag na' za'aque' Sirene na' Alejandria, na' Silisia na' Asia, na' balə beṇə' ca' gwzolao gwsa'acyože' Estebannə'. ¹⁰ Pero na' bito besyə'əželene' nac yosyo'oži'e xtižə' Estebannə' chedə' Spirit che Diozən' bnežjon le' yelə' sin' na' bzejni'in le' bin' gwne'. ¹¹ Nach gosə'əgo'oyele'e to çhopə beṇə' par bosə'oχoayague' gosə'əne' de que Estebannə' babžia bnite'e de'e Moizezən' ben' bzoj lei che beṇə' Izrael ca' na' lecəə gosə'əne' de que babžia bnite'e Diozən'. ¹² Na' beṇə' ca' gwsa'acyožə Estebannə' bosə'ota bosə'one' beṇə' lao syodan' na' beṇə' golə blao che beṇə' Izrael ca' na' beṇə' ca' choso'osed choso'olo'i lei de'en bzoj de'e Moizezən'. Na' ja'acdoe' gan' zo Estebannə' na' gwso'oχe'ene' na' gosə'əche'ene' gan' ža' beṇə' ca' chəsə'ənabia' Izraelən'. ¹³ Nach besyə'əyilje' beṇə' soe' dižə' güenlažə' beṇə' gosə'əne' che': —Benga cuiczə žizə zoe' chžia chnite'e yo'odao' əblao nga na' lei de'en bzoj de'e Moizezən'. ¹⁴ Babeneto' ne' de que Jeso'os beṇə' Nasaretən' yochinje' yo'odao' əblaonə' na' yoše'e costombr checho ca' de'en ben de'e Moizezən' mendad naocho.

¹⁵ Na' beṇə' gwnabia' ca' na' notə'ətezəchlə beṇə' ca' zjəchi' gan' chso'one' yelə' jostisan' besə'əgüie' cho'alao Estebannə' na' besə'əle'ine' chactitən ca' cho'alao angl.

1 Nach ben' naquach bꝥoz əblaonə' gože' Estebannə': —¿Enaquən ca nga chəsə'əna benə' quinga?

2 Nach Estebannə' gože' lega'aque': —Le'e benə' golə na' le'e benə' xcuida', legwzenag chia' len to chopə de'e ənia' le'e. Diozən' ben' naquə le'ezelaogüe benə' zaque'e bloe' laogüe' de'e ɣaxta'ochə Abraannə' catə'ən gwzoe' Mesopotamian' antslə ze'e žjasoe' Arannə'. 3 Na' Diozən' gože'ene': “Benə' lažo'onə' na' ladjo benə' family chio' na' gwyej jəso' latjə gan' gwlo'ida' le'.” 4 Nach de'e Abraannə' bchoje' gan' ža' benə' Caldea ca' na' jəsoe' Arannə'. Na' bžin ža got de'e xə'enə' na' gwdechlə Diozən' gwche'e de'e Abraannə' nga gan' zocho. 5 Diozən' bito bnežjue' de'e Abraannə' yežlyonə' gaquan che', ni to pedas da'ozən', sino bene' lyebe de que gaquan che benə' ca' ze'e za'ac lao dia che'enə' catə' bagote', la'anə'əczə cui no xi'ine' ne'e so catə'ən gož Diozən' le' ca'. 6 Nach Diozən' leczə gože'ene' de que xi'in dia che'enə' žjəsə'ənite'e laž benə' zitə' tap gueyoa iz gan' əsa'aque' esclabos na' yesə'əžaglaochgüe'. 7 Nach Diozən' gože'ene': “Nada' gwnežjua' castigw che nasyonnə' gan' so'one' xi'in dia chio' ca' esclabos na' gona' ca yesyə'əchoj xi'in dia chio'onə' na' da'aque' əso'elaogüe'e nada' nga.” 8 Nach Diozən' bene' lyebe len de'e Abraannə' de que gone' güen len xi'in dia che'enə'. Na' bene' mendad so Abraannə' to seņy de'en ne' sirconsion, le' na' len benə' byo ca' za'ac lao dia che'enə' par gacbia' de que chse'ejle'e che lyebe de'en bene'enə'. De'e na'anə' catə' goljə xi'ine' Isaaquan' bzo'əbo' seņyən' to xmanzebo', na' leczə can' ben de'e Isaaquan' cata' goljə xi'ine' Jacobən'. Na' ca'aczə ben de'e Jacobən' len de'e xi'ine' ca' šižinnə' benə' ca' gwsa'ac šižin dia che chio'o benə' Izrael.

9 Na' xi'in de'e Jacobən' be'en le Jwsə, benə' biše'e ca' gwsa'acxi'ine' le' na' gwsə'ote'ene' gosə'əzi' benə' Egipto ca' le'. Pero Diozən' gwzoe' len Jwsen'. 10 Na' godlene'ene' na' bebeje'ene' lao yoguə'əlol de'en bžaglaogüe'ena'. Na' Diozən' bene' par nič de'e Rei Faraonnə' ben' chnabia' Egipton' bebeine' le' na' gwleje' le' par goque' gubernador che Egipton' na' Faraonnə' bzo'ene' bgüia bye' ližen'.

11 Na' gwche' to bgüin doxen Egipton' na' leczə can' goquə Canaannə' na' de'e ɣaxta'ochə ca' bito besə'əzelene' de'e əsa'ogüe' na' besə'əžaglaochgüe'. 12 Pero na' bžin ža bene de'e Jacobən' rsonnə' de trigw Egipton' na' bsele'e de'e ɣaxta'ochə ca' tši'i jəsə'əxi'en. 13 Na' bechop ši'i ja'aque' catə' ben Jwsen' ca besyə'əyombia' benə' biše'e ca' le', na' gwneze Faraonnə' ca žjənaquə family che Jwsen'. 14 Na' Jwsen' bene' mendad žjasyə'əxi'e ɣaga'aque' Jacobən' na' yoguə'əlol biše' ljuežje' ca', naquə ca do gyonšino'e. 15 Can' goquə gwyej Jacobən' Egipton' na' Egipto na' gote', na' leczə na' gwsa'at xi'ine' ca' benə' ca' žjənaquə ɣaxta'ochə. 16 Na' gwdechlə besyə'əyoe' cuerp chega'aque'ena' na' jasyə'əcuəše'ene' to lo'o bloj ba gan' nzi' Siquem, to yežlyo de'en gwxi' Abraannə' de'en gwso'otə' xi'in Amor benə' Siquem.

17 Na' catə' bazon əžin tyemp əgwnežjo Diozən' lega'aque' yežlyon' can' bene' lyebe len de'e Abraannə', bazda chan benə' Izrael ca' ža' laž benə' Egipto ca'. 18 Na' ca' chac beža' rei che Egipton' na' rei cobən' bito gwnezene' can' goquəlen Jwsen' nasyon Egipton'. 19 Na' rei nga gwdiljlaže'e bin' əbde'ine' par bene' mal len de'e ɣaxta'ochə benə' Izrael ca', na' bene' mendad žjəsə'əcho'on xi'ingə'aque'ena' par nič yenit diana'. 20 Na' ca' tyempən' goljə de'e Moisezan' na' bebei Diozən' le' na' ɣaxne'ena' bosyo'osča'ogüe' le' šonə bio'. 21 Pero na' bžin ža benən byen jəsə'əcho'one'əbo', na' xi'in rein' to no'olə beželene'əbo' na' beyo'əbo' liže'ena' bosča'ogüe'əbo' ca xi'ine'. 22 Ca' goquan' bsd de'e

Moizezən' tcho'a tšao' yelə' sin' che beṇə' Egipto ca', na' bene' de'e zaque'e na' be'e dižə' de'e zaque'e.

²³ Na' čhoa ize de'e Moizezən' catə' gwnan žjəlaṇe'e beṇə' Izrael gwlaž che' ca'. ²⁴ Na' jəle'ine' to beṇə' Egipton' chčhi' chsaque'e to beṇə' Izraelən', na' goclene' beṇə' Izraelən' na' bete' beṇə' Egipton'. ²⁵ De'e Moizezən' bene' xbab se'ejni'i beṇə' Izrael gwlaž che' ca' de que Diozən' gaqulene'ene' par yosle' lega'aque' lao na' beṇə' Egipto ca', pero na' bito gwse'ejni'i beṇə' Izrael ca'. ²⁶ Na' beteyo gosə'dilə čhopə beṇə' Izrael ca' entr lega'acze'. Na' bžin de'e Moizezən' goquene' gone' par nič yenite'e binlo, na' gože' lega'aque': "čBixčhen' chdiləlen ljuəžjle ca' entr beṇə' gwlažzle?" ²⁷ Nach ben' napə dolə'anə' bžigue'e de'e Moizezən' ca'alə gože'ene': "čNo gwna le' gaco' beṇə' gwnabia' par gono' yelə' jostis četo'onə'? ²⁸ čElezə che'endo' goto' nada' can' beto' beṇə' Egipton' nejen'?" ²⁹⁻³⁰ Na' catə' bene' de'e Moizezən' can' gož be'enə' le', nach bxonje' jəsoe' čhoa iz gan' nzi' Madian la'anə'əczə naque' beṇə' zitə' len beṇə' ca'. Na' bšagne'e na' na' gwnitə' čhopə xi'ine'.

Na' goc čhoa iz zoe'enə' catə' bloe' lao to angl le' latjə dašən' galə'əza ya'a Sinai. Yo'o anglən' to lo'o yi' bel' chdoljən to lo'o xis yešə'. ³¹ Na' catə' ble'i' de'e Moizezən' can' čhaquən' bebanene', nach bgüigue'e yelata' par ble'iša'ogüe'ene' na' benene' cholgüiž Xancho Diozən' le' che'ene': ³² "Nada' naca' Dioz na' de'e xaxta'ogo'o Abraanə', Isaaquən' na' Jacobən' gwso'elaogüe'e nada'." De'e Moizezən' bžebe', caguə cheyaxjene' əggüie'. ³³ Na' gož Xančon' le': "Gwlečhj xelo'onə' par gapo' nada' respet la' latjə gan' zecha'onə' naquən čhia'. ³⁴ Nada' ble'ida' yelə' yašə' yelə' zi'inə' chde nasyon čhia' Izraelən' Egipton' na' babenda' can' chso'onyašə'əga'aque'. De'e na'anə' gaqulenga'aca'ane'. Da nič əsela'a le' Egipton'."

³⁵ Diozən' gože'ene' ca' la'anə'əczə antslə beṇə' Izrael ca' cui gosə'əzi'e che' na' gwse'ene': "čNo gwna le' gaco' beṇə' gwnabia' par gono' yelə' jostis četo'?" Diozən' bsele'e de'e Moizezən' par gwnabi'e de'e xaxta'ocho ca' na' par nič bebeje' lega'aque' lao na' beṇə' Egipto ca', na' angl che Diozən' ben' gwyo'o lo'o yi' belən' gwzoe' goclene'ene'. ³⁶ Na' de'e Moizezən' bebeje' lega'aque' Egipton' bene' zan miłagr na' bichlə de'e zaquə' yebanecho Egipton', na' nisdəo' Exnən' na' latjə dašən' lao čhoa iz. ³⁷ Na' de'e Moizez na'anə' gože' de'e xaxta'ocho ca': "Xancho Diozən' sele'e yeto beṇə' lao dia chele par güe'elene' le'e xtiže'enə' can' bsele'e nada'. Che be'enan' əgwzenagle." ³⁸ De'e Moizezən' gwzoe' len de'e xaxta'ocho ca' latjə dašən'. Na' anglən' be'elene' le' dižə' lao ya'a Sinain' gože' le' dižə' de'e zaquə' əgwzenagcho čei na' de'e cui te čei. Na' de'e Moizezən' bzejni'ine'en de'e xaxta'ocho ca' zjəndopə zjənžag galə'əzə ya'anə'. na' Moizezən' bzoje' dižə'anə' par chio'o.

³⁹ Pero na' de'e xaxta'ocho ca' bito boso'ozenague' che de'e Moizezən', boso'ozo'ene' ca'alə. Gwse'enene' žjəya'aque' Egipton'. ⁴⁰ Na' lao zda de'e Moizezən' lao ya'a Sinain', gwse'e beṇə' biše'e Ronnə': "Ben lgua'a lsaquə' de'en šejni'alažə'əcho, de'e yessə'əbialao lao chio'o tnezən'. La' ca' naquə Moizezən' ben' bebej chio'o Egipton' cuili bin' bagoc che'." ⁴¹ Nach gwso'one' to me'e go'on dao' de or na' gwso'ote' no bia yixə' par gwso'elaogüe'eb na' gwnite'e chesyə'əbeine' len de'en gwso'one' len ni'a na'aga'aque'ena'. ⁴² De'e na'anə' Diozən' gwlejjyichje' nasyon Izraelən' na' be'e latjə gwse'ejni'alaže'e bgüižən', bio'onə' na' beljw ca'. Na' nyoj de'en gwna Diozən' can' gwso'one' nan: Le'e beṇə' Izrael, caguə nadan' be'ela'ole catə'an betle bia yixə' latjə dažən' lao čhoa iz.

43 Benle no lgu'a lsaquə'an gwyejni'alažə'əle, na' bi'ale yo'o de lachə'an gan' gwyejni'alažə'əle lgu'a lsaquə' de'en ne' Moloc, na' bi'ale beljon' gwyejni'alažə'əle de'en nzi' Renfan. Na' de'en bagwlejyichjle nada' de'e na'anə' cueja' le'e gan' zolen' na' seła'a le'e zitə' gan' nzi' Babilonia.

44 Na' žlac chaše' latjə dašan' de'e xaxta'ocho ca' gwso'one' to yo'o de lachə' gan' ža' yej ta'a ca' gan' nyoj lei chega'aque'enə'. Na' gwso'one'en con can' gož Diozən' de'e Moizezən' na' con can' blo'ine' le'. 45 De'e xaxta'ocho ca' bososa'ate' yo'o de'e lachə' chega'aque'enə' na' yej ta'a ca' gan' nyoj lei chechonə' con ga ja'aque', gwzolaozən tyemp che de'e Moizezən' na' gwzelaon tyemp che de'e Rei Dabin'. Na' gwde got de'e Moizezən' de'e Josuen' gwche'e lega'aque' yežlyon' de'en ben Diozən' lyebe gwnežjue' lega'aque', na' Diozən' bene' beņə' ca' ža' yež ca' lao na'aga'aque' catə' gosa'ədiləlene' lega'aque'. 46 Na' Diozən' bebeine' de'e Rei Dabin', na' de'e Dabin' gone'ene' gone' to yo'oda' par Diozən', Dioz ben' leczə gwyejni'alažə' de'e Jacobən' cana'ate. 47 Pero na' Diozən' bito be'e latjə gon de'e Dabin' yo'oda'onə', sino de'e xi'ine' Salomonna' bene'en. 48 Na' bito ənachə' de que Diozən' ben' chnabia' doxenlə zoe' do lo'o yo'o de'e chon beņachən', sino chac can' gwna Diozən' de'en bzoj to profet beņə' be' xtiže'enə' cana' nan:

49 Nada' zoa' yoban' chnabia' na' guaquə gona' par nič gaquə con bin' che'enda' lao yežlyon'.

¿Ena' chaquele gonle to liža'anə' ža?

Nada' bito chyažjda' yo'o gan' gona' dezcanz.

50 Nada' bena' yoguə'əte de'e zjəde.

51 De'en cui chzenagle, de'en cui chejle'ele lo'o la'azda'olen' naquachgualə beņə' žod can' gwsa'ac de'e xaxta'ocho ca'. Cuiczə chzenagle che Spirit che Diozən'. 52 De'e xaxta'ocho ca' leczə bosoa'ochi' bososa'aque'e de'e profet ca' beņə' ca' gwso'e xtižə' Diozən' cana' na' gwso'ote' lega'aque' catə'an gwso'e dižə' can' seła' Diozən' Xi'ine'enə' ben' naquə le'ezeləogüe beņə' güen. Na' catə' bide'enə' le'e əbdelene' lao na' beņə' ca' gwso'ote'ene'. 53 La'anə'əczə nombi'ale lein de'en bnežjw angl ca' de'e Moizezən' cana', bitoczə chzenagle chei.

Gwso'ote' Estebannə'

54 Na' catə' Estebannə' gože' lega'aque' ca' lechguale besə'əloque' xte gwsa'oxojə leyga'aque'enə'. 55 Pero na' Estebannə' chnabi'achgua Spirit che Diozən' le', bcos laogüe'en chgüiachgüe' yobalən' na' ble'ine' yeļə' chey che'eni' che Diozən' na' ble'ine' zecha Jeso'osən' cuit Diozən' chnabi'e txen len le'. 56 Nach Estebannə' gwne': —Le'e ggüiašč nla'axejə yoban' na' nla' zecha Jeso'osən' ben' goljə beņach' cuit Diozən' chnabi'e txen len le'.

57 Nach beņə' ca' zjənžaguən' chso'osya'adie' na' bosoa'osejyw nagga'aque'enə' nach tš'i'izə ja'acdoe' gan' ze' Estebannə'. 58 Nach gosa'əbeje' Estebannə' fuerlə syodan' na' bosoa'ošiže'ene' yej. Na' beņə' ca' bosoa'ošižə le' yejən' bosoa'onežjo xaga'aquen' de'en zjənchele'enə' to beņə' güego' beņə' le' Saul par nič gwdaye'en. 59 Na' žlac choso'ošiže'e Estebannə' yejən', Estebannə' bene' orasyonə' gwne': —Xana' Jeso'os, bezi' nada' yoban'.

60 Nach bzo xibe' lao yon' na' gwne' zižjo gwne': —Xana' bito gwnežjo' castigw che beņə' quinga de'en bagwso'onene' nada'.

Na' beyož gwne' ca' gote'.

8

Saulan' blagzejə blagzide' beṇə' ca' chso'onlilažə' Jesocristən'

1-2 Na' beṇə' ca' chso'onlilažə' Jesocristən' Jerosalennə' jəsə'əcuəše'e de'e Esteban', na' gosa'əbežchgü'e' che'.

Na' ca naquə Saulan' ža, gwyazlaže'e de'en gwso'ote' de'e Estebannə'. Na' gwde gwso'ote' de'e Estebannə' beṇə' blao ca' gosə'əzolaogü'e' bosə'olagzejə bosə'olagzide' beṇə' ca' chasə'ədopə chasə'əžag chso'elaogü'e'e Jesocristən' Jerosalennə', na' zan beṇə' ca' chso'elao' Jesocristən' besə'əxonje' ja'aque' do Jodean', do Samarian', pero bito len apostol ca'. ³ Na' Saulən' gwzolaogü'e' cheje' liž to to beṇə' ca' chso'elao' Jesocristən' chjəxobe' no beṇə' byo na' na' no'olə par chche'e lega'aque' ližyan'.

Beṇə' Samaria ca' gwse'enene' dižə' güen dižə' cobə che Jesocristən'

⁴ Pero na' beṇə' ca' chso'elao' Jesocristən' lao besə'əxonje' ja'aque' doxenlə jəsə'ədixjui'e xtižə' Jesocristən'. ⁵ Na' to beṇə' le Lip beṇə' leczə chonlilažə' Jesocristən' bžine' to syoda ga mbane Samarian' na' be'e dižə' che Jesocristən'.

⁶ Na' bene' miłagr na' catə' besə'əle'ine' miłagrən' de'en bene' len lega'aque' beṇə' zan besə'ədobə bosə'ozenague' che'. ⁷ Bebeje' de'e xio' ca' zjəyo'o zjəyaz lo'o yichjla'aždao' beṇə' zan, na' catə' besyə'əchojən' chso'osya'adi'an. Na' zan beṇə' nat to part güejə cuerp chega'aque'enə' beyone' na' beyone' no beṇə' coj. ⁸ Na' lechgualə besyə'əbei beṇə' ca' ža' syodan'.

⁹ Na' lao' syodan' zo to beṇə' goža' beṇə' le Simon. De'e zan de'e bene' antslə de'e besyə'əbane beṇə' Samaria ca', bxoayague' lega'aque' gože' de que naque' beṇə' zaque'e. ¹⁰ Na' žlac bene' de'e ca' yoguə' beṇə' lao' syodan' bosə'ozenague' che' tcho'a tšao', beṇə' gol ca' na' xte no bi'i xcuidə' na' gosə'əne' che': —Lele bengan' nse'e yelə' guac che Diozən'.

¹¹ Zan iz bosə'ozenagteze' che' chedə' bentontene' yichjla'ažda'oga'aque'enə' len yelə' goža' che'enə'. ¹² Pero catə' Lipən' gwdixjui'e dižə' cobə che Jesocristən' len lega'aque' na' bzejni'ine' lega'aque' can' nabia' Diozən' notə'ətezə beṇə' soe' latjə, na' gwse'ejle'e che', na' gosə'əchoe' nis, beṇə' byo na' no'olə. ¹³ Na' lenczə Simonnə' gwyejle'e che', na' gwchoe' nis na' goque' tozə len Lipən' gwdalene' le', na' bebanene' ca' naquə miłagr ca' de'en chon Lipən' na' yeziqə'əchlə de'e zaquə' yebanczecho.

¹⁴ Nach apostol ca' nitə' Jerosalennə' gwse'enene' de que beṇə' Samaria ca' bachoso'ozenague' xtižə' Diozən', nach bosə'osele'e Bedən' len Juannə' Samarian'. ¹⁵⁻¹⁶ Na' catə' besə'əžine'enə' gwso'one' orasyonnə' par nič so Spirit che Diozən' lo'o yichjla'aždao' beṇə' Samaria ca', chedə' ca orən' bitonə' son lo'o la'ažda'oga'aque'enə' la'aṇə'əczə bagosə'əcho'e nisən' gosə'əne' so'onlilažə'e Jeso'osan'. ¹⁷ Nach bosə'oḅoa na' apostol ca' yichjga'aque'enə' par gwzo Spiritən' lo'o yichjla'ažda'oga'aque'enə'.

¹⁸ Na' ble'i Simonnə' can' chso'on apostol ca' choso'oḅoa ne'en yichj beṇə' par chzo Spiritən' len lega'aque', na' bšabene' lega'aque' mech. ¹⁹ Gože' lega'aque': —Legon par nič nada' gaquə xoa na'anə' yichj beṇə' na' so Spiritən' len lega'aque' can' chonle.

²⁰ Nach Bedən' gože'ene': —Cuiayi'ilenə' xmecho'onə' de'en chonlizo' xbabən' de que guac si'o yelə' chnabia' che Diozən' len mech. ²¹ Bitə zaco'o par gonə' ca' naquə de'e nga chonto' chedə' yichjla'ažda'ogo'onə' naquan mal lao Diozən'. ²² De'en cheyalə' gono', bedinje ca' naquə de'e malən' chono' na' gwnab goclen lao Diozən' par nič yezi'ixene' chio' ca' naquə xbabən' yo'o

lo'o yichjla'ažda'ogo'onə'. ²³ Nacbia' chnabia' de'e malən' le' de'en yo'o lo'o yichjla'ažda'ogo'onə' na' ngo'on le' nez malən' gan' cuiayi'o.

²⁴ Nach Simonnə' boži'en gože' le': —Leṇab goclen lao Xančon' par nada' nič ni to de'e nga bač gwnao' cui gaquəšga čhia'.

²⁵ Na' lao zjəya'ac Bedən' len Juannə' Jerosalennə' gwso'eche' xtižə' Diozən' len beṇə' ža' yež zan gan' mbane Samarian' na' gwso'e dižə' can' bagoclen Diozən' lega'aque'.

Lipən' na' beṇə' Ethiopian'

²⁶ Nach Xančo Diozən' bsele'e to angl par gože' Lipən': —Gwyej gan' xoa nez de'en chetj Jerosalennə' na' chden latjə dašən' par yež de'en nzi' Gasa.

²⁷⁻²⁸ Nach Lipən' gwlo'e nezən' na' lao zde'enə' ble'ine' to beṇə' Etiopia zeyo'e to lo'o carret zeze'e gwyeje' Jerosalennə' je'elaogüe'e Diozən'. Le' naque' to beṇə' eunoco na' naque' tesorer čhe no'olə gwnabia' čhe beṇə' Etiopia ca' no'olən' le' Candase, na' yo'ote lao na' tesorerən' yoguə'əloṭte byen čhe no'olə gwnabia'anə'. Na' lao zeyo'e lo'o carretən' chlabe' libr de'en bzoj de'e profet Isaiazən' ben' be' xtižə' Diozən' cana'. ²⁹ Nach Spirit čhe Diozən' gožən Lipən': —jəyexen carretən' na' gwyejlene' txen.

³⁰ Nach gwyejdoch Lipən' par jəyexene' carretən' na' benene' chlab ben' libr de'en bzoj de'e profet Isaiazən'. Nach gože'ene': —čEchejni'ido' de'en chlabo'onə'?

³¹ Na' tesorerən' boži'en gože' Lipən': —čNacxa gaquə šejni'ida'anə'? la' cagua no nla' no əgwzejni'ine'en nada'anə'.

Nach gotə'əyoine' Lipən' par nič gwlo'e Lipən' gwche'elene'ene'.

³² Na' part de'en chlabe'enə' nyojən' nan:

Ca to xilə' bia nxobə beṇə' par gote'eb,
na' ca to xilə' dao' bia cui chosya'a catə' chšibe'eb,
can' gone', bito bi əne' catə'an yesə'əzi'ičhiže'ene'.

³³ Na' yesə'əque'e yelə' bala'an čhe'enə'.
Na' bito so'one' yelə' jostis čhe' can' cheyaṭə' gaquən.
Na' tant beṇə' mal ša' ca tyempən,
so'ote'ene' la'aṇə'əczə bito bi de'e mal none'.

³⁴ Nach tesorerən' gože' Lipən': —Benšga goclen gwna nada' no čhein' na profetən' ca', čəče cuine'en ne' ca' o šə čhe beṇə' yoblə?

³⁵ Nach Lipən' gwzolaogüe' bzejni'ine' bi zejen part gan' chlab tesorerən' na' leczə gož Lipən' le' čhe dižə' güen dižə' cobə čhe Jeso'osən'. ³⁶ Na' ca' chac besə'əžine' ga žia nis, nach tesorerən' gože' Lipən': —Nga žia nis. čEcabi gaquə čhoa' nisən' na'a?

³⁷ Nach Lipən' gože'ene': —Šə chejli'o čhe Jesocristən' do yichj do lažo'o, gwaquə čho' nisən'.

Nach gwne': —Chejli'a de que Jesocristən' naque' Xi'in Diozən'.

³⁸ Nach bene' mendad bcuezə ben' chsa' carretən' len, nach betj Lipən' len tesorerən' jəsə'əžo'e lo'o nisən' par nič Lipən' bcho'ene' nis. ³⁹ Na' catə' besyə'əchoje' lo'o nisən', Spirit čhe Diozən' le'e beče'ete Lipən' ga yoblə, na' bitoch ble'i tesorerən' le'. Na' mbalaz beza' tesorerən' beyo'e lo'o carretən'.

⁴⁰ Nach Lipən' bžine' yež de'en nzi' Asoto na' gwzolaogüe' gwduxjui'e dižə' güen dižə' cobə čhe Jesocristən' to to yež de'e zjəchi' galə'əzə xte bžinte' Sesarean'.

1 Na' Saulən' con chdacze' cho'e dižə' can' chene'ene' gote' beṇə' ca' chso'onlilažə' Xancho Jesocristən' na' chdacze' cheyiljlaže'e naclə gone' gote' lega'aque'. Na' de'e na'anə' gwyeye' lao beṇə' gwnabia' che bχoz che nasyon Izraelən'. 2 Na' Saulən' gwṇabene' beṇə' gwnabia'anə' to yiš de'e goxe'e yoso'olab beṇə' ža' to to yo'odao' ca' niṭə' Damascon' na' güe'en dižə' ənən de que nape' yelə' gwnabia' par sene' beṇə' ca' bachso'onlilažə' Jesocristən' na' gwcheje' lega'aque' par əche'e lega'aque' Jerosalennə', la'anə' beṇə' byo o no'olə. 3 Na' bnežjue'ene' yišən' nach gwlo'e nezən' na' bazon əžine' Damascon' cata' to de repentə to be'eni' de'e za' yoban' gwyechjən le'. 4 Na' bgüixe' lao yon'. Na' lao de'enə' benene' che' to beṇə' le': —Saul, çbixchen' nlagzejə nlagzido' nada'?

5 Nach Saulən' boži'en gože': —çNo le' Señor?

Nach be'enə' gože'ene': —Nada' Jeso'osən' nlagzejə nlagzido'. Na' de'en chono' contr nada', chone zi' cuino' can' chac che to go'oṇ bia'an chlibə' lao ya la de'en zo lao garrošən'.

6 Na' do chaž do chžebze' gože': —Xana' Jeso'os, çbin' che'endo' gona'?

Nach Xancho' gože'ene': —Beyas na' gwyey syoda Damascon' na' to beṇə' əne' le' de'en cheyalə' gono'.

7 Na' beṇə' ca' žag Saulən' benit beçolj goc lo'o yichjla'aždaoga'aque'enə' de'e tant besə'əžebe' de'en goquən' na' de'en gwse'enene' xnen' na' cui no besə'əle'ine'. 8 Nach beyas Saulən', pero cata' beṇə' jelaogüe'enə' con cuich ble'ine'. Na' beṇə' ca' nžague'enə' gwso'oçe'e ne'enə' gosə'əche'ene' Damascon'. 9 Na' šonə ža gwzoe' sin cui ble'ine' na' bito güe'ej gwdaogüe'.

10 Na' zo to beṇə' chonlilažə' Xancho Jesocristən' Damascon' beṇə' le Ananias, na' Ananiasən' ble'idaogüe'ene' Xancho'. Na' Xancho' gože'ene': —Ananias.

Na' boži'en gože': —Nga zoa' Xana'.

11 Nach Xancho' gože'ene': —Gwzoža' na' gwyey liž Jodas de'en zo lao lqueyən' de'en nzi' "De'e Licha", na' ṇabo' to beṇə' le' Saul beṇə' Tarso. Bachone' orasyon. 12 Na' babena' par ble'idaogüe'ene' le' gwyo'o yo'o gan' zoe'enə' na' bχoa na'onə' jela'ogüe'enə' par niç ye'le'ine'.

13 Nach Ananiasən' boži'en gože': —Xana', babenda' beṇə' zan chso'e xtižə' benga ca naquə de'e mal juisyən' babene' Jerosalennə' len beṇə' ca' bagwlejo' par zjənaque' lažə' na'onə'. 14 Na' chəsə'əne' ze'e nga noxe'e yiš che bχoz əblao ca' par sene' yogua'əloj neto' chonto' orasyon cholgüižto' le'.

15 Nach Xancho Jesocristən' gože' Ananiasən': —Gwyey, la' bagwleja' Saulən' par niç šeje' entr beṇə' Izrael ca' na' beṇə' ca' cui zjənaquə beṇə' Izrael na' do lao rei par əgwzejni'ine' lega'aque' çhia' nada'. 16 Na' gwlo'ida'ane' ca' naquə de'e yašə' de'e zi' de'e gaquə che' de'en əgwzenague' çhia'.

17 Nach Ananiasən' gwyeye' gan' zo Saulən' na' gwyo'e lo'o yo'onə' na' bχoa ne'enə' jelao Saulən' gože'ene': —Saul dao', Xancho Jeso'osən' ben' əbloe' laogüe' le' tnez gan' za'onə' babsele'e nada' par zedalanə' a le' par niç ye'le'ido' na' yedəṇabia' Spirit che Diozən' le'.

18 Nach le'e besy'əyiñte de'e ca' ža' jelaogüe' ca' zjənaquən ca no yid bdi'ej na' le'e bele'iteine'. Nach le'e gwzoža'ate' par gwyeye' gan' gwchoe' nisən'.

19 Na' gwdechlə beyaogüe' na' beyaclaže'e. Na' bega'əne' Damascon' yeto çhopə ža len beṇə' ca' chso'onlilažə' Xancho'.

Saulən' be'e xtižə' Diozən' Damascon'

20 Na' lgüegwə gwzolao gwyeye' to to yo'odao' par be'e dižə' che Jeso'osən' de que naque' Xi'iqn' Diozən'. 21 Na' yogua' beṇə' ca' chse'enene' dižə' de'en

be'enə' chesyə'əbanene' na' chse' l'juežjga'aque': —¿Ecaguə bengan' chda chonit cholane' be'nə' ca' chso'on orasyonnə' lao Jeso'osən' Jerosalennə'? na' ʔəcaguə par na'acžən' bide' nga na'a, par əgwčheje' be'nə' ca' na' žjue'e lega'aque' lao bəox əblao ca'?

²² Pero na' Saulən' tža tža goquəch be'e dižə' len yelə' chnabia' che Diozən' na' Diozən' goclene'ene' par be'e dižə' che Jeso'osən' clar de que naque' ben' bselə' Diozən' par chaclene' be'nə'chən', na' be'nə' Izrael ca' ža' Damascon' bito besə'əželene' bin' yesə'əne' chedə' gwsa'ache'ine' de que de'en che'e lega'aque' naquan de'e li.

Saulən' bito goque' lao na' be'nə' Izrael contr che' ca'

²³ Na' catə' bagoc sša cho'elen Saulən' be'nə' Damasco ca' xtižə' Jesocristən' nach boso'oxia be'nə' Izrael ca' so'ote' Saulən'. ²⁴ Na' gosə'anite'e chsa'ape' to to cho'a puert che ze'enə' de'en nyechj syodan' par yesə'əzene' Saulən' so'ote'ene' batə'ətezə yechoje' pero na' Saulən' gocbe'ine' ca naquan' bazjəchi'inaogüe'ene'. ²⁵ Nach be'nə' ca' chso'onlilažə' Jesocristən' besyə'əletje'ene' le'e ze'enə' še'elə besyə'əgüe'ene' to lo'o žomə cuent goc bechoje' lao' syodan'.

Gwyej Saulən' Jerosalennə'

²⁶ Na' catə' bežin Saulən' Jerosalennə' gone'ene' lene' be'nə' ca' chso'onlilažə' Jesocristən' na', pero yoguə'əlole' besə'əžebe' le', bito gwse'ejle'e šə de'e li bachonlilažə'e Jesocristən'. ²⁷ Nach Bernaben' gwčhe'e Saulən' ja'aque' gan' ža' apostol ca' na' be'elene' lega'aque' dižə' can' goquə che Saulən' lao ngüe'e nezən' zde' Damascon' gož'e' lega'aque' de que Xancho Jeso'osən' be'elene' Saulən' dižə'. Na' leczə gož Bernaben' lega'aque' de que Saulən' babe'e xtižə' Jeso'osən' Damascon' sin cui chžebe'. ²⁸ Nach apostol ca' gwse'ejle'e can' goc che Saulən', nach gwzoloao gwdalen Saulən' be'nə' ca' chso'onlilažə' Jesocristən' Jerosalennə'. ²⁹ Na' sin cui bi chaž chžebe' gwzolaogüe' chzejni'ine' be'nə' Izrael ca' dižə' che Xancho Jeso'osən'. Na' be'e dižə' len be'nə' ca' chsa'ac por dižə' griego, bzejni'ine' lega'aque' xtižə' Diozən' clar, pero na' lega'aque' gwse'enczene' so'ote'ene'. ³⁰ Na' gwsa'ache'i be'nə' ca' chso'onlilažə' Jesocristən' Jerosalennə' de que be'nə' ca' bazjəchi'inaogüe' so'ote'ene', nach gosə'əche'ene' ja'aque' syoda Sesarean' na' bosyo'osele'ene' par syoda Tarson'.

³¹ Na' ca naquə be'nə' ca' chəsə'ədopə chəsə'əžague' chso'elaogüe'e Jesocristən' doxenlə Jodean', Galilean' na' Samarian' gosə'anite'e binlo, notoch no no boso'oči' boso'osaquə' lega'aque', na' gwyejach gwso'onlilažə'əche' Xancho Jeso'osən' na' boso'ozenague' che' con bin' bzejni'ine' lega'aque'. Na' Spirit che Diozən' btipəchən lažə'əga'aque' na' benən par gwyanga'aque'.

Beyaque ben' le Eneas

³² Ca naquə Bedən' cheje' to to yež gan' ža' be'nə' ca' bagwlej Diozən' par zjənaque' lažə' ne'enə' par chjəlane'e lega'aque', na' to ža gwyeye' jəlane'e be'nə' ca' ža' Lida. ³³ Na' yež Lidan' jti'e to be'nə' le' Eneas, be'nə' bachac xon' iz die' camən' chedə' nat to part cuer che'ena'. ³⁴ Nach gož Bedən' le': —Eneas, Jesocristən' cheyone' le'. Gwyas na' btob xcamo'onə'.

Nach le'e gwyaste be'ena'. ³⁵ Na' yoguə'əlole be'nə' ža' Lidan' na' be'nə' ža' yež de'en nzi' Saron besə'əle'ine' be'ena' babeyaquene', na' gosə'əbejyichje' costombr chega'aque' de'en zjənaogüe' par gwso'onlilažə'e Xancho Jesocristən'.

Dorcasən' bebane' ladjo be'nə' guat ca'

³⁶ Na' ca tyemp na' to syoda de'en nzi' Jope zo to no'olə le Tabita na' lecza le' Dorcas. Na' chonlilaže'e Jesocristan' na' zotezə zoe' chone' de'e güen, chaclene' no beṇə' yašə' beṇə' chyažj chḥine. ³⁷ Pero na' gocšene Dorcasən' na' gottechgüe' na' besya'əguazje'ene' na' beyož na' gosə'əxo'ene' lo'o yo'o de'en naquə' chop cuia. ³⁸ Na' galə'əzə' chega'an yež Lidan' len Jopen' na' beṇə' ca' chso'elao' Jesocristan' Jopen' gosə'ənezene' de que Bedən' zoe' Lidan'. Nach bosə'osele'e chopə beṇə' jse'etə'əyoine' Bedən' gwse'ene': —Benšga goclen yo'o len neto' ṇa'atec ṇa'a.

³⁹ Nach Bedən' le'e gwza'ate' gwyeye' len beṇə' ca', na' catə' besə'əžine' Jopen' gosə'əche'ene' lo'o yo'o gan' xoa beṇə' guatən' na' le'e gosə'əbiguə'te yoguə' no'olə gozeb ca' laogüe'enə' chəsə'əbeže' choso'olo'ine' le' lachə' de'en ben de'e Dorcasən' lao hguane', no bestid na' no camis. ⁴⁰ Nach Bedən' gwleje' yoguə'əlol beṇə' ca' chyo'olə na' bzo xibe' bene' orasyon. Na' beyechje' chgüie' cuerp che no'olən' na' gože'ene': —Tabita, gwyas.

Nach le'e beṇə'ate jelao de'e Dorcasən' chgüie' Bedən' na' le'e bebe'ete'. ⁴¹ Nach Bedən' beṇə'e ne'enə' bosəže'ene' nach goxe' no'olə gozeb ca' na' yeziquə'əchlə beṇə' ca' zjənaque' lažə' na' Diozən' na' blo'ine' lega'aque' de que babəban Dorcasən'. ⁴² Na' yoguə'əlol beṇə' Jopen' gwse'ene' rson can' goquən', na' beṇə' zanch gwso'onlilaže'e Xancho Jesocristan'. ⁴³ Na' Bedən' bega'əne' Jopen' zan ža, gwzoe' liž to beṇə' le Simon, beṇə' gocol yid.

10

Bedən' na' Cornelion'

¹ Na' Sesarea na' zo to beṇə' le Cornelio, naque' capitan che to gueyoa soldad, na' zjənzi'e "Beṇə' Italia". ² La'əṇə'əczə Cornelion' cui naque' beṇə' Izrael, t xen len family che' ca' chso'elaogüe'e Diozən' na' Cornelion' zotezə zoe' chape' Diozən' respət na' chaclenteze' beṇə' yašə' beṇə' chyažj chḥine, na' chonteza chone' orasyon lao Diozən'. ³ Na' goc che' to ža do cheda šəṇə' ble'idaogüe'ene' to angl che Diozən' gwyo'e gan' zo'ena' na' anglən' gože'ene': —Cornelio.

⁴ Nach Cornelion' chgüiachgüe' lao anglən' na' do chžebe' gože'ene': —žBixan' ža Xana'?

Nach gož anglən' le': —Diozən' nezene' can' zotezə zo' chono' orasyon na' chnežjo' de'en chəsə'əyazje beṇə' yašə', na' Diozən' chene'ene' gaquəlene' le'.

⁵ De'e nga gono' ṇa'a, bselə' beṇə' žjəsə'əxi'e to beṇə' zo Jopen' beṇə' le Simon na' lecza le Bed. ⁶ Zoe' liž to beṇə' gocol yid na' be'enə' lecza lie' Simon, na' liž ben' zon cho'a nisdə'onə'. Na' Simon Bedən' əne' le' bin' cheyałə' gono'.

⁷ Catə' beza' anglən' Cornelion' goxe' chopə mos che' ca' na' to soldad beṇə' chaclen le', na' soldadən' lecza cho'elaogüe'e Diozən'. ⁸ Na' Cornelion' bzejni'ine' lega'aque' yoguə'əlolte can' goquən' nach bselə'e lega'aque' Jopen'. Na' gosə'əgüe'e nezən' əzja'aque'.

⁹ Na' beteyon' galə'əzə' bazja'aque' par yesə'əžine' lao' syoda Jopen' catə' Bedən' gwlo'e yichjo'o che yo'o gan' zo'ena' ca do gobiž par jene' orasyon'. ¹⁰⁻¹¹ Na' lao chone' orasyonṇə' gwdonchgüe' xte gone'ene' gaogüe' lgüegwza. Na' žlac chac de'en gaogüe'enə' ble'idaogüe'ene' le'e yoban' chetj ca to lachə' xen na' nchej dap squinten na' chetjən par lao yon'. ¹² Na' lo'ina' zjəžə' yoguə' cłaste bia yixə' ža' yežlyon', bia žia tap ni'a ne'i na' bia zjanxobə' le'i lao yon', na' len bia žia xile'e bia chaš le'e yoban'. ¹³ Nach benene' gož Diozən' le': —Gwyas Bed na' bet bia ca' gwdao.

14 Nach Bedən' gože'ene': —Bito gaoga'aca'ab Xana'. Ni šlinzə cuinə' gaogua' bia zban ca' zjanac ca' na' bia cui de lsens len lei cheto'onə' gaoto'.

15 Nach Diozən' gože' le' de'e əgwchope: —Bian' bač gwnia' gaogo' bito ənao' de que bia əzbanga'aquən'.

16 De'e gwyon lase gož Diozən' le' ca' nach begüe lachə'an le'e yoban'. 17 Žlac chacžejlažə' Bedən' bi zejen ca' naquə' de'en ble'idaogüe'ene'enə' besə'əžin beṇə' ca' əbselə' Cornelion' cho'a puert che Simon gocol yidən' bagosə'əṇabe' gan' zo liže'enə'. 18 Nach zižjo gosə'əṇabe' šə le na' zo to beṇə' leczə le' Simon Bed. 19 Pero Bedən' nechone' xbab che de'en ble'idaogüe'ene' catə'əczlə gož Spirit che Diozən' le': —Šonə beṇə' chasyə'əyilje' le'. 20 Gwoža' na' beyetj gwyejlenga'aque' na' bito gaquəžejlažo'o la'anə'əczə cui zjanaque' beṇə' Izrael la' nada' əbselə'əga'aca'ane'enə'.

21 Nach Bedən' beyetje' jəšague' beṇə' ca' əbselə' Cornelion' nach gože' lega'aque': —Nga zoa', nadan' Simon Bedən'. ĵBin' cheyilje nada'?

22 Nach gwse' beṇə' ca' le': —To capitan beṇə' le Cornelio əbselə'e neto'. Le' zdacze' chone' de'e güen na' cho'elaogüe'e Diozən', na' yoguə'əloj beṇə' Izrael ca' chso'e xtiže'e de que naque' beṇə' güen. To angl che Diozən' gože' le' deṇabe' šejo' liže'enə' nič əgwzenague' chio' šə bin' yo'one'.

23 Nach gwlo'o Bedən' lega'aque' yo'o na' besyə'əga'anlene' le' tže'. Nach beteyon' Bedən' gwyase' gwyejlene' lega'aque' na' gwche'e to čopə beṇə' Jopen' beṇə' chso'ənilažə' Jesocristan'.

24 Na' ža əgwchop žei besə'əžine' Sesarean'. Na' Cornelion' bač ntobe' bišə' ljuəžje' na' beṇə' ca' nžaguəche' migw, baže'e liže'enə' chesə'əbeze'. 25 Na' catə' bžin Bedən' liž Cornelion' le'e bchojte Cornelion' bšague'ene' na' bzo xibe' laogüe'ene' be'elaogüe'ene'. 26 Na' Bedən' bosə'ože'ene' gože'ene': —Bezoža'. Leczə beṇə'ch nada'.

27 Na' ne'e cho'elene' le' dižə'an ca' gwyo'e lo'o yo'on na' ble'ine' beṇə' zan baža' lo'o yo'onə'. 28 Nach gože' lega'aque': —Le'e nezczele de que lei che neto' beṇə' Izrael nan de que bito cheyalə' šo'oto' liž beṇə' cui zjanaquə beṇə' Izrael na' nan bito cheyalə' gonto' txen len le'e cui nacle beṇə' Izrael. Pero bač bzejni' Diozən' nada' de que ni tozə beṇə' cui cheyalə' gona' xbab che' de que naque' beṇə' zban par šo'a liže'enə'. 29 De'e na'anə' catə' bselə'əle beṇə' ca' bedəsə'əxi' nada' bito goquəžejlaža'a šə naclə gona' sino babida' do laža'a na' na'a che'enda' ənezda' ĵbin' gwnio' nada'?

30 Nach Cornelion' gože'ene': —Na'a chac tap ža leczə do cheda šonə zoa' sin cui bi naogua', na' chona' orasyon liža' nga, catə'əczlə ble'ida' to beṇə' byo laogua'anə' nyaze' to lachə' de'e chey che'eni'. 31 Nach gože' nada': “Cornelio, ca naquə' orasyon chio'onə' chono', bač bzenag Diozən' len na' nezene' chnežjo' de'e chyažj chchine beṇə' yašə'. 32 Bselə' to čopə beṇə' žjasə'əxi'e to beṇə' zo Jopen' beṇə' le Simon Bed. Zoe' liž to beṇə' leczə le Simon, to beṇə' gocol yid. Liž beṇə' gocol yidən' zon galə'əzə cho'a nisdə'onə'. Na' catə' la' Bedən' ližo' nga güe'elene' le' dižə'.” 33 Nachən' le'e bselə'ətia' beṇə' ca' par bedə'əsə'əxi'e le', na' choxcwlientio' de'en bač bido'. Na' nezcze Diozən' de que yoguə'əto' nitə'əto' əgwzenagto' yoguə'əlojte de'en baben Diozən' mendad ənao'.

Bedən' be'e dižə' liž Cornelion'

34 Nach Bedən' gwzolaogüe' be'e dižə'an gwne': —De'e li bač nezdə' notono nla' beṇə' ənacho nzo Diozən' le' to šla'əzə. 35 Sino que gatə'ətezə beṇə' nasyon con beṇə' chso'eləo' Diozən' do yichj do lažə'əga'aque' na' chso'one' de'e güen,

Diozən' chebeine' lega'aque'. ³⁶ Diozən' bsele'e Jesocristən' par naque' Xan yogua'əlol beṇə', na' bsele'ene' entr neto' beṇə' Izrael, na' gwdixjue'ine' neto' de que gwaqua soto' binlo len le' šə gonlilažə'əto' Xi'ine' Jesocristən'. ³⁷ Nezczele can' goquə Galilean' na' doxen Jodean'. De'e Juannə' gwdixjui'e xtižə' Diozən' na' bchoe' beṇə' nis. Na' gwdechlə Jeso'os beṇə' Nasaretən' gwdixjui'e xtižə' Diozən'. ³⁸ Diozən' gwleje' Jeso'osən' par chaclene' chio'o beṇə' na' be'ene' Spirit che'ene' na' yelə' chnabia'. Na' gwda Jeso'osən' bene' de'e güenə' na' beyone' yogua'əlol beṇə' ca' chsaquə'əzi' gwxiye'ene', cheda' Diozən' zoe' len le'. ³⁹ Neto' nezeto' na' cho'eto' dižə' ca' naquə' yogua' de'e güenna' de'e ben' Jeso'osən' na' de'en bsed blo'ine' Jodean' na' Jerosalennə', na' lecca' ble'ito' can' gwso'te'ene' boso'ode'ene' to le'e yag coroz. ⁴⁰ Pero na' Diozən' bolis bosbane'ene' ladjo beṇə' guat ca' beyon ža na' ben Diozən' par nič Jeso'osən' blo'e laogüe' neto'. ⁴¹ Caguə' yogua'əlol beṇə' besə'əle'ine' Jeso'osən' cata'ən bebane' ladjo beṇə' guat ca', pero Diozən' gwleje' neto' par cho'eto' xtiže'ene' na' bene' par nič ble'ito'one'. Na' neto' güe'ej gwdaolento'one' txen gwde bebane' ladjo beṇə' guat ca'. ⁴² Na' Jeso'osən' bene' mendad chixjue'ito' beṇə' de que Diozən' əbzoe' le' par əchoglaogüe'en che' yogua'əlol beṇə' šə non' napə dolə', beṇə' ca' zjəmban na' beṇə' ca' bagwsa'at, na' neto' cho'eto' dižə' de que can' gone'. ⁴³ Na' libr ca' de'en boso'ozoj yogua' profet ca' beṇə' ca' gwso'e xtižə' Diozən' cana'ate zjənyojən chesə'ənan de que nota'ətezə beṇə' so'onlilažə' Jesocristən' Diozən' yezi'ixene' xtolə'əga'aque'ene'.

Spirit che Diozən' gwyo'on lo'o yichjla'aždao' balə beṇə' cui zjənaquə beṇə' Izrael

⁴⁴ Ne'e cho'ete Bedən' dižə'ən ca' cata' Spirit che Diozən' gwyo'on lo'o yichjla'aždao' yogua' beṇə' ca' choso'ozenag dižə' de'en choe'ene'. ⁴⁵ Na' beṇə' Izrael ca' chso'onlilažə' Jesocristən', beṇə' ca' žag Bedən' cata'ən besə'əžine' liž Cornelion', besyə'əbanene' de que Spirit che Diozən' gwyo'on lo'o yichjla'aždao' beṇə' ca' cui zjənaquə beṇə' Izrael. ⁴⁶ Gwsa'acbe'ine' gwyo'o Spirit che Diozən' lo'o yichjla'aždao' beṇə' ca' ža' liž Cornelion' cheda' gwso'elaogüe'e Diozən' na' gwso'e gwde gwdele dižə' de'en cui gwse'ejni'ine'. ⁴⁷ Nach Bedən' gože' beṇə' Izrael ca' žague': —Bito bi de de'e gwžon yesə'əchoa beṇə' quinga nisən', la' nacbia' bazo Spirit che Diozən' len lega'aque' can' zon len chio'o.

⁴⁸ Nach Bedən' bene' mendad gosə'əchoe' nis par gosə'əneze beṇə' de que chso'onlilaže'e Jesocristən'. Na' gwsa'atə'əyoine' le' par bega'əne' yeto čhopə ža.

11

Bedən' gože' beṇə' Jerosalen ca' can' goquən'

¹ Na' apostol ca' na' yeziquə'əchlə beṇə' ca' ža' Jodean' beṇə' ca' chso'onlilažə' Jesocristən' gwse'ene' de que lecca len beṇə' ca' cui zjənaquə beṇə' Izrael bachso'one' čega'aque' xtižə' Diozən'. ² Nach Bedən' beze'e beyeje' Jerosalennə' gan' nita' beṇə' Izrael ca' chso'onlilažə' Jesocristən' na' gwsa'acyože' le'. ³ Gwse'ene': —čBixchen' bagwyjejo' gan' ža' beṇə' ca' cui zjənaquə beṇə' Izrael na' jtaolenga'aco'one'? Malən' babeno'.

⁴ Nach Bedən' gwzolaogüe' be'elene' lega'aque' dižə'ən tcho'a tšao' ca' naquən' goquə che', gože': ⁵ —Lao zoa' lao' syoda Jopen' chona' orasyon Diozən' bene' par nič ble'idaogüe'eda' ca' to lachə' xen nchej dapte squinei ca' chetjən le'e yoban' za'an gan' zo'ana'. ⁶ Na' bgüiayana'an na' ble'ida' lo'ina' ža'an bia yixə' ca'

chaš yežlyon' bia žia tap ni'a ne'i, na' ble'ida' bia zjənxobə le'i lao yo, na' bia žia xile'e bia chaš le'e yoban' na' bałə bia ca' zjənacob bia əznia. ⁷ Na' benda' gwna Diozən' nada': "Gwyas Bed, na' bet bia ca' gwdao." ⁸ Nach božia'an gwnia': "Xana', bito gaoga'aca'ab. Ni šlinzə cuiṇə' gaogua' bia zban ca' zjənac ca' chedə' cui de lsens len lei cheto'onə'." ⁹ Na' de'e əgwchop lase Diozən' gwne': "Bian' bačh gwnia' gaogo' bito əṇao' de que zjənacob bia zban." ¹⁰ Šon' ši'i gože' nada' ca' nach begüe lachə'an le'e yoban'. ¹¹ Ze'e beyož ble'idaogüe'eda' de'enə' cata' bla'ac šonə beṇə' byo gan' zoa'anə' beṇə' za'ac Sesarean'. ¹² Na' Spirit che Diozən' bzejni'in nada' de que cheyalə' ša'alenga'aca'ane' sin cui gaquəžejaža'a, na' gwchi'a beṇə' bišə'əcho quinga xop gwyejto', na' bžinto' Sesarean' liž ben' le Cornelio. ¹³ Nach Cornelion' be'elene' neto' dižə' can' blo'e lao to angl le' liže'enə' na' anglən' gože'ene': "Bselə' beṇə' əžja'ac syoda Jopen' žjasə'axi'e to beṇə' le Simon Bed. ¹⁴ Be'ena' əne' le' na' family chio' nac gonle par ničh yechojle xni'a de'e malən'." ¹⁵ Nach cata' bžina' liž Cornelion' gwzolaogua' bi'a dižə'an len lega'aque', na' Spirit che Diozən' bedəson lo'o yichjla'ažda'oga'aque'enə' can' babedəson len chio'o. ¹⁶ Nach jsa'alaža'a xtižə' Xancho Jesocrisən' can' gwne': "De'e zaque'enə' can' ben Juannə' bchoe' beṇə' nis, pero de'e zaquə'əche' gac chele ca de'en yedəso Spirit che Diozən' lo'o yichjla'ažda'olen' nabi'a'an le'e." ¹⁷ Na' ca naquən' baben Diozən' par ničh zo Spirit che'enə' lo'o yichjla'aždaoga'aque'enə' can' babene' len chio'o, nabcia' zon len notə'ətezcho chonlilažə'əcho Xancho Jesocrisən'. Na' ĩnoxə naca' nada'anə' par gwžona' gon Diozən' de'en chene'ene' gone'?

¹⁸ Na' ca beyož bosə'ozenague' xtižə' Bedən' bitoch bi bi gosə'əne' contr Bedən' de'en gwyeje' liž Cornelion', sino gwso'e yelə' choxčwlen che Diozən', gosə'əne': —Na'a nezecho de que leczə len beṇə' ca' cui zjənaquə beṇə' Izrael chazlažə' Diozən' yesyə'ədinjene' xtolə'əga'aque'enə' ničh əgwnežjue' yelə' mban zejlicane chega'aque'.

Beṇə' ca' chso'elao' Jesocrisən' Antioquian' gan' mbane Siria

¹⁹ Na' gwde gwso'ot beṇə' blaoc che beṇə' Izrael ca' Estebannə' gosə'əzolaoga'aque' bosə'oči' bosə'osaquə'əchgüe' yeziquə'əchlə beṇə' ca' chso'onlilažə' Jesocrisən' nach beṇə' ca' chso'onlilaže'ene' gwsa'asə'asə'ale', bałə' ja'aque' do Fenisia, do Čipre na' do Antioquia gə mbane Siria. Na' lao chesə'əde'enə' bosə'osed bosə'olo'ine' con beṇə' zjənaquə beṇə' Izrael xtižə' Jeso'osən', bito bosə'osed bosə'olo'ine'en beṇə' ca' cui zjənaquə beṇə' Izrael. ²⁰ Pero na' to čopə beṇə' Čipre na' beṇə' Sirene beṇə' chso'onlilažə' Jesocrisən' cata' leczə besə'əxonje' ja'aque' Antioquian', na' na' gosə'əzolaogüe' gosə'əyixjue'ine' beṇə' ca' cui zjənaquə beṇə' Izrael dižə' güen dižə' cobə che Xancho Jesocrisən'. ²¹ Na' Xančon' goclene' lega'aque' len yelə' guac che'enə' na' beṇə' zan gosə'əbejyichje' costombr chega'aque' de'en zjənaogüe' na' gwso'onlilaže'e Xančon'.

²² Na' cata' gwse'ene beṇə' ca' chso'onlilažə' Jesocrisən' Jerosalennə' ca' naquən' bachac Antioquian', nach bosə'ose'e Bernaben' par gwyeje' Antioquian'. ²³ Na' cata' bžin Bernaben' Antioquian' ble'ine' de que de'e li bago-clenchgua Diozən' beṇə' ca', na' lechgualə bebeine'. Nach gwneyoine' lega'aque' ničə'ətežə nite'e yosə'ozenague' che Xančon' do yichj do lažə'əga'aque'. ²⁴ Bernaben' naque' to beṇə' güen, na' chonlilažə'əchgüe' Jesocrisən' na' Spirit che Diozən' chnabi'a'an yichjla'aždaogüe'enə'. Na' de'e na'anə' zanch beṇə' Antioquian' gwso'onlilaže'e Jesocrisən'.

²⁵ Gwde na' Bernaben' gwze'e zde' Tarson' par jəyedilje' Saulən, nach catə' beželene' le', gwche'ene' Antioquian'. ²⁶ Na' gosə'ənite'e Antioquian' tğüiz gwso'one' txen len beṇə' ca' chəsə'ədopə chəsə'əžag chso'elao' Jesocristən' na' boso'osed boso'olo'ine' beṇə' zanch. Na' Antioquia na'atequən' gwzola boso'osi'e beṇə' ca' chso'onlilažə' Jesocristən' beṇə' cristian chedə' choso'ozenague' che Cristən'.

²⁷ Lao nitə' Bernaben' na' Saulən' Antioquian' besə'əžin balə beṇə' Jerosalen beṇə' chsa'aš choso'ozenene' de'en bagož Diozən' lega'aque'. ²⁸ Na' entr beṇə' ca' besə'əžinnə' to beṇə' le Agabo gwzeche' lao beṇə' ca' zjəndopə zjənžag chso'elao' Jesocristən' be'e dižə' can' babzejni'i Spirit che Diozən' le' de que doxenlə yežlyon' gatə' to bgüin juisy. Na' catə' bžin ža gwnabia' ben' le Claudio doxen gan' mbane Roma, cana' goc bgüinnə' can' gwna Agabon'. ²⁹ Nach beṇə' ca' chəsə'ədopə chəsə'əžag chso'elao' Jesocristən' Antioquian' boso'oxi'e yesə'ətobe' mech par niç yosə'əsele'en əsa'aclene' beṇə' ljuəžjga'aque' ca' chso'elao' Jesocristən' gan' mbane Jodean'. Na' boso'oxi'e de que to toe' yoso'onežjue' segon ja'aquə'ətə' de'e gaquə yoso'onežjue'. ³⁰ Na' gwso'one' can' boso'oxi'enə' nach boso'osele'e Saulən' len Bernaben' Jodean' par jəsə'ənežjue' mechən' beṇə' ca' zjənaque' comisyon che beṇə' ca' chso'onlilažə' Jesocristən' Jerosalennə'.

12

Gwso'ote' Jacobən' na' gosə'əyixjue' Bedən' ližyan'

¹ Na' ca tyempən' Rei Erodən' bene' contr beṇə' ca' chso'onlilažə' Jesocristən' na' bene' mendad gosə'əzene' bale' na' boso'ochi' boso'osaque'e lega'aque'. ² Nach bene' mendad gwso'ote' Jacob beṇə' bišə' Juannə' gosə'əçhogue' yene'en len spad. ³ Na' goche'i Rei Erodən' chesyə'əbei beṇə' Izrael ca' de'en bene' mendad gwso'ote' Jacobən', nach bene' mendad gosə'əzene' Bedən' catə' bžin tyemp che lni pascon', lnin' catə'ən chsa'ogüe' yetxtil de'en cui bi xne'i nçhiçə. ⁴ Nach Erodən' gwdirixjue' Bedən' ližyan' na' bsele'e ši'into soldad beṇə' gwsa'ape' ližyan', tap güeje' do ža do yel. Erodən' bene' xbab cueje'ene' ližyan' te lni pascon' par gone' yelə' jostis che' lao lcue' na' so'ote'ene'. ⁵ Soldad ca' gwsa'apə'əçhgüe' Bedən' lao die' ližyan', pero na' ca naquə beṇə' ca' chso'onlilažə' Jesocristən' gwso'onchgüe' orasyon lao Diozən' par Bedən'.

Diozən' bebeje' Bedən' ližyan'

⁶ Na' to že' ca gwxežə ngüia Erodən' cueje' Bedən' ližyan' par so'ote'ene', Bedən' de' chtase' ladjo çhopə soldad na' ncheje' çhopə gden, na' lecza nitə'əte soldad beṇə' chsa'ape' cho'a puert che ližyan'. ⁷ Catə'əczla to de repentzə to angl beṇə' bsele' Xancho Diozən' bžine' lo'o ližyan' gan' de Bedən', na' gwyeni'ichgua lo'o ližyan'. Anglən' bte' cuit le'e Bedən' bosbane'ene' goze'ene': —Na'atec na'a gwyas.

Na' lao or na' le'e besyə'əyežte gdenə' zjənchej na' Bedən'. ⁸ Nach gož anglən' le': —Bego'o doby chio'onə' na' bolej xelo'on.

Nach ben Bedən' ca'. Nach goze' anglən' le': —Bechelə xadon chio'onə' na' beyo'o len nada'.

⁹ Nach bechoj Bedən' zenaogüe'ene', pero bito goche'ine' šə de'e li angl nan' chon ca' len le', con goquene' šə chle'ida'ogüe'ene'. ¹⁰ Beyož besyə'ədie' çhop cuente gan' nita' soldad ca' chsa'ape' ližyan', besyə'əžine' gan' zo puert saguannə' de'en naquə de ya gan' chəsə'əchoje' par chja'aque' lao syodan', con to gwłazzə puertən' byaljon par niç besyə'əchoje', na' ca to cuadr

babesa'aque' nach anglən' bocua'ane' Bedən' toze'. ¹¹ Cana'ach goche'i Bedən' de que de'e li babechoje' ližyan', nach gwne': —Bacheyache'ida' de'e ličza Xana' Diozən' babsle'e angl che'enə' par bosle' nada' lao na' Erodən' na' lao de'e ca' chsa'aque' beṇə' Izrael gwlaž chia' ca' so'one' len nada'.

¹² Na' nechonte Bedən' xbabən' ca' gwze'e gwyeje' liž Maria xna' Juan ben' leca' le Marcos. Na' liž Maria na' zjəndopə zjənžag beṇə' zan chso'one' orasyon. ¹³ Nach bsiže' cho'a puertaguannə' na' le'e bchojte to bi'i no'olə le Rode par jəgüiabo' no de'enə'. ¹⁴ Na' catə' bžimbo' par əsaljwbo' puertən' beyombia'abo' ši'i Bedən' na' de'e tant bebeibo' bito bsaljwbo' puertən' sino beyejdobo' gan' ža' beṇə' ca' jəyeyežbo' lega'aque' de que Bed nan' zecha cho'a puertən'. ¹⁵ Nach beṇə' ca' gwse'e: —ĵEcaguə chac tonto'onə'?

Pero lebo' gwzoczbo' segor de que le'enə'. Nach lega'aque' gwse'ebo' de que to angl beṇə' chapə chye' Bed na'anə'.

¹⁶ Pero Bedən' ne'e chsižcze' cho'a puertən'. Nach ja'aque' par boso'osaljue'. Catə'əczla besə'əle'ine' de que le'enə' besyə'əbanene' xte juisy. ¹⁷ Nach Bedən' bene' señy len ne'enə' par nič gwnite'e žizə boso'ozenague' be'e dižə' can' goquə bebej Xancho Diozən' le' ližyan'. Nach leca' gože' lega'aque' de que cheyałə' yesə'əzenene' Jacobən' na' yeziquə'əchlə beṇə' lježžga'aque' ca' can' bagoquən'. Nach beze'e zjəyede' ga yoblə.

¹⁸ Nach catə' gwye'eni'nə' yelə' goban juisy gwnitə' soldad ca' na' gwso'echgüe' dižə' gosə'əne' bixaczxa goquə len Bed na'anə'. ¹⁹ Na' ca naquə Rei Erodən', bene' mendad jəsyə'ədilje' Bedən' na' gwṇabene' soldad gop ca' nac goquən' bele'. Pero soldad ca' bitobi rson boso'onežjue'. Nach bene' mendad gwso'ote' soldad ca'. Nach gwza' Erodən' Jodean' par jzoe' Sesarean'.

Got Rei Erodən'

²⁰ Erodən' ža, chža'achgüe' beṇə' Tiro na' beṇə' Sidon ca'. Beṇə' ca' besə'əyazjene' yesə'əzi'e de'en əse'ej əsa'ogüe' gan' chnabia' Erodən'. De'e na'anə' boso'ocodə lježž beṇə' Tiron' na' beṇə' Sidon ca' par jəsə'ənežjue' Blaston' to regal, ben' naquə lao ne'i liž Erodən' nach Blaston' gwne' fabor lega'aque' lao rein'. Gwso'one' ca' par nič bzenag rein' čega'aque' catə' ja'aque' laogüe'enə' jəsə'əṇabe' yesyə'anite'e binlo len le'. ²¹ Nach Rei Erodən' bžie' bia' to ža əgwto'be' lega'aque' par əgwzoe' lban laoga'aque'enə'. Na' catə' bžin žan' rein' gwyaze' xalane' de'en naquə xoche de'en chaze' catə' chone' yelə' jostisən' nach gwchi'e xišne'e gan' chnabi'e na' bzoe' lban lao beṇə' ca' že'e ža'anə'. ²² Nach beṇə' ca' gwso'osye'e gosə'əne': —Diozən' cho'e dižə' caguə benachən'.

²³ Na' lao or na' bselə' Xancho Diozən' to angl par nič bene' ca' gocšene rein' gwžia beł bia lo'o le'enə' na' gote'. Goc che' ca' čedə' be'e latjə gwso'elao' beṇə' le' lgu'a əso'elaogüe'e Diozən'.

²⁴ Pero ca' naquə xtižə' Xancho Jesocristən' gosə' gwłaljəchən na' beṇə' zanch gwse'ejle'e čhein'.

²⁵ Na' Bernaben' len Saulən' beyož gwso'one' yoguə' de'en naquə so'one' Jerosalennə' nach besa'aque' jəya'aque' Antioquian'. Na' gosə'əche'e to beṇə' le Juan na' lete' Marcos.

13

Bernaben' na' Saulən' ja'aque' jəsə'ədixjui'e xtižə' Jesocristən' yež zita'

¹ Na' entr beṇə' ca' chəsə'ədopə chəsə'əžag chso'elaogüe'e Jesocristən' Antioquian' zjəlen beṇə' chəsə'əzenene' beṇə' yoblə bi de'e che'e Diozən' lega'aque',

na' zjalen beṇə' choso'osed choso'olo'ine' xtižə' Diozən'. Na' lega'aque' Bernaben', na' Simon ben' zjənsi'e Negr, na' Losio beṇə' Sirene, na' Saul, na' Manaen. Na' Manaenna' bgolə gwcha'ogüe' t xen len Rei Erodən' ben' gwnabia' Galilean'. ² Na' to ža cui bi zjəne'ej zjənao beṇə' ca' chso'onlilazə' Jesocristan', zjəndopə zjənžague' chso'one' orasyonṇə'. Catə'əczla gož Spirit che Diozən' lega'aque': —Lecuej Bernaben' len Saulən' par so'one' xšina'anə' con gatə'ətezə selə'əga'aca'ane'. ³ Nach beṇə' ca' gwso'onche' orasyonṇə' sin cui zjəne'ej zjənaogüe', nach bosoxo'ə na'aga'aque'ena' yichj Saulən' len yichj Bernaben'. Gwso'one' ca' par gosə'əgüe'e xšin Diozən' lao na' Bernaben' len Saulən'. Gwde na' bosoxo'əzine' lega'aque' dižə'.

Apostol ca' gwso'e xtižə' Jesocristan' Chipre

⁴ Nach Spirit che Diozən' bselə'an Bernaben' len Saulən' yež gan' nzi' Seleusia. Na' na' gwso'e lo'o barcon' par besə'əžine' Čhipre. Na' Čhipren' naquən to isla de'en chi' lo'o nisdə'onə'. ⁵ Besə'əžine' yežən' nzi' Salamina gan' mbane Čhipren' na' gosə'əzolaogüe' gosə'əyixjui'e xtižə' Diozən' lo'o yo'oda' che beṇə' Izrael ca'. Na' zjənche'e Juan ben' leczə le Marcos par chaclene' lega'aque'. ⁶ Na' ca' gwsa'əše' gosə'ədie' doxen Čhipren' par besə'əžine' gan' ne' Pafos. Na' Pafos na' jəsə'ədie' to beṇə' goža' le' Barjesos. Naque' beṇə' Izrael na' chxoayague' ne' de que chzenene' bi de'en che' Diozən' le'. ⁷ Barjesosən' naque' migw che gubernador ben' le Sergio Paulo. Sergio Paulən' naque' to beṇə' chejni'ichgüei. Na' le' goxe' Bernaben' na' Saulən' chedə' gone'ene' yoso'ozenene' le' xtižə' Diozən'. ⁸ Na' Barjesosən' leczə nzi' yeto le Elimas, zejen dižə' beṇə' goža'. Le' gone'ene' cui šejle' Sergio Paulən' xtižə' Bernaben' na' Saulən'. Nach bžone' par cui yoso'osed yoso'olo'i beṇə' ca' xtižə' Diozən'. ⁹ Na' ca' naquə' Spirit che Diozən' chnabia'achguan yichjla'azdao' Saulən', ben' leczə le Pab, nach bcos laogüen' bgüiachgüe' Elimasən'. ¹⁰ Nach gože'ene': —Naco' xi'in gwxiye'ena' yelə' goxoayag čhio'onə' na' yelə' beṇə' mal čhio'onə'. Bito chazlažo'o bitə'ətezə de'e güenna' na' bito chbezo' can' chžono' yesə'ənao beṇə' dižə' li che Xanto' Diozən'. ¹¹ De'e na'anə' Xanto' Diozən' gone' castigw čhio' na' əcho'lo' to tyemp, cui gaquə' le'ido' be'eni'ina'.

Nach le'e əgwčholte', gwde ca' to bejw lo'o jelaogüe'ena', nach gwzolaogüe' chgan chtope' cheyljle' no goxə' ne'ena' par yegüe'ene' nez. ¹² Gubernadorən' ble'ine' can' goquən' na' gwyeyje'e xtižə' Xancho Jesocristan', na' be-banchgüeine' can' nanṇə'.

Pabən' na' Bernaben' ja'aque' Antioquia gan' mbane Pisidia

¹³ Nach Pabən' len beṇə' ca' nžague'ena' besa'aque' Pafosən' gwso'e lo'o barcon' par besə'əžine' gan' nzi' Perge distrit che Panfilia. Na' Juan ben' leczə chse'e Marcos gwlejjichje' lega'aque' beyeje' Jerosalenna'. ¹⁴ Na' Pabən' len Bernaben' gwsa'aque' Pergen' na' besə'əžine' Antioquian' distrit che Pisidia. Na' catə' bžin ža dezcanzən' ja'aque' yo'oda'onə' na' jesə'əchi'ena'. ¹⁵ Na' ca' beyož bguab libr gan' nyoj lei che Diozən' na' de'en bosoxo'əzə de'e profet beṇə' ca' gwso'e xtižə' Diozən' cana', beṇə' ca' zjənaquə' gwnabia' che yo'oda'onə' bosoxo'əzə de'e to beṇə' gan' chi' Pabən' len Bernaben' na' gože' lega'aque': —Beṇə' bišə' šə de bi dižə' chene'ele güe'ele əneyoile beṇə' quinga, guaquə' ənalen na'a.

¹⁶ Nach gwzoža' Pabən' na' bene' señy len ne'ena' par nič nite'e žizə' yoso'ozenague', nach gwzolaogüe' gwne': —Le'e beṇə' Izrael na' nota'ətezachle chapple Diozən' respet, le'e gwzenag. ¹⁷ Ca' naquə' Diozən' ben' cho'elao' chio'o beṇə' Izrael gwleje' de'e xaxta'ocho ca' par bene' lega'aque' to nasyon xen catə'an ne'e nite'e zjənaque' beṇə' zita' Egipton', pero bžin ža bebej

Diozən' lega'aque' Egipton' len yelə' guac che'enə'. ¹⁸ Na' ca čhoa iz bguo'o bchejlaže'e len lega'aque' žlac gwsa'aše' latjə dašan'. ¹⁹ Diozən' bonitlaogüe' gažə nasyon gan' ne' Canaan par nič bnežjue' de'e xaxta'ocho ca' yežlyon'. ²⁰ Diozən' bene' ca gosə'ade tğüeja tğüeja beŋə' gwnabia' ca' gwso'on yelə' jostis chega'aque'enə' lao tap gueyoa šiyon iz, xte bžinte tyemp che de'e profet Samuelən' ben' be' xtižə' Diozən' cana'. ²¹ Nach gosə'əŋabe' so to rei par nabi'e lega'aque' na' Diozən' bnežjue' lega'aque' Rei Saulən' par gwnabi'e čhoa iz. Saulən' goque' xi'in ben' gwle Sis, beŋə' goljə lao dia che Benjamin. ²² Gwde na' Diozən' bocui'ize'e Saulən' nach bzoe' Rei Dabin' xi'in Jese par gwnabi'e. Na' Diozən' gwne' che Rei Dabin': "Bač ble'ida' Dabi xi'in Jesen', yičhja'laždaogüe'enə' naquən tozə len yičhja'laždaogua'anə'. Le' gone' yoguə'əlo' can' che'enda'anə'." ²³ Nach lao dia che Rei Dabin' gwlej Diozən' Jeso'osən' na' bene' par nič chac yebeje' chio'o beŋə' Izrael xni'a de'e malən' can' bene' lyebe. ²⁴ Antslə ze'e solao əgwsed əgwlo'i Jeso'osən', de'e Juannə' gwdixjui'e lao yoguə' beŋə' Izrael ca' de que cheyalə' yesyə'ədiŋjene' xtolə'əga'aque'enə' na' yesə'əchoe' nis. ²⁵ Na' catə' bžin ža beyož ben de'e Juannə' yoguə'əlo' de'en yo'o lao ne'e gone', gože' beŋə' ca': "Nada' bito naca' ben' chonlə xbab naca'. Caguə' nada'anə' ben' chbezle par gaqualene' nasyon chechon'. Ze'e za' be'enə' na' de'e tant zaquə'əche' ca' nada' xte bito zaca'a par lečhja' xele'enə'."

²⁶ Beŋə' bišə', chio'o naccho xi'in dia che de'e Abraannə' na' entr chio'o nitə' yebalə beŋə' chsa'apə Diozən' respet la'anə'əczə cui zjanaque' beŋə' Izrael. Par chio'onə' bselə' Diozən' dižə' can' gonjilažə'əcho Jeso'osən' par yebeje' chio'o xni'a de'e malən'. ²⁷ Beŋə' Jerosalen ca' na' beŋə' gwnabia' chega'aque' ca' bito gwsa'ache'ine' de que Diozən' bsele'e Jeso'osən'. Bito gwse'əjni'ine' de que che Jeso'os nan' bosozož de'e profet ca' beŋə' ca' gwso'e xtižə' Diozən' cana' le'e libr ca' choso'olabe' lo'o yo'odao' ca' yoguə' ža dezcanz. Na' de'en gosə'əchoglaogüe'en gwso'ote' Jeso'osən' goc complir can' nyojən. ²⁸ Sin cui bi xtolə' Jeso'osən' gotə', gosə'əŋabene' Pilatən' gone' mendad so'ote'ene'. ²⁹ Beyož gwso'one' complir yoguə'əlo'lte segon can' nyoj Xtižə' Diozən' gaquə' che', bešə'əžin beŋə' bosyo'oletje'ene' le'e yag corozən' na' bosə'əcuəše'ene'. ³⁰ Pero na' Diozən' bolis bosbane'ene' ladjo beŋə' guat ca'. ³¹ Na' nitə' beŋə' ca' əja'aclen Jeso'osən' Galilean' par Jerosalennə' na' beyož bebane' ladjo beŋə' guat ca' gwdalene' lega'aque' zan ža. Na' lega'aque'enə' chso'elene' beŋə' dižə' de que de'e li mbancze'enə'.

³² De'e na'anə' leczə neto' chyixjue'ito' le'e dižə' güen dižə' cobə che Jeso'osən' par nič ənezele de que bač goc complir lyebe de'en ben Diozən' len de'e xaxta'ocho ca'. ³³ Na' chio'o naccho xi'in dia chega'aque'enə' nezecho baben Diozən' complir lyebe de'en bene' len lega'aque' ca' de'en bolis bosbane' Jeso'osən'. Goc can' nyojən' le'e Salmo əgwchopen' nan: "Le' naco' xi'ina'. Neža babena' par nič solao nabi'o len nada'." ³⁴ Na' nyojəchczə Xtižə' Diozən' ga yoblə nan: "Gona' güen len le'e can' beŋə' lyebe len de'e Rei Dabin'." Na' de'en nan ca' zejen de que Diozən' gwne' yolis yosbane' Jeso'osən' ladjo beŋə' guat ca' na' bitoch güe'e latjə gat Jeso'osən' de'e yoblə. ³⁵ Le'egatezə ca' yeto part yoblə che Salmosən' nan: "Nezda' bito go'o latjə gožə' cuerp čhia'anə', nada' naca' xi'inə' na' naquə' la'laždaogua'anə' xi'ilažə' juisy." ³⁶ Žlac bguan de'e Rei Dabin' ža, goclene' de'e xaxta'ocho ca' con can' gone'e Diozən', na' catə' gote' bosə'ocuaše'ene' ga bazjəŋgašə' de'e xaxta'ocho ca' bagwsa'at, na' gožə' cuerp che'enə'. De'e na'anə' nezecho de que caguə' nyoj Salmosən' che cuine'en. ³⁷ Jeso'osən' ben' bolis bosban Diozən', le'enə' cui gožə' cuerp che'enə'. ³⁸ Na' cheyalə' ənezele beŋə' bišə', Jeso'osən' ben' cho'a dižə' čhei chezi'ixene' xtolə'

benə' ca' chso'onlilažə' le'. ³⁹ Bito chac nıtlaο xtolə' chio'o benəch por ni che choncho bi de'en na lei de'en bzoj de'e Moizezən', pero notə'ətezcho šə chonlilažə'əcho Jesocristən', Diozən' chnıtlaogüe' xtolə'əcho ca'. ⁴⁰ Le'e gapə cuidad par cui gac chele can' boso'ozoj de'e profet ca' benə' ca' gwso'e xtižə' Diozən' cana' gan' nan:

⁴¹ Le'e gon xbab, le'e chonle borl,
gwžin ža cuiayi'ile por ni che de'e cui chejle'ele.
Le'e yebane, chedə' nada' Dioz ze'e gona' de'e zaquə' yebanele tyemp nga zole
na'a,

na' bito šejle'ele la'anə'əczə šə no əna le'e can' gaquən'.

Can' gwna Pabən' bzejni'ine' benə' ca' ža' lo'o yo'oda'onə'.

⁴² Beyož bzejni'i Pabən' benə' Izrael ca' nach besyə'əchoje' lo'o yo'oda'onə'. Benə' ca' cui gwsa'alje' benə' Izrael sino gwso'on cuinga'aque' benə' Izrael gwsa'atə'əyoine' Pabən' len Bernaben' par əžja'aque' de'e yoblə yežag xman ža dezcanzən' žəsə'əzejni'ine' lega'aque' de'e yoblə. ⁴³ Benə' zan benə' Izrael ca' na' benə' zan benə' bagwso'on cuinga'aque' benə' Izrael gwse'ejle'e de'en choso'osed choso'olo'i Pabən' len Bernaben' catə'an besyə'əžaše'. Na' Pabən' len Bernaben' gosə'əneyo'ine' lega'aque' par nič nıtə'ətezə nite'e so'onlilaže'e Jesocristən' ben' bselə' Diozən' par chaclene' chio'o.

⁴⁴ Na' catə' bežag xman ža dezcanzən', casi yoguə'əloj benə' lao' syodan' besə'əžag par boso'ozenague' xtižə' Diozən'. ⁴⁵ Pero benə' Izrael ca' cui chso'onlilažə' Jesocristən' besə'əle'ine' catec benə' zannə' nžag na' gwsa'acxi'ine', nach gosə'ənelaogüe' contr Pabən' na' gwso'onle'ega'aque' che dižə'an chzejni'i Pabən'. ⁴⁶ Nach Pabən' len Bernaben' sin cui chəsə'əžebe' gwse'e benə' ca': —Babento' complir can' gone'e Diozən' babzejni'ito' zgua'atec le'e nacle benə' Izrael xtiže'enə'. Pero na' de'en cui chene'ele əgwzenagle ža, zeje dižə' de que bito chene'ele gatə' yelə' mban zejlicane chelen' na' de'e na'anə' əgwzejni'ito'on benə' ca' cui zžənaquə benə' Izrael.

⁴⁷ Xantə' Diozən' bač bene' mendad gontə' can' nyojən nan:

Bač nzoa' le'e par co'ole be'eni' chia'anə' lo'o yičhja'aždao' benə' ca' cui zžənaquə benə' Izrael

par nič benə' ca' ža' doxenlə yežlyon' əsa'acbe'ine' naclən so'one'
nič yesyə'əchoje' xni'a de'e malən'.

⁴⁸ Na' benə' ca' cui zžənaquə benə' Izrael beyož gwse'ene'ene' gwne' ca' besyə'əbeine' nach gosə'əne' güenchgucəzən' naquə xtižə' Diozən'. Nach yoguə' benə' ca' bagwlej Diozən' par gatə' yelə' mban zejlicane chegə'aque'enə' gwso'onlilaže'e Jesocristən'. ⁴⁹ Ca' goquə gosə' gwłaljə xtižə' Xancho Jesocristən' doxen distritən'. ⁵⁰ Pero na' benə' Izrael ca' cui gwso'onlilažə' Jesocristən' boso'ota boso'one' benə' blao che syodan' na' no'olə əblao ca' zžənaochgua costombr che benə' Izrael ca' par nič bosyo'olague' Pabən' len Bernaben' na' besyə'əbeje' lega'aque' fuer syodan' na' distritən'. ⁵¹ Nach Pabən' len Bernaben' boso'osi'ins ni'aga'aque' par bežib bište yon' de'en žiannə'. Gwso'one' ca' par boso'olo'e de que bito zžənapə' dolə' de'en cui chse'ene benə' ca' yoso'ozenague' che Diozən', nach besə'aque' jəya'aque' gan' ne' Iconio. ⁵² Pero benə' ca' chso'onlilažə' Jesocristən' gwnitə'əchgucəze' mbalaz, na' Spirit che Diozən' gwnabia'an yičhja'ažda'oga'aque'enə'.

14

Pabən' na' Bernaben' besə'əžine' Iconion'

¹ Na' goquən' besə'əžin Pabən' len Bernaben' Iconion' na' ja'aque' yo'odao' che beṇə' Izrael ca' par gwso'e xtižə' Jesocristən' len beṇə' ca'. Na' Spirit che Diozən' goclenən lega'aque' par gwso'e dižə'ən, na' beṇə' zan beṇə' Izrael ca' gwso'onlilažə'e Jesocristən' na' leczə zan beṇə' cui zjənaquə beṇə' Izrael gwso'onlilažə'ene'. ² Pero beṇə' Izrael ca' cui gwso'onlilažə' gosə'əgo'oyele'e beṇə' ca' cui zjənaquə beṇə' Izrael par niç gwso'one' xbab mal contr Pabən' len Bernaben'. ³ Na' ca naquə beṇə' zan bagwso'onlilažə' Jesocristən' Iconion', Pabən' len Bernaben' besyə'əga'əne' sša syoda Iconion' par gwso'ecze' xtižə' Xancho Jesocristən' sin cui besə'əžebe'. Na' Xancho Jesocristən' goclene' lega'aque' len yelə' guac che'ena' par niç gwso'one' miłagr na' bichlə de'e besyə'əbane beṇə' niç ca' gwsa'acbeine' de que dižə' lin' chsoe' Pabən' len Bernaben' na' de que lechgualə nži'ilažə' Xancho Jesocristən' beṇə'əčan'. ⁴ Na' beṇə' ca' ža' lao' syodan' gwsa'aque' çhoplə. Bałe' gosə'əde'e beṇə' Izrael ca' na' bałe' gosə'əde'e apostol Pabən' len Bernaben'. ⁵ Nach yoguə' beṇə' ca' cui gwsa'azlažə' can' choso'osed choso'olo'i apostol ca', beṇə' Izrael ca' na' beṇə' ca' cui zjənaquə beṇə' Izrael, gosə'ənite'e yelə' goxia' len jostis ca' par so'one' contr Pabən' len Bernaben' na' yoso'ošiže'e lega'aque' yej. ⁶ Pero ca naquə Pabən' len Bernaben' gwsa'acbeine' can' bazjəngüia beṇə' ca' so'one' len lega'aque', nach besyə'əsa'aque' jəya'aque' gan' ne' Listra na' Derbe, na' yeziquə'əchlə yež ca' gan' mbane Licaonia. ⁷ Na' boso'ozentezene' dižə' cobə che Jesocristən' gatə'ətezə ja'aque'.

Boso'ošiže'e Pabən' yej lao zoe' Listran'

⁸ Na' Listra na' jəsyə'ədie' to beṇə' nxiṇje' dezd goljte', con cui bi bi fuers balor əgwsa'ate'e ni'e ca' par se'e. ⁹ Na' chi'iteze' chzenague' çhoe' Pabən' dižə'ənə'. Nach Pabən' bgüie'ene' na' goçbe'ine' chejle' be'ena' de que Diozən' nape' yelə' guac par gone' ca' gaquə se'e. ¹⁰ Nach Pabən' bolgüiže'ene' clar gože'ene': —Gwzoža'.

Nach le'e gwzoža'ate be'ena' na' gwzolao chde'. ¹¹ Beṇə' zan ca' ža'anə' choso'ogüie' can' ben Pabən' na' gosə'əne' dižə' Licaonia: —Baç gwse'etj Xancho ca' chejni'alažə'əcho gan' zocho nga na' lega'aque'en zjənaque' ca beṇə'əç.

¹² Na' gosə'əne' de que Bernaben' naque' xanga'aque' Jopiter ben' chse'ejni'alaže'e, na' de que Pabən' naque' xanga'aque' ben' nzi' Mercurio çhedə' len' çhoe' dižə'. ¹³ Na' yo'odao' gan' zo xanga'aque' Jopiter ben' chse'ejni'alaže'e zon catezə chso'e lao' syodan'. Nach bçox che Jopiterən' gwze'e nche'e go'on ca' na' bazjənone'eb xoche len yej. Nach bçoxən' len beṇə' ca' ža'anə' besə'əžine' gan' niṭə' apostol ca' gwse'enene' so'ote' go'on ca' par se'ejni'alaže'e lega'aque'.

¹⁴⁻¹⁵ Pero apostol Bernaben' len Pabən' catə' gwsa'acbe'ine' can' so'on beṇə' ca', gosə'əçheze' xaga'aque'ena' çhedə' bito gwse'enene' so'on beṇə' lao' syodan' ca'. Gwse'ebe' ladjo beṇə' ca' gwse'e lega'aque' zižjo: —Beṇə' bito gonle ca'. Leczə beṇə'əç neto'. Za'ato' par chyixjue'ito' le'e de que cheyalə' gwsa' yichjla'azda'olen' na' cuejyichjle costombr quinga de'en naole la' lega'aque'ən bito bi zjəzaquə'ən. Cuejyichjga'aclen niç güe'ela'ole Diozən' ben' zo zejlicane, ben' ben yoban', yežlyon', nisdə'ənə', beṇə'əç, bia ca' chsa'aš, na' bitə'ətezə de'en chle'icho le'e yoban', lao yežlyon' na' lo'o nis. ¹⁶ Ca naquə tyemp ca' de'en bagosə'əde, Diozən' gwdape' yelə' chxenlažə' ca' de'en gosə'əda beṇə' gwžə' to to nasyon gwso'one' con can' gwse'enene'. ¹⁷ Pero Diozən' syempr zocze' chone' güen len yoguə'əloł beṇə'əčan' par niç yesə'ənezene' de que zocze'

naque' Dioz. Le'enə' chone' par niçh chac yejon' niçh ca' chac de'en chazcho, na' chatə' de'en che'ej chaocho par niçh socho mbalaz.

¹⁸ Na' la'ana'əczə gwse' Pabən' len Bernaben' beṇə' Lистра ca' de'enə', cane gosə'əzoinə' par niçh cui gwso'ot beṇə' ca' go'on ca' par se'ejni'alaže'e lega'aque'.

¹⁹ Ca' chac xonj beṇə' Izrael beṇə' nitə' Iconio na' Antioquian' gan' mbane Pisidia, besə'əžine' Listran', nach gosə'əgo'oyeje'e beṇə' Lистра ca' par gwsa'aque' txen bosə'ošize'e Pabən' yej. Na' gwsa'aquene' šə bach gwso'ote'ene' nach gosə'əxobe'ene' fuerlə syodan'. ²⁰ Pero beṇə' ca' chso'onlilažə' Jesocristən' jəsə'ədobe' gan' de'enə' nach beyase' na' beyeje' lao syodan' de'e yoblə. Nach beteyo beza' Pabən' len Bernaben' par jəya'aque' Derben'.

²¹ Na' lecžə gosə'əyixjui'e dižə' güen dižə' cobə che Jesocristən' lao' syoda Derben' na' beṇə' zan gwso'onlilaže'e Jesocristən'. Gwde na' besyə'əsa'aque' jəsyə'aque' Listran', Iconion' na' Antioquian' de'e yoblə. ²² Na' to to syoda ca' gan' jəya'aque'enə' bosə'otipe' lažə' beṇə' ca' chso'onlilažə' Jesocristən' na' gosə'əneyoinə' lega'aque' par niçh nitə'ətezə' nite'e so'onlilaže'e Jesocristən'. Na' lecžə bzejni'ine' lega'aque' de que notə'ətezcho šə chene'echo nabiə' Diozən' chio'o, de'e zan de'e gaquə de'e chi' saquə'əcho. ²³ Na' to to yež can' besyə'ədie'enə' gosə'əbeje' beṇə' golə beṇə' blao par bosə'ogüia bosə'oye' beṇə' ca' chəsə'ədopə chəsə'əžag chso'elaogüe'e Jesocristən'. Na' Pabən' len Bernaben' ze'e yesə'aque' to to yež gwso'one' orasyonnə' txen len beṇə' ca' chəsə'ədopə chəsə'əžaguən' sin cui gwsə'ogüe', gosə'ənabe' lao Xancho Jesocristən' gaquəlene' yoguə' beṇə' ca' bach chso'onlilaže'e'ene'.

Pabən' na' Bernaben' jəya'aque' Antioquian' gan' mbane Siria

²⁴ Gwde na' besə'ac Pabən' len Bernaben' na' besyə'ədie' distrit che Pisidia par besə'əžine' distrit che Panfilia. ²⁵ Na' gosə'əyixjui'e dižə' che Jesocristən' yež de'en nzi' Perge gan' mbane Panfilian'. Beyož na' gwsa'aque' ja'aque' gan' ne' Atalia. ²⁶ Na' Atalian' besə'aque' besyə'əyo'e lo'o barcw par besyə'əžine' Antioquian' gan' mbane Sirian' gan' gwsa'aque'. Na' ca naquə beṇə' Antioquia ca' lega'aque' gosə'ənabene' Diozən' gaquəlene' Pabən' len Bernaben' par žjse'ene' xšin Diozən' catə' cuiṇə' əsa'aque' žja'aque' yež ca' par žjse'ene' xšin Diozən' de'en babeyož gwso'one' na'a. ²⁷ Na' catə' besyə'əžin Pabən' len Bernaben' Antioquian', bosyo'otobe' beṇə' ca' chso'elao' Jesocristən' nach gwso'e dižə' yoguə'əloj can' goquəlen Diozən' lega'aque' žlac jəsə'ədise' dižə' güen dižə' cobə che Jesocristən' na' can' ben Diozən' par niçh beṇə' ca' cui žjənaquə beṇə' Izrael gwso'onlilaže'e Jesocristən'. ²⁸ Šša besyə'əga'ane' gosə'ənite'e len beṇə' ca' chso'onlilažə' Jesocristən' Antioquian'.

15

Apostol ca' bosə'oxi'e len beṇə' Jerosalen ca' naclə cheyalə' so'on beṇə' catə' so'onlilaže'e Jesocristən'

¹ Ca tyempən' to çhopə beṇə' gwsə'ac Jodean' besə'əžine' Antioquian' na' gosə'əzolaogüe' bosə'osed bosə'olo'ine' beṇə' ca' chso'onlilažə' Jesocristən' de que cheyalə' yesə'əzoe' señy de'en ne' sirconsisionnə' can' na lei de'en bzoj de'e Moizezən' par niçh cui žjəya'aque' lao yi' gabilən'. ² Pero Pabən' len Bernaben' gwsə'acyože' beṇə' Jodea ca' de'en choso'osed choso'olo'ine' ca'. Nach beṇə' Antioquia ca' beṇə' ca' bachso'onlilažə' Jesocristən' gosə'əçhoglaogüe'en de que Pabən' len Bernaben' na' len yeto çhopə beṇə' ljuəžjga'aque' ca' əžja'aque' Jerosalennə' par žjəsyə'ənite'e yelə' goxi'a len apostol ca' na' beṇə'

golə blao che beṇə' chso'onlilažə' Jesocristən' Jerosalennə' naclə cheyalə' so'one' che de'en choso'osed choso'olo'i beṇə' ca'.

³ Nach beṇə' ca' chəsə'ədopə chəsə'əžag chso'elaogü'e Jesocristən' bosə'osele'e lega'aque' əžja'aque' Jerosalennə'. Na' gosə'ədie' Fenisia na' Samaria na' gwso'elene' beṇə' ca' chso'onlilažə' Jesocristən' dižə' de que ca naquə beṇə' ca' cui zjənaquə beṇə' Izrael baboso'oša' yichjla'ažda'oga'aque'ena' par choso'ozenague' che Diozən'. Nach beṇə' Fenisia ca' na' beṇə' Samaria ca' besyə'əbeichgüeine'.

⁴ Na' catə' besə'əžin Pabən' len Bernaben' Jerosalennə' beṇə' ca' chəsə'ədopə chəsə'əžag chso'elao' Jesocristən' nach beṇə' golə beṇə' blao čhega'aque' ca' na' apostol ca' besə'əžaglaoga'aque'ene' choso'oguape' lega'aque' diox. Nach Pabən' len Bernaben' gwse'e lega'aque' yoguə'əloł can' bagoclen Diozən' lega'aque'.

⁵ Na' balə beṇə' ca' chso'onlilažə' Jesocristən' zjənaquə' beṇə' fariseo nach gosə'əzož'e' gosə'əne': —Ca naquə beṇə' ca' chso'onlilažə' Jesocristən', cheyalə' nita'əga'aque' señy de'en ne' sirconsionnə' na' cheyalə' so'one' can' na lei de'en bzəj de'e Moisezən' la'ənə'əczə cui zjənaquə' beṇə' Izrael.

⁶ Nach besə'ədobə apostol ca' na' beṇə' golə blao ca' par bosə'oxi'e naclə gaquəczən'. ⁷ Šša bagoc chso'e dižə' catə'əczla gwzoža' Bedən' gože' lega'aque': —Beṇə' bišə', le'e nezczele de que cana'ate gwlej Diozən' nada' par jətiχjui'a dižə' güen dižə' cobə che Jesocristən' len beṇə' ca' cui zjənaquə beṇə' Izrael nič gwso'onlilaže'ene'. ⁸ Na' ca naquə Diozən' ža, nombi'e yichjla'aždao' yoguə'əlołte beṇə'. Na' de'en bsele'e Spirit che'ena' zon lo'o yichjla'aždao' balə beṇə' cui zjənaquə beṇə' Izrael can' zon lo'o yichjla'aždao' chio'o, blo'ine' chio'o de que chazlaže'e can' chso'onlilaže'e Jesocristən'. ⁹ Na' bito ŋacho de que nža' bene' len chio'o na' nža' chone' len lega'aque', sino beya'a beyibcze' la'aždaoga'aque'ena' catə'an gosə'əzolaogü'e chso'onlilaže'e Jesocristən'. ¹⁰ Na' ža, žbixčhen' cui chejle'ele che de'en bagož Diozən' nada'? žBixčhen' chonlene' prueb šə leine' can' ne'ena'? Chene'ele gonle byen yesə'ənao beṇə' ca' cui zjənaquə beṇə' Izrael costombr čecho ca'. Tant zdebə zjənaquən xte ni chio'o na' ni xaxta'ocho ca' cui goquə so'one' yoguə'əloł can' nannə'. ¹¹ De'e na'anə' bito naquən güen ye'ega'acchone' yesə'ənaogü'e' costombr ca', čhedə' cuin Xancho Jeso'osən' babene' par nič cui žjəya'aque' lao yi' gabilən' laogüe de'en nži'ilaže'e' lega'aque' ca'aczən' babene' len chio'o, na' bito ŋacho de que zaquə'əcho par bene' ca' len yoguə'əlołcho.

¹² Nach yoguə' beṇə' ca' ndopə nžaguən' gwnite'e žizə par bosə'ozenague' gwsoe' Bernaben' len Pabən' dižə' ca' naquə ben Diozən' par nič gwso'one' miłagr na' yeziquə'əchlə de'e zaquə' yebanecho entr beṇə' ca' cui zjənaquə beṇə' Izrael. ¹³ Na' catə' beyož gwsoe' Bernaben' len Pabən' dižə'əna', lao ne'e nita' beṇə' ca' žizə gwzoža' Jacobən' gože' lega'aque': —Beṇə' bišə' le'e gwzenag dižə' nga gua'a. ¹⁴ Simon Bedən' bach be'e dižə' can' babloe' Diozən' yełə' guac che'ena' len beṇə' ca' cui zjənaquə beṇə' Izrael na' can' bagwleje' balē' par chso'elaogüe'ene'. ¹⁵ Na' de'en chon Diozən' ca' chotilən de'e ca' bosə'ozəj profet ca' beṇə' ca' gwso'e xtižə' Diozən' cana' can' na de'e nga:

¹⁶ Te na' yida' de'e yoblə na' gona' par nič nabia' xi'īn dia che de'e Rei Dabin', la'ənə'əczə na'a cui no xi'īn dia che'ena' chesə'ənabia' na' gona' par nič socze' nabi'e.

¹⁷ Na' zan beṇə' ca' cui zjənaquə beṇə' Izrael so'onlilaže'e nada' Xanga'aque'. Beṇə' ca' ža' yoguə' nasyonnə' so'ombi'e nada', con noga'aque'ena' gwleja' par so'ombi'e nada'.

18 Can' gwna Xancho Diozən', ben' chzejni'i chio'o can' gaquə dezd ža gwlasda'ote.

19 Na' laogüe de'en nyoj Xtize'ena' nan ca', nada' achnia' le'e de que cabi cheyalə' gonecho beṇə' ca' cui zjənaquə beṇə' Izrael bichlə zed, beṇə' ca' bagosə'əbejyichj costombr čhega'aque'ena' de'en gosə'ənaogüe' par chso'onlilažə'e Diozən'. 20 Con gwzojga'acchone' ye'ega'acchone' de que bito sa'ogüe' no yelə' guao de'en chəsə'əne' naquən čhe lguə'a lsaquə'ən chse'ejni'alažə' beṇə', na' bito sa'ogüe' bia ca' chso'ote' choso'ošo'que' do lba'abən', na' bito sa'ogüe' chen čhega'acobən'. Na' bito yesə'əzolene' no'olə cui naquə no'ol čhega'aque' na' nic no'ol ca' yesə'əzolene' beṇə' cui naquə be'en čhega'aque'. 21 Dezd gwllalte nita' beṇə' to to syodan' choso'ozejni'ine' can' na lei de'en bzoj de'e Moizezən', na' choso'olabe'en lo'o yo'odao' əblao čhechon' yoguə ža dezcanz. De'e na'ana' cheyalə' goncho mendad so'on beṇə' ca' cui zjənaquə beṇə' Izrael ca' cui əsa'aque beṇə' ca' chəsə'ənao de'en na lein' de que malən' chso'on beṇə' ca'.

22 Na' apostol ca' len beṇə' golə blao ca' na' yeziquə'əchlə beṇə' ca' chəsə'əadopə chəsə'əžag chso'əlaogüe'e Jesocristən' gwsa'azlažə'e can' gwna Jacobən', na' bosoxi'e əchoj čhopə beṇə' entr lega'aque' par əžja'aclene' Pabən' len Bernaben' Antioquian'. Nach gosə'əbeje' Jodas Barsabasən' na' Silasən' beṇə' zjənaquə beṇə' blao entr beṇə' ca' chso'onlilažə' Jesocristən' Jerosalenna'. 23 Na' bosoxože' to cart de'e gwso'oxə' beṇə' ca' na' le'e cartən' gwse'e lega'aque':

“Neto' apostol, na' beṇə' golə blao, na' nochlə neto' chonlilažə'əto' Jesocristən' čhguapto' le'e diox, le'e nacle beṇə' ljeužjto' chonlilažə'əchone', le'e nitə'əle Antioquian' na' do gan' mbane Siria na' Silisia. 24 Bagwnezetə' de que to čhopə beṇə' besə'əchoj entr neto' babla'aque' gan' nitə'əlen' chso'one' šejlažə'əle len dižə'ən baboso'ochixə' bosoxi'ize' yichjla'ažda'olen' chəsə'əne' de que cheyalə' sole seŋy de'en ne' sirconsionnə' na' gonle yoguə'əloj can' na lei de'en bzoj de'e Moizezən'. Bito nezetə'ona' gwsa'aque' na' caguə' mendad čheto'onə' bedəsə'əyeže' le'e ca'. 25 Topə txen naquəto' gwyazlažə'əto' gwlejtə' čhopə beṇə' quinga chselə'əga'acto'one' gan' nitə'əlen' len apostol ca' chac'chgüeitə' čhei Bernaben' na' Pabən'. 26 La' lega'aque' baboso'osanlilažə' yelə' mban čhega'aque'ena' par chso'one' xšin Xancho Jesocristən'. 27 Chselə'əto' Jodasən' na' Silasən' na' lega'aque' yoso'ozejni'ine' le'e dižə' cho'a che yoguə' de'en nato' le'e cart nga. 28 Chazlažə'əto' de'en babzejni'i Spirit čhe Diozən' neto' de'en ənato' cui gonle, na' de'e ca' chonən byen cui gonle zjənaquə tapzən. 29 Bitə cheyalə' gaole yelə' guao de'en chəsə'əne' čhe lguə'a lsaquə'ən chse'ejni'alažə' beṇə'. Na' bito gaole bia ca' chso'ote' choso'ošo'que' do lba'abən'. Na' bito gaole chen čhega'acobən'. Na' bito solenle no'olə cui naquə no'ol čhele na' nic no'olən' solene' beṇə' cui naquə be'en čhe'. Šə bito chonle de'e quinga chonto' mendad cui gonle, güenna' gonle šə ca'. De'e na'azən' chzojto' le'e cart nga.”

30 Nach bosoxože' beṇə' ca' chso'onlilažə' Jesocristən' apostol ca' na' beṇə' ca' yechopə dižə' nach gwsa'aque' əzja'aque' Antioquian'. Na' catə' besə'əžine' Antioquian' bosyotobe' yoguə' beṇə' ca' chso'onlilažə' Jesocristən' na' bosoxežjue' lega'aque' cartən' zjənoxə'ena' par bosoxolabe'en. 31 Na' beyož bosoxolabe' cartən' besyə'əbeine' ca' naquə consej de'en nyoj le'ina'. 32 Na' ca' naquə Jodasən' na' Silasən' leczə choso'ozenene' beṇə' bi de'en bagož Diozən' lega'aque'. Nach gwso'elene' beṇə' Antioquia ca' dižə' na' bosoxotipe' lažə'əga'aque' par ničh nitə'ətežə' nite'e so'onlilažə'e Jesocristən'.

³³ Zan ža gwnite'e Antioquian' na' catə' bžin ža par yesa'aque' žjəya'aque' gan' nitə' beŋə' ca' boso'oselə' lega'aque', beŋə' Antioquia ca' boso'ozeine' lega'aque' dižə' gwse'e de que to šao' to güen yesyə'əžine'. ³⁴ Pero na' ca naquə' Silasən' gwčhoglaže'e yega'ane' na'azə. ³⁵ Nach leczə Pabən' len Bernaben' gwnitə'acze' Antioquia na'azə, na' tən len zan beŋə' Antioquia ca' boso'osed boso'olo'ine' beŋə' xtižə' Diozən' na' boso'ozejni'ine' lega'aque' bi zejen.

Pabən' gwyeye' de'e yoblə gan' bajətixjui'e xtižə' Diozən'

³⁶ Na' catə' bagwde to tyemp Pabən' gože' Bernaben': —Šejcho yoguə'əlo' syoda ca' gan' bach įtixjue'echo xtižə' Xancho Jesocristən' par zjəyecho nac chsa'ac beŋə' ca' chso'onlilažə'anə'.

³⁷ Nach Bernaben' goclaže'e yesə'əche'e Juan ben' leczə le' Marcos. ³⁸ Pero Pabən' bene' xbab bito naquən güen yesə'əche'ene', chedə' Juan Marcosən' gwlejšyichje' lega'aque' Panfilian', bito bega'aqlene' lega'aque' par so'one' xšin Diozən'. ³⁹ Na' gotə' to bžaš gual entr Pabən' na' Bernaben' xte gosə'əbejšyichj lježjga'aque'. Bernaben' gwze'e gwče'e Marcosən' gwso'e to lo'o barcw par ja'aque' Chipren'. ⁴⁰ Nach Pabən' gwze'e gwče'e Silasən', na' beŋə' ca' chso'onlilažə' Jesocristən' Antioquian' gosə'əŋabe' lao Xancho Diozən' gaquəlene' Pabən' na' Silasən' gatə'atežə žja'aque'. ⁴¹ Nach Pabən' len Silasən' gosə'ədie' Sirian' na' Silisian' par boso'otipe' lažə' beŋə' ca' chso'onlilažə' Jesocristən' to to yež.

16

Temtion' gwzloagü'e chonlene' Pabən' len Silasən' xšin Diozən'

¹ Na' catə' Pabən' na' Silasən' besə'əžine' Derben' na' gosə'ədie' par besə'əžine' Listran'. Na' Lистра na' zo to beŋə' chonlilažə' Jesocristən' na' le' Temtio. Xna' Temtion' naque' beŋə' Izrael na' chonlilaže'e Jesocristən', na' xə'enə' naque' beŋə' griego. ² Na' beŋə' ca' chso'onlilažə' Jesocristən' Listran' na' Iconion' gwso'e xtižə' Temtion' de que zocze' chone' güen. ³ Nach Pabən' gwŋabe' šejlen Temtion' lega'aque', nach gwčhi'ene' gan' boso'ozo'ene' seŋy de'en ne' sirconsision par nič gwsa'azlažə' beŋə' Izrael ca' ža'anə' əche'ene' gone' xšin Diozən'. Bzo'ene' seŋyən' chedə' la' yogue'e zjənezene' de que xə'enə' bito naque' beŋə' Izrael. ⁴ Nach gwsa'aque' zja'aque' to to syoda na' chəsə'əyixjue'ine' beŋə' ca' chso'onlilažə' Jesocristən' noquə'anŋə' cui cheyalə' so'one' can' gosə'əchoglaə apostol ca' na' beŋə' golə' blaə che beŋə' ca' chso'onlilažə' Jesocristən' Jerosalennə'. ⁵ Nach beŋə' ca' chəsə'ədope' chəsə'əžag chso'elaogü'e' Jesocristən' gwnitə'atežə gwnite'e gwso'onlilažə'əche' Jesocristən' na' gwyanche' tža tža.

Pabən' ble'idaogü'e'ene' to beŋə' Masedonia chatə'əyoine' le' šeje' laže'ena'

⁶ Ca naquə' Spirit che Diozən' bito be'en latjə šej Pabən' na' Silasən' na' Temtion' Asian' žjəsə'ədišjui'e xtižə' Diozən', de'e na'anə' ja'aque' Frigia na' Galasia. ⁷ Na' besə'əžine' galə'əžə gan' mbane Misia. Na' gwsa'aclaže'e əžja'aque' gan' nzi' Bitinia, pero leczə bito be'e Spiritən' latjə əžja'aque'enə'. ⁸ Nach gosə'ədie' Misian' xte besə'əžinte' gan' nzi' Troas. ⁹ Na' že' na' Pabən' ble'idaogü'e'ene' zecha to beŋə' byo beŋə' Masedonia laogü'e'ena' na' be'ena' gotə'əyoine' le' gože'ene': "Yo'o Masedonian' par gaquəleno' neto'." ¹⁰ Nach bsi'ini'a cheto' par gwza'ato' gwyejto' Masedonian' la' gwyejni'to' de que Diozən' chene'ene' žjezeneto' beŋə' ca' dižə' güen dižə' cobə' che Jesocristən', na' nada' Locas gwyə'alena' Pabən' len Silasən' na' Temtion'.

Pabən' na' Silasən' ja'aque' Filiposən'

¹¹ Troas na' gwza'ato' gwyo'oto' lo'o barcon' zdato' licha par galən' ne' Samotrasia, nach beteyo bžinto' gan' nzi' Neapolis. ¹² Nach Neapolis na' gwza'ato' par bžinto' gan' ne' Filipos gan' mbane Masedonian'. Filiposən' naquən to syoda blao gan' ža' beṇə' Roma. Na' gwzoto' na' to čopə ža. ¹³ Na' catə' bžin ža dezcanzən' bchojto' fuerlə syodan' par gwyejto' čo'a yaon' gan' čhja'aque' čhje'ene' orasyonṇə', nach gwče'eto' par be'elento' no'ol ca' bazjənžaguən' dižə' güen dižə' cobə čhe Jesocristən'. ¹⁴ Na' entr no'ol ca' choso'ozenaguən' len to beṇə' le Lidia. Naque' beṇə' syoda Tiatira na' chote'e lachə' fin de color morad. Lidian' čo'elaogüe'e Diozan' na' Xancho Diozan' bene' par nič gone'ene' bzenague' tcho'a tšao' ca' naquə dižə' de'en be' Pabən'. ¹⁵ Na' le'e gwchoate' nis len family čhe' ca'. Nach gwdenə' gotə'əyoine' neto' gwne': —Šə de'e ličzə chejle'e de que chonlilažə'a Xancho Jesocristən', le'e šo'o yega'anle ližə'anə'.

Nach gwyejto' jəyega'anto' liže'enə' čhedə' bencze' byen.

¹⁶ Na' goquən to žlas lao zdato' gan' chac orasyonṇə' bežagto' to no'ol güego' no'olə yo'o yaz de'e xio' lo'o yičhjlə'ažda'obo'onə' na' chonən par nič chac čhneya'abo', na' gan xen chombo' par xambo' ca' de'en čhneya'abo'. ¹⁷ Nach bedənaobo' neto' nžagto' Pabən' chosya'abo' nabo': —Beṇə' quinga zjənaque' beṇə' güen xšin Diozan' ben' čhnabia' doxenlə. Na' lega'aque' choso'olo'ine' naquən' cheyałə' goncho par nič cui yeyejcho lao yi' gabilən'.

¹⁸ Zan ža gwnaobo' neto' nabo' ca' xte bžin ža goque Pabən' zed nach gwyechje' gože' de'e xio'onə': —Por yelə' guac čhe Jesocristən' chona' mendad yechojo' lo'o yičhjlə'aždao' bi'i nga.

Nach le'e bechojten.

¹⁹ Catə' gwsa'acbe'i xambo'onə' cuich bi gan so'one' len lebo' nach gosə'əzene' Pabən' len Silasən' na' jso'e lega'aque' gan' ža' beṇə' gwnabia' ca' galə'əzə gan' chac ya'a. ²⁰ Nach catə' besə'əžinlene' lega'aque' lao beṇə' gwnabia' ca' nach gwse'e: —Beṇə' Izrael quinga čhsa'aše' čhsə'əbeque' de'e zed lao' syoda nga. ²¹ Na' choso'olo'ine' costombr de'e cabi cheyałə' ṇao neto' naquəto' beṇə' Roma.

²² Na' beṇə' ca' ža' lao ya'anə' lecə gwsa'ase' contr Pabən' len Silasən', nach beṇə' gwnabia' ca' gwsə'one' mendad gosə'əlečhje' xaga'aque'enə' par gosə'əyine' lega'aque' xis. ²³ Beyož gosə'əyinchgüe' lega'aque', nach bosə'ože'ene' ližyan' nach gwse'e ben' chapə ližyan' de que gapəchgüe' cuidad len lega'aque'. ²⁴ Catə' gwse'e ben' chapə ližyan' ca' nach be'enə' bže'e lega'aque' lo'o quart ližyan' de'en zo le'ezelaogüe' gan' naquə bižə'ate na' bchide'e ni'aga'aque'enə' len yag sep.

²⁵ Na' do chelyanə' Pabən' len Silasən' nite'e chso'one' orasyon na' chso'ole' no imno chso'elaogüe'e Diozan' na' pres ca' yeziquə'əchlə choso'ozenague'.

²⁶ Na' to de repentžə gwxo'ochgua, na' bse'esə'əchguan lan yo'o ližyan' xte bsaljən yoguə' puert ca'. Nach yoguə' pres ca' ža'anə' beṇə' ca' zjənchej gdenṇə' besyə'əyež gdenṇə' na'aga'aque'enə' nach yag sepən' bosanən ni'aga'aque'enə'.

²⁷ Nach ben' chapə ližyan' bebanene' na' ble'ine' zjənyaljo puert ca' nach le'e goljte' spad čhe'enə' goclaže'e yeyot cuine', goquene' bač besyə'əxonj pres ca'anə'. ²⁸ Nach bisya'a Pabən' gože'ene': —Bito bi gone cuino'. Nga zocə yoguə'əto'.

²⁹ Nach ben' chapə ližyan' gwṇabe' to yi' nach gwyo'odoe' zjəgüie' gan' de Pabən' len Silasən' na' do čhałə' chxize' bzo xiben' laoga'aque'enə'. ³⁰ Na' le'e

bebejte' lega'aque' ližyan' nach gože' lega'aque': —¿Bi cheyałə' gona' par niçh cui yeya'a lao yi' gabilən'?

³¹ Nach gwse'ene': —Benlilažə' Xantə' Jeso'osən' le' na' family çhio' na' gone' ca cui yeyejle lao yi' gabilən'.

³² Nach le'e gwzolaote Pabən' len Silasən' gwso'elene' be'enə' na' family che' ca' xtižə' Xanchon'. ³³ Nach lao or na'atezə be'enə' gwdibe' lao güe' che Pabən' na' che Silasən'. Nach bosə'əcho'e be'enə' nis len family che' ca'. ³⁴ Nach gwche'e Pabən' len Silasən' liže'enə' par bye'ej bguaogüe' lega'aque'. Na' do family be'enə' besyə'əbeichgüeine' de'en bachso'onlilaže'e Jesocrisən'.

³⁵ Catə' gwye'eni'inə' beənə' gwnabia' ca' bosə'osele'e polsia par jse'eže' ben' chapə ližyan' de que yosane' beənə' ca' žžəya'aque'. ³⁶ Nach gož be'enə' chapə ližyan' Pabən': —Ca naquə beənə' gwnabia' ca' baçh bosə'osele'e rson yosana' le'e. Na' bagueaquə žžəya'acle to šao' to güen.

³⁷ Nach Pabən' gože' polsia ca': —Bagosə'əyine' neto' lao lcue' sin cui gwso'one' yelə' jostis šə bi nonto'onə', len naquəto' beənə' nasyon Roma. ¿Ena' na'a chse'enene' yosyo'osane' neto' žizizənə'? Da'ac cuinga'aque' desye'eleje' neto'.

³⁸ Nach polsia ca' jesyə'əyeže' beənə' gwnabia' ca' can' gož Pabən' lega'aque'. Na' beənə' ca' besə'əžebchgüe' catə' gosə'ənezene' de que Pabən' na' Silasən' zžənaque' beənə' nasyon Roma. ³⁹ Nach ja'ac beənə' gwnabia' ca' gan' zžəde Pabən' na' Silasən' jesyə'əye'exene' lega'aque' na' besyə'əbeje' lega'aque' dižə' šao' nach gwsa'atə'əyoine' lega'aque' yesa'aque' syodan'. ⁴⁰ Catə' bechoj Pabən' len Silasən' ližyan' nach ja'aque' liž Lidian' de'e yoblə par jesy'e'tipe' lažə' beənə' ca' chso'onlilažə' Jesocrisən', nach besa'aque'.

17

Beənə' mal ca' bosə'ota bosə'onə' beənə' Tesalonica ca' so'one' contr apostol ca'

¹ Catə' besyə'əsa'ac Pabən' len Silasən' besyə'ədie' gan' ne' Anfipolis na' Apolonia. Na' le'e besyə'əžinte' to syoda de'en nzi' Tesalonica ga zo to yo'oda' ga çhja'ac beənə' Izrael ca'. ² Na' Pabən' ca' costombr checze' gwyeje' lo'o yo'oda'onə' na' lao šonə ža dezcanz ca' bzejni'ine' lega'aque' xtižə' Diozən'. ³ Bzejni'ine' lega'aque' de que Xtižə' Diozən' de'en bosə'ozoj de'e profet ca' beənə' ca' gwso'e xtižə' Diozən' cana' cho'en dižə' che Cristən' nan de que yoso'ochi' yoso'osaquə' beənə' le' na' so'ote'ene' na' techlə yeyas yebane' ladjo beənə' guat ca'. Nach lecžə gože' lega'aque': —Jeso'osən' ben' cho'a dižə' çhei, le'enə' Cristən' ben' bselə' Diozən' par chaclene' chio'o.

⁴ Beyož be'e dižə'anə' zan beənə' Izrael ca' gwse'ejle'e che' na' gwsa'aque' txen len Pabən' na' Silasən', na' zan beənə' griego beənə' gwso'elao' Diozən' na' zan no'olə bla' lecžə gwse'ejle'e che'. ⁵ Pero na' beənə' Izrael ca' cui gwse'ejle'e xtižə' Diozən' gwsa'acxi'ine' Pabən' len Silasən' nach bosə'otobe' xonj beənə' mal chsa'aš lao lqueyən' na' txen zžənaque' bosə'ota bosə'onə' beənə' ca' ža' lao' syodan'. Nach ja'acyalcze' liž ben' le Jason chasyə'əyilje' Pabən' len Silasən' par yesə'əche'e lega'aque' na' so'one' lega'aque' lao na' beənə' syodan'. ⁶ Pero catə' besə'əžine'enə' notono Pabən' len Silasən' nitə'anə'. Nach gosə'əxobe' Jasonnə' lene' yeto çhopə beənə' ca' chso'onlilažə' Jesocrisən' jso'e lega'aque' lao beənə' ca' chsə'ənabia' syodan'. Na' catə' besə'əžine' lao beənə' gwnabia' ca' gwse'e lega'aque' zižjo: —Ca naquə beənə' quinga chsa'aše' chsə'əbeque' de'e zed doxenlə na' na'a bablyaque' gan' nga zocho nga. ⁷ Na' Jason ni babgüialaogüe'

lega'aque' liže'enə, na' yogue'e chso'one' contr lei che Rei Sesar de'en naocho na' chəsə'əne' de que zo yeto rei beṇə' le Jeso'os.

⁸ Besə'əža'achgua beṇə' lao' syodan' na' beṇə' gwnabia' čhega'aque' ca' catə' gwse'enene' can' chəsə'əna beṇə' ca'. ⁹ Nach Jasonə' len beṇə' ljuēžje' ca' bosə'ožie' mech par nič bosyo'osan beṇə' gwnabia' ca' lega'aque'.

Pabən' na' Silasən' ja'aque' Berean'

¹⁰ Nach beṇə' ca' chso'onlilažə' Jesocristən' lguēgwzə' lao' že' na' bosyo'ose'e Pabən' len Silasən' par jəya'aque' gan' ne' Berea. Na' catə' besyə'əžine'enə' ja'aque' lo'o yo'odao' che beṇə' Izrael ca'. ¹¹ Beṇə' Berea ca' zjənaquache' beṇə' šao' cle ca beṇə' Tesalonica ca' na' besyə'əbeine' bosə'ozenague' xtižə' Jesocristən' de'en bosə'ozejni'i Pabən' len Silasən' lega'aque', na' tža tža besyə'əyilje' gan' nyoj de'e ca' bosə'ozejni'ine' par nič gosə'əneze'ne' šə le can' nan. ¹² Na' zanga'aque' gwso'onlilažə'e Jesocristən', na' leczə' zan beṇə' griego ca' na' zan no'olə' blao. ¹³ Nach beṇə' Izrael ca' ža' Tesalonican' beṇə' ca' cui chso'onlilažə' Jesocristən', gwse'enene' rson de que Pabən' len Silasən' banite'e Berean' chosə'ozenene' xtižə' Diozən'. Nach gwsa'aque' ja'aque' Berean' par jəsə'əta jəsə'əne' beṇə' lao' syodan'. ¹⁴ Pero beṇə' ca' chso'onlilažə' Jesocristən' Berean' le'e bosə'osa'ate' Pabən' gwyeje' cho'a nisdə'onə' pero na' besyə'əga'an Silasən' len Temtion'. ¹⁵ Na' beṇə' ca' gosə'əgo'o lao' ne'e jso'e Pabən' syoda Atenas de'en chi' gan' nzi' Gresia. Na' catə' besa'aque'enə' Pabən' bene' mendad əžja'ac Silasən' len Temtion' lguēgwzə' gan' zoe'enə'.

Pabən' bsd blo'ine' beṇə' Atenas ca'

¹⁶ Na' lao' zoe' Atenasən' chbeze' beṇə' ca', cuili biczən' chaque yichjla'aždaogüe'enə' chgüie' catequən' že'e ža' lguə'a lsaquən' chse'ejni'alažə' beṇə' Atenas ca'. ¹⁷ De'e na'anə' bzejni'ine' beṇə' Izrael ca' lo'o yo'odao' čhega'aque'enə' len yeziqə'əchlə beṇə' ca' chso'onlilažə' Diozən'. Na' leczə' yoguə' ža gwyeje' gan' chac ya'a par je'e xtižə' Diozən' len beṇə' ca' ža'anə'. ¹⁸ Na' beṇə' ca' bazjanao de'en chosə'osed chosə'olo'i epicoreo ca' na' estoico ca' gosə'əzolaogüe' gwso'elene' Pabən' dižə'. Nach bale' gosə'əne': —čBi nga əna de'e güe' dižə' nga chio'o?

Nach yeba'le' gosə'əne': —Zedəzenljeine' chio'o che yeto čhopə beṇə' cobən' šejni'alažə'əcho.

Gosə'əne' ca' čhedə' Pabən' bzejni'ine' lega'aque' dižə' che Jeso'osən' na' bzejni'ine' lega'aque' can' beban Jeso'osən' ladjo beṇə' guat ca'. ¹⁹ Nach gosə'əche'e Pabən' to latjə gan' ne' Areopago gan' chesə'ədobe' par chso'e consejw na' catə' besə'əžine'enə' nach gwse'ene': —Chene'eto' əgwzejni'ido' neto' bi de'e cobən' chsed chlo'ido'. ²⁰ La' dižə' de'e cuiczə' ne'e yeneton' cho'o, na' chene'eto' ənezeto' bi zejennə'.

²¹ Na' ca' costombr che beṇə' Atenas ca' na' che beṇə' zitə' ca' ža' Atenasən' con chasə' no güe' dižə' o gozenag dižə' šə bi de'e cobə' de'e de.

²² Nach Pabən' gwzeche' gwcholga'aque'enə' gan' ne' Areopagon' na' gože' lega'aque': —Le'e beṇə' Atenas, chache'ida' de que chejni'alažə'əchguale lguə'a lsaquə' ca'. ²³ Cata' gwdia' tnezən' ble'ida' latjə gan' nitə' de'e ca' chejni'alažə'əlen'. Na' entr latj ca' gan' nitə' de'e ca' chejni'alažə'əlen' ble'ida' to latjə gan' nyojən nan: "Par Xancho be'enə' cui no nombia". Ca' naquə' be'enə' chejni'alažə'əle sin cui nombi' alene' che be'ena'ana' əchyixjue'ida' le'e.

²⁴ Dioz ben' ben yežlyon' na' yoguə'əte de'e de laogüen', len' chnabi'e yoban' na' yežlyon'. Bitə' zoe' do lo'o yo'o de'e ben beṇə'chən' par se'ejni'alažə'e le'.

²⁵ Bitə' de de'e ənacho gon beṇə'chən' par gaquəlene' Diozən' žalə' na'aclo

bi chyažjene'. Dioz na'anə' cho'e yelə' mban che yoguə'əloł beṇə', chgüe'e lega'aque' biš na' cho'e lega'aque' yoguə'əte de'e zjanape'.

²⁶ Na' tozə chen bene' beṇəchən' beṇə' ža' doxen lao yežlyon'. Na' bsi'e xneze bat nita' to to beṇə' na' gan' nite'e. ²⁷ Diozən' bnite'e yoguə' beṇəchən' lao yežlyon' par ničh ca' yesyə'əyilje' naclə so'one' par ničh ca' so'ombi'ene' na' so'onlilaže'e tožə le'. De'e li Diozən' bito zoe' zita' len to to chio'o. ²⁸ Le'enə' chone' par ničh zocho na' par mbancho na' par chdacho, can' gwnaczə to beṇə' poeta chele ben' be' dižə' xoche gwne': "De'e li naccho dia che Diozən'." ²⁹ Na' əchnia' le'e de'en naccho xi'in dia che Diozən' bito cheyalə' gonlizcho xbab de que le' naque' ca no lguə'a lsaquə' de or, de p̄lat o de yej, de'e ca' chsa'aljlažə' beṇəchən' chso'one'. ³⁰ Antslə Diozən' be'e latjə gwso'on beṇəchən' can' con' gwna xbab chega'aque'enə' yelə' cui chejni' chega'aque'. Pero na'a Diozən' chone' mendad de que yoguə'əloł beṇə' ža' doxenlə yežlyon' yesyə'ədinjene' xtolə'əga'aque'enə'. ³¹ La' Diozən' bambeje' Jesocrisən' par əchoglaogüe'en che chio'o beṇəch šə nocho napcho dolə'. Na' Diozən' banžie' bia' batən' choglaogüe'en che chio'o beṇəch. Na' de'en bosban Diozən' Jesocrisən' ladjo beṇə' guat ca' nezecho de que de'e li choglaogüe'en che chio'o beṇəch na' zdacze' liča ca de'en gone' ca'.

³² Catə' beyož gwse'enene' gwna Pabən' de que yesyə'əban beṇəchən' ladjo beṇə' guat ca' bale' gwso'onene' borl na' yebale' gwse'ene': —Na' gwenagyetsi'ito' can' cho'o dižə'anə' yetolə ža.

³³ Ca' goquə beza' Pabən' Areopagon' gan' ža' beṇə' ca'. ³⁴ Pero na' balə beṇə' Atenas ca' gwsa'aque' Pabən' txen na' gwso'onlilaže'e Jesocrisən'. Na' entr beṇə' ca' gwsa'ac Pabən' txen, len to beṇə' byo le Dionisio na' yeto no'olə le Damaris. Na' Dionisio' naque' to beṇə' gwnabia' ca' chso'e consejon' Areopagon'.

18

Can' goquə žlac gwzo Pabən' Corinton'

¹ Gwde goc de'e ca' Pabən' beze'e Atenasən' par gwyeye' gan' ne' Corinto gan' leczə mbane Gresian'. ² Catə' bžine' Corinton' bežague' to beṇə' Izrael le Aquila beṇə' yež Ponto, na' no'ol che'enə' le' Prisila. Ze'e besyə'əžingale' Corinton' zeya'aque' Italia, čhedə' Rei Claudion' ben' chnabia' Italian' bene' mendad besyə'əžaš yoguə'əloł beṇə' Izrael ca' ža' Roman'. ³ Nach gwyej Pabən' ližga'aque'enə' na' gwzoe' len lega'aque'. Na' txen gwso'one' yo'o de lach' čhedə' leczə chac gon Pabən' len na' lennə' naquə žin che Aquilan' na' Prisilan'. ⁴ Na' yoguə' ža dezcanz Pabən' gwyeye' yo'odao' che beṇə' Izrael ca' na' jəzejni'ine' lega'aque' che Jesocrisən' par ničh so'onlilaže'ene' na' lenczə beṇə' cui zjanaquə beṇə' Izrael chja'ac yo'oda'onə'.

⁵ Na' catə' gwsa'ac Silasən' len Temtion' Masedonian' par besə'əžine' gan' zo Pabən' besə'əle'ine' can' chon Pabən' cho'eczə laže'e chyixjui'e xtižə' Jeso'osən' na' chzejni'ine' beṇə' Izrael ca' de que Jeso'osən' naque' Crisən' ben' chəsə'əbeze' əselə' Diozən' par gaquəlene' lega'aque'. ⁶ Pero beṇə' Izrael ca' besə'əže'e apostol Pabən' na' boso'ožia boso'onite'ene'. Nach Pabən' bse'esə xe'enə' par blo'e de que bito bi dolə' nape' che de'e malən' chso'one', na' gože' lega'aque': —Bito bi dolə' napa' nada' de'en cuiayi'ile zejlicane'. Le'e naple dolə'anə'. Na' dezd na'a žjəsəd žjalo'ida' beṇə' ca' cui zjanaquə beṇə' Izrael.

⁷ Nach bechoje' lo'o yo'oda'onə' na' beze'e bežine' liž to beṇə' le Josto. Josto na'anə' zotezə zoe' cho'elaogüe'e Diozən' na' liže'enə' zon cuit yo'oda'onə'.

⁸ Na' zo to beṇə' le Crispo beṇə' naquə beṇə' gwnabia' che yo'oda'onə'. Na'

Crispon' len yoguə'əlol family che'enə' gwso'onlilaže'e Xancho Jesocristən'. Le'egatezə ca' beṇə' zan beṇə' Corinto ca' bosə'ozenag che de'en əbsed blo'i Pabən' gwso'onlilaže'e Jesocristən' na' gosə'əchoe' nis. ⁹ Na' goquən' to že' ble'idaogüe'e Pabən' Xancho Jesocristən', na' Xancho' gože' Pabən': —Bito žebo'. Gwzotezə gwzo be' xtiža'anə' na' bito so' žizə. ¹⁰ Nada' zocza' len le' na' bito gua'a latjə no bi gone le', cheda' beṇə' zan ža' lao' syoda nga beṇə' so'onlilaža' nada'.

¹¹ Ca' goquən' bega'an Pabən' tgüiz yo'o gašjə Corinton' par bsd blo'ine' lega'aque' xtiža' Diozən'.

¹² Na' ca' tyempən' be'enə' le Galion naque' gubernador na' chnabi'e gan' nzi' Acaya. Nach beṇə' Izrael ca' ža' Corinton' beṇə' ca' cui chso'onlilaža' gwsa'aque' tozə par gwso'one' contr Pabən'. Nach gosə'əche'ene' jso'ene' gan' chon gubernadorən' yelə' jostisən'. ¹³ Na' catə' besə'əžine'ena' gwse'e gubernadorən': —Ca' naquə' bengə ža, chde' chgo'oyele'e to to beṇə' par nič so'one' bi de'e cobə par se'ejni'alaže'e Diozən' na' nža'alən' na' lein' šejni'alaža'əchone'.

¹⁴ Bač zotequən' əne Pabən' catə'əczla gož Galionnə' beṇə' Izrael ca': —Ca' naquə' de'e nga chaole xya nga, žalə' naquən to no fal't o to no de'e malchgua, gona'an yelə' jostis. ¹⁵ Pero naquən che dižə'əza na' che la beṇə' na' che lei chelen'. Le'e gwye' naclə gonle. Nada' bito co'o lao' na'a gona' yelə' jostis che de'en nac ca'.

¹⁶ Nach bošaše' lega'aque' gan' chone' yelə' jostisən'. ¹⁷ Nach beṇə' ca' cui zjənaquə beṇə' Izrael bosə'onize' Sostenesən' be'enə' naquə beṇə' gwnabia' che yo'oda'onə'. Na' gwso'ot gosə'əyine' le' lao' Galionnə' pero bito bi cas ben Galionnə' lega'aque'.

Pabən' beyeje' Antioquian' par jətxjui'e xtiža' Diozən' de'e gwyone

¹⁸ Gwde goc ca' yezan ža gwzoch Pabən' Corinton' nach catə' beze'enə' bzeine' beṇə' ca' bachso'onlilaža' Jesocristən' dižə' nach beze'e beyo'e to lo'o barcw. Na' beyeje' Sirian' na' gwche'e Prisilan' na' be'en che' Aquilan'. Na' catə' besə'əžine' Sencrean' besyə'əchoje' lo'o barcon' par ja'aque' lao' yezən'. Na' antslə ze'e yesa'aque' Sencrean' bšib yichj Pabən' par blo'e de que bačh bene' complir to de'en bene' lyebe lao' Diozən'. ¹⁹ Nach besyə'əyo'e lo'o barcon' par besyə'əžine' Efeson' gan' besyə'əga'an Aquilan' na' Prisilan'. Na' Pabən' gozeje' lo'o yo'oda'o' che beṇə' Izrael ca' par be'elene' lega'aque' xtiža' Diozən'. ²⁰ Na' beṇə' ca' ža' lo'o yo'oda'onə' gwsa'atə'əyoine' le' yega'anache' len lega'aque', pero bito gone'ene'. ²¹ Nach bzeine' lega'aque' dižə' gože': —Chonən byen soa' lni de'en šo'o Jerosalennə', pero güidəchczə' delana'a le'e yetš'i'i šə Diozən' güe'e latjə.

Nach beze'e Efeson'. ²² Catə' bžine' Sesarean' nach gwdie' gwyeje' Jerosalennə' na' bguape' diox beṇə' ca' chəsə'ədope' chəsə'əžag chso'elaogüe'e Jesocristən' na', nach beze'e beyeje' Antioquian' gan' mbane Sirian'. ²³ Gwde to tyemp gwzoe' Antioquian', nach gwyeje' gan' mbane Galasian' na' Frigian' jətipe' lažə beṇə' ca' chəsə'ədope' chəsə'əžag chso'elao' Jesocristən' to to yez.

Apolosən' gwduxjui'e xtiža' Diozən' Efeson'

²⁴ Na' tyemp na' bžin to beṇə' Izrael Efeson' na' le' Apolos. Apolosən' naque' beṇə' Alejandria, na' chac cho'e dižə' lao' lcu'e na' bansede' binlo can' na' xtiža' Diozən' de'en nojə'n'. ²⁵ Apolosən' gwnezene' che de'e güen ca' ben Xancho Jeso'osən' na' de'e ca' bsd blo'ine'. Na' do yichj do laže'e be'e dižə' bzejni'ine' tcho'a tšao' de'en nezene' che Jeso'osən' la'anə'əczə con de'en əbsed əblo'i de'e

Juannə' na' can' b̄choe' beṇə' nis na'azən' nezene'. ²⁶ Nach Apolosən' sin cui chaž chžebe' gwzolaο be'e dižə' che Xanchoṇ' lo'o yo'odaο' che beṇə' Izrael ca'. Na' gwse'ene' Prisilan' na' be'en che' Aquilan' can' chzejni'i Apolosən' nach gosə'əche'e le' partlə na' bosο'ozejni'ichene' le' cuaselolj can' na' Diozən' che Jesο'osən'. ²⁷ Na' ca naquə Apolosən' gone'ene' šeje' gan' ne' Acaya, na' beṇə' ca' chso'onlilažə' Jesocristən' Efeson' besyə'əbeine' de'en gone'ene' šeje' na' bosο'ozoje' to cart de'e bexe'e par beṇə' ca' chso'onlilaže'e Jesocristən' Acayan' par niçh yoso'ozenag beṇə' ca' che' na' so'one' güen len le'. Na' catə' b̄žin Apolosən' Acayan' goclenchgüe' beṇə' ca' bagoclen Diozən' par chso'onlilaže'e Jesocristən'. ²⁸ Na' lao lcue' b̄sed blo'ine' beṇə' Izrael ca' de que clelən' chso'one' xbab che Jesο'osən', na' bzejni'ine' lega'aque' can' nyoj Xtizə' Diozən' de que Jesο'osən' naque' Cristən' ben' chəsə'əbeze' yidə' par gaquəlene' lega'aque'. Na' Diozən' goclene' Apolosən' par niçh cui bi gosə'əna beṇə' Izrael ca' ca dižə' de'en be'enə'.

19

Can' goquə žlac gwzo Pabən' Efeson'

¹ Na' žlac zo Apolosən' Corinton', Pabən' beze'e na' bedie' yež ca' zjachi' do ya'ada'onə' na' bežinte' Efeson'. Efeso na' bežague' balə beṇə' ca' bachso'onlilažə' Jesο'osən'. ² Nach gože' lega'aque': —ζEzedaso Spirit che Diozən' lo'o yichjla'ažda' olen' catə'an gwzolaο chonlilažə'əle Jesocristən'?

Nach beṇə' ca' gwse'ene': —Bitο ne'e yeneto' šə zo Spirit che Diozən'.

³ Nach goze'e lega'aque': —ζNacxan' gwchoale nisən' ža?

Nach gwse'ene': —Gwchoato' nisən' can' bzejni'i de'e Juannə'.

⁴ Nach gož Pabən' lega'aque': —De'e Juannə' b̄choe' beṇə' ca' besyə'ədinje xtolə'əga'aque'enə' nis pero na' leczə gože' lega'aque' de que cheyalə' so'onlilaže'e be'enə' ze'e selə' Diozən' par gaquəlene' nasyon Izraelən', na' be'enə' ne' ca' le'enə' Jesο'osən'.

⁵ Beyož bosο'ozenague' can' gwna Pabən' nach gosə'əchoe' nisən' de'e yoblə par besə'əlo'e de que chso'onlilaže'e Xancho Jesο'osən'. ⁶ Nach Pabən' gwxoə ne'enə' yichjga'aque'enə' na' Spirit che Diozən' bedason lo'o yichjla'aždao' to toga'aque' na' benən par niçh gosə'əne' gwde gwdele dižə' na' leczə gosə'əyixjui'e bi de'en gož Diozən' lega'aque'. ⁷ Na' entr yoguə'əga'aque' zjənaquə ca do šižine'.

⁸ Na' ca do šon bio' b̄sed blo'i Pabən', na' sin cui chaž chžebe' be'e xtižə' Diozən' len beṇə' ca' chəsə'əadopə chəsə'əžag lo'o yo'oda'onə' chzejni'ine' lega'aque' par niçh gwse'ejle' zane' de que Diozən' chnabi'e con notə'ətezə beṇə' chso'e latjə. ⁹ Pero besə'əchoj balə beṇə' zjənaquə yichjla'aždao' žod beṇə' cui gwse'ejle'eczə na' delant beṇə' ca' ža'anə' bosο'ožia bosο'onite'e de'en əbsed əblo'i Pabən' che Jesocristən'. Pabən' bechoje' gan' že'enə' na' leczə bebeje' beṇə' ca' bachso'onlilažə' Jesocristən', na' gwche'e lega'aque' gan' zo to yo'o scuel che to beṇə' le Tiranno na' lo'o yo'o scuelən' b̄sed əblo'ichene' lega'aque' yoguə' ža. ¹⁰ Na' lao çop iz ben Pabən' ca', yoguə'əlol beṇə' ža' Asian' beṇə' zjənaquə beṇə' Izrael na' beṇə' cui zjənaquə beṇə' Izrael gwse'enene' xtižə' Xancho Jesο'osən'. ¹¹ Na' Diozən' bene' par niçh Pabən' bene' miłagr de'e besyə'əbanchgüeine'. ¹² No bey na'azə' na' no lachə' na'azə' šə bachelən cuerp che Pabən' nach chjəsyə'əsane'en gan' zjəde beṇə' güie' ca' na' le'e chəsə'əyacteine' che yižgüe'en chse'ine', na' beṇə' ca' yo'o yaz no de'e xio' yichjla'ažda'oga'aque'enə' leczə chesyə'əchojən.

¹³ Nach balə beṇə Izrael ca' beṇə ca' chsa'aš chso'one' rmech len yelə' goža' čhega'aque'enə' na' leczə chəsyə'əbeje' de'e xio', gwsa'aclaš'e yesə'əchine' la Xancho Jeso'osən' par yesyə'əbeje' de'e xio' ca' zjəyo'o zjəyaz beṇə ca' na' gosə'əne': "Chonto mendad yechojle por yelə' chnabia' čhe Jeso'osən' ben' choe' Pabən' xtiž'e'enə'."

¹⁴ Zo to beṇə Izrael na' le Eseba na' naque' beṇə' gwnabia' čhe bxož ca'. Na' nitə' gažə xi'ine' na' xi'ine' ca' gažən' choso'ozetje' la Jeso'osən' gwse'enene' yesyə'əbeje' de'e xio' ca'. ¹⁵ Na' to šlas catə' gwse'to de'e xio'on ca' na' boži'in xtižə'əga'aque'enə' gožən' lega'aque': —Nezda' non' Jeso'osən' na' nombi'a Pabən', pero le'e bito nacle txen len lega'aque'.

¹⁶ Nach de'e xio'onə' benən par nič be'enə' bxite'e bnize' beṇə' ca' na' benene' lega'aque' con can' chene'ennə', xte gosə'əbi'e güe' na' xte gwsa'aque' zi', nach bosyo'oxonje' liž be'enə' ga'alyidga'aque'. ¹⁷ Na' yoguə'əloj beṇə' ca' nitə' Efeson' beṇə' Izrael ca' na' beṇə' ca' cui zjənaquə' beṇə' Izrael gosə'ənezenə' can' goquən'. Nach yogue'e besə'əžebe' na' gwso'eche' yelə' bala'an' čhe Xancho Jeso'osən'.

¹⁸ Na' zan beṇə' ca' bachso'onjilažə' Jesocristən' gosə'əxoadole'e lao beṇə' ca' chəsə'ədopə chəsə'əžag chso'elaogüe'e Jesocristən' gwse'e lega'aque' ca' malən' bagwso'one' antslə. ¹⁹ Nach zan beṇə' bagwsa'ac beṇə' goža' na' beṇə' gone ya'a bosə'otobe' libr' čhega'aque'enə' na' gwso'oxe'en bosə'ozeye'en delant beṇə' ljuežjga'aque' ca' bachso'elao' Jesocristən', na' besyə'əbeje' cuent ca do ja'aquə'ətə' zjənyeyjue' libr' ca' na' bžinən' šiyon mil mech plat. ²⁰ Na' ca' naquə' xtižə' Xancho Jesocristən' gosə' gwlaļjəchən' na' gwyanch beṇə' bosə'ozenague' čhei.

²¹ Gwde goc de'e ca' Pabən' bene' xbab yeyeje' Jerosalennə' catə' yeyož šeje' gan' mbane Masedonian' na' Acayan'. Na' leczə gwne' de que catə' yežine' Jerosalennə' cheyaļə' šeje' Roman'. ²² Nach bsele'e čhopə beṇə' ca' chsa'aclen le' Masedonian', Temtion' len Eraston', žlac bega'anəch le' Asian' yeto čhopə ža.

Beṇə' ca' gwso'on contr Pabən' gwso'onchgüe' scandl Efeson'

²³ Na' zan beṇə' Efeso ca' besə'əže'e Pabən' de'en bsed əblo'ine' čhe Jeso'osən', nach gwsa'aš gwso'olje' lao' syodan' gwso'onchgüe' scandl. ²⁴ Quingan' goquə. Zo to beṇə' le Demetrio na' chone' yo'odao' dao' de plat de'en naquə ca yo'odao' gan' zo xnax Diana ben' chse'ejni'alaže'e, na' chda'ochguan na' gan xen chone' na' leczə ca' beṇə' ca' chso'on žin txen len le'. ²⁵ Nach btobe' beṇə' ca' chso'on žin txen len le' na' yeziquə'əchlə beṇə' leczə zjənlan chso'on žinnə' nac ca' nach gože' lega'aque': —Nezele de que ca naquə žin nga nlancho choncho, chonlenchguachon gan. ²⁶ Na' babenczele na' babe'iczele can' chonližə to de'e le Pab' chsed chlo'ine' beṇə' lao' syoda Efeso nga na' casi yoguə' beṇə' ža' doxente Asian' che'e lega'aque' de que yoguə'əlojte lgua'a lsaquə' de'e chso'on beṇəchən' bito zjəzaquə'ən par šejni'alažə'əchon. Na' beṇə' zan bachoso'ozenag čhe'. ²⁷ Le'e gonšč xbab naclə goncho la' nxož bin' yesə'əne' čhecho por ni čhe žin de'e nga choncho, na' caguə' ležən, sino leczə nxož so'one' par nič yo'odao' čhe xnax Diana čhechon' yega'anə ca to de'e cui bi bi zaque'e na' leczə ca' yelə' xoche čhe'enə' na' yelə' zaquə' čhe'enə'. Xož gac čhe' ca' la'ana'əczə beṇə' ža' doxenlə Asia nga na' doxen yežlyon' chse'ejni'alaže'e le'.

²⁸ Beyoż gwse'enene' gwna Demetrimon' ca' besə'əlocchgüe' che de'en chsed chlo'i Pabən', nach gwso'osye'e gosə'əne': —Benə' zaquə'əchgüei xnax Diana chechon', la' le'enə' xnax che chio'o benə' Efeso.

²⁹ Nach to scandl juisy bachac lao' syodan' de'en gwsa'aque' tozə bosə'əniže' benə' ca' zjələ Gayo na' Aristarco, na' gosə'əxobe' lega'aque' xte besə'əzinte' gan' chəsə'ədobə yogua' benə' lao' syodan'. Gayon' na' Aristarcon' zjənaque' benə' Masedonia na' chsa'aše' t xen len Pabən'. ³⁰ Pabən' goclaže'e šo'e gan' zjəndobə benə' ca' par güe'elene' lega'aque' dižə' pero benə' Efeso ca' chso'onlilažə' Jesocristən' bito gwso'e latjə šeje'. ³¹ Na' yebalə benə' migw che Pabən', benə' zjənaque' benə' gwnabia' Asian', bosə'osele'e rson gwse'e Pabən' de que bito šeje' gan' zjəndobə benə' ca'. ³² Na' benə' ca' zjəndopə zjənžaguən' chso'one' to scandl juisy. Gwde gwde chso'osya'a to toga'aque', niqwe nejni'a bin' chəsə'əne'. Na' caguə yogua'əga'aque' zjənezene' bi parən' zjəndobe'. ³³ Na' benə' ca' besə'əža'a Pabən' lecəə besə'əže'e notə'ətezəchlə benə' Izrael. Nach benə' Izrael ca' zjənžaguən' bosə'ožigue'e to benə' le Ljandr par gwzeche' lao benə' ca' ža'anə' par güe'e dižə' cuent cuich yesə'əže'e lega'aque'. Na' Ljandrən' gwlis ne'enə' par bene' señy nite'e žizə yoso'ozenague' rsonnə' de'en gwzoe' laoga'aque'enə'. ³⁴ Pero catə' besə'əle'ine' le' gwsa'acbe'ine' de que naque' to benə' Izrael, nach tš'i'izə besyə'əzolaogüe' gwso'osye'e gosə'əne': —Benə' zaquə' juisy xnax Diana che chio'o benə' Efeso.

Ca do čhop or gwso'osye'e gosə'əne' ca'.

³⁵ Nach be'enə' naquə sriban catə'əchgua goc bebec žie' lega'aque' nach gože' lega'aque': —Le'e benə' syoda Efeso, yogua' benə' ža' doxenlə yežlyon' zjənezene' de que naquan lao na'acho aggüia əgwyecho yo'odao' che xnax Diana chechon'. Le'enə' naque' le'ezelaogüe benə' zaque'e la' lguə'a lsaquə' che'enə' b xopən yoba na'ate par lao yežlyon'. ³⁶ De'e na'anə' ža bito gaquə no əna de'e yoblə. Na' le'e so žizə, bito bi gonle sin cui gongaxjle xbab naquən' gonle. ³⁷ Ca naquə benə' quinga nche'ele nga, bito ənacho bi bagosə'əbane' lo'o yo'odao' checho ca' na' niqwe ənacho choso'ožia choso'onite'e xnax Diana chechon'. ³⁸ Na' Demetrimon' nga len benə' ljuežje' ca' yela', šə chac bi de'e chac chega'aque' len benə' yoblə, nitə'əczə benə' gwnabia' so'one' yelə' jostis chega'aque'enə' šə žja'aque' par nič əžjse'e lega'aque' part. ³⁹ Na' šə bichlə de'e chnəble gaquə, partlə gaquə jont chei par čhoglaon. ⁴⁰ Ca naquə scandl de'e nga chac na'a nxožchgua əbague'echo de que choncho contr gobiern ca de'en nga že'e ža'acho nga, na' nic bi bi de ye'ega'acchone' šə yesə'ənəbene' chio'o che scandl juisyən' choncho.

⁴¹ Beyoż gože' lega'aque' ca' bene' mendad besyə'əžaše'.

20

Pabən' gwyejəche' Masedonian' na' Gresian'

¹ Nach catə' beyoż gwche' ži de'e zedən', Pabən' goxe' benə' Efeso ca' chso'onlilažə' Jesocristən' gan' zo'enə' na' lao banite'enə' btipe' lažə'əga'aque', nach bzeine' lega'aque' dižə'. Gwde na' beze'e gwyejəche' Masedonian'. ² Na' gwdie' to to yež ca' zjəchi' Masedonian' btipchgüe' lažə' benə' ca' chso'onlilažə' Jesocristən', nach gwyejəche' Gresian'. ³ Na' gwzoe' Gresian' šon bio', na' catə' bžin ža yeze'e par yeyo'e lo'o barcon' yeyeje' Sirian', gwnezene' de que zjəchi'inao benə' Izrael ca' le', nach mejor bezzie' doxen gan' mbane Masedonia na'alə, belə'atie' Filiposən' gan' zoa' ca orən'. ⁴ Na' Sopater len Aristarco len Segundo len Gayo len Tiquico len Trofimo na' lecəə len Temtion'

ja'aclene' le' Asian'. Sopateran' naque' beṇə' Berea, Aristarcon' na' Segundo zjənaque' beṇə' Tesalonica, na' Gayon' naque' beṇə' Derbe. Na' Tiquicon' len Trofimon' zjənaque' beṇə' Asia. ⁵ Nach gosə'əbialao beṇə' ca' na' jəsə'əleze' neto' Troasən'. ⁶ Gwdech lḡin' catə'an chsa'ogüe' yetxtil de'en cui bi xne'i nḡhixə, nada' len Pabən' gwza'ato' Filiposən' gan' zo'ana' na' gwyo'oto' lo'o barcon' na' goc gueyə' ža catə' bžinto' Troasən' gan' banitə' beṇə' ca' jəsə'əleze' neto' nach gwzoto' na' gažə ža.

Can' goquə lao zo Pabən' Troasən'

⁷ Na' catə' bžin ža dmigw besə'ədobə beṇə' ca' chso'onlilažə' Jesocristan' Troasən' gwse'ej gwsa'ogüe' par chjəsyə'əzalaze'e bi zejen par chio'o de'en bsanlazažə' cuin Xancho Jesocristan' gwso'ot beṇə' le'. Na' de'en bazon yeza' Pabən' ca gwxezə be'e xtižə' Diozən' len lega'aque' xte bžinte do chel. ⁸ Na' lo'o yo'o gan' ndopə nžagto' naquən de šon cuiā na' cuartən' de'en zo le'ezealagüe' la'alə, zechguan yi' na' lo'i nan' že'eto'. ⁹ Na' to bi'i güego' lebo' Eutico žiabo' cho'a bentannə'. Na' Pabən' zdonzə zda dižə' de'en cho'enə' na' ca' žia bi'in cho'a bentannə' gwtasbo' na' lao chtasbo'on bexopəczlabo' lao yo che'elə. Na' bi'i guatzə besyə'əlise'. ¹⁰ Nach betj Pabən' bžine' gan' jəsyə'ədixjue'ebo'onə' le'e bchequa'ate' laobo'onə' gwdele'ebo'. Nach gože' beṇə' ca': —Bito bi gaqule, mbanczbo'.

¹¹ Na' begüie' de'e yoblə nach gwsa'ogüe' na' bezolaogüe' cho'e dižə'anə' len lega'aque', na' ne'e cho'ete'en ca' catə' gwyeni'. Nach beze'e. ¹² Nach catə' besyə'əsa'ac beṇə' ca' besyə'əbeichgüeine' besyə'əche'e bi'i güego'on mbambo'.

Gwsa'aque' Troasən' na' ja'aque' gan' nzi' Mileto

¹³ Nach bxi'ato' len Pabən' de que yebialaoto' yeyejto' lo'o barcon' xte gan' nzi' Ason, na' le' gwyazlazažə'ache' yeyede' yo bižlə yela'ate' Asonnə'. Ca' goquən' beyo'oto' lo'o barcon' par bežinto' Asonnə'. ¹⁴ Na' Ason na' bežagto'one' nach txen beyo'olento'one' lo'o barcon' par bežinto' gan' nzi' Mitilene. ¹⁵ Nach na' bessa'ato' besyö'oto' lo'o barcon' na' beteyo bežinto' galə'əžə ganə' nzi' Quio. Nach zjəzdato' na' gwde yeto ža bežinto' ganə' nzi' Samos. Na' bechojto' lo'o barcon' na' gwyejto' gan' nzi' Trogilio na' na' bega'antə' tže' bento' dezcanz. Nach beteyo besyö'oto' lo'o barcon' de'e yoblə par bežinto' Mileton'. ¹⁶ Ca' bento' par nič cui gwdeto' Efeson' la' Pabən' bito gone'ene' šeichene' yež ca' zjəchi' Asian', čhedə' bachachbyenchgüeine' šə galə' soe' Jerosalennə' par ža lḡni Pentecostesən'.

Pabən' be'e dižə' len beṇə' golə blao che beṇə' ca' chso'elao' Jesocristan' Efeson'

¹⁷ Mileto na' zoto' bselə' Pabən' rson par bda'ac beṇə' golə beṇə' blao ca' entr beṇə' ca' chasə'ədopə chasə'əžag so'elaogüe'e Jesocristan' Efeson'. ¹⁸ Na' catə' besə'əla'aque'enə' Pabən' gože' lega'aque': —Nezczze ca güennə' babena' entr le'e dezd catə'an bida' Asian' de'e neche. ¹⁹ Gwzozə' bəna' xšin Diozən' do yichj do laža'a. Bito ben cuina' xen, na' zan las gwchežəchgua' čhele, na' de'e zan de'e boso'oči' boso'osaquə' beṇə' Izrael ca' nada'. ²⁰ Bzejni'ida' le'e yoguə' de'en byažjele šejni'ile sin cui bžeba'. Bzejni'ida'an le'e catə'an chdopə chžagle na' leczə liž to tole. ²¹ Bzejni'itezəda' beṇə' zjənaquə beṇə' Izrael na' beṇə' cui zjənaquə beṇə' Izrael can' chene'e Diozən' yesyə'ədinjene' xtołə'əga'aque'enə' na' can' cheyalə' so'onlilaže'e Xancho Jesocristan'. ²² Na' na'a yeya'a Jerosalennə' čhedə' babzejni'i Spirit che Diozən' nada' de que chonən byen yeya'a, na' bito nezdə' bin' gaquə čhia' na'. ²³ Con de'en nezdə'

de'en babzejni'i Spirit che Diozən' nada' de que to to syoda gan' yedia' ədolə'a gaca' pres na' leczə gaquə bichlə de'e chi' saca'a. ²⁴ Bito chi' yichja' che yoguə de'e ca' chi' saca'a. La'anə'əczə šə so'ote' nada', chzanczəda' yelə' mban chia'anə'. Chi' yichja' š'alao gona' yoguə'əlol de'en naquə lao na'a gona' na' mbalaz zoa' lo'o yichja' aždəogua'anə' žlac chona'an. Xancho Jesocrisən' gwleje' nada' par yo'o lao na'a chyxjui'a dižə' güen dižə' cobə catequən' nzi'ilažə' Diozən' beňachən' na' chixjui'an žlac ne'e yo'a biš xne.

²⁵ Nadan' bzejni'ida' le'e ca naquən' chnabia' Diozən' con notə'ətezə beňə' chso'e latjə pero na'a zoa' segor de que ni tole bitoch le'ile nada' lao yežlyo nga. ²⁶ De'e na'anə' əchnia' le'e de que bito bi dolə' napa' nada' šə nole cuiayi'.

²⁷ La' bač bzejni'ida' le'e yoguə'əlol de'en chene'e Diozən' ənezele sin cui bi bcuaša'a. ²⁸ De'e nan' ža cuēc yichje che yoguə'əlol de'en babzejni'ida' le'e na' legwsed legwlo'i yežiqə'əchlə beňə' chsə'ədoṗə chsə'əžag chso'elaogü'e Xancho Jesocrisən' de que cheyalə' yoso'ozenague' chei. Legon ca' čhedə' Xancho Jesocrisən' bnežjw cuine' gwđixjue' xtolə'əchon' catə'ən gwsə'ot beňə' le', na' Spirit che Diozən' bagwleje' le'e par əggüia əgwyele yeziqə'əchlə beňə' chso'onliłažə' Jesocrisən'. ²⁹ Nezdə' catə' cuich zoa' len le'e la'ac beňə' se'enene' yesə'əxoayague' le'e par nič cuejyichje cuich gwzenagle che Jesocrisən'. ³⁰ Na' entr le'e yesə'əchoj beňə' yoso'osed yoso'olo'ine' le'e por dižə' güenlažə' lguə'a dižə' li, se'enene' naole de'en yoso'osed yoso'olo'ine'. ³¹ De'e na'anə' legapə cuidad nič cui no yesə'əxoayag le'e. Na' ležjza'alažə' de que šon iz bagwzoa' bsd blo'ida' le'e na' gwneyoida' le'e teža na' še'elə' na' xte bcuežən nada' por le'e.

³² Na'a ža beňə' bišə', Diozən' gwcuasə' gwcue'eje' le'e len de'e malən' na' xtiže'enə' əgwzejni'ichən le'e can' nzi'ilažə'e le'e. Xtiže'enə' gaquəlenən le'e soteza' sole gonliłažə'əle Jesocrisən' na' leczə gaquəlenən le'e par nič žjəyazole len Diozən' txen len yeziqə'əchlə beňə' ca' bagwlej Diozən' par zjənaque' lažə' ne'enə'. ³³ Bitonə' selažə'a bi de'en de che beňə', nic xmechga'aque'enə' na' ni xala'anga'aque'. ³⁴ Nezczele ni'a na'a bgona' žin par nič bžel bi de'en byažj de'en bčhinda' txen len beňə' ca' gosə'ənitə' len nada'. ³⁵ Na' bəna' žinnə' ca' par nič leczə blo'ida' le'e can' gonle gaquəlenle beňə' ca' chac falt bi de'en chsə'əyazjene'. Na' žjsa'alažə'əle xtižə' Xancho Jesocrisən' de'en gwne': "Mbalazəch zocho catə' chnežjwcho bi de'en chnežjwcho beňə' cle ca catə'ən chso'one' chio'o bi de'en chso'one'."

³⁶ Na' beyož be'e Pabən' dižə'ən bzo xiben' txen len yoguə' beňə' ca' gwsə'one' orasyonnə'. ³⁷ Na' yoguə'əga'aque' gosə'əbežchgü'e che Pabən' na' gosə'əyele'ene' na' gwsə'ogü'e'ene' bxid. ³⁸ Nach ja'aclene' le' gan' beyo'e lo'o barcon'. De'e juisy de'e gwsə'əquene' de'en gože' lega'aque' de que ni yešlasza' cuich yesə'əle'ine' le'.

21

Pabən' beyeje' par Jerosalennə'

¹ Beyož bzeišaza ljuēžjto' dižə' len beňə' ca', na' beyo'oto' lo'o barcon' zjədato' liča bežinto' gan' ne' Cos. Na' beteyo bežžinto' gan' ne' Rodas. Na' Rodas na' bezsa'ato' na' bežžinto' Patara. Na' bechojto' lo'o barcon'. ² Na' to jəyetilzato' chza' yeto barcw yoblə chza'an šəjan Fenisia na' beyo'oto' lo'inə'. ³ Na' lao zjəyedato' lo'o barcon' ble'ito' isla de'en ne' Chipre, chi'in na'acho yeglə. Na' bedeto' zjəyedato' gan' mbane Siria. Nach catə' bežinto' Tiron' gan' bosyo'oletje' yo'a' de'en zonsa'anə' na' beyetjto'. ⁴ Na' jəyediljto'

gan' nitə' beṇə' ca' chso'onlilažə' Jesocrisṭən', na' catə' beželetə' gan' nite'enə' bega'anlenga'acto'one' to xman. Nach gwsa'atə'əyoine' Pabən' cui šeje' Jerosalennə' chedə' Spirit che Diozən' babžejni'in lega'aque' de que gaquə de'en gac che' Jerosalennə'. ⁵ Na' catə' beza'ato'onə' do xi'in do xo'oləga'aque' lega'aque' len netə' cho'a syodan', nach bzo xibto' bento' orasyonnə' len lega'aque' cho'a nisdə'onə'. ⁶ Beyož na' bzei ljuežjto' dižə' nach beyo'oto' lo'o barcon'. Na' besa'aque' zjəya'aque' ližga'aque'.

⁷ Na' de'en beza'ato' Tiron' bežinto' gan' ne' Tolemaida na' Tolemaida na'azə bezyetjto' lo'o barcon'. Na' jəlanə'əto' beṇə' ca' chso'onlilažə' Jesocrisṭən' Tolemaidan' na' gwzoto' len lega'aque' tza. ⁸ Na' beteyo beza'alentə' Pabən' na' bežinto' Sesarean' na' jəyega'antə' liž Lipən' ben' naquə txen len beṇə' ca' yəxop zjənaque' comisyon che beṇə' ca' chso'onlilažə' Jesocrisṭən' Jerosalennə'. Na' Lipən' zotezə zoe' cho'e dižə' che Jesocrisṭən'. ⁹ Lipən' nita' tap xi'ine' no'ol güego' na' choso'ozenebo' beṇə' bi de'en bagož Diozən' lega'acbo'. ¹⁰ Zan ža gwzoto' liž Lipən' na' lao zoto'onə' bla' to beṇə' Jodean' beṇə' le Agabo. Chzenene' beṇə' bi de'en bagož Diozən' le'. ¹¹ Na' catə' ble'enə' gwnabe' doxpey Pabən' na' bčhejən ni'a ne'e ca' na' gože'ene': —Spirit che Diozən' babžejni'in nada' de que beṇə' Izrael ca' ža' Jerosalennə' yoso'ocheje' ni'a na'o ca' can' babčhej ni'a na'anə' len doxpeyo' nga, nach so'one' le' lao na' beṇə' ca' cui zjənaquə beṇə' Izrael.

¹² Catə' beyož beneto' can' gwna Agabən', netə' len beṇə' Sesarea ca' gotə'əyoito' Pabən' par cui šeja'che' Jerosalennə'. ¹³ Nach Pabən' gwne': —Bito cuežle chia' o gonle' ca soa' trist. Nada' zocza' par əcheja' na' gata' Jerosalennə' laoguē de'en chyixju'i'a xtižə' Xancho Jeso'osən'.

¹⁴ Na' gočbe'ito' bito bi gaquə gonto' par cui šeje' Jerosalennə', na' bitoch bi gožto'one', con gožto'one': —Gaquə con de'en əna Xancho'.

¹⁵ Nach beyo'eni'ato' beza'ato' zjədato' par Jerosalennə'. ¹⁶ Na' gwsa'ac to čhopə beṇə' Sesarea ca' chso'onlilažə' Jesocrisṭən' len netə' na' entr lega'aque' len to beṇə' Čhipren' ben' le Mnason. Bagoc zan iz chonlilaže'e Jesocrisṭən', na' bazo liže' Jerosalennə'. Nach bxia'ato' zjəsoto' liže'enə'.

Pabən' bežine' Jerosalennə' na' jəlanə'e Jacobən'

¹⁷ Na' catə' bežinto' Jerosalennə' beṇə' bišə'əcho ca' ža'anə' besyə'əbeichgüeine' na' boso'oguape' netə' diox. ¹⁸ Na' beteyo gwyeljento' Pabən' jəyeto' Jacobən' na' bžinto'onə' bazjəndopə zjənžag yoguə beṇə' gələ beṇə' blaə che beṇə' ca' chso'onlilažə' Jesocrisṭən' na'. ¹⁹ Nach bguap Pabən' lega'aque' diox na' beyožən' be'elene' lega'aque' dižə' tcho'a tšao' ca naquən' baben Diozən' par nič zan beṇə' cui zjənaquə beṇə' Izrael bachso'onlilaže'e Jesocrisṭən' gan' be'elene' lega'aque' xtižə' Diozən'. ²⁰ Na' catə' beyož boso'ozenague' de'en gož Pabən' lega'aque' nach gwso'elaoguē'e Diozən'. Na' gwse'e Pabən': —Beṇə' bišə' nəzdo' de que zan mil beṇə' Izrael ca' bagwso'onlilaže'e Jesocrisṭən' na' yoguə'ələle' chsa'aquene' chonən byen nəochə costombr de'en na lei de'en bzoj de'e Moizezən'. ²¹ Na' bazjənenene' rson de que le' chdao' chsed chlo'ido' yoguə' beṇə' Izrael ca' že'e zitə' de que cuich cheyałə' yesə'ənaoguē' costombr de'en na lei de'en bzoj de'e Moizezən'. Le'egatezə ca' bazjənenene' rson de que chsed chlo'ido' cuich cheyałə' yoso'ozoe' xi'inga'aque'enə' seŋy de'en ne' sirconisyonnə' can' naquə costombr chechon'. ²² ¿Nacxa gaquən' ža? la' zane' yesə'əžag nga catə' yesə'əneze' de que bač zo' nga de'e yoblə. ²³ Quinga goncho. Nitə' tap beṇə' nga beṇə' zjənon to lyebe lao Diozən' na' na'a chse'enene' so'one'

complir ca de'en zjənone' lyebe. ²⁴ Gwĉhe'ega'aque' yo'odao' əblaonə' na' gono' txen len lega'aque' ĉixjxo' bia ca' əgwnežjwle bħoxən' gote'. Gono' ca' par niĉ yexi' yeyachle can' na lein' de'en bzoj de'e Moizezən' na' techlə guaquə əgwžib yichjga'aque'enə' ca costombr ĉecho de'en de yeyož goncho complir lyeben'. Gono' ca' len lega'aque' par niĉ yoguə'əloĭ benə' əsa'əbe'ine' de que chono' can' na leinə' na' de que bito chzo'on ca'alə can' ĉəsə'əne'. ²⁵ Babzopto' benə' ca' ĉso'onlilažə' Jesocristən' ga yoblə benə' ca' cui zjənaquə benə' Izrael, na' gožga'acto'one' de'en chaqueto' cui cheyalə' so'one'. Gožga'acto'one' cui sa'ogüe' yelə' guao de'en ĉəsə'əne' naquən ĉhe lgua'a lsaquə'an ĉse'ejni'alazə' benə', na' cui sa'ogüe' ĉen, na' cui sa'ogüe' bia chat ĉbe' ši'ib. Na' leczə gožga'acto'one' cui yesə'əgo'o xtoga'aque'.

Gosə'əzene' Pabən' yo'odao' əblaonə'

²⁶ Beteyo gwza' Pabən' gwĉhe'e benə' ca' tap par yesyə'əxi' yesyə'əyache' yo'odao' əblaonə' can' na lei de'en bzoj de'e Moizezən'. Nach Pabən' gwyo'e gan' zo bħoxən' gwdixjue'ine' le' bi žan' əza'a əsa'aque' xi'ilazə' niĉ yoso'onežjue' bħoxən' bia ca' gote'enə'.

²⁷ Na' baĉ zon gaquə gəžə ža ĉso'one' de'en ĉso'one' par ĉesyə'əxi' ĉesyə'əyache', nach gozej Pabən' lo'o yo'odao' əblaonə'. Na' besə'əle'i balə benə' Izrael ca' za'ac Asian' le', nach bosota bosona' benə' ca' nitə'ənə'. Nach gosə'əzene' Pabən'. ²⁸ Gwso'osya'adie' gosə'əne': —Le'e benə' Izrael, ledogaquəch toza. Benga ĉhde' doxenlə ĉsed ĉlo'ine' benə' de que bito naccho benə' güen na' de que bito bi zaquə' lei de'en bzoj de'e Moizezən' na' nic yo'odao' əblao ĉecho nga. Na' na'a yeto de'e mal juisy banone' len yo'odao' əblao nga de'en naquə ĉhe Dioz ĉechon', babž'e'e benə' ca' cui zjənaquə benə' Izrael lo'ina'.

²⁹ Gwso'one' xbabən' ca' ĉhedə' antslə besə'əle'ine' Pabən' lao' syodan' ĉhdalene' to benə' Efeso le Trofimo na' gwsa'aquene' gwĉhe'ene' lo'o yo'odao' əblaonə'.

³⁰ Na' gwso'onĉgüe' zda zne. Nach le'e besə'ədobte benə' zan ĉo'a yo'odao' əblaonə' nach gwso'e gwso'ox'e'e Pabən' na' besyə'əxobe'ene' fuerlə yo'odao' əblaonə', na' le'e besyə'əseyjwte puert ca'. ³¹ Na' baĉĉczə ĉso'ote'ene' catə' bžin rsonnə' lao benə' gwnabia' ĉhe soldad ca' de que doxen lao' syoda Jerosalennə' bachac scandlən'. ³² Nach le'e gwza'ate benə' gwnabia'anə' gwĉhe'e soldad ca' na' capitan ca', əzja'acese' gan' ža' benə' zan ca'. Na' catə' benə' ca' ĉso'ot Pabən' besə'əle'ine' bachəsə'əžin benə' gwnabia'anə' len soldad ĉhe' ca' gan' nite'enə', nach le'e gosə'əbezte' bitoch gosə'əyine' Pabən'. ³³ Nach catə' bžin benə' gwnabia'anə' gan' ža' benə' ca', bene' mendad gwso'oxə' soldad ĉhe' ca' Pabən' na' bosota'ĉheje'ene' ĉhopə gden. Nach gwñabene' benə' ca' ža'anə' bi le be'enə' na' bin' none'. ³⁴ Na' gwso'osya'adia benə' ca' ža'anə', na' gwde gwde gosə'əna to toe', na' gwdecza cui gwyejmi'i benə' gwnabia'anə' bixacžxan' ĉac tant scandl ĉso'one'. Nach bene' mendad gosə'əĉhe' soldad ĉhe' ca' Pabən' cuartelən'. ³⁵⁻³⁶ Nach yoguə' benə' zan ca' jəsə'ənaogüe' lega'aque' ĉso'osye'e ĉso'one' to scandl juisy. Na' catə' besə'əžine' ĉo'a scaler ĉhe cuartelən' gosə'əlen soldad ca' Pabən' ĉhedə' ne'e gwse'enche benə' ca' yoso'onize'ene' na' yogue'e gwso'osye'e gosə'əne': —Le'e gote'.

Pabən' be'e dižə' lao benə' ca' zjənžaguən'

³⁷ Na' baĉ ĉso'e len Pabən' lo'o cuartelən' catə'əczla gože' benə' gwnabia'anə': —¿Eguaquə güe'elena' le'e to ĉhopə dižə'?

Nach beṇə' gwnabia'anə' gože'ene': —¿Echaco' dižə' griego? ³⁸ ¿Ecagua len' beṇə' Egipto ben' gwda btob tap mil beṇə' güet beṇə' bat ngazə na' gwche'e lega'aque' latjə dašən' gan' chso'one' contr gobiernən'?

³⁹ Nach Pabən' gože'ene': —Cagua le' nada'. Nada' naca' beṇə' Izrael na' lažə'anə' naquən to syoda blao gan' mbane Silisia de'en nzi' Tarso. Benšga goclen be' latjə güe'elena' beṇə' quinga dižə'.

⁴⁰ Nach beṇə' gwnabia'anə' gože'ene' ya'o. Nach Pabən' gwzeche' lao scalerən' na' bene' señy len ne'enə' par nitə' beṇə' ca' žizə yoso'ozenague' xtiže'enə', na' legosə'ənitə'ətie' žizə. Nach gwzolaogüe' be'e dižə'an len lega'aque' dižə' ebreo.

22

¹ Gože' lega'aque': —Beṇə' bišə' legwzenag ca naquə rson čhia' nga gwzoa' laolen'.

² Catə' gwse'ene'ene' dižə' ebreon' choe' Pabən', gosə'ənitə'əche' žizə. Nach Pabən' gože' lega'aque': ³ —Nada' naca' beṇə' Izrael. Golja' syoda Tarso gan' mbane Silisian' pero bida' syoda nga na' ni gwcha'ogua'. Na' bseda' len to maestr əblao'n be'enə' le Gamaliel. Le' bzejni'ine' nada' cuaselol can' na lei che de'e xaxta'ocho ca'. Na' godca' lechgualə chona' yogua'əlol can' chene'e Diozən' cayanə'əczən' le'e chaquele chonle na'a. ⁴ Na' blagzejə blagzida' beṇə' ca' chso'onlilažə' Jesocristən'. Go'onda' gotga'aca'ane' na' gwxena' beṇə' byo ca' na' no'ol ca' chso'onlilažə' le' gwche'ega'aca'ane' gwže'e ližyan'. ⁵ Beṇə' gwnabia' che bxož ca' na' yogua'əlol beṇə' golə beṇə' blao ca' chəsə'anabia' nasyon Izraelən' zjəneze' can' bena'. Lega'aque' gwso'one' yiš de'e bexa'a əzya'a Damascən' par nič gaquə sena' balteza beṇə' chso'onlilažə' Jesocristən' par che'ega'aca'ane' Jerosalen ni gonga'acto'one' castigw.

Pabən' be'e dižə' can' goquə bembie Jesocristən'

⁶ Na' goquən' lao əzya'a Damascən' na' mer do gobiž bazon əžina'anə' catə'əczla to be'eni' juisy de'en za' yoban' gwyečhjen nada'. ⁷ Xte bgüixa' lao yon' na' benda' to beṇə' gože' nada': “Saul, žbixchen' nga nlagzejə nlagzido' nada' quinga?” ⁸ Nach božia'an goža'ane': “¿No le Señor?” Nach gwne': “Nada' Jeso'os beṇə' Nasaret. Nadan' nlagzejə nlagzido'.” ⁹ Beṇə' ca' əzya'alena'anə' besə'əžebchgüe' besə'əle'ine' be'eni'inə' pero bito gwse'ene' de'en gwna Jeso'osən' nada'. ¹⁰ Nach goža'ane': “¿Bin' cheyalə gona' ža Xana'?” Nach Xana' Jeso'osən' gwne': “Beyas na' gwyejtəza Damascən', na' to beṇə' zo na' əne' le' bin' cheyalə gono'.” ¹¹ Nach be'eni'inə' xte benən ca gwčola', nach beṇə' ca' nžaga'anə' gwso'oxe'ene' na'anə' par bžinto' Damascən'.

¹² Na' Damasco na' zo to beṇə' le Ananias beṇə' cho'elaogüe'e Diozən' do yichj do laže'e can' na lei chechon', na' yogua'əlol beṇə' gwlaž checho ca' ža'anə' chso'e xtižə' Ananiasən' de que naque' beṇə' chon de'e güen. ¹³ Ananiasən' bide' bedənie' nda' na' catə' ble'enə' gože' nada': “Saul biša'a, bele'i.” Catə' gwne' ca' le'e bele'iteida', nach goc ble'ida' le'. ¹⁴ Nach gože' nada': “Diozən' ben' cho'ela'ocho, ben' leczə gwso'elao' de'e xaxta'ocho ca', bagwleje' le' par nič bable'ido' Xi'ine'enə' ben' naquə le'ezelaogüe beṇə' güen. Bagwleje' le' par nič babendo' be'elene' le' dižə', na' par nič sejni'ido' doxen can' chene'ene' gono'.” ¹⁵ Go'o xtiže'enə' len beṇə' zan beṇə' že' lao yežlyo nga na' əgwzejni'iga'acdo'one' de'e ca' babendo' na' bable'ido'. ¹⁶ Na' na'a ža, bito cuežəcho'. Yo'o par nič čho'o nis. Na' gono' orasyon lao Xancho Jesocristən' ənabdo'one' yeya'a yeyibe' yichjla'ažda'ogo'ona'.”

Pabən' be'e dižə' can' goquə jəsed jəlo'ine' beṇə' ca' cui zjənaquə beṇə' Izrael

17-18 Nach gwde na' beyeda' Jerosalen nga na' gwyə'a lo'o yo'odao' əblaonə' jena' orasyon na' lao chona'annə' ble'idaogüe'eda' Jesocristən'. Na' gože' nada': "Na'atec na'a bechoj Jerosalen nga la' bito yoso'ozenag beṇə' quinga chio' ca naquə dižə' de'en go'o chia'." 19 Nach goža'ane': "Xana', zjənezcəgə'aque'ne' de que nada'anə' gwyə'a to to yo'odao' ca' na' jətə jtina' beṇə' ca' chso'onliləžə' le' na' bseyjwga'aca'ane' ližya. 20 Le'egatezə ca' lencza' naquəto' txen na' gwyazlažə'əchgua' catə'an gwso'ote' de'e Esteban' ben' be'e xtižə'onə', na' nada' gwdapa' xadon che beṇə' ca' gwso'ot le'." 21 Pero Jesocristən' gože' nada': "Bchoj la' əsəla'a le' zitə' par go'o xtižə'anə' len beṇə' cui zjənaquə beṇə' Izrael."

Pabən' be'elene' beṇə' gwnabia' che soldad ca' dižə'

22 To ca'atə'əzə boso'ozenague' che Pabən', nach gwso'osye'e gosə'əne': —Le'e got be'əne'. Bito cheyalə' soche' yežlyon'.

23 Gwso'osya'adie' xte juisy. Na' de'e tant chəsə'əloque' xte boso'ozalə' xaga'aque'enə' lao be' na' leczə gwsa'aše'e bište yon' na' boso'ozalə'en. 24 Catə' ble'i beṇə' gwnabia' che soldad ca' can' chso'one'enə' nach bene' mendad yesə'əyine'ene' yid sot nič güe' de' dižə' bi de'e malən' babene' de'en chso'osya'a beṇə' ca' contr le'. 25 Na' bazjəncheje' Pabən' par yesə'əyine'ene' catə' gože' capitannə' ben' zecha galə'əzə: —Segon can' na' lein', bito de lsens chinle nada' yid sotən' chedə' la' naca' beṇə' nasyon Roma na' niquənə' gatə'əbia' šə bin' nona'.

26 Beyož gože' capitannə' ca' le'e gwyeyte' capitannə' lao beṇə' gwnabia' che soldad ca', ježe'ene': —Gapgo' cuidad bin' gonecho ben' bandolə' la' naque' beṇə' nasyon Roma.

27 Nach beṇə' gwnabia' che soldad ca' gwyeyte' lao Pabən', gože'ene': —Gwna nda' žəle beṇə' nasyon Roma le'?

Nach Pabən' gože'ene': —Beṇə' nasyon Roma nada'.

28 Nach beṇə' gwnabia' che soldad ca' gože' Pabən': —Mech xen gw-xaquə'əda' nada' par nič naca' cuent len beṇə' nasyon Roman'.

Nach Pabən' gože'ene': —Nada' golja' naca' beṇə' nasyon Roman'.

29 Nach beṇə' ca' banitə' probnid par yesə'əyine' Pabən' le'e besyə'əbižə'əte' cuite'enə', na' leczə ca' beṇə' gwnabia' che soldad ca' bžebe' chedə' gosə'əneze' bito de lsens len lein' par yoso'ocheje' notə'ətezə beṇə' naquə beṇə' nasyon Roman' šə cuiṇə' choglaon bi de'e mal none'.

Pabən' zeche' lao beṇə' golə blao ca' chəsə'ənabia' Izraelən'

30 Nach beteyo beṇə' gwnabia' che soldad ca' boseže' Pabən'. Na' bene' mendad besə'ədobə bχoz əblao ca' na' beṇə' golə blao ca' chəsə'ənabia' nasyon Izraelən' par nič əneze'ne' bi porən' choso'ocuiše' Pabən'. Na' catə' babesə'ədobə beṇə' gwnabia' ca', gwleje' Pabən' nach bzeche' le' delant lega'aque'.

23

1 Nach Pabən' bgüie' beṇə' golə blao ca' chəsə'ənabia' nasyon Izraelən', na' gože' lega'aque': —Beṇə' bišə', xte ža neža zoa' lao Diozən' chona' complir de'en ngüe' lao na'a gona' na' lo'o la'aždaogua'anə' nežda' de que chazlaže'e can' chona'anə'.

2 Nach Ananias ben' naquəch bχoz əblaonə' bene' mendad len beṇə' ca' zjəzecha cuit Pabən' yesə'əbaže'e cho'enə'. 3 Nach Pabən' gože'ene': —Diozən'

gone' le' castigw, goxoayag. Le' chi'o nga par gono' yelə' jostis chia'anə' can' na' lein', na' chono' contr lein' de'en benlizo' mendad yesə'əbaže'e cho'anə'.

4 Nach benə' ca' zjanitə' cuite'enə' gwse'ene': —Bito yoži'o xtiže'enə' ca', la' le'enə' bxož əblaoch.

5 Nach Pabən' gože' lega'aque': —Benə' bišə' bito nezdə' šə be'enə' naquəch bxož əblaoch. Ža'alə nezdə' bito goža'ane' ca', čhedə' nyoj Xtižə' Diozən' nan: “Bito yoži'o dižə' pesad len benə' gwnabia' chelen'.”

6 Na' Pabən' gocbe'ine' de que benə' golə blao ca' chəsə'anabia' nasyon Izraelən' zjanaque' čhoplə. Balə' zjanzi'e sadoseo na' yebalə' zjanzi'e fariseo por ni če can' chse'ejle'e na' can' choso'osed choso'olo'ine'. Nach gwne', gože': —Benə' bišə' nada' naca' benə' fariseo, la' xi'in benə' fariseo nada'. Na' zoa' nga chonle yelə' jostis chia' por ni če de'en chejli'a de que yesə'əban benə' guat ca'.

7 Ca beyož gwne' ca' gwzolao to bžəš entr benə' fariseo ca' na' benə' sadoseo ca' na' gwsa'aque' čhoplə. 8 Goc ca' čhedə' benə' sadoseo ca' chəsə'əne' de que bito yesə'əban benə' guat ca', na' bito chse'ejle'e de que nitə' angl ca' na' spirit ca', pero na' benə' fariseo ca' chəsə'əne' nitə' angl na' spirit na' leczə chəsə'əne' yesə'əban benə' guat ca'. 9 Xte bachso'osya'a benə' fariseo ca' len benə' sadoseo ca' chəsə'əšaše'. Nach gosə'əzoža' to čhopə benə' ca' zjənsed lein' benə' ca' zjanaquə benə' fariseo, gosə'əne': —Ni to de'e mal cui non benga. Na' bito naquən güen goncho contr le'. ¿čhexa šə babsed blo'i no spiritən' o no anglən' le'? Caguə de'e si'innə' goncho contr Diozən'.

10 Can' chəsə'ədilə chəsə'əšaše'enə' xte bačh chžeb benə' gwnabia' če soldad ca' šə yoso'ozoxj yoso'onitlaocze' Pabən'. Nach benə' mendad besə'əžin soldad ca' par besyə'əbejxaxjə' Pabən' ladjo benə' ca' na' besyə'əčhe'ene' cuartelən' de'e yoblə.

11 Na' že' beteyon' bžin Xancho Jesocristən' gan' de Pabən' na' gože'ene': —Bito žebo' Pab. Can' babi'o xtiža'anə' Jerosalen nga, ca'aczən' go'on Roman'.

Boso'oxi'e so'ote' Pabən'

12 Na' beteyon' balə benə' Izrael ca' besə'ədobe' par boso'oxi'e so'ote' Pabən'. Na' boso'ozo'e jorament gosə'əne': —Diozən' gone' chio'o castigw šə ye'ej šə gaocho antslə cuiñə' gotcho Pabən'. 13 Mazlə čhoa benə' ca' boso'oxia' so'ot Pabən'. 14 Nach ja'aque' gan' ža' bxož əblao ca' na' benə' golə blao ca' chəsə'anabia' Izraelən', gwse'e lega'aque': —Neto' bačh bzoto' jorament gon Diozən' neto' castigw šə ye'ej šə gaoto' mientrzə cui gotto' Pabən'. 15 Na' ņa'a ža, le'e yedopə legon jont par ničh le'e len benə' lježjle ca' ənabele benə' gwnabia' če soldad ca' cueje'ene' gwxe par yide' laolen' na' con gwde'itezele de que par əšaš əche'enəchle šə bi de'e xiñjən' none'enə'. Na' neto' cue'enaoto'one' tnezən' par gotto'one' antslə ze'e le'e gan' ža'alən'.

16 Pero na' zo to bi'i byo čhe benə' zan Pabən', na' benebo' ca naquən' bazjəngüie' so'one'. Nach gwejyeb' cuartelən' par jəzenebo' Pabən'. 17 Nach Pabən' goxe' to capitannə' na' gože'ene': —Gwče' bi'i nga lao benə' gwnabia' če soldadən'. De to de'e ye'ebə' le'.

18 Nach capitannə' gwče'e bi'inə' lao benə' gwnabia' če soldadən' na' catə' besə'əžine'enə' gože' benə' gwnabia'anə': —Ca naquə Pabən' ben' de pres goxe' nada' na' gwnabe' goclen laogua'anə' par ničh zedəgua'a bi'i nga laogo' nga. De to čhopə dižə' güe'elembo' le'.

19 Nach benə' gwnabia' če soldad ca' bexe'e na' bi'in na' gwče'ebə' ga cui nonə' bene, nach gože'ebə': —¿Bin' de ənao' nada'?

²⁰ Nach bi'inə' gožbo' le': —Ca naquə beṇə' blao che beṇə' Izrael ca' bač boso'oxi'e yedəsa'əṇabene' le' cuejo' Pabən' gwɣe par əselo'one' gan' chəsə'ədopə beṇə' gwnabia' ca', na' con yoso'ode'ine' yesə'əne' de que yoso'ošaŋ yoso'oche'ene' šə bitequən' none'. ²¹ Pero bito šejli'o čhega'aque' chedə' mazlə čhoa beṇə' ca' banaquən yesə'əbe'enaŋ le' tnezən' par so'ote'ene' con šə babnežyw cho'a xtižo'o əselo'one', na' beṇə' ca' baboso'ozoe' jorament gon Diozən' lega'aque' castigw šə se'ej šə sa'ogüe' mientrzə cuinə' so'ote'ene'.

²² Nach beṇə' gwnabia' che soldad ca' bose'e bi'inə' na' gože'ebob': —Cuidad no güe'eleno' dižə' ca' naquə rsonnə' de'en babedəgo'o laogua' nga.

Boso'osele'e Pabən' lao gubernadorən' ben' le Fels

²³ Nach beṇə' gwnabia' che soldad ca' goxe' čhopə capitan che' ca' na' gože' lega'aque' de que cheda ga še'elə yesə'ənite'e probnid len čhopə gueyoa soldad beṇə' əsa'ac nia'aze' na' gyon ši beṇə' yesə'əbia' cabey nach yečhopə gueyoaga'aque' əso'oxe'e lanz par əžja'aque' Sesarean'. ²⁴ Na' leczə gože' lega'aque' yesə'əyilje' cabey bia' cuia Pabən', nič ca' cui bi gaquə che' lao zjsə'ene' lao gubernadorən' ben' le Fels. ²⁵ Nach bzoje' to cart de'e əbgoxe'e lega'aque' par gubernadorən' na' nan:

²⁶ “Señor Gobernador:

Nada' Claudio Lisias chzoja' le' gubernador Felix, əchguapa' le' diox. ²⁷ Ca naquə beṇə' Izrael ca' gosə'əzene' benga na' bazjəngüie' so'ote'ene' ža'aque' gwy'a' na' gwčhi'a soldad chia' ca' par jəyesla'ane' chedə' gwnezdə' de que naque' beṇə' nasyon Roma. ²⁸ Na' de'en go'onda' ənezda' bi porən' choso'ocuiše'ene' joa'ane' lao beṇə' gwnabia' čhega'aque' ca' gan' chəsə'ədobe'. ²⁹ Nach gwnezdə' de que choso'ocuiše' le' por ni che bizə' falt che' len lei čhega'aque'ənə', pero bito ənacho bi de'e mal none' par so'ote'ene' o gate'e ližyan'. ³⁰ Nach na'a babla' rson laogua'anə' de que beṇə' Izrael ca' baboso'oxi'e yesə'əbe'enaogüe'ene' par so'ote'ene' na' de'e na'anə' əchseļa'ane' laogo'onə' lğüegwə. Na' babena' mendad len beṇə' ca' choso'ocuiš le' da'aque' laogo'onə' par yesə'əne' le' šə bin' chsa'ac čhega'aque' len le'. Si'ixenšgo' che yoguə'əloj de'en chneyoišgueda' le'.

Claudio Lisias.”

³¹ Nach soldad ca' besyə'əbeje' Pabən' can' ben beṇə' gwnabian' mendad. Na' bedo yel gosə'əgüe'e nezən' len le' besə'əžinte' gan' nzi' Antipatris. ³² Nach gwy'e'eni'inə' besyə'əbi'i soldad ca' ja'ac con ni'ei jəya'aque' cuartelən', na' porzə beṇə' güiab ca' ja'aclene' Pabən'. ³³ Catə' besə'əžine' Sesarean' boso'onežjue' gubernadorən' cartən' zjənoxə'ena' nach gwso'one' Pabən' lao ne'e. ³⁴ Na' beyož blab gubernadorən' cartən' gwṇabene' Pabən' ga be'enə'. Gotə'əbia' de que Pabən' naque' beṇə' Tarso gan' mbane Silisia. ³⁵ Nach gože'ene': —Na' ənezda' šə bi'in ənao' catə' la'ac beṇə' ca' choso'ocuiš le'.

Nach bene' mendad boso'oseyjue' Pabən' lo'o yo'o gan' chbe' Rei Erodən' catə'an chone' yelə' jostisən'.

24

Pabən' be'e dižə' lao gubernadorən' ben' le Fels

¹ Na' catə' bač goc gueyə' ža zo Pabən' Sesarean', nach bžin be'en naquəch bəxoz əblao ben' le Ananias na' nche'e to čhopə beṇə' golə beṇə' blao na' len to beṇə' le Tertolo beṇə' chac cho'e dižə' lao' lcue'. Nach gwsa'ogüe' xya contr Pabən' lao gubernadorən'. ² Nach gubernadorən' bene' mendad

gwyej Pabən' laogüe'enə' na' Tertolon' gwzolaogüe' chcuise'ene', che'e gob-
ernadorən': —Si'ixenšgo' Señor Gobernador ca naquə za'ato' laogo' nga ža, la'
de'en zocho binlo juisy naquan por le' na' de'e zan de'e güen de'e bachac por
ni che can' chnabi'o neto'. ³ Na' gatə'atezə zoto' syempr nato' choxcwleno'onə'
Señor Gobernador, tant chebeito' can' chnabi'o neto'. ⁴ Na' par ničh cui
gonšguito' le' zedte, chata'əyoišgüida' le' əgwzenago' šlož dao' ca naquə nga
ənatə'. ⁵ Ca naquə bengə zo laogo' nga par gono' yelə' jostis che'enə', bach
nezetə' de que naque' to beņə' güec de'e zed juisy. Na' chde' entr neto'
beņə' Izrael ža'ato' doxenlə yežlyon' chta chne' neto' par ničh gaquato' choplə,
la' naque' beņə' blao che beņə' ca' zjənzi' beņə' Nasaret por ni che de'en
chəsə'anaogüe' de'en əbsed əblo'i de'e beņə' Nasaretən' gwle Jeso'os. ⁶ Na' de'e
mal juisy ngüie' gone' len yo'odao' əblao cheto'onə' de'en gone'ene' gwž'e
beņə' cui zjənaquə beņə' Izrael lo'inə'. De'e na'anə' gwxento'one', na' gone'eto'
gonto' yelə' jostis che' segon can' na lei cheto'onə'. ⁷ Pero na' gwyaz Lisias ben'
naquə beņə' gwnabia' che soldad ca', na' la fuers beque'ene' lao na'ato'onə'.

⁸ Na' bene' mendad de que notə'atezəto' chene'eto' əgwcuisto'one' cheyalə'
əgwcuisto'one' laogo' nga. Guac ənabdo' Pabən' bin' goquə par ničh ənezdo'
che de'e ca' chcuisto'one'.

⁹ Nach beņə' Izrael ca' nžague'enə' gwsa'aque' tozə gosə'əne' de que le can'
naquan. ¹⁰ Nach gubernadorən' bene' seņy len Pabən' par ničh əne'. Nach
gwzolaogüe' gwne': —Ca naquə nezdə' de que bach goc zan iz chono' yelə'
jostis che nasyon nga, de'e na'anə' ža chebeida' gwzo rson čhia'anə' laogo'onə'.

¹¹ Na'a chac šižin žazə gwya'a Jerosalennə' par əje'elaogua'a Diozən'. Na' guaquə
ənlaba'acdo'one' šə le can'. ¹² Na' bito ənacho chacyoža' no beņə' lo'o yo'odao'
əblaonə' na' bitonə' yesə'əle'ine' nada' ša'a do lo'o yo'odao' ca' yelə' par žjəta
žjənia' beņə', na' nic lao' syodan'. ¹³ Na' bito bi de so'on beņə' quinga par
yesə'əlo'e de que napa' dolə' can' choso'ocuiše' nada'. ¹⁴ Con nia' le' clar de que
cho'elaogua'a Dioz ben' gwso'elao' de'e xaxta'oto' ca', na' naogua' costombr
cobə' par cho'elaogua'ane' de'en chəsə'əna zan beņə' gwlaž čhia' ca' zjənaquə
costombr mal. Pero bito zjənaquan costombr mal, la' chejli'a che yogua' lib
ca' gan' zjənyoj Xtizə' Diozən' de'en bzoj de'e Moizezən' na' yeziquə'əchlə beņə'
gwso'e xtiže'enə' cana'. ¹⁵ Na' zoa' lez de que Diozən' yolis yosbane' beņə' guat
ca'. Yolis yosbane' beņə' güen na' beņə' mal, ca'aczən' beņə' gwlaž čhia' ca'
nite'e lez gone'. ¹⁶ Na' zotezə zoa' chi' yichja' chona' can' chene'e Diozən' par
ničh nezdə' lo'o yichjla'aždaogua'anə' de que bito napa' dolə' lao Diozən' na' nic
lao beñəchən'.

¹⁷ Bagoc zan iz zoa' zitə', pero na'a ža babeyeda' Jerosalennə' par bnežjua'
mech de'en btoba' par beņə' yašə' ca' chəsə'əyažj chəsə'əchine' na' jua'a de'e
jua'a lo'o yo'odao' əblaonə'. ¹⁸ Na' goquan' zoa' lo'o yo'odao' əblaonə' babexi'
beyacha' can' na lei de'en bzoj de'e Moizezən', na' chnežjua' de'e ca' chnežjua'
par Diozən'. Ca' chona' catə' to čhopə beņə' Izrael za'ac Asian' bla'aque' gan'
zoa'anə'. Bito ənacho nochlə ntopa' na' bitobi scandl chona'. ¹⁹ Na' lega'auen'
žalə' bda'aque' laogo' nga par yoso'ocuiše' nada' šə bin' chsa'ac lega'aque'
len nada'. ²⁰ O beņə' quinga nitə' nga guac yesə'əne' šə bi de'e malən' nona'
catə'əno' boso'odie' nda' lao beņə' gwnabia' čhega'aque' ca'. ²¹ Tozə de'en
gwnia' laoga'aque'en, catə'ən gožəga'aca'ane': “Ca naquə nga chonle yelə'
jostis čhia'anə', chonlen chedə' chejli'a de que gwžin ža yesyə'əban beņə' guat
ca'.”

²² Catə' bene gubernador Felsən' gwna Pabən' ca', bitoch gone'ene' gone'
yelə' jostis che Pabən' ca orən', chedə' la' bañezczene' che de'en chejle'e chio'o

chonlilažə'əcho Jesocristən'. De'e na'anə' par gwcho'one' čhega'aquen' sša gože' lega'aque': —Catə' yidə Lisiasən' ben' naquə beṇə' gwnabia' čhe soldad ca', cana' yeyož gwzenaga' ca naquə de'e nga chaole xya nga.

²³ Nach Felsən' bene' mendad len to capitan čhe' par beče'e Pabən' gaquəche' pres na' gatə' lsenš par gone' bitə'atezə' chene'ene' na' guaquə žžə'sə'alanə' beṇə' migw čhe' ca' le' par əso'ene' šə bi de'e chyažjene'.

²⁴ Goc to čhopə ža bežə' gubernador Felsən' Sesarean' catə' bezžine' len no'ol čhe'enə'. Naque' no'olə Izrael na' le' Drosila. Na' gox Felsən' Pabən' na' bzenague' be' Pabən' dižə' can' cheyałə' gonlilažə'əcho Jesocristən'. ²⁵ Nach Pabən' be'elene' le' dižə' can' cheyałə' goncho par gaccho beṇə' güen lao Diozən' na' can' bito cheyałə' güe'echo latjə' ṇabia' la'ažda'omalchon' chio'o, na' can' əžin ža catə' Diozən' čhoglaogü'e'n čhe to to chio'o beṇəč šə nocho napcho dolə'. Na' gubernador Felsən' bžebe' xte juisy ca naquə dižə' de'en čoe' Pabən'. Nach gože'ene': —To ca'atə'ətə' gwzenaga' ṇa'a. Guaxcza' le' catə' gatə' to latjə' čhia'.

²⁶ Gubernadorən' goquene' cueze' par nič Pabən' əgwnežjue'ene' mech par yosane' le', na' de'e na'anə' goxe'ene' telizə be'elene' le' dižə'. ²⁷ Ca' chac gwde chop iz, na' le'e bžine tyemp gwde ben' le Porsio Festo goque' gubernador. Na' de'en gone'e Felsən' yega'ane' binlo len beṇə' Izrael ca' catə' cuičh naque' gubernadorən', de'e na'anə' ze'e yechoje' bene' mendad ze'e deczə Pabən' pres.

25

Pabən' chzo rson čhe' lao gubernadorən' ben' le' Festo

¹ Na' catə' bžin Feston' Sesarean' gan' ṇabi'e, gwzoe' šonə ža na' gwze'e gwyeje' Jerosalennə'. ² Nach bχoz əblao ca' na' nochlə beṇə' blao čhe beṇə' Izrael ca' ja'aque' jesə'əye'ene' par boso'ocuiše' Pabən'. ³ Na' gwsa'atə'əyoine' Feston' gone' goclən gaquə can' čhəsə'əṇabe', gonšgue' mendad əžjsə'e Pabən' Jerosalennə'. Gwsa'atə'əyoine' le' gone' ca' par nič lega'aque' yesə'əbe'enaogü'e' Pabən' par so'ote'ene' tnezən'. ⁴⁻⁵ Nach Feston' gože' lega'aque' de que Pabən' naque' segor Sesarean' na' leczə gože' lega'aque': —Nada' bito yega'ana' Jerosalennə' sino le'e cheza'atia'. Beṇə' ca' zjənaquə blao entr le'e guaquə əsa'aque' len nada', na' šə bi de'e xiṇjən' non be'enə', guaquə yoso'ocuiše' le' Sesarean' gan' chona' yelə' jostisan'.

⁶ Na' gwzoe' len lega'aque' ca do xon' o ši ža na' beyeje' Sesarean'. Nach beteyo gwchi'e gan' chone' yelə' jostisan' na' bene' mendad gwyej Pabən' laogü'e'enə'. ⁷ Nach catə' bžin Pabən' laogü'e'enə' banitə beṇə' Izrael ca' za'ac Jerosalennə' na' le'e gwse'ečhjte' le' na' gosə'əzolaogü'e' chosə'əcuiše'ene' čhəsə'əne' de que de'e zan de'e mal juisy de'e chone', pero na' bito bla'alaon šə chso'e dižə' lin'. ⁸ Nach Pabən' bzo rson čhe'enə' gwne': —Ni tozə fal't cuiṇə' gapa' len lei čhe neto' beṇə' Izrael, na' ni len yo'odao' əblao čheto'onə' na' nic len Rei Sesar ben' chnabia' doxen ṇasyon Roman'.

⁹ Nach Feston' ca naquə gone'ene' soe' binlo len beṇə' Izrael ca' gože' Pabən': —čEgü'e'endo' sa'o nič gona' yelə' jostis čhio'onə' Jerosalennə' ca naquə yogua' de'e quinga choso'ocuiš beṇə' quinga le'?

¹⁰ Nach Pabən' gwne': —Laogo' len' zecha', banzo Rei Sesarən' le' par gono' yelə' jostis, na' nga cheyałə' gaquə yelə' jostis čhia'anə'. Ca naquə beṇə' Izrael quinga, le' nezcədo' de que bito bi bi ne'e gona' contr lega'aque'. ¹¹ Žalə' bi fal't bagwdapa' o bichlə de'e babena' de'e cheyałə' gata', bito nia' cui gata'. Pero de'en cui bi bi nona' ca naquə de'en choso'ocuiš beṇə' quingan' nada', notono

no zaquə' əgwde nada' laoga'aque'enə'. Na' na'a chḡaba' tia' lao Rei Sesarən' niḡ cuine' gone' yelə' jostis ḡhia'anə'.

¹² Nach Feston' len beḡə' gwnabia' che' ca' yelə' boso'oxi'e naquən' so'one', nach gože' Pabən': —Lao Rei Sesar na'anə' bagwḡabo' tio', na' laogüe' na'anə' šejo'.

Feston' bdi'e Pabən' lao Rei Agripan'

¹³ Na' ca' chac gwde to ḡopə ža catə' Rei Agripa na' no'ol che' Berenise bla'aque' Sesarean' par bedəsə'əguape' Feston' diox. ¹⁴ Na' gwnite'e zan ža, na' be'elen Feston' Rei Agripan' dižə' ca' naquən' chac len Pabən', gože'ene': —Zo to beḡə' nyixjw Felsən' pres nga. ¹⁵ Na' catə' gwy'a Jerosalennə' bḡoz əblao ca' na' len nochlə beḡə' golə beḡə' blao che' nasyon Izraelən' gosə'əḡabe' ḡhoglaogua'an che' de que nape' dolə'. ¹⁶ Pero na' gožəga'aca'ane' ca' naquə' costombr che' chio'o beḡə' nasyon Roma bito gaquə' gwdecho beḡə' sa'aque' castigw sin cui yesyə'ədillaogüe' beḡə' ca' choso'ocuiš lega'aque' na' gata' latjə yoso'ozo rson chega'aque' ca' naquə' de'en choso'ocuiše'ene'. ¹⁷ Na' catə' bla'aque' nga beteyo le'e gwche'etia' gan' chona' yelə' jostisən', nach bena' mendad gosə'əbeje' Pabən'. ¹⁸ Na' beyož boso'ocuiš beḡə' ca' le', ni toza de'en chacda' choso'osbague'ene' le' cui bi gosə'əne'. ¹⁹ De'en chaczə chega'aque' len le', cui chejḡi'alazə' Pabən' can' chse'ejḡi'alazə' lega'aque' na' chso'e dižə' che to de'e beḡə' guat beḡə' gwle Jeso'os, na' Pabən' ne' de que mbanzce'. ²⁰ Na' nada' ža, cui bežellažə'a bi gona' ca' de'en chac chega'aque', nach goža' Pabən' šə chene'ene' yeza'alene' nada' Jerosalennə' par niḡ gaquə' yelə' jostis che'enə' ca' naquə' de'e ca' choso'osbague'ene' le'. ²¹ Per na' gwḡab Pabən' šeje' gaquə' yelə' jostis che'enə' lao Rei Sesarən'. Nach bena' mendad beyeiḡue' mientr gwdi'ane' lao Rei Sesarən'.

²² Nach Rei Agripan' gože' Feston': —Łeczə che'enda' gwzenaga' can' choe' ben' dižə'əḡə'.

Nach che' Feston' le': —Gwḡe əgwzenago'.

²³ Nach beteyon' de'e juisy chacḡgua besə'əžin Rei Agripan' na' len Berenise, nach gwso'e gan' chi' goberḡadorən', na' łeczə žjalen beḡə' gwnabia' che' soldad ca' na' yeziqə'əchlə beḡə' blao che' syodan'. Nach ben Feston' mendad jesə'əxi'e Pabən'. ²⁴ Nach Feston' gwne': —Rei Agripa na' yoguə'əlol le'e ža'ale nga len neto', ca' naquə' bengə chḡüiale nga, beḡə' zan beḡə' Izrael ca' ža' Jerosalennə' na' beḡə' ca' ža' nga bagosə'əne' nada' de que beḡə' mal bengə, chəsə'əḡabe' de que cabich cheyalə' əban bengə yežlyon'. ²⁵ Pero na' chḡüia' nada' de que bito bi bi none' par ḡhoglaogua'an gate', na' bagwḡabe' tie' lao Rei Sesarən' na' baḡḡ goža'ane' šeje'ena'. ²⁶ Pero na' cui de bixa de'e gwzoja' rein' par yapa'ane' bin' none'. De'e na'anə' baḡḡ gwleja'ane' laole nga, na' catec naco' le' Rei Agripa, par niḡ na' yeyož əgwzenagcho che' na' gatə' de'e gwzoja'. ²⁷ La' chacda' bito bi rson napa' con əgwsełə'a to pres sin cui gwzoja' šə de bi de'en none'.

26

Pabən' bzoe' rson che' lao Rei Agripan'

¹ Nach Rei Agripan' gože' Pabən': —Guaquə' nio' par əgwzo' rson ḡchio'onə'.

Nach Pabən' bze ne'en lao beḡə' ca' gwzolaogüe' bzo rson che'enə' gwne':

² —De'e mba juisy nga bagoc ḡhia', Rei Agripa, ca' naquə' nga de to latjə ḡa'a gwzo rson ḡhia'anə' laogo' nga ca' naquə' de'en choso'ocuiš beḡə' Izrael gwlaž checho ca' nada'. ³ Le' nezdə' ca' naquə' costombr che' chio'o beḡə' Izrael, na'

ca naquə beṇə gwlaž checho ca' chsa'acyože' entr lega'acze'. De'e na'anə ža chatə'əyoišgueda' le' par gapəšgo' yelə' chxenlažə' əgwzenago' chia'.

Pabən' be'e dižə' can' bene' catə' cuinə' gonlilaže'e Jesocrisṭən'

⁴Yoguə'əloḷ beṇə Izrael gwlaž checho ca' zjənezczene' nac gwzoa' dezd gwzolaogüego'otia', gwzoa' Jerosalennə' entr lega'aque'. ⁵Na' zjənezczene' de que nada' dezd bgüego'otia' naca' beṇə' fariseo, na' neto' beṇə' fariseo naochto' yoguə'əloḷ costombr de'en de ca naquən' chejni'alažə'əcho Diozən' mazəchlə ca notə'ətezəchlə beṇə' Izrael. ⁶Na' beṇə' gwlaž checho ca' bachsə'əṇabe' gono' yelə' jostis chia' laogüe de'en chejli'a de que gwžin ža catə' Diozən' yosbane' beṇə' guat ca' can' bene' lyebe len de'e xaxta'ocho ca'. ⁷Beṇə' zan lao šižin family che chio'o beṇə' Izrael nite'e chso'elaogüe'e Diozən' do yichj do lažə'əga'aque' na' do ža do yel nite'e lez gaquə' complir ca' naquə'lyeben'. Na' ni che de'en zoa' lez yosban Diozən' beṇə' guat ca', de'e na'anə' choso'ocuiš beṇə' Izrael ca' nada' Rei Agripa. ⁸¿Bixchexan' chaque le'e caguə de'e no šejle'enə' de que Diozən' cholis chosbane' beṇə' guat ca'?

Antslə Pabən' blagzejə' blagzide' beṇə' ca' chso'onlilažə' Jesocrisṭən'

⁹Antslə nada' godca' de'e cheyalə' gona'an benteca' contr beṇə' ca' chso'onlilažə' Jeso'os ben' naquə beṇə' Nasaret. ¹⁰Beṇə' zan beṇə' Jerosalen ca' bagwlej Diozən' par zjənaque' lažə' ne'enə' bseyjua' ližya segon can' na yiš de'en beṇə'a de'en gwso'on bṅoz checho ca' beṇə' ca' zjənaquə beṇə' blao. Na' catə' bṅoz əblao ca' gosa'əchoglaogüe'en so'ote' beṇə' ca' chso'onlilažə' Jesocrisṭən' lena' bda' cho'a xtižə'a. ¹¹Na' de'e zan las gwy'a to to yo'odao' jəsaquə'əzi'iga'aca'ane' par ničh yoso'ožia yoso'onite'e Jesocrisṭən'. Na' de'e tanttec bgue'iga'acda'ane' gwy'a blagzejə' blagzidəga'aca'ane' syoda che nasyon ca' yelə'.

Pabən' be'e dižə' can' goquə bembie Jesocrisṭən'

¹²Na' leczə güen de'e na' əzya'a Damascon'. Noṅa'a yiš de'en gwso'on bṅoz checho ca' beṇə' ca' zjənaquə beṇə' blao de'en chon mendad gona' ca'. ¹³Pero na' lao əzya'a ngua'a nezən' ca' do gobiž catə'əczla ble'ida' to be'eni' juisy de'e za' le'e yoban' xte bnitlaon be'eni' che bgüižən' na' to gwyečhžən nada' len beṇə' ca' žaga'anə'. ¹⁴Na' xte bgüixə yoguə'əto' lao yon'. Ca' deto' lao yon' catə' benda' to beṇə' chne' dižə' ebreo gwne': "Saul, ¿bixchen' nlagzejə nlagzido' nada'? De'en chono' contr nada' chone zi' cuino' can' chac che to go'on bian' chlibə lao ya la de'en zo lao garrošən'." ¹⁵Nach bolgüižə'ane' chapa'ane': "¿No le' Señor?" Nach gwna Xancho Jeso'osən': "Nada' Jeso'osən' nlagzejə nlagzido'. ¹⁶Pero na'a beyas la' bach bloe' laogua' le' par ničh gono' xšina'anə' na' go'o dižə' che yoguə'əloḷ de'e quinga bach ble'ido', na' yeziquə'əchlə de'e ze'e le'ichdo' catə' yozloe' laogua' le'. ¹⁷Na' na'a əselə'a le' gan' ža' beṇə' ca' cui zjənaquə beṇə' Izrael na' bito gua'a latjə no got le', ni beṇə' Izrael na' nic beṇə' ca' cui zjənaquə beṇə' Izrael. ¹⁸Eselə'a le' par ničh əgwzejni'ido' lega'aque' nac so'one' par ničh šo'o be'eni' chia'anə' lo'o yichjla'ažda'oga'aque'enə' na' yesə'əbejyichje' de'e malən'. Na' yesyə'əchoje' xni'a gwxiye'enə' na' yoso'ozenague' che Diozən' na' nitlao xtolə'əga'aque'enə', na' əsa'aque' txen len yoguə'əloḷ beṇə' ca' yelə' bagwlej Diozən' par zjənaque' lažə' ne'enə' por ni che de'en chso'onlilaže'e nada'."

Pabən' bzenague' can' gož Jesocrisṭən' le'

19 Na'a ža Señor Rei, bzenaga' ca naquæ de'en bzejni'i Jeso'osæn' nada' len de'en ble'idaogüe'eda'. 20 Zgua'atec Damasco na' gwzolaogua' bzejni'ida' beñæ' ca' ža'anæ' che Jesocristan', na' lecza ca' Jerosalennæ' na' doxen gan' mbane Jodean'. Na' lente beñæ' ca' cui zjænaquæ beñæ' Izrael gwɔdixjue'iga'acda'ane' de que cheyalæ' yesyæ'dinjene' xtolæ'æga'aque'ena' na' yoso'ozenague' che Diozæn', na' so'one' ca gacbia' de que babesyæ'dinjene' xtolæ'æga'aque'ena'. 21 Na' por ni che de'en chzejni'ida' beñæ', de'e na'anæ' beñæ' Izrael gwlaž checho ca' gosæ'æzene' nada' lo'o yo'odao' æblao chechon' na' gwsa'aclaže'e so'ote' nada'. 22 Pero na' Diozæn' zocze' chaclene' nada' par niç zocza' cho'a xtiže'ena' xte ža neža len yoguæ'æloł beñæ', la'anæ' bi'i xcuidæ' na' la'anæ' beñæ' golæ. Bito nacho bilæ bagwnia' sino ca de'en gosæ'anaczæ de'e profet ca' beñæ' ca' gwso'e xtižæ' Diozæn' cana', na' can' gwna de'e Moizezæn' che de'en za gaquæ ca tyemp chega'aque'ena'. 23 Gwso'e dižæ' de que Cristæn' ben' selæ' Diozæn' par gaquælene' nasyon chechon' cheyalæ' saquæ'æzi'e na' le' gaque' beñæ' nech yebane' ladjo beñæ' guat ca' na' cuich gate'. Na' lecza gwso'e dižæ' de que Cristæn' gwzenene' chio'o naccho beñæ' Izrael na' len beñæ' ca' cui zjænaquæ beñæ' Izrael naquæn' goncho par niç šo'o be'eni' che Diozæn' lo'o yichjla'ažda'ochon'.

Pabæn' gone'ene' gone' par niç Rei Agripan' gonlilaže'e Jesocristan'

24 Na' ca' cho'e dižæ'ænæ' par chzo rson che'ena' catæ'æczla gwne Feston' zižjo gože'ene': —Chac tonton' Pab. De'e tanttec chsedo' na'anæ' baçh chac tonto'.

25 Nach Pabæn' gože' Feston': —Bito chac tonta' Señor Gobernador. Dižæ' lin' cho'a na' de'e yejni'anæ'. 26 Ca naquæ Rei Agripa nga, nezene' che de'e quinga cho'a dižæ' chei na' de'e na'anæ' cho'a dižæ'an clar laogüe' nga. Zoa' segor cabi nacho cui nezene' che' de'e ca', la' caguæ goquæ de'e ca' do gazæ zo bižæ' de'e ngašæ'ænæ'. 27 Le' Rei Agripa, žæchejli'o ca naquæn' bosozojæ de'e profet ca' beñæ' ca' gwso'e xtižæ' Diozæn' cana'? Nada' nežda' de que chejli'o.

28 Nach Rei Agripan' gože' Pabæn': —žEchacdo' len to çhopæ bi'in bagwna'onæ' gonlilažæ'ætia' Jesocristan'?

29 Nach Pabæn' gože'ene': —Chona' orasyon lao Diozæn' de que šæ to çhopæ dižæ' o šæ zan dižæ' de'e bagwnia' le', le' na' yoguæ'æloł beñæ' ca' choso'ozenag can' ænia' nga so'onlilaže'e Jesocristan' can' chonlilažæ'ane', pero sin cui gacle pres ca nada' nga ncheja' naca' pres.

30 Na' beyož gwna Pabæn' ca' bezoža' Rei Agripan' len no'ol che' Berenisen' na' len gobernador Feston' na' beñæ' ca' gosæ'æbe' len lega'aque'. 31 Nach bežaše' jasyæ'adobe' ga yoblæ nach gwse'e ljuežje': —Bito ænacho bi chon benga de'e zaquæ' gate' o gate'e ližya.

32 Nach Rei Agripan' gože' Feston': —Guaquæ yezan benga žalæ' cuinæ' nabe' tie' lao Rei Sesaræn' par gone' yelæ' jostis che'ena'.

27

Boso'osele'e Pabæn' Roman'

1 Nach boso'oxi'e yoso'osele'e neto' Italian' tlaõ nis. Na' Pabæn' len yeto çhopæ pres ca' gwsa'aque' lao na' to capitan beñæ' le Jolio. Naque' capitan che zan soldad che rein' beñæ' zjænzi'e "Batallon Augusto". Na' nada' Locas zoa' len Pabæn'. 2 Nach gwyo'oto' to lo'o barcw de'e za' Adramitio par æžinæn Asia. Na' za'alæn Aristarcon' neto'. Naque' beñæ' syoda Tesalonica de'en chi' gan' mbane Masedonian'. 3 Beteyo bžinto' Sidonnæ' na' Jolion' bencze' güen len Pabæn' be'e latjo par gwyeye' gan' ža' beñæ' migw che' ca' par boso'onežjue'ene'

bi de'en byažjene'. ⁴ Na' gozsa'ato'onə' na' zdato' to lcue'ej lata' yežlyo de'e nga'an lo'o nisdə'onə' de'en nzi' Ćhipre, Ćhedə' be'enə' cheĉhjan clelə, na' yežlyo na'anə' bcue'ejən neto' len be'enə'. ⁵ Na' beyož gwdeto' lao nisdəo' de'en de cho'i gan' zjəmbane distrit ca' de'en zjənzi' Silisia na' Panfilia nach bžinto' syoda gan' nzi' Mira de'en chi' gan' mbane distrit ĉe Lisia.

⁶ Na' na' bžele capitannə' to barcw de'en za' syoda Alejandria na' chza'an šejən Italian', na' bene' mendad gwyo'oto' lo'inə' na' lenczə le'. ⁷ Nach gwza'ato' zdato' lao nisən' de'e yoblə. Zan ža zdato' šo'olažə' na' do canə gwdeto' galə'əzə gan' ne' Gnido. Na' por ni ĉe can' gwyechj be'enə' de'e na'anə' cui be'en latjə šejto' licha na' de'e na'anə' gwcua'ato' zdato' to lcue'ej yelata' yežlyo de'e nga'an lo'o nisdə'onə' de'en nzi' Creta, part de'en zo galə'əzə syodan' de'en nzi' Salmon, la' na' cuitec gwyechj be'enə' fuert. ⁸ Na' zdato' do canə to lcue'ejən' na' bžinto' gana' nzi' Buenos Puertos galə'əzə yež de'en nzi' Lasea.

⁹ Na' gocze gwde zan ža zdato' na' baĉh chonən zdebə par šejəchto' lao nisən' ĉhedə' baĉh bžin tyemp catə' cheĉhĉhgua be' zaguən'. ¹⁰ Na' Pabən' gwneyoine' be'nə' ca' ĉe'e lega'aque': —Chgüia' de que ca naquə biaj nga naquən leĉhgua le zdebə na' nxož caguəgaza cuiayi' de'en noa' barcon' sino lenczə len na' len yelə' mban ĉeĉho ša šejəchcho.

¹¹ Pero na' capitan ĉe soldad ca' bzenaguəĉe' ĉe ben' nsa' barcon' na' ĉe xan barcon' cle ca ĉe de'en gož Pabən' lega'aque'. ¹² Na' latjə gan' zoto' bito naquan par əgwdeto' tyemp zaguən', na' gwyən be'nə' ca' gwsa'aquene' ša gaquə güenĉ sa'ato' na' əžinto' yež gan' ne' Fenise par niĉh na' zoto' te de'e zaguən'. Fenisen' naquan puert ĉe Creta gan' cuitec ĉeĉhĉj be' de'en za' la'alə na' ĉe'elə.

Gwyechj to be' gual lao nisdə'onə'

¹³ Na' gwzolaĉ ĉeĉhĉj to be' gol de'e za'ate ĉe'elə, nach be'nə' ca' choso'osa' barcon' gwsa'aquene' de que guaquə can' ĉse'ene'ene', nach gozsa'ato' zdato' lao nisən', zdato' galə'əzə Cretan'. ¹⁴ Pero na' caguə gwža catə' za' to be' gual de'e nzi' Noreste de'e cheĉhjan contr galən' zda barcon'. ¹⁵ Na' bžiguə'əxaxjən barcon', caguə bi goquəĉ gonto'. Na' gwlejyichjšazə cuinto' len barcon' nžiguə'ən neto'. ¹⁶ Na' ca' zdato' to lcue'ej yežlyo dao' de'e nzi' Claudia de'e chi' lo'o nisdə'onə' gan' cuitec gwyechj be'enə'. Na' barcw ĉa'o gan' yo'oto'onə' nxobən to barcw dao', na' canə goc becueto'on lo'i de'e ĉa'onə'. ¹⁷ Na' ca beyož becueto' barcw da'onə' lo'i de'e ĉa'onə', na' bĉejto' barcon' ryat par gwlo'oto' fuers ĉei. Na' laogüe de'e bžebto' gaguə'əto' gan' naquə yox, bletjto' lachə' de'en chon par niĉh ĉza' barcon' niĉh cuich bžiguə'ətec be'enə' len. Na' zdato' lao nisən' con can' gwyechj barcon'. ¹⁸ Pero na' bžaglaochguato' ĉhedə' gwyechjĉhgua to be' gual juisy nach beteyo bosə'ošəšaze' yoa' ca' nsa'annə' bosə'ozalə'en lo'o nisan'. ¹⁹ Na' ža gwyon žeinə' goclenga'actə'one' besšazəto' šinlaz barcon'. ²⁰ Na' zan ža bito bolə'e lao bgüizən' na' še'elən' ni que zjənla'azə beljw ca'. Na' de'e tant gwyechjĉhgua be'enə' xte bitoch gwzoto' lez yelato'.

²¹ Na' goquən' baĉh gwža cui ĉaoto', nach Pabən' gwzože'e ladjo be'nə' ca' na' gwne': —Le'e be'nə', žalə' əbzenagle ĉhia' catə'ən gnwia' cui sa'acho Cretan' bito ĉac ĉeĉho quinga žalə' ca' na' bito gwžiai' šinlazchon'. ²² Pero na' ĉhnia' le'e le'e yebei ĉhedə' ni to le'e cui cuiayi' yelə' mban ĉhelen', lete barcw nga cuiayi'in. ²³ Na' ca naquə cho'elaogua'a Diozən' na' baben cuina' lažə' ne'enə', de'e na'anə' bablo'e lao angl ĉe'enə' nada' neže', na' anglən' gwne' nada':

24 “Bito žebo' Pab. Syempr cheyalə'əczə' tio' lao Rei Sesarən', na' əchnia' le' de que Dioz na'anə' gone' par ničh ni to beṇə' ca' za'ac len le' cui sa'at.” 25 Na'a ža, le'e yebei, cheda' nezda' de que Diozən' gone' par ničh gaquə can' bagwna anglən' nada'. 26 Pero bia'acza' yecho'onən' chio'o yo biž de'e nga'an' lata' lo'o nisən'.

27 Na' že' goc žda'obiž zdato' nilə na'alə' lao nisdə'o de'enə' nzi' Adria. Na' ca do chel beṇə' ca' zjənsa' barcon' gwsa'acbe'ine' de que bačh zdato' serczə to yo biž. 28 Nach boso'oletje' to plom lo'o nisən' par boso'ochixə' ca do ja'acquə'ətə' zitjw naquə nisən', na' beyož boso'ochixə'enṇə' goquən ši'intochoa metr. Nach gosə'azdie' yelatə' na' bosə'əzchixə'en de'e yoblə na' ca orən' goquən gažəchoa metr. 29 Na' besə'əžebe' žjti'i barcon' yej lo'o nisən' nach boso'oletje' tap ya xen de'en ne' ancla, boso'očeje'en zda xni'alei par gwso'oxə'an barcon' na' bazjəzelaže'e še'eni'. 30 Nach beṇə' ca' zjənsa' barcon' gwsa'aclačə'e yesyə'əxonje' na' boso'oletje' barcw da'onə' con chosə'əde'itezene' yoso'oletje' ancla ca' de'en yoso'ocue' laolei. 31 Nach Pabən' gože' capitannə' na' len soldad ca': —Šə beṇə' quinga cuich nite'e lo'i nga, ni točo cui yelacho.

32 Nach soldad ca' gosə'əchogue' don' zjənca'a barcw da'onə' na' bosə'osane'en.

33 Nach do šbaļ Pabən' gwzolaogwṇeyoine' beṇə' ca' de que cheyalə' sa'ogüe', che'e lega'aque': —Na'a chac žda'obiž zole cui chtasle na' cui chaole. 34 Na'a ža, chatə'yoišgüeidə' le'e le'e gao par ničh sole binlo, la' de'e li ni tole cui cuiayi'ile.

35 Na' beyož gwne' ca' bexe'e to yetxtilən' na' be'e yelə' choxcwlen che Diozən' lao yoguə'əloļ neto' ža'ato' lo'o barcon' nach gwxi'e to pedasən' gwzolaogüe' chaogüe'en. 36 Nach yoguə'əloļto' bebecheto' na' lecza gwdaoto'. 37 Čhopə gueyog gyonši'intoto'onə' ža'ato' lo'o barcon'. 38 Na' gwde gwdaoto' con ca beljeto' na' ca naquə trigon' de'e ne'e zjənse'e, gwso'ose'en lo'o nisən' ničh barcon' cuich goctequən ži'i.

Goxj barcon'

39 Na' cata' gweyeni' bito zjənombi'e yežlyon' gan' besə'əžine' pero na' choso'ogüie' de to latjə ga žia nisən' žizə na' bade to laša' de'e naquə porzə yox. Nach gwsa'aque' tozə par ničh žjəche' barcon' laša' lao yoxən'. 40 Nach gosə'əchogue' do che ancla ca' na' gosə'əbejyichjga'aque'en lo'o nisən'. Nach boso'oseže' do de'en boso'očeje' yag de'en chsa' barcon' liča na' boso'olise' lachə de'en zo yichjen' par bžiguə' be'enə' len, nach əzja'aque' cho'a nisən'.

41 Pero na' jəsə'ədi'e ga chediļ nisdə'onə' len to de'e yoblə, na' jšo'o laogüen' lo'o yoxən' na' caguə goquəch tan. Na' nisən' gwzolaogwzoxjən xni'einə' de'e tant fuers nsa'an. 42 Nach gwsa'aclačə' soldad ca' so'ote' pres ca' ničh ni toe' cui yesyə'əxoe' lao nisən' na' yosyo'oxonje'. 43 Pero na' capitannə' gone'ene' yosle' Pabən' na' bžone' ca' naquən' bachsa'aclačə' soldad ca' so'one', nach bene' mendad len pres ca' šə noe' chac chxoa lao nisən', guaquə lega'acteque' yesyə'əxite'e lao nisən' na' yesyə'əchoje' yo biž. 44 Na' bene' mendad de que beṇə' ca' cui chac yesə'əxoa lao nisən' yoso'ochine' no yagla' o bichlə šinlaz barcon' par yesyə'əxoe' lao nisən'. Ca' gwso'one' na' yogue'e besə'əžine' binlo yo bižən'.

28

De'en goc che Pabən' žlac zoe' Malta

1 Na' cata' beyož bžin yoguə'əto' yo bižən' gwṇezetə' de que latjənə' nzi'in Malta na' naquən to yežlyo de'en nga'an' lata' lo'o nisən'. 2 Na' beṇə' ca'

ža'anə' mbachgua gwso'elaogüe'e neto', boso'oxene' to yi' xen na' gwsa'axe' yogua'əlołto' gan' nite'enə' chedə' bagwzolao yəjon' na' chacchgua zag. ³Nach Pabən' btobe' xonj xis na' lao chcue'en lao yi'inə' bechojczlə to beł bia benen lo'inə' na' gwdi'inəb ne'enə' xte golə'əditəb. ⁴Na' choso'ogüia beñə' ca' nalə'ədit bełən' na' Pabən', nach gwse'e ljuəzje': —De'e li benga naque' beñə' güet beñə'. Baç bele' lao nisan' pero na' Diozən' bito cho'e latjə əbane'.

⁵ Nach bse'esə' ne'enə' lao yi'inə' niç bexopə bełən' na' bito bi goquene'.

⁶ Nach beñə' ca' baç chəsə'əbeze' bat solao gatə' Pabən' yi o əbixəcle' to de repentzə gate'. Na' ca' gosə'əbeze' sša na' choso'ogüie' bito bi bi chaquene' nach gwso'one' xbab yoblə chəsə'əne' de que naque' to beñə' cheyalə' šejni'aləzə'əcho.

⁷ Beñə' blao che doxen Maltan' le' Poblion' na' de bien che' galə'əzə, na' mbachgua be'elaogüe'e neto' na' gwzoto' šonə ža len le'. ⁸ Na' goquən' xa Poblion' de' cam chacšenene' yo'e de'e la na' che'ine' yiž chen. Nach Pabən' gwyo'e gan' de'ena' na' beyož bene' orasyon gwxoə ne'enə' yičhj beñə' güe'ena' na' beyone' le'. ⁹ Beyož bene' ca' yeziqə'əchlə beñə' ca' ža' latjən' beñə' chsa'acšene' leczə bda'aque' na' beyone' lega'aque'. ¹⁰ Na' beñə' ca' de'e zan de'e gwso'one' cheto'. Na' catə' bžin ža beza'ato', bosyo'ože'e lo'o barcon' yogua' de'e ca' chyažjeto'.

Pabən' bžine' Roman'

¹¹ Bega'anto' Maltan' šon bio' nach gwza'ato' zjəzdato' lao nisan' yo'oto' to lo'o barcw de'en za' Alejandria de'e gwlezə latjən' mientr gwde de'e zagan'. Na' mben le'e barcon' lgua' la aquə' ca' zjənzi' Castor na' Polocs. ¹² Na' bžinto' gan' ne' Siracosa na' gwzoto' šonə ža. ¹³ Na' gozsa'ato' par bžinto' gan' ne' Regio. Na' na' bega'anto' tza. Na' gwzolao cheçj be' de'en za' che'elə, na' beteyo bežžinto' gana' nzi' Poteoli na' na' bechojto' lo'o barcon'. ¹⁴ Na' bežagto' beñə' ljuəzjto' ca' chso'onlilažə' Jesocristən' Poteoli na' gosə'ənabe' gwzoto' len lega'aque' to xman. Na' gwdenə' gwza' ni'ato' par zdato' Roman'. ¹⁵ Pero na' antslə ze'e žinto' Roman' gosə'əneze beñə' ljuəzjto' ca' ža'ana' de que əžinto' na' bedəsə'əleze' neto' latjə gan' nzi' lao ya'a che Apio, na' gan' ne' Šonə Ranš. Na' catə' ble'i Pabən' lega'aque', be'e yelə' choxcwlen che Diozən' na' bebeine' lo'o yičhla'azda'ogüe'ena'. ¹⁶ Na' ca' bžinto' Roman' capitannə' bene' pres ca' yelə' lao na' beñə' gwnabia' che soldad ca', pero na' Pabən' gotə' lsens soe' ca'azə na' gwzo to soldad gwɔapə le'.

Pabən' be'e xtižə' Jesocristən' Roman'

¹⁷ Na' goquən' beyon ža Pabən' goxe' beñə' blao che beñə' Izrael ca' ža' Roman' na' catə' beyož besə'ədobe'ena' gože' lega'aque': —Beñə' bišə', bito nācho bi bena' contr beñə' gwlaž checho ca' o contr costumbr che de'e xaxta'ocho ca'. Pero na' Jerosalen na'ate gwso'one' nada' pres lao na' beñə' Roma ca'. ¹⁸ Na' beñə' ca' beyož gosə'ənabyože' gwsa'acłaze'e yoso'osane' nada' chedə' cui bi bi xtołə'a de par ənācho gata'. ¹⁹ Pero na' beñə' gwlaž ca' ža' Jerosalennə' boso'ožoncze' par yoso'osan beñə' ca' nada'. De'e na'anə' benən byen gwñaba' tia' lao Sesarən', pero bito nācho gua'a part beñə' gwlaž chia' ca'. ²⁰ Na' de'e nin' chac baç goxa' le'e par le'ida' le'e na' par güe'elena' le'e dižə'. Na' chnia' le'e por ni che de'en zocho lez yesyə'əban beñə' guat ca', balə beñə' gwlaž checho ca' gosə'əzene' nada' na' bosyo'ocheje' nada' gden ni.

²¹ Nach beñə' ca' gwse'ene': —Bito bi bi cart ne'e la' laoto' nga de'e za' Jodean' de'e güe' dižə' šə bin' chac len le', na' notono no beñə' gwlaž ne'e la'ac yesə'əne' mal chio' o əsa'ogüe' xya contr le'. ²² Pero na' chaqueto'

güenczən' yeneto' go'o dižə' ca naquən' chono' xbabən', la' neto' nezeto' dox-enlə chəsə'əne' contr le'e chejle'ele che Jesocrisən'.

²³ Na' boso'ožie' bia' to ža par žjəsə'əye' le' na' beṇə' zan zjənaque' ja'aque' gan' zo'enə'. Nach Pabən' be'e dižə' len lega'aque' can' chon Diozən' chnabi'e notə'atezə beṇə' chso'e latjə. Na' bzejni'ine' lega'aque' can' na lei de'en bzoj de'e Moisezən' na' can' na de'en boso'ozoj de'e profet ca' beṇə' ca' gwso'e xtižə' Diozən' cana' par ničh se'ejle'e che Jeso'osən'. Bedo ža be'e dižə'ən len lega'aque'. ²⁴ Na' bałə beṇə' ca' gwse'ejle'e ca naquə dižə' de'en be'enə' na' yebale' cabi gwse'ejle'e. ²⁵ Na' ca' chac gwsa'aque' čhoplə, na' bazon yesa'aque' catə' gož Pabən' lega'aque': —De'e li can' gož Spirit che Diozən' de'e profet Isaiazən' ben' be' xtižə' Diozən' cana' gožən le' gwzoje'en par de'e xaxta'ocho ca', nan:

²⁶ Gwyej gož beṇə' gwlaž čhio' ca' de que Diozən' ne':

De'e li yenele pero cabi šejni'ile bin',
na' de'e li gwle'ile pero cabi gacbe'ile bi zejen.

²⁷ Cuiczə bi rson chazle.

Bačh nažjoczə yičhjlə'ažda'olen' na' bito chzenagle dižə' lin',
bito chonle cas čhei, na' nic chejni'ilen, na' ni que chedinjele xtolə'əle ca'.
Na' de'e na'anə' bito yebeja' le'e xni'a de'e malən'.

²⁸ Na' le'e cheyalə' ənezele de que nā'a par delant Diozən' chsele'e beṇə' chəsə'əyixjui'e xtiže'enə' len beṇə' ca' cui zjənaquə beṇə' Izrael par ničh yoso'ozenague' čhe' na' yebeje' lega'aque' xni'a de'e malən'.

²⁹ Beyož gwna Pabən' ca' besyə'əžaš beṇə' Izrael ca' chsa'acyože' xte juisy.

³⁰ Pero na' Pabən' gwzoe' nya' čhop iz to yo'o ga chyixjue' na' gwzocze' gwleze' yoguə'əloł beṇə' jəsə'əlanə' le'. ³¹ Na' sin cui chaž cui chžebe' na' sin cui no no əbseyjw əbžon gwduxjue'ine' lega'aque' ca naquən' chnabia' Diozən' notə'atezə beṇə' chso'e latjə, na' clar bsed blo'ine' lega'aque' xtižə' Xancho Jesocrisən'.

Cart De'en Bzoj San Pabən' Par Beṇə' Roma Ca'

Pabən' chguape' diox beṇə' ca' chso'elao' Cristən' Roman'

¹ Nada' Pab naca' beṇə' güen žin che Jesocristan'. Diozən' gwleje' nada' par naca' apostol na' bsele'e nada' par ničh əchyiɣjui'a de'e güen de'e cobə che'enə'.

² Ca ni'ite ben Diozən' mendad boso'ozoj profet ca' Xtiz'e'enə' ca' naquə lyebe de'en bene' de que əgwsele'e dižə' güen dižə' cobə che'enə'. ³ De'e güen de'e cobən' cho'en dižə' che Xi'in Diozən', Xancho Jesocristan'. Jesocristan' golje' yežlyo nga lao dia che de'e Rei Dabin'. ⁴ Na' nezecho de que Jesocristan' leczə naque' doalje Xi'in Diozən' chedə' bebane' ladjo beṇə' guat ca'. Na' de'en bebane'enə' nezecho de que nape' yelə' guac che Spirit che Diozən'. ⁵ Chonlilažə'a Jesocristan' na' de'e na'anə' Diozən' banoe' chia' nłana' žin che apostol. Gwleje' nada' par chona' ca' ša' beṇə' so'onlilažə' le' yoguə' nasyon na' so'one' can' ne'enə' par ničh si'e yelə' bala'aŋ. ⁶ Na' lenczə le'e gwlej Jesocristan' par ničh nacle xi'ine', len beṇə' ca' yelə' beṇə' leczə chso'onlilažə' le' na' chso'one' can' ne'enə'.

⁷ Nada' Pab chzoja' cart nga par yoguə' le'e nitə'əle Roman' ca le'e chaque Diozən' chele. Diozən' gwleje' le'e par ničh nacle lažə' ne'enə'. Chona' orasyon par ničh Xacho Diozən' na' Xancho Jesocristan' əsa'aclene' le'e na' so'one' ca so cuezle binlo len xbab de'en yo'o lo'o yičhja' ažda' olen'.

Pabən' gone'ene' žjəlane'e beṇə' Roma ca'

⁸ Chona' orasyon cho'a yelə' choɣcwlen che Diozən' por le'e, na' Jesocristan' chaclene' nada' par chona' orasyonnə'. Cho'a yelə' choɣcwlen che' ca' naquə doxenlə yežlyonə' chsoe' beṇə' dižə' de que yoguə' le'e chonlilažə'əle Jesocristan'. ⁹ Diozən' nezene' yoguə' las catə' chona' orasyonnə' chnaba' gaquəlene' le'e. Le'enə' cho'elaogua'a do yičh do lažə'a ca de'en chyiɣjui'a de'e güen de'e cobə de'en chzejni'in che Xi'ine'enə'. ¹⁰ Na' chnaba' lao Diozən' güe'e latjə par delana'a le'e na'a. ¹¹ La' zelažə'əchgua' delana'a le'e par dezejni'ida' le'e de'en babsed bablo'ine' nada' par ničh sole gonlilažə'əchlene'. ¹² Che'enda' delana'a le'e par güe' lježjcho balor nga ngalə, chedə' la' le'e na' nada' chonlilažə'əcho Jesocristan'.

¹³ Beṇə' bišə', che'enda' ənezele de que zan las bago'onda' yida' delana'a le'e pero xte na'a bitonə' gac. Che'enda' yedəyena' par ničh gonchle can' chazlažə' Diozən' can' bajena' entr yeziquə'əchlə beṇə' cui zjənaquə beṇə' Izrael. ¹⁴ Nezdə' cheyalə' gua'a dižə' güen dižə' cobə che Jesocristan' len beṇə' ca' ža' syoda, na' len beṇə' yiɣə' na' leczə ca' len beṇə' chsa'ac letr na' beṇə' cui chsa'ac letr. ¹⁵ De'e na'anə' che'enchgüeida' gona' ga zelao saquə'əda' chixjue'ida' le'e de'e güen de'e cobə che Jesocristan', le'e ža'əle Roman'.

Dižə' güen dižə' cobən' nsa'an yelə' guac che Diozən' par beṇə' chse'ejle'e chei

¹⁶ Diozən' nape' yelə' guac xen. Na' dižə' güen dižə' cobə che'enə' nsa'an yelə' guac che'enə', par ničh ca' beṇə' chse'ejle' chei, le' yebeje' lega'aque' xni'a de'e malən'. Diozən' che'enchgüeine' yebeje' chio'o beṇə' Izrael xni'a de'e malən' na' leczə chene'ene' yebeje' chio'o cui naccho cobə' Izrael xni'a de'e malən'. De'e na'anə' bito cheto'ida' che dižə' güen dižə' cobə che Jesocristan'. ¹⁷ Dižə' güen dižə' cobə che Jesocristan' chzejni'in chio'o de que Diozən' ne' naccho beṇə' güen laogüe'enə' chedə' chonlilažə'əcho Jesocristan' na' can' choncze' len

notá'atezə beṇə' chso'onlilažə' le'. Can' nyoj Xtiže'ena', nan: "Šə chonlilažə'əcho Diozən', le'ena' ne' de que naccho beṇə' güen laogüe'ena', na' de'e na'anə' guatə'aczə yelə' mban checho zejlicane šə chonlilažə'əchone'."

De xtola' benachən'

¹⁸ Na' Diozən' chlo'ine' chio'o beṇəch, zoze' yoba na'ate, can' əgwnežjue' castigw zejlicane che yoguə' beṇə' ca' cabi chso'elao' le' na' nic chso'one' can' cheyalə' so'one'. Na' yelə' güen de'e mal chega'aque'ena' bito cho'en latjə yesə'əneze beṇə' yoblə de'en naquə de'e li. ¹⁹ Bazjəneze' de'en de de'e guaqua nezecho che Diozən' chedə' Diozən' bablo'ine'en yoguə'əcho. ²⁰ Na' bito bi bi de de'e yoso'ode'i beṇə' cui chso'elao' Diozən' yesə'one' cui zjəneze' šə zoe'ena'. La' gwzolaozən dezd catə'an əbxi'e yežlyonə' xte ža neža chgüiacho beṇə' ca' na' bia ca' na' de'e ca' bene'ena'. De'e na'anə' caguə' naquən zdebə gombi'acho de'e ca' cui zjənla' che Diozən', ca yelə' gwnabia' che'ena' de'en de zejlicane na' de'en cheyalə' güe'ela'ochone'. ²¹ Na' ca' naquə beṇə' ca' cui chso'elao' Diozən', zjəneze' de que zo Diozən' pero bito chso'elaogüe'ene', nic chso'e yelə' choxcwlen' che'. Ca' naquə xbab chega'aque'ena' bito bi zaquə'an na' bazjənchol' yichjla'ažda'oga'aque'ena'. ²² Chəsə'əne' zjənaque' beṇə' sin' pero chso'one' xbab de'e cui bi zaquə'. ²³ Choso'ozoe' Diozən' ca'alə, bito chso'elaogüe'ene', len Dioz nan' naque' le'ezelaogüe beṇə' zaque'e na' zoe' zejlicane. Bito chso'elaogüe'ene', chso'onchso'one' de'e yoblə, chso'ela'ozeche' no lgu'a' laquə' beṇəch beṇə' te chei, na' leczə chso'elaogüe'e lgu'a' laquə' bia zo xile'e, bia yixə' bia žia tap ni'a ne'i na' bia zjənxobə le'i.

²⁴ Ca' naquə beṇə' ca' chso'on de'e ca' zjənac ca', Diozən' bagwlejiychje' lega'aque' par chso'one' de'e mal can' nan lo'o yichjla'ažda'oga'aque'ena' na' de'e na'anə' chso'onchgüe' yelə' zto' che cuerp chega'aque'ena'. ²⁵ Bagwlejiychje' lega'aque' par chso'one' de'e ca' chedə' lega'aque' bagosə'əbejiychje' dižə' li che'ena' par chse'ejle'e de'e güenlažə'. Chse'ejni'alažə'əzeche' na' chso'ela'ozeche' de'e ca' ben Diozən' na' bito chso'one' cas che Diozən' ben' ben yoguə'əlol beṇəch na' yoguə' bia chaš na' yeziqua'əchlə de'e ca' yelə'. Bito chso'one' cas che' la'anə'aczə naque' ben' cheyalə' güe'ela'ochə zejlicane. La' can' naquən.

²⁶ De'e na'anə' Diozən' bagwlejiychje' lega'aque' par chso'one' yelə' zto' can' nan lo'o yichjla'ažda'oga'aque'ena'. Ca' naquə no'ol ca' bito chəsə'əque'e beṇə' byo, lete chəsə'əzolentezə le'e ljuežj no'olzəga'aque' par nich chso'one' de'e cui cheyalə' so'one'. ²⁷ Na' le'egatezəczə ca' chso'on beṇə' byo ca' chəsə'əzolen ljuežj beṇə' byoga'aque' lgu'a' de'e yesə'əca'a no'ol chega'aque'. Na' naquən to yelə' zto' de'en chso'on beṇə' byo con beṇə' byoga'ac, tant chəsə'əzelažə' ljuežjga'aque'. Na' de'en chac che cuerp chega'aque'ena' naquən to castigw de'en cheyalə' yesə'əzi'e lao yelə' güen de'e mal chega'aque'ena'.

²⁸ Na' laogüe de'e cui chse'ene' so'one' cas che Diozən', Diozən' bagwlejiychje' lega'aque' len xbab mal chega'aque'ena', na' chso'one' de'e cui cheyalə' so'one'. ²⁹ Por de'e cui cheyalə' so'one'en chso'one'. Zjənaljene'. Chəsə'əbeine' chso'one' contr beṇə'. Chəsə'əzelažə'e bi de che beṇə' yoblə, na' no bia yixə' chega'aque' na' no beṇə' nitə' ližga'aque'. Zjənaque' beṇə' xi'a juisy na' leczə chsa'acxi'i ljuežje'. Syempr chso'ot ljuežje', chəsə'ədile', choso'oxoayague', na' chəsə'əyone' cleləžə dižə' de'e chse'ene'ena'. Na' zjənaque' beṇə' gochitj dižə'. ³⁰ Chəsə'əne' mal che beṇə' yoblə. Chəsə'əgue'ine' Diozən'. Bitobi respet zjənombi'e par beṇə' yoblə. Chsa'alažə'e. Zjənaque' beṇə' güe'elao' cuine. Chəsə'əyiljažə'e na' chəsə'əželene' can' chso'one' de'e mal. Bito choso'ozenague' che xaxna'aga'aque'. ³¹ Bito chse'ejni'ine'. Bito

chso'one' complir bi lyebe de'e chso'one'. Bito chsa'aque' che beṇə' yoblə. Zjənaque' beṇə' ggo'olaže'e. Bito zjənombi'e yelə' cheyaše'e ljuēzje. ³² Zjənezcene' binlo de que Dioz nan' nchoglaogüe'en cheyalə' yeyejcho lao yi' gabılən' šə goncho can' chso'one'enə'. Pero lega'aque' ne'e zja'accze' chso'one' ca' na' chesyə'əbeine' chso'on beṇə' yoblə can' chso'one'enə'. *Pab*

2

Diozən' zdacze' licha ca de'en chone' beṇəchən' castigw che xtolə'əga'aque'enə'

¹ De'e nan' notə'ətezə naccho bito gaquə əṇacho bito bi xtolə'əcho de catə' choncho xbab che beṇə' yoblə de que naque' beṇə' mal, chedə' catə'ən choncho xbab che beṇə' yoblə de que naque' beṇə' mal, chio'otezən' chchixə cuincho. Chacbe'icho de que beṇə' yoblə chone' de'e mal len leczə can' chon chio'o. ² Nezecho šə choncho de'e ca' zjənac ca' Diozən' ne' checho de xtolə'əcho, na' zdacze' licha de'en ne' ca'. ³ De repent chaquecho de que Diozən' bito gone' castigw checho ca de'en choncho xbab che beṇə' yoblə de que chso'one' de'e mal len leczə can' choncho. Bito cheyalə' gaquecho de que cui gone' castigw checho, la' goncze'en. ⁴ De repent bito choncho cas ca naquə de'e güenchgua de'en chon Diozən' len chio'o lao yelə' beṇə' güen che'enə' na' yelə' xenlažə' che'enə'. Na' de repent bito choncho cas che' laogüe de'en cui le'e chontie' chio'o castigw. Diozən' chone' güen len chio'o par nič gaquəchgüeicho lo'o yichjla'ažda'ochonə' che de'e mal de'en choncho par nič ca' yedinjehon. ⁵ Pero nacteccho beṇə' žod šə bito chedinjehon do yichj do lažə'əcho ca naquə xtolə'əchon'. Na' šə bito chedinjehon choncho ca gonch Diozən' chio'o castigw catə' əžin ža Diozən' əgwlo'e de que le' zdacze' licha ca de'en gone' castigw zejlicane che xtolə'əchon'. ⁶ Gone' chio'o castigw o gone' par nič gaquə de'e güen che chio'o beṇəch segon nac babencho. ⁷ Diozən' gone' chio'o yelə' mban zejlicane šə zotezə zocho choncho de'e güen, chedə' šə choncho ca' chlo'echo de que cheyiljažə'əcho naclə gaquə par nič yežincho gan' zo'enə', na' par nič gone' chio'o yelə' bala'an, na' par nič socho zejlicane. ⁸ Na' šə chnecho contr Diozən' na' cabi chzenagcho che dižə' li che'enə', chzenagzechcho che de'e malən', lechgualə əžə'alažə' Diozən' chio'o na' gone' chio'o castigw zejlicane. ⁹ Zgua'atec chio'o beṇə' Izrael benecho xtižə' Diozən', na' šə choncho de'e mal či' saquə'əcho na' əžaglaoch. Na' chio'o cui naccho beṇə' Izrael gwdechlä benecho xtižə'enə', pero leczə či' saquə'əcho na' əžaglaoch šə choncho de'e malən'. ¹⁰ Na' šə choncho de'e güenə' gwžin ža catə' Diozən' gone' par nič gaccho beṇə' blao, na' gone' chio'o yelə' bala'an, na' gone' par nič socho binlo len yichjla'ažda'ochon'. Gone' güen len chio'o beṇə' Izrael, pero na' leczə gone' güen len chio'o la'anə'əczə cui naccho beṇə' Izrael.

¹¹ Toza can' chon Diozən' len yoguə' chio'o beṇəch. ¹² Yoguə' chio'o šə babencho de'e mal sin cuiə' gombi'əcho lei de'en bzoj de'e Moizezən', Diozən' əchoglaogüe'en checho cuiayi'icho por ni che de'en babencho de'e malən' la'anə'əczə šə cui nezecho can' na lein'. Na' yoguə' chio'o banombi'əcho lein', Diozən' əchoglaogüe'en checho cuiayi'icho por ni che de'en cui bencho can' nanə'. ¹³ Caguə con yenecho lei na'anə' na' əṇa Diozən' checho bitobi xtolə'əcho de. Pero šə choncho can' na lein', Diozən' əne' checho bitobi xtolə'əcho de. ¹⁴ Notə'ətezə beṇə' cui naquə beṇə' Izrael na' cui nombi'e lei de'en bzoj de'e Moizezən', zolə catə' chone' to čhopə can' na lein' con de'e chidzən lo'o yichjla'aždaogüe'e. La'anə'əczə cui nombi'e lein', de'en chon

yichjla'ažda'ogüen' mendad gone' naquæn ca to lei. ¹⁵ Ben' chon ca' ža chlo'e de que lo'o yichjla'aždaogüe'e na' yo'o de'en naquæ ca lein'. Na' catä' chone' de'en chone', lo'o yichjla'aždaogüe'e na' chone' xbab de que de'e malän' chone' o chone' xbab de que de'e güennä' chone'. ¹⁶ Gwžin ža catä' Diožän' gone' par nich Jesocrisän' ächoglaogüe'en che xbab che chio'o benäch de'en bencho bgašä'azä, šä bencho xbab güen o šä bencho xbab mai. Can' chnia' catä' ächyixjui'a dižä' güen dižä' cobä che Jesocrisän'.

Benä' Izrael ca' gwsa'aque' de que gwnite'e binlo len Diožän' čhedä' zjånombi'e lein'

¹⁷ Balë chonle xbab de que zole binlo len Diožän' čhedä' nacle benä' Izrael na' nsedle lei de'en bzoj de'e Moisezän'. Cha'alažä'äle de que cho'ela'ole Diožän'. ¹⁸ Nezele de'en cho'olažä' Diožän'. Nezele de'en naquæ de'e güen. Cho'ele dižä' čhei de que naquæn de'e güen, čhedä' la' lei na'anä' nsedle. ¹⁹ De'e tant chaquäle chejni'ile che Diožän' chonle xbab de que nezele par co'ole benä' nez na' par ägwzejni'ile benä' ca' zjånčhol yichjla'ažda'oga'aque'ena'. ²⁰ Na' chonle xbab de que nezele par ägwzejni'ile benä' cui chse'ejni'i na' par gacle maestr che bi'i xcuidä'. Laogüe de'en nsedle lei de'en bzoj de'e Moisezän' chaquäle chejni'ile na' chaquäle nezele de'en naquæ de'e li. ²¹ Le'e chsed chlo'ile benä' yoblä, žbixchen' cui cholo'i cuinle? Čhsed chlo'ile bito no cuan, len chbanle. ²² Čhsed chlo'ile de que bito no co' xtoi na' bito no cuejyichj be'en čhei o no'ol čhei par solene' benä' yoblä, len chonczle yoguä' de'en nale cui no gon. Na' chgue'ile lguä'a lsaquä' ca' de'en chse'ejni'alažä' benä', len bia'aczä chjelanle bitä'äteza de'en zjæde do lo'o yo'o gan' zjžä' lguä'a lsaquä' ca'. ²³ Cha'alažä'äle de'e nsedle lei de'en bzoj de'e Moisezän', pero laogüe de'e cui chonle can' na lein', chnitle yelä' bala'an che Diožän'. ²⁴ De'e li chonle can' nyoj Xtižä' Diožän' gan' nan: "De'en chonle de'e mal, zan benä' cui zjænaquæ benä' Izrael chäsä'äne' contr Diožän'."

²⁵ Čhio'o benä' Izrael nsa'acho to señy lao cuerp čhechon' de'en ne' sirconsision, na' zejen de que Diožän' gaquälene' čhio'o can' bene' lyebe. Na' señyän' zaquä'än par čhio'o šä choncho can' na lein'. Pero šä cui choncho can' na lein', bitobi zaquä' señy de'en zochonä'. ²⁶ Šä cui nsa'acho señy de'en ne' sirconsisionnä' pero choncho can' na lein', gaccho cuent ca benä' nsa'aczä señy de'en ne' sirconsisionnä' la'añä'äczä cui nsa'achon. ²⁷ Balë bito bi señy de'en ne' sirconsisionnä' nsa'ale, pero chonle complir can' na lein'. Na' laogüe de'en chonle complir can' na lein', chonle ca nacbia' de que deczä xtolä' benä' ca' zjänsa' señy de'en ne' sirconsisionnä', čhedä' nyoj lein' na' zjånombi'en, pero bito chso'one' can' nannä'. ²⁸ Zan benä' chsa'alje' lao dia che Izraelän' na' äzja'accze' chso'one' can' naquæ costumbr che benä' Izraelän', pero lao Diožän' bito zjænaquæ' benä' Izrael, na' nic zaquä' señy de'en choso'ozo cuerp čhega'aque'ena'. ²⁹ Pero čhio'o de'e li naccho benä' Izrael šä chonlilažä'ächo Diožän' can' cheyaäl' gonlilažä'ächone'. Na' de'en babocobä Diožän' yichjla'ažda'ochon' gwxaquä'äleben ca señy de'en ne' sirconsision, na' zejen de que bagwleje' čhio'o par naccho xi'ine'. Babše'e yichjla'ažda'ochon', caguæ con nsa'acho to señy lao cuerp čhechon'. Na' šä chonlilažä'ächone', Diožän' äne' de que choncho güen, la'añä'äczä šä notono no nochlä äña de que choncho güen.

3

¹ ¿Bi de'e güen zedegua'an che čhio'o benä' Izrael laogüe de'en naccho benä' Izrael? ¿Bi de'e güen de'e zedegua'an de'en zocho señy de'en ne'

sirconsionnə'? ² De'e xen de'e zedegua'an. Na' to de'en zedegua'an ca de'en əbnežw Diozən' xaxta'ocho ca' Xtiže'ena' de'en nyojən'. ³ Na' bale' cui gwse'ejle'e chei. Pero bito gwde Diozən' ca'azə cui gone' can' na Xtiže'ena' la'ana'əczə bale' cui gwse'ejle'e chei. ⁴ Goncze' can' ne'ena'. Yoguə' laste ənacze' de'e linə' la'ana'əczə sə yoguə'əlo' be'nə' yesə'əne' dižə' güenlažə'əna'. Chac canə' bzoj to profet gože' Diozən':

Le' əgwlo'ido' be'nə'əchən' de que cho'o dižə' li.

Na' ca naquə be'nə' ca' chso'on xbab de que bito chono' complir can' na'onə', əsa'acbe'ine' de que chonczo' can' na'onə'.

⁵ Quinga chəsə'əna balə be'nə' cui chse'ejni'i che Diozən'. Chəsə'əne' de que de'e mal de'en choncho chlo'in be'nə'əchən' de que Diozən' naque' be'nə' chon de'e güen. Na' chəsə'əne' de que Diozən' bito zde' licha de'en gone' castigw che de'e mal de'en chonchon'. ⁶ Lechguale clelən' chso'one' xbabən'. Žalə' de'e li can' chsa'aquene'ena' bitoczə gaquə gon Diozən' yelə' jostis che chio'o be'nə'əch can' cheyalə'əna'. Pero la' goncze'en.

⁷ Na' be'nə' ca' chso'on xbabən' ca' lecza chəsə'əne' de que catə' chso'onlaže'e chso'one' ca chesyə'əyache'i be'nə' de que Diozən' naque' be'nə' güen ca naquən' cho'e por dižə' li. De'e na'ana' chsa'aquene' de que bito cheyalə' choglaio Diozən' chega'aque' de que zjanape' dolə' ca de'en chso'onlaže'e.

⁸ Balə be'nə' chso'one' contr neto', na' chso'one' cho'ato'onə' chəsə'əne' de que nato' žbixchen' cui goncho de'e malən' par nič gaquə de'e güennə'? Ca cheyalə'əczən' əgwnežjo Diozən' castigw che non' na ca'.

Notono nla' no cui napə dolə'

⁹ žBixan' ža? žEناقəch chio'o be'nə' Izrael be'nə' güench cle ca chio'o cui naccho be'nə' Izrael? Bito. Can' bagwnia', tozəczə can' chac che chio'o be'nə' Izrael na' che chio'o cui naccho be'nə' Izrael, yoguə'əcho zocho xni'a de'e malən'. ¹⁰ Can' nyojczə Xtižə' Diozən' nan:

Notono zo be'nə' zda licha, ni tlišə'əze'.

¹¹ Notono nla' be'nə' chejni'i che Diozən',

na' notono nla' be'nə' cheyilje'ene'.

¹² Yoguə' be'nə'əchən' bagosə'əque'e nez mal.

Yogue'e bitobí zjəzaque'e.

Ni tlišə'əzə be'nə' chon de'e güen notono nla'.

¹³ Len xtižə'əga'aque'ena' chəsə'əxəoyaguene'en be'nə',

na' ca benen che bgüizə' gwxaquə'əlebe dižə' de'en chso'ena'.

Ca zbannə' chla' cuerp che bia guatən' catə'ən bachožə'ən, ca' zbannə' naquə xtižə'əga'aque'ena'.

¹⁴ Por dižə' mal dižə' əzban ža' cho'aga'aque'ena'.

¹⁵ Con bizə de'en choso'ode'ine' par chso'ote' be'nə'.

¹⁶ Gatə'atezə chja'aque' con la' ggo'o yelə' yašə' yelə' zin' chja'aque'.

¹⁷ Na' bito chesə'əzo chesə'əbeze' binlo len lježjga'aque'ena'.

¹⁸ Bito chsa'ape' Diozən' respet.

¹⁹ Na' nezecho ca naquə yoguə' de'en na lei che Diozən' goncho, nyojən par chio'o na' xaxta'ocho ca' be'nə' ca' bnežjue' lein'. Pero ca naquə cui choncho can' nannə', ni tozə chio'o bito gaquə ənacho de que naccho be'nə' güen. De'e na'ana' Diozən' əchoglaogüe'en checho de que si'icho castigw che xtolə'əchon' can' əchoglaogüe'en che yeziquə'əchlə be'nə'əchən'. ²⁰ Ni to chio'o be'nə'əch bito na Diozən' checho de que naccho be'nə' güen por ni che bi de'en choncho de'en na lein', chedə' la' ni tocho bito choncho cayanə'ən nannə'. Lei na'ana' chzejni'in chio'o de que choncho de'e malən'.

Cheyalə' gonlilažə'əcho Jesocristən' par niç gaccho beṇə' güen lao Diozən'

21-22 Diozən' bablo'e can' ne' che notə'ətezcho de que naccho beṇə' güen laogüe'enə' šə chonlilažə'əcho Jesocristən'. Lein' na' de'en boso'ozoj profet ca' beṇə' ca' gwso'e xtižə' Diozən' cana' leczə chso'en dižə' de que can' gone'. Chio'o chonlilažə'əcho Jesocristən' bito chon Diozən' cuent checho šə bi de'e choncho complir de'en na lei che'enə'. Na' notə'ətezcho tozəczə can' chon Diozən' len chio'o la'anə'əczə šə naccho beṇə' Izrael o šə cui naccho. 23 Yoguə'əlołcho babencho de'e mal na' de'e na'anə' ni tocho bito gaquə əṇacho de que naccho beṇə' güen ca beṇə' güennə' naquə Diozən'. 24 Nži'ilažə'e chio'o chonlilažə'əcho Cristo Jeso'osən'. Na' caguə bi chzi' Dioz na'anə' ne' checho de que naccho beṇə' güen laogüe'enə', cheda' la' bagwdixjw Cristo Jeso'osən' xtołə'əchon'. 25 Antslən' bagwdapə Diozən' yelə' chxenlažə'əna' bagwzoine' bguo'o bcheje' che de'e mal de'en bagwso'on beṇə'əchən' tš'i'i, na' bito blo'e can' chnežjue' castigw che notə'ətežə beṇə' chso'on de'e malən'. Pero na'a par blo'e de que le' chnežjwczə' castigw che beṇə' chso'on de'e malən', gwleje' Cristo Jeso'osən' par gwdixjue' xtołə' beṇə'əchən'. Na' Diozən' chñitlaogüe' xtołə' con beṇə' chso'onlilažə' Cristo Jeso'osən'. 26 Na' de'en əbsele'ene'enə' nezecho de que Diozən' zdacze' liča de'en ne' che yoguə' chio'o chonlilažə'əcho Jeso'osən' de que naccho beṇə' güen laogüe'enə'.

27 Bito cheyalə' güe'elao' cuincho əṇacho de que naccho beṇə' güen. Ni tocho cui naccho beṇə' güen por ni che bi de'e güen de'en choncho. Pero šə chonlilažə'əcho Jeso'osən' Diozən' ne' de que naccho beṇə' güen laogüe'enə'. 28 Can' chejni'ichon, šə chonlilažə'əcho Jeso'osən' Diozən' ne' de que naccho beṇə' güen laogüe'enə' sin cui chone' cuent checho šə bi de'e choncho complir de'en na lein'.

29 ¿Diozən' naque' Xan chio'o beṇə' Izrael na'azən'? ¿Ecaguə leczə naque' Xan chio'o cui naccho beṇə' Izrael? 30 Cle naque' Xan yoguə'əloł beṇə'. Na' ne' che yoguə'əcho šə bachonlilažə'əcho Jeso'osən' naccho beṇə' güen laogüe'enə'. Tozəczə can' chone' len chio'o nsa'əcho seŋy de'en ne' sirconsisionə' na' len chio'o cui nsa'əchon. 31 ¿Echoncho lei de'en bzoj de'e Moizezən' ca to de'e cui bi zaque'enə' laogüe chonlilažə'əcho Jeso'osən'? Bito chonchon ca to de'e cui bi zaque'e, sino cho'elechchon balorən'.

4*Abraannə' benlilažə'e Diozən' na' de'e nan' goque' beṇə' güen lao Diozən'*

1 De'e xaxta'əcho Abraam be'enə' naccho dia, žbixa əṇacho che'enə'? 2 Žalə' por ni che de'e güen de'en bene' na'anə' gwna Diozən' de que naque' beṇə' güen laogüe'enə', zaquə'əcze' par be'elao' cuine' žalə' ca'. Pero bito be'elao' cuine' lao Diozən'. 3 Le'e Xtižə' Diozən' de'en nyožen nan: "Abraannə' benlilažə'e Diozən' na' de'e nan' gwchoglaon che' de que naque' beṇə' güen lao Diozən'." 4 Catə' to beṇə' chone' žin chone' gan laxjue'enə' na' bito ṇacho de que xan žinnə' chone' to goclen catə'ən chnežjue'ene' laxjue'enə'. Na' ca'aczen' naquən len chio'o, žalə' babencho cayənə'an non Diozən' mendat goncho bito naquən to goclen de'en chon Diozən' len chio'o catə'ən ne' naccho beṇə' güen laogüe'enə' žalə' ca'. 5 Pero naquəczən to goclen. Diozən' ne' de que naccho beṇə' güen laogüe'enə' šə chonlilažə'əchone' sin cui choncho xbab de que de'e güen de'en choncho chaclenən par əne' de que naccho beṇə' güen laogüe'enə'. Na' Diozən' chone' par niç chio'o cui be'ela'əchone' antslə chachcho beṇə' güen laogüe'enə' catə' chonlilažə'əchone'. 6 Leczə de'e Dabin' be'e dižə' che goclenə' de'en chon Diozən' len chio'o chonlilažə'əchone' ca de'en ne' naccho

benə' güen laogüe'enə' sin cui chone' cuent šə bichlə de'e güen de'en choncho.
7 De'e Dabin' gwne':

Mba zocho šə babezi'ixen Diozən' checho che de'e malən' bencho.

Mba zocho šə babñitlaogüe' xtolə'əchon'.

8 Mba zocho šə chçhoglao Diozən' checho de que caguə bi xtolə'əcho denə'.

9 Chio'o nsa'acho señyən' de'en ne' sirconsisionnə' bito cheyalə' goncho xbab de que chio'ozən' gaquə socho mba can' gwne'enə'. Lenczə benə' ca' cui zjənsa' señyən' gwaquə nite'e mba can' gwne'enə'. Nezecho de'en benlilažə' de'e Abraannə' Diozən' de'e na'anə' gwne' che' de que naque' benə' güen laogüe'enə'. 10 Na' gwne' che de'e Abraannə' de que naque' benə' güen laogüe'enə' antsłə ze'e soe' señy de'en ne' sirconsisionnə', caguə beyožlan'.

11 Na' gwdechłə gwzoe' señyən' par gwnezene' de que Diozən' bagwne' ca' che'. De'e Abraannə' gwzolaogüe' chonlilaže'e Diozən' cata'ən ze'e sole' señyən' na' cana' gwna Diozən' naque' benə' güen laogüe'enə'. De'e na'anə' nezecho de que Diozən' ne' ca' che notə'ətezə benə' cui zjəzo señy de'en ne' sirconsisionnə' con šə chso'onlilaže'ene'. Na' lao Diozən' de'e Abraannə' naque' xaxtao' yoguə' chio'o chonlilažə'əcho Diozən'. 12 Na' leczə nezecho de que Diozən' ne' che chio'o nsa'acho señyən' de que naccho benə' güen laogüe'enə' šə chonlilažə'əchone'. Na' ne' ca' caguə por ni che de'en zocho señyən' sino por ni che de'en chonlilažə'əchone' can' benlilažə' de'e Abraannə' le'.

Abraannə' benlilaže'e Diozən' na' de'e na'anə' Diozən' bene' lyebe de'e bene' len le'

13 De'e Abraannə' benlilaže'e Diozən', na' de'e na'anə' Diozən' bene' lyebe gone' par niçh Abraannə' len xi'in dia che' ca' yesə'anabi'e doxenlə yežlyon'. Bito ben Diozən' cuent che Abraannə' šə bene' complir can' na lei che'enə' sino de'en benlilaže'e Dioz na'anə' gwne' de que naque' benə' güen laogüe'enə' na' leczə de'e na'anə' bene' lyebe yesə'anabi'e yežlyon'. 14 Nitə' benə' chsa'aque'ne' por ni che de'en zjənaoga'aque' lein' yesə'anabi'e yežlyon'. Žalə' na'acłə lega'aque' le' yesə'anabi'e yežlyonə', bito bi zaquə' de'en chso'onlilažə' benə' Diozən', na' leczə ca' bito gon Diozən' complir can' bene' lyebe len xi'in dia che de'e Abraannə' žalə' chac ca'. 15 De'en gwduxjw Diozən' lei che'enə' na' benəçhən' cui choso'ozenague' çhei, Diozən' gwnežjue' lega'aque' castigw zejlicane che xtolə'əga'aque'enə'. Žalə' cui zjənezene' bi de'e ca' cheyalə' so'one', bitobi xtolə'əga'aque' de, pero zjənezcene'en.

16 Ca' chaquən', chio'o chonlilažə'əcho Diozən' nabi'acho yežlyon'. Tant nži'ilažə' Diozən' chio'o chone' ca nabi'achon par niçh gaquə can' bene' lyebe len yoguə' chio'o chone' cuent ca xi'in dia che de'e Abraannə'. Caguə gaquə ca' len benə' ca' zjəšə'ənao lei na'azən' sino leczə len notə'ətezə benə' chso'onlilažə' Diozən' can' benlilažə' de'e Abraannə' le', la' lao Diozən' de'e Abraannə' naque' xaxtao' yoguə' chio'o chonlilažə'əcho Diozən'. 17 Can' nyojczə de'en gwna Diozən': "Banzo' le' gaco' xaxtao' benə' ša' nasyon zan." Na' Diozən' nape' yelə' guac par yobane' benə' guat ca' na' Diozən' chone' par niçh chac bitə'ətezən' ne'enə'. De'e na'anə' cho'e dižə' che benə' ze'e za'ac ca chio'o benəçh cho'echo dižə' che benə' banitə'.

18 Bito gwneze Abraannə' nacxa gaquən' gaquə can' gwna Diozən'. Pero gwyejle'e che Diozən' na' gwzoe' lez de que Diozən' goncze' le' xaxtao' benə' ša' nasyon zan. Con gwyejle'e de que gaquə can' gož Diozən' le': "Benə' zan əsa'ac xi'in dia chio'." 19 Con gwzocze' benlilaže'e Diozən' la'ana'əczə gocbe'ine' banaque' benə' golə par so xi'ine'. Bazoe' casi to gueyoa iz, na' no'ol che'

Saran' bitoch zoe' xlaogüe'e sane'. ²⁰ Gwzoteze' benlilaže'e Diozən' na' bito goquə šejlaže'e che lyebe de'en ben Diozən' len le', sino que gwzoe' cheh benlilaže'ene' na' be'elaogüe'ene'. ²¹ Abraanə' gwnezene' de que Diozən' guac gone' ca de'en bene' lyeben'. ²² Na' laogüe de'en benlilaže'e Diozən' de'e nan' gwchoglaon che' de que naque' beṇə' güen lao Diozən'.

²³ Na' nyojən de que de'en benlilaže'ene' na'anə' gwchoglaon che' de que naque' beṇə' güen lao Diozən'. Pero caguə nyojən par de'e Abraam na'azənə'. ²⁴⁻²⁵ Leczə nyojən par chio'o, la' leczə de'en chonlilažə'əcho Diozən' nchoglaon checho de que naccho beṇə' güen laogüe'enə'. Diozən' bsele'e Xancho Jeso'osən' par gwso'ot beṇə' le' na' bolis bosbane'ene' ladjo beṇə' guat ca'. Goc ca' len Jeso'osən' par niç gwduxjue' xtolə'əchon' na' par niç Diozən' ne' che chio'o chonlilažə'əchone' de que naccho beṇə' güen laogüe'enə'.

5

Zoch binlo len Diozən' šə chonlilažə'əcho Jesocristən'

¹ Diozən' ne' de que naccho beṇə' güen laogüe'enə' chedə' chonlilažə'əcho Jesocristən', na' Xancho Jesocrist na'anə' babene' par niç zoch binlo len Diozən'. ² De'en chonlilažə'əcho Jesocristən' nži'ilažə' Diozən' chio'o na' gwzocze' əži'ilaže'e chio'o. Chebeicho nezecho goṇ Diozən' chio'o yelə' bala'əṇ xen ca de'en de che'. ³ Na' leczə chebeicho cata' chzaquə'əzi'icho, la' nezecho šə chgo'o chchejlažə'əcho cata'ən chzaquə'əzi'icho nachən' gwchejczecho cata'ən de bichlə de'en saquə'əzi'icho. ⁴ Šə chgo'o chchejlažə'əcho cata'ən chzaquə'əzi'ichon', Diozən' chebeine' can' choncho. Na' catə' chebeine' can' choncho, nezecho de que gaquəlenche' chio'o. ⁵ Na' catə'ən nezecho de que gaquəlench Diozən' chio'o, bito chža'a yichjcho chedə' nezecho babsele'e Spirit che'enə' par zon len chio'o, chṇen lo'o la'ažda'ochon' nan de que Diozən' chacchgüeine' checho.

⁶ Lao ne'e zoch xni'a de'e malən', Cristən' bnežjw cuine' gwso'ot beṇə' le'. Ben Cristən' ca' par gwduxjue' xtolə' chio'o cui be'ela'ocho Diozən'. Na' gwso'ote'ene' catə' bžin orən' banžia' Diozən' bia'. ⁷ Ca naquə chio'o beṇəch, zdebə chonən par əchebcho gwnežjo cuincho so'ot beṇə' chio'o lgu'a'a to beṇə' yoblə la'əṇə'əczə šə lgu'a'a to beṇə' zda licha. Pero gwchojlja to beṇə' yeyaxjene' gwnežjo cuine' so'ote'ene' lgu'a'a to beṇə' naquə beṇə' ži'ilažə'. ⁸ Pero catə'ən chio'o nenaccho beṇə' güen de'e mal, Diozən' bsele'e Cristən' bnežjw cuine' por ni checho gwso'ot beṇə' le'. De'e na'anə' nezecho lechguale chaque Diozən' checho. ⁹ Diozən' ne' de que naccho beṇə' güen laogüe'enə' chedə' Cristən' blaj xchene'enə' par gwduxjue' xtolə'əchon'. Na' leczə ca' nezecho de que Cristən' bagoclene' chio'o chonlilažə'əchone' par niç ca' Diozən' bito gone' castigw checho zejlicane. ¹⁰ Beṇə' contr che Diod nan' goccho. Pero na' Xi'ine' Cristən' bnežjw cuine' por ni checho gwso'ot beṇə' le'. Ben Cristən' ca' par bozoe' chio'o binlo len Diozən'. Na' nezecho leczə zo Cristən' chone' par niç gaquə yichjla'ažda'ochon' güen can' naquə yichjla'ažda'ogüe'enə' chedə' ngoda'əcho txen len le'. ¹¹ Na' leczə dech de'en chebeicho. Leczə chebeicho de'en nombi'əcho Diozən', chedə' la' Jesocrist na'anə' bač bozoe' chio'o binlo len Diozən'.

De'e Adanə' bxi'e de'e malən' yežlyo nga, na' Jesocristən' bedəyene' par niç chac de'e güen

¹² Yelə' godenag che beṇə' nechən' ben' gwle Adanə', gwzolao de'e malən' yežlyo nga, na' de'e mal nan' nsa' yelə' gotən'. Na' de'e nan' den de que yoguə'

benachan' chsa'ate' na' yogue'e chso'one' de'e mal. ¹³ Gwso'onczə benachan' de'en malən' dezd tyemp che Adanna' antslə cuina' chixjw Diozan' lei che'enə'. Na' catə' cuina' chixjue' lei che'enə' n'za'alə can' gwchoglaogü'e'en che benachan' catə'an gwso'one' de'e malən'. ¹⁴ Pero na' gwzolaozən dezd tyemp che de'e Adanna' b'zinte tyemp che de'e Moizezan' benən byen yoguə' benə' gwsa'ate' can' chsa'ate' na'a, chedə' yogue'e gwso'one' de'e malən', la'ana'əczə de'e mal de'en gwso'one' bito naquən ca de'e mal de'en ben de'e Adanna'. De'e Adan na'ana' bedayene' par nich gwxe yelə' gotən' yežlyo nga, pero na' Jesocristan' ben' banaquəczən yidə dezd cana'ateczə, le'enə' bedəyene' par nich de yelə' mban zejlicane che notə'atezcho chonlilažə'əchone'.

¹⁵ De'e xen n'za' yelə' goclen de'en ben Diozan' len chio'o catə'an bsele'e Jesocristan' na' ca de'e malən' de'en ben de'e Adanna'. Por ni che de'e malən' de'en ben de'e Adanna' benə' zan gwsa'at. Pero na' Diozan' bene' to de'e zaque'e, bene' to yelə' ži'ilažə' xen na' to yelə' goclen xen par benə' zan. Diozan' chaclene' chio'o ca de'en bsele'e Jesocristan' par cheyašə' cheži'ilažə'e yoguə' chio'o benach. ¹⁶ N'za' de'e malən' de'en ben de'e Adanna' ca goclen de'en ben Diozan' len benachan'. Por ni che de'e malən' de'en ben de'e Adanna', de'e na'ana' Diozan' gwchoglaogü'e'en che chio'o benach de que si'icho castigw zejlicane. Pero na' dadzən' goclen Diozan' chio'o ca de'en bsele'e Xi'ine' Jesocristan', na' chio'o chonlilažə'əchone' ne' de que naccho benə' güen laogü'e'enə' la'ana'əczə babencho de'e zan de'e mal. ¹⁷ Por ni che tozə be'enə' ben de'e malən' de yelə' got che chio'o benach. Pero na' Diozan' lechguale n'zi'ilažə'e chio'o, na' dadzə ne' che chio'o chonlilažə'əchone' de que naccho benə' güen laogü'e'enə'. De'e na'ana' de yelə' mban checho zejlicane na' nabi'acho txen len Jesocristan'.

¹⁸ Can' naquan, por ni che de'e mal de'en ben de'e Adanna', Diozan' gwchoglaogü'e'en de que to to chio'o benach si'icho castigw che xtolə'əchon'. Na' por ni che de'en naquə Jesocristan' benə' güen lao Diozan', Dioz na'ana' ne' che yoguə' chio'o chonlilažə'əcho Jesocristan' de que naccho benə' güen laogü'e'enə' na' chone' chio'o yelə' mban zejlicane. ¹⁹ Na' de'en cui əbenzag de'e Adanna' che Diozan', de'e na'ana' yoguə' chio'o benach naccho benə' güen de'e mal. Pero na' de'en əbenzag Jesocristan' che Diozan', yoguə' chio'o chonlilažə'əcho Jesocristan' naccho benə' güen lao Diozan'.

²⁰ Diozan' gwdixjue' lei che'enə' na' de'e na'ana' gwcha'o gwxench de'e malən' chedə' benachan' bito bosozenague' chei. Pero catə' gwcha'o gwxench de'e malən', de'e xen gwcha'o gwxench yelə' ži'ilažə' che Diozan' par nich bezi'ixene' che chio'o chonlilažə'əchone'. ²¹ Gwcha'o gwxench yelə' ži'ilažə' che'enə' par nich gwaquə əne' che yoguə' chio'o benach de que naccho benə' güen laogü'e'enə' šə gonlilažə'əcho Xancho Jesocristan'. Na' can' de yelə' got che yoguə' chio'o benach de'en naccho benə' güen de'e malən' leczə n'zi'ilažə' Diozan' yoguə' chio'o benach na' chone' chio'o yelə' mban zejlicane šə chonlilažə'əchone'.

6

Diozan' bene' par nich cuich šo'o chazcho de'e malən'

¹ ¿Naxcan' cheyalə' goncho na'a baņezecho de que n'zi'ilažə' Diozan' chio'o? ¿Econ šejczcho goncho de'e malən' par nich yezi'ixentezə yezi'ixen Diozan' chechon'? ² Caguə can' cheyalə' goncho. Diozan' babene' par nich cuich šo'o chazcho de'e malən' šə gwzenagcho che'. De'e nan' bito cheyalə' sochcho əgwzenagcho che la'azda'omalchon'. ³ Bagwchoacho nisən' par nich ca' nacia' de que ngodə'əcho txen len Jesocristan'. Na' ca de'en gwchoacho

nisən' zejen ca gotcho len Crist na'anə'. ⁴ Na' de'en zejen ca gotcho len Cristən', leczə zejen ca bgašə'əcho len le'. Goc ca' par ničh ca de'en bolis bosban Xəcho Diozən' le' len yelə' guac xen che'enə', gwšə'a'əcho yelə' chzo yelə' chbez chechon' na' socho ca be'nə' cobə.

⁵ Ndił ngoda'əcho Cristən' txe'nə' catə'an gwso'ote'ene', na' leczə ndil ngoda'əcho le' txe'nə' catə'an beyas bebane' ladjo be'nə' guat ca'. De'e na'anə' cheyalə' yocobə xbab chechon' par ničh gaquə yichjla'ažda'ochon' can' naquə yichjla'aždaogüe'enə'. ⁶ Ca de'en ndil ngoda'əcho Cristən' txe'n catə'an gwso'ote'ene' le'e yag corozən', zejen de que la'ažda'omalchon' gotən. Gotən par ničh bitoch nabia'an chio'o na' par ničh bitoch šo'o čhaz de'e malən' yichjla'ažda'ochon'. ⁷ Be'nə' bagot bitoch chnabia' la'ažda'omalen' le'. ⁸ Na' ca naquə gotlencho Cristən' chejle'echo de que zocho mbancho len le' na' de que sochcho əbancho len le'. ⁹ Nezecho de que Dioz nan' bosbane' Cristən' ladjo be'nə' guat ca'. Na' bitoch so'ote'ene' de'e yoblə. Yelə' gotən' bitoch soin le' de'e yoblə. ¹⁰ Ca de'en gwso'ote' Cristən', tš'i'izən' bnežjw cuine' par ničh bebeje' chio'o xni'a de'e malən'. Bitoch so'ote' le' yetlas. Na' na'a zoe' chnežjue' Diozən' yelə' bala'an. ¹¹ Legon xbab de que Diozən' babene' par ničh cuich šo'o čhazcho de'e malən'. Pero na' leczə legon xbab de que ndil ngoda'əcho txe'n len Cristən' catə'an beyas bebane' ladjo be'nə' guat ca'. De'e na'anə' mbancho par əgwnežjwcho Diozən' yelə' bala'an. Gonle xbabən' ca' čhedə' ngoda'əcho txe'n len Xəncho Cristo Jeso'osən'.

¹² Bito güe'echo latjə šo'o čhaz de'e malən' cuerp chechon' de'en gat par goncho ca de'e malən' zelažə' la'ažda'ochon'. ¹³ Bito gon cuincho lao na' gwxiye'enə' par goncho de'e mal len cuerp chechon'. Cheyalə' gon cuincho lao na' Diozən' par goncho de'e güennə'. Gon cuincho lao ne'enə' čhedə' bitoch naccho len yichjla'ažda'ochon' ca be'nə' guat, sino bade yelə' mban zejlicane chechon'. ¹⁴ Antslə goquecho goncho can' na lein', pero de'en cui goc goncho can' nanə', blo'in chio'o de que zocho xni'a de'e malən'. Pero na'a de'en nzi'ilažə' Diozən' chio'o babebeje' chio'o xni'a de'e malən', na' de'e na'anə' chac chon cuincho lao ne'enə' par goncho de'e güennə'.

Cheyalə' cuejyichjcho cuich goncho de'e malən'

¹⁵ ¿Egontezcho de'e malən' de'en nezecho nzi'ilažə' Diozən' chio'o na' de'en bito chebeine' chio'o por ni che šə choncho can' na lei che'enə'? Bito. ¹⁶ Nezecho catə' chzenagcho che to be'nə' na' catə' cho'echo latjə chnabi'e chio'o, xni'a be'enan' zocho. Na' leczə ca' šə chdalenczcho de'e malən' na' chzenagcho čhei, xni'e'i nan' zocho na' bito žjəyecho len Diozən' šə ca'. Pero šə chon cuincho lao na' Diozən' na' chzenagcho che' nachən' zdaczcho choncho de'e güennə'. ¹⁷ Antslən' gwzochə xni'a de'e malən'. Pero choxcwlen Diozən' lenczə le'e bachzenagle na'a do yichj do lažə'əle de'en bablo'ito' le'e. ¹⁸ Diozən' babebeje' chio'o xni'a de'e malən'. De'e na'anə' banon cuincho lao na' Diozən' par šejcho goncho de'e güennə'. ¹⁹ Cho'a dižə'anə' can' zocho xni'a non' chzenagcho čhei par ničh šejni'ile. Ca'atezən' ben cuinle lao na' gwxiye'enə' par benle de'en naquə yelə' zto' na' bichlə de'en bito cheyalə' goncho, leczə can' cheyalə' gon cuincho lao na' Diozən' par goncho de'e güennə' ničh gaquə yichjla'ažda'ochon' güen can' naquə yichjla'aždao' Diozən'.

²⁰ Catə'an ne'e zocho xni'a de'e malən', bito bzenagcho che Diozən' par goncho de'e güen. ²¹ Na' bitobi de'e güen ble'icho lao de'e mal ca' de'en jənaochonə'. Bacheto'icho na'a che de'e ca' benchonə'. Žalə' chonchcho de'e mal ca' zjənac ca' bito žjəyecho len Diozən'. ²² Pero Diozən' babebeje' chio'o xni'a de'e malən' na' babene' par ničh non cuincho lao ne'enə'. De'e

na'anə' zda chaquəch yichjla'ažda'ochonə' can' naquə yichjla'aždao' le'enə' na' žjəyecho len Diozən' zejlicane. ²³ Šə zocho choncho de'e malən' yeyejcho lao yi' gabilən'. Pero šə ngodə'əcho txen len Xancho Cristo Jeso'osən', Diozən' chone' chio'o dadza yelə' mban zejlicanen'.

7

Lein' chnabi'an beŋachən' žlac zjəmbane'

¹ Beŋə' bišə' le'e nombi'ale lein' na' nezele de que lein' chnabi'an chio'o žlac mbancho na'azə. ² To no'olə csad, žlac mban be'en che'enə' cheyalə' soe' len le', la' can' chon lein' mendad. Xte catə'əch gat be'en che'enə' cana'achən' babechoj latje' len lei de'en chon mendad soe' len be'en che'enə'. ³ Na' šə no'olən' yeque'e beŋə' yoblə len mban be'en che'enə', beŋə' ggo'o xtoin' naque'. Pero šə bagot be'en che'enə' babechoj latje' len lein'. Guaquə yošagna'alene' beŋə' yoblə, na' bito nacho naque' beŋə' ggo'o xtoi laoguē de'en yošagne'e de'e yoblə.

⁴ Can' naquən beŋə' bišə', ngodə'əcho txen len Cristən', na' de'e bnežjw cuine' gwso'ote'ene', de'e na'anə' baŋezecho bito chaccho beŋə' güen lao Diozən' por ni che choncho bi de'en na lei de'en bzoj de'e Moizezən'. Cristən' beyas bebane' ladjo beŋə' guat ca' na' chio'o baben cuincho lao ne'enə' par nič goncho can' chene'e Diozən'. ⁵ Antslə nezocho chzenagcho che la'ažda'omalchon'. Na' catə'an gwnezecho ca de'en non lei de'en bzoj de'e Moizezən' mendad goncho, nachlə be'elažə'əchcho bzenagcho che de'e malən' de'en yo'o yichjla'ažda'ochonə' na' bencho con can' gone'echo. Žalə' ne'e choncho ca' bito žjəyecho len Diozən'. ⁶ Pero na'a babocobə Spirit che Diozən' yichjla'ažda'ochon' na' nezecho bito chaccho beŋə' güen lao Diozən' por ni che choncho bi de'en na lein'. Antslə bencho bi de'e güen parzə nič goncho complir can' byoj lein' gwłalte nan naquən cheyalə' goncho. Pero na'a choncho can' chene'e Diozən' chedə' babocobə Spirit che'enə' yichjla'ažda'ochon'.

Yo'o de'e malən' yichjla'ažda'ochon'

⁷ Bito cheyalə' goncho xbab de que lei de'en bzoj de'e Moizezən' naquən de'e mal. Bito gočbe'ida' nda' chona' de'e malən' žalə' cui bzejni'i lein' nada' bi de'en cui cheyalə' gona'. Na' bito əgwnežda' de que de'e malən' chona' chzelažə'a bitə'ətezə de'e de che beŋə' žalə' que lein' nan: "Bito selazə'əle bitə'ətezə de'e de che beŋə'." ⁸ Nach catə' gwnežda' can' na lein, de'e mal de'en yo'o yichjla'aždaogua'anə' nachle benən ca gwzelažə'əcha'. Na' bito gočbe'ida' de xtola'a žalə' cui bembia lein'. ⁹ Gwzoa' to tyemp sin cui bembia lei de'en bzoj de'e Moizezən'. Pero catə' gwnežda' bin' nonən mendad gona', nachle bzenaguacha' che de'e malən' de'en yo'o yichjla'ažda'ogua'anə'. De'e na'anə' gwnežda' si'a castigw zejlicane che xtola'a. ¹⁰ Na' ca naquə lei de'en bzoj de'e Moizezən', naquən par gwzenaga' chei nič ca' gatə' yelə' mban zejlicane čhia'. Pero de'en cui bzenaga' chei de'e na'anə' gwnežda' si'a castigw zejlicane. ¹¹ Ca de'en nombi'a lein', de'e malən' de'en yo'o yichjla'aždaogua'anə' bxoayaguən nada', benən ca bito bzenaga' che de'en nonən mendad gona'. Na' de'e na'anə' gwnežda' si'a castigw zejlicane che xtola'anə'.

¹² Ca naquə lei de'en bzoj de'e Moizezən', za'an che Diozən'. To to de'en nonən mendad goncho za'an che Diozən' na' zjənaquən de'e liča na' de'e güen. ¹³ Əlei de'en naquə de'e güenə' benən par nič si'a castigw zejlicane che xtola'anə'? Bito naquə len. De'e malən' de'en yo'o yichjla'aždaogua'anə' bito be'en latjə gona' can' cheyalə' gona'. Na' de'en cui chona' can' na lein', de'e

nan' gwnezdá' si'a castigw zejlicane che xtolá'aná'. Ca chac nan' nla'alaon naca' beñá' mal de'en cui chona' can' na lein', na' nla'alaon de que de'e mal juisyən' chona' cui chona' can' none' mendad gona'.

¹⁴ Naquən clar de que lein' gwaquəlenən nada' len xbab de'en yo'o lo'o yichjla'aždaogua'aná' žalá' chzenaga' chei. Pero nada' naca' beñá' la'aždao' mal, zoa' yo'o yaza' de'e malən'. ¹⁵ Bito chona' de'e güen de'en che'enda' gona'. De'e mal de'en cui che'enda' gona' lelənnə' chona'. Bito cheyacbe'ida' chia' bixchen' chona' ca'. ¹⁶ Che'enda' gona' can' na lei de'en bzoj de'e Moizezən', pero bito chona'an yoguá' las. Na' catá' cui chona' can' nanñá' lechgualə de'e chacda', chedá' nezdá' lein' naquən de'e güen. ¹⁷ Caguə nada'aná' chona' de'en cui che'enda' gona'. De'e mal de'en yo'o yichjla'aždaogua'a nan' chonən par niçh chona' de'en cui che'enda' gona'. ¹⁸⁻¹⁹ Nezdá' bito naca' beñá' güen, chedá' yo'o de'e malən' lo'o yichjla'aždaogua'aná'. Che'enda' gona' de'e güennə', pero bito chona'an. De'e mal de'en cui che'enda' gona' lelənnə' chona'. ²⁰ Na' ca de'en chona' de'en cui che'enda' gona', caguə chona'an nada'aná'. De'e mal de'en yo'o yichjla'aždaogua'a nan' nžiguəən nada' chona' de'e mal de'en cui che'enda' gona'.

²¹ Na' syempr catá'ən che'enda' gona' de'e güennə', de'e mal de'en yo'o yichjla'aždaogua'aná' chžonən gona'an. ²² Chebeida' lei che Diozən' lo'o yichjla'aždaogua'aná'. ²³ Pero na' chache'ida' de de'en yo'o yichjla'aždaogua'aná' de'en cui cho'en latjə gona' can' nezdá' cheyalə' gona'. De'e mal de'en yo'o yaz cuerp chia'aná' chnabi'an nada'.

²⁴⁻²⁵ Lo'o yichjla'ažda'ochon' chene'echo goncho de'en non lei che Diozən' mendad goncho, pero na' la'ažda'omalchon' chonczən ca choncho de'e malən'. ¡Prob chio'o! ¿No soi la'ažda'omalchon' de'enə' chnabia' chio'o? Nezecho si'icho castigw zejlicane šə soczcho gwzenagcho chei. Choçwlen Diozən', chone' par niçh Xancho Jesocristən' soine' la'ažda'omalchon'.

8

Cheyalə' goncho can' chene'e Spirit che Diozən'

¹ De'e na'aná' Diozən' ne' che chio'o šə ngoda'əcho txen len Cristo Jeso'osən' de que bito bi xtolá'əcho de. Chio'o ngoda'əcho txen len Cristo Jeso'osən' bachoncho can' chene'e Spirit che Diozən'. Bito choncho can' na la'ažda'omalchon'. ² Nezdá' Spirit che Diozən' chnabi'an nada' na' chonən yelə' mban zejlicane chia' laogüe de'en ngoda'a txen len Cristo Jeso'osən'. Catá' gwzoo' xni'a de'e malən' lennə' benən par niçh gwçhoglaə Diozən' chia' si'a castigw zejlicane. Pero Spirit che Diozən' babebejən nada' xni'a de'e malən'.

³⁻⁴ Lei de'en bzoj de'e Moizezən' bito gwzoin par yebejən chio'o xni'a de'e malən' chedá' naccho beñá' la'aždao' mal. Diozən' gwzoinə' bebeje' chio'o xni'a de'e malən' de'en bsele'e Xi'ine'en golje' yežlyə nga, goczə cuerp che'enə' ca cuerp che chio'o beñá' güen de'e mal. Na' Xi'in Dioz na'aná' gwdixjue' xtolá'əchon' par niçh chio'o benəçh gwaquə yeçhojcho xni'a de'e malən' na' gwaquə šejcho liçha goncho can' non lein' mendad, con šə goncho can' chene'e Spirit che Diozən' na' bito goncho can' na la'ažda'omalchon'.

⁵ Šə soczcho choncho can' na la'ažda'omalchonə', yo'o yichjcho de'en chene'en goncho. Pero šə zocho choncho can' na Spirit che Diozən' yo'o yichjcho can' nan na'aná'. ⁶ Na' šə con yo'o yichjcho de'en chene'e la'ažda'omalchonə', si'icho castigw zejlicane. Pero šə con yo'o yichjcho de'enə' chene'e Spirit che Diozən', guatə' yelə' mban zejlicane checho na' so cuezcho binlo len xbab de'en yo'o lo'o yichjla'ažda'ochonə'. ⁷ Contr Dioz nan' choncho šə con yo'o

yichjcho de'en chene'e la'azda'omalchon' goncho. Na' ša con yo'o yichjcho len, bito chzenagcho che lei che Diozən', na' niqwe gaquəczə gwzenagcho che Diozən' ša ca'. ⁸ Ša zocho choncho can' na la'azda'omalchon' bito gaquə naquəchlə goncho par nič yebei Diozən' chio'o.

⁹ Pero chio'o ža, ša zo Spirit che Diozən' lo'o la'azda'ochonə', bitoch zocho choncho can' na la'azda'omalchon', sino zocho chzenagcho che Spiritan'. Na' ša cui zo Spirit che Cristən' lo'o la'azda'ochonə', de'en leczə naquən Spirit che Diozən', bito naccho xi'in Dioz. ¹⁰ Cristən' zoe' len chio'o chonlilažə'əchone', na' Diozən' ne' de que naccho beŋə' güen laogüe'enə'. Na' de'e na'anə' de yelə' mban zejlicəne checho la'anə'əczə gatcho len cuerp chechon' por ni che de'e malən'. ¹¹ Diozən' bolis bosbane' Cristo Jeso'osən' ladjo beŋə' guatən'. Na' ša Spirit che Diozən' zon lo'o la'azda'ochon', leczə gwžin ža cata' Diozən' yolis yosbane' chio'o len cuerp checho quinga de'enə' sa'at. Yolis yosbane' chio'o chedə' yo'o Spirit che'enə' lo'o la'azda'ochon'.

¹² Can' ža beŋə' bišə', bito cheyalə' goncho can' na la'azda'omalchon'.

¹³ Si'icho castigw zejlicəne ša zoczcho choncho de'en chene'e la'azda'omalchonə'. Pero ša güe'echo latjə gaquəlen Spirit che Diozən' chio'o par nič cuich gwzenagcho che la'azda'omalchon', nachən' gatə' yelə' mban zejlicəne checho.

¹⁴ Na' yoguə' chio'o ša chzenagcho che de'en chsed chzejni' Spirit che Diozən' chio'o goncho, naccho xi'in Dioz. ¹⁵ Diozən' beŋə' chio'o Spirit che'enə' cata'ən gwcue'e chio'o ca xi'ine'. Na' de'e na'anə' bito chžebcho Diozən' can' chžebcho to beŋə' znia cata' choncho xšine'enə'. Lgua'a žebchone' cholgüižchone' che'echone': "Xa." ¹⁶ Spirit che Diozən' nan lo'o yichjla'azda'ochon' de que chio'o naccho xi'in Dioz. ¹⁷ Na' ša naccho xi'in Dioz, gwžin ža cata' yoguə' de'en de che Cristən' gaquən checho txen lencho le'. Gaquən checho con ša gwsanlažə' cuincho yoso'ochi' yoso'osaquə' beŋə' chio'o por ni che de'en chonlilažə'əcho Cristən', can' bosə'ochi' bosə'osaquə'e le'enə'. Na' ša yoso'ochi' yoso'osaquə'e chio'o, Diozən' goŋe' chio'o yelə' bala'an xen ca de'en habnežjue' che Cristən'.

¹⁸ Yežlyo nga de de'en chzaquə'əzi' chzaquə'əyašə'əcho. Pero nada' chona' xbab caguə de'e bi de'enə' ca de'en yebeicho cata'ən əžin ža goŋ Diozən' chio'o yelə' bala'an xen ca de'en napə Cristən'. ¹⁹ Diozən' bene' beŋəch, bene' bia chsa'aš na' bene' cuantzə bi de'en zjəde. Na' yoguə'əcho len lega'quən bazochə lao juisy batə'əquən' goŋ Diozən' yelə' bala'an de'en si' chio'o naccho xi'ine', na' leczə len yoguə' bia ca' chsa'aš chsə'əbezəb batə'əquən' əžin ža gone' ca'. ²⁰ Na' yoguə' de'e ca' ben Diozən' caguə zjənac ša'onə'. Na' caguə con ca gwse'ene'ennə' zjənaquən. Ze'e gonša'ochə' lega'quənnə', na' ze'e gonša'ochə' yoguə' bia chsa'aš na' leczə ca' chio'o beŋəch. Na' leczə Dioz nan' bene' par nič chsə'əbezən na' par nič chsə'əbezə beŋəchan' na' par nič leczə chsə'əbezə bia ca' chsa'aš. ²¹ Chsə'əbezən batə'əquən' əžin ža yesyə'əyaquən binlo juisy na' bito te čega'quən. Na' leczə can' chsə'əbezə bia ca' əsa'ac čega'quəb. Na' ca'aczen' gac che chio'o naccho xi'in Dioz, cata'ən si'icho yelə' bala'an xen de'en goŋ Diozən' chio'o, yeyac cuerp chechon' de'e cobə na' cuatəch soi yelə' gotən' chio'o. ²² Na' nezecho, xte ža neža yoguə' de'e ca' ben Diozən' chso'onən ca beŋə' chbežgüe', chsə'əžaglaon ca to no'olə beŋə' chzan. Na' leczə yoguə' bia ca' chsa'aš chsə'əbezgüe'eb chsə'əžaglaob ca to no'olə beŋə' chzan. ²³ Na' caguə de'e ca'azən'. Leczə len chio'o chbežgüe'echo. Diozən' babene' chio'o Spirit che'enə' par nič nezecho gwžin ža gaquəch güen checho. Na' chbežgüe'echo lo'o la'azda'ochon' chbezcho batə'əquən' goŋ Diozən' cuerp

cobə chechon' par əgwlo'e de que banque'e chio'o ca xi'ine'. ²⁴ Catə'ən bebej Diozən' chio'o xni'a de'e malən', ca nan' gwzoloa chbezcho gwžin ža gaquəch güen checho. To de'e bagoc bitoch socho lez cuezcho gaquən. Notono zo no nezeo' lez gaquə de'en nezene' bagoc. ²⁵ Pero ca naquə de'en zocho lez gwžin ža gaquəch güen checho, zocho chgo'o chchejlažə'əcho batə'əquən' gaquən.

²⁶ Ca naquə Spirit che Diozən' zon chaclenən chio'o chedə' bitotec bi chac goncho sīn cui zon len chio'o. Bito chac goncho orasyon can' cheyalə' gonchon, poro na' Spirit che Diozən' chñen fabor chio'o laogüe'ena' la'anə'əczə cui chezelecho naclə güe'elenchone' dižə' che de'en chnalažə'əcho. ²⁷ Na' Diozən' ngüia nye' la'ažda'ochon' na' leczə ca' chejni'ine' bin' chene'e Spirit che'ena' catə'ən chñen fabor chio'o bagwleje' par naccho lažə' ne'ena'. Na' can' chene'e Diozən' ñen fabor chio'o.

Diozən' de'e chio'o, de'e na'anə' notono no soi chio'o

²⁸ Na' nezecho de que lao yoguə de'en chaquən', Diozən' chone' par niç gaquə güen che chio'o chaquecho che'. Chio'on bach gwleje' par chonlilažə'əchone' segon can' gwchoglaogüe'en. ²⁹ Nombia' Diozən' chio'o dezd gwlatte, na' əbsi'e xneze par niç tozə gaquə yichjla'ažda'ochon' len yichjla'aždao' Xi'ine' Jesocrisən'. Bene' par niç Jesocrisən' naque' beñə' nech entr chio'o beñə' biše'e zan. ³⁰ Na' ca naquə əbsi' Diozən' xneze par niç gaquə yichjla'ažda'ochon' toza len yichjla'aždao' Xi'ine' Jesocrisən', leczə gwleje' chio'o par chonlilažə'əchone' na' bagwchoglaogüe'en checho de que naccho beñə' güen laogüe'ena'. Na' leczə can' goñce' chio'o yelə' bala'anna'.

³¹ Catec güenna' chon Diozən' len chio'o de'en bsi'e xneze gac checho yoguə de'e ca'. Na' nezecho Diozən' de'e chio'o, na' de'e na'anə' notono no soi chio'o. ³² Diozən' bito bžone' saquə'əzi' Xi'ine'ena' por ni che yoguə'əlol chio'o ca de'en bsele'ene' gwso'ot beñə' le'. Na' can' bsele'e Xi'ine' Jesocrisən' par chio'o, ca'aczən' gone' yoguə' de'e güenna' dadzə len chio'o. ³³ Diozən' bagwleje' chio'o par naccho xi'ine' na' bagwchoglaogüe'en checho de que bito bi xtolə'əcho de. De'e na'anə' notono no soi əgwcuış chio'o laogüe'ena'.

³⁴ Notono zo no gaquə gon par niç əna Diozən' checho de que de xtolə'əchon'. Por ni chechon' bsanlažə' cuin Crisən' gwso'ot beñə' le' de' na' Diozən' bolis bosbane'ene' ladjo beñə' guat ca'. Na' na'a chi'e cuit Diozən' chnabi'e txen len le', na' chñe' fabor chio'o. ³⁵ ¿Ede de'e əgwžon par niç Crisən' cuich gaquene' checho? ¿Egwžon no de'e mal de'en gaquə checho? ¿Egwžon no de'e yašə' de'e zi' de'e gaquə checho? ¿Egwžon no yelə' xi'a che beñə' chgue'i chio'o? ¿Egwžon no yelə' chbil' chdon checho? ¿Egwžon laogüe de'en cui de xala'ancho? ¿Egwžon šə bi lxož de'e za' len chio'o? ¿Egwžon par niç Crisən' cuich gaquene' checho šə to beñə'əclə noxe'e cwšiyən' gote' chio'o? Bitobi bi de de'e əgwžon par niç Crisən' cuich gaquene' checho. ³⁶ Can' nyojczə Xtižə' Diozən' nan:

Por ni che chonlilažə'əto' le', chse'ene beñə' so'ote' neto' do tyempte. Chso'one' xbab de que neto' naquəto' ca to xilə' bia so'ote'.

³⁷ Pero catə'ən za'ac bi de'e mal gac checho, bito chac chop lažə'əcho, sino chebeichgüeicho la' nezecho zoczə Crisən' chaquene' chechon'. ³⁸ Nada' nezdə' de que notono gaquə gwžon par niç Diozən' len Crisən' cuich əsa'aquene' checho. Yelə' gotə' bito gaquə bi gonən, ni yelə' mbannə', ni no angl bzelaο, ni nochlə beñə' blao che angl bzelaο, ni angl bzelaο beñə' gwnabia', ni de'e chac checho na'a na' šə bichlə de'e ze'e za'ac. ³⁹ Ni de'e de le'e yoban', ni de'e de gabilən', ni bichlə de'en ben Diozən' bito gaquə yesə'əžonən par niç Diozən' cuich gaquene' checho. Nic yesə'əžon no beñə', nic yesə'əžon bitə'ətezə de'e

gac checho par nich Diozən' cuich gaquene' checho, la' Diozən' bsele'e Xancho Cristo Jeso'osan' blo'ine' chio'o can' chaquene' checho.

9

Diozən' gwcue'e beṇə' Izrael ca xi'ine'

¹⁻² De'en ngoda'a t xen len Cristən' cho'a dižə' li nia' de que zochgua trist, na' chachgüeida' lo'o la'ažda'ogua'anə' ca naquə zan beṇə' gwlaž chia' ca' bito chso'onlilaže'e Cristən'. Spirit che Diozən' chonən par nich nezda' lo'o yichjla'ažda'ogua'anə' de que cho'a dižə' li catə' nia' ³ xte zelaža'a cuiayi'a žalə' na'anə' yecui'ižə' Diozən' nada' cuit Cristən' par nich beṇə' gwlaž chia' ca' so'onlilaže'ene'. Che'enda' so'onlilaže'ene' chedə' lega'aque' gwsa'alje' zjənaque' beṇə' Izrael ca nada'. ⁴ Diozən' gwcue'e chio'o beṇə' Izrael ca xi'ine'. Na' gwzoe' len de'e xaxta'ocho ca' to lo'o bejw de'en chey che'eni'. Na' bene' lyebe gaquəlene' lega'aque'. Na' leczə bnežjue' lega'aque' lei de'en bzoj de'e Moizezən'. Na' Dioz nan' əblo'ine' lega'aque' naquən' se'ejni'alaže'ene'. Na' leczə benche' lyebe de'e bene' len lega'aque'. ⁵ Beṇə' golə blao beṇə' za' che'elte zjənaque' xaxtao' chio'o beṇə' Izrael. Cristən' ben' bselə' Diozən' par gaquəlene' beṇə'naçn' golje' lao dia che beṇə' Izrael. Le' naque' Dioz na' chnabi'e yogua'əte, chnabi'e beṇə'naçn' bia ca' chsa'aš, na' yogua'əloj cuantzə de'e zjəde. Cheyałə' socho güe'ela'ochone' zejlicane. Can' gonšgaczcho.

⁶ Clelən' choncho xbabən' šə chaquecho de que Diozən' bito bene' complir ca lyebe de'en bene'. De'e li caguə yogua' beṇə' ca' əgwsa'aljə lao dia che Izraelən' zjənaque' beṇə' Izrael lao Diozən'. ⁷ Na' caguə beṇə' ca' əgwsa'aljə lao dia che de'e Abraanna' chon Diozən' cuent zjənaque' xi'in dia che de'e Abraanna'. Quinga gož Diozən' Abraanna': "Xi'in dia che Isaac gona' cuent lao dia chio'onə'." ⁸ De'e nga chlo'in chio'o de que caguə ni che de'e goljcho lao dia che beṇə' Izraelən' naccho xi'in Dioz. Naccho xi'in Dioz chedə' chejle'echo che lyebe de'en bene' len de'e Abraanna', gwne' de que əque'e ca xi'ine' con beṇə' so'onlilažə' le'. ⁹ Catə'an ben Diozən' lyebe len de'e Abraanna' gwne': "Leczə ca tyemp nga na'a yida' yetgüiz, na' cana' bazo to bi'i che Sar ni."

¹⁰ Na' leczə be' Diozən' dižə' len de'e Rebequan' catə'an gwzoe' bi'e bi'i cuaš ca', xi'in de'e xaxta'ocho Isaaquan'. ¹¹ Ze'e sa'aljə bi'i cuaš ca'anə', na' ni de'e güen ni de'e mal cuinə' so'ombo'. Na' lao cuinə' gačə'əbia' naquan' so'ombo', gwlej Diozən' tobo' par gaquə güen chebo'. Con bagwchoglaogüe' can' gaquə chega'acbo' na' bene' can' bansi'e xnezen'. ¹² De'e na'anə' gože' de'e Rebequan': "Bi'in galjə nech sobo' xni'a bi'in yedenao lebo'." ¹³ Na' nyojczə de'en gwna Diozən' che bi'i cuaš ca': "Chacda' che Jacobən' na' chgue'ida' Esa'on'."

¹⁴ Bito cheyałə' goncho xbab de que Diozən' bito zde' licha de'en gwne' ca'. Zdacze' lican'. ¹⁵ Ze' Diozən' de'e Moizezən': "Yeyašə'əlaža'a len beṇə' che'enda' yeyašə'əlaža'a, na' əži'ilaža'a len beṇə' che'enda' əži'ilaža'a." ¹⁶ Quinga naquan': Diozən' nži'ilaže'e chio'o caguə por ni che che'enecho əži'ilaže'e chio'onə'. Na' caguə por ni che zocho lao juisy əži'ilaže'e chio'onə' nži'ilaže'e. ¹⁷ Nyojczə Xtižə' Diozən' can' gože' de'e Rei Faraonna': "Nada' bena' par nich naco' rei parzə nich gona' len le' ca yesa'əneze beṇə' can' naquə yelə' guac chia'anə'. Gona' par nich yogua'əloj beṇə' ža' yežlyon' yesa'ənezene' non' naca' nada'." ¹⁸ Can' naquan', Diozən' cheyašə'əlaže'e beṇə' chene'ene' yeyašə'əlaže'e, na' chone' par nich nitə' beṇə' žod beṇə' chene'ene' cui yoso'ozenague' che'.

¹⁹ Na' de'en chon Diozən' ca' de repent chonle xbab nale: "Chio'o beṇə'naçn choncho con can' banžia' Diozən' bia. ¿Bixchen' ne' de xtolə'əchon'?" ²⁰ Pero

¿no naquæ chio'on ža par gaquæyožcho Diozæn'? ¿Egüe' to yesæ' ben' ben len: "¿Bixche nga beno' nada' quinga?" Nezecho bito ye'en le' ca'. ²¹ Beņæ' güen yesæ' xguaguæn', chac gone' no yesæ' par gonæn žin len de'e naquæ de'e xoche. Na' le'e gon' na'atezæ leczæ gone' yesæ' par gonæn žin len de'e cui naquæ xoche.

²² Ca cheyalæ'æczæn' nžia' Diozæn' bia' gwnežjue' castigw zejlicane che beņæ' ca' cui choso'ozenag che', na' can' nžie' bia' gone' bichlæ par gwlo'ine' yelæ' guac che'ena'. Na' de'e cheyalæ'æczæn' can' nžia' Diozæn' bia' gone' çhedæ' bagwzoine' bagwdape' yelæ' chxenlažæ' len lega'aque' la'aņæ'æczæ zjæzaque'e par yesæ'æzi'e castigw zejlicanen', na' yesyæ'æžine' lao yi' gabilæn'. ²³⁻²⁴ Na' ca cheyalæ'æczæn' ca de'en bsi'e xņezenæ' antslæ par gone' chio'o chonlilažæ'æchone' yelæ' bala'aņ, chio'o cheyašæ' cheži'ilažæ'e. Bene' ca' par niç nachbia' lechguale de'e güen juisy chone' chaclene' chio'o gwleje' par chonlilažæ'æchone' entr beņæ' Izrael na' entr beņæ' cui zjænaquæ beņæ' Izrael.

²⁵ Can' na' le'e libr de'en bzoj de'e profet Oseasæn', Diozæn' gwne':

Beņæ' cui zjænaquæ xi'ina' na' nia' lega'aque' xi'ina'.

Na' beņæ' ca' cui goquæda' çhega'aque' yapaga'aca'ane' de que chacda' çhega'aque'.

²⁶ Na' leczæ nan:

Gan' gož Diozæn' beņæ' ca': "Le'e bito nacle xi'ina'", leczæ na'anæ' ye'e lega'aque' de que zjænaque' xi'ine', Dioz ben' zo zejlicane.

²⁷ Leczæ can' gwna de'e profet Isaiazæn' che beņæ' Izrael ca': "La'aņæ'æczæ chio'o beņæ' Izrael šancho ca yox de'e chi' cho'a nisdæ' balgachon' yechojcho xni'a de'e malæn'. ²⁸ La' Xancho Diozæn' gone' can' bançhoglaogüe'en len chio'o beņæch, na' to žalnez gone' yoguæ'ælol de'en bangüie' gone'." ²⁹ Leczæ de'e Isaiazæn' gwne' antslæ:

Žalæ' Xancho Diozæn' ben' napæ le'ezelaogüe yelæ' guac xen cui bocua'aņe' to chopæ beņæ' lao nasyon Izrael çhechon',

can' goc che beņæ' Sodoma na' beņæ' Gomorra ca' goc çhecho žalæ' ca'.

Con beņæ' chso'onlilažæ' Cristæn' nchoglaon çhega'aque' de que zjænaque' beņæ' güen lao Diozæn'

³⁰ Quingan' naquæn, beņæ' ca' cui zjænaquæ beņæ' Izrael bito besyæ'æyilje' naclæn' so'one' par niç Diozæn' æne' de que zjænaque' beņæ' güen laogüe'ena', pero bale' bach chso'onlilažæ'e Cristæn' na' Diozæn' ne' çhega'aque' de que zjænaque' beņæ' güen laogüe'ena'. ³¹ Na' beņæ' Izrael ca' jæsæ'anaogüe' to lei de'e chon mendarad naclæn' so'one' par niç æsa'aque' beņæ' güen lao Diozæn'. Pero bito gwso'one' can' nannæ'. De'e nan' Diozæn' gwçhoglaogüe'en çhega'aque' de que bito zjænaque' beņæ' güen laogüe'ena'. ³² Na' gwçhoglaogüe'en çhega'aque' ca' çhedæ' caguæ gwso'onlilažæ'e Dioz na'anæ' con gwsa'aquene' so'one' can' na lein' par niç æsa'aque' beņæ' güen laogüe'ena'. De'e na'anæ' gwxaquæ'ælebæga'aquene' ca beņæ' žti'i to yej. ³³ Goc can' nyojczæ Xtižæ' Diozæn' nan:

Gan' nzi' Sion na' æsela'a to beņæ' gwxaquæ'ælebene' ca to yej de'e æçhego'o beņæ' na' ca to yej de'en zjæsæ'æzo'e na' yesæ'æbiçe'.

Na' beņæ' so'onlilažæ' ben' gwxaquæ'ælebe ca yejæn' bitobi zto' æsa'aquene' che de'en so'onlilažæ'ene'.

10

¹ Beņæ' bišæ', do yichj do lažæ'a che'enda' par niç beņæ' Izrael gwlaž çhia' ca' yesyæ'æchoje' xni'a de'e malæn', na' de'e na'anæ' chona' orasyon chnaba' gaquælen Diozæn' lega'aque'. ² Nežda' can' chse'enene' de'e zan de'e

so'one' chsa'aquene' par yebei Diozən'. Pero bito zjənezene' bin' chene'e Diozən'. ³ Bito chse'ejni'ine' naquən' baben Diozən' par niçh ne' che beṇə' de que zjənaque' beṇə' güen laogüe'enə'. Le'e lega'acteze' chse'ene'ene' yesə'əyilje' naquən' so'one' par niçh əsa'aque' beṇə' güen lao Diozən'. Bito chse'ene'ene' so'onlilaže'ene' par niçh əne' chega'aque' de que zjənaque' beṇə' güen laogüe'enə'. ⁴ Pero nota'ətezə beṇə' chonlilaže' Cristən', Diozən' ne' che' de que naque' beṇə' güen laogüe'enə' la'anə'əczə sə cui chonyane'e can' na lein'.

⁵ De'e Moizezən' bzoje'en de que nota'ətezə beṇə' chone' cuaselol can' na lein' nachən' naque' beṇə' güen lao Diozən' na' gaquə bane' zejlicane'. ⁶⁻⁷ Pero nza'alan' nyoj Xtizə' Diozən' che beṇə' ca' na Diozən' zjənaquə beṇə' güen laogüe de'en chso'onlilaže'ene'. Nan: "Bito goncho xbab lo'o la'azda'ochon' gaquecho: Notono no gaquə cue yoban' o notono no gaquə yetj gan' ža' beṇə' guat ca'", žalə' na'aclə chyažjecho žjəxi'icho Cristən' niçh gonlilaže'əchone'.

⁸ Na' leczə nyojən' nan: "Banombia'acho dižə' de'en chaclen chio'o. Choncho xbab chei na' cho'echo dižə' can' nan." Na' lenṇə' dižə' de'en chzejni'ito' beṇə' par niçh so'onlilaže'e Cristən'. ⁹ Quingan' cheyałə' goncho par niçh Diozən' yebeje' chio'o xni'a de'e malən'. Cheyałə' güe'echo dižə' len beṇə' yoblə par niçh yesə'ənezene' de que chonlilaže'əcho Xancho Jeso'osən', na' leczə cheyałə' šejle'echo do yichj do lažə'əcho de que Dioz nan' bolis bosbane' Jeso'osən' ladjo beṇə' guat ca'. ¹⁰ Diozən' ne' de que naccho beṇə' güen laogüe'enə' šə chejle'echo do yichj do lažə'əcho de que cuine'enə' bolis bosbane' Jeso'osən' ladjo beṇə' guat ca'. Na' šə cho'echo dižə' len beṇə' yoblə par niçh yesə'ənezene' de que bachonlilaže'əcho Xancho Jeso'osən', nachən' Diozən' yebeje' chio'o xni'a de'e malən'.

¹¹ Xtizə' Diozən' de'en nyojən nan: "Nota'ətezə beṇə' chso'onlilaže' Diozən' bitobi zto' sa'aquene' che de'en chso'onlilaže'ene'." ¹² Chio'o beṇə' Izrael na' chio'o cui naccho beṇə' Izrael, tozəczə can' chon Diozən' len yoguə'əcho, la' Xancho Jeso'osən' naque' Xan yoguə'əlol beṇə'. Le' lechguale cheyašə' cheži'ilaže'e yoguə'əcho con šə chnabcho gaquəlene' chio'o. ¹³ Can' na Xtizə' Diozən' de'en nyojən': "Nota'ətezə beṇə' yesə'ənab godlen laogua' nada' naca' Xanle, gaaquəlenca' lega'aque'." ¹⁴ Pero žnacxa so'on beṇə' yesə'ənabe' godlen laogüe'enə' šə bito chso'onlilaže'ene'? Na' žnacxa so'one'en so'onlilaže'e le' šə cuiṇə' se'enene' xtiže'enə'? Na' žnacxa gaquə əse'enene' xtiže'e na'anə' šə cui zo beṇə' güe' xtiže'enə' len lega'aque'? ¹⁵ žNacxa so'on beṇə' yesə'əyixjui'e dižə'əna' šə bito zo no chselə' lega'aque' par yesə'əyixjui'en? Can' nyojczə Xtizə' Diozən' nan: "Chebeichgüeicho len beṇə' chesə'əyixjui'e guac socho binlo len Diozən', chesə'əyixjui'e dižə' güen dižə' cobə che'enə'."

¹⁶ Pero la'anə'əczə catə' chse'ene beṇə' dižə' güen dižə' cobə che Diozən', caguə yogue'e choso'ozenague' chei. De'e Isaiazən' gwne': "Xana' casi notono no choso'ozenag dižə' de'en chyixjue'eto'ona'." ¹⁷ Cheyałə' əse'ene beṇə' dižə' güen dižə' cobə de'en gwzejni'in lega'aque' che Cristən' par so'onlilaže'ene'.

¹⁸ Pero chṇaba': žəcabi ne'e se'ene beṇə' Izrael ca' dižə' güen dižə' cobə de'en chzejni'in che Cristən'? Baçh gwse'enene'en. Baçh chac can' nyoj Xtizə' Diozən' nan:

Doxenlə yežlyon' baçh gosə' gwłaljə dižə'əna'.

Zbi'izcan yežlyon' babselə' Diozən' xtiže'enə'.

¹⁹ Na' chṇaba' de'e yoblə: žəcui gwse'ejni'i beṇə' Izrael ca' dižə' de'en chzejni'in che Crist na'anə'? Zse'ejni'iczene'en. De'e Moizezən' gwduxjui'e can' gwna Diozən', gwne':

Nada' Dioz gona' güen len beṇə' ca' cui zjənaquə nasyon çhia'.

De'e na'anə' gue'ile lega'aque'.

Na' gona' güen len beṇə' ža' nasyon ca' beṇə' cui bi chse'ejni'i,
na' de'e na'anə' əža'ale.

²⁰ Na' de'e profet Isaiazən' bito bžebe' gwdixjui'e can' gwna Diozən':
Beṇə' cui besyə'əyilj nada', bedəsyə'ədi'e nada'.

Na' beṇə' cui gosə'əṇab nada', na' bena' par niç gwso'ombi'e nada'.

²¹ Na' de'e profet Isaiazən' leczə gwdixjui'e can' gwna Diozən' che beṇə' Izrael
ca', gwne': "Do tyempte chaxa' beṇə' ca' cui choso'ozenag chia' par niç
yoso'ozenague'. Beṇə' žod beṇə' godenag zjənaquəga'aque' len xtiža'anə'."

11

Diozən' bito bechojlaže'e beṇə' Izrael ca'

¹ Bito cheyalə' goncho xbab de que Diozən' bechojlaže'e chio'o naccho dia
che Izraelən'. Leczə beṇə' Izrael nada', za'a lao dia che de'e Abraam, naca'
xi'in xesoa de'e Benjamin. ² Bito bechojlažə' Diozən' chio'o naccho dia che
Izraelən', chio'on gwleje' gwlahte par naccho nasyon che'enə'. Legon xbab
can' nyojən le'e libr Xtižə' Diozən' can' ben Liazən' orasyonṇə' laogü'e'enə'
cana', gwne' contr beṇə' Izrael gwlaž che', gwne': ³ "Bagwso'ot beṇə' Izrael
quina profet chio' ca' Xana'. Bagosə'əgo'oni'ane'e mes de vej chio' gan'
cheyalə' əso'elaogü'e le'. Yetoga nada' zoa' na' leczə chse'ene'ene' so'ote'
nada'." ⁴ Pero Diozən' boži'en gože'ene': "Ne'e nitə' gaža mil beṇə' bag-
wleja' par zjənaque' lažə' na'anə' beṇə' cuiṇə' yesə'əzo xibe' to lao lgua'a
lsaquə' de'en chse'ejni'alažə' beṇə' de'en nzi' Baal." ⁵ Leczə can' naquən xte
za neža, la'aṇə'əczə bito naccho beṇə' zan, pero Diozən' bagwleje' chio'o
par cho'ela'ochone' chedə' nži'ilaže'e chio'ona'. ⁶ Diozən' gwleje' chio'o par
cho'ela'ochone' chedə' chebeine' chaclene' chio'o. Gwleje' chio'o caguə por
ni che bichlə de'e güen de'en benchonə'. Žalə' Diozən' gwleje' chio'o laogüe
bencho de'e güen, bito naquan con to goclenzə de'en gwleje' chio'o.

⁷ Ca naquə beṇə' Izrael gwlaž chia' ca', zane' bito besə'əželene' naclən'
so'one' par niç Diozən' yebeine' lega'aque'. Pero chio'o chonlilažə'əcho
Diozən', cuine'enə' gwleje' chio'o par cho'ela'ochone' na' chebeine' chio'o,
la'aṇə'əczə beṇə' Izrael ca' yela' bito gwse'ejni'ine' bi'in chene'e Diozən'.

⁸ Chac chega'aque' canə' nyoj Xtižə' Diozən' nan: "Diozən' bene' par niç
zjənaque' ca beṇə' cuiczə zjənannə' cuiczə zjəntei. Na' xte ža neža gw-
x-
acuə'əlebəga'aquene' ca beṇə' cui chəsə'əle'i len jlaoga'aquen' na' ca beṇə'
ncuež nagga'aquen'." ⁹ Leczə bzoj de'e Dabin' gwne':

Gaquəšga yogua' de'en chəsyə'əbeine'ena' ca to ga gaon lega'aque'
na' ca to ga žjəsə'əxope' na' ca to ga sa'acšgue' castigw.

¹⁰ Yesə'əcholšga yichjla'ažda'oga'aque'enə',

na' yedote yesə'əzaquə'əzi'išgue' can' chzaquə'əzi' beṇə' nlegw cože'enə' no'e
yoa' zi'i.

Diozən' babene' par niç balə beṇə' cui zjənaquə beṇə' Izrael chso'onlilaže'ene'

¹¹ Ca naquə bagwyo'o yejən' ni'a beṇə' Izrael ca', bito cheyalə' goncho xbab
de que leczə gosə'əbix'e'enə'. Pero ca de'en cui boso'ozenague' che Diozən',
goc ca' par niç lenczə le'e cui nacle beṇə' Izrael yechojle xni'a de'e malən'
con le'e chonlilažə'əlene'. Na' leczə goc ca' par niç beṇə' ca' cuiṇə' so'onlilažə'
Diozən', beṇə' gwsa'aljə lao dia che Izraelən', yesə'əzelaže'e gon Diozən' len
lega'aque' can' bachone' len le'e cui nacle beṇə' Izrael, le'e chonlilažə'əlene'.

¹² Na' ca de'en cui boso'ozenag beṇə' Izrael ca', goc ca' par niç yeziquə'əchlə

benə' ʒa' yeʒlyon' nite'e mbalaz šə so'onlilaʒe'e Diozən'. Na' ca de'en cuich chon Diozən' cuent che zan benə' Izrael ca' de que zjənaque' nasyon che'enə', goc ca' par niçh le'e cui nacle benə' Izrael zole mbalaz, le'e chonlilaʒə'əle Diozən'. Naquəchxa de'e mban' gaquə' catə' yoguə'əolte benə' Izrael ca' so'one' ca yebei Diozən' lega'aque' de'e yoblə.

13 Le'e cui nacle benə' Izrael, che'enda' ənezele de que nada' naca' apostol che Diozən' na' bsele'e nada' cho'a xtiʒe'enə' entr le'e cui nacle benə' Izrael. Chona' xte ga zelao saquə'əda' par niçh zan le'e cui nacle benə' Izrael gonlilaʒə'əle Diozən'. 14 Chona'an par niçh leczə yeziquə'əchlə benə' Izrael gwlaʒ chia' ca' yesə'əzeləze'e gon Diozən' len lega'aque' can' chone' len le'e cui nacle benə' Izrael, na' con yoguə' no so'onlilaʒə' le', yebeje' lega'aque' xni'a de'e malən'. 15 Diozən' babnite'e zan benə' Izrael ca' ca'alə, na' laogüe de'en babnite'e lega'aque' ca'alə babozoe' zan le'e cui nacle benə' Izrael binlo len le'. Pero na' gwžin ʒa catə' gon Diozən' ca yesə'əbiguə' benə' Izrael ca' len le' de'e yoblə. Na' lechguale de'e mban' gaquə' catə' baben Diozən' ca besyə'əbigue'e de'e yoblə len le'. 16 Nezecho de costombr che chio'o benə' Izrael catə' choncho yetxtil chneʒjwcho Diozən' to blol dao' cuazin', na' zejen de que dolol cuazi nan' naquən' che'. Can' naquən len chio'o benə' Izrael. Balcho banon Diozən' chio'o cuent ca xi'ine', pero na' chene'ene' de que yoguə'əcho gaccho xi'ine'. Na' catə' nacho de que to lo yag naquən che Diozən', leczə che' xoze'e ca'.

17 Chio'o benə' Izrael gwxaquə'əlebecho ca xozə' yag olibən' de'en naquə güen. Na' Diozən' bnite'e balcho ca'alə. Na' de'en bene' ca' gwxaquə'əleben ca de'en chon to benə' catə' chçhogue' xozə' yaguən'. Na' yoguə' le'e cui nacle benə' Izrael gwxaquə'əlebele ca xozə' yag olibo de'en ze yixə', na' bene' le'e ca to yag de'e chone' injert, bozoe' le'e lao yag güenənə'. Na' loin' noxə'an le'e na' leczə noxə'an xoze'e ca' yelə', na' xniʒe'in chguazə'an le' na' chguazə'əten xoze'e ca' yelə'. 18 Bito gaquale de que naquəchle benə' güen cle ca benə' Izrael ca', benə' ca' gwxaquə'əlebəga'aque' ca xozə' yag de'en gwchoguan'. Caguə le'e chneʒjwle yelə' mban che lo yag na'anə', sino que lo yag na'alən' chonən le'e yelə' mbanənə'.

19 Le'e cui nacle benə' Izrael de repent nale: "Gwçhogue' xozə' yaguən' par niçh bene' neto' injert." 20 Na' de'e liczə can' nalənə'. Na' laogüe de'e cui gwso'onlilaʒə' benə' Izrael ca' Dioz nan', bene' len lega'aque' ca xozə' yag de'en bagwçhogue'enə'. Na' babozoe' le'e lguə'a lega'aque' laogüe de'en chonlilaʒə'əle Cristən'. De'e nan' ʒa, bito gonle xbab de que Diozən' chebeichene' le'e cle ca benə' Izrael ca', sino leso' legon xbab par sotezə sole gonlilaʒə'əlene'. 21 Diozən' bito gwzi'ixene' che benə' ca' chsaquə'əlebene' ca xozə' yaguən' de'en zjənaque' doalje, na' leczə bito si'ixene' che le'e šə bito sotezə sole gonlilaʒə'əlene'. 22 Legonšc xbab chele can' nʒi'ilaʒə' Diozən' benə' chso'onlilaʒə' le', na' can' chbejyichje' benə' cui chso'onlilaʒe'ene'. Diozən' gwlejyichje' benə' Izrael ca' besə'əxopə cui gwso'onlilaʒe'ene', na' nʒi'ilaʒe'e le'e cui nacle benə' Izrael laogüe de'en chonlilaʒə'əlene'. Pero šə cui sotezə sole gonlilaʒə'əlene', leczə cuejyichje' le'e. 23 Na' de'e yoblə Diozən' yozoe' benə' Izrael ca' na' yeyone' lega'aque' injertar lao xozə' yaguən' šə so'onlilaʒe'e Cristən'. Diozən' nape' yelə' guac par gone' ca' len lega'aque'. 24 Le'e nacle ca xozə' yag olibo de'e ze yixə', na' gwçhog Diozən' le'e, na' bene' le'e injertar bozoe' le'e lao xozə' yag olibo güenənə'. Bezole gogle injertar lao xozə' yag olibo güenənə', len caguə nacle xoze'e doaljen'. Nezecho leczə gwžin ʒa catə' yeyon Diozən' injertar de'e yoblə xozə' yag olibo de'e ca' zjənaquə xoze'e doalje.

Gwžin ʒa yebej Diozən' yoguə' benə' Izrael ca' xni'a de'e malən'

²⁵ Beṇə' bišə', che'enda' ənezele de'e nga de'e cui no gwneze antslə par niçh cui gaquele de que yelə' beṇə' sin' çhelen' nzi'ilažə' Diozən' le'e. Balə beṇə' Izrael ca' zjənaque' beṇə' yichj žod, bito chse'ejni'ine' bi'in chene'e Diozən'. Na' nic se'ejni'iczene'en xte que catə'əch əžin ža baçh de yelə' mban zejlicane che beṇə' ca' cui zjənaquə beṇə' Izrael, con yoguə' beṇə' ca' əgwnežjo Diozən' yelə' mban chega'aque'. ²⁶ Nach yoguə' beṇə' Izrael ca' yebej Diozən' lega'aque' xni'a de'e malən' can' nyojczə Xtizə'ena', nan:

To beṇə' syoda Sion yebeje' beṇə' xni'a de'e malən'.

Na' yelə' güen de'e mal che xi'in dia che de'e Jacobən', le' yeque'en.

²⁷ Na' de'e ngan' chona' lyebe gona' len xi'in dia che de'e Jacobən', yeca'a de'e mal chega'aque'ena' de'en chso'one'ena'.

²⁸ Can' naquən. De'en chso'on beṇə' Izrael ca' contr Diozən', bito chse'ejle'e che dižə' güen dižə' cobə' che'ena', de'e na'anə' Diozən' gwleje' le'e cui nacle beṇə' Izrael par gone' le'e cuent len nasyon che'ena'. Pero Diozən' chaquene' chega'aque' laogüe de'en gwleje' de'e xaxta'oga'aque'ena' par gwsa'aque' nasyon che'. ²⁹ Na' Diozən' bito cheyejene' che de'e ca' chnežjue' beṇə'chən', na' nic cheyejene' che beṇə' ca' mbeje' par zjənaque' nasyon che'ena'. ³⁰ Ca naquə le'e, antslə bito bzenagle che Diozən', pero na'a ža bachzenagle che' na' bacheyašə' cheži'ilaže'e le'e laogüe de'en cui bosozenag beṇə' Izrael ca' che'. ³¹ Diozən' cheyašə' cheži'ilaže'e le'e laogüe de'en cui choso'ozenag beṇə' Izrael ca'. Pero gwžin ža cats' leczə yeyašə' yeži'ilaže'e beṇə' Izrael ca' de'e yoblə. ³² Diozən' gwlejyichje' yoguə' beṇə'chən' par niçh cui bosozenague' che'. Bene' ca' par niçh leczə yeyašə' yeži'ilaže'e yoguə'əlolga'aque'.

³³ Leçhguale beṇə' sin' Diozən'. Nezene' yoguə'əlol. Bito gaquə ənezecho de'en nzi'e' bia' gaquə. Bito gaquə šejni'iyane'echo de'en chone'ena'. ³⁴ Nyoj Xtizə'ena' nan: "Bito gaquə ənezecho yoguə' xbab che Xancho Diozən'. Bito bi de de'e əgwse əgwlo'ichone' chio'o." ³⁵ Na' nan: "Bito gaquə goncho byen çixjw Xancho Diozən' šə biclə de'e babe'echone'." ³⁶ Diozən' bene' yoguə'əlol, bene' bia chsa'aš, bene' beṇə'ch, na' yeziquə'əchlə de'e zjəde. Diozən' chgüia chye' yoguə'əlol, chgüia chye' beṇə'chən' na' bia chsa'aš na' yoguə' cuantzə de'e zjəde. Len' bene' beṇə'ch na' yeziquə'əchlə de'e zjəde par niçh si'e yelə' bala'an. Ledoye'ela'oche' zejlicane. Can' gonšgaczcho.

12

Cheyalə' gon cuincho lažə' na' Diozən'

¹ Beṇə' bišə', bacheyašə' cheži'ilažə' Diozən' chio'o. De'e na'anə' chneyoida' le'e legon cuerp çhelen' lažə' na' Diozən' na'a mbanle. Le'e güe'en ca to regal. Cheyalə' gaccho beṇə' la'aždao' xi'ilažə' par niçh gon cuincho lažə' na' Diozən' çhedə' can' cho'olaže'e. Šə choncho ca', do yichj do lažə'əchon' cho'ela'ochone'. ² Bito goncho can' chso'on beṇə' ca' cui zjənombia' Diozən'. Cheyalə' güe'echo latjə par niçh Diozən' gwšə'e xbab chechon', par niçh ənezecho bi'in chene'ene'. Diozən' chene'ene' goncho de'en naquə de'e güen na' con yoguə' de'en cho'olaže'e.

³ Diozən' bano'e chia' naca' apostol na' de'e na'anə' zaquə'an ənia' naquən' cheyalə' goncho. Bito Cheyalə' gon cuincho xen, sino que syempr goncho xbab de que no'e che to tocho chonjilažə'əchone' bi xšine'ena' goncho na' bito gaquə goncho xšine'ena' žalə' le' cui chaclene' chio'o. ⁴ Zan part nsa' cuerp chechon'. Pero to to partən' caguə tozə žin de'e chso'onən. ⁵ Leczə can' naquən

len chio'o. Benə' zannə' naccho chonlilažə'əcho Cristən', pero yoguə'əcho ngoda'əcho txen len le' na' gwxaquə'əlebecho ca tozə cuerp.

⁶ Diozan' lao yelə' chaclen chen' len chio'o, no'e checho de que gwde gwdele de'e gaquə gon to tocho. Šə balcho chac chixjue'echo bi de'en bagwna Diozən' chio'o cheyalə' chixjue'echon segon can' banoe' Diozən' checho laogüe de'en chonlilažə'əchone'. ⁷ Šə Diozən' bano'e checho gaquəlencho benə', cheyalə' gaquəlenchoe do yichj do lažə'əcho. Na' šə Diozən' bano'e checho əgwsed əgwlo'iga'aquechone' binlo. ⁸ Šə Diozən' bano'e checho əneyoicho benə' yoblə par so'one' de'e güen, cheyalə' sotezə socho əneyoiga'aquechone'. Na' šə' bano'e checho bi de'e əgwnežjwcho benə' yoblə, cheyalə' gwnežjwchon do yichj do lažə'əcho. Šə bano'e checho gaccho benə' blao par əggüia əgwyelə' ljuəžj chio'o cho'ela'ochone', cheyalə' cue' yichjcho par əggüia əgwyega'acchone' can' chene'e Diozən'. Šə noe' Diozən' checho yeyašə' yeži'ilažə'əcho benə' yoblə, cheyalə' yebeicho na' yeyašə' yeži'ilažə'əchone'.

Can' cheyalə' gon notə'ətezcho chonlilažə'əcho Cristən'

⁹ Cheyalə' gaque che ljuəžjcho do yichj do lažə'əcho. Na' cheyalə' cue'yichjcho de'e malən' na' gue'ichon, par nič ca' zejlj goncho de'e güennə' ¹⁰ Can' cheyalə' gaquecho che bišə' goljcho, ca'aczən' cheyalə' gaque che ljuəžjcho. Cheyalə' gapəchcho respet benə' ljuəžjcho clezə ca cuincho.

¹¹ Bito gaccho benə' xagüed. Do yichj do lažə'əcho goncho bitə'ətezə de'en goncho, con yoguə' de'en chene'e Xancho Diozən' goncho.

¹² Na' cheyalə' yebeicho cheda' nezecho soch Diozən' gone' güen len chio'o. Leczə cheyalə' co'o gwchejləžə'əcho cata' chyi' chzaquə'əcho. Na' leczə cheyalə' gontezə goncho orasyon do tyempte.

¹³ Cheyalə' gaquəlencho šə bi de'e chesə'əyažje benə' ljuəžjcho benə' ca' bagwlej Diozən' par zjanaque' lažə' ne'enə'. Na' cheyalə' yeyaše'echo benə' zitə'.

¹⁴ Cheyalə' nabcho gaquə de'e šao' de'e güen che benə' choso'ochi' choso'osaquə' chio'o. Cheyalə' nabcho gaquə de'e güen chega'aque', caguə de'e mal.

¹⁵ Cheyalə' yebeicho txen len benə' chəsyə'əbei. Cheyalə' cuežcho len benə' chəsə'əbež.

¹⁶ Yoguə'əcho cheyalə' goncho tozə xbab checho. Bito ga'aləžə'əcho. Cheyalə' yolgüižcho benə' yašə' benə' cui bi chac, na' bito gon cuincho benə' sin'.

¹⁷ Šə bi de'e mal chon benə' len chio'o, bito ənacho leczə de'e mal yoži'ichon len le'. Cheyalə' cue' yichjcho par nič goncho de'e güen, par nič yesə'əna yeziquə'əchlə benə' de que le naquəczə güen de'en chonchona'. ¹⁸ Cheyalə' goncho xte ga zelao saquə'əcho par nič ca' socho binlo len yoguə'əloj benə'.

¹⁹ Benə' bišə' dao', cheyalə' əgwzej əgwdecho ca'alə bitə'əzə de'en chso'one benə' chio'o. Gwyeczə Diozən' nac gone' len benə' ca' chchi' chsaquə' chio'o. Xtize'enə' nyojən nan: "Quinga na Xancho Diozən': Nadan' co'olažə'ane' na' nadan' gona'ane' castigw." ²⁰ Na' leczə nan: "Šə benə' contr chechonə' chbil chdone', cheyalə' güe'echone' de'e ye'ej de'e gaogüe'. Šə goncho güen len le' de reponet lechuale yeyejene' che de'e malən' chone' len chio'o." ²¹ Cata' chso'on benə' de'e malən' len chio'o, bito güe'echo latjə nabia' de'e malən' chio'o par yoži'icho de'e mal len lega'aque'. Yoži'icho de'e güennə' len lega'aque' par nič yesyə'əyejene' che de'e malən' chso'one'.

13

¹ To tocho cheyałə' əgwzenagcho che jostis ca' beŋə' ca' chəsə'ənabia', chedə' Dioz nan' nite'e yogua' əlɔlgə'aque' par niç chəsə'ənabi'e. ² Šə bito chzenagcho che jostis ca', choncho contr de'en nŋia Diozən' bia' goncho. Na' šə bito chzenagcho chega'aque', chyiljə xtolə'əchon' par gaccho castigw. ³ Ca naquə jostis ca' beŋə' ca' chəsə'ənabia', bito cheyałə' žebga'acchone' šə choncho de'e güen, pero beŋə' ca' chso'on de'e mal, lega'aquen' cheyałə' yesə'əžebe' jostis ca'. Šə chene'echo socho sin cui žebcho jostis ca', cheyałə' goncho de'e güen par niç ca' yesə'əna jostis ca' de que de'e güenŋə' choncho. ⁴ Jostis ca' chso'one' xšin Diozən' par niç socho güen. Pero šə choncho de'e mal, cheyałə' žebga'acchone'. Caguə con zjəndolə'əlizene' yelə' chnabia' na'anə', par so'one' castigon' zjəndolə'ene'en, chedə' Diozən' banežjue'en ca xšin beŋə' jostis ca' chso'one' castigw beŋə' ca' chso'on de'e malən'. ⁵ De'e nan' cheyałə' əgwzenagcho che jostis ca' par niç cui si'icho castigw, na' leczə par niç gacbe'icho lo'o yichjla'ažda'ochon' de que de'e güenŋə' choncho. ⁶ Na' leczə de'e na'anə' cheyałə' chixjwcho no che bien na' goncho no žinlao'. Con yogua' de'e yoso'ochixjue' chio'o na' šə bi de'e yoso'ogone' chio'o, cheyałə' gwzenagcho chega'aque' chedə' Dioz nan' chone' mendad goncho ca'.

⁷ Chixjwcho šə bi chalə'əcho che beŋə'. Šə chalə'əcho gwzon che beŋə', yogo'ochon. Šə chalə'əcho che bien, chixjwchon. Šə chalə'əcho che impuest, chixjwchon. Na' gapcho respet beŋə' cheyałə' ədap respet. Na' güe'ela'ochə beŋə' cheyałə' əye'elao'. ⁸ Ni to cui no galə'əcho chei sin cui chixjwchon. Na' de'en naquə de'e žialao goncho, gaquecho che sa'aljuežjcho tocho yetocho. Na' šə bachaque che sa'aljuežjchon', bachonczcho can' non lei che Diozən' mendad goncho. ⁹ Lein' nan: "Bito co'o xtole na' bito cuejyichjle be'en chele o no'ol chele par solenle beŋə' yoblə, bito gotle beŋə', bito cuanle, bito gacle testigw fałs, bito selažə'ale bitə'ətezə de'e de che beŋə'." Na' dech de'en na lein', pero na' šə choncho can' nyojən nan: "Legaque che sa'aljuežjle catg chaque che cuinle", leczə chonczcho complir yogua' de'e ca' yelə' de'en nanna'. ¹⁰ Bazoczcho choncho cuaselol can' na lein' šə chaquecho che yeziquə'əchlə beŋə'. Chedə' šə chaquecho chega'aque' bitobi de'e mal goncho contr lega'aque'.

¹¹ Catə'ən gwzolaə benjilažə'əcho Cristən' gwŋezecho gwžin ža yide' de'e yoblə. Na' na'a bazon baözə əžin ža əžin orən' yide'. De'e na'anə' bitoch cheyałə' gaccho ca beŋə' chtas, beŋə' cui bi xbab chon. ¹² Na' ca naquən' bazon əžin ža par yide'ena', cheyałə' cuejyichjcho cuich goncho de'e malən' de'en bencho catə'ən ne'e nchol lo'o yichjla'ažda'ochon'. Na' na'a bagwyo'o be'eni' che Diozən' lo'o yichjla'ažda'ochon' cheyałə' goncho de'e güen. ¹³ Le'e do gonch can' cheyałə' goncho na'a bayo'o be'eni' che'ena' lo'o yichjla'ažda'ochon'. Bito cheyałə' lencho lni gan' chac scandl, na' bito cheyałə' gaccho beŋə' güe'e zo, na' beŋə' zargat, na' beŋə' ggo'o xtoi. Na' leczə bito cheyałə' tilələn ljuežjcho, na' bito gue'icho beŋə'. ¹⁴ Cheyałə' gon cuincho lažə' na' Xancho Jesocristən' par niç gaquə yichjla'ažda'ochon' can' naquə yichjla'ažda'ogüe'ena', na' bito goncho can' chene'e la'žda'omalchon' goncho.

14

Bito cheyałə' ənacho che ljuežjcho de que de'e malən' chso'one'

¹ Šə to beŋə' bachonlilažə'e Cristən' nechacžejlažə'e na' bito ne'e šejni'ine' naquən cheyałə' gone', legwlene' par gaque' txen len le'e. Pero can' naquə

xbab che'enə', bito cheyalə' gaquəyožlene'. ² Zo beṇə' chone' xbab de que bito nape' dolə' šə gaogüe' bitə'ətezə yelə' guao. Pero zo beṇə' bito ne'e šejni'ine' šə guaqua gaogüe' bitə'ətezə yelə' guao sin cui gape' dolə', na' de'e na'ana' šə chaogüe' porzə yixə' cuan. ³ Ben' chao bitə'ətezə yelə' guao bito cheyalə' gue'ine' ben' cui chao bitə'ətezə yelə' guao. Na' ben' cui chao bitə'ətezə yelə' guao bito cheyalə' əne' che ben' che'ej chao bitə'ətezə de que malən' chone' che'ej chaoteze'. Nezecho de que Dioz nan' banone' chopte' ca xi'ine'. ⁴ ¿Noxa naqua chio'o na'ana' par əgwlažə' checho šə nac chon ben' bagwcuə' Diozən' ca xi'ine'? Dioz nan' naque' Xan xi'ine' ca' na' le'enə' nezene' che to tocho šə choncho güen o šə choncho mal. Na' Xancho Cristən' gone' ca šejczcho goncho de'e güen chedə' nape' yelə' guac par gone' ca'.

⁵ Nitə' beṇə' chso'one' xbab de que nchoj to ža xen na' de'e žialao lao yoguə' ža ca' yelə'. Pero na' lecza nitə' beṇə' chso'one' xbab de que tozəczə can' zjənaqua yoguə'əte ža ca'. To tocho cheyalə' socho do yichj do lažə'əcho gonlilažə'əcho de que choncho can' cheyalə' gonchonə'. ⁶ Beṇə' ca' chso'on xbab de que de ža de'e žialaoch cle ca ža ca' yelə' chso'one' xbabən' ca' par chso'elaogüe'e Xancho Cristən'. Na' beṇə' ca' chso'on xbab de que tozəczə can' zjənaqua yoguə'əte ža ca', lecza de'en chso'elaogüe'e Xancho Crist nan' chso'one' xbabən' ca'. Na' ben' chao bitə'ətezə yelə' guao, chaogüe'en par cho'elaogüe'e Xancho Cristən', chedə' lecza yelə' choxcwlen che Dioz nan' cho'e. Na' ben' cui chao bitə'ətezə yelə' guao lecza par cho'elaogüe'e Xancho Crist na'ana' cui chaogüe'en chedə' lecza chnežjue' yelə' choxcwlen che Diozən'.

⁷ Ni to chio'o cui zocho par nich goncho con de'e bia'azəlažə'əcho. Na' ni to chio'o cui gatcho šə tant chene'echo gatcho. ⁸ Lao zocho mbancho, zocho par goncho can' chene'e Xancho Cristən'. Na' gatcho catə'an əne' gatcho. Can' naquən gatcho o mbancho, naquəczcho lao na' Xancho na'ana'. ⁹ Par nan' got Cristən' na' beyas bebane' de'e yoblə' ladjo beṇə' guat ca' par nich ca' naque' Xan beṇə' zjəmban na' Xan beṇə' bagwsa'at.

¹⁰ Pero bito cheyalə' ənacho de que beṇə' bišə'əcho ca' zjənape' dolə' šə por ni che de'en cui chso'one' can' choncho na'azən'. Na' lecza bito cheyalə' gue'icho beṇə' bišə'əcho ca'. Yoguə'əcho techo lao Cristən' par əchogbi'en checho šə de xtolə'əcho o šə cui bi de. ¹¹ Nyojczə gan' na Xancho Diozən' ne': De'e li nada' naca' Dioz zoa' mbana', na' de'e na'ana' yoguə' beṇə' desə'əzo xibe' laogua'ana' na' yogue'e əso'elaogüe'e nada'.

¹² Can' naquən, yoguə'əchon' əgwdecho cuent lao Diozən' šə biquə' de'e babencho lao bguancho.

Bito goncho ca yesə'əxopə beṇə' yoblə' so'one' de'e mal

¹³ Na' bito cheyalə' ənacho che ni to beṇə' bišə'əcho ca' de que zjənape' dolə' šə por ni cheza cui chso'one' can' choncho na'ana' ənacho chega'aque' ca'. Pero chio'o cheyalə' cuejyichjcho cuich goncho bichlə' de'en choncho šə chonən par nich beṇə' bišə'əcho ca' chsa'acžəjlažə'e o chesə'əxopə' chso'one' de'e malən'. ¹⁴ Bitobi yelə' guao de de'e chonən manch yichjla'ažda'ochon', nada' nezdə' chedə' ngoda'a txen len Xancho Jeso'osən'. Pero šə to beṇə' chone' xbab de que de yelə' guao de'e chonən manch yichjla'ažda'ochon', par len' naquən mal šə gaogüe'en. ¹⁵ Šə por ni che bi yelə' guao de'en chaochonə' chaque beṇə' bišə'əchonə' tolə, bitoch cheyalə' gaochon, chedə' por ni che beṇə' bišə'əcho na'ana' Cristən' bnežjw cuine' gwso'ot beṇə' le'. De'e na'ana' cheyalə' gaquecho che' na' bito goncho ca cuejyichje' cuich gonlilažə'e Cristən' na' cuiayi'e. ¹⁶ Šə choncho to de'e chaquecho naquən güen par chio'o pero par

benə' bišə'ačo ca' naquən mal, bito gonchon par nič cui yesə'əne' choncho de'e mal. ¹⁷ Šə bazocho chnabia' Diozən' chio'o, de'en che'ej chaochon' bito naquən de'e žialao xen. De'e naquə de'e žialao xen šejcho liča, socho binlo len benə' yoblə na' gon Spirit che Diozən' ca socho mbalaz. ¹⁸ Ben' zda liča, na' zoe' mbalaz, na' zoe' binlo len benə' yeziquə'ačhlə, bena'anə' cho'elao' Cristan', na' Diozən' chebeine' le', na' yeziquə'ačhlə benə' leczə chəsə'əne' de'e güennə' chone'.

¹⁹ De'e na'anə' cheyalə' goncho ca socho binlo tocho yetocho, na' leczə ca' gaquəlen ljuəžjcho par nič ca' gonlilažə'ačcho Diozən'. ²⁰ Diozən' babebeje' ljuəžj chio'o chonlilažə'ačhone' xni'a de'e malən' par nič so'one' de'e güen. Na' bito cheyalə' goncho par nič so'one' de'e malən'. De'e na'anə' šə por ni che de'en chaocho to de'en chaocho na'azən' gonən par nič benə' bišə'ačhon' gone' de'e malən', bitoch cheyalə' gaochon. Bito bi yelə' guao de de'e chonən manch yičjla'ažda'ochon'. Pero malən' choncho šə chaocho de'en chon par nič benə' bišə'ačhonə' gone' de'e malən'. ²¹ Nca'alə xnezen' cuich gaoch belə'anə' na' niquəch ye'ejcho binon', na' nic goncho bičhlə de'en choncho šə chonən par nič benə' bišə'ačhonə' gaquəžejlaže'e o əxope' gone' de'e mal o cui gwzenague' che Diozən'. ²² Šə choncho xbab de que bito naquan dolə' ca de'en choncho bitə'ətezə de'en choncho, chopzcho lencho Dioz nan' ŋezecho. Bito ye'echo benə' yoblə so'one' can' čhaque chio'o güen goncho. Šə bito chacžejlaže'ačo che bitə'ətezə de'en choncho de que naquan güen, nachən' zocho mbalaz. ²³ De xtolə' ben' chao to yelə' guao šə chacžejlaže'e chaquene' de que bitolja cheyalə' gaogüe'ennə', čhedə' bito chonlilaže'e de que de'e güennə' chone' chaogüe'en. De xtolə'ačo šə choncho bitə'ətezə de'en chaquecho bito cheyalə' goncho. Napcho dolə' čhedə' cabi chonlilažə'ačo de que de'e güennə' choncho par chio'o.

15

Bito goncho porzə de'en əna chio'o

¹ Chio'o bachejni'išaogüe'echo na' banəzecho naquən' cheyalə' goncho. De'e na'anə' cheyalə' gapcho yelə' chxenlažə' len benə' ca' chse'ejni' latə'əlasə. Bito cheyalə' goncho con porzə de'en əna chio'o. ² Cheyalə' goncho de'e güen de'e chsa'azlažə' sa'aljuəžjcho, par nič ca' so'onlilažə'ače' Diozən'. ³ Goncho ca' čhedə' ni Cristən' bito bene' con de'e gwyazlažə'əzə le'. Na' nyojczən de que Cristən' gože' Diozən': "Benə' contr chio' ca' tant chəsə'əže'e le', na' lena' boso'ožia boso'oŋite'e." ⁴ Na' Xtizə' Diozən' de'en boso'ozoj benə' cana' nyojən chzejni'in chio'o, par nič zotezcho chgo'o chčejljažə'ačo catə' de de'en chsaquə'əzi'icho. Na' Xtizə' Diozən' de'en nyojən leczə chtipəchən lažə'ačo. ⁵ Diozən' chone' par zotezcho chgo'o chčejljažə'ačo bitə'ətezə de'en chac čhecho na' chtipe' lažə'ačo. Na' na'a chnaba' gone' par nič tozə ca gaquə yičjla'ažda'olen', čhedə' can' chene'e Cristo Jeso'osən'. ⁶ Čhnaba' gone' ca' par nič tozə ca nale güe'ela'ole Diozən', Xa Xancho Jesocristən'.

Cristən' bene' par nič benə' ca' cui zjənaquə benə' Izrael gaquə əso'elaogüe'e Diozən'

⁷ Ca' ža, le'e so güen tole yetole can' ben Cristən' gwcue'e to tocho ca xi'ine'. Legon ca' par nič Diozən' si'e yelə' bala'an. ⁸ Echnia' le'e de que Cristo Jeso'osən' bide' par goclene' zgua'atec benə' Izrael ca'. Bedəyene' complir ca lybe de'en ben Diozən' len xaxtao' chio'o benə' Izrael, par nič blo'e de que

Diozən' cho'e dižə' li. ⁹ Na' leczə bidə Cristən' par niç beṇə' ca' cui zjənaquə beṇə' Izrael gvaquə əso'elaogü'e Diozən' de'en cheyašə' cheži'ilažə' Diozən' lega'aque'. Chac can' nyoj Xtizə' Diozən' nan:

De'e nan' ža gü'e'elaogua'a le',

gola' gan' ža' beṇə' ca' cui zjənaquə beṇə' Izrael par gü'e'elaogua'a le'.

¹⁰ Na' yeto gan' nan:

Le'e cui nacle beṇə' Izrael, leyebei txen len beṇə' Izrael ca', beṇə' ca' gwlej

Diozən' par zjənaquə' ṇasyon che'.

¹¹ Na' leczə nan:

Yoguə' le'e cui nacle beṇə' Izrael, legü'e'elao' Xancho Diozən'.

Yoguə'əle cheyalə' gü'e'ela'olene'.

¹² Na' leczə de'en bzoj de'e profet Isaiazən' nan:

To beṇə' yidə ben' za' lao dia che de'e Isain'.

Le' ṇabi'e yogua'əlol beṇə'.

Na' balə beṇə' ca' cui zjənaquə beṇə' Izrael yesə'əbeze' gaquəlen be'enə' za'anə' lega'aque'.

¹³ Diozən' chone' par niç nezecho zotezə zoe' chaclene' chio'o. Na' gonšgue' par niç sole mbalaz juisy na' so cuezle binlo juisy len xbab de'en yo'o lo'o yichjla'ažda'olen' laogü'e de'en chonlilažə'əle Cristən'. Na' šə bazole mbalaz juisy na' bachzo chbezele binlo juisy len xbab de'en yo'o lo'o yichjla'ažda'olen', nachən' Spirit che Diozən' gonən par sotezə sole yebeile de'en gaquəlench Diozən' le'e.

¹⁴ Beṇə' bišə', nezdə de que Diozən' babene' par niç nacle beṇə' güenchgua na' chejni'ichgü'eile. Nezdə chac choe' ljuežjle consejw tole yetole. ¹⁵ Pero de'en gwlej Diozən' nada' par gona' xšine'enə' cheyaxjda' chzoja' le'e clar che de'e ca' bañezzele par niç yosa'alažə'əga'aclen. ¹⁶ Gwleje' nada' par niç chona' xšin Jesocratan' ladjo beṇə' ca' cui zjənaquə beṇə' Izrael. Na' cho'elenga'aca'ane' dižə' güen dižə' cobə che Diozən' par niç Diozən' yebeine' lega'aque' catə' so'onlilažə'ene'. Na' Spirit che'enə' gonən par niç əsa'aque' beṇə' la'aždao' xi'ilažə' par niç Diozən' šo'olažə'e' lega'aque'.

¹⁷ De'en ngoda'a txen len Cristo Jeso'osan' chebeida' cho'a dižə' che xšin Diozən' de'en chona'. ¹⁸ Bito cheyaxjda' gua'a dižə' che bi de'e baben beṇə' yoblə, sino cho'a dižə' che de'en baben Cristən' ca' naquən' goclene' nada' chona' xšine'enə'. Le' bene' par niç bia'a dižə' len beṇə' ca' cui zjənaquə beṇə' Izrael, na' goclene' nada' bena' ca' par niç balə' bachoso'ozenague' che'. ¹⁹ Spirit che Diozən' goclenən nada' len yelə' guac cheinə' par niç bena' miłagr na' bichlə de'e zaquə' yesyə'əbane beṇə'. Goclenən nada' par niç babi'a dižə' güen dižə' cobə de'e chezejni'in che Cristən' doxen, gwzoloaža' Jerosalennə' bi'an, nach bežintia' gan' nzi' Ilirico. ²⁰ Babena' byen bajj'a dižə' güen dižə' cobə de'en chezejni'in che Cristən' gan' ža' beṇə' cuiṇə' se'ene'len. Bito gwya'a ga bajse'eczə beṇə' yoblə xtižə' Cristən'. ²¹ Can' nyojczə Xtizə' Diozən' nan:

Ca' naquə beṇə' ca' cui nonə' chixjue'i' lega'aque' xtižə' Diozən', lega'aque' yesə'ənezene'en.

Na' beṇə' ca' cuiṇə' se'enen, se'ejni'ine'en.

Pabən' bene' xbab šje' Roman'

²² Ca' chaquən' ža, zan las catə'ən go'onda' yida' gan' nitə'alen' bito goquə yida'. ²³ Cana'aten' zelažə'a yida', pero xte na'ach babeyož bena' de'en nžia' Diozən' bia' gona' latjə nga. ²⁴ Na' catə' ša'a Españan' cana' che'enda' tia' əgwlaṇa'a le'e. Mbalaz soa' yeyož əgwlaṇa'a le'e, nach gaquəlenle

nada' par ša'a Españan'. ²⁵ Pero na'a yeya'a Jerosalennə' žjəyesana' de'e chəsə'əyažje beṇə' ca' nitə'anə', beṇə' ca' bagwlej Diozən' par zjənaque' lažə' ne'enə'. ²⁶ Beṇə' Masedonia ca' na' beṇə' Acaya ca' gwsa'azlaže'e boso'otobe' mechən' par beṇə' yašə' prob ca' ža' entr beṇə' ca' bagwlej Diozən' par zjənaque' lažə' ne'enə' beṇə' nitə' Jerosalennə'. ²⁷ Na' de'en gwsa'azlaže'e boso'otobe' mechən' naquən to goclen de'e cheyalə' yesyə'əyontocze' len beṇə' Izrael ca'anə'. Caguə beṇə' Izrael lega'aque', pero bazjəlene' beṇə' Izrael ca' chəsə'əzi'e de'en chaclen yichjla'ažda'oga'aque'enə', na' de'e na'anə' cheyalə' sa'aclene' beṇə' Izrael ca' len de'en chəsə'əyažj chəsə'əchinene'. ²⁸ Catə' yeya'a Jerosalennə' žjəyenežjoga'aca'ane' mechən' de'en bđobən', cana' tia' əgwlanə'a le'e catə'an ša'a Españanə'. ²⁹ Nada' nezdə' catə' la'a gan' nitə'əlen' na' güe'elencha' le'e dižə' güen dižə' cobə che Cristən', lechgwale mban' gon Diozən' len chio'o.

³⁰ Chaquecho che Xancho Jesocristən' na' Spirit che Diozən' chonən par nič gaque che ljuežjcho tocho yetocho. De'e na'anə' ža beṇə' bišə', chnaba' goclen len le'e gacle nda' txeṇ goncho orasyon lao Diozən' xte ga zelao saque'echo par nič gaquəlene' nda'. ³¹ Nəbechone' gone' ca cui gaca' lao na' beṇə' Jodea ca', beṇə' ca' cui chso'onlilažə' Cristən', na' leczə nəbcho par nič beṇə' Jerosalen ca' beṇə' ca' bagwlej Diozən' par zjənaque' lažə' ne'enə' so'olaže'e de'en güe'ega'aca'ane'enə'. ³² Can' goncho orasyonə', na' šə Diozən' güe'e latjə, nada' yebeida' yida' delaṇa'a le'e, na' gona' dezcanz gan' nitə'əlenə'. ³³ Diozən' ben' chon par chzo chbezcho binljo len xbab de'en yo'o lo'o yichjla'ažda'ochon', gaquəlene' yoguə'əle. Ca'ašgacən' gaquə.

16

Pabən' chguape' diox beṇə' ca' nombi'e

¹ Chneyoida' le'e legon txeṇ len beṇə' zanchə Febe catə'an le'e gan' zolenə'. Lene' nchoje' naque' comisyon che beṇə' ca' chəsə'ədopə chəsə'əžag chso'elaogüe'e Jesocristən' lao yež Sencrean'. ² Legon txeṇ len le', chedə' can' cheyalə' gon chio'o naccho lažə' na' Diozən'. Can' chonlilažə'əcho Xancho Jesocristən' leczə can' chonlilažə' Feben' le'. Legaclene' šə bi de'e chyažj chchinene', chedə' beṇə' zan bagoclene', na' leczə ca' bagoclene' nada'.

³ Legguap Prisilan' na' be'en che' Aquilan' diox. Lega'aque' bagwso'one' žin che Cristo Jeso'osən' txeṇ len nada'. ⁴ Boso'osanlažə' cuinga'aque' sa'ate' par gwsa'aclene' nada' nič cui gwso'ot beṇə' nada'. Chselə'a yelə' choxcwlen chega'aque' can' gwso'one', na' leczə ca' yoguə' beṇə' cui zjənaquə beṇə' Izrael beṇə' ca' chəsə'ədopə chəsə'əžag chso'elaogüe'e Diozən' ga yoblə leczə choso'osele'e yelə' choxcwlen chega'aque'. ⁵ Legguap diox beṇə' ca' chəsə'ədopə chəsə'əžag liž Prisilan' na' Aquilan' chso'elaogüe'e Diozən'. Leczə legguap diox Epeneton' be'enə' chacda' chei. Le' naque' beṇə' nech beṇlilaže'e Cristən' entr beṇə' Acaya ca'. ⁶ Legguap diox Marian', la' babenchgüe' žin par le'e. ⁷ Legguap diox beṇə' gwlaž chia' Andronico na' Jonias. Txeṇ gotə'oto' ližya len lega'aque'. Na' lega'aque' zjənaque' beṇə' blao entr neto' apostol, na' lega'aque' byob gwso'onlilaže'e Cristən' ca nada'.

⁸ Legguap diox Ampliasən'. Chonlilaže'e Xancho Cristən', na' chacda' che'. ⁹ Legguap diox Urbano ben' chon txeṇ len chio'o choncho xšin Cristo Jeso'osən', na' leczə ca' Estaquis be'enə' chacda' chei. ¹⁰ Legguap diox Apeles ben' bablo'echgua de que chonlilaže'e Cristən'. Leczə legguap diox beṇə' ca' nitə' liž Aristobolo. ¹¹ Legguap diox beṇə' gwlaž chia' Erodion, na' beṇə' nitə'

liž Narsison' beṇə' chso'onlilažə' Xancho Cristən'. ¹² Legguap diox Trifena na' Trifosa beṇə' güen žin che Xancho'. Na' leczə ca' legguap diox Persida be'enə' chacadə' chei. Babenchgüe' xšin Xancho'. ¹³ Legguap diox Rofo. Le' naque' beṇə' blao entr chio'o chonlilažə'əcho Xancho'. Na' leczə legguap diox xne'ena' be'enə' leczə naquə ca xna'a. ¹⁴ Legguap diox Asincrito, Flegonte, Ermas, Patrobas, Ermes na' len beṇə' bišə'əcho ca' nitə' len lega'aque'. ¹⁵ Legguap diox Filologo na' Jolia na' Nereo na' beṇə' zane', na' Olimpás, na' yogua' beṇə' yeziquə'əchlə nitə' len lega'aque' beṇə' ca' bagwlej Diozən' par zjənaque' lažə' ne'ena'.

¹⁶ Na' catə' chežagle leyolguiz ljuəžjle dižə' šao' par nič gacbia' de que chaque che ljuəžjle. Na' beṇə' ca' nitə' nga na' len beṇə' ca' nitə' ga yoblə chəsə'ədoṗə chəsə'əžag chso'elaogüe'e Cristən', yogua'əga'aque' choso'oguape' le'e diox.

¹⁷ Chṇeyoida' le'e beṇə' bišə' par gaple cuidad len beṇə' ca' zjənaquə beṇə' gotil na' chso'one' par nič beṇə' yeziquə'əchlə chso'one' de'e mal. Beṇə' ca' chso'on ca' chso'one' contr de'en babsedcho che Diozən'. Na' bito gonle txen len lega'aque'. ¹⁸ Beṇə' ca' chso'on ca' bito choso'ozenague' che Xancho Jesocristən', con chso'one' de'e bia'azəlažə'əga'aque'. Xochechgua chso'e dižə' choso'opeine' beṇə' ca' chse'ejle'edazə, na' choso'oxoayague' lega'aque'. ¹⁹ Yoguə' beṇə' zjənezene' de que le'e chzenagle che Diozən', na' de'e na'anə' chebeida'. Na' che'enda' sole cue' yichjle par gonle de'e güen caguə par gonle de'e mal. ²⁰ Na' Diozən' ben' chon par chzo chbezcho binlo leczə le' gone' par nič lguəgwə əgwlej əgwšošjle xtižə' gwxiye'ena'. Na' Xancho Jesocristən' sotezə soe' gaquələnšgacze' le'e.

²¹ Temtio' ben' chonlen nada' žin chguape' le'e diox. Na' leczə ca' bišə' ljuəžja' quinga choso'oguape' le'e diox, Losion', Jasonṇə' na' Sosipaterən'.

²² Nada' Tersio chzoja' cart nga con can' na Pabən', leczə əchguapa' le'e diox, ca naquə le'e chonlilažə'əle Xancho' can' chonlilažə'ane' nada'.

²³ Chguap Gayon' le'e diox. Nada' Pab zoa' liže'ena'. Na' leczə liže' na' chəsə'əžag beṇə' ca' chso'elao' Cristən'. Erasto ben' naquə tesorer che syodan' chguape' le'e diox, na' beṇə' bišə'əcho Cuarto.

²⁴ Chṇaba' gaquələn Xancho Jesocristən' yogua'əlolle. Na' ca'ašgacən' gaquə.

Cho'elaogüe'e Diozən'

²⁵⁻²⁷ Ledoye'ela'och Diozən' zejlicane, Dioz ben' naquə le'ezelaogüe beṇə' sin'. Len' nape' yelə' guac par chaclene' chio'o nič sotezə socho gonlilažə'əchone' na' chaclencze' can' na de'en əchyixjui'a che Jesocristən'. De'en əchyixjui'a na'anə' naquən to dižə' güen dižə' cobə de'en cui no gwneze dezd ža gwlasda'ote, pero na'a Diozən' bablo'ine'en chio'o. Diozən' babene' ca baņezechon, babzejni'ine' chio'o bi zejen de'en boso'ozoj de'e profet ca'. Dioz ben' zo zejlicane bene' mendad par nič yogua' chio'o beṇəch əņezecho dižə' güen dižə' cobə che Jesocristən' par əgwzenagcho che' na' gonlilažə'əcho Jesocristən'. Na' Jesocrist na'anə' gaquələne' chio'o par güe'ela'och Diozən' zejlicane. Na' ca'ašgacən' gaquə. *Pab*

Cart Nech De'en Bzoj San Pabən' Par Beṇə' Corinto Ca'

Pabən' chzoje' beṇə' ca' chso'elao' Cristən' Corinton'

1-2 Nada' Pab chzoja' le'e cart nga. Nezczele de que Diozən' gwleje' nada' par naca' apostol che Jesocristən', chedə' can' gwnalaže'e. Chzoja' cart nga par le'e bagwlej Diozən' niçh chdopə chžagle cho'ela'ole Jesocristən' lao' syoda Corinton'. Nada' len beṇə' bišə'əcho Sostenesən' chguapto' le'e diox. Diozən' bagwleje' le'e can' gwleje' neto' par naccho lao ne'ənə' laogüe de'en ngodə'əcho txen len Cristo Jeso'osən'. Chzoja' cart nga par yoguə'əlo beṇə' gatə'ətezə nite'e, beṇə' chso'on orasyon chso'olğüže' Xancho Jesocristən'. Naque' Xanga'aque' na' leczə naque' Xancho. 3 Chṇaba' lao Xacho Diozən' na' lao Xancho Jesocristən' əsa'aclenšgue' le'e na' so'one' par so cuezle binlo len xbab de'en yo'o lo'o yichjla'ažda'olen'.

Cristən' chone' par niçh zocho mbalaz

4 Syempr cho'a yelə' choxcwlen che Diozən' can' chone' par niçh Cristo Jeso'osən' chaclene' le'e. 5 De'en chonlilažə'əlene' chaclenchgüe' le'e par niçh chejni'ile yoguə' de'e ca' babzejni'i Diozən' le'e na' cho'ele dižə' chei. 6 Na' bachonle ca nachbia' de que xtižə' Cristən' de'en chejle'ele naquən de'e li. 7 Chaclen Diozən' le'e len xbab de'en yo'o lo'o yichjla'ažda'olen' par gonlilažə'əchlene' na' par niçh gonchle can' chazlaže'ənə' žlac chbezcho yida Xancho Jesocristən' yetlas. 8 Diozən' gaquəlene' le'e soczle gonle can' chazlaže'ənə' par niçh catə'an yida Xancho Jesocristən' yetlas notono gaquə əne' de que napple dolə'. 9 Diozən' zotezə zoe' chone' complir can' ne'ənə'. Le'ənə' bagwleje' le'e par niçh naquə yichjla'ažda'olen' tozə len yichjla'aždao' Xi'ine' Jesocristən' ben' naquə Xancho'.

Beṇə' ca' chso'elao' Cristən' Corinton' bito zjənaque' tozə

10 Beṇə' bišə', laogüe de'en chonlilažə'əcho Xancho Jesocristən' chṇeyoida' le'e gonle txen len lježjle na' bito tiłə gwšašle. Tozə xbab gonle na' tozə can' əgwžiale bia'. 11 Beṇə' bišə', beṇə' ca' nitə' liž Cloe baboso'ozenene' nada' de que chdilə chšašle. 12 Enia' chdilə chšašle, chedə' balle nale: "Naogua' de'en chsed chlo'i Pab." Na' yeballe nale: "Naogua' de'en chsed chlo'i Apolos." Na' yeballe nale: "Naogua' de'en chsed chlo'i Bed." Na' yeballe nale: "Naogua' de'en bsed blo'i Cristən'." 13 ¿Echaquele bselə' Diozən' Cristən' par yebeje' to chopzle xni'a de'e malən'? ¿Ena' chaquele nada' Pabən' gwso'ote' le'e yag corozən' par gwdixjua' xtolə'əle ca'? Na'alje žəpor la nada'anə' gwchoale nisən'? Bito. 14 Crispo na' Gayo na'azən' bcho'a nis. Na' choxcwlen Diozən' notoch no zo entr le'e beṇə' yesə'əne' de que leczə nada' bcho'aga'aca'ane' nis. 15 Bito che'enda' no əna de que por la' na'anə' gwchoe' nisən'. 16 Na' leczə nada' bchoa' beṇə' ca' nitə' liž Estefanasən' nis. Na' bitoch chjsa'alažə'a šə noch zo beṇə' bcho'a nis. 17 Nezdə' Cristən' bito bsele'e nada' par gwcho'a beṇə' nis. Bsele'e nada' par chyixjui'a dižə' güen dižə' cobə che'ənə'. Na' catə' chyixjui'an bito cho'a dižə' zdebə de'e cui se'ejni'i beṇə'. Bito che'enda' no gaque de que nada' naca' beṇə' sin', chedə' šə so'one' xbab che yelə' sin' chia'anə' bito əsa'aquene' de que de'e zaque'ənə' ca de'en bnežjw cuin Cristən' gwso'ot beṇə' le' le'e yag corozən'.

Cristan' bedalo'e yelə' chnabia' na' yelə' sin' che Diozən'

18 Beṇə' ca' cui choso'ozenag che Diozən' yesə'əbiayi'e zejlicane. Lega'aque' bito chse'enene' no güe'elen lega'aque' dižə' can' gwso'ot beṇə' Cristan' le'e yag corozan'. Pero Cristan' babene' par niçh chio'o cui yeyejcho lao yi' gabilan'. Na' nezecho de que zaquə'əchgua dižə' de'en cho'echo de que gwso'ote'ene' le'e yag corozən', chedə' dižə' nan' chzejni'in beṇə' de que Diozən' nape' yelə' guac par chocobe' yichjla'aždao' notə'ətezcho chonlilažə'əchone'. 19 Chac can' na Xtižə' Diozən' de'en nyojan': Nada' gona' par niçh nacbia' de que beṇə' sin' ca' caguə de'e li zjənsine'enə', na' gona' par niçh beṇə' ca' chse'ejni'i de'e zan lao yežlyo nga bito bi bi de gon ca de'en chse'ejni'ine'enə'.

20 Nitə' beṇə' bazjənsed yelə' sin' che beṇəçhən', na' nitə' beṇə' choso'osed choso'olo'i lei che Diozən', na' nitə' beṇə' chso'e dižə' che de'en chac lao yežlyo nga. Beṇə' ca' chsa'aquene' chso'one' xbab sin', pero lao Diozən' bito bi bi zaquə' xbab chega'aque'enə'. 21 Diozən' naque' beṇə' sin' na' le'enə' bene' par niçh yelə' sin' che beṇəçhən' bito chaclenən beṇə' par so'ombi'ene'. Pero na' con beṇə' se'ejle' xtižə'enə' de'en chyixjue'eto', Diozən' chazlaže'e yebeje' lega'aque' xni'a de'e malən', la'anə'əczə beṇə' ca' cui zjənombia' Diozən' chsa'aquene' de que bito bi bi zaquə' dižə' de'en chyixjue'eto'.

22 Ca naquə beṇə' Izrael ca' cui chso'onlilažə' Cristan', chəsə'əṇabe' yesə'əle'ine' milagr par yesə'əneze'ne' šə le' Dioz nan' bsele'e Cristan', na' le'egatezə' ca' beṇə' ca' cui zjənaquə beṇə' Izrael na' cui chso'onlilaže'e Cristan', zjəchi' yichjga'aque' porzə che bitə'ətezə dižə' cobə de'en chsa'aquene' naquən dižə' sin'. 23 Pero na' neto' chyixjue'eto' can' gwso'ote' Cristan' le'e yag corozan'. Na' catə' chyixjue'eto'on beṇə' Izrael ca' bito chsa'azlaže'e na' bito chse'ejle'e chei. Na' leczə beṇə' ca' cui zjənaquə beṇə' Izraelən' catə' chse'enene' dižə' de'en chyixjue'eto', leczə chsa'aquene' de que bito bi bi zaquə'ən. 24 Pero chio'o bagwlej Diozən' par naccho xi'ine', chio'o naccho beṇə' Izrael na' chio'o cui naccho beṇə' Izrael, nezecho de que Diozən' chlo'e yelə' chnabia' che'enə' na' yelə' sin' che'enə' ca de'en bsele'e Cristan' gwso'ote'ene' por ni checho. 25 Na' de'en bsele'ene' gwso'ot beṇə' le' por ni chechon' beṇəçhən' chsa'aquene' de que bito bi zaquə' de'en chon Diozən', na' chsa'aquene' de que bito bi yelə' chnabia' napə Diozən'. Na' ca de'en bsele'ene' chlo'en de que Diozən' lechgualə beṇə' sin' naque' cle ca beṇəçhən' na' lechgualə chnabi'ache' ca beṇəçhən'. 26 Le'e gon xbab beṇə' bišə', Diozən' gwleje' chio'o par naccho xi'ine'. Bito naquə zanchə beṇə' sin' segon can' chso'on beṇəçhən' xbab checho, na' nic naquə zanchə beṇə' gwnabia', na' nic naquə zanchə beṇə' blaə. 27 Diozən' gwleje' chio'o par naccho xi'ine', la'anə'əczə bito naccho beṇə' sin' na' la'anə'əczə bito naccho beṇə' gwnabia'. Gwleje' chio'o par niçh chzejni'ine' beṇə' ca' cui zjənombi'ene' de que yelə' sin' na' yelə' gwnabia' chega'aque'enə' bito bi zjəzaquə'ən laogüe'enə'. 28 Chio'o cui naccho beṇə' blaə na' cui bi zaquə'əcho par beṇəçhən'. De'e na'anə' beṇə' ca' cui zjənombia' Diozən' chəsə'əgüe'ine' chio'o. Pero Dioz na'anə' gwleje' chio'o par naccho xi'ine' niçh sa'acbe'ine' de que bitobi bi zaquə' xbab chega'aque'enə' ca de'en choso'ozoe' Diozən' ca'alə. 29 Na' Diozən' babene' par niçh notono no gaquə güe'elao' cuine laogüe'enə'. 30 Dioz na'anə' babene' par niçh ngodə'əcho txen len Cristo Jeso'osən'. Diozən' banone' chio'o beṇə' sin' chedə' Cristan' naque' beṇə' sin'. Banone' par niçh naccho beṇə' güen laogüe'enə', chedə' Cristan' naque' beṇə' güen laogüe'enə'. Banone' la'azda'ochon' xi'ilažə' chedə' Cristan' naque' beṇə' la'azdao' xi'ilažə'. Na' leczə le'enə' babene' par niçh cui bi xtolə'əchon' de, chedə' Cristan' gwdixjue' xtolə'əchon'. 31 Na' nyoj

Xtižá' Diozán' nan: "Bito cheyałá' güe'elao' cuincho sino cheyałá' güe'ela'ochó Xancho Diozán'."

2

Pabán' be'e xtižá' Cristán' ben' gwso'ot beñá' mal ca' le'e yag corozán'

¹ Beñá' bišá', catá' bedáya'a xtižá' Diozán' gan' zolen' bito bi'a dižá' zdebá de'e cui šejni'ile, na' caguá bi'a dižá' par nič gonle xbab de que nada' naca' beñá' sin'. ² Gwnia' lo'o la'aždaogua'a de que žlac soa' len le'e bito bi bichlá dižá' gua'a sino que gua'a dižá' che Jesocristán' na' can' gwso'ote'ene' le'e yag corozán', na' bena' can' gwnia' lo'o la'aždaogua'aná' catá'an bida' gan' zolená'.

³ Gocbe'ida' bito bi gaquá gona' par nič šejle'ele dižá' de'en gua'aná' na' de'e na'aná' lechguale bžeba' na' golá' gwziza' catá' bena' xbab ša gwzenagle chia'.

⁴ Na' catá' bi'a dižá' che Cristán' bito bi'a dižá' len yelá' sin' chia' par nič gonle can' gwni'aná'. Spirit che Diozán' gocwlenán le'e len yelá' guac cheiná' par nič gocbe'ile de que dižá' lin' bi'a. ⁵ Bi'a dižá'an ca' par nič notono no gaquá ana de que chonlilažá'ale Diozán' por ni che yelá' sin' chia'aná'. Nezczecho de que Dioz nan' gocwlene' le'e len yelá' guac che'ená' par nič chonlilažá'álene'.

Spirit che Diozán' chonán par nič chejni'ito'

⁶ Na' de'e li chaclen Diozán' neto' par nič cho'eto' dižá' sin' len beñá' ca' bachse'ejni'i xtiže'ená'. Pero na' yeziqú'achlá beñá' ža' yežlyo nga bito chsa'aque'ne' de que xtižá'ato'on naquan de'e sin'. Na' ni que chsa'aque' beñá' gwnabia' ca' ža' yežlyo nga de que cho'eto' dižá' sin'. Na' ca naquá beñá' gwnabia' ca' ža' yežlyo nga, gwžin ža catá' te yelá' gwnabia' chega'aque'ená'.

⁷ Na' dižá' sin' de'en cho'eto', Dioz nan' babzejni'ine'en neto'. Notono gwneze dižá' sin' che'ená' antslá, pero na'a babzejni'ine'en neto'. Lao yelá' beñá' sin' che Diozán' gwchoglaogüe'en nac gone' par nič gone' chio'o yelá' bala'an.

⁸ Na' ni tozá beñá' gwnabia' beñá' ža' yežlyo nga bito gwse'ejni'ine' yelá' sin' che Diozán'. La' žalá' gwse'ejni'ine'en, bito boso'ode'e Xancho Jesocristán' le'e yag corozán', ben' naquá le'ezelaogüe beñá' zaque'e. ⁹ Na' Xtižá' Diozán' de'en nyojan nan:

Notono ne'e le'i de'e šao' de'e güen de'en gon Diozán' len beñá' ca' chsa'aque'ne' che',

na' nic noná' yesá'neze can' gone',

na' nic noná' gon xbab chei lo'o yichjla'aždaogüe'ená'.

¹⁰ Pero na'a ža, Diozán' babene' par nič Spirit che'ená' bzejni'in chio'o ca naquá de'e güen de'en chone' len chio'o chaquecho che'. Tcho'a tšao' chejni'i Spirit che Diozán' can' chone'ená', na' leczá než nle'in de'en ngašá' len benachán'.

¹¹ Notono no neze bi xbab chon beñá' yoblá, chedá' con to tocho nezecho bi xbabán' choncho. Na' nic no neze bi xbabán' chon Diozán'. Spirit che' na'azán' nezen bi xbabán' chone'. ¹² Na' Diozán' bsele'e Spirit che'ená' zon lo'o la'ažda'ochon' par nič chnezecho yoguá'áloł de'e šao' de'e güen de'en chon Diozán' len chio'o laogüe de'en nži'ilaže'e chio'o. De'e na'aná' bitoch choncho xbab ca xbab de'en chso'on beñá' yeziqú'achlá ža' yežlyo nga. ¹³ Neto' cho'eto' dižá' che de'e ca' chon Diozán' len chio'o, pero caguá cho'eto'on lao yelá' beñá' sin' cheto'oná'. Spirit che Dioz nan' chzejni'in neto' dižá' de'en cho'eto'oná'. Na' beñá' ca' bayo'o Spirit che Diozán' lo'o yichjla'ažda'oga'aque'ená', lega'acze'ená' chse'ejni'ine' de'en chsed chlo'iga'aqueto'one'.

14 Na' beṇə' ca' cui yo'o Spirit che Diozən' lo'o yichjla'ažda'oga'aque'enə', bito gaquə se'ejni'ine' de'en chsed chlo'i Spiritən' cheda' chsa'aque' bito bi bi zaquə'an par lega'aque'. Bito chse'ejni'ine'en cheda' bito yo'o Spiritən' lo'o yichjla'ažda'oga'aque'enə' par gaquəlenən lega'aque' se'ejni'ine'en. 15 Chio'o bayo'o Spirit che Diozən' lo'o yichjla'ažda'ochon', de'e na'anə' chaclenən chio'o par nič chache'icho che bitə'ətezə de'en goncho šə naquən güen o šə naquən mal gonchon. Pero na' beṇə' yeziquə'əchlə bito chse'ejni'ine' de que de'en chene'e Spirit che Diozən' gon chio'o naquən de'e güen. 16 Na' Xtižə' Diozən' de'en nyojən nan: "Notono zo no chejni'i xbab che Xancho Diozən' to gwłazze'. Na' Diozən' bito bi de de'e əgwsed əgwlo'i beṇəchən' le'." Pero Diozən' babene' par nič choncho xbab can' chazlazə' Cristən'.

3

Txenṇə' gwso'one' xšin Diozən'

1 Beṇə' bišə', catə' bi'a xtižə' Diozən' len le'e, bito bi'an can' cho'an len beṇə' ca' bachoso'ozenag che Spirit che Diozən', cheda' le'e ne'e chzenagle che la'ažda'omallen'. La'anə'əczə bachonlilažə'əle Cristən' gwxaquə'əlebele ca bidao'. 2 Catə' ze'e gwzolaole chonlilažə'əle Cristən' gwxaquə'əlebele ca bidao' ne'e chsa'ažə' laogüe de'en cuiṇə' šejni'iša'ogüe'ele de'e ca' chene'e Diozən' šejni'ile. De'e na'anə' bsed blo'ida' le'e de'e ca' cui naquə zdebə šejni'ile, na' xte ža neža ne'e chsed chlo'ida' le'e ca' cheda' cuiṇə' gac šejni'ile de'en naquə zdebə. 3 Nacbia' bitonə' gac šejni'ile de'en naquə zdebə, cheda' ne'e chzenagle che la'ažda'omallen'. De'en chgue'i ljeužjle na' chdilə chžašle zeje dižə' chzenagczle che la'ažda'omallen' can' chso'on beṇə' ca' cui chso'onlilažə' Cristən'. 4 Chzenagle che la'ažda'omallen' ca de'en na balle: "De'en chsed chlo'i Pabən' naogua'", na' yeballe nale: "De'en chsed chlo'i Apolosən' naogua'." De'e na'anə' nia' chonle can' chso'on beṇə' ca' cui chso'onlilažə' Cristən'.

5 ¿Noxa nada' Pab na' noxa Apolosən'? Neto' naquəto' beṇə' güen xšin Diozən' na' neto' be'elento' le'e xtiže'enə'. Na' cuiṇ Diozən' bene' par nič balle beṇlilažə'əle Cristən' catə' bi'a dižə' güen dižə' cobə che'enə' len le'e na' leczə bene' par nič yeballe beṇlilažə'əle Cristən' catə'an Apolosən' be'elene'en le'e. 6 Zgua' atec nadan' be'elena' le'e xtižə' Diozən' na' gwxaquə'əlebəda' ca to beṇə' chaz. Na' laogüe de'en leczə bsed blo'i Apolosən' le'e, gwxaquə'əlebene' ca be'en chylil. Na' can' chon Diozən' nič chcha'o chxen de'en chazcho, leczə can' bene' par nič gwyejle'ele xtiže'enə' de'en be'elento' le'e. 7 Bitotec bi zaca'a nada' de'en be'elena' le'e xtižə' Diozən', na' nic Apolosən' de'en bsed blo'ichene'en le'e. Dioz nan' zaquə' cheda' le'enə' bene' par nič gwyejle'ele xtiže'enə'. 8 Ben' chyixjue'e xtižə' Diozən' de'e neche na' ben' chyixjue'en de'e gwchope, txenṇə' chso'one' xšin Diozən' na' tozəczə can' cheyalə' gapəga'acchone' respet. Na' Diozən' gone' par nič to toe' yesə'anite'e mbalaz segon can' gwso'one' xšine'enə'. 9 Neto' ža, txenṇə' chonto' xšin Diozən' entr le'e. De'e na'anə' gwxaquə'əlebetə' ca beṇə' goz go'oṇ na' le'e gwxaquə'əlebele ca yežlyon' gan' chac žinnə'.

Na' leczə le'e chdopə chžagle cho'ela'ole Cristən' yoguə'əle txen gwxaquə'əlebele ca to yo'o che Diozən' na' neto' gwxaquə'əlebetə' ca beṇə' ben yo'onə'. 10 Diozən' goclene' nada' par nič naca beṇə' nech bena' xšine'enə' entr le'e. De'e na'anə' gwxaquə'əlebəda' ca beṇə' bxe lan yo'o. Na' bena' xšine'enə' ca chon to mues beṇə' chacchgua. Na' nita' beṇə' yoblə beṇə' leczə boso'osed boso'olo'ine' le'e na' lega'aque' gwxaquə'əlebəga'aque' ca beṇə' gosə'əbec ze'enə'. Na' šə nochlə beṇə' yoso'osed yoso'olo'ine' le'e, cheyalə'

so'one' xbab par ničh yoso'osed yoso'olo'ine' le'e porzə de'en naquə de'e li. ¹¹ Le'e chdopə chžagle cho'ela'ole Jesocristən' yoguə'əle txennə' gwxaquə'əlebele ca to yo'o de'en chac, na' Jesocristən' gwxaquə'əlebene' ca lan yo'onə'. Na' šə no chene'e əgwɣe laneinə' de'e yoblə, bitoch gaquə, chedə' tozə Jesocristən' zaque'e par gonlilažə'əchone'. ¹² Nezecho chcheje bitə'ətezə ze'e de'e chxə beṇə' lao lan yo'onə' segon šə none'en de or, de plət, de yej fin, de yag, de yix, o de dod. Can' gwxaquə'əlebe de'en yoso'osed yoso'olo'i beṇə' le'e. ¹³ Na' catə' əžin ža choglao Diozən' che yoguə'əlol beṇə', cana'ach la'alaon che to to beṇə' boso'osed boso'olo'ine' le'e šə boso'osed boso'olo'ine' le'e de'en naquə de'e li, o šə cui. Na' šə boso'osed boso'olo'ine' le'e de'en naquə de'e li, gwxaquə'əlebəga'aquene' ca to beṇə' ben yo'o de or de plət o de yej fin chedə' de'e ca bito chse'eyən. Pero na' šə boso'osed boso'olo'ine' le'e clelə, gwxaquə'əlebəga'aquene' ca to beṇə' ben yo'o de yag, de yix, o de dod chedə' de'e ca chse'eyən. Catə' əžin žan' choglao Diozən' che yoguə'əlol beṇə', gone' ca la'alaon šə de'en ben to to beṇə' güen xšine'enə' naquan de'e zaque'e o šə bito bi zaquə'an. Ca'aczən' nla'alaon che to to yo'o segon naquan' zjənaquən. ¹⁴ Beṇə' ca' boso'osed boso'olo'ine' le'e de'en naquə de'e li, cuin Diozən' gone' ca yesə'əzi' beṇə' ca' yelə' bala'an. ¹⁵ Pero beṇə' ca' boso'osed boso'olo'ine' le'e clelə gwxaquə'əlebəga'aquene' ca beṇə' šey ližen'. Na' nacchguaze gaquə yesə'əchoje' par cui se'eye', bito bi yelə' bala'an yesə'əzi'e chedə' bito boso'osed boso'olo'ine' le'e can' cheyalə'.

¹⁶ Chio'o chdopə chžagcho cho'ela'ocho Jesocristən', yoguə'əcho txennə' gwxaquə'əlebecho ca to yo'oda' gan' chso'elao' beṇə' Diozən' chedə' Spirit che'enə' zon lo'o yichjla'azda'ocho'n'. ¹⁷ Na' šə to beṇə' gone' par ničh chio'o chdopə chžagcho cho'ela'ocho Cristən' cuejyichjcho dižə' li che Diozən', Diozən' gwnežjue' castigw zejlicanə che ben' gon ca', chedə' bagwlej Diozən' chio'o par naccho lažə' ne'enə' na' zo Spirit che'enə' lo'o yichjla'azda'ocho'n'.

¹⁸ Šə nocho chaquecho nsi'incho, bito cheyalə' xoayagcho. Cheyalə' gache'icho de que bitotec bi zaquə' xbab chechon' ničh ca' Diozən' gone' chio'o yelə' sin' che'enə'. ¹⁹ Beṇə' ca' cui zjənombia' Diozən' yelə' sin' chega'aque'enə' bitobi zaquə'an lao Diozən'. La' nyojczə Xtižə' Diozən' nan: "Beṇə' ca' chsa'aquene' zjənaque' beṇə' sin', Diozən' gone' par ničh yesə'əbiayi'e por ni che xbab mal chega'aque'enə'." ²⁰ Na' yeto gan' nyojən nan: "Xancho nan' neze de que xbab che beṇə' sin' ca' bito gaqualenən lega'aque' par so'ombi'ene'." ²¹ Ca naquə neto' əbsed əblo'ito' le'e, bito gone' xbab de que naquəto' le'ebeyože beṇə' zaque'e. Dioz na'aczən' bsele'e yoguə'əto' par chaclento' le'e na' bsi'e xneze par ničh bitə'ətezachlə de'e zjəde na' de'e ca' chac chsa'aclenən le'e. ²² Diozən' bsele'e nada' na' Apolosən' na' Bedən' par chaclento' le'e. Na' bene' yežlyon' par ničh lecza chaclenən chio'o. Na' chone' par ničh bitə'ətezə de'en chac checho lao mbancho o catə'an gatcho əsa'aclenən chio'o na'a na' batə'ətezachlə. ²³ Na' laogüe de'en cho'ela'ocho Cristən' ngoda'əcho txen len le' can' ngode'e txen len X'e' Diozən'.

4

De'en gwlo'o Diozən' lao na' apostol ca' par gwso'one'

¹ Cheyalə' gonle xbab de que naquəto' beṇə' güen xšin Cristən'. Diozən' babzejni'ine' neto' de'en cui no gwneze antsla, de'e na'anə' Cristən' ngüe'e lao na'ato' chsed chlo'ito'on beṇə'. ² Na' chonən byen gonto' complir de'en ngüe'e lao na'ato' gonto'. ³ Na' ca naca' nada' bitobi nonən len nada' la'aṇə'əczə šə

jostis o šə le'e chaquele de que bito chona' can' cheyałə' gona'. Bito nia' šə chona' can' cheyałə' gona' o šə cui. ⁴Nada' chacda' de que bito bi dolə' napa' len bitə'ətezə de'e chona', pero caguə ni che de'e na'ana' əna Diozən' čhia' de que bito bi xtoł'a de. Xancho Cristən' əne' šə chona' can' cheyałə' gona' o šə cui. ⁵De'e na'ana' bito cheyałə' bi ənacho che notə'ətezə beņə' šə chone' can' cheyałə' gone' o šə cui. Catə'əchan' yida' Xancho Cristən' yeto, ca na'achən' gone' par nič ənezecho de'en cui nonə' neze na'a. Gone' par nič yeyacbe'icho xbab de'en yo'o lo'o yichjla'aždao' to tocho, na' cana'achən' Diozən' əne' šə nochon' chon güen.

⁶Benə' bišə', babi'a xtižə' Apolosən' na' xtižə'a par nič šejni'ile can' na xtižə' Diozən' de que bito cheyałə' güe'ela'ocho che to beņə' šə naquən' chsed chlo'ine' na' nique gue'icho che yetoe'. ⁷¿Echaquele de que zaquə'əchle cle ca beņə' ca' yela'? ¿Ede bi de'e de chele de'e cui beņə' Diozən'? Bito bi de. Nezele naquən' de'e beņə' Diozən' le'e, de'e na'ana' bito cheyałə' ga'alazə'əle len de'en deilen'?

⁸Chacljeile bitoch bi chyažjele, na' de que bazole mbalaz la'anə'əczə cui chac četo' ca'. Yebeito' žalə' de'e liczə zole mbalaz na' soto' mbalaz txen len le'e žalə' ca'. ⁹Diozən' bsele'e neto' apostol naquəto' ca to beņə' le'ezelaogüe cui zaque'e o ca beņə' nchoglaon che' gate'. Na' Diozən' bsi'e xneze par nič angl ca' na' beņə' ca' ža' yežlyon' chəsə'əgüie' can' chac četo' can' chəsə'əgüia beņə' to comedy. ¹⁰Beņə'achən' chsa'aquene' bito bi bi zaquə'əto' por ni che de'en chonto' xšin Cristən'. Pero na' le'e ža, chonle par nič chsa'aquene' nacle beņə' sin' la'anə'əczə ngodə'əle txen len Cristən'. Neto' nezeto' caguə bi chac gonto', pero le'e chaquele chac gonle bitə'ətezə. Chso'elao' beņə' le'e na' chəsə'əgue'ine' neto'. ¹¹Xte ža neža zan las cui de de'e ye'ej de'e gaoto', na' bito bi xala'anto' de, na' chəsə'əbaza' beņə' neto', na' nic bi ližto' de. ¹²Na' len ni'a na'ato' chonto' žin par nič chon cuanto' mantener. Na' catə' choso'ožia choso'onitə' beņə' neto', nachle chnabto' nite'e mbalaz, na' catə' choso'oči' choso'osaquə' beņə' neto', chgo'o chchejlažə'əto' ca de'en choso'oči' choso'osaque'e neto'. ¹³Na' catə' beņə' chne' cllə'ə četo', nachle cho'elenga'actə'one' dižə' šao'. Na' xte ža neža nitə' beņə' chəsə'əgue'ine' neto' ca chəsə'əgue'ine' no beb na' can' chsə'əgue'ine' no de'e naquə'əban.

¹⁴Na' ca naquə de'e ca' de'en bach bzoja' le'e, bito bzoja'an par nič gaquele zto'. Nacle ca xi'ina' na' chacda' chele. De'e na'ana' chona' le'e consejw quinga. ¹⁵Nitə'alja ši mil beņə' choso'osed choso'olo'ine' le'e che Cristən', pero toza' nada' naca' ca xale chedə' zgua'atec nada' gwduxjui'a dižə' güen dižə' cobə che Cristo Jeso'osən' len le'e par nič chonlilažə'əlene'. ¹⁶Na' de'en naca' ca xale de'e na'ana' chneyoida' le'e gonle can' chona'ana'.

¹⁷De'e na'ana' bseł'a'a Temtion' gan' zolenə'. Banona'ane' ca xi'ina' beņə' chacda' chei laogüe de'e bsed blo'ida'ane' par chonlilažə'e Xancho Cristən'. Na' zoteze' chone' complir can' cheyałə' gone'. Na' Temtio na'ana' gone' par nič əžjsa'alažə'əle de'en babsed bablo'ida' le'e che Cristən' ca de'en chsed chlo'ida' beņə' ca' chəsə'əadopə chəsə'əžag chso'elaogüe'e Cristən' gatə'ətezə nite'e. ¹⁸Balle nale de que bito bi zaca'a parzə nič chon cuinle xen na' chonle ca' laogüe de'en chonle xbab de que bitoch yida' gan' zolenə'. ¹⁹Pero caguə chžach yida' gan' zolenə' šə Xancho Diozən' güe'e latə. Na' catə' yida' cana' degüia' gonle can' nalena'. ²⁰Ca naquə beņə' ca' chnabia' Diozən' lega'aque', Diozən' chone' par nič gaquə so'one' can' chso'e dižə'ən. Caguə con chəsə'ənaze'ena'. ²¹¿Nac chene'ele gona'? ¿Egüida' gan' zolenə' par gona' le'e

castigw o ša yida' gwlo'a can' chacda' chele sin cui bi diža' aña' le'e? Legon xbab naquän' chene'ele gona'.

5

To beña' gwzolen no'ol che xe'enä' ca xo'oläcze'

¹ Chso'echgua beña' xtiža'äle de que zo to beña' byo entr le'e beña' zolene' no'ol che xe'enä' ca xo'oläcze'. Beña' ca' cui chso'elao' Diozan' bito chžinläže'e de'e yela' zton' chso'one' ca de'e yelä' zto'onä' chon be'enä'. ² Na' la'añä'äczä chac ca' cho'elao' cuinle. Bito güe'elao' cuinle. Cheyalä' yegüine'ele na' cuich güe'ele latjä gone' txen len le'e. ³ La'añä'äczä bito zoa' na' len le'e, bagwchoglaogua'an can' cheyalä' gonle len be'en chon de'e malän'. Na' le'e ža, le'e gon cuent lažä'äle de que naquäczcho txenna' ša bachonle' ca'. ⁴ Na' catä' bandopä nžagle cho'ela'ole Xancho Jesocristän', zocze' chaclene' le'e len yelä' chnabia' che'enä', na' nada' choncza' txen len le'e. ⁵ Catä' bandopä nžagle txen, legwžon gon be'enä' txen len chio'o chonläžä'ächo Jesocristän' na' le'e cueje' ca'alä par nič gon Satanäsän' con nac chene'en len le'. De repent ša čhi' saque'e na'a len cuerp che'enä' goša'alja yičhjä'äždaogüe'ena' nič cui si'e castigw zejlicane' catä'an äžin ža čhoglao Xancho Jesocristän' naquän' gac che to beñačän'.

⁶ Bito naquän güen can' chonle cho'elao' cuinle chaquele chebei Diozan' le'e. Nezele catä' choncho yetxtil latä' xne'in chonän par nič cheyas doxen coazin'. Le'egatezäczä ca' catä' cho'ele latjä chcha'o chxench bitä'ätezä de'e mal entr le'e, yoguä'älen' chaple dolä' čhedä' yoguä'älen' čhonlenle' ben' chon de'e malän' txen. ⁷⁻⁸ Beña' Izrael gwlaž čheto' ca' chsa'ape' cuidad cui chsa'ogüe' yetxtil de'e nčixä xne'i lao lni pascon' na' chsa'ape' cuidad par nič cui bi bi xna' cuazin' chega'an lo'o yo'o ližga'aque' lao lni'. Ca'atezäczän' chio'o chonläžä'ächo Cristän' cheyalä' gapcho cuidad do tyempte par nič cui bi de'e mal goncho na' cui bi de'e mal ta' ächen yičhjä'äžda'ochon'. Cheyalä' cuejyichjo de'e malän' čhedä' Cristän' gwduxje' xtolä'ächon' par bebeje' chio'o xni'a de'e malän'. Na' de'en gwso'ote' le' por ni čhecho gwxaquä'älebene' ca xilä' daon' bian' chso'ot beña' Izrael ca' lao lni pascon'. De'en chonläžä'ächo Cristän' ža, cheyalä' cuejyichjo de'e malän' na' goncho poržä de'e güen.

⁹ Bzoja' to cart par le'e na' gwnia' de que bito cheyalä' socho binlo len beña' chgo'o xtoi na' be'ena' chbejyichj no'ol čhei o be'en čhe' par chzolene' beña' yoblä. ¹⁰ Catä' nia' cabi cheyalä' socho binlo len lega'aque', bito cho'a dižä' čhe beña' ca' cui naccho txen cho'ela'ochcho Cristän' sino que cho'a dižä' čhe ljuěžjcho beña' leczä chso'elao' Cristän'. Na' leczä ca' nia' bito socho binlo len beña' čhasä'äzelažä' bi de'e de čhe beña', nic len beña' čhasä'äca'a bi de'e de čhe beña', na' nic len beña' chso'elao' lgua'a lsaquä'. Nia' ca' čhe ljuěžjcho beña' ca' naccho txen cho'ela'ochcho Cristän'. Žalä' cui chac socho binlo len beña' ca' cui chso'elao' Cristän', bitoch gac socho yežlyo nga žalä' ca'. ¹¹ Ša entr le'e nitä' beña' nacho bišä'ächo beña' čhasä'äža' xtoga'aque' o beña' čhasä'äbejyichj no'ol chega'aquei o be'en čhega'aquei par čhasä'äzolene' beña' yoblä, o beña' čhasä'äzelažä' bi de'e de čhe beña', o beña' chse'ejni'alažä' lgua'a lsaquä', o beña' choso'ožia choso'onitä' ljuěžjga'aque', o beña' güe'e zo, o beña' bgüan, bito cheyalä' sole binlo len lega'aque'. Na' bito cheyalä' gaolenga'äclene' txen. ¹² Beña' ca' čhasä'ädopä čhasä'äžag chso'elaogüe'e Cristän' txen len chio'o cheyalä' čhoglaochon čhega'aque' catä' äsa'ape' dolä', pero bito bi cheyalä' änačho čhe beña' ca' cui chso'elao' Cristän' txen len chio'o. ¹³ Diozan' äne' čhe

benə' ca' cui chso'elao' Cristən' de que zjənapə' dolə'. Na' ca naquə be'enə' chon de'e malən' ben' cho'elao' Cristən' txen len chio'o, cheyalə' cuejchone' ca'alə.

6

Bito ye'echo benə' cui zjənombia' Diozən' so'one' yelə' jostis chechon'

¹ Catə' chaole xya tole yetole chjənabele benə' ca' cui choso'ozenag che Diozən' par so'one' yelə' jostis chelen' l'gua'a nabele benə' ca' bagwlej Diozən' par zjənaque' lažə' ne'enə. ¿Ebito chache'ile clellən' chonle? ² ¿Ecabi nezele de que gwžin ža catə' chio'o naccho lažə' na' Diozən' goncho yelə' jostis che benə' yeziquə'əchlə ža' yežlyo nga? Na' ca naquə goncho yelə' jostis chega'aque'en, gwaquəczə goncho yelə' jostis che de'e ca' cuitec zjəzaque'e. ³ Leczə əgwžin ža goncho yelə' jostis che angl ca'. Na' naquəchxen' gaquə goncho yelə' jostis che de'e chso'on benə' lao yežlyo nga. ⁴ Na' catə' gaquəyožə l'juežjle, bito cheyalə' žja'acle lao benə' ca' cui chso'onlilažə' Cristən' par so'one' yelə' jostis chelen', chedə' bitotec bi zjəzaque'e par chio'o chdopə chžagcho cho'ela'ocho Cristən'. ⁵ Che'enda' gaquəchgüeile lo'o yichjla'ažda'olen' ca de'en chja'acle lao jostis ca' cui chso'onlilažə' Cristən' chjətaole xya tole yetole le'e nacle bišə'əcho. ¿Eniga tole cui nacle benə' si'innə' par gon yelə' jostis che l'juežjle catə' bin' chac chele?

⁷ Lechgualə clelən' chonle batə'ətezə chaole xya tole yetole. Mbalazəch zole žalə' chdele ca'alə šə bi de'en chone l'juežjlen' le'e, na' mbalazəch zole žalə' güe'ele latjə yesə'əque'e bi de'e de chele. ⁸ Chebanda' can' chonle contr l'juežjle na' chca'ale bi de'e de chega'aque' la'anə'əczə zjənaque' txen len chio'o chonlilažə'əcho Cristən'.

⁹ Bito goncho xbabən' clellə. Notə'ətezcho šə zotezcho choncho de'e malən' bito gaquə yežincho yoban' gan' zo Diozən' chnabi'e. Nitə' benə' chəsə'əgo'o xtoi na' benə' chso'on bichlə de'e yelə' zto' de'en nac ca'. Nitə' benə' chso'elao' l'gua'a lsaquə'. Nitə' benə' chəsə'əbejyichj no'ol chei o be'en chei par chəsə'əzolene' benə' yoblə, na' benə' chəsə'əzolentezə le'e l'juežj benə' byoga'aque' l'gua'a de'e yesə'əca'a no'ol chega'aque', na' no'ol ca' chəsə'əzolentezə l'juežj no'oləga'aque' l'gua'a yesə'əque'e benə' byo. ¹⁰ Nitə' benə' chəsə'əban na' benə' chəsə'əzelažə' bi de che benə'; na' benə' güe'e zo; na' benə' choso'ožia choso'onitə' l'juežjga'aque'; na' benə' chəsə'əxoayague' par nič yesə'əque'e bi de'e de che benə'. Ni to benə' chon de'e mal ca' cui gaquə yesyə'əžine' yoban' gan' zo Diozən' chnabi'e. ¹¹ Balcho bencho de'e mal ca' antslə. Pero na'a de'en chonlilažə'əcho Xancho Jesocristən', Spirit che Dioz chechon' babocobən yichjla'ažda'ochon' par nič naccho benə' la'aždao' xi'ilažə', naccho lažə' na' Diozən' na' naccho benə' güen laogüe'enə.

Cheyalə' goncho len cuerp chechon' ca si' Diozən' yelə' bala'an

¹² Nitə' benə' chəsə'əne' de que de lsens par goncho bitə'ətezə, pero nezecho caguə yoguə' de'en gonchon' naquən güen par chio'o. Na' la'anə'əczə šə chəsə'əna benə' de que de lsens par goncho bitə'ətezə, bito cheyalə' güe'echo latjə par nič bi de'en goncho nabia'an chio'o. ¹³ Leczə nita' benə' chəsə'əne'; "Nsa' le'echon' par yelə' guao, na' deczə yelə' guaon' par lennə." De'e liczə can' chəsə'əne'enə, pero na' le'echon' len yelə' guaon', əžin ža catə' gon Diozən' par nič te chega'auən. Na' cuerp chechon' bito naquən par nič co'o xtocho o par nič goncho bichlə yelə' zto' de'en nac ca'. Naquə cuerp chechon' par nič socho güe'ela'ocho Xancho Cristən', na' Xancho' zocze' par gaquəlene' chio'o. ¹⁴ Diozən' bosbane' Xancho Cristən' ladjo benə' guatən', na' leczə ca' əžin ža catə' yosbane' chio'o ladjo benə' guatən' len yelə' guac che'enə.

15 ¿Ecbi nezele de que ngodá'echo txen len Cristán' par nich nabi'e cuerp chechon'? Na' de'en ngodá'echo txen len le', bito cheyalá' so xtocho bená' gon cuerp chechon' lao ne'e. 16 Catá' to bená' chatá'álene' xtoe' cuerp chega'aque'ena' chsa'acquán tozá, can' nyoj de'en gwna Diozán': "Bená' cá' chopá'asa'aque' tozá cuerp." 17 Pero chio'o ngodá'echo txen len Xancho Cristán' na' naquá yichjla'ázda'ochon' tozá len le'.

18 De'e na'aná' bito co'o xtocho na' bito goncho bitá'atezáchla de'e ca' zjánac ca'. De'e mal ca' yeziqú'áchla bitotec chso'onán contr cuerp chechon', pero ša co'o xtocho o ša goncho bichlá de'e yelá' zto' de'en nac ca', lega'acquán chso'onán contr cuerp chechon'. 19 Spirit che Diozán' zon lo'o yichjla'ázdao' to tocho ca to bená' zo lo'o yo'o che'. Dioz nan' bsele'e Spirit che'ena' zon lo'o la'ázda'ochon' par chnabia'an chio'o. Caguá chio'o anácho naquán' gonchon'. 20 Xancho Cristán' gwdixjue' xtolá'ochon' par nich naccho xi'in Dioz. De'e na'aná' cheyalá' goncho len cuerp chechon' na' len yichjla'ázda'ochon' ca si' Diozán' yelá' bala'an.

7

Cho'e dižá' che yelá' gošagna'aná'

1 Na' de'e ca' bzojle nada' le'e cartán', de de'en che'enda' nia' le'e. Ša no bená' byo bito chene'ene' si'e no'olá gaque' xo'ole', güenna' chone'. 2 Pero na' de'e nxož co'o xtole, de'e na'aná' naquáchan güen agwšagna'ale par nich ca' to to bená' byo so xo'ole' na' to to no'olá so be'en che'. 3 Na' le'e bená' byo, yeyatá'álen no'olá che chele. Le'egatezaczá ca' le'e no'olá yeyatá'álen be'en che chele. 4 Ca naquá no'olán' caguá le'áne' nac gone' len cuerp che'ena'. Le'egatezáz ca' bená' byon' leczá caguá le'ena'áne' nac gone' len cuerp che'ena'. Chopte'en cheyalá' yoso'ozenag che ljuežjga'aque'. 5 Na' le'e bená' nšagna' bito agwžonle yeyatá'álen be'en chele o no'ol chele. Pero de'e gaquaczán' ša yelá' goxia che chople cuezle to term güejá par nich sotezle gonle orasyon. Na' te termán' yeyatá'álen be'en chele o no'ol chele de'e yoblá par nich Satanasán' cui gaquá co'oyelá'an le'e gonle de'e malán' laogüe de'e tant nan solen ljuežjle.

6 De'e quinga nia' chedá' de lsens par nich to to bená' byo si' xo'ole' na' to to no'olá si' be'en che', pero bito nācho de que chon Diozán' mendad goncho ca'.

7 Chebeida' žalá' yoguá'ale sole ca nada', cui no xo'ola' zo. Pero na' nža' can' baben Diozán' par zo to tocho na' nža' can' chene'ene' goncho.

8 Le'e cuiñá' gwšagna'ale, chacda' naquáchan güen yega'anle can' zoa' nada' na' cui agwšagna'ale. Na' le'e bagot be'en chele o no'ol chele, chacda' leczá naquáchan güen cui yošagna'ale. 9 Pero na' le'e bená' byo ša lechguale nan solenle no'olán', na' le'egatezáz ca' le'e no'olá ša lechguale nan solenle bená' byo, mejor agwšagna'ale par nich ca' bito nābia' yelá' chzelažá'ána' le'e.

10 Le'e no'olá le'e nšagna'ale, chona' mendad bito yela'ale be'en chele. Na' bito gaquale de que nadáza'an ania' ca'. Naquán to de'e chon Xancho Cristán' mendad cui goncho. 11 Na' ša no'olán' yele'e be'en che'ena', cheyalá' yega'ane' sin cui yeque'e bená' yoblá o cheyalá' yeyeje' žjáyazolene' be'en che'ena' de'e yoblá. Na' le'e bená' byo le'e nšagna'ale, bito yela'ale xo'ollena'.

12 Na' le'e bená' yeziqú'áchla, ania' can' chona' xbab cheyalá' gonle, la'aná'eczá Xancho Cristán' bito bi gwne' che de'e ca'. Ša entr le'e zo to bená' zo xo'ole' no'olá cuiñá' gonlilažá' Cristán', na' ša zo no'olán' gan par soteze' yega'anlene' be'en che'ena', bito cheyalá' yela'a bená' byon' le'. 13 Na' ša entr le'e zo to no'olá na' cuiñá' gonlilažá' be'en che'ena' Cristán', ša be'en che'ena'

zoe' gan par yesə'ənite'e, bito cheyalə' yesyə'əle'e. ¹⁴ Bito naquən mal lao Diozən' par no'olən' chonlilažə' Cristən' solene' be'en che'enə' la'əna'əczə šə be'en che'enə' cuiṇə' gonlilaže'e Cristən'. Leczə bito naquən mal lao Diozən' par beṇə' byon' chonlilažə' Cristən' solene' no'ol che'enə' la'əna'əczə no'olən' cuiṇə' gonlilaže'e Cristən'. Žalə' chgue'i Diozən' yesə'əzolen ljuəžjga'aque' leczə gwgüe'i Diozən' bi'i chega'aque'enə', pero Diozən' chaquene' che xi'inga'aque'enə'. ¹⁵ Pero na' šə beṇə' byon' o no'olən' ben' cui chonlilažə' Cristən' bitoch chene'ene' solene' be'en che' o no'ol che' ben' chonlilažə' Cristən', bito gwžonle yesyə'əla'aga'aque'. Bito chonən byen yesyə'əga'anlen ljuəžjga'aque' chedə' la' Diozən' chene'ene' socho binlo len be'en checho o no'ol checho. ¹⁶ Le'e no'olə le'e chonlilažə'əle Cristən', šə sotezle len be'en chele be'en cuiṇə' gonlilaže'e Cristən', de repent gvaquəlenlene' par niçh gonlilaže'e Cristən'. Na' le'e beṇə' byo le'e chonlilažə'əle Cristən', šə sotezle len no'ol chelen' la'əna'əczə cuiṇə' gonlilaže'e Cristən', de repent gvaquəlenlene' par niçh gonlilaže'ene'.

¹⁷ Na' ca naquə žin de'en nlanle catə' gwlej Diozən' le'e par chonlilažə'əle Cristən' gvaquəczə gonchlen. Na' šə banšagna'ale catə'an gwlej Diozən' le'e par chonlilažə'əle Cristən', con ca'aczən' cheyalə' so cuezle, chedə' can' no'e Xancho Cristən' chele gonle. Leczə can' babena' mendad len beṇə' ca' chəsə'ədopə chəsə'əžag chso'elaogüe'e Cristən' gatə'ətezəchlə, leczə can' chona' mendad len le'e. ¹⁸ Šə bazole seṇy de'en ne' sirconsisionṇə' catə'an gwlej Diozən' le'e par chonlilažə'əle Cristən' bito gonle par niçh yenit seṇyan'. Na' šə ballə cuiṇə' sole seṇy de'en ne' sirconsisionṇə' catə'an gwlej Diozən' le'e par chonlilažə'əle Cristən', bito gonle byen par solen. ¹⁹ Bito naquən to de'e žialao len chio'o šə nsa'acho seṇy de'en ne' sirconsisionṇə' o šə cui nsa'achon. De'en naquə de'e žialao len chio'o, goncho con can' non Diozən' mendad. ²⁰ Con can' naccho yoguə'əcho catə'an gwlej Diozən' chio'o par chonlilažə'əcho Cristən', šə nsa'acho seṇy de'en ne' sirconsisionṇə' o šə cui nsa'achon, ca'atezəczən' cheyalə' so cuezcho. ²¹ Šə nacle esclabo catə'an gwlej Diozən' le'e par chonlilažə'əle Cristən', bito bi gaquele che de'ena'. Pero na' šə guatə' latjə chixjwle niçh əchojle xni'a xanlen', lechixjw niçh əchojle. ²² Na' la'əna'əczə nacle esclabo catə' Diozən' gwleje' le'e par chonlilažə'əle Xancho Cristən', nacle beṇə' zaque'e lao Xancho'. Na' la'əna'əczə cui naccho esclabo catə' Diozən' gwleje' chio'o par chonlilažə'əcho Cristən', pero na'a ža Cristən' banaque' Xancho. De'e nan' cheyalə' gwzenagcho che'. ²³ Cristən' gwdixjue' xtolə'əchon' par niçh naccho xi'in Dioz. De'e na'anə' cheyalə' gwzenagəchcho che' cle ca gwzenagcho che bi de'en chesə'əna beṇə'. ²⁴ Beṇə' bišə', šə nacle esclabo catə'an gwlej Diozən' le'e par chonlilažə'əle Cristən', bito bi gaquele. Gvaquə so cuezle ca' na'a ngodə'əle Diozən' txen.

²⁵ Bito bi mendad ben Xancho Cristən' can' goncho par len no'ol güego' ca'. Pero nada ənia' le'e can' chacda' cheyalə' goncho par len lega'aque'. Na' laogüe de'en babeyašə' beži'iləžə' Xancho' nada' na' chaclene' nada' par chona' complir can' cheyalə' gona'anə', dižə' de'e nga cho'a naquən de'e zaque'e par əgwzenagle chei. ²⁶ De'en chacda' nada', notə'ətezə beṇə' šə nšagne'e catə'an gwlej Diozən' le' par chonlilaže'e Cristən', con can' cheyalə' so cueze', o šə bito nšagne'e, leczə can' chacda' naquən güen so cueze'. Nia' ca' por ni che can' chi' saquə'əcho tyemp nga zocho na'a. ²⁷ Le'e nšagna'ale bito yelə'ale xo'olle, na' le'e cui no xo'olle zo, bito çhilje xo'olle. ²⁸ Pero na' notə'ətezle bito gaple dolə' šə əgwšagna'ale, na' ni le'e no'ol güego' bito gaple dolə' šə əgwšagna'ale. Pero de'en gac chele de'e zan de'e çhi' saquə'əle lao yežlyo ngan', lenṇə' cui

che'enda' gac chele ania' ca'.

²⁹ Benə' biša', che'enda' nia' le'e de que bito socho zan iz par goncho xšin Diozən'. De'e na'anə' šə nitə' xo'olle, cheyalə' gwzenagle che Diozən' na' gonczle xšine'enə' can' gonlen žalə' cui no xo'olle zo. ³⁰ Na' šə chegüine'echo por ni che bi de'en chac checho, cheyalə' soczcho goncho xšin Diozən' cacza chon beñə' cui bi bi chac chei. Na' šə de de'en cheba chezaquə'alažə'ačo, cheyalə' gonczcho xšin Diozən' can' goncho žalə' cui chac to de'e güen checho de'en goncho xbab chei. Na' šə bagwx'i'icho to de'e gwčhincho, bito cheyalə' gonteccho xbab chei sino cheyalə' gonczcho xšin Diozən' can' goncho žalə' cui gwxi'ichon. ³¹ Ca naquə' zocho yežlyo nga na' chčhincho bi de'e ca' de'en de yežlyo nga, bito cheyalə' cue'echgua yichjcho che bi de'en deicho o bi de'en chac checho chedə' de'e te chei yežlyo nga chle'icho na'a.

³² Na' che'enda' bito bi cuec yichjle che de'en chac yežlyo nga. Šə to beñə' cui zo xo'ole', deczə latjə par gone' xbab che xšin Xancho Diozən' de'en chone', na' deczə latjə par güe'elažə'e gone' de'en yebei Xancho'. ³³ Pero šə to beñə' zo xo'ole', chbe' yichje' che de'en chac yežlyo nga na' can' gone' par nič yebei xo'olen'. ³⁴ Na' leczə nža' can' chac len no'olan' nšagna' na' no'olan' cui nšagna'. No'olan' cui nšagna' nlatje' par cue' yichje' che de'en chene'e Xancho Diozən' na' par gon cuine' lažə' ne'enə' nič gone' can' chene'e Diozən' len cuerp che'enə' na' len yichjla'ažda'ogüe'enə'. Pero no'olan' zo be'en chei, chbe' yichje' che de'en chac yežlyo nga na' nac gone' par yebei be'en che'enə'.

³⁵ Bagwnia' le'e ca' par nič gaqualenə' le'e, caguə de'e əgwšona' əgwšagna'alənə'. Con che'enda' güe'elažə'əle par gonle de'e güen na' güe'elažə'əle par gonle xšin Xancho' sin cui bi bi gwžon gonlen.

³⁶ Na' šə to beñə' chaquene' bito chone' güen ca de'en cui chšague' na' xi'ine' no'olan', na' šə no'olan' bangole' na' chene'ene' əgwšagne'e, naquəczən güen gwšag x'e'enə' ne'e šə can' chazlažə'e gone'. Bito chone' de'e mal šə əgwšague' na' xi'ine' no'olan' len ben' chnab le' par gague' xo'ole'. ³⁷ Pero šə to beñə' zoe' chaquene' chone' güen len xi'ine' no'olan' de'en bito chene'ene' no si' le', con šə cui chene'e xi'ine' en əgwšagne'e na' šə chaquene' cui de bichlə de'en chonən byen par əgwšagna' xi'ine'enə', de lsens par gone' can' chazlažə'e na' choncze' güen can' bagwchoglažə'e gone'. ³⁸ Na' leczə chon ben' güen be'enə' chšague' na' xi'ine' no'olan', pero güench chon be'enə' cui chšague' na' xi'ine' no'olan'.

³⁹ Na' ca naquə' notə'ətezə no'olə ca' zjanšagna', cheyalə' yesə'anite'e len be'en chega'aque' ca', chedə' can' chon lein' mendad. Pero šə sa'atclə be'en chega'aque' ca', guac yesyə'əque'e beñə' yoblə, con šə beñə' chso'onjilažə' Xancho Cristən'. ⁴⁰ Pero chacda' nada' yesə'anitə'ače' mbalaz šə yesyə'əga'ane' sin cui no yesyə'əque'e cle ca yesyə'əque'e beñə' yoblə. Na' chacda' xbab chian' naquən tozə len xbab che Spirit che Diozən'.

8

Yelə' guao de'en choso'ožia beñə' lao lgu'a lsaquə'an chse'ejni'alažə'e

¹ Balle nale bito cheyalə' gaocho yelə' guao de'en choso'ožia beñə' lao lgu'a lsaquə'an chse'ejni'alažə'e, na' yeballe nale bito gonən mal gaochon chedə' nezecho bito bi zjəzaquə' lgu'a lsaquə' ca'. Na' əchnia' le'e bito cheyalə' gon cuincho xen laogüe de'en chaquecho lechguale nezecho to de'en nezecho, sino cheyalə' gaquecho che yeziquə'achlə beñə' chso'onjilažə' Cristən' na' gaquə'engacchone'. ² Na' šə chaquecho lechguale nezecho to de'en nezecho,

cheyalə' gache'icho de que bito bi bi de de'en chejni'icho can' cheyalə' šejni'ichon. ³ Pero ša chaquecho che Diozən', chebeine' chio'o.

⁴ Na' ca naquə gwñable ša guac gaochi yelə' guao de'en choso'ožia beñə' lao lgua'a lsaquə'an chse'ejni'alaže'ena', de'e liczə can' nalena', lgua'a lsaquə' ca' caguə bi zjəzaquə'an. Diozən' naquə Xancho, na' le'ena' cheyalə' šejni'alaže'acho. ⁵ De'e zan de'e de yoban' na' yežlyon' de'en chse'ejni'alaže' beñə' chəsə'əne' zjənaquən xanga'aque'. ⁶ Pero chio'o nezecho tozə Xacho Dioz nan' zo na' tozə Xancho Jesocristən' par güe'ela'ocho na' par güe'ega'acchone' yelə' bala'an. Na' Xacho Dioz na'anə' bene' par niçh Xancho Jesocristən' bene' yoguə'əlol beñə' na' yoguə' bia chsa'aš, na' yoguə' bichlə de'e zjəde.

⁷ Balə beñə' bišə'əcho bito chse'ejni'ine' ca de'en chejni'icho. Ne'e chsa'aquene' beñə' zaquə' lgua'a lsaquə' ca', na' de'e na'anə' chsa'aquene' chso'one' de'e mal cata' chsa'ogüe' yelə' guao de'en choso'ožia beñə' lao lgua'a lsaquə'an chse'ejni'alaže'e, chedə' cuiñə' se'ejni'isaogüe'ene' de que bitobi zjəzaquə' lgua'a lsaquə' ca'. ⁸ Bitobi zaquə' yelə' guaon' par niçh Diozən' yebeichene' chio'o. Diozən' chebeine' chio'o caguə por ni che de'en chaocho bitə'ətezə yelə' guaon' len caguə por ni che ša cui chaochon. ⁹ Pero bito cheyalə' goncho par niçh beñə' ljuəžjcho ca' yesə'əxope' so'one' de'e mal laogüe de'en cuiñə' se'ejni'isa'ogüe'ene' de que bitobi zjəzaquə' lgua'a lsaquə' ca'. ¹⁰ Le'e nacle beñə' chejni'i, na' ša cue'ele na' ye'ej gaole gan' chso'on beñə' lni che lgua'a lsaquə', de repent no beñə' chso'onlilažə' Jesocristən' yesə'əle'ine' le'e na' leczə se'enene' sa'ogüe' de'en choso'ožia beñə' lao lgua'a lsaquə'an chse'ejni'alaže'e. Na' balə' əsa'aquene' de que əsa'ape' dolə' ša sa'ogüe'en chedə' ne'e chsa'aquene' beñə' zague'e lgua'a lsaquə' ca'. ¹¹ Na' chio'o bachejni'icho de que bito bi zjəzaquə' lgua'a lsaquə' ca', bito cheyalə' goncho bitə'ətezə de'e gon par niçh beñə' bišə'əcho ca' cuich so'onlilaže'e Cristən' na' yesə'əbiayi'e. Cristən' bnežjw cuine' gwsə'ot beñə' le' lenczə por ni che beñə' bišə'əcho ca' beñə' ca' cuiñə' se'ejni'isaogüe' de que bito bi zjəzaquə' lgua'a lsaquə' ca'. ¹² Contr beñə' bišə'əcho can' choncho ša choncho par niçh sa'ogüe' de'en choso'ožia beñə' lao lgua'a lsaquə'an chse'ejni'alaže'ena'. Na' cata' choncho contr lega'aque', leczə contr Crist nan' choncho, na' chapcho dolə' laogüe'ena'. ¹³ De'e na'anə' nia' ša por ni che belə' de'en chaogua' gonən par niçh beñə' bišə'əcho ca' yesə'əxope' so'one' de'e mal, cuatach gaogua'an par niçh cui yesə'əxope' so'one' de'e malən'.

9

Pabən' be'e dižə' de que naque' doalje apostol

¹ Nezele de que nada' naca' apostol, na' napa' yelə' chnabia' par ənia' naquən' gona'. Nezele de que bable'ida' Xancho Jeso'osən' na' de que chonlilažə'əlene' chedə' nada' be'elena' le'e dižə' güen dižə' cobə che'ena'.

² La'anə'əczə ša beñə' ca' yelə' bito chse'ejle'e de que naca' apostol, pero le'e chejle'ele. Na' de'en chonlilažə'əle Xancho' ben' bselə' nada' chlo'ele de que de'e li naca' apostol che'ena'.

³ De'e nga nia' chzoa' rson lao beñə' ca' chəsə'əne' cui bselə' Diozən' nada' par naca' apostol. ⁴ Nada' napa' yelə' chnabia' par naba' gonle nada' mantener žalə' ye'enda' gonle ca'. ⁵ Deczə lsens par əgwšagna' a len no'olə chonlilažə' Cristən'. Na' žalə' gwšagna'a deczə lsens par əçhi'ane' con ga ša'a, can' chon Bedən' na' apostol ca' yelə' na' beñə' ca' zjənaquə bišə' Xancho Jesocristən'. ⁶ Zaquə'əczə Bernaben' na' nada' par cuich gonto' žin len

ni'a na'ato' nič gonle neto' mantener žalə' ca', la' yeziqə'əchlə beŋə' ca' choso'osed choso'olo'i xtižə' Diozən' bito chso'one' žin len ni'ana'aga'aque'.
 7 Ca naqəə soldad bito chyixjue' che gast che'ena' sino que nitə'əczə beŋə' chəsə'əyixjw len. Na' notono gazə zan yag oban' šə cui gaogüe' frot dao' chein' catə' yesə'əbian, na' nic no əgwye xonj baquə' šə cui ye'eje' latə' lech chebən'.
 8 Ca de'en nia' ca' bito naquən xbab che beŋəch, sino leczə can' na lei de'en bzoj de'e Moizezən'.
 9 Quinga bzoje' le'e lein': "Bito əgwseyjwle cho'a go'on ca' žlac choso'olej choso'ošoşjəb trigon' par chchoj xeina'." Caguə por ni che de'en chi' yichj Diozən' go'on ca'azən' bene' mendad par bzoj de'e Moizezən' ca'.
 10 Chzejni'ine' chio'o de que naquəczən güen goncho mantener beŋə' ca' chso'on xšin Diozən' entr chio'o, na' leczə de'e na'anə' nyojən de que ben' chgua'an go'on na' ben' chonšao' trigw cheyalə' yesə'əzi'e latə' güejə cwseš che de'en chso'one'.
 11 Bač goclento' le'e par nič chejni'ile xtižə' Diozən' na' de'e na'anə' bito naquən mazəchlə de'en cheyalə' gonle žalə' ŋabto' gonle neto' mantener.
 12 Chonle mantener yeziqə'əchlə beŋə' choso'osed choso'olo'ine' le'e na' neto' zaquə'əchto' par gonle neto' mantener cle ca' lega'aque'.

Pero bito chŋabto' gonle neto' mantener. Chgo'o chchejlažə'əto' bitə'əteza de'en chac cheto' par nič cui bi bi gwžon šanch chio'o chzenagcho che dižə' güen dižə' cobə che Cristən'.
 13 Ca'aczən' chac len beŋə' ca' chso'on mendad lo'o yo'odao' əblao che neto' beŋə' Izrael, chsa'aque' mantener len de'en chəsə'ənežjo beŋə' Izrael ca' lega'aque'. Na' bxož ca' choso'ozey bia yixə' par chso'elaogüe'e Diozən', chosyo'ocua'anə' latə' güejə de'e chsa'ogüe' che bia ca' chso'ote'ena'.
 14 Na' ca'aczən' baben Xancho Jesocristən' mendad de que beŋə' ca' choso'ozenag che dižə' güen dižə' cobə che'ena' cheyalə' so'one' mantener beŋə' ca' chəsə'əyixjui'en len lega'aque'.
 15 Pero nada' ža, bitonə' ŋaba' gonle nada' mantener, na' caguə chzoja' de'e nga ŋa'a par nič gonle ca'. Yebeichləda' gata' caguə ca' ŋaba' gonle nada' mantener, chedə' lechguale chebeida' can' guac əŋia' de que bito bi bi gan chona' de'en əchyixjui'a dižə' güen dižə' cobə che Jesocristən' len le'e.

16 Bito gaquə əŋia' de que to goclen xennə' chona' laogüe de'en chyixjue'ida' beŋə' dižə' güen dižə' cobə che Jesocristən'. Diozən' gwleje' nada' par chyixjui'an na' chonən byen gona' con can' ne'ena', na' probchguazə nada' žalə' cui chzenaga' par chixjui'a dižə' güen dižə' cobə che'ena'.
 17 Žalə' chyixjui'an por ni che de'en na xbab chia'an gona' ca', ŋaba' gonle nada' mantener. Pero bito əŋacho de que naquən xbab chia' gona' ca'. Diozən' gwleje' nada' par əchyixjui'an na' de'e na'anə' cheyalə' chixjui'an.
 18 Na' cheba chezaquə'əlažə'a de'en cui chŋaba' gonle nada' mantener ca' de'en chyixjui'a dižə' güen dižə' cobə che Jesocristən' len le'e. Bitobi laxjua' chzi'a ca' de'en chyixjui'an, la'anə'əczə zaca'a par gonle nada' mantener.

19 Chzexjw yichja' chon cuina' ca xmos yoguə'əlol beŋə' par nič šanch beŋə' so'onlilažə' Cristən', la'anə'əczə Diozən' none' nada' beŋə' gwnabia'.
 20 Catə' zoa' len beŋə' Izrael ca' chona' con can' chon neto' beŋə' Izrael na' leczə chona' yoguə' de'e ca' zjənyoj le'e lei de'en bzoj de'e Moizezən', la'anə'əczə ŋezda' bito chyažjən gona' ca' par nič yebei Diozən' nada'. Pero naogua' costombr ca' par nič ca' lega'aque' yoso'ozenague' chia' na' so'onlilažə'e Cristən'.
 21 Na' catə' zoa' len beŋə' cui zjənombia' lei de'en bzoj de'e Moizezən' bito naogua' costombr ca' de'en chon lein' mendad ŋaoto', par nič ca' beŋə' ca' cui zjənombia' lei de'en bzoj de'e Moizezən' yoso'ozenague' chia' na' so'onlilažə'e Cristən'. Bito ŋacho cui chzenaga' che lei che Diozən', chedə' la' zoa' chzenaga' che Cristən'.
 22 Catə' zoa' len beŋə' cuinə' se'ejni'isaogüe'ene'

can' chene'e Diozən' goncho, bito chona' de'e sa'aque'ne' zjənaquən de'e mal goncho la'anə'əczə nəzda' bito zjənaquən mal. Chi' yichja' naclə gona' par niç yoso'ozenague' chia' na' so'onlilažə'ache' Cristən'. Chona' xte gan' zelao chzaquə'əda' par chaquələna' yoguə'əlo' beṇə' par niç ca' šəba'le' so'onlilažə' Cristən'. ²³ Yoguə'əlo' de'en chona', chona'an par niç se'ejle' beṇə' dižə' güen dižə' cobə' che Cristən', chedə' la' che'enda' šancho na' txen socho mbalaz.

²⁴ Nezecho catə' beṇə' chso'one' carrer yogue'e chsa'acdoe' par niç chatə'əbia' noe' chon gan, na' tozə ben' chon gan chzi'e premio. Pero na' chio'o, to tocho cheyalə' güe'elažə'əcho goncho cayanə'an chene'e Diozən' par niç ca' gaquə' gone' ca so to tocho mbalaz catə'an yežincho gan' zoe'enə'.

²⁵ Beṇə' deportist ca' chsa'əgo'o chsa'əchejažə'e cui chso'one' con can' na cuerp čhega'aque'enə' par niç chsa'aque'che' beṇə' gual. Chso'one' ca' čhedə' chse'enene' so'one' competir na' yesə'azi'e to premio, la'anə'əczə naquən to premio de'e te čhei. Na' chio'o bito cheyalə' güe'echo latjə' nabia' la'ažda'omalchon' chio'o par niç Diozən' gone' ca socho mbalaz catə' yežincho gan' zoe'enə'. Na' premio de'en gon' Diozən' chio'o caguə' de'e te čhein'.

²⁶ Ca naquə' beṇə' deportist ca', la'anə'əczə šə chsa'acdoe', bito so'one' gan šə cui zjəneze' ga zelao yesə'əžine'. Na' šə beṇə' chso'one' bocsear, cheyalə' yesə'əneze' nac yoso'oçhitje' ponetən' par niç so'one' gan. Na' nada' gwxaquə'əlebəda' ca to deportist beṇə' chacchgua laogüe de'en chona' do yichj do lažə'a' yoguə'əlo' can' na Diozən'. ²⁷ Na' bito chzenaga' čhe la'ažda'omala'an bitə'ətezə de'e mal de'en nan gona' len cuerp chia'anə'. Žalə' chzenaga' čhe la'ažda'omala'an bito yebei Diozən' nada' la'anə'əczə bagwdixjui'a dižə' güen dižə' cobə' čhe Jesocrisən' len beṇə' yoblə.

10

Bito cheyalə' goncho txen len beṇə' ca' chse'ejni'alažə' lguə'a lsaquə'

¹ Beṇə' bišə', che'enda' ənezele de que Diozən' gwzoe' len yoguə'əlo' de'e xaxtao' neto' beṇə' Izrael, beṇə' ca' besyə'əchoj Egipton'. Yogue'e jəsə'ənaogüe bejon' gan' yo'o Diozən' na' yogue'e gosə'ədie' Nisdəo' Exnan' lao goquən choplə par bla' yo biž. ² Na' yoguə'əlo'le' gwsa'aque' txen len de'e Moisezən' ca de'en gwčhe'e lega'aque' gosə'ədie' nisdə'onə' na' gatə'ətezəchlə ja'aque' bedote gwzo Diozən' len lega'aque' lo'o bejon'. ³ Na' yoguə'əlo' de'e xaxta'oto' ca' gwsa'ogüe' tozə clas yelə' guao de'en bnežjw Diozən' lega'aque'. ⁴ Na' yogue'e tozə nis de'en bnežjw Diozən' lega'aque' gwse'eje'. Na' Cristən' gwxaquə'əlebene' ca yejən' gan' bchoj nisən' de'en gwse'eje', chedə' Cristən' gwdalene' beṇə' ca' na' goclene' lega'aque'. ⁵ Na' la'anə'əczə Diozən' bene' güen len yogue'e con to čopgue' gwso'one' can' chazlažə' Diozən', na' de'e na'anə' Diozən' bene' par niç gosə'əbiayi' beṇə' ca' yelə' latjə' dašən'.

⁶ Beṇə' ca' gosə'əzelažə'e gatə' bi de'e gatə' čhega'aque' de'en cui gone'e Diozən' gwnežjue' lega'aque'. Na' de'en goc čhega'aque' chzejni'in chio'o de que bito cheyalə' selažə'əcho goncho bi de'en naquə' de'e mal. ⁷ Bito cheyalə' šejni'alažə'əcho lguə'a lsaquə' nic bitə'ətezəchlə de'en chse'ejni'alažə' beṇə' ca' cui zjənombia' Diozən'. Zan beṇə' Izrael ca' gwse'ejni'alažə'e lguə'a lsaquə' na' nyoj Xtizə' Diozən' cho'en dižə' can' gwso'one' lao lguə'a lsaquə' go'oṇ dao' bian' gwse'ejni'alažə'e, nan: "Gosə'əbi'e gwse'ej gwsa'ogüe' na' gosə'ənite'e gwso'one' legr." ⁸ Na' leczə ca' bito cheyalə' co'o xtcho'o goncho bichlə de'e yelə' zto' de'en nac ca'. To ža zan beṇə' Izrael ca' bosə'ožə' xtoga'aque', na' lao ža na' gwsa'at šonechoa milga'aque'. ⁹ Bito cheyalə' goncho Xancho Diozən' prueb šə leine' can' ne'enə'. Zan beṇə' Izrael ca' gwso'onene' prueb šə leine'

can' ne'enə, na' Diozən' bsele'e beļ əznia gwsa'ob lega'aque' na' zane' gwsa'at. ¹⁰ Zan beṅə' Izrael ca' besa'əže'e'eše'e len Diozən'. De'e na'anə' Diozən' bsele'e to angl bete' lega'aque'. Na' chio'o ža bito cheyalə' əže'ešə'əcho len Diozən'.

¹¹ Yogua' de'e ca' goc čhega'aque' zjənyoṅ par čəsə'əzejni'in naquən' cheyalə' gon chio'o zocho tyemp nga babidə Xancho Jesocristən'. ¹² De'e na'anə' notə'ətezcho šə čhaquecho zocho chonlilažə'əcho Jesocristən', cheyalə' gapcho cuidad par nič cui goncho de'e malən'. ¹³ Bitə'ətezə de'e mal de'en čho'oyelə' gwxiye'en chio'o goncho, bito nacho zdebəchlə chac čecho cle ca čhe notə'ətezəchlə beṅə'. Na' Diozən' zocze' chaclene' chio'o can' ne'enə'. Čhone' chio'o fuers balor par nič cui gwzenagcho čhe gwxiye'enə', na' čzejni'ine' chio'o naquən' goncho par nič soicho cui goncho de'e malən'.

¹⁴ De'e na'anə' xi'indaogua'a, bito gonle t xen len beṅə' ca' chse'ejni'alažə' lgua'a lsaquə'. ¹⁵ Bachejni'ile. De'e na'anə' legon xbab čhe de'e quinga čzejni'ida' le'e par nič ənezele de que čona' le'e to consejw güen. ¹⁶ Na' ca naquə de'en čhe'ej čhaocho par čjəyeza'alažə'əcho bi zejen par chio'o de'en gwso'ote' Cristən', yelə' čoxcwlen čhe Dioz nan' čhe'echo catə'an čhe'ej čhaochon. Na' ca de'en čhe'ej čhaochon' zejen de que chio'o chonlilažə'əcho Cristən' naccho tozə, čhedə' Crist na'anə' bnežjw cuine' gwso'ote'ene' na' blalj xčhene'enə' par gwdixjue' xtolə'əchon'. ¹⁷ Tozə yetxtilən' čhozjcho na' yoguə'əcho čhaocho latə' güejən par čjəyeza'alažə'əcho bi zejen de'en gwso'ote' Cristən'. La'aṅə'əczə naccho beṅə' zan, de'en čhao yoguə'əcho tozə yetxtilən' chlo'en de que yoguə' chio'o chonlilažə'əcho Cristən' naccho ca tozə family laogüe de'en ngodə'əcho t xen len le'.

¹⁸ Na' legon xbab čhe de'e nga. Beṅə' Izrael gwlaž čhia' ca' catə' čso'ela'ogüe'e Diozən' čso'ote' bia yixə' to lao mes de'en naquə par Diozən'. Na' baltezə beṅə' čhsa'ogüe' xpelə' bian' čso'ote' lao mesən' naquəga'aque' t xen čso'elaogüe'e Diozən'. ¹⁹ Na' ca'aczən' naquən len chio'o, šə gaocho yelə' gūao de'en čoso'ožia beṅə' lao lgua'a lsaquə'an čse'ejni'alažə'enə', so'one' xbab de que zocho lez gaquəlen lgua'a lsaquə' ca' chio'ona'. Bitə'ənačo de que lgua'a lsaquə' ca' zjəzaquə'an par əsa'aclenən beṅə', na' nic bi zakuə' ca de'en čjəsə'əžie' yelə' gūaon' laoga'aquen'. ²⁰ Čhe'enda' ənezele de que beṅə' ca' cui zjənombia' Diozən' catə' čjəsə'əžie' yelə' gūaon' lao lgua'a lsaquə'an čse'ejni'alažə'enə', caguə par Dioz na'anə' čjəsə'əžie'en, sino par de'e xio' ca'anə'. Na' bito čhe'enda' gonlenle de'e xio' ca' t xen. ²¹ Bitə' cheyalə' ye'ej gaocho de'en čhe'ej čhaocho par čjəyeza'alažə'əcho bi zejen par chio'o de'en gwso'ot beṅə' Xancho Cristən' šə leczə ye'ej gaocho de'en čjəsə'əžia beṅə' par de'e xio' ca'. ²² Contr Dioz nan' čoncho šə čhe'ej čhaocho de'en čjəsə'əžia beṅə' par de'e xio' ca', na' šə čhe'ej čhaochon čoncho ca čhza' a Diozən' chio'o. Na' bitə' ənačo naquəčcho beṅə' gualəč cle ca Diozən' par nič cui bi gac čecho šə goncho contr le'.

Bitə' goncho de'en naquə mal par lježjcho

²³ Na' la'aṅə'əczə čəsə'əne': "De lsens par goncho bitə'ətezə", cheyalə' žjəsə'alažə'əcho de que caguə yoguə' de'en gonchon' naquən güen par chio'o. Na' la'aṅə'əczə šə čhaquecho deczə lsens par goncho bitə'ətezə, caguə yoguə'əṅṅə' gaquəlenən chio'o. ²⁴ Ni tocho bitə' cheyalə' goncho bitə'ətezə de'en goncho šə naquən mal par lježjcho, la'aṅə'əczə čhaquecho naquən to de'e güen par chio'o.

²⁵ Bitə'ətezə belə' de'en čso'ote'e ya'anə' legaon sin cui ənable šə bosə'ožie'en lao lgua'a lsaquə'an čse'ejni'alažə'e. Nia' ca' par nič cui gaquəžejlažə'əle šə

naple dolə' por ni che de'en gaolen. ²⁶ Nezecho de que guac si'icho bitə'atezə belə' de'en chso'ote'e ya'anə', chedə' Xtižə' Diozən' nyojən nan: "Che Xancho Diozən' yežlyo nga, beṇachən', bia yixə' na' yogua' de'e zjəde lao yežlyon'."

²⁷ Na' catə' beṇə' cui chso'onlilažə' Cristən' so'one' chio'o combid ližga'aque'enə' par əxjtaocho, šə šejcho con gaotezcho bitə'atezə de'en so'one' gaocho. Bitə' əṇabga'aquechone' šə bosə'ožie'en lao lgua'a lsaquə'an chse'ejni'alaže'enə'. Diozən' bito chene'ene' gaquəəzejlažə'əcho šə napcho dolə' por ni che šə bi de'en gaocho. ²⁸ Na' šə no ye' chio'o de que baboso'ožie' belə'an to lao lgua'a lsaquə'an chse'ejni'alaže'e, bito gaochon šə ca' par nič be'en ye' chio'o ca' cui gone' xbab de que lenczchon' chejni'alažə'əcho lgua'a lsaquə' ca' na' par nič cui gone' xbab de que napcho dolə' šə gaochon. ²⁹ Bitə' əṇacho de que naquən de'e mal gaochon, pero par nič ben' gwna chio'o de que baboso'ožie'en lao lgua'a lsaquə'an cui gaquene' de que choncho de'e mal, de'e na'anə' cui gaochon.

De repent chonle xbab bixchen' cheyalə' cuejyichjcho cui goncho bitə'atezə de'en goncho šə por ni che de'en gonchon' əsa'aque beṇə' ljuəžjchon' de que napcho dolə'. ³⁰ Na' de repent chonle xbab bixchen' əṇa ljuəžjchon' choncho de'e mal chaocho to yełə' guao šə cho'echo yełə' choxcwlen che Diozən' por len. ³¹ Quinga naquən, bitə'atezə de'en goncho cheyalə' gonchon ca gaquəlenən beṇə' yoblə par nič əso'elaogü'e Diozən', na' bito ye'ej gaocho de'en gonən par nič beṇə' yoblə cui əso'elaogü'e Diozən'. ³² Na' bito goncho par nič notə'atezə beṇə' yesə'əxope' so'one' de'e malən', la'əṇə'əczə šə beṇə' Izrael, o šə beṇə' cui zjənaquə beṇə' Izrael, na' la'əṇə'əczə naque' ljuəžj chio'o bagwlej Diozən' par chdopə chžagcho cho'ela'ochə Cristən' o šə cui naque'. ³³ Ca'acžə nada' ža, bitə'atezə de'en chona' əchyiljəlažə'a naclən' chona'an par nič gaquəlenən beṇə' yoblə. Choncha' xbab che de'en gaquəlen beṇə' yeziquə'əchlə cle ca chona' xbab che de'en gaquəlen nada', chedə' che'enda' beṇə' zan yesyə'əchoj xni'a de'e malən'.

11

¹ Nada' ža chchojyichja' de'en che'enda' gona' par nič chona' de'en naquə güen par beṇə' yeziquə'əchlə. Na' leḡonšga ca' chedə' nada' chona' can' ben Cristən'.

Can' cheyalə' so'on no'ol ca' lao coltən'

² Lechgualə chebeida' de que chonle xbab chia' yoguə' las na' de que chjsa'alažə'əle de'en bsd blo'ida' le'e. Güenchguan' chonle chzenagle che de'e ca' bsd blo'ida' le'e. ³ Na' che'enda' ənezele de que notə'atezə beṇə' byo cheyalə' əgwzəxjw yichje' par nič Cristən' chnabi'ene'. Na' no'ol ca' cheyalə' yesə'əzəxjw yichjga'aque' par nič be'en chega'aque' ca' yesə'ənabi'e leḡa'aque', can' chon Cristən' chzəxjw yichje' par nič Diozən' chnabi'ene'. ⁴ Le'e beṇə' byo catə' gonle orasyon na' catə' chixjue'ele bi de'en bagwna Diozən' le'e, bito gwzo xlapə'əlen'. La' šə nzotezlen naquən to yełə' zto' par le'e na' zejen de que beṇachən' chnabi'e le'e, caguə Crist na'əzan'. ⁵ Na' le'e no'olə catə' gonle orasyon o catə' chixjue'ele bi de'en bagwna Diozən' le'e, le'e gwcuəša' yichjle can' choncze batə'atezə chchojle nič nacbia' de que beṇə' byo ca' chəsə'ənabi'e le'e. Yoguə'əcho nezecho naquən to yełə' zto' che no'olən' catə'an nšib yichje'en pelon, na' ca'acžə naquən len le'e no'olə šə cui chcuəša' yichjlen' catə'an chonle orasyon o catə'an chyixjue'ele bi de'en bagwna Diozən' le'e. ⁶ Na' šə cui chonle can' naquə costombr chele de'en chcuəša' yichjlen' batə'atezə chchojle, yejni'a əḡwšib yichjlen'. Na' šə chaquəle zto' par əḡwšiblen,

mejor aɣwcuasá'əczlen can' chso'on no'ol ca' yela'. ⁷ Na' ca naquə le'e beṇə' byo, bito cheyalə' aɣwcuasá' yichjlen' catə' gonle orasyon na' catə' chixjue'ele bi de'en bagwna Diozən' le'e, chedə' Diozən' bene' le'e par nich naple yelə' chnabia' can' napə le'enə' na' par aɣwlo'ele ca güenna' chone'enə'. Na' le'e no'olə, Diozən' bene' le'e par aɣwlo'ele ca güenna' chso'on be'en chelen'. ⁸ Diozən' bito bene' beṇə' byon' len costiy che no'olən' sino que gwleje' costiy che beṇə' nechən' par bene'en no'olən'. ⁹ Na' Diozən' bito bene' beṇə' byon' par gaqualene' no'olən' sino que bene' no'olən' par gaqualene' beṇə' byon'. ¹⁰ De'e na'anə' no'ol ca' cheyalə' yesə'alo'e de que chəsə'anabia' beṇə' byo ca' lega'aque'. Cheyalə' so'one' ca' chedə' angl ca' chəsə'əgüie' naquən' chon chio'o beṇəch. ¹¹ Pero ngodə'əczcho t xen len Xancho Jesocristán' la'anə'əczə sə naccho beṇə' byo o sə naccho no'olə, na' de'e na'anə' bito cheyalə' so'on no'olə ca' xbab de que bito chəsə'əyazjene' beṇə' byo na' nic neto' beṇə' byo gonto' xbab de que bito chyažjeto' no'olə. ¹² Naquən de'e li can' ben Diozən' gwleje' costiy che beṇə' byo nechən' par bene'en no'olə nechən', na' nezecho yoguə'əte beṇə' byo gwaxan no'olə lega'aque'. Na' Dioz na'anə' bene' beṇəch, bene' bia ca' chsa'aš, na' bene' bitə'ətezəchlə de'e zjəde.

¹³ Legon xbab chele na' gacbe'ile de que caguə de'e šo'olažə'əcho sə no no'olə gone' orasyon sin cui aɣwcuasə' yichje'enə', chedə' can' naquə costombr chechon'. ¹⁴ Na' leczə nezecho bito chazlažə'əcho sə beṇə' byon' cui aɣwšib yichje'enə', con güe'e latjə ətonən. Naquən to yelə' zto' che' sə gone' ca'. ¹⁵ Pero na' no'olən' xochechgua yišə' yichje'en sə žian de'e tonə. Diozən' none' par nich yišə' yichj no'ol ca' chaquən de'e tonə par chcuasə'an yichjga'aque'enə'. ¹⁶ Na' sə nole bito chazlažə'əle de'e quinga babzoja' na' sə chaquele aɣwšašle chei, əṇia' le'e clar de que neto' apostol bito cho'eto' latjə so'on no'ol ca' orasyon lao ndopə nžagcho sin cui yoso'ocuašə' yichjga'aque'enə', na' nic chsoe' beṇə' ljuežjto' ca' latjə so'one' ca' gatə'ətezəchlə ža' beṇə' bagwlej Diozən' par chəsə'ədopə chəsə'əžague' chso'elaogüe'e Cristən'.

Catə'an gwse'ej gwsa'ogüe' t xen bito jəsyə'əza'alažə'e can' bnežjw cuin Xancho Jesocristán' por ni čhega'aque'

¹⁷ Leczə de de'e yoblə de'en əṇia' le'e na' ca naquə lennə' bito gaquə əṇia' de que chonle güen. De'en chonle lao chdopə chžagle t xen par cho'ela'ole Cristən' chonən mal len le'e lgu'a de'e gaqualenə' le'e. ¹⁸ Enia' ca' chedə' babenda' dižə' de que cata' chdopə chžagle par cho'ela'ole Cristən' bito chonle t xen len beṇə' ljuežjle. Na' de repent dižə' de'en babenda' naquən de'e li. ¹⁹ De'e li nitə' balə beṇə' entr le'e cui chso'one' t xen len yoguə'əle. Na' de'en cui chso'one' t xen chloe'en non' chonlilažə' Cristən' do yichj do lažə'e na' non' cui. ²⁰ Na' catə' chežagle par chaole t xen, bito chonle ca' žjəyeza'alažə'əle de'en bnežjw cuin Xancho Jesocristán' por ni checho catə'an gwso'ote'ene', la'anə'əczə chedopə chežagle par žjəyeza'alažə'əlen. ²¹ To tole che'ej chaole de'en noxə'əle sin cui chbezə ljuežjle ca'. Bito chonlen tozə par nich yoguə'əle gaolen. De'e na'anə' balə ne'e chdonle catə' chedaole na' yeballe chzožele de'e tant che'ej chaoxatle. ²² Nca'alə xneze yega'an ližle ye'ej gaole cle ca ye'ej gaole lao beṇə' cui de čhega'aque' sə cui aɣwnežjwle čhega'aque'. Chonga'aquele ljuežjle ca beṇə' cui bi zjəzaquə, la'anə'əczə t xen len chio'o bagwlej Diozən' lega'aque' par chso'elaogüe'e Jesocristán': Chonle ca chsa'aque'ne' tolə de'en cui de čhega'aque'. Bito gonle xbab əṇia' de que güenna' chonle de'en chonle ca'.

Ch'ej chaocho par chjəyeza'alažə'əcho de'en bnežjw cuin Xancho Jesocristán' por ni checho

²³ Xancho Jeso'osən' bene' par ničh nežda' can' chene'ene' goncho par žjəyeza'alažə'əcho de'en bnežjw cuine' por ni checho catə'an gwso'ote'ene'. Na' babzejni'ida' le'e de que že'enə' catə'an Jodən' bdie' Xancho Jeso'osən' lao na' benə' mal ca, Xancho na'ana' bexe'e to yetxtilən'. ²⁴ Na' lao noxe'en be'e yelə' choxcwlen che Diozən'. Nach bzoxxje'en, na' gwne': "Legao yetxtil nga. Lenne' naquən cuerp chia' de'en əgwnežjua' por ni chele. Quinga gonle par žjəyeza'alažə'əle ca de'en gwnežjua'an." ²⁵ Beyož gwsa'ogüe' yetxtilən' bexe'e to tas nis oban' na' leczə be'e yelə' choxcwlen che Diozən'. Na' gože' benə' ca: "De'en yožə lo'o tas nga zejen de que Diozən' solao gone' de'e cobə de'en none' lyebe gone' par gaqualene' le'e. Na' gone'en chedə' so'ote' nada' na' laljə xchena'anə' por ni chele. Na' batə'ətezə ye'ejlen can' ye'ejlen na'a, le'e yosa'alažə' ca de'e gwnežjo cuina' por ni chele." ²⁶ Na' nada' Pab cheznia' le'e, yoguə' las catə'an gaocho yetxtilən' na' catə'an ye'ejcho nis oban' de'en che'ej chaocho par chjəyeza'alažə'əcho ca de'en bnežjw cuin Xancho Jesocristán' por ni checho, choncho ca yesə'əneze benə' de que gwdixjue' xtolə'əchon' catə'an gwso'ote'ene'. Na' can' gonchcho xte catə'an yide' de'e yoblə.

Can' cheyalə' goncho catə' che'ej chaocho par chjəyeza'alažə'əcho de'en bnežjw cuin Xancho Jesocristán' por ni checho

²⁷ De'e na'ana' šə bito güe'ela'əcho Xancho Jesocristán' do yichj do lažə'əcho bito naquən güen ye'ej gaocho de'en che'ej chaocho par chjəyeza'alažə'əcho ca de'en bnežjw cuin Xancho Jesocristán' por ni checho. Na' leczə bito naquən güen ye'ej gaochon catə' cui zocho binlo len Diozən' o len ljuežjcho. Gapcho dolə' šə ye'ej gaochon ca, chedə' goncho ca cui bi zaquə' de'en bnežjw cuin Xancho Jesocristán' blalj xchene'enə' por ni checho. ²⁸ Catə'an che'ej chaocho par chjəyeza'alažə'əcho ca de'en bnežjw cuin Xancho Jesocristán' por ni checho, to tocho cheyalə' gonyanə'əcho xbab šə zocho binlo len Diozən' na' len ljuežjcho ca' par ničh ye'ej gaocho de'en de ye'ej gaocho. ²⁹ Na' šə che'ej chaochon sin cui goncho xbab ca de'en bnežjw cuin Xancho' por ni checho Diozən' gone' chio'o castigw. ³⁰ Na' de'en che'ej chaolen sin cui chonlə xbab bi zejen, de'en na'ana' balə benə' ljuežjlen' bagwsa'at na' zanle chacšene. ³¹ Pero na' šə gonyanə'əcho xbab naquən' goncho par ničh socho binlo len Diozən' na' len ljuežjcho, nachən' bito gon Diozən' chio'o castigw por ni che can' che'ej chaochon'. ³² Catə' napcho dolə' na' che'ej chaochon, Xancho Diozən' chone' chio'o castigw par ničh cheyache'icho de que de'e malən' choncho. Chone' ca' par ničh cui si'icho castigw zejlicane can' gac che benə' ca' cui chso'elao' le'.

³³ De'e na'ana' benə' bišə, catə' ədopə əžagle txen par ye'ej gaole, lecueza ljuežjle ca' par ničh ye'ej gao yoguə'əle txen. ³⁴ Šə de'en chbil chdonle na'azə, nca'alə xneze yega'an ližle ye'ej gaole, caguə ca gon Diozən' le'e castigw can' chonle catə'an chdopə chžagle. Na' ne'e deczə de'en che'enda' gwzejni'ida' le'e naquən' gonle, pero catə' yida' de'e yoblə gan' zolenə' cana'ach əgwzejni'ida' le'e che de'e ca'.

12

Spirit che Diozən' chaclenən to tocho par goncho bi de'en chene'en goncho

¹ Benə' bišə, de de'en che'enda' ənezele che de'en chon Spirit che Diozən' chaclenən chio'o chonli'alažə'əcho Jesocristán'.

² Nezele cata'ən cuina' gombi'ale Diozən' banxoayagle par chejni'alažə'əle lgu'a lsaquə' ca' con can' bzejni'i beṇə' le'e, la'anə'əczə lgu'a lsaquə' ca' bito zjənye'en biš xne. ³ Pero na'a ža, che'enda' ənezele de que Spirit che Diozən' bito chonən par ničh no əṇa de que Jeso'osən' naque' beṇə' maldit. Na' notono no əṇa de que Jeso'osən' naque' Xane' šə cui chon Spirit che Diozən' par əṇe' ca'.

⁴ Tozə Spirit che Diozən' zon na' nža' nža' can' chaclenən to tocho par goncho bi de'en goncho na' par ənezecho bi de'en nezecho. ⁵ Tozə Xancho Jesocristən' cho'ela'ocho la'anə'əczə nža' nža' can' chac gon to tocho xšine'enə'. ⁶ Leczə tozə Dioz nan' zo la'anə'əczə nža' nža' can' chone' len to tocho par ničh choncho xšine'enə'. ⁷ Na' Spirit che Diozən' zon len to tocho par ničh ca' chac choncho de'en chaclenən ljuəzjcho. ⁸ Spirit che Diozən' chonən par ničh balcho cho'echo dižə' che Diozən' de'en naquən lechguale dižə' sin', na' leczə Spirit na'anə' chaclenən yebalcho par chejni'icho che Diozən' na' par cho'echo xtiže'enə'. ⁹ Na' Spirit na'anə' chonən ca balcho chonlilažə'əchguacho Diozən' par ničh chac bitə'ətezə de'en chnabechone' gaquə. Na' leczə Spirit na'anə' chonən par ničh balcho chac choncho ca chəsyə'əyaque beṇə' chsa'acšene. ¹⁰ Na' Spiritən' chonən par ničh balcho choncho milagr, na' balcho chyixjue'echo bi de'en bagwna Diozən' chio'o. Na' leczə Spirit nan' chaclenən yebalcho par ničh chnezecho che bitə'ətezə de'en chso'on beṇə' šə za'an che Spirit che Diozən' o šə che de'e xio'ona'. Na' Spirit na'aczan' chaclenən yebalcho par chchoj cata' cho'echo gwde gwdele dižə' de'en cui chejni'icho, na' chaclenən yebalcho par chozejni'iga'aquechone' bi zeje dižə' de'en cho'echon'. ¹¹ Tozə Spiritən' chaclenən yoguə'əcho par ničh choncho yoguə' de'e ca' chene'en gon to tocho.

Yoguə' chio'o chonlilažə'əcho Cristən' naccho tozə, can' naquə cuerp chechon'

¹² Cuerp chechon' nsa'an zan part pero de'en zjəngoda'ən txen naquən tozə cuerp. Ca'aczə naquən len yoguə' chio'o chonlilažə'əcho Cristən', naccho tozə can' naquə cuerp chechon'. ¹³ Balə chio'o naccho beṇə' Izrael na' yebalcho bito naccho beṇə' Izrael. Balcho naccho beṇə' esclabos na' yebalcho bito naccho. Pero yoguə'əcho gwchoacho nis par chlo'en de que Spirit che Diozən' babənən ca ngoda'əcho txen len Cristən'. Na' tozə Spirit na'anə' zon lo'o yichjla'aždao' yoguə'əcho.

¹⁴ Cuerp chechon' nsa'an zan part, na' nža' naquə to to partən'. ¹⁵ Žalə' ni'achon' əṇan: "Bito naca' tozə len cuerpən' chedə' bito naca' ne'ina'", caguə ni che de'en əṇan ca'anə' cui naquən tozə len cuerpən'. ¹⁶ Le'egatezə ca' žalə' nagchon' əṇan: "Bito naca' nada' tozə len cuerpən' chedə' bito naca' jelaogüei." ¹⁷ Žalə' doxen cuerp chechon' naquən jelaocho, bito gaquə yenecho. Le'egatezə ca' žalə' doxen cuerpən' naquən nagcho, bito gaquə le'icho. ¹⁸ Pero Diozən' bsi'e xneze par ničh cuerp chechon' nsa'an zan part de'e chso'on žin con can' gwyazlaže'e. ¹⁹ Bito nya' cuerp chechon' žalə' nsa'an tozə part. ²⁰ Cuerp chechon' nsa'an zan part pero de'en zjəngoda'ən txen naquən tozə cuerp.

²¹ De'e na'anə' jelaochon' bito gaquə ye'en na'achon': "Bito chyažjda' le'." Na' nic gaquə ye' yichjchon' ni'achon': "Bito chyažjda' le'." ²² La'anə'əczə cuerp chechon' nsa'an balə part de'e cuitec bi fuers chei de, bia'aczə lechguale chyažjchon. ²³ Na' part ca' nsa' cuerp chechon' de'en chaquecho cuitec bi zaquə', chi' yichjchon ca de'en cheyac xacho. Na' part ca' de'e cui chene'echo le'i beṇə', chcuəšə'əchon len xacho de'en chacwcho. ²⁴ Pero part de'en nsa' cuerp chechon' de'en banaquə xoche bito chcuəšə'əchon. Na' Diozən' none' cuerp chechon' ca chi' yichjcho che part ca' de'en cui zjənaquə

xoche. ²⁵ Ca'acžan' bsi'e xneze par ničh chio'o cho'ela'ocho Cristan' goncho txen tocho yetocho na' cue' yičh'cho gaqualen ljuěžjcho. ²⁶ Na' ša bin' chac che tocho, yogua'echo chi' saqua'echo txen. Na' ša chac güen che yetocho, yogua'echo socho mbalaz.

²⁷ Yogua'echo ngoda'echo txen len Cristan' na' to tocho gwxaqua'alebecho ca to part cuerp che'ena'. ²⁸ Na' entr chio'o chdopə chžagcho cho'ela'ocho Cristan', Dioz nan' gwleje' neto' naquəto' apostol, na' de'en ngü'e' lao na'ato' gonto' naquən de'e zaqua'əchgüei. Na' lecze'en gwleje' yebale' par chəsə'əyix'jui'e de'en ne'ena'. Na' de'en chso'one'ena' lecza naquən de'e zaque'e. Na' yebale' gwlej Diozan' par choso'osed choso'olo'ine' xtiže'ena'. Na' de'en choso'osed choso'olo'ine' xtiže'ena' lecza naquən de'e zaque'e. Na' lecza gwlej Diozan' beṇə' chso'on miłagr na' beṇə' chso'on par chəsya'əyaque beṇə' chsa'acšene, na' beṇə' chsa'aclen yeziquə'əchlə beṇə' ša bi de'en chəsə'əyazžene'. Na' gwleje' beṇə' chəsə'anabia' chio'o chdopə chžagcho cho'ela'ocho Cristan', na' gwleje' beṇə' chso'e gwde gwdeleḏa diža' de'en cui chse'ejni'ine' con catə' chon Spiritan' ca chso'en. ²⁹ Pero caguə yogua'echo naccho apostol. Na' Diozan' bito gwleje' yogua'echo par chixjue'echo bi de'en bagwne' chio'o, na' nic gwleje' yogua'echo par əgwšed əgwlo'icho xtiže'ena', na' nic gwleje' yogua'echo par goncho miłagr. ³⁰ Caguə yogua'echo chac goncho ca yesy'əyaque beṇə' chsa'acšene, na' caguə yogua'əchon' chon Spirit che Diozan' par güe'echo gwde gwdeleḏa diža' de'en cui chejni'icho, na' caguə yogua'əchon' chac yozejni'icho bi zejen diža' de'en chon Spiritan' ca chso'e. ³¹ Chonle güen ša chzelaza'ale gaqualen Spirit che Diozan' le'e gonle de'e ca' de'en naquəch de'e zaque'e. Pero əgwlo'ida' le'e yeto de'e gonle de'en naquə de'e žialao xench.

13

Cheyalə' gaque che ljuěžj beṇəchcho

¹ La'aṇə'əczə ša chaccho gwde gwdeleḏa diža' de'en chsa'ac beṇəchən' na' de'en chsa'ac angl ca', pero ša bito chaquecho che ljuěžj beṇəchcho, bito bi bi zaqua'echo. Con gwxaqua'alebecho ca pedas ya de'en chso'on ššag na' ca platiy de'en choso'osiž beṇə' gocuež ca' la' xtiže'əchon' bitobi bi zaqua'an.

² Na' la'aṇə'əczə ša bagocwlen Spirit che Diozan' chio'o par ničh chyixjue'echo bi de'en bagwne' chio'o len yelə' guac che Spiritan', bito bi zaqua'echo ša bito chaquecho che ljuěžj beṇəchcho. La'aṇə'əczə ša nezecho yogua'əloḏ de'en cui no gwneze antslə, len la'aṇə'əczə ša chejni'icho yogua'əloḏ de'en naquə de'e zaque'e, bitoczə bi zaqua'echo ša cui chaquecho che ljuěžj beṇəchchon'. Na' la'aṇə'əczə ša lechguale chonliłaza'echo Diozan' par ničh chone' bitə'ətezə de'e zdebə de'en chṇəbechone' gone', bitoczə bi zaqua'echo ša cui chaquecho che ljuěžj beṇəchcho. ³ Na' ša cui chaquecho che ljuěžj beṇəchchon' bito bi zedəgua'an par chio'o la'aṇə'əczə ša əgwnežjwcho beṇə' yašə'an yogua' de'en deicho. Le'egatezə ca' ša cui chaquecho che ljuěžj beṇəchchon' bitobi zedəgua'an par chio'o la'aṇə'əczə ša əgwnežjo cuincho yoso'ozeye'.

⁴ Ša chaquecho che ljuěžj beṇəchcho, napcho yelə' chxenlažə' len lega'aque', na' choncho güen len lega'aque'; bito chgue'iga'aquechone' ša chac güen chega'aque'; na' bito cho'elao' cuincho; na' bito cha'alaza'echo. ⁵ Na' cata' chaquecho che ljuěžj beṇəchcho, bito choncho nacze len lega'aque', bito choncho xbab che cuinzcho, bito naccho beṇə' xtišjw, na' bito naccho beṇə' ggo'olaže'e. ⁶ Na' catə' chaquecho che ljuěžj beṇəchcho bito chebeicho ša non'

chon de'e mal, sino que chebeicho ša non' chon de'e güen. ⁷ Ša chaquecho che ljuežj benachcho chapcho yelə' chxenlažə' bitə'ətezə de'en chso'one benə' chio'o, na' choncho xbab güen che yoguə'əlöl benə', na' zocho lez so'on benə' güen yoguə' las, na' chgo'o chchejlažə'əcho len bitə'ətezə de'en chac.

⁸ Cuat əžin ža catə' cuich cheyalə' gaquecho che ljuežj benachcho. Pero gwžin ža catə' cuich gon Diožan' par ničh no čixjue'e bi de'en bagož'e'ene'. Na' gwžin ža catə' Spirit che'enə' gonən ca cuich əso'e gwde gwdelelə dižə' de'e cui chse'ejni'i benə' yoblə. Na' leczə gwžin ža catə' te che yoguə'əlöl de'en neze chio'o benach lao yežlyo nga. ⁹ Bitonə' nezecho yoguə'əlöl de'e ənezecho na' niqenə' gac čixjue'echo yoguə'əlöl de'en bagwna Diožan' chio'o. ¹⁰ Pero gwžin ža catə' gaquə cayanə'n chene'e Diožan' gaquə, na' cana'achən' cuich bi bi yega'an de'en cui gaquə cayanə'n chene'e Diožan'.

¹¹ Cata' gočcho bidao' be'echo dižə' can' chsoe' notə'ətezə bidao' dižə', na' leczə xbab chechon' goquən ca xbab čhega'acbo'onə', na' gwyejmi'icho con can' chse'ejni'ibo'. Na' na'a bagwcha'och bitoch choncho can' chso'on bidao'. ¹² Pero bitonə' šejni'icho binlo che Diožan'. De'e na'anə' gwxaquə'əlebecho ca benə' chgüie' benə' yoblə to lo'o spejw de'e cuitec chloe' binlo. Pero gwžin ža catə' šejni'iyane'echo che Diožan' can' chejni'ine' checho na'a. ¹³ Na'a ža, de'e quinga šonə chon Diožan' mendad goncho zejlicane: gonlilažə'əchone', socho lez gaquə güen checho, gaquecho che Diožan' na' che ljuežj benachcho. Pero de'en naquə de'e žialaoch goncho entr šonə de'e quinga, gaquecho che Diožan' na' che ljuežj benachcho.

14

Benə' ca' chso'elen Diožan' gwde gwdelelə dižə' de'en cui chse'ejni'ine'

¹ Cheyalə' güe'elažə'əcho par gaquechecho che Diožan' na' che ljuežj benachcho, na' leczə cue' yichjcho gaqualen Spirit che'enə' chio'o par goncho xšine'enə'. Na' mazəchlə cheyalə' cue' yichjcho par gaqualənən chio'o čixjue'echo de'en əna Diožan' chio'o. ² Balcho chon Spiritən' par ničh chchoj catə' cho'elencho Diožan' gwde gwdelelə dižə' de'en cui chejni'icho. Na' catə' cho'elencho Diožan' gwde gwdelelə dižə'n ca', caguə benach na'anə' cho'elenchon čhedə' bito chse'ejni'ine' dižə'n. Spirit nan' chonən par ničh cho'echo dižə' de'en chejni'i tozə Diožan'. ³ Pero catə' chyixjue'echo de'en bagwna Diožan' chio'o choncho par ničh ljuežjcho ca' nitə'ətezə nite'e so'onlilažə'e le', na' chtipcho lažə'əga'aque', na' leczə cho'ega'acchone' balor par nite'e mbalaz. ⁴ Catə' Spirit che Diožan' chonən par ničh cho'elenchone' gwde gwdelelə dižə' de'en cui chejni'icho, yichjla'ažda'och na'agan' chaclenən. Pero catə' Spirit che Diožan' chaclenən par ničh chyixjue'echo de'en bagwna Diožan' chio'o, chaclenən yoguə' chio'o chdopə chžagcho cho'ela'och Cristən'.

⁵ Yebeida' žalə' Spiritən' gonən par ničh yoguə'əle güe'elenle Diožan' gwde gwdelelə dižə', pero gobeichda' žalə' gaqualənən yoguə'əle par čixjue'ele de'en ye'e le'e. Ben' chyixjue'e de'en bagož Diožan' le', chone' to de'e zaquə'əche cle ca de'en chon ben' cho'elen Diožan' gwde gwdelelə dižə'. La' ša cui no zo no əgwzejni'i yeziquə'əchlə benə' chso'elao' Cristən' bi dižə'n cho'e, bito no gaqualənən. ⁶ Benə' bišə', nezdə' bito gaqualənən le'e ša güe'elena' Diožan' gwde gwdelelə dižə' catə'n yida' dezla'na'a le'e. Pero gaqualənən le'e ša əgwzejni'ida' le'e bi de'en babsd bablo'i Diožan' nada'. Na' guaqualenczən ša əgwzejni'ida' le'e bichlə de'en nezdə' che Diožan'. Guaqualenczən ša čixjue'ida' de'en əna Diožan' nada'. Na' leczə guaqualənən ša gwsed gwlo'ida' le'e bi zeje txiže'enə'.

⁷ Ca naquæ flaudæn', šə tozə can' gwcuež beņə' gocuežən' len dote tyemp, notono gache'i bi piesən' chcueže'. Le'egatezə ca' arpən' šə tozə can' ggoļ beņə' gocuežən' len dote tyemp, notono gache'i bi piesən' chgoļe'. ⁸ Catə' zo to beņə' chcueže' cornetən' par ničh chəsə'əneze soldad ca' naquən' so'one', šə bito əgwcueže'en clar, bito se'ejni'ine' naquən' cheyalə' so'one'. ⁹ Le'egatezə ca' chio'o ža, šə gü'eelencho Diozən' dižə' de'en cui chse'ejni'i beņə', bito gaquälənə legaque'. ¹⁰ Nezecho de que beņə' ža' doxen yežlyo nga gwde gwdele dižə' de'e chsa'aque', na' to toga'aque' chse'ejni'i xtižə' ljuējžga'aque'. ¹¹ Na' šə chio'o bito chaccho dižə' de'e chac yeto beņə', nezecho le' naque' beņə' zita' na' chio'o naccho beņə' zita'. ¹² Na' le'e chi' yichjle gaquälən Spirit che Diozən' le'e, ca'aczən' co' yichjle gonle xšine'enə' par gaquälən ljuējžle. Gonle ca' ničh yoguə'əle chdopə chžagle cho'ela'ole Cristən' sotezə sole gonlilažə'əlene'.

¹³ Na' šə Spiritən' gonən ca' əchoj catə' gü'eelencho Diozən' gwde gwdele dižə', cheyalə' nabecho Diozən' gaquälənche' chio'o par ničh əgwzejni'icho beņə' bi zejen dižə' de'en cho'elenchone'enə'. ¹⁴ Na' catə' choncho orasyonnə' šə Spirit che Diozən' chonən par cho'elenchone' dižə' de'e cui chejni'icho, bito bi xbab choncho lo'o yichjla'azda'ochon' catə'ən cho'echon, con chache'icho de que Dioz na'aczən' cho'ela'ocho. ¹⁵ Quingan' cheyalə' goncho, catə' goncho orasyonnə' gü'e'echo dižə' de'en əgwzejni'i Spirit che Diozən' chio'o, pero goncho xbab che dižə' de'en cho'echon'. Na' catə' golcho, golcho bi de'en əgwzejni'i Spirit che Diozən' chio'o, na' leczə goncho xbab che de'en cholchon'. ¹⁶ Legon xbab nac gaquə šə gü'e'echo yelə' choxcwlen che Diozən' len dižə' de'en cui chejni'i yoguə'əcho. Beņə' cuiņə' yesə'əneze naquən' choncho lao chdopə chžagcho cho'ela'ocho Cristən', bito se'ejni'ine' bin' nacho na' de'e na'anə' bito əso'e yelə' choxcwlen che Diozən' txen len chio'o. ¹⁷ Bito gaquälənə legaque' šə goncho orasyon len dižə' de'e cui se'ejni'ine' la'anə'əczə šə de'e li gü'e'echo yelə' choxcwlen che Diozən' binlo. ¹⁸ Cho'a yelə' choxcwlen che Diozən' de que Spirit che'enə' chonən par ničh cho'elencha'ane' gwde gwdele dižə' mazachlə ca chonən len notə'ətezachle. ¹⁹ Pero catə' ndopə nžagcho cho'ela'ocho Cristən' la'anə' gueyə'əzə dižə' de'en chejni'i yoguə'əcho gwsed gwlo'ida' le'e zejəchen cle ca gua'a ši mil dižə' de'en cui chejni'icho.

²⁰ Beņə' bišə, naquəczən güen gaccho ca bi'i che'enə' dao' laogüe de'en cui goncho de'e mal. Pero cheyalə' šo'ochə xbab che beņə' cha'o na' bito šo'ochə xbab che bi'i cuiņə' šejni'i. ²¹ Xtižə' Diozən' nyojən nan: "Nada' Dioz gona' par ničh beņə' zita' ca' əso'əlene' beņə' Izrael ca' dižə' de'e cui se'ejni'ine', na' yesyə'əbane beņə' Izrael ca', pero bia'aczə bito yoso'ozenague' chia'." Can' na Xancho Diozən'. ²² Šə nitə' beņə' cui chse'ejle'e che Diozən' na' choso'ozenague' catə' gü'e'elenle Diozən' gwde gwdele dižə' de'en cui chejni'ile yesyə'əbanene' na' sa'ache'iljeine' de que zoczə Diozən' len le'e. Na' ca naquə chio'o cho'ela'ocho Cristən', baņezecho de que zoczə Diozən' len chio'o. Na' catə' to beņə' chyixjue'ine' bi de'en bagož Diozən' le', chaclenən chio'o chonlilažə'əcho Cristən' la'anə'əczə cui chaclenən beņə' cui chso'onlilažə'ene'. ²³ Legon xbab nac gaquə šə lao ndopə nžagcho txen cho'ela'ocho Cristən' yoguə'əcho solao gü'e'elenchone' gwde gwdele dižə' de'e cui chejni'icho. Na' šə da'acclə beņə' cui chso'onlilažə' Cristən' o beņə' cuiņə' yesə'əneze naquən' choncho cho'ela'ochone', əse'enene' cho'elenchone' gwde gwdele dižə' na' so'one' xbab de que chac tontchon'. ²⁴ Pero nž'a'an šə to tocho chyixjue'echo bi de'en bagwna Diozən' chio'o. Šə yezidaclə to beņə' cuiņə' gonlilažə' Cristən'

o to beṇə' cuiṇə' neze naquən' choncho cho'ela'ochone', gache'ine' de que de xtole'e catə' to tocho chyixjue'echo bi de'en bagwna Diozən' chio'o. ²⁵ Na' catə' gache'ine' de que la'aždaogüe'enə' naquən mal lao Diozən' gwzolja xibe' güe'elaogüe'ene' na' əṇe' de que zoczə Diozən' len chio'o chonlilažə'əcho Cristən'.

Cheyalə' gwsa'acho coltən' binlo na' cui gonchon chac yazə

²⁶ Na'a ža beṇə' bišə', catə'an chdopə chžagle txen balle golle to imno, na' balle de de'e əgwsed gwlo'i ljuežjle, na' balle güe'ele dižə' che to de'en babzejni'i Spirit che Diozən' le'e, na' balle güe'ela'ole Diozən' güe'elenlene' gwde gwdele dižə' de'en cui chejni'ile, na' yeballe yozejni'ile dižə' de'en gwso'elen beṇə' ljuežjle ca' Diozən'. Naquəczən güen gonle yoguə' de'e ca' con šə gonlen ca sa'aclenən beṇə' ljuežjle ca' so'onlilažə'əche' Cristən', beṇə' ca' nacle txen cho'ela'olene'. ²⁷ Na' šə nole güe'elenle Diozən' gwde gwdele dižə' de'en cui chejni'ile, legüe'elene'en pero do chopzle o šonžle na' tgüejə tgüejle. Nach te na' əchoj to beṇə' yozejni'ine' bi zeje dižə' de'en be'elenle Diozən'. ²⁸ Na' šə cui no zo no yozejni'i bi zeje dižə' ca', bitoclə güe'elenle Diozən' dižə'an nac ca' zižjo lao ndopə nžagle txen. Con lo'o la'ažda'ole na'azə güe'elenlene'enə'. ²⁹ Na' le'e bagocwlen Spiritən' par chyixjue'i ljuežjle de'en bagwna Diozən' le'e, leczə do chopzle o šonžle əchojle chixjue'elen lao ndopə nžagle, nič beṇə' ca' yelə' yoso'ozenague' na' so'one' xbab šə de'en na to tole za'an che Diozən'. ³⁰ Na' šə lao choe' toe' dižə'an Diozən' əgwzejni'ine' yetoe' to de'e chixjui'e, ben' bacho'eczə dižə'an cheyalə' cueze' žlac güe' ben' yeto dižə'anə'. ³¹ Chaclenczə Spiritən' yoguə'əle par nič tgüejə tgüejle chyixjue'ele bi de'en bagwna Diozən' le'e, chozejni'i ljuežjle na' chtiplažə' ljuežjle. ³² Spirit che Diozən' chonən par nič balle chac chixjue'elen bi de'en bagwna Diozən' le'e. Na' chixjue'elen con catə'əzən' chache'ile naquən güen par chixjue'elen. ³³⁻³⁴ Diozən' chene'ene' əgwsa' colt chechon' binlo na' cui ša'acho chac yazə.

Na' gata'ətezə chəsə'ədotə chəsə'əžag beṇə' bagwlej Diozən' par zjənaque' lažə' ne'enə', bito cheyalə' soe' no'ol ca' dižə' lao coltən'. Cheyalə' yesə'əlo'e de que choso'ozenague' che chio'o beṇə' byo la' can' na Xtižə' Diozən' de'en nyojən'. ³⁵ Na' šə de bi de'e chse'ene'e no'ol ca' yesə'əneze'ne', cheyalə' yesə'ənabe' be'en che to toga'aque' catə' yesə'əžine' ližga'aque', cheda' naquən to yelə' zto' šə no'olan' güe'e dižə' lao ndopə nžagcho cho'ela'ochio Diozən'.

³⁶ Le'e beṇə' Corinto, bito cheyalə' gonle xbab de que le'ezən' zaquə'əle par ənale naquən' gon chio'o chonlilažə'əcho Cristən'. Caguə zgua'atec le'en gwdisle xtižə' Diozən', len caguə le'ezən' nombi'alen. ³⁷ Balle nale chon Spirit che Diozən' par nič chyixjue'ele bi de'en bagwna Diozən' le'e, na' balle nale de que Spirit che Diozən' chaclenən le'e par chonle bichlə de'en chene'e Diozən'. Šə de'e li chaclen Spiritən' le'e nachən' guache'iczele de que mendad che Xancho Crist na'anə' chzoja' le'e yoguə' de'e quinga. ³⁸ Šə nole cui chejle'ele de que Cristən' chone' par nič chzoja' de'e quinga, bito chaclen Spirit che Diozən' le'e šə ca'.

³⁹ Na'a ža beṇə' bišə', de'e yoblə chnia' le'e, leṇabe Diozən' gaquəlen Spirit che'enə' le'e par nič chixjue'ele de'en əna Diozən' le'e. Na' šə Spirit che Diozən' gonən par nič beṇə' ljuežjle ca' əso'elene' Diozən' gwde gwdele dižə', bito gwžonle əso'elene'en le'. ⁴⁰ Pero bitə'ətezə de'en gonle lao coltən', legwsa'an binlo, na' bito gonlen chac yazə.

15

Beban Jesocristan' ladjo benə' guat ca'

¹ Bena' bišə', che'enda' yosa'alazə'əle dižə' güen dižə' cobə che Cristən' de'en babe'elena' le'e antslə. Babzenagle chei na' zotezə zole chdalenlen. ² Na' šə talenczle dižə' güen dižə' cobə che Cristən' de'en babe'elena' le'e, nezele de que žjəyezole len Diozən'. Pero šə bito talenle dižə' güen dižə' cobə che'ena' bitobi zejen de'en nale de que bachejle'ele che dižə' güen dižə' cobə che'ena'.

³ Diozən' bzenene' nada' de'en zjənaquə de'e žialao xench ca bitə'ətezəchlə na' bač bsed blo'ida'an le'e. Gwnia' le'e de que gwso'ot benə' Cristən' gwduxjue' xtolə'əchon', con can' byoj Xtižə' Diozən' gaquə. ⁴ Leczə bgašə' Cristən' pero na' beyas bebane' ladjo benə' guat ca' beyon ža con can' byoj Xtižə' Diozən' gaquə. ⁵ Na' bi'a dižə' can' ben Cristən' beyož bebane' ladjo benə' guat ca', jəyeloe' laogüe' Bedən' na' gwde na' jəyeloe' laogüe' yeziquə'əchlə disipl che' ca' lao nite'e txen, benə' ca' gwsa'ac šižine' antslə. ⁶ Na' gwde na' jəyezloe' laogüe' mazlə gueyoa' gueyoa' benə' zjənita' tš'i'izə chso'elao' le'. Na' zan benə' ca' nezjmban na'a la'anə'əczə bagwsa'at bačle'. ⁷ Le'egatezə ca' jəyezloe' laogüe' Jacobən' nach gwde na' jəyezloe' laogüe' yoguə' apostol ca'.

⁸⁻⁹ Na' le'eze-laogüe' bedeyeloe' laogüe' nada'. Na' gwxaquə'əlebada' ca to bi'i goljə sin cuiŋə' žin ža, čhedə' ca tyempən' bitonə' gonlilažə'a Cristən', gwda' bčhi' bsaca'a benə' ca' bagwlej Diozən' par čəsə'əadopə čəsə'əžague' chso'elaogüe'e Cristən'. De'e na'anə' chacda' naca' le'eze-laogüe' apostol benə' cui bi zaquə' entr benə' ljuežja' ca', na' chacda' bitoczə zaca'a par naca' apostolan'. ¹⁰ Pero bia'aczə nži'ilazə' Diozən' nada'. De'e na'anə' gwleje' nada' par naca' apostol che'ena', na' de'e na'anə' bagocwlene' nada' par nič choncha' xšine'ena' mazəchlə ca de'en chso'on yoguə' apostol ca' yela'. Pero bito ənacho toza' nada' chona' xšine'ena' sino que Dioz na'aczən' chaclene' nada' par chona'an. ¹¹ Na' bachejle'ele che dižə' güen dižə' cobə che Cristən' de'en babzejni'ida' le'e na' de'en baboso'ozejni'i apostol ca' yela' le'e.

Yesyə'əban benə' guat ca'

¹² Na' bač bsed blo'ito' le'e de que Cristən' beyas bebane' ladjo benə' guat ca'. Pero le'e ža, žbixčhen' na bačle de que bito yesyə'əban benə' guat ca'?

¹³ Žalə' naquən de'e li can' nalen' de que Diozən' bito yosbane' benə' guat ca', bitolja bosbane' Cristən' žalə' ca'. ¹⁴ Na' žalə' cui bosban Diozən' Cristən' ladjo benə' guat ca', bito bi zaquə' xtiže'ena' de'en babe'elento' le'e na' bitobi zejen de'en chonlilažə'əchone' žalə' cui bebane'. ¹⁵ De'en babsed blo'ito' le'e de que Diozən' bosbane' Cristən' ladjo benə' guat ca', babe'eto' dižə' güenlažə' žalə' bito naquən de'e li. Žalə' de'e li bito yosbane' benə' guat ca', bito bosbane' Cristən' žalə' ca'. ¹⁶ De'e na'anə' bito cheyalə' goncho xbač de que Diozən' bito yosbane' benə' guat ca', čhedə' la' bosbane' Cristən'. ¹⁷ Bito bi bi zedəgua'an de'en chonlilažə'əcho Cristən' žalə' cui bosban Diozən' le' ladjo benə' guat ca'. Bito gaquə' əgwnitlaogüe' xtolə'əchon' žalə' cui bebane'. ¹⁸ Benə' ca' bagwsa'at benə' gwso'onlilažə' Cristən' žlac gosə'əbane' bagosə'əbiayi'e na' bito nite'e len Diozən' na'a žalə' cui beyas bebane' Cristən' ladjo benə' guat ca'. ¹⁹ Probchguazə chio'o žalə' yežlyə ngazən' zocho lez gaquəlen Cristən' chio'o. Chxoayagzə cuincho mazəchlə ca nota'ətezəchlə benə' žalə' ca'.

²⁰ Na' de'e liczə Dioz nan' bolis bosbane'ene' ladjo benə' guat ca', par nič nezecho de que ca'aczən' gone' len benə' yeziquə'əchlə benə' chso'onlilažə' le'. ²¹ To benə'an ben par nič chsa'at benəčan', na' to benə'an gon par

yesyə'əbane'. ²² Adan nan' ben par niçh chsa'at yoguə' beṇačən', na' Crist nan' gon par yesyə'əban yoguə' beṇə' chso'onlilažə' le'. ²³ To tocho yebancho con catə'an babsi'e xneze. Zguə'atec Cristən' bebane' ladjo beṇə' guat ca', na' catə'an yide' yeto le'egatezəcə ca' yesyə'əban beṇə' ca' bagwsa'at, con beṇə' gwso'onlilažə'ene'. ²⁴⁻²⁶ Cristən' chnabi'e doxenlə. Na' əgwlej əgwšošje' yoguə' beṇə' contr che' ca' na' bichlə de'e ca' chso'on contr le', na' que'e yelə' gwnabia' che de'e xio' ca' na' che angl bzelayo ca' na' che notə'ətezachlə beṇə' gwnabia' beṇə' cui chso'elao' le'. Na' catə' Cristən' babeyož blej bšošje' yoguə' beṇə' contr che' ca' na' bichlə de'e ca' chso'on contr le', nach gwcueze' yelə' gotən' na' šo'o fin che yežlyon'. Na' cana'achən' Cristən' cue'e lao na' X'e' Diozən' yoguə' de'en nlane' chnabi'e na' yoguə' non' chnabi'e. ²⁷ Xtizə' Diozən' de'en nyojən nan: "Diozən' bansi'e xneze de que gwžin ža catə' Cristən' nabi'e yoguə'əloj beṇə' na' biquə'əchlə de'en zjəde." Pero ca de'en nan de que Cristən' nabi'e yoguə'əloj beṇə' na' biquə'əchlə de'en zjəde, bito nəcho zejen de que leczə Cristən' nabi'e X'e' Diozən'. ²⁸ Na' catə' Cristən' bagwlo'e lao na' X'e' Diozən' yoguə'əte beṇə' na' len yeziqə'əchlə de'e zjəde, cana'ach əgwlo'e de que leczə le' yo'e lao na' X'e' Diozən'. Nach yoguə'əloj beṇə' əsa'acbe'ine' de que Diozən' naque' xanga'aque', na' leczə ca' sa'acbe'i angl na' de'e xio' ca'.

²⁹ Nitə' beṇə' chəsə'əchoe' nis de'e non che beṇə' ca' bagwsa'at. Bito so'one' ca' žalə' cui chse'ejle'e de que gwžin ža yesyə'əban beṇə' guat ca'.

³⁰ Nada' ža, do tyempte nita' beṇə' chse'enene' so'ote' nada' laogüe de'en cho'a xtižə' Cristən'. ³¹ Beṇə' bišə', de'e li yoguə' ža chsanlažə' cuina' gaquə bitə'ətezə de'e gaquə chia'. Che'enda' nezele de que chsanlažə' cuina' can' baṇezele de que chebeichgüeida' de'en chonlilažə'əle Xancho Jesocristən'.

³² Na' guac əṇacho de que por bež əznian' jətilələna' catə'an jsoa' Efeson' chedə' gwso'onchguə beṇə' ca' contr nada'. Pero ža'alə cui yesyə'əban beṇə' guat ca', bitobi bi zaquə' ca de'en goquə chia'. Na' žalə' bito yesyə'əban beṇə' guat ca' yejni'a gonecho che de'en na: "Ye'ej gaotezcho, la' gwxezan' gatcho."

³³ Bito güe'ele latjə no əxoayag le'e, chedə' de'e li can' nyojən nan: "Šə socho txen len beṇə' chso'on de'e mal, la' solao goncho can' chso'one'enə'."

³⁴ Legwša' xbab chelen' na' cuich gonle de'e malən'. Nia' ca' chedə' balle bitonə' gombi'ale Diozən' na' che'enda' gaquəchgüeile lo'o la'azda'olen' de'en cui nombi'alene'.

De'e cobə'yeyac cuerp che beṇə' ca' yesyə'əban ladjo beṇə' guat ca'

³⁵ De repent gwṇabljeile nada' nac gaquən' yesyə'əban beṇə' guat ca' o nac gaquə cuerp chega'aque'enə' catə'an yesyə'əbane'. ³⁶ Nchoj yichjila'azda'olen' šə chaquele cui gaquə yesyə'əbane'. Nezecho de que to to xoa' dao' de'en chazcho cheyalə' yexinjən par yela'an yel dao'. ³⁷ Na' bito əṇacho de que catə'an chazchonə' chazcho yel dao'. Na' can' šə biquə'əchlə de'e chene'echo la'ac, con xsei nan' gazcho. ³⁸ Na' Diozən' chone' par niçh chla' de'en chazchon' na' to ton chaquən segon bi de'en chazchon'. ³⁹ Ca'aczən' naquən caguə tozə ca naquə cuerp chechon' len cuerp che bia ca' chsa'aš. Nža'an naquə cuerp che beṇačən' na' nža'an naquə cuerp che bia žia tap ni'ane'i, na' nža'an naquə che bia chsa'aš lo'o nis, na' nža'an naquə che bia chsa'aš lao be'. ⁴⁰ Na' nža'an zjənaquə beṇač ca' na' bia ca' chsa'aš lao yežlyon', na' nža'an zjənaquə de'e ca' chle'icho le'e yoban'. Nža' yelə' xoche che de'e ca' chle'icho le'e yoban' na' nža' yelə' xoche che beṇač ca' na' bia ca' chsa'aš lao yežlyo nga. ⁴¹ Nža' can' chse'eni' bgüižən' na' nža' can' chse'eni' bio'onə' na' leczə nža' can' choso'ose'eni' to to beljw ca'. ⁴² Le'egatezəcə ca' catə' yesyə'əban beṇə' ca'

gwso'onlilažə' Cristən' žlac gosə'əbane', nža'an gaquə cuerp čhega'aque'enə'. Cuerp čhega'aque'enə' de'en besə'əgašə' lo'o ban' bagwso'ožə'an, pero catə' yesyə'əbane' ladjo beŋə' guat ca' yeyac cuerp čhega'aque'enə' de'e cobə na' bitoch sa'ate'. ⁴³ Bitobi bi zaquə' cuerp čhe beŋə' guat ca', la' zjənaquən cuerp šen. De'e na'anə' chcuašə'əchon. Pero catə'an yesyə'əbane' yetlas, šə gwso'onlilažə'e Cristən' žlac gosə'əbane', yesyə'əyac cuerp čhega'aque'enə' de'e zaquə'əche na' de'e gualach clezə can' əgwswa'quən antslə. ⁴⁴ Cuerp čhe beŋə' guat ca' de'en chcuašə'əchon' zjənaquən de belə' chen, pero nža'an yesyə'əyaquən catə'an yesyə'əbane' šə gwso'onlilažə'e Cristən'. Cana'achən' yesyə'əyaquən por cuerp cobə de'en gon can' əna Spirit čhe Diozən'. Na'a zjənaquə cuerpən' de belə' chen, pero gwžin ža gatə' cuerp cobə de'en gon can' əna Spirit čhe Diozən'.

⁴⁵ Xtižə' Diozən' nyojən nan de que Adannə' ben' naquə beŋə' nechən' gwzoe' bguane'. Pero na' zo yeto beŋə' gwxaquə'əlebene' ca Adannə', le'ena' Cristən'. Na' de'en bebane' ladjo beŋə' guat ca' chone' yelə' mban zejlicane'. ⁴⁶ Na'a naccho beŋə' belə' chen pero gwžin ža catə'an gatə' cuerp cobə čhechon' de'en gon can' əna Spirit čhe Diozən'. ⁴⁷ Adannə' ben' goquə beŋə' nech, Diozən' bene' le' len bište yo na' gwzoe' yežlyo ngazə. Pero ben' gwxaquə'əlebe ca Adannə' de'en bxie' yelə' mban zejlicane' bazocze' yoban' antslə ze'e yide' galje' yežlyo nga, le'ena' Xancho Cristən'. ⁴⁸ Na' chio'o beŋə'ach cuerp čhechon' naquən can' goquə cuerp čhe de'e Adannə' de'en ben Diozən' len bište yon', na' de'e na'anə' naccho beŋə' čhe yežlyo nga. Pero na' chio'o chonlilažə'əcho Cristən' gwžin ža catə' gatə' cuerp cobə čhecho de'en gaquə ca cuerp čhe Cristən' ben' zo yoban'. ⁴⁹ Na'a ŋenaccho ca ben' ben Diozən' len bište yon' pero gwžin ža gaccho ca Cristən' ben' zo yoban'.

⁵⁰ Beŋə' bišə' əchnia' le'e catə'an yežincho žjəyecho len Diozən' zejlicane' bito gaquə əbanecho cuerp čhechon' de belə' chennə'. De'e te čhe cuerp čhechon' na' de'e na'anə' bito gaquə əbanechon catə' žjəyecho len Diozən' zejlicane. ⁵¹ Na'a əchnia' le'e de'en cui nonə' ŋeze antslə, caguə yoguə'əchon' gatcho, pero yoguə'əchon' yežə' can' gacchon'. ⁵² Xtitnez yežə' can' gacchon' catə'an cuež trompet čhe Diozən' par šo'o fin čhe yežlyon'. Cuež trompet čhe Diozən' par yesyə'əban yoguə' beŋə' bagwsa'at con beŋə' gwso'onlilažə' Cristən'. Na' canan' yeyac cuerp čhega'aque'ena' de'e cobə de'en cui te čhei na' lecəzə can' yeyac cuerp čhe chio'o ŋe'e mbancho. ⁵³ Cuerp čhecho de'en mbanecho yežlyo nga na'a de'e te čhein' čhedə' gožə'an catə'an gatcho. Pero catə'an yeyac cuerp čhechon' de'e cobə bito gožə'an na' bito te čhei. ⁵⁴ Na' catə' bade cuerp cobə čhecho de'en cui gožə' na' de'en cui te čhei, cana'achən' bagoc complir can' nyoj Xtižə' Diozən' nan: "Diozən' gwzoinə' bcueze' yelə' gotən' čhedə' le'ena' chone' yelə' mban zejlicane." ⁵⁵ Na' cana'achən' ənacho: "Bitoch soi yelə' gotən' chio'o na' bitoch gonən chio'o gan." ⁵⁶ De yelə' got čhe chio'o beŋə'ach čhedə' choncho de'e malən'. Na' de'en ŋezecho bin' non lei čhe Diozən' mendad goncho nachle chzenaguə'chcho čhe de'e malən'. ⁵⁷ Choxcwlen Diozən' bsele'e Xancho Jesocristən' ben' chon par nič cuich chzoi de'e malən' chio'o, na' le'ena' babene' par nič chio'o chonlilažə'əchone' šə gatcho lecəzə əžin ža yebancho ladjo beŋə' guat ca'.

⁵⁸ De'e na'anə' beŋə' bišə' dao', lešotezə lešo legonlilažə' Xancho Jesocristən' sin cui žjəxaquə'əlažə'əle na' sin cui gaquə'əjelažə'əle. Na' zejli legonchgua xšin Xancho' la' ŋezceze de que bito gaquə dadən.

16

Choso'otobe' mech par chsa'aclene' beṇə' ca' chso'onlilažə' Cristən' Jerosalennə'

¹ Na'a ža che'enda' əṇia' le'e naquən' gonle catə' əgwtoḃle mechən' par gaqualenle beṇə' Jerosalen ca' bagwlej Diozən' par zjənaque' lažə' ne'ena'. Legon can' bena' mendad so'on beṇə' ca' chəsə'ədopə chəsə'əžag chso'elaogüe'e Cristən' to to yež de'en zjəchi' Galasian'. ² Na' yoguə' ža dmigw to tole cuejle lata' güejə mech segon ca de'en beṇle gan lao xmanə' na' co'osa'olen par nič den catə'an yida' dezlaṇa'a le'e. Legon ca' par nič bito əgwtoḃlen catə'an yida'anə'. ³ Na' catə'an yida'anə' cana' əselə'a beṇə' ca' bagwlejlen' par əxjsə'e xmechlen' Jerosalenne', na' əgoxə'ətega'aca'ane' to čhopə cart. ⁴ Pero ša gwxenlažə'əcho de que nada' ša'a na' sa'aclene' nada' txen.

Pabən' chone' xbab žjəlane'e lega'aque'

⁵ Na' yida' gan' zolen' catə' yeyož tia' Masedonian', chedə' leczə cheyalə' ša'a žjəlaṇa'a beṇə' ca' chəsə'ədopə chəsə'əžag chso'elaogüe'e Cristən' na'. ⁶ Na' de repent yega'ana' len le'e do tḃio' o čhop bio' o ša yega'anca' dote tyemp zaguən'. Na' catə' yeza'a gan' zolen' le'e gaqualenle nada' par yeya'a ga yoblə. ⁷ Bito yida' delana'a le'e ṇa'a chedə' to teza'an ša baza'a, la' che'enda' desoa' sša len le'e catə'an yida'anə' ša Xancho Diozən' güe'e latjə. ⁸ Che'enda' yega'ana' Efeso nga xte catə' galə' lni de'en ne' Pentecostes. ⁹ Yega'ana' chedə' beṇə' zan nitə' nga beṇə' chse'ene'e yoso'ozenague' che xtižə' Diozən' pero leczə nitə' beṇə' zan cui chse'ene'e čixjui'an.

¹⁰ Na' catə' yida' Temtion' gan' zolen' cheyalə' gaplene' respet par nič cui žebe' əgwsed əgwlo'ine' le'e, chedə' leczə can' chona' nada' xšin Xancho Diozən' ca'aczen' chon le'. ¹¹ De'e na'anə' ža bito gonle xbab de que bitobi zaque'e, sino que cheyalə' sole güen len le' na' len beṇə' ca' žague'ena' catə' la'aque' gan' zolenə'. Na' catə' yesa'aque' cheyalə' gaquallenga'aclene' par deya'aque' gan' zoa' nga to šao' to güen la' chbezəga'aca'ane'ena'.

¹² Na' ca' naquə beṇə' bišə'əcho Apolosən' ža, leczə gotə'əyoida'ane' par yidalene' Temtion' na' len beṇə' bišə'əcho ca' desə'alane'e le'e, pero bene' xbabən' mejor bito yide' ṇa'a. Pero güide' catə' soe' to latjə.

Yeto čhopə de'en che' Pabən' beṇə' Corinto ca'

¹³ Cheyalə' gaple cuidad par nič cui xoayagle len de'e malən', na' cheyalə' sotezə sole gonlilažə'əle Diozən' con can' chonlilažə'əczlene'. Bito žebe sino leso legon can' chene'e Diozən'. ¹⁴ Na' legaque che Diozən' na' che beṇə'chən' bitə'ətezə de'en chonle.

¹⁵ Na' ṇa'a ža beṇə' bišə', de to de'e che'enda' əṇia' le'e. Nezele de que family che Estefanas zjənaque' beṇə' nech gwso'onlilažə'e Cristən' Acayan', na' banezczele can' chso'oncze', lechgualə chsa'aclene' notə'ətezəchlə beṇə' bazjənaque' lažə' na' Diozən'. ¹⁶ De'e na'anə' əchnia' le'e de que cheyalə' əgwzenagle che lega'aque' na' lenczə che notə'ətezəchlə beṇə' chso'onchgua xšin Diozən' na' che beṇə' ca' chsa'aclenchgua beṇə' bišə'əcho ca'. ¹⁷ Chebeida' babla'ac Estefanasən', Fortonaton' na' Acaicon' gan' zoa' nga, na' bagwsa'aclene' nada' par nič bitoch zoa' trist de'en cui zole nga len nada'. ¹⁸ Lechgualə bagwso'one' ca' chebeida', can' bagwso'one' len le'e. De'e na'anə' cheyalə' gapəga'acchone' respet.

¹⁹ Na' ṇa'a ža əchnia' le'e de que beṇə' ca' chəsə'ədopə chəsə'əžag chso'elaogüe'e Cristən' doxen Asian' chəsə'əguape' le'e diox. Na' leczə len

Aquila na' no'ol che' Prisilan' nach zjələnczə beŋə' ca' chəsə'ədopə chəsə'əžag chso'elaogüe'e Cristən' ližga'aque'enə', leczə chəsə'əguapchgüe' le'e diox. Lega'aque' chso'onlilažə'acze' Xancho Jesocristən' can' chonlilažə'əchone' chio'o. ²⁰ Na' yoguə'əl ol beŋə' bišə'əcho ca' nitə' nga chəsə'əguape' le'e diox. Na' catə' chežagle leyolgüiž ljuežjle dižə' šao' par nič gachia' de que chaque che ljuežjle.

²¹ Cuincza' nada' Pabən' chzoja' part dao' che cart nga par əchguapa' yoguə'əle diox.

²² Na' šə nənčixə' nole cuiŋə' gonle cas par gaquəle che Xancho Jesocristən', cuiayi'išazəchle zəjlicaŋen'. Xancho Jesocristən' yide' de'e yoblə.

²³ Na' ŋa'a ža, Xancho Jesocrist nan' sotezə soe' gaquələnšgacze' le'e. ²⁴ Na' chnia' le'e de que chacchgüeida' che yoguə'əle laogüe de'en chonlilažə'əle Cristo Jeso'osən'. De'e na'azən' əchnia' le'e. *Pab*

Cart Egwchope De'en Bzoj San Pabən' par Benə' Corinto Ca'

Pabən' chzoje' benə' ca' chso'onlilažə' Cristən' Corinton'

1-2 Nada' Pab naca' apostol che Jesocristən' con can' gwnalažə' Diozən'. Nada' chzoja' cart nga par le'e bagwlej Diozən' niçh chdopə chžagle cho'ela'ole Cristən' lao' syoda Corinton', na' notə'ətezəchle bagwlej Diozən' par nacle lažə' ne'enə', le'e nitə'əle doxen gan' mbane Acayan'. Nada' len benə' bišə'əcho Temtion' chonto' orasyon chnabto' lao Xacho Diozən' na' Xancho Jesocristən' əsa'aclenšgue' le'e na' so'one' ca so cuezle binlo len xbab de'en yo'o lo'o yichjla'ažda'olen'.

De'e ca' gwdi' gwxaquə' Pabən'

3 Cheyalə' socho güe'ela'ochə Xacho Diozən'. Le'e naque' Xa Xancho Jesocristən' na' Xancho Jesocristən' leczə cho'elaogüe'e le'. Xacho Diozən' cheyašə' cheži'ilažə'e chio'o na' le'enə' cheyonxenlažə'e chio'o šə bi de'en chac checho. 4 Ca naquə nada' ža, le'enə' cheyonxenlažə'e nada' catə' chyi' chzaca'a par niçh leczə chac cheyonxenlažə'a benə' yoblə catə' chəsə'əyi' chəsə'əzaque'e. Na' can' chon Diozən' cheyonxenlažə'e nada' leczə can' cheyonxenlažə'a benə'. 5 Lechgualə chyi' chzaca'a can' gwdi' gwxaquə' Cristən', pero na' con zoczə Diozən' cheyonxenlažə'əchgüe' nada' chedə' chonlilažə'a Cristən'. 6 Chyi' chzaca'a laogüe de'en chzejni'ida' le'e can' gonle par žjəyezole len Diozən'. Chac chia' ca' par niçh cheyonxenlažə'a le'e len bi de'en chyi' chzaquə'əle. Na' de'en cheyonxenlažə' Diozən' nada' catə' bin' chac chia', chone' ca' par niçh nada' cheyonxenlažə'a le'e. De'e na'anə' chonlilažə'əle Cristən' na' chgo'o chchejlažə'əle catə'an chyi' chzaquə'əle can' chyi' chzaca'a nada'. 7 Na' zotezə zoa' chbeza' de que le'e co'o gwchejlažə'əle catə' saquə'əzi'ile. Nežda' de que con can' chyi' chzaca'anə' leczə can' chyi' chzaquə'əle, na' can' cheyonxenlažə' Diozən' nada', leczə can' cheyonxenlažə'e le'e.

8 Benə' bišə', che'enda' ənezele catequən' gwxaquə'əzi' gwxaquə'əyaša'a catə'an gwzoa' Asian' xte cuichczə bi goquə gona', con beyož bedolažə'a na' xte bžinczə catə' bena' xbab la' gatzca'anə'. 9 De'e li bena' xbab lo'o yichjla'ažda'ogua'anə' de que la' gatzca'anə'. Pero na' goc chia' ca' par niçh cui bena' xbab de que gwzoiczəda' nada'əza' yocuižə'a de'en chyi' chzaca'anə'. Na' de'en goc ca' benən par niçh chonlilažə'əcha' Diozən', Dioz ben' yosban benə' guat ca'. 10 Na' catə'an bena' xbab la' gatzca'anə', Diozən' bosle' nada' par cui gota'. Na' nechoslacze' nada'. Na' con bazoczə' lez chbeza' yosle' nada' šə bazezocla' cho'a yelə' gotan'. 11 Yosle' nada' chedə' lenczə le'e chaclenle nada' chonle orasyonnə' laogüe'enə' chnabelene' yosle' nada'. Na' benə' zan naccho choncho orasyon lao Diozən' par niçh gaquəlene' nada'. Na' te gaquəlene' nada', yoguə'əlo'lo'cho güe'echo yelə' choxcwlen che Diozən' de'en bagoclene' nada'.

Pabən' gwžeine' šeje' Corinton'

12 Nežda' lo'o yichjla'aždaogua'anə' de que chona' güen len yoguə'əlo'lo' benə' na' mazəchlə chona' güen len le'e. De'e na'anə' cho'a dižə' de que do yichj do lažə'a chona' güen len yoguə'əlo'lo' benə' chedə' Diozən' babeyone' la'ažda'ogua'anə' xi'ilažə'. Bitə chona' con can' na' xbab chia'anə', sino chona' can' na' Diozən'

por yelə' chaclen che'enə'. ¹³ Cart quinga chzoja' le'e, bito cheyalə' gonle xbab šə naquəchlə zejen sino can' nyojan nan' šejni'ilen. Na' zoa' lez šejni'ilen. ¹⁴ Bačgacə chejni'ile de que do yichj do laža'a chona' yoguə'əloj de'en chona', na' che'enda' šejni'ilen binlo. Na' catə'an əžin ža yidə Xancho Jeso'osan' de'e yoblə, che'enda' yebeile de'en babe'elena' le'e xtiže'enə', ca nada' chebeida' de'en chejle'ele chei.

¹⁵ Na' zoa' segor šejni'ile de que do yichj do laža'an chona' bitə'ətezə de'en chona'. De'e na'anə' gwzelaža'a yida' de'e yoblə delana'a le'e par nič gaquəlenča' le'e. ¹⁶ Gwzelaža'a tia' əgwlaŋa'a le'e catə'an gwyə'a Masedonian' de'e yoblə, na' catə' beza'a Masedonian', leczə gwzelaža'a yedia' əgwlaŋa'a le'e. Na' go'onda' le'e gaquəlenle nada' par yeya'a Jodean'. ¹⁷ De'e liczə go'onda' yedia' əgwlaŋa'a le'e. Bito chaca' šayečə šayen can' chsa'ac beŋə' ca' cui zjanombia' Diozən', to əŋia' gona' to de'e gona' na' to əŋia' cui gona'an. Lechgualə de'e chacda' catə' cui chac gona' can' bagwnia' gona'. ¹⁸ Diozən' chone' complir can' ne'enə'. Na' nezene' bito goca' šayečə šayen catə'an gwnia' yida' de'e yoblə delana'a le'e la'anə'əczə cui bida'. ¹⁹ Nada' len Silbanon' na' Temtion' gwduxjue'ito' le'e xtižə' Jesocrist Xi'in Diozən'. Cristən' bito chaque' šayečə šayen. Syempr chone' complir can' ne'enə'. ²⁰ Yoguə' de'en ben Diozən' lyebe gone', babsele'e Jesocristən' par beđayene'en. De'e na'anə' nacho "Amen" catə'an cho'ela'ocho Diozən' na' zejen de que nezecho chon Diozən' complir can' ne'enə'. ²¹ Baben Diozən' par nič le'e len nada' zotezə zocho chonlilažə'əcho Cristən'. Na' bagwleje' chio'o par nič choncho xšine'enə'. ²² Bsele'e Spirit che'enə' zon lo'o yichjla'ažda'ochon' par nič nacbia' naccho xi'ine' na' par nič ənezecho de que gwžin ža catə' gaquə lao na'acho de'en gonəch Diozən' chio'o.

²³ Bito bida' Corinton' de'e yoblə delana'a le'e čhedə' beyejda' bitolə detila' le'e. Diozən' nezene' dižə' lin' cho'a əŋia' ca'. Šə chonlaža'a Diozən' gone' nada' castigw. ²⁴ Le'e bazotezə zole chonlilažə'əle Cristən', bito nato' le'e de'e niczən' šejle'ele. Lete de'en chonto' len le'e, chaclento' le'e par ničə'əchle mbalaz.

2

¹ Ca naquə bechoglaža'a, bitolə bida' de'e yoblə delana'a le'e par nič cui gwdiłəča' le'e che de'e malən' chonlen', čhedə' bito go'onda' socho trist. ² La' ža'alə bida' dezoa' le'e trist notono nla' no so'on ca soa' mbalaz. ³ Le'e cheyalə' gonle par nič soa' mbalaz. De'e na'anə' bzoja' cartən' gotə'əyoida' le'e cuejyichjle de'e malən' par nič catə'an yida' de'e yoblə delana'a le'e cui soa' trist can' chonlen'. Bzoja' le'e čhedə' nezda' de que yoguə'əle yebeile gonle ca soa' mbalaz. ⁴ Tristchgua zoa' catə' bzoja' cart de'en bseła'a na' chegüi'inchgüeida' lo'o yichjla'aždaogua'anə' xte gwcheža'. Bzoja' cartən' caguə par nič sole trist sino par nič ənezele de que nada' chacchgüeida' čhele.

Cheyalə' yezi'ixencho che beŋə' ca' chso'on de'e malən'

⁵ De'e li gwzoa' trist can' ben tole, pero caguə nadə'əzan' gwzoa' trist, casi yoguə' le'e gwzole trist por ni čhe de'en ben be'enə'. Nia' casi yoguə'əle čhedə' bito nezda' šə yoguə'əczle gwzole trist. ⁶ Ca naquə le'e gwyanle par bchoj yelə' goxia' chelen' benlene' castigw, əchnia' le'e bač goc to ca'atə'ətə' gaque' castigw. ⁷ Bito cheyalə' gonchlene' castigon'. Cheyalə' yezi'ixenle' che' na' güe'elene' yelə' chxenlaža' par nič cui cuejyichje' Diozən' por ni čhe de'en zochgüe' trist. ⁸ Chneyoida' le'e legon par nič ənezene' de que chaquele che'. ⁹ Bzoja' le'e par nezda' šə gwzenagle čhia' ca naquə yoguə'əloj de'en gwnia'

gonle. ¹⁰ Na' ca naquə chezi'ixenle che be'enə', lencza' nada' chezi'ixena' che'. Na' šə bi de'en bene' len nada', nezcze Cristən' de que babezi'ixena' che' cheda' che'enda' gaquəlena' le'e. ¹¹ Cheyalə yezi'ixencho che' par ničh cui soi gwxiye'enə' chio' o par goncho bichlə de'e mal. Nezczecho ca naquən' chene'en əxoayaguən chio' o.

Pabən' go'onchgüeine' yežague' Titonə'

¹² Catə' bežina' Troas par chixjui'a dižə' güen dižə' cobə che Cristən', Xancho Diozən' bene' par ničh gwnitə' beṇə' gwse'enene' yoso'ozenague'en. ¹³ Pero benchgua' xbab che beṇə' bišə'əcho Titonə' de'en cui bežaga'ane' na'. De'e na'anə' bzeida' beṇə' bišə'əcho ca' dižə' nach beza'a beya'a Masedonian'.

Cristən' bebeje' chio'o xni'a de'e malən' par ničh chnabi'e chio'o

¹⁴ Choxcwlen Diozən' babebej Cristən' chio'o xni'a de'e malən' par ničh chnabi'e chio'o, na' na'a ngoda'əcho txen len le'. Na' leczə chon Diozən' par ničh gatə'ətezə zocho na' gatə'ətezə chejcho choncho ca chsa'acbe'i beṇə' ca beṇə' güennə' naquə Cristən'. ¹⁵ Chebei Diozən' de'en choncho ca chsa'acbe'i beṇə' ca beṇə' güennə' naquə Cristən'. Balə beṇə' ca' babesyə'əchoj xni'a de'e malən' na' yebalə' bachəsə'əbiayi'. ¹⁶ Catə' choncho ca chsa'acbe'i beṇə' ca beṇə' güennə' naquə Cristən', beṇə' ca' cui chso'onlilažə'ene' chsa'acbe'ine' de que yesə'əbiayi'e. Pero na' beṇə' ca' chso'onlilažə' Cristən' chəsə'əbeine' de'en chlo'echo ca beṇə' güennə' naque'enə', chedə' bade yelə' mban chega'aque' zejlicane na' yesyə'əžine' gan' zo Diozən'. ¿No chio'o chonlilažə'əcho Cristən' zaquə'əcho par əgwlo'echo ca beṇə' güennə' naque'enə' ža'alə cui zo Diozən' chaclene' chio'o? ¹⁷ Nitə' beṇə' zan choso'oxoayague' chəsə'əše'e can' na' xtižə' Diozən' parzə ničh beṇə' ca' choso'opeine' len xtižə'əga'aque'enə' choso'onežjue' lega'aque' mech. Nada' bito chona' ca'. Do lažə'a zotezəczə' chyixjui'a xtižə' Diozən' chedə' le'enə' bene' mendad chyixjui'an. Diozən' neze nle'ine' naquən' chona' chyixjui'a xtižə'enə', nada' ngoda'a txen len Cristən'.

3

De'e cobə de'en non Diozən' lyebe gone' par gaquəlene' beṇəchən'

¹ Chezonljale xbab de que cho'elao' cuina' ca dižə' de'en cho'a, pero caguə ca'anə'. Nezczele de que chona' xšin Diozən' do lažə'a. Na' bito chonən byen goxa'a cart par ničh ənezele nac naca', na' nic chonən byen gwwojle cart de'e goxa'a catə' ša'a ga yoblə can' chonən byen len balə beṇə'. ² Lechgualə chacda' chele. Nada' gwɔdixjue'ida' le'e dižə' güen dižə' cobə che Cristən' par bocobə yichjla'ažda'olen'. De'e na'anə' bito chyažjda' cart de'en na de que naca' beṇə' güen, la' yoguə' no zjənonmbia' le'e zjənezene' can' goquəlena' le'e par chonlilažə'əle Cristən'. ³ Catə'an be'elena' le'e xtižə' Cristən' benlilažə'əlene' na' bene' par ničh Spirit che Dioz ben' zo zejlicane bocobən yichjla'ažda'olen'. Na' de'en nacbia' babocobə yichjla'ažda'olen' zaquə'əchən cle ca to cart de'en nyoj le'e yiš na' cle ca lei che Diozən' de'en byoj le'e chopə yej ta'a.

⁴ De'en chonlilažə'əle Cristən' nezcza' de que le'enə' chaclene' nada' par chona' xšine'enə' can' chebei Diozən'. ⁵ Ca naquə nada' bito de cho'a əṇia' de que to gwlažza' chona' xšin Diozən'. Bito gaquə əṇia' ca', la' Dioz nan' zoe' chaclene' nada' na' chone' par ničh chac chona' xšine'enə'. ⁶ Dioz na'anə' babene' par ničh chac chyixjui'a can' naquə de'e cobə de'en none' lyebe gone' par gaquəlene' chio'o beṇəch. De'e cobən' de'en none' lyebe gone' bito naquən ca lei che'enə' de'en nyojən chzejni'in chio'o de que cuiayi'icho de'en

cui choncho complir yoguə'əloł can' nannə'. Diozən' none' lyebe goŋ Spirit che'enə' yelə' mban zejlicane che notə'ətezcho gonlilažə'əchone'.

⁷ Catə' bzoj Diozən' lei che'enə' le'e yej ta'a ca' na' bnežjue'en de'e Moizezən', de'e zan de'e bene' par gosə'əneze beŋə' Izrael ca' catequən' zaquə' lei che'enə' de'en chzejni'in chio'o beŋəch de que cuiayi'icho. Na' de'e tant goctit cho'alao de'e Moizezən' xte bito goquə yesə'əgüia beŋə' Izrael ca' cho'alaogüe'enə'. Pero šo'olažə' bega'a yelə' chactit che cho'alaogüe'enə'. ⁸ Zaquə'əczə lein' pero na' zaquə'əch dižə' güen dižə' cobə che Cristən' de'en chyixjue'ida', la' notə'ətezcho chonlilažə'əchone', Spirit che Diozən' chonən yelə' mban zejlicane checho. ⁹ Diozən' blo'e de que zaquə'əczə lein' la'aŋə'əczə nan de que yoguə' chio'o beŋəch de xtolə'əcho de'en cui choncho complir can' nannə'. Pero zaquə'əch dižə' güen dižə' cobə che Cristən' chedə' la' notə'ətezcho chonlilažə'əchone', Diozən' none' chio'o beŋə' güen. ¹⁰ Na' na'a de'en babidə Cristən', zaquə'əchgua dižə' güen dižə' cobə che'enə', na' de'e na'anə' lein' bačh naquən ca to de'e cui bi zaquə'. ¹¹ De'e te chei lein' la'aŋə'əczə naquən to de'e zaquə'e. Pero ca naquə dižə' güen dižə' cobə che Cristən' caguə de'e te cheinə'. De'e na'anə' zaquə'əch dižə' güen dižə' cobə che'enə'.

¹² Nada' nezda' de que caguə de'e te chei dižə' güen dižə' cobə che Cristən'. De'e na'anə' cho'a dižə' chei clar. ¹³ Moizezən' bcuašə' cho'alaogüe'enə' len to lach' ničh cui besə'əle'i beŋə' Izrael ca' nac goc bega'a yelə' chactit che cho'alaogüe'enə'. Nada' bito chcuəša'a dižə' güen dižə' cobə che Cristən', sino chyixjui'an ničh chasə'əneze yoguə'əloł beŋə'. ¹⁴ Beŋə' Izrael ca' bito gwse'ejni'ine' de'en chebei Diozən' na' xte ža neža catə' choso'olabe' lei de'en bzoj de'e Moizezən', bito chse'ejni'ine' bi zejen. Con beŋə' ca' chso'onlilažə' Cristən' chse'ejni'ine' bi zejen, na' casi yoguə' beŋə' Izrael gwlaž chia' ca' bito chso'onlilaže'ene'. ¹⁵ De'e li xte ža neža yoguə' las catə' choso'olabe' lei de'en bzoj de'e Moizezən' bito chse'ejni'ine' bi zejen. ¹⁶ Pero catə'əch chzoloa chso'onlilaže'e Xancho Cristən', cana'achən' chse'ejni'ine' bi zejen lei de'en bzoj de'e Moizezən'. ¹⁷ Na' ca naquə chio'o chonlilažə'əcho Xancho Cristən', zo Spirit che Diozən' lo'o yichjla'ažda'ochon' chaclenən chio'o par choncho can' chene'e Diozən'. Bitoch choncho xbab de que por ni che šə choncho de'en na lein' chebei Diozən' chio'o. Na' Spirit che Diozən' lecə naquən Spirit che Xancho Cristən'. ¹⁸ Ca to spejw chlo'en cho'alao beŋə', ca'aczə dižə' güen dižə' cobə de'en chzejni'in che Xancho Cristən' chlo'in yoguə' chio'o chonlilažə'əchone' de que naque' le'ezelaogüe beŋə' zaquə'e. Na' Spirit che Xancho Cristən' zon lo'o yichjla'aždao' chio'o chejni'icho dižə' güen dižə' cobə che'enə' chaclenən chio'o par ničh zdach chaquəchcho beŋə' šao' beŋə' güen can' naquə Cristən'.

4

¹ Yelə' beŋə' güen che Diozən' gwleje' nada' par chyixjui'a dižə' güen dižə' cobə che Jesocristən'. Na' de'e na'anə' bito chjəxaquə'əlažə'a ca de'en chyixjui'an. ² Bitobi chona' de'e əgwcuəša'a o de'e gaquəda' zto' par yesə'əneze beŋə'. Bito chxoayaga' beŋə', na' bito chzejni'ida' xtižə' Diozən' clelə. Nada' chsed chlo'ida' beŋə' xtižə' Diozən' tcho'a tšao' na' yoguə'əlole' zjəneze' lo'o yichjla'ažda'oga'aque'enə' de que cho'a dižə' li. Na' lecə neze nle'i Diozən' can' babena'. ³ Con beŋə' ca' bachasə'əbiayi' por ni che de'en cui chso'onlilaže'ene' lega'acze' bito chse'ejni'ine' dižə' güen dižə' cobə che Jesocristən' de'en chyixjui'a. ⁴ Gwxiye' nan' chnabia'an lega'aque' na' chonən par nchol yichjla'ažda'oga'aque'enə'. De'e na'anə' bito

cho'o be'eni'in lo'o yichjla'ažda'oga'aque'enə' la'anə'əczə chzenga'acda'ane' dižə' güen dižə' cobə che Cristən'. Le'enə' naque' le'ezelaogüe beṇə' zaque'e, na' naquə yichjla'aždaogüe'enə' cayanə'an naquə yichjla'aždao' Diozən' na' tozə can' chso'one'. ⁵ Bitobi dižə' cho'a par güe'elao' cuina'. Con chyixjui'a de que cheyalə' gwzenagcho che Xancho Jesocristən'. Na' nada' con zocza' par gaquəlena' le'e xte ga zelao saquə'ada' chedə' chacda' che Jeso'osən'. ⁶ Chyixjue'eto' dižə' güen dižə' cobə che Jesocristən' chedə' Dioz ben' ben par niçh chatə' be'eni' yežlyo nga leczə le'enə' babene' par niçh be'eni' che'enə' yo'on lo'o yichjla'ažda'ochon'. Na' de'e na'anə' ca naquə chio'o banombi'acho Jesocristən' nezecho de que Diozən' naque' le'ezelaogüe beṇə' zaque'e chedə' yichjla'aždao' Diozən' naquən cayanə'an naquə yichjla'aždao' Jesocristən' na' tozə can' chso'one'.

Apostol ca' gwnitə'ətezə gwnite'e gwso'onjilaže'e Diozən'

⁷ Chio'o ni latə'əzə cui zaquə'əcho par chzejni'icho beṇə' che Cristən', pero Diozən' chaclene' chio'o par chzejni'iga'aquechone'en. De'e na'anə' chsa'acbe'i beṇə' de que por yelə' guac xen che Dioz nan' choncho de'en choncho, caguə por ni che de'e zaquə'əcho gonchonṇə'. ⁸ Na' ca naquə nada' syempr chy'i chzaca'a pero bito chbejəyichja' xšine'enə'. Zan las catə' cuichczə chežellaža'a naclə' gona', pero nežda' zo Diozən' chaclene' nada'. ⁹ Choso'olagzejə' choso'olagzidə beṇə' nada' pero Diozən' bito chbejyichje' nada'. Choso'oçhi' choso'osaquə' beṇə' nada' pero bito choe' Diozən' latjə par so'ote' nada'. ¹⁰ Gatə'ətezə cha'a con do tyemp choso'oçhi' choso'osaquə' beṇə' nada' na' chse'enene' so'ote' nada' can' gwso'ot beṇə' mal ca' Jeso'osən'. Diozən' cho'e latjə chy'i chzaca'a yoguə' de'e quinga par niçh nla'alaon de que zocza Jeso'osən' chaclene' nada' par chona' can' chazlaže'enə'. ¹¹ Nada' žlac ne'e mbana' syempr chjt'i'a beṇə' choso'oçhi' choso'osaque'e nada' laogüe de'en chse'enene' so'ote' nada'. Chəsə'əgue'ine' nada' chedə' əchyixjui'a xtižə' Jeso'osən'. Na' la'anə'əczə chac ca' na' la'anə' chaxə' cuerp chia'anə' zocza Jeso'osən' chaclene' nada' par chona' can' chazlaže'enə'. ¹² Gwžinlja ža so'ote' nada', pero caguə de'e bi de'enə', con la' bade yelə' mban zejlicane' chelen' de'en babzejni'ida' le'e xtižə' Diozən' na' banonen' chele.

¹³ De'e Dabin' bzoje' to Salmo gan' nan: "Chonjilaža'a Diozən' na' de'e na'anə' cho'a dižə' che'." Can' benjilažə' de'e Dabin' Diozən', ca'aczən' chonjilaža'ane' nada'. De'e na'anə' cho'a xtiže'enə'. ¹⁴ Diozən' bosbane' Xancho Jeso'osən' ladjo beṇə' guat ca'. Na' nezecho can' bosbane'ene'enə', leczə can' yosbane' chio'o na' yeyejcho gan' zoe'enə' par niçh žjəyechocho txen len le'. ¹⁵ Yoguə'əlol de'en babžaglaogua', bžaglaogua'an par gaquəlena' le'e. De'e na'anə' bag-wyanch chio'o chonjilaža'əcho Xancho Jeso'osən', na' banaccho beṇə' zan cho'echo yelə' choxwlen che Diozən' catequan' nži'ilaže'e chio'o.

¹⁶ Na' bito chjxaquə'əlaža'a ca de'en chyixjui'a xtižə' Xancho Jeso'osən' la'anə'əczə tža tža zda chaxə' cuerp chia'anə'. Tža tža chonəch Diozən' nada' fuers balor par yichjla'aždaogua'anə'. ¹⁷ Yob te che bitə'ətezə de'e dao' de'en chžaglaochi' lao zocho yežlyo nga. Pero de'e ca' chžaglaochon' chsa'aclenən chio'o niçh socho probnid žjəyechocho mbalaz juisy len Diozən' zejlicane. ¹⁸ Chio'o bito chi' yichjcho che de'e ca' chle'icho yežlyo nga, chi' yichjcho che de'e ca' cui chle'icho. De'e ca' chle'icho zjəde yežlyo nga, de'e yesə'əde cheinə', pero de'e ca' cui chle'icho yežlyo nga caguə de'e yesə'əde cheinə', zjənaquan par zejlicane.

5

¹ Ca naquæ cuerp çhechon' gwxaquæ'æleben ca to ranšzæ. Žalnez te çhei catæ'an gatcho. Pero na' nezecho Diozæn' gone' par niç žjæyezocho zejlicane yoban' gan' zoe'ena'. Na' gan' žjæyezocho' gwxaquæ'æleben ca to yo'o gual çhedæ' naquæn to de'e ben Diozæn' na' caguæ de'e te çheina'. ² De'e li žlac nezoa' mbana' yežlyo nga chbežyaša'a lo'o la'aždaogua'anæ' zelaža'a xte juisy gon Diozæn' cuerp cob çhia'anæ' de'en gata' çhia' yoban'. ³ Zelaža'a gata' cuerp cobæ çhia' sin cui gata' çhedæ' bito che'enda' soa' sin cuerp. ⁴ Cuerp çhechon' de'e te çhein'. De'e na'anæ' chbežyaša'a lo'o la'aždaogua'an, caguæ de'en che'enda' gata', pero de'en zelaža'a gon Diozæn' cuerp cobæ çhian' de'en cui te çhei na' žjæyezoa' len le' zejlicane. ⁵ Dioz na'anæ' babocobe' yichjla'ažda'ochon' na' le'ena' babsel'e'e Spirit çhe'ena' zon lo'o yichjla'ažda'ochon' par niç ca' nezecho gwžin ža gone' chio'o to cuerp cobæ de'en cui te çhei.

⁶ De'e na'anæ' yichjla'aždaogua'anæ' zon mba bitæ'ætezæ chac. Nezda' žlac zoa' mbana' len cuerp çhia'anæ', bito gaquæ soa' yoban' gan' zo Xancho Jesocristæn'. ⁷ Pero la'anæ'æczæ cui chle'ida' Xancho' zocza' chonlilaža'ane'. ⁸ Na' yichjla'aždaogua'anæ' zon mba de'en nezda' žjæyezoa' len Xancho Jesocristæn' catæ'an gata'. De'e na'anæ' yejni'a gata' na' gožæ' cuerp çhia'anæ' cle ca socha' yežlyo nga. ⁹ Na' žlac ne'e mbana' cho'elaza'a chona' ca chebei Diozæn' nada' na' ca yebeine' nada' catæ'an bagota'. ¹⁰ Chona' ca' çhedæ' chonæn byen yoguæ'æcho techo lao Cristæn' par æçhogbi'en che to tocho segon naquæn' bencho lao bguancho, šæ bencho de'e güen o šæ bencho de'e mal. Eçhogbi'en che to tocho šæ socho mbalaz o šæ si'icho castigw.

Nota'ætezæ beŋæ' chso'onlilažæ' Cristæn' nite'e binlo len Diozæn'

¹¹ Na' nada' ža ca naquæn' nezda' de que cheyalæ' ægwdecho cuent lao Cristæn' che yoguæ'ælol de'en chonchon', chona' xte ga zelao saquæ'ada' par se'ejle'e beŋæ' che xtiže'ena'. Diozæn' nezene' de que chona' xšine'ena' do laža'a, na' leczæ zoa' lez de que le'e baŋezelen. ¹² De'e yoblæ nia' de que bito cho'elao' cuina' sino che'enda' ænezele can' chona' niç yebeile na' güe'ele dižæ' len beŋæ' ca' çhæsæ'anelao' çhia' ye'ega'aclene' de que chona' xšin Diozæn' do laža'a. Beŋæ' ca' çhæsæ'anelao' çhia' chso'elao' cuinga'aque' por ni che šæ bi de'en bazjænsede', na' che seŋyan' zjæzoe' na' che no lao dia çhei gwsa'alje'. Na' bito bi nonæn len lega'aque' nac zjænaquæ yichjla'ažda'oga'aque'ena'. ¹³ Šæ chaquæle chac tonta'anæ' por ni che can' babena', legon xbab de que par be'elaogua'a Dioz nan' babena' bi de'en babena'. Na' šæ çhonle xbab zo ša'ocza yichjla'aždaogua'anæ', legon xbab de que par chaquælena' le'ena' chona' bi de'en chona'. ¹⁴ Leçgualæ chaque Cristæn' çhecho, na' de'e na'anæ' bitobi chona' de'e bia'azalaža'a. Chona' con can' chene'ene' çhedæ' bsanlažæ' cuine' gwso'ote'ene' por ni che yoguæ' chio'o beŋač, na' de'e na'anæ' guaquæ æŋacho de que yoguæ'æcho gotcho. ¹⁵ Por ni che yoguæ' chio'o beŋačæn' Cristæn' bsanlažæ' cuine' gwso'ote'ene' par niç bitoch goncho con de'e bia'azalažæ'æcho sino goncho can' chene'e le', chio'o bade yejæ' mban zejlicane çhecho. Por ni che chio'on bsanlažæ' cuin Cristæn' gwso'ote'ene' na' leczæ por ni çhechon' bebane' ladjo beŋæ' guatæn'. ¹⁶ Catæ'an cuinæ' gonlilaža'a Cristæn' bena' xbab de que cui zaquæ'e, çhedæ' bena' xbab che' na' che yoguæ'æte beŋæ' de que zjæzaquæ'e segon nac zjænaquæ', na' nac chso'one', na' bi de'e de çhega'aque'. Pero ŋa'a bitoch chona' xbabæn' ca' che Cristæn' o che nota'ætezæchlæ beŋæ'. ¹⁷ Chio'o bandil' ngodæ'æcho len Cristæn' Diozæn' babocobe' yichjla'ažda'ochon'. Na' bitoch chebeicho de'e ca' bebeicho antsæ,

na' lec̄zə bitoch choncho can' bencho antslə. Bazochō ca beṇə' cobə, na' banža' yelə' chzo yelə' chbez chechon'.

¹⁸ Ca de'en banaccho ca beṇə' cobə, goc ca' chedə' Diozən' bocobe' yichjla'ažda'ochon'. Ben Diozən' par bezochō binlō len le' ca de'en bnežjw' cuin Cristən' por ni checho. Na' Diozən' no'e chia' chaquələna' beṇə' par niçh yesyə'anite'e binlō len le'. ¹⁹ Diozən' bsi'e xpeze ben Cristən' par niçh notə'atezə beṇə' chso'onlilažə' le' chəsyə'anite'e binlō len Diozən', na' bitoch chone' cuent che de'e mal ca' bagwso'one'. Na' de'e na'anə' no'e Diozən' chia' chyixjue'ida' beṇə'chən' naquən' so'one' par yesyə'anite'e binlō len le'. ²⁰ Cristən' bsele'e nada' ca lgüe'e, na' Diozən' chone' par niçh chneyoida' le'e ca cuinczə Cristən', le'e cuinə' gonlilažə'əlene', par yezole binlō len Diozən'. De'e na'anə' leyenitə' binlō len le'. ²¹ Cristən' bitobi de'e mal bene', pero par niçh cui si'icho castigw che de'e mal chechon' de'en choncho, Diozən' bene' par niçh Cristən' gwxaquə'əzi'e caczə nacho lele'en bene' de'e malən'. Na' laogüe de'en gwxaquə'əzi' Cristən' lgua'a chio'o, Diozən' banone' chio'o beṇə' güen can' naquə' cuine' chio'o chonlilažə'əcho Cristən'.

6

¹ Nada' chona' xšin Diozən' txen len le'. De'e na'anə' chneyoida' le'e legon can' chazlažə' Diozən' par niçh gacbia' de que chaclenən le'e ca de'en chonlilažə'əle Diozən' ben' nzi'ilažə' le'e. ² Nyoj can' gwna Diozən':

Catə' bžin tyemp de'en bžia' bia' gona', bzenaga' chio'.

Na' catə' bžin ža bena'an, cana'achən' goquələna' le'.

Can' nyojən. Na' ža neža babžin tyempən' gwne' ca', la' ža neža zocze' par yebeje' le'e xni'a de'e malən' le'e cuinə' gonlilažə'əlene'.

³ Bitō chona' de'e əgwžon par niçh beṇə' cui so'onlilažə'e Criston' niçh ca' cui nono nelao' che xšin Diozən' de'en chona'. ⁴ Lgua'a de'e gona' ca', bitə'atezə de'e chona' chona'an ca chsa'acbe'i beṇə' de que chona' can' cheyalə' so'on beṇə' güen xšin Diozən'. Chgo'o chchejlaža'a catə' choso'ochi' choso'osaquə' beṇə' nada' na' catə' chzaquə'əzi' chzaquə'əyaša'a, na' catə' za'ac bichlə de'e mal len nada'. ⁵ Lec̄zə chgo'o chchejlaža'a catə' chjəti'a beṇə' chəsə'əyin nada', na' catə' chəsə'əyixjue' nada' ližya, na' catə' chəsə'əbiadi'e nada' chəsə'əne' de que naca' beṇə' mal, na' catə' chjxaquə'ada' por ni che yoguə'əloj de'en chona', na' catə' chžaglaogua' chbeja' yel bišgal, na' catə' chbil chdona'. Yoguə' de'e quinga chjti'a pero chgo'o chchejlaža'a. ⁶ Chona' ca chsa'acbe'i beṇə' de que chona' can' cheyalə' so'on beṇə' güen xšin Diozən'. Chlo'a de que bito bi de'e mal da' əchen yichjla'aždaogua'anə'. Chlo'a de que chejni'ida' can' chene'ene' goncho, napa' yelə' chxenlažə' len beṇə' yoblə, chona' güen len beṇə' yoblə, chona' can' na Spirit che Diozən', na' do laža'a chacda' che beṇə' yoblə. ⁷ Cho'a xtiže'ena' de'en naquə' de'e li, na' de'en baben Diozən' par niçh naca' beṇə' güen laogüe'ena' de'e na'anə' chone' nada' yelə' guac che'ena' par chona' xšine'ena' na' par chdilaena' gwxiye'ena'. ⁸ Chona' ca chsa'acbe'i beṇə' de que chona' can' cheyalə' so'on beṇə' güen xšin Diozən' la'anə'əczə šə chso'elaogüe'e nada' o šə chəsə'əgue'ine' nada' na' la'anə'əczə šə chəsə'əne' güen chia' o šə chəsə'əne' mal chia'. Dižə' de'en cho'a naquən de'e li, la'anə'əczə nitə' beṇə' chəsə'əne' naca' beṇə' goxoayag. ⁹ Na' la'anə'əczə nitə' beṇə' chsa'acquene' bito bselə' Diozən' nada', le'e nezele de que Diozən' bsele'e nada' naca' apostol. Zan las chona' xbab gatca'anə', pero nembana'. Ca de'en chon Diozən' par chac chia' yoguə' de'e quinga chžaglaogua', chone' ca' par niçh gaquə'cha' beṇə' güen, caguə' chone' par niçh gata'anə'. ¹⁰ La'anə'əczə de'e zan de'e chac par

soa' trist, syempr chebeida' lo'o la'aždaogua'anə'. La'anə'əczə nga'an yaša'a, chona' ca beṇə' zan nite'e mbalaz. La'anə'əczə bito bi de chia', Diozən' choṇe' bitə'ətezə de'en chyažjda'.

¹¹ Con yoguə' dižə' de'en ṇezda' na' de'en naquə' güen babi'an len le'e beṇə' Corinto de'en chachgüeida' chele. ¹² Na' ca naquən' cui zole binlo len nada', naquən' por ni che de'en cuitec chaquale chia', caguə' de'en cui chacda' chele. ¹³ Chatə'əyoichgüeida' le'e can' chatə'əyoida' no xi'ina' lesə' legaue' chia' can' chachgüeida' chele.

Spirit che Diozən' zon lo'o yichjla'aždao' beṇə' chso'onlilažə' le'

¹⁴ Bito cheyalə' əgwcodə' ljuežjcho len beṇə' cui chso'onlilažə' Cristən'. Ben' zda licha bito gaquə' gone' txen len ben' chon de'e mal. Na' ben' yo'o be'eni' che Diozən' lo'o yichjla'aždaogüe'enə' bito naquə' yichjla'aždaogüe'en tozə' len yichjla'aždao' ben' cui yo'o be'eni' che Diozən'. ¹⁵ Cristən' bito chac gone' txen len de'e gwxiye'enə'. Na' ben' chonlilažə' Cristən' bito cheyalə' gaque' txen len ben' cui chonlilažə' Cristən'. ¹⁶ Na' chio'o cho'ela'ocho Dioz ben' zo zejlicane bito gaquə' goncho txen len bitə'ətezə' de'en naquə' che lgua'a lsaquə' de'en chse'ejni'alažə' beṇə', chedə' Spirit che Diozən' zon lo'o yichjla'ažda'ochon' ca beṇə' zo liže'. Chac can' gwna Diozən': Soa' len lega'aque' na' talenga'aca'ane'.

Gaca' ben' so'elaogüe'e, na' lega'aque' əsa'aque' xi'ina'.

¹⁷ De'e na'anə' cheyalə' goncho can' gwna Xancho Diozən':

Le'e yechoj entr beṇə' ca' cui chso'elao' nada' na' bitoch gonle txen len lega'aque'.

Bitoch gonle de'e malən'.

Legon par niç yebeida' le'e.

¹⁸ Na' nada' gaca' Xale na' le'e gacle xi'ina'.

Can' na' Dioz ben' napə' le'ezelaogüe yelə' guac xennə'.

7

¹ Beṇə' bišə'ədaogua'a, ṇezecho gon Diozən' len chio'o can' na lyebe quinga de'en babi'a dižə' çhei. De'e na'anə' cheyalə' cuejyichjcho cuich goncho bitə'ətezə' de'e mal na' bitə'ətezə' xbab mal de'en choncho, par niç cui bi de'e mal ta' əchen cuerp chechon' o yichjla'ažda'ochon'. Na' ca de'en napcho Diozən' respet, cheyalə' gwzenaguəchcho che' par niç yichjla'ažda'ochon' šejəch gaquachən xi'ilažə'.

Beṇə' Corinto ca' gosə'əbejyichje' de'e malən'

² Na' chṇeyoida' le'e, legaue' chia' can' chacda' chele. Ni to beṇə' cui bi bi chonda'ane'. Bito bi bi chona' par əgwxiñjən yichjla'aždao' beṇə' yoblə. Bito chxəoyaga' beṇə'. ³ La'anə'əczə' balə' nale de que chona' ca', bito chdila' le'e. Bagwnia'acza' antslə' lechguale chacda' chele. Chacda' chele na'a mbana' na' leczə' xte ža yelə' gota' ne'e gwaquəczəda' chele. ⁴ Lechguale chebeida' le'e na' zoa' segor gonle can' chene'e Diozən'. Babeyacxenlažə'a de'en bla' rson ca güenṇə' chonle, na' zochgua' mbalaz, la'anə'əczə' de'e zan de'e chyi' chzaca'a.

⁵ Catə' bežina' Masedonian' de'e li bito gota' latjə yezi'ilažə'a. Do tyempte boso'oçhi' boso'osaquə' beṇə' ca' nada', na' bžeba' lo'o yichjla'aždaogua'anə' godca' nac gonle. ⁶ Pero Diozən' syempr cheyonxenlažə'e beṇə' nitə' trist. Le' beyonxenlažə'e nada' de'en bela' Titonə'. ⁷ Beyacxenlažə'a caguə' de'en bele'e na'azən' sino por ni che rson de'en zeno'enə' de que bebeichgüeine' can' chonle. Be'e dižə' de que zelažə'əchguale yida' de'e yoblə delana'a le'e.

Na' leczə ne' de que chegüi'inchgüeile lo'o yichjla'ažda'olen' ca naquə de'e mal de'en benlen' na' chi' yichjle gonle can' gwnia' le'e. Na' bebeichgüeida' de'en bele'enə' pero mazachlə bebeida' dižə' de'en be'e chele.

8-9 Chache'ida' tristən' bzoa' le'e ca de'en gwnia' le'e le'e cartən'. Gwdechla beyejda' ca naquən' bzoa' le'e tristən', pero na'a bitoch cheyejda' chedə' šložzan' gwzole trist. Caguə chebeidan' bosgüi'inda' yichjla'ažda'olen'. Con chebeida' de que lao zole chegüi'inlažə'əle lo'o yichjla'ažda'olena' bedinjle de'e mal chele de'en benle. Na' chebei Diozən' de que bedinjlen. Can' naquən bitobi de'e mal benən len le'e de'en bzoja' le'e cartən', sino goclenən le'e. 10 Chebei Diozən' catə' notə'atezə beṇə' zo trist chedinjene' che de'e malən' babene', na' Diozən' chezi'ixene' che ben' chedinje xtolə'enə' par nich cui yeyeje' lao yi' gabilən'. Na' šə babedinjecho xtolə'əcho ca' cuat socho trist de'en bedinjchon. Beṇə' zan ža' yežlyo nga bito chesyə'ədinjene' xtolə'əga'aque'enə' catə' nite'e trist, na' de'e na'anə' gwžin ža žjəya'aque' lao yi' gabilən'. 11 Chebei Diozən' can' bedinjle xtolə'əlen' catə'ən gwzole trist. Na' de'en gwzole trist, lechguəle gone'ele benle can' chene'e Diozən' gonle, na' lechguəle gone'ele nežda' de que bito benle txen len ben' ben de'e malən', na' bžə'ale por ni che de'e malən' ben be'enə', na' bžəble chaquele šə yida' yedeyena' le'e castigw. Lechguəle gone'ele gonle ca yebeida'. Lechguəle gwche' yichjle gonle can' na Diozən'. Na' leczə de'en gwzole trist benən par nich bnežjwle castigw che ben' ben de'e malən'. Na' lao yoguə'əlol de'e quinga bagoc, naquən clar de que bitoch bi xtolə'əle de. 12 Bitə bzoja' le'e parzə nich ben' ben de'e malən' si'e castigw, ni que nacho parzə nich ben' goquə de'e mal chei yeyacxenlažə'e. Leczə bzoja' le'e par nich lao Diozən' gocbe'ile de que ne'e chaquele chia' na' ne'e chene'ele gonle can' nia'anə'. 13 Na' babeyacxenlažə'a de'en bzenagle chia'.

Na' bebeichgüeida' chedə' benle ca bebei Titonə'. Yoguə'əle benle ca zoe' mbalaz. 14 Be'elaogua' le'e catə' bi'a dižə' len Titonə' na' benle can' goža' Titon' gonle. De'e na'anə' bito chacda' tola. Yoguə'əlol de'en bagwnia' le'e babi'a dižə' li, na' leczə catə'ən bi'a dižə' len Titonə' be'elaogua' le'e benle par nich nachia' bi'a dižə' li. 15 Na' chaquəchene' chele chedə' chone' xbab can' yoguə' le'e bzenagle che' na' chone' xbab can' gwche'echgua yichjle par benle can' gože' le'e. 16 Na' chebeida' zoa' segor gonle yoguə'əlol can' cheyalə' gonle.

8

Bešə'əzanene' de'en gotə' chega'aque' par gwsa'aclene' beṇə' yoblə

1 Beṇə' bišə', chene'eto' ənezele can' bagoclen Diozən' tcuen tcuen beṇə' ca' chəsə'ədoṇə chəsə'əžag chso'əlaogüe'e Cristən' gan' mbane Masedonian'. 2 Lao yeļə' yašə' yeļə' zi' chega'aque'enə' bagoclen Diozən' lega'aque' par nite'e mbalaz. Na' la'aṇə'əczə bazjənaquəchgüe' beṇə' yašə', besyə'əbeine' bosə'ənežjue' de'en besə'əyažje beṇə' chso'əlo' Cristən' Jodean'. 3 Nežda' na' cho'a dižə' de que to toe' bosə'ənežjochgüe' de'e besə'əyažje beṇə' ca' la'aṇə'əczə cui bi gotə' par cuinga'aque', na' con xbab chega'aque'enə' gwso'one' ca'. 4 Gosə'əneyoine' nada' gua'a latjə yoso'ənežjue' mech par əsa'aclene' beṇə' Jodea ca' bagwlej Diozən' par zjanaque' lažə' ne'enə'. 5 Na' gwso'onche' mazachlə can' bena' xbab so'one' de'en gwso'on cuinga'aque' lažə' na' Xancho Cristən' na' lažə' na'anə' chedə' gwsa'acbe'ine' can' chene'e Diozən' so'one'. Na' leczə bosə'ənežjue' mechən'. 6 Nezecho de que Titon' bide' gan' zole na' btipe' lažə'əle par btoble mechən'. Na' catə' gwnežda' de'en gwso'on beṇə' Masedonia ca', gotə'əyoida' Titonə' yeyede' yeto gan'

zolen' par niçh gaquälene' le'e yeyoż ägwtooble mechän'. ⁷ Güenchguan' chonle ca de'en lechguale chonlilaža'äle Cristän', na' cho'echguale xtiže'ena', na' de'e zan de'e chejni'ile che Diozän', na' chonle xšine'ena' do yichj do laža'äle, na' chacchgüeile cheto'. Na' de'e na'ana' chneyoida' le'e gonšgacze güen ägwtooble de'e scha'o par ägwnežjwle beṇä' Jodea ca'.

⁸ Bito chona' mendad ägwnežjwle mechän', con babi'a dižä' len le'e can' boso'onežjo beṇä' mech. Na' šä gonle can' gwso'on lega'aque' gwlo'ele de que do laža'älen' chaquele che Diozän'. ⁹ Nezele de que Xancho Jesocristän' nape' yelä' gwnabia' na' yelä' bala'aṅ xen. Pero de'en nži'ilaže'e chio'o bzanene' gwlejšichje' yelä' gwnabia' na' yelä' bala'aṅ che'ena' par niçh bedäyene' ca si'icho yelä' bala'aṅ xen.

¹⁰ Godgüize gone'ele gaquälentle beṇä' yaša' ca' na' gwzolaob tooble mechän'. Na' na'a chnia' le'e de que naquän güen yeyoż ägwtooblen. ¹¹ Na' gwnežjwle de'en de chele xte ga zelao saque'ele par niçh yeyoż gonle can' gone'ele gonle.

¹² Šä to beṇä' chene'ene' ägwnežjue' to de'e ägwnežjue', gobeicze Diozän' can' gone'ena' la'ana'eczä latä'azä de'en gaquä ägwnežjue', pero na' šä cui bi de che' bito äṇa Diozän' cheyalä' ägwnežjue' de'e cui de che'.

¹³ Bito nia' de que gonle ca cuich bi bi yega'aṅ chele na' gatä' che beṇä' yoblä.

¹⁴ Con che'enda' gatä' de'e chyažje yoguä'äle. Na'a de che le'e, na' cheyalä' gaquälentle lega'aque' chäsä'ayažjene' na'a. Čhexa šä gwžin tyemp catä' gatä' che lega'aque' na' le'e äyažjele, lega'aque' cheyalä' sa'aclene' le'e par niçh gatä' de'e chyažje yoguä'äle. ¹⁵ Nach gaquä can' nyoj Xtižä' Diozän', nan: "Ben' betobä de'e scha'o bito gotä'äch mazachlä ca de'en byažjene', na' ben' betobä lata' da'ozän' gotä' che' de'en byažjene'."

Titon' na' beṇä' lježje' ca'

¹⁶ Čoxčwlen Diozän' bene' par niçh Titonä' che'enchgüeine' gaquälene' le'e ca'aczän' che'enda' nada' gaquälena' le'e. ¹⁷ Catä' gotä'äyoida'ane' yeyede' gan' zolen' par gaquälene' le'e, le' gwne' ya'o, caguä de'en gotä'äyoida'ane' na'azä sino de'en bache'enchgüeiczene' yeyede' gan' zolen' par gaquälene' le'e.

¹⁸ Čhselä'a yeto beṇä' bišä'ächo len Titonä'. Na' tcuen tcuen beṇä' ca' chäsä'ädopä chäsä'äžag chso'elaogüe'e Jesocristän' chso'e dižä' güen che beṇä' bišä'ächonä' catequan' xoche chzejni'ine' beṇä' ca naquä dižä' güen dižä' cobä' che Jesocristän'. ¹⁹ Nachän' bagosä'äbeje'ene' par sa'alene' nada' catä' žjəyesana' mechän' de'en chtobcho par gaquälentle beṇä' bišä'ächo yaša' ca' nita' Jodean'. Čhtobchon par niçh Xancho Diozän' chzi'e yelä' bala'aṅ na' par niçh nla'alao de que chene'echo gaquälentle beṇä' chyažj chchine. ²⁰⁻²¹ Yo'o yichja' gona' de'en naquä güen lao Xancho Diozän' na' lao beṇächän'. De'e na'ana' le' sa'alene' nada' par niçh notono äṇa de que bito chona' can' cheyalä' gona' len mech xen de'en goxa'ana'.

²² Na' leczä len Titon' čhselä'äto' yeto beṇä' bišä'ächo. Zan las bable'ito' de que do yichj do laže'e chone' xšin Diozän'. Nezene' de que le'e lechguale chene'ele gonle can' cheyalä' gonle, na' de'e na'ana' banachguan yide' gan' zolen' par gaquälene' le'e. ²³ Šä no ṇabe le'e bixchen' za' Titon' na' beṇä' bišä'ächo ca' yechopä, leye'ega'aque' de que Titon' chone' t xen len nada' chonto' xšin Diozän' par chačlent' le'e. Na' beṇä' ca' yechopä ža, tcuen tcuen beṇä' ca' chäsä'ädopä chäsä'äžag chso'elaogüe'e Cristän' chäsä'äsele' lega'aque' par sa'aclene' le'e, na' chso'one' ca chzi' Cristän' yelä' bala'aṅ. ²⁴ Na'a ža chneyoida' le'e legon güen len lega'aque' par niçh yesa'äneze tcuen tcuen beṇä'

ca' chəsə'ədopə chəsə'əžag chso'elaogüe'e Cristən' de que chaquele che Diozən'. Na' legon par ničh la'alaon de que dižə' lin' gwnia' catə'an be'elaogua'a le'e.

9

Boso'otobe' mech par gwsa'aclene' beņə' ca' chso'onlilažə' Cristən' Jodean'

¹ Bito chonən byen gwzoja' le'e de que cheyalə' əgwnežjwle mech par gaquälənle beņə' Jodea ca' bagwlej Diozən' par zjənaque' lažə' ne'enə', ² chedə' nežda' de que le'e chene'ele gaquälenga'aclene'. Cho'elaogua'a le'e cho'a dižə' len beņə' Masedonia ca' chapəga'aca'ane' de que le'e beņə' Acaya gone'ele gaquälənle beņə' yašə' ca' godgüize na' gwzolao btoble mechən'. Na' de'en beņle ca' do yichj do lažə'äle leczə zan beņə' Masedonian' chse'enene' sa'aclene' lega'aque'. ³ Na' ŋa'a chselə'a beņə' bišə'əcho ca' gan' zolen' na' sa'aclene' le'e yeyož əgwtohlen par ničh ca' sole probnid əgwnežjwlen. Che'enda' la'alaon de que dižə' lin' bi'a be'elaogua'a le'e de que gaquälənle beņə' yašə' ca'. ⁴ Čhexa šə' əsa'acłə to čhopə beņə' Masedonian' catə' yeyeda' gan' zolen'? Šə bito ne'e yeyož əgwtohle mechən' catə' yeyeda', gaquada' zto' de'en gožəga'aca'ane' ca' güennə' gonle na' leczə le'e gaquele zto' de'en cui beņle complir de'en gwzolao beņle. ⁵ De'e na'anə' zencuialaogua' beņə' bišə'əcho ca' šonə zeya'aque' gan' nitə'alənə' chedə' chacda' chonən byen sa'aclene' le'e yeyož əgwtohle mech de'en beņle lyebe əgwtohle par gaquälənle beņə' yašə' ca'. Legwtobən antslə cuiņə' yeyeda' par ničh baden catə' yeyeda', na' gachia' de que gonlen do yichj do lažə'äle caguə gonlen la fuers.

⁶ Ben' chaz latə'əzə, latə'əzə chelape', na' ben' chaz de'e scha'o, de'e scha'o chelape'. Ca'acczan' chac len chio'o, šə zanecho de'e scha'o par gaquäləncho beņə', nachən' socho mbalaz juisy. ⁷ To tole cheyalə' əgwnežjwle ja'aquə'ətə' de'e yebeile əgwnežjwle chedə' lechgualə chebei Diozən' ben' chebeine' chnežjue' de'e chnežjue' par xšin Diozən'. Bito cheyalə' əgwnežjwcho de'e əgwnežjwcho la fuers sino əgwnežjwchon do lažə'əcho. ⁸ Diozən' nape' yelə' guac par chaclenchgüe' chio'o len bitə'ətezə de'e chyažjecho. Na' chac gone' ca' gatə' yoguə'ələl de'e chyažjecho do tyempte par ničh gaquə əgwnežjwcho bi de'e chyažje beņə' yoblə na' goncho bichlə de'en naquə güen. ⁹ Nyoj Xtizə' Diozən' can' ben to beņə' nan:

Bagoclene' beņə' zan, bnežjue' de'e besə'əyazje beņə' yašə'.

Na' cuat ganlažə' Diozən' de'e güennə' de'en ben be'enə'.

¹⁰ Diozən' chone' par ničh chatə' no xoa' biņ na' bitə'ətezəchlə de'en chazcho, na' le'enə' chone' par ničh chatə' de'e che'ej de'e chaocho. Le'egatezə ca' le'enə' gone' ca' gatə' bichlə de'e chyažjecho na' gone ca' ča'o xenchən par ničh šejəch gonchcho de'e güennə'. ¹¹ Na' bitə'ətezə de'en chac chele Diozən' chone' par ničh chebeile chnežjwle de'e scha'o de'e chəsə'əyazje beņə' yoblə na' catə' neto' žjənežjoto' beņə' yašə' ca' de'en babtoble, nach əso'e yelə' choxcwlen che Diozən'. ¹² Na' catə' chio'o chnežjwcho de'e chəsə'əyazje yeziquə'əchlə beņə' bagwlej Diozən' par zjənaque' lažə' ne'enə' chaclenga'acchone' par ničh chatə' de'en chəsə'əyazjene', na' leczə ca' choncho par ničh beņə' ca' chaclencho chso'echgüe' yelə' choxcwlen che Diozən'. ¹³ Na' catə' yeyož əgwtohle de'e scha'o de'en əgwnežjwcho beņə' yašə' ca' əgwlo'en de que do yichj do lažə'äle chzenagle che dižə' güen dižə' cobə che Cristən'. Na' catə' beņə' yašə' ca' yesə'əzi'e de'en əgwnežjwle lega'aque' nach əso'elaogüe'e Diozən' can' chselə'äle de'e scha'o mech de'e gaquälənən lega'aque' na' əso'elaogüe'e

Diozən' can' chaclenle notə'ətezəchlə beṇə' chso'elao' Cristən'. ¹⁴ Na' so'one' orasyon par yesə'əṇabe' yelə' chaclen che Diozən' par le'e na' əsa'aquene' chele yesyə'əbeine' can' bagocwlenchgua Diozən' le'e len xbab de'en yo'o lo'o yichjla'azda'olen' par niçh chnežjwle de'en chəsə'əyazje beṇə' yoblə. ¹⁵ Choçwlen Diozən' ca naquə goclen xen de'en bene' len chio'o beṇəçh cata'ən bsele'e Xi'ine'enə' por ni checho. Bito de dižə' de'e güe'echo catec zaquə'ən de'en bsele'ene'.

10

Yelə' chnabia' che Pabən' de'en naque' apostol

¹ Na' ca naca' nada' Pab de yeto de'e ṇia' le'e can' gonle. Chəsə'əna beṇə' de que nada' chžeba' par bi gona' o par bi ṇia' le'e catə'ən zoa' len le'e na' con cata' zoa' zita' chzoja' le'e ca beṇə' cui chžeb. Bito naquan ca' sino chona' len le'e can' bentezə ben Cristən' len beṇə' lao yelə' chxenlažə' che'enə' na' yelə' beṇə' gaçjwlažə' che'enə'. ² De'e na'anə' chṇeyoida' le'e legon ca cui gonən byen tila' le'e catə'ən yida'. Bangüia' tila' beṇə' ca' chəsə'əne' chona' con can' na xbab chia'anə'. ³ La'anə'əczə naca' beṇəçh bito chona' con can' na xbab chia'anə' ca de'en chonchgua' xte ga zelao saquə'əda' par niçh beṇə' yoblə yoso'ozenague' che Cristən'. ⁴ Nezda' de que bitə'ətezə de'en chac chon cuinza' bito chaclenən nada' par gona' ca yoso'ozenag beṇə' che Cristən'. Pero Diozən' chaclene' nada' par chzoa' ca'alə bi de'en chžon par niçh beṇə' yoso'ozenague' che Cristən'. ⁵ Na' len yelə' chnabia' che' de'en babene' nada', chona' ca chəsə'əzexjwyichj beṇə' lao Cristən' par choso'ozenague' che' na' chso'one' xbab güen can' chene'e Cristən'. Chona' ca cuich chso'on cuinga'aque' xen sino chəsə'əbejyichje' bitə'ətezə de'en chžon par se'ejle'e dižə' li che Diozən'. ⁶ Chbeza' par niçh yogua' le'e gwzenagle che Cristən' do yichj do lažə'əle, pero na' notə'ətezle sə cui gwzenagle, zoa' dispuest par gona' le'e castigw.

⁷ Legon xbab sə de'en chəsə'əna beṇə' naquən de'e li. Nitə' beṇə' chəsə'əne' zjənezene' bsele' Cristən' lega'aque'. Beṇə' ca' cheyalə' so'one' xbab de que lecza Cristən' bsele'e nada'. ⁸ Žalə' güe'echa' dižə' mazəchlə can' babi'an antslə ənia' de que Cristən' bsele'e nada' na' beṇə' yelə' chnabia' par bi de'en chona', guatə'əbia' de que cho'a dižə' li. Xancho Cristən' bsele'e nada' na' beṇə' nada' yelə' chnabia' par niçh gaquələna' le'e, caguə par gona' ca cuejyichjle cuich gonlilažə'əlene'enə'. ⁹ Echnia' ca' par niçh cui gonle xbab de que chzoja' cart quinga par əgwšeba' le'enə'. ¹⁰ Beṇə' ca' chəsə'ənelao' chia' chəsə'əne' de que cart ca' chzoja' zjənaquan de'e žialao. Na' chəsə'əne' bito chžeba' bi ənia' le'e le'e cartən' pero bito cheyaxjda' par bi gona' cata' zoa' len le'e na' de que xtižə'anə' bito bi zaquə'ən. ¹¹ Beṇə' ca' chəsə'ənelao' chia' cheyalə' yesə'ənezene' de que can' ṇia' le'e cart ca' de'en chzoja' le'e catə' zoa' zita', lecza can' əṇia' na' lecza can' gona' catə'ən soa' len le'e.

¹² Bito che'enda' gonlebəda' beṇə' ca' chso'elao' cuinga'aque'. Beṇə' ca' chsa'aquene' de que chso'onyanə'e can' cheyalə' so'one' na' chsa'aquene' de que güenchguan' choso'osed choso'olo'ine' chedə' tozə can' choso'osed choso'olo'i yogue'e, len bito bi zaquə' de'en chso'one' xbabən' ca'. ¹³ Nada' bito güe'elao' cuina' əṇia' de que bena' bi de'e güen sə cui bena'an cuina'. Con gua'a dižə' che de'en babena' gan' babselə' Diozən' nada', na' nezda' de que lenczə gan' zole na'anə' bsele'e nada'. ¹⁴ Na' ca naca' nada' babida' be'elena' le'e xtižə' Diozən' catə'ən cui nonə' güe'elene'en le'e, de'e na'anə' naquəczən əṇia' le'e can' cheyalə' gonle. ¹⁵ Bito cho'a dižə' che xšin Diozən' de'en ben

benə' yoblə ga cui bsələ' Diozən' nada' par chixjui'a xtiže'ena'. Nada' zoa' lez de que le'e gonlilažə'əchle Cristən' na' catə' cuich chyažjele əgğüia əgwyə' le'e, nach ša'acha' ga yoblə gan' əselə' Diozən' nada' par chixjui'a xtiže'ena'. ¹⁶ Na' chixjui'a dižə' güen dižə' cobə che Cristən' ga yoblə gan' cui no ne'e chixjue'en. Na' gua'a dižə' che xšin Diozən' de'en baben cuina' lguə'a güe'elao' cuina' che de'en baben benə' yoblə.

¹⁷ Bito cheyalə' güe'elao' cuincho sino cheyalə' güe'ela'ocho Xancho Diozən'.

¹⁸ La'anə'əczə šə əna to benə' de que chone' güen, caguə de'e na' šejle'echo de que le güenə' chone'. Pero šə Diozən' güe'elaogüe'ene' nachən' nezecho be'ena' chone' güen.

11

Pabən' na' benə' ca' gwso'on cuinga'aque' ca apostol

¹ Žalə'ašga əgwzenagle yeto chopə dižə' de'en ənia' le'e la'anə'əczə šə gaquele bito bi zjəzaquə'an. Legwzenag žlac ənia'an. ² Nada' bzejni'ida' le'e xtižə' Cristən' na' de'e na'anə' che'enchgüeida' gaquele che tozə Cristən' ca to no'ol güego' naplažə' cuine' na' chaquene' che tozə ben' si' le'. Ca'aczən' chene'e Diozən' gaquele che Cristən'. ³ Chxožda' yesə'əxoayag benə' le'e par nič cuich gonlilažə'əle Cristən' do lažə'əle na' cuich gaquele che tozə le', can' bxoayag belən' de'e no'olə nechən' ben' gwle Eb yelə' bia bib chebən'. ⁴ ¿Egüenchguan' chonle ža? Babla'ac benə' gan' zolen' choso'ozejni'ine' le'e che Jeso'osən' nža'alə can' babzejni'ida' le'e. De'en choso'ozejni'ine'en zdan clelə len dižə' güen dižə' cobə che Cristən' de'en bagwyejle'ele chei. Pero le'e bito chaquele zdebə chzenagle chega'aque'. ⁵ Malən' chonle banonle benə' ca' ca apostol chele na' chonga'aclene' xen. ¿Ecabi lecə zaca'a nada' can' zjəzaquə'ena'?

⁶ La'anə'əczə cui chac cho'a dižə' güenchgua, chejni'ida' de'en cho'a dižə' chei. Bable'iczele yoguə'əte de'en babena' na' nezczele de que chejni'ida' xtižə' Diozən' de'en cho'elena' le'e.

⁷ ¿Echaquele malən' bena' cui bi laxjua' gwxi'a catə'an be'elena' le'e dižə' güen dižə' cobə che Diozən'? Nada' ben' cuina' ca to benə' cui bi zaquə' de'en cui bi laxjua' gwxi'a parzə nič bena' ca zole mbalaz. ⁸ ¿Egwñacho malən' bena' gwxi'a mech de'en gwso'on benə' ca' chəsə'ədopə chəsə'əžag chso'elaogüe'e Cristən' ga yoblə? Gwxi'a par nič be'elena' le'e xtižə' Diozən' sin cui benle nada' mantener. ⁹ Catə' gwzoo' len le'e la'anə' cui gotə' de'en byəžda', bito gwñabda'an le'e. Benə' bišə'əcho ca' zeya'ac Masedonian' lega'acle' gwso'one' de'en cui gotə' čhia'. Na' gwdapa' ciudad cui bi zed benda' le'e par gonle nada' mantener, na' batə'ətezəchlə bitoczə bi bi zed gonda' le'e. ¹⁰ Can' nezda' chaclen Cristən' nada' par cho'a dižə' li, ca'aczən' nezda' de que cuat gonda' le'e zed par gonle nada' mantener. Chebeida' guaquə' nia' de que bito bi gan' chona' de'en chyxjui'a xtižə' Diozən' len le'e o len benə' ža' gatə'ətezəchlə gan' mbane Acayan'. ¹¹ Caguə de'en cui chacda' chelen' cui gonczada' le'e zed gonle nada' mantenerən'. Diozən' nezene' chacda' chele.

¹² Goncha' can' chonczə' cui bi laxjua' chzi'a par nič benə' ca' chəsə'əna cui naca' apostol cuich yesə'əželene' bi yesə'əne' čhia'. ¹³ Lega'aque' chse'enene' goncho xbab de que zjənaque' apostol, pero bito zjənaque'. Choso'osed choso'olo'ine' dižə' güenlažə' na' chəsə'əxoayague' par nič chaquele de que Crist nan' əbselə'e'lega'aque'. ¹⁴ Bito yebanecho de'en chəsə'əxoayague', chedə' la' ca'aczən' chxoayag gwxiye'en chio'o par nič chaquecho de que de'en chene'en goncho naquən to de'e güen. ¹⁵ Na' de'en chon gwxiye'ena' ca',

beṇə' ca' choso'ozenag chei leczə choso'oḡoayague' par niç gaquele de que choso'ozejni'ine' beṇə' de'en naquə de'e güen. Gwžin ža gon Diozən' par niç gata' castigw çhega'aque' segon de'e mal de'en chso'one'ena'.

De'en gwdi' gwxaquə' Pabən' de'en naque' apostol

¹⁶ De'e yoblə əchnia', bito gaquele de que chona' xbab de'e cui bi zaquə'. Le'e chzenagle che beṇə' ca' de'e liczə chso'on xbab de'e cui bi bi zaquə'. Ca'aczə legwzenag chia' žlac gonlebəda' lega'aque' gua'a to chopə dižə' che de'e güenna' de'en chona'. ¹⁷ Gua'a dižə'an ca' la'aṇə'əczə nezdə' Cristən' bito be'e dižə'an ca'. Gona' ca' beṇə' chon xbab de'e cui zaque'e. ¹⁸ Beṇə' zan chso'e dižə' de que zjənaque' beṇə' güen por ni che can' zjənaque', o por ni che šə bi de'en bagwso'one' o bi de'en bagoc çhega'aque'. Ca'aczən' nada' gua'a dižə' che cuina' chedə' zjəde de'en nac ca' de'e gua'a dižə' chei. ¹⁹ De'e tant non cuinle beṇə' sin' de'e na'aljan' chebeile chzenagle che beṇə' ca' chso'on xbab de'e cui bi zaque'e. ²⁰ De'en chzenagle çhega'aque' bazjənzoe' le'e xni'aga'aque'ena' ca' esclabos çhega'aque' Choso'oḡoayague' le'e par niç chnezjwle lega'aque' bi de'en de çhele na' par niç chontezle bin' chəsə'ane'. Chso'elao' cuinga'aque' na' chəsə'əbaže'e le'e par niç chzenagle çhega'aque', na' le'e chebeile chonle can' chəsə'ane'ena'. ²¹ Gobeichljeile žalə' chonda' le'e can' chso'on lega'aque'ena'.

Leczə gwaquəczə gua'a dižə' par əgwlo'ida' le'e de que naca' beṇə' blao can' chso'on beṇə' ca', la'aṇə'əczə šə gaquele de que bito bi zaquə'an. ²² Chso'elao' cuinga'aque' de que gwsa'aljəlene' beṇə' chso'e dižə' ebreo. Leczə ca' nada' goljələna' beṇə' chso'e dižə' ebreo. Chso'elao' cuinga'aque' de que zjənaque' beṇə' Izrael. Pero leczə beṇə' Izrael nada'. Chso'elao' cuinga'aque' de que zjənaque' xi'in dia che de'e Abraanna'. Pero leczə xi'in dia che de'e Abraam na' nada'. ²³ Chəsə'ane' de que Crist nan' bsele'e lega'aque' par chso'one' xšime'ena'. Leczə len' əbsele'e nada'. Na' güe'ela'och cuina' can' chso'elao' cuin lega'aque' nia' can' bagoc chia'. Leçgualə babena' xšin Diozən' mazəchlə ca' lega'aque'. Na' zan las bagota'a ližya por ni che de'en əchyixjui'a xtižə' Cristən', na' leczə zan las bagosə'əyin jostis ca' nada'. Na' zan las babelazə cui gota' por ni che de'e ca' bagoc chia'. ²⁴ Gueya' las gosə'əyin beṇə' Izrael gwlaž chia' ca' nada' yid sot tğualjechoa las. ²⁵ Šon las beṇə' jostis ca' gosə'əyine' nada' xis. Na' yetlas bosə'ožižə' beṇə' nada' yej xte yelatə'əzə cui gwso'ote' nada'. Na' lao zya'a yež ziti' to lo'o barcw, leczə šon las boçijn' nisdə'on barcon' na' cane bžina' yo biž. Na' lao šon lasan' beyinjənnə' tši'i' gwxoə lao nisdə'ona' tža tyel to lao yag. ²⁶ Na' lao gwya'a jətxijui'a xtižə' Cristən' zan las bela' cui gota' o so'ot beṇə' nada'. Zan las goc zdebə' tia' yao ca', zo catə' goca' lao na' beṇə' bguan, na' zo catə' beṇə' Izrael gwlaž chia' ca' gwse'enene' so'ote' nada', na' leczə zo catə' beṇə' cui zjənaquə beṇə' Izrael gwse'enene' so'ote' nada'. Na' yelatə'əzə cui gota' do syodan' na' do ga cui no beṇə' ža'. Na' bašə gata' lao nisdə'ona'. Na' do tyemp chxožda' cuiayi' xšin Diozən' por ni che beṇə' ca' chsa'aš chəsə'ane' de que zjələne' chio'o pero caguə do lažə'əga'aque'ena'. ²⁷ Na' lao bena' xšin Diozən' zan las jxaquə'əchgüeida' na' zan las bguo'o bçheja' cui gwtasa'. Nombi'a yelə' chbil chdon chedə' zan las cui gotə' de'e ye'ej gaogua'. Na' zan las beyaga' cui gotə' xa' de'e byažjda'.

²⁸ Na' de'e zanch de'e chyi' chzaca'a de'en cui cho'a dižə' chei. Pero mazachlə chyi' chzaca'a, de'en chi'ichgua' yichja' yoguə' ža nac chac che le'e chdopə chžagle cho'ela'ole Cristən' to to yež. ²⁹ Na' notə'ətezle catə' cui chzoile par gonyanə'əle can' chene'e Diozən', chzochgua' trist ca'aczə ənacho

nada'an cui chona'an. Le'egatezə ca' catə' beŋə' chəsə'əxope' le'e par chonle de'e mal, lechguale de'e chacda' de'en che'enchgüeida' yebeja' le'e lao de'e malən'. ³⁰ Chacda' chyažjele gua'a dižə' che cuina', na' de'e na'anə' güe'ešaza' dižə' che de'e ca' chəsə'əlo'e can' chac falt' fuers balor chia', na' can' bito zaca'a bi gona' žalə' cui zo Diozən' len nada'. ³¹ Dioz ben' cheyalə' güe'ela'ocho zejlicaŋe ŋeczene' cho'a dižə' li. Len' naque' Xa Xancho Jesocristən' na' Xancho Jesocristən' leczə' cho'elaogüe'e le'. ³² Na' catə'an gwzoa' Damascon' ben' goquə' gubernador žlac gwnabia' Rei Aretas bnite'e beŋə' gwsa'apə' cho'a puert de'en zo le'e ze'e de'en nyechj syodan' par yesə'əzene' nada' catə' yechoja'. ³³ Pero beŋə' bišə'əcho ca' gosə'əgüe'e nada' to lo'o žomə' soa na' bosyo'oletje' nada' le'e ze'e che syodan' cho'a to bentan' par niçh ca' cui gwsa'acbe'ine' par yesə'əzene' nada'.

12

Pabən' be'e dižə' che de'en ble'ida'ogüe'ene' na' de'en bzejni'i Jesocristən' le'

¹ Chonən byen gua'a dižə' che cuina' la'anə'əczə' cui gaquälənən nada'. Na' gua'a dižə' che balə' de'en bable'idaogüe'eda' na' che balə' de'en babzejni'i Xancho Jesocristən' nada'. ²⁻³ Goc žda' iz ben Diozən' par niçh gwya'a yoban' na' ŋezda' bžina' gan' zo'enə', na' bachonlilaža'a Cristən' ca orən'. Pero bito goche'ida' šə gwya'a do cuerp chia' o šə cui. Dioz na'azən' ŋezene' naquən' goquə'. ⁴ Con ŋezda' de que bžina' mer gan' zo Diozən' na' benda' chsoe' beŋə' ca' ža' na' dižə' de'e cui chsa'ac beŋə'əçən' yežlyo nga na' naquən dižə' de'en cui de lənsə' əgwzejni'ida' beŋə'. ⁵ Žalə' nan chia' güe'elao' cuina' güe'elao' cuina' de'en baben Diozən' len nada'. Pero con gua'a dižə' che de'e ca' choso'olo'e' can' bito zaca'a bi gona' žalə' cui zo Diozən' len nada'. ⁶ Žalə' gua'a dižə' ca mban' baben Diozən' len nada' catə'an gwya'a yoban' naquən dižə' li, pero so'onlja beŋə' xbab de que naquə'cha' beŋə' zaque'e mazə'chlə' can' naca'. Bito gue'echa' dižə' che de'enə' chedə' la' che'enda' yogua' beŋə' so'one' xbab chia' segon bin' chəsə'əle'ine' chona' na' segon can' chyixju'i'a xtižə' Diozən'.

⁷ Diozən' bito chene'ene' gon cuina' xen por ni che de'e ca' ble'idaogüe'eda' na' de'e ca' bzejni'ine' nada' de'e cuiŋə' se'en yesə'əle'i yeziqə'əchlə' beŋə'. De'e na'anə' bene' par niçh chžaglaogua' len to de'en chac che cuerp chia' nga. De'en chžaglaogua' len len gwxaquə'əleben caczə' ga cha'a to yešə'. Na' lechguale chon gwxiye'en ca gaquəda' tolə' de'en chac chia' ca'. Dioz nan' chone' par niçh chac chia' ca' niçh cui gona' xbab de que lechguale zaca'a. ⁸ Šon las gwnabda' Xancho Cristən' gone' par niçh yega'a de'en chžaglaogua' len cuerp chi'anə'. ⁹ Nach Xancon' gwne': "Bito gona' ca cuich əžaglaogo'. Con sotezə' soa' gaquäləna' le'. Lezən de'en chyažjdo'. Na' ca naquən' cui chac bi gono', nada' gaquäləna' le' len yelə' guac chia'anə'." Ca' gože' nada'. De'e na'anə' chebeiləda' cho'a dižə' can' cui chac bi gona', chedə' de'en chac chia' ca' chlo'en ca yelə' guaquən' napə' Cristən' par chə'clene' nada'. ¹⁰ De'en chonlilaža'a Cristən' chebeida' bitə'ətezə' de'en chlo'e' can' chyažjda' yelə' chaclen che'enə'. Chebeida' catə' choso'əžia choso'onitə' beŋə' nada'. Chebeida' catə' chac falt' bi de'en chyažjda'. Chebeida' catə' choso'olagzejə' choso'olagzidə' beŋə' nada'. Chebeida' catə' bichlə' de'e chžaglaogua'. Chebeida' chedə' catə' chac chia' ca' chaclench Cristən' nada' len yelə' guac che'enə'.

Pabən' gwche'echgua'yichje' beŋə' ca' chso'onlilaža' Cristən' Corinton'

11 Babenle byen bi'a dižə' che cuina' la'anə'əczə nezda' bitotec bi zaquə'an güe'echo dižə'an ca'. Žalə' le'e cho'ele dižə' de que nada' naca' beṇə' zaque'e, bito benən byen bi'a dižə' quinga. Nezda' bitobi zaca'a žalə' cui zo Diozən' len nada', pero lechgualə zaquə'əcha' cle ca beṇə' ca' banonele apostol chele, beṇə' ca' chonle xen. 12 Diozən' bablo'e de que naca' doalje apostol che'enə'. Bagoclene' nada' bguo'o bchejlaža'a bena' xšine'ena' entr le'e la'anə'əczə de'e zan de'e bagoc chia'. Goclene' nada' bena' xšine'ena' len yelə' guac che'ena' na' lecza len yelə' guac che'ena' bena' miłagr na' bichlə de'e zaquə' yesyə'əbane beṇə'. 13 Tozə ca güennə' bena' len le'e na' can' bena' len beṇə' ca' chəsə'ədopə chəsə'əžag chso'ela'ogüe'e Cristən' ga yoblə. ¿Echaquele bencha' güen len lega'aque' cle ca can' bena' len le'e de'en cui gwṇabda' le'e gonle nada' manteren? Lesi'ixen chia' šə malən' bena'.

14 Bazoa' probnid par yida' dezlaṇa'a le'e de'e gwyon lase. Na' catə' yida' bito gua'a latjə gonle nada' mantener. Bito che'enda' gonle nada' bi de'en de chele, che'enda' gon cuinle lažə' na' Cristən'. Bito naquən par bidə' ca' so'ombo' mantener xaxna'aga'acbo', sino xaxna'aga'acbo' nan' cheyalə' so'one' lega'acbo' mantener. 15 Ca'aczən' naquən len nada' ža, yebeida' əzanda' bitə'ətezə de'en de chia' na' lente cuina' par gaqualencha' le'e gwzenagle che Cristən'. La'anə'əczə lechgualə chacda' chele, pero nachle bitotec chaquele chia'.

16 Balle chnelaole chia' nale de que chxoayaga' le'e de'en bito bi'a latjə gonle nada' mantener parzə nič cuejəlana' mechən' de'en chtoble par gaqualenle beṇə' bišə'əcho ca' zjənaque' beṇə' yašə'. 17 ¿Ecabi nezele bito bxoayaga' le'e len notə'ətezə beṇə' babsela'a gan' zolen'? 18 Gwṇeyoida' Titon' bide' bedəlane'e le'e na' bsela'a beṇə' bišə'əchon' yeto len le'. ¿Ecabi nezele de que bito bxoayag Titon' le'e? Na'alje ¿cabi tozə can' chona' len can' bene'ena'? Na' can' che'enda' gaquələna' le'e ca'aczən' gone'ene'.

19 De repent chaquele cho'a dižə' quinga parzə nič le'e cui gonle xbab de que chona' bi de'e mal. Pero caguə ca'anə'. Nezda' ngoda'a txen len Cristən' na' de que Diozən' neze nle'ine' naquən' chona' na' bin'ənia'. De'e na'anə' cho'a dižə' quinga, beṇə' bišə' dao', par nič chaquələna' le'e. 20 Chžeba' əželda' šə bi de'en cui chonle güen can' che'enda' gonle catə'an yida' gan' zolen', na' šə əželda' chonle de'e malən' bito šo'olažə'ale can' gona' castigw chelen'. Chona' xbab, chexa šə chdilə chšašle na' chgue'i ljuežjle, o šə əchloc ljuežjle na' chonle parzə nič gaquə güen che cuinzle. Na' chexa šə chnele mal che ljuežjle na' chexa šə nacle beṇə' gočhitj dižə' o šə chon cuinle xen o šə ža'ale chac yazə. 21 Chžeba' de que catə'an yida' dezlaṇa'a le'e zanle cuinə' cuejyichjle ca de'en chgo'o xtole na' chbejyichjle be'en chele o no'ol chele par chzolenle beṇə' yoblə na' bitə'ətezəchlə yelə' zto' de'en chonle len cuerp chelen'. Na' Dioz chia'an gone' par nič yeto'ida' na' yegüi'inda' che nolen' cui gwlejyichjle de'e malən' chonle.

13

Paḇən' gwđixjui'e de que gwnežjue' castigw che beṇə' ca' chso'on de'e malən', na' chguape' beṇə' Corinto ca' diox

1 De'e gwyon lase dezlaṇa'a le'e ṇa'a. Na' gaquə can' nyoj Xtizə' Diozən' nan: "Catə' no gao xya che to beṇə' de que nape' dolə', choglaochon che' de que nape' dolə' šə yotilən ca yesə'əna chopə o šonə testigw beṇə' chso'e dižə' de que babene' de'e mal." 2 Bagoža' beṇə' ca' chso'on de'e malən' antslə catə'an bedəlaṇa'a le'e de'e əgwchope de que bito yeyašə'əda' lega'aque' šə cui

yesyə'ədiŋjene' xtolə'əga'aque'enə'. Na' de'e yoblə na'a lao cuiŋə' yezida' gan' zolen' nia' notə'ətezəchlə bachonle de'e malən' bito yeyašə'əda' le'e catə'an yida'. ³ Na' catə' gona' castigw che le'e cui chediŋjele xtolə'əlen' cana'achən' ənezele de que de'en chnia' za'an che Cristən', can' nale chene'ele ənezele. Na' bito nado de que Cristən' bito gaquə gone' castigw chelen', la' nape' yelə' guac xen, na' bablo'e yelə' guac che'enə' len le'e. ⁴ De'e li Cristən' ben cuine' ca beŋə' cui bi chac gon catə'an gwso'ot beŋə' le' bosə'ode'ene' le'e yag corozən'. Pero zocze' na'a chedə' Diozən' bosbane'ene' len yelə' guac che'enə'. Le'egatezə ca' naca' nada' ca beŋə' cui bi bi chac gon. Pero nezdə' ngoda'a txen len Cristən' na' catə'an yezida' gan' zolen' gwlo'ida' le'e can' zo yelə' guac che Diozən' len nada'.

⁵ Legonyanə' xbab chele šə de'e liczə chonlilažə'əle Jesocristən'. Na' sə de'e li chonlilažə'əlene' gacbe'ile de que zoe' len le'e. Pero šə chacbe'ile bito zoe' len le'e guacbe'iczele de que caguə chonlilažə'əlene'enə'. ⁶ Pero zoa' lez gacbe'ile de que zocze' len le'e par niçh ca' gacbe'iteile de que naca' doalje apostol che'. ⁷ Chona' orasyon chnaba' gaquəlen Diozən' le'e par niçh cuejyichje'le cuich gonle de'e malən'. Bitobi nonən len nada' šə gona' ca gacbe'ile de que bselə' Diozən' nada' o šə cui, con šə le'e sotezle gonle de'e güen. ⁸ La' šə chzenagle che dižə' li che Jesocristən' bito əyazjən gona' castigw chele. Con gwnežjua' castigw che beŋə' ca' cui choso'ozenag chei. ⁹ Chebeida' catə' le'e chonle de'e güen na' bito chyažjən gwlo'a yelə' chnabia' chia'anə' par gona' castigw chele, la' leczə chona' orasyon chnaba' gaquəlen Diozən' le'e par niçh gonle xbabən' can' cheyalə' gonle de'e yoblə. ¹⁰ Babzoja' de'e quinga antslə ze'e yida' gan' zolenə' par niçh yediŋjele xtolə'əlen' na' cui gona' castigw chelen' catə'an yida'anə'. Diozən' bsele'e nada' naca' apostol che'enə' par niçh gona' ca so'onlilažə'əch beŋə' le', caguə par gona' ca yesə'əbejyichje' cuich so'onlilažə'ene'.

¹¹ Na'a ža beŋə' bišə', babzoja' de'en go'onda' ənezele. Le'e gon xbab can' cheyalə' gonle de'e yoblə. Legwzenag consejw quinga chona' le'e. Legac tozə len ljuěžjle. Leso binlo tole yetole. Diox ben' chaque checho na' ben' chon par chzo chbezcho binlo len xbab de'en yo' o lo' o yichjla'ažda'ochon' sošgue' len le'e. ¹² Catə' chežagle leyolgüiž ljuěžjle dižə' šao' par niçh gachia' de que chaque che ljuěžjle. ¹³ Yoguə' beŋə' ca' nitə' nga beŋə' ca' bagwlej Diozən' par zjənaque' lažə' ne'enə' choso'oguape'e le'e diox.

¹⁴ Xancho Jesocristən' sotezə soe' gaquəlenšgue' le'e. Na' Diozən' gonšgue' par niçh gacbe'ichele de que chaquene' chele. Na' Spirit che Diozən' gonšgan par niçh yoguə'əle gonle tozə xbab. De'e na'azən' əchnia' le'e. *Pab*

Cart De'en Bzoj San Pabən' Par Beṇə' Galasia Ca'

Pabən' chguape' diox beṇə' ca' chso'elao' Cristən' Galasian'

¹⁻² Nada' Pab chzoja' le'e chdopə chžagle cho'ela'ole Cristən' yež ca' de'en zjəchi' gan' nzi' Galasia. Chguapto' le'e diox txen len yoguə beṇə' bišə'əcho ca' nitə' nga. Caguə beṇəch nā'anə' gwlej nada' o bsele'e nadā' par naca' apostol. Jesocristən' txen len Xə' Diozən' ben' bosban le' ladjo beṇə' guat ca', lega'aque'en gosə'əbeje' nada' par naca' apostol. ³ Chona' orasyon par niç Xəcho Diozən' na' Xəcho Jesocristən' əsa'aclene' le'e na' so'one' ca so cuezle binlo len xbab de'en yo'o lo'o yichjla'ažda'olen'. ⁴ Beṇə' ca' ža' yežlyo nga tyemp nga zocho ṇa'a nite'e xni'a de'e malən'. Jesocristən' bnežw cuine' gwso'ot beṇə' le' par gwdixjue' xtolə'əchon' niç ca' bebeje' chio'o xni'a de'e malən'. Bene' ca' cheda' can' gwyazlažə' Xəcho Diozən' gone'. ⁵ Ledoye'ela'och Diozən' zejlicane. Can' gongaczcho.

Bitoch bi dižə' de de'e guac əṇacho dižə' güen dižə' cobə

⁶ Diozən' gwleje' le'e par niç Xi'ine' Cristən' chaclene' le'e. Na' chebanda' can' chonlen' lgüegwə bachbejyichjle Diozən'. Na' lgu'a de'e gwzenagle dižə' güen dižə' cobə de'en chzejni'in che Jesocristən' de'en be'elena' le'e, bachzenagzechle che yeto de'en chaquele naquə dižə' güen dižə' cobə. ⁷ Pero bito naquən dižə' güen dižə' cobə. Beṇə' ca' choso'osed choso'olo'ine' to de'e zda clelə na' chso'one' ca chaczejlažə'əle che de'en bsd əblo'ito' le'e. ⁸ Žalə' neto' əchyxjue'eto' yeto de'en bito naquən lebe len dižə' güen dižə' cobə de'en chzejni'in che Cristən' de'en babsed bəblo'ito' le'e, Diozən' gone' par niç cuiayi'ito' zejlicane, na' la'anə' to angl beṇə' za' yoban' chixjui'e xtižə' Cristən' clelə, leczə cuiayi'e. ⁹ Can' bagwnia' antslə, leczə can' chniā' ṇa'a. Notə'ətezə beṇə' chixjui'e de'en bito naquən lebe len dižə' güen dižə' cobə de'en chzejni'in che Cristən' de'en babsed blo'ito' le'e, Diozən' gone' par niç cuiayi'e zejlicane.

¹⁰ Echnia' ca' par niç yebei Diozən' len nada', caguə par niç yebei beṇəchən' nada', na' caguə par so'olažə'e can' chona' na'anə'. Žalə' chi' yichja' naclə gona' par niç so'olažə' beṇəchən' can' chona' bito chzenaga' che Cristən' žalə' ca'.

Diozən' gwleje' Pabən' par goque' apostol

¹¹ Beṇə' bišə', che'enda' ənezele de que dižə' güen dižə' cobə de'en chzejni'in che Cristən' de'en babe'elena' le'e bito naquən xbab che beṇəch. ¹² Caguə beṇəch na'anə' bzenene' nada' dižə' güen dižə' cobə de'en chzejni'in che Jesocristən' na' nique əṇacho beṇəch na'anə' bene' ca gwyejni'ichda'an. Cuiñ Jesocristən' bzejni'ine' nada' dižə' güen dižə' cobən'.

¹³ Babenczele dižə' can' bena' antslə catə'an ṇe'e naogua' costombr che neto' beṇə' Izrael. Lechguale blagzejə blagzida' beṇə' ca' chso'onližə' Cristən', go'onda' yonitlaoga'aca'ane'. ¹⁴ Na' gwche'echgua' yichja' che costombr de'en gosə'ənao de'e xaxta'ogua'a ca' can' gwse'ejni'aləžə'e Diozən', na' bichlə de'en gwso'one' gwsa'acquene' par yebei Diozən' lega'aque' laogüe de'en gosə'ənaogüe'en. Bsdəcha' de'e ca' mazəchlə can' bososəd zan beṇə' Izrael lježja' ca' beṇə' ca' gwsa'aljə ca tyempən' golja'anə'. ¹⁵ Catə' cuiñə' galja' Diozən' bsi'e xneze gona' xšine'ena'. Gwleje' nada' par gona'an cheda'

n'zi'ilaže'e nada'. ¹⁶ Na' catə' bžin ža ben Diozən' can' gwchoglaogü'e'en gone', nach bzejni'ine' nada' de que Jeso'osən' naque' Xi'ine'. Bzejni'ine' nada' par nich chjətxjui'a xtiže'ena' len beñə' ca' cui zjənaquə beñə' Izrael. Na' dezd ža na' notono gwnabda' əgwzejni'ine'en nada'. ¹⁷ Na' nic gwy'a'a Jerosalennə' par nich beñə' ca' zjənaquə apostol antslə ca nada' yoso'osed yoso'olo'ine' nada' che Jeso'osən'. Zgwa'atec gwy'a'a gan' nzi' Arabia, na' Arabia na' beza'a bežina' Damascon'.

¹⁸ Gwde šon iz gwy'a'a Damascon' nach gwy'a'a Jerosalennə' jəlaŋa'a Bedən' na' jsoa' len le' žda'obiž. ¹⁹ Pero bito bžaga' apostol ca' yelə' sino tozə Jacob beñə' bišə' Xanchon'. ²⁰ Nezcze Diozən' de que de'e nga chzoja' le'e naquən de'e li.

²¹ Nach gwy'a'a yež ca' zjəchi' gan' nzi' Siria na' Silisia. ²² Na' ca' naquə beñə' ca' chesə'ədopə chesə'əžag chso'elaogü'e'e Cristən' yež ca' zjəchi' gan' nzi' Jodea, bitonə' so'ombi'e nada' ca orən'. ²³ Con bazjənenene' rson de que bitoch chlagzejə chlagzida' beñə' ca' chso'onjilažə' Cristən' na' de que bachyixjui'a xtiže'ena', len antslə go'onda' gona' ca yesə'əbejyichj beñə' ca' len. ²⁴ Na' beñə' Jodea ca' chso'onjilažə' Cristən' gwso'ela'oche' Diozən' de'en bachonjilažə'a Cristən'.

2

Apostol ca' yelə' gwza'azlaže'e can' ben Pabən'

¹ Na' gwde žda' iz gwy'a'a Jerosalennə' nach gwy'a'a de'e yoblə len Bernaben', na' leczə gwchi'a Titon'. ² Diozən' bene' mendad ša'a, na' de'e na'anə' gwy'a'a. Na' btoba' beñə' ca' zjənaquə blao entr beñə' ca' chso'elao' Cristən' Jerosalennə' na' lega'acze' bzejni'ida' bin' chyixjui'a len beñə' ca' cui zjənaquə beñə' Izrael catə'ən cho'elena' lega'aque' dižə' güen dižə' cobə de'en chzejni'in che Cristən'. Bzejni'iga'acda'ane' bin' chsed chlo'ida' chedə' go'onda' əsa'azlaže'e de'en chsed chlo'ida' beñə' ca' par nich ca' cui yesə'əne' de que bito bi zaquə' de'en chona' na' de'en babena'. ³ Ca goquən' bito cholə gwso'one' byen so beñə' ljuežja' Titon' señy de'en ne' sirconsision, la'anə'əczə cui naque' beñə' Izrael. ⁴ Goc ca' la'anə'əczə gwnitə' beñə' gosə'əne' cheyalə' soe' señyən'. Gwnitə' beñə' gosə'əlen beñə' bišə'əcho ca' Jerosalennə' ca orən', parzə nich yesə'əgüie' šə naoto' costumbr ca' de'en nyoj le'e lei che neto' beñə' Izrael. Gwse'enene' gwso'one' byen yoguə' beñə' so'onjilaže'e Cristən' yesə'ənaogü'e' costumbr ca' len la' nezecho chebei Diozən' chio'o por ni che de'en chonjilažə'əcho Cristən', caguə por ni che šə choncho complir bi de'en na lein'. ⁵ Pero nada' na' Bernaben' ni lata'əzə bito bzenagto' che beñə' ca'. Con gwzochechtezəto' bento' par nich gaquə talenchle dižə' güen dižə' cobə de'en chzejni'in che Cristən' de'en babe'elento' le'e na' de'en naquə de'e li, sin cui bi bichlə gonle.

⁶ Na' beñə' ca' gwsa'ac blao entr beñə' ca' chso'onjilažə' Cristən' Jerosalennə', bito gwse'enene' gwšə'a can' chsed chlo'ida' che Cristən'. Eñia' ca' la'anə'əczə bito bi nonən len nada' šə gwsa'aque' beñə' blao o šə cui gwsa'aque', la' par len Diozən' tozəczə can' zaquə' yoguə'əloj beñə'. ⁷ Gwsa'acbe'ine' de que Diozən' ngüe'e lao na' əchyixjui'a dižə' güen dižə' cobə de'en chzejni'in che Cristən' len beñə' ca' cui zjənaquə beñə' Izrael can' ngüe'en lao na' Bedən' chyixjui'en len beñə' Izrael gwlaž cheto' ca'. ⁸ Diozən' len yelə' guac che'enə' chaclene' Bedən' par nich chyixjui'e xtižə' xtižə' Cristən' len beñə' Izrael gwlaž cheto' ca'. Na' lecze'ena' chaclene' nada' len yelə' guac che'enə' par nich əchyixjui'a xtižə' Cristən' len beñə' ca' cui zjənaquə beñə' Izrael.

⁹ Jacobən' len Bedən' na' len Juannə' zjənaquəche' beṇə' blao entr beṇə' ca' chəsə'ədopə chəsə'əžag chso'elaogüe'e Cristən' Jerosalennə'. Na' catə' lega'aque' gwsa'acbe'ine' can' chaclen Diozən' nada' par chona' xšine'ena' nach gwso'oxe'e na'anə' len na' Bernaben' par bos'o'olo'e de que chsa'azlaže'e can' chonto' txen len lega'aque'. Na' gwsa'aque'ne' güenczən' gonto' xšin Diozən' entr beṇə' ca' cui zjənaquə beṇə' Izrael na' lega'aque' so'one'n entr beṇə' Izrael gwlaž cheto' ca'. ¹⁰ Tozə de'en gwse'e neto' gonto', gaquə'ento' beṇə' yašə' ca' chso'elao' Cristən'. Na' de'e liczə chi'ichgua yichja' gaquə'ləna' beṇə' yašə' ca'.

Pabən' gwdile' Bedən' Antioquian'

¹¹ Na' gwdechlə gwy'a Antioquian'. Na' žlac zoa' na' bidə Bedən' gan' nitə' beṇə' ca' chəsə'ədopə chəsə'əžag chso'elaogüe'e Cristən' na' gwdilə'ane' can' chone', çhedə' bla'alaon chone' de'e mal. ¹² Quingan' goquə catə' ze'e bžine' Antioquian', gwzolaogüe' che'ej chaogüe' txen len beṇə' ca' chso'onlilažə' Cristən' la'anə'əczə cui zjənaque' beṇə' Izrael, pero gwdechlə catə' besə'əžin beṇə' Jerosalen ca' beṇə' ca' bselə' Jacobən', bitoch gone'ene' ye'ej gaogüe' txen len beṇə' ca' cui zjənaquə beṇə' Izrael. Bžebe' bi yesə'əna beṇə' ca' chso'on xbab de que notə'ətezə beṇə' chonlilažə' Cristən' cheyalə' soe' señy de'en ne' sirconsision. ¹³ Nach beṇə' Izrael ca' yelə' nitə' Antioquian' chso'onlilaže'e Cristən' leczə besyə'əbiže'e cuich əgwse'ej əgwsa'ogüe' txen len beṇə' ca' cui zjənaquə beṇə' Izrael, na' gosə'əgo'oyelə'e Bernaben' par niç lencze' bebiže'e. Na' besyə'əbiže'e parzə niç yesyə'əbei beṇə' Jerosalen ca' lega'aque', la'anə'əczə gosə'ənezene' naquən güen əse'ej əsa'ogüe' txen len beṇə' ca' cui zjənaquə beṇə' Izrael. ¹⁴ Gocbe'ida' bitoch chso'one' can' cheyalə' gon chio'o nombi'acho dižə' güen dižə' cobə de'en chzejni'in che Cristən' na' de'en naquə de'e li. De'e na'anə' gwdilə' Bedən' lao yoguə' beṇə' ca' chəsə'ədopə chəsə'əžag chso'elaogüe'e Cristən', goža'ane': "Le' naco' beṇə' Izrael, pero bagwlejjichjo' costombr che chio'o beṇə' Izrael par chono' txen len beṇə' ca' cui zjənaquə beṇə' Izrael. De'e na'anə' bito cheyalə' gono' byen so'on beṇə' ca' cui zjənaquə beṇə' Izrael can' na' costombr che chio'o beṇə' Izrael."

Con beṇə' chso'onlilažə' Jesocristən' zjənaque' beṇə' güen lao Diozən'

¹⁵ Neto' goljəto' naquəto' beṇə' Izrael, na' bito goljəto' entr beṇə' ca' cui chso'elao' Diozən'. ¹⁶ Diozən' bito əne' de que naccho beṇə' güen laogüe'ena' por ni che bi de'en choncho. Con beṇə' ca' chso'onlilažə' Jesocristən' zjənaque' beṇə' güen lao Diozən'. Lenczə neto' bachonlilažə'to' Cristən' par niç Diozən' ne' cheto' de que banaquəto' beṇə' güen laogüe'ena'. Bito ne' ca' che notə'ətezcho por ni che šə choncho bi de'en na lein' goncho.

¹⁷ Na' notə'ətezə chio'o naccho beṇə' Izrael, antslə ze'e əna Diozən' de que naccho beṇə' güen laogüe'ena', bzejni'ine' chio'o de que tozə ca beṇə' malən' naccho len yeziquə'əchlə beṇə' güen de'e mal ca', pero la'anə'əczə bzejni'ine' chio'o de que tozə ca beṇə' malən' naccho len yeziquə'əchlə beṇə' güen de'e mal ca' bito ənacho de que Crist nan' bene' par niç naccho beṇə' mal. Na' šə can' chaquecho lechgualə clelən' choncho xbabən'. ¹⁸ Chio'o babechojcho xni'a costombr ca' de'en zjənyoj le'e lei chechon' na' šə yozo cuincho xni'aga'aqueinə' de'e yoblə, le'e nachbi'ate de que de'e malən' choncho. ¹⁹ Lein' chzejni'in chio'o de que naccho beṇə' mal par niç nezecho bito naccho beṇə' güen lao Diozən' por ni che de'en choncho bi de'en na lein'. Na' na'a chio'o chonlilažə'əcho Cristən' con yo'o yichjcho sotezə socho gwzenagcho che Diozən'. ²⁰ Nada' nezdə' de que ndil' ngoda'a txen len

Cristan' catə'an gwsə'ote'ene' le'e yag corozən'. Na' bitoch zoa' to gwłaza' sino Cristan' zolene' nada'. Na' de'en chona' na'a chona'an con can' na Xi'in Diozən' ben' chonłilaža'a. Len' chaquene' checho na' bnežjw cuine' gwsə'ote'ene' por ni checho. ²¹ Diozən' nzi'ilaže'e chio'o na' bseļe'e Cristan' par ničh gonłilaža'əchone' na' gaccho beṇə' güen lao Diozən'. Na' bito che'enda' gwzoa' ca'alə de'en bene' ca', gaquəda' de que por ni che bi de'en chona' naca' beṇə' güen lao Diozən'. Žalə' por ni che de'en choncho bi de'en na lein' əṇa Diozən' de que naccho beṇə' güen laogüe'ena' bito byažjən əgwnežjo cuin Cristan' por ni checho žalə' ca'.

3

Naccho beṇə' güen lao Diozən' chedə' chonłilaža'əcho Cristan', caguə por ni che de'en choncho complir can' na lein'

¹ Le'e beṇə' Galasia, nchoļ yichjla'ažda'olen' ca de'en baboso'oxoayag beṇə' le'e par chaquele cheyalə' naole costombr ca' de'en na lein'. Clar juisy babzejni'ida' le'e can' gwsə'ote' Cristan' le'e yag corozən' por ni checho. ² De'e ngazan' chṇabda' le'e: ¿Ezo Spirit che Diozən' lo'o yichjla'ažda'olen' por ni che de'en chonle complir can' na lein'? Bito, sino zon lo'o yichjla'ažda'olen' por ni che de'en bachonłilaža'əle Cristan'. ³ Spirit che Diozən' zon lo'o yichjla'ažda'olen' dezd catə'an gwzolao chonłilaža'əle Cristan'. Na'alje žəde'e tant nchoļ yichjla'ažda'ole na'anə' chaquele chyažjən so señyan' lao cuerp chelen' par yeyož gonle can' chene'e Diozən'? ⁴ De'e zan de'e baboso'ochi' bosə'osaquə' beṇə' le'e laogüe de'en chonłilaža'əle Cristan'. Na' žbixa parən' bguo'o bchejlaža'əle len de'e ca' šə ṇa'a sole señy de'en ne' sirconsision? Pero bitolja əṇacho de que sole señyan', la' šə solen cuejyichjle de'en chonłilaža'əle Crist na'anə'. ⁵ Nezczele de que Diozən' babene' Spirit che'ena' zon lo'o yichjla'ažda'olen' na' chone' miłagr entr le'e, chedə' bachonłilaža'əle Cristan' na' bachzenagle che', caguə chac ca' por ni che de'en chonle complir bi de'en na lein'.

⁶ Na' ca'aczən' nyoj Xtižə' Diozən' cho'en dižə' che de'e Abraanṇə' nan de que benłilaže'e Diozən' na' de'e na'anə' Diozən' gwne' che' de que naque' beṇə' güen laogüe'ena'. ⁷ Cheyalə' ənezele de que yoguə' beṇə' chso'onłilaža' Diozən' can' benłilaža' de'e Abraanṇə' le', lao Diozən' zjanaque' xi'in dia che de'e Abraanṇə'. ⁸ Diozən' bsi'e xneze par ničh chone' len le'e cui nacle beṇə' Izrael can' chone' len neto' beṇə' Izrael, ca de'en ne' che notə'ətezcho chonłilaža'əchone' de que naccho beṇə' güen laogüe'ena'. De'e na'anə' gože' de'e Abraanṇə' dižə' güen dižə' cobə' nga: "Gona' güen len beṇə' ca' ža' yoguə' nasyon, beṇə' ca' so'onłilaža' nada' can' chonłilaža'o nada'." ⁹ Na' can' naquən, Diozən' chone' güen len beṇə' ca' chso'onłilaža' le' can' bene' güen len de'e Abraanṇə' por ni che de'en benłilaža' de'e Abraanṇə' le'.

¹⁰ Na' notə'ətezə beṇə' chon xbab de que gaque' beṇə' güen lao Diozən' por ni che šə chone' bi de'en na lei de'en bzoj de'e Moizezən', de'e mal juisy gaquə che' šə ca', chedə' notono no yesə'əzoi par so'one' cayanə'an nannə'. Can' nyoj Xtižə' Diozən' nan: "De'e mal juisy gaquə che notə'ətezə beṇə' šə cui niṭə'ətezə nite'e so'one' complir yoguə'əloļ can' na lein' dote tyemp." ¹¹ Na' Xtižə' Diozən' nyojən nan: "Diozən' ne' che beṇə' chso'onłilaža' le' de que zjanaque' beṇə' güen laogüe'ena', na' de'e na'anə' guatə'əczə yelə' mban chega'aque' zejlicane." Na' de'en nan ca' nezecho de que Diozən' bito əṇe' che notə'ətezcho de que naccho beṇə' güen laogüe'ena' por ni che šə choncho bi de'en na lein' goncho.

¹² Benə' zan chsa'aque'ne' so'one' can' na lein' sin cui chso'onlilaže'e Diozən', con yo'o yichjga'aque' de'en nan: "Notə'ətezə benə' chon cuaselol can' na lein' gaquə bane' zejlicane."

¹³ Cristən' gwidxjue' xtolə'əchon' par niç ca' cui gaquə de'e mal juisy checho ca de'en cui chzoicho par goncho cuaselol can' na lein'. Bnežjw cuine' goc de'e mal juisy che' lgu'a' chio'o. Goc che' can' nyojən nan: "De'e mal juisy chac che notə'ətezə benə' chso'ote' choso'ode'ene' le'e yag." ¹⁴ Goc ca' par niç lenczə benə' ca' cui zjənaquə benə' Izrael so'onlilaže'ene' na' nite'e mbalaz ca mbalazən' gwzo de'e Abraannə' laogüe de'en benlilaže'e Diozən'. Na' chio'o chonlilažə'əcho Jesocristən' ža, Diozən' bsele'e Spirit che'ena' zon lo'o yichjla'ažda'ochon' can' bene' lyebe.

Lei de'en bzoj de'e Moizezən' na' lyebe de'en ben Diozən' len de'e Abraannə'

¹⁵⁻¹⁶ Ca naquə Diozən' bene' lyebe len de'e Abraannə' can' gone' güen len xi'in dia che'ena', be'e dižə' che tozə xi'in dia che de'e Abraannə', na' che Crist nan' be'e dižə'an ca'. Benə' bišə', quingan' naquən len notə'ətezə benə' choso'ozə' yiš, catə' babeyož boso'oze'en bito gaquə əna toe' de que cui gone' can' nannə' na' bito gaquə gwzanch yetoe' can' nannə'. ¹⁷ Na' lyebe de'en ben Diozən' len de'e Abraannə' ža, gwxaquə'əleben ca to yiš de'en choso'ozə' benə', cheda' la' Diozən' bito gwš'e can' bene' lyebe len de'e Abraannə'. Ne'e choncze' con can' gože'ene'ena'. Na' bagwde tap gueyoa šichoa iz ben Diozən' lyebe len de'e Abraannə' nach bene' par niç bzoj de'e Moizezən' lei che'ena'. Na' la'ənə'əczə Diozən' bnežjue' lein' bito ənacho cuich chone' can' bene' lyebe len de'e Abraannə'. ¹⁸ Žalə' Diozən' ne' de que benə' ca' chso'on cuaselol can' na lein' zjənaque' benə' güen, bito chaclene' benə' can' bene' lyebe gaquəlene' žalə' ca'. Pero cuine'en ne' che chio'o chonlilažə'əchone' de que nacho benə' güen laogüe'ena' por ni che lyebe de'en bene' len de'e Abraannə'.

¹⁹⁻²⁰ Leczə byažje lei de'en bzoj de'e Moizezən'. Diozən' bnežjue' en par benə' ca' gwnitə' bedote catə'an cuiñə' yidə Cristən' par niç gwsa'acbe'ine' de que chso'one' contr can' non Diozən' mendad so'one'. Cristən' golje' lao dia che de'e Abraannə' na' che le'ena' be' Diozən' dižə' catə'an bene' lyebe len de'e Abraannə'. Na' ca naquə lein' Diozən' bene' par niç angl ca' boso'onežjue'en de'e Moizezən'. Na' Diozən' bchine' de'e Moizezən' par bzejni'ine' benə' Izrael ca' can' na lein'. Pero catə' ben Diozən' lyebe len de'e Abraannə' notono no bchine' par əgwzejni'ine' de'e Abraannə'.

Lein' chzejni'in chio'o de que choncho de'e mal

²¹ Na' bito cheyalə' goncho xbab de que lei de'en bzoj de'e Moizezən' chonən contr can' non Diozən' lyebe gone'. Pero lein' bito gaquə yocobən yichjla'ažda'ochon'. Žalə' gaquə yocobən yichjla'ažda'ochon' gwaquə goncho can' na lein' nach gaccho benə' güen lao Diozən' žalə' ca'. ²² Pero Xtizə' Diozən' de'en nyojən nan de que yoguə'əlol benəchən' yesə'əzi'e castigw zejlicane por ni che xtolə'əga'aque'ena'. Na' nyojən ca' par niç con benə' so'onlilažə' Jesocristən' bito yesə'əzi'e castigon', sino gaquə güen chega'aque' can' ben Diozən' lyebe len de'e Abraannə'.

²³ Ca naquə neto' benə' Izrael catə'an bitonə' əgwzejni'i Diozən' neto' de que cheyalə' gonlilažə'əto' Cristən', nchoglaon cheto' de que si'ito' castigw zejlicane cheda' nombi'ato' lei de'en bzoj de'e Moizezən' na' bito chonto' can' nannə'. ²⁴ Par neto' lein' gwxaquə'əleben ca to mos əznia benə' chgüia chye' xi'in benə', de'e zan de'e che'əbo' gombo' na' de'e cui gombo'. Pero na'a babidə Cristən' na' baltezəto' chonlilažə'əto'one' Diozən' ne' de que naquəto'

beṇə' güen laogüe'enə' na' can' ne' che notə'ətezcho. ²⁵ Na' de'en babida Cristəṇ' bitoch gwxaquə'əlebe lein' ca to mos əznia par neto' beṇə' Izrael, neto' bachonlilažə'əto'one'.

²⁶ Yoguə' chio'o chonlilažə'əcho Jesocristəṇ' naccho xi'in Dioz. ²⁷ Na' notə'ətezcho šə bagwchoacho nisən' par blo'echo de que ngoda'əcho txen len Jesocristəṇ', bachzolao chac yichjla'ažda'ochon' can' naquə yichjla'ažda'ogüe'enə'. ²⁸ Na' tozəczə can' zaquə'əcho lao Diozəṇ' šə naccho beṇə' Izrael o šə cui naccho, šə naccho beṇə' esclabo o šə cui naccho, na' šə naccho beṇə' byo o šə naccho no'olə. Yoguə'əcho banaccho tozə laogüe de'en ngoda'əcho txen len Jesocristəṇ'. ²⁹ Na' de'en ngoda'əcho txen len Jesocristəṇ', lao Diozəṇ' naccho xi'in dia che de'e Abraannə' na' len chio'onə' gon Diozəṇ' güen can' bene' lyebe gone' len xi'in dia che de'e Abraannə'.

4

¹ To beṇə' gwni'a šə zo xi'ine', bi'inan' si' byen che'enə'. Pero na' žlac ne'e nacbo' bidao' bito nacho mbalazəch chac chebo' cle ca che to mos la'anə'əczə gwžin ža gaquə lao na'abo' yoguə' de'en de che xabo'onə'. ² Beṇə' ca' nitə' lo'o yo'o ližbo'onə' ne'e choso'ogüia choso'oye'ebo' na' ne'e chesə'anabi'ebo' žlac cuiṇə' cha'obo' na' žlac əžin ža co'o xabo'onə' lao na'abo' de'en deine'enə'. ³ Can' goquə len neto' beṇə' Izrael, žlac cuiṇə' yidə Cristəṇ' gwxaquə'əlebetə' ca xi'in beṇə' gwni'anə'. Diozəṇ' bene' mendad naoto' yoguə'əlol costombr de'en na lein'. Na' de'e na'anə' par neto' lein' gwxaquə'əleben ca beṇə' ca' chəsə'anabia' xi'in beṇə' gwni'anə' žlac cuiṇə' žin ža si'ibo' de'en de che xabo'onə'. ⁴ Pero catə' bžin ža bžia Diozəṇ' bia' bsele'e Xi'ine'enə' yežlyo nga, gwxaṇ to no'olə le'. Na' Xi'in Diozəṇ' leczə bzenague' che lein'. ⁵ Na' le'enə' bedəyene' par niçh yoguə' chio'o chonlilažə'əchone' zocho mbalaz ca mbalazəṇ' so xi'in beṇə' gwni'anə' catə'an əžin ža gaquə lao na'abo' byenna'. Cristəṇ' bedəyene' par niçh nezecho bitoch chonəṇ byen naocho costombr ca' de'en žjanyoj le'e lei che neto' beṇə' Izrael.

⁶ Na' de'en bagwcua' Diozəṇ' chio'o ca xi'ine', babsele'e Spirit che'enə' zon lo'o yichjla'ažda'ochon' de'en leczə naquə Spirit che Xi'ine' Cristəṇ'. Na' Spiritəṇ' chaclenəṇ chio'o par niçh cholgüižcho Diozəṇ' che'echone: "Xa." ⁷ Diozəṇ' bagwcue'e chio'o ca xi'ine' caguə par cue'e yichjcho costombr ca' de'en non lein' mendad. Gwcue'e chio'o ca xi'ine' par niçh chac güen checho can' bene' lyebe gaquə che xi'in dia che de'e Abraannə'.

Pabən' chi'yichje' naquən' chso'on beṇə' ca' chso'onlilažə' Cristəṇ'

⁸ Antslə catə'an cuiṇə' gombi'ale Diozəṇ' gwyejṇi'alažə'əle bi de'e ca' cui žjəzaquə' par šejṇi'alažə'əcho, na' lega' aquən gosə'anabi'an xbab chelen'. ⁹ Pero na'a banombi'ale Diozəṇ' o šə güenč əṇacho de que Diozəṇ' banombi'e le'e. Chebanchgüeida' chele de'en chebiguə'əle gosxaṇlə na' bachezo cuiṇle xni'a costombr ca' che biguə' de'en ye'ej gaocho, che ža ca', na' che cuerp chechon'. Costombr ca' bito gwsa' aquən par yesyə'əbejəṇ chio'o xni'a de'e malən' na' leczə caguə bi žjəzaquə'əṇ na'a par əsa'aclenəṇ chio'o. ¹⁰ Bagwzolao naole costombr che neto' beṇə' Izrael che lṇi ca', che ža ca', che bio' ca', che tyemp ca' na' che iz ca'. ¹¹ Chžeba' šə cuiçh əgwzenagle che de'en babsed blo'ida' le'e, la' šə cuiçh gwzenagle chei, cuiayi' de'en bena' entr le'e.

¹² Beṇə' bišə', chatə'əyoida' le'e gonle can' babena' nada' de'en babchojyichja' costombr che neto' beṇə' Izrael de'en žjanyoj le'e lein' niçh zoa' chona' žin entr le'e: Na' ca naquə bedəsoa' len le'e bito nacho de que babenle mal len nada'. ¹³ Nezczele chacšenda' de'en bida' de'e neche, na'

gwdixjui'a dižā' güen dižā' cobā de'en chzejni'in che Cristān' len le'e. ¹⁴ Na' de'en chacšenda' ca orān' zaquā'an par gue'ile nada', pero bito bgue'ile nada', sino bzenagczle xtižā'anā'. Na' do yichj do lažā'āle bgüialaole nada' ca'aczā chgüialaogüe to angl che Diozān' o ca'aczā cuin Jesocristān'. ¹⁵ Mbalaz gwzole de'en benle ca' len nada', na' žbixchen' cuich chonle ca' na'a ža? Nežda' de'e tant goquele chia' xte bebele bzanele bitā'atežā de'en deile na' lente cuinle par goclenle nada'. ¹⁶ žEpor ni che de'en cho'elena' le'e dižā' lin' bachaquele de que naca' beņā' contr chele ža?

¹⁷ Beņā' ca' choso'osed choso'olo'i le'e na'a lechguale zjāchi' yichjga'aque' le'e, pero caguā par nich so'one' güen len le'ena' sino par nich yesyā'ābeje' le'e cuich gonle txen len neto'onā' na' par nich cue'e yichjle lega'acze'enā'. ¹⁸ Naquāczān güen yesā'ābe'yichj beņā' le'e do tyempte, caguā catā'ezān' zoa' len le'e na' con šā so'one' güen len le'e. ¹⁹ Xi'in daogua'a, de'e yoblā chžaglaogua'a lo'o la'ažda'ogua'anā' por ni che le'e can' chžaglaō to no'olā beņā' chzan, na' āžaglaochca' xte catā'āch gaquā yichjla'ažda'olen' can' naquā yichjla'aždao' Cristān'. ²⁰ Žalā'āšga zoa' len le'e na'a, nžā'alā can' gaquā nia' le'e. De'e li lechguale chacžejlaža'a chele.

De'e Agar na' de'e Sarān'

²¹ Le'e chene'ele naole costombr che neto' beņā' Izrael de'en zjānyoj le'e lei de'en bzoj de'e Moizežān', žābitonā' yenele can' na de'en nyojānā'? ²² Nan de que gwnitā' čhopā xi'in de'e Abraannā' bi'i byo, tobo gwxañ to no'olā naquā esclabo che' na' yetobo' gwxañ no'ol checze' no'olān' bito naquā esclabo. ²³ Na' bi'in gwxañ no'olā esclabon' goljbo' chedā' gwzolen de'e Abraannā' le' pero bi'in gwxañ no'ol checze' goljbo' chedā' Diozān' bene' par nich goc complir can' bene' lyebe de que sane' la'anā'āczā naque' beņā' güiž. ²⁴ Na' de'en goc che no'ol ca' chzejni'in chio'o che čopte lyebe de'en ben Diozān' naclān' gaquālene' beņā' Izrael ca'. No'olā esclabo ben' le Agar gwxaquā'ālebene' ca lei de'en ben Diozān' mendad bzoj de'e Moizežān'. Bzoje'en par de'e xaxta'o neto' beņā' Izrael laō ya'a Sinain' beņā' ca' gwxaquā'ālebe ca esclabos. ²⁵ Na' doxen nāyson Izraelān' gwxaquā'āleben ca de'e Agarān' no'olā esclabo che de'e Abraannā'. Diozān' bnežjue' de'e xaxta'oto' ca' lein' laō ya'a Sinain' gan' nzi' Arabia, na' xte ža neža beņā' Izrael gwlaž čheto' ca' zjānaque' ca esclabos chedā' chsa'aquene' chonān byen yesā'ānaogüe' yoguā' costombr ca' de'en na lein'. ²⁶ Pero yoguā' chio'o chonlilažā'ācho Cristān', babozoe' chio'o binlo len Diozān', na' naquān to goclen de'en bene'. De'e na'anā' nezecho bito chonān byen nāochi costombr ca' de'en na lein'. ²⁷ Diozān' bene' par nich to profet beņā' be' xtiže'enā' cana' bzoje'en de que beņā' zanch so'onlilažā' Cristān' cle ca beņā' ca' yesā'ānao costombr ca' de'en na lein'. Na' quinga na de'en bzoje'enā'. Bebei no'olā güiž, no'olā cui no chzan, Bisyā'a yelā' chebei čhio', le' cuinā' gaco' bes che yelā' sanā', chedā' sano' bi'i zan.

Na' le' cui no xi'ino' ne'e so,
Nitā'āch xi'ino' cležā can' nita' xi'in no'olān' bagwxañ to xi'in be'en chio'onā'.

²⁸ Ca naquā Isaaquān' xi'in de'e Abraannā' goljbo' por yelā' guac che Diozān' chedā' can' bene' lyebe len de'e Abraannā'. Le'egatežā ca' chio'o ža, por yelā' guac che Dioz na'anā' bachone' chio'o cuent ca xi'in dia che de'e Abraannā' chedā' can' bene' lyebe gone'. ²⁹ Bi'i che de'e Agarān', bi'in goljā por ni che de'en gwzolen de'e Abraannā' le' blagzejā blagzidbo' Isaaquān' bi'in ben Spirit che Diozān' par gwxañ de'e Sarān' no'olān' goquā beņā' güiž. Le'egatežā ca' ža neža beņā' Izrael ca' chesā'ānao costombr ca' de'en na lein'

choso'olagzejə choso'olagzide' chio'o chonlilažə'əcho Cristən'. ³⁰ Na' Xtižə' Diozən' de'en nyojən nan de que Diozən' gože' de'e Abraannə': "Bebej no'olə esclabon' len bi'i che'enə', cheda' bi'i che'enə' bito əgwnežjua'abo' de'en nona' lyebe əgwnežjua' bi'in gwxañ no'ol chio'onə'." ³¹ De'e na'anə' beñə' bišə' nezecho laogüe de'en chonlilažə'əcho Cristən' gwxaquə'əlebecho ca xi'in de'e Sarən' no'olən' bito goquə esclabo, caguə ca xi'in de'e no'olə esclabon'.

5

Bito chonən byen ñaacho costombr de'en na lein'

¹ Catə'an benlilažə'əcho Cristən' le' bebeje' chio'o lao yogua' de'en choncho chaquecho chebei Diozən' chio'o laogüe de'en chonchon'. De'e na'anə' bito ənacho yebeche Diozən' chio'o šə ñaacho costombr ca' can' na lei che neto' beñə' Izrael.

² Nada' Pab əchnia' le'e to de'e žialao. Šə sole señy de'en ne' sirconsi-sionnə' ña'a bachonlilažə'əle Cristən', bito bibi zaquə'ən de'en bagwzolao chonlilažə'əlene' šə ca'. ³ Echnia' clar de que notə'ətezə beñə' soe' señy de'en ne' sirconsision, leczə cheyałə' gone' complir yoguə'əloł bitə'ətezəchlə de'en na lein'. ⁴ Na' šə chaquele gonle cuaseləł can' na lein' par niç gacle beñə' güen lao Diozən', bachzole Cristən' ca'əłə šə can' chaquele, na' bitoch chonle cas can' nzi'ilažə' Diozən' chio'o. ⁵ Chio'o chonlilažə'əcho Jesocristən' zo Spirit che Diozən' lo'o la'ažda'ochon' na' chonən ca bañezecho de que Diozən' əne' naccho beñə' güen laogüe'enə' catə' yežincho gan' zoe'enə'. ⁶ Ca naquə chio'o chonlilažə'əcho Jesocristən' bito bi nonən len Diozən' šə socho señy de'en ne' sirconsision, o šə cui zochon. La' de'en naquə de'e žialao xen len Diozən', sotezə socho gonlilažə'əcho Cristən' na' gaquecho che ljuējzcho par niç gacia' de que chonlilažə'əchone'enə'.

⁷ To tyemp babenle can' chebei Diozən', pero ña'a chebanda' babe'ele latjə chəsə'əžon beñə' cuich ñaole de'en naquə de'e lin'. ⁸ Dios ben' gwlej le'e par nacle xi'ine', bito ñacho le'enə' chone' par niç chzenagle che beñə' ca'. ⁹ Na' de'en bachzenagle che consejw malən' yobəch əgwzenagle che bitə'ətezəchlə de'e chon contr xtižə' Diozən'. Chonle can' na dicho nga: "Latə'əzə xna' cuazin' chonən par niç cheyas doxen cuazin'." ¹⁰ Pero na' zoa' lez gon Xancho Jesocristən' par niç yezolao ñaole de'e ca' babzejni'ida' le'e. Na' notə'ətezə zjənaquə beñə' ca' chso'on par niç chaczejlažə'əle, Diozən' əgwnežjue' castigw chega'aque'.

¹¹ Na' ca naca' nada', nitə' beñə' chəsə'əne' chsed chlo'ida' de que yoguə' chio'o chonlilažə'əcho Cristən' cheyałə' socho señy de'en ne' sirconsision. Bitolja zjənlagzejə zjənlagzidə beñə' nada' žalə' chsed chlo'ida' ca'. Len bito gaquə zdebə no gwzenag žalə' ca', cheda' bitoch gonən byen so'onlilažə'e Cristən' ben' gwso'ote' boso'ode'ene' le'e yag corozən'. ¹² Yebeichləda' žalə' beñə' ca' chso'on par niç chaczejlažə'əle šə chebei Diozən' le'e de'en cui zole señyən' yesə'əchog cuinga'aque' yelata'.

¹³ Beñə' bišə', Diozən' gwleje' chio'o par chonlilažə'əcho Cristən'. De'e na'anə' bitoch chonən byen ñaacho costombr ca' can' na lei che neto' beñə' Izrael. Pero bito de ləns goncho bitə'ətezə de'e mal de'en la'ažda'omalchon' goncho. De'en chene'e Diozən' goncho, gaque che ljuējzcho na' gaquəlen ljuējzcho tocho yetocho. ¹⁴ Na' bazoczcho choncho yoguə'əloł can' na lein' šə choncho can' nyojən nan: "Goque che sa'aljuējzjo' catg chaque che cuino'." ¹⁵ Pero

šə chacyožə ljuežjcho o chdiłalen ljuežjcho chžiai'y'icho de'en non Diozən' par naccho tozə.

Can' goncho šə gwzenagcho che Spirit che Diozən'

16 De'en naquə de'e žialao xen goncho, cheyałə' sotezə socho goncho can' chene'e Spirit che Diozən'. Na' šə goncho ca' bito gwzenagcho che la'ažda'omalchon'. 17 Cats' chzenagcho che la'ažda'omalchon' bito cho'en latjə əgwzenagcho che Spirit che Diozən'. Na' ca naquə de'en chene'e la'ažda'omalchon' goncho naquən contr de'en chene'e Spirit che Diozən'. Pero šə choncho can' chene'e Spirit che Diozən', bito choncho can' na la'ažda'omalchon'. Na' de'en zo Spiritən' len chio'o bito choncho can' goncho žala' cui zon len chio'o. 18 Na' šə chzenagcho che de'en chsed chzejni'i Spirit che Diozən' chio'o goncho, bitoch naocho costombr ca' de'en na lei de'en bzoj de'e Moizezən'.

19 Šə chzenagcho che la'ažda'omalchon' choncho notə'ətezən de'e mal quinga: Chbejyichjcho no'ol checho o be'en checho par chzolencho beňə' yoblə; chgo'o xtocho; chebeicho bichlə de'e yelə' zto' de'en zjənac ca'; 20 chejni'alažə'əcho lgua' a laquə'; naocho de'en chso'on beňə' ca' chesə'ənelen de'e xio'; bito zocho binlo len ljuežjcho; chdiłə chššašo; chgue'i ljuežjcho; chlocho; chi' yichjcho gaquə güen che cuinzcho sin cui choncho xbab nac gaquə che ljuežjcho; naccho beňə' gotil; bito choncho txen len ljuežjcho; 21 chzelažə'əcho bi de'en de che beňə' yoblə; chotcho beňə'; naccho beňə' güe'e zo; chlencho no lni gan' chac scandl; na' choncho bichlə de'e mal de'en zjənaquə ca de'e mal quinga bagwnia'. Na' de'e yoblə chnia' le'e can' bagwnia'acza' antslə, bito yežincho yoban' gan' zo Diozən' chnabi'e šə choncho de'e mal ca' zjənac ca'.

22 Na' šə chzenagcho che Spirit che Diozən', goncho yoguə' de'e quinga: Gaquecho che ljuežj beňə'cho; socho mbalaz de'en nombi'acho Diozən'; socho binlo len xbab de'en yo'o lo'o yichjla'ažda'ochon'; gapcho yelə' chx-enlažə' len ljuežj beňə'cho bitə'ətezə de'en chso'onene' chio'o; goncho güen len beňə' yeziquə'əchlə na' əži'ilažə'əga'acchone'; goncho complir šə bin' ye'echo beňə' goncho; 23 gaccho beňə' gaxjwlažə'; bito güe'echo latjə nabiə' la'ažda'omalchon' chio'o. Na' šə bachzenagcho che Spirit che Diozən', bito bi bi lei de de'en əna choncho de'e mal. 24 Na' chio'o bangodə'əcho txen len Cristo Jeso'osən' bitoch cho'echo latjə nabiə' la'ažda'omalchon' chio'o par goncho bi de'en chzelažə'an. 25 Spirit che Diozən' babenən yelə' mban zejlicəne chechon', na' de'e na'anə' cheyałə' socho goncho can' chene'ennə'.

26 Na' bito cheyałə' gon cuincho xen gaquecho lechguale chebei Diozən' chio'o, la' šə goncho ca' yesə'əža'a beňə' ljuežjchon' chio'o na' yesə'əgue'ine' chio'o.

6

Cheyałə' gaquəlen ljuežjcho

1 Beňə' bišə', šə to beňə' ljuežjchon' babxope' bene' to de'e mal, chio'o chzenagcho che Spirit che Diozən' cheyałə' gaquəlenchone' par ničh yezoe' binlo len Diozən' de'e yoblə. Na' güe'echone' consejw dižə' šao' əžjsa'alažə'əcho de que leczə ca' chio'o nxož əxopcho goncho de'e malən'. 2 To tocho cheyałə' gaquəlen beňə' ljuežjcho ca' bitə'ətezə de'e chsa'ac chega'aque'. Šə goncho ca' goncho complir can' chene'e Cristən' gonchon'.

3 Na' šə goncho xbab de que naccho beňə' blao len cui naccho, chxoayagzə cuinchon' šə ca'. 4 To tocho cheyałə' goncho xbab šə de'en babenchon' naquən

de'e güen o de'e mal. Na' yebeicho ša babencho de'en naquə güen, pero bito goncho xbab de que güen chon chio'o clezə ca beṇə' yoblə. ⁵ La' to tochon' choglaio Diozən' checho ša bencho güen o ša bencho mal.

⁶ Ša no choso'osed choso'olo'i chio'o xtižə' Diozən', bito goncho rgüin len lega'aque'. Cheyalə' əgwnežjoga'acchone' latə' ša bi de'e šao' de'e güen de'e de checho.

⁷ Bito güe'ele latjə no əxoayag le'e, bito gaquə əgwzochio Diozən' ca'alə. La' segon de'en chonchon' gone' par nič socho mbalaz o par nič si'icho castigw. Can' chac, con de'en chazcho nan' chelapcho. ⁸ Ben' chon con can' chene'e la'ažda'omale'enə' gwžin ža cuiayi'e zejlicane, pero ben' chon can' chene'e Spirit che Diozən', Spiritən' gonən par nič əbane' zejlicane. ⁹ Na' bito cheyalə' žjəxaquə'alazə'əcho par goncho de'e güenə', chedə' la' gwžin ža catə' Diozən' gone' par nič socho mbalaz juisy, con šə cui cuejijchjcho goncho can' chene'ene'enə'. ¹⁰ Cheyalə' goncho güen len yogua'əlo' benə' batə'ətezə zo latjə, pero mazəchlə cheyalə' goncho güen len yeziquə'əchlə beṇə' chso'onlilažə' Cristən'.

Yeto chopə de'en che' Pabən' lega'aque'

¹¹ Le'e güiašc letr cha'o quinga, la' cuina'an chzoja'an le'e. ¹² Beṇə' ca' chso'on byen sole seŋy de'en ne' sirconsion chso'one' ca' chedə' chse'enene' yesyə'abei beṇə' lega'aque' ša baboso'ozoe' le'e seŋyən'. Chso'one' byen solen par nič cui no gwlagzejə gwlagzidə lega'aque' can' choso'olagzejə choso'olagzidə beṇə' neto' laogüe de'en chzeneto' ca naquən' bnežjw cuin Cristən' gwso'ote'ene' le'e yag corozən' por ni checho. ¹³ Beṇə' ca' zjəzo seŋy de'en ne' sirconsionnə' zjəchi' yichjga'aque' lei de'en bzoj de'e Moizezən', pero ni lega'aque' cui chso'one' can' nannə'. Con chse'enene' sole seŋyən' par nič əso'elao' cuinga'aque' na' yesyə'abei beṇə' lega'aque'. ¹⁴ Ca naca' nada', bitoczə güe'elao' cuina', na' bitobi nonən len nada' ša beṇə'chən' yebeine' nada'. Güe'ela'ogua'a Xancho Jesocristən' na' le'enə' che'enda' yebeine' nada'. De'en nezdə' bnežjw cuine' gwso'ot beṇə' le' le'e yag corozən' por ni checho bitobi nonən len nada' ša beṇə'chən' yesyə'əbeine' nada'. ¹⁵ Nezdə' bito bi nonən šə zocho seŋy de'en ne' sirconsionnə' o šə cui zochon, pero de'e zaquə'əchgüei de'en babocobə Diozən' yichjla'ažda'ochon'. ¹⁶ Chio'o naccho doaljə beṇə' Izrael lao Diozən' ša bachonlilažə'əcho Jesocristən' na' šə cuich naocho costombr de'en zjənyoj le'e lein'. Na' le'e šə bachi' yichjle tlaozə can' chene'ene'enə', Diozən' gonšgue' par so cuezəchle binlo len xbab de'en yo'o lo'o yichjla'ažda'olen' na' soteze' yeyašə' yeži'ilazə'e le'e.

¹⁷ Na' par delant bitoch bi xbab clelə gonle che de'en babzoja' le'e. Legwzenag chia' chedə' cuerp chia'anə' nsa'an yiz che de'en baboso'oči' baboso'osaquə' beṇə' nada' por ni che de'en əchyixjui'a xtižə' Xancho Jeso'osən'.

¹⁸ Beṇə' bišə', Xancho Jesocristən' sotezə soe' gaqualenšgacze' le'e len xbab de'en yo'o lo'o yichjla'ažda'olen'. De'e na'azən' chzoja' na'a. *Pab*

Cart De'en Bzoj San Pabən' Par Beṇə' Efeso Ca'

Apostol Pabən' bzoje' cart par beṇə' ca' chso'elao' Jesocrisṭən' Efeson'

¹ Nada' Pab naca' apostol che Jesocrisṭən' con can' gwnalažə' Diozən'. Na' chzoja' cart nga par le'e nitsə'əle Efeson', le'e bagwlej Diozən' par nacle lažə' ne'enə'. Zotezə zole chzenagle che' na' ngodə'əle txeṇ len Cristo Jeso'osən'.

² Chona' orasyon chṇaba' lao Xacho Diozən' na' Xancho Jesocrisṭən' əsa'aclene' le'e na' so'one' ca so cuezle binlo len xbab de'en yo'o lo'o yichjla'ažda'olen'.

Diozən' chaclene' chio'o ngodə'əcho txeṇ len Jesocrisṭən'

³ Ledoye'ela'och Diozən' ben' naquə Xa Xancho Jesocrisṭən' na' leczə cho'elao' Xancho Jesocrisṭən' le'. Ca naquən' ngodə'əcho len Crisṭən', Diozən' bagoclene' chio'o len xbab de'en yo'o lo'o yichjla'ažda'ochon' par niç baçh chzo chbezcho binlo can' socho catə'an yežincho yoban'. ⁴ Chio'o ngodə'əcho txeṇ len Crisṭən', catə' cuṇə' xe yežlyon' Diozən' gwleje' yoguə' chio'o par niç gaquə la'ažda'ochon' xi'ilažə' na' par niç cui bi xtolə'əcho gatə' laogüe'enə'.

⁵ Chaque Diozən' checho. De'e nan' bsi'e xnezenə' antslə par niç gwcue'e chio'o ca xi'ine', na' de'e na'anə' bsele'e Jesocrisṭən' por ni checho. Diozən' gwcue'e chio'o chedə' can' gwyazlaže'e na' can' gone'ene'.

⁶ Bsele'e Xi'ine' Jesocrisṭən' ben' chaquene' chei par goclene' chio'o par niç ca' güe'ela'ochone' laogüe de'enə' nzi'ilažə'əteque' chio'o.

⁷ Tant nzi'ilažə' Diozən' chio'o, bsele'e Jesocrisṭən' bnežjw cuine' blalj xchene'enə' par gwdixjue' xtolə'əchon' catə'an gwso'ote'ene' par niç ca' Diozən' bezi'ixene' xtolə'əcho ca'.

⁸ Diozən' nzi'ilažə'əchgüe' chio'o, beṇe' chio'o zan clas yelə' sin' na' bene' par niç chacbe'icho ca güennə' chone' len chio'o.

⁹ Na' bzejni'ine' chio'o de'en cui no gwneze antslə de'en gone'ene' gaquə, ca naquə de'en bžie' bia' gon Crisṭən'.

¹⁰ Bžie' bia' de que gwžin ža catə' Crisṭən' nabi'e doxenlə na' gone' par niç yoguə'əloł beṇə' ža' yoban' na' beṇə' ža' yežlyon' txeṇ yoso'ozenague' che'.

¹¹ Na' chio'o ngodə'əcho txeṇ len Crisṭən', Diozən' bsi'e xneze par gwcue'e chio'o ca xi'ine' par niç gaquə lao na'acho de'en gone' chio'o naccho xi'ine'. Na' zoe' chone' par niç gaquə yoguə'əloł can' gwchoglaogüe'en na' can' chene'ene' gaquə.

¹² Na' ca naquə neto' chbezəto' yidə Crisṭən' na' chonlilažə'əto'one' antslə ca le'e, bsi'e xneze par niç zgua'atec neto' be'ela'oto'one' laogüe de'en naque' le'ezelaogüe beṇə' zaque'e.

¹³ Na' le'e ngodə'əle txeṇ len Crisṭən', chedə' leczə bzenagle che dižə' güen dižə' cobə de'en naquə de'e li. Na' nan de que cui yeyejcho lao yi' gabılən' šə gonlilažə'əcho Crisṭən'.

Na' catə'an benlilažə'əle Crisṭən' bla' Spirit che Diozən' zon lo'o yichjla'ažda'olen'. Zon len chio'o chonlilažə'əchone' can' bene' lyebe par niç nezecho bagwcue'e chio'o ca xi'ine'.

¹⁴ Na' zon lo'o yichjla'ažda'ochon' par niç nezecho de que gwžin ža catə' gaquə lao na'acho de'en gonəch Diozən' chio'o naccho xi'ine'. Na' gaquən lao na'acho catə' gone' cuerp cobə chechon'.

Beṇe' chio'o Spirit che'enə' par niç güe'ela'ochone' de'en naque' le'ezelaogüe beṇə' zaque'e.

Pabən' gwnabe' de que Diozən' əgwsed əgwlo'ine' beṇə' ca' chso'onlilažə' Crisṭən'

¹⁵ Babenda' dižə' ca naquən' chonlilažə'əle Xancho Jeso'osən' na' ca naquən' chaquele che yoguə' beṇə' ca' yelə' beṇə' ca' bagwlej Diozən' par zjənaque' lažə' ne'enə'.

¹⁶ De'e na'anə' nada' catə' chona' orasyonṇə' yoguə' laste cho'a

yelə' choxcwlen che Diozən' can' chonlən'. ¹⁷ Na' chnaba' de que Diozən' gone' par niç šejni'ichele che' na' gombi'achlene'. Xancho Jesocristən' leczə cho'elaogü'e Diozən' ben' naquə Xe' na' ben' naquə le'ezelaogü'e beṇə' zaque'e. ¹⁸ Chnabda' Diozən' šo'o be'eni' che'enə' lo'o yichjla'ažda'olen' par niç ənezele bi de'e güennə' zochə lez gone' len chio'o bagwleje' naccho xi'ine'. Na' chnaba' gone' par niç šo'o be'eni' che'enə' lo'o yichjla'ažda'olen' par niç ənezele catec yelə' bala'an xen juisy gone' chio'o bagwleje' par naccho lažə' ne'enə'. ¹⁹ Leczə chnabda'ane' šo'o be'eni' che'enə' lo'o yichjla'ažda'olen' par niç ənezele de que yelə' guac xenṇə' nape' par gaquəlene' chio'o chonlilažə'əchone'. Bablo'ine' benachən' can' naquə yelə' guac xen che'enə'. ²⁰ Blo'en ca de'en bosbane' Cristən' ladjo beṇə' guatən' na' nzo'ene' cuiten' gan' chi'e chnabi'e par niç ca' Cristən' chnabi'e txeṇ len le'. ²¹ De'e na'ana' Cristən' chnabi'ache' ca notə'atezə angl. Chnabi'ache' ca beṇəch, na' ca de'e xio', na' ca bi de'en chse'ejni'alaže'e na' ca notə'atezəchlə napə yelə' gwnabia' na'a na' tyemp de'en ze'e za'. ²²⁻²³ Diozən' bene' par niç zoczə Cristən' chnabi'e yoguə'əlo beṇə' na' biquə'əchlə. Na' can' zoczə Cristən' chnabi'e doxenlə, leczə ben Diozən' par niç zoczə Cristən' chnabi'e chio'o cho'ela'ochone'. De'e na'ana' chio'o cho'ela'ochone' gwxaquə'əlebecho ca to cuerp. Na' Cristən' gwxaquə'əlebene' ca yichj cuerpən', chedə' chnabi'e chio'o can' chon xbab de'en yo'o lo'o yichjchon' chnabi'an cuerp chechon'.

2

Chio'o chonlilažə'əcho Diozən' bito yeyejcho lao yi' gabilən' chedə' nzi'ilaže'e chio'o

¹ Diozən' babocobe' yichjla'ažda'olen' can' babocobe' cheto'onə'. Antslə goccho len yichjla'ažda'ochon' ca beṇə' guat laogü'e de'en cui bzenagcho che Diozən'. ² Con gwzoczcho bencho de'e malən' can' chso'on yeziquə'əchlə beṇə' ca' ža' yezlyo nga. Bencho can' chene'e gwxiye'enə' de'en chnabia' de'e xio' ca'. Lega'aquən zjənyeçj zjəmbi'in beṇəchən' na' chəsə'anabi'an yichjla'aždao' beṇə' ca' cui chse'ene yoso'ozenag che Diozən'. ³ Ca'aczən' ben yoguə'əcho antslə, bito bzenagcho che Diozən'. Con gwdcaccho bencho can' gwna la'ažda'omalchon', na' bencho con can' gwna xbab chechon'. De'e na'anə' gwçhoglaogü'e'en checho gone' chio'o castigw zejlicəne, can' gone' len yeziquə'əchlə beṇəch de'en cui choso'ozenague' che'. ⁴⁻⁶ Goccho ca beṇə' guat len yichjla'ažda'ochon' chedə' bito bzenagcho che Diozən'. Pero Diozən' lechgualə cheyašə' chezi'ilaže'e chio'o na' chacchgüeine' checho. Na' de'en nzi'ilažə' Diozən' chio'o, de'e nan' bene' par niç cui yeyejcho lao yi' gabilən'. Bžin ža ben Diozən' len chio'o can' bene' len Cristən' catə'an bosbane'ene' ladjo beṇə' guat ca'. Diozən' bocobe' yichjla'ažda'ochon' par niç cuich naccho ca beṇə' guat na' bene' ca ndil ngodə'əcho Cristən' txeṇ par niç bach chzo chbezcho binlo can' socho catə'an bachi'ilenchone' yoban' gan' chi'enə'. ⁷ Bene' ca' par niç tyemp de'enə' ze'e za' əgwlo'e catequən' nzi'ilaže'e chio'o na' catec de'e güennə' chone' len chio'o ngodə'əcho txeṇ len Cristo Jeso'osən'. ⁸⁻⁹ De'en nzi'ilažə' Diozən' chio'o bene' par niç chio'o chonlilažə'əchone' bito yeyejcho lao yi' gabilən'. Con to goclenə' bene' ca', caguə por ni che bencho bi de'e güennə'. De'e na'anə' notono chio'o cheyalə' gü'e'elao' cuincho de'en cui yeyejcho lao yi' gabilən'. ¹⁰ Na' par niç goncho de'e güen Diozən' bocobe' yichjla'ažda'ochonə' na' bene' par niç ndil ngodə'əcho txeṇ len Cristo Jeso'osən'. Bsi'e xnezenə' antslə par niç sotezə socho goncho de'e güen.

Cristan' bene' par nich bena' Izrael ca' na' bena' ca' cui zjonaqua bena' Izrael nite'e binlo toe' yetoe'

¹¹ Le'e gon xbab ca naqua neto' goljato' naquato' bena' Izrael zoto' seŋy de'en ne' sirconsision na' zejen de que Diozan' gaquale' neto' can' none' lyebe. Antsla neto' gwneto' che le'e golje cui nacle bena' Izrael: "Le'e cui zole seŋy de'en ne' sirconsision". Na' seŋyan' naqan con to seŋy de'en choso'ozo bena' lao cuerp cheto'ona'. ¹² Na' le'e gon xbab de que tyemp de'en bagwde bito bembiale Cristan'. Bito nacle nasyon che Diozan' can' naqua neto' bena' Izrael. Bito bi lyebe ben Diozan' par gaquale' le'e ca lyebe de'en bene' len neto' bena' Izrael. Bito gwzole lez gaquale' Diozan' le'e na' bito bembiale Diozan'. ¹³ Antsla bito gwzole binlo len Diozan', pero na'a le'e len neto' bangoda'echo txen len Cristo Jeso'osan' na' Diozan' chaclene' chio'o cheda' Cristan' bnezjw cuine' blalj xchene'ena' por ni che xtolae'achon' cata'an gwso'ote'ene'ena'. ¹⁴ Na' antsla neto' bena' Izrael na' le'e cui nacle bena' Izrael gocco bena' contr tocho yetocho. Pero na'a Cristan' babene' par nich naccho toza na' zocho binlo tocho yetocho. ¹⁵ De'en bnezjw cuin Cristan' por ni checho cata'an gwso'ote'ene', bitoch chonan byen cue' yichjcho par goncho yogua'elol can' na lei de'en bzoj de'e Moizezan', ca costombr ca' de'en nan na' bichla de'en chonan mendad goncho. Yogu' chio'o chonlilaža'echo Cristan' bene' chio'o ca toza yež, neto' bena' Izrael na' le'e cui nacle bena' Izrael. De'e na'ana' zocho binlo tocho yetocho. ¹⁶ Cristan' bnezjw cuine' gwso'ote'ene' le'e yag corozan' par bozoe' chio'o binlo len Diozan'. De'e na'ana' naccho toza na' bito chgue'i ljezjcho.

¹⁷ Par le'e cui nacle bena' Izrael na' neto' naquato' bena' Izrael, Cristan' bedaye'e diža' can' gaqua socho binlo len Diozan'. ¹⁸ Na' de'en chonlilaža'echo Cristan', toza Spirit che Diozan' chaclenan chio'o par nich chac cho'elencho Xacho Diozan' diža'. ¹⁹ De'e na'ana' le'e cui nacle bena' Izrael bitoch nacle ca bena' zit' len neto', sino banacle bena' ljezjto' na' banacte'le bena' family che Diozan' txen len neto' bagwlej Diozan' par naccho laža' ne'ena'. ²⁰ Na' yogua'echo gwxaqua'alebecho ca to yo'o de yej. Neto' chsed chzejni'ito' le'e che Cristan' naquato' ca laneina', neto' apostol na' len yeziqwa'achla bena' chso'e xtiža' Cristan'. Na' Jesocristan', gwxaqua'alebene' ca yej squin nech che to yo'o. ²¹ Na' de'en ngoda'echo txen len Cristan', gwxaqua'alebecho ca yej ca' de'en zjancua' zjängoda'an gan' chac yo'o de yejan'. Zjängoda'an txen par nich ša' yo'ona' na' par nich gaquan' gual. Can' naquan' gwxaqua'alebecho ca to yo'o gan' zo Diozan', cheda' ngoda'echo txen len Xancho Jesocristan'. ²² Neto' len le'e txenna' naccho ca to yo'o gan' zo Diozan' cheda' zo Spirit che'ena' lo'o yichjla'aždao' chio'o chonlilaža'echo Cristan'.

3

Diozan' bsele'e Apostol Paban' jetixjui'e xtiže'ena' len bena' cui zjonaqua bena' Izrael

¹ Nada' Pab dia' ližya nga cheda'an achyixjui'a xtiža' Cristo Jeso'osan' len le'e cui nacle bena' Izrael. ² Le'e chache'ile chia' ca naquan' nži'ilaža' Diozan' nada' na' bsi'e xneze par nich chzejni'ida' le'e xtiže'ena'. ³ Chache'ile ca naqua Diozan' blo'ine' nada' de'en cui no gwneze antsla, can' chzoja' le'e to chopə diža' le'e cart nga. ⁴ Na' cata' gwlable de'en chzoja' nga gache'ile de que nada' chejni'ida' de'en cui no gwneze che Cristan'. ⁵ Antsla Spirit che Diozan' bito bzejni'in bena' de'en cui no gwneze che Cristan', pero na'a neto' apostol che Diozan' babzejni'in neto' len, na' lecza' babzejni'in yeziqwa'achla bena' chso'e xtiža' Cristan'. Babzejni'in neto' bagwlej Diozan' par naquato'

lažə' ne'enə'. ⁶ Babzejni'in neto' de que notə'ətezcho šə bachejle'echo che dižə' güen dižə' cobə de'en chzejni'in che Cristən', nachən' bangodə'əcho txen len Cristo Jeso'osən'. De'e na'anə' le'e cui nacle beñə' Izrael na' len neto' beñə' Izrael txenñə' si'icho de'en gonəch Diozən' chio'o naccho xi'ine', na' txenñə' ngodə'əcho naccho ca tožə family, na' txenñə' chaclen Diozən' chio'o can' babene' lyebe. ⁷ Diozən' gwleje' nada' len yelə' guac che'enə' par niç əchyixjui'a dižə' güen dižə' cobənə'. Na' bano'e chia' chyixjui'an chedə' nzi'ilažə'e nada'. ⁸ Nada' chacda' ni latə'əzə cui zaca'a entr chio'o bagwlej Diozən' par naccho lažə' ne'enə', pero Diozən' no'e chia' chyixjue'ida' beñə' cui zjənaquə beñə' Izrael catec de'e güen juisy gone' len yoguə'əloł chio'o chonlilažə'əcho Cristən'. Tant de'e šao' de'e güen gaquə checho, cabi bi de de'e saquə'əlebe de'e güen de'en gone' len chio'o. ⁹ Diozən' bene' yoguə'əloł beñə', yoguə'əloł bia chaš, na' yoguə'əloł de'e de. Na' dezd ža gwlasda'ote bito be' Diozən' latjə yesə'əneze beñəchan' bin' babžie' bia' gaquə. Pero na'a no'e chia' chzejni'ida' yoguə'əloł beñə' de que bachac can' nžie' bia'. ¹⁰ Na' Diozən' chlo'ine' angl əblao ca' na' angl gwnabia' ca' beñə' nitə' yobanə' de que nape' de'e zan clas yelə' sin', chlo'ine' lega'aque' de'e güenñə' de'en chone' len chio'o ncodə' ljuejzcho cho'ela'ocho Cristən'. ¹¹ Chone' can' nžie' bia' dezd nechte catə'an gwchoglaogüe'en sele'e Xancho Jesocristən'. ¹² Na' chio'o ngodə'əcho txen len Cristən' bito chžebcho Diozən', sino chebeicho nezecho de que chac cho'elencho Diozən' dižə' chedə' chonlilažə'əcho Cristən'. ¹³ La'anə'əczə dia' ližya nga laogüe de'en bagwdixjue'ida' le'e dižə' güen dižə' cobə de'en chzejni'in che Cristən', chatə'əyoida' le'e bito yeyašə'alažə'əle ca naquə nga chy'i' chzaca'a. Leyebei chedə' chac chia' ca' par niç chaquəlena' le'e.

Cristən' lechquale chaqueñe' che chio'o chonlilažə'əchone'

¹⁴ Catə' chona' xbab ca güenñə' baben Diozən' par niç nacle tožə len neto' beñə' Izrael, chzo xiba' chona' orasyon lao Xa Xancho Jesocristən'. ¹⁵ Le'enə' bxie' yoguə' family che chio'o zocho lao yežlyo nga na' che beñə' ža' yoban'. ¹⁶ Chnaba' lao Xacho Diozən' gon Spirit che'enə' fuers balor par yichjla'ažda'olen' par niç gonle yoguə'əloł can' chene'ene'. Na' Dioz na'anə' gone' par niç gatə' fuers balor che yichjla'ažda'olen' chedə' naque' le'ezelaogüe beñə' zaque'e na' nape' le'ezelaogüe yelə' guac xen. ¹⁷ Chnaba' soczle gonlilažə'əle Cristən' par niç sotezə soe' len le'e. Na' leczə ca' le'e sotezə sole gaquəle che Diozən' can' cheyalə' gaquəle che', na' gaquəle che ljuežjle can' cheyalə' gaquəle chega'aque'. ¹⁸ Chnaba' de'e quinga par niç le'e txen len yeziquə'əchlə beñə' bagwlej Diozən' par zjənaque' lažə' ne'enə' šejni'ile de que lechquale chaque Cristən' che chio'o. Na' yelə' chaque che'enə' len chio'o gwxaquə'əleben cacžə gan' nžiljw nisdə'onə', pero mazəchlə can' nžiljw nisdə'onə' chaqueñe' checho. Na' nezecho de que tonchgua de yežlyon', pero mazəchlə can' dennə' chaque Cristən' checho. Na' lechquale zitjw minñə', pero mazəchlə ca zitjon' naquəññə' chaque Cristən' checho. Le'egatezə can' yoban' lechquale sibə zen, pero mazəchlə ca sibən' zennə' chaque Cristən' checho. ¹⁹ Chnaba' gon Diozən' par niç ənezele de que Cristən' chaquechene' checho mazəchlə ca de'en chon notə'ətezcho xbabən'. Na' leczə gon Diozən' par niç gaquə yichjla'ažda'olen' tožə can' naquə yichjla'ažda'ogüe'enə' par niç ca' gacle can' naque'enə'.

²⁰ Diozən' chac chone' yoguə'əloł. De'e na'anə' chac chone' mazəchlə ca de'en chnabechone' o de'en choncho xbab gone'enə'. Na' chone' par niç Spirit che'enə' zon lo'o yichjla'ažda'ochon' chaclenən chio'o len yelə' guac che'enə'.

21 Chio'o ncodə' ljuəzjcho cho'ela'ocho Cristən', lədoye'ela'och Diozən' nɑ'ɑ' na' zejlicəne chedə' ngodə'əcho txen len Cristo Jeso'osən'. Na' can' gonšgaczo.

4

Spirit che Diozən' babeyonən yichjla'ažda'ochon' tozə

1 Nada' dia' ližya nga chedə' əchyixjui'a xtižə' Xancho Jesocristən'. Bagwlej Diozən' le'e par nacle xi'ine' can' gwleje' neto'. De'e na'anə' chatə'əyoida' le'e šejšgacze gonle can' cheyalə' gon yoguə' chio'o bagwlej Diozən' par naccho xi'ine'. 2 Chatə'əyoida' le'e bito gon cuinle xen. Legac beṇə' gaxjwlažə' na' legapə yelə' chxenlažə' len beṇə' yoblə. Chatə'əyoida' le'e gaque che ljuəzjle na' gwdele ca'alə šə bi chac chele entr tole yetole. 3 Babeyon Spirit che Diozən' yichjla'ažda'olen' tozə. Na' chatə'əyoida' le'e leso binlə tole yetole par niç sotezə sole gaquə yichjla'ažda'olen' tozə. 4 Yoguə' chio'o cho'ela'ocho Diozən' naccho ca tozə family. Na' tozə Spirit che Diozən' zon lo'o yichjla'aždao' yoguə'əcho, na' tozə can' zocho lez gon Diozən' güen len chio'o chedə' bagwleje' yoguə'əcho par naccho xi'ine'. 5 Tozə Xancho Jesocristən' naquə, na' tozə can' chonlilažə'əchone', na' tozə can' zejen de'en gwchoacho nisən'. 6 Tozə Diozən' zo ben' naquə Xa yoguə' chio'o. Le'enə' chnabi'e yoguə'əcho, na' chchine' yoguə'əcho par choncho xšine'enə', na' zoczə' len yoguə'ətecho.

7 Na' seḡon can' chaclen Cristən' chio'o, no'e checho gwde gwdele de'e gaquə gon to tocho. 8 Chac can' nyoj de'en gwna Diozən' che Cristən': Catə'an beyepe' yoban' bene' de'e xio' ca' gan, na' be'e che beṇəchən' gwde gwdele de'e gaquə so'on to toga'aque'.

9 Na' de'en gwne': "Beyepe' yoban'", zejen de que betje' na' ble'e lao yežlyo nga antslə ze'e yeyepe' yobanə'. 10 Na' ben' betjən' leczə le'enə' beyepe' yoban' gan to Diozən'. De'e na'anə' zoe' chnabi'e doxenlə. 11 Le'egatezə le'enə' no'e che balə chio'o par niç naccho apostol, na' balcho no'e checho chyixjue'echo bi de'en bagwne' chio'o. Yebalcho no'e checho chje'echo dižə' güen dižə' cobə de'en chzejni'in che'. Yebalcho no'e checho chgüia chyecho beṇə' chso'elao' le' na' chsed chlo'iga'aquechone'. 12 Cristən' no'e checho chaclen ljuəzj chio'o bagwlej Diozən' par naccho lažə' ne'enə' par niç yoguə'əcho choncho xšine'enə' na' zda chonlilažə'əchcho Cristən', chio'o naccho ca family che'. 13 Na' zocho chaclen ljuəzjcho tocho yetocho par niç gaccho tozə gonlilažə'əcho Xi'in Diozən' na' gombi'achone'. Cana' gacyanə'əcho can' cheyalə' gaccho, gaccho beṇə' šao' beṇə' güen can' naquə Cristən'. 14 Bito cheyalə' šo'ocho xbab ca che to bidao', šejcho qui šejcho ca'alə nəocho to to yelə' chejni'aləžə' de'en chsa'aljlažə' beṇə' güenlažə' na' beṇə' gwxiye' ca' par chəsə'əxoayague' chio'o. 15 Cheyalə' nəocho de'en naquə de'e li, na' zejli gaque che ljuəzjcho tocho yetocho. Cheyalə' šejcho gaquəchcho beṇə' šao' beṇə' güen can' naquə Cristən' ben' chnabia' chio'o. 16 Ca naquə cuerp chechon', to to partən' ngodə'an na' noxə' ljuəzje len belə' na' len bin de'en nca'an niç to to partən' chonən žin che chei na' niç cuerpən' naquən gual. Ca'aczən' chio'o cho'ela'ocho Cristən' ngodə'əcho txen tocho yetocho. Na' catə' to tocho choncho de'en noe' Diozən' checho goncho, nachən' Cristən' chone' par niç yoguə'əcho txen zda chaquəchcho beṇə' šao' beṇə' güen na' zda chaquechecho che ljuəzjcho.

Diozən' babocobe' yichjla'aždao' chio'o chonlilažə'əchone'

17 Na' a əchnia' le'e de'en non Xancho Jesocristən' mendad əgwzejni'ida' le'e de que bito cheyalə' goncho can' chso'on beṇə' ca' cui zjənonbia' Diozən'.

Xbab chega'aque'enə' bito bi zaquə'an. ¹⁸ Nchoł yichjla'ažda'oga'aque'enə'. Na' laogüe de'en zjənaque' beṇə' godenag, bito chse'ejni'ine' bin' chazlažə' Diozən'. De'e na'anə' bitobi yelə' mban zejlicəṇe chega'aque' de ca naquə de'en choṇ Diozən' chio'o. ¹⁹ Bito bi zto' zjənombi'e che de'e malən' chso'one'. Chso'onteze' bitə'atezə de'e mal de'en nan so'one'. Do tyempte con chso'elaže'e chso'one' yoguə' claste yelə' zto'. ²⁰ Le'e nezele de que Cristən' bito chene'ene' goncho de'en nac ca'. ²¹ La' babzenagle che dižə' li de'en chzejni'in che Jeso'osən' na' babletje' xbabən' yichjla'ažda'olen'. ²² Antslə gwdacho bencho con can' na la'ažda'omalchon'. La'ažda'omalchon' chebein de'e malən' na' de'e na'anə' chxoayaguən chio'o par nič goncho de'e mal can' chzelažə'əṇṇə'. Pero baṇezele de que cheyalə' cuejyichjo cuich gwzenagcho che la'ažda'omalchon'. ²³ Na' lecžə nezele de que cheyalə' gwša'acho xbab de'en choncho lo'o yichjla'ažda'ochon'. ²⁴ Cheyalə' güe'echo latjə yocobə Diozən' yichjla'ažda'ochon' par nič sotezə socho goncho de'e güen can' chon le', na' par nič gaccho beṇə' la'aždao' xi'ilažə' can' naquə le'. Goncho ca' chedə' banombi'acho xtižə' Diozən' de'en naquə de'e li.

²⁵ De'e na'anə' bitoch gonlažə'əcho sino güe'elen ljuježjcho dižə' li chedə' ncodə' ljuježjcho naccho ca tozə family.

²⁶ Catə' chža'acho bito cheyalə' goncho de'e mal. Cheyalə' yeyacxenlažə'əcho lgüegwzə lao yelə' chža'a chechon', bito ža'acho do ža. ²⁷ Bito güe'echo latjə ṇabia' gwxiye'enə' chio'o par goncho de'e mal.

²⁸ Šə nocho naccho beṇə' bguan, bitoch cheyalə' cuancho. Cheyalə' so tacho goncho žin de'en naquə de'e güen, par nič gatə' de'e əgwnežjwcho beṇə' chyažj chchine.

²⁹ Bito güe'echo dižə' zban dižə' de'e cui zaque'e. Cheyalə' güe'echo dižə' güen dižə' de'e zaque'e par gaquəlen lata'an beṇə' əse'ene len. Güe'echo dižə' de'e gaquəlen beṇə' ljuježjcho ca' par nič so'onlilažə'əche' Jesocristən'. ³⁰ Na' bito goncho ca so Spirit che Diozən' trist, la' zo Spiritən' lo'o yichjla'ažda'ochon' par nič nezecho gwžin ža goṇ Diozən' chio'o cuerp cobən' na' gone' par nič gaquə yichjla'ažda'ochon' cayanə'an chene'ene'.

³¹ Cheyalə' cuejyichjo yoguə' de'e malən'. Bitoch co'olažə'əcho. Bitoch əlocho. Bitoch əža'acho. Bitoch güe'echo dižə' loc dižə' lžej. Bitoch əgwžia gwnitə'əcho beṇə'. Na' bitoch gaccho beṇə' xi'a. ³² Cheyalə' goncho güen len ljuježjcho na' lecžə cheyalə' yeyaše'e ljuježjcho tocho yetocho. Cristən' bagwdixjue' xtolə'əchon' par nič babezi'ixen Diozən' checho. Na' can' babezi'ixene' checho, ca'aczən' cheyalə' yezi'ixen che ljuježjcho tocho yetocho catə' bi de'en chso'one beṇə' ljuježjchon' chio'o.

5

Chio'o naccho xi'in Dioz cheyalə' goncho can' chon Diozən'

¹ Na'a ža cheyalə' goncho can' chon Diozən' chedə' banaccho xi'ine' na' chaquene' checho. ² Cheyalə' sotezcho gaquecho che ljuježjcho can' chaque' Cristən' checho. La' por ni chechona' bnežjw cuine' gwdixjue' xtolə'əchon' catə'an gwso'ote'ene'enə', na' chebei Diozən' de'en bene' ca'.

³ Bito cheyalə' co'o xtocho na' bito cheyalə' cuejyichj be'en checho o no'ol checho par solencho beṇə' yoblə, na' bito goncho bichlə de'e yelə' zto'. Na' cuat selažə'əczcho goncho de'e mal ca' de'en zjənac ca'. Bagwlej Diozən' chio'o par naccho lažə' ne'enə'. ⁴ Na' de'en banombi'acho Diozən' bito cheyalə' goncho de'en naquə de'e yelə' zto' yelə' zla'an na' bito güe'echo dižə' zban na'

nic güe'echo dižá' de'e cui nca'a xneze. De'en cheyalá' goncho, güe'echo yelá' choxcwlen che Diozán'. ⁵ Bañezecho de que be'ená' chgo'o xtoi na' be'ená' chbejyichj no'ol chei o be'en che' par chzolene' beñá' yoblá, na' leczá ca' be'ená' chzelažá' gon bichlá de'e yelá' zto', ni to beñá' ca' bito bi de'e güen yesá'azi'e ca de'en si' chio'o cho'echo latjá chnabia' Cristán' na' Diozán' chio'o. Na' šá no chebeine' chone' de'e yelá' zto', tozaczá ca mal naquæn len de'en chso'on beñá' chse'ejni'alažá' lgu'a lsaquá'. ⁶ Bitó güe'echo latjá no axoayag chio'o len dižá' güenlažá'. Diozán' gwnežjue' castigw zejlicane che beñá' ca' cui choso'ozenague' che', chso'ela'ozeche' chso'one' de'e mal ca' bagwnia' ca'. ⁷ Bitó gonga'acchone' txen goncho de'e malán'.

⁸ Antslán' nchoj yichjla'ažda'ochon', pero na'a bayo'o be'eni' che Xancho Jesocristán' lo'o yichjla'ažda'ochon'. De'e na'aná' ledoyen de'e güenná' can' cheyalá' gon chio'o bayo'o be'eni' che Xanchon' lo'o yichjla'ažda'ochon'. ⁹ Na' de'en bayo'o be'eni' che'ená' lo'o yichjla'ažda'ochon' goncho de'e güen na' goncho de'e zda licha na' güe'echo dižá' li. ¹⁰ Na' cheyalá' gwsedcho par añezecho bin' chazlažá' Xanchon' nich gonchon. ¹¹ Bitó goncho txen len beñá' ca' zjānchoj yichjla'ažda'oga'aque'ená' na' chso'one' de'e cui bi zaquá'æn. Cheyalá' ye'ega'acchone' de que de'e malán' chso'one'. ¹² Na' ca de'en chso'on beñá' ca' do bgašá'áza, naquan de'e cheyalá' gaguecho zto' güe'echo dižá' chei. ¹³ Pero chio'o yo'o be'eni' che Diozán' lo'o yichjla'ažda'ochon', catá' ye'ega'acchone' de que de'e malán' chso'one', yesyá'ayacbe'ine' de que le malán' chso'one'. Be'eni' che Dioz na'aná' chlo'in chio'o šá de'en choncho naquæn de'e güen o šá naquæn de'e mal. ¹⁴ De'e na'aná' che'echo beñá':

Nacle len yichjla'ažda'olen' ca beñá' guat de'en cui chzenagle che Diozán'. De'e na'aná' le'e gwzenag che' par nich Cristán' gone' le'e be'eni' che'ena'.

¹⁵ Cheyalá' ggüiacho naquæn' chzo chdacho. Cui tacho ca beñá' cuiczá nabe'i sino tacho ca chda beñá' chejni'i. ¹⁶ Do tyempte cheyalá' goncho de'e güen, chedá' tyemp nga na'a zan beñá' nitá' chso'one' de'e mal. ¹⁷ Bitó goncho ca beñá' cui bi xbab nye'. Cheyalá' šejni'icho na' goncho can' chene'e Xancho Jesocristán'. ¹⁸ Bitó gaccho beñá' güe'e zo beñá' cui bi yelá' zto' nombia'. De'en cheyalá' gonchon', güe'echo latjá nabia' Spirit che Diozán' yichjla'ažda'ochon'. ¹⁹ Catá' chdopá chžagcho txen cheyalá' gojcho no imno na' gwlabcho no salmo na' gojcho no de'en na Spirit che Diozán' gojcho. Leczá gojcho lo'o la'ažda'ochon' par güe'ela'ochó Xancho Jesocristán'. ²⁰ Cheyalá' güe'echo yelá' choxcwlen che Xacho Diozán' zejji bitá'atezá de'e chac checho na' lao yoguá'aloj de'en babene' chio'o, chedá' la' chonjilažá'ácho Xancho Jesocristán'.

To tocho cheyalá' solencho family checho can' chazlažá' Cristán'

²¹ Ca de'en napcho Diozán' respet cheyalá' agwzexjw yichjcho tocho yetocho.

²² Na' ca naquá le'e no'olá le'e nšagna'ale, le'e gwzenag che be'en chele. Šá gonje ca' lenczá che Xancho Jesocristán' chzenagle. ²³ Le'e gwzenag che be'en che to tole chedá' lega'aque' chásá'anabi'e le'e ca Cristán' chnabi'e chio'o cho'ela'ochone'. Chio'o gwxaquá'álebecho ca to part che cuerp che Cristán' na' le'ená' babebeje' chio'o xni'a de'e malán'. ²⁴ Na' ca naquá chio'o cho'ela'ochó Cristán' cheyalá' gwzenagcho che', le'egatezá ca' le'e no'olá le'e nšagna'ale, legwzenag yoguá' bin' na be'en che to tole.

²⁵ Na' le'e beñá' byo le'e nšagna'ale, le'e gague che no'ol chelen' to tole can' chaque Cristán' che yoguá' chio'o cho'ela'ochone' na' bnežjw cuine' por ni checho catá'æn gwsó'ote'ene'. ²⁶ Bnežjw cuine' par nich beya'a beyibe'

la'aždao' chio'o chonlilažə'əchone'. Na' catə' gwchoacho nisən' be'echo dižə' gwnacho de que chonlilažə'əcho Cristən'. De'e na'anə' bene' la'ažda'ochon' xi'ilažə'. ²⁷ Na' bene' par nič əžincho laogü'e'enə' sin cui bi manch da' əchen la'ažda'ochon', na' sin cui bi xtolə'əcho de, na' nic bichlə de'e mal yo'o yaz lo'o la'ažda'ochonə' de'e cui chazlažə' Diozən'. Cristən' bene' par nič chio'o cho'ela'ochone' gaquə la'ažda'ochon' xi'ilažə' na' bito bi xtolə'əcho gata'. ²⁸ Can' nži'i Cristən' chio'o, ca'acžən' le'e beņə' byo le'e nšagna'ale cheyalə' ži'ile no'ol che to tole can' nži'ile cuerp chelen'. Ben' nži'i xo'ole' nži'icze' cuine' ca de'en chone' ca'. ²⁹ Notono zo beņə' chgue'ine' cuerp che'enə' sino nži'ine'en na' chapəši'en, can' chon Cristən' nži'ine' chio'o na' chapəši'e chio'o cho'ela'ochone'. ³⁰ Cristən' nži'ine' chio'o na' chapəši'e chio'o cheda' la' to to chio'o gwxaquə'əlebecho ca to to part che cuerp che'enə', ca žit de'en yo'e na' ca xpele'enə'. ³¹ Na' nyojczə Xtižə' Diozən' nan: "Beņə' byonə' le'e xaxne'e par əgwšagne'e si'e to no'olə na' əsa'aque' tozə." ³² De'en babzoja' nga naquan de'e cui no gwneze antslə na' naquan de'e žialao xen par chio'o. Na' zejen de que chio'o cho'ela'ochon' Cristən' naccho tozə len le'enə'. ³³ Na' leczə zejen de que to to le'e beņə' byo cheyalə' gaquəle che no'ol chelen' can' chaquele che cuinle. Na' leczə ca' le'e no'olə le'e nšagna'ale, to tole cheyalə' gaple respet be'en chelen'.

6

¹ Le'e bidao' bi'i xcuidə', le'e əgwzenag che xaxna'ale. Gonle ca' cheda' le'e len neto' ngodə'əcho txen len Xancho Cristən' na' naquəczən de'e cheyalə' gonlen'. ²⁻³ Na' de'e nga ben Diozən' mendad goncho gwne': "Legwnežjo yelə' bala'an xaxna'ale. Na' šə gonle ca' gaquə güen chele na' gaquə banle sša lao yežlyo nga." Na' entr yoguə' de'e ca' bene' mendad goncho de'e ngan' naquə de'e žialao de'en nsa' lyebe, nan de que gaquə güen che beņə' choso'ozenague' chei na' de que gaquə yesə'əbane' sša lao yežlyon'.

⁴ Na' le'e xaxna' bidao', leyosgol leyoscha'o bi'i chele ca' par yoso'ozenagbo' che Xancho Cristən'. Bito con gonle ca yesə'əža'a yesə'əlocho', pero legü'e'ega'acbo' consejw šao' consejw güen.

⁵ Na' le'e mos legwzenag yoguə'əlol can' na xan žinnə' na' legapəga'aque' respet. Na' legon xšinga'aque'enə' do yichj do lažə'əle. Legon ca' cheda' leczə che Crist nan' chzenagle catə'an chzenagle chega'aque'. ⁶ Bito gonleile xan žinnə' gonlizle ca beņə' chonchgua žinnə' catə'əžən' chgüie' le'e. Legon žinnə' do yichj do lažə'əle can' chene'e Diozən' cheda' nacle beņə' güen xšin Cristən'. ⁷ Na' cheyalə' güe'elažə'əle gonle žin che beņə' nič yebei Xancho Cristən' le'e, caguə par nič yebei ben' naquə xan žin na'azənə'. ⁸ Nezecho šə choncho de'e güen le'egatežczə ca' gon Xancho Cristən' güen len chio'o notə'ətezə naccho, la'anə'əczə šə syempr choncho xšin beņə' yoblə o šə cui.

⁹ Na' le'e beņə' xan žin, leczə cheyalə' gonle güen len beņə' güen žin chelen'. Bito co'oga'aclene' šeb, cheda' nezele Xancho' ben' zo yoban' leczə' Xan beņə' güen žin ca'anə'. Na' lao Diozən' ben' zo yobanə' tozə can' zaquə' chio'o beņəch.

Naquan' cheyalə' goncho par nič de'e malən' cui gonən chio'o gan

¹⁰ Na'a ža beņə' bišə', cheyalə' gwčhincho fuers balor de'en chon Cristən' par yichjla'ažda'ochon', na' cheyalə' güe'echo latjə gaqualene' chio'o len yelə' guac xen che'enə'. ¹¹ Cheyalə' goncho yoguə'əlol can' chene'e Diozən' par nič socho chech cui šejle'echo che gwxiye'enə' catə'an chyljlažə'an naclən' gonən par əxoayaguən chio'o. ¹² Caguə chdiləlencho beņəch beņə' naquə belə'

chennə' sino que chdiləlencho de'e xio' ca', na' angl bzelayo ca', na' de'e ca' yeziquə'əchlə de'en chəsə'anabia' beṇə' mal ca' ža' yežlyo nga, beṇə' ca' chsa'aš lo'o de'e žcholən'. Chdiləlencho de'e mal ca' gan' chsa'ašən par niçh ca' cui šejle'echo chega'acquən. ¹³ De'e na'anə' cheyalə' goncho yoguə'əloł can' chene'e Diozən' par niçh soicho gwxiye'enə' len bichlə de'e mal ca' catə'an se'ene'en yesə'əgo'oyelə'an chio'o par goncho de'e malən'. Nach cheyalə' soteza socho cui šejle'echo chega'acquən. Na' šə goncho yoguə'əloł can' chene'e Diozən', saquə'əlebecho ca to soldad beṇə' noxə' spad che'enə' na' nyaze' xe' de'en naquə de'e ya par chcue'ejən le' catə' chdiləlene' beṇə' contr che' ca'. ¹⁴ Na' par niçh soczcho cui šejle'echo che gwxiye'enə' na' bichlə de'e mal ca', cheyalə' güe'echo por dižə' li. Na' de'en güe'echo dižə' lin' saquə'əleben ca dobey de'en chchej soldadən' l'sine'enə'. Na' cheyalə' goncho porzə de'e güen niçh gwcue'ejən chio'o ca xa soldadən' de'en naquə de ya chcue'ejən cho'alcho'enə'. ¹⁵ Leczə ca' cheyalə' sotezə socho šejle'echo che dižə' güen dižə' cobə de'en chzejni'in chio'o par zocho binlo len Diozən'. Na' šə sotezə socho šejle'echo chei, gwaquəlenzən chio'o socho probnid par tiləlencho gwxiye'enə' na' bichlə de'e mal ca' ca spat de'en nlej soldadən' chaclenən le'. ¹⁶ Pero na' de'en naquən de'e žialao xench ca biquə'əchlə de'en choncho, cheyalə' sotezə socho gonlilažə'əcho Diozən'. Na' ca de'en gonlilažə'əcho Diozən' gwaquəlenzən chio'o ca to escudo de'en chcue'ej soldadən' par niçh xis goxıtə' ca' de'en chsa'alə'əniṇ cui chəsə'əyidjən le'. Gwxiye'enə' bito gaquə co'on xbab mal lo'o yichjla'ažda'ochon' šə sotezə socho gonlilažə'əcho Diozən'. ¹⁷ Na' cheyalə' yosa'alažə'əcho de que Diozən' baçh bebeje' chio'o xni'a de'e malən'. Na' šə yosa'alažə'əcho de que babebeje' chio'o xni'a de'e malən' gaquəlenən chio'o ca to lapə' de ya de'en zo yichj soldadən' chaclenən le' niçh beṇə' contr che' ca' bito chso'one' le' gan. Na' leczə cheyalə' güe'echo xtižə' Diozən' de'en chzejni'i Spirit che'enə' chio'o. Na' de'en güe'echon gaquəlenən chio'o par niçh gwxiye'en cui soin chio'o, can' chaclen spad che soldadən' le' par chdiləlene' beṇə' contr che' ca'. ¹⁸ Do tyemp cheyalə' goncho orasyon lao Diozən' na' ṇabcho gaquəlene' chio'o can' chzejni'i Spirit che'enə' chio'o goncho. Cheyalə' gaccho beṇə' banlažə' par niçh goncho orasyonṇə' sin cui žjə'xaquə'əlažə'əcho, əṇabcho gaquəlen Diozən' yoguə' beṇə' ca' yela' bagwleje' par žjənaque' lažə' ne'enə'. ¹⁹ Na' leṇab gaquəlen Diozən' nada' par niçh əṇezda' bin' chayalə' əṇia' na' par niçh bito žeba' gua'a dižə' gwzejni'ida' beṇə' yoblə che Cristən', na' naquən to de'e güen de'e cobə de'en cui no gwṇeze antslə. ²⁰ Par niçh gua'a dižə' güen dižə' cobə na'anə' bselə' Diozən' nada' ca lgüe'e, na' por ni che de'e na'anə' zoa' nga naca' pres. De'e na'anə' leṇabe Diozən' gaquəlene' nada' par gua'a xtižə' Cristən' sin cui žeba' chedə' can' cheyalə' gua'annə'.

Apostol Pabən' btipe' lažə'əga'aque'

²¹ Na' par niçh əṇezele can' chac chia' na' bin' chona', əchselə'a beṇə' bišə'əda'ocho Tiquicon'. Le'enə' zotezə zoe' chone' can' cheyalə' gone' par chaclene' nada' chona' xšin Xancho Jesocristən'. ²² Echselə'ane' par niçh əgwzejni'ine' le'e əṇe' yoguə'əte can' chac cheto' ni, na' par niçh güe'e le'e balor.

²³ Beṇə' bišə', chonlilažə'əle Xancho Jesocristən' na' Xə' Diozən'. De'e na'anə' so'onšgue' par niçh yoguə'əle so cuezle binlo len xbab de'en yo'o lo'o yichjla'ažda'olen' na' so'onšgue' ca gaquəle che ljuežjle. ²⁴ Na' Diozən' sotezə soe' gaquəlenšgacze' yoguə' le'e chaquəle che Xancho Jesocristən' tozə can' chaquəle che'. De'e na'azən' chzoja' ṇa'a. *Pab*

Cart De'en Bzoj San Pabən' Par Beṇə' Filipos Ca'

Pabən' chzoje' beṇə' ca' ža' Filiposən' lao die' ližyan'

¹⁻² Nada' Pab chzoja' cart nga par le'e nitə'əle Filiposən' yoguə' le'e nacle lao na' Diozən' laogüe de'en ngodə'əle txen len Cristo Jeso'osən'. Na' leczə chzoja'an par le'e naquə' lao na'əle chgüia chyele yeziqwa'əchlə beṇə' ca' chso'onlilažə' Cristən' na' le'e nchojle nacle comisyon che le'e chonlilažə'əle Cristən' na'. Temtion' na' nada' chṇabto' sa'aclenšga Xacho Diozən' na' Xancho Jesocristən' le'e na' so'one' ca so cuezle binlo len xbab de'en yo'o lo'o yichjla'ažda'olen', neto' naquəto' beṇə' güen xšin Jesocristən'.

Pabən' chone' orasyon par beṇə' ca' chso'onlilažə' Cristən' Filiposən'

³ Batə'ətezə chona' xbab chele cho'a yelə' choxcwlen che Diozən' can' chonlen'. ⁴ Na' yoguə' las chebei la'ažda'ogua'anə' catə' chṇaba' gaquəlen Diozən' le'e. ⁵ Cho'a yelə' choxcwlen che' de que dezd catə'an gwzola chonlilažə'əle Jesocristən' xte ža neža, choncho txen par nič beṇə' zan se'ejle'e che dižə' güen dižə' cobə de'en chzejni'in che'enə'. ⁶ Diozən' bagwzolaogüe' chone' to de'e güen lo'o yichjla'ažda'olen'. Na' nežda' gwzoteze' goncze' ca' par nič babeyožən catə'an əžin ža yidə Jesocristən' de'e yoblə. ⁷ Na' naquəczən güen de'en nežda' gwzotezə Diozən' goncze' de'e güen lo'o yichjla'ažda'olen' chedə' chacchgüeida' chele. Diozən' nži'ilažə'e chio'o txen na' le'e chonle txen len nada' la'anə'əczə dia' ližya nga chsd chlo'ida' de que dižə' güen dižə' cobə de'en chzejni'in che Jesocristən' naquən de'e li, na' chona' par nič beṇə' zanch chso'onlilažə'ene'. ⁸ Nezcze Diozən' chacchgüeida' che yoguə'əle can' chaque Jesocristən' checho. ⁹ Na' chona' orasyon par le'e chṇaba' gonšgaczə Diozən' par nič šejəch gaquəchele che ljuežjle, na' gonšgue' le'e yelə' sin' par nič šejni'ile bin' chazlažə' Diozən' yoguə' las. ¹⁰ Gonšgue' ca' par nič gache'ile noquə'əṇṇə' naquə güenchgua gonle yoguə' laste nič yichjla'ažda'olen' gaquən xi'ilažə', na' cui bi dolə' gaple catə'an əžin ža yidə Cristən' yeto. ¹¹ Na' can' sotezə sole gonle de'e güen chedə' zo Jesocristən' chaclene' le'e. Na' šə sotezə socho goncho de'e güen, nachən' əyejləo Diozən' na' leczə əso'eləo beṇə' le'.

Pabən' cho'e dižə' de que naque' tozə len Cristən' de'en chi'yichje' tloazə de'en chene'e Cristən'

¹² Beṇə' bišə', che'enda' ənezele de'en dia' ližya nga beṇə' zan chso'ombi'e dižə' güen dižə' cobə de'en chzejni'in che Jesocristən'. ¹³ Yoguə' soldad ca' beṇə' ca' chsa'apə liž rein' bazjəneze' de que dia' ližya nga laogüe de'en əchyixjui'a xtižə' Cristən' na' beṇə' ža' doxenləo lao' syodan' bazjəneze'. ¹⁴ Na' casi yoguə' beṇə' bišə'əcho ca' bachsa'apəche' balor par chso'onlilažə'e Xancho Cristən' laogüe de'e bagwse'enene' de que bito chžeba' la'anə'əczə dia' ližya nga. Na' de'e na'anə' lega'aque' chso'eche' xtižə' Diozən' sin cui chəsə'əzebe'.

¹⁵ De'e li nitə' balə beṇə' do lažə'əga'aque' chso'one' güen chəsə'əyixjui'e xtižə' Cristən'. Pero yebale' caguə' do lažə'əga'aque'enə' chəsə'əyixjui'en, con chse'enene' yoso'ozenag beṇə' chəga'aque' cle ca' chia' nada'. ¹⁶ Beṇə' ca' chəsə'əgue'i nada' chəsə'əyixjui'e xtižə' Cristən' parzə nič əyejləoga'aque', caguə chəsə'əyixjui'en do lažə'əga'aque'enə'. Con chse'enene' so'one' par nič lechguəle de'e gaquəda' lao dia' ližya nga. ¹⁷ Beṇə' ca' chsa'aque'

chia' na' chsa'aque'ne' che Cristan' chasa'ayixjui'e xtiže'ena' do laža'aga'aque'. Zjənezene' de que Diozan' babe'e latja dia' ližya nga par chsed chlo'ida' de que diža' güen diža' cobə de'en chzejni'in che Jesocristan' naquan de'e li. ¹⁸ Nita' beṇə' chasa'ayixjui'e xtiža' Cristan' pero caguə do laža'aga'aque'. Na' nita' beṇə' yoblə chasa'ayixjui'en do laža'aga'aque'. Pero naquətezə chasa'ayixjui'e xtiža' Cristan' chebeida', na' bata'ətezəchlə gobeichzəda'.

¹⁹ Nezda' yechoja' güen len yoguə de'e ca' chac chia' cheda' chonle orasyon chia' na' chaclen Spirit che Jesocristan' nada' de'en leczə naquan Spirit che Diozan'. ²⁰ Na' de'en che'enchgüeida' na' zoa' lez yeyož gona' yoguə'əloj can' chene'e Diozan' nič cui gaquəda' zto' laogüe'ena', na' cui žeba' bitə'ətezə gaquə chia', šə socha' o šə gata'. Na' ca' sa'acbe'i beṇə' can' bagwsa'acbe'ine' bedote de que Cristan' naque' le'ezelaogüe beṇə' šao' beṇə' güen. ²¹ Quinga naquan len nada': Na'a mbana' naca' tozə len Cristan' na' chi' yičja' tlaozə de'en chene'ene', na' catə' gata' mbalazəchlə soa' len le'. ²² Šə socha' guaquə goncha' xšin Diozan' par nič so'ombia' beṇə' le'. Pero bito gaquə əṇia' non' naquəch güen, šə socha' o šə gata'. ²³⁻²⁴ Che'enda' žjəyzoa' len Cristan', la' lechguale mbalazəch soa' len le', pero le'e chyažjele socha' par gaquəlena' le'e. De'e na'anə' bito gaquə əṇia' šə güench socha' o šə güench gata'. ²⁵ Zoa' segor chyažjele socha' par gaquəlena' le'e na' de'e na'anə' nezda' socha' len le'e na' gona' par nič šejəch gonlilažə'əlene' na' sole mbalaz de'en chonlilažə'əlene'. ²⁶ Na' güe'ela'ochguale Cristo Jeso'osən' catə' babene' ca soa' len le'e de'e yoblə.

²⁷ Na' šə socha' len le'e o šə cui, legon byen legon can' cheyalə' goncho laogüe de'en bachzenagcho che diža' güen diža' cobə de'en chzejni'in che Cristan'. Legon par nič yenda' rson de que yoguə'əle nita'əczle chech chzenagle che Spirit che Diozan' na' yenda' de que tozə can' chon yoguə'əle xbab na' de que txen chonle xte ga zelao saque'ele par se'ejle'e beṇə' che diža' güen diža' cobə de'en chzejni'in che Cristan'. ²⁸ Legon par nič yenda' rson de que bito chžeble beṇə' contr chele ca' bitə'ətezə de'e chso'one' par choso'ošebe' le'e. Na' šə bito chžeble beṇə' ca' choso'ošebe' le'e gwsa'acbe'iljeine' de que Diozan' əgwnežjue' lega'aque' castigw zejlicane na' gone' par nič le'e cui yeyejle lao yi' gabilən'. Na' le'ena' gone' par nič cui žeble na' par nič əsa'acbe'ine' de'e ca'. ²⁹ De'en chaque Diozan' checho babsi'e xneze par nič chonlilažə'əcho Cristan' na' le'egatezə ca' de'en chaque Diozan' checho babsi'e xneze par nič chyi' chzaquə'əcho laogüe de'en cho'echo xtiža' Cristan'. ³⁰ Bable'ile can' boso'oči' boso'osaquə' beṇə' nada' antslə laogüe de'en chona' xšin Diozan' na' chenczele rson de que leczə can' chac chia' na'a. Na' can' chac chia' nada' leczə can' chac che le'e de'en leczə chonle xšin Diozan'.

2

Cristan' gwlejyichje' yoguə' de'e güen de'en de che' par bide' yežlyo nga, pero na'a naque' le'ezelaogüe beṇə' blaoch

¹ Cristan' chtipe' laža'əle. Chaque'ne' chele na' de'e na'anə' chebeile chzenagle che'. Nezczele bazo Spirit che Diozan' len le'e. Na' leczə bachon Cristan' par nič chaquele che ljuežjle na' cheyašə'aga'aque'lene'. ² De'e na'anə' chṇeyoida' le'e leqac tozə len ljuežjle. Na' le'e gaque che ljuežjle tole yetole na' tozə ca leqon yoguə'əle xbab. Legon ca' par nič lechguale yuebeida'. ³ Bito gonle ca gaquə güen che cuinze, na' nic gonle ca əso'elao beṇə' le'e. Bito gon cuinle xen. Na' tole leqon xbab güen che nota'ətezə can' chonle len beṇə' zjənaquəch beṇə'

blao ca le'e. ⁴ Na' to tole le'e yeyiljlažə' naclə gonle par niç gaquə güen che ljuežjle caguə che cuinzle.

⁵⁻⁷ Naquə yichjla'aždao' Cristo Jeso'osən' cayana'an naquə yichjla'aždao' Xe' Diozən' na' nape' yelə' gwnabia' na' yelə' bala'an tozəczə' can' napə' Xe'ena'. Pero bito que bchojyichj Cristo Jeso'osən' yelə' gwnabia' che'ena' na' yelə' bala'an che'ena'. Bchojyichje' de'e ca' par niç golje' goque' be'nach na' goque' ca nota'atezə be'nə' güen žin. Na' chio'o leczə cheyalə' goncho xbab ca xbabən' ben Cristo Jeso'osən'. ⁸ Bzenague' che Diozən', bzexjw yichje' be'e latjə gwso'ot be'nə' le' bos'o'ode'ene' le'e yag corozan' can' chso'one' len be'nə' ca' zjənaquə be'nə' mal juisy. ⁹ Na' de'en bsanlažə' cuine', Diozən' be'ene' yelə' bala'an xen mazəchlə ca de'en gotə' che' antslə. Na' Diozən' bito cho'e nota'atezəchlə be'nach o angl yelə' bala'an xen ca de'en be'e Cristo Jeso'osən'. Na' bene' par niç naque' le'eze-laogüe be'nə' blao. ¹⁰⁻¹¹ Bene' ca' par niç yoguə' be'nə' ža' yoban' na' be'nə' ža' yežlyo nga na' nochlə be'nə' bagwsa'at, na' len yoguə' angl ca' yesə'əzo xibga'aque' lao Cristo Jeso'osən' yesə'əne' de que naque' Xanga'aque'. Na' len yoguə' de'e xio' ca' na' angl bzelaο ca' yesə'əzo xibga'acquən laogüe'ena', yesə'ənan de que naque' Xanga'aquei. Na' Xacho Diozən' si'e yelə' bala'an catə'an gaquə ca'.

Chio'o chonlilažə'əcho Cristən' gwxaquə'əlebecho ca beljw de'en choso'ose'eni' lao naquə žčhol

¹² Na'a ža chacda' chele na' chebeida' de que chzenagczle che Diozən' catə'an zoa' len le'e. Na' chatə'əyoida' le'e gwzənagle che' mazəchlə na'a cui zoa' len le'e. Legon yoguə'əloł de'en chene'e Diozən' par niç la'alaən de que babebeje' le'e xni'a de'e malən', na' legonən do yichj do lažə'əle na' con cuido, la' nezczele Diozən' gone' chio'o castigw šə cui goncho can' chene'ene'. ¹³ Dioz na'ana' chocobe' xbab chelen' par niç chene'ele chonle de'e güen can' chazlaže'ena' na' leczə'ena' chaclene' le'e par niç chonlen.

¹⁴ Legon bitə'atezə əna Diozən' gonle sin cui əže'ešə'əle na' sin cui gaquəyožle. ¹⁵ Legon ca' par niç cui bi dolə' gaple na' cui bi de'e mal šo'o lo'o yichjla'ažda'olen'. Diozən' chene'ene' de que chio'o naccho xi'ine' bitobi de'e mal ta' əchen yichjla'ažda'ochon', la'anə'əczə yežlyo nga chdacho entr be'nə' ca' chso'on clelə na' be'nə' zjənaquə be'nə' mal juisy, na' de'e na'ana' gwxaquə'əlebecho ca beljw ca' de'en choso'ose'eni' lao naquə žčhol. ¹⁶ Na' legwzejni' be'nə' dižə' güen dižə' cobə de'en chzejni'in che Cristən' par niç se'ejle'e chei na' gata' yelə' mban zejlicane čega'aque'. Šə gonle ca' yebeida' le'e catə'an əžin ža yidə' Cristən' de'e yoblə, čedə' la' zejen de que bzenagle che de'en bsd blo'ida' le'e, caguə con bendada' xšin Diozən' bedote. ¹⁷ Le'e chebeile de'en chonlilažə'əle Cristən', na' nada' chebeida' de'en babi'a xtižə' Cristən' len le'e par niç chonlilažə'əlene'. Na' gwzocza' yebeida' len le'e la'anə'əczə šə so'ot be'nə' nada' por ni che de'en əchyixjui'a xtižə' Cristən'. ¹⁸ Le'egatezə ca' le'e yebei txen len nada'.

Temtion' na' Epafroditon'

¹⁹ Na' zoa' lez gon Xancho Jeso'osən' par niç yob gaquə selə'a Temtion' gan' zolen' par yeyo'e rson nac chac chele. Na' lechguale yeyacənlažə'a catə' bagwnežda' nac chac chele. ²⁰ Notoch no zo no əselə'a be'nə' gon xbab chele do yichj do laže'e ca' chon Temtion'. ²¹ Be'nə' yeziquə'əchlə zjəchi' yichjga'aque' bi de'en chse'ene'ne' gaquə čega'aque', na' bito zjəchi' yichjga'aque' əye'elao' Cristo Jeso'osən'. ²² Nezele can' bachon Temtion' güen yoguə' laste. Na' ca naquən' chona' par niç so'ombia'ach be'nə' dižə' güen dižə' cobə de'en

chzejni'in che Cristo Jeso'osən', chaclene' nada' can' chon to beṇə' len xē'.
 23 De'e na'anə' bagwleja'ane' par əselə'ane' gan' zolen' na' əselə'ane' lgüegwzə
 catə' bagotə'əbia' šə gochoja' ližyan' o šə cui. 24 Na' chonlilaža'a de que Xancho
 Cristo Jeso'osən' gone' par niçh lencza' nada' yob yida' gan' zolen'.

25 Pero na' por mientrzə chacda' chonən byen yoselə'a beṇə' bišə'əcho
 Epafroditon' par yeyede' gan' zolen'. Bselə'əlene' nga par goclene' nada',
 na' babene' txen len nada' ca naquə xšin Diozən' de'en bento' na' len yoguə'
 can' bagwdilə'ento' gwxiye'ena'. 26 Che'enchgüeine' yežagle de'e yoblə, chedə'
 zoe' trist de'en benele rson gocšenene'. 27 De'e li bašə gate', pero na' Diozən'
 beyašə' beži'ilaže'ene' na' bene' par niçh beyaquene'. Na' caguə Epafrodito
 na'azən' beyašə' beži'ilaže'e sino lencza' nada'anə' par niçh bito gotə'əch de'e
 soa' trist. 28 De'e na'anə' chosa'ane' yeyede' lgüegwzə par niçh ca' yebeile
 na' lencza' nada' cuitce soa' trist che le'e šə ca'. 29 Legon güen len le' catə'
 yele'e na' legwlo'ine' de que chebeichgüeine can' babene'ena', chedə' nacle
 txen chonlilažə'əle Xancho Cristo Jeso'osən'. Beṇə' ca' chso'on can' baben
 Epafroditon' zjəzaque'e par güe'ega'acchone' yelə' bala'an. 30 Epafroditon'
 bsanlažə' cuine' gate' par gone' xšin Cristən' de'en bselə'əlene' nga gone', na'
 de'e li gocšenchgüeine' xte yelatə'əzə cui gote'. Gocwlenchgüe' nada' can' gon
 le'e žalə' zole nga.

3

Can' goncho par gaccho beṇə' güen lao Diozən'

1 Na'a ža beṇə' bišə', nedech de'en ənia' le'e. Cheyalə' sotezə socho yebeicho
 chedə' ngodə'əcho txen len Xancho Cristən'. Bito chacda' zed chzoja' che de'en
 babzójca' antslə, chedə' chyažjele gonchle xbab chei. 2 Legapə cuidad niçh cui
 gwzenagle che beṇə' ca' chasə'əne' cheyalə' sole señy de'en ne' sirconsision.
 Lega'aque' lechgualə zjənaljəga'aque' na' chso'one' de'e mal. 3 Na' chio'o
 de to señy checho par nezecho naccho xi'in Dioz. Señyan' naquən ca de'en
 baben Diozən' chio'o Spirit che'enə' par chaclenən chio'o cho'ela'ochone'.
 Chebeicho de'en chonlilažə'əcho Cristo Jeso'osən' na' nezecho bito chyažjecho
 señy lao cuerp chechon' par gaccho xi'in Diozən'. 4-6 Nada' naca' beṇə'
 Izrael na' golja' lao dia che de'e Benjaminə' na' boso'ozoe' nada' señy che
 sirconsisionə' to xmanzəda'. Na' goljələna' dižə' ebreo laogüe de'en zjənaquə
 xaxna'a ca' beṇə' ebreo. Na' ca' naquə lei de'en bzoj de'e Moizezən', goca' txen
 len beṇə' fariseo ca' beṇə' ca' zjəchi'ichgua yichjə'aque' to to pont che lein'.
 Na' de'e tant gwche' yichja' che de'e ca' zjəšə'ənao beṇə' Izrael gwlaž'chia' ca'
 xte blagzejə blagzida' beṇə' ca' chso'onlilažə' Cristən'. Na' ca' naquə de'en na
 lein' cheyalə' goncho na' de'en nan cui goncho, bzenaga' che yoguə'ən xte ga
 zelao gwxaquə'əda'. Žalə' chacda' chebei Diozən' nada' por de'e ca', guaquə
 gona' xbab de que chebeichene' nada' mazəchlə can' chebeine' len beṇə' ca'
 yeziquə'əchlə. 7 Yoguə'ənnə' bəna' xbab əsa'aclenən nada' par niçh Diozən'
 yebeine' nada', pero na'a bachacbe'ida' bito gwsa'aclenən nada'. Na' benən
 byen gwleje'yichjə'aca'an par niçh benlilažə'a Cristən'. 8 De'en banombi'a
 Cristo Jeso'osən' ben' naquə Xana' zaquə'əchguan par nada'. De'e na'anə'
 bitoch bibi zjəzaquə' yoguə'əlo' de'e ca' goquəda' antslə əsa'aclenən nada'.
 De'en banombi'ane' na'anə' bagwnit yoguə' de'e ca' bebeida' antslə, na' na'a
 nona' lega'aquən ca to beb de'e gwcho'əna' par niçh gombi'acha'ane'. 9 Na'
 lecəzə nona' lega'aquən ca to beb de'e gwcho'əna' par niçh gachia' de que
 ngoda'a txen len Cristən'. Che'enda' əna Diozən' chia' de que naca' beṇə' güen

laogüe'enə'. Ene' ca' por ni che de'en chonlilaža'a Cristən', caguə por ni che de'en chona' complir bi de'en na lein'. ¹⁰ Che'enda' gombia'acha' Cristən', na' che'enda' yocobache' yichjla'aždaogua'anə'. De'en beyas bebane' ladjo beṇə' guat ca'anə' chac yocobe' yichjla'aždaogua'anə'. Na' che'enda' čhi' saca'a de'en chona' xšin Cristən' can' gwđi' gwxaque'enə' na' leczə che'enda' gacbe'ichda' bi zejen de'en ngoda'a t xen len le' catə'an gwso'ot beṇə' le'. ¹¹ Can' čho chbeza' na'a čhedə' lechguale che'enda' yolis yosban Diozən' nada' ladjo beṇə' guat ca' catə' bagota'.

Cho'elaža'a chona' par nič gaquə yichjla'ažda'ogua'an can' naquə yichjla'aždao' Cristo Jeso'osən'

¹² Bito əṇia' de que bač naquə yichjla'aždaogua'anə' can' che'enda' gaquən, la' bito ne'e gaquən can' naquə yichjla'aždao' Cristo Jeso'osən'. Pero na' cheyljəlaža'a naclə gona' par nič ca' gaquə yichjla'ažda'ogua'anə' can' naquə yichjla'aždao' Cristo Jeso'osən', la' par nan' gwleje' nada' naca' xi'ine'. ¹³ Beṇə' bišə' nezda' bitoṇə' gac yichjla'ažda'ogua' can' che'enda' gaquən, pero babchojyichja' yoguə'əloł de'en goquə de'e zaque'e par nada' antslə, len bi de'en bena', čhedə' bagocbe'ida' bitobi zjəzaquə'an. Na' tlaozə de'en čhi' yichja' na'a de'en čho'elaža'a chona' can' chene'e Diozən' par nič gaquə yichjla'ažda'ogua'anə' can' naquə yichjla'aždao' Cristo Jeso'osən'. ¹⁴ Zaquə'əchguan par nada' de'en gwlej Diozən' nada' par yežina' yoban' gan' zo'enə' laogüe de'en chonlilaža'a Cristo Jeso'osən'. Na' de'e na'anə' čho'elaža'a chona' can' čsa'azlaže'enə' par nič gon Diozən' ca gaquə yichjla'ažda'ogua'anə' can' naquə yichjla'aždao' Cristo Jeso'osən'.

¹⁵ Na' baltezcho šə bazda chaccho can' chene'e Cristən' gaccho cheyalə' cuejyichjcho de'e ca' goquecho zjənaquən de'e zaque'e par čio'o antslə na' cheyalə' cue' yichjcho par goncho ca gaquə yichjla'ažda'ochon' can' naquə yichjla'ažda'ogüe'enə'. Na' šə nole ne'e yo'ole bichlə xbab yoblə Diozən' gone' ca gacbe'ile. ¹⁶ Na' cheyalə' šejəchcho goncho can' babzejni'i Diozən' čio'o goncho.

¹⁷ Beṇə' bišə' yoguə'əle leḡon can' chona' nada', na' can' čso'on yez-iquə'əchlə beṇə' ca' bachso'on can' chonto'onə'. ¹⁸ De'e yoblə əṇia' le'e can' bagwnia' zan las antslə, de que nitə' beṇə' zan beṇə' čso'one' ca čhnezecho de'en čsa'aquene' bito bi zaquə'an de'en gwđixjw Cristən' xtolə'əchon' le'e yag corozən'. Chbeža' de'en nitə' beṇə' čso'on ca'. ¹⁹ Yesə'əbiayi' beṇə' ca' čhedə' la' lguə'a so'ela'ogüe'e Diozən' con čso'elaža' čse'ej čsa'ogüe' na' čso'one' bichlə de'en na cuerp čhega'aque'enə'. Chesya'əbeine' čso'one' de'en naquə de'e yelə' zto', na' zjəchi' yichjga'aque' tlaozə de'en chac yežlyo nga. ²⁰ Na' čio'o ža, bitoch choncho xbab de que yežlyo nga naquən lažcho, sino choncho xbabən' de que lažchon' naquən yoban' gan' za' Xancho Jesocristən' ben' babebej čio'o xni'a de'e malən' na' yide' nga de'e yoblə. ²¹ Na' catə'an yide'enə' gone' par nič cuerp čhecho de belə' čennə' yeyaquən to cuerp cobə de'en gaquə lechguale güen can' naquə cuerp che le'enə'. Gone' ca' čhedə' nape' yelə' guac par nič bitə'ətezə de'e zjədə yoso'ozenaguən čhe'.

4

Cheyalə' yebeicho de'en chonlilaža'əcho Xancho Jesocristən'

¹ Beṇə' bišə' dao', chacda' čhele na' che'enčgüeida' le'i lježjcho. Chebe-ichgüeida' de'en zotezə zole chonlilaža'əle Jesocristən', na' por le'e sočgua' mbalaz. De'e na'anə' gončhečhlaža'əšgacze gonlilaža'əle Xancho Jesocristən'.

² Na' chatə'əyoida' le' Ebodia na' le'cəzə ca' le' Sintique, lesošga binlo legon txen tole yetole chedə' choptele chonlilažə'əle Xancho'n'. ³ Na' le' Sinsigos, len' babeno' xšin Diozən' do yichj do lažo'o txen len nada', le'cəzə chneyoida' le' gaquəleno' beṇə' zanco Ebodian' na' Sintiquen' chedə' lega'aque' le'cəzə gwso'one' xšin Diozən' txen len nada' catə'an gwɔdixju'i'a dižə' güen dižə' cobə de'en chzejni'in che Jesocristan' gan' zolen'. Na' lenczə Clementən' na' yebalə beṇə' ljuežjcho ca' gwso'one' txen len nada'. Na' zjənyoj laga'aque'ena' le'e lib' che Diozən' gan' zjənyoj la yoguə' beṇə' bazjənapə yelə' mban zejlicane.

⁴ Le'e yebei do tyempte de'en chonlilažə'əle Xancho Jesocristan'. De'e yoblə əchnia', le'e yebei. ⁵ Legon par nich yoguə'əloḷ beṇə' yesə'əneze' de que nacle beṇə' gaxjwlažə' chedə' bazon yidə Xancho'n' de'e yoblə.

⁶ Bito gaquəle tola bitə'ətezə de'en chac chele. Legon orasyon lao Diozən' che yoguə' de'en chac na' nable yelə' chaclen che'ena' na' le'cəzə güe'elene' yelə' choxcwlen catə' bi de'en ənabelene'. ⁷ Šə gonle ca' Diozən' gaquəlene' le'e par so cuezle binlo len xbab de'en yo'o lo'o yichjla'ažda'olen' do tyempte xte ni que gache'ile bixchen' bazo chbezle ca'. Gaquəlene' le'e chedə' ngoda'əcho txen len Cristo Jeso'osan'.

Cue' yichjcho che de'e ca' zjənaquə de'e güen

⁸ Na' yeto' consejw de'en nga chona' le'e beṇə' bišə', cue' yichjle par güe'ele por dižə' li, par gonle ca beṇə' yoblə əsa'ape' le'e respet, par gonle de'e zda licha, na' par gonle de'e cui bi de'e mal nsa'. Cue' yichjle par gacle beṇə' šao', na' par gonle de'en zjəneze beṇə'chən' zjənaquən de'e güen. Bitə'ətezə de'e zaqu'e' lao Diozən' na' bitə'ətezə de'en chebei Diozən', che lega'aquənnə' cue' yichjle.

⁹ Bzenagle chia' catə' bzejni'ida' le'e bin' cheyalə' gonle, na' baben bable'iczele chona' ca'. Lesotezə leso legon can' bagwnia' le'e. Na' šə gonle ca', Dioz ben' chon par chzo chbezcho binlo len xbab de'en yo'o lo'o yichjla'ažda'ochon' sotezə soe' gaquəlene' le'e.

Can' gwsa'aclen beṇə' Filipos ca' Apostol Pabən'

¹⁰ Chebeichgüeida' lao Xancho Cristo Jeso'osan' de que de'e yoblə na'a bach blo'ile can' chonle xbab chia' ca de'en bselə'əle de'en goquəlen nada'. Na' nezda' chonczele xbab chia'anə', pero cuinə' gonən gaquəlenle nada' antslə.

¹¹ Na' chebeida' de'en bselə'əlenə', caguə por ni che de'e byažjda' bi de'en byažjda'. Diozən' babzejni'ine' nada' par nich zoa' mbalaz catə' de de'en chyažjda' na' catə' cui bi bi de. ¹² Yo'olaocza' yelə' yašə' yelə' zi', na' yo'olaocza' yelə' šao'. Diozən' babzejni'ine' nada' par zoa' mbalaz bitə'ətezə nac la'anə' catə' de de'e che'ej chaogua' o la'anə' catə' chdona', na' la'anə' catə' de bichlə de'en chyažjda' o catə' cui bi bi de. ¹³ Chac chona' bitə'ətezə de'e cheyalə' gona', chedə' ngoda'a txen len Cristən' ben' chon nada' fuers balor. ¹⁴ Pero ca naquən' goclenə' nada', naquən de'e güenchgua de'en chonle txen len nada' lao de'en chyi' chzaca'a.

¹⁵ Na' le'e nitə'əle Filiposən' nezele can' goquəlenle nada' catə'an bagoc to tyemp dao' bedə'tixjue'ida' le'e dižə' güen dižə' cobə de'en chzejni'in che Cristən' de'e neche, na' babenən byen beza'a Masedonian'. Caguə nochlə beṇə' ca' chesə'ədopə chesə'əžag par chso'elaogüe'e Cristən' gwso'on txen len nada' par yoso'oselə'e mech de'en gaquəlen nada', pero na' le'e bselə'əle de'en bchina'. ¹⁶ Na' caguə ca na'azən' bselə'əlen, le'cəzə bselə'əlen yeto chop las catə' gwzoa' Tesalonican' par bi de'en byažjda'. ¹⁷ Caguə de'e chzelažə'a bi de'en chonle nada' sino chzelažə'a gonchle de'e güen par nich Diozən' yebeichene' le'e. ¹⁸ Doxen de'en bselə'əle len Epafroditon' bach gwxi'an na'

bitoch bi bi chyažjda', de'e scha'o bade chia' ŋa'a. Na' de'en bseļə'ālen' gwxaquə'āleben ca to yal de'en chlā' zix de'e chzey bχozən' lao Diozən'. Diozən' chebeichgüeine' can' babenlen'. ¹⁹ Yo'o lao na' Diox chechon' yoguə'ālolte de'en de par əgwnežjue'en con non' chene'ene'. Na' gone' de'e güen juisy par nich gatə' yoguə'ālol de'e chyažjele, cheda' ngoda'āle txen len Cristo Jeso'osən'. ²⁰ Ledoye'elaoch Xacho Diozən' zejlicane. Can' gonšgaczcho.

Bzeine' lega'aque' dižə'

²¹ Le'e gguap diox yoguə'ālol beṇə' Filipos ca' beṇə' zjənaquə' lažə' na' Diozən' laogüe de'en zjəngode'e txen len Jesocristən'. Na' beṇə' bišə'əcho ca' nitə' txen len nada' nga choso'oguape' le'e diox. ²² Na' leczə' ca' yoguə' beṇə' Roma quinga beṇə' bagwlej Diozən' par zjənaque' lažə' ne'enə' choso'oguape' le'e diox, na' mazəchlə beṇə' ca' chso'on žin liž rein' choso'oguape' le'e diox.

²³ Xancho Jesocristən' sošgue' gaquəlenšgacze' le'e len xbab de'en yo'o lo'o yichjla'ažda'olen'. De'e na'azən' de'en chzoja' ŋa'a. *Pab*

Cart De'en Bzoj San Pabən' Par Beṇə' Colosas Ca'

Pabən' chzoje' beṇə' ca' chso'elao' Jesocristən' Colosasən'

¹⁻² Nada' Pab naca' apostol che Jesocristən' con can' gwnalažə' Diozən'. Nada' chzoja' le'e nitə'əle Colosasən' le'e banacle lažə' na' Diozən' laogüe de'en ngodə'əle txen len Cristən', chedə' txen len neto' naccho family che'enə'. Beṇə' bišə'əcho Temtion' na' nada' chṇabto' lao Xacho Diozən' sotezə soe' gaquäləṅgacze' le'e na' gonšgue' ca so cuezle binlo len xbab de'en yo'o lo'o yichjla'ažda'olen'.

Pabən' chone' orasyonə' par beṇə' ca' chso'onlilažə' Cristən' Colosasən'

³ Yoguə' las catə' chona' orasyon par le'e cho'a yelə' choxcwlen che Diozən' par le'e, Dioz ben' naquə Xa Xancho Jesocristən'. ⁴ Babenda' rson can' chonlilažə'əle Jesocristən' na' can' chaquele che yeziquə'əchlə beṇə' bagwlej Diozən' par zjənaque' lažə' ne'ena'. ⁵ Cho'a yelə' choxcwlen che Diozən' de que lenle zocho lez žjəyezochə len Diozən', can' gwyejini'ile catə'an gwzolao bzenagle che dižə' güen dižə' cobə che Jesocristən' de'en naquən de'e li. ⁶ Dižə' li che Jesocristən' de'en chzenagle chei bagosə'əlasən doxenlə na' beṇə' ca' choso'ozenag chei ga yoblə leczə chso'one' güen na' choso'ozejini'ine'en beṇə' yoblə can' chon le'e dezd žan' catə'an bzenaglen de'e nech na' gwnezele de que de'e li nži'ilažə' Diozən' le'e. ⁷ Epafras da'onə' bzejni'ine' le'e xtižə' Cristən' lgua'a nada'. Chone' xšin Cristən' can' chona' par chaclene' le'e na' zotezə zoe' chone' complir can' cheyalə' gone'. ⁸ Epafras na'anə' bagwne' nada' can' bāben Spirit che Diozən' par niç chaquele che ljuežjle na' chachteile chia'.

⁹ De'e na'anə' dezd catə'an gwnezdə' can' chonlen', yoguə' laste chona' orasyon lao Diozən' par le'e chṇaba' gon Spirit che'enə' le'e yoguə' claste yelə' sin' na' yelə' chejni'i par niç ca' ənezele tcho'a tšao' can' chene'ene' gonle. ¹⁰ Chṇaba' ənezele can' chene'ene' gonle par niç ca' šejəchle gonle can' cheyalə' gon chio'o nombi'əcho Xančon' na' gonle doxen can' chazlažə'ena', gonle yoguə' claste de'e güen, na' šejəch gombia'achle Diozən'. ¹¹ Na' chṇaba' gaquälən Diozən' le'e len yelə' guac xen che'enə' par niç gapple yelə' chxenlažə' na' sotezə sole gonlilažə'əlene' bitə'ətezə de'en chac na' sole mbalaz. Chṇaba' gaquälene' le'e ca' chedə' nape' le'ezelaogüe yelə' guac xen. ¹² Na' leczə güe'ele yelə' choxcwlen che Xacho Diozən' chedə' le'ena' bene' par niç txen len yeziquə'əchlə beṇə' ca' bagwleje' par zjənaque' lažə' ne'ena' gaquə žjəyezochə len le' gan' chey che'eni'ichgua. ¹³ Diozən' babebeje' chio'o xni'a gwxiye'ena' de'en chnabia' beṇə' ca' chsa'aš lo'o de'e žcholən' na' bene' par niç chnabia' Xi'ine' Jesocristən' chio'o ben' chaquene' chei. ¹⁴ Xi'ine' Jesocrist na'anə' gwdixjue' xtolə'əchon' par niç Diozən' chezi'ixene' checho.

Cristən' chozoe' chio'o binlo len Diozən'

¹⁵ Yichjla'aždao' Cristən' naquən cayanə'an naquə yichjla'aždao' Xe' Diozən' ben' cui no chle'i, na' tozə can' chso'one'. Bazoczə Cristən' catə'an cuiṇə' xe yežlyon', catə'an cuiṇə' nitə' angl ca' na' beṇəch ca', na' catə' cuiṇə' gatə' bitə'ətezə de'en zjəde. ¹⁶ Le'ena' bene' yoban' na' yežlyon' na' bene' beṇə' ža' yoban' na' beṇə' ža' yežlyon', na' bia yixə' ca', na' biquə'əchlə de'en zjəde yoban' na' yežlyon'. Bene' par niç zjəde de'e ca' chle'icho na' de'e ca' cui chle'icho. Bene' par niç nitə' angl əblao ca', nitə' spirit mal ca'

chəsə'anabia'an beṇə' ca' cui choso'ozenag che Diozən', nitə' de'e xio' na' nitə' biquə'əchlə de'e ca' zjənapə poder. Na' Crist nan' bene' par niçh nitə' de'e ca', na' nitə' beṇə' ca', niçh si'e yelə' bala'an. ¹⁷ Cristən' bazocze' catə'an cuiṇə' nitə' beṇəch, angl, bia yixə' na' biquə'əchlə de'en zjəde, na' noe' che to toe' zjənaque' can' zjənaque' na' to ton zjənaquən can' zjənaquən, chedə' Cristən' none' mendad par chac ca'. ¹⁸ Na' Crist na'anə' chnabi'e chio'o chdopə chzəgcho cho'ela'ochone' na' len' beṇə' chio'o yelə' mban zejlicanən'. Len' naque' beṇə' nech bebane' ladjo beṇə' guat ca' par chnabi'e na' de'e na'anə' naque' le'eze laogüe beṇə' blao na' chnabi'e yoguə'əlol beṇə' na' biquə'əchlə. ¹⁹ Diozən' chazlažə'e de que cayaṇə'an naquə yichjla'aždaogüe'enə' ca'aczən' naquə yichjla'aždao' Xi'ine' Cristən', cayaṇə'an naquə yelə' guac che Diozən' ca'aczən' naquə yelə' guac che Cristən', na' tozəczə can' chso'one'. ²⁰ Na' leczə chazlažə' Diozən' de que yoguə' beṇə' ža' yoban' na' beṇə' ža' yežlyo nga guac yesə'anite'e binlo len le' laogüe de'en blalj xchen Cristən' le'e yag corozən'.

²¹⁻²² Goccho beṇə' contr che Diozən' antslə por ni che xbab malən' de'en gwyo'o lo'o yichjla'ažda'ochon' na' por ni che de'e malən' bencho. Pero na'a Cristən' babozoe' chio'o binlo len Diozən' ca de'en bnežjw cuine' por ni checho catə'an gwso'ote'ene'ena'. Babozoe' chio'o binlo len Diozən' par niçh ca' gaccho beṇə' la'aždao' xi'ilažə' na' bito bi dolə' gapcho catə'an yežincho gan' zo Diozən' na' catə'an əche'e chio'o laogüe'ena', na' notono soi əgwcuış chio'o lao Diozən'. ²³ Na' yežincho laogüe'ena' sin cui bi dolə' napcho šə zotezə zocho chonlilažə'əcho Cristən', šə zocho len tozə xbab, na' šə zocho lez žjəyecho len Diozən' laogüe de'en babzenagcho che dižə' güen dižə' cobə che Cristən'. Dižə' güen dižə' cobə che' na'anə' bagosə' gwłaljən gatə'ətezə ža' beṇəchən' na' Dioz nan' gwleje' nada' Pab par niçh əchyixjui'an.

Pabən' chaclene' beṇə' ca' chesə'adopə chesə'əžag chso'elaogüe'e Cristən'

²⁴ Chebeida' la'anə'əczə chy'i' chzaca'a laogüe de'en əchyixjui'a xtižə' Cristən' len le'e cui nacle beṇə' Izrael, na' che'enda' gaquə chia' bichlə de'en ne'e chac falt par yeyož gaquəlena' le'e. Cristən' gwdi' gwxaque'e par goclene' chio'o chdopə chzəgcho cho'ela'ochone', chio'o gwxaquə'əlebecho ca cuerp che'ena', na' can' chac chia' par chaquəlena' le'e. ²⁵ Diozən' gwleje' nada' par chona' xšine'ena' entr le'e cui nacle beṇə' Izrael par niçh ca' gwzejni'ida' le'e doxen can' na xtiže'ena'. ²⁶ Dezd gwłalte de de'en bito no gwyejni'i can' na xtiže'ena' pero na'a babzejni'i Diozən' chio'o len, chio'o bagwleje' par naccho lažə' ne'ena'. ²⁷ Diozən' chene'ene' ənezecho de que lechgualə de'e güen juisy chone' len notə'ətezcho chonlilažə'əchone' la'anə'əczə cui naccho beṇə' Izrael. De'e na'anə' bachzejni'ine' chio'o de'en cui no gwneze antslə de que chio'o chonlilažə'əcho Cristən' ngodə'əcho txen len le' na' de'e na'anə' zocho lez žjəyecho len Diozən' gan' chey che'eni'ichgua.

²⁸ Cho'elento' yoguə'əlol beṇə' dižə' che Cristən' chatə'əyoiga'aqueto'one' par niçh yoso'ozenague' che' na' chzejni'iga'aqueto'one' naquən' ne'. Cho'eto' xtiže'en len yoguə' clas yelə' sin' par niçh ca' catə' yežincho lao Diozən' yoguə' beṇə' ca' boso'ozenag cheto' əsə'aque' cayaṇə'an chene'e Diozən' əsə'aque' laogüe de'en zjəngode'e txen len Cristən' can' ngodə' chio'o. ²⁹ Na' de'e na'anə' chonchgua' xte ga zelao chzaquə'əda' əchyixjui'a xtiže'ena' len doxen fuers balor de'en choṇ Cristən' nada'.

2

¹⁻² Na' che'enda' ənezele can' chona' xte ga zelao chzaquə'əda' par niçh əchtipa' lažə'əle na' lažə' beṇə' ca' nitə' Laodisean' na' yeziquə'əchlə beṇə' ca'

chso'onlilažə' Cristən' do na', beŋə' cuinə' gombi'aga'aca'. Chona' xte ga zelao chzaquə'ada' par niç yoguə'əle gaque che ljeužjle tole yetole na' par niç nezele tcho'a tšao' can' cheyalə' gonle xbab yogua' laste na' par niç šejni'ile che Cristən'. Cui no gwneze antslə de'en bachzejni'i Diozən' chio'o che Cristən'.³ Na' šə bin' chene'echo nezecho, doxen yelə' sin' na' yelə' chejni'i che Diozən' napə Cristən' len par chzejni'ine'en chio'o. ⁴ Echnia' ca' par niç cui no yopei le'e len dižə' yoblə par xoayagle. ⁵ La'anə'əczə bito zoa' na' len le'e, syempr chona' xbab chele na' chebeida' de'en chonle can' cheyalə' gonle na' zotezə zole chonlilažə'əle Cristən'.

⁶ De'e na'anə' con can' babsedle che Jesocristən' na' can' bachonlilažə'əlene' ca Xanle, con ca'ašgaczn' sotezə sole len le'. ⁷ Na' le'e sotezə leso legonlilažə' Cristən' can' babzejni'i Epafrasən' le'e par niç gacle ca to yag de'e chaz loina' zitjw na' chcha'ochguan. Na' le'e güe'echgua yelə' choxcwlen che Diozən' can' chaclene' le'e.

Cristən' babocobe' yichjla'ažda'ochon'

⁸ Le'e gapə cuidad par niç notono yesə'əxoayag le'e len xbab chega'acze' par naole de'en choso'osed choso'olo'ine'. Lega'aque' choso'osed choso'olo'ine' de'en cui bi zaquə' che costombr gol ca' de'en zjəde, che de'en ye'ej gacho, che ža ca' na' che cuerp chechon' lgua'a yoso'osed yoso'olo'ine' che Cristən'.

⁹ Cristən' lao goque' beŋə' belə' chen goc yichjla'aždaogüe'enə' doxen can' naquə yichjla'aždao' Diozən' na' ca'aczən' naque' na'a. Gwdape' yelə' guac cayanə'an napə Diozən' na' ca'aczən' nape'en na'a. Bene' tozəczə can' chon Diozən' na' ca'aczən' chone' na'a. ¹⁰ Na' Cristən' chnabi'ache' ca notə'ətezə angl əblao na' notə'ətezə de'e xio'. Na' chio'o laogüe de'en ngodə'əcho txen len Cristən' bitoch bi bi chyažjəchecho par so cuezcho binlo. ¹¹ Na' leczə de'en ngodə'əcho txen len le' zocho to seŋy de'en zejen ca seŋy de'en ne' sirconsionnə'. Bito naquən seŋy de'en bzo beŋə' lao cuerp chechon', sino de'en bagwlejyichjcho cuich chzenagcho che la'ažda'omalcho na'anə'. Cristən' babocobe' yichjla'ažda'ochon'. ¹² Na' ca de'en bagwchoacho nisən' zejen ca gotcho na' bgašə'əcho txen len Cristən' na' leczə zejen ca bolis bosban Diozən' chio'o ladjo beŋə' guat ca'. Diozən' bolis bosbane' Cristən' ladjo beŋə' guat ca', na' catə'an benlilažə'əchone' par bocobe' yichjla'ažda'ochon', canan' bene' par niç cuich naccho ca beŋə' guat. ¹³ Antslə gwxaquə'əlebecho ca beŋə' guat len yichjla'ažda'ochon' chedə' bito bzenagcho che Diozən', bzenagzechcho che la'ažda'omalchon'. Pero na' can' ben Diozən' par niç Cristən' bebane' ladjo beŋə' guat ca', leczə can' bocobe' yichjla'ažda'ochon' par niç cuich naccho ca beŋə' guat na' babezi'ixene' yoguə'əte xtolə'əchon'. ¹⁴ Diozən' bsele'e Cristən' gwdixjue' xtolə'əchon' le'e yag corozən' par niç cui si'icho castigw por ni che de'en cui bencho complir yoguə'əlol can' na lei che'enə' de'en nyojən'. De'e na'anə' lein' bitoch güe'en dižə' contr chio'o can' benən antslə. ¹⁵ Diozən' beque'e yelə' gwnabia' che angl bzelayo ca' na' de'e xio' ca' par niç cuich yesə'anabia'an chio'o. Blo'ine' beŋə'achən' de que banitə'an xni'enə' catə'an Cristən' gwdixjue' xtolə'əchon' le'e yag corozən'.

Cheyalə' cuec yichjcho de'e ca' zjəzaquə' len Diozən'

¹⁶ De'e na'anə' bito gwzenagle che beŋə' ca' chəsə'əna chonle de'e mal ca de'en bito naole costombr ca' de'en na lei de'en bzoj de'e Moizezən' na' bichlə costombr chega'aque'enə' de'en chəsə'əne' cheyalə' ye'ej gacho, o goncho lni, o can' goncho cats' naquə bio' che'en, o de'en cheyalə' gomba'ancho ža de'en chsa'aquene' naquən de'e žialao. ¹⁷ Diozən' bene' par niç de'e Moizezən' bzoje' che costombr ca' parzə niç bzejni'ine' chio'o latə' dao' che Cristən'

antslā ze'e yide'. Pero na'a babidā Cristān' na' costombr ca' bito zjāzaquā'ən can' zaquā' de'en nombi'acho Cristān'. ¹⁸ Nitā' beṇā' choso'osed choso'olo'ine' de que cheyalā' gon cuincho ca to de'e cui bi zaquā' na' cheyalā' güe'ela'ochō no angl na' goncho bichlā de'en chāsā'əne' besā'əle'idaogüe'ənā'. Bitō gwzenagle chēga'aque' catā' əse'e le'e de que cui chonle' can' cheyalā' gonle'. Con chso'on cuinga'aque' xen chedā' choso'ozenague' che la'ažda'omalga'aque'ənā'. ¹⁹ Lega'aque' bito zjāngode'e txen len Cristān' ben' chnabia' chio'o chdopā chžagcho cho'ela'ochone'. Pero chio'o chdopā chžagcho cho'ela'ochone' ngodā'əcho txen len le' na' len ljuēžjcho ca' ca to to part che cuerp chechon' ngodā'ən txen len bečj bnīa' ca'. Na' de'en ngodā'əcho txen len Cristān' Diozān' chaclene' chio'o par ničh chaquā'chcho beṇā' šao' beṇā' güen.

²⁰ Ca naquān' ngodā'əcho txen len Cristān' catā'ən gote', bito cheyalā' cue'ech yichjcho che costombr de'en zjāsā'ənao beṇā' ca' cui choso'ozenag che Diozān', costombr che de'en ye'ej gaocho, che ža ca' na' che cuerp chechon'. La' chio'o bitoch naccho txen len beṇā' ca' cui choso'ozenag che Diozān' na' de'e na'anā' bito cheyalā' goncho can' chso'one'ənā'. ²¹ De'e na'anā' bito gwzenagle che beṇā' ca' chāsā'əna: "Bitō goxā'əle de'e nga, bito ye'ej gaole de'e na', na' bito canle de'en yeto." ²² Costombr ca' za'aquān che beṇā'chən', la' yoguā' de'e ca' de'en chāsā'əne' cui goxā'əcho, cui ye'ej gaocho na' cui cancho, de'en chčhinchon chāsā'əde chei. ²³ Chsa'aque beṇā' de que costombr ca' zjānaquān de'e sin'. Len de'e chsa'aljlažā' beṇā'ch ə'azānā' par chse'ejni'alažē'e angl ca' na' par chso'on cuinga'aque' ca to de'e cui bi zaquā' na' par chāsā'əžaglaogüe' len cuerp chega'aque'ənā', pero bito sa'aclenān chio'o par ničh cui əgwzenagcho che la'ažda'omalchon'.

3

¹ Can' bolis bosban Diozān' Cristān' ladjo beṇā' guat ca', lecžā can' babocobe' yichjla'ažda'ochon'. De'e na'anā' cheyalā' cuēc yichjcho che de'e ca' zjānaquā de'e zaque'e gan' zo Cristān' chnabi'e txen len Diozān'. ² Cheyalā' cue' yichjcho che de'e ca' zjāzaque'e len Diozān' caguā de'e ca' zjāzaque'e len beṇā'chən'. ³ Bagwlejjichjcho cuich chzenagcho che la'ažda'omalchon' na' mbancho par goncho can' chene'e Diozān'. Na' zocho txen len Diozān' laogüe de'en ngodā'əcho txen len Cristān' la'aṇā'əczā cui chsa'acbe'i beṇā'. ⁴ De yelā' mban checho zejlicane chedā' chonjilažā'əcho Cristān' na' Cristān' zotežā zoe' len chio'o. Na' catā' yide' de'e yoblā gone' par ničh yichjla'ažda'ochon' yeyož gaquan ca yichjla'aždaogüe'ənā' na' gone' par ničh cuerp chechon' yeyaquān to cuerp cobā de'en gaquā lechguale güen can' naquā cuerp che le'ənā'.

Can' bencho antslā na' can' cheyalā' goncho na'a

⁵ Na' laogüe de'en babocobe' yichjla'ažda'ochon', cheyalā' cuejjichjcho de'e mal ca' de'en chene'e la'ažda'omalchon' goncho žlac zocho yežlyo nga. Bitō co'o xtocho nic cuejjichjcho no'ol checho o be'en checho par solencho beṇā' yoblā. Bitō goncho bichlā de'e yelā' zto'. Bitō yebeicho bitā'ətezā de'en naquā de'e yelā' zto'. Bitō selažā'əcho goncho bitā'ətezā de'e mal. Na' bitō selažā'əcho de'e zan de'e gatā' checho, chedā' tozəczā ca mal naquān len de'en chso'on beṇā' chse'ejni'alažē'e lguā' lsaquā'. ⁶ Gwžin ža catā' Diozān' gone' castigw zejlicane che beṇā' ca' chso'ela'ozeche' chso'one' de'e mal ca' zjānac ca'. ⁷ Antslā gwdacze benle de'e malān' ca de'e ca' bagwni'ənā'. ⁸ Pero na'a cheyalā' cuejjichjle yoguā' de'e mal ca'. Bitō əžā'a ljuēžjle na' bito locle. Bitō gaquāxi'i ljuēžjle, bito gwžia əgwgnitā' ljuēžjle, na' bito güe'ele dižā' zban. ⁹ Bitō güe'ele dižā' güenlažā' len ljuēžjle. Bitoch gonle de'e ca' chedā' bagwzolao chbejjichjle cuich

chzenagle che la'azda'omallen' len de'e mal ca' de'en nan gonle. ¹⁰ Diozən' ben' ben yoguə'əcho babocobe' yichjla'ažda'ochon', na' chzejni'ine' chio'o par nič zda chaquəch yichjla'ažda'ochon' can' naquə yichjla'aždaogüe'enə'. ¹¹ Bitobi nonən par len Diozən' šə naccho beṇə' Izrael o šə so naccho beṇə' Izrael. Bitobi nonən par le' šə zocho señy de'en ne' sirconsui o šə cui zochon. Na' leczə bitobi nonən par le' šə naccho beṇə' zita' la'anə'əczə šə za'acho yež de'e lechguale ne'e naquə serrado. Na' le'egatezə ca' bitobi nonən par le' šə naccho esclabos o šə cui naccho esclabos. De'en naquə de'e žialao xen, gonjilažə'əcho Cristən'. Na' notə'ətezə naccho šə bachonjilažə'əchone' ngoda'əcho txen len le'.

¹² Diozən' bagwleje' chio'o par naccho lažə' ne'enə' na' chaquene' checho. De'e na'anə' legon can' cheyalə' gon chio'o bagwlej Diozən' par naccho xi'ine'. Le'e yeyašə' leyeži'ilažə' ljuējzle na' legon güen len ljuējzle. Bito gon cuinle xen. Le'e gac beṇə' gaɣjwlažə', na' le'e gapə yelə' chxenlažə' len ljuējzle. ¹³ Na' le'e gwde ca'alə šə bi chac chele entr tole yetole, na' le'e yezi'ixen che ljuējzle šə chaquele bi babenene' le'e. Con can' babezi'ixen Cristən' checho ca'aczən' cheyalə' yezi'ixencho che ljuējzcho. ¹⁴ Na' de'en naquəch de'e žialao xench lao yoguə' de'e ca', cheyalə' gaque che ljuējzcho chedə' šə chaquecho che ljuējzcho nachən' leczə goncho bitə'ətezəchlə de'en chene'e Diozən' goncho. ¹⁵ Diozən' gwleje' chio'o par so cuzcho binlo len xbab de'en yo'o lo'o yichjla'ažda'ochon' na' par socho binlo len ljuējzchon'. De'e na'anə' legon ca' gaqualen Diozən' le'e so cuzle ca', la' yoguə' chio'o chonjilažə'əcho Cristən' banaccho ca tozə family. Na' le'e güe' yelə' choɣcwlen che Diozən' can' chaclene' le'e.

¹⁶ Lesotezə leso legon xbab che de'e ca' babzejni'i Cristən' chio'o. Le'e gwzejni'i beṇə' ljuējzle ca' na' le'e gatə'əyoiga'aque' len yoguə' clas yelə' sin' par yoso'ozenague' che Cristən'. Legol no salmos na' no imnos, na' bichlə de'en na Spirit che Diozən' gollə, güe'ele yelə' choɣcwlen che' lo'o yichjla'ažda'olen' can' chaclen Xancho' le'e. ¹⁷ Na' bitə'ətezə de'e gonle na' bitə'ətezə dižə'an güe'ele, legonən na' le'e güe'en par nič Xancho Jeso'osən' si'e yelə' bala'an. Na' do tyempte güe'ele yelə' choɣcwlen che Xacho Diozən' can' chaclen Xancho Jeso'osən' le'e.

Quingan' cheyalə' gon chio'o babocobə Diozən' yichjla'ažda'ochon'

¹⁸ Le'e no'olə le'e nšagna'ale, le'e gwzenag che be'en che to tole can' cheyalə' gon chio'o chonjilažə'əcho Xancho Cristən'. ¹⁹ Na' le'e beṇə' byo le'e nšagna'ale, legaue che no'ol che to tole na' bito gonle znia len lega'aque'. ²⁰ Na' le'e bi'i xcuidə', le'e gwzenag che xaxna'ale yoguə'alol bin' se'e le'e, chedə' can' chazlažə' Xancho' gonle. ²¹ Na' le'e nacle xaxna' bi'i xcuidə', bito con gonle ca yesə'əža'a yesə'əlocbo', la' šə gonle ca' bitobi de gost nitə'əbo' na' bitoch yoso'ozenagbo' chele. ²² Na' le'e nacle mos, cheyalə' əgwzenagle yoguə'alol can' na xan žinnə'. Bito gonleile xan žinnə' gonlizle ca beṇə' chonchgua žinnə' catə'əzən' chgüie' le'e. Pero le'e do yichj do lažə'ale legon žinnə' laogüe de'e chaple Diozən' respet na' cui chene'ele əže'e le'e. ²³ Na' bitə'ətezə de'en gonle, gonlen do yichj do lažə'ale par nič yebei Xancho Cristən' le'e, caguə par nič yebei xan žin na'əzənə'. ²⁴ Legon ca' chedə' nezczele de que Xancho Cristən' gone' par nič chio'o choncho can' chazlažə'enə' yežincho gan' zoe'enə'. Na' de'en gone' par nič yežincho gan' zoe'enə' zaquə'əchən ca laxjwchon'. ²⁵ Na' notə'ətezə zjənaquə beṇə' ca' chso'on de'e malən', Xancho' əgwnežjue' castigw che to toga'aque' segon naquən' gwsone'.

4

1 Na' le'e xan žin, legon güen len beṇə' ca' chso'on xšinlen', cheda' nezele leza zo Xanle ben' zo yoban'.

2 Legac beṇə' banlažə' par nič sotezə sole gonle orasyon, gü'e'ele yełə' choxcwlen che Diozən' can' chaclene' le'e. 3 Na' lenabe Diozən' gone' par nič gazuə latjə güe'elencha' beṇə' xtiž'e'ena' nič yesə'əneze' de'en cui no gwneze antslə che Cristən'. La' por ni che de'en bi'a xtižə' Crist na'anə' dia' ližya nga. 4 Lenabe Diozən' əgwzejni'ine' nada' nič ənežda' naquən' yapəga'aca'ane' par nič se'ejni'ine'en.

5 Na' žlac na'a ne'e de tyemp par gonlen, legon güen len beṇə' ca' cui zjənaquə txen len chio'o can' chejni'ile cheyalə' goncho. 6 Legüe' dižə' šao' dižə' güen na' dižə' de'en naquə de'e zaque'e yoguə' laste. Na' legon xbab par nič ənezele naclən' cheyalə' yoži'ile xtižə' to to beṇə'.

Chguape' beṇə' migw che' ca' diox

7 Tiquicon' əne' le'e yoguə'əlol can' chac chia'. Le' naque' beṇə' bišə'əcho na' chacda' che'. Zotezə zoe' chone' complir can' cheyalə' gone' par chaclene' nada' chona' xšin Xancho Cristən'. 8 Echselə'ane' par nič ənezele can' chac chia' na' par nič əgwtipe' lažə'əle. 9 Na' txen len le' choselə'a beṇə' bišə'əcho Onesimon' ben' naquə beṇə' gwlaž chele na' ben' chaquecho chei. Lenczə le' zotezə zoe' chone' complir can' cheyalə' gone'. Echselə'aga'aca'ane' par nič yesə'əne' le'e yoguə' de'en chonto' nga.

10 Aristarcon' ben' de ližya nga len nada' chguape' le'e diox. Na' Marcos beṇə' sobrin che Bernaben' leczə chguape' le'e diox. Bagwnia' can' cheyalə' gonle güen len Marcosən' catə' le'e gan' zolen'. 11 Na' Jeso'os ben' zjənsi'e josto leczə chguape' le'e diox. Caguə nochlə beṇə' Izrael chsa'aclene' nada' len de'en chona' par nič nabia' Diozən' beṇə' zanch sino beṇə' ca' šonžə. Na' zocha' mbalaz laogüe de'e chsa'aclene' nada'. 12 Nach leczə beṇə' gwlaž chele Epafrasən' ben' chon xšin Cristən' chguape' le'e diox. Yoguə' laste catə' chone' orasyonnə' chṇabchgüe' əgwzejni'i Diozən' le'e yoguə'əlol de'en chene'ene' gonle na' par nič yeyož gonlen na' gacle cayanə'an chene'e Diozən' gacle. 13 Che'enda' ənezele can' chonchgüe' orasyon par le'e chončilažə'əle Cristən' Colosas, Laodisea na' Ierapolis. 14 Na' lenczə Locas ben' naquə beṇə' güen rmech ben' chacda' chei chguape' le'e diox na' leczə' ca' Demasən' chguape' le'e diox.

15 Le'e gguapšga diox beṇə' bišə'əcho ca' ža' Laodisean', len Ninfas na' beṇə' ca' chesə'ədopə chesə'əžag chso'elaogüe'e Diozən' liž'e'ena'. 16 Na' cata' yeyož gwlabl cart nga, əgwnežjwlen beṇə' ca' chesə'ədopə chesə'əžag chso'elaogüe'e Diozən' Laodisean' par nič yoso'olabe'en. Na' leczə le'e gwlab cartən' de'en bselə'a par beṇə' Laodisea ca'. 17 Na' le'e ye' Arquipon' de que chneyoida'ane' gone' seguir len xšin Diozən' de'en chone'ena' par nič yeyož gone' yoguə'əlol de'en gwlej Xancho Cristən' le' gone'.

18 Part dao' che cart nga nada' Pab chzoja'an cuincza'. Bito ganlažə'əle can' dia' ližya nga. Diozən' sošgue' gaquəlenšgacze' le'e. De'e na'azə chzoja' na'a. Pab

Cart Nech De'en Bzoj San Pabən' Par Beṇə' Tesalonica Ca'

Pabən' len beṇə' l'juežje' ca' boso'ozoje' beṇə' ca' chso'elaogüe'e Jesocrisṭən'

¹ Nada' Pab chzoja' le'e nitə'əle Tesalonican', le'e chdopə chžagle cho'ela'ole Xacho Diozən' na' Xancho Jesocrisṭən' laogüe de'en ngodə'əle t xen len lega'aque'. Na' nada' lena' Silbano na' Temtion' chṇabto' lao Xacho Diozən' na' lao Xancho Jesocrisṭən' əsa'aclene' le'e na' so'one' ca so cuezle binlo len xbab de'en yo'o lo'o yichjla'ažda'olen'.

Besə'əloe' beṇə' Tesalonica ca' de que chso'onlilažə'e Jesocrisṭən'

² Yogua' laste catə' chonto' orasyon cho'eto' yelə' choxcwlen che Diozən' par yoguə'əle, na' chṇabto' gaqualene' le'e. ³ Na' catə' chonto' orasyon lao Xacho Diozən' chjsa'alažə'əczəto' yoguə'əlo' de'e güen de'en chonle laogüe de'en chonlilažə'əle Diozən' na' chaquele che'. Na' chjsa'alažə'əczəto' can' chgo'o chchejlažə'əle catə'an chzaquə'əzi' chzaquə'əyašə'əle cheda' zole lez yidə Xancho Jesocrisṭən' yeto. ⁴ Nezetə' beṇə' bišə', de que Diozən' chaquene' chele na' bagwleje' le'e par nacle xi'ine'. ⁵ Na' Spirit che Diozən' goclenən le'e len yelə' guac chein' par niç gwnezele de que dižə' güen dižə' cobə de'en bzejni'ito' le'e che Jesocrisṭən' naquən de'e li. Caguə naquən con to dižə'. Na' nezele can' bentezə bento' de'e güen entr le'e par niç goclento' le'e.

⁶ Na' le'e zole chonle can' bento' na' can' ben Xancho Jesocrisṭən'. Na' Spirit che Diozən' chonən ca chebeile la'anə'əczə de'e zan de'e bagwdi' bagwx-aquə'əle por ni che de'en babzenagle de'en gwdixjue'ito' le'e che Jesocrisṭən'. ⁷ Beṇə' ca' chso'onlilažə' Jesocrisṭən' Masedonian' na' Acayan' bazjəneze' can' chonle na' de'e na'anə' zjəneze' naquən cheyalə' so'one'. ⁸ Babenle ca zjəneze beṇə' che Xancho Jesocrisṭən' chedə' doxenlən' banasə' nlažən, caguə Masedonian' na' caguə Acaya na'azən'. Na' le'egatezə ca' yoguə'əzə beṇə' bazjəneze' can' chonlilažə'əle Diozən', na' de'e nan' bitoch bi de ənato' chele. ⁹ Na' beṇə' zan chso'e dižə' ca güennə' benle len neto' catə'an bedalanə'əto' le'e na' can' goquə gwzolo' chonlilažə'əle Diozən'. Bagwlejyichjle cuich chejni'alažə'əle lguə'a lsaquə' chele ca' na' na'a bachonlilažə'əle Diozən', na' bacho'ela'ole Diozən' ben' zo zejlicane. Len' zaquə' par güe'ela'ocho. ¹⁰ Na' chso'e dižə' can' chbezle əchoj Xi'ine' Jeso'osən' yoban' yide' yežlyo nga yetlas, be'en bosban Diozən' ladjo beṇə' guat ca'. Na' de'en chonlilažə'əcho Jeso'osən', Diozən' bito gone' chio'o castigw catə'an əžin ža gone' castigw zejlicane che beṇə' ca' cui chso'onlilažə' Jeso'osən'.

2

Xšin Diozən' de'e ben Pabən' Tesalonican'

¹ Le'e nezele beṇə' bišə', catə'an bedalanə'əto' le'e na' gwdixjue'ito' le'e dižə' güen dižə' cobə che Diozən' zochgua yelə' guac che'enə' len neto'. ² Nezele can' gwdi' gwxaquə'əto' Filiposən', can' boso'ožia boso'onitə' beṇə' ca' neto' lao gwdixjue'ito' che Jesocrisṭən'. Pero na' Diozən' bene' ca cui bzebtə' gwdixjue'ito' le'e dižə' güen dižə' cobə che'enə' la'anə'əczə de'e zan de'e besə'əžon par chixjue'eto'on. ³ De'en chatə'əyoito' le'e gwzenagle che Diozən', bito nacho chonto' clelə na' nic chzelažə'əto' gonto' bi de'e mal, na' nic chene'eto' əxoayagto' le'e. ⁴ Diozən' neze' de que zotezə zoto' chzenagto' che',

na' de'e na'anə' gwleje' neto' par chyixjue'eto' dižə' güen dižə' cobə che'enə'. Ca' chaquən' chzeneto'on le'e. Chyixjue'ito'on le'e caguə par niç yebei beṇə' de'en chonto' na'anə', sino par niç yebei Diozən' can' chonto'onə'. Le' nezene' yoguə'əte xbab de'en yo'o lo'o yichjla'ažda'ochon'. ⁵ Nezele can' chonto', ni šlinzə cuiṇə' gwpeito' le'e len dižə' de'en cho'eto'onə', na' niqenə' xoayagto' le'e par niç goṇle' neto' bi de'en de chele. Cuiṇ Diozən' nezene' de que can' naquən. ⁶ Na' nic chyiljlažə'əto' naclə gonto' par niç əso'elao' beṇə' neto'. Ni que əṇacho chene'eto' par niç le'e güe'ela'ole neto', na' nic chene'eto' yeziquə'əchla beṇə' əso'ela'ogüe' neto'. Zaquə'əto' par gonto' ca gwzenagle cheto' la fuers por ni che de'en bselə' Cristən' neto' par cho'eto' xtižə'enə', pero bito chonto' ca gwzenagle cheto' la fuers. ⁷ Nži'ito' le'e cacza nži'i to no'olə xi'ine' bi'i chosgol chosča'ogüe'. ⁸ Na' de'en chaqueto' chele, cho'elento' le'e dižə' güen dižə' cobə che Diozən'. Na' caguə de'e na'azən' chonto', sino leczə chsanlažə' cuinto' chonto' xte ga zelao chzaque'eto' par chaclento' le'e chedə' chaqueto' chele. ⁹ Za'alazə'əczle beṇə' bišə', catə'an gwzoto' len le'e lechguəle bento' žin xte jxəque'eto' par ben cuinto' mantener. Bento' žin teža na' do še'elə par niç cui bi gast əbzoto' le'e. Can' bento' gwduxjue'ito' le'e dižə' güen dižə' cobə che Diozən'.

¹⁰ Txenczən' nacle len Diozən' nezele ca güenə' bento' catə'an gwzolento' le'e chonlilažə'əle Jesocristən'. Benzəto' con can' chazlažə' Diozən'. Bento' par niç ni to cui no gwna de que napəto' dolə'. ¹¹ Nezele can' gotə'əyoito' le'e gwzenagle che Diozən' na' can' əbtipto' lažə' to tole can' chon to beṇə' byo len xi'ine'. ¹² Bento' mendad de que gonšgacze de'e güen can' cheyalə' gon chio'o bagwlej Diozən' par nabi'e chio'o na' par goṇe' chio'o yelə' bala'an.

¹³ Bito chbezəto' cho'eto' yelə' choxcwlen che Diozən' can' bzenagle xtižə'enə' catə'an gwduxjue'ito'on le'e. Zache'iczele bito naquən xtižə' beṇə'chən' sino naquən dižə' de'en chon Diozən' par cho'eto'. Na' de'en gwyejle'ele xtižə' Dioz na'anə' chša'an xbab de'en yo'o lo'o yichjla'ažda'olen'. ¹⁴ Beṇə' bišə', le'e bagoc chele can' goc che beṇə' ca' chəsə'ədoṇə chəsə'əžag cho'elaogüe'e Jesocristən' zan part Jodean', beṇə' ca' chso'onlilažə' Jesocristən' ca chio'o chonlilažə'əchone'. Na' le'egatezə ca' baboso'ochi' boso'osaquə' beṇə' Izrael ca' beṇə' gwlaž chega'aque' ca' chso'onlilažə' Jesocristən', na' can' boso'ochi' boso'osaquə' beṇə' gwlaž chele ca' le'e. ¹⁵ Beṇə' Izrael ca'anə' gwso'ote' Xancho Jeso'osən' can' gwso'ote' beṇə' ca' gwso'elene' lega'aque' xtižə' Diozən' cana'. Na' leczə can' gwso'one' boso'olagzejə boso'olagzide' neto'. Na' xte ža neža por de'e cui chazlažə' Diozən' chso'one', na' leczə chso'one' contr yoguə'əlol beṇə'chən'. ¹⁶ Beṇə' Izrael ca' choso'ožone' əgwzejni'ito' beṇə' cui zjənaquə' beṇə' Izrael bi de'en cheyalə' goncho par niç cui yeyejcho lao yi' gabilən'. Can' chso'one' de'e na'anə' do tyemp choso'ozanch xtolə'əga'aque'enə'. Bagwchoglaio Diozən' chega'aque' de que zejlicane yesə'əzi'e castigon'.

Pabən' gone'ene' žjezlane'e beṇə' ca' nita' Tesalonican'

¹⁷⁻¹⁸ Na' neto' beṇə' bišə', bachacchgüeito' chedə' bitochəṇə' le'i lježjcho, pero chonto' xbab chele. Nada' Pab zan las go'onda' delaṇə'a le'e, na' bchoj catə' beyiljlažə'əto' naclə gonto' par niç yežagcho de'e yobla. Pero catə' gone'eto' yidəto' par delaṇə'əto' le'e, Satanəsən' de'en chnabia' de'e xio' ca' bito be'en latjə. ¹⁹ Zoto' lez sotezə sole gonlilažə'əle Xancho Jesocristən'. Na' leczə chebeito' can' chonlilažə'əlene' na'a. Na' catə'an yide' yeto, soto' mbalaz güe'eto' dižə' can' chonlen'. ²⁰ Le'e chonle ca si'ito' yelə' bala'an na' le'e chonle ca zoto' mbalaz.

3

1-2 Na' cuich bchejeto' laogüe de'en cui chle'i ljuežjchon'. De'e na'anə' bselə'ato' beṇə' bišə'əcho Temtion' gan' zolenə' na' bega'an netəzəto' Ate-nas nga. Temtion' naque' beṇə' güen xšin Diozən' na' chone' txen len neto' chyixjue'eto' dižə' güen dižə' cobə de'en chzejni'in beṇə' che Cristən'. Bselə'ato'one' btipache' lažə'əle na' bedəyene' ca benlilažə'əchle Cristən'. 3 Bselə'ato'one' gan' zolenə' par ničh ni tole cui gaquəžejlažə'əle bixčhen' chy'i chzaquə'əle, chedə' la' baṇezele Diozən' nsi'e xneze techo yelə' yašə' yelə' zi' yežlyo nga. 4 Catə'an gwzolento' le'e antslə bzeneto' le'e de que yoso'ochi' yoso'osaquə' beṇə' chio'o. Na' nezele de que bachac can' gwnato'onə'. 5 Na' laogüe cuich chchejda' de'en cuichənə' le'i ljuežjcho, bselə'a Temtion' gan' zolenə' par ničh gwnežda' šə zdaczle chonlilažə'əle Cristən'. Go'onnda' ənežda' šə bagwzoi gwxyie'enə' bxoayaguən le'e. La' šə babxoayaguən le'e, bendadto' xšin Dioz na'anə' entr le'e šə ca'.

6 Beyacxenlaza'əteto' catə' belə' Temtion' de'en bide' gan' zolenə'. Bedəyzejni'ine' neto' ca güenə' chonle chonlilažə'əle Cristən' na' chaquele che yoguə'əloj beṇə'. Na' leczə gwne' can' chi' yichjle neto' na' can' zelažə'əle yežagcho de'e yoblə leczə can' chene'e neto'. 7 Ca'aczən' beṇə' bišə', ne'e chžaglaoto' na' ne'e chyi' chzaquə'əto' pero babeyondiplažə'əto' gwnežeto' de que zotezə zole chonlilažə'əle Cristən'. 8 De'e li' babeyacxenlaza'əto' na' zoto' mbalaz de'en zotezə zole chonlilažə'əle Xancho Cristən'. 9 Na' de'e na'anə' lechgualə chebeito' lao Diozən' can' chonle na' cho'echguato' yelə' choxcwlen che' can' chaclene' le'e. 10 Lechgualə chonto' orasyon do ža do yel chṇabeto'one' gone' ca le'i ljuežjcho ničh əgwzejni'icheto' le'e par ničh šejəchle gonlilažə'əchlene' chedə' bitonə' gonlilažə'əlene' can' chene'e Diozən'.

11 Chṇabeto' Xacho Diozən' na' len Xancho Jesocristən' əso'e latjə yedəzlanə'əto' le'e. 12 Na' chṇabeto' Xancho' gone' ca gaquəche che ljuežjle tole yetole na' gone' ca gaquəchele che yoguə' beṇə'ach con catezən' chaqueto' che le'e. 13 Chṇabczəto'one' gone' ca gaquə la'ažda'olen' xi'ilažə' lao Xacho Diozən' sin cui bi dolə' gapple catə'an yidə Xancho Jeso'osən' de'e yoblə nche'e yoguə'əloj beṇə' bagwlej Diozən' par zjənaque' lažə' ne'enə'.

4

Paṇən' bzejni'ine' can' chene'e Diozən' yesə'əzo yesə'əbeze'

1 Na'a ža beṇə' bišə', bač bsd blo'ito' le'e gonle can' chene'e Diozən', na' bač zole chonle ca'. Na' de'en chonlilažə'əle Xancho Jesocristən' chatə'əyoito' le'e na' chonto' mendad əžja' aquəchle gonchle de'en chene'e Diozən'.

2 Baṇezzele de que de'en bento' mendad gonle naquan de'en na Xancho Jeso'osən'. 3 Diozən' chene'ene' sotezə socho gaccho beṇə' la'aždao' xi'ilažə'. Na' bito chene'ene' cuejyichjcho no'ol checho o be'en checho par solenicho beṇə' yoblə, na' bito chene'ene' əgwža' xtocho. 4 Na' leczə chene'ene' əneze totole naquan' cheyalə' čhiljle xo'ollen' sin cui gapple dolə' na' sin cui no əṇa de que chonle de'e mal. 5 Bito gonlebele beṇə' ca cui chso'onlilažə' Diozən' na' čhiljle xo'olle par gonle can' chzelažə' la'ažda'omallen', sino čhiljlene' par solenlene' can' chene'e Diozən'. 6 Ni tole bito cheyalə' solenle no'ol che beṇə' yoblə chedə' la' contr be'en che' na' gonle šə gonle ca'. Babe'eto' dižə' antslə par bosniseto' le'e de que Xancho' chnežjue' castigw che beṇə' chso'on bitə'ətezə de'e malən' zjənac ca'. 7 Diozən' gwleje' chio'o par gaccho beṇə' la'aždao' xi'ilažə', caguə par co'o xtocho o goncho bichlə de'e mal ca' zjənac ca'. 8 De'e

na'anə notə'ətezle šə nacle beṇə' godenag len de'e ca' chsed chlo'ito' le'e, che Dioz nan' cui chzenagle, caguə che netəzəto'. Le'ena' beṇe' chio'o Spirit che'ena' chedə' chene'ene' gaccho beṇə' la'aždao' xi'ilažə'.

⁹ Bito chyažjele gwzoja' le'e par ənezele de que cheyalə' gaque che ljuežj chio'o chonlilažə'əcho Diozən'. Dioz na'anə' babsedene' le'e par ničh chaque che ljuežjle tole yetole. ¹⁰ Na' can' bachaquele che yoguə' beṇə' bišə'əcho ca' nita' doxen Masedonian'. Na' chatə'əyoito' le'e beṇə' bišə', legaquəche chega'aque'. ¹¹ To tole le'e yeyiljažə' naclən' gonle žin par ničh sole binlo len xbab de'en yo'o lo'o yichjla'ažda'olen' na' bito con ggüiale bi chso'on beṇə' yoblə. Na' gonle bitə'əzə žin yixə' o žin de'e de yo'o can' bento' mendad. ¹² Le'e gon ca' par ničh beṇə' ca' cui zjənaquə txen len chio'o bito yesə'əne' mal chele, na' lecza par ničh cui gaquə falť šə bi de'en chyažj chchinele.

Can' gaquə catə'an yidə Jesocristən' de'e yoblə

¹³ Le'egatezə ca' beṇə' bišə', chene'eto' ənezele can' gac che beṇə' guat ca', beṇə' ca' gwso'onlilažə' Diozən' lao gosə'anite'e yežlyon'. Chene'eto' ənezelen par ničh cui sole trist ca' tristan' chəsə'anitə' beṇə' yeziquə'əchlə catə' chat no chat chega'aque' la' cui nite'e lez žjəsyə'əzoe' len Diozən'. ¹⁴ Nezecho gwso'ot beṇə' Jeso'osən' na' bebane' ladjo beṇə' guat ca'. Le'egatezə ca' nezecho de que Diozən' gone' par ničh yidə Jeso'osən' de'e yoblə na' nche'e beṇə' ca' bagwsa'at con beṇə' gwso'onlilažə' le'.

¹⁵ Na' dižə' nga chzeneto' le'e naquən xtižə' Xancho Jeso'osən' de'en none' mendad gwzeneto'. Chio'o mbancho na'a chonlilažə'əchone', šə ne'e mbancho catə'an yide' de'e yoblə, bito nacho yobəch yežaglaochone' cle ca' beṇə' ca' bagwsa'at. ¹⁶ Na' ca' naquə Xancho Jeso'osən', cuine'en yetje' le'e yoban', na' əne' zizjo gone' mendad yesyə'əban beṇə' guat ca', na' to angl əblaonə' əne', na' yenecho cuež trompet che Diozən'. Nach beṇə' ca' bagwsa'at beṇə' ca' gwso'onlilažə' Cristən' lega'acteque' yesyə'əbane' ladjo beṇə' guat ca'. ¹⁷ Na' te na' chio'o chonlilažə'əchone' šə ne'e mbancho yežlyo nga, gon Diozən' par ničh txen len lega'aque' šepcho le'e yobana' to lo'o bejw na' yežaglaochi Xancho Jeso'osən' le'e yobana'. Nach žjəyechocho len le' zejlicane. ¹⁸ De'e na'anə' ledogwtipəchlažə' ljuežjcho tocho yetocho güe'echo dižə' can' gaquə.

5

¹ Beṇə' bišə', bito chyažjen gwzoja' le'e par gwzenda' le'e bi ža bi orən' yidə Xancho Jeso'osən' yeto. ² Nezele de que gwžin ža əgwnežjue' castigw che beṇə' ca' chso'on de'e malən'. Senyale' lega'aque' can' chon to beṇə' bguan beṇə' chda še'elə. ³ Na' šlac chəsə'əna beṇə' zan: "Mban' zocho, bitobi gaquə checho", catə' to de repenzə əžin ža əgwnežjue' castigw chega'aque'ena'. Can' chac che no'olə catə' to de'e repenzə chaque' bes che yelə' sannə', ca'atezəczən' gaquə che beṇə' ca' cui zjəniti' probnid catə'an əgwnežjo Xancho Jeso'osən' castigw chega'aque'ena'. Bito gaquə yoso'oxonje'. ⁴ Pero chio'o beṇə' bišə', chio'o cui nchoj yichjla'ažda'ochon', de'e na'anə' bito ədolə'əcho senyal Xancho' chio'o catə'an əžin ža əgwnežjue' castigw che beṇə' ca' cui chso'onlilažə'ene', na' bito gac checho can' chac che beṇə' chzenyal bguanna' le' to de repenzə. ⁵ Bayo'o be'eni' che Diozən' lo'o yichjla'aždao' yoguə' chio'o, na' de na'anə' bito choncho de'e mal can' chso'on beṇə' ca' ne'e nchoj yichjla'ažda'oga'auen'. ⁶ Cheyalə' gonyanə'əcho xbab naquən' chene'e Diozən' goncho na' nabiə' cuincho par goncho can' chazlažə'ena' par ničh bito bi gac checho catə' əgwnežjo Xancho Jeso'osən' castigw che beṇə' ca' cui chso'onlilažə'ene'. Beṇə' ca' cui

chso'on cas che' gwxaquə'əlebəga'aque' ca beṇə' zjəntas. ⁷ De'en zjənchəl yichjla'ažda'oga'aque'ena' gwxaquə'əlebəga'aque' ca beṇə' zjəntas na' ca beṇə' chəsə'əzože. ⁸ Pero chio'o bayo'o be'eni' che Diozən' lo'o la'ažda'ochon'. De'e na'anə' cheyalə' ṇabia' cuincho par goncho can' chazlaže'ena'. Cheyalə' gonlilažə'əcho Diozən' na' gaque che ljuežjcho na' yebeicho de'en nezecho žjəyecho len Diozən'. Šə goncho yoguə' de'e ca' gaquəlenən chio'o par nič bitobi gac checho catə' gwnežjo Xancho Jeso'osan' castigw che beṇə' ca' cui chso'onlilaže'ene'. Gaquəlenən chio'o ca xa soldad de'en naquə de'e ya chaclenən le' par nič cui bi chac che' catə' chdiləlen beṇə' le'. ⁹ Caguə gwlej Diozən' chio'o par nič gone' castigw chechon'. Gwleje' chio'o par nič chonlilažə'əcho Xancho Jesocristən' na' cui yeyejcho lao yi' gabilən'. ¹⁰ Jesocrist na'anə' bnežjw cuine' por ni checho catə'an gwso'ot beṇə' le' par nič sotezə socho len le' lao mbancho na' lecəzə ca' catə' bagotcho. ¹¹ De'e na'anə' le'e gwtiplažə' ljuežjle tole yetole na' le'e gaclen ljuežjle par nič sotezə sole gonlilažə'əchle Jesocristən' con can' chonczle.

Paḇən' bzejni'ine' beṇə' ca' chso'onlilažə' Jesocristən' can' cheyalə' so'one'

¹² Chatə'əyoito' le'e beṇə' bišə', gapple respet beṇə' ca' chso'on xšin Xancho Jesocristən' entr le'e choso'ogtūia choso'oye' le'e na' choso'ozejni'ine' le'e naquən' cheyalə' so cuezle. ¹³ Gapəchguaga'aclene' respet na' gaquəchgüeile chega'aque' chedə' la' xšin Xancho nan' chso'one'. Na' le'e len lega'aque' le'e so binlo tole yetole.

¹⁴ Le'egatezə ca' beṇə' bišə', le'e güe' consejw beṇə' cui chse'ene so'on žin, na' le'e gwtiplažə' beṇə' chsa'aque'ne' zdebə choso'ozenague' che Jesocristən', na' le'e gaclen beṇə' cuiṇə' se'ejni'išaogüe'ene' naquən' cheyalə' so'one'. Leso legapə yelə' chxenlilažə' len yoguə'əlo' beṇə'.

¹⁵ Šə bi de'e mal chso'on beṇə' len le'e legon byen cui yoži'ile de'e mal len lega'aque'. Zejli leyeyiljlažə' naclən' gonle güen len ljuežjle tole yetole na' len notə'ətezəchlə beṇə'.

¹⁶ Do tyempte le'e yebei. ¹⁷ Lesotezə leso legon orasyon. ¹⁸ Legüe' yelə' choxwlen che Diozən' bitə'ətezə de'en chac chele, chedə' can' chene'ene' gon chio'o chonlilažə'əcho Cristo Jeso'osan'.

¹⁹ Bito gwžonle gon Spirit che Diozən' can' chene'en len le'e o len beṇə' yobla. ²⁰ Le'e gon xbab de que to de'e zaque'e chso'on beṇə' chəsə'əyixjui'e de'en bagož Diozən' lega'aque'. ²¹ Na' legonyanə' xbab che yoguə'əlo' dižə' de'en chso'e par nič gonən chele yoguə' de'en naquə güen. ²² Na' bito gonle bitə'ətezə de'e naquə de'e mal.

²³ Diozən' chone' ca chzo chbezcho binlo len xbab de'en yo'o lo'o yichjla'ažda'ochon'. Na' chṇabda'ane' gone' par nič gacle beṇə' la'aždao' xi'ilažə'. Na' lecəzə gonšgue' par nič bito bi de'e mal gonle len yichjla'ažda'olen' na' nic len cuerp chelen' par nič bito bi dolə' gapple catə'an yidə Xancho Jesocristən' yeto. ²⁴ Diozən' ben' bagwleje' chio'o par naccho xi'ine' chone' complir can' ne'ena', na' de'e na'anə' gone' par nič güe'elažə'əle gonle can' chazlaže'ena', na' gone' par nič cui gapple dolə'.

Paḇən' gwṇabe' gaquəlen Diozən' beṇə' Tesalonica ca'

²⁵ Beṇə' bišə' le'e so le'e gon orasyon par neto'.

²⁶ Na' catə' chežagle leyolgüiz ljuežjle dižə' šao' par nič gachia' de que chaque che ljuežjle.

²⁷ Can' na Xancho Jesocristən', chona' mendad gwlabl cart nga par əse'ene yoguə'əlo| benə' bišə'əcho ca' nitə' gan' zolenə'.

²⁸ Na' sotezə sošga Xancho Jesocristən' gaquəlenšgue' le'e. De'e na'azan' chzoja' na'a. *Pab*

Cart Egwchope De'en Bzoj San Pabən' Par Benə' Tesalonica Ca'

Pabən' len benə' ljuežje' ca' boso'ozoje' benə' ca' chso'elaogüe'e Jesocristan'

1-2 Nada' Pab chzoja' le'e chdopə chžagle cho'ela'ole Xacho Diozən' na' Xancho Jesocristan' lao' syoda Tesalonican'. Na' nada' lena' Silbanon' na' Temtion' chnabto' lao Xacho Diozən' na' Xancho Jesocristan' əsa'aclenšgue' le'e na' so'onšgue' ca so cuezle binlo len xbab de'en yo'o lo'o yichjla'ažda'olen'.

Catə'an yidə Cristən' de'e yoblə Diozən' əgwnežjue' castigw che benə' ca' chso'on de'e malən'

³ Benə' bišə', neto' cheyalə' sotezə soto' güe'eto' yelə' choxcwlen che Diozən' por le'e can' chonczəto'. Naquən güen chonto' ca' la' zda chonlilažə'əchle Diozən' na' zdach chaquele che ljuežjle. ⁴ De'e na'anə' chebeito' cho'eto' xtižə'əlen' len yeziquə'əchlə benə' ca' bagwlej Diozən' par chəsə'ədopə chəsə'əžague' chso'elaogüe'e Jesocristan' ga yoblə. Cho'eto' dižə' ca güennə' chonle de'en chgo'o chchejlažə'əle len de'en choso'olagzejə choso'olagzidə benə' le'e na' can' zotezə zole chonlilažə'əle Diozən' la'anə'əczə de'e zan de'e chžaglaole. ⁵ Na' ca naquə zotezə zole chonlilažə'əle Diozən' nəzecho de que zdacze' licha par choglaogüe'en nac gaquə che to to benəch. Na' le' cho'e latjə chyi' chzaquə'əle par niç əne' de que zaque'ele par yeyejle yoban' gan' zoe' chnabi'e.

⁶ Na' naquəczən licha can' chon Diozən' chçhi' chsaque'e benə' chosə'əçhi' chosə'əsaquə' le'e. ⁷ Le'e na' len neto' chyi' chzaquə'əcho na'a, pero Diozən' gone' ca cuezə yoguə'əte de'en chyi' chzaquə'əchon' catə'an le'icho yetj Xancho Jesocristan' le'e yoban' len angl che' ca' benə' ca' zjənapə yelə' guac. Yidə nyechje' yi' bel. ⁸ Na' gwnežjue' castigw che benə' ca' cui zjənombia' Diozən', na' nic gwse'ejle'e che dižə' güen dižə' cobə de'en chzejni'in chio'o che Xancho Jesocristan'. ⁹ Lega'aque' əsa'aque' castigw zejlicane. Cuat yesyə'əžine' lao Diozən', nic əse'en yesə'əle'ine' yelə' guac xen che'enə' na' yelə' chey che'eni' che'enə'. ¹⁰ Yidə Jesocristan' de'e yoblə catə'an əžin žanə', par niç chio'o chonlilažə'əchone' na' bagwlej Diozən' chio'o par naccho lažə' ne'enə' yoguə'əcho güe'echone' yelə' bala'an na' yebanecho ca güennə' naque'. Txen len le'e güe'echone' yelə' bala'an na' yebanecho ca güennə' naque', chedə lenle chejle'ele che dižə' de'en be'elento' le'e.

¹¹ De'e na'anə' chontezəto' orasyon par le'e. Chnabeto' Diozən' gaquəlene' le'e gonle ca əne' de que zaquə'əle par de'en gwleje' le'e nacle xi'ine'. Na' chnabto' gaquəlene' le'e len yelə' guac che'enə' par niç yeyož gonle yoguə' de'e güen de'en bagwçhoglaole gonle na' len biquə'əchlə de'en chene'ele gonle laogüe de'en chonlilažə'əlene'. ¹² Chnabto' gonle ca si' Xancho Jesocristan' yelə' bala'an, na' le' gone' ca si'ile yelə' bala'an chedə' Xacho Diozən' na' Xancho Jesocristan' chsa'aclene' le'e.

2

Eçhoj ben' gonchgua de'e malən'

¹ Benə' bišə', de'e yoblə əchnia' le'e ca naquən' yidə Xancho Jesocristan' yeto par deyeto'be' chio'o žjəyecho txen len le'. ² Babzejni'ito' le'e can' gaquə, na' de'e yoblə chatə'əyoito' le'e legonyanə' xbab par niç cui cuejyichje de'en

babsed bablo'ito' le'e. Na' lec̄zə bito gaquəʒejlažə'əle šə no yidəclə dezejni'ine' le'e de que Spirit che Diozən' bagwnan de que babžin ža əgwnežjo Xancho Jeso'osən' castigw che beṇə' ca' cui chso'onlilažə'ene'. Na' nic gaquəʒejlažə'əle šə bi rson yenele o šə la'ac̄lə no cart fałs de'e chon cho'a'ənia' de que babžin žan'. ³ Bito gü'e'ele latjə no xoayag le'e šə bi əṇe' o šə bi de'e gone'. La' catə'an ze'e yida Xancho Jeso'osən' par əgwnežjue' castigon' beṇə' zan əsa'ase' contr Diozən' na' lec̄zə cana' əchoj to beṇə' blao beṇə' gonchgü'e' de'e mal contr Cristən'. Be'enan' əgwnežjo Xancho Jeso'osən' castigw che' zejlicane'. ⁴ Gon cuine' xen na' gone' contr Diozən' na' contr bitə'ətezəchlə de'en chse'ejni'alažə' beṇə'. Na' cui'e lo'o yo'odao' əblao gan' chse'ejni'alažə' beṇə' Diozən' na' əṇe' de que naque' Dioz.

⁵ Cheyalə' əžjsa'alažə'əle de que catə'an gwzoa' len le'e bzejni'ida' le'e can' gaquə catə'an yida Jesocristən' de'e yoblə na' can' gaquə catə'an ze'e yide'. ⁶ Na' nezczele de'en chžon əchoj ben' gonchgua de'e malən', pero catə'an babžin ža bžin or nan' əchoje'. ⁷ Bachac de'e malən' ṇa'a de'en naquə contr Diozən' pero ṇengašə'ən. Na' gwžin ža la'alaon catə' cuich zo de'en chžon gaquə de'e malən'. ⁸ Cana'achən' əchoj beṇə' blao ben' gonchgua de'e malən'. Pero Xancho Jeso'osən' yide' nse'e yelə' guac xen che'enə' na' yonitlaogü'e'ene' la' catə' le'ine' Xancho' na' yenene' dižə' de'en gü'e' Xancho' nach gate'. ⁹ Na' ca naquən' əchoj ben' gonchgua de'e malən', Satanas de'en chnabia' de'e xio' ca' gonən par nič əchoje' na' gonən par nič garəchgü'e' yelə' guac na' par nič gone' miłar na' bichlə de'e zaque'e yesyə'əbane beṇə' parzə əxoayague' lega'aque'. ¹⁰ Yogue' claste de'e mal gone' əxoayague' beṇə' ca' banaquən əgwnežjo Xancho Jeso'osən' castigon' zejlicane'. Na' ca naquə dižə' li de'en zaquə' par se'ejle'e par nič cui žjəya'aque' lao yi' gabilən', bito yesyə'əbeine'en. De'e na'anə' əgwnežjue' lega'aque' castigw zejlicanen'. ¹¹ Na' de'e na'anə' Diozən' gone' par nič gaquə yichjla'ažda'oga'aque'enə' žčhol' na' yoso'ozenagzeche' che dižə' güenlažə'əna'. ¹² Nach Xancho Jeso'osən' əgwnežjue' lega'aque' castigon' zejlicane' chedə' besyə'əbeichene' de'e malən' na' bito gwse'ejle'e che dižə' li che Xancho'.

Diozən' chbeje' beṇə' par gone' ca cui žjəya'aque' lao yi' gabilən'

¹³ Beṇə' bišə', chaque Xancho Jesocristən' chele. Na' ca naquə neto' ža, cheyalə' sotezə soto' gü'e'eto' yelə' choxcwlen che Diozən' de'en gwleje' le'e catə'an cuiṇə' xə yežlyon' par nič bene' ca cui yeyeje' lao yi' gabilən'. Na' catə'an gwzolaole cheje'le'ele che dižə' li che Diozən' nach bsele'e Spirit che'enə' chonan par nič nac̄le beṇə' la'aždao' xi'ilažə'. ¹⁴ Par cui yeyeje' lao yi' gabilən' gwlej Diozən' le'e. Na' de'en gweyje'le'ele che dižə' güen dižə' cobə che Diozən' de'en be'elento' le'e, əžin ža catə'an cuin Diozən' gone' le'e yelə' bala'an ca de'en de che Xancho Jesocristən'.

¹⁵ De'e na'anə' beṇə' bišə', le'sotezə le'so le'gonlilažə' Diozən'. Na' le'e talentezə de'en bzejni'ito' le'e, šə dižə' de'en be'elento' le'e o šə de'en babzojto'. ¹⁶⁻¹⁷ Xacho Diozən' chaquene' checho. Na' de'en nži'ilažə'e chio'o na'anə' bsele'e Xi'ine'ene'. Can' ben Diozən' par nič zocho mbalaz zejlicane' na' par nič zocho len gone' güen len chio'o. Na' chnabda' cuin Xancho Jesocristən' txen len Xacho Diozən' yoso'otipšgue' lažə'əle na' əsa'ac̄lensgue' le'e par nič gonle' porzə de'e güen na' gü'e'ele por dižə' güen.

3

Gwṇab Pabən' so'one' orasyon par le' len beṇə' lježje' ca'

¹ Na'a ža beṇə' bišə', gonšgale orasyon par neto' niç yob žjətixjue'ito' che Xancho Jesocrisṭən' doxenlə na' par niç beṇə' yeziquə'əchlə yob so'one'en chega'aque' catə' se'enene'en can' baben le'e. ² Bia'aczə nita' beṇə' mal beṇə' cui so'onlilažə' Xancho Jesocrisṭən' na' zjənaljəga'aque'ne'. De'e na'ana' leczə ṇabšgale par niç beṇə' ca' bito yesə'əžone' chixjue'eto' xtižə' Xancho Jesocrisṭən'. ³ Xancho Jesocrisṭən' zotežə zoe' chone' complir can' ne'enə na' leczən' gaquəlene' le'e par niç sotežə sole gonlilažə'əlene'. Na' leczə le'ena' əgwcuasə' gwcue'eje' le'e len de'e malən'. ⁴ Na' zoto' segor de que chaclencze' le'e par niç chonle can' babento' mendadən' na' zoto' lez gaquəlene' par niç nita'əczle gonle ca'. ⁵ Na' chṇabda' Xancho Jesocrisṭən' gone' ca gaquəchele che Diožən'. Na' leczə chṇabda'ane' gone' ca sotežə sole gonlilažə'əlene' can' ben Jesocrisṭən' gwzotežə gwzoe' benlilažə'əchgüe' Xe' Diožən' lao yoguə'əlołte de'en gwdi' gwxaque'e yežlyo nga.

Pabən' bene' mendad so'one' žin par so'on cuinga'aque' mantener

⁶ Beṇə' bišə', chzeneto' le'e can' chon Xancho Jesocrisṭən' mendad. Bito cheyałə' gonle txen len no beṇə' bišə'əchon' šə naque' beṇə' xagüed o šə bito chzenague' che de'en əbsed əblo'ito' le'e. ⁷ Neto' syempr bento' žin catə'ən gwzoto' len le'e, na' de'e na'ana' nezczele de que cheyałə' sole gonle žin. ⁸ Bito be'eto' latjə no gon neto' mantener; sino que bento' žin pesad težə na' lente do še'elə par niç ben cuanto' mantener na' niç ca' bito əbsoto' le'e gast. ⁹ Zaquə'əczəto' par gonle neto' mantener catə'ən gwzoto' bento' xšin Diožən' gan' zolenə' pero ben cuanto' mantener niç blo'ito' le'e de que can' cheyałə' gonle. ¹⁰ Catə'ən gwzoto' len le'e bento' mendad gwnato': "Šə no cui gone' žin, bito güe'ele latjə gaogüe'." ¹¹ Pero na' babeneto' dižə' de que balle bito bi žin chonle, con nita'əle chgüiale bin' chso'on beṇə' yoblə. ¹² Na' šə nole chgüedle na' bito bi bi žin chonle, chonto' mendad na' chatə'əyoito' le'e gonle can' chene'e Xancho Jesocrisṭən'. Legonšazə byen leyezolao legon žinnə' par niç gon cuinle mantener; na' leso lecuežə binlo len xbab de'en yo'o lo'o yichjla'ažda'olen'.

¹³ Na' yoguə'əle beṇə' bišə', bito žjəxaquə'əlažə'əle gonle de'e güen. ¹⁴ Chonto' mendad əgwzenagle che yoguə' de'en babzjo'to' le'e. Na' šə no gon godenag, le'e gwzoe' to šla'alə. Bitoch gonle txen len le' par niç gaquene' zto' che de'en chone'ena'. ¹⁵ Pero la'anə'əczə šə babzolene' to šla'alə, bito gue'ilene', sino əgwzejni'ilene' dižə' šao' chedə' la' naque' beṇə' bišə'əcho.

Pabən' gwnabene' Diožən' gaquəlene' beṇə' Tesalonica ca'

¹⁶ Xancho Jesocrisṭən' chone' ca chzo chbezcho binlo len xbab de'en yo'o lo'o yichjla'ažda'ochon'. Na' le'ena' gonšgacze' par niç so cuezle binlo len xbab de'en yo'o lo'o yichjla'ažda'olen' dote tyemp bitə'ətežə de'en chac. Sošgacze' len yoguə'əle.

¹⁷ Na' chzenda' le'e de que cuincza' nada' Pabən' chzoja' part dao' che cart nga əchguapa' le'e diox. Can' choncza' len yoguə' cart de'en əchsełə'a par niç nachbia' de que nadan' chsełə'an, la' banombi'aczele can' chzoja'. ¹⁸ Xancho Jesocrisṭən' gaquəlenšgüe' yoguə'əle. De'e na'azən' chzoja' ṇa'a. *Pab*

Cart Nech De'en Bzoj San Pabən' Par Temtion'

Pabən' chzoje' cart par Temtion'

¹ Nada' Pab naca' apostol che Jesocristən'. Diozən' babebeje' chio'o xni'a de'e malən' na' zocho lez gon Cristo Jeso'osən' par niç žjəyecho len Diozən'. Lega'aque'enə' gwso'one' mendad par naca' apostol. ² Na' chzoja' le' Temtio dao'. Banona' le' ca xi'ina' laogüe de'en bsed blo'ida' le' par chonlilažo'o Xancho Cristo Jeso'osən'. Chona' orasyon chnaba' lao Xacho Diozən' na' lao Xancho Cristo Jeso'osən' əsa'aclenšgue' le', na' yesyə'əyašə' yesyə'əži'ilaže'e le', na' so'onšgue' ca so cuezo' binlo len xbab de'en yo'o lo'o yichjla'ažda'ogo'onə'.

Nitə' beṇə' choso'osed choso'olo'ine' dižə' güenlažə'

³ Catə'an gwza'a Efeson' par gwyə'a Masedonian', goža' le' yega'ano' Efeson'. Bena' mendad yega'ano' par niç əgwzejni'ido' balə beṇə' nitə' na' de que cuich yoso'osed yoso'olo'ine' bitə'ətezə dižə' de'en cui zdan txen len xtižə' Diozən'. Na' che'enda' sotezo' gono' ca'. ⁴ Na' lecəzə bzejni'iga'aque' de que bitoch cue' yichjga'aque' che de'e xaxta'ocho ca'. Dia chega'aque' ca' zjənaque' beṇə' zan. Na' de'e zan cuent chso'e chega'aque'. Gaquəyožcho šə cue' yichjcho che de'e ca'. Na' bito chsa'aclenən chio'o par niç gonlilažə'əcho Diozən' can' chene'ene' goncho.

⁵ Cheyalə' əgwzejni'icho beṇə' par niç so'onlilaže'e Diozən' do yichj do lažə'əga'aque' na' so'e latjə yeya' yeyib Diozən' yichjla'ažda'oga'aque'enə'. Na' šə so'one' ca' nachən' sa'acbe'ine' lo'o yichjla'ažda'oga'aque'enə' de que bito bi de'e mal chso'one'. Egwzejni'icho lega'aque' so'one' ca' par niç əsa'aque'ne' che Diozən' na' che ljuežjga'aque'. ⁶ Nitə' beṇə' bagosə'əque'e nez malən'. Bito chso'onlilaže'e Diozən' do yichj do lažə'əga'aque'. Bito chso'e latjə yeya' yeyibe' yichjla'ažda'oga'aque'enə' na' zjəneze' de que chso'one' de'e mal. De'e na'anə' chso'echgüe' dižə' de'e bito bi zaquə'an. ⁷ Chse'enene' yoso'osed yoso'olo'ine' beṇə' yoblə lei de'en bzoj de'e Moizezən' len bito chse'ejni'ine' bi dižə'an chso'e na' nic chse'ejni'ine' bi zeje de'e ca' chəsə'əne' zjənaquən de'e žialao xen goncho.

⁸ Na' nezecho de que lein' naquən güen con šə gwchinchon par əgwzejni'icho beṇə' de que bito cheyalə' so'one' de'e mal. ⁹ Cheyalə' nezecho de que beṇə' ca' bachso'on can' chene'e Diozən' bito chəsə'əyazjəne' to lei de'e gwzejni'in lega'aque' de que cheyalə' so'one' de'e güen. Diozən' bnežjue' lein' par beṇə' ca' cui chso'on can' nan na' par beṇə' godenag ca' na' par beṇə' ca' cui chso'elao' le', na' par beṇə' ca' chso'ontezə chso'one' de'e malən', na' par beṇə' ca' cui chso'on cas che Diozən', na' par beṇə' ca' chesə'əgue'i de'en naquə de'e zaquə'e lao Diozən', na' par beṇə' ca' chso'ot xaxna'aga'aque', na' par yeziquə'əchlə beṇə' güet beṇə'. ¹⁰ Na' lecəzə bnežjue' lein' par beṇə' ca' chesə'əgo'o xtoga'aque' na' par beṇə' ca' chesə'əbejyichje' no'ol chega'aque' o be'en chega'aque' par chəsə'əzolene' beṇə' yoblə, na' par beṇə' byo ca' chesyə'əzolentezə ljuežj beṇə' byoga'aque', na' par beṇə' chəsə'əche'e beṇə' yoblə la fuers na' chesə'ədi'ene' lao na' beṇə' yoblə, na' par beṇə' güenlažə', na' par beṇə' ca' chsa'ac testigw fals contr ljuežjga'aque' lao jostis, na' par notə'ətezəchlə beṇə' chso'on contr dižə' güen de'en chsed chlo'icho che Diozən'. ¹¹ Lei na'anə' chonən txen len dižə' güen dižə' cobə che Diozən' ben'

cho'ela'ochō. Na' lē'enā' babene' lao na'a par chyixjui'a dižā' cobā che'enā' de'en naquā de'e güen juisy.

Pabən' be'e yelā' choxcwlen che Diozən'

¹² Cho'a yelā' choxcwlen che Xancho Jesocristán', chedā' lē'enā' chone' fuers balor chia' par chyixjui'a xtīze'enā'. Na' lē'enā' gwleje' nada' par gona' xšine'enā' chedā' gwnezene' de que zotezā zoa' chona' complir can' cheyalā' gona'. ¹³ Lechgualē bachaclene' nada', len antslā ze'e gombi'ane' bžia bnita'ane' na' gwzi'ichīzā'ane', na' bchi' bsaca'a beṇā' ca' chso'onlilaže'ene'. Beyašā' beži'ilaže'e nada' la'anā'əczā' benā' ca' chedā' cuiṇā' gonlilažā'ane' na' bito goche'ida' bin' chona'. ¹⁴ Na' Xancho Cristo Jeso'osən' blo'ine' nada' catequan' nzi'ilaže'e nada' ca de'en chaclene' nada' par nič bachonlilažā'ane' na' bachacda' che yeziqū'əchlā' beṇā' laogüe de'en ngoda'a txen len Cristo Jeso'osən'.

¹⁵ Dižā' quinga naquən de'e li na' zjəzaquā'ən par šejle'echo, de que "Jesucristən' bide' yežlyo nga par nič chebeje' beṇā' xni'a de'e malən'." Na' nada' chacda' goca' lē'ezelaogüe beṇā' güen de'e mal. ¹⁶ Pero la'anā'əczā' goca' lē'ezelaogüe beṇā' güen de'e mal, Jesocristán' beži'ilaže'e nada' par nič blo'e catec yelā' chxenlažā' nape'. Na' de'en beži'ilaže'e nada' yoguā' beṇā' ze'e so'onlilaže'ene' na' ze'e yesā'əzi'e yelā' mban zejlicane sa'acbe'ine' de que nape' yelā' chxenlažā' xen. ¹⁷ Ledoye'elaoch Rei chechon' na'a na' zejlicane, ben' cui te chei na' zoe' zejlicane. Cheyalā' güe'echone' yelā' bala'an. Lē'enā' cui no chac le'i, na' naque' beṇā' sin'. Tozā lē' zaque'e par güe'ela'ochone'. Na' can' naquəczən.

¹⁸ Xi'inda'ogua'a Temtio, de'e quinga chzoja' le' le'e cart nga, chona' mendad gono' xšin Diozən' do yichj do lažo'o la'anā'əczā' catā' naquən zdebā. Che'enda' žjəsa'alāžo'o can' gws'o'on beṇā' golā' blao entr chio'o chonlilažā'əcho Cristən', bagwso'e dižā' bos'o'ozenene' chio'o de que bagwlej Diozən' le' par gono' xšine'enā'. Benšga xšin Diozən' can' gosā'əne'. ¹⁹ Na' leczā gwzo chech gonlilažo'o Cristən', na' gono' ca ənezdo' lo'o yichjla'aždaog'o de que bitobi de'e mal chono'. Balā beṇā' bito besyā'ədinjene' xtolā'əga'aque'enā' la'anā'əczā' gosā'ənezene' lo'o yichjla'aždaoga'aque'enā' de que bagwso'one' de'e malən', na' de'e na'anā' bitoch chso'onlilaže'e Diozən'. ²⁰ Can' bagwso'on Imeneo na' Ljandr. Chžona' so'on beṇā' ca' txen len chio'o chonlilažā'əcho Cristən' na' chṇabda' Diozən' güe'e latjə gon Satanāsən' con nac chene'en len lega'aque' par nič əsa'acbe'ine' de que bito cheyalā' yoso'ožia yoso'onite'e Diozən'.

2

Nac cheyalā' goncho orasyonnā'

¹ Na' chnia' le' de yeto de'en naquā de'e žialao gon yoguā'əcho. Catā' ndopā nžagcho par cho'ela'ochō Diozən' cheyalā' goncho orasyonnā' par yoguā'əlōl beṇā', ṇabcho gaquālen Diozən' lega'aque', na' güe'echo yelā' choxcwlen che Diozən' por lega'aque'. ² Leczā cheyalā' goncho orasyonnā' par no rei na' par yoguā' beṇā' gwnabia' ca', par nič gaquā so cuezcho binlo, na' par nič bitobi əgwžon güe'ela'ochō Diozən'. Cheyalā' goncho de'en naquā güen laogüe'ena' na' lao beṇā'chən'. ³ Naquən güen goncho orasyonnā' ca', la' Diozən' ben' babebej chio'o xni'a de'e malən' cho'olāže'e goncho ca'. ⁴ Diozən' chene'ene' yebeje' yoguā' beṇā' xni'a de'e malən'. Leczā chene'ene' yesā'ənezene' na' se'ejle'e dižā' li che'enā'. ⁵ Tozā Diozən' zaque'e par güe'ela'ochone', na' tozā ben' zo fabor chio'o lao Diozən', lē'enā' Jesocristán' ben' goljə beṇā'ch. ⁶ Jesocrist

nan' bnežjw cuine' gwdixjue' xtolə' yoguə' beṇaḥ. Dezd gwlatte Diozən' bsi'e xneze nitə' beṇə' yesə'əyixjui'e che Jesocristən' na' cata'ən bžin žan' bžie' bia'anə', gosə'əyixjui'e de que Jesocristən' bnežjw cuine' gwso'ote'ene' por ni checho. ⁷ Na' leczə de'e na'anə' gwlej Diozən' nada' par naca' apostol che' na' par əchyixjui'a dižə' li che'enə'. Bsele'e nada' chsed chlo'ida'an beṇə' ca' cui zjənaquə beṇə' Izrael par niḥ so'onlilaže'ene'. Cho'a dižə' li notono chxoayaga' əṇia' ca'.

⁸ Na' yeto de'e che'enda' gonle, yoguə' latjə gan' chdopə chžagle par cho'ela'ole Diozən', beṇə' byo ca' cheyalə' so'one' orasyonṇə' lao ndopə nžagle. Cheyalə' gaquə la'ažda'oga'aque'en xi'ilažə', na' notono yesə'əže'e na' notono sa'acyože' par niḥ Diozən' əgwzenague' chega'aque' catə' so'one' orasyonṇə'. ⁹ Na' leczə no'ol ca' cheyalə' yoso'opa'a cuinga'aque' ca cui nite'e zban. Pero bito cheyalə' cue' yichjga'aque' porzə par nite'e xoche, o par yesə'əgualə'e bga o ret de or o de perlas. Na' bitotec yesə'əbe' yichjga'aque' gaquə yišə' yichjga'aque'en xoche o par yesə'əzi'e xaga'aque' de le'eya'. ¹⁰ Cheyalə' nite'e so'one' de'e güen, can' chene'e Diozən' so'on notə'ətezəchlə no'olə bagwso'on lyebe de que əso'elaogüe'ene'. ¹¹ No'olə ca' cheyalə' yesə'əzəxjw yichjga'aque' yoso'ozenague' che beṇə' ca' choso'osed choso'olo'ine' xtižə' Diozən' na' bitobi dižə' əso'e lao coltən'. ¹² Bito cho'a latjə par niḥ no'ol ca' yoso'osed yoso'olo'ine' xtižə' Diozən' lao coltən', con nitə'əteze' žiza. Na' bito yesə'anabi'e beṇə' byo. ¹³ Chnia' ca' la' Diozən' zgua'atec bene' Adannə' na' techlə bene' Eban'. ¹⁴ Na' catə' gwxiye'en beṇə' par niḥ beṇə' nech ca' gwso'one' de'e malən' bito bxoayaguən Adannə', sino bxoayaguən no'ol che'enə' par niḥ besə'əxope' gwso'one' de'e malən'. ¹⁵ De'e na'anə' no'ol ca' chəsə'əžaglaogüe' catə' chəsə'əzane'. Pero žjasyə'ənite'e len Diozən' zejlicəne šə nitə'ətezə nite'e so'onlilaže'ene'. Leczə cheyalə' sa'aque'ne' che Diozən' na' əsa'ac la'ažda'oga'aque'enə' xi'ilažə' na' bito so'e latjə ṇabia' la'ažda'omalga'aque'enə' lega'aque'.

3

Nac cheyalə' so'on beṇə' ca' choso'ogüia choso'oye' beṇə' ca' chso'onlilažə' Jesocristən'

¹ De'e li can' chesə'əne': "Notə'ətezə beṇə' šə chene'ene' əggüia əgwye' yeziquə'əchlə beṇə' chso'onlilažə' Jesocristən', chene'ene' gone' to žin de'en zaquə'əchgua." ² Catə' cuejle to beṇə' par əggüia əgwye' yeziquə'əchlə beṇə' chso'onlilažə' Jesocristən', lecuej to beṇə' zotezə zoe' chone' ca notono gaquə əne' de que de'e malən' chone'. Lecuej beṇə' zo tozə no'ol chei, beṇə' cui choe' latjə ṇabia' la'ažda'omale'enə' le', beṇə' chnabia' cuine' par chone' can' chazlažə' Diozən', beṇə' chon ca beṇə' yoblə chsa'ape'ene' respet, beṇə' chebei chgüialaogüe' beṇə' liže'enə', na' beṇə' neze nac əgwsed əgwlo'ine' xtižə' Diozən' binlo. ³ Bito cuejle beṇə' güe'e zo, o beṇə' naquə beṇə' gotil, o beṇə' chzelažə' gone' gan mechən', o beṇə' chon znia par niḥ yoso'ozenag beṇə' che', sino cuejle beṇə' naquə gaxjwlažə'. ⁴ Lecuej beṇə' chnabia' xi'ine' ca' binlo len notə'ətezəchlə beṇə' nitə' liže'enə'. Lecuej beṇə' chon byen yoso'ozenag xi'ine' ca' che' na' beṇə' chon ca chsa'apbo' le' respet bitə'ətezə de'en chone'. ⁵ La' šə to beṇə' bito chac nabi'e family che'enə' binlo, bito nezene' nac gone' par əggüia əgwye' beṇə' ca' bagwlej Diozən' par chesə'ədopə chesə'əžague' chso'elaogüe'e Jesocristən'. ⁶ Bito cuejle to beṇə' ze'e gwzola'ə chonlilaže'e Diozən', la' šə cuejle to beṇə' cobə gonlja cuine' xen can' ben de'e gwxiye'enə'

na' si'e castigw ca castigon' si' lennə'. ⁷ Cuejle beṇə' chon par niḥ beṇə' ca' cui zjənaque' txen len chio'o yesə'əneze' de que chone' de'e güen, la' šə cui zoteza zoe' chone' de'e güen, gwzĩnłja ža catə' yoso'ožia yoso'onitə' beṇə' le' na' əxope' lao na' de'e gwxiye'enə'.

Nac cheyalə' sa'ac beṇə' ca' əsa'aque' comisyon che chio'o chonłilažə'əcho Jesocristən'

⁸ Na' catə' cuejle beṇə' ca' əsa'ac comisyon che le'e chonłilažə'əle Jesocristən' gan' zolen', lecuej beṇə' zjəzaqua' par gapəga'achone' respet, na' beṇə' bito zjənaqua beṇə' goxoayag, beṇə' cui zjənaqua beṇə' güe'e zo, beṇə' cui chesə'əzelažə' so'one' gan mechən' len xšin Diozən'. ⁹ Lecuej beṇə' nitə'əteza nite'e chse'ejle'e che de'en babzejni'i Diozən' chio'o che Jesocristən' de'en cui no gwneze antslə, beṇə' chso'on ca chesə'əneze' lo'o yichjla'ažda'oga'aque'enə' de que chso'one' can' chazlažə' Diozən'. ¹⁰ Cheyalə' ggũiale can' chso'on beṇə' ca' chaquele cuejle par əsa'aque' comisyon chele šə chso'one' can' bagwnia' cheyalə' so'one', na' šə yesə'əchoje' binło sin cui bi bi falt chega'aque' əžel, nachən' cuejle lega'aque' par əsa'aque' comisyonnə'. ¹¹ Leczə ca' no'ol ca' chso'on xšin Diozən' cheyalə' əsa'aque' beṇə' zjəzaque'e par gapəga'acchone' respet, cheyalə' əsa'aque' beṇə' cui choso'ožia choso'onite'e beṇə' yoblə, cheyalə' əsa'aque' beṇə' cui chso'e latjə nabia' la'ažda'omalga'aque'en lega'aque', na' cheyalə' əsa'aque' beṇə' nitə'əteza nite'e chso'one' complir con can' chene'e Diozən'. ¹² Na' catə' cuejle beṇə' ca' əsa'ac comisyon che le'e chonłilažə'əle Jesocristən' gan' zole, lecuej beṇə' zjəzo tgüejzə no'ol chei na' lecuej beṇə' chesə'anabia' xi'inga'aque' na' notə'ətezachlə beṇə' nitə' ližga'aque' can' chazlažə' Diozən'. ¹³ Beṇə' ca' zjənchoj par zjənaque' comisyonnə' šə so'one' binło yesə'əzi'e yelə' bala'an xen, na' leczə so'onłilažə'əchgüe' Jesocristən' na' bito yesə'əžebe' laogüe'enə'.

Notono gwneze antslə de'en babzejni'i Diozən' chio'o

¹⁴⁻¹⁵ Zoa' lez yob yida' delana'a le', pero bzoja' de'e ca' čhedə' bito nezdə' batən' gaquə yida' na' che'enda' ənezdo' nac cheyalə' gon chio'o naccho family che Diozən'. Dioz ben' zo zejlicane bagwleje' chio'o par chdopə chžagcho cho'ela'ocho Jesocristən' na' de'e na'anə' naccho family che'. Na' Diozən' babzejni'ine' chio'o dižə' li che'enə' par chzejni'ichon beṇə'. ¹⁶ Notono gwneze antslə de'en babzejni'i Diozən' chio'o na'a, na' chejle'echon na' naquan de'e žialao xen.

Jesocristən' bide' golje' beṇəch,
na' Spirit che Diozən' blo'en de que naque' doalje xi'in Dioz.
Angl ca' besyə'əbeine' besə'əle'ine' le'.

Na' bžin ža beyepe' yoban' bezi'e yelə' gwnabia' che'enə' na' yelə' bala'an che'enə'.

Na' beṇə' ca' chso'e xtiže'enə' bagosə'əyixjui'en yoguə' nasyon,
na' zan beṇə' ža' doxen yežlyo nga bachso'onłilaže'ene'.

4

Ežin ža yesə'əbejyichj beṇə' dižə' li che Diozən'

¹ Clar bagwna Spirit che Diozən' de que əžin ža balə beṇə' yesə'əbejyichje' dižə' li che Diozən'. Yesə'əbejyichje'en ca de'en yoso'ozenague' che beṇə' ca' yoso'osed yoso'olo'i dižə' güenlažə', na' yoso'ozenague' che beṇə' ca' yoso'osed yoso'olo'i dižə' de'en za'ac che de'e xio' ca'. ² Beṇə' goxoayag ca' beṇə' ca' yoso'osed yoso'olo'i dižə' güenlažə' na' bitoch bibi əsa'aque'ne' lo'o

yichjla'ažda'oga'aque'enə' catə'an yesə'əxoayague' o catə'an so'one' bichlə de'e mal. ³ Yoso'ožone' no yoso'ošagna', na' yesə'əne' de que bito gaquə gaocho balə yelə' guao la'anə'əczə Diozən' bene' par nič zjəden. Na' bene' yoguə' yelə' guao ca' par nič chio'o chonlilažə'əchone' na' nombi'acho de'en naquə de'e li gaoga'acchon na' güe'echone' yelə' choxcwlen. ⁴ Na' de'en bene' yoguə' de'e ca' nezecho zjənaquan güen na' bito zjənaquan par gue'iga'aquechon, con güe'echo Diozən' yelə' choxcwlen par de'e ca' chone' chio'o. ⁵ Zjənaquan güen par gaoga'acchon chedə' cho'echo Xtiže'enə' catə' choncho orasyon cho'echo yelə' choxcwlen che' par lega'aquan.

Nac cheyalə' so'on beṇə' ca' yoso'osed yoso'olo'ine' xtižə' Jesocristán'

⁶ Na' Temtio, par nič yebeichgüei Jesocristán' can' chono' xšine'enə' cheyalə' əgwzejni'ido' beṇə' bišə'əcho beṇə' ca' chso'onlilažə' Jesocristán' de'e ca' bagwnia' le'. Šə gono' ca' gaqualenən le' par sotezə so' gonlilažə'əcho' Jesocristán' na' talencho' dižə' li che Diozən' de'en bachdalenə' ṇa'a. ⁷ Bito gone chio' dižə' güenlažə' de'en chsa'aljlažə' beṇə' ca' cui chso'elao' Diozən'. Chso'e dižə' ca' dižə'ən chsoe' balə no'olə gol ca' len bidao' ca' de'e cui zaquə' šejle'echo chei. Pero na' le' bsd par nič šejəch goncho' can' chene'e Diozən'. ⁸ Nezecho de que catə' choncho jersisy chaclenən cuerp chechon', na' catə' choncho can' chene'e Diozən' caguə cuerp checho na'azən' chaclenən, sino chaclenczən chio'o par zocho mbalaz ṇa'a lao mbancho na' ca'aczə catə' žjəyezocho len Diozən'. ⁹ Naquan de'e li na' zaquə'ən par šejle'echo chei. ¹⁰ Na' Diozən' chone' par nič de yoguə' de'e chyažje yoguə' beṇə' par nič zjəmbane', na' chone' yelə' mban zejlicane che chio'o chonlilažə'əchone'. Na' de'en zocho lez žjəyezocho len Dioz ben' zo zejlicane, chonchguacho xšine'enə' na' chgo'o chchejlažə'əcho catə' chəsə'əzi'ičhižə' beṇə' chio'o.

¹¹ Bsd blo'i beṇə' de'e quinga babzejni'ida' le' na' gono' mendad so'one' can' bagwnia'. ¹² La'anə'əczə ṇe'e naco' beṇə' xcuidə' bito go'o latjə yesə'əzo beṇə' le' ca'alə cui yoso'ozenague' chio'. Len bitə'ətezə əṇao' na' len yoguə' de'en chono' blo'i beṇə' ca' chso'onlilažə' Jesocristán' nac cheyalə' so'one', na' naquan' cheyalə' sa'aque'ne' che Diozən' na' che ljuežjga'aque' na' nac cheyalə' ṇitə'ətezə ṇite'e so'onlilažə'e Jesocristán', na' nac cheyalə' so'one' par nič la'ažda'oga'aque'enə' əsa'aquan xi'ilažə'. ¹³ Mientr yida' gan' zo'onə' gwlec yichjo' blab Xtižə' Diozən' de'en nyojən len beṇə' ca' chəsə'ədopə chəsə'əžag chso'elaogüe'e Jesocristán' na' gwdixjue'i dižə' güen dižə' cobə che'enə', na' bzejni'i beṇə' bi zeje xtižə' Diozən'. ¹⁴ Ben yoguə'əlo' de'en gwlej Diozən' le' par gono' catə'ən boso'oəxoə na' beṇə' golə beṇə' blao ca' yichjo'on na' boso'ozenene' le' de que Diozən' gwleje' le' par gono' xšine'enə'.

¹⁵ Gwlec yichjo' ben yoguə' can' gwnia' par nič yoguə' beṇə' yesə'əle'ine' can' zdach chono' can' chene'e Diozən'. ¹⁶ Gwdapə cuidad ben con can' chazlažə' Diozən', na' bsd blo'i beṇə' so'one' ca'. Šə gono' ca' gaqualenən beṇə' ca' choso'ozenag xtižə'onə' par yesə'əchoje' xni'a de'e malən' na' leczə gaqualenən le'.

5

Can' cheyalə' goncho len beṇə' ca' chso'onlilažə' Cristən'

¹ Šə bi de'en chon to beṇə' golə, bito tilə'one' sino gwṇeyoine' can' cheyalə' gone', ben can' chono' len xao'. Na' šə bi de'en chon to beṇə' xcuidə' bzejni'ine' ca' bišo'o. ² Na' šə bi de'en chon to no'olə golə, bzejni'ine' can' chono' len xna'o,

na' šə bi de'en chon to no'olə xcuidə' bzejni'ine' ca to zano' par niç notono gaquə əne' de que de'e malən' chono'.

³ Cheyalə' goncho mantener no'ol ca' bagwsa'at be'en çhega'aque', šə zjənaque' doalje gozəbə. ⁴ Pero šə nitə' xi'ingə'aque' o xesoaga'aque' bzejni'i beṇə' ca' de que cheyalə' so'one' lega'aque' mantener çhedə' beṇə' gol ca' babosyo'osgolə' lega'aque'. Chazlažə' Diozən' goncho mantener beṇə' golə lao family çhe checho. ⁵ No'ol ca' zjənaquə doalje gozəbə, beṇə' ca' notono family çhega'aque' nitə', nite'e lez gaquəlen Diozən' lega'aque' na' chso'ontezə chso'one' orasyon teža na' še'elə. De'e na'anə' zjəzaque'e par goncho lega'aque' mantener.

⁶ No'olə gozəb ca' chso'on xbab so'one' con can' chse'enene' zjənaquəga'aque' ca beṇə' guat len yichjla'ažda'oga'aque'enə' de'en cui choso'ozenague' che Diozən'. ⁷ Yoguə' de'e ca' bagwni'anə' gono' mendad so'on beṇə' ca' chso'onlilažə' Cristən' par niç notono gaquə əne' de que chio'o chonlilažə'əcho Cristən' bito choncho can' cheyalə' goncho. ⁸ Šə nocho cui gaquəlencho no parient checho len de'en çhəsə'əyazjəne', bito choncho can' cheyalə' gon chio'o chonlilažə'əcho Cristən' na' napəchcho dolə' cle ca beṇə' ca' cui zjənombia' Cristən'. Na' peorəch šə cui choncho mantener no'ol checho, xi'inqho, na' xaxna'əcho.

⁹ Quinga nezele noe' no'olə gozəb ca' cuejle par niç le'e chdopə çhžagle cho'ela'ole Cristən' gonle lega'aque' mantener. Šə banite'e gyon iz o mazlə, na' šə gwnitə' tgüejzə be'en çhega'aque', ¹⁰ na' šə beṇə' zan çhəsə'əne' bagwso'onchgüe' de'e güen ca de'en bosə'əsgole' no bidəo' o çhəsə'əgüialəogüe' beṇə' zitə' ližga'aque'enə', o chsa'aclenchgüe' yeziquə'əchlə beṇə' bagwlej Diozən' par zjənaque' lažə' ne'enə', o chsa'aclene' beṇə' çhəsə'əyi' çhəsə'əzaque'e, o šə bagwso'onchgüe' bitə'ətezəchlə de'e güen nachən' zjəzaque'e par cuejga'aclene'.

¹¹ Pero bito cuejle no'olə gozəb ca' zjənaquə beṇə' xcuidə' la' gwžinlja ža se'enene' yesə'əbejyichje' xšin Cristən' na' se'enene' yesyə'əšagne'e de'e yoblə. ¹² Na' šə yesə'əbejyichje' xšin Cristən' əsa'ape' dolə' de'en cuich so'one' can' gwso'one' lyebe. ¹³ Na' no'olə gozəbə xcuidə' ca' bito gonga'aclene' mantener. De'en yesə'əlažə'e liž beṇə', so'olaogüe' cui so'one' žin na' əsa'aque' beṇə' güilj gwxañ dižə' na' yesə'əgüiazeche' bin' chso'on beṇə' yoblə, na' so'e dižə' çhe de'en cui cheyalə' so'e dižə' çhei. ¹⁴ Chacda' güen šə no'olə gozəbə xcuidə' ca' yesyə'əšagne'e de'e yoblə na' yesə'əzane' na' yosyo'osgol xi'ingə'aque', na' yosə'əgüia yoso'oye' xmendadga'aque' de'e de ližga'aque', par niç notono beṇə' contr checho gaquə əne' de que de'e malən' choncho. ¹⁵ Balə no'olə gozəbə xcuidə' ca' bagosə'əbejyichje' Cristən' par zjəsə'ənaogüe' Satanəən' de'en çnabia' de'e xio'ə'.

¹⁶ Notə'ətezə beṇə' chso'onlilažə' Cristən' šə lao family çhega'aque'enə' nita' no'ol ca' bagwsa'at ben' çhega'aque', cheyalə' so'one' lega'aque' mantener par niç beṇə' ca' çhəsə'ədopə çhəsə'əžag chso'elaogüe'e Jesocristən' bito so'one' lega'aque' mantener, sino so'one' mantener no'ol ca' zjənaquə doalje gozəbə.

¹⁷ Beṇə' ca' bagwlejle par zjənaque' beṇə' golə beṇə' blaolə la' le'e chonlilažə'əle Cristən' šə chso'one' binlə de'en ngo'o lao na'aga'aque' so'one', zjəzaque'e par gaple lega'aque' respet na' par çhixjwle çhe gast çhega'aque'enə', na' mazəchlə šə noe' çhesə'əyixjui'e xtižə' Diozən' na' choso'osed choso'olo'ine' bi zejennə'. ¹⁸ Zjəzaque'e par gonle ca' la' nyojan le'e Xtižə' Diozən' nan: "Bito əgwseyjwle cho'a go'on ca' par niç cui gaquə sa'ob

žlac choso'olej choso'ošoşjəb trigon' par chchoj xeinə'." Na' leczə nyojəñ nan: "To beñə' güen žin cheyałə' si'e laxjue'."

¹⁹ Bito gono' cas šə no gao xyan' contr to beñə' golə beñə' blao lao le'e chonlilažə'əle Cristən' šə cui zo yeto o yechopə testigw beñə' əso'e dižə' de que de'e malən' chon be'ena'. ²⁰ Pero šə de'e li chone' de'e malən', cheyałə' tiło'one' lao yoguə' beñə' ca' chəsə'ədopə chəsə'əžag chso'elaogü'e Jesocristən' par niç yeziquə'əchlə beñə' ca' chso'elao' Jesocristən' yesə'əžebe' so'one' de'e malən'.

²¹ Diozən' na' Xancho Jesocristən' na' angl beñə' ca' zjənchoj par chso'one' mendad che Diozən' zjənaque' testigw chia' de'en chona' mendad gono' can' bagwnia' le' le'e cart nga. Tozəczə can' gono' len notə'ətezə beñə', ni toe' cui gono' xench. ²² Bito yob cuejo' notə'ətezə beñə' par gaque' beñə' golə beñə' blao lao le'e chonlilažə'əle Cristən', la' šə əxope' gone' de'e mal lenczə' le' gapo' dolə' šə ca'. Ben par niç gactezə gaquə yichjla'ažda'ogo'onə' xi'ilažə'.

²³ De'en chacsəndo' telizə, bitoch ye'ejo' slezə nis, sino güe'ej latə' bino par niç gaquəlenən li'onə'.

²⁴ Nachiaxəjə de'e mal de'en chso'on bałə beñə' antslə ze'e əžin ža əsa'aque' castigw che xtolə'əga'aque'ena'. Pero na' yebəle' bito yob gacbe'icho šə chso'one' de'e mal. ²⁵ Na' leczə can' naquən len beñə' chso'on de'e güennə'. Bałə' nachiaxəjə de'e güennə' chso'one', na' yebəle' bito nachia' pero gwžin ža la'alaon.

6

¹ Yoguə' mos beñə' ca' chso'onlilažə' Cristən' cheyałə' əsa'ape' xanga'aque'ena' respet, par niç xanga'aque' ca' bito yesə'əne' contr Diozən' ben' cho'ela'ochə na' contr de'en chsed chlo'icho. ² Na' šə xanga'aque' ca' leczə chso'onlilažə'e Cristən', mos ca' bito cheyałə' so'one' xbab cui yoso'ozenague' čhega'aque' por ni che de'en zjənaque' txen chso'onlilažə'e Cristən'. Mazəchlə cheyałə' so'one' žinnə' do yichj do lažə'əga'aque' chedə' xanga'aque' beñə' ca' chso'one' žin čei chso'onlilažə'e Cristən' na' Diozən' chaquene' čhega'aque'. Gwdixjue'e de'e ca' babzejni'ida' le' na' bsd blo'in.

Cheyałə' socho content len de'e de checho laogüe de'en chonlilažə'əcho Jesocristən'

³ Nita' beñə' choso'osed choso'olo'ine' dižə' de'en cui zdan lebe len de'en bagwnia' le' na' len dižə' güen che Xancho Jesocristən' na' len bitə'ətezəchlə de'en chzejni'icho beñə' par chso'elaogüe'e Diozən'. ⁴ Beñə' ca' choso'osed choso'olo'ine' clełə chso'on cuingə'aque' xen chsa'aquene' zjəneze' len la' bitobi chse'ejni'ine'. Beñə' ca' chso'on ca' con zjəchi' yichjga'aque' chesə'ədilə chesə'əšašlene' beñə' yoblə, na' chso'e dižə' che no pont dao' de'en choso'osed choso'olo'ine' de'en cui naquə de'e žialao. De'en chesə'ədilə chesə'əšaše' che bizə de'en nac ca' chonən par niç chsa'acxi'i ljuežjga'aque', na' chsa'acyože' beñə', na' choso'ožia chso'onite'e beñə', na' chso'one' xbab mal che beñə', ⁵ na' chesə'əža'a ljuežjga'aque' toe' yetoe'. Beñə' ca' chso'on ca' choso'ozenague' che la'žda'omalga'aque'ena' na' bito zjənombi'e de'en naquə de'e li. Malən' chso'one' choso'osed choso'olo'ine' che Diozən' parzə niç so'one' gan. Bito gono' txen len beñə' ca' chso'on ca'. ⁶ De'e ličzə de'e xen de'e zedegua'an par chio'o šə cho'ela'ochə Diozən' na' šə zocho mbalaz len de'e dao' de' čhecho. ⁷ Can' na' dicho nga: "Ga'alchon' catəñ bla'acho yežlyo nga na' ga'alchon' yeza'acho." ⁸ Cheyałə' socho mbalaz šə de de'en che'ej de'en chaochə, na' šə de xala'ancho, na' gan' chtascho. ⁹ Beñə' ca' zjəchi' yichjga'aque' gatə' de'e zan šinlazga'aque', de'e zan bien čhega'aque' o mech

xen čhega'aque' choso'ozenague' che de'e malən'. Can' chac chesə'əxope' lao na' gwxiye'en. Choso'ozenague' che la'ažda'omalga'aque'enə' par chso'one' de'e zan de'e cui zjazaquə' na' de'en chso'on mal len lega'aque'. Beṇə' ca' chso'on ca' yesə'əbiayi'e na' əsa'aque' castigw zejlicane. ¹⁰ La'ažda'omalchon' gwzenaguən che bitə'ətezə de'e mal šə chebeichgüeicho mechən'. Baḷə beṇə' de'en chesyə'əbeichgüeine' mechən' bagosə'əbejyichje' dižə' li che Diozən' na' de'e zan de'en chesə'əžaglaogüe' yelə' güen de'e mal čhega'aque'enə'.

Cheyalə' cuec yichjcho goncho xšin Diozən' do yichj do lažə'əcho

¹¹ Pero na' le' naco' beṇə' güen xšin Diozən', bito yebeido' de'e ca' zjənac ca', sino güe'elažə'o gono' de'en naquə güen lao Diozən', na' šejəch goncho' can' chene'ene'enə' na' gonlilažə'əcho'one', na' gaquəchdo' che' na' che beṇəchən', na' sotezə so' gonlilažə'o Diozən' catə' de de'e saquə'əzi'o, na' gaquəcho' beṇə' gaḡjwlažə'. ¹² Ca to deportist chone' do yichj do lažə'e yoguə' de'en cheyalə' gone' par nič si'e premio, le'egatezə ca' le' gwlec yichjo' ben xšin Diozən' do yichj do lažə'o laogüe de'en chonlilažə'one'. Gwlec yichjo' de'en žjəyze' len Diozən' zejlicane čhedə' Diozən' gwleje' le' par žjəyze' len le', na' bi'o dižə' li lao beṇə' zan de que chonlilažə'one'. ¹³ Ca'aczən' be' Jesocristən' dižə' li lao Ponsio Pilatən' de que chonlilažə'e Diozən'. Na' na'a lao Jesocristən' na' lao Diozən' ben' chnežjo yelə' mban che beṇəchən', na' bia chsa'aš, na' biquə'əchlə de'e zjəmban, ¹⁴ chona' mendad gono' yoguə' de'en nezdə' chene'e Diozən' gono'. Benən xte ca yidə Xancho Jesocristən' de'e yoblə par nič notono gaquə əna de que cui chono' can' chene'e Diozən'. ¹⁵ Yidə Jesocristən' de'e yoblə catə' əžin ža əžin or əgwžia Diozən' bia' yide'. Tozə Diozən' chnabi'e doxenlə, na' le'ena' cho'ela'ocho. Le'ena' naque' Rei ben' chnabia' yoguə' rei ca' yelə', na' naque' Xancho ben' chnabia' yoguə' beṇə' gwnabia' ca' yelə'. ¹⁶ Tozə le' chone' chio'o yelə' mban zejlicane na' tant yo'o yelə' chey che'eni' che'ena' gan' zo'ena' xte notono nochlə gaquə bigue'e gan' zo'ena'. Notono beṇə' lao yežlyo nga ne'e le'ine' le' na' notono no gaquə le'ine' le'. Cheyalə' güe'ela'ochone' la' le'ena' chnabi'e zejlicane. Na' can' gonšgaczcho.

¹⁷ Na' ca naquə beṇə' ca zjənaque' beṇə' gwni'a yežlyo nga, ben mendad bito əsa'aque' beṇə' ya'alazə', na' bito so'one' xbab nite'e mbalaz por ni che yelə' gwni'a čhega'aque'enə' čhedə' ca naquə yelə' gwni'anə' de'e te čhein'. Cheyalə' nite'e lez gon Diozən' ca nite'e mbalaz, la' le'ena' chone' chio'o yoguə' de'en naquə de'e güen par nič yebeichon. ¹⁸ Beṇə' gwni'a ca' cheyalə' cue' yichjga'aque' par so'one' porzə de'e güen, so'one' de'en chebei Diozən', yesə'əchine' xmechga'aque'enə' par əsa'aclene' beṇə', na' bito əsa'aque' beṇə' rgüin. ¹⁹ Šə bač chso'one' ca', bachso'one' can' chene'e Diozən' gon chio'o de yelə' mban zejlicane čhecho na' gaquəlenən lega'aque' tyemp de'en zeza'.

Yeto de'en gože' Temtion'

²⁰ Temtio dao' gwlecchgua yichjo' yoguə' de'en babzejni'i Diozən' le'. Bitobi cas gono' che bitə'ətezə de'en yesə'əna beṇə' ca' chso'onlaza' chəsə'əne' de que xtižə'əga'aque'enə' naquən de'e sin', čhedə' bitobi zaquə'ən lao Diozən'. ²¹ Beṇə' ca' chesə'əna ca' bagosə'əbejyichje' dižə' li che Diozən' na' bitoch chso'onlilažə'ene'.

Na'a ža gaquəlenšga Diozən' le'. De'e na'azən' chzoja'. *Pab*

Cart Egwchope De'en Bzoj San Pabən' Par Temtion'

Pabən' chzoje' Temtion'

¹ Nada' Pab naca' apostol che Jesocrisṭən' con can' gwnalažə' Diozən'. Gwleje' nada' par naca' apostol par niḥ chyixjui'a can' bene' lyebe de que gata' yelə' mban zejlicane che notə'ətezə beṇə' gonlilažə' Jesocrisṭən'. ² Na' chzoja' le' Temtio dao', len' banona' ca xi'ina'. Chona' orasyon chṇaba' lao Xacho Diozən' na' lao Xancho Jesocrisṭən' əsa'aclenšgue' le' na' yesyə'əyašə' yesyə'əzi'ilažə'e le' na' so'onšgue' ca so cuezo' binlo len xbab de'en yo'o lo'o yichjla'ažda'ogo'onə'.

Cheyalə' güe'echo dižə' che Jesocrisṭən'

³ Do yichj do laža'a cho'elaogua'a Diozən' can' gwso'on de'e xaxtaogua'a ca', na' nəzda' lo'o yichjla'ažda'ogua'an de que chona' can' chazlažə' Diozən'. Na' yogua' laste catə' chona' orasyonṇə' cho'a yelə' choxcwlen che' par le'. ⁴ Chjza'alaza'a can' gwchežo' catə' beza'a gan' zo', teža na' še'elə chze-lažə'əchgua' le'i ljuežjcho par niḥ yebeichgüeida' lo'o yichjla'aždaogua'an. ⁵ Na' chona' xbab can' chonlilažo'o Diozən' do yichj do lažo'o can' chso'on xna'agolo' Loida na' xna'o Eunise bedote, na' zoa' segor de que chonlilažo'one' can' chso'on lega'aque'.

⁶ De'e na'anə' chṇeyoida' le', ben xte ga zelao saquə'ədo' par gono' ca de'en ben Diozən' lao na'o gono' catə'an bxoə na'ato'onə' yichjo'onə' par blo'eto' de que Diozən' gwleje' le' par gono' xšine'enə'. ⁷ Diozən' babene' chio'o Spirit che'enə' zon lo'o yichjla'ažda'ochon'. De'e na'anə' bito cheyalə' žebcho. Na' de'en zo Spirit che'enə' len chio'o, nəzecho chaclen Diozən' chio'o len yelə' guac che'enə' na' chactezə chaquecho che ljuežjcho na' chnabia' cuincho par choncho can' chazlažə' Diozən'. ⁸ De'e na'anə' bito yeto'ido' go'o xtižə' Xancho Jesocrisṭən' na' nic yeto'ido' chia' de'en naca' pres laogüe de'en chyixjui'a xtiže'enə'. Cheyalə' co'o gwchejlažə'əcho əžaglaochi ca de'en gac checho laogüe de'en chyixjue'echo dižə' güen dižə' cobə che Jesocrisṭən', na' Diozən' gaqualene' chio'o len yelə' guac che'enə' catə'an əžaglaochi. ⁹ Catə' cuiṇə' xe yežlyon' Diozən' bsi'e xneze gwleje' chio'o par naccho lažə' ne'enə'. Na' catə' gwzolao benlilažə'əcho Jesocrisṭən' Diozən' bebeje' chio'o xni'a de'e malən'. Na' de'en gwleje' chio'o par naccho lažə' ne'enə', bito bene' ca' por ni che bilə de'e güenṇə' bencho. Gwleje' chio'o chedə' nzi'ilažə'e chio'o. ¹⁰ Diozən' bablo'ine' chio'o can' nzi'ilažə'e chio'o de'en bsele'e Jesocrisṭən' ben' bebej chio'o xni'a de'e malən'. Jesocrisṭən' na'anə' bene' par niḥ əžin ža cuezə yelə' gotən'. Na' de'en chejle'echo dižə' güen dižə' cobə che'enə' nəzecho de que deczə yelə' mban zejlicane checho.

¹¹ Diozən' gwleje' nada' par niḥ əchyixjui'a dižə' güen dižə' cobə che Jesocrisṭən' na' par niḥ naca' apostol che'enə' na' chsed chlo'ida' xtiže'enə' beṇə' ca' cui zjənaqua beṇə' Izrael. ¹² Na' de'en chsed chlo'ida' xtiže'enə' de'e na'anə' chžaglaogua' nga. Pero bito cheto'ida' che de'en chžaglaogua' dia' ližya nga, chedə' nombi'a Diozən' ben' chonlilažə'a. Baben cuina' lao ne'enə' na' nəzda' de que nape' yelə' guac par gone' ca sotezə soa' gonlilažə'ane' xte catə'əch əžin ža yidə Jesocrisṭən' de'e yoblə.

¹³ Gwnaošga yogua' de'en babsed bablo'ida' le', la' lennə' naquən güen, na' bito cuejyichjo' de'en chonlilažo'o Jesocristán' na' de'en chacdo' che' na' che benačan'. ¹⁴ Be' latjə gaquəlen Spirit che Diozən' le' par nič sotezə so' əgwsed əgwlo'ido' dižə' li de'en babzejni'ida' le', cheda' Spirit nan' zon lo'o yichjla'ažda'ochon'.

¹⁵ Nezdə de que Figelon' na' Ermogenesən' na' yezan beṇə' ljuējžcho ca' nitə' Asian' bagosə'abejyichje' nada'. ¹⁶ Pero na' Onesiforon' bito beto'ine' chia' de'en dia' ližya nga, sino btipe' laža'a zan las. Xancho Diozən' gwlo'ešgue' can' nži'ilaže'e le' na' family che'enə'. ¹⁷ Catə' bide' Roma nga bene' byen beyilje' nada' na' beželene' nada' dia' ližya nga. ¹⁸ Na' nezdə can' goclenchgüe' nada' Efeson'. Chṇaba' lao Xancho Diozən' əgwlo'ine' le' can' nži'ilaže'ene' catə' əžin ža choglaə Xancho Diozən' che yogua' beṇə' šə zjənapə' dolə' o šə cui zjənapə' dolə'.

2

Cheyalə' co'ə gwčhejlažə'əcho len de'en əžaglaəcho lao goncho xšin Jesocristán'

¹ Na'a xi'indaogua'a, de'en chaclen Jesocristán' le' benčhechlažo'o ben xšine'enə'. ² Na' yogua' de'en babsed bablo'ida' le' lao beṇə' ljuējžcho zan ca', bsed blo'in beṇə' ca' nitə'ətezə nite'e chso'one' complir can' cheyalə' so'one', beṇə' gaquə yoso'osed yoso'olo'ine'en beṇə' yoblə.

³ Bguo'o bčhej len bitə'ətezə de'en əžaglaəgo' lao gono' xšin Jesocristán' par nič ca' saquə'əlebado' ca to soldad gual. ⁴ Nezecho de que notono beṇə' gaquə gone' xšine' žlac zde' yelə' soldadən', cheda' cheyalə' gone' con can' na ben' chnabia' le'. ⁵ Na' nezecho de que ben' naquə deportist bito gaquə si'e premio šə bito chzenague' che yogua' reglas ca' catə'an chytje'. ⁶ Na' leczə nezecho de que ben' chelalə chon žin yixə'anə' chzi'e part nech che cwsešən' par cuine' antslə ze'e chnežjue' che beṇə' yoblə. ⁷ Ben xbab che de'en chzejni'ida' le', na' Xancho Jesocristán' gaquəlene' par nič šejni'ido' can' cheyalə' gono' xšine'enə'.

⁸ Na' ben xbab che Jesocristán' ben' goljə yežlyo nga lao dia' che de'e Rei Dabin', na' bebane' ladjo beṇə' guat ca' can' chyxjui'a dižə' güen dižə' cobə che'enə'. ⁹ Na' de'en chyxjui'a dižə' güen dižə' cobə che'enə' de'e na'anə' chžaglaəgua' na' dia' ližya nga ca to beṇə' mal juisy. Pero la'anə'əczə nada' dia' ližya nga, bitobi gaquə so'on beṇə' par nič cui gasə' laljə xtižə' Diozən' doxenlə. ¹⁰ La'anə'əczə chžaglaəgua' nga zotezə zoa' chyxjui'a xtižə' Diozən'. Chyxjui'an par nič yeziquə'əchlə beṇə' bagwlej Diozən' par əsa'aque' xi'ine' so'onlilaže'e Jesocristán'. Na' šə so'onlilaže'ene', yebeje' lega'aque' xni'a de'e malən' na' gwnežjue' lega'aque' yelə' mban zejlicane. ¹¹ Dižə' quinga zjənaquən de'e li:

Šə ngodə'əcho txen len Cristən' ca de'en gwso'ot beṇə' le',
leczə ngodə'əcho txen len le' ca de'en bebane' ladjo beṇə' guat ca' par nič
zjəyezocho len le'.

¹² Šə chio'o chonlilažə'əcho Cristən' chgo'o chčhejlažə'əcho catə'an chžaglaəcho,
leczə nabi'əcho txen len le'.

Šə cuejyichjcho Cristən' leczə ca' le' cuejyichje' chio'o.

¹³ Na' la'anə'əczə šə chio'o cui goncho complir can' nacho goncho, bia'aczə zo
le' gone' con can' ne'enə',
la' naquəcze' beṇə' chon complir len bitə'ətezə de'en ne'.

Can' goncho xšin Jesocristán' binlə

14 Ben par nič beṇə' ljuēžjcho ca' chso'onlilažə' Cristən' žjəsyə'əzalaze'e de'e ca' bagwnia', na' ben mendad cui yesə'ədilə yesə'əšaše' entr ljuēžjga'aque' por ni che bizə dižə' de'e cui zeje. Xancho Diozən' naque' testigw can' chso'one'. Na' šə yesə'ədilə yesə'əšaše' beṇə' ca' choso'ozenag čhega'aque' cui se'ejle'e xtižə' Diozən'. 15 Bentezə ben xte ga zelao saquə'ədo' par nič yebei Diozən' can' chono'onə' na' par nič bito gaquə'ədo' zto' de'en chono' xšine'enə'. Na' əgwsed əgwlo'ido' cayanə'an zeje xtižə' Diozən'. 16 Bitobi cas gono' che bitə'ətezə dižə' de'en yesə'əna beṇə' de'en cui naquə de'e zaque'e lao Diozən', čhedə' dižə' ca' chxoayaguən beṇə' par nič chyalə'əch chso'onche' de'e malən'. 17 Na' xtižə' beṇə' ca' choso'osed choso'olo'i de'e ca' zjanac ca' chonən par nič beṇə' ca' choso'ozenag čhega'aque' chəsə'əbejyichje' de'en chso'onlilažə'e Cristən', ca chen de'en naquə mal chytjən doxen lao cuerp čhechon' na' chžiyi'in len. Imeneon' na' Fileton' choso'osed choso'olo'ine' dižə' güenlažə' de'en nac ca'. 18 Lega'aque' bagosa'əbejyichje' de'en naquə de'e li čhedə' choso'osed choso'olo'ine' de que chio'o chonlilažə'əcho Cristən' babebancho ladjo beṇə' guat ca' ca de'en bocobe' yichjla'ažda'ochon' na' cuat əžin ža yolis yosbane' chio'o len cuerp čhechon'. Na' de'en choso'osed choso'olo'ine' ca', bałə beṇə' chso'onlilažə' Cristən' chsa'aczejlažə'e šə xtižə' Cristən' naquən de'e li. 19 Chio'o chonlilažə'əcho Cristən' gwxaquə'əlebecho ca to lan yo'o de'en naquə de'e gual. Na' nyoj Xtiže'enə' čhecho nan: "Diozən' ņezene' non' zjanaquə xi'ine'." Na' leczə nyojən nan: "To to beṇə' chesə'əne' de que chso'onlilažə'e Xancho Diozən' cheyalə' yesə'əbejyichje' cuich so'one' de'e malən'."

20 Nezecho de que lo'o liž beṇə' gwni'a ca' zjəde no yesə' xguaguə na' no ša' de or na' de plət, na' leczə zjəde no xguaguə na' no ša' de yag na' de gon'. Bałən chso'onən žin par len de'en zjanaquə xoche na' yebałən chso'onən žin par len de'en zjanaquə de'e zban. 21 Notə'ətezcho šə bito naocho de'en choso'osed choso'olo'i beṇə' güenlažə' ca' gwxaquə'əlebecho ca to yesə' o to xguaguə de'e chon žin len de'en naquə xoche čhedə' guaquə goncho xšin Cristən' de'en zaquə'əchgua. La' šə cui naocho de'en choso'osed choso'olo'i beṇə' güenlažə'əna' nacheṇ' guaquə gon cuincho lažə' na' Diozən' na' socho probnd par goncho bitə'ətezə de'e güen de'en chene'e Cristən' goncho.

22 De de'en chene'e la'ažda'omalchon' goncho žlac ņe'e naccho beṇə' xcuida', pero le' bito gono' bitə'ətezə de'e ca'. Be'elažə' ben de'en naquə güen lao Cristən', na' gwzotezə gwzo beṇlilažə' le', na' goque che ljuēžj beṇəcho', na' leczə gwzo gwlezə binlo len lega'aque'. Be'elažə' ben yoguə de'e ca' can' chso'on yeziquə'əchlə beṇə' chso'onlilažə' Xancho Cristən' beṇə' ca' zjanaquə yichjla'ažda'oga'aque'enə' xi'ilažə'. 23 Bito əgwzenago' che beṇə' ca' zjančhoj yichjla'ažda'oga'aque'enə' na' chesə'ədilə chəsə'əšaše' por ni che bizə dižə', čhedə' šə əgwzenagcho che dižə' ca' zjanac ca' gonən par nič gaquə'əyožcho beṇə'. 24 Chio'o naccho beṇə' güen xšin Xancho Cristən' bito cheyalə' tiłə gwšəšlencho beṇə'. Cheyalə' goncho güen len yoguə beṇə', na' cheyalə' ņezecho nac əgwsed əgwlo'icho beṇə' xtižə' Diozən' binlo, na' cheyalə' co'o gwčhejlažə'əcho bitə'ətezə de'en chso'one beṇə' chio'o. 25 Cheyalə' gaccho beṇə' gačjwlažə' catə' güe'echo consejw beṇə' ca' chso'onczə yichjlaoga'aque' cui chse'ejle' dižə' li che Cristən'. Šə can' goncho, de repent gaquələn Diozən' lega'aque' par nič yesyə'ədinjene' xtolə'əga'aque'enə' na' sa'acbe'ichene' de'en naquə de'e li. 26 Na' šə yesyə'ədinjene' xtolə'əga'aque'enə' yesyə'əchoje' xni'a gwxiye'en gan' nite'e ņa'a chso'one' con can' chazlažə'ənnə'.

3

Naquən' so'on beṇə' catə' bazon yidə Xancho Cristən' de'e yoblə

1 Cheyalə' šejni'ido' de que catə' bazon yidə Xancho Cristən' de'e yoblə, lechuale' de'e zan de'e žaglao chio'o chonlilažə'əchone'. 2 Ca tyemp na' nitə'əchgua beṇə' yesyə'əbeine' so'onchgüe' con can' na la'ažda'omalga'aque'enə', na' yesyə'əbeichgüeine' mech, na' so'elao' cuinga'aque', na' sa'alaze'e. Yoso'ožia yoso'onite'e beṇə' na' Diozən', na' bito yoso'ozenague' che xaxna'aga'aque'. Bito so'e yelə' choxcwlen che Diozən' na' bito sa'ape'ene' respet. 3 Na' xte bito güe'en latjə əsa'aque'ne' che beṇə' yoblə, əsa'aque' beṇə' ggo'olažə', əsa'aljažə'e par yoso'oxie' gwdilə, bito gaquə yesə'əbeze' cuich so'one' bitə'əteze de'e malən' de'en nan so'one'. So'one' znia len ljuəzjga'aque' can' chso'on bia yixə', na' yesə'əgüe'ine' bitə'əteze de'en naquə de'e güen. 4 Yesə'əxoayague' beṇə' parzə nich yoso'odie' lega'aque' lao na' beṇə' contr chega'aque' ca', na' yesə'əne' dižə' loc dižə' lžej na' so'onteze' de'e malən' sin cui bi xbab so'one'. So'on cuinga'aque' xen, na' yesyə'əbeine' so'one' legr lguə'a əsa'aque' che Diozən'. 5 Na' so'one' ca əsa'aque beṇə' yeziquə'əchlə de que chso'elaogüe'e Diozən', pero bito so'e latjə yocobə Diozən' yichjla'ažda'oga'aque'enə'.

Bito gono' txen len beṇə' ca' so'on de'e ca' bagwnia'. 6 So'one' can' chso'on balə beṇə' ca' chja'ac liž beṇə' par choso'osed choso'olo'ine' dižə' güenlažə'. Na' choso'oxoayague' no'ol ca' chsa'ac šayečə šayen len xtižə' Diozən', no'ol ca' nyan xtolə'əga'aque'enə'. Choso'ozenagtezə no'ol ca' che bitə'əteze de'en na la'ažda'omalga'aque'enə' so'one'. 7 De'e na'anə' choso'ozenague' che notə'əteze beṇə' goxoayag, bitə'əteze de'en choso'ozejni'ine' lega'aque', na' bito chžin ža əse'ejni'ine' de'en naquə de'e li. 8 Can' gwso'on de'e Janes na' de'e Jambres contr de'e Moizezən' catə'ən cui gwse'enene' yoso'ozenague' che dižə' li de'en be'elen de'e Moizezən' lega'aque', leczə can' chso'on beṇə' goxoayag quinga' contr Diozən' por ni che de'en cui choso'ozenague' che dižə' li che'enə'. Zjənčhol' yichjla'azda'oga'aque'enə' yelə' güen de'e mal chega'aque'enə' na' bito chso'onlilažə'e Diozən' par yebeine' lega'aque'. 9 Pero caguə yosə'əxoayague' beṇə' sša, la' əžin ža catə' yoguə' beṇə' sa'acbe'ine' de que zjənčhol' yichjla'ažda'oga'aque' na'anə' can' gwsa'acbe'i beṇə' de que gosə'əchol' yichjla'aždao' de'e Janesən' na' de'e Jambresən' catə'ən gwso'one' contr de'e Moizezən'.

Consejw le'ezelaogüe de'en bzoj Pabən' par Temtion'

10 Na' le' Temtio, banəzdo' binlo yoguə' de'en chsed chlo'ida' che Diozən', na' yoguə' can' chona'. Nezdə' can' chi' yichja' par nich gona' porzə de'en chazlažə' Diozən'. Nezdə' can' zotezə zoa' chonlilažə'a Diozən' na' can' chgo'o chchejlažə'a len de'en chy'i chzaca'a. Nezdə' can' zotezə zoa' chacda' che Diozən' na' che benəçən', na' can' bito chbejəyichja' xšin Diozən' catə' choso'oçhi' choso'osaquə' beṇə' nada'. 11 Nezdə' can' bosə'oçhi' bosə'osaque'e nada' catə'ən gwzochə Antioquian' na' Iconion' na' Listran', na' nezdə' bichlə de'en babžaglaogua'. Na' leczə nezdə' can' bosla Xancho Cristən' nada' lao yoguə' de'e ca' bžaglaogua'. 12 De'e li nitə' beṇə' yoso'oçhi' yoso'osaque'e notə'ətezcho ngodə'əcho txen len Cristo' Jeso'osən' na' chi' yichjcho chzenagcho che Diozən'. 13 Na' ca naquə beṇə' mal ca' na' beṇə' goxoayag ca' zja'aque'che' so'onche' de'e malən'. Yoso'oxoayague' beṇə' yoblə na' se'ejle'e che dižə' güenlažə' de'en soe' beṇə'.

¹⁴ Pero ca naco' le' Temtio dao', gwzotezə gwzo bzenag che yoguə' de'en bachejni'ido' che Cristo Jeso'osan' na' de'en bachejli'o' chei, la' nezcado' noquə'əto'on bzejni'ito'on le'. ¹⁵ Dezd xcuidə'atio'onə' nombi'o' Xtižə' Diozən' de'en nyojan. Na' Xtižə' Diozən' de'en nyojan chzejni'in chio'o de que cheyalə' gonlilažə'əcho Cristo Jeso'osan' par ničh Diozən' yebeje' chio'o xni'a de'e malən'. ¹⁶ Cuiñ Diozən' bzejni'ine' beñə' ca' bosozoj Xtiže'enə' xbab che'enə' par ničh ca' bosozoje'en. De'e na'anə' doxen Xtižə' Diozən' de'en nyojan zaquə'əchguan par chzejni'in chio'o che Diozən', na' par chdilən chio'o catə'an choncho de'e malən', na' par chonən chio'o consejw, na' par chzejni'in chio'o naquən' goncho de'en naquə' güen lao Diozən'. ¹⁷ Xtižə' Diozən' de'en nyojan chaclenən chio'o chzenagcho che Diozən' par ničh ca' chnezecho yoguə'əloł de'en cheyalə' ənezecho par sotezə socho goncho yoguə' claste de'en naquə' güenə'.

4

¹ Yidə' Xancho Jesocrisən' de'e yoblə dechoglaogüe'en naquən' gaquə' che to to beñəch beñə' ne'e zjəmban na' beñə' bagwsa'at, na' techlə nabi'e. Na' Temtio dao', Jesocrisən' na' Xacho Diozən' zjənaque' testigw chia' de que chona' mendad ² sotezə so' chixjui'o' xtižə' Diozən'. Gwdixjue'en catə' nlatjo' na' catə' chacdo' cui nlatjo'. Be'elen beñə' dižə' par ničh yesə'ənezene' de que de'e malən' chso'one', gwdiləga'aque' che de'e malən' chso'one' par ničh yesyə'ədinjene'en, be'ega'aque' consejw, na' gwzotezə gwzo bzejni'iga'aque' sin cui žjəxaquə'əlažo'o. ³ Gwžin ža catə' cuich əse'ene beñəchən' yoso'ozenague' che no əgwzejni'i lega'aque' de'en naquə' de'e güen. De'e na'anə' yoso'otobe' beñə' zan beñə' yoso'osed yoso'olo'i lega'aque' dižə' de'en chesyə'əbeine'. ⁴ Yesə'əbejyichje' cuich yoso'ozenague' che dižə' lin' na' yoso'ozenagzeche' che dižə' güenlažə' de'en chsa'aljažə' beñə'. ⁵ Pero ca naquə' le' ža, do tyempte gwnabia' cuino' par gono' can' chazlažə' Diozən', na' gwzotezə gwzo bguo'o bchejlažə' catə'an de de'e chžaglaogo', na' gwzotezə gwzo be' dižə' güen dižə' cobə' che Jesocrisən', na' ben doxen de'en baben Diozən' lao na'onə' gono'.

⁶ Gwzotezə gwzo ben xšin Diozən', chedə' la' bazon baözə so'ote' nada' na' žjəyzoa' len Diozən'. ⁷ Nada' babena' xte ga zelao gwxaquə'əda' par chona' can' chazlažə' Diozən'. Babena' yoguə'əloł de'en ngo'o Diozən' lao na'a gona', na' zotezə zəa' chonlilažə'a Jesocrisən'. ⁸ Na' catə' žjəyzoa' len Diozən', gone' par ničh soa' mbalaz chedə' bentezə beñə' de'e güen laogüe'enə'. Xancho Jesocrisən' zdacze' licha na' catə' əžin ža əne' bin' gaquə' che yoguə' beñəchən', caguə' nada'əzan' soa' mbalaz, lecžə' mbalaz nita' notə'ətezəchlə beñə' chesyə'əbeine' nite'e lez yidə' Jesocrisən' de'e yoblə.

De'en chene'e Pabən' gon Temtion'

⁹ Ben byen par ničh yob yido' nga. ¹⁰ Nia' ca' chedə' Demasən' bagwlejyichje' nada' na' bazjəyede' Tesalonican' de'en chi'ichgua yichje' bin' gatə' che' lao yežlyo nga. Na' ca' naquə' beñə' ca' yelə' ža, Crescentən' bazde' Galasian', na' Titor' bazde' Dalmasian'. ¹¹ Yetoga Locasən' nga'anlene' nada'. Che'esgo' Marcon' catə'an yido', la' lechguale chaclenə' nada'. ¹² Babselə'a Tiquicon' Efeson'. ¹³ Na' catə' yido' goxə'əšgo' xadon' chia' de'en bocua'əna' Troasən' liž Carpon', na' bexə' libr ca' pero na' de'e žialao xench bexə'əšga rollos ca' de'en zjənyoj.

¹⁴ Ljandr ben' chon žin len cobre babenchgüe' contr nada'. Xancho Diozən' əgwnežjue' le' castigw che de'en babene'. ¹⁵ Gapəšgo' cuidad len le', la' babenchgüe' contr nada' par niç cui çhiçjui'a xtižə' Diozən'.

¹⁶ Catə' bosə'odie' nada' lao jostis ca' de'e nech, ni tozə cui no bidə par əne' fabor nada'. Yoguə' beṇə' ca' bena' xbab əne' fabor nada' gosə'əbejyichje' nada'. Chona' orasyon lao Diozən' chṇaba' yezi'ixene' çhega'aque' de'en gosə'əbejyichje' nada'. ¹⁷ Bia'aczə zoczə Xancho Diozən' len nada'. Len' goquəlene' nada' par niç bi'a xtiže'enə' clar na' bene' par niç zan beṇə' cui zjənaquə beṇə' Izrael gwse'enene' xtiže'enə'. Na' Xancho Dioz na' bosle' nada' lao na' beṇə' contr chia' ca'. ¹⁸ Na' nezdə' goslaczə Xançon' nada' lao bitə'ətezə de'e gaquə chia', na' əgwcuasə' gwcue'ejcze' nada' len de'e malən' par niç žjəyzoa' len le' gan' chnabi'e. Ledoye'ela'oche' ṇa'a na' zejlicəne. Na' can' gonšgaczcho.

Chguape' diox yeto çhope' na' chṇablaže'e gaquəlen Diozən' lega'aque'

¹⁹ Eguapšgo' Priscan' na' be'en che' Aquilan' diox, na' leczə family che Onesiforon'. ²⁰ Eraston' bega'əne' Corinton', na' bocua'əṇa' Trofimón' syoda Mileton' chacšenene'. ²¹ Ben xte ga zelao saquə'ədo' par yido' antslə ze'e gaquə zag. Leczə Eubolon' chguape' le' diox, len Podenten', na' Linon' na' Claudian' na' len yoguə' beṇə' biša'əcho ca' nitə' nga.

²² Xancho Jesocristən' gaquəlenšgue' le' len xbab de'en yo'o lo'o yichjla'ažda'ogo'onə', na' gaquəlenšgue' yoguə'əle. De'e na'azən' chzoja'. *Pab*

Cart De'en Bzoj San Pabən' Par Titon'

Pabən' chzoje' Titon'

¹ Nada' Pab naca' beṇə' güen xšin Diozən' na' naca' apostol che Jesocrisṭən'. Diozən' gwleje' nada' niḥ chyixjui'a xtiže'ena' len beṇə' ca' bagwleje' par əsa'aque' xi'ine', par niḥ so'onlilaže'ene' na' se'ejni'ine' de'en naquə de'e li na' par niḥ so'one' can' chene'e Diozən'. ² Na' chaquəlenga'aca'ane' par niḥ yesə'əneze'ne' de que žjəsyə'anite'e len Diozən' zejlicane. Ze'e xe yežlyon' Diozən' bene' lyebe de que beṇə' so'onlilažə' le' žjəsyə'anite'e len le' zejlicane. Na' nezecho de que bito chonlažə' Diozən'. ³ Na' na'a catə' bžin ža bžin or can' bžie' bia'anə', Diozən' ben' babebej chio'o xni'a de'e malən' bzejni'ine' chio'o dižə' güen dižə' cobə che'enə'. Na' gwleje' nada' na' bene' mendad chixjui'an len beṇə' yoblə. ⁴ Chzoja' le' Tito, len' naco' ca doalje xi'ina' chedə' bzejni'ida' le' par niḥ chonlilažo'o Xancho Jesocrisṭən' can' chonlilaža'ane' nada'. Chona' orasyon lao Xacho Diozən' na' lao Xancho Jesocrisṭən' ben' babebej chio'o xni'a de'e malən', chnaba' əsa'aclenšgue' le' na' yesyə'əyašə' yesyə'əži'ilaže'e le' na' so'onšgue' par niḥ so cuezo' binlo len xbab de'en yo'o lo'o yichjla'ažda'ogo'onə'.

Xšin Diozən' de'en chon Titon' gan' nzi' Creta

⁵ Bocua'ana' le' Cretan' par niḥ yeyož gono' xšin Diozən' de'en gwzo-laogua' beṇə'. Na' leczə' beṇə' mendad cuejo' beṇə' yoso'ogüia yoso'oye' yeziquə'əchlə beṇə' chso'onlilažə' Jesocrisṭən' to to yež. ⁶⁻⁷ Šə no beṇə' chso'on ca notono əna chso'one' de'e malən', šə nita' tgüejzə no'ol chega'aque', na' šə xi'inga'aque' ca' chso'onlilaže'e Jesocrisṭən' na' šə xi'inga'aque' ca' bito chso'onlitjeine' mech par so'one' legr na' nic zjənaque' beṇə' godenag, ca beṇə' can' cuejo' par yoso'ogüia yoso'oye' yeziquə'əchlə beṇə' chso'onlilažə' Jesocrisṭən'. Gwlej beṇə' so'on ca notono əna chso'one' de'e malən', chedə' la' xšin Dioz na'anə' so'one'. Bito cuejo' beṇə' zjənaquə' godenag, beṇə' loc, beṇə' güe'e zo, o beṇə' chso'on znia par yoso'ozenag beṇə' chega'aque', na' nic cuejo' beṇə' zjəzelažə' so'one' gan mech len xšin Diozən' de'en so'one'ena'. ⁸ Gwlej beṇə' chəsyə'əbeine' choso'ogüialaogüe' beṇə' yoblə ližga'aque'ena' na' beṇə' chəsyə'əbei de'e güenna' lgua'a de'e malən', beṇə' chesə'anabia' cuinga'aque' par chso'one' can' chazlažə' Diozən', na' beṇə' chso'on güen len ljuežjga'aque', na' beṇə' chso'on can' chebei Diozən', na' beṇə' cui chso'e latjə nabia' la'ažda'omalga'aque'ena' lega'aque'. ⁹ Beṇə' ca' yoso'ogüia yoso'oye' yeziquə'əchlə beṇə' chso'onlilažə' Crisṭən', cheyalə' nita'ətežə nite'e yoso'ozenague' che dižə' lin' de'en chsed chlo'icho che Jesocrisṭən' la' naquan de'e güen. Šə yoso'ozenague' chei, gaquə yoso'ozejni'ine'en beṇə' ca' chəsə'əne contr, na' gachbia' de que beṇə' contr ca' chso'e dižə'an clelə.

¹⁰ Gwlej beṇə' ca' chso'on can' bagwni'anə' par yoso'ogüia yoso'oye' yeziquə'əchlə beṇə' chso'onlilažə' Crisṭən' chedə' nita' zan beṇə' Izrael na' baļə beṇə' cui zjənaquə' beṇə' Izrael chso'one' txen len chio'o chonlilažə'əcho Jesocrisṭən', però bito chse'enene' nabia' Diozən' lega'aque'. Chso'echgüe' dižə' de'en bitobi zjəzaquə' na' chesə'əxoayague' beṇə'. ¹¹ Cheyalə' gono' par niḥ beṇə' ca' chso'on ca' Cretan' nite'e žizə cuich yoso'osed yoso'olo'ine' dižə' güenlažə'anə' chedə' chso'one' par niḥ zan family bito nite'e binlo len

ljuežjga'aque'. Na' parzə niç so'one' gan mechən' choso'osed choso'olo'ine' de'e ca' cui cheyalə' yoso'osed yoso'olo'ine'.

¹² To profet chega'aque' leczə beṇə' Creta bzoje' chega'aque' gwne': "Beṇə' Creta ca' syempr zjənaque' beṇə' güenlažə' na' gwxaquə'alebəga'aque'ne' ca' bia znia yelə' güen de'e mal chega'aque'ena', na' leczə zjənaque' beṇə' lia na' beṇə' xagüed." ¹³ De'en bzoje' chega'aque' naquən de'e li. De'e na'ana' cheyalə' tilo' lega'aque' che de'e malən' chso'one' par niç yesə'adalene' dižə' güen che Jesocristən'. ¹⁴ Na' tiləga'aco'one' par niç cui yoso'ozenague' che dižə' güenlažə' de'en chsa'aljlažə' beṇə' Izrael ca', na' cui yoso'ozenague' che beṇə' ca' bagosə'əbejyichje' de'en naquə de'e li bitə'atezə de'e əse'e lega'aque' so'one'.

¹⁵ Beṇə' ca' zjənaque' beṇə' la'azdao' xi'ilažə' guaquə sa'ogüe' bitə'atezə yelə' guao sin cui so'onən manch yichjla'ažda'oga'aque'ena'. Pero na' beṇə' ca' cui chso'onlilažə' Jesocristən' bitə'atezə de'e so'one', yichjla'aždaoga'aque'ena' zjənaquəchguan manch lao Diozən'. Choso'ozenagteze' che la'ažda'omalga'aque'ena' na' bitobi chsa'aque'ne' catə'an chso'one' de'e malən'. ¹⁶ Chesə'əne' de que zjənombi'e Diozən' pero laogüe de'en chso'ontezə chso'one' de'e malən' nachbia' de que bito zjənombi'ene'. Chso'one' de'en chgue'i Diozən'. Na' zjənaque' beṇə' godenag, na' bito chac so'one' bitə'atezə de'en naquə güen.

2

De'e güen de'en chsed chlo'icho che Jesocristən'

¹ Pero na' le' Tito, bsd blo'i porzə de'en chonən txen len de'en chsed chlo'ida' che Jesocristən', la' naquən de'e güen. ² Ben mendad de que beṇə' byo gol ca' cui so'e latjə nabia' la'ažda'omalga'aque'ena' lega'aque'. Cheyalə' so'one' par niç beṇə' yoblə əsa'apəga'aque'ne' respet, na' cheyalə' yesə'ənabia' cuinga'aque' par so'one' can' chazlažə' Diozən'. Cheyalə' yesə'adalene' dižə' güen che Jesocristən', cheyalə' nitə'atezə nite'e əsa'aque'ne' che ljuežjga'aque', na' cheyalə' nitə'atezə nite'e so'onlilaže'e Diozən' catə' chesə'əyi' chesə'əzaque'e. ³ Na' leczə ca' ben mendad de que no'olə gol ca' nitə'atezə nite'e so'elaogüe'e Diozən' bitə'atezə de'e so'one'. Na' ben mendad cui yoso'ožia yoso'onite'e beṇə' na' bito əsa'aque' beṇə' güe'e zo. Cheyalə' yoso'osed yoso'olo'ine' beṇə' bin' naquə de'e güen so'one'. ⁴ Cheyalə' yoso'osed yoso'olo'ine' no'olə xcuidə' ca' can' cheyalə' yesə'əzi'ilaže'e be'en chega'aque' na' xi'in chega'aque' ca'. ⁵ Na' leczə no'olə gol ca' cheyalə' yoso'osed yoso'olo'ine' no'olə xcuidə' ca' can' yesə'ənabia' cuinga'aque' par so'one' can' chazlažə' Diozən', na' can' cheyalə' so'one' par niç gactezə gaquə yichjla'ažda'oga'aque'ena' xi'ilažə', na' can' cheyalə' yoso'ogüia yoso'oye' ližga'aque'ena' na' so'on xšinga'aque'. Yoso'osed yoso'olo'ine' lega'aque' can' cheyalə' so'one' güen len yoguə'əloł beṇə' na' can' cheyalə' yoso'ozenague' che be'en chega'aque'. No'olə gol ca' cheyalə' yoso'osed yoso'olo'ine' no'olə xcuidə' ca' can' so'one' par niç bito yesə'əne beṇə' contr xtižə' Diozən'.

⁶ Na' leczə ca' cheyalə' əneyoido' beṇə' xcuidə' ca' par niç yesə'ənabia' cuinga'aque' par so'one' can' chazlažə' Diozən'. ⁷ Na' bitə'atezə de'e gono' le', gono'on güen par niç sa'ache'i beṇə' de que leczə cheyalə' so'one' ca'. Na' catə' əgwsed əgwlo'ido' beṇə', cheyalə' əgwsed əgwlo'iga'acdo'one' porzə de'e güen na' əgwsed əgwlo'iga'acdo'one' binlo par niç əsa'ape' le' respet. ⁸ Na' bsd blo'iga'aque'ne' dižə' li par niç notono gaquə əne' de que xtižə'ona' naquən

mal. Gono' ca' par nich benə' contr checho ca' yesə'əto'ine' na' bito gaquə yesə'əneche' contr chio'o.

⁹ Ben mendad de que mos ca' yosə'əzəxjw yichjga'aque' par yoso'ozenague' che xanga'aque'enə' na' so'one' bitə'ətezə de'e gon xanga'aque'n mendad sin cui yosyo'ozi' yosyo'olebe' xtiže'enə'. ¹⁰ Ben mendad cui yesə'aque'e bi de'e de che xanga'aque'enə', sino nita'ətezə nite'e so'one' can' cheyalə' so'one'. Bitə'ətezə de'e so'one' cheyalə' so'one'en güen par nich əsa'acbe'i benə' yoblə de que de'en chsed chlo'icho che Diozən' naquən de'e güen, Dioz ben' babebej chio'o xni'a de'e malən'.

¹¹ Diozən' bablo'e de que nzi'ilaže'e chio'o benəch na' nape' yelə' guac par yebeje' chio'o xni'a de'e malən'. ¹² De'e na'anə' nezecho de que cheyalə' cuejyichjcho yoguə' de'en chso'on benə' mal ca' de'en chzelažə' la'ažda'omalchon' goncho na' bitə'ətezəchlə de'en cui chazlažə' Diozən'. Na' nezecho naquən' cheyalə' so cuezcho yežlyo nga, cheyalə' nabia' cuincho par goncho can' chazlažə' Diozən', cheyalə' goncho de'e güen, na' cheyalə' əgwzenagcho che Diozən'. ¹³ Na' zocho mbalaz de'en nezecho əžin ža yidə Jesocristən' de'e yoblə nse'e yelə' bala'an xen che'enə'. Jesocristən' naque' Dioz checho, naque' le'ezelaogüe benə' zaque'e, na' babebeje' chio'o xni'a de'e malən'. ¹⁴ Bnežjw cuine' gwso'ot benə' le' par gwduxjue' xtolə'əchon' nich bebeje' chio'o xni'a yoguə' de'e mal, na' bene' par nich la'ažda'ochon' naquən xi'ilažə'. Bene' de'e ca' par nich naccho xi'in Diozən', na' par nich chebeicho choncho de'e güennə'.

¹⁵ Le' Tito, be' dižə' che de'en babzejni'ida' le', gwneyoi benə' par yoso'ozenague' chei, na' be'ega'aque' consejw par nich yesə'əbejyichje' de'e malən', chedə' la' Diozən' bagwleje' le' par gono' de'e ca'. Bito go'o latja yesə'əzo benə' le' ca'alə' cui yoso'ozenague' chio'.

3

De'en cheyalə' gon chio'o chonlilažə'əcho Jesocristən'

¹ Ben par nich žjəsə'əza'alaze'e de que cheyalə' yoso'ozəxjw yichjga'aque' yoso'ozenague' che jostis ca' na' che benə' gwnabia' chega'aque' ca', na' cheyalə' nite'e probnid par so'one' bitə'ətezə de'e güen de'e so'one' mendad.

² Gožga'aque' de que bito yesə'əne' mal che notə'ətezə benə', na' bito yesə'ədilə yesə'əšaše' len benə' yoblə. Cheyalə' əsa'aque' gaxjwlažə' na' cheyalə' əsa'ape' yelə' chxenlažə' len yoguə'əloj benə'.

³ Antslən' gwchəlj yichjla'ažda'ochon', na' goccho benə' godenag. Gwxoayagcho len de'e malən' na' gwzocho xni'a la'ažda'omalchon' ca naquən' bencho bitə'ətezən' gwzelažə'ən na' bitə'ətezən' gwnan parzə nich gwdacho legr. Con gwdacho bencho mal len benə' na' gocxi'i ljuežjcho. Besə'əgue'i benə' chio'o na' bgue'iga'aquechone'. ⁴ Pero na' bžin ža catə' Diozən' ben' babebej chio'o xni'a de'e malən' blo'ine' chio'o ca benə' güennə' naque' na' catequən' chaquene' che chio'o benəch. ⁵ Na' baltezcho chonlilažə'əcho Jesocristən', Diozən' bebeje' chio'o xni'a de'e malən' chedə' cheyaša' cheži'ilaže'e chio'o. Bito bebeje' chio'o por ni che bilə de'e güen de'e bencho. Beya'a beyibe' yichjla'ažda'ochon' na' bene' par nich Spirit che'enə' bocoban len. ⁶ Diozən' bsele'e Spiritən' zon lo'o yichjla'ažda'ochon' par chaclenchguan chio'o chedə' Jesocristən' babebeje' chio'o xni'a de'e malən'. ⁷ De'en cheyaša' cheži'ilažə' Diozən' chio'o bsele'e Spirit che'enə' zon lo'o la'ažda'ochon' par nich gaquə əne' checho de que naccho benə' güen laogüe'enə'. Na' lecəzə bsele'en par nich nezecho žjəyecho len le' zejlīcane.

⁸ De'e ca' bagwnia' nga zjənaquən de'e li. Na' che'enda' sotezə so' chixju'i'o de que de'e ca' babzejni'ida' le' zjənaquən de'e žialao xen gwzenagcho chei. Gono' ca' par ničh yoguə' beṇə' ca' chso'onlilažə' Diozən' nita'atezə nite'e so'one' de'e güen. De'e ca' bagwnia' zjənaquən de'e güen na' sa'aclenən notə'atezə beṇə' yoso'ozenag chei. ⁹ Pero na' bito gwzenago' che beṇə' ca' zjənčhoj yichjla'ažda'oga'aque'enə' na' chesə'ədilə chesə'əšaše' por ni che bizə dižə'. Na' bito cue' yichjo' che dia che de'e xaxta'oto' ca'. Bito gwzenago' che beṇə' ca' chsa'acyožə na' chesə'ədilə chesə'əšaše' por ni che can' chse'ejni'ine' to to pont dao' che lei de'en bzoj de'e Moizezən'. Dižə' ca' zjənac ca' bito chaclenən beṇə' na' bitobi zaquə'ən.

¹⁰ Be' consejw che notə'atezə beṇə' chsed chlo'ine' xtižə' Diozən' clelə beṇə' chene'e yesə'ənao beṇə' de'en chzejni'ine'. Šə babi'one' consejw to čop las na' cui chzenague', bebeje' ca'alə. ¹¹ De'en bito bzenague' čhio' nachən' nezdə' naljene'. Na' de'e malən' chone' chlo'en de que nape' dolə'.

De'en chon Pabən' mendad gon Titon'

¹² Catə' əselə'a Artemasən' o Tiquicon' gan' zo', yob yidəšgo' par yežagcho syoda Nicopolisən', čhedə' bagwčhoglažə'a yega'ana' Nicopolisən' lao tyemp zaguən'. ¹³ Ben xte ga zelao saquə'ədo' par gaquəleno' Zenas ben' babsed lein' gačjw gwche' na' Apolosən' catə' yesə'aque' gan' zo' par ničh bitobi yesə'əyažjene' tnezən'. ¹⁴ Na' bzejni'išguei beṇə' ljuežjcho ca' chso'onlilažə' Diozən' par ničh yesə'əbe' yichjga'aque' porzə par so'one' de'e güen. Cheyalə' sa'aclen ljuežjga'aque' šə de bi de'en chesə'əyažje to toga'aque', na' cheyalə' so'one' con can' chazlažə' Diozən'.

Beṇə' ca' nita'əlen Pabən' chesə'əguape' Titon' diox

¹⁵ Yoguə' beṇə' ca' chso'on xšin Diozən' txen len nada' nga chesə'əguape' le' diox. Na' beṇə' ca' zoleno' txen beṇə' ca' chsa'aque' čhecho čhedə' chonlilažə'əcho Diozən' əgguapšgaga'aco'one' diox.

Gaquəlenšga Diozən' yoguə'əle. De'e na'azən' chzoja' na'a. *Pab*

Cart De'en Bzoj San Pabən' Par Filemón

Pabən' chguape' Filemonnə' diox

¹ Nada' Pab dia' lizya nga chedə' chyixjui'a xtižə' Cristo Jeso'osən'. Na' txen len beṇə' bišə'əcho Temtion' chzojto' le' Filemon. Chaqueto' chio' na' naco' txen len neto' choncho xšin Diozən'. ² Na' chzojto' le' zanda'oto' Apia, nach le' Arquipo len' chono' xšin Xancho' txen len neto'. Nach leczə ca' chzojto' le'e chdopə chžagle liž Filemonnə' par cho'ela'ole Jesocristən'. ³ Chonto' orasyon lao Xacho Diozən' na' lao Xancho Jesocristən' chṇabto' əsa'aclenšgue' le'e, na' so'one' ca so cuezle binlo len xbab de'en yo'o lo'o yichjla'ažda'olen'.

Can' chonlilažə' Filemonnə' Jesocristən' na' chaque che ljuežje'

⁴ Na' le' Filemon, yoguə' laste catə' chona' orasyon cho'a yelə' choxcwlen che Diozən' can' chono'. ⁵ Babenda' dižə' ca naquən' chonlilažo'o Xancho Jesocristən', na' can' chacdo' che notə'ətezəchlə beṇə' bagwlej Diozən' par zjənaque' lažə' ne'ena'. ⁶ Na' chona' orasyon chṇaba' de que sotezə so' gono' güen len lega'aque' laogüe de'en chonlilažo'o Xancho Jesocristən', par niç yogue'e sa'acbe'ine' de que Cristo Jeso'osən' babenchgüe' güen len chio'o chonlilažə'əchone'. ⁷ Beṇə' bišə' catə' benda' can' chacdo' che yeziquə'əchlə beṇə' bagwlej Diozən' par zjənaque' lažə' ne'ena' na' can' chacleno' lega'aque' par niç nite'e mbalaz, lechguale bebeida' na' zoa' mbalaz.

Pabən' gwṇabe' yezi'ixen Filemonnə' che Onesimon'

⁸ Laogüe de'en naca' beṇə' güen žin che Cristən' napa' yelə' chnabia' par gona' mendad can' cheyalə' gono', ⁹ pero laogüe de'en chaquecho che Cristən' na' che ljuežjcho chneyoida' le' gono' to de'en che'enda' gono'. Nada' Pab banaca' beṇə' golə, na' leczə na'a dia' ližyan' chedə' chyixjui'a xtižə' Jesocristən'. ¹⁰ Chṇaba' goclen laogo'on par Onesimon' ben' banona' ca xi'ina'. Lao dia' ližya nga bsd blo'ida'ane' par niç chonlilažə'e Jesocristən'.

¹¹ Antslə bito goque' mos güen par le', pero na'a banaque' mos güen par le' na' leczə par nada'. ¹² Chossela'ane' laogo'onə', na' chṇabda' le' yogüialaogo'one' na' so' binlo len le' chedə' lechguale chacda' che'. ¹³ Yebeida' žalə' gaquə yega'anlene' nada' par niç gaquəlene' nada' can' gaquəleno' nda' lao dia' ližyan' žalə' zo' nga. ¹⁴ Pero bito gwṇabda'ane' yega'anlene' nada' chedə' che'enda' əṇao' le' bin' gone'. Bito che'enda' gona' byen gaquəleno' nada' pero yebeida' šə can' chazlažo'o gono'. ¹⁵ De repent Diozən' be'e latjə beze'e ližo'on par to tyemp par niç gacle toza zejlicane. ¹⁶ Na'a bitoch gaque' con to mos na'azə, la' naque' bišə'əda'əcho. Lechguale chacda' che' na' mazəchlə gaquədo' che' de'en banaque' txen len chio'o chonlilažə'əcho Xancho Jesocristən' na' leczə naque' xmoso'.

¹⁷ Na' ca naquə chono' nada' cuent de que naca' txen len le', yogüialaogo'one' caczən' chgüialaogo' nada' catə' chedelaṇa'a le'. ¹⁸ Na' šə bi de'e malən' bene' contr le', o šə bi de'en chəle'e chio', nada' chixjua'an. ¹⁹ Cuincza' nada' Pab chzoja' le', nada' chixjwczə'an. Na' bitobi əchnia' che de'en chalə'o che yelə' mban zejlicane chio' laogüe de'en bsd blo'ida' le' par niç chonlilažo'o Jesocristən'. ²⁰ Beṇə' bišə' dao', laogüe de'en chaquecho che Xancho Jesocristən' che'enda' gono' de'e nga par niç soa' mbalaz. De'en chaquecho che Xancho', bešga par niç yebeida'.

²¹ Chzoja' le' chedə' zoa' lez gwzenago' chia', na' nezda' de que gono' mazəchlə ca de'en nia' le'. ²² Na' leczə chṇabda' le' gonšgo' probnid to quart par nada'. Zoa' lez yesə'əsane' nada' šə gonchle orasyon par nada' par niḥ gaquə deyelaṇa'a le'e.

Benə' ca' nitə' len Pabən' chəsə'əguape' Filemonnə' diox

²³ Epafraśən' die' ližya nga txen len nada' de'en chyixjui'e xtižə' Cristo Jeso'osən' na' chguape' le'e diox. ²⁴ Na' Marcosən', len Aristarcon', len Demasən', na' len Locasən', benə' ca' chso'on xšin Diozən' txen len nada', leczə chəsə'əguape' le'e diox.

²⁵ Xancho Jesocristən' sošgue' gaquəlenšgacze' le'e len xbab de'en yo'o lo'o yichjla'ažda'olen'. De'e na'azən' chzoja' le'. *Pab*

Cart De'en Nyoj Par Beṇə' Ebreo Ca'

Diozən' babe'elene' chio'o dižə' ca de'en bsele'e Xi'ine'ena'

¹ Tyemp de'en bagwde, Diozən' bsele'e zan profet beṇə' gwsoe' xtiže'ena' len de'e xaxta'ocho ca'. Zan las profet ca' gwso'e xtiže'ena' len de'e xaxta'ocho ca', nža' nža' can' gwso'en. ² Pero tyemp nga zocho na'a nža'alə babene'. Na'a babe'elene' chio'o dižə' ca de'en bsele'e Xi'ine'ena' ben' ben yoban', yežlyon' na' de'e ca' chle'icho le'e yoban', na' bengə'aque'en con can' ben Diozən' mendad. Na' gwžin ža catə' gaquə lao na Xi'in Diozən' yoguə beṇəch, yoguə' bia ca' chsa'aš, na' biquə'əchlə de'e ca' bene'. ³ Xi'in Diozən' nse'e doxen yelə' chey che'eni' che Xe'ena' na' cayanə'an naquə yichjla'aždao' Xe' Dioz nan' naquə yichjla'aždaogüe'ena'. Na' Xi'in Diozən' chone' par nič yoban', yežlyon' na' de'e ca' chle'icho le'e yoban' chso'onən žin, čhedə' nape' yelə' guac par nič chac con can' ne'ena'. Bsanlažə' cuine' gwso'ot beṇə' le' par nič čhniłaoğüe' xtola' yoguə' chio'o chonlilažə'əchone'. Na' gwde na' beyepe' yoban' zjəyechi'e cuił Xe' Diozən' ben' naquə le'ezelaogüe beṇə' zaque'e par čhnabi'e txen len le'.

Xi'in Diozən' naquəche' beṇə' zaquə'əche cle ca angl ca'

⁴ Na' nla'alao de que Xi'in Diozən' naquəche' beṇə' zaquə'əche cle ca angl ca', čhedə' Diozən' babnežjue'ene' yelə' bala'an nazachlə ca de'en babnežjue' angl ca'. Na' babene' par nič naquəche' beṇə' blaoch. ⁵ Diozən' bitonə' ye'e ni toza angl can' gože' Xi'ine'ena', gože'ene':
Len' naco' xi'ina'.

Neža babena' par nič solao nabi'o len nada'.

Na' nic ne'e güe'e dižə' che notə'ətezə angl can' gwne' che Xi'ine'ena', gwne':
Nada' gona' par nič gachbia' naca' Xe',
na' gona' par nič gachbia' de que naque' Xi'ina'.

⁶ Xi'in Diozən' naque' le'ezelaogüe beṇə' zaque'e. De'e na'anə' catə'an Diozən' bsele'ene' yežlyon' gwne':

Yoguə'əlol angl chia' ca' cheyalə' əso'elaogüe'ene'.

⁷ Nach gozne' che angl ca':

Chona' par nič angl chia' ca' beṇə' ca' chso'on mendad chia'
čhsa'aque' ca' be' de'en chečj na' ca' yi' bel.

⁸ Na' nža'alə can' be'e dižə' len Xi'ine'ena' gože'ene':

Len' naco' Dioz na' čhnabi'o zejljicane'.

Na' lečgualə güen čhnabi'o.

⁹ Chebeido' de'en zda liča na' čhgue'ido' de'e malən'.

De'e na'anə' nada' Diozən' ben' čho'elaogo'o

babena' par nič zocho' mbalazəch cle ca beṇə' ljeužjo' ca'.

¹⁰ Na' de'e yoblə gož Diozən' Xi'ine'ena':

Le' naco' Xan yežlyon'.

Len' beno'on ža gwlasda'ote.

Na' yoguə' de'en chle'icho le'e yoban', leczə len' beno'on.

¹¹⁻¹² Na' gwžin ža catə' te che yoguə' de'en chle'icho le'e yoban' na' yežlyo nga.

Pero le' bito te čchio'; syempř soczo' zejljicane'.

Na' gwša' le'e yoban' na' yežlyon' ca to beṇə' čša' xə' catə' babeyoin na' chaze' yeton.

Gono' len le'e yoban' na' yežlyon' can' chon to beṇə' catə' četobə xə'.

Pero le', tozəczə can' gaco' zejljicane, na' bito əžin iz nacho te čchio'.

¹³ Diozən' bitonə' ye'e ni to angl ca de'en gože' Xi'ine'enə', gože'ene': Gwche'edo' cuita' nga nabi'acho txen, na' gona' par niçh nitə' de'e ca' chso'on contr le' na' beṇə' contr chio' ca' xni'onə'.

¹⁴ Ca naquə' angl ca', yogue'e zjənaque' beṇə' chso'on mendad che Diozən', chsele'e lega'aque' par chsa'aclene' chio'o bagwlej Diozən' par niçh zjəyecho len le'.

2

Cheyalə' əgwzenagcho che xtižə' Diozən' par niçh zjəyecho len le'

¹ Na' laogüe de'en naquə' Xi'in Diozən' beṇə' blaoch na' beṇə' zaquə'əche ca angl ca', do yichj do lažə'əcho cheyalə' əgwzenagcho xtižə'ena' de'en babenecho, chedə' la' šə bito əgwzenagcho chei do yichj do lažə'əcho, guanlažə'əchon na' cuejyichjchon. ² Lei che Diozən' de'en gosa'əyixjue'e angl ca' naquəczən de'e žialao xen. Na' de'e na'anə' Diozən' bnežjue' castigw che de'e xaxta'ocho ca' batə'ətezə cui boso'ozenague' chei segon de'e mal de'en gwso'on to toga'aque'.

³ Na' naquən segor de que Diozən' gone' chio'o castigw šə bito goncho can' na Xancho Jesocristən'. Zgua'atec Xancho Jesocristən' be'e dižə' güen juisy can' cheyalə' goncho par niçh zjəyecho len le'. Nach gwdenə' beṇə' ca' gosa'ədalen le' lecə'əbošo'ozejni'ine' chio'o can' gwne'enə', chedə' gosa'ənezene' de que naquən güen. ⁴ Na' Diozən' bene' par niçh gwso'one' milagr na' bichlə de'e zaquə' yebanecho, na' Diozən' bnežjue' lega'aque' zan clas yelə' guac, na' Spirit che'enə' benə' par niçh gwso'one' de'e zan de'e güen len yelə' guac chein' segon can' gwyazlažə' Diozən', par niçh ənezecho de que xtižə'əga'aque'enə' naquən de'e li.

Goc Jeso'osən' doxen can' naquə' chio'o beṇəçh

⁵ Catə' te che yežlyo nga na' gata' yežlyo cobə de'en cho'a dižə' chei, Diozən' bito gone' ca yesə'anabia' angl ca'. ⁶ Na' nyoj can' gwna de'e Rei Dabin' gože' Diozən':

çBixçhen' chacdo' che beṇəçhən'? ca naquə' bitotec bi zjəzaque'e.

Na' çbixçhen' chaclenga'aco'one'?

⁷ Beno' par niçh beṇəçhən' bito zjənaque' beṇə' blao can' zjənaquə' angl ca' pero caguə' syempr gaquən ca'.

Bia'aczə beno' par niçh zjəzaquə' beṇəçhən' na' bnežjwga'aco'one' yelə' bala'an.

⁸ Beno' par niçh yoguə'əloite de'e zjəde əsa'aquən lao na' beṇəçhən',

na' len yoguə'əloj bia ca' chsa'aš, lecə' əsa'aquəb lao na'aga'aque'.

Na' ca naquə' ben Diozən' par niçh yoguə'əloite de'e zjəde əsa'aquən lao na' beṇəçhən' na' yoguə' bia ca' chsa'aš lecə' əsa'aquəb lao na'aga'aque', de'e na'anə' beṇəçhən' yesə'anabi'e lao yoguə'əte de'en zjəde, la'anə'əczə na'a nezecho bitonə' yesə'anabi'e. ⁹ Na' ca naquə' Jeso'osən', žlac goque' beṇəçh bito goque' beṇə' blao can' zjənaquə' angl ca'. Na' de'e tant nži'ilažə' Diozən' chio'o beṇəçh bene' par niçh Jeso'osən' bsanlažə' cuine' por ni checho catə'an gwso'ot beṇə' le', na' de'e na'anə' Jeso'osən' banzi'e yelə' bala'an xen na' banaquə'chgüe' beṇə' zaque'e.

¹⁰ Diozən' bene' bia chsa'aš, bene' beṇəçh na' yeziquə'əchlə de'e zjəde par niçh chzi'e yelə' bala'an. Na' bene' güen ca de'en bsi'e xneze par niçh gwxaquə'əzi' Jesocristən' ben' babebej chio'o xni'a de'e malən'. Na' de'en gwxaquə'əzi'enə' chac chone' par niçh beṇə' zan əsa'aque' xi'in Diozən' na' zjəsyə'anite'e len le' yoban'. ¹¹ Jeso'osən' bagwleje' chio'o par naccho lažə' na' Diozən'. De'e na'anə' txen len le' naccho xi'in Diozən' na' bito cheto'ine' par

əne' che chio'o de que naccho beṇə' biše'e na' beṇə' zane'. ¹² Quinga gwna Jeso'osən' gože' Diozən':

Gua'a dižə' par niç beṇə' biša'a ca' na' beṇə' zana' ca' yesə'əṇezene' non' naco'. Na' lao zjəndopə zjənžague' chso'elaogüe'e le', nada' gua'a dižə' ca beṇə' güennə' naco'.

¹³ Nach gwne':

Sotezə soa' gonlilaža'a Diozən'.

Na' de'e yoblə gozne':

Nga zoa' txen len beṇə' ca' ben Diozən' nada' par niç zjənaque' xi'ina'.

¹⁴ Na' chio'o naccho beṇə' belə' chen, chio'onə' naccho xi'ine'. De'e na'anə' leczə le' golje' goque' beṇə' belə' chen na' bsanlažə' cuine' gwso'ot beṇə' le' par niç bnitlaogüe' yelə' gwnabia' che gwxiye'en de'en chon par niç chatcho.

¹⁵ Bene' par niç chio'o chonlilažə'əchone' bitoch žebcho gatcho. Beṇə' ca' cui chso'onlilaže'ene' syempr chəsə'əžebe' sa'ate'. ¹⁶ Jeso'osən' bide' yežlyo nga caguə par goclene' angl ca', sino par goclene' beṇə' ca' chso'onlilažə' Diozən' can' benlilažə' de'e Abraannə' Diozən'.

¹⁷ Benən byen goc Jeso'osən' doxen can' naquə chio'o beṇə' par niç ca' chaclene' chio'o lao Diozən' can' gwso'on de'e bħoz əblao ca' len de'e xaxta'o chio'o beṇə' Izrael gwsa'aclene' lega'aque'.

Cheyašə' cheži'ilažə' Jeso'osən' chio'o na' chone' complir can' ne'enə'.

Can' chon Jeso'osən' be'enə' checa'a xtolə' chio'o chonlilažə'əchone'.

¹⁸ Jeso'osən' cuat bene' de'e mal pero bžaglaogüe' catə'an gwlo'oyelə' gwxiye'en le' par gone' de'e malən' na' catə' goc bitə'ətezəchlə de'e mal len le'.

De'e na'anə' nezene' naclən' chone' chaclene' chio'o catə' chgo'oyelə' gwxiye'en chio'o par goncho de'e malən' na' catə' chac bitə'ətezə de'e mal len chio'o.

3

Jeso'osən' zaquə'əche' cle ca de'e Moizezən'

¹ Beṇə' bišə', laogüe de'en bagwlej Diozən' yoguə' chio'o par naccho lažə' ne'enə', cheyalə' goncho xbab che Cristo Jeso'osən' ben' bselə' Diozən' par naque' bħoz əblao checho. Diozən' bsele'ene' bedətixjui'e xtize'enə' de'en chejle'echo chei.

² Diozən' gwleje' le' par chaclene' chio'o ca to bħoz əblao. Na' Jeso'osən' lao bide' yežlyon' na' na'a chone' con can' na Diozən', ca'acən' ben de'e Moizezən' ben' leczə goclene' yoguə' beṇə' gwsa'ac family che Diozən'.

³ Pero na' Jeso'osən' zaquə'əche' cle ca Moizezən'. Jeso'os na'anə' bħie' family che Diozən' ca de'en bene' par niç chio'o chonlilažə'əcho Diozən' na'a na' len beṇə' ca' gwso'onlilažə' le' cana' naccho family che Diozən'.

Na' ca naquə de'e Moizezən' ža, goque' con to beṇə' lao family che Diozən'.

⁴ Na' gwnitə' beṇə' bħe to to family nitə' lao yežlyon', pero Jeso'osən' caguə bħie' family che Dioz na'azən', sino leczə bħie' yoguə'əte de'e zjəde, chedə' len' naque' Dioz.

⁵ Na' ca naquə de'e Moizezən', bene' can' gwna Diozən' par goclene' yoguə' beṇə' gwsa'ac family che Diozən' la'anə'əczə goque' con to xmos Diozən'.

Na' de'e Moizezən' be'e dižə' che de'e ca' ze'e əsa'ac ca tyempən' de'e ca' bagwsa'aquan na'a.

⁶ Cristən' leczə bene' complir can' gwna Diozən' par goclene' beṇə' zjənaquə family che Diozən'.

Na' bene' ca' chedə' naquə'cze' Xi'in Diozən', caguə ca to mos.

Na' family che Dioz na'anə' naquə chio'o šə zotezə zocho chonlilažə'əcho Diozən' do yichj do lažə'əcho catə'an yidə Cristən' de'e yoblə,

na' šə chebeicho de'en yidə Cristən'.

Guaquə socho mbalaz len Diozən'

⁷⁻⁸ Cheyalə' goncho xbab can' gwna Spirit che Diozən' de'en nyojən nga:

Catə' Diozən' əne' to de'e gonle n'a'a,
bito gacle beṇə' godenag can' gwsa'ac beṇə' Izrael ca' cana'
catə' gwsə'one' contr Diozən' latjə dašən'.

Gwsə'one' prueb šə leine' de que gwnežjue' castigw čhega'aque'enə'.

⁹ Nach Diozən' gwne':

De'e xaxta'ole ca' bito gwse'ejle'e chia' la'anə'əczə čhoa iz besə'əle'ine' de'e ca'
bena' par goquəlenga'aca'ane'.

Con gwsə'one' prueb šə leida'anə'.

¹⁰ De'e na'anə' bito bebeiga'acda'ane',

na' gwnia': "Do tyemp naquəga'aque' beṇə' yichjla'aždao' žod,
bitonə' se'enene' se'ejni'ine' can' chona'."

¹¹ Na' de'en bžə'a lega'aque' de'e nan' gwnia' čhega'aque' de que cuat nite'e
mbalaz len nada'.

¹² Legapə cuidad beṇə' bišə', par nič ni tole cui gacle beṇə' yichjla'aždao'
mal. Lesotezə leso legonlilažə' Diozən' par nič cui cuejyichjlene' čhedə'
le'ena' zoe' zejlicane. ¹³ Žlac n'a'a ne'e de tyemp par əgwzenagle čhe Diozən',
legwtiplažə' ljuežjle tžə tžə par nič cui gonle de'e malən', la' catə' choncho de'e
malən' chxəoyaguən chio'o par nič cuič bi bi chaquecho catə'an chonch-
chon. ¹⁴ Ngoda'əcho t xen len Crisən' šə ne'e zotezə zocho chonlilažə'əchone'
catə'an yide' de'e yoblə con can' gwzolaoczcho chonlilažə'əchone'.

¹⁵ Na' nyoj Xtižə' Diozən' par chio'o gan' nan:

Catə' Diozən' əne' to de'e gonle n'a'a

bito gacle beṇə' godenag can' gwsa'ac beṇə' Izrael ca' cana'.

¹⁶ Na' de'en nyojan nan ca' cho'en dižə' čhe beṇə' ca' jəsyə'ənao de'e Moi-
sezən' catə'an jəyeleje' lega'aque' Egipton'. Boso'ozenague' can' ben Diozən'
mendad par besyə'əchoje' Egipton', pero beyožzə besyə'əchoje'ena' bitoch
boso'ozenague' čhe'. ¹⁷ De'e na'anə' bžə'e lega'aque' čhoa iz de'en gwsə'one'
de'e malən' cuič boso'ozenague' čhe', na' gwsa'ate' latjə dašən'. ¹⁸ Na' Diozən'
gwne' de que cuat nite'e mbalaz len le' čhedə' cui boso'ozenague' čhe'. ¹⁹ Na'
nezecho de que yelə' godenag čhega'aque'ena' cui goquə nite'e mbalaz len le'.

4

¹ Na'a ža, nezecho can' goc čhe beṇə' godenag ca' beṇə' ca' gwsa'at latjə
dašən'. De'e na'anə' cheyalə' žebcho par nič cui goncho can' gwsə'one'ena',
čhedə' šə goncho can' gwsə'one'ena' bito gaquə socho mbalaz len Diozən'
can' bene' lyebe. ² Babenecho to dižə' güen dižə' cobə de que gaquə socho
mbalaz len Diozən' ca dižə' de'en gwse'ene lega'aque'. Pero ca naquə lega'aque'
de'en cui gwse'ejle'e čhei, de'e nan' bito goquəlenən lega'aque'. ³ Na' chio'o
chejle'echo čhe de'en na Diozən' bazocho mbalaz len le'. De'e na'anə' bito na
Diozən' čhecho can' gwne' čhe beṇə' ca' gwne':

De'en bžə'a lega'aque' na' gwnia' de que cuat nite'e mbalaz len nada'.

Na' ca naquə Diozən' nezecho babeyož bxi'e yoban' na' yežlyon' na' de'e na'anə'
zoe' mbalaz. ⁴ Can' nyoj to part Xtiže'ena' nan:

Žop ža ben Diozən' yoban', yežlyon', beṇəchən', bia yixə'an na' biquə'əchlə de'e
zjəde.

Na' catə' bžin ža gažən', bitoch bi bi bene', con zoe' mbalaz.

⁵ Na' de'e yoblə goncho xbab čhe de'en gwne':

Cuat nite'e mbalaz len nada'.

⁶ De'e li balə beṇə' nite'e mbalaz len Diozən'. Pero ca naquə beṇə' ca'
gwse'enene' dižə' güen dižə' cobə čhe'ena' cana'ate, bito goquə nite'e mbalaz

len *le'* chedá bito boso'ozenague' *che'*. ⁷ Na' catá' bagwde zan iz Diozán' gwne' de'e yoblá de que gwaquá *nítá'* bená' mbalaz len *le'*. Bene' par niçh bzoj de'e Rei Dabin' dižá de'en na:

Catá' Diozán' *áne'* to de'e gonle *na'* a bito gacle bená' godenag.

⁸ De'e Josuen' gwçhe'e de'e *xaxta'o* chio'o bená' Izrael gan' gosá'azi'e yežlyon' de'en bnežw Diozán' lega'aque'. Pero lega'aque' bito gwnite'e mbalaz len Diozán'. De'e na'aná' gwdechlá Diozán' bene' par niçh de'e Dabin' bzoje' gwne' de que gwžin ža *nítá'* bená' mbalaz len *le'*. ⁹ Nachán' nezecho de que chio'o chonlilažá'əcho Diozán' chac socho mbalaz len *le'*. ¹⁰ Na' bená' ca' banitá' mbalaz len Diozán' bitoch chso'one' can' na xbab çhega'aque'ená', sino que chso'one' can' na Diozán'. De'e na'aná' nacho de que nite'e mbalaz can' zo Diozán' de'en beyož bxie' yogua' de'e ca' zjəde. ¹¹ Na' cheyalá' yejiljažá'əcho nac goncho par niçh socho mbalaz len Diozán'. Cheyalá' gwzenagcho *che'* par niçh ca' ni tocho cui gac çhecho can' goc *che* de'e *xaxta'o*cho ca' de'en cui boso'ozenague' *che* Diozán'.

¹² Xtizá' Diozán' chazán lo'o yichjla'aždao' bená', na' chaclenán notá'ətezə choso'ozenag çhei. Na' gwxaquá'əleben ca to spad de'en nlaçgua çhopə la'ate. Pero mazəchlə can' chon to spad chon Xtizá' Diozán', chedá' chlo'in chio'o no çhein' chzenagcho, əçhe Spirit *che* Diozán' o šə *che* la'ažda'omalchon'. Leçzə ca' chzejni'in chio'o *che* xbab de'en yo'o lo'o yichjla'ažda'ochon' na' *che* yogua'əloj de'en chzelažá'əcho šə naquən güen o šə naquən mal. De'e na'aná' gwxaquá'əleben ca to spad de'e chçhog entr beçh bnia ca' na' entr bin ca'. ¹³ Diozán' neze nle'ine' to to benəçh, na' to to angl, na' to to de'e xio', na' cuantzə bi de'en zjəde. Diozán' neze nle'ine' yichjla'ažda'ochon'. Na' laogüe' na'aná' əgwdecho cuent šə biquə' de'e babencho.

Jeso'osən' naque' bçoz əblao çhechon'

¹⁴ Jeso'os Xi'in Diozán' babeyepə' yoban' gan' zo Diozán' par gaquəlene' chio'o. De'e na'aná' Jeso'osən' naque' bçoz əblao çhecho, ben' naquə le'ezelaogüe bená' zaque'e. Na' de'e na'aná' cheyalá' sotezə socho gonlilažá'əchone' can' chonczcho. ¹⁵ Na' Jeso'osən', ben' naquə bçoz əblao çhechon', chache'ine' catá' çhaquecho zdebə goncho to de'e güen. Gwxiye'en gwlo'oyelə'an le' gone' de'e mal pero bito bene'en na' bžaglaogüe' cayañə'an chžaglaio chio'o benəçh. ¹⁶ Na' cheyalá' güe'elencho Diozán' dižá' sin cui žebcho, ənabəchone' yezi'ixene' çhecho na' gaquəlene' chio'o batá'ətezə çhyažjecho yelə' chaclen *che'ená'*, chedá' le'ená' nži'ilažə'e chio'o.

5

¹ Bená' ca' besá'əchoj gwsa'aque' bçoz əblao *che* nasyon Izrael çhechon' tyemp de'en bagwde jso'e bi de'en jso'e lao Diozán' na' gwso'ote' bia yixá' besá'əlalje' xçhenga'acquəbən' par niçh Diozán' bezi'ixene' xtolə' de'e *xaxta'o*cho ca'. Na' yogua' bçoz ca' gwsa'aque' con to bená'. ² Na' bçoz əblao ca' gwsa'ape' yelə' chxenlažá' len bená' ca' cuiñə' se'ejni'i can' cheyalá' so'one' na' len bená' ca' bazjənxoayag len de'e malən', chedá' leçzə benəçhən' zjənaque' na' naquən zdebə par so'one' de'e güennə'. ³ Na' de'en zjənaque' benəçhən' benən byen gwso'ote' bia yixá' na' besá'əlalje' xçhenga'acquəbən' par gosá'ənabe' yezi'ixen Diozán' xtolə'əga'aque'ená' can' gosá'ənabe' yezi'ixene' xtolə' bená' ca' yelə'.

⁴ Na' notono gwlej cuine' par gaque' bçoz əblao, sino Diozán' gwlejga'aquene' can' gwleje' de'e Ronnə'. ⁵ Le'egatezə ca' Cristən' bito ben

cuine' xen cuejlize cuine' par gaque' b̄xoz əblao. Diozən' gwleje'ene' na' Dioz
na'anə' gože'ene':

Len' naco' Xi'ina'.

Neža babena' par niç solao nabi'o len nada'.

⁶ Na' ga yoblə nyoj yeto de'en gože'ene':

Naco' b̄xoz beṇə' zo zejlicane,
na' naco' ca b̄xoz Melquisedequan'.

⁷ Na' Jeso'osən' catə' gwzoe' yežlyo nga bene' orasyon lao Xe' Diozən' ben' gac
yosle'ene' par niç cui gate'. Jeso'osən' gwne' zižjo na' gwcheže' gwnabe' yelə'
chaclen che', na' Diozən' bzenague' na' bene' par niç yelə' gotən' cui gwn-
abi'an le' chedə' benlilaže'ene'. ⁸ Na' la'anə'əczə Jeso'osən' naque' Xi'in' Dioz,
Diozən' bzejni'ine' le' de que cheyalə' əzaglaogüe' par yeyož gone' yoguə'əloł
de'e ca' naquən gone'. De'e na'anə' Jeso'osən' b̄zaglaogüe' len yoguə'əloł de'en
goc che' yežlyo nga. ⁹ Na' beyož goc che Jeso'osən' yoguə'əloł can' gone'e
Diozən', nach gwzoloa chone' par niç yoguə'əloł beṇə' ca' choso'ozenag che',
nite'e len le' zejlicane. ¹⁰ Diozən' gwleje' le' par naque' b̄xoz əblao checho na'
gwxaquə'əlebene' ca b̄xoz Melquisedequan'.

Gapcho cuidad par niç cui cuejyichjo xtižə' Diozən' de'en bachejle'echo chei

¹¹ Na' ne'e dech de'e zan de'en che'enda' əṇia' le'e che de'en naquə' Jeso'osən'
b̄xoz chechon', pero naquən zdebə əṇi'an par šejni'ilen, chedə' bitoch chebeile
gwzenagle che Diozən'. ¹² Bagolə' əgwsed əgwlo'ile beṇə' yeziquə'əchlə
xtižə'ena', pero latje de'e gonle ca', chyažjele to beṇə' par əgwsed əgwlo'ine'
le'e de'e yoblə ca de'en babsedle de'e nechən'. Na' laogüe de'en chyažjele
əgwsedəchle de'e ca', gwxaquə'əlebele ca bidao' ca' ne'e chsa'ažə', bi'i cuiṇə'
gac sa'o. ¹³ Na' ben' naquə ca bidao' ne'e chažə', bitonə' šejni'ine' xtižə
Diozən' de'en naquach zdebə. ¹⁴ Na' xtižə' Diozən' de'en naquach zdebə
gwxaquə'əleben ca yelə' guao de'en chao beṇə' cha'o. Na' beṇə' ca' chse'ejni'i
len chsa'acbe'ine' che bitə'ətezə dižə šə naquən de'e li o šə naquən dižə'
güenlažə'. Chsa'acbe'ine' chedə' la' bazjəyo'olaogüe' choso'ozenague' che
Diozən'.

6

¹ Na' ca bidao' ca' chəsə'əzolao chsa'obo' yelə' guao catə' bazjəncha'obo'
ca'aczən' chio'o cheyalə' solaocho cue' yichjcho che xtižə' Diozən' de'en
naquəch zdebə par niç gaquəch yichjla'ažda'ochon' can' naquə yichjla'aždao'
Cristən'. Catə'ən gwzoloa benlilažə'əcho Cristən' gwyejni'icho can' yedinjecho
xtolə'əchon' na' bedinjechon. Na' na'a bitoch chyažjən yedinjecho che de'e
ca' de'e yoblə, na' nic chyažjən yezoloacho gonlilažə'əchone' de'e yoblə.
² Bañezczəcho bi zejen catə'ən chcho'acho nisən', na' leczə can' bañezezcho bi
zejen catə'ən chxoə na'achon' yichj beṇə' yoblə chnabcho yelə' chaclen che
Diozən' par lega'aque' na' bitoch chyažjən no gwzejni'iche chio'o bi zeje de'e
ca'. Le'egatezə ca' bitoch chyažjəcho no gwzejni'iche chio'o can' yolis yosban
Diozən' beṇə' guat ca' o can' gone' yelə' jostis che beṇə' ca' chso'on de'e malən'.
Bañezczega'aquechonə'. ³ Pero na'a ža, šə Diozən' güe'e latjə yeyiljažə'əcho nac
goncho par niç gaquə yichjla'ažda'ochon' can' naquə yichjla'aždao' Cristən'.

⁴ Nitə' beṇə' bachse'ejni'i xtižə' Diozən' na' bazjənapə' yelə' mban zejlicane
de'en choṇ Diozən' chio'o chonlilažə'əchone', na' leczə ca' bazo Spirit che
Diozən' lo'o yichjla'ažda'oga'aque'ena'. ⁵ Bazjənezene' ca güenna' naquə xtižə'
Diozən' na' bazjənombi'e miłagr na' bichlə yelə' guac che Diozən' la'anə'əczə
ze'e yesə'əle'ichene' yelə' guac de'en gwlo'eche' catə' əžin ža gatə' yežlyo

cobæ. ⁶ Na' šə gwžincla ža yesə'əgue'i beŋə' ca' Diozən' šə yesə'əbejyichjcle' xtiže'enə', bitoch gaquə yesyə'ədinjene' xtolə'əga'aque'enə' de'e yoblə, čhedə' lo'o yichjla'ažda'oga'aque'enə' so'one' txen len beŋə' ca' bosə'oda' Xi'in Diozən' le'e yag corozən', na' so'one' par nič beŋə' yeziqə'əchlə leczə yesə'əgue'ine' le'. ⁷ Ca naquə yežlyo güen gan' chsa'az beŋə', šə chacchgua yejon', nach chac de'en chsa'aze'enə' na' chatə' de'en chsə'əyažjene', na' Diozən' chebeine' de'e chac cwseš čhega'aque'enə'. Can' gwxaquə'əlebecho šə zotezə zocho chzenagcho čhe Diozən'. ⁸ Pero šə bagwlejičjcho cuich chzenagcho čhe Diozən' gwxaquə'əlebecho ca yežlyon' gan' chlā'ac por yag yešə' na' no yixə' cuan de'e cui chac gaocho. Yežlyon' de'en nac ca' bito bi bi zaquə'an par xan yežlyon', nach chbejičjhe'en na' chžin ža catə' chzeye' de'e ca' chlā'ac laoguēnə'.

Zotezə zocho chonlilažə'əcho Diozən' čhedə' nezecho žjəyecho len le'

⁹ Na' ca naquə le'e, la'anə'əczə babi'a dižə'an ca', chacda' čhele, na' zoa' segor bito gonle can' bagwnia' chso'on beŋə' ca'. Nezda' gonšgacze can' čheyalə' goncho laoguē de'en babebej Diozən' chio'o xni'a de'e malən'. ¹⁰ Diozən' naque' beŋə' güen. Na' bito ganlaze'e can' babenle xšine'enə', na' can' ne'e chonczen nā'a chaclenle yeziqə'əchlə beŋə' bagwleje' par žjənaque' lažə' ne'enə', chonlen laoguē de'en chaquele čhe'enə'. ¹¹ Nezele žjəyecho len Cristən'. Na' de'e na'anə' yedote žlac cuinə' yide' de'e yoblə čheyalə' cue' yichjle de'en žjəyecho len le', can' bachi' yichjle nā'a par chaclen ljuežjle. ¹² Bitu gacle beŋə' gədenag len xtižə' Diozən'. Lezonlilažə' Diozən' can' bagwso'on beŋə' ca' bagwnitə', beŋə' ca' gosə'əzi' de'en ben Diozən' lyebe əgwnežjue' lega'aque'. La'anə'əczə cui gosə'əzi'en cate, con gwso'onlilažə'əteze'ene'.

¹³ Diozən' bene' lyebe de que xi'in dia čhe de'e Abraanə' əsa'aque' beŋə' zan. Na' de'en naque' Dioz na' notoch no no nla' beŋə' yoblə beŋə' napəch yelə' gwnabia' cle ca le', de'e na'anə' bzo cuine' testigw gwne': "Guaquəczə can' nia'anə' čhedə' zoa' naca' Dioz." ¹⁴ Gwne': "De'e li goncza' par nič gaquə güen chio'. Na' de'e li goncza' par nič xi'in dia chio'onə' əsa'aque' beŋə' zan." ¹⁵ Na' sša gwzo de'e Abraanə' benlilažə'əteze' Diozən' xte que bžin ža goc can' ben Diozən' lyebe len le'. ¹⁶ Benəčan' chsə'əzoe' jorament chsə'əne' de que be'enə' chnabia'ach ca lega'aque' gwnežjue' castigw čhega'aque' šə cui so'one' complir can' chso'ozoe' jorament. Chso'one' ca' par nič beŋə' ca' chsa'acyožə' lega'aque' se'ejle' čhega'aque' na' yesyə'əyaxcenlaze'e. ¹⁷ Beŋə' ca' chon Diozən' cuent žjənaque' xi'in dia čhe de'e Abraanə' laoguē de'en chso'onlilaže'e Diozən', Diozən' bene' par nič nitə'əchgü'e segor de que guaquəczə can' bene' lyebe, na' bito chš'e can' bansi'e xneze gone'. De'e na'anə' bzo cuine' testigw gwne': "Guaquəczən čhedə' zoa' naca' Dioz." ¹⁸ Ca naquə Diozən' bene' lyebe na' leczə bzo cuine' testigw gwne': "Guaquəczə can' nia'anə' čhedə' zoa' naca' Dioz", bene' ca' par nič nezecho de que gaquə de'e te can' gwne'enə'. Na' bito chac gü'e dižə' güenlaze'. Diozən' bene' lyebe na' bzo cuine' testigw par nič bito žebcho sino yebeicho de'en nezecho žjəyecho len le', chio'o bagwñabechone' bezi'ixene' xtolə'əchon'. ¹⁹ Na' de'en nezecho žjəyecho len Diozən' bito chac čop lažə'əcho sino zotezə zocho chonlilažə'əchone' čhedə' la' nezecho de que Jeso'osən' čhne' fabor chio'o lao Diozən' ca bžox əblao čhecho. ²⁰ Jeso'osən' bazjəyecho' gan' zo Diozən' na' chone' par nič leczə chio'o žjəyecho len le'. Na' Jeso'osən' naque' bžox əblao čhecho, ben' gwxaquə'əlebe ca bžox Melquisedequən'.

7

Jeso'osən' naque' ca bχoz Melquisedequən'

1 Na' Melquisedequən' goque' rei gan' nzi' Salem na' Diozən' ben' naquə le'eze-laogüe beñə' blao gwleje' le' par goque' bχoz. Na' catə' beza' de'e Abraannə' beyoż bene' gan lao rei ca' beñə' ca' gosə'ədiləlen beñə' Sodoma ca', bχoz Melquisedequən' jəšague' le' na' len yelə' guac che Diozən' bene' par niç goc de'e šao' de'e güen che de'e Abraannə'. 2 Na' de'e Abraannə' botobə' de'e ca' gosə'əban rei ca' che beñə' Sodoma ca' na' bnite'en ši cuen de'e naquə lebe nach gwleje' tcuenən par bnežjue'en bχoz Melquisedequən'. Melquisedequən' zeje dižə' "rei beñə' chnabia' güen". Na' gwnabi'e gan' nzi' Salem, na' Salemən' zeje dižə' "gwnitə' beñə' binlo". 3 Bito nyojən šə no goquə de'e xaxna' Melquisedequən' na' nique nyojən šə no goquə de'e xaxta'ogüe'e, na' nic nyojən batə'əquə' golje' na' batə'əquə' gote'. De'e na'anə' nezecho cuinə' te yelə' naquə bχoz che'enə' na' leczə de'e na'anə' gwxaquə'ələbene' ca Xi'in Diozən'.

4 Le'e gon xbab de que bχoz Melquisedequən' goque' beñə' blao. De'e na'anə' de'e xaxta'ocho Abraannə' lao ši cuen güejə de'e ca' gwleje', bnežjue' tcuenən bχoz Melquisedequən'. 5 Na' beñə' ca' gwsa'aljə lao dia che de'e Lebin', beñə' ca' besya'əyalə' par gwsa'aque' bχoz, nyojən le'e lei de'en bzoj de'e Moizezən' de que yesə'əzi'e tcuen lao ši cuen yoguə' cuantzə de'e gotə' che beñə' Izrael ca' yelə' la'anə'əczə yoguə'ələlga'aque' zjənaque' xi'in dia che de'e Abraannə'. 6 Melquisedequən' bito ənacho golje' lao dia che de'e Lebin', pero gwxi'e tcuen lao ši cuen de'en botobə de'e Abraannə' na' len yelə' guac che Diozən' bene' par niç goc güen che de'e Abraannə' ben' ben Diozən' lyebe əsa'ac xi'in dia che'enə' beñə' zan. 7 Na' nacia' de que Melquisedequən' zaquə'əche' cle ca de'e Abraannə' chedə' Melquisedec na'anə' gwdape' yelə' guac che Diozən' na' bene' par niç goc de'e güen che de'e Abraannə'. 8 Na' beñə' ca' gwsa'ac bχoz segon can' na lei de'en bzoj de'e Moizezən' gosə'əzi'e tcuen lao ši cuen cuantzə bi de'en gotə' che beñə' Izrael ca' yelə'. Bχoz ca' gwsa'aque' beñə'ch na' gwsa'ate'. Pero Melquisedequən' ben' gwxi' tcuen lao ši cuen de'en botobə de'e Abraannə', cho'en dižə' che' ca beñə' ne'e zoczə. 9-10 Na' ca naquə de'e Abraannə' bnežjue' Melquisedequən' tcuen lao ši cuen de'e ca' botobə de'en gosə'əban rei ca', de'en na'anə' gwaquə ənacho de que de'e Lebin' leczə bnežjue' Melquisedequən' tcuen güejə lao ši cuen de'e ca' botobə de'e Abraannə'. Guac ənacho ca' chedə' de'e Lebin' golje' lao dia che de'e Abraannə' la'anə'əczə bitonə' galje' catə'ən Melquisedequən' jəšague' de'e Abraannə'. De'e Lebin' goque' xa beñə' nech ca' əgwsa'ac bχoz che beñə' Izrael gwlaž checho ca' cana', na' lei de'en bzoj de'e Moizezən' nan de que yesə'əzi'e tcuen lao ši cuen cuantzə bi de'en de che beñə' Izrael ca' yelə'.

11 Žalə' bχoz ca' beñə' ca' gwsa'aljə lao dia che de'e Lebin' goc so'one' par niç yichjla'aždao' beñə' gwlaž checho ca' əsa'aquan can' chene'e Diozən', bito byažjecho yeto bχoz žalə' ca'. Pero de'en cui goquə so'one' par niç əsa'ac yichjla'aždao' beñə' can' chene'e Diozən', de'e na'anə' bidə Jeso'osən' par naque' bχoz chechon' na' gwxaquə'ələbene' ca Melquisedequən'. 12 Jeso'osən' naquə'əcze' bχoz chechon' la'anə'əczə cui naque' dia che de'e Lebin'. De'e na'anə' nezecho banžə' lei de'en choe' dižə' che bχoz che nasyon Izrael chechon'. 13 Bχoz checho ben' cho'echo dižə' chei, golje' lao dia che de'e Jodan', na' bitoch bchoj no gaque bχoz entr beñə' ca' əgwsa'aljəch lao dia che de'e Jodan'. 14 Nezczecho de que Xanchon' golje' lao dia che de'e Jodan', pero

de'en bzoj de'e Moizezən' le'e lein' nan de que beṇə' ca' gwsa'aljə lao dia che de'e Lebin' əsa'aque' bχoz.

¹⁵⁻¹⁶ Bχoz checho Jeso'osən' naque' ca bχoz Melquisedequən'. Bito golje' lao dia che de'e Lebin' na' bito naque' bχoz can' na lei de'en bzoj de'e Moizezən'. Naque' bχoz chedə' bito gwzoj yelə' gotən' le', na' zocze' zejlicane. ¹⁷ Na' de'e nga nyojən can' goz Diozən' Jeso'osən' nan:

Naco' bχoz beṇə' zo zejlicane
na' naco' ca bχoz Melquisedequən'.

¹⁸ Ca naquə' bχoz ca' beṇə' ca' ben Diozən' mendad gwnitə' cana', bitoch none' mendad nite'e n'a'a chedə' de'en gwso'one'ənə' bito zaquə'an par əsa'a guac yichjla'aždao' benachən' can' chene'e Diozən', na' bito nsa'an yelə' guac che Diozən'. ¹⁹ Leinə' bito zaquə'an gonən par niçh yichjla'aždao' beṇə' əsa'aque' can' chene'e Diozən'. Pero n'a'a bazo Jeso'osən' chone' par niçh chac yichjla'ažda'ochon' can' chene'e Diozən'. Na' nezecho chaquach güen checho cle ca che beṇə' ca' zjənombia' lein'. Jeso'osən' chone' par niçh zocho binlo len Diozən'.

²⁰ Na' par niçh nezecho de que Jeso'osən' naque' bχoz chechon', Diozən' bzo cuine' testigw gwne':

Naquəcze' bχozən' chedə' zoa' naca' Dioz.

²¹ Beṇə' ca' gwsa'aque' bχoz segon can' bzoj de'e Moizezən', Diozən' bito gože' lega'aque' can' gože' Jeso'osən'. Nyojən' can' gože'ene', nan:

Diozən' bzo cuine' testigw gwne':
"Naquəczo' bχozən' chedə' zoa' naca' Dioz.

Na' bito gwša'a can' ni'anə'.

Le' naco' bχoz ben' zo zejlicane.

Naco' ca Melquisedequən'."

²² Nezecho de que Jeso'osən' bedəlo'ine' chio'o de que Diozən' choncze' con can' none' lyebe par gaquəlene' chio'o. Na' de'en none' lyebe gone' n'a'a naquəchən güen cle ca de'en bene' lyebe gone' antslə. ²³ Beṇə' ca' gwsa'aque' bχoz segon can' na lei de'en bzoj de'e Moizezən', gwsa'aque' beṇach na' gwsa'ate', pero benitə'ətecəə lgu'a'aga'aque'. De'e na'anə' gwsa'aque' beṇə' zan. ²⁴ Pero Jeso'osən' zoe' zejlicane na' de'e na'anə' zejlicane naquəcze' bχoz chechon'. ²⁵ Na' notə'ətezə beṇə' chse'ene'ene' nite'e binlo len Diozən', Jeso'osən' nape' yelə' guac par chocobe' yichjla'ažda'oga'aque'en con šə chso'onlilaže'ene'. Nape' yelə' guac par gone' ca' chedə' zocze' zejlicane chnabe' godlen lao Diozən' par yoguə' chio'o chonlilažə'əchone'.

²⁶ Na' Jeso'os nan' naque' bχoz əblao chechon' na' zaque'e par gaquəlene' chio'o chedə' chone' cayanə'an chazlažə' Diozən'. Bito bi dolə' nape', na' bito bi de'e mal chone', na' nic chone' xbab mal. Zoe' gan' zo Diozən', chnabi'e txe' len le'. ²⁷ Bito bi xtole'e de na' de'e na'anə' bito cheyalə' gote' bia yixə' par yezi'ixen Diozən' xtole'ənə' can' gwso'on beṇə' ca' gwsa'ac bχoz segon can' na lei de'en bzoj de'e Moizezən'. Yoguə' ža zgua'atec gwso'ote' bia yixə' par niçh gosə'əṇabe' bezi'ixen Diozən' xtole'əga'aque'ənə' na' techlə lecəə gwso'ote' bia yixə' par gosə'əṇabe' bezi'ixen Diozən' xtole'ə beṇə' Izrael ca' yelə'. Šlinzə bnežjw cuin Jeso'osən' par ni checho catə'an gwso'ot beṇə' le' le'e yag corozən' na' bitoch gate' yeto. ²⁸ Beṇə' ca' gwsa'ac bχoz əblao segon can' na lei de'en bzoj de'e Moizezən' gwsa'aque' beṇə' güen de'e mal can' zjənaquə yeziquə'əchlə beṇə'. Zan iz bagoc bzoj de'e Moizezən' lei che Diozən' catə' Diozən' bzo cuine' testigw de que sele'e Xi'ine'ənə' par gague' bχoz əblao chechon' na' gwne': "Gaquəcze' bχoz əblaon' chedə' zoa' naca' Dioz." Na' Xi'ine' na'anə' zocze' zejlicane, na' naquə yichjla'aždaogüe'ənə' cayanə'an chene'e Diozən'.

8

Cristàn' chone' par nich chac de'e cobà de'en non Diozàn' lyebe gone' par gaquàlene' chio'o

¹ Na'a ža zo b̄xoz əblao chechon', na' chi'e yoban' chnabi'e txen len Diozàn' ben' naquà le'eze-laogüe beñà' blao. L̄ennà' naquan de'e žialaoch lao yoguà' de'en babe'echo dižà' chei. ²⁻³ B̄xoz əblao ca' beñà' ca' gwso'ot bia yižà' lo'o yo'odao' de'en gwso'on de'e xaxta'o chio'o beñà' Izrael jso'e xchenga'aquebən' gan' nzi' "Latjə gan' zo Diozàn'" par nich Diozàn' bezi'ixene' xtolə'əga'aque'enà' len che beñà' ca' yelà'. Na' de'en gwso'one'enà' naquan ca de'en chac yoban' gan' zo Diozàn'. De'e na'anà' benən byen bnežjw cuin Jeso'osən' gwso'ot beñà' le' par nich naque' b̄xoz əblao chechon' gan' zo Diozàn', na' chone' par nich Diozàn' chezi'ixene' xtolə' chio'o chonlilažə'əchone'. ⁴ Na' bito naque' b̄xoz žalə' ne'e zoe' lao yežlyon', chedə' banitə' b̄xoz ca' beñà' ca' chjsoa' bi de'en chjsoa' lao Diozàn' segon can' na lein'. ⁵ Na' yoguà'əlo' de'en chso'on b̄xoz ca' beñà' ca' chso'on can' na lein', naquan latə' laszə ca naquà de'en chac yoban'. Diozàn' bene' mendad len de'e Moisezan' antslə ze'e so'on de'e xaxta'o chio'o beñà' Izrael yo'o de'e lachə'anà' gan' gwso'o b̄xoz ca' par gwso'elaogüe'e Diozàn', gože'ene': "Yoguà' de'en bagwnia' gonle, legonən cayanə'an blo'ida' le' catə'an gwzocho lao ya'anà'." ⁶ Pero na' de'en chon Cristàn' zaquə'əchən cle ca de'en gwso'on b̄xoz ca' beñà' ca' gwso'on can' na lein'. Na' lecəzə de'e cobà de'en chon Diozàn' len chio'o naquə'əchən güen cle ca de'en bene' antslə, chedə' de'e nench de'en non Diozàn' lyebe gone' par gaquàlene' chio'o na'a.

⁷ Žalə' de'en ben Diozàn' par goclene' beñà' Izrael gwlaž checho ca' de'e nech benən par nich gwsa'ac yichjla'ažda'oga'aque'enà' can' chene'ene', bito bsele'e Cristàn' žalə' ca'. ⁸ Pero nachbia' Diozàn' bito bebeine' lega'aque', nachən' gwne': Chona' lyebe gona' to de'e cobà par gaquàlena' le'e beñà' Izrael catə' əžin ža, nada' Xanle Dioz ənia' ca'.

⁹ Nža'an beñà' len de'e xaxta'ole ca' ca tyemp catə'an goquə'lenga'aca'ane' par nich besyə'əchoje' Egipton'.
Lega'aque' bito gwso'one' can' gwso'one' lyebe len nada'.

De'e na'anà' nada' Xanle Dioz bitoch bengə'aca'ane' cas.

¹⁰ Quinga gona' par gaquàlena' le'e beñà' Izrael catə'an əžin žan':
Nada' Dioz gona' par nich šo'o yichjle de'e ca' nona' mendad gonle,
na' gona' par nich yebeilen lo'o la'ažda'olen'.
Na' toza' nada' güe'ela'ole na' le'e gacle xi'ina'.

¹¹ Na' ni tole cui chyažjən əgwsed əgwlo'i ljuežjle par nich gombi'ale nada'
chedə' cana' yoguà'əle gombi'ale nada',
le'e cuitec bi zaquə'əle na' len le'e nacle beñà' blao.

¹² Cana'ach bitoch gona' xbab che de'e mal ca' de'en babenlənə'
chedə' ca orən' babezi'ixena' xtolə'əlenə'.

¹³ Na' ca naquan' be' Diozàn' dižà' che de'e cobən' de'en gwne' gone' par gaquàlene' nasyon chechon', nezecho chde che de'en bene' mendad so'one' antslə chedə' banaquan de'e golə na' bitoch cheyalə gonchon.

9

Yo'odao' de lachə' de'en gwso'on beñà' Izrael ca gwxaquə'əleben ca gan' zo Diozàn'

¹ Cana'ate ben Diozàn' mendad naclə so'on beñà' Izrael gwlaž checho ca' par so'ela'ogüe'ene'. Na' lecəzə bene' mendad so'one' to yo'odao' par le'.

² Yo'oda'onə' goquən de lachə'. Na' lo'o cuart nechən' bosozoe' to candeler

na' to mes gan' bosu'ocue'e yetxtil de'en naquæ par Diozæn'. Na' cuart nechæn' nzi'in "Latjæ che Dioz". ³ Na' cuart ægwchopen' nzi'in "Latjæ gan' zocza Diozæn'". Na' entr cuart ca' çhopæ gwze to lachæ'. ⁴ Na' lo'o cuart ægwchopen' bosu'ozoe' yeto mes de or gan' bosu'ozeye' yal. Na' gosæ'æyixjue' to caj na' bosu'oguaazje' doxenæn or. Na' lo'o caj na' bosu'ozoe' to yesæ' de or gan' bosu'ože'e yelæ' guao de'en gwza' yoba de'en nzi' mana, na' lecza lo'o caj na' gosæ'ægüe'e garrot che de'e Ronnæ' de'en bexejæ. Na' lecza na' bosu'ože'e yej ta'a ca' gan' byoj de'en ben Diozæn' mendad so'one' par nich gaquælene' lega'aque'. ⁵ Na' lao tap che cajæn' bosu'onite'e çhopæ lgua'a lsaqua' angl beñæ' gosæ'æzi' querobines. Na' gan' zjæzeca querobines ca' chey che'eni'in, par nich nachia' de que Diozæn' zoe' na'. Toe' gwzeca ŝyichjæn na' yetoe' yeŝyichjæn. Na' lao tap che cajæn' entr lega'aque' nzi'in "Latjæ che yelæ' cheyaŝæ' chezi'ilažæ' che Diozæn'". Pero bitoch che'enda' güe'echa' dižæ' che to to de'e ca'.

⁶ Na' beyož banitæ' cuart ca' na' beyož bosu'onite'e yoguæ' de'e ca' lo'inæ', yoguæ' ža ja'ac bçoz ca' lo'o cuart nechæn' gan' gwso'one' can' ben Diozæn' mendad so'one' par æso'ela'ogüe'ene'. ⁷ Na' cuart ægwchopen' toza bçoz æblaon' goc gwyo' e ze tgüiz güejæ. Na' catæ'an gwyo'enæ' benæn byen bexe'e chen che bia yixæ' bže'en lao cajæn par nich Diozæn' bezi'ixene' xtolæ'enæ' na' bezi'ixente' xtolæ' beñæ' ca' yelæ'. ⁸ Na' de'en cui gotæ' lens ŝo'o nochlæ beñæ' lo'o cuartæn', Spirit che Diozæn' chzejni'in chio'o de que bito gaquæ ŝo'ocho gan' zo Diozæn' žalæ' ñe'e chone' mendad gaquæ yoguæ'æloj de'en gwso'one' lo'o yo'odao' de'en nsa' çhopæ cuart. ⁹ Na' yo'oda'onæ' len yoguæ' de'e ca' gwso'on bçoz ca' lo'inæ' chlo'in chio'o zocho na'a can' naquæ yoban' gan' zo Diozæn'. De'e zan de'en gwso'on de'e çaxta'ocho ca' gwso'ela'ogüe'e Diozæn' lo'o yo'oda'onæ' pero bito beyac yichjla'ažda'oga'aque'en can' chene'e Diozæn' la'añæ'æczæ bosu'onežjue' Diozæn' bi de'en bosu'onežjue'ene' na' la'añæ'æczæ gwso'ote' bia yixæ' par gwso'elaogüe'ene'. ¹⁰ De'e ca' bosu'onežjue' Diozæn' gwsa'aquæn no nis yelæ' guao na' no bia yixæ'. Na' de'e zan costombr çhega'aque' gotæ' par gwsa'a gosæ'ayib cuinga'aque'. Na' yoguæ' de'e ca' gwso'one' nich cuerp çhega'aque'ena' goquæn xi'ilažæ' can' na'lein'. Yoguæ' de'e ca' gwso'one'ena' gwso'onæn žin xte catæ'an bselæ' Diozæn' Cristæn' par bene' de'e zaquæ'æche.

¹¹⁻¹² Pero bazo Cristæn' na'a naque' bçoz æblao chechon' na' chone' par nich chac güen can' gwnitæ' de'e çaxta'ocho ca' lez gaquæ. Babeyepæ' yoban' na' zoe' gan' zo Diozæn'. Na' gan' zoe'ena' gwxaquæ'æleben ca cuart ægwchope che yo'odao' che beñæ' Izrael ca', pero naquæchæn de'e zaquæ'æche na' de'e güench clezæ ca de'en gwzo che bçoz ca' cana', la' bito naquæn de'e ben beñæch. Na' Cristæn' zaque'e par gwyo'e gan' zo Diozæn' çhedæ' bnežjw cuine' gwso'ot beñæ' le' na' blalj xchene'ena' le'e yag corozæn'. Bitu ñacho bete' no ŝib o no go'oñ dao' na' blaljæ xchembæn' par nich be'en Diozæn'. Šlinzæn' gwdixjue' xtolæ'æchon' len xchene'ena' par zejlicane. ¹³ Ca naquæ de'e çaxta'ocho ca' bito gwsa'aque' xi'ilažæ' can' na'lein' ŝæ bagosæ'ægane' no beñæ' guat. Na' par nich besyæ'ayac cuerp çhega'aque'ena' xi'ilažæ' de'e yoblæ can' na'lein', bçoz ca' bosu'ože'e lega'aque' no xchen ŝib o no xchen go'oñ na' len de de'en gwche' catæ'an cheyož choso'ozeye' baquæ' dao'. ¹⁴ Pero xchen Jesocristæn' de'en bedalalje' par beque'e xtolæ'æchon' zaquæ'æchæn ca xchen bia yixæ' ca'. Xtolæ'æcho na'anæ' benæn par nich goccho ca beñæ' guat len yichjla'ažda'ochon', pero na'a baben Jesocristæn' par nich naquæ yichjla'ažda'ochon' xi'ilažæ' nich cho'ela'ocho Diozæn' ben' zo zejlicane. Spirit che Dioz nan' goclenæn Jeso'osæn' par ben cuine' lažæ' na' Diozæn' par gwdixjue' xtolæ'æchon'. Na' ca naquæ

Jeso'osən' bitocza bi bi xtole'enə' gotə'.

¹⁵ Na' de'en bedəlalj xchen Cristən' gwzoloa chac de'e cobən' de'en chon Diozən' lyebe gone' par chaclene' chio'o. Na' bachac de'e cobən' par niç ca' baltezə beṇə' bagwlej Diozən' žjasyə'anite'e len le' zejlicane. De'en bedəlalj xchen Cristən' gwdixjue' lente de'e mal ca' bencho žlac ne'e chac de'e neche de'en ben Diozən' lyebe gone' par goclene' de'e xaxtao' chio'o beṇə' Izrael.

¹⁶ Catə' to beṇə' babene' testament, bito gaquə can' na testamentən' xte cata'əch nezecho de que bagote'. ¹⁷ Na' ca naquə testamentən' bito gaquə can' nannə' žlac ne'e mban be'enə' ben len. Catə' bagote' cana'anə' gaquə can' nannə'. ¹⁸ Na' par niç gwzoloa goc de'e neche de'en ben Diozən' lyebe gone' par goclene' de'e xaxta'ocho ca', bene' mendad boso'olaljə' xchen bia yixə'. ¹⁹ De'e na'anə' cata' de'e Moizezən' beyož be'elene' beṇə' ca' dižə' che yoguə'əloj de'en ben Diozən' mendad so'one' can' na lei che'enə', nach de'e Moizezən' bže'e lega'aque' xchen go'on dao' na xchen šib nach nis. Bže'e lega'aque' de'e ca' len latə' yišə' xa xilə' de'en mben color əḡna na' len to xis yixə' dao' de'en naquə ca gwreg. Na' leczə bže'en libran' gan' nyoj leinə'. ²⁰ Na' de'e Moizezən' gože' lega'aque': "Chen ni ben Diozən' mendad əgwza'a le'e par niç gone' can' none' lyebe gone' par gaquəlene' chio'o." ²¹ Nach bža'ate'en yo'odao' de lachə'an na' len yesə' ca' na' ša' ca' de'en boso'oçhine' gan' gwso'ela'ogü'e Diozən'. ²² Lei de'en bzoj de'e Moizezən' benən mendad boso'ože'e chennə' par niç zan de'en boso'oçhine' gwsa'aquən xi'ilažə' can' na lein'. Diozən' bito bezi'ixene' xtole' beṇə' žalə' cui boso'olalje' chen che bia yixə'.

De'en bnežjw cuin Cristən' gwso'ote'ene' chac cheque'e xtole' chio'o chonlilažə'əchone'

²³ De'e na'anə' benən byen boso'ože'e xchen bia yixə'an de'e ca' besə'əchine' lo'o yo'oda'onə' par niç gwsa'aquən xi'ilažə' can' na lein'. Pero xchen bia yixə' ca' bito gaquə gonən ca gaquə yichjla'ažda'ochon' can' chene'e Diozən' par niç šo'ocho gan' zoe'enə'. Tozə xchen Jesocrist nan' zaquə'an par chonən ca chac yichjla'ažda'ochon' can' chene'e Diozən'. ²⁴ Catə' Cristən' gwdixjue' xtole'əchon' bito gwyo'e lo'o cuart əgwchope che yo'oda'onə' can' gwso'on bxož ca' cana' sino beyepe' yoban' gan' zo Diozən', na' na' zocze' na'a chne' fabor chio'o lao Diozən'. Na' cuart əgwchope che yo'odao' che beṇə' Izrael na'anə' gwzon par bzejni'in chio'o can' naquə gan' zo Diozən'. ²⁵ Bxož əblao ca' ze tğüiz güejə gwso'e lo'o yo'oda'onə' gan' nzi' latja gan' zoczə Diozən' boso'ože'e chen che bia yixə'. Pero Cristən' bito byažjən əgwnežjo cuine' so'ote'ene' zan las. Šlinzən' blalj xchene'enə' par gwdixjue' xtole'əchon'. ²⁶ Žalə' byažjən laljə xchene'en zan las, babnežjw cuine' zan las dezd catə'an gwxe yežlyon' žalə' ca'. Pero caguə ca'anə'. Bnežjw cuine' šlinzə catə'an bžin or che'enə', na' de'en gwso'ote'ene' šlinzə cana', gwdixjue' xtole'əchon' zejlicane. ²⁷ Na' Diozən' bansi'e xneze de que əžin ža sa'at to to beṇəçhən' na' šlinzən' sa'ate'. Na' techlə əna Diozən' che to toga'aque' šə yesə'əzi'e castigw o šə nite'e mbalaz len le'. ²⁸ Na' ca de'en sa'at beṇəçhən' šlinzə leczə šlinzən' bnežjw cuin Cristən' gwso'ote'ene' gwdixjue' xtole' beṇəçhən'. Nach əžin ža yide' de'e yoblə, caguə par çhixjoche' xtole'əchon' sino par niç deyexi'e beṇə' ca' chəsə'əbeza batə'aquan' yide'enə'.

10

¹ Lei de'en bzoj de'e Moizezən' chzejni'in chio'o latə'əlaszə che de'e güen de'en gaquə checho catə' yežincho yoban' gan' zo Diozən'. Pero leinə' bito

goquə gonən par niç yichjla'azdao' benə' ca' gwso'on can' nannə' əsa'aguən can' chene'e Diozən', la'anə'əczə gwso'ote' bia yixə' yoguə' iz par bezi'ixen Diozən' xtolə'əga'aque'enə'. ² Žalə' de'en gwso'ote' bia ca' benən par niç cuich so'one' de'e malən' bitoch besə'əyajjene' so'otache'eb žalə' ca'. Pero de'en gwsa'acbe'ine' ne'e chso'one' de'e malən' nachən' yoguə' iz gwso'ote'eb. ³ Na' de'en gwso'one' ca' bito gwsa'anlaže'e de que zjənapə' dolə'. ⁴ Na' gwso'one' ca' yoguə' iz chedə' chen che no go'oŋ dao' o no šib bito zaquə'an par yeca'an xtolə' benə'.

⁵ De'e na'anə' catə' Cristən' bide' yežlyo nga gože' Xe' Diozən': Nezda' to de'en chazlažə'əcho' mazəchlə ca' bia yixə' bian' chso'ot benə' par chso'ela'ogüe'e le', na' mazəchlə ca' bichlə de'en chso'one' le'.

De'en chazlažə'onə' əgwnežjo cuina' par chixjua' xtolə' benə'chən'.

⁶ Lenə' de'en chebeido' mazəchlə ca' bian' chso'ote' par choso'ozeye', na' mazəchlə ca' xchen bia yixə' de'en chəsə'alalje' catə' chəsə'əŋabe' yezi'ixeno' xtolə'əga'aque'enə'.

⁷ De'e na'anə' goža' le' can' nyojən le'e librən' gan' nan:

“Dioz chia', za'a nga zedəyena' con can' chazlažə'onə'.”

⁸ Zgua'atec Cristən' gože' Xe' Diozən': “Nezda' de'en chazlažə'əcho' na' de'en chebeichdo' ca' de'en chso'ote' bia yixə' na' ca' bichlə de'en chso'one' le', na' ca' de'en choso'ozeye' bia ca' chso'ote' na' leczə ca' de'en chəsə'alalje' xchenga'acobən' par chəsə'əŋabe' chezi'ixeno' xtolə'əga'aque'enə'.” Gwne' ca' la'anə'əczə lei de'en bzoj de'e Moizezən' benən mendad gwso'ote' bia yixə' na' gwso'one' bichlə de'e ca' gwso'one'enə'. ⁹ Nach Cristən' gože' Diozən': “Nada' za'a zedəyena' con can' chazlažə'onə'.” De'e na'anə' nezecho de que Diozən' bitoch chene'ene' gotcho bia yixə' can' na' lein' chedə' Cristən' bagwdixjue' xtolə'əchon'. ¹⁰ Cristən' bene' con can' gwyazlažə' Diozən'. Šlinzən' bnežjw cuine' gwso'ot benə' le' par beyone' yichjla'azdao' yoguə' chio'o chonlilažə'əchone' xi'ilažə'.

¹¹ Benə' ca' zjənaquə' bxož, yoguə' ža nitə'ətezə nite'e chso'ote' bia yixə' par xtolə' benə' Izrael' ca' yela', len la' xchen bia yixə'an bito gaquə' yeca'an xtolə' benə'. ¹² Pero na' Cristən' bnežjw cuine' šlinzə par gwdixjue' xtolə'əchon'. Na' beyožən' zjəyechi'e gan' chnabi'e len Diozən'. ¹³ Na' zoe' na' chbeze' əžin ža nitə' yoguə' de'e ca' chso'on contr le' na' benə' contr che' ca' xni'enə'. ¹⁴ Na' de'en gwdixjw Cristən' xtolə'əchon' šlinzə cana', na' beyone' yichjla'azdao' yoguə' chio'o chonlilažə'əchone' xi'ilažə', leczə babene' par niç chac yichjla'azda'ochon' can' chene'e Diozən' gaquən zejlicane. ¹⁵ Na' caguə nada'əza' cho'a dižə' che de'e ca'. Leczə Spirit che Diozən' benən ca' byožen ca' par niç nezecho naquən de'e li, nan:

¹⁶ Quinga nona' lyebe gona' len lega'aque' catə' əžin žan':

Nada' Dioz gona' par niç šo'o yichjga'aque' de'e ca' nona' mendad so'one', na' gona' par niç yesyə'əbeine'en lo'o la'azda'oga'aque'enə'.

¹⁷ Nach nyoj yeto de'en nan:

Cuatəch žjsa'alaza'a che de'e mal ca' bagwso'one' na' che xtolə'əga'aque'enə'.

¹⁸ Na' catə' babezi'ixen Diozən' xtolə'əchon', bitoch chyəžjecho gotcho bia yixə' par əŋabcho yezi'ixene'en.

Cheyalə' socho güe'ela'ochio Diozən' na' goncho orasyon laogüe'enə'

¹⁹ Na'a ža benə' bišə', laogüe de'e blalj Jesocristən' xchene'ena' par gwdixjue' xtolə'əchon' guaquəczə šo'ochio gan' zo Diozən' sin cui žebcho. ²⁰ De'en ben Jesocristən' par niç šo'ochio gan' zo Diozən' naquən to de'e cobə la' antslə

“Latjə gan' zo Diozən'” lo'o yo'oda'onə' bgašə'an len to lachə'. Pero na'a de'en bnežjw cuin Jesocristən' por ni chechon' bito bi de de'en chcuasə'an latjə gan' zo Diozən' yoban' len chio'o chonlilažə'əcho Jesocristən'. ²¹⁻²² Na' de'en naquə Jesocristən' bχox əblao checho, na' de'en chaclene' chio'o naccho ca family che Diozən', de'e na'anə' cheyalə' socho güe'ela'ochio Diozən' na' goncho orasyon laogüe'enə' do yichj do lažə'əcho, gonlilažə'əchone' sin cui gaquəžejlažə'əcho. Goncho ca' laogüe de'en blalj xchen Jesocristən' par beque'e xtolə'əchon'. Na' leczə bagwchoacho nisan'. ²³ Na' can' gwzoloacho chonlilažə'əcho Jesocristən', ca'aczan' cheyalə' sotezə socho gonlilažə'əchone' na' yebeicho de'en žjəyecho len le', chedə' la' Diozən' ben' ben lyebe žjəyecho len le', chone' complir can' ne'enə'. ²⁴ Na' leczə cheyalə' güe'e ljuežjcho balor par nič gaquəchecho che ljuežjcho na' gonchcho de'e güen to yetocho. ²⁵ Na' bito cuejyichjcho de'en chdopcho txen par cho'ela'ochio Diozən', can' chso'on balə benə' chəsə'əbejyichje'en. Cheyalə' gwtiplažə' ljuežjcho par nič sochcho chech gonlilažə'əcho Cristən'. Gonchcho ca' chedə' bazon baozə yidə Cristən' yeto.

²⁶ Na' šə chio'o cuejyichjcho dižə' li che Diozən' de'en banombi'achio par gontezcho de'e malən', bitoch gaquəlenən chio'o de'en blalj xchen Jesocristən' par beque'e xtolə'əchon'. ²⁷ Na' šə goncho ca', cheyalə' žebcho castigw de'en gon Diozən' chio'o, chedə' notə'atezcho choncho contr le' əsele'e chio'o lo'o yi' gan' cuiayi'icho. ²⁸ Ca naquə benə' ca' chsa'aque'ne' bitobi zaquə' lei de'en bzoj de'e Moizezan' na' bito choso'ozenague' chei, benə' gwlaž checho ca' chso'ote' lega'aque' sin cui chesyə'əyaše'ene' lega'aque', con šə nita' chopə o šonə testigw benə' chso'e dižə' de que de'e malən' bagwso'one'. ²⁹ Pero chio'o ža šə güe'icho Xi'in Diozən' na' Spirit che'eno' de'en nži'ilažə' chio'o, zaquə'əczən par si'icho castigw gualəch, na' le'egatezə ca' šə gaquecho cui bi zaquə' xchene'enə'. Lennə' bedəlalje' par nič gwzoloa chac de'e cobə de'en ben Diozən' lyebe gone' par chaclene' chio'o na' bedəlalje'en par nič yichjla'aždao' chio'o chonlilažə'əchone' beyaquən xi'ilažə'. ³⁰ Nezecho de que Diozən' gwne': “Nadan' co'olažə'a benə' ca' chso'on contr nada' na' nadan' gonga'aca'ane' castigw.” Na' leczə nyojən nan: “Diozən' gwnežjue' castigw che benə' ca' bagwcue'e ca' xi'ine' šə so'one' de'e malən'.” ³¹ Na' šə cuejyichjcho Diozən' ben' zo zejlicane, lechgualə de'e žebcho ca naquə castigon' de'en gone' chio'o.

³² Le'e žjsa'alažə' can' bchejele la'anə'əczə de'e zan de'e gwdi' gwxaquə'əle ca tyempən' cata'an ze'e gwzoloa gwyejni'ile che Cristən'. ³³ Besyə'əbei benə' contr chele ca' bosu'ogüie' can' bžaglaole catə'an bosu'ozia bosu'onite' le'e na' cata'an gosə'əque'e de'en gotə' chelen'. Na' leczə bchejele par benle txen len benə' ljuežjcho ca' cata'an goc chega'aque' ca'. ³⁴ Beyašə' beži'ilažə'əle ljuežjcho ca' benə' ca' gwsa'atə' ližya na' gwzole mbalaz la'anə'əczə gosə'əca' benə' de'en gotə' chele, chedə' la' gwnezele de que laogüe de'en chonlilažə'əle Cristən' de de'e zaquə'əche chele yoban' de'e cui te chei. ³⁵ Na'a ža, bito cuejyichjle ca de'en chonlilažə'əlene', chedə' gwžin ža catə' sole mbalaz. ³⁶ Bitu žjxaquə'əlažə'əle par yeyož gonle yoguə'əloj can' chene'e Diozən' la' šə gonle can' chene'ene'enə' žjəyecho len le' zejlicane can' bene' lyebe. ³⁷ Nyojən can' gwna Diozən' nan:

Lechgualə lgüegwə əžin ža catə' yidə ben' əse'la'a, na' bito šeichene'.

³⁸ Na' benə' ca' zjənaque' benə' güen laogua'anə' cheyalə' nite'e so'onlilažə'e nada'.

Na' beṇə' ca' chəsyə'əbižə' cuich chso'onlilaže'e nada', bitoczə yebeiga'acda'ane'.

³⁹ Pero na' chio'o ža, bito ṇacho naccho ca beṇə' ca' chəsyə'əbižə' cuich chso'onlilaže'e Diozən', beṇə' ca' yesə'əbiayi'. Chio'o zotezə zocho chonlilažə'əchone' na' de'e na'anə' ṇezecho žjəyecho len le' zejlicane.

11

Diozən' chebeine' beṇə' laogüe de'en chso'onlilaže'ene'

¹ De'en chonlilažə'əcho Diozən' ṇezecho guaquə de'en chbezcho gaquə, na' ṇezecho de'e liczə can' na Diozən' che de'e ca' cui chle'icho. ² Na' beṇə' ca' gwnitə' gwłalte, bebei Diozən' lega'aque' laogüe de'en gwsə'onlilaže'ene'.

³ Na' de'en chonlilažə'əchone' chejni'icho de que con bene' mendad goc yoban' na' yežlyon'. Bito bi bchine' par bene'en.

⁴ Na' ca naquə de'e Abelən', de'en beṇlilaže'e Diozən', goque' beṇə' güen lao Diozən' na' bebei Diozən' de'en bnežjw de'e Abelən' le' cle ca de'en bnežjw de'e Cainnə'. Na' la'anə'əczə cuich zo de'e Abelən', de'en beṇlilaže'e Diozən' chzejni'in chio'o de que can' cheyalə' goncho.

⁵ Na' Enoquan' leczə beṇlilaže'e Diozən', na' de'e na'anə' Diozən' bezi' beque'ene' sɪn cui gote'. Notoch no ble'i le'. Na' nyojən che' de que chebei Diozən' le' antslə ze'e yezi' yeque'ene'. ⁶ Diozən' bito chebeine' notə'ətezə beṇə' cui chonlilažə' le'. Na' šə no güe'elao' le', cheyalə' šejle' de que zoczə Diozən' na' de que gwzenagczə Diozən' che' šə bi de'en əṇabene' le' do yichj do laže'e.

⁷ Na' ca naquə de'e Noen' ža, leczə beṇlilaže'e Diozən'. Na' Diozən' bosnisene' le' can' ze'e gaquə na' de'e Noen' gweyje'le' che'. De'e na'anə' Noen' bene' to barcw gan' gwyo'e len family che' ca' par nič bito gwsa'ate' len nisən'. Na' yelə' chonlilažə' che'enə' len Diozən' blo'in beṇə' ca' yeziquə'əchlə gwža' yežlyon' de que gwsa'ape' dolə'. Na' leczə de'en beṇlilaže'e Diozən', de'e na'anə' Diozən' gwne' che' de que naque' beṇə' güen laogüe'enə'.

⁸ Na' de'en beṇlilažə' de'e Abraannə' Diozən', bzenague' cata' Diozən' bene' mendad šeje' zita'. Na' gan' gweyje' Diozən' blo'ine' le' yežlyon' de'en gaquə che'. Na' gweyje' la'anə'əczə bito nombi'e latjən' ca orən'. ⁹ Na' de'en beṇlilažə' de'e Abraannə' Diozən', gwzoe' laž beṇə' zita' gan' ben Diozən' lyebe gwnežjue' xi'in dia che' ca'. Na' de'e Abraannə' gwzoe' lo'o yo'o de lachə'əzə, na' leczə lo'o yo'o de lachə'əzə gosə'ənitə' de'e xi'ine' Isaaquan' na' de'e xi'in xesoe' Jacobən', beṇə' ca' leczə gosə'əbeze' gwnežjo Diozən' xi'in dia čhega'aque' ca' yežlyon'. ¹⁰ Bito bi goque de'e Abraannə' de'en gwnite'e lo'o yo'o de lachə'əzə, čhedə' gwzoe' lez əžin ža soe' gan' zo Diozən', gan' naquə to syoda güen de'e cui te che', syoda de'en ben Diozən'.

¹¹ Na' ca naquə de'e Sar no'ol che de'e Abraannə', beṇlilaže'e Diozən' na' de'e na'anə' Diozən' bene' par nič bi'e bdao' na' gwxxane'ebə' la'anə'əczə cuich zoe' xlaogüe'e sane'. Diozən' bene' ca' len de'e Sarən' čhedə' Sarən' gweyje'le' de que Diozən' gone' can' bene' lyebe. ¹² De'e na'anə' la'anə'əczə de'e Abraannə' naque' beṇə' golə' par so xi'ine', xi'in dia che' ca' gwsa'aque' beṇə' zan can' zjənaquə beljw ca' de'en zjəžia le'e yoban' na' can' naquə yox de'en či' cho'a nisdə'onə', notono no gaquə gwłabe' xi'in dia che'enə'.

¹³ De'e Abraannə', de'e Isaaquan' na' de'e Jacobən', na' nochlə beṇə' ca', ṇe'e chso'onlilažə'əcze' Diozən' catə' bžin ža gwsa'ate' la'anə'əczə cuiṇə' gac can' ben Diozən' lyeben'. Bito gwsa'acžejlaže'e, sino que gwse'ejle'ecze' de que gwžin ža gone' can' gwne'enə'. Na' lega'aque' gwsa'acbe'ine' de que zjənaque' ca beṇə' zita' len beṇə' ža' lao yežlyon' na' de que bito bi lažga'aque' de lao yežlyo nga.

14 Na' de'en gwsa'aquene' cui bi lažga'aque' de lao yežlyon', nachia' de que gwse'enene' yesə'əžine' ga yoblə gan' gaquə lažga'aque'enə'. 15 Žalə' gwso'one' xbab che yežən' gan' gwsa'alje' de que naquən lažga'aque'enə', zjəsyə'anitə'alje' na' žalə' ca'. 16 Pero gwso'one' xbab de que yoban' naquən lažga'aque'enə' na' gwse'enchgüeine' yesyə'əžine' na', čhedə' la' güench naquən cle ca yežlyon'. De'e na'anə' Diozən' bito cheto'ine' čhega'aque' par əne' de que naque' Dioz čhega'aque' ben' chso'elaogüe'e, na' le' habensəogüe'e to syoda par lega'aque'.

17-18 Na' ca naquə de'e Abraannə' benlilaže'e Diozən', de'e na'anə' bzenague' catə' Diozən' benene' prueb gože'ene': "Bet xi'ino' Isaaquən' can' choto' bia yixə' ca' na' chlaljo' xčhenga'acquəbən' par cho'elaogo'o nada'." Na' gwneze de'e Abraannə' de que Diozən' bene' lyebe len le' de'e zan de'e güen de'e gaquə por xi'in' dia che'enə'. Na' che bi'i nan' gož Diozən' de'e Abraannə': "Xi'in' dia che Isaac na'azə gona' cuent lao dia čhio'onə'." Pero bia'aczə bzenag de'e Abraannə' ca de'en gož Diozən' le' got xi'ine' tlišə'anə'. Na' bžin orən', Diozən' bito be'e latjə gote'ebo'. 19 De'e Abraannə' bzenague' par gote'ebo' čhedə' gwnezene' de que Diozən' chac yosbane' beņə' guat ca'. Na' ca naquə Diozən' bito be'e latjə gote' xi'ine'enə' guac ənacho de que Diozən' bosbane'ebo' ladjo beņə' guat ca'.

20 Nach leczə de'e Isaaquən' benlilaže'e Diozən', na' de'e na'anə' gwñabene' Diozən' gone' güen len xi'ine' ca' de'e Jacobən' na' de'e Esa'on'. 21 Leczə de'e Jacobən' benlilaže'e Diozən', na' de'e na'anə' catə' bazon gate' gwñabene' Diozən' gone' güen len xi'in' xesoe' ca', xi'in' de'e Jwsen'. Na' bčhequə' yichje'ena' be'ela'ogüe'e Diozən' žiaša'atezə garrot che'ena'. 22 Na' de'e Jwsen' leczə benlilaže'e Diozən' na' gwyejle' de que əžin ža yesyə'əchoj beņə' Izrael ca' Egipton' can' ben Diozən' lyebe. De'e na'anə' catə' bazon gate' bene' mendad yesyə'əyo'e žit che cuerp che'ena' catə' žjəya'aque' Canaannə'.

23 Na' catə' goljə de'e Moizezən', de'e tant gwso'onlilažə' de'e xaxne'e ca' Diozən', bito besə'əžebe' so'one' contr can' ben de'e rein' mendad so'one' ca de'en gože' beņə' Izrael ca' so'ot bi'i čhega'aque' ca'. Šonə bio' bosə'ocuaše'e de'e Moizezən' ližga'aque'enə', čhedə' gwsa'aquene' nacho' xochechgua. Na' catə' bitoch goquə yoso'ocuaše'ebo', xi'in' rein' beque'ebo' bosčha'ogüe'ebo'. 24 Na' catə' bagwcha'o de'e Moizezən', benlilaže'e Diozən' na' de'e na'anə' bito gone'ene' gaque' cuent ca bi'i che de'e xi'in' Rei Faraonnə'. 25 Gwyazlažə'əche' bžaglaogüe' txen len beņə' Izrael ca' ca de'en gosə'əzaquə'əzi' gosə'əzaquə'əyaše'e, cle ca gone' bi de'en čhasyə'əbei beņə' mal ca' chso'one', la' de'e te čhei de'e ca'. 26 De'en bžaglao de'e Moizezən' gwxaquə'əleben ca de'en gwxaquə'əzi' Cristən'. Na' gocbe'ine' de que de'e zaquə'əche əžaglaogüe' yoguə' de'e ca' cle ca si'e doxen yelə' gwni'a che Egipton'. Gwnezene' gwžin ža catə' gon Diozən' par nič soe' mbalaz. 27 Na' de'en benlilaže'e Diozən' bito bžebe' rein' catə' bžin ža besyə'əchoje' Egipton' la'anə'əczə rein' bža'achgüe' lega'aque'. Na' de'e Moizezən' gwlo'o gwčhejlaže'e len de'e ca' bžaglaogüe' lao bene' par besyə'əchoje' Egipton' čhedə' gwnezene' zoczə Diozən' len le' ca nacho chle'iczene' le'. La'anə'əczə Diozən' cui no chac le'i le'.

28 Na' de'e Moizezən' de'en benlilaže'e Diozən' bene' mendad len to to family beņə' Izrael ca' gwso'ote' xilə' dao' ca' can' gož Diozən' le' na' bosə'ože'e xčhenga'acquəbən' ližga'aque'enə' par nič anglən' ben' beslə' Diozən' bito bete' bi'i nech ca' lao yoguə' family čhega'aque'enə'. 29 Na' beņə' Izrael ca' de'en gwso'onlilaže'e Diozən', Diozən' bene' par nič Nisdəo' Exnan' goquən čhoplə xte bla' yo biž par nič goc gosə'adie' yešla'alə. Pero na' beņə' Egipto ca'

catà' gwsa'acłaz'e e yesà'adie', beyeyjw nisàn' gan' chàsà'adi'enà' na' gwsa'ate' gwse'ej'e' nisàn'.

³⁰ Na' lecza de'en gwsò'onlilaža' beñà' Izrael ca' Diozàn', de'e na'ana' Diozàn' bene' par niçh bebiç'e ye de'e de'en gwyechj doxen syoda Jericon' catà' beñà' Izrael ca' jàsà'əzèçhje'en yoguà' ža lao gažà ža. ³¹ Na' de'e Raaban' no'olan' goquà sargat antslà, lecza benlilaže'e Diozàn'. Na' de'en benlilaže'ene' bito gwziaye'e len beñà' Jerico ca' beñà' ca' cui boso'ozenag che Diozàn', chedà' le' ža bgüialaogüe' beñà' Izrael ca' liže'enà' beñà' ca' jàsà'əgüia jàsà'əye' laže'enà'.

³² ¿Bichxan' ənia' ža? Bitò nlatja' par gua'a diža' che de'e Gedeonna', che de'e Baraquan', che de'e Sansonna', che de'e Jeften' che de'e Dabin', che de'e Samuelan' na' che yeziqwa'əchlà beñà' ca' gwsoe' xtižà' Diozàn' cana'.

³³ Na' laogüe de'en gwsò'onlilaže'e Diozàn' bale' besà'əchoje' gwso'one' gan' catà' gosà'ədiləlene' no rei, na' yebale' gwso'one' byen par niçh beñà' yoblə gwso'one' de'en naquà de'e güen. Na' yebale' ben Diozàn' lyebe gone' to de'e gone' len lega'aque' na' goc can' bene' lyeben', nach lecza yebale' Diozàn' bene' par niçh bež əznia ca' cui bi gwso'one'eb lega'aque'. ³⁴ Na' lecza de'en gwsò'onlilaže'e Diozàn', bale' bito gwse'eye' lo'o yi'ina', na' yebale' besyà'əla catà' gwse'ene'e beñà' so'ote' lega'aque' len spadàn', na' yebale' bnežjw Diozàn' lega'aque' fuers balor catà' cui bi fuers chega'aque' gotà', na' yebale' gwsa'aque' soldad gual, na' yebale' gwso'one' gan' soldad zità' beñà' besà'əžin gosà'ədiləlene' lega'aque'. ³⁵ Gwnitə' no'olə gwso'onlilaža' Diozàn' na' laogüe de'en gwsò'onlilaže'ene'ena' bosbane' no family chega'aque' ladjo beñà' guat ca'.

Na' gwnitə' beñà' gwso'onlilaža' Diozàn' na' bito gwse'enene' yesà'əbejyichje'ene' par yesyà'əchoje' lao de'en chàsà'əchi' chàsà'əsaquà' beñà' lega'aque', chedà' gwnite'e lez yolis yosban Diozàn' lega'aque' ladjo beñà' guat ca' par žjəsyà'ənite'e len le'. ³⁶ Na' gwnitə' beñà' lechgualə gosà'əzi'ichižà' beñà' lega'aque' na' gwso'ot gosà'əyine' lega'aque' na' boso'əcheje' lega'aque' gden, na' gosà'əyixjue' lega'aque' ližya. ³⁷ Na' beñà' mal ca' boso'ošize'e balə beñà' ca' chso'onlilaža' Diozàn' yej, na' boso'ozoxje' cuerp che yebale' len syer, na' gosà'əgo'oyełe'e yebale' par yesà'əbejyichje' Diozàn', però bito gosà'əbejyichje'ene', na' gwso'ote' yebale' len spad. Na' balə beñà' ca' gwso'onlilaža' Diozàn' gwsa'aše' yixà' žjənyaze' no xa xilə' na' no xa šib. Bitobi bi gotà' chega'aque'. Lechgualə nyašà' goc chega'aque'. Na' lechgualə boso'ochi' boso'osaquà' beñà' lega'aque'. ³⁸ Gosà'əlaže'e do latjə dašən' na' do ya'adao' na' do ga ze bløj na' ga zo no liž bia yixà'. Yoguà' de'e ca' goc che beñà' ca' gwso'onlilaža' Diozàn', len la' žjəzaquà'əche' lao Diozàn' cle ca' yoguà' beñà' ca' cui gwso'onlilaže'ene'ena'. ³⁹ Na' la'ana'əczə bebei Diozàn' yoguà' beñà' ca' gwso'onlilaža' le', bito bene' ca' gaquə yoguà'əłə de'e ca' bene' lyebe žlac gwnitə' lega'aque'. ⁴⁰ Diozàn' bito gone'ene' gaquə che lega'acze' de'en bene' lyebe, sino bene' par niçh txen len lega'aque' bagoc checho can' bene' lyebe gaquə par niçh chac yichjla'azda'ochon' can' chene'ene'ena', na' lechgualə mbalaz can' bene'ena'.

12

Cheyalə' sotezə socho goncho xbab che Jeso'osən'

¹ De'en gwso'on yoguà' beñà' ca' gwso'onlilaža' Diozàn' žlac gosà'əbane' yežlyo nga chzejni'in chio'o can' cheyalə' gonlilaža'əchone'. De'e nan' cheyalə' gwcui'izəcho ca'ala šə bi de'en chžon par gonlilaža'əchcho Diozàn', na' cuejyichjcho šə bi de'e mal de'en choncho. Na' cheyalə' co'o gwchejlaža'əcho

len bitə'ətezə de'e chac c̄hecho par niç sotezə socho gonlilažə'əcho Diozən' na' goncho can' ne'enə'. ² Cheyalə' sotezə socho goncho xbab c̄he Jeso'osən' chedə' tozə le' chonlilaže'e Diozən' cayanə'an cheyalə' gonlilažə'əchone' chio'o. Gwneze Jeso'osən' ze'e gon Diozən' par niç soe' mbalaz len le', na' de'e na'anə' gwlo'o gwchejlaže'e de'en gwxaquə'əzi'e catə'an gwso'ot beṇə' le' le'e yag corozən' na' be'e latjə' beya' gwso'one beṇə' ca' le'. Pero na'a chi'ilene' Diozən' yoban' na' chəsə'anabi'e txen.

³ Cheyalə' goncho xbab c̄he Jeso'osən' can' gwlo'o gwchejlaže'e len yoguə' de'en gwso'on beṇə' mal ca' contr le' par niç co'o gwchejlažə'əcho na' cui gaquecho zdebə' goncho can' chene'e Diozən'. ⁴ Na' chio'o ža, de'e zan babžaglaochō chedə' choncho xte ga zelao chzaque'echo par cui choncho de'e malən', pero notononə' got chio'o. ⁵ Cheyalə' žjsa'alazažə'əcho de que Diozən' chone' chio'o consejw can' chso'on beṇə' len xi'inga'aque'. Na' consejon' chone' chio'o nyojən nan:

Xi'indaogua'a, bito gaquele de que cui bi zejen ca de'en chona' castigw chelen' catə' chonle bi de'e malən', na' bito gaquele tolə' catə' chdila' le'e, nada' naca' Xanle.

⁶ De'e na'anə' nada' chnežjua' castigw c̄he beṇə' ca' chacda' chei catə' chso'one' de'e malən',

na' chona' par niç chəsə'əžaglaō beṇə' ca' bagwcuə'a ca xi'ina' catə' cui choso'ozenague' chia'.

⁷ De'e nan' ža, Diozən' chone' chio'o castigw chedə' chosgole' chio'o can' chso'on beṇə'chən' chosyo'osgole' xi'inga'aque'enə' bi'i chsa'aque'ne' chei, chso'one' castigw c̄hega'acbo' catə' chso'ombo' de'e malən'. ⁸ Na' šə cui bi castigw c̄hechon' chon Diozən' catə' choncho de'e malən', zeje dižə' de que bito naccho xi'ine', la' yoguə' chio'o bagwcue'e ca xi'ine' catə' choncho de'e malən' chone' castigw c̄hecho. ⁹ Xaxna'acho ca' bosyo'osgole' chio'o yežlyo nga na' gwso'one' castigw c̄hecho che bi de'e mal de'en bencho na' bzenagcho c̄hega'aque'. Naquə'chxe cheyalə' əgwzexjw yichjchon' gwzenagcho con bin' əṇa Xacho Diozən' ben' chon yelə' mban zejlicane' c̄he chio'o chonlilažə'əchone'. ¹⁰ Na' xaxna'acho ca' lao to chop izən' gwso'one' castigw c̄hecho con can' gwnan' c̄hega'aque'enə'. Pero na' Diozən' chone' chio'o castigw parzə' niç gaquəlene' chio'o, par niç ca' gaccho beṇə' la'aždao' xi'ilažə' can' naque'enə'. ¹¹ Na' lao orən' bito chazlažə'əcho bitə'ətezə castigw de'en chaccho. Pero galj' chdelə' cheyache'icho naquən' goncho chedə' castigw de'en chaccho chaclenən' chio'o par niç sotezə socho goncho de'e güennə'.

Diozən' gone' castigw c̄hecho šə cui gwzenagcho c̄he'

¹² De'e na'anə' lesotezə leso legonlilažə' Diozən' na' le'e co'o gwchejlažə' bitə'ətezə de'en chyi' de'en chzaquə'əle. ¹³ Leso legon con can' chene'e Diozən'. Legonən' par niç beṇə' ljuežjle ca' yoso'ozenaguache' c̄he Diozən' caguə ca yesə'əxope' so'onche' de'e malən', chedə' bale' cuiṇə' yoso'ozenague' c̄he yoguə'əloj' de'en chene'e Diozən' so'one'.

¹⁴ Legon ga zelao saque'ele par niç sole binlo len yoguə' beṇə' chso'onlilažə' Jesocrisən'. Na' leczə' legü'e' latjə' par niç Diozən' gone' la'ažda'olen' xi'ilažə', chedə' notono no yežin gan' zo Diozən' šə cui naquə' la'ažda'ogü'e'en xi'ilažə'.

¹⁵ Bito gü'e'ele latjə' par niç tole cuejyichjle cuich talenle' Diozən', la' Diozən' nži'ilažə'əchgü'e' yoguə'əcho. Na' šə tole cuejyichjle Diozən', nxož' yoguə'əle gonle ca'. ¹⁶ Bito co'o xtole o cuejyichjle be'en chele o no'ol chele par solenle beṇə' yoblə. Na' bito gue'ile de'en naquə' de'e zaque'e lao Diozən'. Nezecho de'e Esa'on' por to yelə' guao na'azə' bete'e de'en banaquən' gwnežjo Diozən'

le' de'en golje' naque' beṇə' nech. ¹⁷ Nezele de que gwdechlə gone'ene' yeyac lao ne'e de'en bdie' lao na' beṇə' biše'enə', pero bito goquə bi gone' par nich yeyaquən lao ne'enə' la'aṇə'əczə gwcheže' tant gone'ene' yeyaquən lao ne'enə'.

¹⁸ Nža'alə chac che chio'o na'a cle ca can' goc che de'e xaxta'ocho ca' cata'an Diozən' bnežjue' lega'aque' lei che'enə'. Betje' lao ya'a Sinain' na' gwyečhj yi' beļ lao ya'anə', na' gwxoan žen, na' beyaquən žchol, na' gwyečhjchgua be'. ¹⁹ Na' gwse'enene' gwchež to trompet, na' leczə gwse'enene' be' Diozən' dižə' len lega'aque'. Pero de'e tant besə'əžebe' xte gwsa'ata'əyoine' de'e Moizezən' par nich ye'e Diozən' cuich güe'elene' lega'aque' dižə'. ²⁰ Lechgualə besə'əžebe' por ni che de'en gož Diozən' lega'aque' antslə de que šə no beṇə' žjabigüe'e ya'anə' par yesə'əgüie' laogüen' yoso'ošiže'ene' yej, na' leczə ca' so'onene' šə bia yixə'. ²¹ Na' nezecho lechgualə de'e zakuə žebchon' goquəczə lao ya'a Sinain', chedə' len de'e Moizezən' gwne': "Lechgualə chaž chžeba' can' chac."

²² Pero na'a ža chio'o banaccho txen len Diozən' ben' zo zejlicane' na' len yoguə' angl zan che' ca' beṇə' ca' že' yoban. Na' yoban' gwxaquə'əleben ca' syoda Jerosalennə' na' ca' ya'a Sionnə'. ²³ Na' naccho txen len yoguə'əlolte beṇə' yeziquə'əchlə beṇə' ca' leczə chəsə'ədopə chəsə'əžag chso'elaogüe'e Jesocristən', na' yoguə'əcho len lega'aque' gwxaquə'əlebecho ca to beṇə' goljə nech lao to family laogüe de'en naccho beṇə' blao lao Diozən', na' yoguə'əcho nyoj lachon' le'e libr che Diozən' de'en de yoban'. Naccho txen len Diozən' ben' əchoglaogüe'en che yoguə'əlol beṇə'chən' šə žjənaque' beṇə' güen o šə žjənaque' beṇə' mal. Leczə naccho txen len beṇə' ca' bagwsa'at, beṇə' ca' gwso'onlilažə' Cristən' lao gwnite'e yežlyon'. Diozən' babene' par nich yichjla'aždao' lega'aque'enə' banaquən' cayanə'an chene'ene' əsa'aquən. ²⁴ Na'a ža zocho txen len Jeso'osən' chedə' le'enə' bedəlalx chene'ena' par nich gwzolo' chon Diozən' de'e cobə de'en none' lyebe gone' par gaqualəne' chio'o. Na' xchen Jeso'osən' de'en bedəlalje' cata'an gwso'ote'ene' chlo'in de que Diozən' chezi'ixene' xtolə' con beṇə' chso'onlilažə' Jeso'osən'. Caguə can' naquən len xchen de'e Abelən' de'en gwłaljən', chedə' lennə' con blo'en de que de'e malən' ben beṇə' biše'enə' bete'ene'.

²⁵ Naquən de'e žialao xen gwzenagcho che xtižə' Diozən'. Nezecho de que bnežjue' castigw che de'e xaxta'ocho ca' cata'an gwsa'aque' godenag len xtiže'enə' de'en be' de'e Moizezən' len lega'aque'. Pero gonche' castigw che chio'o šə cui gwzenagcho che xtiže'enə' de'en bedəže'eni' Xi'ine' ben' zo yoban'. ²⁶ Lechgualə gwxo' cata' Diozən' betje' yoban' par bžine' lao ya'a Sinain' gan' be'elene' beṇə' Izrael ca' dižə'anə'. Na' gwdechlə gwne': "Gwžin ža cata' yossi'in'sa' yežlyon' de'e yoblə, pero caguə yežlyo na'azən' sino que lenczə de'e ca' chle'icho le'e yoban'." ²⁷ Na' de'en gwne' de que yossi'in'se'en de'e yoblə, zejen de que cana'achən' te che yoguə' de'e ca' ben Diozən' de'en chle'icho, ca naquə yežlyon' na' de'e ca' chle'icho le'e yoban'. Na' cata' babesy'ənit yoguə' de'e ca' chle'ichon' Diozən' ne'e zocz'e chone' par nich chac de'e güen de'e cui te chei. ²⁸ De'e na'anə' cheyalə' güe'echo yelə' choxcwlen che Diozən' ca de'en cui te che de'e mbalaz de'en chac lo'o yichjla'aždao' chio'o chonlilažə'əchone'. Na' leczə güe'etecho yelə' choxcwlen che' ca de'en cui te che de'en žjəyecho len le' zejlicane'. Cheyalə' gapcho Diozən' respet na' güe'ela'ochone' can' chazlaže'enə'. ²⁹ Nezecho ca naquə yi'ino' chzeyən bitə'ətezə, na' ca'aczən' chon Diozən', chone' castigw che bitə'ətezə de'e mal de'en chon chio'o beṇə'ach, chedə' lechgualə chgüe'ine' bitə'ətezə de'e malən'.

13

De'en chazlaža' Diozən' goncho

¹ Cheyalə' sotezə socho gaquecho che yeziqə'əchlə beṇə' chso'onlilažə' Jesocrisṭən', chedə' yogue'e zjənaquə bišə'əcho na' zanchə. ² Cheyalə' əgğüialaocho beṇə' zitə' ližchon' na' gonga'acchone' goclən. Balə xaxta'ochə ca' catə' bosə'əgğüialoogü'e beṇə' zitə' na' bosə'əgğüialoogü'e angl che Diozən' sin cui gwsə'acbe'ine'.

³ Cheyalə' gaquəlencho beṇə' ljuežjcho ca' chsa'atə' ližya chedə' txennə' chžaglaolenga'acchone' šə bi de'e chac chega'aque'. Na' lecəə ca' gaquəlencho beṇə' ljuežjcho ca' šə no choso'ochi' choso'osaquə' lega'aque'. Lecəə gwžinlja ža chi' saquə' chio'o zocho yežlyo nga.

⁴ Na' le'e nšagna'ale yoguə'əle leso do lažə'əle len no'ol chele o be'en chele, can' chene'e Diozən', na' bito talenle notə'ətezəchlə beṇə'. Diozən' əgwnežjue' castigw che beṇə' ca' chəsə'əgo'o xtoi, na' beṇə' ca' chəsə'əbejyichj no'ol chega'aque' o be'en chega'aque' par chəsə'ənitə'əlene' beṇə' yoblə.

⁵ Bitə cheyalə' selažə'əcho gaccho beṇə' gwni'a. Cheyalə' socho mbalaz len de'en de checho, chedə' cuin Diozən' bagwne' chio'o: "Bitə ganlažə'a le'e na' bitə cuejəyichja' le'e." ⁶ De'e na'ana' bitə de de'e žebcho. Quinga guac əna to tocho:

Xana' Diozən' zoe' chaclene' nada'.

Na' bitə žeba' šə bi de'en gone beṇəchən' nada'.

⁷ Legon xbab che beṇə' ca' bosə'osed bosə'olo'i le'e xtižə' Diozən', beṇə' ca' cuich nitə' na'a. Lega'aque' gosə'əzo gosə'əbeze' binlo yežlyo nga, na' cheyalə' sole gonlilažə'əle Diozən' can' gwnitə' lega'aque' gwsə'onlilažə'ətezene'.

⁸ Can' naquə yichjla'aždao' Jesocrisṭən' nej nase, ca'aczən' naquən na'a, na' ca'aczən' gaquan zejlicane. ⁹ Beṇə' zan choso'osed choso'olo'ine' che Cristən' pero na' nža' xen can' choso'osed choso'olo'i bale'. Bitə güe'ele latjə yesə'əxoayague' le'e len xtižə'əga'aque'enə'. Zaquə'əchən si'icho yelə' chaclen che Diozən' lo'o yichjla'ažda'ochon' par nich sotezə socho gonlilažə'əchone' cle ca cue' yichjcho che bi de'en chəsə'əna beṇə' cheyalə' ye'ej gaocho. De'en che'ej chaochon' bitə chaclenən' yichjla'ažda'ochon'.

¹⁰ Nezecho de que Jesocrisṭən' bagwdixjue' xtolə'əchon' le'e yag corozən'. Pero na' beṇə' ca' ne'e chso'ot bia yixə' na' choso'ozeye'eb chsa'aque'ne' par yezi'ixen Diozən' chega'aque'enə', bitə chaclenən' lega'aque' ca' de'en gwdixjw Jesocrisṭən' xtolə' chio'o beṇəch. ¹¹ Bxoz ca' chso'ote' bia yixə' ze tğüz güeja chəsə'ənabe' yezi'ixen Diozən' xtolə' yoguə' beṇə' lao nasyon chechon', na' chjgua' bxoz əblaon' chennə' lo'o cuart gan' nac che Diozən', pero cuerp chega'aque'əbən' choso'ozeye'en fuerlə syoda. ¹² Na' can' goc che Jeso'osən', gwsə'ote'ene' fuer syodan', na' yoguə' beṇə' so'onlilažə' Jeso'osən' yeyac la'ažda'oga'aque'en xi'ilažə' por ni che de'en blalj xchene'ena'. ¹³ De'e na'ana' cheyalə' gonlilažə'əcho Jesocrisṭən' na' bitoch naochə de'e ca' la'ana'əczə šə beṇə' zan yesə'əgue'ine' chio'o de'en cuich naochon. ¹⁴ Gatə'ətezə zocho yežlyo nga, de'e te chein', pero chbezcho yežincho yoban' na' žjəyecho syodan' de'e cui te chei. ¹⁵ Laogüe de'en babocobə Jesocrisṭən' yichjla'ažda'ochon' cheyalə' güe'echo yelə' choxwlen che Diozən' dote tyemp na' güe'ela'ochone' len xtižə'əcho. ¹⁶ Cheyalə' sotezə socho goncho yoguə' claste de'en naquə güen na' cheyalə' əgwnežjwcho con ja'aque' guac əgwnežjwcho par gaquəlencho beṇə' ca' cui de chega'aque', chedə' can' chene'e Diozən' goncho.

¹⁷ Le'e əgwzewxjw yichjle na' le'e gwzenag che beṇə' ca' bagwlej Diozən' par choso'osed choso'olo'ine' le'e na' par chəsə'əgğüia chəsə'əye' le'e. Lega'aque'

chsa'aclene' le'e par nič ca' gonlilažə'əchle Diozən', na' cheyalə' yoso'odie' cuent laogüe'enə' can' chonle. Legwzenag čhega'aque' par nič yesə'əbeine' catə' yoso'odie' cuentən' na' cui yesə'anite'e trist. Na' šə cui gwzenagle čhega'aque' bitobi de'e güen gaquə čhele.

¹⁸ Legon orasyon par neto'. Zoa' segor de que chonto' can' chazlažə' Diozən', na' chene'eto' gonto' porzə de'e güen. ¹⁹ Che'enchgüeida' gonle orasyon chia' par nič yob gaquə yidəcha' gan' zolen'.

Chnabe' gaquəlen Diozən' lega'aque'

²⁰ Laogüe de'en bnežjw cuin Xancho Jesocristán' blalj xchene'enə', chac chon Diozən' de'en none' lyebe gone' par gaquəlene' chio'o. Na' cuat əžin ža cuich gone' can' bene' lyebe gone'. Xancho Jesocristán' gwxaquə'əlebene' ca to beṇə' goye xilə' tant nži'ilaze'e chio'o. Diozən' bolis bosbane'ene' ladjo beṇə' guat ca', na' Dioz na'aczən' chone' par nič chzo chbezcho binlo len xbab de'en yo'o lo'o yichjla'ažda'ochon'. ²¹ Laogüe' nan' chona' orasyon chnaba' əgwletje' xbab güen lo'o yichjla'ažda'olen' na' gaquəlene' le'e par nič gonle yoguə'əlol can' chene'ene' gonle. Na' chnaba' gone' ca gombi'achle Jesocristán' par nič ca' gaquə yichjla'ažda'olen' con can' chazlažə' Diozən'. Ledoye'ela'och Jesocristán' na'a na' zejlicane. Na' can' gonšgaczcho.

²² Legon xbab čhe yoguə' consejw quinga de'en babəna' le'e, čhedə' bitotec bzoja' dižə' zan čhe to ton. ²³ Na' chyixjue'ida' le'e de que Temtion' babechoje' ližyan' na' chbeza'ane' nga. Na' šə yob yeje'e nach čhi'ane' catə' delana'a le'e.

²⁴ Por part nada' le'e gguap diox beṇə' ca' bagwlej Diozən' par choso'osed choso'olo'ine' le'e na' par choso'ogüia choso'oye' le'e. Na' leczə ca' le'e gguap diox yoguə' noquə'əchlə beṇə' nitə' na' beṇə' bagwlej Diozən' par zžənaque' lažə' ne'enə'. Na' beṇə' lžuežjcho ca' za'ac Italian' choso'oguape' le'e diox.

²⁵ Diozən' gaquəlenšgue' le'e. De'e na'azə de'e əchnia'.

Cart De'en Bzoj Santiagon'

Santiagon' chguape' diox beṇə' ca' zjənasəlas zan yež

¹ Nada' Santiago naca' beṇə' güen zin che Diozən' na' che Xancho Jesocristən'. Echguapa' le'e diox, le'e nacle xi'in dia che family ca' šižin che de'e Izraelən', le'e chonlilažə'əle Jesocristən' na' nasəlasle zan part yežlyon'.

Naquən' nezecho can' chene'e Diozən' goncho

² Beṇə' bišə' dao', le'e yebeichgüei bitə'ətezə de'e chac chele la'anə'əczə šə chyi' chzaquə'əle. ³ Nezecho bitə'ətezə de'en chac checho chonən chio'o prueb šə chonchechlažə'əcho chonlilažə'əcho Jesocristən'. Na' catə' chonchechlažə'əcho chonlilažə'əcho Jesocristən' zeje dižə' chgo'o chchejlažə'əcho len de'en chac checho. ⁴ De'e na'anə' cheyalə' co'o gwchejlažə'əcho len bichlə de'en chac checho par nich sotezə socho gonlilažə'əcho Jesocristən', əgwzenagcho che' can' cheyalə' əgwzenagcho che' na' yeyož gaccho can' chene'ene'enə'.

⁵ Notə'ətezcho catə'an cui nezecho bin' chene'e Diozən' goncho o šə naquən' chene'ene' goncho, cheyalə' ənabechone' əgwzejni'ine'en chio'o. La' chebeine' chaclene' chio'o, na' bito chdile' chio'o catə' chnabechone' gaquəlene' chio'o. ⁶ Pero na' catə' chnabechone' əgwzejni'ine' chio'o, cheyalə' gonlilažə'əcho de que chzenagcze' chechon' na' bito gaquə'əjlažə'əcho. Be'enə' chaczejlažə' šə chzenag Diozən' che' gwxaquə'əlebene' ca' nisdə'onə' de'en chas chatə' catə' chechj be' laogüen' na' chjta'an nil na'alə. ⁷ Ben' chaczejlažə' šə chzenag Diozən' che', bito gaquə' əgwnežjo Xancho Diozən' le' bitə'ətezə de'en chnabe'enə'. ⁸ Na' ben' chon ca' bito nezene' bi xbabən' chone', con šayechə šayen chaque' len bitə'ətezə de'en chone'.

⁹ Le'e beṇə' bišə' le'e nacle beṇə' yašə' le'e so mbalaz, chedə' la' Diozən' chone' par nich nacle beṇə' zaque'e. ¹⁰ Na' le'e beṇə' bišə' le'e nacle beṇə' gwni'a, le'e yebei de que lao Diozən' bito zaquə'əchle mazəchlə can' zaquə' beṇə' yašə' ca' chedə' bitə'ətezə de'en deicho yežlyo nga yob te chega'aquei can' chac len yej ca' de'en chla'ac do yixə'. ¹¹ Catə' chzo bgüižən' zniachgua, chesə'əcuad yixə' ca', nach chəsə'əyinj lojei ca' na' bitoch choso'olo'en xoche. Can' chac len yej ca' leczə can' gaquə' len le'e, nit yelə' gwni'a chelen' lao chelə' chežejele.

Cheyalə' sotezə socho gonlilažə'əcho Jesocristən' bitə'ətezə de'en chac checho

¹² Šə chgo'o chchejlažə'əcho len de'en chac checho na' chonchechlažə'əcho chonlilažə'əcho Jesocristən' nachən' lechguale mbalaz zocho. Na' catə' te de'en chyi' chzaquə'əchon' Diozən' gone' par nich əbancho len le' zejlicane can' bene' lyebe əban yoguə'əcho chaquecho che'. ¹³ Na' notə'ətezcho catə' nan goncho de'e malən' bito gaquə' ənəcho de que Dioz na'anə' chgo'oyele'e chio'o goncho de'e malən', la' Diozən' bito chgo'oyele'e beṇə' so'one' de'e malən'. Le'egatezə ca' le' bito bi bi de de'e co'oyelə' le' par gone' de'e malən'. ¹⁴ La'ažda'omalchon' chonən par nich chene'echo goncho de'e malən'. ¹⁵ Na' bachoncho de'e malən' šə chzenagcho che la'ažda'omalchonə'. Na' šə con zocho choncho de'e malən' gwžin ža catə' cuejyichj Diozən' chio'o na' bito zjəyecho len le'.

16 Beṇə' bišə' dao', bito əxoayag cuinle gonle xbabən' de que Dioz na'anə' chgo'oyele'e le'e par gonle de'e malən'. 17 Yoguə' de'en chon Diozən' len chio'o na' yoguə' de'en chone' chio'o zjənaquən güen, bitobi de'e mal zjansa'an, la' dezd yoba na'ate za'aquən. Xacho Dioz ben' ben de'e ca' chle'icho le'e yoban' chone' par niç gaquə güen checho, na' bito chš'e ca' chone' len chio'o, syempr zocze' chone' güen. 18 Gwyazlažə' Diozən' bocobe' yichjla'ažda'ochon' catə'an gwyejle'echo che dižə' li che'enə'. Bocobe' yichjla'ažda'ochon' par niç gonəche' chio'o yelə' bala'an mazəchlə can' gwnežjue'en yeziquə'əchlə beṇəchən'.

Can' goncho par yebei Diozən' chio'o

19 Beṇə' bišə' dao', le'e gwzenag che Diozən' do yichj do lažə'əle. Na' bito güe'elizle dižə' sin cui gonle xbab, na' nic le'e əža'atele. 20 Catə' chža'acho, bito chac goncho güen can' chene'e Diozən' goncho. 21 De'e na'anə' cheyalə' cuejyichjcho yoguə'əlo' de'en naquə mal na' bitə'ətezə de'en na la'ažda'omalchon' goncho. Cheyalə' əgwzəxjw yichjcho na' gwzenagcho dižə' li che Diozən' de'en bayo'o lo'o yichjla'ažda'ochon', par niç ca' yebejən chio'o xni'a de'e malən'.

22 Na' cheyalə' goncho de'en na dižə' li che Diozən' goncho, caguə con chenecho can' nanṇə'. La' šə con chenecho can' nanṇə' sin cui gonchon cas, chxoayagzə cuinchon' šə ca'. 23 Ben' chene dižə' li che Diozən' šə bito chone'en cas gwxaquə'əlebene' ca to beṇə' chgüia cho'alaogüe'en lo'o spejw, 24 la' con chgüie' can' naquə cho'alaogüe'en na' cats' babeyož bgüie'en le'e cheyanlažə'əte' can' naquənnə'. 25 Xtižə' Diozən' de'en nyojən' chsed chlo'in chio'o can' babebej Diozən' chio'o xni'a de'e malən'. Na' de'en chsed chlo'in chio'o goncho naquən de'e güenchgua. Na' šə əgwsedchon na' sotezə socho goncho can' nanṇə' sin cui ganlažə'əchon nachən' socho mbalaz.

26 Notə'ətezcho šə choncho xbabən' de que choncho can' chebei Diozən' pero šə con cho'echo dižə' de'en na la'ažda'omalchon', chxoayagzə cuinchon'. La' xtižə'əchon' bito naquən güen lao Diozən', na' bito chebeine' bitə'ətezə de'en choncho šə ca'. 27 Šə choncho can' chebei Xacho Diozən', chaclencho no'olə gozeb ca' na' bi'i gozeb ca' šə biclə de'en chesə'əyazjəne' na' chbejyichjcho cuich choncho de'e mal de'en chso'on beṇə' ca' cui zjənombia' Diozən'.

2

Tozəczə can' cheyalə' goncho len yoguə' beṇə'

1 Beṇə' bišə' dao', Xancho Jesocrisən' naque' le'ezelaogüe beṇə' zaque'e, na' šə de'e liczə chonlilažə'əcho Xancho Jesocrisən', bito ṇacho balə beṇə' gonchguaga'acchone' xen, na' yebalə' gonga'aquechone' naccze. 2 Šə la'ac çhopə beṇə' gan' chdopə chžəpə cho'ela'ochio Jesocrisən', na' toe' naque' beṇə' gwni'a na' nyaze' lachə' šao' lachə' xoche, na' nde xbene'enə' to niy de or, na' ben' yeto naque' beṇə' yašə' na' nyaze' lachə' golə lachə' bedo beda', tozə can' cheyalə' goncho len çhoptega'aque'. 3 Bito naquən güen šə goncho beṇə' gwni'anə' xen na' ye'echone': "Gwche'edo' lao yag siy nga." Na' niqne naquən güen šə ye'echo beṇə' yašə'anə': "Gwzechatezə do de'e na'alə", o šə ye'echone': "Gwche'edo' lao yon'." 4 Bito naquən güen lao Diozən' šə gon cuincho ca juez par əṇacho noen' zaque'e na' noen' cui zaque'e. Xbab chechon' naquən de'e mal šə goncho ca'.

⁵ Benə' bišə' dao', Diozən' bagwleje' zan benə' yašə' par zjənaque' xi'ine' na' par chso'onlilažə'əchgüe' le'. Na' catə' yesyə'əžine' gan' zo'enə' gone' par niçh yesə'anabi'e txen len le' la' can' bene' lyebe gon notə'ətezə chio'o chaquecho che'. ⁶ Pero na' le'e chonle benə' yašə' ca' ca benə' cui bi bi zjəzaque'e. Na' benə' gwni'a ca' chonga'aclene' ca benə' zjəzaquə'əchgua, len la' lega'aque'enə' chesə'əçhi'i chesə'əsaque'e le'e, na' chəsə'əçhe'e le'e do lao jostis ca'. ⁷ Na' le'egatezəczə' lega'aque'enə' choso'ožia choso'onite'e Jesocristən' ben' chonlilažə'əchon' l'gua'a so'ene' yelə' bala'an.

⁸ Lein' de'en naquə de'e žialao lao yoguə de'e ca' yela' de'en nyojan le'e Xtižə' Diozən' nan: "Legaque che sa'aljuežj benəchle catg chaquele che cuinle." Šə de'e liczə chonle can' nanə' choncze güennə'. ⁹ Pero de'e malən' chonle šə balə benə' chonga'aculene' xen na' yebale' chonga'aclene' ca benə' cui bi zaque'e. Lei che Diozən' chçhoglaon chele de que naple dolə' de'en chonle ca'. ¹⁰ Can' naquən, notə'ətezə benə' zoe' chone' cuaselol can' na lein', pero na' la'anə' tozə pontən' chçhoe', doxen lei na'anə' chape' dolə'. ¹¹ Diozən' ben' gwna: "Bito co'o xtole, na' cui cuejyichj be'en chele o no'ol chele par solenle benə' yoblə", lecze'en gwne': "Cui gotle benə'", na' bene' mendad bichlə de'e cui goncho. Šə bitonə' goncho to de'e mal de'e na lein' cui goncho pero babencho yeto de'e nan cui goncho, bia'aczə napcho dolə' len lein'. ¹² Cheyalə' güe'echo dižə' con can' chene'e le'enə' na' goncho con can' chazlaže'enə' chedə' la' le' əne' che to tocho šə choncho can' na Xtiže'enə' de'en nyojan o šə bito choncho can' nanə'. Xtižə' Dioz na'anə' chzejni'in chio'o can' babebeje' chio'o xni'a de'e malən' par goncho can' chene'ene'enə'. ¹³ Diozən' əgwnežjue' castigw che benə' ca' cui chesyə'əyašə' chesyə'əži'ilažə' ljuežj benəchga'aque'. Pero benə' ca' chesyə'əyašə' chesyə'əži'ilažə' ljuežj benəchga'aque', Diozən' yeyašə' yeži'ilaže'e lega'aque'.

Bitobi zejen šə con chonlilažə'əcho Jesocristən' de'e dižə'əza

¹⁴ Benə' bišə' dao', šə to benə' bito chaque'ne' che ljuežje' na' bito chone' yeziquə'əchlə de'e naquə de'e güen, bitobi zaquə de'en ne': "Chonlilažə'a Jesocristən'." Yeyeje' lao yi' gabilən' šə de'e dižə'əzən' ne' ca'. ¹⁵ Balə benə' ljuežjcho benə' chso'onlilažə' Jesocristən' cui de de'en əse'ej əsa'ogüe' na' cui de xala'anga'aque'. ¹⁶ Na' šə bito gaquə'engə'acchone' len de'en chesə'əyažjene'enə', šə con ye'ega'acchone': "Ležjəya'ac to šao' to güen na' Diozən' gaquə'ene' par niçh əzelele de'en chyažjelen'", bitobi zejen de'en nəcho chonlilažə'əcho Jesocristən' šə goncho ca'. ¹⁷ De'e na'anə', šə con nəcho de que chonlilažə'əcho Jesocristən', pero bito chaquecho che ljuežjcho na' bito choncho yeziquə'əchlə de'en naquə de'e güen, bitoczə bi zejen de'en nəcho de que chonlilažə'əchone'.

¹⁸ Nitə' benə' chesə'əne' de que guaquə so'onlilaže'e Jesocristən' sin cui so'one' de'en naquə de'e güen. Na' leczə nitə' benə' chesə'əne' con chso'one' de'e güennə' pero na' bito chso'onlilaže'e Jesocristən'. Na' nada' əchnia' le'e šə nəcho de que chonlilažə'əcho Jesocristən' pero bito choncho de'e güen, bito debia' šə chonlilažə'əchone'enə'. Pero šə de'e li chonlilažə'əchone' choncho de'e güennə' na' nachbia' de que chonlilažə'əchone'enə'. ¹⁹ Chejle'echo de que tozə Diozən' zaque'e par güe'ela'ochone', na' ca'aczən' cheyalə' šejle'echo. Pero caguə de'e ca'azən' cheyalə' goncho. De'e xio' ca' chse'ejle'en de que tozə Diozən' naque' benə' zaque'e na' chesə'əxizən' tant chesə'əžebən. ²⁰ Choncho de'e cui zeje šə con nəcho chonlilažə'əcho Jesocristən' na' bito choncho de'e güennə'. Bito gata' yelə' mban zejlicəne checho šə con nəcho chonlilažə'əchone'.

21 De'e xaxta'ochō Abraannā' blo'e de que benlilaže'e Diozān' de'en bzenague' con bi gozā Diozān' le'. De'e na'anā' bxoā xi'ine' Isaaquān' lao mes de yējān' par gote'ebō' güe'ela'ogüe'e Diozān', pero na' Diozān' bito be'e latjā gote'ebō'. Na' de'en bzenague' che Diozān', de'e na'anā' Diozān' gwne' che' de que naque' beñā' güen laogüe'enā'. 22 Naquān' clar de que de'e Abraannā' caguā con benlilažā'aze' Dioz na'anā', sino leczā bzenague' che'. Na' de'en bene' ca' blo'e de que benlilaže'e Diozān'. 23 De'e na'anā' nyoj Xtižā' Diozān' che' nan: "De'e Abraannā' benlilaže'e Diozān' na' de'e nan' Diozān' gwne' che' de que naque' beñā' güen laogüe'enā'." Na' leczā nyojān' de que Abraannā' naque' beñā' migw che'.

24 Clar naquān' de que caguā ni che de'en nacho chonlilažā'ācho Dioz na'anā' ne' naccho beñā' güen laogüe'enā', sino que de'en chzenagcho che' na'anā' ne' checho de que naccho beñā' güen laogüe'enā'. 25 De'e Raabān' ben' goquā no'olā sargatān', bzenague' che Diozān' catā'an bgüialaogüe' beñā' chop ca' bselā' nasyon Izraelān' par jāsā'ägüia jāsā'āye' laže'enā'. Na' blo'ine' lega'aque' yetolā nez par jāya'aque' par nič bito jāsā'āxen soldad che rein' lega'aque'. Na' de'en goquālene' beñā' ca' blo'e de que benlilaže'e Diozān'. Na' gwna Diozān' che' de que naque' beñā' güen laogüe'enā'. 26 Šā to beñā' bitoč nye'e biš xne nezecho naque' beñā' guat. Ca'aczān' gwxaquā'ālebe chio'o, šā bito choncho de'e güen, nezecho bito de yeļā' mban zejlicāne chechon' la'añā'āczā šā nacho de que chonlilažā'ācho Jesocristān'.

3

Choncho de'e xinj len xtižā'āchon'

1 Beñā' bišā' dao', nezecho de que neto' chsed chlo'ito' beñā' yoblā xtižā' Diozān' si'ichto' castigw šā bito gonto' can' nannā'. De'e na'anā' āchnia' le'e, bito selažā'ātecle āgwsed āgwlo'ile beñā' yoblā xtižā' Diozān'. 2 Zan las yoguā'ācho choncho de'e xinj'. Pero šā to beñā' bito chone' de'e xinj' len xtiže'enā' naquāchgüe' beñā' güen na' gwzoiczene' nabia' doxen cuerp che'enā' šā ca'. 3 Chgo'ochō frennā' cho'a cabey ca' par nič yosā'āzenaguāb checho na' žja'aguāb con gatā'ātezā chene'echo šejlenga'acchob. 4 Na' leczā beñā' ca' choso'osa' barcw xen ca' choso'ochine' yag da'ozā de'en chsa' lega'aquān liča par nič chja'aquān gatā'ātezā chse'enene' la'añā'āczā šā chžiguā' be' gualān' lega'aquān. 5 Ca'aczān' naquān len ložā'āchon'. Tozā de'e dao' rizā'an naquān par len cuerp chechon' pero chac chñelenchon dižā' par gon cuincho xen. Na' ca' naquā to yi' bzi' dao' guaquā āgwzeyān to ya'adao' xen, ca'aczān' naquān len ložā'āchon' catā' chñelenchon dižā' mal. 6 Gwxaquā'āleben ca to yi'. Šā bito chzenagcho che Diozān' cho'echo yoguā' claste dižā' mal, chedā' ložā'āchon' chonchān de'e mal cle ca bitā'ātezāchlā part che cuerp chechon'. Na' šā cho'echo dižā' malān' chyaļā'āch yoguā'ālolte de'e mal de'en chonchon', na' bitoczā bi güen socho yedote lao ābancho. La' che gwxiye' nan' chzenagcho catā'an cho'echo dižā' mal ca'. 7 Chsa'ac max yoguā' claste bia yixā', bia žia tap ni'a ne'i, bia žia xile'e, bia chda nxobā le'i, na' bia ca' ža' lo'o nis. Bagwnitā' beñā' gwso'onmaxga'aque'eb. 8 Pero ni to chio'o bito soicho ložā'āchon' par nič bito güe'elenchon dižā' mal. Do tyempte cho'echo dižā' na' dižā' de'en chchoj lo'o la'ažda'omalchon' naquān de'e mal juisy. Gwxaquā'āleben ca benen che to beļāznia. 9 Len xtižā'āchon' cho'ela'ochō Xācho Diozān' ben' leczā naquā Xāncho. Na' leczā len xtižā'āchon' chžia chnitā'ācho ljuežj beñachcho, beñā' ca' ben Diozān' can' naquā cuine'. 10 Na' cho'ācho na'anā' chchoj dižā' šao' catā'an

cho'ela'ochio Diozən' na' lecəə na'anə' chchoj dižə' mal catə'an chzia chnitə'əcho ljuežj beṇəchcho. Beṇə' bišə' bito choncho can' cheyaḷə' goncho. ¹¹ Nezecho de que bito žia nis šao' na' nis əzbapj tozə bej. ¹² Na' lecəə ca' beṇə' bišə', nezecho de que to yag yixguion' bito chbian güi na' nic zapjən' chbian' yixgüio. Na' lecəə ca' bito šejcho bej gan' žia nis əzbapjən' par žjəxi'icho nis šao'. Ca'aczən' naqun len chio'o ža, bito cheyaḷə' güe'echo dižə' mal txen len dižə' güen, sino cheyaḷə' güe'echo por dižə' güen.

Can' goncho šə Diozən' babene' chio'o yelə' sin' che'enə'

¹³ Notə'ətezcho šə chaquecho naccho beṇə' sin' na' chejni'icho xtižə' Diozən' par əgwsed əgwlo'ichon beṇə' yoblə cheyaḷə' goncho yoguə'əḷəḷ can' chene'e Diozən' goncho par nič gacbia' naccho beṇə' sin', na' bito gon cuincho xen de'en naccho beṇə' sin'. ¹⁴ Pero na' šə chgue'i ljuežjcho na' chene'echo gaccho beṇə' blaoch cle ca lega'aque' bito cheyaḷə' əṇacho de que naccho beṇə' sin' par əgwsedecho beṇə' yoblə. Nacia' bito naccho beṇə' sin' šə choncho ca'. ¹⁵ Na' šə chgue'i ljuežjcho na' chene'echo gaccho beṇə' blaoch ca lega'aque' bito naccho beṇə' sin' par əgwsedecho beṇə' yoblə, con choncho can' na la'ažda'omalchon' na' can' chso'on beṇə' ca' cui zjənombia' Diozən', la' xbab chechon' za'an che de'e gwxiye'enə'. ¹⁶ Šə chgue'i ljuežjcho na' chene'echo gaccho beṇə' blaoch ca lega'aque', bito zocho binḷo len lega'aque' šə ca', na' choncho porzə de'e mal. ¹⁷ Catə' Diozən' chone' chio'o yelə' sin' che'enə', choncho porzə de'e güen, na' bito chxecho gwdilə' entr ljuežjcho. Na' catə' chone' chio'o yelə' sin' che'enə' naccho gaxjwlažə' na' chzexjw yichjcho par nič chzenagcho che ljuežjcho. Na' lecəə cheyašə' cheži'ilažə' ljuežjcho na' tozə can' chaclencho yogue'e na' cho'echo por dižə' li. ¹⁸ Pero catə'əch zo chbezcho binḷo na' chaclencho beṇə' yeziquə'əchlə par yesə'əzo yesə'əbezəga'aque' binḷo, nachən' beṇə' ca' chsed chlo'icho so'onljə' de'e güenṇə'.

4

Bito gaquə goncho txen len beṇə' ca' cui zjənombia' Diozən'

¹ De'en chdilə chšašle entr ljuežjle chonle ca' chedə' yo'o yaz de'e malən' lo'o yichjla'ažda'olen' na' chnabi'an le'e par chonle con can' nan chele. ² Yo'o yaz de'e malən' lo'o yichjla'ažda'olen'. De'e na'anə' chene'ele de'en de che beṇə' ljuežjle na' catə' cui chac ca'alēn, xte chotga'aclene' par nič gaquən lao na'ale. Na' lecəə catə' chzelažə'əle gatə' de'e cui de chele chdiləlen beṇə' na' chšašlenga'aclene'. Bito de'en chyažjele chedə' bito chṇabele Diozən' par gone' ca' gatə'ən. ³ Na' tgüejə catə' chṇabecho Diozən' gone' par gatə' bi de'en gatə' checho bito chone'en chedə' con chene'echo gatə' šə bin' na la'ažda'omalchonə', na' choncho con nactezə nan. ⁴ Šə cho'echo latjə chnabia' la'ažda'omalchon' chio'o par choncho con can' chene'ennə', choncho can' chso'on beṇə' ca' cui zjənombia' Diozən' na' choncho contr Diozən'. De'e na'anə' notə'ətezcho šə chene'echo goncho txen len beṇə' mal ca', naccho beṇə' contr che Diozən' na' de'en cuich chaquecho che Diozən' gwxaquə'əlebecho ca to no'olə go'o xtoi, no'olən' cuich chaque che be'en che'enə'. ⁵ Chonljale xbab de que Xtižə' Diozən' bitobi zaquə'ən gan' nyojən nan: "Diozən' beṇə' Spirit che'enə' zon lo'o la'ažda'ochon'. Na' Spiritən' lechguale nži'ilažə'ən chio'o, na' chzelažə'əchguan gaquecho che tozə Diozən'." ⁶ Diozən' chaclenchgüe' chio'o par nič cuich chzenagcho che la'ažda'omalchon'. De'e na'anə' nyojən le'e Xtižə' Diozən' nan: "Diozən' chone' contr beṇə' ca' chso'on cuinga'aque' xen, pero chaclene' beṇə' ca' chso'on xbab de que bitotec bi

zjəzaque'e." ⁷ De'e na'anə' cheyałə' gon cuincho lažə' na' Diozən' na' co'o gwčhejlažə'əcho cui šejle'echo che gwxiye'enə'. Šə goncho ca' yebižə'an šlož. ⁸ Cheyałə' goncho xbab can' chaque Diozən' checho na' güe'elenchone' dižə' can' cho'elencho beņə' migw checho ca' dižə'. Šə goncho ca', Diozən' gaque' beņə' migw checho. Na' šə choncho de'e malən' cheyałə' cuejyichjchon. Na' šə choncho xbabən' de que guaquə güe'ela'ocho Diozən' na' gontezcho can' chene'e la'ažda'omalchon', clelən' choncho xbabən' šə ca' na' cheyałə' güe'echo latjə yocobə Diozən' yichjla'ažda'ochon'. ⁹ Catə' babencho de'e malən' cheyałə' yegüine'echo na' cuežyašə'əcho na' gaquəchgüeicho lo'o la'ažda'ochon' por ni che de'e mal de'en babenchon'. Bito cheyałə' goncho legr na' nic cheyałə' yebeicho, chedə' la' babencho de'e malən'. Cheyałə' yegüine'echo por ni che de'e malən' babenchon' na' yedinjechon. ¹⁰ Cheyałə' agwzəxjw yichjcho lao Xancho Diozən' gacbe'icho de que bito naccho beņə' zaquə'əchgüei par nič gone' chio'o yalə' bala'an.

Bito cheyałə' ənacho che ljuežjcho de que nape' dolə'

¹¹ Beņə' bišə' dao', bito cheyałə' ənecho che ljuežjcho. Ben' chne' che ljuežje' na' chnelaote', lei na'anə' chzoe' ca'alə, la' lennə' nan gaque che ljuežjcho. Na' nezecho de que ben' chon ca' bito chzenague' che lein'. Na' de'en chon cuine' ca beņə' zaque'e par əne' che ljuežje' de que nape' dolə', chone' lei che Diozən' ca to de'e cui bi zaque'e. ¹² Tozə Dioz nan' bnežjue' lein' na' tozə le'ena' zaque'e par əne' che to tocho šə napcho dolə'. Na' leczə'enə' chac gone' par nič cui žjəya'ac beņə' lao yi' gabilən' na' chacte sele'e beņə' lao yi' gabilən'. Pero chio'o bito zaquə'əcho ənacho che ljuežjcho de que zjənape' dolə'.

Bito nezecho bin' gaquə gwxe güižj

¹³ Na' leczə' tgüejə chchogbi'achon šejcho to ga šejcho par goncho negosy nič goncho gan. Na' chbejcho to žan' par šejcho na' chchogbi'achon de que yega'ančhonə' tgüiz. ¹⁴ Bito güen əchogbi'achon ca' la' bito nezecho bin' gaquə checho o nac goncho gwxe güižj. Yelə' mban chechon' gwxaquə'əleben ca to bejw, la' bejon' šložzə chle'ichon' na' cheyasən. ¹⁵ Cheyałə' ənacho: "Šə Xancho Diozən' güe'e latjə əbancho na' goncho to de'e goncho." ¹⁶ Pero na' de'e malən' choncho šə chon cuincho xen par chžiacho bia' naquən' goncho sin cui ənabecho Diozən'. ¹⁷ Na' šə nezecho de'en naquə güen goncho na' bito chonchon, napcho dolə' lao Diozən' de'en cui chonchon.

5

Lechquale de'e mal gaquə che beņə' gwni'a ca' beņə' cui chso'onlilažə' Jesocrisən'

¹ Na' le'e beņə' gwni'a le'e cui chonlilažə'əle Jesocrisən', le'e so trist, na' le'e cuežyašə', la' lechquale de'e mal gaquə chele. ² Bachbiayi' de'en deilen', na' leczə' bachsa'o bej zilə' lachə' šao' chelen'. ³ Mech chele de'en naquə de or na' de plat bachesə'əzen xche'i na' de'en zjənzen xche'inə' nachbia' de que bito bchinlen par gaqualenle beņə'. De'e na'anə' əžin ža əžaglaochquale lao yi' gabilən'. Bagwche' yichjle tlaozə babboble de'e sčha'o xmechlen', la'aņə'aczə bazon gon Diozən' le'e castigw. ⁴ Le'e gon xbab can' benle len beņə' güen žin chelen' beņə' yašə' ca' besy'əlap cwsəš chelen'. Bxəoyagle lega'aque' de'en bito gwđixjwga'aclene' can' cheyałə'. Na' de'en cui bnežjwle laxjwga'aque'en can' cheyałə', chlo'en de que nacle beņə' güen de'e mal. Diozən' chzenague' che beņə' güen žin ca' de'en chesyə'əgüine'ene', Dioz ben' napə le'ezelaogüe

yelə' guac xen. ⁵ Zotezle che'ej chaoša'ole na' chonditjeile de'en deile chonle con can' nan chele. Na' laogüe de'en chonle con can' nan chelen' na' bito chache'ile bazon gon Diozən' castigw chelen', gwxaquə'əlebele ca to bia yixə' bian' chgüe'ej chguaosa'ocho par ničh chanə'əb antslə ze'e gotchob. ⁶ Babenle par ničh beṇə' yoblə gwso'ote' beṇə' ca' gwso'on de'e güen, na' bitobi goquə so'one' par ničh cui bi gonga'aquelene'.

Cuezcho batə'əquan' yidə Xancho Jesocristən' de'e yoblə, na' goncho orasyon

⁷ Ca naquə le'e beṇə' bišə' dao', le'e co'o le'e gwchejlažə' len de'en chyi' chzaquə'əle chedə' bazon yidə Xancho Jesocristən' de'e yoblə. Beṇə' ca' chsa'az chnite'e chesə'əbeze' cwsešən', chedə' cwsešən' naqun de'e zaque'e. Na' chesə'əbeze' chedote lao chac yejon' na' catə' chbeza' yejon' canə'ach chesya'ətobe' cwsešən'. ⁸ De'e na'anə' bitə'ətezə de'e chyi' chzaquə'əle cheyalə' gonchechlažə'əle gonlilažə'əle Xancho Jesocristən' chedə' nezecho bazon yide' de'e yoblə. ⁹ Beṇə' bišə' dao', bito yosbague'ele ljuežjle šə bin' chac chele. Šə bin' yosbague'ele ljuežjle Xancho' choglaogüe'en chele de que nape dolə'. Na' bazon baözə yide' de'e yoblə. ¹⁰ Le'e gon xbab che de'e profet ca' beṇə' ca' gwsoe' xtižə' Xancho Diozən' cana'. Lechguale besə'əžaglaogüe' pero bia'aczə gwnite'e chech gwso'onlilaže'e Diozən'. ¹¹ Mbalaz nitə' beṇə' ca' gwnitə'ətezə gwnitə' gwnonlilažə' Diozən' la'anə'əczə besə'əžaglaogüe'. Babenele xtižə' de'e Jobən' can' benchechlaže'e benlilaže'e Diozən' la'anə'əczə de'e zan de'en gwdi' gwxaque'e. Pero na' catə' gwde de'en gwdi' gwxaque'ena', Diozən' bene' par ničh gwzoche' mbalaz clezə can' gwzoe' antslə. Can' ben Diozən' blo'e de que lechguale chene'ene' gaquəlene' chio'o na' lechguale cheyašə' cheži'ilaže'e chio'o.

¹² Beṇə' bišə' dao', bito əgwsocho jorament por yoba, nic por yežlyo nga, na' nic por bitə'ətezəchlə. Cheyalə' güe'echo por dižə' li de'e se'ejle' beṇə' sin cui əgwzocho testigw de que leiczechon', par ničh Jesocristən' cui choglaogüe'en checho de que cheyalə' si'icho castigw.

¹³ Notə'ətezcho catə' chyi' chzaquə'əcho, cheyalə' goncho orasyon. Na' notə'ətezcho catə' zocho mbalaz, cheyalə' golcho güe'ela'ocho Jesocristən'.

¹⁴ Notə'ətezcho catə' chacsenecho cheyalə' gaxcho beṇə' gol ca' gwlejšo par ničh zjənaque' beṇə' blaö che chio'o chdopə chžagcho cho'ela'ocho Jesocristən'. Na' yesə'əyebe' chio'o setən', na' so'one' orasyon lao Diozən' yesə'ənabe' yeyaquəcho chedə' lega'aque' na' chio'o chonlilažə'əcho Xancho Jesocristən'. ¹⁵ Na' chio'o choncho orasyonə cheyalə' šejle'echo de que chzenagczə Xancho Diozən' checho par ničh ca' yeyaque šə no chio'o chacsene, la' Xancho nan' yeyone' chio'o. Na' šə babencho de'e mal, gozi'ixenczə Xancho' checho. ¹⁶ De'e na'anə' cheyalə' güe'echo dižə' len beṇə' ljuežjcho che bitə'ətezə de'e mal babencho contr lega'aque' na' goncho orasyon tocho yetocho par ničh ca' yezochö güen šə bin' chac checho. Na' šə naccho beṇə' güen lao Diozən', Diozən' chzenagczə' checho catə' choncho orasyonə' do yichj do lažə'əcho na' chone' de'e zan de'e güen de'en chnabechone' gone'.

¹⁷ Le'e gon xbab che Liažən'. Goque' beṇəch cayanə'nə naquə chio'o. Na' catə' bene' orasyon do yichj do laže'e gwṇabene' Diozən' cui gaquə yejw, Diozən' bzenague' che' na' bito bsele'e yejon' lao šon iz yo'o gašjə. ¹⁸ Na' catə' bene' orasyonə' gwṇabene' Diozən' əsele'e yejon' de'e yoblə, nach Diozən' bsele'en. Na' goc cwseš che beṇə' ca' de'e yoblə.

¹⁹ Beṇə' bišə' dao', catə' to beṇə' ljuežjcho bagwlejšyichje' de'en naquə de'e li de'en bzejni'i Diozən' chio'o, cheyalə' gaquəlenchone' par ničh yedinjene' xtole'ena' na' yeyaquə' tozə len chio'o. ²⁰ Che'enda' ənezele de que catə'

choncho par nich notə'ətezə beṇə' chedinjene' xtole'enə', chaclenchone' par nich chezi'ixen Diozən' xtole'enə' la'aṇə'əczə šə naquən de'e zan, na' cui yeyej be'enə' lao yl' gabilən'.

De'e na'azən' chzoja' ṇa'a. *Santiago*

Cart Nech De'en Bzoj San Bedan'

Bedan' chzoje' cart par benə' ca' chso'onlilažə' Cristan' benə' ca' zjanasəlas

¹ Nada' Bed naca' apostol che Jesocristan'. Na' chzoja' cart nga par le'e nasə'əlasle distrit che Ponto, Galasia, Capadosia, Asia na' Bitinia. Chio'o chonlilažə'əcho Jesocristan' naccho ca benə' zitə' len yeziqə'əchlə benə' ža' lao yežlyon'. ² Xacho Diozan' gwleje' chio'o pa nič naccho xi'ine' can' bsi'e xneze dezd gwlatte. Spirit che Diozan' chonən par nič naquə' la'ažda'ochon' xi'ilažə' par nič chzenagcho che Jesocristan' na' par nič chnitlao xtolə'əchon' chedə' le' blaj xchene'enə'. Chnaba' sotezə so Diozan' gaquə'lenche' le'e na' gone' par nič so cuezəchle binlo len xbab de'en yo'o lo'o yichjla'ažda'olen'.

Zochə lez žjəyecho len Diozan'

³ Ledoye'ela'och Diozan'. Le' naque' Xa Xancho Jesocristan' na' leczə cho'elao' Xancho Jesocristan' le'. Lechgualə cheyašə' cheži'ilažə' Diozan' chio'o ca de'en bocobe' yichjla'ažda'ochon' na' bene' par nič zochə lez žjəyecho len le'. Na' nezecho gaquə' can' zochə lez chedə' Jesocristan' bebane' ladjo benə' guat ca'.

⁴ Diozan' gone' de'e šao' de'e güen par chio'o de'e cui te chei, na' benə' güen de'e mal ca' bito gaquə' yesə'əžone' gaquə' güen par chio'o. Diozan' babsi'e xneze gone' de'e ca' par chio'o catə'an yežincho yoban'. ⁵ Na' na'a Diozan' len yelə' guac xen che'enə' chcuasə' chcue'eje' chio'o len de'e malən' chedə' chonlilažə'əchone'. Na' chbezcho batə'əquən' yidə Cristan' de'e yoblə nič gone' de'e güen ca' par chio'o.

⁶ De'e na'anə' zochə mbalazchgua' la'anə'əczə de de'e zan de'en chy' chzaquə'əcho šlož güejə' lao zochə yežlyo nga. ⁷ Benə'chən' choso'ozeye' orən' par nič chesə'əneze' šə naquan doalje' na' par nič chesyə'əbeje' bitə'ətezə de'en nchixən. Na' orən' gwžin ža te chei. Na' ca'aczən' chon Diozan' len chio'o, cho'e latjə chy' chzaquə'əcho par nič nachbia' šə de'e li chonlilažə'əchone'. Na' šə de'e li chonlilažə'əchone' zaquə'əchən cle ca can' zaquə' orən'. Na' šə ca' catə' yidə Jesocristan' de'e yoblə, Diozan' əne' checho de que bencho de'e güen, na' gone' par nič gagcho benə' blao na' gone' chio'o yelə' bala'an xen.

⁸ Na' le'e chaquele che Jesocristan' la'anə'əczə bitonə' le' ilene'. Na' la'anə'əczə bito chle'ichone' na'a chonlilažə'əchone'. Na' de'e na'anə' zochə mbalaz na' clegazə chebeicho. ⁹ Na' de'en chonlilažə'əcho Jesocristan', gone' par nič žjəyecho len Diozan'.

¹⁰⁻¹¹ Na' ca naquə' benə' ca' bosə'ozoj Xtižə' Diozan' cana', Spirit che Diozan' de'en leczə naquan Spirit che Cristan' gwzon lo'o yichjla'ažda'oga'aque'enə', bzejni'in lega'aque' can' saquə'əzi' ben' əselə' Diozan' par yosle' benə' lao de'e malən' na' can' yezi'e yelə' bala'an xen che'enə' catə'an te de'en saquə'əzi'enə'. Gosə'əneze' na' bosə'ozoje' can' chaclen Diozan' chio'o na'a. Na' bosə'osedeyane' na' besyə'əyiljyože' non' əselə' Diozan' par gone' ca žjəyecho len le' na' batən' əsele'ene'. ¹² Spiritən' bzejni'in lega'aque' de que de'en bosə'ozoje'enə' bito gaquən complir tyemp chega'aque'enə' sino tyemp che chio'ona'. Na' ca naquə' neto' babzeneto' le'e dižə' güen dižə' cobə' de'en chzejni'in che Cristan', gwdixjue'ito' le'e de que bač goc complir can' bosə'ozoj benə' ca' cana'. Spirit che Diozan' de'en bsele'e goclənən neto' gwdixjue'ito'on le'e. Na' angl ca' lechgualə chse'enene' se'ejni'ine' de'e ca' bagwdixjue'ito' le'e.

Cheyalə' gaquə la'ažda'ochon' xi'ilažə' len yoguə' de'en choncho

¹³ De'e na'anə' cheyalə' socho len tozə xbab na' nabia' cuincho par goncho can' chazlažə' Diozən'. Cheyalə' socho yebeicho ca de'e güen de'en gon Diozən' par chio'o catə'an yidə Jesocristən' de'e yoblə. ¹⁴ Laogüe de'en naccho xi'ine' cheyalə' sotezə socho əgwzenagcho che'. Bitoch cheyalə' əgwzenagcho che de'e malən' de'en chene'e la'ažda'omalchon' goncho can' bencho catə'an cuiṇə' šo'o be'eni' che Diozən' lo'o yichjla'ažda'ochon'. ¹⁵ Diozən' gwleje' chio'o par naccho xi'ine'. Le' naque' beṇə' la'aždao' xi'ilažə'. De'e na'anə' chio'o leczə cheyalə' gaquə la'ažda'ochon' xi'ilažə' len yoguə' de'en choncho. ¹⁶ Xtižə' Diozən' nyojən nan: "Cheyalə' gaquə la'ažda'olen' xi'ilažə' chedə' nada' Dioz naquə la'ažda'ogua'anə' xi'ilažə'."

¹⁷ Chio'o choncho orasyon lao Diozən' che'echone' "Xato' Dioz". Na' Dioz nan' chchoglaogüe'en che chio'o beṇəç šə nocho napcho dola' segon naquən' chon to tocho. Na' tozəczə can' chon Diozən' len yoguə' beṇəçən'. De'e na'anə' cheyalə' gapchone' respet na' soteza socho gapcho cuidad par nich cui goncho de'e mal lao socho yežlyo nga. ¹⁸⁻¹⁹ Nezecho de que costombr ca' de'en boso'ozejni'i de'e xaxta'ocho ca' chio'o bitobi zjəzaquə'ən. Na' Cristən' gwdixjue' xtolə'əchon' catə' blalj xchene'enə' par nich cuich naocho costombr ca'. Bito gwdixjue'en len mech de or o de plat o len bichlə de'en zjəde lao yežlyon' de'en yesə'əde chei. Na' xchene'enə' de'en blalje' zaquə'əchguan lao Diozən'. Cristən' gwxaquə'əlebene' ca xilə' dao' bian' cui bi bi yižgüe' da' na' cui bi bi naquei, ca bia ca' gwso'ot beṇə' Izrael gwlaž checho ca' par bezi'ixen Diozən' xtolə'əga'aque'enə'. ²⁰ Na' ze'e xe yežlyon' catə' Diozən' gwleje' Cristən' par chixjue' xtolə'əchon'. Na' Diozən' bsele'ene' laochon' tyemp nga zocho na'a par chaclene' chio'o. ²¹ Na' de'en bosban Diozən' Cristən' ladjo beṇə' guat ca' na' bnežjue'ene' yelə' bala'an xen, de'e na'anə' chonlilažə'əcho Diozən' na' chebeicho nezecho gon Diozən' güen len chio'o.

²² Na' de'en bachzenagcho che dižə' li che'enə', Diozən' bene' ca naquə la'ažda'ochonə' xi'ilažə', par nich chaquecho che yeziquə'əchlə beṇə' chso'onlilažə' Cristən'. De'e na'anə' cheyalə' gaquə'əchgüeicho chega'aque' do yichj do lažə'əcho, caguə de'e dižə'əza. ²³ Diozən' babene' par nich goljcho de'e yoblə chedə' gwyejle'echo che xtižə' Diozən'. De'e na'anə' bade yelə' mban zejlicane checho. Bito den por ni che de'en goljcho por xaxna'acho beṇə' ca' chsa'at, sino por Diozən' ben' zo zejlicane. ²⁴ Xtižə' Diozən' nyojən, nan: Chio'o beṇəç gwxaquə'əlebecho ca yixə' de'en chla'ac do yoba, chedə' šložgan' zocho.

Na' yoguə' de'en de yežlyo nga de'en chebeicho gwxaquə'əleben ca lojei ca', chedə' te chega'aquən'.

Can' chac len yixə' ca', chesə'əbižən nach chesə'əyiṇj lojei ca', ca'atezəczən' chac len chio'o na' len de'e ca' zjəde yežlyo nga.

²⁵ Pero na' caguə de'e te che Xtižə' Xancho Diozən'.

Dižə' güen dižə' cobən' de'en gwdixjue'ito' le'e naquən xtižə' Xancho Diozən' de'en cui te chei.

2

¹ Na' laogüe de'en banaccho xi'in Dioz, cheyalə' cuejyichjcho yoguə' claste de'e mal de'en choncho. Bito əxoayagcho beṇə', bito goncho ca əsa'aque beṇə' naquə'əcho beṇə' güenəç can' naccho, bito gaquə'xi'icho beṇə' na' nic ənecho dižə' mal che beṇə'. ² Na' ca bi'i che'en dao' ca' chəsə'ədombo' xizə'əga'acbo' ca'aczən' cheyalə' selažə'əcho šejni'ichecho Xtižə' Diozən' de'en

nyojən par niç gaqualenən chio'o gaccho can' chene'e Diozən' gaquə chio'o chonlilažə'əchone'. Na' Xtižə' Diozən' bito chxoayaguən notə'ətezə beṇə'.
 3 Cheyalə' selažə'əcho šejni'ichecho Xtižə' Diozən' chedə' bachacbe'icho de que Xancho Jesocrstən' chonchgüe' güen len chio'o.

Cristən' gwxaquə'əlebene' ca to yej squin che to yo'o

4 Chio'o chonlilažə'əchone' chedə' zoe' zejlicane na' chone' chio'o yelə' mban zejlicane. Diozən' gwleje' le' par chone' chio'o yelə' mban zejlicane na' lechgualə zaque'e len Diozən'. De'e na'anə' Jesocrstən' gwxaquə'əlebene' ca to yej de'en gwlej beṇə' par gaquən yej squin liže'enə' na' zaquə'əchguan len be'enə' gwlej lenṇə', la'anə'əczə beṇə' ca' yeziqə'əchlə gwsa'aque' cui bi zaquə' yejən' na' boso'ozo'en ca'alə'. 5 Na' de'en ngoda'əcho txen len Jesocrstən' gwxaquə'əlebecho ca yej ca' de'en zjəncua' zjəngoda'ən gan' chac yo'o de yejən'. Pero zaquə'əchcho ca yejən' la' de yelə' mban zejlicane chechon', na' yoguə'əcho txenṇə' naccho liž Diozən' chedə' zoe' len chio'o. Na' gwxaquə'əlebecho ca bxož che beṇə' Izrael gwlaž checho ca' can' gwnitə'ətezə gwnite'e gwse'ejni'alaže'e Diozən', chedə' Jesocrstən' chone' par niç zotezə zocho cho'ela'ocho Diozən' lo'o yichjla'ažda'ochon' can' chazlažə' Diozən'. 6 Na' Xtižə' Diozən' nyojən' che Jesocrstən' nan:

Gan' nzi' Sion na' əselə'a to beṇə' gwxaquə'əlebene' ca to yej de'en gwlej beṇə' par gaquən yej squin, na' zaquə'əchguan par le'.

Na' beṇə' so'onlilažə' ben' gwxaquə'əlebe ca yejən' bito bi zto' əsa'aque' che de'en so'onlilaže'ene'.

7 Na' par chio'o chonlilažə'əchone', naque' le'ebeyože beṇə' zaque'e. Pero na' beṇə' ca' cui chso'onlilažə' le', choso'ozoe' le' ca'alə, na' par lega'aque' nyojczə Xtižə' Diozən', nan:

Yej de'en boso'ozo mues ca' ca'alə,
 len banaquən yej squin ṇa'a.

8 Na' le'egatezə ca' nan:

Ben' əselə'a gwxaquə'əlebene' ca to yej de'e əchego' beṇə',
 na' ca to yej de'en žjəsə'əžə'e na' yesə'əbiṇe'.

Yesə'əchegüe'e chedə' chso'onczə yichjlaoga'aque' cui choso'ozenague' Xtižə' Diozən'. De'e na'anə' yesə'əbiayi'e can' babsi' Diozən' xneze.

Chio'o chonlilažə'əcho Diozən' naccho xi'ine'

9 Pero na' chio'o chonlilažə'əcho Diozən' bagwleje' chio'o par naccho family che'. Na' lao Diozən' naccho rei na' bxož, na' naccho ṇasyon che' na' nactecho xi'ine'. Diozən' gwleje' chio'o par niç chixjue'echo catec de'e güenṇə' chone'. Na' le'enə' bebeje' chio'o lo'o de'e žcholən' gan' gwdacho antslə. Na' gwlo'o be'eni' che'enə' lo'o yichjla'ažda'ochon'. Na' be'eni' che'enə' naquən de'e güen juisy par chio'o. 10 Antslə bito goccho xi'in' Diozən', pero ṇa'a banaccho xi'ine'. Na' antslə bito gwnezecho de que cheyašə' cheži'ilažə' Diozən' chio'o, pero ṇa'a banezecho de que cheyašə' cheži'ilaže'e chio'o.

Zoczcho par goncho can' chazlažə' Diozən'

11 Beṇə' bišə' dao' chio'o naccho ca beṇə' zito' len beṇə' ža' lao yežlyo nga na' par chio'o lažchon' naquən gan' zo Diozən'. Na' chatə'əyoida' le'e bito əgwzenagle che de'en chzelažə' la'ažda'omallənə' cuent cui ṇabi'an le'e par gonle' de'e malən'. 12 Le'e sotezə leso leğon de'e güen par niç beṇə' ca' cui zjənombia' Diozən' yesə'əle'ine' de'e güenṇə' chonle na' gwžin ža bale' so'onlilaže'e Diozən' əso'ene' yelə' bala'an, la'anə'əczə ṇa'a chesə'əne' nacle beṇə' mal.

¹³ To tocho cheyalə' əgwzenagcho che jostis ca' benə' ca' chesə'anabia' chedə' Xancho Jesocrisən' bene' mendad goncho ca'. Cheyalə' əgwzenagcho che rein' ben' chnabia'ach. ¹⁴ Na' leczə cheyalə' əgwzenagcho che gobernador ca' benə' ca' chselə' rein'. Chselə'e lega'aque' par choso'onežjue' castigw che benə' chso'on de'e mal, na' par chso'e yelə' bala'an che benə' chso'on de'e güen. ¹⁵ Diozən' chene'ene' goncho de'e güen par nič bito gaquə yesə'ana benə' ca' cuinə' so'ombia' le' de que choncho de'e mal, benə' ca' nežjanchoł yichjla'ažda'oga'aque'ena'.

¹⁶ Bitoch chonən byen naocho costombr che benə' Izrael ca' can' na lein'. Pero bito cheyalə' goncho xbab de que de lsens checho par goncho bitə'atezə de'e mal, chedə' la' naccho benə' güen xšin Diozən' na' zoczcho par goncho can' chazlaže'ena'. ¹⁷ Cheyalə' gapcho respet yoguə' benə'. Na' cheyalə' gaquecho che yeziquə'əchlə benə' chso'onlilažə' Diozən'. Cheyalə' güe'ela'ochio Diozən', na' žebcho goncho de'en cui chazlaže'ena', na' cheyalə' gapcho rein' respet.

Cristən' bguo'o bchejlaže'e len de'en gwxaquə'əzi'ena'

¹⁸ Le'e nacle mos che benə', legwzenag che xanlen' laogüe de'en chaple Diozən' respet. Gwzenagle caguə' tlaozə che benə' zjənaquə' benə' güen benə' gaxjwlažə', sino que lenczə che benə' znia ca'. ¹⁹ Catə' benə' choso'ochi' choso'osaque'e chio'o sin cui bibi de'e mal noncho, Diozən' chebeine' šə chgo'o chchejlažə'əcho len de'en choso'ochi' choso'osaque'e chio'o, chedə' can' chene'ene' goncho. ²⁰ Bitobi zaquə' lao Diozən' ca de'en chgo'o chchejlažə'əcho catə' chesə'əbažə' benə' chio'o šə de'en chonchon' naquən mal. Pero na' šə choso'ochi' choso'osaque' benə' chio'o laogüe de'en choncho de'e güen, Diozən' chebeine' de'en chgo'o chchejlažə'əcho len de'en choso'ochi' choso'osaque'e chio'o. ²¹ Diozən' bagwleje' chio'o par nič goncho de'e güenna' na' par nič co'o gwchejlažə'əcho len bitə'atezə de'e yoso'ochi' yoso'osaque' benə' chio'o. Bguo'o bchejlažə' Cristən' len de'en goc che'ena' catə'an gwxaquə'əzi'e por ni checho, na' bguo'o bchejlaže'e par nič ənezecho naquən' chene'ene' goncho na' par nič goncho can' bene'ena'. ²² Na' Cristən' bitobi de'e mal bene', na' ni que əbxoayague' benə' len dižə' de'en be'e. ²³ Na' catə' gwsa'adə' benə' le' dižə' bito nacho boži'e dižə' mal len lega'aque'. Na' le'egatezə ca' catə'an bosochi' bososaque'ene' bito gwne' gone' mal len lega'aque'. Ben cuine' lao na' Diozən', chedə' benlilaže'e Diozən' ben' zdaczə licha par əne' non' napə dolə' na' non' chon de'e güen. ²⁴ Bito bi de'e mal ben Cristən' pero gwdixjue' che de'e mal de'en ben chio'o. Bnežjw cuine' gwso'ot benə' le' le'e yag corozən', par nič notə'atezcho chonlilažə'əchone' cui si'icho castigw che de'en benchon'. Bnežjw cuine' par nič cuich šo'o chazcho de'e malən' sino sotezə socho goncho de'e güen. Na' be'e latjə gwso'onene' le' ca' par nič bebeje' chio'o xni'a de'e malən'. ²⁵ Gwxaquə'əlebecho ca xilə' ca' zjənasələs laogüe de'en bencho con can' gwna la'ažda'omalchon'. Pero na'a bitoch chzenagcho che la'ažda'omalchon', sino que bachzenagcho che Cristən'. Na' Cristən' gwxaquə'əlebene' ca to benə' goye xilə' de'en chcuasə' chcue'eje' chio'o len de'e malən'.

3

Can' cheyalə' so'on benə' ca' zjənšagna'

¹⁻² Na' le'e no'olə le'e nšagna'ale, to tole cheyalə' əgwzenagle che be'en chele. Na' šə be'en chelen' bito chzenague' che xtižə' Diozən' guaqualenljaga'aclene'

nich yoso'ozenague' chei. Catə' yesə'əle'ine' can' zdaczle chonle de'e güenna' na' can' chaple Diozən' respet do yichj do lažə'əle gwžinlja ža se'enene' yoso'ozenague' che', la'ana'əczə šə cui bi ye'ele lega'aque'. ³ Na' le'e no'olə, bito gonle xbab de que zaquə'əchgua de'en gonle par sole xoche. Bito cuec yichjle gaquə yišə' yichjlen' xoche, na' bito cue' yichjle porzə par əgwpa'a xale o par əgualə'əle bga o rət o par əgwdele niy. ⁴ De'en naquə de'e zaquə'əchgua lao Diozən' gaquə yichjla'ažda'olen' can' naquə yichjla'aždao' Cristən' na' gacle beŋə' gaɣjwlažə' na' so cuezle binlo len xbab de'en yo'o lo'o yichjla'ažda'olen', chedə' lega'aquən zjənaquən par zejlicane. ⁵ Cana' gwnitə' no'olə gwso'onlilažə' Diozən' na' gwso'on cuinga'aque' lažə' ne'enə'. Lega'aque' gwsa'aque' beŋə' gaɣjwlažə' na' boso'ozenague' che be'en chega'aque'. Na' zaquə'əchguan lao Diozən' can' gwso'one'enə'. ⁶ De'e Sarən' no'ol che de'e Abraanna' syempr bzenague' che be'en che'ena' na' gože'ene' ya'o con bin' gože'ene'. Na' šə sotezə sole gonle de'e güenna' na' bito žeble par gonlen bitə'ətezə gaquə, yesə'əna beŋə' de que nacle xi'in de'e Sarən' chedə' chonle can' bene'enə'.

⁷ Na' chio'o beŋə' byo chio'o nšagna'acho, leczə can' cheyalə' goncho güen len no'ol checho, can' nezecho chazlažə' Diozən'. Cheyalə' güe'ega'achone' yelə' bala'an' na' cheyalə' goncho xbab de que bito zjənaque' beŋə' gual can' naquə chio'o. Na' əžjsa'alazə'əcho de que Diozən' bagoclene' lega'aque' par nich de yelə' mban zejlicane chega'aque' can' bagoclene' chio'o. De'e na'anə' cheyalə' goncho yoguə'əte de'e ca' par nich bitobi bi əgwžon cui əgwzenag Diozən' checho catə' goncho orasyonə'.

Chchoj catə' chyi' chsaquə'əcho laogüe de'en choncho de'e güen

⁸ Yoguə'əcho cheyalə' goncho tozə xbab na' cheyalə' gaquecho lo'o la'ažda'ochon' šə bi de'en chac che ljuežjcho. Cheyalə' gaque che ljuežj chio'o chonlilažə'əcho Diozən' na' cheyalə' yeyašə'əlažə'e ljuežjcho. Bito cheyalə' gon cuincho xen. ⁹ Šə bi de'e mal chso'on beŋə' len chio'o, bito nacho leczə de'e mal yoži'ichon len lega'aque'. Na' šə chsa'ada' beŋə' chio'o dižə' leczə bito cheyalə' yoži'icho dižə' mal len lega'aque'. Lgua'a yoži'icho de'e mal len lega'aque', cheyalə' ənabcho gaquə de'e güen chega'aque'. Diozən' gwleje' chio'o par nich chone' ca zocho mbalaz. ¹⁰ Can' nyoj Xtizə' Diozən' nan:

Šə chene'echo əbancho sša na' socho mbalaz bito cheyalə' ənecho bitə'ətezə dižə' de'e naquə mal.

Na' bito güe'echo bitə'ətezə dižə' goxoayag.

¹¹ Cheyalə' cuejyichjcho yoguə' de'e mal, na' goncho de'e güen.

Cheyalə' chiljlažə'əcho nac goncho par socho binlo len ljuežjcho, na' sotezə socho gonchon.

¹² Xancho Diozən' chgüia chye' beŋə' ca' chso'on de'e güen, na' chzenague' catə' chso'one' orasyon laogüe'enə'.

Pero na' beŋə' ca' chso'on de'e malən' chže'e lega'aque'.

¹³ Notono no gaquə so'on par nich cuiayi'icho šə sotezə zocho chonchgua-cho de'e güen. ¹⁴ Pero na' šə beŋə' ca' cui zjənombia' Diozən' yoso'ochi' yoso'osaque'e chio'o laogüe de'en chontezcho de'en naquə güen lao Diozən', gone' ca socho mbalaz. Na' bito cheyalə' gaquəžejažə'əcho o žebcho lega'aque'.

¹⁵ Cheyalə' güe'ela'ochə Cristən' do yichj do lažə'əcho na' güe'echo latjə nabi'e chio'o. Cheyalə' sotezə socho probnid par yoži'icho xtizə' notə'ətezə beŋə' ənabene' chio'o bixchen' chejle'echo che Cristən'. Cheyalə' yoži'icho xtizə'əga'aque'enə' dižə' šao' na' con respet. ¹⁶ Do tyempte legon ca ənezele lo'o la'ažda'olen' de que chonle can' chazlažə' Diozən'. Nach catə' beŋə'

yesə'əne' de que chonle de'e mal laogüe de'en chonle can' cheyalə' gon chio'o chonlilažə'əcho Cristən', əsa'aque'ne' zto' de'en chəsə'əne' ca'. ¹⁷ Chchoj catə' Diozən' chazlažə'e chyi' chzaquə'əcho na' güenclə' čhi' saquə'əcho laogüe de'en choncho de'e güen cle ca' čhi' saquə'əcho laogüe de'en choncho de'e mal.

¹⁸ Cristən' ben' ben porzə de'e güen gwdi' gwxaque'e por ni' čhe chio'o be'ə' güen de'e mal catə'ən gwso'ote'ene' šlinzə canə', na' cuat gate' de'e yoblə. Gwdi' gwxaque'ena' par nič babozoe' chio'o binlo len Diozən'. Na' de'en bidə Cristən' goque' be'ə' belə' chen, de'e na'ana' be'ə' mal ca' gosə'əzoine' gwso'ote'ene'. Pero de'en naque' Xi'in Diozən' beyas bebane' ladjo be'ə' guat ca'. ¹⁹ Na' de'en naque' Xi'in Diozən' gweyeje' gan' ža' angl bzela' ca' gan' bseyjw Diozən' lega'aquən na' gwduxjui'e xtiž'e'ena' len lega'aquən.

²⁰ Angl bzela' ca' dezd cana' bito choso'ozenaguən čhe Diozən'. Gwso'onən can' gwso'on be'ə' ca' gwnitə' ca' tyempən' gwzo de'e Noen'. Diozən' gwzoine' gwdape' yelə' chxenlažə' len lega'aque' de'en bito bnežjue' castigw čhega'aque'ena' cate, gwleze' xte catə'əch beyož ben de'e Noen' barcon'. Na' xo'onzə be'ə' gwso'e lo'o barcon' na' lega'acze' bito gosə'əbiayi'e lo'o nisən'.

²¹ Ca'aczən' naquən len chio'o bagwcho'əcho nisən' na' Diozən' gone' par nič cui yeyejcho lao yi' gabilən'. Na' chcho'əcho nisən' caguə par nič nisən' gonən cuerp čechon' xi'ilažə', sino chcho'əchon de'en bezi'ixen Diozən' xtolə'əchon' catə'ən gw'nabechone' gone' ca' gaquə yichjla'ažda'ochon' xi'ilažə'. Na' Diozən' babezi'ixene' čhecho laogüe de'en beban Jesocristən' ladjo be'ə' guat ca'. ²² Jesocristən' babeyepə' yoban' gan' zoe' chnabi'e txen len Diozən'. Na' chnabi'e angl əblao ca' na' notə'ətezəchlə angl, na' notə'ətezəchlə napə yelə' gwnabia'.

4

Diozən' no'e čhecho de'e gon to tocho par gaquəlen ljuežjcho

¹ Cristən' goque' be'ə' belə' chen na' bsanlažə' cuine' gwxaquə'əzi'e catə'ən gwduxjue' xtolə'əchon'. De'e na'ana' cheyalə' əgwsanlažə' cuincho saquə'əzi'icho. Šə goncho ca' zejen de que bitoch chnabia' la'ažda'omalchon' chio'o. ² Na' chio'o lao yedote əbancho bito cheyalə' əgwzenagcho čhe de'en chzelažə' la'ažda'omalchon', cheyalə' goncho can' chazlažə' Diozən'.

³ Antslə bencho can' chso'on be'ə' ca' cui'ə' so'ombia' Diozən'. Lega'aque' chso'elažə'e chso'one' de'e naquə de'e yelə' zto' na' chso'onteze' bin' chzelažə' la'ažda'omalga'aque'ena', na' zjənaque' be'ə' güe'e zo, na' chso'one' lni gan' chac scandl, na' chso'elažə'e chsa'aše' güe'ena', na' chse'ejni'alažə'e lgu'a lsaquə' de'en na lei čhe Diozən' cui šejni'alažə'əcho. Pero bitoch cheyalə' goncho ca'.

⁴ Be'ə' ca' cui'ə' so'ombia' Diozən' chesyə'əbanene' de'en cuich choncho txen len lega'aque'. Bitoch choncho de'e mal ca' de'en chso'onchgua lega'aque'. De'e na'ana' choso'ožia choso'onite'e chio'o. ⁵ Pero yosə'ədie' cuent lao Cristən' čhe yoguə de'en chso'one'ena', čhedə' la' Cristən' chbeze' par əchoglaogüe'en naquən' gaquə čhe to to be'ə'əchən', la'anə'əczə šə bagwsa'ate'.

⁶ De'e na'ana' Diozən' bsele'e be'ə' bedəsə'ədixjui'e xtiž'e'ena' len chio'o par nič chonlilažə'əcho Cristən', na' len yeziquə'əchlə be'ə' gwso'onlilažə'ene' antslə ze'e sa'ate'. Na' nchoglaon čhe yoguə' chio'o be'ə'əch de que gatcho, pero be'ə' ca' gwso'onlilažə' Diozən' la'anə'əczə gwsa'ate', bia'aczə zjəmbane' len Diozən'.

⁷ Bazon bazoə šo'o fin čhe yežlyon', na' de'e na'ana' to tocho cheyalə' socho len tozə xbab na' n'abia' cuincho par goncho can' chazlažə' Diozən'. Cheyalə' goncho ca' par nič güe'elažə'əcho goncho orasyonnə'. ⁸ Na' de'en naquə de'e

žialao xench ca bitə'ətezəchlə de'en choncho, cheyalə' gaquecho che ljuežjcho do yichj do lažə'əcho. La' catə' chaquecho che ljuežjcho, bito choncho xbab šə de xtolə'əga'aque' la'anə'əczə šə zjənaquan de'e zan. ⁹ Cheyalə' yebeicho aggüialaocho ljuežjcho ca' catə' da'aque' ližchon'. ¹⁰ Diozən' lao yelə' chaclen che'enə' no'e checho gwde gwde de'e gaquə gon to cho. Na' de'en no'e gon to tocho cheyalə' gonchon par gaquəlen ljuežjcho. Na' šə goncho ca' saquə'əlebecho ca to mos əblao ben' chon can' chene'e xane'ena'. ¹¹ Šə Diozən' bano'e checho chixjue'echo xtiže'enə', cheyalə' žjəsa'alažə'əcho de que xtiže'e na'anə' chyxjue'echo. Na' šə bano'e checho gaquəlencho beṇə', cheyalə' gaquəlenga'acchone' do yichj do lažə'əcho chedə' nezecho Diozən' chone' chio'o fuers balor na' bichlə de'e chčincho par chaclenga'acchone'. Diozən' beṇə'e Jesocrstən' chaclene' chio'o, na' bitə'ətezə de'en goncho cheyalə' gonchon par nič Diozən' si'e yelə' bala'an. Ledoye'ela'och Jesocrstən' na'a na' zejlicane ben' chnabiaz' zejlicane. Na' can' gonšgacžcho.

De'en chyi' chzaquə'əcho chonən chio'o prueb šə chonlilažə'əcho Diozən'

¹² Beṇə' bišə' dao' bito cheyalə' yebanecho catə' choso'očhi' choso'osaquə'əchgua beṇə' chio'o. De'e ca' chyi' chzaquə'əcho chso'onən chio'o prueb šə de'e li chonlilažə'əcho Diozən'. De'e na'anə' bito cheyalə' goncho xbab de que de'en chyi' chzaquə'əcho naquan to de'e zaquə' yebanecho. ¹³ Cheyalə' yebeicho catə'an choso'očhi' choso'osaquə'e chio'o chedə' chac checho can' goc che Cristən' catə'an gwdi' gwxaquə'enə'. Na' catə' əžin ža əgwlo'i Diozən' de que Cristən' nape' yelə' bala'an xen, lechgualə yebeicho na' mbalaz socho. ¹⁴ Na' na' a zocho mbalaz la'anə'əczə šə choso'ožia choso'onitə' beṇə' chio'o de'en chonlilažə'əcho Cristən', la' Spirit che Diozən' de'en napə yelə' bala'an xen zon lo'o yichjla'ažda'ochon' par nič nezecho zoe' len chio'o. Beṇə' mal ca' choso'ožia choso'onite'e Cristən', na' chio'o nombi'achone' cho'ela'ochone'. ¹⁵ Bito cheyalə' gaccho beṇə' güet beṇə', beṇə' bguan, beṇə' güen bitə'ətezə de'e mal, na' bito cheyalə' əgwžiacho bia' bin' so'on beṇə' yoblə, par nič ca' šə čhi' saquə'əcho bito čhi' saquə'əcho laogüe de'en choncho de'e malən'. ¹⁶ Šə čhi' saquə'əcho laogüe de'en chonlilažə'əcho Cristən' bito cheyalə' gaquecho zto' de'en čhi' saquə'əcho sino nachle cheyalə' güe'ela'ochio Diozən' na' soczcho gonlilažə'əcho Cristən'.

¹⁷ Chio'o chonlilažə'əcho Diozən' naccho ca family che'enə'. Na' babžin ža lechgualə chyi' chzaquə'əcho chedə' Diozən' bachzolao chone' chio'o prueb šə de'e li chonlilažə'əchone'. Na' ca naquan' chyi' chzaquə' chio'o chonlilažə'əchone', nezecho gwžin ža catə' gaquə de'e mal juisy che beṇə' ca' cui choso'ozenag dižə' güen dižə' cobə che Diozən'. ¹⁸ Can' nyoj Xtižə' Diozən' nan: "Chio'o banaccho beṇə' güen lao Diozən' na' bia'acžə nacchguaze gaquə cui yeyejcho lao yi' gabilən', na' beṇə' mal ca' beṇə' ca' cui chso'elao' Diozən', naquan segor de que lega'aque' žjəya'aque' lao yi' gabilən'." ¹⁹ Chio'o chyi' chzaquə'əcho segon can' chzi' Diozən' xneze gac checho, na' cheyalə' gon cuincho lao na' Diozən' na' gonczcho de'e güen. Le'enə' bene' chio'o beṇəch, na' de'e na'anə' chaclene' chio'o can' ne'enə' la'anə'əczə chyi' chzaquə'əcho.

5

De'en cheyalə' gon chio'o chonlilažə'əcho Cristən'

¹ Na'a de to de'e əñia' le'e nchojle nacle beṇə' golə beṇə' blao par len beṇə' ca' chesə'ədopə chesə'əžag chso'elaogüe'e Diozən'. Txenczə len le'e na' nada' bagwlej Diozən' par naccho beṇə' golə beṇə' blao. Ble'ida' na' cho'a dižə' can'

gwxaquə'əzi' Cristən', na' nəzda' gon Cristən' chio'o yelə' bala'aṅ xen catə' yide' de'e yoblə. ² Na' chatə'əyoida' le'e leyebel əggüia əgwyele beṅə' ca' bagwlo'o Diozən' lao na'ale, caguə gonlen parzə niç gonle complir de'en gwso'on beṅə' mendad gonle. Leggüia legwyega'aque' do yichj do lažə'əle, caguə por ni che šə bi gan gonlen'. ³ Na' ca naquə beṅə' ca' zjənaquə lao na'ale, bito gonle byen yoso'ozenague' chele šə cui chse'enene', sino len bitə'əteza de'e gonle, legwlo'iga'aque' can' chene'e Diozən' goncho. ⁴ Šə gonle ca' catə'an yidə Xançon' de'e yoblə, ben' chapə chye' yoguə'əcho, gone' chio'o yelə' bala'aṅ xen de'e cui te chei.

⁵ Leczə ca' le'e nacle beṅə' xcuidə', chatə'əyoida' le'e legwzenag che beṅə' gola beṅə' blao çelen'. Yoguə'əcho cheyalə' gwzexjw yichjcho tocho yetocho na' goncho xbab de que bitotec bi zaquə'əcho. La' Xtizə' Diozən' nyojən nan: Diozən' chone' contr beṅə' ca' chso'on cuinga'aque' xen, na' chaclene' beṅə' ca' chso'on xbab de que bitotec bi zjəzaque'e.

⁶ De'e na'anə' cheyalə' gwzexjw yichjchon' lao Diozən' ben' napə yelə' guac xen, par niç ca' gone' chio'o yelə' bala'aṅ catə' cheyalə' si'ichon. ⁷ Cheyalə' goncho lao na' Diozən' yoguə'əloj de'en chžebcho gaquə na' bitoch cue' yichjcho çhei, la' le' nzi'ilaže'e chio'o.

⁸ Cheyalə' nabia' cuincho par goncho can' chazlažə' Diozən' na' gapcho cuidad cui co'o gwxiye'en chio'o nez mal. De'e gwxiye'en chonən contr chio'o na' gwxaquə'əleben ca to bež əznia la' bežən' syempr chosya'ab chdab chyljəb non' gaob, na' de'e gwxiye'en syempr cheyljlažə'an naclən' gonən par niç əgwžiyi'in chio'o. ⁹ Cheyalə' gonchechlažə'əcho cui šejle'echo che gwxiye'enə'. Cheyalə' sotezə socho gonlilažə'əcho Cristən', na' əžjsa'alažə'əcho de que caguə chio'ozənə' chyi' chzaquə'əcho sino lenczə yoguə' beṅə' bišə'əcho ca' ža' doxenlə yežlyo ngan', beṅə' ca' chso'onlilažə' Cristən'. ¹⁰ Na' catə' bagwde de'en chyi' chzaquə'əcho to tyemp dao' na'a, Diozən' gone' par niç gaquəch yichjla'ažda'ochon' can' naquə yichjla'aždaogüe'enə', na' gone' par niç gonlilažə'əchhone'. Gone' fuers balor checho par goncho can' chene'ene' goncho, na' gaquəlene' par niç to tocho socho len tozə' xbab. Dioz na'anə' chaclencze' chio'o len yoguə' de'en chyažjecho na' bagwleje' chio'o par niç gapcho yelə' bala'aṅ xen len le' zejlicane laogüe de'en chonlilažə'əcho Cristən'. ¹¹ Ledoye'ela'och Diozən' na'a na' zejlicane, ben' chnabia' zejlicane. Na' can' gonšgaczo.

Bedən' chguape' diox beṅə' ca' yoso'olabe' cartən'

¹² Cart dao' nga ngoxa'an Silbanon' par le'e. Naque' bišə'əcho na' nəzda' de que zotezə zoe' chone' complir can' cheyalə' gone'. Babzoja' cart nga chneyoida' le'e sotezə sole šejle'ele de que de'e li Diozən' nzi'ilaže'e chio'o can' babzenda' le'e. De'e na'anə' le'e sotezə leso legonlilaže'e.

¹³ Syoda Roma ngan' gwxaquə'əleben ca syoda Babilonian' chedə' beṅə' ca' ža' nga chso'onchgüe' de'e malən'. Na' neto' cho'ela'oto' Diozən' nga chguapto' le'e diox. Diozən' gwleje' neto' par naquəto' xi'ine' can' gwleje' le'e. Leczə Marcos ben' nona' ca xi'ina' chguape' le'e diox. ¹⁴ Catə' chežagle leyolgüiž ljuežjle dižə' šao' par niç gacbia' de que chaque che ljuežjle.

Yoguə' le'e chonlilažə'əle Jesocristən' chnaba' lao Xancho Diozən' gone' ca so cuezle binlo len xbab de'en yo'o lo'o yichjla'ažda'olen'.

De'e na'azə de'e chnia'. *Bed*

Cart Egwchope De'en Bzoj San Bedan'

Bedan' chzoje' cart par bena' ca' chso'onlilaža' Cristan'

¹ Nada' Simon Bed naca' apostol na' bena' güen žin che Jesocristan'. Na' chzoja' le'e bagoclen Diozan' par chonlilaža' ale Jesocristan'. Jesocristan' naque' Dioz chechon' ben' babebej chio'o xni'a de'e malan'. Tozə can' chone' güen len yogua' chio'o chonlilaža'əchone' chedə' la' zdacze' licha, tozə can' chone' len neto' naquəto' apostol na' len le'e cui nacle apostol. ² Chnaba' lao Diozan' gaquəlenche' le'e na' gone' ca so cuezəchle binlo len xbab de'en yo'o lo'o yichjla'ažda'olen' laogüe de'en nombi' alene' na' de'en nombi' ale Xancho Jeso'osan'.

Can' cheyalə' gon chio'o chonlilaža'əcho Cristan'

³ Banombi'acho Xancho Jeso'osan' na' de'e na'anə' lao yelə' guac xen che'enə' babene' chio'o yogua' de'en chyažjecho par sotezə socho goncho can' chene'e Diozan' na' güe'ela'ochone'. Xancho Jeso'osan' bagwleje' chio'o par naccho xi'ine' laogüe de'en naque' le'ezelaogüe benə' zaque'e na' nape' yelə' guac xen. ⁴ Na' laogüe de'en naque' le'ezelaogüe benə' zaque'e na' nape' yelə' guac xen, babene' lyebe gone' de'e zan de'e güen juisy na' de'e zaque'e len chio'o. Bene' lyebe gone' güen len chio'o par nič ca' gaquə yichjla'ažda'ochonə' cayanə'an naquə yichjla'ažda'ogüe'enə', na' par nič cuich goncho de'e mal can' chso'on benə' ca' cui zjənombia' Diozan' con choso'ozenagteze' che de'en chesə'əzelaža' la'ažda'omalga'aque'enə'. ⁵ Bachonlilaža'əcho Xancho Jeso'osan', na' de'en bachzolao chac yichjla'ažda'ochon' can' naquə yichjla'aždaogüe'enə' cheyalə' goncho xte ga zelao saquə'əcho par nič sotezə socho goncho de'e güen na' par nič šejni'ichecho de'en chazlaže'enə'. ⁶ Na' bito cheyalə' güe'echo latjə nabia' la'ažda'omalchon' chio'o. Cheyalə' sotezə socho gonlilaža'əcho Diozan' cata' chy' chzaquə'əcho, na' cheyalə' güe'ela'ochone' na' goncho can' chene'ene'enə'. ⁷ Na' leczə cheyalə' gaquecho che benə' ljuežjcho benə' chso'onlilaža' Cristan' can' chonlilaža'əchone' na' cheyalə' gaquecho che yeziquə'əchlə benə'.

⁸ Šə zdacho chonchguacho yogua' de'e ca', chaclenən chio'o par nič nezecho can' chene'e Xancho Jesocristan' goncho na' par nič sotezə socho goncho can' chene'ene'. ⁹ Pero na' notə'ətezcho šə bito choncho de'e ca' bagwnia' cheyalə' goncho, nchol yichjla'ažda'ochon' na' bito chejni'išaogüe'echo che Diozan' na' bagonlaža'əcho de que Diozan' babnitlaogüe' de'e mal de'en babencho antslə. ¹⁰ De'e na'anə' benə' bišə, cheyalə' goncho yogua'əloj can' bagwnia' chene'ene' par nič əzezecho de'e li bagwlej Diozan' chio'o par naccho xi'ine', na' bsi'e xnezənə' antslə par nič gwcue'e chio'o ca xi'ine'. Šə can' goncho cuat cuiayi'icho. ¹¹ Nachən' bitobi bi de de'e gaquə əgwžonən žjəyezochə len Xancho Jesocristan' gan' chnabi'e zejlicane, Jesocrist ben' babebej chio'o xni'a de'e malan'.

¹² Na' la'anə'əczə banzele de'e ca' bagwnia' le'e na' bazole chečh chejle'ele dižə' li che Diozan', bia'aczə che'enda' gontezə gona' par nič žjəyeza'alažə'əlen. ¹³ Chacda' naquən güen na'a nembana' gona' par nič žjəyeza'alažə'əle de'e ca' na' gonle xbab chega' aquən. ¹⁴ Nezda' de que yob əžin ža gata' segon can' bablo'i Xancho Jesocristan' nada'. ¹⁵ De'e na'anə'

chona' xte ga zelao saquə'əda' par niç catə' bagota' guaquə yosa'alažə'əle de'e ca' bagwnia' cheyałə' goncho.

Apostol ca' besə'əle'ine' yelə' chey che'eni' che Jesocristán'

¹⁶ De'en babzejni'ito' le'e can' əgwlo'i Jesocristán' yelə' guac xen che'enə' catə'an yide' de'e yoblə, bito naquən de'e chaljlažə'əto' par əxoayagto' le'e. Neto' apostol che'enə' ble'ito' yelə' chey che'eni' che'enə' na' de'e na'anə' nezeto' de que naque' le'ezelaogüe beṇə' zaque'e. ¹⁷ Xacho Diozən' bnežjue' Xi'ine'en yelə' bala'an xen na' bene' par niç cho'alaogüe'enə' goquən ca de'en chey che'eni'. Na' Xacho Diozən' ben' naquə le'ezelaogüe beṇə' blao na' ben' chnabia' doxenlə, gwne' che': "Bengan' Xi'ina' ben' chacchgüeida' chei, na' cheba chezaquə'əlažə'a len le'." ¹⁸ Na' neto' beneto' can' gwna Diozən' che', Dioz ben' zo yoban', la' gwzoto' len Jesocristán' lao ya'anə' de'en gwlej Diozən' par goc ca' laogüeinə'.

¹⁹ Na' de'en bable'ito' yelə' chey che'eni' che Jesocristán' blo'ichən neto' de que Xtizə'enə' de'en boso'ozoj de'e profet ca' beṇə' ca' gwso'e xtižə' Diozən' cana' naquən de'e li. Na' de'e güennə' gonle šə əgwzenagle chei. Xtižə' Diozən' de'en nyojən chse'eni'in lo'o yichjla'ažda'ochon' can' chon to lampara chse'eni'in to lo'o cuart gan' naquə žchol. Na' de'en nyojən əgwse'eni'in lo'o yichjla'ažda'ochon' yedote xte catə'an əžin žan' yidə Cristən' de'e yoblə. ²⁰ Pero na' de'en naquə de'e žialao šejni'icho, de'e profet ca' beṇə' ca' boso'ozoj Xtizə' Diozən' cana' bito boso'ozoje' con xbab chega'acze' che bi de'e ca' bachac o che de'e ze'e gaquə. ²¹ De'en boso'ozoje' bito naxo naquən to de'e gwnan yoso'ozoje', sino de'en gwlej Diozən' lega'aque' par gwsa'aque' lažə' ne'enə, Spirit che'enə' benən par niç boso'ozoje' de'en gone'ene'.

2

Beṇə' ca' choso'osed choso'olo'i xtižə' Diozən' clelə

¹ Na' tyemp catə'an gwnita' profet ca' leczə cana' gwnita' profet güenlažə' entr beṇə' Izrael ca'. Na' ca'aczən' nitə' beṇə' yoso'osed yoso'olo'i xtižə' Diozən' clelə entr le'e. Lega'aque' se'enene' yesə'əxoayague' le'e par niç cui gache'ile de que de'en choso'osed choso'oline' bito naquən de'e li. Na' lega'aque' yesə'əzoe' Xancho Jesocristán' ca'alə ben' gwduxjw xtolə' chio'o beṇə'ach. Na' šə no yoso'ozenag che de'en choso'osed choso'olo'i beṇə' goxoayag ca', žjəya'aque' lao yi' gabilən'. Na' ca de'en so'on beṇə' goxoayag ca' gonan par niç leczə əžin ža catə' lega'aque' yesə'əbiayi'e to de repentza. ² Beṇə' zan yoso'ozenague' chega'aque' na' so'one' yoguə' claste yelə' zto' ca de'en chso'on beṇə' ca'. Na' por ni che de'en so'one', beṇə' ca' cuinə' so'ombia' Diozən' yesə'əne' contr dižə' li che Diozən' de'en naocho. ³ Na' beṇə' goxoayag ca' laogüe de'en se'enchgüeine' yesə'əzi'e mech əso'e de'e zan dižə' güenlažə' de'en sa'aljaže'e parzə niç əgwnežjoga'aclene' xmechlen'. Dezd cana' Diozən' babži'e bia' yesə'əzi'e castigw, na' naquən segor yesə'əbiayi'e.

⁴ Nezecho can' goquə cana'. Diozən' bnežjue' castigw che angl ca' gwso'on de'e malən' bsele'e lega'aque' lo'o yech gabil gan' lechgualə naquə žchol, na' na' zjənite'e xte ca əžin ža yesə'əzi'e castigw zejlicane. ⁵ Na' leczə ca' Diozən' bžiyai'e yoguə'əte beṇə' ca' cui gwso'elao' le' cana' catə'an bsele'e yejw sio' juisyən'. De'e na'anə' gwsa'ate' gwse'eje' nisan'. Pero na' Diozən' bosle' Noe ben' gwduxjue'i beṇə' ca' nac so'one' par niç Diozən' əne' zjənaque' beṇə' güen laogüe'enə', na' leczə bosla Diozən' yegažə beṇə' yoblə. ⁶ Na' leczə bžiyai'e beṇə' ca' gwža' syoda Sodomān' na' syoda Gomorran', bene' par niç syoda ca'

gwse'eyən besyə'anittecən. Na' bene' ca' len syoda ca' par chosnisene' yoguə' beṇə' ze'e za'ac beṇə' cui so'elao' le' de que gwnežjue' castigw čhega'aque'.
 7 Na' cata' Diozən' bnežjue' castigw che beṇə' Sodoma na' beṇə' Gomorra ca', bosle' ben' le Lot čhedə' Lotən' goque' beṇə' güen laogüe'ena', na' Lotən' goquene' pesad ca yelə' zton' gwso'on beṇə' mal ca'. 8 La' beṇə' güen na'anə' gwzoe' entr beṇə' mal ca', na' yoguə'ate ža ble'ine' na' benene' de'e malən' gwso'one' na' goquene'en pesad lo'o yichjla'ažda'ogüe'ena'. 9 Na' yoguə' de'e ca' de'en ben Diozən' cana' chzejni'in chio'o cho'ela'ochone' de que Diozən' nezczene' nac gone' par yebeje' chio'o lao bitə'ateza de'e gonən ca əxopcho goncho de'e malən'. Na' leczə chzejni'in chio'o de que chone' par nič beṇə' mal ca' chesə'əzi'e castigw ŋa'a na' əžin žan' gwnežjue' castigw čhega'aque'ena' zejlicane.

10 Na' gonchgüe' castigw che yoguə' beṇə' ca' chso'onzeche' yelə' zto' čhega'aque' con can' na la'ažda'omalga'aque'ena', na' bitobi respet chsa'ape' Xancho Diozən'. Bito chesə'əzebe' par so'one' de'e malən'. Chso'one' con can' chse'enene', na' choso'ožia choso'onite'e angl ca'. 11 Na' la'anə'əczə angl ca' zjənapəche' yelə' guac na' zjənaquəche' beṇə' gual cle ca' beṇə' ca' choso'osed choso'olo'i dižə' güenlažə', bito chəsyə'əyaxje angl ca' yoso'ožia yoso'onite'e beṇə' güenlažə' ca' lao Xančon'.

12 Pero beṇə' ca' choso'osed choso'olo'i dižə' güenlažə'əna' choso'ožia choso'onite'e de'e ca' cui chse'ejni'ine'. Yesə'əbiayi'e čhedə' zjənaquə' ca bia yixə' de'en chso'one' con can' nan čhega'aque' na' bito choso'ozenague' che Diozən'. 13 Na' yesə'əzi'e castigw por ni che de'en choso'oči' choso'osaque'e beṇə'. Bito chso'one' žin, con chse'ej chsa'oteze' bi chse'enene' do ža do yel. Na' cata' che'ej chaole txen chso'elažə'əzeche' chse'ej chsa'oxate' lgua'a žjəsyə'əzalaze' e bi zejen de'en bnežjw cuin Cristən' por ni čhecho cata' beṇə' gwso'ote'ene'. De'e na'anə' gwxaquə'əlebəga'aguene' ca to manch lao lachə' xi'ilažə' na' ca to yiz xen lao cuerpən'.

14 Na' con chesə'əzelažə'əzeche' notə'ateza no'olə chesə'əle'ine', nitə'ateza nite'e chso'one' de'e malən', na' chəsə'əgo'oyele'e beṇə' ca' chsa'ac sayechə šayen len xtižə' Diozən' par chso'one' de'e malən' txen len lega'aque'. Beṇə' mal ca' bazjəyo'olaogüe' chesə'əzelaže'e bi de che beṇə'. Diozən' babžie' bia yesə'əbiayi'e. 15 Beṇə' goxoayag ca' bagosə'əbejyichje' nez de'en naquə de'e güen, na' bazjəyo'e nez malən'. Chso'one' can' ben de'e profet Balaam xi'in de'e Beor. Lečgualə bebei Balaanə' gan de'en gwxi'e por de'e malən' bene'. 16 Pero na' ben Diozən' par nič to bia yixə' bian' cui chac neb gwdiłəb le' che de'e malən' chone'. Borr che'ena' bšillemb le' len xne che beṇə', na' bžomb gon Balaanə' de'e malən' chene'ene' por ni che xbab clelən' de'en yo'o yichjla'aždaogüe'ena'.

17 Beṇə' ca' choso'osed choso'olo'i dižə' güenlažə'ən gwxaquə'əlebəga'aguene' ca bej de'en cui bi nis žia na' gwxaquə'əlebəga'aguene' ca bejw biž de'en nžiguə' to be' gual čhedə' cui zjəzaquə'e. Babžia Diozən' bia' yesə'əbiayi'e zejlicane lo'o yech gabil' gan' lečgualə naquə žchol. 18 Zižjo chso'e dižə' güenlažə' chso'elao' cuinga'aque'. Na' de'en chso'one' yelə' zto' che cuerp čhega'aque'ena', chəsə'əgo'oyele'e beṇə' ca' ze'e gwzoloa chso'onlilažə' Cristən' par leczə chso'one' yelə' zto' che cuinga'aque', la'anə'əczə beṇə' ca' ze'e besyə'əchoje' ladjo beṇə' ca' chso'on de'e malən'. 19 Chse'e beṇə' ca' ze'e gwzoloa chso'onlilažə' Cristən': "De'e malən' bito ŋabia'an chio'o", pero beṇə' ca' chəsə'əna ca' nite'e xni'a de'e malən'. Na' nezecho šə chzenagcho che bitə'ateza, xni'ei nan' zocho. 20 Na' beṇə' ca' bagwso'ombi'e

Ḫancho Jesocristān' na' bebeje' lega'aque' xni'a de'e mal ca' de'en chso'onān manch yichjla'aždao' notā'atezā beṇā' cui zjānombia' Diozān'. Pero de'en babesyā'azolaoḡiē' chosyo'ozenague' che de'e malān' babesyā'anite'e xni'einā' de'e yoblā, na' malāch chac čhega'aque' ṇa'a ca antslā. ²¹ Na' de'en babesyā'azolaoḡiē' chosyo'ozenague' che de'e malān', nca'alā xneze žalā' cui ḡwso'ombi'e nez de'e naquā de'e ḡüēn, cle ca ḡosa'abejyichje' de'en ben Ḫancho Diozān' mendad goncho de'en naquān de'e ḡüēn. ²² Šā cuejyichjcho de'en bene' mendad goncho, goncho can' ṇa dicho nga: "Beco'on cheyaob de'en cheyebāb, na' cošān' catā'an babḡuazjchob cheyo'ob lo'o beṇjon' de'e yoblā." Na' de'e li can' na dicho nga.

3

Yidā Jesocristān' de'e yoblā

¹ Beṇā' bišā' dao', de'e ngan' naquān cart aḡwchope de'en chzoja' le'e. Na' babzoja' cart quinga čhedā' chebeile chzenagle che dižā' lin', na' che'enda' gona' par nič ažjsa'alāžā'ele na' gonle xbab che de'en baboso'ozoj profet ca' beṇā' ca' ḡwso'e xtižā' Diozān' cana', na' de'en babsed blo'i neto' naquāto' apostol. ² Diozān' ḡwleje' profet ca' par ḡwsa'aque' lažā' ne'enā' na' bosō'ozoje' che de'e ca' ze'ā'ac. Na' neto' naquāto' apostol babzejni'ito' le'e bin' non Ḫancho Jesocristān' mendad goncho, Jesocrist ben' babebej chio'o xni'a de'e malān'.

³ Naquān de'e žialao ānezele ṇa'a cuiṇā' yidā Ḫancho Jesocristān' de'e yoblā, nitā' beṇā' so'onzeche' con can' čhesā'azelāžā' la'ažda'omalga'aque'enā' na' so'one' borl che de'en na Diozān' gaquā. ⁴ Yesā'āne': "Ca naquā lyebe de'en ben Jesocristān' de que yide' de'e yoblā, con ḡwne'enā'. Bagwsa'at de'e xaxta'ocho ca' beṇā' ḡwso'onlilažā' Diozān' antslā. Na' tozāczā can' chac dezd ḡwxete yežlyon' xte ža neža." ⁵ Beṇā' ca' čhesā'āna ca', bito čse'enene' so'one' xbab de que catā' ḡwxē yoban' na' yežlyon', con ben Diozān' mendad āsa'aquān, na' ḡoc can' bene' mendadān'. Bchoj yežlyon' lao nišān' de'en nyechj mbi'i len na' bčhin Diozān' nišān' catā'an bene'en. ⁶ Na' catā' ḡoc yejw sio' juisyān' cana'an ḡwžiai'y' yoguā' bia yixā' na' beṇāch nitā' lao yežlyon'. ⁷ Na' de'e ca' chle'icho le'e yoban' len yežlyon' zjānitā'an na' ca'aczān' yesyā'āga'anān xte catā'āch āžin ža gaquā juisyān'. Cana'ach āse'eyān čhedā' can' ben Diozān' mendad. Na' leczā cana'āchān' čhoglao Diozān' che beṇā' ca' cui chso'elao' le' de que āsa'aque' castiḡw zejlicane.

⁸ Pero na' le'e beṇā' bišā' dao', che'enda' ānezele de'e nga, len beṇāchān' žalnez chde tža na' lechḡuale sša čhsa'aquene' tmil iz, pero caguā can' len Ḫancho Diozān'. ⁹ De'en cuiṇā' yidā Jesocristān' de'e yoblā balā beṇā' chso'one' xbab cui gon Ḫancho Diozān' can' bene' lyebe, pero yidā Jesocristān' catā'an āžin or che'enā'. De'en nape' yelā' chxenlažā' len yoguā' chio'o beṇāch cui le'e chontie' chio'o castiḡw. Čhene'ene' yedinjecho xtolā'āchon' na' bito čhene'ene' cuiayi' notā'atezcho.

¹⁰ Na' can' cho'o beṇā' bḡuannā' liž beṇā' še'elā čzenyale'ene', leczā can' gaquā che beṇā' ca' cui chso'onlilažā' Ḫancho Jesocristān' catā' āžin ža yide' de'e yoblā. Nach gaquā to sšag xen la' te che yoguā' de'e ca' chle'icho le'e yoban', na' te che yežlyon' len yoguā' de'e zjade laogüēn' čhedā' yoguā'an āse'eyān, xte yesyā'anit de'e ca' chle'icho le'e yoban'.

¹¹ Laogüē de'en nezecho yesyā'anit yoguā' de'e ca', cheyalā' gon cuiṇcho lažā' na' Diozān' na' sotezā socho ḡüē'ela'ochone'. ¹² Na' cheyalā' cuezcho batā'āquān' āžin ža babžia Diozān' bia' yidā Jesocristān' de'e yoblā, na' goncho

par yob gaquən. Nach yoguə' de'en chle'icho le'e yoban' əse'eyən na' tant yi' gual gaquən xte yesyə'əyonə'ən na' yesyə'ənitən. ¹³ Pero na' zocho lez gaquə le'e yoban' de'e cobə na' gaquə yežlyon' de'e cobə gan' nitə' porzə beṇə' zjənaquə beṇə' güen lao Diozən', can' none' lyebe gaquə.

¹⁴ De'e na'anə' beṇə' bišə' dao', laogüe de'en zocho lez gaquə yoguə' de'e ca', cheyałə' goncho xte ga zelao saquə'əcho par nič catə'ən yidə' Jesocristən' de'e yoblə' bitobi manch da' chen la'azda'ochon' na' par nič ca' bitobi xtolə'əcho de na' chzo chbezcho binlo len Diozən'. ¹⁵ Na' de'en napə' Xancho Diozən' yełə' chxenlažə' len chio'o benəč cui le'e chontie' chio'o castigw. Chone' ca' par nič baltezcho yedinjecho xtolə'əchon' cui yeyejcho lao yi' gabilən'. Leczə can' babzoj beṇə' bišə'əda'əcho Pabən' le'e, čhedə' Diozən' bnežjue'ene' yełə' sin'. ¹⁶ Leczə ca' yoguə' cart čhe' ca' chso'en dižə' čhe de'e ca' babzoja' le'e. Na' le'e cart ca' de'en bzoj Pabən' zjəlen de'en naquə zdebə' šejni'icho. Na' balə beṇə' cuiṇə' se'ejni'ine' bi zeje de'e ca' na' šayečə' šayen chsa'aque' len xtižə' Diozən'. Chse'ejni'ine' clelə de'en bzoje'enə' can' chso'one' len bitə'ətezəchlə Xtižə' Diozən' de'en nyojən. Na' de'en chso'one' ca' yesə'əbiayi'e.

¹⁷ De'e na'anə' beṇə' bišə' dao', laogüe de'en baṇezele can' chso'on beṇə' ca', cheyałə' gaple cuidad par nič cui šejle'ele dižə' güenlažə'ənə' bitoch sole čheč talenle de'en naquə de'e li. ¹⁸ Legüe' latjə gaquəlen Xancho Jesocristən' le'e par nič gaquəch yichjla'azda'olen' can' naquə yichjla'azda'ogüe'enə' na' le'e šejəch gombia'achle Xancho Jesocristən' ben' babebej chio'o xni'a de'e malən'. Ledoye'ela'oche' ŋa'a na' zejlicane. Na' ca'ašgaczən' gaquə.

De'e na'azən' de'e chzoja'. *Bed*

Cart Nech De'en Bzoj San Juannə'

Jesocristan' chone' yelə' mban zejlicane

¹ Chyixjue'ida' le'e che Jesocristan' ben' naquə Dižə'anə', ben' chon yelə' mban zejlicanen'. Bazocze' catə'an gwxe yežlyon'. Neto' apostol bzenagto' xtiže'enə', ble'ito'one', bgüiato'one' na' gwdanto'one'. ² Le'enə' golje' beṇəch na' ble'ito'one' na' cho'eto' dižə' de que mbancze' zejlicane. Na' chyixjue'ida' le'e de que le' zoe' len Xacho Diozən' na' bedəsoe' len chio'o beṇəch. ³ Ben' ble'ito' na' bzenagto' xtiže'enə', che le'enə' chyixjue'ida' le'e par nič tozə can' goncho xbab. Na' catə' tozə can' gon chio'o xbabən' cana'ach gonle xbab ca xbabən' chon Xacho Diozən' na' len Xi'ine' Jesocristan' chedə' xbab cheto' zjənaquan tozə len xbab chega'aque'enə'. ⁴ Na' chzoja' le'e cart nga par nič ca' sole mbalaz juisy.

Diozən' len yelə' chon de'e güen che'enə' naque' ca be'eni'

⁵ Bzenagto' be' Jesocristan' dižə' na' chyixjue'ito' le'e can' gwne' de que Diozən' len yelə' chon de'e güen che'enə' naque' ca be'eni'. Ni latə'əzə de'e mal cui chone'. ⁶ Na' šə nacho de que xbab chechon' naquan tozə len xbab che Diozən' pero ne'e chdaczcho choncho de'e malən', con chonlāžə'əchon', na' cabi zdalencho de'e lin'. ⁷ Diozən' naque' ca be'eni' chedə' chdalene' de'e güen. Na' šə chio'o leczə chdalenchö de'e güenə', nachən' tozə naquə xbab chechon' tocho yetocho. Na' šə chdalenchö de'e güenə' yichjla'ažda'ochon' nactezə naquan xi'ilažə' chedə' Jesocrist Xi'in Diozən' blalj xchene'enə' par beque'e yoguə'əte xtolə'əchon' catə'an gwso'ote'ene'.

⁸ Šə nacho cabi bi xtolə'əcho de, chxoayagzə cuinchon' na' cabi cho'echo dižə' li. ⁹ Pero catə' chxoadolə'əcho lao Diozən' ca naquə de'e mal ca' de'en chonchon', chezi'ixene' che xtolə'əchon' na' chnitlaogüe' yoguə'əlolte de'e mal de'en chonchon' chedə' la' chone' complir can' ne'enə' na' lican' zde'. ¹⁰ Šə nacho bito bi de'e mal ne'e goncho, choncho Diozən' ca to beṇə' güenlāžə' na' cabi zdalenchö xtiže'enə'.

2

Cristən' chne' fabor chio'o chonlāžə'əchone' lao Diozən'

¹ Xi'indaogua'a, chzoja' le'e cart nga par nič cui gonle de'e malən'. Pero na' šə no chio'o goncho de'e malən', zo beṇə' chne' fabor chio'o lao Xacho Diozən', le'enə' Jesocristan' ben' zdaczə licha. ² Gwdixjue' xtolə'əchon' par nič chio'o chonlāžə'əchone' zocho binlo len Diozən'. Na' caguə xtolə' chio'o na'azənə' gwduxjue' sino xtolə' yoguə'əlol beṇəchən'.

³ Na' šə choncho can' non Diozən' mendadən' nezecho de que banombi'achone'enə'. ⁴ Šə nacho de que nombi'achone' na' cabi choncho can' none' mendadən', naccho beṇə' güenlāžə' na' bito zdalenchö dižə' lin'. ⁵ Pero nezecho ngodə'əcho txen len Diozən' šə choncho con can' ne'enə'. Na' catə' choncho con can' ne'enə' de'e liczə chaquecho che' can' cheyalə'. ⁶ Šə nacho de que zotezə zocho len Diozən', cheyalə' sotezə socho goncho de'e güen can' ben Jesocristan'.

De'en non Cristən' mendə goncho

⁷ Benə' bišə', chzoja' le'e par əni'a' de'en non Cristən' mendad goncho. De'en none' mendad goncho caguə naquən de'e cobəna' sino de'e nezczele dezd catə'an gwzolaə chonliləzə'əlene' na'anə'. Guaquə ənacho de que naquən de'e golə chedə' leczənnə' babenele bedote. ⁸ Pero leczə guaquə ənacho de que de'en none' mendad goncho de'en chzoja' chei nga naquən de'e cobə chedə' babla' be'eni' che Cristən' len be'nachən' na' de'e malən' de'en gwxaquə'əlebe ca de'e žčholən' bachzolaə chde chei. Cristən' blo'ine' chio'o de que chaquene' checho. De'e na'anə' nezecho naquən de'e žialao xen gaque che ljuəžjcho can' none' mendadən'.

⁹ Šə nacho de que yo'o be'eni' che Cristən' lo'o yichjla'ažda'ochon' pero šə chgue'i ljuəžjcho, ne'e nchol yichjla'ažda'ochon'. ¹⁰ Na' šə chaquəcho che ljuəžjcho yo'oczə be'eni' che Cristən' lo'o yichjla'ažda'ochon' na' bitoljə əxopcho goncho de'e malən'. ¹¹ Pero šə zochə chgue'i ljuəžjcho, nchol yichjla'ažda'ochon' na' zdalenczcho de'e malən'. Na' šə can' choncho, bito choncho xbab gan' yežincho chedə' nchol yichjla'ažda'ochon' por ni che de'e mal de'en chonchon'.

¹² Chzoja' le'e xi'indaogua'a chedə' Diozən' babezi'ixene' checho laogüe de'en bagwdixjw Jesocristən' xtolə'əchon'. ¹³ Chzoja' le'e xaxna' bi'i xcuidə' chedə' nombi'ale Jesocristən' ben' bazoczə catə'an gwxe yežlyon'. Chzoja' le'e be'nə' güego' be'nə' cheban chedə' bach gwzoile cui chejle'ele che gwxiye'enə'.

Chzoja' le'e bidao' bi'i xcuidə', chedə' banombi'ale Xacho Diozən'. ¹⁴ Chzoja' le'e xaxna' bi'i xcuidə' chedə' banombi'ale Jesocrist ben' bazoczə catə'an gwxe yežlyon'. Leczə chzoja' le'e be'nə' güego' be'nə' cheban chedə' bachčinle fuers balor de'en chon Cristən' par yichjla'ažda'ochon'. Ngo'o yichjtezle Xtizə' Diozən' na' bagwzoile cui chejle'ele che gwxiye'enə'.

¹⁵ Bito seləžə'əle gacle tozə len be'nə' ca' cui zjənombia' Diozən', na' leczə bito seləžə'əle gonle can' chso'one'enə'. Notə'ətezcho šə chzelažə'əcho goncho can' chso'on be'nə' ca' cui zjənombia' Diozən', bitonə' gaquəcho che Xacho Diozən'. ¹⁶ Be'nə' ca' cui zjənombia' Diozən' chso'one' de'e mal de'en chzelažə' la'ažda'omalga'aque'enə', na' chso'one' de'e mal de'en chəsə'əzelažə'e so'one' por ni che šə bi de'en chəsə'əle'ine', na' leczə chsa'aləžə'e. Yoguə' de'e ca' chso'one' bito za'aquən che Xacho Diozən', sino za'aquən che gwxiye'enə'. ¹⁷ De'e te chei yežlyo nga na' leczə de'e te chei de'e ca' chəsə'əzelažə' be'nə' ca' cui zjənombia' Diozən'. Pero šə choncho can' chene'e Diozən' nachən' socho zejlicane.

Nezecho de'en naquə de'e li

¹⁸ Xi'indaogua'a, bazon əžin ža əžin or yidə ben' gonchgua contr Cristən'. Babzeneto' le'e de que zə'e, na' na'a be'nə' zan bachso'one' contr Cristən'. De'e nan' nezecho bazon əžin ža əžin or yidə be'enə' gonchgua contr Cristən'. ¹⁹ Entr chio'onə' besə'əchoj be'nə' ca' chso'on contr Cristən', caguə do lažə'əga'aque'enə' gwso'one' txen len chio'o. Žalə' do lažə'əga'aque' gwso'one' txen len chio'o, ne'e nite'e len chio'o žalə' ca'. Pero besə'əchoje' par nič bla'alaon de que caguə de'e li zjənaque' chio'o txennə'.

²⁰ Pero na' Cristən' babene' le'e Spirit che Diozən' can' babene' len neto'. De'e na'anə' yoguə'əcho nezecho can' na Xtizə' Diozən'. ²¹ De'e nga babzoja' le'e chedə' nombi'ale dižə' li che Diozən'. Bito ənacho cui nezecho de'en naquə de'e lin'. Na' nezczecho bitobi de'e güenləžə' nsa' Xtizə' Diozən'.

²² Be'nə' güenləžə'əno' ben' na che Jeso'osan' de que caguə le'enə' Cristən' Xi'in Diozən', chedə' chzoe' Xacho Diozən' ca'alə na' len Xi'ine'enə'. Be'enan' chon contr Cristən'. ²³ Notə'ətezə be'nə' chzo Xi'in Diozən' ca'alə, bito zo Xacho

Diozən' len le'. Ben' nezene' na' cho'e dižə' de que Jeso'osən' naque' Xi'in Dioz, zo Xacho Diozən' len le'.

²⁴ Le'e gontezə legon xbab che de'e ca' babzeneto' le'e dezd catə'an gwzoloa chonlilažə'əle Cristən'. Šə ca' gonle, sotezə sole len Xacho Diozən' na' len Xi'ine'enə'. ²⁵ Na' de'e nga ben Jesocristən' lyebe len chio'o, de que gone' chio'o yelə' mban zejlicən'.

²⁶ De'e ngan' babzoja' le'e bi'a dižə' che beņə' ca' chse'ene'e yesə'əxoayag le'e. ²⁷ Jesocristən' babene' le'e Spirit che Diozən' na' zotezə zon chzejni'in le'e yoguə'ələl de'en cheyalə' nezele che cuine'. Dižə' lin' choe' Spiritən', bito chonlilažə'an. Na' de'en zon chzejni'in le'e, bito chyažjele nochlə gwsede le'e par ənezele bin' naquə de'e li. De'e na'anə' lesotezə leso len Jesocristən' can' babsed bablo'i Spiritən' le'e.

²⁸ Na' na'a xi'indaogua'a, cheyalə' sotezə socho len Jesocristən' par nič catə'an yide' de'e yoblə cui žebcho na' cui gwcuašə'əchone' yeto'icho catə'an le'ichone'. ²⁹ Ca naquə nezele de que Jesocristən' zdacze' licha, le'egatezə ca' cheyalə' ənezele de que yoguə'əcho šə zotezə zocho choncho de'e güen naccho xi'in Dioz.

3

Naquən' goncho šə naccho xi'in Dioz

¹ Le'e gonšc xbab catequən' chaque Xacho Diozən' checho. Lechguale chaquene' checho ca de'en bene' par nič guaquə əne' xi'ine' chio'o. Beņə' ca' cui zjənombia' Diozən' bito chse'ejni'ine' de que naccho xi'in Dioz, chedə' cabi chse'ejni'ine' non' naquə Diozən'. ² Le'e beņə' chacda' chei, chio'o chonlilažə'əcho Jesocristən' bač naccho xi'in Dioz. Na' bito ne'e la'alao naquən' gaccho, pero na' nezecho catə'an Jesocristən' yide' de'e yoblə, le'icho can' naque'enə' na' gone' par nič gaquə yichjla'ažda'ochon' can' naquə yichjla'aždaogüe'enə'. ³ Na' to tocho šə zocho lez de que Diozən' gone' par nič gaquə yichjla'ažda'ochon' can' naquə yichjla'aždao' Jesocristən', goncho par nič la'ažda'ochon' gactezə gaquən xi'ilažə' ca xi'ilažə'an naquə la'aždao Jesocristən'.

⁴ To tocho šə choncho de'e mal bito chzi'icho can' na Diozən', chedə' de'e mal de'en chonchonə' chonən contr can' na Diozən'. ⁵ Na' nezecho de que Jesocristən' bide' par beque'e xtolə'əcho ca', na' caguə bi xtolə' le' denə'. ⁶ To tocho šə zotezə zocho len le', bito choncho de'e mal. Na' to tocho šə choncho de'e malən, bito ne'e šejni'icho non' naquə Jesocristən', nic ne'e gombi'achone'. ⁷ Xi'indaogua'a, bito güe'echo latjə no əxoayag chio'o. Šə choncho can' cheyalə' goncho, zdacho licha can' zda Jesocristən'. ⁸ Šə yo'olaocho choncho de'e malən naccho xi'in gwxiye', chedə' gwxiye'enə' naquən güen de'e mal dezd nechte. Na' bidə Xi'in Diozən' par chnitlaogüe' de'en chon gwxiye'enə'.

⁹ To tocho šə naccho xi'in Dioz bito yo'ola'ocho goncho de'e mal, chedə' la' Diozən' babocobe' yichjla'ažda'ochonə' par nič bagwzoloa chaquən ca yichjla'aždaogüe'enə'. Na' bitoch gaquə sotezcho goncho de'e malən chedə' xi'in Dioz chio'o. ¹⁰ De'e nga chlo'en non' xi'in Diozən' na' non' xi'in gwxiye'enə'. Notə'atezcho šə cui zocho choncho de'e güen, bito naccho xi'in Dioz. Na' notə'atezcho šə cui chaque che ljuežjcho, bito naccho xi'in Dioz.

Cheyalə' gaque che ljuežjcho

¹¹ Na' dižə' nin' babenele dezd gwzoloa chonlilažə'əle Cristən', de que cheyalə' gaque che ljuežjcho tocho yetocho. ¹² Cui goncho can' ben Cainnə',

goque' xi'in gwxiye'enə' na' bete' beṇə' biše'enə'. ¿Enezele bixchen' bete'ene' za? Bete'ene' chedə' biše'enə' bene' de'e güen na' le' gwyejlene' de'e malən'.

13 Beṇə' bišə', bito yebanele šə beṇə' ca' cui zjənombia' Diozən' chəsə'əgue'ine' le'e. 14 Na' ca naquə' chio'o ža, de'en chaquecho che ljuežjcho nachən' nezecho bitoch naccho len yichjla'ažda'ochon' ca beṇə' guat. De yelə' mban zejlicane checho na'a. Pero šə cui chaque che ljuežjcho nachən' ne'e naccho ca beṇə' guat len yichjla'ažda'ochonə'. 15 Nota'atezcho šə chgue'i ljuežjcho, lao Diozən' naccho beṇə' güet beṇə'. Na' nezecho de que ni to beṇə' güet beṇə' bito de yelə' mban zejlicane che'. 16 De'en chaque Jesocristən' checho na' bsanlažə' cuine' por ni checho catə'an gwso'ote'ene', de'e na'ana' nezecho can' cheyalə' gaque che ljuežjcho. Šə chonən byen cheyalə' gwsanlažə' cuincho gatcho par gaquəlen beṇə' ljuežjcho. 17 Šə bade de'e de checho na' nezecho de que ljuežjchon' chyažjene'en gwchine'en, na' šə bito cheyašə'əchone', bito gaquə əṇacho de que chaquecho che Diozən'. 18 Xi'indaogua'a, bito cheyalə' gaque che ljuežjcho de dižə'əza, sino cheyalə' gaque che ljuežjcho do yichj do lažə'əcho na' gaquəlen ljuežjcho.

Bito chžebcho Diozən'

19-20 Nezecho de que naccho xi'in Dios ben' choe' dižə' li šə chaque che ljuežjcho do yichj do lažə'əcho. Na' šə chchoj catə' choncho xbab lo'o yichjla'ažda'ochon' de que bito zaquə'əcho par əṇa Diozən' xi'ine' chio'o, cheyalə' əgwzenaguə'chcho che Diozən' cle ca che xbab chechon'. Diozən' nombi'e yichjla'ažda'ochon', na' yelə' beṇə' xenlažə' che'enə' bagwcue'e chio'o ca xi'ine'. 21 Le'e beṇə' chacda' chei, šə lo'o yichjla'ažda'ochon' nezecho de que bito napcho dolə', bito chžebcho Diozən'. 22 Na' bitə'ətezə de'e əṇabechone' goncze'en chedə' la' choncho can' none' mendadən' na' can' chazlaže'enə'. 23 Na' de'e nin' de'en none' mendad goncho, gonlilažə'əcho Xi'ine' Jesocristən', na' gaque che ljuežjcho tocho yetocho can' none' mendadən'. 24 Šə choncho can' none' mendadən' zotezə zocho len Diozən' na' Diozən' zotezə zoe' len chio'o. Na' nezecho de que le' zotezə zoe' len chio'o chedə' babene' chio'o Spirit che'enə' zon lo'o la'ažda'ochon'.

4

Caguə' yoguə' beṇə' yo'o Spirit che Diozən' lo'o yichjla'ažda'oga'aque'ena'

1 Le'e beṇə' chacda' chei, bito šejle'ele xtižə' nota'ətezə beṇə' ne' de que zo Spirit che Diozən' lo'o yichjla'aždaogüe'ena', sino legonga'aque' prueb šə zo Spirit che Diozən' lo'o yichjla'ažda'oga'aque'ena'. Zan beṇə' bachaš yežlyo nga chso'onlaže'e chəsə'əne' de que chəsə'əyixjui'e de'en bagož Diozən' lega'aque'. 2 Quinga guaquə goncho prueb par ənezecho šə zo Spirit che Diozən' lo'o yichjla'aždao' beṇə': Yoguə' beṇə' chso'e dižə' chəsə'əne' de que Jesocristən' naque' Dios na' golje' beṇə'ch yežlyo nga, nezecho yo'o Spirit che Diozən' lo'o yichjla'ažda'oga'aque'ena'. 3 Beṇə' ca' cui chso'e dižə' de que Jesocristən' naque' Dios na' golje' beṇə'ch yežlyo nga, bito yo'o Spirit che Diozən' lo'o yichjla'ažda'oga'aque'ena' na' chso'one' contr Cristən' len xbab chega'aque'ena'. Babzeneto' le'e de que yidə beṇə' gonchgua contr Cristən', na' na'a banitə' beṇə' yežlyo nga chso'one' ca'.

4 Xi'indaogua'a chzoile cui chejle'ele xtižə' beṇə' ca' chso'onlažə' chəsə'əne' chəsə'əyixjui'e de'en bagož Diozən' lega'aque'. Chio'o naccho xi'in Dios bagwzoicho cui chejle'echo chega'aque' chedə' Diozən' ben' zo len chio'o

chnabi'ache' ca gwxiye'enə' de'en zo len beṇə' ca' cui chse'ejle'e che Diozən'.
 5 Beṇə' ca' cui choso'ozenag che Diozən' choso'ozenague' che ljuežjga'aque' chedə' yogue'e chso'e dižə' de'en chazlažə' la'ažda'omalga'aque'enə'.
 6 Chio'o naccho xi'in Dios na' yeziquə'ačhlə beṇə' ca' zjənobmbia' Diozən' choso'ozenague' checho, na' beṇə' ca' cui zjənaquə xi'in Dios bito choso'ozenague' checho. Can' chac nezecho noquə' beṇə' ca' yo'o lo'o yichjla'ažda'oga'aque'enə' Spirit che Diozən' de'en choe' dižə' li na' noquə'əga'aque'enə' yo'o lo'o yichjla'ažda'oga'aque'enə' gwxiye'enə' de'en choe' dižə' gūenlažə'.

Diozən' chaquene' che beṇəchən'

7 Le'e beṇə' chacda' chei, cheyalə' gaque che ljuežjcho tocho yetocho chedə' Diozən' chone' par nič chio'o naccho xi'ine' chaque che ljuežjcho. Na' šə chaque che ljuežjcho naccho xi'in Dios na' nombi'achone'. 8 Šə cui chaque che ljuežjcho, bitonə' gombi'acho Diozən' chedə' bito choncho can' chone'enə'. Diozən' chaquene' che beṇəchən'. 9 Na' blo'e can' chaquene' checho ca de'en bsele'e Xi'ine' tlišə'ənə' yežlyo nga par nič gatə' yelə' mban zejlicane che notə'ətezcho gonlilažə'əchone'. 10 Bito goquecho che Diozən', lelen' goquene' checho na' bsele' Xi'ine'enə' gwduxjue' xtolə'əchon' par nič gaquə socho binlo len Diozən'. Can' chaque Diozən' checho.

11 Le'e beṇə' chacda' chei, can' chaque Diozən' checho, lecəə can' cheyalə' gaque che ljuežjcho tocho yetocho. 12 Notono zo beṇə' bable'ine' Diozən'. Pero šə chio'o chaque che ljuežjcho tocho yetocho, Diozən' zotezəə zoe' len chio'o na' chaquecho che' can' cheyalə'. 13 Nezecho de que zotezəə zocho len le' na' le' zotezəə zoe' len chio'o chedə' Spirit che' nan' bsele'e par nič zon lo'o yichjla'ažda'ochon'. 14 Na' neto' apostol nezetə' na' cho'eto' dižə' de que Xacho Dios na'anə' bsele' Xi'ine'enə' par nič yoguə' no so'onlilažə' le' cui žjəya'aque' lao yi' gabilan'. 15 Na' šə cho'echo dižə' de que Jeso'osən' naque' Xi'in Dios, Diozən' zotezəə zoe' len chio'o na' chio'o zotezəə zocho len le'.

16 Na' chio'o baṇezecho na' chejle'echo ca naquən' chaque Diozən' checho. Diozən' chaquene' che beṇəchən' na' šə zotezəə zocho chaquecho che Diozən', nachən' zotezəə zocho len Diozən' na' le' zotezəə zoe' len chio'o. 17 Bachaquecho che Diozən' can' cheyalə' gaquecho che' šə zotezəə zocho chaquecho che' do tyemp. Šə choncho ca' bito žebcho catə' əžin ža choglaogüe'en che yoguə' chio'o beṇəch šə nocho napcho dolə', chedə' can' naquə yichjla'aždao' Jeso'os na'anə' can' banaquə yichjla'ažda'ochon' na'a zocho yežlyo nga. 18 Šə chaquecho che Diozən' can' cheyalə'ənə' bito bi de de'e žebcho, la' ca to castigon' naquən' checho chžebcho. Na' šə de bi de'e chžebcho, bito chaquecho che Diozən' can' cheyalə'ənə'.

19 Chio'o chaquecho che Diozən' chedə' zgua'atec le'enə' gwzolaogüe' chaquene' checho. 20 Šə nacho de que chaquecho che Diozən' na' chgue'itei ljuežjcho, chonlažə'əchonə'. ¿Nacxa gonchonə' par gaquecho che Diozən' ben' cui chle'icho? len chle'itei ljuežjcho na' cui chaquecho chega'aque'. 21 De'e ngan' non Diozən' mendad gon chio'o chaquecho che', lecəə cheyalə' gaquecho che ljuežjcho.

¹ Notá'atezcho naccho xi'in Dioz šə chejle'echo de que Jeso'os nan' Cristən' ben' naquə Dioz. Na' yoguə'əcho šə chaquecho che Xacho Diozən' le'egatezəcə can' gaquecho che ljuəžjcho, la' leczə xi'in Dioz ljuəžjcho ca'. ² Chio'o naccho xi'in Diozən' nezecho de que chaque che ljuəžjcho chedə' chaquecho che Diozən' na' choncho can' none' mendad. ³ Šə chaquecho che Diozən', choncho can' none' mendadən'. Na' de'en none' mendad goncho bito naquan zdebə gonchon. ⁴ Šə naccho xi'in Dioz chzoicho chcuizə'əcho de'e malən' de'en de yežlyo nga par cui chonən chio'o gan. Na' de'en chonlilažə'əcho Jeso'osən' de'e na'anə' chzoicho chcuizə'əcho de'e malən' de'en de yežlyo nga par cui chonən chio'o gan. ⁵ Caguə nochlə chzoi chcuizə' de'e malən' de'en de yežlyo nga par cui chonən le' gan sino chio'o chejle'echo de que Jeso'os nan' naque' Xi'in Diozən'.

Diozən' cho'e dižə' de que Jesocristən' naque' Xi'ine'

⁶ Jesocristən' bide' yežlyo nga gwchoe' nis na' blalj xchene'enə' catə'an gwso'ote'ene'. Caguə bide' na' con gwchoaze' nisən', sino leczə blalj xchene'enə' catə'an gwso'ote'ene'. Na' Spirit che Diozən' cho'en xtižə'enə' na' dižə' de'en cho'en naquan de'e li. ⁷ Šonə testigw nitə' yoban' chso'e dižə' che Jesocristən', Xacho Diozən' na' ben' naquə Dižə'anə', na' Spirit che Diozən'. Na' tozə can' na Xacho Diozən' len can' na ben' naquə Dižə'anə', na' len can' na Spirit che Diozən'. ⁸ Leczə šonə testigw nitə' yežlyo nga, Spiritən' cho'en dižə' che Jesocristən'. Na' de'en gwchoa Jesocristən' nisən' leczə cho'en dižə' che'. Na' de'en blalj xchene'en catə'an gwso'ote'ene' le'egatezə chezo'en dižə' che'. Na' dižə' de'en chsoe' de'e quinga chotilən len dižə' de'en choe' Spiritən'. ⁹ Chejle'echo xtižə' benəchən', len la' zaquə'əche xtižə' Diozən' de'en cho'e ne' de que Jesocristən' naque' Xi'ine'enə'. ¹⁰ Šə chonlilažə'əcho Xi'in Diozən', Diozən' cho'e dižə' che Xi'ine'enə' lo'o yichjla'ažda'ochonə'. Šə cui chonlilažə'əcho Diozən' chonchone' ca benə' güenlažə' chedə' cui chejle'echo dižə' de'en cho'e che Xi'ine'enə'. ¹¹ Dižə' nga choe' Diozən', de que babene' par nič de yelə' mban zejlicane che nota'atezcho ngodə'əcho txen len Xi'ine'enə'. ¹² De'e na'anə' šə chonlilažə'əcho Xi'in Diozən' de yelə' mban checho zejlicane. Na' sə cui chonlilažə'əchone' ža, bito de yelə' mban zejlicane checho.

Can' beyož cart nga de'en bzoj Apostol Juannə'

¹³ Cart nga babzoja' le'e bachonlilažə'əle Xi'in Diozən' par nič ənezele de que de yelə' mban zejlicane chele.

¹⁴ Na' bito chžebcho goncho orasyon lao Diozən', chedə' la' Diozən' chzenagcze' checho con šə de'en chnabechone' naquan de'e zaquə' nabechone'.

¹⁵ Na' ca naquan nezecho de que le' chzenague' checho bitə'ətezə de'en chnabechone', leczə ca' nezecho de que gone' de'en bagwnabechone'enə'.

¹⁶ Šə nezecho to benə' ljuəžjcho benə' chonlilažə' Cristən' chone' de'e mal, cheyalə nabecho Diozən' gaqualene' le', na' Diozən' gone' par nič yezoe' binlo len le' de'e yoblə. Can' goncho par benə' chso'on de'e malən' de'en cui naquan par žjəya'aclene'en lao yi' gabilən'. De de'e mal de'en chso'on benə' de'en žjəya'aclene' lao yi' gabilən', na' bito nia' ənabecho Diozən' gaqualene' benə' chso'on len. ¹⁷ Chio'o benəch napcho dolə' šə choncho bitə'ətezə de'e mal. Pero de de'e mal de'e choncho de'e cui chonən par yeyejcho lao yi' gabilən'.

¹⁸ Nezecho de que nota'atezcho šə naccho xi'in Dioz bito choncho de'e mal, chedə' Jesocrist Xi'in Diozən' chcuasə' chcue'eje' chio'o nič gwxiye'enə' cui chzoin chio'o par šejle'echo chei.

¹⁹ Na' nezecho de que chio'o naccho xi'in Dios, pero na' ca naquə yoguə'əlo' be'ə' ca' cui choso'ozenag che Diozən', lega'aque' nite'e xni'a gwxiye'enə'.

²⁰ Na' nezecho de que Xi'in Diozən' babide' na' bagwlo'o be'eni' che'enə' lo'o yichjla'ažda'ochon' nich nombi'acho Diozən' ben' zaquə' par güe'ela'ochə. Na' ngodə'əcho txen len Diozən' laogüe de'en ngodə'əcho txen len Xi'ine' Jesocristən'. Dios na'anə' zaquə'əcze' par güe'ela'ochone'. Le' chone' yelə' mban zejlicanən'. ²¹ Xi'indaogua'a bito nochlə šejni'alažə'əle mas que tozə Diozən' len Xi'ine' Jesocristən'.

De'e na'azən' chzoja' n'a. *Juan*

Cart Egwchope De'en Bzoj San Juannə'

Nombi'acho de'en naquə de'e li na' cheyalə' gaque che ljuəžjcho

¹ Diozən' gwleje' nada' par cho'a xtiže'enə' len le'e. Na' lao yelə' beṇə' golə' chia' chzoja' le' no'olə' len xi'ino' ca'. Diozən' gwleje' le'e par žjəyazole len le'. De'e li' chacda' chele, na' caguə toza' nada'anə', lenczə yoguə'əlo' beṇə' ca' yelə' beṇə' ca' bazjənombi'e de'en naquə de'e li. ² Chaqueto' chele chedə' chio'o nezecho de'en naquə de'e li na' talenchon zejlicane. ³ Chnaba' lao Xacho Diozən' na' Xi'ine' Xancho Jesocristən' sa'aclenšgue' le'e na' yesyə'əyašə' yesyə'əži'ilažə'əšgue' le'e na' so'onšgue' ca so cuezle binlo len xbab de'en yo'o lo'o yichjla'ažda'olen' chedə' la' nombi'ale de'en naquə de'e li na' chaquəle che ljuəžjle tole yetole.

⁴ Lechguale bebeida' catə' gwnežda' de que balə xi'ino' ca' chso'one' can' ben Xacho Diozən' mendad goncho, əzja'aque' choso'ozenague' che de'en naquə de'e li. ⁵ Na' de'e cheyalə' goncho no'olə, gaque che ljuəžjcho tocho yetocho, la' can' non Diozən' mendad goncho. Ca de'e nga nia' cheyalə' goncho, caguə naquən ca to mendad cobənə', de'e nezczecho dezd gwzolaochon chonlilažə'əcho Cristən'. ⁶ De'e ngan' goncho šə' chaquecho che Diozən', goncho can' none' mendadən'. Catə'an gwzolaochon lilažə'əle Cristən' canan' gwnezele de que none' mendad gaque che ljuəžjcho.

Zan beṇə' goxoayag chsa'aš yežlyo nga

⁷ Zan beṇə' goxoayag babesə'əchoj entr chio'o na' chaše' yežlyo nga. Lega'aque' chso'e dižə' chesə'əne' de que Jesocristən' ben' bidə' na' golje' yežlyo nga bito naque' Dioz. Beṇə' can' zjənaque' beṇə' goxoayag na' chso'one' contr Cristən'. ⁸ Bito šejle'ele chega'aque', la' šə' šejle'ele chega'aque' bito si'ile yelə' bala'an' de'en chene'e Diozən' gone' le'e laogüe de'en beṇle xšine'enə'. Legon par nič si'ile doxen yelə' bala'an' de'en chene'e Diozən' gone' le'e.

⁹ Notə'ətezcho šə' chbejyichjcho de'en bsd əblo'i Cristən' na' chca'acho nez yobla, bito zo Diozən' len chio'o. Pero šə' zotezə zocho chzenagcho che de'en bsd əblo'i Cristən', Xacho Diozən' len Xi'ine'enə' nite'e len chio'o. ¹⁰ Šə' no beṇə' yide' gan' zole par əgwšed əgwlo'ine' le'e, pero bito əgwšed əgwlo'ine' ca de'en bsd əblo'i Cristən', bito əggüialaolene' ližlena', na' bito ye'elene': "Gwyo'o ngalə beṇə' bišə'." ¹¹ Šə' ye'echo le': "Gwyo'o ngalə beṇə' bišə'", zejen de que txennə' choncho de'e malən'.

Gone'ene' žjəlane'e lega'aque'

¹² De'e zan de'en de ənia' le'e, pero bito che'enda' gwzojəcha'an le'e yiš chedə' yida' gan' zolenə' na' socho txen güe'elena' le'e dižə' cho'a par nič socho mbalaz juisy.

¹³ Xi'in' no'olə' bilo'onə' chəsə'əguape' le'e diox beṇə' ca' leczə bagwlej Diozən' par žjəsyə'ənite'e len le'. De'e na'azən' chzoja' n'a. *Juan*

Cart Egwyone De'en Bzoj San Juannə'

Apostol Juannə' ne' de que Gayon' chone' güen

¹ Diozən' gwleje' nada' par cho'a xtiže' enə' len le'. Na' lao yelə' beñə' gola chia' chzoja' le' Gayo dao'. De'e li chacda' chio'.

² Gayo dao', chnaba' lao Diozən' de que syempr gaquə de'e güen len le', na' so' güen ca güennə' zo' lo'o yichjla' aздаого' onə'. ³ Lechgualə bebeida' catə' besyə' ala' ac balə beñə' bišə' acho ca' na' gwso'e dižə' can' chono' le' banone chio' de'e lin' na' bazdaleno' on. ⁴ Bito bi bichlə de'e de de'e chebeida' ca de'e nga nežda' zdalenle de'e lin', le' na' len beñə' ca' yelə' nacle ca xi' ina'.

⁵ Le' Gayo dao', catə' chacleno' beñə' bišə' acho ca' beñə' zjənaquə beñə' zita', chono' can' cheyalə' gon chio' o chonlilažə' acho Jesocristən'. ⁶ Lega' aque' bagwso'e dižə' lao neto' chdopə chžagto' cho' elə' oto' Jesocristən' nga can' chacdo' chega' aque'. Na' batə' atežə chəsə' ala' aque' gan' zo' onə' cheyalə' güe' lega' aco' one' šə bi de'en chəsə' ayažjene' par yesyə' əgüe' e nezan' de'e yoblə. Can' cheyalə' goncho len yoguə' beñə' ca' chso' e xtižə' Diozən'. ⁷ Bito bi chəsə' əzi' e che beñə' cui chse' ejle' e che Jesocristən' lao chaše' chəsə' əyxjui' e xtižə' Jesocristən'. ⁸ Chio' o ža, cheyalə' gaquə lencho yoguə' beñə' bišə' acho ca' chaš ca' na' ca' goncho txen len lega' aque' ca de'en chəsə' əyxjui' e de'en naquə de'e li.

Juannə' gwne' de que Diotrefesən' bito chone' güen

⁹ Bač bzoja' le' e chdopə chžagle cho' elə' ole Jesocristən'. Pero Diotrefesən' chene' ene' gaque' le' ezelaogüe beñə' blao entr le' e na' bito chzenague' chia'.

¹⁰ De' e na' anə' šə yida' dezlana' a le' e, lao ndopə nžagle gona' par yosa' alažə' e can' chone' contr neto' lao yelə' güilj gwxañ dižə' che' enə'. Na' caguə de' e na' azən' chone'. Lečzə ca' bito chgüialaogüe' beñə' bišə' acho ca' liže' enə' na' catə' balə chene' ele ggüialaoga' aclene' ližlenə' chžone' ggüialaoga' aclene'. Na' le' e chene' ele ggüialaole lega' aque' enə', chebeje' le' e ladjo beñə' ljuežjle ca' chəsə' ədopə chəsə' əžag chso' elə' ogüe' e Jesocristən'.

¹¹ Le' Gayo dao', bito gono' de' e mal can' chso' on beñə' mal ca', con gonczo' de' e güennə'. Šə choncho de' e güen nacbia' naccho xi' in Dioz, pero šə choncho de' e mal bito ne' e gombi' acho Diozən'.

Juannə' be' e dižə' ca güennə' chon Demetrian'

¹² Yoguə' əlol beñə' chso' e dižə' güen che Demetrian'. Nla' alaon de que zdalene' de' e lin'. Le' egatežə ca' neto' cho' eto' dižə' can' chone' de' e güen. Na' nezele dižə' lin' cho' eto'.

Bene' xbab yesyə' əžaque' de' e yoblə

¹³ Bena' xbab gwzoja' le' de' e zan, pero bito che' enda' gwzojə' cha' an le' e yiš. ¹⁴ Chbeza' yežagcho lğüegwzə na' socho txen güe' elen ljuežjcho dižə' cho' a.

¹⁵ Sošgo' binlo len xbab de' en yo' o lo' o yichjla' aзда' ogo' onə'. Beñə' migw chio' on nitə' nga chəsə' əguape' le' diox. Bguapšga beñə' migw cheto' ca' diox to' e. De' e na' azən' chzoja' na' a. *Juan*

Cart De'en Bzoj San Jodasən

Chzoje' beṇə' ca' zjənaque' lažə' na' Diozən'

¹ Nada' Jodas naca' beṇə' güen žin che Jesocristán', na' naca' beṇə' bišə' Jacobən'. Chzoja' le'e bagwlej Xacho Diozən' par nacle lažə' ne'ena' can' bagwleje' nada', le'e chcuasə' chcue'ej Jesocristán' len de'e malən' can' chone' len nada'. ² Chona' orasyon lao Xacho Diozən' chṇaba' gone' ca gache'ichele can' cheyašə' cheži'ilaže'e le'e na' can' chone' par chzo chebezle binlo len xbab de'en yo'o lo'o yichjla'ažda'olen' na' can' chaquene' chele.

Beṇə' ca' choso'osed choso'olo'ine' dižə' güenlažə'

³ Xi'indaogua'a, bachonchgua' xbab naquən' gwzoja' le'e to cart gwzejni'ichda' le'e can' babebej Jesocristán' yoguə' chio'o chonlilažə'achone' xni'a de'e malən'. Pero na' babenda' yeto rson chele na' ṇa'a chonən byen chzoja' le'e chṇeyoida' le'e sole chech šejle'ele che dižə' li che Diozən'. Diozən' bene' par nič nyojən par chio'o bagwleje' nič naccho lažə' ne'ena', na' bito gwše'en. ⁴ Banitə' balə beṇə' entr le'e, beṇə' ca' chso'on txen len le'e pero caguə do lažə'əga'aque'ena'. Bito choso'ozenague' che Diozən' na' chəsə'əne' de que deczə ləns goncho bitə'ətezə yelə' zto' len cuerp chechon', chedə' nži'ilažə' Diozən' chio'o na' chezi'ixene' checho. Na' leczə chesə'əzoe' Xancho Jesocristán' ca'alə, len tozə le' zaque'e par nabi'e yoguə' beṇačən'. Cana'ate byoj Xtizə' Diozən' nan de que beṇə' ca' chso'on ca' yesə'əzi'e castigw che xtolə'əga'aque'ena'.

⁵ Na' la'ana'əczə banezele binlo can' goquən', che'enda' žjəsa'alaza'əle de que Diozən' bosle' beṇə' Izrael ca' lao na' beṇə' Egipto ca' cana' pero gwdechlə bnežjue' castigw che beṇə' ca' cui gwso'onlilaže'ene'. ⁶ Na' balə angl ca' bito gwsa'azlaže'e de'en gwlo'o Diozən' lao na'aga'aque' so'one', na' de'e na'ana' gosə'əbejyichje' gan' gwnite'ena'. Na' Diozən' gwlo'e lega'aque' lo'o yech gabil gan' naquə lechgualə žchol, na' zjənga'ane' xte catə'əch əžin ža xen catə' gwnežjue' castigw chega'aque'ena' zejlicane, la' zjənaque' pres che Diozən' zejlicane. ⁷ Nach beṇə' ca' gwnitə' syoda Sodoman' na' syoda Gomorran' na' syoda' ca' zjənyečj žjəmbi'i lega'aquən gwso'one' yelə' zto' len cuerp chega'aque'ena' na' besyə'əyiljeteze' ljuežj beṇə' byoga'aque' par nič gwso'one' yelə' zto' chega'aque'. Na' ca de'en ben Diozən' bsele'e yi'ina' bzeyən syoda ca' na' cuich no gwnitə' na', chosnisən beṇačən' de que yoguə' beṇə' cui choso'ozenag che Diozən' əsa'aque' castigw lao yi' gabilən' zejlicane.

⁸ Na' beṇə' ca' choso'osed choso'olo'i le'e dižə' güenlažə'əna' chso'one' can' gwso'on beṇə' Sodoma na' beṇə' Gomorra ca'. Chso'one' yelə' zto' che cuerp chega'aque'ena'. Bito chse'enene' nabiə' Diozən' lega'aque'. Choso'ožia choso'onite'e angl ca'. Chəsə'əne' de que besə'əle'idaogüe'ene' de'e nan de ləns par so'one' de'e ca'. ⁹ Ca naquə angl əblaonə' ben' le Miguel catə'an gocyoze' de'e gwxiye'en por cuerp che de'e Moisezən', bito beyaxjene' tile' de'e gwxiye'en de'en gwnen contr de'e Moisezən', con gože'en: "Xancho Diozən' tile' le'." ¹⁰ Pero na' beṇə' ca' choso'osed choso'olo'i le'e dižə' güenlažə'əna' choso'ožia choso'onite'e bitə'ətezə de'en cui chse'ejni'ine'. Gwx-aquə'əlebəga'aque'ne' ca' bia yixə' chedə' chso'one' porzə de'en na cuerp chega'aque'ena'. Na' de'en chso'ontezə chso'one' can' nanṇə' yesə'əbiayi'e zejlicane.

11 Probchguazə beṇə' ca'. Chso'ontezə chso'one' de'e mal can' ben de'e Cainṇə', na' chesə'əzelaže'e yesə'əželene' mech əscha'o can' ben de'e profet Balaannə'. Chso'one' contr Diozən' na' yesə'əbiayi'e can' gwziayi' de'e Coren' ben' ben contr de'e Moizezən' cana'. 12 Gwxaquə'əlebəga'aque' ca to manch lao lachə' xi'ilažə'əna', la' žlac che'ej chaole txen len lega'aque' par cho'ela'ole Xanchoŋ' chso'elažə'əzeche' chse'ej chsa'oxate'. Con chse'ej chsa'ontezə' bi chse'enene'. Gwxaquə'əlebəga'aque' ca bejw biž de'en nžiguə' be', na' ca yag frot de'en cui bi frot chbia catə' chžin tyemp chei, chedə' babgüizən na' banlažə' do loi. Gwxaquə'əlebəga'aque' ca bejw biž na' ca yag frot de'e cui bi frot chbian chedə' bito zjəzaque'e. 13 Na' gwxaquə'əlebəga'aque' ca nisdaon' de'en chas chatə' na' checho'onən bžin' lao yon' cho'a nisda'onə'. Can' gwxaquə'əlebəga'aque' chedə' de'en chso'one' na' dižə' de'en chso'echgüe' choso'olo'en yelə' zto' chega'aque'enə'. Na' leczə' gwxaquə'əlebəga'aque' ca to beljw de'en chde šaltezə, chedə' Diozən' babžie' bia' yesyə'əžine' lo'o yech gabıl gan' lechguale naquə žčhoł na' gan' yesə'ənite'e zejlicane.

14 Gwzolaon tyemp che de'e Adannə' xte tyemp che Enoquən' goc gažə dia che Adannə'. Na' Enoquən' be'e dižə' che beṇə' ca' chso'on can' chso'on beṇə' ca' choso'osed choso'olo'i dižə' güenlažə', gwne': "De'e li Xancho Diozən' yide' len angl zan juisy che' ca'. 15 Na' əchoglaogüe'en che to to beṇəch šə zjənapə' dolə' o šə cui zjənapə' dolə'. Na' gone' ca sa'acbe'i yoguə' beṇə' ca' cui boso'ozenag che' de que lechguale de'e mal juisy bagwso'one'. Na' gone' par nič žjasyə'əza'alaže'e yoguə' de'e malən' bagwso'one' de'en cui boso'ozenague' che'. Na' leczə' gone' par nič žjasyə'əza'alaže'e yoguə' de'e mal de'en bagosə'əne' contr le'. Na' əgwnežjue' castigw che to toga'aque'." 16 Beṇə' ca' cui choso'ozenag che Diozən' chəsə'əže'eše'e che', bitobi chesyə'əbeine', con chso'ontezə' can' na la'ažda'omalga'aque'en, chso'on cuinga'aque' xen, na' choso'opeine' beṇə' la' chse'enene' yoso'onežjo beṇə' ca' lega'aque' mech.

Consejw de'en chnežjue' beṇə' ca' chso'onlılažə' Jesocristən'

17 Pero na' le'e xi'indaogua'a, cheyalə' žjəsə'alažə'əle de'en gwse' apostol che Xancho Jesocristən' le'e antsla. 18 Gosə'əne': "Na'a cuiṇə' yidə Xanchoŋ' de'e yoblə nitə' beṇə' so'onzeche' yelə' zto' chega'aque' con can' na la'ažda'omalga'aque'enə', na' so'one' borl che de'en na Diozən'." 19 Beṇə' ca' chso'one' par nič gwde gwdelə can' chejni'ile xtižə' Diozən'. Con chso'one' can' chene'e la'ažda'omalga'aque'enə' chedə' bito yo'o Spirit che Diozən' lo'o yičjıla'ažda'oga'aque'enə'.

20 Pero na' le'e xi'indaogua'a, chejle'ele che dižə' li che Diozən' de'en naquə de'e güenchgua. Na' cheyalə' sotezə sole gonle can' nannə' par nič gaquə gonle can' chazlažə' Diozən'. Na' legon orasyon can' əgwzejni'i Spirit che Diozən' le'e. 21 Na' le'e so le'e gon par nič gacbe'ile de que chaque Diozən' chelen'. Xancho Jesocristən' gone' par nič əbanle len le' zejlicane laogüe de'en cheyašə' cheži'ilaže'e le'e. Leso leyebei de'en gone' ca'.

22 Balə beṇə' chso'onlılažə' Jesocristən' chsa'acžəlaže'e šə cheyalə' yesə'ənaogüe' dižə' li che Diozən'. Legon par nič sa'acbe'ine' de que cheyalə' yesə'ənaogüe'en. 23 Na' balə' ze'e gwzolao chesə'ənaogüe' de'en choso'osed choso'olo'i beṇə' güenlažə' ca'. Le'e yeyaše'e lega'aque' na' le'e co'oga'aque' nez güenṇə' lgüegwzə. Na' le'e gapə cuidad par nič cui gonle de'e mal de'en chso'on lega'aque'.

Jodasən' cho'elaogüe'e Diozən'

24 Cheyałə' güe'ela'ochon' Diozən' la' le'enə' chac chone' ca cui əxopcho goncho de'e malən', na' chac chone' par niç bitobi de'e mal da' əchen yichjla'ažda'ochon' catə' əžin žan' le'icho yełə' chey che'eni' che'enə'. Na' cana' lechgualə yebeicho. 25 Tozə Diozən' zaque'e par güe'ela'ochone', na' naque' le'ezelaogüe beṇə' sin'. Babebeje' chio'o xni'a de'e malən' ca de'en bsele'e Xancho Jesocristən' gwdixjue' xtolə'əchon'. Ledoye'ela'ochə' chedə' naque' le'ezelaogüe beṇə' zaque'e na' beṇə' blao na' chnabi'e doxenlə. Zocze' dezd catə'ən cuiṇə' xe yežlyon' na' par zejlicane. Na' naque' Xan yoguə' benəch, yoguə' bia chsa'aš na' yoguə' biquə'əchlə de'e zjəde. Ca'ašgaczə gaquə.

De'e na'azən' chzoja' ṇa'a. *Jodas*

De'en Bzejni'i Jesocristan' San Juannə' Niç Bzoje'en Par Chio'o

Diozan' bene' par niç Jesocristan' bzejni'ine' San Juannə' de'e quinga

¹ Nada' Juan naca' beṇə' güen xšin Jesocristan'. Diozan' blo'ine' Jesocristan' de'e quinga de'en bzejni'ine' nada' par gwlo'ida'an yeziqwa'əchlə beṇə' chso'elaogüe'ene'. Bsele'e angl che'enə' par bzejni'ine' nada' de'e quinga par niç ənezecho de'e ca' gaqwa' lgüegwə. ² Na' bacho'a dižə' che yogua'əloł de'e quinga de'en blo'ine' nada', na' yogua'əloł de'en bzene Diozan' nada' na' de'en bzejni'i Jesocristan' nada'.

³ Mbalaz ṇitə' beṇə' ca' yoso'olabe' de'e nga chzoja' nga de'en bzene Diozan' nada'. Na' mbalaz ṇitə' beṇə' ca' əse'ene len catə' beṇə' yoblə yoso'olabe'en. Mbalaz ṇite'e šə yoso'ozenague'en, çhedə' bazon gaqwa' de'e ca' blo'ine' nada'.

Juannə' chzoje' beṇə' ca' chso'elao' Jesocristan' yež ca' gažə

⁴ Nada' Juan chzoja' le'e chdopə chžagle cho'ela'ole Jesocristan' Asian', le'e nitə'əle yež ca' gažə. Diozan' sošgue' gaqwalene' le'e na' gone' ca so cuezle binlo len xbab de'en yo'o lo'o yichjla'ažda'olen', Dioz ben' bazoczə catə'an bxi'e yežlyon', na' ca'aczən soe' catə'an yeyož yedon. Na' Spirit che Diozan' de'en naquə ca gažə Spirit zon lao Diozan' gan' chi'e chnabi'e na' sošgan gaqwalenən le'e na' gonən ca so cuezle binlo len xbab de'en yo'o lo'o yichjla'ažda'olen'.

⁵ Na' leczə Jesocristan' sošgue' gaqwalene' le'e na' gone' ca so cuezle binlo len xbab de'en yo'o lo'o yichjla'ažda'olen'. Jesocristan' be'e dižə' che Diozan' na' xtiže'enə' naquən de'e li. Len' naque' beṇə' nech bebane' ladjo beṇə' guat ca' par chnabi'e. Jesocristan' chnabi'e notə'ətezə beṇə' çhasə'anabia' yežlyo nga. Chaque Jesocristan' checho na' babnitlaogüe' xtolə' chio'o chonliłažə'əchone' ca de'en blalj xchene'enə' catə'an bnežjw cuine' gwso'ote'ene'. ⁶ Gwleje' chio'o par niç ṇabi'əcho t xen len le' ca no rei na' par niç sotezə socho güe'ela'ocho Xe' Diozan' can' gwnitə'ətezə gwnitə' bxož che beṇə' Izrael ca' gwse'ejni'alaže'e Diozan'. Jesocristan' chnabi'e zejlicəne. Ledoye'ela'oche' ṇa'a na' zejlicəne. Can' gonšgaczo.

⁷ Le'e gon xbab, la' Jesocristan' yetje' to lo'o bejw. Na' yogua'əloł beṇə' yesə'əle'ine' le', lente beṇə' ca' gwso'ot le', na' beṇə' ca' ža' doxen yežlyon' yesə'əbežyaše'e de'en cui gwso'onliłaže'ene'. Can' na Diozan', na' ca'aczən gaqwa'.

⁸ “Nadan' naca' ben' ben yežlyon' na' ben' gon par niç te çhei.” Can' na Xancho Diozan' ben' napə le'ezełaogüe yelə' guac xennə', ben' bazoczə catə'an bxi'e yežlyon', na' ca'aczən soe' catə'an yeyož yedon.

Juannə' ble'idaogüe'ene' Cristan' len yelə' chey che'eni' che'enə'

⁹ Nada' Juan naca' beṇə' bišə'əle çhedə' naccho t xen cho'ela'ocho Cristan' na' txennə' choso'ochi' choso'osaquə' beṇə' chio'o. Txennə' chnabia' Diozan' chio'o na' t xen chgo'o chçhejlažə'əcho len yogua' de'en chac checho çhedə' ngodə'əcho t xen len Jesocristan'. Zoa' isla nga de'en ne' Patmos la' naca' pres por ni che de'en bagwodixjui'a xtižə' Diozan' na' babi'a dižə' che Jesocristan'. De'e na'anə' baboso'osele'e nada' nga. ¹⁰ Na' to ža dmi gw Spirit che Diozan' benən par niç ble'idaogüe'eda' to de'en ble'idaogüe'eda'. Na' benda' gwṇe

to beṇə' coža'anə' zižjochgua ca zižjon' chbež trompet. ¹¹ Na' gože' nada': — Nadan' naca' ben' ben yežlyon' na' ben' gon par nič te čhei. Bzoj dižə' čhe de'e quinga le'idaogüe'edo'onə' to le'e libr na' selo'o librən' lao beṇə' ca' chesə'ədopə chesə'əžag chso'elaogüe'e nada' Asia, beṇə' ža' Efeson' na' Esmirna, na' Pergamo, na' Tiatira, na' Sardis na' Filadelfia na' Laodisea.

¹² Na' gwyechja' bgüia' non' cho'elen nada' dižə' na' ble'ida' gažə candler de or. ¹³ Na' gwchol' candler ca' gažə ble'ida' Xi'in Diožən' ca to beṇəch. Na' nyaze' to lachə' tonə de'e bžinte yen ni'e. Na' nchej cho'alčo'enə' to sinš de or. ¹⁴ Na' yišə' yichje'enə' naquən ca xa xilə' šyiš na' ca be'eyə'. Na' jelaogüe' ca' chsa'actitən ca to yi' de'e chalə'əniṇ. ¹⁵ Na' ble'ida' ni'enə' chactitən ca to brons de'e nlachgua catə' xoan lao yi'. Na' xne čhe'enə' nenən ca chziž yaon' cata' dechguan. ¹⁶ Na' noxe'e gažə beljw len ne'e ličan', na' cho'enə' zo to spad de'e nla čhopə la'ate. Na' ble'ida' cho'alaogüe'enə' can' chle'icho bgüižən' catə'ən chṇachguan.

¹⁷ Na' beyož ble'ida'ane' bgüixa' xni'enə' gota' šlat. Nach bli ne'e ličanə' bexe'e na'anə' na' gože' nada': —Bito žebo'. Nadan' naca' ben' ben yežlyon' na' ben' gon par nič te čhei. ¹⁸ Nada' naca' Dioz ben' zo zejlicaṇe. Ca de'en bida' goca' beṇəch gwso'ote' nada', pero na' bebana' ladjo beṇə' guat ca' na' soa' zejlicaṇe. Nada' napa' yelə' gwnabia' par əṇia' batən' sa'at to to beṇə' na' napa' yelə' gwnabia' par əṇia' non' žjəya'ac gabiḷən'. ¹⁹ Na' ža bzoj dižə' čhe de'e ca' bable'ido', na' čhe de'e ca' chac na'a na' čhe de'e ca' ze'e za'ac. ²⁰ Bito gwyejni'ido' čhe beljw ca' gažə de'en noxa'a na' čhe candler de or ca' gažə. Beljw ca' gažə zejen gažə beṇə' ca' zjəyo'o lao ne'i beṇə' ca' chesə'ədopə chesə'əžag chso'ela'ogüe'e nada' yež ca' gan' mbane Asia. Na' candler ca' gažə zejen gaž cuen beṇə' ca' chso'onḷilažə' nada'.

2

Dižə' de'en be'e par beṇə' ca' chso'elao' Jesocristən' yež ca' gažə: De'en gože' beṇə' Efeso ca'

¹ Bzoj de'e nga par ben' naquə lao ne'i beṇə' ca' chesə'ədopə chesə'əžag chso'elaogüe'e nada' Efeson' na' yo'one' de que nada' ben' ble'ido' noxə' gažə beljw ca' na' chgüia chya' candler de or ca' gažə, əchnia' dižə' quinga: ² “Neze nle'ida' ca güenṇə' chonḷe, can' zotezə zole chonḷe xšina'anə' sin cui chjəxaquə'əlažə'əle, na' can' cui chzenagle čhe beṇə' mal ca' chəsə'əna zjənaque' apostol. Babgüiale can' chso'one' na' chache'ile de que bito bselə'əga'aca'ane'. ³ Chgo'o chchejlažə'əle len de'en chy' chzaquə'əle na' zotezle chonḷe xšina'anə' sin cui chjəxaquə'əlažə'əle. ⁴ Pero de to de'en cui chazlažə'a can' chonḷe, cuič chaquele čhia' can' bagoquele čhia' antslə. ⁵ Le'e gon xbab can' gocchgüeile čhia' antslə na' cuič chactequele čhia' na'a. Le'e gon xbabən' par nič yediṇjele de'en cuič chactequele čhia' na' legonch can' benḷe antslə. Na' šə cui yediṇjele de'e malən', yedəyena' le'e castigw nach yebiža'a len le'e. Bitoch gacle candler čhia' šə cui yediṇjele xtolə'əlen'. ⁶ Pero la'anə'aczə bito chonḷe doxen can' chazlažə'anə', chebeida' de que chgue'ile de'e malən' chso'on beṇə' ca' zjənzi' nicolaitos, la' leczə nada' chgue'ida' can' chso'one'enə'. ⁷ Le'e žia nagle de'e chene, le'e gwzenag čhe de'en bagwna Spirit čhe Diožən' par le'e chdopə chžagle cho'ela'ole nada'. Notə'ətezle chzoile cui chzenagle čhe de'e malən', gua'a latjə gaole frotən' de'en chbia lao yag yelə' mbannə' de'en zo gan' zo Diožən'.”

De'en gože' beṇə' Esmirna ca'

8 Na' leczə bzoj ben' naquə lao ne'i beṇə' ca' chesə'ədopə chesə'əžag chso'elaogüe'e nada' Esmirnan'. Bzoje' gože' de que nada' naca' ben' ben' yežlyon' na' ben' gon par nič te čhei. Na' gwso'ote' nada' lao bida' goca' beṇəč pero bebana' ladjo beṇə' guat ca'. Na' leczə yo'one' de que nada' əchnia' dižə' quinga: ⁹ “Neze nle'ida' ca' güennə' chonlen', na' neze nle'ida' can' choso'oči' choso'osaquə' beṇə' le'e na' can' nyašə'əčgua chac čhele. Pero la'aṇə'əczə banga'anyašə'əle lečhguaḷe mbalaz zole. Nezda' can' choso'ožia choso'onitə' beṇə' gwlaž čhele ca' le'e, beṇə' ca' gwsa'alje' lao dia čhe de'e Izraelən'. Lao Diozən' bito zjənaque' beṇə' Izrael sino zjəncodə' ljuežje par chso'one' txen len gwxiye'enə' de'en le Satanas. ¹⁰ Bito žeble de'e ca' ze'e za'ac de'en saquə'əzi'ile. Gwxiye'enə' gonən ca' yesə'əyixjue' balḷe ližya par nič ca' co'yelə'an le'e cuejyichjle xtiža'anə'. Lao ši ža saquə'əzi' saquə'əyašə'əle. Pero na' lesotezə leso legwzenag čhia' la'aṇə'əczə šə so'ote' le'e por ni čhe de'en chzenagle čhia'. Na' šə sotezə sole gwzenagle čhia' nachən' gona' ca' əbanḷe len nada' zejlīcaṇe. ¹¹ Le'e žia nagle de'e chene, le'e gwzenag čhe de'en bagwna Spirit čhe Diozən' par le'e chdopə čžagle cho'ela'olene'. Notə'ətezle chozoile cui chzenagle čhe de'e malən', bito gac čhele can' gac čhe beṇə' ca' yesə'əzaquə'əzi'e zejlīcaṇe, de'en nacho yelə' got əgwchope.”

De'en gože' beṇə' Pergamo ca'

¹² Na' leczə bzoj ben' naquə lao ne'i beṇə' ca' chesə'ədopə chesə'əžag chso'ela'ogüe'e nada' Pergamon'. Bzoje' gože' de que nada' ben' ble'ido' zo spadən' cho'anə' de'e nla čhopə la'ate əchnia' dižə' quinga: ¹³ “Nezda' de que zole lao syodan' gan' chnabia' Satanasən' na' gan' lečhguaḷe choso'ozenag beṇə' čhei. Neze nle'ida' ca' güennə' chonle, can' zotezə zole chonḷilažə'əle nada' na' can' cui chbejyichjle xtiža'anə' de'en chejle'ele čhei, na' nic catə'an gwso'ote' Antipasən' gan' zolen', ben' gwzotezə gwzo be'e dižə' li čhia'anə' lao syoda čhele gan' zo Satanasən'. ¹⁴ Pero de to čhopə de'en chonle de'en cui chazlažə'a. Nitə' balḷe chonle de'e malən' ca' de'en bzejni'i de'e profet Balaanə' de'e Rei Balaquən'. Na' Balac na'anə' bene' ca' besə'əxopə beṇə' Izrael ca' gwso'one' de'e malən', zane' gwsa'ogüe' yelə' guao de'en naquə čhe lgua'a lsaquə'an gwse'ejni'aləže'e na' bosə'oža' xtoga'aque' lao gwse'ejni'aləže'e lgua'a lsaquə' čhe beṇə' Moab ca'. ¹⁵ Leczə can' chac len le'e, balḷe naole de'en nac ca' de'en čhsed chlo'i beṇə' ca' zjənzi' nicolaitos de'enə' chgue'ida'. ¹⁶ De'e na'anə' le'e yedinje de'e malən' chonle. Šə cui yedinjele de'e malən' chonle, yida' lğüegwzə na' gona' par gacle castigw, la' xtiža'anə' gwxaquə'əleben ca to spad. ¹⁷ Le'e žia nagle de'e chene, le'e gwzenag čhe de'en bagwna Spirit čhe Diozən' par le'e chdopə čžagle cho'ela'ole nada'. Notə'ətezle chozoile cui chzenagle čhe de'e malən', gonə' le'e yoguə'əloḷ de'en chyažjele par sole mbalaz yoban' zejlīcaṇe, na' gonə' yej fin par to tole nič ənezele de que chebeida' le'e. Na' le'e yejən' nyoj to la de'e cobə na' ben' goxə' yej na'azə ənezene' bin' nyojən.”

De'en gože' beṇə' Tiatira ca'

¹⁸ Bzoj de'e nga par ben' yo'o lao ne'i beṇə' ca' chesə'ədopə chesə'əžag chso'ela'ogüe'e nada' Tiatiran'. Bzoje' gože' de que nada' naca' Xi'in Diozən' ben' ble'ido' chsa'actit jəlaogua'anə' ca to yi' de'en chalə'əniṇ na' ni'anə' ca to brons de'en lačgua. Na' yo'one' de que nada' əchnia' dižə' quinga: ¹⁹ “Neze nle'ida' de'e güennə' chonle, na' can' chaquale čhia' na' čhe ljuežj beṇəčhle, can' chonḷilažə'əle nada' na' can' chaclen ljuežjle. Nezda' can' chgo'o chčhejlažə'əle len bitə'ətezə de'e chac čhele, na' nezda' chonchle güen na'a cle ca can' babenḷe catə'an gwzolaole chonḷilažə'əle nada'. ²⁰ Pero na' chonle

de'e cui chazlaža'a can' cho'ele latja par ničh no'olən' gwxaquə'əlebene' ca de'e Reina Jesabelən' chsed chlo'ine' le'e ne' de que cho'e xtiža' Diozən'. Chxoayague' bała le'e chonlilaža'əle nada', che'e le'e de que naquən güen əgwša' xtole na' gaole yelə' guao de'en chəsə'əne' naquən che lgu'a' lsaquə'an chse'ejni'alaža' beṇə'. ²¹ Babnežjua'ane' tyemp par yedinjene' de'e mal ca' chone', pero bito chene'eng' yedinjene'en. ²² De'e na'anə' gona' par ničh gaquə'senene', na' le'e chonle txen len le', gona' par ničh əzaglaochgualə šə cui cuejyichjle cuich gonle de'e mal de'en chsedene' le'e chonle. ²³ Na' ca naquə beṇə' ca' bagosə'əbejyichje' xtiža'anə' par choso'osed choso'olo'ine' de'e malən' gožga'aque' de que gotga'aca'ane'. Na' catə' gona' ca' yoguə'əlol le'e chdopə chžagle cho'ela'ole nada' gatə'ətezə, gacbe'ile de que neze nle'icžəda' xbab de'en yo'o lo'o la'ažda'olen' na' bin' chebeile. Na' gona' par ničh to tole sole mbalaz o si'ile castigw segon naquən' babenle. ²⁴ Pero na' le'e yelə'ale zole Tiatiran', le'e cui naole de'en chsed chlo'i no'olən' na' cui nsedle de'en chəsə'əne' chse'ejni'ine' che Satanə'sən' de'en ngašə'an len beṇə' yeziquə'əchlə, bito nia' bichlə de'e cheyalə' gonle. ²⁵ Con sotezə sole gonle de'e güennə' par ničh bachonle ca' catə'an yida' de'e yoblə. ²⁶ Notə'ətezle chzoile cui chzenagle che de'e malən' na' zotezə zole chonle can' chazlaža'anə' xte catə'an yida' de'e yoblə, gona' par ničh nabi'ale nasyon ca' txen len nada'. ²⁷ Ca Xa'anə' babene' par ničh chnabia'aga'aca'an, leczə can' le'e nabi'alən txen len nada' na' goncho ca yesə'əzəxjwyichj beṇə' nasyon ca', na' əgwžiyai'iga'acchone'. ²⁸ Na' gona' par ničh gombi'ayanə'əle nada' len yelə' chey che'eni' chia'anə', nadan' gwxaquə'əlebəda' ca beljw xsilən'. ²⁹ Le'e žia nagle de'e chene, legwzenag che de'en bagwna Spirit che Diozən' par le'e chdopə chžagle cho'ela'ole nada'."

3

De'en gože' beṇə' Sardis ca'

¹ Bzoj de'e nga par ben' naquə lao ne'i beṇə' ca' chesə'dopə chesə'əžag chso'elaogüe'e nada' Sardisən'. Bzoje' gože' de que Spirit che Diozən' de'en naquə ca gažə spirit zon len nada' na' gože' de que naca' ben' ble'ido' noxa'a gažə beljw ca', na' nada' əchnia' dižə' quinga: "Neze nle'ida' can' chonlen'. Nezda' can' chəsə'əna beṇə' de que naple yelə' mban zejlicanə', pero zanle nacle ca beṇə' guat par len nada' de'en cui chzenagle chia'. ² Leyeban bin' chonle, legonlilaža'əch nada' na' legaquəche chia' na'a žlac cuinə' yeyož cuejyichjle nada'. Nezda' de que Diozən' bito chebeine' can' chonle, Dioz ben' leczə cho'elaogua'a. ³ Le'e žjsa'alaža' xtiža'anə' de'en boso'ozejni'i beṇə' le'e na' de'en bzenagle chei antslə. Le'e gwzenag chei de'e yoblə na' yedinjele de'e malən' chonle. La' šə cui gonle xbab yedinjele de'e malən' yedayena' le'e castigw na' senyala' le'e can' chon to beṇə' bguan ben' chidə ca orən' cui chonle xbab yide'. ⁴ Na' la'anə'əczə zanle zole Sardisən' cui chonle can' chazlaža'anə', bia'acczə ne'e nita' bałle cui da əchen de'e malən' yichjla'ažda'olen'. Na' le'e cui bi de'e mal da chen yichjla'ažda'olen', gwžin ža catə' le'e talenle nada' gan' zoa'anə' na' čhazle lachə' šyiš, čhedə' le'e zaquə'əle par talenle nada'. ⁵ Notə'ətezle chzoile cui chzenagle che de'e malən', guacua' le'e lachə' šyiš na' bito yoxia' lalen' le'e libr chia' gan' nyoj la beṇə' ca' zjənapə' yelə' mban zejlicanə. Na' gua'a dižə' len Xa' Diozən' na' len angl che' ca' de que bagwcu'a'a le'e ca xi'ina'. ⁶ Le'e žia nagle de'e chene, legwzenag che de'en bagwna Spirit che Diozən' par le'e chdopə chžagle cho'ela'ole nada'."

De'en gože' beṇə' Filadelfia ca'

7 Bzoj de'e nga par ben' naquə lao ne'i beṇə' ca' chesə'ədopə chesə'əžag chso'elaogüe'e nada' Filadelfian'. Bzoje' gože' de que nada' naca' beṇə' la'aždao' xi'ilažə' juisy na' syempr chona' can' ənia'anə'. Nada' chnabia' doxenlə can' bagwnabia' de'e Rei Dabin' Izraelən'. Napa' yeļə' chnabia' par əṇia' non' yedəso len nada' na' non' cui yedəso len nada'. Na' notono gaquə gon par niç gwšə'a can' əṇia'anə'. 8 Bzoje' gože' de que nada' əchnia' dižə' quinga: "Neze nle'ida' ca güennə' chonle. Na' la'anə'əczə cui naquə zanle, zotezə zole chonle can' əṇia'anə' na' bito chbejyichjle de'en chonlilažə'əle nada'. De'e na'anə' babena' par niç nita' beṇə' zan beṇə' chse'enene' yoso'ozenague' che xtizə' Diozən' de'e güe'elenle lega'aque' na' notono no gaquə gwžon par cui chixjue'ilen lega'aque'. 9 Na' ca naquə beṇə' ca' gwsə'aljə lao dia che de'e Izraelən' beṇə' ca' zjəncodə' ljuežje chso'one' txen len Satanəən', lao Diozən' bito zjənaque' beṇə' Izrael. Chso'onlažə'e chəsə'əne' chebei Diozən' lega'aque'. Na' gona' par niç yesə'əzo xibga'aque' laolen' yesə'əne' de que nacle beṇə' zaque'e len nada' na' sa'acbe'ine' de que chacda' chelen'. 10 Na' ca naquə zotezə zole chzenagle che xtizə'anə' de'en cho'en dižə' can' bguo'o bchejlažə'a len de'e mal de'en goquə chia', nada' gona' par niç yechojle güen catə' əžin or saquə'əzi'ichgua yoguə' beṇə'əchən'. Cana' la'alao nac chon to to beṇə'əchən', šə chzenague' chia' o šə chzenague' che de'e malən'. 11 Bazon əžin ža yida' de'e yoblə. Lesotezə leso legon de'e güennə' par niç ca' bito bi gwžon gona' ca əbanle len nada' zejlicane. 12 Notə'ətezle chzoile cui chzenagle che de'e malən', gona' par niç solə txen len Diozən' zejlicane, Dioz ben' cho'elaogua'a. Na' zejlicane yega'anlenlene'. Na' gona' par niç gacle xi'in Diozən' zejlicane, na' solə syoda Jerosalen de'e naquə de'e cobə, syoda che Diozən' de'en chi' yoban' de'en gwletje' lao yežlyon'. Na' gwzoja' lao xga to tole la'anə' de'en naquə de'e cobə. 13 Le'e žia nagle de'e chene legwzenag che de'en bagwna Spirit che Diozən' par le'e chdopə chžagle cho'ela'ole nada'."

De'en gože' beṇə' Laodisea ca'

14 Bzoj de'e nga par ben' naquə lao ne'i beṇə' ca' chesə'ədopə chesə'əžag chso'elaogüe'e nada' Laodisean'. Bzoje' gože' de que nada' naca' ben' chon par niç chac can' che'enda'anə'. Cho'a dižə' de'en bagwna Diozən' nada' na' naquən de'e li. Nada' bəna' yoban' na' yežlyon', beṇə'əch, angl, bia chsa'aš na' yeziquə'əchlə de'e zjəde. 15 Bzoje' gože' de que nada' əchnia' dižə' quinga: "Neze nle'ida' can' chonlen', bito chgue'ile nada' pero ni que chaquele chia' do yichj do lažə'əle. Yebeichləda' žalə' chgue'ile nada' o žalə' chaquele chia' do yichj do lažə'əle. 16 Na' laogüe de'en cuitec chonle cas chia' na' cui chaquele chia' do yichj do lažə'əle, la'anə'əczə bito chgue'ile nada', bia'acžə žin ža cuejeyichja' le'e cuich gonada' le'e ca xi'ina'. 17 Le'e nale zole mbalaz, na' de que chonle de'e güen juisy, na' de que bito bi bi chac fałt chele par niç yebei Diozən' le'e. Bito chacbe'ile de que de'e malchguan' chonle na' de'e malchguan' gaquə chele. Bito chebei Diozən' le'e. Nçhol yichjla'ažda'olen' na' nacbia'axejə chonle de'e malən'. 18 De'e na'anə' chona' le'e consejw legonlilažə' nada' par niç gona' ca gacle beṇə' güen can' naca'anə'. Le'e yedinje xtolə'əlen' par niç gaquə la'ažda'olen' xi'ilažə' na' cuich gonle de'e malən' lao Diozən'. Na' le'e güe' latjə yocobə Diozən' xbab chelen' par niç šo'o be'eni' che'enə' lo'o yichjla'ažda'olen'. 19 Notə'ətezə beṇə' chacda' chei cho'ane' consejw na' chona'ane' castigw catə' chone' de'e mal. De'e na'anə' le'e cuec yichjle par yedinjele xtolə'əle ca'. 20 Gwxaquə'əlebəda' ca to beṇə' zecha cho'a puert chelen' chne' na' chsiže' le'e puertən'. Notə'ətezle šə gwzenagle chia' na'

šə əsaljwle par šo'a, yedəsoa' len le'e na' gona' par niçh sole mbalaz txen len nada'. ²¹ Na' notə'ətezle šə chzoile cui chzenagle che de'e malən', gona' par niçh cue'elenje nada' gan' chi'a chnabi'a, ca nada' chi'ilena' Xa'anə' chnabi'ato' dezd catə'an beyož bzoa' gwxiye'enə' xni'anə'. ²² Le'e žia nagle de'e chene, legwzenag de'en bagwna Spirit che Diozən' par le'e chdopə chžagle cho'ela'ole nada'."

4

Be'idaogüe'ene' Diozən' chi'e chnabi'e yoban'

¹ Beyož bzoja' de'e ca' gwne' nada', bgüia' na' ble'ida' nyaljo to puert yoban' na' benda' cho'elen ben' nada' dižə', ben' benda' de'e nechən' ben' naquə xne che'enə' zižjochgua ca zižjon' chbež trompet. Lecze'en gwnehcze' nada' de'e yoble, gwne': —Gwyep gan' zoa' nga par niçh gwzejni'ida' le' de'e ca' ze'e gaquə.

² Nach ca orən' ben Spirit che Diozən' par niçh ble'idaogüe'eda' Diozən' gan' chi'e yoban' chnabi'e. ³ Na' ble'ida' ben' chi' chnabia' naque' ca to de'e chactit, ca yej fin de'en nzi' jasje na' cornalina. Na' to de'en naquə ca to yita' gwyeçhjan gan' chi'enə' de color ga' ca yej fin de'en ne' esmeralda. ⁴ Na' cuit cue'ej Diozən' gan' chi'e zjəchi' tapechoa beņə' golə beņə' blao beņə' chəsə'anabia' txen len le'. Zjənyaze' lachə' šyis' na' zjəzo coron de or yichj to toga'aque'. ⁵ Na' gan' chi' Diozən' chep yes na' chac sšag, na' chašjw chtin. Na' laogüe'enə' nita' gažə yi' de'e chalə'anin. Na' yi' ca' gažə zjanaquən Spirit che Diozən'. ⁶ Na' laogüe' gan' chi'enə' nžiljw to de'e chle'icho ca to nisdəo' de bidr o de be'ya'.

Na' nita' tap bia gan' chi' Diozən', tgüjəb nita' cuiten' çhopə la'ate, yetob cože'enə' na' yetob laogüe'enə', na' žia de'e zan jəlaoga'acquəb delant na' traslə. ⁷ Bia nechən' naquəb ca to leon, na' bia əgwchopen' ca to go'on, na' cho'alao bia əgwyonən' naquən ca cho'alao beņəch, na' bia əgwdapən' naquəb ca to bsia bian' chzo. ⁸ Na' to to bia ca' tap žia xop güejə xilə'əga'acquəb, na' doxen cuerp chega'acquəbən' žia de'e zan jəlaoga'acquəb lo'ole na' fuerlə. Na' do ža do yel bito chəsə'əbezəb, yapəyoe chəsə'anəb:

Lechgualə beņə' la'aždao' xi'iləžə' juisy naquə Xancho Diozən' ben' napə le'ezelaogüe yelə' guac xen.

Bazocze' catə'an bxi'e yežlyon', na' ca'aczən' soe' catə'an yeyož yedon.

⁹ Na' yoguə' las catə' bia ca' chso'eb dižə' chso'ela'ob Diozən' ben' chi' chnabia' ben' zoczə zejlicane, yoguə' laste catə'an chso'eb yelə' bala'an na' yelə' choxcwlen che', ¹⁰ beņə' golə beņə' blao ca' tapechoa chəsə'əzo xibga'aque'en lao Diozən' ben' zo zejlicane chso'elaogüe'ene' na' choso'onite'e coron chega'aque'en xni'enə', chəsə'əne'.

¹¹ Xanto' Dioz, len' beno' beņəch, angl, bia ca' ža', na' biquə'əchlə de'en zjəde, chedə' can' gwyazlažo'o na' chedə' go'ondo' nita' beņəch, angl, bia ca' ža' na' biquə'əchlə de'en zjəde.

De'e na'anə' zaquə'əczo' par chnabi'o, par si'o yelə' bala'an, na' par əyejlaogo'o.

5

Ben' gwxaquə'əlebe ca xilə' dao' gwso'ot beņə' Izrael ca' par gwnitlao xtolə'əga'aque'enə'

¹ Na' ble'ida' Dioz ben' chi' chnabia' noxe'e to rollo de'en nyoj çhopə la'ate na' nyeyjon len gažə sey. ² Na' ble'ida' to angl gual na' gwne' zižjo: —¿Non' zaquə' par əgwzoxje' sey ca' par niçh šaš rollon'?

Na' beṇə' golə beṇə' blao ca' tapechoa besə'əzo xibga'aque' na' gwsə'elaogüe'e Diozən' ben' zoczə zejlicəṇe.

6

Sey ca' gažə

¹ Na' ca' naquə sey ca' gažə ble'ida' cata' Jesocristən' ben' ble'ida' ca' to xilə' dao' bian' bagwsə'ote' bzoxxje' ton. Na' bənda' entr' bia ca' tap tob gwṇeb zižjo' ca' zižjon' chašjw chtin, gwṇab: —Da bgüia de'e nga.

² Na' cata'ən bgüia', ble'ida' to cabey bia šyiš na' ben' žia cožə' cabeyən' noxe'e to xis goxītə'. Na' zo to coron yichje'ənə' na' bchoje' chzoe' zan beṇə' xni'ənə'. Na' zde' par yeyož əgwzoe' beṇə' xni'ənə'.

³ Na' cata' Jesocristən' bzoxxje' sey əgwchopen', bənda' gwṇe bia əgwchopen' gwṇab: —Da bgüia de'e nga.

⁴ Nach bchoj to cabey cua yin', na' ben' žia cožə'əbən' nape' yelə' chnabia' par nič gone' ca cuich niṭə' beṇə' ca' ža' yežlyon' binlo len ljuēžjga'aque', na' so'ot ljuēžjga'aque'. Na' ben' žia cabeyən' noxe'e to spad xen.

⁵ Na' cata' Jesocristən' bzoxxje' sey əgwyonən' bənda' gwṇe bia əgwyonən' gwṇab: —Da bgüia de'e nga.

Na' cata' bgüia' ble'ida' to cabey gasj na' ben' žia cožə'əbən' noxe'e to xigonz.

⁶ Na' bənda' to de'en godca' gwna to beṇə' gan' ža' bia ca' tap gwṇe': —Ben par nič tkilzə trigon' o tyagzə sebadən' guac yesə'əzi'e len laxjwga'aque' de'en chso'one' gan tža tža; pero bito gono' par nič cui əžel set na' binon'.

⁷ Na' cata' Jesocristən' bzoxxje' sey əgwdape, bənda' gwṇe bia əgwdapən', gwṇab: —Da na' bgüia de'e nga.

⁸ Na' cata' bgüia' ble'ida' to cabey bia naquə ca color gašə' na' ben' žia cožə' cabeyən' le' Yelə' Got, na' yeto beṇə' naogüe'ene' le' Gabil'. Na' goquən lao na'aga'aque' gwsə'one' par nič goc gwdilə, gocchgua yižgüe', goc fałt de'e əse'ej əsa'o beṇəchən', na' gwsə'ot bia znia ca' beṇə' zan. Na' lao goc ca', beṇə' zan ža' yežlyon' gwsa'ate'.

⁹ Na' cata' bzoxxje' sey güeye'e ble'ida' mes gan' chso'elao beṇə' ca' ža' yoban' Diozən'. Na' xni'a mesən' ble'ida' beṇə' guat ca' beṇə' ca' gwsə'ot beṇə' mal ca' lega'aque' por ni che de'en boso'ozenague' xtižə' Diozən' na' gwso'e dižə' de que chso'onlilaže'e Jesocristən'. ¹⁰ Na' beṇə' guat ca' gosə'əne' zižjo gosə'əne': —Xənto, le' naco' beṇə' la' aždao' xi'ilažə' juisy, na' syempr chono' can' na'onə'. žBatə'əquən' gwnežjo' castigw che beṇə' mal ca' ža' yežlyon' ca' de'en gwso'ote' neto'.

¹¹ Nach Diozən' bnežjue' to to beṇə' guat ca' xala'anga'aque' de'e šyiš de'e gwsa'aze', na' gože' lega'aque' so'one' dezcanz yeto tyemp dao' xte catə'əch babeyož gwso'ot beṇə' mal ca' beṇə' ljuēžjga'aque' ca' chso'elao' Cristən' con ca'ate'ənə' nžia Diozən' bia' sa'at.

¹² Na' cata' Jesocristən' bzoxxje' sey de'e gwxoqe, gocbe'ida' lechgualə gwxo' na' bgüižən' beyaquən ca' to lacha' gasj, na' bio'onə' beyaquən ca' chen. ¹³ Nach beljw ca' besə'əyiñjən besə'əžinten lao yežlyon' can' chac len frot de'e žia lao yag catə' chečhjchgua be'. ¹⁴ Na' le'e yoban' benittecžən ca' to rollo de'en chedobə' na' yoguə' ya'a ca' na' islas ca' bosə'oša' xišne'i. ¹⁵ Nach rei ca' beṇə' ca' chasə'ənabia' lao yežlyon', len beṇə' blao ca' na' beṇə' gwni'a ca', len capitan ca', len notə'ətezəchlə beṇə' napə yelə' chnabia', na' len beṇə' zjənaquə esclabos txen len beṇə' ca' cui zjənaquə, yogue'e bosə'ocuašə' cuinga'aque' do lo'o bloj na' entr' yej xen ca' de'en žia lao ya'a ca'. ¹⁶ Na' gosə'əne': —Žalə'əšga

əca'a bdiŋj na' yej quinga na' ya'a quinga yesə'əyenən chio'o niç cui le'i Diozən' chio'o, Dioz ben' chi' chnabiá, na' niç cui gon̄ Jesocristən' castigw checho, Jesocrist ben' gwxaquə'əlebe ca xilə' dao' ca' gwso'ot beŋə' Izrael ca' par gwnitlao xtolə'əga'aque'ənə'.

¹⁷ Gosə'əne' ca' cheda' gwsa'acbe'ine' babžin ža gaquə juisyən' na' lechguale yesə'əžaglaogüe' len castigon' de'en əgwnežjo Diozən' lega'aque'.

7

Beŋə' Izrael ca' beŋə' ca' zjənyišə' sey che Diozən'

¹ Gwde na' ble'ida' tap angl gosə'əzeche' tap part lao yežlyon' bosozague'e be'enə' par niç cui gwyeçhən̄ lao yežlyon', lao nisdə'onə' o gan' ze yag ca'.

² Nach ble'ida' yeto angl ze'e galən' chla' bgüižən' noxə'e to de'e gwçhine' par gwçhiše'e sey che Diozən' ben' zo zejlicəne lao xga beŋə' ca' chso'elao' le'. Nach anglən' gwne' zižjo belgüiže' angl ca' tap, beŋə' ca' naquən̄ lao na'aga'aque' so'one' par niç gaquə de'e mal lao yežlyon' na' lao nisdə'onə'.

³ Gože' lega'aque': —Bito gonle par niç gaquə de'e mal lao yežlyon', lao nisdə'onə' o gan' ze yag ca' xte catə' babeyož bçhišə'əto' sey che Diozən' lao xga beŋə' ca' chso'elao' le'.

⁴ Nach gwdechlə benda' gwna anglən' de que to gueyoa tapeyon mil beŋə' bçhiše'e seyən', yogue'e za'aque' lao dia ca' šižin che xi'in de'e Izraelən'. ⁵ Na' šižina mile' lao dia che de'e Jodan', šižina mile' lao dia che de'e Robennə', šižina mile' lao dia che de'e Gadən', ⁶ na' šižina mile' lao dia che de'e Aserən', šižina mile' lao dia che de'e Neftalin', šižina mile' lao dia che de'e Manasesən', ⁷ na' šižina mile' lao dia che de'e Simeonnə', šižina mile' lao dia che de'e Lebīn', šižina mile' lao dia che de'e Isacarən', ⁸ na' šižina mile' lao dia che de'e Sabolonə', šižina mile' lao dia che de'e Jwsen' na' šižina mile' lao dia che de'e Benjaminnə'.

Beŋə' zan zjənyaze' lachə' šyiš'

⁹ Nach gwde na' bgüia' na' ble'ida' beŋə' zan juisy zjəzeche' lao Diozən' gan' chi'e chnabi'ənə' na' lao Jesocristən' ben' gwxaquə'əlebe ca xilə' dao' ca' gwso'ot beŋə' Izrael ca' par gwnitlao xtolə'əga'aque'ənə'. Tant beŋə' zan zjəzecha xte notono no goquə gwlab lega'aque', beŋə' naquə to to nasyon, to to yež, to to dia na' chso'e gwde gwdele dižə'. Na' yogue'e zjənyaze' lachə' šyiš' na' zjənoxe'e zin. ¹⁰ Na' tant besyə'əbeine' yogue'e gosə'əne' zižjo, gosə'əne': Diozən' ben' chi' chnabiá, na' Jesocristən' ben' gwxaquə'əlebe ca xilə' dao' ca' gwso'ot beŋə' Izrael ca' par gwnitlao xtolə'əga'aque'ənə',

bagwso'one' par niç cui yeyejcho lao yi' gabilən'.

¹¹ Na' yoguə'əlol angl ca' zjənyechj zjəmbi'e beŋə' golə beŋə' blao ca' na' bia ca' tap bian' nitə' gan' chi' Diozən' chnabi'e, nach angl ca' besə'əzo xibga'aque' lao Diozən' na' bchequə' yichjga'aque'ənə' lao yon' gwso'ela'ogüe'ene', ¹² gosə'əne': Gaquəšgan quinga. Zejlicəne güe'ela'ocho Dioz chechon'.

Zejlicəne güe'echo dižə' can' nse'e yelə' chey che'eni', can' chnabi'e, can' nape' yelə' guac xen,

na' can' nse'e yoguə' c'aste yelə' sin'.

Zejlicəne güe'echo yelə' choxcwlen che' na' güe'echone' yelə' bala'an̄.

Ca'ašgacən̄ gaquə'.

¹³ Nach to beŋə' golə beŋə' blao ben' naque' txen len beŋə' tapechoa ca' gože' nada': —¿Enezdo' no beŋə' quinga zjənyaz lachə' šyišən'? ¿Enezdo' gan' za'aque'?

¹⁴ Na' goža'ane': —Le' nezdō' beṇə' gol dao'.

Nach gwne' nada': —Jesocristən' gwxaquə'əlebene' ca xilə' dao' ca' gwso'ot beṇə' Izrael ca' par gwnitlao xtolə'əga'aque'enə', cheda' blalj xchene'enə' par gwduxjue' xtolə' beṇə'chən'. Na' beṇə' quingan' gosə'əṇabene' le' bnitlaogüe' xtolə'əga'aque'enə'. Na' bitoch bi de'e mal da' əchen yichjla'ažda'oga'aque'enə'. Lega'aque' besə'əžaglaochgüe' lao yežlyon' de'en chso'onlilaže'e Jesocristən'.
¹⁵ Na' de'e na'anə' nite'e lao Diozən' gan' chi'e chnabi'e chso'e yelə' choxcwlen che' do ža do yel gan' chso'elaogüe'ene' yoban'. Na' Dioz ben' chi' chn-
 abia' zoe' len lega'aque' par chcuasə' chcue'eje' lega'aque' len de'e malən'.
¹⁶ Bitoch yesə'əbil yesə'ədonga'aque'. Bgüizən' bitoch gonən mal len lega'aque' na' bitoch yesə'əžaglaogüe' len de'e zeyə'əna', ¹⁷ cheda' Jesocristən' ben' gwxaquə'əlebe ca xilə' dao' ca' gwso'ot beṇə' Izrael ca' par gwnitlao xtolə'əga'aque'enə' chapə chye' lega'aque'. Zoe' gan' chi' Diozən' chnabi'e na' chone' par nitə'əcze' mbalaz len Diozən' zejlicəne. Na' Diozən' gone' par niç cuich yesə'əbeže' na' cuich ṇite'e trist.

8

Sey gažən'

¹ Nach Jesocristən' ben' ble'ida' ca to xilə' dao' bian' bagwso'ote' bzoxxje' sey gažən', na' catə' beyož bzoxxje'ennə' lechguale žizə goquə yoban' do gašj or.
² Nach ble'ida' gažə angl ca' beṇə' ca' zjəzecha gan' zo Diozən'. Diozən' bnežjue' lega'aque' tgüejə trompet. ³ Nach yeto anglən' bedəseche' cho'a mesən' gan' chso'elaogüe'e Diozən', mes de or de'en zo lao Diozən' gan' chi'e chnabi'enə'. Anglən' noxə'e to barser de or gan' yo'o de'e zan yal na' bcuase'en lao yi' ya'alj de'en žia lao mesən'. Bene' ca' par niç Diozən' gwle'ine' žen che yalən' catə' beṇə' chso'one' orasyonṇə' beṇə' ca' bagwlej Diozən' par zjənaque' lažə' ne'enə'. ⁴ Na' lao gwyas žen che yalən' de'en noxə' anglən' gwle'i Diozən' len catə' gwso'on beṇə' ca' orasyonṇə'. ⁵ Nach anglən' gwxi'e ya'alj de'en žia lao mesən' gwlo'en lo'o barserən' na' bzalə'en lao yežlyon' na' gošj gwtin, na' goc bichlə sšag xen, gwyep yes, na' gwxo'.

Trompet ca'

⁶ Nach angl ca' gažə, beṇə' ca' zjənoxə' trompet ca', bosō'ozo'en cho'aga'aque'enə' par bosō'ocueže'en.

⁷ Angl nechən' bcueže' trompet che'enə'. Na' beyož bcueže'ennə' gwche'echgua yej de'en nchixə yi' na' chen lao yežlyon'. Na' yo de'en de lao yežlyon' casi gašjən gwžiai'i in tant gwyeyən, na' yag ca' zjəze lao yežlyon' casi gašjə de'e ca' gosə'əbiayi'in, na' yoguə'əloj yixə' ga' chi' lao yežlyon' gosə'əbiayi'in.

⁸ Na' angl əgwchopen' catə' bcueže' trompet che'enə' to de'en naquə ca to ya'a xen bxopən lo'o nisda'onə' chalə'əṇinən, na' casi gašjə nisda'onə' beyaquən chen. ⁹ Na' casi gašjə bia ca' ža' lo'o nisən' gwsa'atəb, leczə gosə'əbiayi' casi gašjə barcw ca' de'e chaš lao nisən'.

¹⁰ Nach angl əgwyonən' bcueže' trompet che'enə' na' to beljw xen de'en žia le'e yoban' bxopən chalə'əṇinən ca to yi' yech. Na' bxopən lo'o nis che zan yao ca' na' bej ca'. ¹¹ Na' beljōn' nzi'in De'e Zla'. Na' lo'o nis ca' gan' jəchazənṇə' besyə'əyaquən zla', na' beṇə' zan gwsa'at por ni che de'en gwse'eje' nisən'.

¹² Nach angl əgwdapən' bcueže' trompet che'enə' na' casi gašjə bgüizən' beyaquən žchol, na' leczə casi gašjə bio'onə' beyaquən žchol, na' leczə ca'

gwsa'ac casi gašjə beljw ca'. Na' de'e na'anə' part ca' de'en besyə'əyac žčhol bito bosə'əse'eni'in teža na' ni še'elə.

¹³ Nach ble'ida' chda to angl lao be'enə' gwchol yoban' na' benda' gwne' zizjo gwne': —Probchguazə beṇə' ca' ža' lao yežlyon', ca naquən' gac čhega'aque' catə' yoso'ocuež trompet čhe angl ca' yešonə.

9

¹ Nach angl güeye'enə' bcueže' trompet čhe'enə' na' to angl beṇə' zo yoban' ble'ida' betje' lao yežlyon' ca to beljw. Na' le' yo'o lao ne'e saljue' yech gabilən'.

² Na' bsaljue' yech gabilən' na' gwyaschgua žen lo'o yechən' can' chas žennə' catə' chəsə'əbeque' yi' xen lo'o orn. Na' žennə' de'en gwyas lo'o yech gabilən' bcuašə'n bgüižən' can' chac catə'ən chi'ichgua žen dao'. ³ Na' gan' gwyas žennə' besə'əchoj bišə' zan gwyasəb lao yežlyon'. Na' bišə' ca' gwsə'omb znia can' chso'on beṅgoni bian' chsa'aš lao yežlyon'. ⁴ Na' Diozən' bene' mendad cui sa'ob yiṅə' ga' o bi de'en zjənaze' na' ni yag ca', sino yesə'əyižəb beṇə' ca' cui nyišə' sey che Diozən' lao xgaga'aque'enə'. ⁵ Bito be'e latjə so'otəb lega'aque' sino gwyasəb gueyə' bio' gwsə'omb par besə'əžaglaochgüe'. Na' beṇə' ca' gosə'əyižəbən' besə'əžaglaochgüe' can' chžaglaoch catə' chyž beṅjoni'in chio'o. ⁶ Na' catə' əžin ža gaquə can' ble'idaogüe'eda'anə' beṇə' ca' ža' yežlyon' yesə'əṇablaže'e sa'ate', pero bito sa'ate', na' se'enene' cuich ṇite'e, pero bito yesyə'əželene' nac so'one'.

⁷ Na' quinga zjənaquə bišə' ca' ble'ida', zjənaquəb ca cabey bia žja'ac lao gwdilə. Nach yichjga'aquəbən' zo de'e naquə ca coron de or. Na' cho'alaoga'aquəbən' ble'ida'an ca cho'alaob beṇə'ch. ⁸ Na' zjəžiab yišə' de'en naquə ca yišə' yichj no'olə, na' leyga'aquəbən' zjənaquən ca ley leon. ⁹ Na' cuerp čhega'aquəbən' zjənazjən' de'en naquə ca de'e ya de'en chcuasə' chcue'ej lega'aquəb. Na' sšag de'en chso'omb len xilə'əga'aquəbən' nenən ca sšag de'en chso'on zan cabey catə' chsa'acdob chja'aquəb lao gwdilən' zjənxobəb caretən'. ¹⁰ Na' xbanga'aquəbən' zjənaquən ca xban beṅgoni nich bosə'ochimb len gosə'əyižəb beṇə' lao gueyə' bio'onə'. ¹¹ Na' angl bzelaο de'en chnabia' gabilən' leczə chnabia'an bišə' ca', lennə' nzi' Abadon dižə' ebreo na' leczə nzi'in Apolion dižə' griego, zeje dižə' "chžiyai'in".

¹² Bagwde de'e mal nechən' na' ze'e za'ac yechopən.

¹³ Nach angl əgwxope bcueže' trompetən' na' benda' gwne' angl ben' zecha cho'a mes de orən' de'en zo lao Diozən' mes de'en žia lozei dap squinte gan' chso'elaogüe'e Diozən'. ¹⁴ Na' anglən' bolgüiže' angl əgwxopen' ben' noxə' trompetən', gože'ene': —Bosež angl bzelaο ca' tap de'e ca' zjanchej cho'a yao xen de'en nzi' Eofrates.

¹⁵ Nach anglən' bəseže' angl bzelaο ca' tap par nich gwsə'otən' casi gašjə beṇə'chən'. Diozən' bito be'e latjə sa'aš angl bzelaο ca' antslə. Bzague'e lega'aquən par bi izən', na' bi bio'onə' na' bi žan' na' bi orən' gone' mendad sa'ašən. ¹⁶ Na' gwnežda' nita' čhopə gueyoa millon soldad čhega'aquən de'en zjəžia cabey.

¹⁷ Na' quinga ble'idaogüe'eda' cabey ca' na' de'e xio' ca' zjəžia cožə'əga'aquəbən'. De'e xio' ca' zjənazjən to ya de'e chcuasə' chcue'ej cho'alcho'oga'aquən na' yan' naquən de šonə color, de'e xna, de'e asol na' de'e gašə'. Na' yichj cabey ca' zjənaquən ca yichj leon, na' cho'aga'aquəbən' chchoj yi' na' len žen na' len sofr de'en chalə'əniṇ. ¹⁸ Na' casi gašjə beṇə'chən' gwsa'ate' por ni čhe yi' na' žen na' sofr de'en besə'əchoj cho'a cabey ca'. ¹⁹ Bosə'ochimb

cho'aga'aguabən' par gwso'otəb beṇə' na' leczə ca' xbanga'aguabən', la' xbanga'aguabən' zjənaquən ca bel, zjənsa'an yichjei par niç gwsa'on beṇə'.

²⁰ Na' beṇə' ca' besyə'aga'an cui gwsa'at catə'an gwyas cabey ca' lao yežlyon', bitoczə besyə'ədinjene' de'e malən' chso'one' ca naquən' chso'elaogü'e de'e xio' ca' na' chse'ejni'alaže'e lgu'a' lsaquə' de or, de plat, de brons, de yej na' de yag. Na' lgu'a' lsaquən' chse'ejni'alaže'ena' bito chəsə'əle'in, nic chse'enen, na' nic chac yoso'ota cuinga'aquei. ²¹ Na' bitoczə besyə'ədinje beṇə' ca' besyə'aga'anən' che de'e malən' chso'one'ena' ca naquən' chso'ote' beṇə', na' ca naquən' chəsə'ənaogü'e' de'en chso'on beṇə' goža' ca', na' choso'oza' xtoga'aque' na' chso'one' bitə'ətezəchlə de'e yelə' zto' de'en zjənac ca', na' chəsə'əbane' bi de che beṇə'.

10

Angl ben' noxə' librən'

¹ Nach ble'ida' yeto angl gual, gwze'e yoban' betje' lao yežlyon' to lo'o bejw. Na' gwyeçhj to yita' yichje'ena'. Na' cho'alaogü'e'ena' gwnatitan can' chna bgüizən' na' ni'e ca' ble'ida'an ca yag bye de'en chalə'əniṇ. ² Anglən' noxə'e to libr dao' de'en nyaljo na' ni'e ličan' bsoe'en lao nisdə'onə' na' de'e yeglən' lao yežlyon'. ³ Na' bisye'e zizjochgua can' chosya'a leon ca', na' cata' bisye'ena' gošj gwtin gaž las. ⁴ Na' ca' naquə dižə' de'en benda' lao gošj gwtinnə' bazon gwzoja'an catə'əczla to beṇə' zo yoban' gwne' nada': —Bito gwzojo' dižə' de'en bendo' lao gošj gwtinnə', con gwdapən lo'o yichjla'aždaogo'ona'.

⁵ Nach anglən' ben' zo šla'a ni'ena' lao nisdə'onə' na' yešla'an lao yežlyon', gwlis ne'e ličan' yobalə ⁶ na' bzoe' Dioz ben' zo zejlicane' testigw de que cho'e dižə' li, Dioz ben' ben beṇəch, bene' bia ca' ža', na' len bitə'ətezəchlə de'e zjəde yoban', lao yežlyon' na' lo'o nisən'. Gwne': —Bitoch cuezə Diozən' par gone' can' bzie' bia' gone'. ⁷ Catə' angl gažən' solao əgwcueže' trompet che'ena' cana'achən' gaquə complir de'en nžia Diozən' bia' gaquə ca naquən' babzejni'ine' profet che' ca' beṇə' ca' gwso'elao' le', bzejni'ine' lega'aque' de'ena' cuinə' se'ejni'i beṇə' yeziqə'əchlə.

⁸ Na' ben' zo yoban' be'elence' nada' dižə' de'e yoblə gwne': —Jəxi' libr da'onə' de'en nyaljo de'en noxə' anglən' ben' zecha zo šla'a ni'ena' lao nisdə'onə' na' de'en yešla'a lao yežlyon'.

⁹ Nach gwyə'a gan' zecha anglən' na' gwṇaba' libr da'onə'. Na' anglən' gože' nada': —Beṇə'ən na' gwdaon. Na' lo'o cho'onə' gaquədo'on zix ca ši'in bia ser, pero lo'o li'onə' yeyaqun zla'.

¹⁰ Na' gwxi'a libr da'onə' noxə' anglən' na' gwdaogua'an. Na' lo'o cho'ana' goquən zix ca ši'in bia ser, pero beyož gwdaogua'anə' beyaquən zla' lo'o li'anə'. ¹¹ Nach anglən' gože' nada': —De'e yoblə cheyalə' go'o dižə' nac gaquə che zan yež, na' che zan nasyon, na' che beṇə' chsa'ac gwde gwdele dižə', na' che zan rei.

11

Chopə testigw

¹ Nach Jeso'osan' bene' nada' to ya de'e gwchixəda' yo'onə' na' gože' nada': —Žjəxi'o medid che yo'odao' əblao che Diozən' na' che mesən' gan' cho'ela'ochone', na' gwlabo' balə beṇə' chso'elaogü'e'ene'. ² Pero bito si'o medid chyo'onə', cheda' naquən par beṇə' ca' cui chso'onlilažə' Diozən', na' beṇə' ca' cui chso'onlilažə' le' so'onchene' syoda che'ena' con nac chse'enene'

lao yechopəyon bio'. ³ Ešela'a čhopə testigw čhia' so'e xtiža'anə' tml čhopə gueyoa gyon ža. Na' sa'aze' lachə' gasj.

⁴ Testigw ca' čhopə gwxaquə'əlebəga'aque'enə' ca yag olibo ca' čhopə de'en zo lao Xancho Diozən' na' ca candeler ca' čhopə de'en zjəzo laogüe'enə'. ⁵ Na' notə'ətezə beñə' yene'e gon mal len lega'aque' əchoj yi' cho'a testigw ca' na' əgwzeyən beñə' ca' so'on ca'. Ca' gaquə əsa'at beñə' ca' šə' bi so'onene' testigw ca'. ⁶ Na' testigw ca' naquən lao na'aga'aque' so'one' ca cui gaquə yejw yedote lao so'e xtižə' Diozən', na' naquən lao na'aga'aque' so'one' ca yeyac nis ca' chen, na' leczə naquən lao na'aga'aque' so'one' ca gaquə bitə'ətezəchlə de'e mal de'en se'enene' gaquə. ⁷ Na' cata' yeyož əso'e xtiža'anə' cana'ach əchoj lo'o yech gabilə' to de'e xio' de'en naquə ca to bia znia na' əxitə'ən nizən lega'aque' na' gotten lega'aque'. ⁸ Na' cuerp chega'aque'enə' yega'anən šonə ža šgobiž lao lquey syoda əblaonə' gan' gwso'ote' nada' naca' Xanle. Na' syodan' gan' gwso'ote' nada' gwxaquə'əleben ca syoda Sodoman' na' ca nasyon Egipton'. ⁹ Na' lao šonə ža šgobiž yesə'əžag beñə' zjənaquə zan nasyon, beñə' za'ac zan yež, beñə' zjənaquə zan dia na' chsa'aque' gwde gwdeleə dižə', desə'əgüie' de'e beñə' guat ca' zjədə' lao lqueyən' na' bito so'e latjə no əgwcuasə' lega'aque'. ¹⁰ Na' beñə' ca' ža' lao yežlyon' yesyə'əbeine' cata' bagwsa'at testigw čhia' ca', tant zed əgwsa'aquene' xtiža'anə' de'en gwso'elene' lega'aque'. Nach so'one' legr, na' yoso'onežjo ljuežjga'aque' no regal. ¹¹ Nach ble'idaogüe'eda' goc doxen can' gwne'ena'. Na' cata' goc šonə ža šgobiž gwsa'at testigw ca', cana'ach Diozən' bosbane' lega'aque' na' gosə'əzeche' de'e yoblə. Na' yoguə' beñə' ca' besə'əle'i can' besyə'əban testigw ca' besə'əžebchgüe'. ¹² Nach testigw ca' čhopə gwse'enene' gož Diozən' lega'aque' zižjo: —Le'e yeda, le'e yeyep nga.

Nach besyə'əyep'e yoban' to lo'o bejw, na' besə'əle'i beñə' contr chega'aque' ca'. ¹³ Na' ca orən' lechguale gwxo' na' gwžiai'i' to part syodan' na' gaža ml beñə' gwsa'ate' cata'ən gwxo'. Na' beñə' ca' besyə'əga'an' cui gwsa'ate' lechguale besə'əžebe' na' gwso'ela'ogüe'e Diozən' ben' zo yoban'.

¹⁴ Bagwde de'e mal əgwchopen' na' ze'e gaquə de'e əgwyonən'.

Can' goquə cata' angl beñə' gažən' bcueže' trompet che'ena'

¹⁵ Nach angl beñə' gažən' bcueže' trompet che'ena' na' beñə' ca' ža' yoban' gosə'əne' zižjo gosə'əne':

Xancho Diozən' na' Xi'ine' Cristən' bagwsə'one' ca zo gwxiye'enə' xni'aga'aque'enə',

na' lega'acze'enə' yesə'ənabi'e beñə' ža' yežlyon' zejlicane.

Crist na'anə' gwlež Diozən' par chaclene' beñəčan'.

¹⁶ Nach beñə' golə beñə' blao ca' tapechoa, beñə' ca' zjəchi' chəsə'nabia'alene' Diozən', besə'əzo xibga'aque' laogüe'enə' na' besə'əchequə' yichjga'aque'en lao yon' gwso'elaogüe'e Diozən', ¹⁷ gosə'əne':

Chonəto' yelə' choxcwlen čio', Xanto'.

Len' naco' Dioz ben' napə le'ezelaogüe yelə' guac xen.

Bazoco' cata'ən bxi'o yežlyon', na' ca'aczən' so' cata'ən yeyož yedon.

Na' len yelə' guac čio'onə' chnabi'o.

¹⁸ Beñə' nasyon ca' ža' yežlyon' besə'əže'e le',

pero na'a babžin ža əgwnežjo' castigw chega'aque'.

Babžin ža əchoglaogo' che yoguə' beñə' bagwsa'at šə non' napə dolə'.

Na' gwnežjo' yelə' bala'an' che beñə' ca' gwso'on xšino'onə' ca de'en gwso'e xtižo'onə',

na' len yeziq'uə'əchlə beṇə' ca' bagwlejo' par zjənaque' lažə' na'onə' na' gwsa'ape' le' respet.

Egwnežjo' lega'aque' yelə' bala'an la'anə'əczə šə gwsa'aque' beṇə' blao o la'anə'əczə šə cui gwsa'aque' beṇə' blao žlac gosə'anite'e yežlyon'.

Łeczə gono' par ničh beṇə' ca' choso'ožiai'i' ljuēžjga'aque' o chso'one' bichlə de'e mal lao yežlyon' əsa'aque' castigw lao yi' gabilən'.

¹⁹ Nach ble'ida' nla'axejə gan' chso'elaogü'e Diozən' yoban' na' ble'ida' caj gan' ža' de'en nyoj can' ben Diozən' mendad so'on beṇə' Izrael ca' par ničh gaquəlene' lega'aque'. Na' lao ble'ida' de'e ca' gwyep yes, gocchgua sšag na' gošj gwtin, na' łeczə gwxo' na' gwche'echgua yejən'.

12

No'olən' na' gwxiye'ena'

¹ Na' ben Diozən' par ničh ble'ida'ogü'e'eda' le'e yoban' to de'e zaquə' yebanecho, ble'ida' to no'olə nyaze' bgüižən' ca xe'. Na' zeche' lao bio'onə' na' yičhj'e'ena' zon to coron de šižin beljw. ² No'e bdao' na' bachaque' bes che yelə' sannə' na' bisye'e tant chžaglaogü'e' lao chzane'ena'. ³ Na' ble'idaogü'e'eda' yeto de'e zaquə' yebanecho le'e yoban', ble'ida' gwxiye'ena' beyaquan to bel gaž yičhj bia xen na' bia xṇa, na' žia ši lozəb na' tgüejə coron nitə' yičhjəb ca'. ⁴ Na' catə' gwda xbambən' bchinjən' casi gašjə beljw ca' zjəžia le'e yoban' na' besə'əyinjən' lao yežlyon'. Nach belən' bian' beyaque gwxiye'ena' gotə'əb xni'a no'olən', gwlezəb par šebəb bda'onə' catə' sane'əbo'onə'. ⁵ No'olən' gwxane' to bi'i byo, bi'i nabia' yoguə' nasyon. Na' gombo' ca' yoso'ozexjw yičhj beṇə' nasyon ca' yoso'ozenague' chebo'. Diozən' bezi' beque'əbo' beche'əbo' gan' chi'e chnabi'ena'. ⁶ Nach no'olən' boxonjene' gwxiye'ena' par šeje' to latjə gan' cui no ža' gan' banonšao' Diozən' par so no'olən', na' lao soe' na' Diozən' gone' le' mantener tml čhopə gueyoa gyon ža.

⁷⁻⁸ Gwde na' goc gwdilən' yoban', na' angl əblao ben' le Miguel na' soldad che' ca' gosə'ədiləlene' belən' bian' beyaque gwxiye'ena'. Na' gwxiye'ena' na' angl bzelaο chei ca' bito gosə'əzoin anglən' len soldad che' ca'. Besyə'əbeje' lega'aquan yoban' na' bitoch chso'e latjə žjəya'acquəchən yoban' de'e yoblə. ⁹ Na' bosyo'ozalə'e gwxiye'ena' len angl bzelaο chei ca' lao yežlyon'. Ca' goc che' de'en beyaque bel xennə', de'en le Satanə. Zon dezd catə'ən gwxe yežlyon' chxəoyaguən yoguə' beṇəch.

¹⁰ Nach benda' to beṇə' zo yoban' gwne' zižjo gwne': —Bač bžin ža bosla Diozən' beṇəchən' lao na' gwxiye'ena' len yelə' guac de'en nape'ena' na' chnabi'e' lega'aque'. Na' babžin ža chi' Cristən' chnabia'alene' Diozən', Crist nan' bsele'e par goclene' beṇəchən'. Babesyə'əbeje' gwxiye'ena' de'en bcuiš beṇə' bišə'əcho ca' lao Diozən' do ža do yel nan de que de xtolə'əga'aque', na' ṇa'a baboso'ozalə'en lao yežlyon'. ¹¹ Beṇə' bišə'əcho ca' beṇə' ca' bagwsa'at, gosə'əzoinə' cui bosə'əzenague' che gwxiye'ena' lao gosə'anite'e čhedə' gwso'onlilaže'e Jesocristən' ben' blalj xchene'ena' por ni checho. Na' łeczə gosə'əzoinə'en čhedə' gwso'e dižə' de que chso'onlilaže'e Jesocristən'. Gwsa'acbe'ine' yejni'a sa'ate' cle ca' yesə'əbejyichje' Jesocristən' ben' gwxaquə'əlebe ca' xilə' dao' ca' gwso'ot beṇə' Izrael ca' par gwnit-lao xtolə'əga'aque'ena'. ¹² De'e na'anə' ledoyebei chio'o zocho yoban'. Probchguazə beṇə' nitə' doxen lao yežlyon'. Probchguazəga'aque' čhedə' babžin gwxiye'ena' gan' nite'ena'. Łechgualə chžə'an de'en chega'an yetozə

tyemp dao' par gonən can' chene'ennə' na' de'e na'anə' gonchguan contr beṇəchən'.

¹³ Na' belən' bian' beyaque gwxiye'enə' catə' gočbe'ib de que babesyə'əbeje'eb yoban' na' babžimb lao yežlyon', nach belagdob no'olən' ben' gwɣan bi'i byo da'onə'. ¹⁴ Pero Diozən' goclene' no'olən', bene' ca gwzo čopə xile'e de'e xen caczə che to bsia dao' par nič cui gwɣen belən' le'. Na' gwzoe' bžinte' latjə dašən' gan' banonšao' Diozən' soe' na' gan' gone' le' mantener šon iz yo'o gašjə. ¹⁵ Nach bchoj nis zil cho'a belən' caczə to yao la' gone'eb əžinten gan' zo no'olən' par gua'an le'. ¹⁶ Pero na' Diozən' goclene' no'olən', bene' par nič yežlyon' güe'ejən nisən' de'en bchoj cho'a belən'. ¹⁷ Na' belən' bžə'achguab no'olən' nach jəyemb contr xi'ine' ca' yelə', beṇə' ca' chso'on can' non Diozən' mendad goncho, beṇə' ca' leczə chso'e dižə' de que chso'onlilaže'e Jeso'osən'.

13

Čopə bež bia əznia

¹ Na' gwzeča' cho'a nisdə'onə' na' ble'ida' bchoj to bež əznia lo'o nisdə'onə'. Na' nitə' gažə yichjəb na' žia ši lozəb na' lao to to lozəb ca' nitə' tgüejə coron. Na' lao to to yichjəb ca' nyoj to la de'en chloe' de que chon cuimb ca Dioz.

² Ble'ida' bežən' ca to tigr na' ble'ida' ni'ana'ab ca' zjənaquən ca ni'ana' os, na' cho'abən' naquən ca cho'a leon. Na' belən' bian' beyaque gwxiye'enə' bemb par nič gwnabia' bežən', na' bnežjw belən' leḅ yelə' guac par nič bemb ca gosə'ənitə' yoguə'əloj beṇəch xni'abən'. ³ Na' ble'ida' to yichj bežən' naquəchguan güe', na' naquən ca to de'e gatleme pero bito gotəb. Na' yoguə'əloj beṇə' besyə'əbanene' de'en beyaquebən' na' gwnitə'əcze' xni'abən'.

⁴ Na' gwso'elaogüe'e belən' bian' beyaque gwxiye'enə', gwsa'ache'ine' de que belən' bemb par nič chnabia' bežən'. Na' leczə gwso'elaogüe'e bežən', gosə'əne': —Bež nga chnabi'achəb ca notə'ətezəchlə beṇə', na' notono no soi tiləlen leḅ.

⁵ Na' bežən' be'eb dižə' de que naquəb ca Diozən' na' be'eb bichlə dižə' bžia bnitə'əb Diozən' lao čopeyon bio' gwnabi'ab. ⁶ Gwnečguab contr Diozən', bžia bnitə'əb le' na' leczə bžia bnitə'əb yoban' na' len beṇə' ca' ža' na'. ⁷ Na' gwyo'o lao na' bežən' gwdiḷəlemb beṇə' ca' bagwlej Diozən' par zjənaque' lažə' ne'enə' na' bzob lega'aque' xni'abən' par bchi' bsaquə'əb lega'aque'. Nach gwnabi'ab beṇəchən' yoguə' nasyon yoguə' yež, yoguə' dia na' yoguə' beṇə' chso'e gwde gwdelə dižə'. ⁸ Na' yoguə' beṇə' ca' cui zjənyoj laga'aque'ena' le'e libr che Jesocristən' gwso'elaogüe'eb. Catə'an ze'e xe yežlyon' banyoj la beṇə' ca' zjənapə yelə' mban zejlicane le'e libr che Jesocristən' ben' gwxaquə'əlebe ca xilə' dao' ca' gwso'ot beṇə' Izrael ca' par gwnitlao xtolə'əga'aque'ena'.

⁹ Le'e žia nagle de'e chene legwzenag de'e nga. ¹⁰ Beṇə' ca' choso'ozo beṇə' yoblə xni'aga'aque'ena' ca pres o ca esclabos, can' chso'one' ca' gac čega'aque'. Na' beṇə' ca' chso'ot beṇə' len yes ya, leczə can' sa'ate'. De'e na'anə' chonən byen sotezə so chio'o bagwlej Diozən' par naccho lažə' ne'enə' gonlilažə'əchone' bitə'ətezə chac checho.

¹¹ Na' ble'ida' yeto bež bchojəb lo'o yon'. Na' bežən' žia čopə lozəb ca loz xilə' dao' pero be'eb dižə' goxoayag can' chon belən' bian' beyaque gwxiye'enə'. ¹² Na' bežən' bian' ble'ida' de'e neche bemb par nič bež əgwchopen' gwnabia'ab lao leḅ na' bnežjəb leḅ doxen yelə' gwnabia' de'en gwdapəbən'. Nach bia əgwchopen' bemb par nič beṇə' ca' ža' yežlyon' gwso'elaogüe'e bia nechən' bian' naquə güe' yichjəina', güe' de'en

goquə ca to de'e gatlemb. ¹³ Na' bia əgwchopen' bemb de'e zan de'e zaquə' yesyə'əbanchgüei beṇə', xte bemb par niç beṇachən' besə'əle'ine' yi' le'e yoban' na' betjən lao yežlyon'. ¹⁴ Na' laogüe de'en bemb de'e besyə'əbanene'enə' lao bež nechən', bxoayaguəb beṇə' ža' yežlyon' par niç ca' gwsə'elaogüe'e bia nechən' bian' goquə güe' yichjəbən' len yes yanə', güe' de'en baša gatlemb. Na' bež əgwchopen' bemb mendad par gwsə'one' to lgua'a lsaquə' bež nechən'. ¹⁵ Na' goquən lao na' bež əgwchopen' bemb par niç gwyo'o lgua'a lsaquə' bež nechən' biš xne. Na' lgua'a lsaquə'ənə' be'eczən dižə' na' benən ca gwsə'ote' beṇə' ca' cui gwsə'elao' len. ¹⁶ Na' leczə benən byen par niç goso'ozo yoguə' beṇə' señy che bežən' na'aga'aque' liča o lao xgaga'aque', beṇə' blao na' la'anə' beṇə' cui zjənaquə blao, na' la'anə' beṇə' gwni'a o beṇə' yaša', na' la'anə' beṇə' zjənaquə esclabos o beṇə' cui zjənaquə esclabos. ¹⁷ Bitobi bi goquə so'ote'e na' nic goquə bi yesə'əzi'e šə cui zjəzoe' señy che bežən' o šə cui zjəzoe' nomero de'en zejən labən'. ¹⁸ Na' nga de to yelə' sin' de'e əgwzejni'in chio'o che bežən', na' šə no chejni'in cheyalə' gwlabə' nomero chebən'. Na' nomero chebən' naquən can' chlab chio'o beṇach, xop gweyoa gyon xop.

14

De'en gwsə'ol beṇə' ca' to gweyoa tapeyon mil gwsə'elaogüe'e Diozən'

¹ Nach bgüia' na' ble'ida' Jesocristən' ben' gwxaquə'əlebe ca xilə' dao' ca' gwsə'ot beṇə' Izrael ca' par gwnitlao xtolə'əga'aque'ənə', zeche' lao ya'a Sionnə' len togweyoa tapeyon mil beṇə' yoblə. Na' nyoj le'enə' na' len la Xə' Diozən' lao xga beṇə' ca'. ² Na' benda' chso'ol beṇə' zan beṇə' ža' yoban'. Na' benda'an ca chsiž catə' dechgua yaon' na' ca nen catə' lechgualə chñin, na' benda' nenən can' choj arpan' catə' chəsə'əgolə' de'e zan tš'i'izə. ³ Na' benda' chso'ole' to imno cobə lao Diozən' gan' chi'e chnabi'enə' gan' nitə' bia ca' tap na' beṇə' golə blao tapechoa ca'. Pero beṇə' ca' to gweyoa tapeyon mil na'azə goc boso'osede' imnon' par gwsə'ole'en. Beṇə' ca'anə' zjənchoje' entr beṇachən' chse'ejle'e de que Jesocristən' gwdixjue' xtolə'əchon'. ⁴ Beṇə' ca' chsa'aque'ne' che tozə Jesocristən', na' de'e na'anə' gwxaquə'əlebga'aque'ne' ca beṇə' cui chgo'o xtoi. Beṇə' ca' chso'one' con can' na Jesocristən' ben' gwxaquə'əlebe ca xilə' dao' ca' gwsə'ot beṇə' Izrael ca' par gwnitlao xtolə'əga'aque'ənə'. Lega'aque'ne' zjənchoje' entr beṇachən' chse'ejle'e de que Jesocristən' gwdixjue' xtolə'əchon'. ⁵ Chso'e por dižə' li, na' bitobi bi de'e mal da achen yichjla'ažda'oga'aque'ənə'.

De'en gosə'əna šonə angl

⁶ Nach ble'ida' yeto' angl gwchoj yoban' chde' lao be'. Gwdixjue'ine' beṇə' ža' yežlyon' to dižə' güen dižə' cobə che Diozən' de'e zaquə' zejlicəne. Na' gwdixjui'en len beṇə' zjənaquə to to nasyon, to to yež, to to dia, na' beṇə' chso'e gwde gwdele dižə'. ⁷ Gwne' zižjo gože' lega'aque': —Le'e gapə Diozən' respet, le'e güe' Diozən' yelə' bala'an, chedə' babžin or gone' castigw beṇə' ca' cui chso'elao' le'. Le'e güe'elao' Diozən' ben' ben yoban', yežlyon', nisdə'onə' na' bej ca'.

⁸ Na' gwde na' bchoj yeto angl, na' gwne': —Baç bžin ža cuiayi' syoda Babilonian' la' beṇə' gwnabia' ca' ža' syodan' bagwsə'one' par niç beṇə' ca' ža' yoguə' nasyon ca' choso'ozoe' Diozən' ca'alə cuich chso'elaogüe'ene'.

⁹ Nach gwde na' bchoj angl əgwyone, na' leczə gwne' zižjo gwne': —Notə'ətezə beṇə' chso'elao' bežən' na' lgua'a lsaquə' de'en naquə ca leb

na' notə'ətezə bagwso'e latjə bosso'ozoe señy che bežən' lao xgaga'aque' o na'aga'aque', ¹⁰ lega'aque'enə' gon Diozən' castigw gual zejlicane tant chze'e che de'e malən' chso'one'. Yesə'əzaquə'əzi'e gan' chalə' yi' na' sofr: Na' angl che Diozən' na' Jesocristən' ben' gwxaquə'əlebe ca xilə' dao' ca' gwso'ot beñə' Izrael ca' par gwnitlao xtolə'əga'aque'enə' yesə'əle'ine' can' gac che beñə' ca'. ¹¹ Na' chas žlen che yi'inə' gan' yesə'əžaglaogü'e zejlicane, na' do ža do yel bito bi dezcanz gatə' chega'aque'. Can' gaquə che beñə' ca' chso'elao' bežən' na' lgua'a lsaquə' de'e naquə ca leb beñə' ca' zjəzo señy che labən' lao xgaga'aque' o na'aga'aque'. ¹² De'e na'anə' chonən byen sotezə so chio'o bagwlej Diozən' par naccho lažə' ne'enə' goncho can' none' mendadən' na' sotezə socho gonlilažə'əcho Jeso'osən'.

¹³ Na' benda' to beñə' zo yoban' gože' nada': —Bzoj de que dezd na'a beñə' ca' chso'onlilažə' Xancho Jesocristən' nite'e mbalaz catə'an sa'ate'. Bzoj de que Spirit che Diozən' nan de que de'e li nite'e mbalaz cheda' Diozən' gwcueze' de'en gwlo'e lao na'aga'aque' so'one' na' Diozən' əžjsa'alaze'e yoguə' de'e güen de'en bagwso'one'.

Catə' Diozən' yotobe' cwseš che'enə'

¹⁴ Nach bgüia' na' ble'ida' to bejw šyiš le'e yoban' na' chi' Xi'in Diozən' cožə' bejon', naque' ca to beñəch. Na' zo to coron de or yichje'enə' na' noxe'e to oz de'en nłachgua. ¹⁵ Na' bchoj yeto angl lo'i gan' chso'elaogüe'e Diozən' yoban' na' gwne' zizjo gože' ben' chi' cožə' bejon': —Babžin or yetobo' trigw de'en goquə lao yežlyon', la' bagolan. Na' beçhoguən.

¹⁶ Nach ben' chi' cožə' bejon' beçhogue' trigon' len ozən' par bezi'e cwsešən'.

¹⁷ Na' bezchoj yeto anglən' gan' chso'elaogüe'e Diozən' yoban' na' leczə noxe'e to oz de'en nłachgua. ¹⁸ Nach bezchoj yeto anglən' beñə' zo gan' zo mes gan' chso'elaogüe'e Diozən', ben' chapə yi' de'en chalə' lao mesən'. Na' anglən' gwne' zizjo bolgüize' angl əgwchopen' ben' leczə noxə' ozən', gože'ene': —Bagüe obas ca' de'en žia lao yežlyon'. Beçhogga'aquən len oz chio'onə' niç yetobəga'aco'on.

¹⁹ Nach anglən' beçhogue' obas ca' de'en žia lao yežlyon' na' bzale'en lo'o ša' xen de yej gan' choso'osi'en par chechoj xisein'. Na' zejen dižə' de que Diozən' botobe' beñə' ca' cui bosso'ozenag che' par benchgüe' lega'aque' castigw. ²⁰ Beñə' zan juisyən' botobe' na' bnežjue' castigw chega'aque'enə', na' tant besə'əžaglaoga'aque' xte ble'ida' xçhenga'aque'enə' ca nis oban' de'en bosso'osie' lo'o šan' de'en chi' fuerlə syodan'. Na' gwžian de'e zil lao yežlyon', bžinten ca tmetr yo'o gašjə yelə' zitjw na' bšiljon šonə' gueyoa kilometros.

15

Angl ca' gwso'on par niç gotə' gažə castigw de'en bselə' Diozən' le'ezelaogüe

¹ Na' ble'ida' yeto de'e leçhguale' zaquə' yebanecho le'e yoban', to de'e žialao xen. Ble'ida' gažə angl beñə' naquə lao na'aga'aque' so'one' par niç gaquə yegažə de'e mal par yeyož əgwlo'e Diozən' can' chnežjue' castigw che beñə' chso'on de'e malən'.

² Na' ble'ida' to de'en naquə ca to nisdə' de bidr nçhixən len yi' na' lao nisdə'onə' zjəzecha beñə' ca' gwso'on gan cui gwso'elaogüe'e bežən' na' lgua'a lsaquə' de'e naquə ca leb na' leczə cui gwso'e latjə yesə'anite'e señy çheb o numero de'en zejen labən'. Na' beñə' ca' zjənoxə'e tgüejə arpa de'en bnežjw Diozən' lega'aque'. ³ Na' chso'ole' to imno de'en naquə ca de'en bzejni'i de'e Moizežən' beñə' Izrael ca', Moizež ben' goquə beñə' güen xšin Diozən'.

Jesocristən' ben' gwxaquə'əlebe ca xilə' dao' ca' gwso'ot beṇə' Izrael ca' par gwnitlao xtolə'əga'aque'ənə' bzejni'ine' beṇə' ca' ble'ida' niçh chso'olē'en, na' nan:

Ḳanto' Dioz, le' chono' miḷagr xen na' bichlə de'e zaquə' yebaneto'.

Len' napo' le'ezelaogüe yelə' guac xen.

Na' zdaczo' liçha na' chono' can' na'onə'.

Len' chnabi'o nasyon ca'.

⁴ Gwžin ža catə' yoguə' beṇə'chən' əsa'ape' le' respet na' əso'elaogüe'e le'.

Len' naco' beṇə' la'aždao' xi'ilažə' juisy.

Na' beṇə' ža' yoguə'əlol nasyon əso'elaogüe'e le' catə' la'aque' laogo'onə',

çhedə' babesə'əle'ine' de que yoguə'əlol de'en babeno'onə' beno'on can' cheyalə' gaquan.

⁵ Na' gwde de'e ca' ble'ida' nḷa'axejə gan' chso'elaogüe'e Diozən' yoban' na' naquan ca yo'o de lachə' de'en gwso'on beṇə' Izrael ca' latjə dašən' gan' gwzo Diozən' len' lega'aque'. ⁶ Na' angl ca' gažə, beṇə' ca' ble'ida' antslə, besyə'əchoje' gan' chso'elaogüe'e Diozən' yoban', beṇə' ca' naquan lao na'aga'aque' so'one' par niçh gaquə gažə de'e mal ca' lao yežlyon'. Na' zjənyaze' lachə' fin de'en naquə de'e žyiš xilə' juisy, na' cho'alçho' to toga'aque' zjənyechjən sinš de or.

⁷ Nach to bia ca' tap bia ca' nitə' lao Diozən' bnežjob angl ca' gažə tgüejə tas de or gan' yo'ožə to de'en gwxaquə'əleben ca castigw gual de'en əgwnežjo Diozən' beṇə' ca' chso'on de'e malən', Dioz ben' zoczə zejlicane. ⁸ Na' de'e tant chey che'eni' gan' zo Diozən' na' tant yelə' guac xen nape' xte goc ca to ga ças žen gan' chso'elaogüe'ene' yoban'. De'e na'anə' notono no goc šo'o gan' chso'elaogüe'ene' xte que catə'əch beyož goc de'e mal ca' gažə de'en naquə lao na' angl ca' gažə.

16

Tas ca' gan' yo'ožə de'en gwxaquə'əlebe ca castigw de'en gwnežjo Diozən' beṇə' mal ca'

¹ Nach benda' gwṇe Diozən' zižjo gan' chso'elaogüe'ene' yoban' gože' angl ca' gažə': —Le'e žja'ac le'e zjəcuasə de'en yo'ožə lo'o tas chele ca' lao yežlyon', la' de'en zjəyo'ožənnə' gwxaquə'əleben ca castigw gual de'en əgwnežjuə' beṇə' ca' chso'on de'e malən'.

² Nach gwyej angl nechən' jəcuase' de'en yo'ožə lo'o tas che'enə' lao yežlyon' na' yoguə' beṇə' ca' zjəzo señy che bežən' na' chso'elaogüe'e lguə'a lsaquə' de'en naquə ca leb gosə'əbie' to çlas yežə' əzban na' gwłachguan.

³ Nach angl əgwchopen' bcuase' de'en yo'ožə lo'o tas che'enə' lao nisdə'onə' na' nisdə'onə' beyaquan ca chen che beṇə' guat. Na' gwsə'at yoguə' bia ca' ža' lo'o nisən'.

⁴ Nach angl əgwyonen' bcuase' de'en yo'ožə lo'o tas che'enə' lao yao ca' na' bej ca' na' lecžə besyə'əyaquan çen. ⁵ Na' benda' de'en gož anglən' ben' çhapə nisən' de'en de lao yežlyon', gože' Diozən': —Ḳanto' Dioz, len' naco' beṇə' la'aždao' xi'ilažə' juisy. Len' bazoczə' catə'ən bxi'o yežlyon' na' zoczə' nā'a. Na' zdaczo' liçha ca de'en chnežjo' beṇə' mal ca' castigw quinga de'en çhsə'aque'.

⁶ Lega'aque' bagwso'ote' profet ca' beṇə' ca' gwso'e xtižə'onə' na' bagwso'ote' nochlə beṇə' gwlejo' par gwsə'aque' lažə' na'onə'. De'e na'anə' babeno' par niçh əse'eje' nis de'en babeyac çen. Ca'aczən' cheyalə' gac çhega'aque'.

⁷ Na' benda' yeto angl ben' zecha cho'a mes gan' chso'elaogüe'e Diozən' gwne': —Ḳanto' Dioz, lən' napo' le'ezelaogüe yelə' guac xen. De'e li' zdaczo' liçha can' chnežjo' castigw che beṇə' mal ca' na' chono' can' na'onə'.

⁸ Na' angl əgwdapen' bcuase' de'en yo'ožə lo'o tas che'enə' lao bgüižən' na' benən par ničh bgüižən' bzeyən beṇačhən' len yi' cheina'. ⁹ Lechgualə bzeyən beṇačhən', pero bito besyə'ədiñjene' xtolə'əga'aque'enə' par əso'elaogüe'e Diozən'. Nachle boso'ožia boso'onite'e Diozən' ben' chon par ničh chəsə'əžaglaogüe'.

¹⁰ Na' angl güeye'enə' bcuase' de'en yo'ožə lo'o tas che'enə' gan' chi' bežən' chnabi'ab na' beyac žčhol doxen gan' chnabi'abən'. Na' beṇə' ca' ža' gan' chnabi'abən' gwsa'oya'a ložə'əga'aque'enə' tant besə'əyiyə'a cuerp čhega'aque'enə'. ¹¹ Na' bitoczə besyə'ədiñjene' de'e malən' gwso'one'enə' la'anə'əczə besə'əžaglaochgüe', nachle boso'ožia boso'onite'e Dioz ben' zo yoban' por ni che de'en chse'ey chəsə'əla' cuerp čhega'aque'enə' na' por ni che de'en zjəžie' yežə'əna'.

¹² Na' angl əgwɔpen' bcuase' de'en yo'ožə lo'o tas che'enə' lao yao xen de'en nzi' Eofrates na' bebiž nis yaon' na' beyaljo to nez par ničh rei ca' za'ac gan' chla' bgüižən' yesə'əžine' gan' gaquə gwdilən'.

¹³ Nach šonə de'e xio' ca' besyə'əyaquən bləž. Na' to bləžən' ble'ida' bchojəb cho'a beṇən' bian' beyaque gwxiye'enə', na' yetob bchojəb cho'a bežən', na' yetob bchojəb cho'a bež əgwchope bian' choe' dižə' goxoayaguan' par ničh beṇačhən' chso'elaogüe'e bež nechən'. ¹⁴ De'e xio' quinga gwso'onən miłagr na' jəsə'ətoḅən yoguə' beṇə' ca' chəsə'ənabia' doxenlə lao yežlyon'. jəsə'ətoḅən lega'aque' tozə latjə par ničh nite'e probnid yesə'ədiləlene' Diozən' ben' napə le'ezelaogüe yelə' guac xen catə'ən əžin žan' nžie' bia' yesə'ədiləlene'ene'. ¹⁵ Nach benda' gwna Xi'iq̄ Diozən': —Le'e gon xbab de que nada' yida' əgwnežjua' castigw che beṇə' ca' chso'on de'e malən', na' senyala' lega'aque' can' chon to beṇə' bguan. Mbalaz sole šə bazole probnid chbezle nada' catə'ən yida'anə'. Pero šə cuiṇə yediñjele de'e malən' chonle catə'ən yida'anə', gona' ca sa'ache'i yoguə'əlol beṇačhən' ca naquə yoguə' de'e mal ca' babenlen'.

¹⁶ Nach bezle'ida' to latjə gan' nzi' Armagedon dižə' ebreo. Latjən' nzi' ca'anə' əbtob de'e xio' ca' beṇə' ca' chəsə'ənabia' lao yežlyon'.

¹⁷ Na' angl gažən' bcuase' de'en yo'ožə lo'o tas che'enə' lao be', na' benda' gwne Diozən' zižjo gan' chso'elaogüe'ene' yoban' gan' leczə chi'e chnabi'e, gwne': —Bačh bselə'a yoguə' castigw ca' de'en nžia bia' əselə'a.

¹⁸ Nach gwyep yes, goc sšag, na' gošj gwtin, na' lechgualə gwxo' mazəchlə can' bagwxo' batə'ətezəchlə lao ža' beṇačhən' yežlyon'. ¹⁹ Na' le'ezelaogüe syoda blaoch de'en chi' lao yežlyon' gwžiyai'in goquən šonlə, na' leczə gwžiyai' syoda ca' yeziquə'əchlə de'en zjəchi' lao yežlyon'. Diozən' bitoch gwleze' par bnežjue' castigw che de'e malən' bagwso'ontec beṇə' ca' chəsə'ənabia' Babilonian' na' de'e na'ana' bnežjue' lega'aque' castigw gual zejlicane tant chže'e che de'e malən' gwso'one'enə'. ²⁰ Na' de'e tant gwxo'ochgua xte benitteczə yoguə'əlol islas ca' na' ya'a ca'. ²¹ Na' leczə gwche'echgua yej ži'a lao yežlyon' na' chla'aga'əquan tapa rob güežə to ton. Besə'əžaglaochgua beṇə' ca' ža' yežlyon' na' boso'ožia boso'onite'e Diozən' de'en bene' par ničh gwche' yejən'.

17

Castigw de'en bnežjw Diozən' no'olə sargatən'

¹ Na' lao angl ca' gažə beṇə' ca' gwso'oxə' tas de orən', toe' gože' nada': —Da gwlo'ida' le' castigw de'en əgwnežjo Diozən' no'olə blaolə no'olə sargatən' chi' lao nisdə' ca'. ² Yoguə' beṇə' chəsə'ənabia' lao yežlyon' bagosə'əzolene'ene'.

Na' yoguə' beṇə' ʒa' yeʒlyon' bagwse'eje' bino de'en bneʒjue' lega'aque' par niçh gosə'əzelaʒe'e gosə'anitə'əlene' le'.

³ Nach lao ben Spirit che Diozən' par ble'idaogüe'eda' de'e quinga, anglən' gwchi'e nada' latjə daʒən'. Na' ble'ida' to no'olə ʒie' coʒə' to beʒ əxna bia gaʒə yichjən' na' ʒia ši lozəb. Na' nyoj zan diʒə' lao cuerp chebən' de'en chloe' de que chon cuimb ca Dioz. ⁴ Na' no'olən' nyaze' lachə' morad na' de'e xna na' non cuine' xoche len or, len yej fin, na' len perlas. Na' noxe' to tas de or gan' yo'oʒə to bino. Na' binon' zejen diʒə' de que chebeine' chone' yoguə'əloj de'en chgue'i Diozən' na' de'en naquə contr Diozən'. ⁵ Na' lao xgue' na' nyoj le'ena', na' ngaśə' can' zejen, chedə' nan quinga: "Syoda Babilonia de'en naquə de'e blao. Nada' chona' par niçh beṇə' ʒa' yeʒlyon' bito chso'elaogüe'e Diozən' na' chso'one' bichlə de'en chgue'i Diozən'." ⁶ Na' ble'ida' de que chozo'e no'olə na'anə'. Chzoʒene' chedə' güe'eje' xchen beṇə' ca' gwsote'ena' beṇə' ca' gwsa'aque' laʒə' na' Diozən' na' gwsote' diʒə' de que chso'onjilaʒe'e Jeso'osan'. Na' cats' ble'ida' no'olənə' lechgualə bebanda' can' naque'ena'. ⁷ Nach goʒ anglən' nada': —Bito yebando'. Na' gwzejni'ida' le' bi zejen ca de'en ble'ido' ʒia no'olən' beʒən' bia gaʒə yichjən' na' ʒia ši lozəb. ⁸ Beʒən' bian' ble'ido'on gwzob to tyemp. Bitoch zob na'a, pero güidəb de'e yoblə la' əchojəb lo'o yech gabilən' gan' yo'ob na'a, na' leczə na'an yeyo'ob gaquəb castigw zejlicəne. Na' beṇə' ca' ʒa' yeʒlyon' beṇə' ca' cui zjənyoj laga'aque'ena' le'e lib' gan' nyoj la beṇə' ca' zjənapə yelə' mban zejlicənen', yesə'ənaogüe' beʒən' na' yesyə'əbanene' can' gwzob antslə, na' ca'aczən' sob nabi'ab de'e yoblə la'aṇə'əczə cui zob na'a. Cats'ən cuiṇə' xə yeʒlyon' banyoj la beṇə' ca' zjənapə yelə' mban zejlicəne le'e librən'.

⁹ Na' nga de to yelə' sin' de'e əgwzejni'in chio'o che beʒən'. Yichjəb ca' gaʒə zejen gaʒə ya'a gan' chi' no'olən'. ¹⁰ Na' leczə yichjəb ca' gaʒə zejen gaʒə rei. Gueye'e bagosə'anabi'e na' bagwnit yelə' gwnabia' chega'aque'ena'. Toe' chnabia' na'a, na' ben' yeto ze'e yide' par nabi'e pero na' šloʒgan' nabi'e. ¹¹ Na' beʒən' bian' gwzo antslə na' bitoch zob na'a zejen yeto rei beṇə' gaquə ca beṇə' ca' gaʒə. Gone' yoguə'əloj de'e mal ca de'en gwsote'ena' na' nabi'e xte catə gon Diozən' par niçh cuiayi'e zejlicəne.

¹² Na' lozəb ca' ši de'en ble'ido' zejen ši rei beṇə' ze'e za'ac par yesə'anabi'e. Na' beʒən' gomb par niçh yesə'anabi'e txen len leb tš'i'izə pero šloʒgan' yesə'anabi'e len leb. ¹³ Rei ca' ši tozə can' so'one' xbab na' tozə can' so'one' de'e malən'. Na' yelə' guac de'en gatə' chega'aque'ena' na' len yelə' gwnabia'anə' yesə'əchine'en par so'one' con can' yene'e beʒən'. ¹⁴ Yesə'ədiləlene' Jesocristən' ben' gwxaquə'əlebe ca xilə' dao' ca' gwsote' beṇə' Izrael ca' par gwnitlao xtolə'əga'aque'ena', na' Jesocristən' gone' lega'aque' gan na' nite'e xni'ena', chedə' le'ena' chnabi'e notə'ətezəchlə beṇə' blao na' notə'ətezəchlə rei. Na' beṇə' ca' so'on txen len Jesocristən' zjənaque' beṇə' ca' bagwlej Diozən' par zjənaque' xi'ine', na' nitə'ətezə nite'e chso'onjilaʒe'ene' na' choso'ozenague' che'.

¹⁵ Na' anglən' gozne' nada': —Nisda'onə' gan' chi' no'olə sargatən' zejen diʒə' de que beṇə' zan juisy beṇə' zjənaquə zan yeʒ na' zan nasyon na' beṇə' chsa'ac gwde gwde la diʒə' choso'ozenague' che no'olən'. ¹⁶ Na' beʒən' bian' ʒie'ena' gue'ib le', na' leczə can' so'on rei ca' ši, beṇə' ca' ble'ido' che ši loz beʒən', leczə yesə'əgue'ine' no'olən' na' txen len beʒən' yesyə'əque'e bitə'ətezə de'en de che' na' yesə'əcua'aṇə' ga'alyide'. Na' so'ote'ene' nache əsa'ogüe' xpele'ena' txen len beʒən' na' de'en yega'aṇən' yoso'ozeye'en. ¹⁷ So'one' ca' chedə' Diozən' cue'e xbabən' lo'o yichjla'aʒda'oga'aque'ena' par yoso'oʒiayi'e no'olən'. De'e

na'anə' n̄acho de que tozə naquə xbab che ši rei ca' par so'one' con can' yene'e bežən' xte so'one' yoguə' can' babžia Diozən' bia' gaquə. ¹⁸ Na' no'olə sargatən' ble'ido'on naque' syoda de'en naquə le'ezelaogüe de'e blaο lao yežlyon' na' de'en chnabia' rei ca' beņə' ca' ža' yežlyon'.

18

Can' gaquə catə' cuiayi' syoda Babilonian'

¹ Na' gwde na' ble'ida' yeto angl ze'e yoban' betje' lao yežlyon'. Na' nape' yelə' chnabia' xen par chac can' ne'enə', na' yelə' chey che'eni' che'enə' bse'eni'in lao yežlyon'. ² Na' anglən' gwne' zizjo gwne': —Babžin ža cuiayi' syoda Babilonian'. Gaquən latjə che angl bzelaο ca' na' de'e xio' ca' na' latj che yoguə' claste bia zo xile'e bia zžənaquə bia zban par len beņachən'. ³ Cuiayi'in čhedə' beņə' gwnabia' che syodan' bagwso'one' par ničh beņə' ca' ža' yoguə' n̄asyonə' baboso'ozoe' Diozən' ca'alə na' cuich chso'elaogüe'ene', na' beņə' ca' chəsə'anabia' doxen lao yežlyon' choso'ozenagzeche' che beņə' gwnabia' che syodan' cle ca che Diozən'. Na' beņə' güen dilgens ca' ža' lao yežlyon' bagwso'onchgüe' gan chso'ote'e bi de'en chəsə'əzi' beņə' gwnabia' ca' par gwso'onche' de'e malən'.

⁴ Nach benda' gwne yeto beņə' zo yoban' gwne': —Le'e nacle xi'ina' le'e yechoj syoda Babilonian' par ničh cui gonle txen len de'e malən' chso'on beņə' Babilonia ca', na' par ničh cui si'ile castigon' txen len lega'aque' na' len yeziquə'əchlə beņə' ca' choso'ozenag čhega'aque'. ⁵ Lechgualə de'e zan juisy xtolə' beņə' Babilonia ca'. De'e na'anə' bitoch cuezə Diozən' par əgwnežjue' castigw čhega'aque' zejlicane. ⁶ Na' beņə' gwnabia' che Babilonian' na' len beņə' ca' choso'ozenag čhega'aque' yesə'əyi' yesə'əzaque'e can' bosə'oči' bosə'osaque'e beņə' yoblə, yesə'əzaglaogüe' mazəchlə can' bosə'oči' baboso'osaque'e beņə' yoblə. Lechgualə castigw gualəch gaquə de'en yesə'əzi'enə' clezə ca de'en gwso'onene' beņə' ca' bosə'oči' bosə'osaque'e. ⁷ Na' ca naquə beņə' gwnabia' che Babilonian' lechgualə bagwso'on cuinga'aque' xen na' lechgualə bagwso'one' con bin' na la'azda'omalga'aque'ena', ca'aczən' yesə'əyi' yesə'əzaque'e na' yesyə'əgüine'ene'. So'one' xbab lo'o yičhjlə'azda'oga'aque'ena' de que cuat te cuich yesə'anabi'e na' syempr yoso'ozenag beņə' čhega'aque'. ⁸ Pero lao tozə ža gaquə yoguə' de'e ca' so'one' xbab cuat gaquə čhega'aque'. Beņə' zan sa'ate' na' gatə'əchgua de'e yesyə'əgüine'ene' na' gatə' yelə' chbil chdon na' syodan' šeyən na' cuiayi'in. Can' gac che syoda Babilonian', čhedə' la' Xancho Diozən' len yelə' guac che'enə' gone' par ničh beņə' gwnabia' čhei ca' na' len beņə' ca' choso'ozenag čhega'aque' yesə'əzi' castigon'.

⁹ Na' beņə' gwnabia' ca' ža' lao yežlyon' beņə' ca' bosə'ozenag che beņə' Babilonia ca' par bosə'ozoe' Diozən' ca'alə na' par gwso'one' con can' na la'azda'omalga'aque'ena' yesə'əbeže' na' yesyə'əgüine'ene' catə' yesə'əle'ine' šey syodan' na' chas žen chein'. ¹⁰ Yesə'əžebe' par yesyə'əbigue'e galə'əza. De'e na'anə' yesyə'əga'ane' zitə'ələ yesə'əgüie', na' yesə'əne': —De'e ma' juisy bachac che syoda Babilonia nga de'en naquə de'e blaοch ca syoda ca' yelə' lao yežlyon'. Bachbiayi' syodan' de'en bagwnabia'ach lao de'e ca' zjəchi' yežlyon'. Lao tozə or baten Diozən' par chbiayi'in.

¹¹ Nach beņə' güen dilgens ca' ža' lao yežlyon' leczə yesə'əbeže' na' yesyə'əgüine'ene' catə' cuiayi' syodan'. Yesyə'əgüine'ene' čhedə' cuich no əžel no yesə'əzi' de'en so'ote'ena'. ¹² Bitə əžel no yesə'əzi' de'en se'enene' so'ote'e de'en naquə de or, de plət, de yej fin, de perlas, na' no lachə' fin de lino na' de

sed, lachə' morad na' lachə' x̄na, na' no yag de'e chl̄a' zix, na' yoguə' de'e ca' chso'one' de marfil, de yag fin, de brons, de ya na de marmol, ¹³ na' no canel na' bichl̄a' rcaud ca', no yal, no mirra, no perfome, no bino, no set, no yezi fin, no trigw, no go'on, no xilə', no cabey, no carret, na' len no beṇəch beṇə' ca' so'ote'e par əsa'aque' esclabos. ¹⁴ Na' yesə'əne' che syodan': —Yoguə' de'e ca' de'en gwsa'azlažə'əchgua beṇə' Babilonia ca' yesə'əzi'e lao yelə' gwni'a chega'aque'ena' cuich gaquə' yesə'əzi'en n̄a'a. Caguə' no beṇə' gwni'a ša'ach Babilonian' n̄a'a par zejlicane, na' notoch no no so no yesə'əzi' de'e šao' de'e güen ca' de'en gosə'əzi' beṇə' Babilonia ca' antslə'.

¹⁵ Na' ca naquə' beṇə' güen dilgens ca' beṇə' ca' chso'ote'e de'e šao' de'e güen ca' chəsə'əzi' beṇə' Babilonia ca', bazjənaque' beṇə' gwni'a por de'en chəsə'əzi' beṇə' Babilonia ca'. Lega'aque' yesə'əžebe' catə' yesə'əle'ine' can' gaquə' che syodan' na' yesə'əzeche' zitə'ələ' yesə'əbeže' na' yesyə'əgüine'ene'. ¹⁶ Na' yesə'əne': —De'e mal juisyən' bagoc che syoda nga de'en goquə' blaoch lao syoda ca' yelə' de'en ža' yežlyon'. Beṇə' ca' gwža' syodan' gwsa'aze' lachə' fin na' lachə' de'e color morad na' de'e x̄na. Gwso'on cuinga'aque' xoche len no or, no yej fin na' no perlas. ¹⁷ Na' lao tozə' or bagwnit yoguə' de'e šao' de'e güen chega'aque' ca'.

Nach yoguə' x̄an barcw ca' na' nochlə' beṇə' ca' choso'osa' barcw ca' na' beṇə' ca' chso'on žin lo'o barcw ca', na' beṇə' ca' chja'ac ga yoblə' lo'o barcon', yogue'e yesə'əzeche' zitə'ələ' yesə'əgüie'. ¹⁸ Na' catə' yesə'əle'ine' chas ženṇə' lao syodan' əsa'ache'ine' de' que cheyənṇə', na' yesə'əne': —Bitoch bi syoda yoblə' chi' lao yežlyon' de'e naquə' can' goquə' syoda nga.

¹⁹ Nach yoso'ožia yichjga'aque'en bište yon' tant n̄ite'e trist, na' yesə'əbežyaše'e na' yesyə'əgüine'ene', yesə'əne': —De'e mal juisy bagoc che syoda nga de'en goquə' blaoch ca' syoda ca' yelə' lao yežlyon'. Por yelə' gwni'a che beṇə' ca' gwža' na' yoguə' chio'o bencho gan xen ca' naquə' žinṇə' babencho len barcw checho quinga. Na' n̄a'a lao tozə' or bagwžiyai' syodan'.

²⁰ Na' to beṇə' zo yoban' gwne': —Ledoyebei chio'o zocho yoban', na' le'e yebei le'e apostol na' le'e profet na' len le'e yeziquə'əchlə' bagwlej Diozən' par nacle lažə' ne'ena', chedə' Diozən' gone' castigw che beṇə' Babilonia ca' por ni che de'en baboso'ochi' baboso'osaque'e le'e.

²¹ Nach to angl gual bcose' to yej xen ca' yej ca' chso'on žin gan' ža' molin, na' bzalə'en lo'o nisdə'ona'. Nach gwne': —Can' gaquə' che syoda Babilonian', nitan can' gwnit yej xenṇə' de'en bzalə'a lo'o nisdə'ona', cuatəch le'ichon de'e yoblə'. ²² Cuatəch yesə'əcuež beṇə' gocuež ca' Babilonian'. Na' cuatəch əso'olə' lao lquey che syodan'. Cuatəch yoso'ogolə' arpa o yoso'ocueže' bžejo lao syodan'. Notoch no n̄itə' no so'on žin lao syodan', na' cuatəch yenecho sšag che yišə' de'en chso'ote' no'ol ca'. ²³ Ni quech le'icho be'eni' che lampara lao syodan', na' ni que yenchecho beṇə' so'on legr lao yelə' gošagna', chedə' notoch no ša'ach na'. Cuiayi' syoda che beṇə' güen dilgens ca', la'ənə'əczə' lega'aque' zjənaque' beṇə' blaolao yežlyon'. Beṇə' Babilonia ca' babesə'əxoayague' beṇə' ža' yoguə' n̄asyon ca' naquən' gwso'one'ena'.

²⁴ Bagwso'ote' profet ca' na' notə'ətezəchlə' beṇə' gwlej Diozən' par gwsa'aque' lažə' ne'ena', na' beṇə' Babilonia ca' zjənape' dolə' che yoguə' nochlə' beṇə' bagwso'ote' doxen lao yežlyon'. De'e na'anə' cuiayi' syoda chega'aque'ena'.

19

1 Gwde na' benda' angl zan juisy beṇə' ža' yoban' chso'elaogüe'e Diozən' na' zižjo nen catə'an gosə'əne':

Beṇə' güen juisy naquə Dioz chechon'.

Le'ena' babene' par niçh beṇə' ca' chso'onlilažə' le' cui žjəya'aque' lao yi' gabilən'.

Chey che'eni'ichgua gan' zoe'enə' na' nape' yelə' guac xen.

2 Zdacze' licha ca de'en chnežjue' castigw che beṇə' ca' chso'on de'e malən', na' chone' complir can' ne'ena'.

Baben Diozən' castigw che syoda əblao de'en gwxaquə'əlebe ca to no'olə sargat

laogüe de'en gwso'on beṇə' gwnabia' chei ca' par niçh beṇə' ža' doxen lao yežlyon' bosə'ozoe' Diozən' ca'alə cui gwso'elaogüe'ene'.

De'e na'anə' Diozən' babselə'e castigw de'en cheyalə' yesə'əzi'e ca naquən' gwso'ote' beṇə' ca' chso'elao' le'.

3 Nach de'e yoblə gosə'əne': —Beṇə' güen juisyən' naquə Diozən'. Zejlicanən' çhas žennə' gan' chey syodan'.

4 Nach beṇə' golə beṇə' blao ca' tapechoa besə'əzo xibe' gwso'elaogüe'e Diozən' gan' chi'e chnabi'enə', gosə'əne': —Ca'ašgacə gaquə. Beṇə' güen juisyən' naquacə Diozən'.

Na' leczə ca' gwso'on bia ca' tap, bia ca' nitə' lao Diozən' gan' chi'e chnabi'enə'.

5 Nach benda' gwne to angl do gan' chi' Diozən' chnabi'e, na' gwne':

Ledoye'ela'och Dioz chechon', chio'o naccho beṇə' güen žin che' na' chapchone' respet,

chio'o naccho beṇə' blao na' len chio'o cui naccho beṇə' blao.

Yelə' gošagna' che Jesocristən' ben' gwxaquə'əlebe ca xilə' dao' ca' gwso'ot beṇə' Izrael ca' par gwnitlao xtolə'əga'aque'ena'

6 Nach leczə benda' xne che yezan beṇə' chso'elaogüe'e Diozən'. Na' xnen' nenən can' chsiž yaon' catə' dechguan na' ca nen catə'an lechgualə çhašjw chtin. Na' gosə'əne':

Beṇə' güen juisy naquə Xancho Diozən'.

Nape' le'ezelaogüe yelə' guac xen na' chnabi'e.

7 Ledoyebei, ledoso mbalaz, na' ledoye'ela'och le',

çhedə' babžin ža əgwšagna' Jesocristən' ben' gwxaquə'əlebe ca xilə' dao' ca' gwso'ot beṇə' Izrael ca' par gwnitlao xtolə'əga'aque'ena'.

Bazo no'olən' si'e par gaque' xo'ole'.

8 Na' baben Jesocristən' par niçh no'olən' nyaze' lachə' fin de'en naquə šyiš xilə' juisy na' de'en cui naquə manch.

Na' lachə' fin de'en nacho nyaz no'olən' de'en naquə de'e šyiš zejen dižə' de que chio'o bagwlej Diozən' par naccho lažə' ne'ena' zotezə zocho choncho de'e güenṇə'.

9 Nach anglən' bolgüiže' nada' de'e yoblə gwne': —Bzoj de que mbalaz beṇə' ca' bazjanaquə combid par əžja'aque' gan' gaquə yelə' gošagna' che Jesocristən' ben' gwxaquə'əlebe ca xilə' dao' ca' gwso'ot beṇə' Izrael ca' par gwnitlao xtolə'əga'aque'ena'.

Na' anglən' leczə gože' nda': —Diozən' babene' par niçh gwnia' ca', na' naquən de'e li.

10 Nach bzo xiba' par güe'elaogua'a anglən', pero anglən' bito be'e latjə, gwne': —Bito gono' ca'. Be'elao' Diozən'. Nada' naca' to beṇə' güen xšine'

can' naco' le' na' ljuežžo' ca' beṇə' ca' lecza chso'e dižə' de que chso'onlilaže'e Jeso'osən'.

Na' ca'aczən' naquən, notə'ətezcho cho'echo dižə' de que chonlilažə'ačo Jeso'osən', zo Spirit che Diozən' len chio'o chonən ca cho'echo xtiže'ena'.

Ben' žia cožə' cabey šyišən'

¹¹ Nach ble'idaogüe'eda' nla'axejə yoban' na' ble'ida' to cabey šyiš na' Jeso'osən' žie' cožə'əbən'. Len' chone' par nič hac can' ne'ena' na' le' syempr choe' dižə' li. Zdacze' licha ca de'en chchoglaogüe'en che yoguə'əloł beṇə' šə non' napə dolə', na' zdacze' licha can' chdilaene' de'e malən'. ¹² Jelaogüe' ca' chsa'actitən ca to yi' de'e chalə'əniṇ, na' zan coron nitə' yichje'ena', na' lao xgue'ena' nyoj yeto le' de'en cui nombia' nochlə beṇə'. ¹³ Na' nyaze' to lacha' de'e dopə chen, na' yoso'osi' beṇə' le' Xtižə' Diozən'. ¹⁴ Na' angl ca' ža' yoban' beṇə' žənaquə soldad che Diozən' gosə'ənaogüe'ene', zjənyaze' lacha' fin de'en naquə de'e šyiš na' de'e cui naquə manch, na' yogue'e zjəžie' cabey šyiš. ¹⁵ Na' cho'ena' zo to spad de'e nlachguan par nič gwzo'e beṇə' ca' ža' yoguə' nasyon xni'ena'. Nabi'e lega'aque' na' gone' ca yesə'əzəxjw yichjga'aque' laogüe'ena'. Le'ena' əgwnežjue' castigw che beṇə' ca' chso'on de'e malən', chedə' chža'achgua Diozən' lega'aque', Dioz ben' napə le'ezelaogüe yelə' guac xen. ¹⁶ Na' le'e xadon che Jeso'osən' na' len le'e ni'ena' nyoj dižə' quinga: "Nada' chnabi'a notə'ətezchlə rei na' notə'ətezchlə beṇə' blao."

¹⁷ Nach ble'ida' to angl zeche' lao bgüižən' na' bolgüiže' yoguə' claste šod ca' bia ca' chaš le'e yoban' na' gože' lega'aquəb zižjo: —Le'e da leyedobə nga par gaole to xše' xen de'e gon Diozən' le'e. ¹⁸ Gatə' xpelə' rei, na' xpelə' no comandant na' no beṇə' gual. Gatə' xpelə' cabey na' xpelə' beṇə' ca' gosə'əbia lega'aquəb. Gatə' xpelə' yoguə' claste beṇə', beṇə' gwsa'ac esclabos na' beṇə' cui gwsa'ac esclabos, beṇə' gwsa'ac beṇə' blao na' beṇə' cui gwsa'ac beṇə' blao.

¹⁹ Na' ble'ida' bež gaž yichjən' na' bežən' yeto len yoguə'əloł rei ca' na' yoguə' soldad zan che rei ca'. Bač nite'e probnid par yesə'ədilaene' Jeso'osən' ben' žia cožə' cabey šyišən' na' len soldad che' ca'. ²⁰ Na' bež nechən' len bia əgwchopen' bian' choe' dižə' goxoayag par nič beṇə'chən' chso'elaogüe'e bež nechən', čopteb besə'ədolə' na' gwsa'aquəb lao na' Jeso'osən'. Bež əgwchope na'ana' bian' ben de'e zan de'e besyə'əbane beṇə' lao bež nechən' par bxoayaguəb beṇə' ca' nitə' señy che bež nechən' na' beṇə' ca' chse'ejni'alažə' lgua'a lsaquə' de'en naquə ca' le'b. Na' nežəmbanga'aquəb bzalə' Jeso'osən' lega'aquəb lo'o yi' gabilən' gan' chalə' sofrən', to yi' xen de'en naquə ca to nisdao'. ²¹ Na' Jeso'osən' ben' žia cožə' cabey šyišən' bete' rei ca' na' soldad zan chega'aque' ca' len spadən' de'en zo cho'ena' de'en nlachgua. Nach yoguə'əloł šod ca' gwsa'oxatəb xpelə'əga'aque'ena'.

20

Can' gaquə lao tmil iz

¹ Na' ble'ida' to angl beṇə' zo yoban' betje' par bsaljue' yech gabilən', na' noxe'e to gden xen. ² Na' anglən' bnize' bełən' bian' beyaque gwxiye'ena' ža gwlasda'ote, de'en le Satanas, na' bčeje'eb gdenṇə' par tmil iz. ³ Nach bzalə'eb lo'o yech gabilən' na' le'e bseyjwte' cho'a yechən', na' bčiše'en to sey. Bene' ca' par nič cuich xoayaguəb beṇə' ža' yežlyon' xte catə' te tmil iz. Cana'ach yoseže'eb yechojəb yeto tyemp dao'.

⁴ Nach ble'ida' zjəchi' beṇə' chəsə'ənabia' txen len Cristən' na' yogue'e len le' gosə'əchoglaogüe'en che beṇə'chən' šə non' napə dolə'. Na' beṇə' ca'

chəsə'anabia' len le' zjənaque' beṇə' ca' cui əgwso'elao' bežən' nic lgu'a' lsaquə' de'en naquə ca leb, na' bito gwso'e latjə yoso'ozoe' señy chebən' lao xgaga'aque'ena' o na'aga'aque'ena'. Gwso'e dižə' de que chso'onlilaže'e Jeso'osən', na' bosozənaque' che xtižə' Diozən'. De'e na'anə' beṇə' ca' chəsə'əgue'i Diozən' gwso'ote' lega'aque' gosə'əchogüe' yenga'aque'ena'. Pero babesyə'əbane' ladjo beṇə' guat ca' niç chəsə'anabi'e txen len Cristən' tmlil iz. ⁵ Cristən' bolis bosbane' lega'aque' ladjo beṇə' guat ca' antslə ca beṇə' yeziquə'əchlə. Na' catə' te yesə'anabi'e tmlil iz, cana'ach yeziquə'əchlə beṇə' ca' bagwsa'at yesyə'əbane' ladjo beṇə' guat ca'. ⁶ Mbalaz par beṇə' ca' babolis bosban Cristən' ladjo beṇə' guat ca' antslə ze'e solao tmlil izən', beṇə' ca' bagwlej Diozən' par zjənaque' lažə' ne'ena'. Bito gac chega'aque' can' gac che beṇə' ca' yesə'əžaglaochgua zejlicane. Na' de'en yesə'əžaglaochgüe' zejlicane lennə' naxo yelə' got əgwchopen'. Na' beṇə' ca' zjənaque' lažə' na' Diozən' nita'ətezə nite'e əso'elaogüe'ene' na' əso'elaogüe'e Cristən' can' gwnita'ətezə gwnita' bəxoz che beṇə' Izrael ca' gwse'ejni'alaze'e Diozən'. Na' beṇə' ca' zjənon cuinga'aque' lažə' na' Diozən' lega'aque' yesə'anabi'e txen len Cristən' tmlil iz.

⁷ Na' catə' bagoc tmlil iz chəsə'anabi'e, Diozən' güe'e latjə yeçoj gwxiye'ena' de'en le' Satanas lo'o yech gabilən' gan' yo'on. ⁸ Na' yeçojən par əxoayaguən beṇə' ca' ža' doxenlə lao yežlyon' de'e yoblə, beṇə' ca' chəsə'əne' Gog na' Magog. Gwxiye'ena' əxoayaguən lega'aque' na' əgwtoḅən lega'aque' par yesə'ədiləlene' Cristən'. Na' beṇə' zan juisy əgwtoḅən contr Cristən' ca yox zannə' de'en chi' cho'a nisdao'. ⁹ Nach ble'idaogüe'eda' chac ca', za'ac beṇə' zan doxenlə lao yežlyon' na' gwse'əchje' syodan' chaque Diozən' chei gan' ža' beṇə' ca' bagwleje' par zjənaque' lažə' ne'ena'. Nach Diozən' bene' par niç bchoj yi'inə' yoban' bžinten lao yežlyon' par bžiyai'in beṇə' ca' bəbtob gwxiye'ena'. ¹⁰ Na' ca naquə gwxiye'ena' de'en bəxoayag beṇə' ža' yežlyon', Cristən' bzale'en lao yi' gabilən' gan' chalə' sofrən', lo'o yi' xen de'en naquə ca to nisdao'. Bzale'en gan' bzale'e bež nechən' na' bež əgwchope bian' bəxoayaguəḅ beṇə'chən' len dižə' güenlažə' chebən'. Na' chəsə'əžaglaog gwxiye'ena' len bež ca' lo'o yi' gabilən' do ža do yel par zejlicane.

Diozən' gwçhoglaogüe'en che beṇə' ca' bagwsa'at šə non' napə dolə'

¹¹ Nach ble'ida' chi' Diozən' lao to siy xen de'en naquə de'e šyis na' chnabi'e. Na' lecəə ble'ida' benittecəə yežlyon' na' de'e ca' chle'icho le'e yoban' chedə' bitoch byəžjga'aquen. ¹² Na' ble'ida' beṇə' ca' bagwsa'at sin cui gwso'onlilaže'e Jesocristən', beṇə' ca' gwsa'ac beṇə' blao na' len beṇə' ca' cui gwsa'ac beṇə' blao. Yogue'e zjəzeche' lao Diozən'. Nach Diozən' bzaše' libr ca' gan' zjənyoj yoguə' de'e ca' gwso'on to toga'aque'. Nach gwde na' bzaše' yeto libr gan' zjənyoj la beṇə' ca' zjənapə' yelə' mban zejlicanen'. Na' yoguə' beṇə' ca' gwsa'at sin cui gwso'onlilaže'e Jesocristən' gwçhoglaogüe'en chega'aque' de que yesə'əzi'e castigw segon bin' gwso'on to toga'aque', con can' nyoj le'e libr ca'. ¹³ Na' yoguə' beṇə' bagwsa'at lo'o nisdə'onə' sin cui gwso'onlilaže'e Jesocristən' lenczəga'aque' besyə'əchoje' par gosə'əzeche' lao Diozən' na' le'egatezə ca' yoguə' beṇə' bagwsa'at gata'ətezəchlə lecəə besyə'əchoje' latj che beṇə' guat ca'. Na' Diozən' gwçhoglaogüe'en che to toga'aque' de que yesə'əzi'e castigw segon can' gwso'one'. ¹⁴ Nach Diozən' bcueze' yelə' gotən' de'en naxo de'e neche. Bene' par niç cuich no yežin latjə che beṇə' guat ca'. Na' de'en yesə'əzaquə'əzi' beṇə' güen de'e mal ca' lo'o yi' gabilən' zejlicane, lennə' de'en naxo yelə' got əgwchopen'. ¹⁵ Yoguə' non' cui nyoj leina' le'e libr gan' nyoj la beṇə' ca' zjənapə' yelə' mban zejlicane, bosozalə'ene' lo'o yi' gabilən' de'en naquə de'e xen ca nisdao'.

21

Yežlyon' beyaquən de'e cobə len de'e ca' chle'icho le'e yoban'

¹ Gwde na' ble'ida' de'e ca' chle'icho le'e yoban' zjənaquən de'e cobə, na' leczə ble'ida' yežlyon' de'e cobə. Ca naquə de'e ca' zjənla' le'e yoban' antslə, na' ca naquə yežlyon' de'en banombi'acho, bagwde čhega'aquən. Na' leczə nisdə'ona' bagwde čhei. ² Nada' Juan ble'ida' syoda čhe Diozən', syoda Jerosalennə' de'en naquə de'e cobə de'en čhi' yoban' gan' zo Diozən', ble'ida' bletje'en lao yežlyon'. Banonšaogüe'en na' banone'en xoche ca to no'olə čhpa'a cuine' catə' chšagne'e. ³ Nach do gan' čhi' Diozən' čhnabi'e benda' gwne to anglən' zizjo gwne': —Syoda čhe Diozən' babžinən gan' ža' benəchən' na' Diozən' soe' len lega'aque'. Benəch ca' əsa'aque' xi'ine' na' le' gaque' Dioz čhega'aque' ben' əso'elaogüe'e. ⁴ Na' Diozən' gone' par ničh cuich nite'e trist, notoch no gat, na' notoch no no yegüime'e, ni que gaquə bi de'en yesə'əžaglaogüe' o bi de'en gon par yesə'əbeže'. Bagwde čhe yoguə' de'e ca' zjənac ca' de'en gotə' lao yežlyo nechən'.

⁵ Nach Diozən' ben' čhi' čhnabia' gwne': —Nada' chocoba' yoguə'əloł de'en de.

Na' leczə gwne': —Bzoy de'e quinga čhedə' nada' chona' can' nia'anə' na' syempr cho'a dižə' li.

⁶ Nach gozne' nada': —Bačh goc can' gwni'anə'. Nadan' naca' ben' ben yežlyon' na' nada' naca' ben' gon par ničh te čhei. Nadan' bazocza' catə'an bxi'a yežlyon' na' ca'aczən' soa' catə'an yeyož yedon. Notə'atezə benə' chene'ene' si'e de'en gwnežjua'ane', gwnežjua'ane' yelə' mban zejlicane de'en gwxaquə'əlebe ca nis ya'a de'en che'ejcho catə'an čhbilecho, na' gwnežjua'ane'en sin cui bi yesə'əyixjue' čhei. ⁷ Na' notə'atezə benə' šə čhəsə'əzoinə' cui choso'ozenague' čhe de'e malən', gac čhega'aque' yoguə' de'e güen ca' de'en babi'a dižə' čhei, na' caguə de'e te cuich gaca' Dioz ben' əso'elaogüe'e na' caguə de'e te cuich əsa'aque' xi'ina'. ⁸ Pero na' ca naquə benə' ca' čhəsə'əžeb par yoso'ozenague' čhia', na' benə' ca' cui chso'onlilažə' nada', na' benə' ca' chso'on bitə'atezə de'en chgue'ida', na' benə' ca' chso'ot benə' yoblə, na' benə' ca' čhəsə'əbejyichj no'ol čhega'aque' o be'en čhega'aque' par chesə'əzolene' benə' yoblə, na' benə' čhəsə'əža' xtoga'aque', na' benə' ca' čhəsə'ənao de'en chso'on benə' ca' čhəsə'ənelen de'e xio', na' benə' ca' chse'ejni'alažə' lguə'a lsaquə, na' yoguə' benə' ca' chso'e dižə' güenlažə', yoguə'əga'aque'enə' yesə'əzaquə'əzi'e zejlicane lo'o yi' gabilən' gan' čhalə' sofrən', na' yi' gabilən' naquən ca to nisdəo'. Na' de'en gac čhega'aque' lennə' yelə' got əgwchopen'.

Syoda Jerosalen de'en naquə de'e cobə

⁹ Na' ble'ida' angl ca' gažə benə' ca' gwso'oxə' gažə tas gan' yo'ožə de'en gwxaquə'əleben ca gažə castigw de'en bnežjw Diozən' benə' mal ca'. Na' toe' bgüiguə' gan' zoa'anə' na' gože' nada': —Da gwlo'ida' le' no'olən' ze'e si' Jesocristan' par gaque' xo'ole', Jesocrist ben' gwxaquə'əlebe ca xilə' dao' ca' gwso'ot benə' Izrael ca' par gwnitlao xtolə'əga'aque'enə'.

¹⁰ Na' Spirit čhe Diozən' benən par ničh anglən' gwčhe'e nada' to lao ya'a xen de'en naquə de'e sibə par ničh blo'ine' nada' syoda əblao čhe Diozən', syoda Jerosalennə' de'en gwche' yoban' gan' zo Diozən' de'en babletje' lao yežlyon'. ¹¹ Na' ble'ida' čhey che'eni' syodan' len yelə' čhey che'eni' čhe Diozən', na' ble'ida'an ca to yej fin de'e chactit, ca yej de'en ne' jaspe de'en chle'icho ca bidr. ¹² Na' ble'ida' to ze'e xen de'e sibə de'en nyechj syodan', na' nitə'an šižin puert, na' to to cho'a puertən' zjəzecha tğüejə angl. Na' ca

naquə puert ca' zjənyojən la šižin family che beṇə' Izrael ca' beṇə' ca' za'ac lao dia che to to xi'in de'e Izraelən'. ¹³ Le'e ze'e galən' chla' bgüizən' nitə' šonə puert, na' yešonən cuitən licha, na' yešonən cuitən yeglə, na' yešonən galən' chen bgüizən'. ¹⁴ Na' ble'ida' lan ze'enə' de'en nječh̄j syodan', naquən šižin yej xen na' zjənyoj le'e yej ca' la šižin apostol che Jesocristən' ben' gwxaquə'əlebe ca xilə' dao' ca' gwsot beṇə' Izrael ca' par gwnitlao xtolə'əga'aque'enə'.

¹⁵ Na' anglən' ben' be'elen nada' dižə'anə' noxə'e to ya de or par gws'i'e medid che syodan' na' len ze'e cheinə' na' puert chei ca'. ¹⁶ Syodan' naquə de'e cuadrad, na' tozə can' naquə yelə' zlague'i len yelə' ltonəi na' len yelə' sib chein'. Na' medid che syodan' goquən čhopa mil čhopə gueyoa kilometros. ¹⁷ Nach gwde na' gwxi'e ze'e de'en nječh̄j syodan' medid, na' goquən gyon tap metr yelə' sib chein' segon metr de'en chesə'əčhin beṇə'čhən' na' lenṇə' bčhin anglən'.

¹⁸ Ze'e de'en nječh̄j syodan' naquən de yej de'en nzi' jaspe, na' ble'ida' de que yo'o ca' ža' syodan' zjənaquən porzə de or na' nla'an ca bidr de'en naquə xi'ilažə'. ¹⁹ Na' le'e to to yej xen ca' de'en zjənaquə lan ze'e de'en nječh̄j syodan' zjənonə'en xoche len yoguə' claste yej fin. De'e nechən' da'an jaspe, de'e gwchopen' safiro, de'e gwyonə agata, de'e gwɔape esmeralda, ²⁰ de'e güeyə' onise, de'e gwɔope cornalina, de'e gažə crisolud, de'e əgwɔonə'e berilo, de'e güei topasio, de'e ši crisoprassa, de'e šnejei jasinto, na' de'e šižinēi amatista. ²¹ Nach puert ca' šižin de'e nitə' che syodan' to toga'quən zjənaquən de to perla. Na' lquey che syodan' zjənaquən porzə de or na' nla' le'ina' can' nla' le'i to de'en naquə de bidr.

²² Bitobi yo'odao' ble'ida' lao' syodan' čhedə' la' do tyempte beṇə' ca' ža' syodan' nite'e lao Xancho Diozən' ben' napə le'ezelaoğue yelə' guac xennə' na' lao Xi'ine' Jesocristən' ben' gwxaquə'əlebe ca xilə' dao' ca' gwsot beṇə' Izrael ca' par gwnitlao xtolə'əga'aque'enə', na' beṇə' ca' ža' syodan' chso'elaogüe'e lega'aque'. ²³ Bito chyažje bgüizən' ni bio'onə' par yoso'ose'eni'in lao syodan' čhedə' nye'eni' syodan' len yelə' chey che'eni' che Diozən' na' che Xi'ine' Jesocristən'. ²⁴ Na' be'eni' che syodan' gwse'eni'in yedote par beṇə' ca' chso'onlilažə' Jesocristən', beṇə' ca' zjənaquə to to nasyon. Na' rei ca' chə'anabia' yežlyon', beṇə' ca' chso'onlilažə' Diozən', yoso'onežjue'ene' yelə' gwnabia' na' yelə' bala'an de'en de čhega'aque'. ²⁵ Bito šeyjw puert ca' teža na' caguə batə'əquə gaquə žčhol. ²⁶ Na' yelə' xoche na' bitə'atezəchlə de'e zaque'e de'en gotə' che nasyon ca' gatə'an lao' syodan'. ²⁷ Bitobi de'e mal gaquə lao' syodan' na' notono gaquə yesyə'əžin syodan' no chon de'e ca' chgue'i Diozən' o no choe' dižə' güenlažə'. Caguə no yesyə'əžin syodan' sino beṇə' ca' zjənyoj laga'aque'en le'e libr che Jesocristən' ben' gwxaquə'əlebe ca xilə' dao' ca' gwsot beṇə' Izrael ca' par gwnitlao xtolə'əga'aque'enə'. Le'e libr na'anə' zjənyoj la beṇə' ca' zjənapə yelə' mban zejlicaṇən'.

22

¹ Nach blo'ine' nada' yao de'en yožə nis de'en chnežjon beṇə'čhən' yelə' mban zejlicaṇən'. Na' nisən' naquən clar juisy ca be'eyə', na' yaon' chchojən gan' chi' Diozən' na' Xi'ine' Jesocristən' chəsə'anabi'e, Jesocristən' ben' gwxaquə'əlebe ca xilə' dao' ca' gwsot beṇə' Izrael ca' par gwnitlao xtolə'əga'aque'enə'. ² Na' yaon' chden gwchol lquey xen che syodan' na' ze yag čhəpə la'a čhə'a yaon', yag de'en chnežjon beṇə'čhən' yelə' mban zejlicaṇən'. Na' yoguə' bio' chəsə'əbian frot, šižin las lao tgüiz. Na' beṇə' ca' ža' syodan' beṇə' zjənaquə to to nasyon chəsə'əčhine' xlague'i ca' par ničh nite'e

güen. ³ Cuat gatə' de'e gue'i Diozən' lao' syodan'. Diozən' len Xi'ine' Jesocristən' ben' gwxaquə'əlebe ca xilə' dao' ca' gwso'ot beṇə' Izrael ca' par gwnitlao xtolə'əga'aque'ena' zjəchi'e syodan' chesə'anabi'e, na' yoguə' beṇə' ca' ʒa' syodan' chso'onlilaʒe'e Diozən' na' nitə'ətezə nite'e chso'elaogüe'ene'. ⁴ Nitə'ətezə nite'e gan' chesə'əle'ine' cho' alao Diozən', na' nyoj le'ena' lao xgaga'aque'ena'. ⁵ Cuat gaquə ʒchoł lao' syodan'. De'e na'ana' bito yaʒje be'eni' che lampara, nique yaʒje be'eni' che bgüiʒən', chedə' yelə' chey che'eni' che Xancho Diozən' chse'eni' in gan' ʒa' beṇə' ca' chso'elao' le' na' chesə'anabi'e len le' zejlicane.

Bazon əʒin ʒa yida Cristən' de'e yoblə

⁶ Nach anglən' gwne' nada': —Yoguə' de'en bagwna Diozən' zjənaquən de'e li na' gaquə can' ne'ena'. Xancho Dioz nan' chbeje' beṇə' par chso'e xtiʒe'ena' na' le'ena' bsele'e nada' par chzejni'ida' beṇə' ca' chso'elao' le' de'e ca' baza' gaquə. ⁷ Jeso'osən' ne' de que bazon əʒin ʒa yide' de'e yoblə, na' mbalaz nitə' beṇə' ca' yoso'ozenag che de'e ca' babzojo' le'e librən' noxo'onə', ca naquə de'e ca' ze'e gaquə.

⁸ Nada' Juan bzoja' de'en benda' na' ble'ida', na' catə' benda' na' ble'iga'acda'an bzo xiba' xni'a anglən' par güe'elaogua'ane', ben' ben par niç ble'ida'ogüe'eda' yoguə' de'e ca'. ⁹ Pero anglən' bito be'e latjə, na' gwne': —Bito gono' ca'. Be'elao' Diozən'. Nada' naca' to beṇə' güen xšine' can' naco' le' na' ljuəzjo' ca' beṇə' ca' leccə bagwlej Diozən' par chso'e xtiʒe'ena', na' ca'aczən' yoguə' beṇə' ca' yoso'ozenag che de'e ca' babzojo' le'e librən' noxo'onə'.

¹⁰ Na' leccə gwne' nada': —Bito gwcuəšo'o che de'e ca' ze'e za'ac can' na libr nga bzojo', chedə' bazon əʒin ʒa gaquə yoguə' de'e ca' bzojo' le'inə'.

¹¹ Bazon əʒin ʒa catə' beṇə' ca' chso'on de'e malən' yesyə'əga'anlencə de'e mal chega'aque'ena' gabilən'. Na' beṇə' ca' chso'on de'en naquə yelə' zto' yesyə'əga'anlene' yelə' zto' chega'aque'ena' gabilən'. Na' beṇə' ca' zjənaque' beṇə' güen lao Diozən' so'onche' de'e güenna' zejlicane. Bagwlej Diozən' lega'aque' par zjənaque' laʒə' ne'ena' na' zejlicane yesyə'əga'ane' laʒə' ne'ena'.

¹² Nach Jeso'osən' gwne': —Bazon əʒin ʒa yida' de'e yoblə, na' gona' castigw che to to beṇə'ch o gona' par niç gaquə de'e güen che to toga'aque' segon nac gwso'one'. ¹³ Nada' naca' ben' ben yeʒlyon' na' ben' gon par niç te chei. Bazocza' catə'an bxi'a yeʒlyon' na' ca'aczən' soa' catə'an yeyoʒ yedon.

¹⁴ Mbalaz nitə' notə'ətezə beṇə' bagosə'əṇabe nada' beca'a xtolə'əga'aque'ena'. Na' gua'a latjə so'e cho'a puert che syodan' gan' zoa'anə' na' gwneʒjua' lega'aque' frot che yag yelə' mban zejlicanen'. ¹⁵ Pero na' bito gua'a latjə so'o beṇə' ca' cui chso'onlilaʒə' nada' cho'a puert che syodan'. Bito gaquə so'o beṇə' ca' chesə'ənelen de'e xio', na' beṇə' chəsə'əbejyichj no'ol chega'aque' o be'en chega'aque' par chnitə'alene' beṇə' yoblə o beṇə' chəsə'əʒa' xtoga'aque'. Bito gaquə so'o beṇə' chso'ot beṇə', beṇə' chse'ejni'alaʒə' lgu'a lsaquə' na' notə'ətezə beṇə' chəsə'əbeine' chso'e diʒə' güenlaʒə'.

¹⁶ Nada' Jeso'os bsele'a angl chia'anə' par bzenene' le' yoguə' de'en babzojo' par beṇə' ca' zjəncodə' ljuəzje chso'elaogüe'e nada'. Nada' golja' lao dia che de'e Rei Dabin', na' naca' ben' ben Diozən' lyebe əsele'e lao dia che de'e Rei Dabin'. Na' gwxaquə'əlebəda' ca beljw xsilən'. Nezecho catə' chla' beljw xsilən' bazon še'eni', na' de'en babida' yeʒlyon' nezecho bazon gaquə yoguə' de'e güen ca' zjənyoj le'e libr nga.— Can' gwna Jeso'osən' nada'.

¹⁷ Chio'o chonlilaʒə'əcho Jesocristən' naccho ca to no'olan' si'e, na' chio'o txen len Spirit che Diozən' chnablaʒə'əcho yob yide' de'e yoblə. Na' yoguə' no yene catə' yoso'olabe' libr nga, leccə yesə'ənablaʒə'əsgue' yob yide' de'e yoblə.

Na' notə'ətezə beṇə' se'ene'ene' so'onlilaže'e Jeso'osən' gatə' yelə' mban zejlicane čhega'aque' sin cui bi yesə'əyixjue' čhei.

¹⁸ Nach gozna Jeso'osən': —De'e ngan' əchnia' par yoguə' le'e gwlabl o yenele catə' beṇə' yoso'olabe' de'e quinga ben Diozən' mendad zjənyoj le'e libr nga. Notə'ətezle šə gwzanchle ca de'en na libr nga catə' əgwzejni'ile beṇə' čhe de'e ca' ze'e za'ac, Diozən' gone' par ničh gac čhele yoguə' de'e mal ca' de'en zjənyoj le'e libr nga. ¹⁹ Na' notə'ətezle catə' əgwzejni'ile beṇə' čhe de'e ca' ze'e za'ac šə cui yene'ele əgwzejni'ile lega'aque' yoguə' de'e ca' ben Diozən' mendad zjənyoj le'e libr nga, Diozən' yoxi'e lalen' le'e libr čhe'enə' na' bito güe'e latjə yežinle syoda čhe'enə'. Na' le'e libr čhe Dioz nan' zjənyoj la yoguə' beṇə' ca' zjənapə' yelə' mban zejlicanen'.

²⁰ Nach Jeso'osən' ben' bzejni'ine' nada' yoguə' de'e quinga ne': —De'e li yida' lgüegwə.

Na' nada' goža'ane': —Ca'ašgaczə gaquə. Yob yidəšgo' Xana' Jeso'os.

²¹ Xancho Jesocristən' sotezə soe' gaquəlenšgacze' yoguə'əle. De'e na'azən' de chzoja'. *Juan*